

Cohãcjã Yere
Yahuducuri Tju



New Testament in Piratapuyo (CO:pir:Piratapuyo)

Cohãcjã Yere Yahuducuri Tju

New Testament in Piratapuyo (CO:pir:Piratapuyo)

copyright © 2011 Wycliffe Bible Translators, Inc.

Language: Piratapuyo

Translation by: Wycliffe Bible Translators, Inc.

Piratapuyo [pir], Colombia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Piratapuyo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Nov 2022 from source files dated 29 Jan 2022
ad83cef1-6eb5-5233-a8f3-356e47bbda0d

Contents

San Mateo	1
San Marcos	75
San Lucas	120
San Juan	198
Hechos	253
Romanos	321
1 Corintios	354
2 Corintios	386
Gálatas	407
Efesios	418
Filipenses	429
Colosenses	436
1 Tesalonicenses	444
2 Tesalonicenses	450
1 Timoteo	454
2 Timoteo	463
Tito	469
Filemón	473
Hebreos	475
Santiago	501
1 San Pedro	510
2 San Pedro	519
1 San Juan	525
2 San Juan	533
3 San Juan	534
San Judas	536
Apocalipsis	539

San Mateo

*Jesucristo Cohãcjũ macũno
tiquiro acaye panopũ cjẽna ijire
(Lc 3.23-38)*

¹ Jesucristo acayere panopũ cjẽnare yahutja yũhũ. Tiquiro ñecũno mũnano panopũ cjũno Davi wame tiriquire ijie tiahye. Tiquiro ijiato pano tiquina ñecũno mũnano iji turiariquiro Abrahã wame tiriquire ijie tiahye.

² Abrahã Isaac pacũro ijiahye. Isaac Jacob pacũro ijiahye. Jacob Judã gãhũ pacũro ijiahye. ³ Fare, Zara mehna tiquina pacũro Judã ijiahye. Tiquina pacoro Tamar wame tiricoro ijiahye. Fare Esrom pacũro ijiahye. Esrom Aram pacũro ijiahye. ⁴ Aram Aminadab pacũro ijiahye. Aminadab Naasón pacũro ijiahye. Naasón Salmón pacũro ijiahye. ⁵ Salmón Booz pacũro ijiahye. Tiquiro pacoro Rahab ijiahye. Booz Obed pacũro ijiahye. Tiquiro pacoro Rut ijiahye. Obed Isai pacũro ijiahye. ⁶ Isai Davi pacũro ijiahye. Davi pehe Israe masa pũhtoro ijiahye. Tiquiro Uria wame tiriquire mũnano namonore tiquiro namo tiri bato Salomo wame tiriquire pohna tiahye.

⁷ Salomo Roboam pacũro ijiahye. Roboam Abia pacũro ijiahye. Abia Asa pacũro ijiahye. ⁸ Asa Josafat pacũro ijiahye. Josafat Joram pacũro ijiahye. Joram Uzia pacũro ijiahye. ⁹ Uzia Jotam pacũro ijiahye. Jotam Acaz pacũro ijiahye. Acaz Ezequia pacũro ijiahye. ¹⁰ Ezequia Manase pacũro ijiahye. Manase Amón pacũro ijiahye. Amón Josia pacũro ijiahye. ¹¹ Josia Jeconia gãhũ pacũro ijiahye. Tiquina ijiri pjere Israe yehpa cjẽnare Babilonia cjẽna pehe ñehe cãhye tiquina ya yehpapũ.

¹² Sa ye Babilonia yehpapũ tiquina esari bato, Jeconia Salatiere pohna tiahye. Salatiel Zorobabel pacũro ijiahye. ¹³ Zorobabel Abiud pacũro ijiahye. Abiud Eliaquim pacũro ijiahye. Eliaquim Azor pacũro ijiahye. ¹⁴ Azor Zadoc pacũro ijiahye. Zadoc Aquim pacũro ijiahye. Aquim Eliud pacũro ijiahye. ¹⁵ Eliud Eleazar pacũro ijiahye. Eleazar Matán pacũro ijiahye. Matán Jacob pacũro ijiahye. ¹⁶ Jacob José pacũro ijiahye. José María manũno ijiahye. María pehe Jesu pacoro ijiri. Jesu pehe masare yũhdũoatiquiro ijiro, Cristo tiquina ni pisuriquire ijiri.

¹⁷ Sa yeye Abrahãre mari queo mũhtagũ tee Davire mari queo bato tigũ ahriquina ijipihtiequina tiquina panamena mehna ijiye, catorce cururi waro ijiahye. Sa yeye mari pari turi Davire mari queo mũhtagũ tee Babiloniarũ Israe masare tiquina neato pano mari queo bato tigũ ijipihtiequina tiquina panamena mehna ijiye, catorce cururi waro pari turi ijiahye. Sa ye tuhasa Babiloniarũ tiquina esari bato mari queo mũhtagũ tee Cristo tiquiro masa bajuagapũ mari queo bato tigũ ijipihtiequina tiquina panamena mehna ijiye, catorce cururi waro ijiahye tja.

*Jesucristo tiquiro masa bajuarire yahuahye
(Lc 2.1-7)*

¹⁸ Sa ye ohõ saha Jesucristo masa bajuari jiri. Tiquiro pacoro María pehe José mehna omoca dũhteaticoro ijiahye. Sa yero ticoro omoca dũhteato pano Espiritu Santo tutuaye mehna coã ni-jinogãre ne bũcua cãhtaro masiahye ticoro basi. ¹⁹ Sa yero José ticorore omoca dũhteatiquiro tire masino, pote ijiyere yeriquiro ijiro ticorore cohãno taro nimahye. Masa tiquina ihũono ticorore bũoro ye

dueraro, masa tiquina tũhoato pano yahuro marieno ticorore cohãno taro nimahye. ²⁰ Tire tiquiro tũhoturi watoa Cohãcjũ yaquiro angel pehe quehẽnopũ Josere bajuaro, ohõ saha niahye:

—José, Davi manano panami iji turiagu, María mehna bue tiro marieno omoca dũhteya. Ticoro Espiritu Santo yedohoro mehna coã nijinogãre ne bucua cãhtaricoro ijire. Sa yegu bue tiro marieno omoca dũhteya ticorore. ²¹ Ticoro pohna tirota. Tiquirota ticoro macunota tiquiro ya maca cjenare pecapũ wahaboriquinare yũhdũoatiquiro ijirota. Tiquiro sa yũhdũoatiquiro ijigũ ihñagũ Jesu wame yegũta mũhũ tiquirogãre, niahye angel Josere.

²² Ahri ijiptiye sa wahahye panopũ cjãno Cohãcjũ yere yahu mũhtariquiro tiquiro ni ojoariro sahata. Tire tiquirore Cohãcjũ ojoa dutiahye. Ohõ saha ni ojoahye Cohãcjũ yere:

²³ Nuhmino, nijinogãre bocaro pohna tirota ticoro macunogãre. Sa yero Emanuel wame tirota tiquirogã, ni ojoahye Cohãcjũ yere.

“Emanuel” nino “Cohãcjũ mari mehnata ijire”, nino niaga.

²⁴ Cohãcjũ yaquiro angel Josere tiquiro ni yahuri bato José pehe wahcã, angel dutiriro sahata María mehna omoca dũhteahye.

²⁵ Tiquiro macunogãre ticoro pohna tiato pano José pehe ticoro mehna ijiera tiahye. Ticoro pehe pohna tia wahahye. Sa yero tiquiro pehe macunogãre Jesu wame yeahye.

2

Asũ mũja taro cjẽna Jesugãre ihñãne esahye

¹ Herode Judea yehpa cjẽna pũtoro tiquiro ijiri pje ti yehpapũ ijiri macapũ Belẽpũ Jesu masa bajuahye. Tiquiro sa masa bajuari bato ñahpicohare buheyequina ñahpicohare quehnoano masiñequina asũ mũja taro cjẽna ahta, Jerusalẽpũ wihiahye. ² Sa wihiye, masare to cjenare sinituahye:

—¿Judio masa pũtoro ijiatiquiro yojopũre nohopũ masa bajuagari tiquiro? Asũ mũja taropũ cjãna ijiaja. Sa yena ñahpicoha coã bajua wahã sagũ ihñana “Pũtoro masa bajuaro niaga”, ni masii usã. Sa tia bajuagũ ihñana, usã ihcãno mehna tiquirore ño peona ahtau ohõpũ, ni, yahuahye buheyequina masare.

³ Sa ye apequina Herodere tire yahuahye. Tiquina sa yahugũ tũhoro Herode pehe bajua witi tũhotuahye. Sa yeye ijipihitiyequina Jerusalẽ cjẽna gũhũ tiquiro yero sahata bajua witi tũhotuahye tiquina gũhũ. ⁴ Sa yero Herode pehe ijipihitiyequina pahia pũtoare, mari judio masare buheyequina gũhare tiquiro piji cahmecoa peho, tiquinare sinituahye tiquiro:

—¿Nohopũ masa bajuaboagari Cristo pehe, masa tũhotugũ? ni sinituahye tiquiro.

⁵ Ohõ saha ni yahuahye tiquirore:

—Belẽpũ, Judea yehpapũ ijiri macapũ Cristo masa bajuarota. Ohõ saha ni ojoahye Cohãcjũ yere yahu mũhtariquiro:

⁶ Belẽpũ yeequinare Israe masare dutiatiquiro, tiquinare cohteatiquiro ahtarota. Sa yero apeye macari Judea yehpapũ ijiye macari yũhdũoro ijire Belẽ pehe, ni ojoahye Cohãcjũ yere, ni yahuahye tiquina Herodere.

⁷ Tiquina sa ni yahuri bato Herode masa tũhoeropũ asũ

maja taropu ahtariquinare pijioahye. Tiquiro cahapu tiquina esagu ihñano, tiquinare sinituahye. Tiquiro sa sinitugū tūhoye, tiquina ñahpicohare ihñari decore yahuahye tiquina. ⁸ Tiquina sa yahuri bato Herode pehe tiquinare Belēpu ohoro, ohō saha niahye tiquinare:

—Tiquirogāre quehnoano macaña. Tiquirogāre bocana yūhure tojoana yahu tojoaya. Yūhu gāhu tiquirogāre ño peou wahau tūu niaja, niahye tiquinare Herode.

⁹ Tiquiro sa nidi bato, tiquina wahahye. Tiquina sa wahagū asū maja taropu tiquina ihñaria ñahpicoha pehe tiquina pano umu tāducuahye. Sa yero nijinogā tiquiro ijiri bui waro tojoa wahā sahye tia ñahpicoha. ¹⁰ Sa yeye ñahpicohare ihñañe, tutuaro bucueahye tiquina. ¹¹ Nijinogā tiquiro ijiri wāhupū esa, sajāa wahahye tiquina. Sa sajā saye, nijinogāre tiquiro pacoro mehna ijiriquirogāre ihñahye tiquina. Sa ihñañe tiquina dūsepe curi mehna quehe sa, tiquirogāre ño peohye. Ño peo tuhasa tiquina acarire pōohye. Urure, bueyere, mirra wame tiye ehme sitiye gūhure ne wio, tire tiquirogāre wapa marieno ohoahye. ¹² Tire oho tuhasa carīa wahahye tiquina. Tiquina sa carīgū quehēnopū Cohācjū yahuahye tiquinare: “Herode cahapu tojoeracāhña”, ni yahuahye Cohācjū tiquinare quehēnopūre. Tiquiro sa ni yahuri bato, tiquina pehe wahcāhye. Tiquina sa wahcāri bato ape mahapu tiquina ya dihtapu tojoaa wahahye.

José gāhu Jesugāre Egiptopū ne duhti cāa wahahye

¹³ Tiquina sa wahari bato Cohācjū yaquiro angel quehēnopū Joséré bajuaro, ohō saha niahye:

—Wahcāña. Herode pehe nijinogāre wejēno taro, macano nine yojopare. Sa ye nijinogāre tiquiro pacoro gūhure Egiptopū umuñano ne duhti cāa wahaya. Topūre yūhu nidiro punota ijiya, tee yūhu yahugūpū, ni yahuahye angel Joséré.

¹⁴ Tiquiro sa nigū tūhoro, José pehe ñamita wahcā, nijinogāre, tiquiro pacoro gūhure Egiptopū ne duhti cāa wahahye. ¹⁵ Egiptopū esa, Herode catiro puno topūre ijiahye tiquina. Sa yeahye panopū cjūno Cohācjū yere yahu mahtariquiro tiquiro ni ojoariro sahata. Tire tiquirore Cohācjū ojoa dutiahye. Ohō saha ni ojoahye Cohācjū yere: “Egiptopū ijiriquirore yahu macare pijiou”, ni ojoahye Cohācjū yere.

Herode macanagāre wejē dutiahye

¹⁶ Sa ye ñahpicohare buheyequina tiquina duhti yūhdū cāgū tūhoro Herode pehe usua yūhdūa wahahye. Sa usuario, Belē cjēnare, ti maca dūhtū caha cjēna gūhure tiquina pohnene umuagāre pūa cūhma cūoyequinagāre wejē bato ti dutiahye tiquiro. Coā warore ñahpicohare buheyequina ñahpicohare tiquina ihñari decore yahuahye Herodere. Tiquina sa nigū tūhoro tiquiro wejē duariquirogāre masa bajuari decore masino, “Ohōpe cūhmari cūore” nino, pūa cūhma cūoyequinagāre wejē bato ti dutiahye. ¹⁷ Panopū cjūno Jeremia Cohācjū yere yahu mahtariquiro tiquiro ni ojoariro sahata wahahye. Ohō saha ni ojoahye tiquiro:

¹⁸ “Ramá wame tiropū bisirota. Tutuaro bujūa witiye mehna utiye bisirota. Raquel panamena numia iji turiaye numiapū Israe masa namosānumia tiquina pohnene tutuaro utieta.

Tiquina pohnene apequina wejēgū ihñañe, ne bujua witi duhusi”, ni ojoahye panopu.

¹⁹ Sa ye Herode tiquiro yariari bato Egiptopu ijiriquirore Josere Cohācjū yaquiro angel quehēnopu bajuahye. Sa bajuaro ohō saha ni-ahye Josere:

²⁰ —Nijinogāre wejē du-amediquina yariaa wahari. Sa yegu wahcāña. Tiquirogāre pacoro mehna Israe yehpapu ne tojoaa wahaya muhu, ni yahuahye angel Josere:

²¹ Tiquiro sa nidi bato José wahcā, nijinogāre pacoro mehnata Israe yehpapu ne tojoaa wahahye. ²² Sa yeperota Arquelao Herode macano pehe tiquiro pacaro comesariquiro ijigū tuhoro José pehe Judea yehpapu tojoa duaro cueahye. Sa yero pari turi tja quehēnopu tiquirore yahu nemoahye. Tiquirore pari turi Judea yehpapu iji dutierahye. Tiquiro sa ni yahuri bato, tiquina Galilea yehpapu wahaa wahahye. ²³ Ti yehpapure Nazare wame tiri macapu ijiahye tiquina. Sa yeahye tiquina Cohācjū yere yahu mahtariquina tiquina ojoariro sahata. Ohō saha ni ojoahye: “Cristo Nazare cjūnota ijire”, nieta masa”, ni ojoahye Cohācjū yere yahu mahtariquina panopu cjēna.

3

Ñu wame yeriquiro masare yahuahye

(Mr 1.1-8; Lc 3.1-9, 15-17; Jn 1.19-28)

¹ Sa ye ti pjere Ñu Cohācjū yequinare wame yeriquiro ijiahye. Judea yehpapu masa marienopu tiquiro Cohācjū yere yahu dūcahye masare. ² Ohō saha ni yahuahye tiquinare:

—Musa ñañe yerire bujua witiya. Tire duhuya. Uhmuse cjūno Cohācjū masa puhtoro tiquiro ijiato

mehnogā dūhsare, ni yahuahye tiquiro.

³ Panopu cjūno Isaia Cohācjū yere yahu mahtariquiro Ñu tiquiro buheatire ohō saha ni ojoahye:

Masa marienopu yahuducu sañuducuriquiro ohō saha ni buherota tiquiro: “Mari puhtoro ahtato pano mahare mari quehnoyuro saha quehnoana ijiyuya masa. Masa ñañe yerire bujua witiya”, ni sañuducurota, ni ojoahye Isaia Ñure.

⁴ Sa yero Ñu camello poari suhtirore sañariquiro, wahiquiro cahsero mehna tuā dihoriquiro ijiahye. Poreroare, nucu cjē umi gūhare ihyae tiahye. ⁵ Jerusalē cjēna, ijipihtiro Judea yehpapu ijieyequina, Jordā wame tiri ma cahapu ijieyequina gūhu tiquirore tuhoye ahtahye. ⁶ Wihi, tiquirore tuho, tiquina ñañe yerire bujua witi, Cohācjūre tire yahu yūhdūahye tiquina. Sa tiquina yahugū tuhoro Jordāpu Ñu tiquinare wame yeahye.

⁷ Sa yero peyequina fariseo masa, saduceo masa gūhu Ñure tiquina wame ye dutiye ahtagū ihñano tiquiro yahuahye tiquinare:

—Añaa yero saha ña yūhdūana ijire masa. Masa ñañe yerire bujua witi duerana Cohācjū masa ñañe yeri buhiri tiquiro buhiri dahreato panu duhti masiedare masa. ⁸ Sa yena potota masa ñañene bujua witiya. Quehnoañene comesaya. Sa yena quehnoañe pehere yeya masa. ⁹ Ohō saha ni tuhotueracāhña: “Panopu cjūno Abrahā mari ñecu munano ijie tiahye. Sa yena tiquiro panamena iji turiana ijina mari Cohācjū yequina ijiaja”, ni, tuhotueracāhña masa. Masare niita niaja. Abrahā panamena iji turiana ijimene masa. Masa sa ijiepegāta ti masa

sa ijiye dāhseati ijierare. Cohācjū pehe ahri utā paca mehna Abrahā panamenare dojogū ye masine. Sa yero Abrahā panamena iji turiana mūsa ijiye ihyo waro ijire utā paca ti paca ihyo waro ijiro sahata. ¹⁰ Ohō saha ijire: Masa yucūri yero saha ijire. Cohācjū pehe yucūrire quētiare comeare cūriquiuro yero saha ijire. Sa yero ñañe dūca tiye cjure quē cohā, ti nūhcori gūhure dūte surerota. Dūte sure tuhasa, pecapū ujūanota tiquiuro ti cjure, nūhcori gūhure. Sata yerota masa gūhure tiquiore cah-meēñequinare. ¹¹ Yūhū bato yūhū yūhdūoro tutuariquiuro ahtarota. Quehnoa yūhdūariquiuro ijire tiquiuro. Tiquiuro yero saha ijieraja yūhū pehe. Sa yegū tiquiore tūhotugū, “Ihyo ijigū ijiaja yūhū”, ni tūhotuaja yūhū. Yūhū pehe mūsa ñañe yerire būjūa witi duti, mū sare wame yegū aco mehna yemi. Tiquiuro pehe yūhū yūhdūoro yerota. Espiritu Santore masa mehna ijiducugū yerota tiquiuro. Sa yero peca ñañene ujūa wero sahata tiquiuro ahtariquiuro pehe mūsa ñañe yerire cose werota. ¹² Yūhū bato ahtariquiuro cahseri cohāriquiuro yero saha ijire. Cahseri cohāriquiuro tiquiuro batiro mehna ijipihtiye trigo cahserire puti were. Tiquiuro sa puti weri bato trigo pehere tiquiuro ihbori wūhūpū ihborota. Sata yerota tiquina ñañene būjūa witiyequinare yūhū bato ahtariquiuro. Tiquiuro puti weye cahseri pehere tiquiuro ujūanota. Ti peca ujūari peca ne yatisi. Sata yerota tiquiuro yūhū bato ahtariquiuro tiquina ñañene būjūa witiyequinare, ni yahuahye Ñu.

*Ñu Jesure wame yeahye
(Mr 1.9-11; Lc 3.21-22)*

¹³ Came Jesu Galileapū ijiriquiuro waha, Jordā wame tiri mapū buha

sahye Ñure wame ye dutiro. ¹⁴ Coā warore Ñu wame ye dueramahye.

—Yohou, mūhū pehe yūhū yūhdūoro tutuagū yūhū pehere mūhū wame yegū quehnoaboaga. Mūhūre wame yebogū ijieraja yūhū, ni yūhtimahye Ñu Jesure.

¹⁵ Jesu pehe yūhtiahye tiquiore:

—Yūhūre wame yeya. Ohō saha yena, Cohācjū dutiro saha sohtoa tina niaja mari, niahye Jesu.

Tiquiro sa nigū tūhoro,

—Aū, ni yūhtiahye Ñu.

¹⁶ Sa ni tuhasa, Jesure wame yeahye. Tiquiuro wame ye tuhasagū Jesu diapū ducuriquiuro maja dūcahye. Tiquiuro maja dūcagū, ūhmūanopū parī maahye. Cohācjū yaquiuro Espiritu bujua yero saha tiquiuro bui dijia tagū ihñahye. ¹⁷ Sa dijia tagū ūhmūanopū yahuducuye bisiahye:

—Ahriquiuro yūhū macū yūhū cahñiquiro ijire. Tiquiuro mehna tutuaro bucueja, niahye ūhmūanopū.

4

*Watīno ñañene ye dutimahye
Jesure*

(Mr 1.12-13; Lc 4.1-13)

¹ Sa ye Espiritu Santo pehe Jesure masa marienopū neahye, topū watīno tiquiore ñañene ye dutiatio saha.

² Topū esaro cuarenta decori waro ihyaro marieno ijiahye Jesu. Sa yero ūjūa ahbahye. ³ Ūjūa tiquiore ahbagū ihñano watīno pehe tiquiuro cahapū esaro, ohō saha niahye:

—Mūhū Cohācjū macū ijigū, ahria utāre ihyaye dojomehneña, nimahye tiquiuro Jesure.

⁴ Jesu ohō saha ni yūhtiahye:

—Yeraja. Cohācjū yere tiquina ojoari pūpū ohō saha nine: “Masare ihyaye mehna dihita catieraro cahmene. Ijipihtiye Cohācjū tiquiuro ye yahuye mehna

ijiro cahmene”, nine Cohãcjũ, ni yũhtiahye Jesu watĩnore.

⁵ Tiquiro sa ni yũhtiri bato watĩno pehe Jerusalẽpũ “Cohãcjũ ya maca” tiquina nidi macapũ Jesure neahye. Topũ esa, Cohãcjũ ya wũhũ bui Jesure ne sahye tiquiro.

⁶ Ne sa tuhasa, tiquirore ohõ saha nimahye:

—Cohãcjũ yere tiquina ojoari pũ ohõ saha nine:

“Cohãcjũ tiquiro yequina angelere mũhũre ihña ihbo dutirota. Sa yeye tiquina pehe mũhũre ihña ihboeta ‘Utãpũ pũha tu maari,’ niñe”, nine tiquiro ojoari pũ.

Tiquiro sa nidi poto ijigũ mũhũ Cohãcjũ macũ ijigũ yehpapũ uhpu dijia ihñõña yũhũre. Mũhũre tiquina yedohogũ ihñõña yũhũre, nimahye watĩno.

⁷ Jesu uhpu dijia ihño dueraro ohõ saha ni yũhtiahye:

—Cohãcjũ yere tiquina ojoari pũ ohõ saha nine: “Mũsa pũhtoro Cohãcjũ tiquiro nidire ‘¿Poto ijia-jari?’ ni masi duana Cohãcjũre ye ihño duti tuhueracãhña”, nine Cohãcjũ yere tiquina ojoari pũ, niahye Jesu.

⁸ Tiquiro sa ni yũhtiri bato uhmũa yũhdũdũ cũpũpũ Jesure ne mũjahye watĩno tja. Tũ buipũ ne mũja sa pje, ijipihtiye macarine ihñodoque dijioahye Jesure. Tiquina cũoye gãhũre ihñõahye. ⁹ Sa ihñono Jesure ohõ saha nimahye:

—Yũhũre dũsepe curi mehna quehe sa, ño peoya mũhũ. Mũhũ sa yegũ ijipihtiye ahri macarine mũhũre ohoutja, ni yahumahye watĩno.

¹⁰ Tiquiro sa nigũ Jesu ohõ saha ni yũhtiahye:

—Satana, wahaya mũhũ. Ohõ saha nine Cohãcjũ yere tiquina ojoari pũ: “Mũhũ pũhtoro Cohãcjũ dihitare ño peoya. Tiquiro ye dutiye dihitare yeya”, nine Cohãcjũ

yere tiquina ojoari pũ, niahye Jesu watĩnore.

¹¹ Tiquiro sa nigũ tũhoro watĩno wahaa wahahye. Tiquiro wahari bato angele pehe wihi, Jesure yedohoye ihyayere ohoahye angele.

Galilea yehpapũ Jesu buhe dũcahye

(Mr 1.14-15; Lc 4.14-15)

¹² Sa ye Ñure peresupũ tiquina yegũ tũhoro, wahaa wahahye Jesu. Waha, Galilea yehpapũ esahye.

¹³ Topũ ijiri macapũ Nazarepũ waha, yũhdũ cã, Capernau wame tiri macapũ esahye. Galilea

wame tiri ditara dũhtũ cahapũ ijiri Capernau. Ti maca Zebulón yehpa cahapũ, Neftalí yehpa cahapũ ijiri Capernau. Topũ esa, ijiahye Jesu.

¹⁴ Sata yeahye Jesu panopũ cãno Cohãcjũ yere yahu mũhtariquiro Isaia tiquiro ni ojoariro sahata. Ohõ saha ni ojoahye:

¹⁵ Zebulón yehpa cahapũ, Neftalí yehpa cahapũ, ditarapũ wahari mahapũ, Jordã wame tiri ma ape sie pahrẽpũ Galilea yehpa ijire. Ti yehpa judio masa ijieyequina ya yehpa ijire. ¹⁶ To cãena

Cohãcjũ yere quehnoano masiedare. Sa masiedapeta quehnoariquirore ihñañepũ masieta. Tiquina pehe Cohãcjũre ne masiedare. Sa yeye pecapũ wahaboriquina ijimahye. Sa yero ihcãquiro tiquinare Cohãcjũ yere masigũ yerota, ni ojoahye Isaia.

¹⁷ Topũ ijiro, Cohãcjũ yere yahu dũcahye Jesu:

—Mũsa ñañe yerire bujũa witiya. Sa yena quehnoañene comesaya. Uhmũse cãno Cohãcjũ ijipihtiyequina pũhtoro tiquiro ijiaito mehenogã dũhsare, ni yahu dũcahye tiquiro.

Pittiaro wahi wejẽñequinare tiquiro mehna cjẽna ijatiquinare pijahye Jesu

(Mr 1.16-20; Lc 5.1-11)

¹⁸ Sa ye Galilea wame tiri ditara dũhtũ cahapũ esaro, Simore, tiquiro bahũro Andre mehna boca sahye Jesu. Simo tiquina Pedro ni pisuriquiro ijahye. Tiquina pehe wahi wejẽñequina ijie, tiquina wẽñecjũre doque ñoñe niahye ditarapũ.

¹⁹ —Yũhũ mehna cjãna ijianaja ahtaya mũsa. Yũhũ mehna mũsa ahtagũ mũsa wahire ñehe cahme-coana mũsa ijiro saha, Cohãcjũ yequina ijatiquinare masare piji cahmecoana ijigũ yeitja mũsare. Yũhũ mehna mũsa ahtagũ sa yeana-jare cõtja mũsare, niahye tiquiro tiquinare.

²⁰ Tiquiro sa nigũ tũhoyeta tiquina wẽñecjũre cũ cã, tiquiro mehna wahahye.

²¹ Sa ye Jesu tiquina mehna yũhdũ cã, Santiagore tiquiro bahũro Ñu gãhũre boca sahye tja. Tiquina Zebedeo pohne ijiri. Tiquina yaria yucũsapũ tiquina pacũro mehna tiquina wẽñecjũre quehnoñe niahye. Tiquina pũarore tiquiro pijioahye. ²² Tiquiro sa pijiogũ tũhoye, tiquina pehe duita tiquina pacũrore, yucũsa gãhũre cũ, Jesu mehna wahahye.

Peyequina masare buheahye Jesu

(Lc 6.17-19)

²³ Sa ye ijipihtiropũ Galilea yehpare Jesu buhe tinidi. Judio masa mari buheye wahũsepũ quehnoañe buheyere, ãhmũse cjãno tiquiro pũhoro ijie tiyere buheri. Tiquinare buhe, dohatiye-quinare quehnoa wahagũ yero, ijipihtiye dohatiyere yũhdũori tiquiro. ²⁴ Tiquiro sa yegũ tũhoye Siria yehpa cjẽna ijipihtiropũ ti yehpapũ ijieyequina tiquirore masi

dũcari. Sa masiñe, sijoro saha ijie dohatiye cũoyequinare, watĩare cũoyequinare, ñama yariaye cũoyequinare, tini masieñequina gãhũre ne sari. Sa yero ijipihtiyequina tiquinare yũhdũgũ yeri Jesu. ²⁵ Tiquiro sa yegũ ihñañe, Galilea yehpa cjẽna, Decapoli cjẽna, Jerusalẽ cjẽna, Judea yehpa cjẽna, Jordã ape sie pahrẽ cjẽna peyequina masa tiquiro mehna wahari.

5

Cũnũpũ mũja, topũ buheahye Jesu masare

(Lc 6.20-23)

¹ Sa ye masa peyequina tiquiro cahapũ tiquina esagũ ihñano Jesu cũnũpũ mũjaa wahahye. Mũja sa, topũ dujiahye. Topũ dujigũ tiquiro buheyequina tiquiro cahapũ esahye. ² Tiquina esagũ ihñano ohõ saha ni buhe dũcahye.

³ —Tiquina ñañene bũjũa witiye-quina Cohãcjũre cahmeñequina bucueyequina ijire. Æhmũse cjãno tiquiro pũhoro ijiropũre wahaeta tiquina. Æhmũse cjẽ tiquina ye ijire.

⁴ 'Utiyequina gãhũ bucueye-quina ijire. Tiquinare bucuegũ yerota mari Pacũ.

⁵ 'Apequinare yũhdũdũca dueye-quina "Ihyo ijina ijiaja usã", ni tũhotuyequina bucueyequina ijire. Cohãcjũ "Ohoutja", tiquinare tiquiro nidi yehpare cũoeta tiquina.

⁶ 'Cohãcjũ dutiro saha ye du-ayequina, quehnoañene ye du-ayequina bucueyequina ijire. Cohãcjũ tiquiro yedohogũ tiquina quehnoañene yeducueta.

⁷ 'Apequinare paja ihñañequina bucueyequina ijire. Tiquina sa paja ihñagũ Cohãcjũ tiquina gãhũre paja ihñanota.

⁸ 'Tiquina ñañene cosenohriquina bucueyequina ijire. Cohãcjũre ihñañeta tiquina.

⁹ 'Apequinare cahmequedagū yeyequina bucueyequina ijire. Tiquinare "Yūhū pohna ijire", ninota Cohācjū.

¹⁰ 'Cohācjū dutiyere tiquina yeri buhiri apequina ñano yere Cohācjū tiquiro dutiriquinare. Tiquina sa ñano yegū bucueyequina ijire tiquina pehe. Ūhmūse cjāno tiquiro pūhtoro ijiropū tiquiro yere cūoeta tiquina.

¹¹ 'Yeere mūsa yeri buhiri apequina mū sare tiquina tuhtiepegūta bucuena ijire mūsa. Mū sare tiquina ñano yepegūta bucuena ijire mūsa. Yeequina mūsa ijiri buhiri mū sare ijipihtiye ñaṅe tiquina quitī dojomehnepegūta tiquina ni mehoepēgūta bucuena ijire mūsa. ¹² Cohācjū yere yahu mūhtariquinare mūsa pano ijiriquinare tiquinapūreta ñano ye mūhtahye. Tiquinare yeriro sahata mūsa gūhūre apequina sa yegū bucueya. Quehnoano jeripohna tiya. Sa yero ūhmūsepu mūsa esagū pajiro quehnoano yerota mū sare Cohācjū, ni yahuahye Jesu.

Moa yero saha, buhrioro yero saha ijire Jesu yequina

(Mr 9.50; Lc 14.34-35)

¹³ Sa ye Jesu buhe nemoahye:

—Moa mehna wahiQUIRO dihire ti ñano wahaeragū yero sahata mūsa pehe yeequina pehe ijipihtiyequina apequinare ñaṅene tiquina ye dueragū yere. Sa ijieperota moa pehe ti ñaṅe wahagū pari turi quehnoaṅe ye masiedare. Ti moa ne quehnoaedare. Ti sa wahagū ti moare cohāno cahmene. Ti moare cohāri bato ti bui masa cahta cūre. Ne dūhseati ijierare ti moa tiquiro cohāṅe. (Ti dūhseati ijieraro saha ijieracāhña mūsa. Cohācjū ye pehere cohāedacāhña,) ni yahuahye Jesu.

¹⁴ Sa ye tiquiro buhe nemoahye:

—Buhrioro marine ihñagū yero sahata mūsa pehe yeequina pehe

ahri yehpa cjēnare Cohācjūre masigū yere. Cūnū bui ijiri macare nūono basioerare. ¹⁵ Sa ye sihāriare masa sihāṅe, sutu docapū moha dapo masiedare. Tiare sihāriare ūhmūanopū duhu peore ti wūhū cjēna ijipihtiyequina tiquina ihñatiare. ¹⁶ Ohō sahata mūsa gūhū buhrioro yero saha ijina, quehnoaṅene yeya. Mūsa sa yegū ihñāṅe masa mari Pacū ūhmūse cjānore ño peo, "Tutuagū, quehnoagū ijire", nieta, ni yahuahye Jesu.

Cohācjū tiquiro dutiyere tiquiro ojoari gūhūre yahuahye Jesu

¹⁷ Sa ni tuhasa, tiquinare yahu nemoahye:

—Ahrire mūsa masigū cahmeaja yūhū. Cohācjū dutiyere Moisere tiquiro cūrire, tiquiro yere yahu mūhtaṅequina tiquina ojoari gūhūre cohāgū tagū niedū. Ti dutiyere mū sare quehnoano yahu potou tūū ni. Ti dutiyere poto ijigū ihñou ahtau. Ti dutiye nidiro sahata ye sohtori tūū ni. ¹⁸ Ijirota mū sare niaja. Pihtiri deco pano ijinigū Cohācjū dutiye Moisere tiquiro cūrire ne mehenogā cohāsi mari. Ahri yehpa, ūhmūse gūhū ti ijiro puno tiquiro dutiye gūhū ijirota. ¹⁹ Sa yeye ti dutiyere ihquēquina yūhdūdcaye, apequinare sata ye dutiye, ūhmūse cjāno tiquiro pūhtoro ijiropū cahacjēna yero saha ijietā. Ihcā dutirogā ijiepegūta tiquina yūhdūdcaye, cahacjēna yero saha ijietā tiquina. Apequina ti dutiyere quehnoano yeye, apequinare tiquina yero saha ye dutiye, ūhmūse cjāno tiquiro pūhtoro ijiropū pūhtoa yero saha ijietā tiquina pehe. ²⁰ Mū sare nieta niaja yūhū. Judio masare buheyequina, fariseo masa gūhū Cohācjū cahmeṅene queoro yerare. Tiquina yūhdūoro Cohācjū cahmeṅene yeya mūsa. Mūsa sa

yerana, tiqiro p̄h̄toro ijirop̄are ne esasi m̄sa, ni yahuahye Jesu.

Usuayere yahuahye Jesu
(Lc 12.57-59)

²¹ Sa ni tuhasa, tiquinare yahu nemoahye:

—Panop̄a cjēna ohō saha ni tiquina yahurire t̄h̄ori jimedi m̄sa: “Masare wejēdacāhña. Masare wejēdiqirore tiquina buhiri dahreatiqiro ijire”, tiquina nidire t̄h̄ori jimedi m̄sa. ²² Ahri tiquina yahuri ȳhd̄uo cjūno m̄sare ahri pehere yahu nemoutja. Tiquiro acaȳro mehna usuariqiro pehe tiquina buhiri dahreatiqiro ijire mas̄nore wejēdiqiro yero saha. Tiquiro acaȳrore tuhtiriquiro “Ne t̄ho masiñe marieḡa ijire m̄h̄u”, ni-diqiro buhiri dahre dutiyequina cahap̄a tiquina neatiquiro ijire. “T̄ho masieḡa ijire m̄h̄u”, tiqiro acaȳrore sa nidiquirore pecap̄a wahaboaga tiqiro.

²³ M̄sa acaȳro m̄sare tiqiro ihña tuhtiḡa ohō saha yeya. Cohācj̄u w̄h̄up̄a Cohācj̄ure m̄sa ño peoato pano, tiqirore wahiquirore m̄sa ohoato pano ohō saha yeya. ²⁴ Cohācj̄ure m̄sa ohoatire duhu cū, m̄sa acaȳro cahap̄a waha, “Pari turi cahmequedacāhña. To punota duhuuhna tire”, niña tiqirore. M̄sa sa nidi bato Cohācj̄ure oho, ño peona wahaya tiqiro ya w̄h̄up̄a.

²⁵ Apeqiro m̄h̄ure yahusā duaro, p̄h̄toro masare beseriquiro cahap̄a m̄h̄ure tiqiro nea duaḡa, tiqiro mehna usuaro marieno ijiya. Beseriquiro cahap̄a tiqiro neato pano tiqiro mehna quehnoano ijiya. M̄h̄u sa yeḡa ihñano tiqiro m̄h̄ure yahusāedaboaga. M̄h̄u sa quehnoano ijieraḡa ihñano top̄are m̄sa esaḡa tiqiro pehe m̄h̄are masare beseriquirore yahusānota. Tiquiro sa yahusāḡa,

beseriquiro pehe peresu yeye-quinap̄are m̄h̄are ohorota. Sa yeye tiquina m̄h̄are peresu yeeta. ²⁶ Ijirota niaja m̄h̄are. Top̄a ijiniita m̄h̄u. Tee tiquina wapa ye dutirire m̄h̄u wapa ye pehoḡup̄a wijiaḡata m̄h̄u, ni yahuahye Jesu.

Apeqiro namono mehna ñano yeyere yahuahye Jesu

²⁷ Ohō saha ni yahu nemoahye Jesu:

—Panop̄a cjēnare ohō saha tiquina ni yahurire t̄h̄ori jimedi m̄sa: “Apeqiro namono mehna ñano yeracāhña”, tiquina nidire t̄h̄ori jimedi m̄sa. ²⁸ Ahri tiquina yahuri ȳhd̄uo cjūno m̄sare ahri pehere yahu nemoutja. Numinore ñehedaperota, ihcāqiro ticorore ñano tutuaro cahmeno, ñano wacū t̄hoturo, ñano ye tuhasari ticoro mehna.

²⁹ Sa yeḡa m̄h̄u capea poto pehep̄a ijiria mehna ñano yeḡa, tiare ore we ne m̄h̄u cohāboriro sahata ti ñañene duhuya. Tire duhueraḡa pecap̄a wahaḡata. M̄h̄u capeare m̄h̄u cohāḡa tia capea dihita butire. M̄h̄u pehere pecap̄a m̄h̄u wahaḡa ña ȳhd̄uare. Sa yeḡa ti ñañene duhuya. ³⁰ Sa yeḡa m̄h̄u omoca poto pehe ijiri omoca mehna ñano yeḡa, ti omocare m̄h̄u d̄ate cohāboriro sahata ti ñañene duhuya. Tire duhueraḡa pecap̄a wahaḡata. M̄h̄u omocare m̄h̄u cohāḡa ti omoca dihita butire. M̄h̄u pehe pecap̄a m̄h̄u wahaḡa ña ȳhd̄uare. Sa yeḡa ti ñañene duhuya, ni yahuahye Jesu.

Tiquiro namonore cohāñene, wame peoye ḡah̄are yahuahye Jesu
(Mt 19.9; Mr 10.11-12; Lc 16.18)

³¹ Ohō saha ni yahu nemoahye Jesu:

—Panop̄a ahri ḡah̄are ni-ahye: “Tiquiro namonore cohā duariqiro tiqiro cohātire yahuri p̄u mehna ticorore cohā masine”, nimahye panop̄a. ³² Ahri tiquina

yahuri yahdno cjūno māsare ahri pehere yahu nemoutja. Tiquiro namono apequiro mehna ñano yerico tico ijerapegāta tico manano ticorore cohāboaga. Ticoro sa cohānohricoro apequiro mehna omoca duhtero, ñano yero niaga tico apequiro mehna ijiro. Ticoro manano ticorore tiquiro cohāri bato ticorore apequiro mehna ñano yegū yere. Sa yero tiquiro bato namo tiriquiro gūhu tico mehna ñano yero nine, ni yahuahye Jesu.

³³ Ohō saha ni yahu nemoahye Jesu:

—Panopu cjēna ohō saha tiquina ni yahurire tūhori jimedi mūsa: “Mūsa nidiro sahata yeya. ‘Cohācjū mehna poto sa yeitja’ mūsa nidiro sahata yeya”, tiquina ni yahurire tūhori jimedi mūsa. ³⁴ Ahri tiquina yahuri yahdno cjūno māsare ahri pehere yahu nemoutja. “Uhmuse mehna poto nii niaja”, ni uhmuse mehna wame peoeracāhña. Uhmuse pehe Cohācjū mari pūhtoro tiquiro ijiro ijire. Ihyo ijiro ijierare. Sa ijigū ihñana sa niedacāhña. ³⁵ Ahri yehpa mehna ne wame peoeracāhña. Ahri yehpa Cohācjū ya yehpa ijire. Sa ijigū ihñana sa niedacāhña. Jerusalē mehna ne wame peoeracāhña. Tutuariquiro mari pūhtoro ya maca ijire Jerusalē. Ihyo ijiri maca ijierare. Sa ijigū ihñana sa niedacāhña ti wamene. ³⁶ “Yūhu dapu mehna poto nii niaja”, ni wame peoeracāhña. Mūsa poari yehseye poari wahagū ye masiedare mūsa. Ti poarire ñiñe wahagū gūhare ye masiedare mūsa. Sa ye masiena “Yūhu dapu mehna poto nii niaja”, ni wame peoeracāhña. ³⁷ “Yenatja”, nina wame peoro marieno ohō saha dihita tire niducuya. “Yesi”, nina gūhu wame peoro marieno niducuya. Mūsa wame peo nina,

watīno ñariquiro dutiro saha yena niaga, ni yahuahye Jesu.

Tiquina cahme ihña tuhtiyere yahuahye Jesu

(Lc 6.29-30)

³⁸ Ohō saha ni yahu nemoahye Jesu:

—Panopu ohō saha tiquina ni yahurire tūhori jimedi mūsa. “Mūhare apequiro mūhu capeare tiquiro quē tihāriro sahata mūhu gūhu tiquirore quē tihā cahmeña. Mūhu upiriare tiquiro quē nuhariro saha mūhu gūhu quē nuha cahmeña”, tiquina nidire tūhori ijimedi mūsa. ³⁹ Tiquina yahuri yahdno cjūno ahri pehere yahu nemoutja māsare. Mūhare ñano yeriquirore sa ihña cāhña. Ihcā pehe mūhu wahsupure tiquiro quēgū, ape sie gūhare quē dutiya tiquirore. ⁴⁰ Apequiro buhiri dahre dutiriquirore mūhare tiquiro yahusāgū, dutiriquiro pehe mūhu camisare mūhare yahusāriquirore oho dutiboaga. Tiquiro oho dutigū, tiquirore ohoya. Mūhu bui cjā suhtiro gūhare oho nemoña tiquirore. ⁴¹ Apequiro surara apee borore ihcā kilómetro mūhare tiquiro nea basa dutigū, ape kilómetrore waha nemoña tja. ⁴² Mūhare sinidiquirore ohoya. Sa yegu apequiro mūhare waso dutigū wasoya tiquirore, ni yahuahye Jesu.

Māsare ihña tuhtiequinare cahñña

(Lc 6.27-28, 32-36)

⁴³ Ohō saha ni yahu nemoahye Jesu:

—Masa ohō saha nine: “Mūsa mehna cjēnare cahñña. Sa yena māsare ihña tuhtiequinare ihña tuhti cahmeña tja”, tiquina nidire tūhori jimedi mūsa. ⁴⁴ Tiquina yahuri yahdno cjūno ahri pehere yahu nemoutja māsare: Māsare ihña tuhtiequinare cahñña. Māsare ñano yeyequinare tiquina

ye ijiatire Cohãcjũre sini basaya. ⁴⁵ Mũsa sa yena mari Pacũ ùhmũse cjũno pohna ijire mũsa. Cohãcjũ pehe ihcãno saha yere masare. Ñañequina gãhũre quehnoañequina gãhũre asũ asigũ yere tiqũiro. Sa yero Cohãcjũ dũtiyere yeyequina gãhũre, yeyequina gãhũre acoro ahtagũ yere tiqũiro. Masare ihcãno saha tiqũiro yeriro sahata mũsa gãhũ yeya. ⁴⁶ Mũsare cahĩñequina dihitare mũsa cahĩgũ ti ne dũhseati ijierare. Wapa ne cohteyequina gãhũ sata yere. Sa yena ijipihtiyequinare cahĩña. ⁴⁷ Mũsa acaye dihitare mũsa quehnoano piti cagũ ti ne dũhseati ijierare. Cohãcjũre masieñequina gãhũ sata yere. Sa yena ijipihtiyequinare quehnoano piti caya. ⁴⁸ Ñañe mariena ijiya mũsa. Mari Pacũ ùhmũse cjũno tiqũiro ñañe marieniquiro tiqũiro ijiro sahata mũsa gãhũ ñañe mariena ijiya, ni yahuahye Jesu.

6

Quehnoañe yeyere yahuahye Jesu

¹ Pari turi tiqũiro yahu nemoahye:

—Cohãcjũ ye ijiatire quehnoañene yena, tire masare “Ohõ saha ijigũ ijijaja yũhũ”, ni ye ihñõedacãhña apeqũinare. Mũsa sa ni ye ihñõri buhiri quehnoañene mũsa yeri dũhseati ijierare. Sa yero Cohãcjũ ùhmũse cjũno quehnoañene mũsa yeri wapa mũsare ohosi. ² Sa yena pejecũoyequinare yedohona, tire masare ye ihñõedacãhña. Masa tiqũina ihñenopũ yedohoya tiqũinare. Sata ihquẽequina ye ihñõre mahapũ ijijeyequinare, judio masa mari buheye wũhũsepũ ijijeyequina gãhũre. Tiquina mari ihñõno dihita quehnoano iji mehoñequina ijire. Sa ye ihñõre tiqũina, “Quehnoañequina ijire ahriquina”, masare ni ihña dũtiye. Tiquina sa ni ihñagũ sa ye

ihñõñequina pehe bucue tuhasari. “Quehnoañequina ijire”, ni masa tiqũina ñõ peogũ bucue tuhasari tiqũina. Sa yero Cohãcjũ pehe ne bucue nemogũ yesi tiqũinare. ³ Sa yena pejecũoyequinare yedohona, masa tiqũina ihñenopũ yedohoya tiqũinare. Mũsa mehna cjẽna mehna ijina tiqũina ihñeno pejecũoyequinare yedohoya. ⁴ Masa tiqũina ihñenopũ mũsa yedohoepegũta Cohãcjũ pehe ihñare. Sa ihñano mũsa sa yeri wapa ohorota mũsare, ni yahuahye Jesu.

Cohãcjũre siniñene yahuahye Jesu

(Lc 11.2-4)

⁵ Pari turi tiqũiro yahu nemoahye:

—Cohãcjũre sinina, masa ihñõno dihita quehnoano iji mehoñequina yero saha yeracãhña mũsa. Judio masa mari buheye wũhũsepũ ducu, mahapũ gãhũre ducu, Cohãcjũre sini ihñõre tiqũina masare. Sa sini ihñõñe poto masa tiqũina ñõ peoye mehna tiqũina bucue tuhasari. ⁶ Cohãcjũre sinigũ tagũ, mũhũ ya tucũpũ biha sajàña. Biha sajà, mari Pacũ ihñamehneniquirore siniña. Mũsa sa yegũ masa marienopũ mũsa siniepegũta mari Pacũ mũsare tũhorota. Sa tũhoro mũsare quehnoano yerota tiqũiro.

⁷ Sa yena Cohãcjũre sinina, tũhoturo marieno mũsa sinidireta pari turi sini majare tojoeracãhña. Ohõ sahata yere Cohãcjũre masieñequina. “Peye tahari ihcãno saha usã sinigũ Cohãcjũ usãre tũhorota”, ni tũhotumene tiqũina. ⁸ Tiquina yero saha yeracãhña mũsa. Mũsa siniato pano mari Pacũ mũsa cahmeñene masi tuhasare. ⁹ Sa yena ohõ saha ni siniña mũsa Cohãcjũre:

Usã Pacũ, ùhmũse cjũ mũhũ quehnoagũ sa ijiducure.

10 Yojoꝛꝛe ijipihtiyequina ꝑꝛhto ijiiya. Ʋhmꝛꝛeꝑꝛ mꝛhꝛ du-tiro sahata tiquina yeriro sa-hata ahri yehpa cꝛēna gꝛhꝛ yeahro.

11 Sa yegꝛ decoripe ꝛsꝛ ihyatire ohoducuya ꝛsꝛe.

12 Apequina ꝛsꝛe tiquina ñano yerire ꝛsꝛ boaja. Sa yegꝛ mꝛhꝛ gꝛhꝛ ꝛsꝛ ñano yerire boya.

13 Sa yegꝛ ꝛsꝛ ñañene ye duagꝛ ꝛsꝛ tutuaro cahmegꝛ ihñagꝛ tire ꝛsꝛe ye dutiegꝛta. Sa yegꝛ ꝛsꝛe ꝛsꝛ ñañene yeragꝛ yeya.

Mꝛhꝛ ꝛsꝛ ꝑꝛhto tutuagꝛ sa ijiducugꝛta. Ijipihtiyequina mꝛhꝛe sa ño ꝑeoducuahro, ni siniña Cohācꝛꝛe.

14 'Apequina mꝛsare tiquina ñano yerire mꝛsa bogꝛ ihñano, mari Pacꝛ Ʋhmꝛꝛe cꝛꝛno gꝛhꝛ mꝛsa ñano yerire borota. 15 Sa boeperota apequina mꝛsare tiquina ñano yerire mꝛsa boeragꝛ mari Pacꝛ gꝛhꝛ mꝛsa ñano yerire bosí, ni yahuahye Jesu.

Sijiyere buheahye Jesu

16 Sa yero tiquiro tiquinare yahu nemoahye:

—Cohācꝛꝛe ño peona tana sijina bujꝛa witiyequina yero saha ye ihñoedacāhñā. Sata yere masa ihñono dihita quehnoano iji mehoñequina. Tiquina wꝛhdoa paca bujꝛa witiyequina yero saha ijire. Tiquina sa ijiyequina ijigꝛ tiquina sijigꝛ ihña masine masa. Ijirota mꝛsare nii niaja. Masa tiquinare ño peogꝛ cahmene tiquina. Sa yeye tiquinare tiquina ño peogꝛ ihñañe bucue tuhasari. Cohācꝛꝛ ꝑehe tiquirore tiquina ño ꝑeori wapa tiquinare bucuegꝛ yesí. Sa yena tiquina yero saha ye ihñoedacāhñā mꝛsa. 17 Mꝛsa sijina, mꝛsa ꝑoarire aco mehna wa ꝑeo wꝛhꝛo ꝑeoya. Sa yena mꝛsa wꝛhdoa ꝑacare coseya.

18 Mꝛsa sa yegꝛ mꝛsa sijigꝛ ihña masisi masa. Cohācꝛꝛ dihita mꝛsa sijiyere ihña masinota. Mꝛsa sehsharo mꝛsa ijigꝛ tiquiro mꝛsa mehna sa ijiducure. Sa ihñano tiquiro mꝛsare quehnoano yerota tiquirore mꝛsa ño ꝑeori wapa, ni yahuahye Jesu.

*Ʋhmꝛꝛe cꝛꝛe cꝛꝛo dutiahye Jesu
(Lc 12.33-34)*

19 Sa yero tiquiro yahu nemoahye:

—Ahri yehpa cꝛꝛe ne cahme-coedacāhñā. Ohō cꝛꝛ ahbaa waha-boaga. Ti ahbaeragꝛ yaqueriquiro neboaga tire. Tiquiro yaqueragꝛ mecasia tꝛaboaga. Sa yero ahri yehpa cꝛꝛ butiaro cuarīne. Sa yena ahri yehpa cꝛꝛe tutuaro cahmedacāhñā. 20 Ʋhmꝛꝛe cꝛꝛ ꝑehere cahmeña mꝛsa. Ʋhmꝛꝛe cꝛꝛe mecasia tua masiedare. Topꝛ mꝛsa cꝛꝛoye ne ahbaerare. Topꝛe yaqueriquiro ne masiedare. Sa yena Ʋhmꝛꝛe cꝛꝛe cahmeña mꝛsa. 21 Topꝛ mꝛsa cꝛꝛoye ijigꝛ, Ʋhmꝛꝛe cꝛꝛe Cohācꝛꝛ yere tutuaro wacꝛꝛe mꝛsa, ni yahuahye Jesu.

Masa tiquina tꝛhoturo sahata yere

(Lc 11.34-36)

22 Sa yero ohō saha ni yahu nemoahye tiquinare:

—Sihāria quehnoano buhriogꝛ mari quehnoano ihña masino sahata quehnoañene tꝛhotuye mehna quehnoano ye masinata mꝛsa. Mꝛsa tꝛhoturo sahata yere mꝛsa. Quehnoañene tꝛhotuna quehnoano yere mꝛsa. 23 Quehnoañene tꝛhotuerana ñañene yere mꝛsa. Mꝛsa ñañe dihitare mꝛsa tꝛhotuducugꝛ ti ñañe ꝑehe ña yꝛhꝛꝛe ijire, ni yahuahye Jesu.

*Niñerure cahñequina, Cohācꝛꝛ ꝑe-
here cahiedare
(Lc 16.13)*

24 Sa yero tiquiro yahu nemoahye tiquinare:

—Ihcãquiro Cohãcjũ pehere wacũno, tutua yũdũaro niñeru pehere wacũedare. Niñeru pehere tutua yũdũaro wacũno Cohãcjũ pehere wacũedare. Niñeru dihitare cahmediquiro ijiro Cohãcjũre bucuegũ yerare. Cohãcjũ gũhure, niñeru gũhure puarore cahme yũhdũdũcaro basioerare musare.

Cohãcjũ tiquiro pohnene ihña ihbore

(Lc 12.22-31)

²⁵ Sa yegu ahrire musare nii niaja: Musa ihyayere, sihniñene, suhti gũhure pajiro bujua witi tũhotueracãhña. Musare bajumehnenno ihyayere ihyatina dihitare suhti sañatina dihitare Cohãcjũ yerari musare. ²⁶ Minicjua parire Cohãcjũ tiquiro ihña ihbooyere masiña musa. Tiquina weseri marieñequina ijire. Sa yeye ihyayere tiquina ihbooye wahuse tiquinare mariedare. Mari Pacu pehe tiquinare tiquina ihyatire ohore. Minicjua yũdũoro musa pehere cahñe Cohãcjũ. Sa yero musa gũhure ihña ihborota tiquiro. ²⁷ Pajiro musa tũhotuye mehna ti musare ihcã hora cati nemogũ yerare. Sa yero musa pajiro tũhotuye dũhseati ijierare.

²⁸ Sa yena musa suhti sañatire pajiro bujua witi tũhotueracãhña. Nucũ cjẽ cohorti ti cohooyere tũhotuya. Ti cohorti ti basi suhtire yerare. Sa yerapeta ti cohorti quehnoañe suhti yero saha quehnoañe cohorti bajure. ²⁹ Salomo manano quehnoañe suhtire sañariquiro tiquiro ijiepegũta ti cohorti pehe tiquiro yũdũoro quehnoa yũdũaye cohorti waro ijire. ³⁰ Cohorire quehnoañe cohorti yere Cohãcjũ pehe. Ti cohorti pehe meheñe decorigã ijiducu ñai bora dijiaa wahare. Mehenogã iji, ape decoru pecaru ujũa wahare. Sa ijiepegũta cohortire quehnoañe cohorti ijigũ yere Cohãcjũ. Sa

yero Cohãcjũ cohortire tiquiro quehnoañe cohorti tiquiro yeriro yũdũoro musa gũhure quehnoano yerota. Suhtire ohorota. Cohãcjũre mehenogã wacũ tutuare musa. ³¹ Sa yena musa ihyatire, musa sihniatire, musa suhti sañatire pajiro bujua witi tũhotueracãhña. ³² Cohãcjũre cahmeeñequina pehe tire sa macaducuye nine. Mari Pacu uhmuse cjãno ijipihtiye musa cahmeñene masine. Tiquiro sa masigũ pajiro bujua witi tũhotueracãhña. ³³ Cohãcjũ musa puhtoro tiquiro ijiatore cahme mahtaña musa. Ijipihtiye apee boro yũdũoro tiquirore cahmeña musa. Quehnoañene tiquiro ye dutiye gũhure cahmeña. Musa sa yeri bato Cohãcjũ pehe musa cahmeñe dũhsagũ ohorota. ³⁴ Sa yena ñamiapure musa dũhse wahatore pajiro bujua witi tũhotueracãhña. Ñamiare musa ñano yũhdũgũ Cohãcjũ yedohorota musare. Miare musa ñano yũhdũato iji tuhasare. Sa yena mia cjẽ dihitare tũhotuya. Ape deco cjẽne pajiro bujua witi tũhotu nemoedacãhña. Cohãcjũ pehe musare yedohorota, ni yahuahye Jesu.

7

Apequinare “Ñañequina ijire”, niedacãhña

(Lc 6.37-38, 41-42)

¹ Sa yero tiquiro tiquinare yahu nemoahye:

—Apequinare “Ñañequina ijire”, niedacãhña musa. Musa sa niedagũ Cohãcjũ musare “Ñana ijire”, nisi. ² Apequinare “Quehnoano yerare”, musa ni ihñano sahata Cohãcjũ pehe musa gũhure sata ni ihñanota. ³ Mari queoye mehna mari buhegũ ohõ saha yena ijire musa. Musa acayuro tiquiro capearu meheni pohcarogã sajãgũ ti pohcarogãre quehnoano ihñare musa. Musa ya capea pehere pajiri

pji ijiepeguta ti pjine ne ihnedare musa. Meheni pohcarogare musa ihnana saha musa acayuro tiquiro nana yeye pehere quehnoano ihñare musa. Musa basi musa ñañene tutuaro yepenata tire masiedare musa, pajiri pjine musa ihñeno saha. ¿Duhse ijiro boro sa ijiajari musa? ⁴ Ohõ saha nibona ijire musa: “Yuhũ acayũ, ñañene yei nine mahũ. Sa yegu tire duhuya”, nibona ijire musa. Sa nibona ijiepenata pajiro ñañene yere musa. ¿Duhse musa ñañene yepenata tire masiedajari musa? ⁵ Masa tiquina ihñono dihita quehnoano iji mehona ijire musa sa yena. Pajiri pjine musa capeapu ijiri pjine musa ne muhtaboriro sahata musa ñano yeye pehere duhu muhtaña. Musa sa yeri bato musa acayuro tiquiro nana yeyere duhugũ ye masiboaga, meheni pohcarogare musa neboriro sahata.

⁶ Diayea yero saha ijieyequina, yesea yero saha ijieyequina gũhu ñañequina Cohãcjũ yere quehnoa yuhdayere tiquina ño peerare. Tiquina pehere yahueracãhña. “Tiquina bujape, ñano niari”, nina, yahueracãhña tiquinare, ni yahuahye Jesu.

Cohãcjũre mari siniñene yahuahye Jesu

(Lc 11.9-13; 6.31)

⁷ Sa yero tiquiro tiquinare yahu nemoahye:

—Cohãcjũre siniña musa. Sinina musa nenata. Musa sinidire bocanata. Tiquirore sa siniducuya musa. Musa sa yegũ tiquiro musare ohorota. ⁸ Ijipihtiyequina Cohãcjũre siniñequina neeta. Sa yeye tiquina sinidire bocaeta. Sa yero ijipihtiyequina Cohãcjũre sa siniducuyequinare tiquiro tiquinare ohorota.

⁹ ¿Musa pohna pãgãre musare tiquina sinigũ utã pehere ohobogari musa tiquinare? Ne ohosi.

¹⁰ ¿Musa pohna wahire musare

tiquina sinigũ aña pehere ohobogari musa tiquinare? Ne ohosi.

¹¹ Musa ñana ijiepenata musa pohnare quehnoañene ohoe tiri musa. Sa yero Cohãcjũ pehe musa yuhduoro quehnoañene ohore musare tiquiro pohnare tiquirore sininare. Musa pohnare musa ohoriro yuhduoro Cohãcjũ pehe tiquiro pohnene ohore.

¹² Apequina musare tiquina quehnoano yegũ cahmene musa. Tiquinare musa quehnoano yegũ cahmeno sahata quehnoano yeya tiquina gãhare. Tiquina quehnoano yerapegata musa pehe tiquinare quehnoano yeya. Sata ye dutire Cohãcjũ dutiye Moiserere tiquiro cõripũ, Cohãcjũ yere yahu muhtariquina tiquina ojoari gãhũ, ni yahuahye Jesu.

Meheni sopecahagã quitere yahuahye Jesu

(Lc 13.24)

¹³ Sa yero tiquiro yahu nemoahye tiquinare.

—Uhmsepu Cohãcjũ cahapu waha duana tiquiro yere yero cahmene musare. Sa yena tiquiro yere sa ye macaedacãno cahmene. Meheni sopecahagãpu musa sajã duagũ mijorĩne. Sata mijorĩne Cohãcjũ cahapu musa waha duagũ. Pecapu masa tiquina wahagũ mijoadare. Pajiri sopecahapu mari sajãgũ mijoadare. Ti sopecahapu masa tiquina sajãboro saha pecapu masa tiquina wahagũ mijoadare. Sa yeye peyequina masa topu wahaye nine. ¹⁴ Cohãcjũ cahapu musa waha duagũ mijorĩne. Meheñequinagã masa topu wahaeta. Topu wahayequina ijipihtiye decori Cohãcjũ mehna ijiducueta, ni yahuahye Jesu.

Yucũgu ducare masina, tu padũ gãhũre masine musa

(Lc 6.43-44)

¹⁵ Sa yero tiquiro yahu nemoahye tiquinare:

—Quehnoano yeya. “Cohãcjũ yere yahu mahtana ijiaja”, ni mehoñequinare tãhoeracãhña m̄sa. Tiquina oveja yero saha usueyequina saha bajumene. Tiquina tãhotuyep̄ ñañequina ijire tiquina. ¹⁶ Tiquina ñano yegũ ihñana, ñañequina tiquina ijigũ masinata m̄sa. Tiquina quehnoano yegũ ihñana quehnoañequina tiquina ijigũ masinata m̄sa. Pota b̄ucugũ uhse tõhorine d̄uca tierare. Potagũ higuera pacare d̄uca tierare. ¹⁷ Quehnoadũ yucugũ quehnoañene d̄uca tire. Ñadũ pehe ñañene d̄uca tire. ¹⁸ Quehnoadũ yucugũ ñañene ne d̄uca tierare. Sa yero ñadũ quehnoañene d̄uca tierare. ¹⁹ Quehnoañene d̄uca tieye c̄jũre d̄ate cohã cã, pecap̄ uñãanota. Sata yerota Cohãcjũ tiquiro cahmeñene yerariquinare. ²⁰ Sa yena “Cohãcjũ yere yahu mahtana ijiaja”, ni mehoñequinare ohõ saha masinata. Tiquina yerire ihñana, tiquina ni mehoñequina ijigũ masinata, ni yahuahye Jesu.

“M̄sare ne masiedaja”, ninota Cohãcjũ peyequina masare (Lc 13.25-27)

²¹ Sa yero tiquiro yahu nemoahye tiquinare:

—Peyequina yuh̄are “Pũhto” niñequina ijiepetã uhm̄use c̄jũno Cohãcjũ tiquiro pũhtoro ijirop̄are wahasi tiquina. Yuh̄u Pacũ uhm̄use c̄jũno tiquiro cahmeñene yeyequina dihita tiquiro pũhtoro ijirop̄are wahaeta. ²² Decorĩ pihtigũp̄are peyequina masa ohõ saha nieta yuh̄are: “Pũhto, m̄uh̄u yere usã buhei. M̄uh̄u wame mehna watĩare cohãũ. Sa yena m̄uh̄u tutuaye mehna peye bajumehneñene yei usã”, yuh̄are niñequina ijietta. ²³ Ohõ saha yũhtitja tiquinare: “M̄sare ne masiedaja. Ñañene yena ijire m̄sa.

Yuh̄u cahap̄u ahtaeracãhña”, niitja yuh̄u tiquinare, ni yahuahye Jesu.

Pũa wuh̄u yeyequina quitire yahuahye Jesu

(Mr 1.22; Lc 6.47-49)

²⁴ Sa yero tiquiro yahu nemoahye tiquinare:

—Sa ye ijipihtiyequina ahri yuh̄u buherire tãhoriquina yuh̄u dutiyere yeyequina, quehnoano tãho masiniquiro wuh̄u dahreriquire yero saha ijire tiquina. Tiquiro pehe uh̄cũãñe coperi sehe, wuh̄are doco d̄ucah̄e. ²⁵ Ti wuh̄are peho tuhasari bato acoro tutuaro ahta, dia mini yuh̄d̄ua waha, tutuaro wihnono wẽah̄e. Sa ti tutuaro wẽpegũta ti wuh̄u uh̄cũãno tiquiro docori wuh̄u ijiro ne waha sa queherah̄e. ²⁶ Sa yeye ijipihtiyequina yuh̄u buherire tãhoepeta yuh̄u dutiyere yerariquina, tãho masieniquiro wuh̄u dahreriquire yero saha ijire. Tiquiro pehe ti wuh̄are padũro buigã doco, quehnoano ye d̄ucaerah̄e. ²⁷ Ti wuh̄are peho tuhasari bato, acoro tutuaro ahta, dia mini yuh̄d̄ua waha, wihnono tutuaro wẽah̄e. Sa tutuaro wẽno ti wuh̄u pehere wẽdoque cũ cãh̄e. Sa yero ti wuh̄u tutuaro bora sa quehea wahah̄e, ni yahuahye Jesu.

²⁸ Tiquiro sa ni buhegũ tãhoye, tãho maria wahah̄e masa.

²⁹ “Tiquiro potota pũhtoro ijire. Sa yero quehnoano masi pehoriquire ijiro marine buhere tiquiro. Mari judio masare buheyequina yero saha buherare”, ni tãhotuah̄e tiquina.

8

Jesu camĩ b̄ucũ m̄na wihirore yuh̄d̄ua wahagũ yeah̄e

(Mr 1.40-45; Lc 5.12-16)

¹ Jesu cun̄ap̄u buhe dujiriquire dijjiaa wahah̄e. Tiquiro dijjagũ ihñañe masa peyequina tiquiro bato wahah̄e. ² Tiquiro sa

wahagū ihcāquiro cami bꞑꞑ mꞑna wihiro tiquirore piti ca, dꞑsepe curi mehna quehe sa, tiquirore siniahye.

—Pꞑhto, mꞑhꞑ yꞑhꞑre yꞑhdꞑo duagꞑ yꞑhdꞑoꞑa, niahye.

³ Tiquiro sa nigū tꞑhoro tiquiro omoca mehna Jesu tiquirore ña peoahye.

—Tire ye duaja. Mꞑhꞑre yꞑhdꞑgū yeitja, niahye Jesu tiquirore.

Tiquiro sa nigūta cami bꞑꞑ mꞑna yatia wahahye. ⁴ Sa ni tuhasa Jesu tiquirore niahye tja:

—Yꞑhꞑ mꞑhꞑre ohō saha yerire ne apequinare yahueracāhꞑa. Mꞑhꞑ pagꞑre quehnoari pagꞑ waharire pahire ihñogꞑ wahaya. Moiserere Cohācjū tiquiro cūriro sahata pahire minicꞑare ohoya mꞑhꞑ yꞑhdꞑrire masa ijipihtiyequina tiquina masino quehnoano, niahye Jesu.

Surara pꞑhtoro tiquiro cahacjꞑno dohatigū Jesu yꞑhdꞑoahye tiquirore

(Lc 7.1-10)

⁵ Sa ye Jesu Capernau wame tiri macapꞑ tiquiro esagū cien surara pꞑhtoro tiquiro cahapꞑ esa, tiquirore tutuaro ohō saha ni sinidi:

⁶ —Pꞑhto, yꞑhꞑ cahacjꞑno ne pagꞑ tutueriquiro waha masiedaro tiquirore tutuaro purīgū ya wꞑhꞑꞑꞑ cuñari tiquiro, nidi tiquiro Jesure.

⁷ Tiquiro sa nigū,

—Aꞑ, tiquiro dohatiyere yꞑhdꞑogꞑ wahaꞑtja, nidi Jesu.

Tiquiro sa nigū ohō saha nidi surara pꞑhtoro:

⁸⁻⁹ —Pꞑhto, quehnoanota. Wahægata. Yꞑhꞑ yꞑhdꞑoro quehnoa yꞑhdꞑagꞑ ijire mꞑhꞑ. Ya wꞑhꞑꞑꞑ mꞑhꞑre sajā ta dutibogꞑ ijieraja yꞑhꞑ. Mꞑhꞑ masiñe mehna yꞑhdꞑoꞑa tiquirore. Mꞑhꞑ sa

yegū yꞑhꞑ cahacjꞑno quehnoa waharota. Yꞑhꞑre yꞑhꞑ bui ijiyequina apequina pꞑhtoa ditire. Yꞑhꞑ gꞑhꞑ surarare dutiaja. Ihcāquirore “Wahaya”, yꞑhꞑ nigū tiquiro wahare. Apequirore “Ahtaya”, yꞑhꞑ nigū tiquiro ahtare. Yꞑhꞑ cahacjꞑnore “Ahrire yeya”, yꞑhꞑ nigū tire yere. Mꞑhꞑ gꞑhꞑ dutigata ijire. Sa yero mꞑhꞑ dutiro sahata tiquiro dohatiriquiro yꞑhdꞑrota, nidi tiquiro.

¹⁰ Tiquiro sa nigū tꞑho maria waharo, peyequina masa tiquiro mehna ijiyequinare ohō saha nidi Jesu:

—Ijirota mꞑsare niita niaja. Ahriquiro surara pꞑhtoro Israe masꞑno ijieriquiro Cohācjꞑre tutuaro wacū tutuare. Tiquiro cahacjꞑnore yꞑhꞑ yꞑhdꞑgū yeatire masi tuhasare. Ne Israe masare ahriquiro yero saha ijiyequinare ihñedaga yꞑhꞑ. ¹¹ Mꞑsare niita niaja. Peyequina ahriquiro yero saha Cohācjꞑre wacū tutuayequina ijipihtiro cjēna gꞑhꞑ ꞑhmꞑse cjꞑno pꞑhtoro tiquiro ijiropꞑ esa, topꞑ ijiyequina mehna ihyaeta. Abrahā, Isaac, Jacob mehna ihyaeta tiquina. ¹² Masa apequina pehe Cohācjū tiquiro pꞑhtoro ijiropꞑ wahaboriquina tiquina ijiepegūta ñanopꞑ nahitianopꞑ cohā cānota tiquinare. Topꞑ tiquiro cohāriquina tutuaro uti, bꞑꞑꞑ witiye mehna bahque dihoeta, ni yahuri Jesu.

¹³ Tire sa ni tuhasa, surara pꞑhtorore nidi.

—Tojoahya mꞑhꞑ ya wꞑhꞑꞑꞑ. Mꞑhꞑ cahacjꞑno yꞑhdꞑrota. “Potota yꞑhdꞑrota”, ni mꞑhꞑ tꞑhoturiro sahata yꞑhdꞑrota, nidi Jesu.

Sa nigūta tiquiro cahacjꞑno pehe quehnoa wahari.

Pedro mareonore dohatiricorore yꞑhdꞑoahye Jesu

(Mr 1.29-31; Lc 4.38-39)

¹⁴ Sa ye Jesu Pedro ya wꞑhꞑꞑꞑ esa, Pedro mareono dohatigū

ihñahye tiqiro. Ujuaye tigū cuñahye ticoro. ¹⁵ Ticoro sa ijigū ihñano ticoro omocare ña peoahye. Tiquiro sa ña peogūta ujuaye surua wahahye. Surugū tahoturo ticoro pehe wahcādūca, tiquinare ihyayere peoahye.

Jesu peyequina dohatiequinare yuhdūoahye

(Mr 1.32-34; Lc 4.40-41)

¹⁶ Sa ye ñamicahapū peyequina watāre cūoyequinare masa ne wihiahye Jesu cahapū. Tiquina sa ne wihigū ihñano ihcā tahata tiqiro waha dutigū watā waha wahahye. Sa yero ijipihtiequina dohatiequina tiquina ne sariquinare yuhdūo pehoahye Jesu. ¹⁷ Sata yeahye tiqiro panopū cñūno Cohācñū yere yahu mūhtariquiro Isaia tiqiro nidiro sahata. Ohō saha ni ojoahye: “Mari dohatiyere yuhdūo cānota tiqiro. Mari duti tiyere cohā cānota”, ni ojoahye Isaia Jesure.

Ihquēquina Jesu mehna waha duamahye

(Lc 9.57-62)

¹⁸ Ape taha Jesu peyequina masa tiqiro cahapū tiquina ijigū ihñano, ohō saha nidi.

—Ape sie pahrēpū isa pehāhna, nidi.

¹⁹ Sa usā pehāto pano mari judio masare buheriquiro Jesu cahapū esa, ohō saha nidi:

—Buhegū, mūhū mehna waha duaja noho mūhū waharopū, nidi.

²⁰ Jesu ohō saha ni yūhtiri:

—Ihquēquina nūcū cñēna wahiquina tiquina coperi cūore. Minicñū gūhū tiquina suhti cūore. Yūhū masū Cohācñū ohorigū pehe yūhū carīni wūhū cūoeraja, ni yūhtiri Jesu.

²¹ Sa ye apequiro Jesu buheriquiro ohō saha nidi:

—Pūhto, yūhū pacū tiqiro yariagū yarīgūta. Sa ya tuhasagū

pūrita mūhū mehna wahagūta, nidi tiqiro Jesure.

²² Jesu yūhtiri:

—Yūhūre cahmeeñequina yari-ariquina yero saha ijire. Tiquina pehe yariariquinare yaahro. Sa yegū mūhū pehe yūhū mehna cñū ijiaçñū ahtaya, nidi tiqiro.

Jesu wihnonore yūhū dutiahye

(Mr 4.35-41; Lc 8.22-25)

²³ Sa ni tuhasa yucūsapū sajāri. Sa yena usā tiqiro buhena gūhū tiqiro mehna waha, sajānū. ²⁴ Ti ditarapū usā pehāgū waro wihnono tutuaro wēdi. Sa yero pahcōri yucū sare quē mio cāmedi. Sa wihnono wēpegūta Jesu pehe carīno nidi. ²⁵ Sa wahagū ihñana usā tiqirore wahcōu. Wahcō ohō saha nii:

—Pūhto, yuhdūoya. Mari minina tana niájú, nii usā.

²⁶ Usā sa nigū Jesu yūhtiri:

—¿Dūhsena cue maca cāri mūsa? Yūhūre wacū tutuerare mūsa, nidi Jesu usāre.

Sa ninota wahcādūca sa, wihnonore pahcōri gūhūre “Yūhūahya”, nidi. Tiquiro sa nigū wihnono yuhdūa wahari. Sa ye pahcōri gūhū yūhū dijiaa wahari. ²⁷ Tiquiro sa yegū ihñā acūana, ohō saha nii usā:

—¿Yohou, dūhse ijiriquiro boro masūno ijiajari ahriquiro? Ahri wihnono, pahcōri gūhū tiqiro dutigū yuhdūcaerare tiqirore, nii usā.

Watā cūoyequinare watāre cohāhye Jesu

(Mr 5.1-20; Lc 8.26-39)

²⁸ To bato pehā sa, Gadara cñēna ya yehrapū esa. Topū usā esagū pūaro mūsa masa coperi cahapū ijiequina Jesure piti cari. Tiquina watāre cūoyequina cauequina ijiri. Sa yero topū masa tiquina wahamehnenno ijiri. ²⁹ Tiquirore piti ca, sañuducuri:

—¿Mũhũ Cohãcjũ macũ dũhse yegũ ahtajari mũhũ usã cahapũre? ¿Usãre Cohãcjũ tiqũiro buhiri dahreati pje ijierapegũta usãre buhiri dahrei ahtau niajari mũhũ? ni saũducũri tiqũina.

³⁰ Tiquina cahapũ peyequina yesea maca ihyaye nidi.

³¹ Tiquinare ihñañe, watĩa ohõ saha nidi Jesure:

—Usãre cohãgũ sisequina cahapũ waha dutiya usãre. Tiquina mehna iji dutiya usãre, ni sinidi watĩa Jesure.

³²—Aũ, wahaya, nidi Jesu.

Tiquiro sa nigũ watĩa pũaro masa mehna ijiriquina waha, yesea cahapũ esari. Tiquina mehna tiqũina ijigũta yesea pari, pari cjũpũ oma maa buha, ditarapũ bora ñojoa, mini yaria pihtia wahari.

³³ Tiquina sa wahagũ ihñañe yeseare ihña ihboyequina pehe cuea waha, oma maa cãa wahari. Macapũ esa, yesea tiqũina minidire yahu site pehoahye. Watĩare cũoriquinare Jesu watĩare tiqũinapũre ijiriquinare cohã wiori gũhũre yahu pehoahye tiqũina. ³⁴ Sa tiqũina yahu siteri bato ti maca cjẽna ijipihtiyequina Jesure ihñañe ahtari. Sa ye tiqũirore ihñañe, tutuaro mehna waha dutiri tiqũirore.

9

Tini masieniquirore yũhdũoahye Jesu

(Mr 2.1-12; Lc 5.17-26)

¹ Sa ye Jesu yucũsapũ sajã, ditarapũ pehã, tiqũiro masari macapũ esahye. ² Topũ apequina tini masieniquirore tiqũiro cuñari cahsero mehna yo wũa wihiahye Jesu cahapũ. “Jesu ahriqũirore dohatiyere yũhdũgũ yerota”, ni tũhotuahye tiqũina. Tiquina sa ni tũhotugũ masino dohatiriquirore ohõ saha niahye Jesu:

—Bucueya mũhũ. Mũhũ ñañe yeyere cohã tuhasau yũhũ, niahye tiqũiro.

³ Tiquiro sa nigũ tũhoye ihquẽquina mari judio masare buheyequina ohõ saha ni tũhotumahye. “Ahriqũiro ihyo ijiriquiro sa nino ‘Cohãcjũ ijiaja’, nino nine. Sa nino Cohãcjũre ñano nino nine”, ni tũhotumahye tiqũina. ⁴ Tiquina sa ni tũhotugũ masino, ohõ saha niahye Jesu:

—¿Dũhsena sa ñano tũhotuajari mũsa? ⁵ “Mũhũ ñañe yeyere cohã tuhasaja”, yũhũ nigũ “Ni mehogu ijire”, nine mũsa quehnoano masiedapenata. “Wahcãdũca, wahaya”, yũhũ nigũ tiqũiro tinigũ ihñana, yũhũ nidi potõ ijigũ duita mũsa masinata. ⁶ Yũhũ masũ Cohãcjũ ohorigũ ahri yehpapũ masa tiqũina ñañe yeyere cohã masiaja yũhũ. Masa tiqũina ñañe yeyere cohãcjũre cũri Cohãcjũ yũhũre. Yũhũ sa cohãrire mũsa masiato saha ohõ sahata ye ihñoutja mũsa ihñatire, niahye Jesu.

Sa ni tuhasa tini masieniquirore ohõ saha niahye:

—Wahcãdũcaya. Mũhũ cuñari cahserore ne cãhña mũhũ ya wũhũpũ, niahye tiqũirore.

⁷ Tiquiro sa nigũ tũhoro tini masieniquirore wahcãdũca sa, tiqũiro ya wũhũpũ tojoa wahahye. ⁸ Sa wahagũ ihñañe masa cueahye. Sa ye Jesure Cohãcjũ tiqũiro tutuayere tiqũiro ohogũ ihñañe masa Cohãcjũre ño peo, quehnoano yahuducuahye.

Jesu Mateore pijiahye

(Mr 2.13-17; Lc 5.27-32)

⁹ Tiquina sa yeri bato Jesu topũ ijiriquiro ahta, yũhũre Mateore boca sari. Pũhtoia ye ijiatire masare wapa ne cohtegũ ijimi. Sa yegũ ti pjere yũhũ dahrari tucũpũ dujii. Topũ yũhũ dujigũ ihñano ohõ saha nidi yũhũre:

—Yuhu mehna cjũ ijiajũ ahtaya, nidi Jesu yuhure.

Tiquiro sa nigũ tũhogu wahcãduca tiquiro mehna wahaũ.

¹⁰ Came ya wũhũpũ Jesu gãhu ihyaye ahtari. Peyequina wapa ne cohteyequina, “Ñano yeyequina”, tiquina niñequina gãhu usã mehna ihyari. ¹¹ Tiquina mehna usã ihyagũ ihñañe, fariseo masa usãre Jesu buhenare ohõ saha nidi:

—¿Dũhse yero masare buheriquiro wapa ne cohteyequina mehna, ñano yeyequina mehna ihyajari? nidi tiquina usãre tiquiro buhenare.

¹²⁻¹³ Tiquina sa nigũ tũhoro Jesu pehe queoye mehna buhero yũhtiri:

—Dohatieyequina duturure macaedare. Dohatieyequina dihita duturure macare. Ñañequina dohatiyequina yero saha ijire. Sa yegũ ñañequina dihitare tiquina ñañene yerire bũjũa witi duti, quehnoañe pehere comesagũ yei ahtaũ nii yũhu. Tiquina basi “Quehnoana ijiaja usã”, ni tũhotuyequinare yedohogu ahtaerũ. Cohãcjũ tiquiro nidire tiquina ojoarire masiña mũsa. “Wahiquinare mũsa wejẽ, ujuũ mũoñe mehna yuhure mũsa ño peogũ cahmedaja. Apequinare mũsa paja ihñagũ pehere cahmeaja”, ni ojoahye. Ahri tiquiro ojoari dũhse nidire masiña mũsa. Tire quehnoano buhe nemona wahaya, nidi Jesu fariseo masare.

*Sijiyere sinituahye Ñu buheye-
quina Jesure*

(Mr 2.18-22; Lc 5.33-39)

¹⁴ Came Ñu wame yeriquiro buheyequina Jesu cahapũ esa, sinituri:

—Usã Ñu buhena pehe peye tahari Cohãcjũre ño peona tana, sijiaja. Fariseo masa gãhu sata

sijire. ¿Dũhse yeye mũhu buheye-
quina pehe sijierajari? nidi tiquina
Jesure.

¹⁵ Jesu tiquiro tũhotuye mehna queoye mehna buhero taro tiquinare ohõ saha ni yũhtiri:

—Ohõ saha ijire ti: Omoca dũhteropũ tiquina pijioriquina omoca dũhteriquiro mehna ijiye, siji masiedare. Sata yũhu buheye-
quina gãhu yũhu mehna ijiye, siji masiedare. Yũhu omoca dũhteriquiro yero saha ijiaja. Omoca dũhteriquiro bose deco tiquiro yegũ tiquiro mehna cjẽna bũjũa witiye mehna ijierare. Sa yeye ihyeyequina ijierare. Yũhu Pacũ Cohãcjũ yuhure tiquiro nedi bato pũritare yũhu buheyequina mehna ijisi yũhu. Sa yeye ti pjepũta yũhu buheyequina gãhu sijieta, ni yũhtiri Jesu.

¹⁶ Panopũ cjẽ buheye wahma buheye mehna tiquina buhe more duagũ ihñano ohõ saha ni nemori Jesu tiquinare queoye mehna buhero.

—Ne wahma cahsero suhtiro cahsero mehna mũnano suhtirore sere ohõno cahmedare. Sa yegũ wahma cahsero mari coseri bato mũnano suhtirore weje cahme-
coa, paji yũhdũaro tũhũgũ yere. (Ahri yero saha mũna buheyere wahma buheye mehna piti dahre buheraro cahmene.) ¹⁷ Sa yena ne uñse co bisiye core wahiquiro cahsero ajurore mũna ajurore pose yeraro cahmene. Sa yegũ uñse co bisiye pahmuñepũ mũna ajurore tũhrẽ cãhre. Sa tũhũgũ uñse co gãhu, ajuro gãhu cohãa wahare. Sa yena uñse co wahma core wahma ajuropũ pose yero cahmene. Sa yegũ uñse co cohãeda, ajuro gãhu cohãedare. (Sata wahma buheye mũna buheye mehna buhe moredaro cahmene,) ni yahuri Jesu tiquinare.

*Jairo maconore maso, dii
mũna dohatiducuricoro gãhure*

yuhduoahye Jesu

(Mr 5.21-43; Lc 8.40-56)

¹⁸ Tiquiro sa ni yahuri watoa mari judio masa puhtoa mehna cĵano Jesu cahapu wihiri. Wihi, dusepe curi mehna quehe sa, ohō saha nidi.

—Yuhu maco mianogā yariaa wahari. Ticorore muhu omocare duhu peogu ahtaya. Muhu sa yegū masanota, nidi tiquiro Jesure.

¹⁹ Tiquiro sa nigū tuhoro Jesu wahcādaca tiquiro mehna wahari. Ūsā tiquiro buhena gāhu wahau.

²⁰ Ūsā mahapu wahaducugū topu numino dii muna dohatiducuricoro Jesu batopu ahta, tiquiro suhtiro sohtoare dahra tuhuahye. Doce cahmari waro decoripe dii muna dohatiro niahye. ²¹ Ohō saha ni tuhoutuahye ticoro sa yero: “Ti suhtirore dahra tuhugo, quehnoa wahagota”, ni tuhoutuahye ticoro. ²² Ticoro sa yegū masino Jesu majaredaca, ticorore nidi.

—Maco, bucueya muhu. Muhu yuhare wacū tutuaye mehna quehnoago tojoare yojopare, nidi tiquiro.

Tiquiro sa nigūta yuhdua wahari ticoro.

²³ Sa ye tuhasa Jesu puhtoro ya wuhapu esari. Topu esa, űehe quea utiyequinare weōgu mate pohoro saha ijdare putiyequinare ihñari. Peyequina masa tiquina ñano bisigū gāhure tuhori tiquiro. ²⁴ Tiquina sa yegū ihñano masare ohō saha nidi:

—Wijiaya musa. Yarierare ticoro. Carĳno nine, nidi tiquinare.

Tiquiro sa nigū tuhoye “Sa ni maca cāno nine ahriquiro”, niñe, masa bujari tiquirore. ²⁵ Sa yero wahu puhapare ijiyequina masare tiquiro wio pehori bato yariaricoro cahapu esa, ticoro omocare űeheahye. Tiquiro sa űehegū masa quehe sa, wahcādaca sahye ticoro. ²⁶ Tiquiro sa yerire

tuhoye, to cĵena masa ijiptiyequina yahu siteri.

Puaro caperi bajueyequinare ihñagū yeahye Jesu

²⁷ Sa yero Jesu topu ijiriquiro wahagū, puaro caperi bajueyequina tiquirore pisu nunu tāri:

—Davi panami iji turiagu, masare yuhduoacju, usāre paja ihñaña muhu, ni sañuducuri tiquina.

²⁸ Tiquina sa nigūta Jesu ape wuhapu sajāri. Tiquiro sa sajāgū masiñe caperi bajueyequina tiquiro cahapu sajāa wahari. Tiquina sa sajā sagū ihñano tiquiro pehe sinituri tiquinare:

—¿“Marine ihñagū yerota tiquiro”, ni tuhoutuajari musa yuhare? nidi tiquiro.

—Puhto, sata ni tuhoutuaja usā, ni yuhtiri tiquina.

²⁹ Tiquina sa nigūta tiquina caperire ña peori. űa peo ohō saha nidi:

—Yuhare “Sa yerota”, musa ni tuhoturiro sahata sa yeaja musare, nidi Jesu.

³⁰ Tiquiro sa nigūta tiquina caperi pehe quehnoa wahari. Sa ye Jesu ohō saha nidi tiquinare:

—Ahri yahu ohō saha yerire apequinare ne yahueracāhña, nidi.

³¹ Tiquiro sa niepegūta waha, topu ijiyequinare yahu siteri tiquina tiquiro sa yerire.

Yahuducueriquirore yahuducugū yeahye Jesu

³² Ti wuhare tiquina wiĵagū waro ihcāquiro yahuducueriquirore ne cāhtari masa. Watĳno tiquiro mehna ijiriquiro tiquirore yahuducueragū yeahye.

³³ Tiquina ne sagū ihñano watĳnore Jesu cohā wiori. Tiquiro sa cohāgū watĳnore cāoriquiro pehe yahuducia wahari. Tiquiro sa yegū ihñañe ijiptiyequina ihña maria pihtia wahari.

—Ne, ahri yehpa Israe yehpapure ohō saha yeyere ihñedahti mari, ni yahuducuri tiquina basi.

³⁴ Fariseo masa pehe sijoro saha ni yahuducuri:

—Watīa pūhtoro tutuaye mehna watīare cohāre ahriquiō, ni yahuducuri tiquina.

Masare paja ihñahye Jesu

³⁵ Sa ye ijipihtiye macari topū ijiye macarigāre, bujaye macari gūhare buhe tinino wahari Jesu. Quehnoañe buheyere judio masa mari buheye wuhūsepū buhero wahari tiquiō. Sa yero Cohācjā pūhtoro tiquiō ijiatire yahuri. Ijipihtiye dohatiye gūhare to cjēnare yūhdūori tiquiō. ³⁶ Masa peyequina ñano yūhdūyequinare, pejecūoro wahayequinare tiquina ijigū ihñano Jesu tiquinare paja ihñari. Tiquina oveja opana marieñequina yero saha tiquina ijigū ihñano Jesu tutuaro paja ihñari tiquinare. ³⁷ Sa yero ohō saha nidi tiquiō usāre tiquiō buhenare, queoye mehna buhero:

—Trigo peye bucūa tuhasagū peye ijigū dahraye pajiro ijire. Sa ijiepegūta dahrayequina pehe meheñequinagā ijire. Sata quehnoañe buheyere tuhoatiquina peyequina ijigū pajiro ijire mari dahraye. Sa ijiepegūta meheñequinagā dahrari masa yero saha quehnoañe buheyere buheatiquina gūhū meheñequinagā ijire. ³⁸ Sa yena quehnoañe buheyere buheatiquinare apequinare tiquiō ohoatire siniña Cohācjāre, nidi Jesu.

10

Jesu doce waro beseahye tiquiō ohoatiquinare

(Mr 3.13-19; Lc 6.12-16)

¹ Came doce usāre tiquiō buhenare Jesu pijio, tutuayere ohori usāre. Watīare usā cohā

masiatire ijipihtiye dohatiyere usā cohā masiatire ohori usāre.

² Ohō saha wame tii usā Jesu cūrina: Simo ijiri. Tiquiroreta Pedro ni pisuri Jesu. Simo bahūro Andre gūhū ijiri. Santiago gūhū tiquiō bahūro Ņu mehna ijiri. Tiquina Santiago gūhū pacūro Zebedeo wame tiri. ³ Felipe, Bartolomé, Tomasu, yūhū Mateo ijii usā. Yūhū pehe pūhtoa ye ijiatire masare wapa ne cohtegū ijimi. Usā mehna Santiago ijiri. Tiquiro pehe Alfeo macūno ijiri. Sa yero Tadeo gūhū ijiri. ⁴ Simo celote ya curua cjāno ijimediquiō, Juda Iscariote gūhū ijiri. Juda pehe Jesure ihña tuhtiyequinare ihñoaatiquiō ijiri.

Jesu tiquiō buheyequinare buhe dutiro ohoahye

(Mr 6.7-13; Lc 9.1-6)

⁵ Sa ye usāre doce tiquiō buhenare ohoro, “Ohō saha yeya”, ni yahuri usāre Jesu:

—Judio masa ijieyequina cahapūre wahaeracāhña. Ne Samaria yehpapū ijiye macaripū gūhare wahaeracāhña. ⁶ Israe yehpa cjēna cahapū pehere waha. Cohācjāre masieñequina ijire tiquina. ⁷ “Uhmūse cjāno pūhtoro tiquiō ijiato mehenogā dūhsare”, ni buheya tiquinare. ⁸ Sa yena camī bucū mūna wihare, apeye peye sijoro saha ijiye dohatiyere cūoyequina gūhare yūhdūgū yeya. Yariariquinare masoña. Watīa masa mehna ijieyequinare cohāña tiquinare. Mūsare sa ohogū niaja ahri tutuayere. Sa yena mūsa gūhū yūhū sa ohoriro sahata masare yūhdūgū yeya wapa neno marieno.

⁹ Mūsa wahana niñerure ne nedacāhña. ¹⁰ Ne mūsa ajurore, pūaro camisare, pūa pa dahpo suhtire, tuaye cjū gūhare nedacāhña. Mūsa sañano dihitare sañaa wahaya. Apeye suhtire nedacāhña. Mūsa buhena waropū ijieyequina tiquina pehe

m̄sare pohe ijiatire ohoeta. Sata ohoro cahmene tiquinare.

11 'Ti macarip̄u esana, m̄sare quehnoano piti catiquirore macaña. Sa yena ti w̄h̄up̄ata tojoariña. Tee, coã wahanap̄u wijiaya ti w̄h̄ure. 12 Sa yena w̄h̄up̄u sajãna, “¿Ijijari m̄sa?” niña ti w̄h̄u cj̄enare. M̄sare quehnoano tiquina cahmegũ “Cohãcjũ mehna quehnoano ijiya m̄sa”, niña tiquinare. 13 M̄sare tiquina cahmedagũ, m̄sa sa niborire niedacãhña. 14 Sa yena m̄sare tiquina cahmedagũ, tiquina t̄ho dueragũ ti w̄h̄ure wijiaya. Wijiana, dahpocãri cj̄e dihta esa wahanãre wej̄e site cũña m̄sa tiquinare tiquina ye buhirire masigũ yena. Ti maca cj̄ena m̄sare cahmedagũ sata yeya tiquina ḡh̄ure. 15 Ijirota m̄sare niita niaja. Ahri deco pihtiḡap̄ure Sodoma cj̄ena, Gomorra cj̄ena ḡh̄u tutuaro buhiri tiatiquinata ijire. Tiquina sa ijiepegũta tiquina ȳhd̄oro m̄sare cahmeeñequina buhiri tiatiquina ijietã, ni yahuri Jesu.

Jesu yequinare apequina ñano yeatire yahuahye Jesu

16 Sa ni tuhasa ohõ saha ni nemori:

—Ȳh̄ure t̄hoya m̄sa. Oveja yero saha ijinare m̄sare ñañequina watoa ohogũ niaja. Tiquina ñañequina n̄c̄u cj̄ena yayia usuayequina yero saha ijire. Sa yena m̄sa pehe apequina wahiquina wacũ masiñequina yero saha ijiya. Sa ijina ijiepenata bujua yero saha ne usuena ijiya m̄sa. 17 Quehnoano yeya m̄sa. M̄sare masa p̄htoare ohoeta. Judio masa mari buheye w̄h̄usep̄u quẽeta m̄sare. 18 Sa yeye yeequina m̄sa ijiri buhiri macari cj̄ena p̄htoa cahap̄u tiquina bui ijieyequina p̄htoa cahap̄u ḡh̄ure neañeta m̄sare. Sa yena m̄sare

top̄u tiquina neagũ p̄htoare, judio masa ijieyequina ḡh̄ure quehnoañe buheye buhenata m̄sa. 19-20 M̄sare p̄htoare tiquina ohogũ tiquinare m̄sa niatire “Yohou, masiedaboaga”, ni t̄hotueracãhña. M̄sare tiquina sinitugũta m̄sa niatire masinata. Sa masina tiquinare yahuna, m̄sa tire m̄sa esa tuharo yahuducuna nisi. Cohãcjũ pehe mari Pac̄u tiquiro yaquiro Esp̄ritu mehna m̄sare yahuducugũ yerota.

21 'Ti pjere tiquina wahmis̄m̄a tiquina bahanare wej̄e dutiye ohoeta p̄htoare yeequina tiquina ijiri buhiri. Tiquina pac̄us̄m̄a tiquina pohnene wej̄e dutiye ohoeta p̄htoare. Tiquina pohne pehe tiquina pac̄us̄m̄are wej̄e dutiye ohoeta p̄htoare. 22 Sa yeye yeequina m̄sa ijiri buhiri ihña tuhtieta masa ijipihtiyequina m̄sare. Tiquina sa yepegũta ahri yehpap̄u m̄sa catiro puno m̄sare tiquina ñano yerire ihcãno sahana ȳh̄ure duhuerana, ȳhd̄nata m̄sa. 23 Ihcã macap̄u m̄sare tiquina ñano yegũ ape macap̄u duhti cãhña. Ijirota m̄sare niita niaja. Israe yehpap̄u ijie macarine m̄sa pehoato pano, ȳh̄u mas̄ Cohãcjũ ohorigũ ahri yehpap̄u tojoa tautja.

24 'Ne ihcãquiro buheriquiro tiquirore yahuriquiro buip̄u ijierare. Sa yero cahacjũno ḡh̄u tiquiro p̄htoro bui cj̄ũno ijierare. 25 Sa yero ohõ saha t̄hoturo cahmene buheriquirore: “Ȳh̄ure buheriquiro yero sahata ijiḡtja”, ni t̄hoturo cahmene. Cahacjũno ḡh̄ure sata ni t̄hoturo cahmene. “Ȳh̄u p̄htoro yero sahata ijiḡtja”, ni t̄hoturo cahmene. “Tiquiro bui ijiḡtja. Sa yegu ȳh̄u p̄htoro tiquiro ñano ȳhd̄riro sahata ñano ȳhd̄usi ȳh̄u pehe”, ni t̄hotueraro cahmene. Ȳh̄u pehe w̄h̄u cj̄ũno yero saha ijiaja. M̄sa

pehe ti wuhupū dahrayequina yero saha ijire. Sa yeye masa yuhare “Beelzebū ijire”, ni yahusāñe, mūsa gūhare yeequinare ñano ni yahuduceta tiquina, ni yahuri Jesu.

“¿Noa pehere cuegū quehnoajari?” ni yahuahye Jesu

(Lc 12.2-7)

²⁶ Sa ni tuhasa ohō saha ni nemori:

—Sa yena mūsare ñano yeyequinare cueracāhña. Masa tiquina yahuerarire came apequina masieta. Sa yeye tiquina nūori gūhare apequina masieta. ²⁷ Mūsare tūhoerogā yuhū yahurire peyequina masa watoa buhe turiaya mūsa. ²⁸ Masunore wejēñequina tiquiō pagū dihitarē wejēne. Tiquiō jeripohna yarierare. Sa yena mūsare wejē duayequinare cueracāhña. Cohācjū pehere cueya. Tiquiō mūsa pagurire, mūsa jeripohnari gūhare pecapū cohā masine. Sa yena tiquiō pehere cueya.

²⁹ Pūaro siripia wapa mariedare. Tiquina sa wapa mariedapegūta ihcāquiōgāre Cohācjū ne boerare. Cohācjū dutieragū ne yarierare tiquiōgā. ³⁰ Sa yero mūsa poarire ne ihcā poa da dūhsaro marieno masi pehore Cohācjū. Sata mūsa ijiye tiye gūhare masi pehore Cohācjū. Sa masino mūsare ihña ihboducure. ³¹ Siripiare tiquiō cahño yuhduoro, mūsa pehere cahñe Cohācjū. Sa yena pajiro tūhotueracāhña mūsa.

Jesure mūsa wacū tutuarire yahuya masare

(Lc 12.8-9)

³² Ihcāquiō “Jesu yaquiō ijiaja”, masare tiquiō ni yahugū yuhū gūhū tiquiōre “Yaquiō ijire”, ni yahugūtja yuhū Pacure uhmūse cjānore. ³³ Sa ijiepegūta ihcāquiō “Jesu yaquiō ijieraja”, masare tiquiō nigū yuhū gūhū “Yaquiō

ijierare tiquiō”, ni yahugūtja yuhū Pacure, ni yahuri Jesu.

Jesu masare tu wagū yere

(Lc 12.51-53; 14.26-27)

³⁴ Sa ni tuhasa ohō saha ni yahuri nemori:

—¿Dūhse ni tūhotuajari mūsa yuhare? ¿“Tiquiō masare tiquiō buheri bato apequina tiquinare ihña tuhtisi”, ni, tūhotuajari mūsa? Sa ijierare. Masare yuhū buheri bato ihquēquina yeere tūhoeta. Apequina pehe tiquinare ihña tuhtieta. Ihcāno saha ijisi masa. ³⁵ Bucūna yuhū buheyere tiquina tūhori buhiri tiquina pohne tiquinare ihña tuhtieta. Bucūna numia gūhū yuhū buheyere tiquina tūhori buhiri tiquina pohna numia tiquinare ihña tuhtieta. Tiquina mareosānumia yuhū buheyere tiquina tūhori buhiri tiquina macū namosānumia tiquinare ihña tuhtieta. ³⁶ Sa yeye masa tiquina acayere ihña tuhtiequina ijietā.

³⁷ Yuhare tiquina cahīboriro yuhduoro tiquina pacūsumūa pehere cahī yuhduūcaye, yeequina ijisi tiquina. Yuhare tiquina cahīboriro yuhduoro tiquina pohne pehere cahī yuhduūcaye, yeequina ijisi tiquina. ³⁸ Sa yeye apequina curusapū yariariro saha yeequina tiquina ijiri buhiri ñano yuhdueta tiquina gūhū. Sata ñano yuhdu dueyequina yeequina ijisi tiquina. ³⁹ Masa yuhare wacūno marieno tiquina esa tuharo yeye pecapū wahaeta tiquina. Sa yeye yeere sa yeducuye ijipihtiye decori yuhū mehna ijietā tiquina, ni yahuri Jesu.

Mari wapatatire yahuahye Jesu
(Mr 9.41)

⁴⁰ Sa ni tuhasa ohō saha ni yahuri nemori:

—Mūsare yeequinare ihcāquiō quehnoano cahmeno, yuhū gūhare cahmeno nine tiquiō. Sa yero tiquiō yuhare quehnoano

cahmediquiro yuhare ohoriquiro gũhare cahmeno nine. ⁴¹ Sa yero Cohãcjũ yere yahuriquiro wapatarota. Tiquirore quehnoano yerota Cohãcjũ. Sa yero tiquiro yere yahuriquiro tiquiro ijigũ ihñano apequiro pehe yahuriquirore quehnoano cahmeno, yahuriquiro yero sahata wapatarota tiquiro gũhũ. Sa ye apequiro quehnoano yeriquiro wapatarota. Sa yero quehnoano yeriquiro tiquiro ijigũ ihñano apequiro pehe tiquirore quehnoano cahmeno, quehnoano yeriquiro yero saha wapatarota tiquiro gũhũ. ⁴² Yaquirogã ihcãquiro tiquiro ijigũ ihñañe dũhse ijiyequina tiquirogãre acore mehenogã tiquina sihõdepegũta, potota tiquinare quehnoano yerota Cohãcjũ, ni yahuri Jesu.

11

Ñu wame yeriquiro tiquiro buheyequinare Jesure sinitu dutiro ohoahye

(Lc 7.18-35)

¹ Ûsãre tiquiro buhenare tiquiro sa ni yahuri bato to cahapũ ijiye macaripũ buhero wahari tiquiro.

² Sa ye tiquiro yerire Ñu perezupũ ijiriquiro tũhooahye. Sa tũhoro Ñu tiquiro buheyequinare Jesure sinitu dutiro ohoahye. ³ Sa ye Jesu cahapũ esa, sinituri tiquina Ñu buheyequina.

—¿Ñu “Yahũ bato apequiro ahtarota”, tiquiro nidigũ ijiajari mahũ? ¿Tiquiro nidigũ mahũ ijieragũ apequirore cohtenatari usã? ni sinituri tiquina pehe Jesure.

⁴ Tiquina sa nigũ tũhoro Jesu yahtiri:

—Yojopũre mũsa tũhorire, mũsa ihñarire Ñure yahuna wahaya: ⁵ “Caperi bajueyequina ihñare. Tini masieñequina tinine. Cami bũcũna quehnoa wahare.

Cahmono tũhoeyequina tũhoa wahare. Yariariquina masaa wahare. Tiquina ijipihtiyequinare quehnoa wahagũ yei yũhũ. Sa yegũ pejecũoyequinare quehnoañe buheyere yahuaja. ⁶ Yũhare tũhoriquiro “Poto ijire”, niniquiro tiquiro bucueriquiro ijire’, nidi”, ni, Ñure yahuna wahaya, nidi Jesu.

⁷ Ñu buheyequina tiquina wahari bato, Jesu pehe Ñu ijiye tiyere yahu dũcari peyequina masare:

—Masa marienopũ taare wi-hnono wẽdoqueo mũjagũ ihñana eserari mũsa. ⁸ “Quehnoañe suhti tiriquirore ihñana wahauhna”, niedari mũsa masa marienopũ wahana. Quehnoañe suhti tiyequina wapa bũjũyere cũoyequina pũhtoa ye wũhũsepũ ijire. ⁹ Masa marienopũ esana Cohãcjũ yere yahu mũhtariquirore ihñana esari mũsa. Ijirota ijire. Ñu Cohãcjũ yere yahu mũhtariquiro ijire. Apequina Cohãcjũ yere yahu mũhtañequina yũhdũoro ijiriquiro ijire tiquiro pehe. ¹⁰ Panopũ Cohãcjũ yere tiquina ojoari pũpũ Ñure ohõ saha ni yahuahye:

Mari Pacũ tiquiro macũnore ohõ saha niahye: “Mũhũ pano mũhare yahuyuatiquirore ohogũ niaja”, niahye, ni ojoahye panopũre Ñure.

¹¹ Mũsare ijirota niaja. Apequina ijipihtiyequina bui ijire Ñu wame yeriquiro. Ahri decoripũre tiquiro sa ijipegũta uhmũse cjãno pũhtoro ijiropũre ijipihtiyequina docapũ ijiriquiro pũrita Ñu bui ijire.

¹² Ñu wame yeriquiro tiquiro buhe, wame ye dũcagũ peyequina masa uhmũse cjãno pũhtoro ijiropũ tiquina tutuaye mehna, tiquina esa tuharo sajã duamedì. ¹³ Cohãcjũ yere yahu mũhtañequina tiquina ojoarire, Cohãcjũ Moiserẽ tiquiro cũripũ gũhare buhena Cohãcjũ tiquiro pũhtoro ijiatore masiaja

mari. Ñu gũhũ tireta yahuri. ¹⁴ “Elia ahtarota”, panopũ tiquina nidiquirota ijire Ñu pehe. Panopũ cjēna tiquina nidire “Poto ijire”, ni duana Ñu tiquina sa nidiquiro tiquiro ijigũ masinata m̄sa. ¹⁵ Quehnoano tũhoya m̄sa ahrire.

¹⁶ ¿Yojopũ cjēna masa yabequina yero saha ijajari tiquina, m̄sa tũhotugũ? Tiquina macanagã yero saha ijire. Apequina tiquina cahmeno saha tiquina yeragũ bucuere tiquinagã. Doeri cjē duaropũ ape dujiye, ohõ saha ni pisupere tiquinagã basi: ¹⁷ “M̄sa basatire usã putipemi. ¿Dũhsena m̄sa basaerari usã tire putigũ? Usã tutuaro ñehe quea utipe, sañuducupemi. ¿M̄sa pehe dũhsena usã mehna utiperari?” niducuriquina yero sahata ijire yojopũ cjēna gũhũ. Yojopũ cjēna tiquina cahmeno saha usã yeragũ ihñañe bucuere tiquina gũhũ. ¹⁸ Tiquina yero saha yena ohõ saha yere m̄sa yojopũ cjāna. Ñu wame yeriquiro Cohãcjāre ño peoro taro sijiro, vinore sihniedari. Tiquiro sa sihniedagũ ihñana “Watĩnore caoriquiro ijire”, nimesi m̄sa tiquiro pehere. ¹⁹ Yũhũ masũ Cohãcjũ ohorigũ ijigũ yũhũ ihya, sihniaja. Yũhũ sa yegũ ihñana ohõ saha nine m̄sa yũhũ pehere: “Ihñaña. Ahriquiropajiro ihyariquiropajiro, queheriquiro ijire. Wapa ne cohteyequina, ñano yeyequina gũhũ tiquina piti tiriquiropajiro tiquiro”, nine m̄sa yũhũ. Sa nina macanagã yero saha yahuducuna nine m̄sa. M̄sa cahmeno saha usã yeragũ bucuere m̄sa. Sa masiedapenata usã ye ihñorire ihñana, Cohãcjũ yere usã masigũ masinata m̄sa, nidi Jesu tiquinare.

Tiquina ñañene bujũa witiyequina ye macari cjēnare tuhtiahye Jesu
(Lc 10.13-15)

²⁰ Apeye macari cjēnare tuhtiri Jesu. Ti macarine apeye macari yũhũoro Cohãcjũ tutuaye mehna ye ihñomedi tiquiro. Tiquiro sa ye ihñoepegũta tiquina ñañe yerire duhuerari tiquina. Sa yero ohõ saha ni tuhtiri Jesu tiquinare.

²¹ —Corazín cjāna, m̄sa ñano yũhũnata. Betsaida cjāna, m̄sa gũhũ ñano yũhũnata. M̄sa ye macaripũre Cohãcjũ tutuaye mehna ye ihñomi. Tiro wame tiri macare, Sidõ wame tiri maca gũhũre tiquiro tutuaye mehna yũhũ ye ihñogũ ihñañe panopũ to cjēna pehe tiquina ñañene bujũa witiboaga. Sa yeye quehnoañene comesaboaga. Masa dija suhtire saña, peca cjē nujuare tiquina bui dahra site peoboaga tiquina ñañene bujũa witiyere ihñõe. ²² M̄sare niita niaja. Buhiri dahreati deco ijigũ Cohãcjũ Tiro cjēna, Sidõ cjēna yũhũoro m̄sa pehere m̄sa ñari buhirire ña yũhũaro buhiri dahrerota. ²³ Capernaũ cjāna, m̄sa esa tuharo uhmũsepu waha duamedĩ. M̄sare Cohãcjũ pecapu cohãnota. M̄sa ya macapu Cohãcjũ tutuaye mehna ye ihñomi. M̄sa yũhũre tũhoerari. Sodoma wame tiri macare Cohãcjũ tutuaye mehna yũhũ ye ihñogũ ti maca pehe yojopũre ijiboaga. ²⁴ M̄sare niita niaja. Buhiri dahrerari deco ijigũ Cohãcjũ Sodoma cjēna yũhũoro, m̄sa pehere m̄sa ñari buhiri ña yũhũaro buhiri dahrerota, nidi Jesu ti macari cjēnare.

—Yũhũ cahapu sona taya, niahye Jesu

(Lc 10.21-22)

²⁵ Ti pjere ohõ saha nidi Jesu tiquiro Pacũro mehna yahuducũro:

—Yũhũ Pacũ, m̄hũ uhmũse cjēna puhto, ahri yehpa cjēna puhto ijire. Ahri m̄hũ buheyere “Quehnoano masina ijiaja usã”, niñequinare masigũ yerare m̄hũ.

Buhe pehoeyequina pehere m̄h̄u yere masigū yere m̄h̄u. M̄h̄u sa yegū, “Quehnoare”, niaja ȳh̄u m̄h̄ure. ²⁶ Sata ijire. Tiquina pehere masigū cahmedi m̄h̄u, nidi Jesu tiquiro Pac̄orore.

²⁷ Sa yero masare ohō saha ni yahu nemori:

—Ȳh̄u Pac̄u ijiphtiyere ȳh̄ure ohori. Tiquiro dihita ȳh̄ure quehnoano masine. Sa yena usā dihita ȳh̄u masi dutiyequina mehna ȳh̄u Pac̄ure masiaja usā. ²⁸ M̄sa ñañe apee boro n̄sc̄ñe yero saha ijire. N̄sc̄ñene w̄ana m̄sa tahr̄ino saha ñañene wahyia wahare m̄sa. Sa wahyarina ijina ȳh̄ure cahmeña m̄sa. M̄sare sogū yeitja. M̄sa ñañe yeyere duhugū yeitja. ²⁹ Ȳh̄u dutiyere yeya. Yeere quehnoano masiña. Ȳh̄u paja ih̄ñagū ijiaja. Sa yegū ȳhd̄d̄c̄aegū ijiaja. Ȳh̄u sa ijigū yeere quehnoano masiña m̄sa. Sa yena soye mehna quehnoano jeripohna tinata m̄sa. ³⁰ Yeere m̄sa yegū mijoedare. Sa yero m̄sa w̄aye ti n̄sc̄edaro sahata ȳh̄u pehe m̄sare mehenogā ye dutiaja, nidi Jesu.

12

Judio masa tiquina sori decore trigore peheahye Jesu buheyequina (Mr 2.23-28; Lc 6.1-5)

¹ Mehenogā tiquiro sa ni buheri bato saurú ijigū usā Jesu mehna trigo wesep̄u esau. Usā tiquiro buhena uj̄a ahbana, trigore pehe, ihya tuhasa, ȳhd̄u c̄a waha usā. ² Usā sa yegū ih̄ñañe, fariseo masa Jesure ohō saha nidi:

—T̄hor̄iña usāre. ¿D̄h̄se ye m̄h̄u buheyequina saurú mari sori deco ijiepegūta dahrajari? Marine dutiyere ȳhd̄d̄c̄ayene nine, nidi tiquina.

³⁻⁴ Jesu ȳhtiri. “Ȳh̄u buheyequina ȳhd̄d̄c̄ayene niedare”, ni yahuro taro ohō saha ni ȳhtiri:

—Davi tiquiro mehna c̄j̄ena mehna uj̄a ahbaro Coh̄c̄j̄u w̄h̄up̄u sajā, Coh̄c̄j̄u ye p̄are ihyahye. Ti p̄are pahia dihita ihyae tiahye. Coh̄c̄j̄u dutiyere tiquina ojoari p̄u apeq̄inare ti p̄are ihya dutierare. ¿Davi ḡh̄u tire tiquina yerire Coh̄c̄j̄u ojoari p̄up̄u buherari m̄sa? (Ti p̄are ihyaro Coh̄c̄j̄ure ȳhd̄d̄c̄aroc̄o niedahye. Miare ahri p̄jerire ihyaye ȳh̄u buheyequina ḡh̄u Coh̄c̄j̄ure ȳhd̄d̄c̄ayene niedare.) ⁵ Sa ye Coh̄c̄j̄u w̄h̄up̄u dahrayequina pahia ne soerape mari soye decorire. Sa soerapeta Coh̄c̄j̄u dutiyere ȳhd̄d̄c̄ayequina ijierare. ¿Tire buherari m̄sa Coh̄c̄j̄u Moiserere tiquiro c̄uri p̄up̄u? ⁶ M̄sare nita niaja. Coh̄c̄j̄u w̄h̄ure ño peona ti w̄h̄up̄u dahrayequina tiquina soeragū ih̄ñap̄enata “Quehnoanota”, nine m̄sa. Ti w̄h̄u ȳhd̄uoro ȳh̄u pehere ño peoro cahmene. ⁷ Coh̄c̄j̄u yere tiquina ojoari p̄u ohō saha nine: “Wahiquinare wej̄e, uj̄a m̄oñe mehna ȳh̄ure m̄sa ño peogū cahmedaja. Apeq̄inare m̄sa paja ih̄ñagū pehere cahmeaja ȳh̄u”, nine tiquiro yere tiquina ojoari p̄u. Tiquiro sa nidire m̄sa quehnoano t̄hona, ȳh̄u buheyequinare tiquina buhiri mariedapegūta tiquinare tuhtieraboaga m̄sa. ⁸ Ȳh̄u mas̄u Coh̄c̄j̄u ohorigū ahri deco saurú decore masa tiquina yeatire yahugū ijigū p̄h̄to ijiaja, nidi Jesu fariseo masare.

Omoca buhariquiro q̄iti ijire (Mr 3.1-6; Lc 6.6-11)

⁹ Tiquiro sa nidi bato waha, judio masa mari buheri w̄h̄up̄u esau usā Jesu mehna. ¹⁰ Top̄u omoca buhariquiro ijiri. Sa yeye fariseo masa pehe Jesure yahusāñe tehe, tiquirore sinituri:

—Saurú decore mari sori decore mas̄nore ȳhd̄u dutierare

Cohãcjũ. ¿Sata ijajari, mũhu tũhotugũ? ni sinituri tiquina.

¹¹ Jesu yũhtiri tiquinare:

—¿Mũsa yaquiro oveja saurũ ijigũ copergũ tiquiro bora sajãgũ tiquirore ne wioeraboagari mũsa? Ne wionata mũsa. ¹² Oveja yũhduoro ijire masano pehe Cohãcjũ tiquiro ihñagũ. Sa yero saurũ ijigũ quehnoañene mari yegũ quehnoarĩne, ni yũhtiri Jesu tiquinare.

¹³ Tiquiro sa nidi bato omoca bũhariquirore ohõ saha nidi:

—Mũhu omocare siõ potoya, nidi tiquiro.

Tiquiro sa nigũ omoca bũhariquiro pehe siõ poto, omoca quehnoa wahari ape omoca quehnoari omoca yero saha.

¹⁴ Sori decore tiquiro sa yegũ ihñañe, fariseo masa waha, tiquina basi ohõ saha niahye:

—¿Dũhse Jesure wejẽnatari mari? niahye tiquina basi.

Cohãcjũ yere yahu mũhtariquiro panopũ cjãno Jesure yahuahye

¹⁵ Jesu tiquina sa nidire masino, waha wahari. Tiquiro sa wahagũ peyequina masa tiquirore nũnũ tãri. Sa yero tiquiro pehe ijipihtiequina tiquina mehna cjẽnare dohatiequinare yũhdũgũ yeri. ¹⁶ Sa yero dohatiequinare tiquinare tiquiro yũhduorire apequinare yahu site dutierari tiquiro. ¹⁷ Sa dohatiequinare yũhdũgũ yero, Cohãcjũ yere yahu mũhtariquiro Isaia panopũ tiquiro ni ojoariro sahata yero nidi Jesu. Ohõ saha ni ojoahye Isaia:

¹⁸ Ohõ saha nine Cohãcjũ: “Ahriquiro yũhu cahacjãno ijire. Tiquiro yũhu beseriquiro ijire. Tiquirore cahãaja. Sa yegũ tiquiro mehna bucueaja. Yaquiro Espĩriture tiquirore ohogãtja. Sa yero yũhu tutuaye mehna

ijipihtiequina masare yũhu buheyere yahurota tiquiro. ¹⁹ Sa yahuro tiquiro ne purĩno mehna yahusi. Sa yero sañuducusi. Sa yero maca cjã mahapũ peyequina masa watoa tiquiro tutuaro sañuducu yahusi. ²⁰ Wũjũgũ nuhrino cuadũ tiquiro nuhriedagũ yero saha masa gũhũre quehnoano yerota tiquiro. Mehenogã wũri pecare tiquiro yatigũ yeraro saha masa gũhũre quehnoano yerota tiquiro. Sata yedurota tiquiro watĩnore tiquiro yũhdũducato pano. ²¹ Sa yeye peyequina masa tiquirore wacũ tutueta”, nine Cohãcjũ, ni ojoahye Isaia.

—*Jesu watĩno tutuayere cũore, ni yahusãhye masa*

(*Mr 3.20-30; Lc 11.14-23; 12.10*)

²² Ihcã deco watĩno cũoriquirore masa ne cãhtari Jesu cahapũ. Tiquiro pehe watĩnore cũoro yahuducu masiedari. Sa yero caperi ne bajuerari. Tiquina sa ne wihigũ ihñano, yũhdũgũ yeri Jesu tiquirore. Tiquiro sa yegũ watĩno cũoriquiro ihña, yahuducuri. ²³ Tiquiro sa wahagũ ihñañe, masa ihña maria wahari.

—¿Ahriquiro Davi panamino iji turariquiro masare yũhduoatiquiro ijajari? nidi tiquina basi.

²⁴ Jesu watĩare tiquiro cohãrire tũhoye fariseo masa ohõ saha ni tũhoturi:

—Beelzebũ watĩa pũhtoro tiquiro tutuaye mehna watĩare cohãre Jesu, ni tũhoturi tiquina.

²⁵ Tiquina sa ni tũhotugũ masino, Jesu queoye mehna yahuri tiquinare, “Watĩno ye tutuaye mehna watĩare cohãgũ niedaja”, nino taro:

—Ihcã yehpa cjẽna tiquina basi cahmequeñe, ti yehpa cjẽna waha

pihtia wahaboaga. Ihcā maca cjēna tiquina basi cahmequeñe ti maca cjēna waha pihtia wahaboaga. Ihcā wāhū cjēna gūhū sata wahaboaga. ²⁶ Sa yeye Beelzebú watia pūhtoro pehe watīare cohāno, tiquina watīa tiquina basi cahmequeñe niboaga. Sa ye tiquina gūhū waha pihtia wahaboaga. ²⁷ Ohō saha ni yahusāre mūsa yūhūre: “Tiquiro Beelzebú yedohoye mehna watīare cohāre”, ni yahusāre mūsa. Mūsa mehna cjēna gūhū watīare cohāre. ¿Watīno tiquiro tutuaye mehna watīare cohājari tiquina gūhū, mūsa ihñagū? Sa cohāedare. Tire masine mūsa. Yūhū gūhū watīno tutuaye mehna watīare cohāedaja. ²⁸ Sa yegū yūhū pehe watīare cohāgū Cohācjū yaquiro Espiritu tutuaye mehna tiquinare cohāja. Yūhū sa cohāgū ihñana ohō saha masiña mūsa; Cohācjū masa bui pūhtoro ahri yehpapūre iji tuhasare yojopūre.

²⁹ 'Ohō sahata ijire queoye mehna mari buhegū: Tutuariquiro ya wūhūpū apequiro sajā sa yaque masiedare. Tutuariquirore dūhteraro tiquiro ya wūhūpū sajā sa yaque masiedare. Tutuariquirore tiquiro dūhteri bato sajā sa yaque masine, ni yahuri Jesu.

(Sa ni yahuri, watīnore tiquiro yūhdūcarire yahuro. Watīno tutuariquiro tiquiro ijiepegūta Jesu tiquirore yūhdūcare watīare cohāno.)

Sa ni tuhasa ohō saha ni yahu nemori Jesu.

³⁰—Ihcāquiro yūhūre cahmedaro, yūhūre ihñā tuhtiriquiro ijire. Ihcāquiro yūhūre yedohoeraro, yūhūre wape tigū yero nine.

³¹ 'Sa yegū mū sare poto niita niaja yūhū. Ijipihtiyē ñañene masa tiquina yegū, yahuducugū gūhūre Cohācjū bo masine. Sa boeperota Espiritu Santore tiquina ñano ni yahuducugū ti pūritare

ne bosī. ³² Yūhūre masū Cohācjū ohorigūre yūhūre tiquina ñano ni yahuducurire bo masine Cohācjū. Espiritu Santo pehere tiquina ñano ni yahuducurire ne bosī Cohācjū. Yojopūre, deco pihtigū gūhūre tiquina sa nidire bosī tiquiro, ni buheri Jesu tiquinare.

Masa tiquina yahuducuyere tūhona tiquina ijiye tiyere masiaja mari

(Lc 6.43-45)

³³ Sa yero queoye mehna buhero ohō saha ni yahu nemori tiquinare:

—Quehnoadū yucūgū quehnoañene dūca tire. Ñadū yucūgū ñañene dūca tire. Yucūgū dūcare masina “Tū dūcata ijire”, ni masiaja mari. Mari sa masino saha masa tiquina yahuducuyere tūhona tiquina ijiye tiyere masiaja mari. ³⁴ Añaa yero saha ñana ijire mūsa. Mūsa ñana ijina, quehnoañene ni masiedare mūsa. Mari wacūñepū mari tūhoturiro sahata mari dūseropū wijiare.

³⁵ Quehnoariquiro quehnoañene tūhoture. Sa yero quehnoañene yahuducure. Ñariquiro ñañene tūhoture. Sa yero ñañene yahuducure. ³⁶ Quehnoano tūhotu yahuducuna ijiya mūsa. Quehnoano yahuducuerana, buhiri dahreati deco ijigū mūsa sa ni maca cārire Cohācjūre yahu yūhdūnata. ³⁷ Queoro mūsa yahuducurire masino “Quehnoana ijire”, ninota Cohācjū. Sa yero ñano mūsa yahuducurire masino “Ñana ijire”, ninota tiquiro, nidi Jesu tiquinare.

Masa ñañequina Jesure Cohācjū tutuaye mehna ye ihñō dutiahye
(Mr 8.12; Lc 11.29-32)

³⁸ Tiquiro sa nidi bato mari judio masare buheyequina, fariseo masa gūhū tiquirore ohō saha nidi:

—Buhegũ, Cohãcjũ ohorigũ ijigũ Cohãcjũ tutuaye mehna ye ihñõña usãre, nimesi tiquina.

³⁹ Jesu yãhtiri:

—Yojopũ cjẽna ñãñequina, Cohãcjũre cahmeñequina Cohãcjũ tutuaye mehna yũhũ ye ihñõgũ ihña duamene. Tiquina sa ihña duepegũta Cohãcjũ yere yahu mãhtariquirore Jona panopũ cjãnore Cohãcjũ tiquiro tutuaye mehna tiquiro yeri dihitare ye ihñõnota masare. ⁴⁰ Jona ihtia deco waro pajiriquiro wahi paa puhiapũ ijiahye. Tiquiro sa wahariro sahata yũhũ gãhũ masũ Cohãcjũ ohorigũ ihtia deco waro masa coperpũ ijigũta. ⁴¹ Nínive cjẽna pehe Jona Cohãcjũ yere tiquiro yahurire tãhoye tiquina ñãñe yerire bujũa witiãhye. Sa bujũa witiyequina ijiye buhiri dahreati deco ijigũ tiquina yojopũ cjẽnare tiquina ñãñene bujũa witiyequinare “Ñãñequina ijire”, ni, yahusãeta. Jona tiquinare Cohãcjũ yere tiquiro yahugũ tãhoye quehnoañene cahmeãhye tiquina pehe. Sa cahmeñe quehnoano yeye niahye yojopũ cjẽna yãhdũoro. Sa yeye tiquina yojopũ cjẽnare yahusãeta. Musare niita niaja. Yojopũ musare yũhũ buheye Jona tiquiro buheri yãhdũoro ijire. ⁴² Sa ye buhiri dahreati deco ijigũ pãhtoro sur cjõno panopũ cjõno ducu, yojopũ cjẽnare “Ñãñequina ijire”, ni yahusãnota ticoro gãhũ. Ticoro Salomo panopũ cjãno tiquiro masiñene tãhõ duaro yoaropũ ahri yehpa ape sierũ ijiricoro Salomore tãhoro ahtãhye. Sa yero quehnoano yero niahye yojopũ cjẽna yãhdũoro. Sa yero ticoro yahusãnota yojopũ cjẽnare. Musare niita niaja. Yojopũ musare yũhũ buheri Salomo tiquiro buheri yãhdũoro ijire, nidi Jesu tiquinare.

Watĩno pari turi masũnore

tiquiro sajãri quitire yahuahye Jesu (Lc 11.24-26)

⁴³ Sa yero pari turi Jesu tiquiro tãhotuaye mehna ohõ saha ni quitu yahuri tiquinare:

—Watĩno masũno mehna ijiriquiro waha, aco marieni yehpapũ tini, tiquiro ijiatore macamahye. ⁴⁴ Sa bocaeraro, ohõ saha ni tãhotuahye tiquiro. “Masũno yũhũ cohãriquiro mehnata pari turi ijigũ wahaũtja”, ni tãhotuahye tiquiro. Sa ni tãhoturo tojoaa waha, tiquiro cohãriquiroreta bocahe. Sa tiquiro bocagũ masũno pehe quehnoariquiro ijimahye. ⁴⁵ Sa yero watĩno apequina siete watĩare tiquiro yãhdũoro ñãñequinare pijiro wahahye. Tiquiro sa pijigũ tiquina ijipihtiyequina tiquiro mehna ijiahye. Masũno pehe to pano ihcãquiro watĩnore cãoro, ñariquiro ijimahye. Camerpũ pehere peyequina watĩare cãoriquiro ijiro, to pano tiquiro ijiriro yãhdũoro ña yãhdũariquiro ijiahye. Yojopũ cjẽna Cohãcjũre cãomediquina tiquirore cohãñe, tiquina gãhũ ña yãhdũayequina waro wahaeta, nidi Jesu tiquinare.

Jesu acaye tiquirore yahu duahye

(Mr 3.31-35; Lc 8.19-21)

⁴⁶ Masare tiquiro sa ni yahuducuri watoa tiquiro pacoro tiquiro bahana mehna sopecahapũ ducu, tiquirore yahu duari. ⁴⁷ Sa yero ihcãquiro Jesure yahuri:

—Mũhũ paco mũhũ bahana mehna mũhũre yahu duaye sopecahapũ ducuri, nidi.

⁴⁸ Tiquiro sa nigũ tãhoro topũ ijiyequinare ohõ saha nidi Jesu tiquinare buhero taro:

—¿Noa ijiajari yũhũ paco, yũhũ bahana gãhũ, mũsa ihñagũ? nidi.

⁴⁹ Sa nino, usãre tiquiro buhenare ñupuha, ohõ saha nidi:

—Ahriquina ijire yuhū paco, yuhū bahana yero saha ijiyequina.
⁵⁰ Tiquina yuhū Pacū ūhmuse cĵāno tiquiro cahmeñene yere. Sa yeyequina yuhū bahū, yuhū baho, yuhū paco yero saha ijire, nidi Jesu tiquinare.

13

Jesu oteriquiro quitire yahuahye
(Mr 4.1-9; Lc 8.4-8)

¹ Ti decota Jesu wuhūpū ijiriquiro wijari. Wijia, ditarapū waha, ditara dūhtū cahapū dujiri. ² Tiquiro sa dujigū ihñañe peyequina masa tiquiro cahapū cahmecoa wahpaa waha, bihsaro yeri Jesure. Sa bihsagū ihñāno yucasapū sajā, tiapū dujiri tiquiro. Masa pehe padaropū ducuri. ³ Sa yero tiquiro peye queoye mehna yahuri tiquinare, buhero taro. Ohō saha nidi tiquiro:

—Oteriquiro otero wahahye.
⁴ Tiquiro sa otero wahagū apeye pjeri maha dūhtū cahapū bora quehe sahye. Topū bora quehe saye pjerire minicĵna ahta, ihya cāhye. ⁵ Sa ye apeye pjeri ūtā paca watoa bora quehe sahye. Ūtā paca watoa dihta marieda cĵūnopū duita pihnimahye. ⁶ Sa pihnieperota asū tutuaro asigū, nūhcori marieda, ñaia wahahye. ⁷ Apeye pjeri taa watoa bora quehe sahye. Taa pehe dia yūhdūa waha, oteye pehere wejēahye. ⁸ Apeye pjeri quehnoari yehrapū bora quehe sahye. Quehnoano pihni, dūca tiahye. Apeye cĵū cien pjeri, apeye cĵū sesenta pjeri, apeye cĵū treinta pjeri dūca tiahye. ⁹ Ahrire quehnoano tūhoya mūsa, nidi Jesu.

Jesu queoye mehna tiquiro buherire yahuahye
(Mr 4.10-12; Lc 8.9-10)

¹⁰ Tiquiro sa nidi bato ūsā tiquiro buhena tiquiro cahapū esa, sinituu ūsā tiquirore:

—¿Dūhse yegū masare queoye mehna buheajari mūhū? ni, sinituu ūsā.

¹¹ Jesu yūhtiri:

—Ūhmuse cĵāno tiquiro pūhtoro ijiyere panopū cĵēna tiquina masiedarire mū sare yuhū buhenare masigū yere Cohācĵū. Apequina pehere sa yerare tiquiro.

¹² Sa yero masiñequinare masi nemogū yerota tiquiro. Sa yeye tiquina pehe quehnoano masieta. Masiñequina pehe mehenogā tiquina masiepegūta tiquina pehere masiedagū yerota tiquiro. ¹³ Sa yegū queoye mehna buheaja. Ohō saha ijire. Yoĵopū cĵēna ihñāepeta, ihñedariquina yero saha tojoare. Sa yeye tūhoepeta masiedare. Tire tūhoeyequina yero saha ijire tiquina. ¹⁴ Sa ijiyequina ijiye Isaia panopū cĵāno tiquiro ni ojoariro sahata yere tiquina. Ohō saha ni ojoahye:

Ohō saha nine Cohācĵū: “Cohācĵū yere tūhonata mūsa. Sa tūhoepenata, ne masisi mūsa. ¹⁵ Ahriquina masa dapu paca batiyequina tojoare. Sa ye tiquina cahmo coperire bihare, ‘tūhoari’, niñe. Tiquina caperire ihmitihāre, ‘ihñari’, niñe. Sa yeraye quehnoano ihñañe, masiboaga tiquina. Sa ye tūhoye, masiboaga tiquina. Tiquina wacūñepū quehnoano masiboaga. Sa masiñe yūhare Cohācĵūre cahmeboaga tiquina. Sa yūhare cahmegū tiquina ñañene cohā, tiquinare pecapū wahaboriquinare yūhdugū yeboaga yuhū”, nine Cohācĵū, ni ojoahye Isaia.

¹⁶ ‘Mūsa pehe mūsa caperi mehna ihñana, masine. Mūsa cahmo mehna tūhona, masine. Sa yena bucuena ijire mūsa. ¹⁷ Mū sare niita niaja. Yoĵopū mūsa

ihñañene m̄sa t̄hoyere panop̄
 c̄jēna Cohāc̄jū yequina tutuaro ihña
 duamahye. Cohāc̄jū yere yahu
 m̄htariquina ḡh̄u tire tutuaro
 ihña duamahye. Sa ihña duepeta
 ne ihñedahye. Yojop̄ m̄sa t̄hoye
 ḡh̄uare tutuaro t̄ho duamahye
 tiquina. Sa masi duepeta tire
 masiedahye, ni yahuri Jesu ūsāre
 tiqiro buhenare.

*Jesu oteriquiro queoyere yahu
 pehoahye*

(Mr 4.13-20; Lc 8.11-15)

¹⁸ Came Jesu ūsāre yahu nemori:

—T̄hoya m̄sa. Oteriquiro
 queoyere m̄sare yahutja. Ȳh̄uare
 t̄hona, quehnoano masiña.
¹⁹ Oteye p̄jeri quehnoañe buheye
 yero saha ijire. Sa yeye maha d̄ht̄a
 cahap̄ borari p̄jeri quehnoañe
 buheye yero saha ijire. Sa
 yeye masa quehnoañe buheyere
 t̄hoepeta ne masiedare. Sa yero
 masa quehnoañe buheyere tiquina
 t̄hoḡū ihñano wat̄no pehe ahta,
 ti buheyere quehnoañe buheyere
 masi dutierare masare. Minic̄j̄a ti
 p̄jerire tiquina dote nediro saha
 yere wat̄no. ²⁰ Sa ye ūt̄a paca
 watoa borari p̄jeri quehnoañe
 buheye yero saha ijire. Sa yeye
 masa quehnoañe buheyere t̄ho,
 bucueye mehna duita tire t̄ho
 nene. ²¹ Sa t̄ho nepeta ūt̄a paca
 watoa ijiye c̄j̄a n̄h̄cori marieñe
 c̄j̄a yero saha ahriquina masa
 ḡh̄u tutuerare. Sa tutueraye ñano
 ȳhd̄aye, yeequina tiquina ijiri
 buhiri apequina tiquinare ñano
 yeḡū ihñañe yee pehere duhu c̄h̄re.
 Apequina tiquinare ñano yeḡū
 tire ihc̄āno sahaeraye, yeere duhu
 c̄h̄re. ²² Sa ye taa watoa borari
 p̄jeri quehnoañe buheye yero saha
 ijire. Sa yeye masa quehnoañe
 buheyere t̄hoepeta, ahri yehpa
 c̄j̄ēne pajiro baj̄a witi t̄hotuye,
 niñeru pehere cah̄ne. Tiquina sa
 yeḡū ti pehe quehnoañe buheyere
 cahmotare. Sa cahmotaḡū masa

quehnoañe pehere yerare. ²³ Sa
 ye quehnoari yehpap̄ borari p̄jeri
 quehnoañe buheye yero saha ijire.
 Sa ye masa quehnoañe buheyere
 t̄hoye, tire quehnoano masine.
 Sa masiñequina ijiye, Cohāc̄j̄ū
 cahmeno sahata quehnoañene
 yere tiquina. Ihquēquina pajiro
 quehnoañene yere cien p̄jeri
 d̄ca tiro saha. Apequina doca
 c̄j̄ūnoḡā quehnoañene yere sesenta
 p̄jeri d̄ca tiro saha. Apequina
 mehenoḡā quehnoañene yere
 treinta p̄jeri d̄ca tiro saha, ni
 yahuri Jesu ūsāre.

*Trigo watoa taa diari queoyere
 yahuahye*

²⁴ Sa ye pari turi queoye mehna
 buheri Jesu:

—Ūhm̄se c̄j̄ūno tiqiro p̄htoro
 ijiye oh̄o saha ijire. Wese up̄ro
 tiqiro wesep̄ quehnoañe p̄jerire
 tiqiro oteriro saha ijire ūhm̄se
 c̄j̄ūno tiqiro p̄htoro ijiye. ²⁵ Wese
 up̄ro ijipihtiyequina tiqiro
 mehna c̄j̄ēna ḡh̄u tiquina car̄no
 watoa tiqirore ihña tuhtiriquiro
 ahtahye. Sa ahtaro trigore ti
 oteripop̄ taare oteahye. Ote
 tuhasa wahaa wahahye. ²⁶ Came
 trigo pihniahye. Sa ye ti d̄ca tiro
 taro yeḡū waro diaa wahahye.
²⁷ Sa ye wese up̄rore dahra
 cohteyequina tiqiro cahap̄ esa,
 yahuahye: “¿P̄hto, quehnoañe
 p̄jeri dihitare mah̄a wesere m̄h̄u
 otepeḡūta, dahse ye taa ḡh̄u
 diajari ti wesere?” nidi tiquina.
²⁸ “Ȳh̄uare ihña tuhtiriquiro iji-
 aga ti taare oteriquiro”, niahye
 wese up̄ro. “¿Taare ūs̄ā cureḡū
 cahmeajari mah̄a?” nimahye
 tiqirore dahra cohteyequina.
²⁹ “Taare curerac̄h̄ña, ‘Trigo
 pehere cureari’, nina. ³⁰ Trigo
 taa mehnata b̄c̄ar̄ahdo. D̄ca
 nedi p̄je ijiḡū neñequinare oh̄o
 saha niñt̄ja: ‘Taare cure m̄htaña.
 Tuhasa m̄sa curerire ūj̄aña.
 Came trigore peheya. Pehe peho,

tire yuhū ihbori wuhupū cūña', niitja tiquinare", niahye wese upuro, nidi Jesu, queoye mehna yahuro.

Mostaza pje queoyere yahuahye Jesu

(Mr 4.30-32; Lc 13.18-19)

³¹ Sa ye apeye queoye mehna usāre ohō saha ni buheri tja:

—Uhmuse cjūno tiquiro pūhtoro ijiye mostaza pjegā yero saha ijire. Ti pjegā meheni pjegā waro ijire.

³² Ti pjegāre wesepū tiquiro oteri bato, quehnoano pihnine. Sa yero paji yuhduadu wahare. Sa wahagū minicjūa pari ti dūpūripū suhti suhare, ni yahuri Jesu. (Sa nino ohō saha nino niahye. Mostaza pjegā pajidū tū bucuariro saha uhmuse cjūnore mari pūhtorore masiñequina meheñequinagā tiquina iji mūhtaepēgūta camepū peyequina wahaeta.)

Pāre pugū yeye queoyere yahuahye Jesu

(Lc 13.20-21)

³³ Sa ye apeye queoye mehna usāre ohō saha ni buheri tja:

—Uhmuse cjūno tiquiro pūhtoro ijiye pāre pugū yeye yero saha ijire. Tire numino ihcā ajuro trigore aco mehna quehnoano tire dahra morene pā bucuatire. Ticoro sa yegū pāre pugū yeye pehe trigore quehnoano sehśaa wahare, nidi Jesu. (Sa nino ohō saha nino niahye. Pāre pugū yeye trigore ti sehśaa wahariro saha uhmuse cjūnore mari pūhtorore peyequina masa iji pihitiro cjēna masieta.)

Queoye mehna Jesu tiquiro buherire yahuahye

(Mr 4.33-34)

³⁴ Ahri iji pihitiyere buhero, queoye mehna yahuri Jesu. Queoye marieno yahuerari tiquiro tiquinare. ³⁵ Sata yeri tiquiro Cohācjū yere yahu mūhtariquiro ni ojoariro sahata. Ohō saha ni ojoahye panopū:

Queoye mehna yahutja. Cohācjū ahri yehpare tiquiro bajumehnedi bato ne masare tiquiro yahuerarire yahutja, ni ojoahye Cohācjū yere yahu mūhtariquiro manano.

Trigo watoa taa diari queoyere yahu pehoahye

³⁶ Sa ye masare cohe ti, wuhupū sajāa wahari Jesu. Sa yena usā tiquiro buhena tiquiro cahapū esa, sinituu usā:

—Trigo watoa taa diari queoyere yahu pehoya usāre, nii usā tiquirore.

³⁷ Jesu yahitiri usāre:

—Wese upuro quehnoañe pjerire oteriquiro yero saha ijiaja yuhū. Yuhū masū Cohācjū ohorigū ijiaja. ³⁸ Wese pehe ahri yehpa yero saha ijire. Quehnoañe pjeri pihniñe uhmuse cjūno pūhtoro ijiropū ijiatiquina yero saha ijire. Taa pehe watīno yequina yero saha ijire. ³⁹ Wese upuro ihña tuhtiriquiro taare oteriquiro watīno yero saha ijire. Tire nedi pje pihitiri deco yero saha ijire. Sa ye trigore neñequina angele yero saha ijire. ⁴⁰ Taare tiquina cure ujūariro saha pihitiri deco iji gū watīno yequinare pecapū cohāeta tiquinare. ⁴¹ Yuhū masū Cohācjū ohorigū yequina angelere ohogutja. Yuhū ohogū angele pehe ñañene ye dutiyequinare, ñañene yeyequinare yuhū pūhtoro ijiropū neañeta. ⁴² Ne sa tuhasa pecapū cohāeta tiquinare. Topū tiquina tutuaro uti, bajūa witiye mehna bahque dihoeta. ⁴³ Sa ye Cohācjū yequina tiquina Pacuro tiquiro pūhtoro ijiropū ijieta. Topū ijiye, asū deco cjūno yero saha quehnoano buhrioeta tiquina. Ahrire quehnoano tuhoya masa, ni yahuri Jesu.

Quehnoa yãhdũyere tiquiro nũorire tiquiro bocari queoyere yahuahye

⁴⁴ Sa ye apeye queoye mehna yahuri tja:

—Ūhmũse cjãno tiquiro pãhtoro ijiye niñeru tiquiro nũori yero saha ijire. Masũno tire wesepũ wacũeno mehna boca, pari turi tire nũo nemoahye. Sa bocaro tutuaro bucueahye tiquiro. Sa yero tiquiro bocarire neno taro, ti wesere dú duahye. Sa yero tiquiro yere dua peho, ti wesere dúahye, ni yahuri Jesu. (Sa nino ohõ saha nino niahye. Ūhmũse cjãno tiquiro pãhtoro ijiye tiquiro bocari yero saha ijire. Tiquiro bocarire tiquiro tutuaro cahmediro sahata ãhmũse cjãnore masa pãhtorore tiquina masidi bato masa tutuaro cahmene tiquirore.)

Wapa bũjuri pje queoyere yahuahye

⁴⁵ Sa ye apeye queoye mehna yahuri tja:

—Ūhmũse cjãno tiquiro pãhtoro ijiye wapa bũjũye pjerire perla wame tiye pjerire dúriquiri yero saha ijire. ⁴⁶ Ti pjerire macano quehnoa yãhdũari pjere bocahe. Bocaro, ti pjere dú duaro, ijiptiye tiquiro yere dua peho wahahye. Sa dua tuhasa ti pjere wapa bũjuri pjere dúahye, nidi Jesu. (Sa nino ohõ saha nino niahye. Ti pjere perla pjere tiquiro cahmediro sahata ãhmũse cjãnore masa pãhtorore quehnoano tiquina masidi bato masa tutuaro cahmene tiquirore.)

Wẽñanũ queoyere yahuahye

⁴⁷ Sa ye apeye queoye mehna Jesu yahuri tja:

—Ūhmũse cjãno tiquiro pãhtoro ijiye wẽñanũ tiquina doque ñodu yero saha ijire. Tũ wẽñanũ mehna peyequina wahi sijoro saha ijiyequinare ñehene. ⁴⁸ Tũ wahpaa wahagũ wahi wejẽñequina

pehe tare padũropũ weje nũjũa, quehnoañequina wahire besere. Quehnoañequinare tiquina pũhũsepũ bese sajãre. Ñañequina wahire cohãre. ⁴⁹ Pihtiri deco ijigũ ohõ saha ijirota. Angele pehe masare beseeta. Ñañequinare ne wioeta quehnoañequina cahapũ ijiyequinare. ⁵⁰ Ne wio, tiquinare pecapũ cohãeta. Topũ tiquina uti, tutuaro bũjũa witiye mehna upiri bahque dihoeta ñañequina pehe, ni yahuri Jesu.

Mũna buheyere, wahma buheye gãhũre yahuahye

⁵¹ Tiquiro sa ni yahuri bato sinituri usãre:

—¿Ahri ijiptiye tũhoajari mũsa? ni sinituri tiquiro.

—Tũhoaja usã, ni yũhtii usã.

⁵² Usã sa nigũ tiquiro yahuri usãre:

—Judio masare buheyequina ãhmũse cjãno tiquiro pãhtoro ijiyere buheye, pũaro buheyere yahure. Mũna buheyere, wahma buheye gãhũre yahure. Tiquina wahũ upãro yero saha ijire. Tiquiro wahapũ ijiyere quehnoañene ne wioro, wahmare, mũna gãhũre ne wiore tiquiro, nidi Jesu usãre.

Jesu Nazarepũ wahahye

(*Mr 6.1-6; Lc 4.16-30*)

⁵³ Ti queoyere tiquiro buheri bato, wahãũ usã tiquiro mehna. ⁵⁴ Waha, tiquiro masari macapũ esau. Topũ esa, judio masa mari buheye wahũsepũ buheri tiquiro. Tiquiro sa buhegũ tũhoye, tũho maria wahari tiquina.

—¿Ahriquiri nohopũ tũhoyari ahri buheyere? ¿Dũhsero quehnoano masi pehoajari tiquiro? Cohãcjũ tutuaye mehna ye ihñore tiquiro basi. ⁵⁵ Ahriquiri taboa dahrariquiri macũno ijire. Sa ye tiquiro pacoro María ijire. Sa ye Santiago, José, Simo, Juda, tiquiro bahana ijire. ⁵⁶ Yojoopũre

tiquiro bahana numia ahri macapũ ijire. Sa yero tiquiro mari yero saha ijiriquiro ijire. ¿Sa ijieperota nohopũ tahoyari tiquiro ahri buheyere? ni yahuducuri tiquina basi.

⁵⁷ Sa ye tiquina tiquirore cahmedari. Tiquina sa cahmedagũ ihñano ohõ saha nidi Jesu tiquinare:

—Cohãcjũ yere yahu mahtariquirore apequina ño peore. Tiquina sa ño peoepegũta tiquiro ya maca cjẽna, tiquiro acaye tiquirore ño peerare. Sa yena yuhũre ño peerare mũsa ohõpũ yuhũ masarigũ ijigũ, nidi tiquiro tiquinare.

⁵⁸ Sa yero tiquirore tiquina wacũ tutueragũ ihñano, ti macapũ Cohãcjũ tutuaye mehna peye tahari ye ihñoadari Jesu.

14

Ñu wame yeriquiro manano yariarire yahuahye

(Mr 6.14-29; Lc 9.7-9)

¹ Ti pjere Herode Galilea cjãno puhtoro Jesu yerire tahooahye. ² Sa tahooro ohõ saha nimahye:

—Ñu wame yeriquiro ijiaga masatjiãno. Sa yero yojopũre tiquiro masari bato ahri tutuayere cõore tiquiro bajumehneñene yero, nimahye Herode tiquiro cahacjẽnare. Jesure “Ñuta ijire”, ni tahotumahye tiquiro Ñure tiquina wejẽdi bato.

³⁻⁵ Sa yero Ñure tiquiro wejẽ dutiatio pano Herode tiquiro baharo Felipe namonore namo tiahye. Tiquiro sa yegũ ihñano Ñu wame yeriquiro Herode pehere ohõ saha nie timahye:

—Muhũ bahũ namonore namo tigũ Cohãcjũ dutiyere yãhdũdcagũ nine mũhũ, nie timahye Ñu.

Tiquiro sa nidi buhiri Herode tiquirore wejẽ duamahye. “ Ñu Cohãcjũ yere yahu mahtariquiro ijire’, ni tahoturi judio masa”,

nino, tiquina pehere cueahye Herode. “Ñure yuhũ wejẽgũ tiquina usuaboaga”, nino tiquinare cueahye. Sa cuero Ñure wejẽ dueramahye. Sa wejẽ dueraperota Herode tiquirore ñehe dũhte duti, peresu yeahye. Tiquiro namono Herodia dutiro mehna sa yeahye Herode. ⁶ Sa ye Herode masa bajuari deco ijigũ bõse deco yeahye tiquiro. Topũ Herodia macono bõse deco wihyequina tiquina ihñonopũ basa ihñeahye. Ticoro sa basa ihñogũ ihñano Herode bucueahye. Sa bucuero ticorore niahye:

⁷ —Cohãcjũ mehna poto niita niaja. Yuhũre mũhũ sinino punota ohogũtja yuhũ mũhũre, niahye Herode pehe Herodia maconore.

⁸ Tiquiro sa nigũ tahoro Herodia ticoro maconore ticoro siniatire yahuahye ticorore. Ticoro sa yahugũ ticoro macono pehe ohõ saha ni siniahye Herodere.

—Ñu wame yeriquiro dapure dũte sure dutiya. Sa yegũ waparo mehna tiquiro dapure ohoya yuhũre, niahye ticoro.

⁹ Ticoro sa nigũ tahoro Herode tutuaro bũjũ witiahye. Masa tiquina ihñonopũ “Ohogũtja mũhũre”, niahye tiquiro. Sa yero tiquiro bũe tiro “Mũhũre ohoeraja”, ni masiedahye ticorore. Sa yero ticoro dutiriro sahata Herode pehe tiquiro cahacjẽnare Ñure wejẽ dutiahye. ¹⁰ Sa yero Ñu dapure dũte sure dutiahye. ¹¹ Sa dũte sure tuhasa, waparo mehna tiquiro dapure ne cãhtahye tiquina. Herodia maconore tiquiro dapure tiquina ohogũ, ticoro pehe ticoro pacorore yãhdũoahye tja.

¹² Tiquina sa yeri bato Ñu buheyequina ahta, tiquiro pagure masa coperpũ nea cũahye. Sa cũ tuhasa, tiquina tire Jesure yahuye wihiri.

Cinco mil masare ihyaye ohoahye Jesu

(Mr 6.30-44; Lc 9.10-17; Jn 6.1-14)

¹³ Tiquina sa ni yahugū tūhoro, Jesu usā mehna yucūsapu sajā, masa marienopu siho wahari. Jesu topu wahagū tūhoye, masa tiquina ye macaripu ijiriquina ahta, mahapu tiquirote nūnū tā cāa wahari. ¹⁴ Sa yero usā wahā sari bato tiquiro peyequina masare ihñano, paja ihñari tiquinare. Sa paja ihñano tiquina mehna cjēna dohatiyequinare yūhdugū yeri. ¹⁵ Namicahapu usā tiquiro buhena tiquirote ohō saha nii:

—Namicahapu waharo nine. Ohō masa marienopu ijire. Sa yegu macaripu masare tiquina ihyatire dú dutiya tiquina pohe tiatire, nimi usā tiquirote.

¹⁶ Jesu yūhtiri usāre:

—Wahaeracāhdo tiquina. Mūsa basita ihyayere ohoya tiquinare, nidi usāre.

¹⁷ —Ihcā omope paca pā paca, wahi puaro to punota ijire usāre, ni yūhtii usā.

¹⁸ —Tire yūhure ne cāhtaya mūsa, nidi usāre.

¹⁹ Tiquiro sa nigū tūhona neau usā. Usā ne sari bato taa bui masare tiquiro duji dutiri. Tiquina dujigū ihcā omope paca pā pacare, puaro wahire ne, ūhmūsepū ihña mūo, Cohācjāre “Quehnoare”, nidi. Sa ninota pā pacare nuhano, usāre tiquiro buhenare oho. Tiquiro sa ohogū usā pehe tire masare itii. ²⁰ Sa ye ijipihtiyequina quehnoano ihya, yapi yūhdūa wahari. Tiquina yapi wehorire doce pūhase waro ne cahmecoa, wahpo dapou usā tiquiro buhena. ²¹ Topu tire ihyariquina ūmūa dihitare queogū cinco mil ūmūa ijiri. Numia, macanagā gāhū ijiri.

Jesu aco bui tiniahye
(Mr 6.45-52; Jn 6.16-21)

²² Came usāre tiquiro buhenare Jesu ditara ape sie pahrepu pehāyu dutiri masare tiquiro cohe tiri watoa. ²³ Cohe ti tuhasa, cūnūpu mūja, Cohācjāre sinino wahahye. Namine topu tiquiro ihcāquiota ijiahye. ²⁴ Ti pjeta ditara decopu yucūsa mehna pehāducuna nimi usā. Wihnono tutuaro ahta, pahcōri bujūye wahcā, yucū sare quē sajāri. ²⁵ Sa wahagū bohrea mūja tato pano Jesu aco bui tini cāhtari usā cahapu. ²⁶ Usā cahapu tiquiro ahtagū ihñana cue nii usā. Sa cuena sañuducumi usā.

—Yariariquiro mūnāno pagu ijire, ni sañuducumi usā.

²⁷ Usā sa cuegū ihñano Jesu ohō saha nidi:

—Ne yūhure ihña cueracāhña. Yūhuta ijiaja, nidi usāre.

²⁸ Tiquiro sa nigū tūhoro Pedro nidi tiquirote:

—Pūhto, potota mūhuta ijigū, aco bui yūhure mūhū cahapu ducu cā dutiya, nidi tiquiro.

²⁹ —Ahtaya, ni yūhtiri tiquiro pehe.

Tiquiro sa nigū Pedro yucū sare dijia, aco bui Jesu cahapu ducu cāmedi. ³⁰ Wihnono tutuaro ahtagū ihñano cueri tiquiro. Sa cuero diha dijiaa wahamedi.

—Yūhure yedohoya pūhto, ni sañuducuri tiquiro Jesure.

³¹ Tiquiro sa nigūta tiquiro omocare űehe,

—Mehenogā wacū tutuare mūhū yūhure. ¿Dūhsegu yūhure wacū tutuerajari mūhū? nidi tiquiro Pedre.

³² Tiquiro sa nidi bato yucūsapu sajāri tiquina. Tiquina sa sajāri bato wihnono yūhdūa wahari. ³³ Sa yena usā tiquiro buhena yucūsapu ijina Jesure űo peou.

—Potota mūhū Cohācjā macūta ijire, nii usā tiquirote.

Genesare cjēna dohatiyequinare yuhduohaye Jesu
(Mr 6.53-56)

³⁴ Sa yeri bato pehã, Genesare wame tiri yehpapu esau. ³⁵ To cjēna Jesure ihña masidi. Sa masiñe tiquiuro cahapu ijiyequinare dohatiyequinare ne cãhta dutiri. Sa ye tiquina dohatiyequinare tiquiuro cahapu ne cãhtari.

³⁶ —Mũhu suhtiro dũhtũ caha dihitare usãre ñehe tuhu dutiya, ni sinidi tiquina Jesure.

Sa ye tiquiuro suhtirore ñehe tuhuriquinape topequinata quehnoa wahari.

15

Masa ñañequina wahagũ yeyere yuahaye Jesu
(Mr 7.1-23)

¹ Sa ye Jerusalē cjēna, fariseo masa, marine judio masare buheyequina mehna Jesu cahapu wihiye, sinituri tiquiore:

² —¿Dũhse ijiro boro mari acaye bucũna mũnapu tiquina dutirire yerajari mũhu buheyequina pehe? Tiquina ihyato pano tiquina dutiriro sahata omo coserare, nidi tiquina Jesure.

³ Jesu yũhtiri tiquinare:

—¿Dũhse yena mari acaye panopu cjēna ye dutiye dihitare yena tana Cohãcjũ ye dutiye pehere yerajari mũsa pehe? ⁴ Ohõ saha nine Cohãcjũ: “Mũsa pacũsumũare ño peoya”, nine. Sa yero “Ihcãquiuro tiquiuro pacũsumũare ñañene qũti dahreriquiro ijiro ti buhiri apequina tiquina wejẽatiquiuro ijirota”, nine Cohãcjũ. ⁵ Tiquiuro sa niepegũta ohõ saha ye dutire mũsa pehe tiquina pacũsumũare yedoho dutierana: Tiquina pacũsumũare ohoborire Cohãcjũ pehere oho dutire mũsa. Sa ni buhemene mũsa. ⁶ Sa buhena tiquina pacũsumũare ño peogũ yerare mũsa. Mũsa sa yena Cohãcjũ dutiyere yuhduũcana nine mũsa,

mari acaye panopu cjēna ye dutiye dihitare yena. ⁷ Masa tiquina ihñono dihita quehnoano iji mehona ijire mũsa. Cohãcjũ yere yahu mũhtariquiuro Isaia mũsare potota yahu ojoahye panopure:

⁸ Ahriquina masa yũhare quehnoano yahuducuepeta yũhare ne ño peerare. ⁹ Sa ye yũhare tiquina ñu buheye ne dũhseati ijierare. “Cohãcjũ ye dutiye ijire ahri”, ni meho buhere tiquina ye buheye pehere, ni ojoahye Isaia, nidi Jesu fariseo masare, mari judio masare buheyequina gũhare.

¹⁰ Sa ni tuhasa tiquiuro cahapu masare pijio, ohõ saha nidi:

¹¹ —Tũhoya mũsa. Yũhu niñene quehnoano masiña mũsa. Mũsa dũserire sajiñe pehe mũsa ihyaye pehe mũsare ñana ijigũ yerare. Mũsa ñañe yahuducuye pehe mũsa dũseri wijiaye pehe mũsare ñana ijigũ yere, nidi Jesu.

¹² Tiquiuro sa ni buheri bato usã tiquiuro buhena pehe tiquiore yahuu.

—Mũhu sa nigũ tũhoye fariseo masa usuari, ni yahuu usã tiquiore.

¹³ Tire tũho, ohõ saha ni yũhtiri usãre:

—Tiquina fariseo masa taa yero saha ijire. Yũhu Pacũ uhmũse cjũno ijipihtiyere oteyere tiquiuro oterarire nũhcori mehnata cure, cohãnota. Sata yerota tiquinare. ¹⁴ Tiquinare sa ihña cãhña mũsa. Tiquina caperi bajueyequina tiquina ihña masiedaro saha ne Cohãcjũ yere masiedare. Sa ye pecapu wahaeta. Sa masiedapeta apequina masieñequinare buhe duamedì. Sa ye caperi bajueyequina coperu tiquina boraboriro saha tiquina buhenohriquina gũhu pecapu wahaeta, nidi Jesu.

15 Tiquiro sa nigū tūhoro Pedro nidi:

—Ahri quitire masa tiquina duseri wijiaye quitire yahu nemoña usāre tja, nidi tiquiro Jesure.

16 Jesu yūhtiri:

—¿Ne, yojopū tūhoerajari mūsa?

17 Masa ihyayere ihyagū tiquina duseripū sajāre. Sa ye tiquina paapū sajā, yūhdūa wahare. Ihyo waro ijire. Mari ihyaye marine ñana wahagū yerare. ¿Ahrire masiedajari mūsa? 18 Masa duseripū wijiaye, tiquina yahuducuye pehe tiquina tūhotuyepū ahtare. Tiquina yahuducuye pehe ñañe ijiro, masare ñañequina ijigū yere. 19 Ñañe tūhotuye, masare wejēñe, apequiro namono mehna ñano yeye, ñano yeye numia mehna ñano yeye, yaqueye, ni mehoñe, masare ñañe quitī dahreye masa tūhotuyepū ahtare. 20 Ti ñañe pehe masare ñañequina ijigū yere. Sa yepegūta bācūna yee tūhoro sahata masa omo coserapeta tiquina ihyagū ti masare ñañequina ijigū yerare, nidi Jesu.

Judio masono ijiericoro Jesure wacū tutuahye

(Mr 7.24-30)

21 Sa ni buhe tuhasa, usāre siho wahari tja. Tiro wame tiri maca cahapū Sidō wame tiri maca cahapū esañ usā. 22 Usā topū esagū Canaa yehpa cōno topū ijiricoro Jesu cahapū esa, sañuducuri:

—Pūhto, Davi panami iji turiagu masare yūhdūoacjū, yūhūre paja ihñāñā mūhū. Yūhū maco wafīnōre cūoro, ña yūhdūaro yūhdūri ticoro, ni sañuducuri ticoro.

23 Ticoro sa niepegūta Jesu yūhtierari. Sa yegū ihñāna usā tiquiro buhena pehe tiquirore ohō saha nimi.

—Waha dutiya ticorore. Ñano cariboro bisiaga, nimi usā.

24 Usā sa nigū tūhoro yūhtiri ticorore:

—Israe masare Cohācjāre masieñequina dihitare yedoho dutiro ohori yūhū Pacū yūhūre, nidi tiquiro.

25 Tiquiro sa niepegūta Jesu dahpocāri cahapū dūsepe curi mehna quehe sari ticoro.

—Pūhto, yedohoya yūhūre, nidi ticoro.

26 Jesu yūhtiri ticorore.

—Ohō saha ijire ahri: Coā warore wūhū upūro pohne ye ihyayere diayeare oho māhtagū quehnoaedare. Israe masa yere ape yehpa cjenare yūhū oho māhtagū quehnoaedare, nidi Jesu ticorore queoye mehna yahuro.

27 —Sata ijire pūhto. Sa ijiepegūta diayea gūhū wūhū upūro mesa docapū tiquina ihya site boroyere ihya cohtere tiquina gūhū. Ape yehpa cjo yūhū ijiepegūta yūhū gūhūre yedoho masine māhū, ni yūhtiri ticoro.

28 Ticoro sa nigū tiquiro yūhtiri:

—Numio, māhū yūhūre tutuaro wacū tutuare. Māhū cahmeno sahata sa waharota, nidi Jesu ticorore.

Tiquiro sa nigūta duita quehnoa wahari ticoro macono.

Peyequina dohatiyequinare yūhdūgū yeahye Jesu

29 Sa ni tuhasa usāre siho waha, Galilea wame tiri ditara dūhtū cahapū siho esari tja. Esa, mehenūgā cūnare mūja, tū buipū dūjiri. 30 Topū tiquiro ijigū peyequina masa tini masieñequinare, caperi bajueyequinare, pari yuri wahayequinare, yahuducu masieñequinare, peyequina apequina dohatiyequinare tiquiro cahapū ne wihiri masa. Ne wihi tuhasa Jesu dahpocāri cahapū duhu cūri tiquina. Tiquina sa duhu cūri bato quehnoa wahagū yeri Jesu tiquinare. 31 Tiquiro sa yegū ihñāñe masa ihñā maria wahari. Yahuducu masieñequina tiquina yahuducugū ihñāñe, pari yuri

wahayequina tiquina quehnoa wahagū ihñañe, tini masieñequina tiquina tinigū ihñañe, caperi bajueyequina tiquina ihñagū ihñañe, ihña maria wahari tiquina. Sa ye ohō saha nidi:

—Israe masa usā pūhto, Cohācjū tutuagū, quehnoagū ijire, ni ño pe-ori tiquina Cohācjūre.

Cuatro mil masare ihyayere ohoahye Jesu

(Mr 8.1-10)

³² Tiquiro sa yeri bato Jesu usāre tiquiro buhenare ohō saha nidi:

—Ahriquina masa yūhū mehna ihtia deco waro iji tuhasare. Sa ye pohe mariedare tiquinare. Pohe mariedagū ihñagū tiquinare paja ihñaja. “Tiquina uña ah-bayequina, mahapū borari”, nigū tiquinare ihyaye marieno tiquina ye wāhūsepū waha duti dueraja. Sa yegū tiquinare pohe oho duaja, nidi tiquiro.

³³ Tiquiro sa nigū usā tiquiro buhena tiquirore sinituu:

—¿Dūhse mari ohōre masa marienopāre pāre boca ohobogari mari? nii usā tiquirore.

³⁴ —¿Nohope paca pā pacare cūojari mūsa? nidi.

—Siete pā pacare, meheñequinagā wahire cūojaja, ni yūhtii usā.

³⁵ Usā sa nigū tiquiro masare yehpapū duji dutiri.

³⁶ Tuhasa siete pā pacare, wahigā gūhūre ne, Cohācjūre “Quehnoare”, nidi. Sa ninota pā pacare nuha, usāre tiquiro buhenare ohori. Sa yena usā pehe ti ihyayere masare itii.

³⁷ Sa ye masa tire ihya, yapi yūhdūa wahari. Tiquina yapi wehorire siete pūhūse waro ne cahmecoa, wahpo dapou usā.

³⁸ Topū ih-yariquinare amūa dihitare queogū cuatro mil waro amūa ijiri. Numia, macanagā gūhū ijiri.

³⁹ Tiquina sa ihya tuhasagū Jesu masare waha duti, yucūsapū sajā, Magadán wame tiri yehpapū usāre siho esari.

16

Fariseo masa, saduceo masa gūhū Cohācjū tutuaye mehna ye ihñogū ihña duamahye

(Mr 8.11-13; Lc 12.54-56)

¹ Sa ye fariseo masa, saduceo masa mehna Jesu cahapū wihiri. Tiquiro ñano yegū ihña duamedi tiquirore yahusā duaye. Sa ye tiquina tiquirore Cohācjū tutuaye mehna ye ihño dutimedi tiquiro masiedagū ihña duaye, “Cohācjū ohoriquiro ijierare”, ni duaye.

² Tiquina sa ye dutigū Jesu yūhtiri tiquinare:

—Ñamicahapū ahmūano sohāgū ihñana “Quehnoari ñami ijirota”, nine mūsa.

³ Sa yena bohrearo ahmūano sohāgū, ñicuri deco ijigū ihñana “Acoro ahtarota”, nine mūsa. Sa quehnoano masiepenata Cohācjū tutuaye mehna mū sare yūhū ye ihñogū ihñaepenata ne tire quehnoano masiedare mūsa.

⁴ Yojopū cjēna ña yūhdūyequina Cohācjūre ño peo dueyequina Cohācjū tutuaye mehna ye ihñogū ihña duamene. Ye ihñosi yūhū. Cohācjū yere yahu māhtariquiro Jona tiquiro dūhse waharire masi tuhasare mūsa. Ti dihitare ihñoutja mū sare, ni yūhtiri Jesu.

Sa ni yahu tuhasa siho wahaa wahari tja.

Fariseo masa saduceo masa tiquina ñañe buheyere yahuahye Jesu

(Mr 8.14-21)

⁵ Ditarare usā pehāna, pāre bo cū cā, pehā tari jii usā.

⁶ Sa yero Jesu usāre yahuri:

—Quehnoano yeya. Fariseo masa, saduceo masa tiquina ye pā pugū yeyere ihñana quehnoano yeya. Cuarīne ti, ni yahuri.

⁷ Tiquiro sa nigū tūhona tūho masiedana, usā basi tire yahuducū:

—Mari pāre mari ne cāhtaeragū ihñano sa niaga ahriquiuro, nimi usā basi.

⁸ Usā sa nidire masino, usāre sinirituri:

—¿Duhseña masa pā borire wacūajari masa? Mehenogā waro yahure wacū tutuare masa.

⁹ ¿Yojopu masiedajari masa? ¿Cinco mil amuare ihcā omope pā pacare yuhu nuha ohorire, numia gūhure yuhu ohorire wacūedagari masa? ¿Nohope puhuse waro masa ne cahmecoa wahpo daporire wacūedagari masa?

¹⁰ ¿Sa yegu siete pā pacare nuha, cuatro mil amuare yuhu ohorire, numia gūhure yuhu ohorire wacūedagari masa? ¿Nohope puhuse waro masa ne cahmecoa wahpo daporire wacūedagari masa?

¹¹ ¿Sa yena pā pugū yeyere yuhu yahugū duhse yena quehnoano tuhoerajari masa? Sa nigū pā warore nigū niedaja. Fariseo masa, saduceo masa tiquina pā pugū yeyere ihñana quehnoano yeya. Cuarīne ti, ni yahuri usāre tiquiuro.

¹² Tiquiro sa ni yahugūpu usā masii. “Pā pugū yeye”, nino pā warore nino niedari. Sa nino fariseo masa, saduceo masa tiquina buheyere nino nidi. “Tiquina ye buheyere tuhoeracāhña”, nino nidi.

Jesu poto Cristo tiquiro ijyere Cohācjū ohoriquiro tiquiro ijyere yahuahye Pedro

(Mr 8.27-30; Lc 9.18-21)

¹³ Sa ye Jesu mehna wahana, Cesarea Filipino wame tiri maca cahapu ijiye macaripu esau usā. Sa yero macapu sajā sari bato Jesu usāre tiquiro buhenare sinirituri:

—¿Noa boro ijiagari yuhu, masa yahure tiquina tuhutugū? ni sinirituri tiquiro.

¹⁴ —“Ñu wame yeriquiro ijire”, nine mahure. Apequina “Elia ijire”, nine. Apequina “Jeremia

ijiboaga o apequiuro Cohācjū yere yahu mahitariquina mehna cjūno manano ijiiboaga”, nine, ni yuhtii usā tiquireore.

¹⁵ —¿Masa pehe masa tuhutugū noa boro ijiagari yuhu? ni, sinirituri tiquiro.

¹⁶ Simo Pedro yuhtiri:

—Mahu Cristo Cohācjū ohorigu ijire. Cohācjū catiriquiro waro macu ijire mahu, ni yuhtiri Simo Pedro.

¹⁷ —Simo Ñu macu mahu bucuegu ijire. Ohō saha ni mahu yahure yuhtiyē masa tiquina yahuri ijiare. Yuhu Pacu ahmuse cjūno pehe tire mahure masigū yeri. ¹⁸ Mahure niita niaja. Mahu Pedro wame tigu ijire. (Pedro nino utā nino nine.) Ahri utā paa bui tutuari wahure yuhu yeboriro saha yeequina pehere wacū tutuayequina ijigū yeitja yuhu. Sa ye yeequina ne pecapu wahasi.

¹⁹ Hmuse cjūno mari puhtoro ijiro cjā sawire mahure ohoutja. Sa yegu ahri yehpare mahu ye dutieragū ahmusepu gūhure ye dutisi. Ahri yehpare mahu ye dutigū ahmusepu gūhure ye dutiye ijietā, nidi Jesu.

²⁰ Tiquiro sa nidi bato usāre tiquiro buhenare ohō saha nidi:

—Yuhure “Cristo ijire tiquiro”, ni yahu sitenedacāhña apequinare, ni, dutiri usāre.

Jesu tiquiro yaria masa wijiatire yahuahye

(Mr 8.31-9.1; Lc 9.22-27)

²¹ Ti pjeta Jesu usāre tiquiro buhenare quehnoano yahu peho ducari:

—Jerusalēpu yahure waharo cahmene yojopure. Topu judio masa mari bucuna, mari pahia puhtoā, marine judio masare buheyequina gūhu yahure ñano yeeta. Yuhure wejēeta. Sata ñano yuhuro cahmene yuhure. Sa yegu ihtia deco wahaboro masa wijiağata, ni yahuri usāre tiquiro.

22 Tiquiro sa nigū tūhoro Pedro pehe ape sie cǵūnogā Jesure ne saduca, tiquirore ohō saha nidi:

—Pūhto, mūhu nino saha sa wahaeracāhdo. Mūhare tiquina wejēdacāhdo, nimesi tiquiro Jesure.

23 Tiquiro sa nigū tūhoro Jesu mareduca, tiquirore ohō saha nidi:

—Satana yero saha yahuducugū nine mūhu. Sa niedacāhña. Mūhu tūhotuye masa ye ijire. Cohācǵū ye ijierare. Sa yegū yūhu yeatire cahmota duare mūhu, nidi Jesu Pedre.

24 Tiquiro sa nidi bato usāre yahuri:

—Ihcāquiro yaquiro iji duaro, tiquiro cahmeno ye duamedire duhu cānota. Sa yero yaquiro tiquiro ijiri buhiri ñano yahduerota yūhare duhusi. Sa yero yeere yeducuriquiro ijirota. 25 Masano yūhare wacūno marieno tiquiro esa tuharo tiquiro cahmeno sahata yero, pecapū waharota. Sa yero yeere masano sa yeducuriquiro ijipihtiyē decori yūhu mehna ūhmasepū ijirota tiquiro. 26 Ĵhcāquiro masano ahri yehpa cǵēne ijipihtiyere cūoriquiro Cohācǵūre cahmedaro pecapū waharo, yabere wapatajari tiquiro? Sa ijiriquiro ne wapataerare. Pecapū tiquiro jeripohna wahagū ne dūhse wapa ye wioro basioerare. 27 Yūhu masū Cohācǵū ohorigū yeequina angele mehna ahri yehpapū tojoa tagū yūhu Pacū asi siteye mehna tojoa tagū ijipihtiyequina masare tiquina ñañe yerī buhiri buhiri dahreitja. Tiquina quehnoañe pehere yegū quehnoano yeitja tiquinare. 28 Ijirota mūsare yahutja. Ihquēquina mūsa ohōpūre ijina mūsa yariato pano yūhare yūhu pūhto saǵgū ihñanata, ni yahuri Jesu.

17

Jesu tiquiro pagūre comesahye
(Mr 9.2-13; Lc 9.28-36)

1 Sa ye seis decori bato Jesu Pedre, Santiagore tiquiro baharo Ñu gūhare ūhmuanū cūnupū tiquina dihitare piji mājari.

2 Ūhmuanopū tiquina esari bato tiquina ihñonopū tiquiro pagūre comesahye. Tiquiro wāhdoa asū deco cǵāno yero saha asi siteahye. Sa yero tiquiro suhtiro buhrioro yero saha yehsero wahahye.

3 Sa ye Jesu Moise mūnāno, Elia mūnāno mehna tiquina yahuducugū ihñahye tiquina ihtiaro buheyequina. 4 Sa yero Pedro Jesure nimahye:

—Pūhto, mari ohōpū ijigū quehnoa duare. Mūhu cahmegū ihtia wāhugā yeitja. Mūhu ya wāhugā, Moise ya wāhugā, Elia ya wāhugā yeitja, nimahye tiquiro.

5 Tiquiro sa ni yahuducuri watoa ehmeo quehnoano asiye ehmeo tiquinare cahmotahye. Sa wahagū ehmeo watoapū yahuducuye bisiro ca tahye.

—Ahriquiro yūhu macū yūhu cahñiquiro ijire. Tiquiro mehna bucueaja. Tiquirore tūhoya, ni yahuducuro ca tahye.

6 Sa nigū tūhoye tiquiro buheyequina tūho maria waha, yehpapū doque quehe sahye. 7 Tiquina sa wahari bato Jesu tiquina cahapū esa, tiquinare buacarero, ohō saha niahye:

—Wahcādūcaya mūsa. Yojopūre mūsa ihñarire, mūsa tūhori gūhare cueracāhña, niahye tiquiro tiquinare.

8 Tiquiro sa nigū tiquina ihña wahcō, Jesu dihitare ihñahye. Tiquina ihñariquina pehe mariedahye.

9 Sa ye cūnupū tiquina dijia tagū Jesu tiquinare tutuaro mehna niahye:

—Mianogāta yuh̄u sa waharire apequinare yahueracāh̄ña. Yuh̄u mas̄u Cohācjū ohorigu yuh̄u yaria masa wijari batopu tire apequinare yahuya m̄usa, niah̄ye Jesu.

¹⁰ Tiquiro sa nidi bato Pedro gūhu tiquirore sinituah̄ye:

—“Cristo masare yuh̄duoatiquiro tiquiro ahtato pano Eliare ahta m̄ah̄tano cahmene”, nine marine judio masa buheyequina. ¿Duh̄se ijiro boro sa niajari tiquina? ni sinituah̄ye tiquina tiquirore.

¹¹ Jesu yuh̄tiahye:

—Potota ijire. Eliare ahta m̄ah̄ta dutiri Cohācjū, ijipih̄tiyere quehno m̄ah̄tatiquirore. ¹² Ohō saha niḡu m̄usare niḡu niaja. Elia wih̄i tuhasari. Tiquiro sa wih̄iepegāta tiquina tiquirore ne ih̄ña masiedari. Sa ye tiquina duh̄se ye duaro yeri jiri tiquirore. Sata yeeta yuh̄u gūh̄ure. Yuh̄u mas̄u Cohācjū ohorigu ijiaja. Tiquina sa yegū ñano yuh̄duḡtja yuh̄u, niah̄ye Jesu.

¹³ Tiquiro sa ni yahugū tiquina quehnoano tūhoah̄ye. “Elia”, nino, Ñu wame yeriquirore nino niah̄ye. Tire masiah̄ye tiquina.

Jesu wat̄nore c̄oriq̄uoro yuh̄duoah̄ye

(Mr 9.14-29; Lc 9.37-43)

¹⁴ Sa ye peyequina masa cahapu tiquina dijia tagū ih̄ñano ih̄cāquiro am̄no Jesu cahapu esa, dūsepe curi mehna quehe sari.

¹⁵ —Puhto, yuh̄u mac̄ure paja ih̄ñaña. Tiquiro ñama yariayere dohatiriquiro ijire. Sa yero ña yuh̄duaro yuh̄dure. Peye tahari pecapu bora sa quehea m̄ujare tiquiro. Ih̄quē tahari diapu bora ñojoa m̄ujare. ¹⁶ Sa yegu m̄uh̄u buheyequina cahapu tiquirore ne sami. Tiquina tiquirore yuh̄duo masiedari, nidi tiquiro Jesure.

¹⁷ Jesu yuh̄tiri:

—Yojopu c̄jana, ñana ijire m̄usa. Yuh̄ure ne wacū tutuerare. Yoa

yuh̄duari pje m̄usare buhemi yuh̄u. ¿Noho puno yoari pje yuh̄ure m̄usa cariboajari? Tiquirore ne cāhtaya yuh̄ure, nidi Jesu.

¹⁸ Sa yero wat̄nore tiquiro tuhtigāta wat̄no pehe mas̄no mehna ijiriquiro wahaa wahari. Sa wahari batogāta quehnoa wahari tiquiro.

¹⁹ Came us̄a tiquiro buhena us̄a seh̄saro ijina Jesure sinituu:

—¿Duh̄sena us̄a pehe ahriquiro pehere wat̄nore cohā masiedari, m̄uh̄u tūhotugū? ni sinituu us̄a.

²⁰ Jesu yuh̄tiri:

—Yuh̄ure mehenogā wacū tutuare m̄usa. Poto m̄usare yahugūta niaja. Mostaza capegā meheni pjegā ijire. Ti yero saha Cohācjūre mehenogā m̄usa wacū tutuana ohō saha wahagū ye masinata m̄usa. Ahd̄u c̄anure “Sohōpu wahaya”, m̄usa nigū, waharota. Cohācjūre sata wacū tutuana, ijipih̄tiyere ye masine m̄usa. [²¹ Sa ijepegāta ahriquiro boro wat̄nore m̄usa cohā duana Cohācjūre tutuaro sinino cahmene m̄usare. Sa ye duana sijiro cahmene m̄usare Cohācjūre sinina tana,] nidi Jesu us̄are.

Pari turi Jesu tiquiro yaria masa wijiatire yahuah̄ye

(Mr 9.30-32; Lc 9.43-45)

²² Sa ye Galilea yehparu us̄a tinigū, Jesu us̄are yahuri:

—Yuh̄u mas̄u Cohācjū ohorigu ijiaja. Masa yuh̄ure ñehe, apequinapure yuh̄ure ohoeta. ²³ Sa tiquina ohori bato yuh̄ure wejēta. Sa tiquina wejēgū ihtia deco wahaboro masa wijagūta, ni yahuri tiquiro us̄are.

Tiquiro sa ni yahugū tutuaro būjua witi us̄a.

Cohācjū wuh̄u c̄jē wapare sinituah̄ye apequina

²⁴ Sa yena Capernaup̄u sajā sagū, Cohācjū wuh̄u c̄jē ijiatire wapa ne cohteyequina Pedro cahapu esa, tiquirore sinituah̄ye.

—¿M̄sare buheriquiro Cohāc̄jũ w̄hũ cj̄e wapa ijiatire wapa yeajari tiquiro? ni sinituahye tiquina.

²⁵ —Wapa yere tiquiro, ni yũhtiahye Pedro.

Tiquiro sa nidi bato w̄hũpũ tiquiro sajāgũ Jesu sinitu m̄htahye Pedore:

—¿Simo d̄hse ni t̄hotuajari m̄hũ? ¿Ahri yehpa cj̄ena p̄htoa yabequina pehere wapa neajari, m̄hũ t̄hotugũ? ¿Tiquina mehna cj̄enare wapa neajari? ¿O ape yehpa cj̄ena pehere wapa neajari, m̄hũ t̄hotugũ? ni sinituahye tiquiro Pedore.

²⁶ —Ape yehpa cj̄ena pehere wapa nene, ni yũhtiahye Pedro.

Tiquiro sa nigũ Jesu yahuahye:

—Sa yero p̄htoro tiquiro ya yehpa cj̄enare wapa nedari. ²⁷ Sa ijiepegũta wapa ne cohteyequinare usuagũ ye dueraja mari. Sa yena wapa yenata. Ditarapũ wahaya. Топ̄ esa, yohyeri dare doque ñoña. Sa yegũ wahi m̄hũre ihyariquirore weje n̄oña. Tiquiro d̄seropũ niñeru cjoere bocaguta m̄hũ. Ti cjoe queoro wapa tiri cjoe ijirota. Yũh̄are, m̄hũ ḡh̄are Cohāc̄jũ w̄hũ cj̄ena tiquina wapa negũ quehnoano queoro esa tuharota ti cjoe. Ti cjoere bocagũ mari wapamonore wapa yegũ wahaya, niahye Jesu Pedore.

18

Jesu buheyequina tiquina mehna cj̄anore p̄hto s̄o duamahye

(Mr 9.33-37; Lc 9.46-48)

¹ Ti pjere us̄a tiquiro buhena Jesu cahapũ esa, sinituu tiquirore:

—¿H̄m̄use cj̄ano p̄htoro ijiropũre us̄a mehna cj̄ano noa wahaboagari p̄htoro? ni sinituu us̄a.

² Us̄a sa nigũ Jesu nijinoḡare pijio, tiquiroḡare us̄a caha duhu docori. Duhu doco tuhasa, us̄are nidi:

³ —Poto m̄sare yahuḡtja. Ahriquina macanaḡa Cohāc̄jũre

tiquina p̄htoro waro t̄hoture. Sa yena m̄sa ḡhũ tiquina yero saha t̄hotuna, quehnoañene comesana, h̄m̄use cj̄ano p̄htoro ijiropũre wahanata. Tiquina yero saha t̄hotuerana p̄htoro tiquiro ijiropũre wahasi m̄sa. ⁴ Sa yero h̄m̄use cj̄ano p̄htoro ijiropũre sa t̄hotu c̄ariquiro ahriquiro nijinoḡa yero saha t̄hoturiquirota apequina bui p̄htoro wahare. ⁵ Sa yena yeere yena tana oh̄o saha ijieyequinaḡare cahmena, yũhũ ḡh̄are cahmene m̄sa, ni yahuri Jesu.

Ñañene yegũ cuar̄ine

(Mr 9.42-48; Lc 17.1-2)

⁶ Sa yero tiquinare yahu nemori:

—Ahriquiroḡa yero saha ijiriquiro yũh̄are wacũ tutu-ariquiroḡare yahutja m̄sare. Apequiro ahriquiroḡa yero saha ijiriquirore ñañene ye dutiro tiquiro ña yũhd̄uro yũhd̄urota. Tiquiro wam̄are pajiria ut̄are d̄hte yo, pajiri mapũ tiquirore cohāgũ ñano wahaboaga tiquiro. Sa ijiepegũta ahriquiroḡa yero saha ijiriquirore ñañene ye dutiriquiro tiquiro pehe pajiri mapũ tiquina coh̄ariquiro yũhd̄uro ñano yũhd̄urota. ⁷ Masare ñañene yegũ yeye ijire. Tire yeye ahri yehpa cj̄ena ñano yũhd̄ure. Ñañene yeducure masa. Tiquina sa yegũ tiquinare ñañene yegũ yeyequina pehe ña yũhd̄uro yũhd̄ureta.

⁸ M̄hũ omoca mehna ñano yegũ ti omocare m̄hũ d̄ate coh̄oro saha ti ñañene duhuya. Tire duhueragũ pecapũ wahaguta. Top̄are ne peca yatierare. M̄hũ omocare m̄hũ cohāgũ ti si dihita butiboaga. Sa yegũ m̄hũ pehe sa bajuri turu ijiepegũta came Cohāc̄jũ mehna ijiguta. P̄na omoca mehna pecapũ wahagũ m̄hũ sa wahagũ ña yũhd̄uroboaga. Sa yegũ ti ñañene duhuya. M̄hũ dahpoc̄a mehna ñano yegũ ti dahpoc̄a

gũhure mũhu dũte cohãboro saha ti ñañene duhuya. Tire duhueragũ pecarũ wahaguta. Топуре ne peca yatierare. Мũһũ dahpocãre mũһũ cohãgũ ti si dihita butiboaga. Sa yegũ sa bajuri turu ijiepegũta came Cohãcjũ mehna ijigũta. Pũa dahpocã mehna pecarũ wahagũ mũһũ sa wahagũ ña yũhdũaboaga. Sa yegũ ti ñañene duhuya. ⁹ Мũһũ capea mehna ñano yegũ tiare ore we mũһũ cohãboro saha ti ñañene duhuya. Tire duhueragũ pecarũ wahaguta. Топуре ne peca yatierare. Tiare mũһũ cohãgũ tia dihita butiboaga. Ihcã pehe capea mariedapegũta came Cohãcjũ mehna ijigũta. Pũa capea mehna pecarũ wahagũ mũһũ sa wahagũ ña yũhdũaboaga. Sa yegũ ti ñañene duhuya, ni yahuri Jesu.

Oveja butiriquiro queoyere yahuahye Jesu
(Lc 15.3-7)

¹⁰ Sa ni tuhasa ohõ saha ni yahu nemori:

—Ne, ahriquinagãre macanagãre ihña tuhtieracãhña. Mũsare niita niaja yũһũ. Tiquinagã yeequina angele tiquinagãre cohteyequina ʌhmũsepũ ijieyequina pehe yũһũ Pacũ caharũ sa ijiducure. [¹¹ Yũһũ masũ Cohãcjũ ohorigũ ahri yehparũ pecarũ wahaboriquinare yũhdũogũ tũ ni yũһũ,] ni yahuri Jesu.

¹² Sa ni tuhasa tiquiro tãhotuye mehna ohõ saha ni queoye mehna buheri usãre.

—Ovejare cohteriquiro cien ovejare cãoriquiro ihcãquiro oveja butia wahagũ ohõ saha yerota tiquinare cohteriquiro pehe. Apequina ovejare noventa y nueve ovejare tiquina ihyaropũ duhu doco, butiriquirore macano waharota. ¹³ Ijirota nii ni-aja mũsare. Tiquirore bocaro bucueroa tiquiro. Apequina noventa y nueve dũhsayequina mehna bucuero tiquiro. Tiquinare

tiquiro bucuero yũhdũoro butiriquiro pehere bocaro tutuaro bucueroa. ¹⁴ Sata mari Pacũ ʌhmũse cjãno ahriquina ihyo ijieyequina gũhure pecarũ tiquina wahagũ cahmedare, ni yahuri Jesu.

Mũһũ acayũro mũһũre ñano yegũ ohõ saha ye dutiahye Jesu
(Lc 17.3)

¹⁵ Sa ni tuhasa ohõ saha ni yahu nemori:

—Mũһũ acayũro mũһũre ñano tiquiro yegũ tiquiro mehna yahugũ wahaya. Mũsa sehsaro tire yahuya. Mũһũ sa yegũ tiquiro mũһũre tãhoboaga. Tiquiro tãhogũ “Mũһũre ne pari turi ohõ saha yesi yũһũ”, tiquiro nigũ mũһũ acayũrore pari turi piti tigũ niaga mũһũ. ¹⁶ Mũһũre tiquiro tãho dueragũ pũrita ihcãquiro mehna waha duagũ o pũaro mehna waha duagũ tiquinare piti ti cã, pari turi tiquirore yahuna wahaya. Mũsa sa yena pũana o ihtiana tiquirore mũsa yahusãgũ, “Poto tjire”, ni masieta apequina. ¹⁷ Sa yena mũһũ mehna cjẽna gũhure tiquiro tãho dueragũ ijipihtieyequina Jesu yequina cahmecoañequinare yahusãna wahaya. Sa yena Jesu yequina cahmecoañequinare tiquiro tãho dueragũ ihñana Cohãcjũre ño peo dueriquiro tiquiro ijiro saha yeya tiquirore. Wapa ne cohteriquiro tiquiro ijiro saha yeya tiquirore.

¹⁸ Ijirota mũsare niita ni-aja. Ahri yehparũ mũsa Jesu yequina ñañene mũsa ye dutieragũ ʌhmũsepũ gũhure ye dutisi. Ahri yehparũ mũsa quehnoañene ye dutigũ ʌhmũsepũ gũhure ye dutiye ijirota.

¹⁹ Pari turi mũsare yahutja ahrire: Mũsa pũana Cohãcjũre sinigũ, mũsa pũana mũsa sinidire ihcãno saha mũsa tãhotugũ yũһũ Pacũ ʌhmũse cjãno tire yerota.

20 Puharo o ihtiaro yeequina, yeere yeatiquina tiquina cahmecoagū yuhū tiquina mehna ijiaja, ni yahuri Jesu.

Cahacjāno apeqiro tiqiro wapamonore tiqiro bo duerari quitire yahuahye Jesu

21 Came Pedro Jesu cahapū esa, sinituri:

—¿Puhato, yuhū acayuro mūhū yaqiro peye tahari yuhure ñano tiqiro yegū ihñagu nohope tahari tire bogutari yuhū? ¿Siete tahari bogutari yuhū? ni sinituri Pedro.

22 Jesu yuhtiri:

—Siete taharita mūhure apeqiro ñano yerire mūhū bogū to wahaerare. Peye tahari mūhure ñano tiqiro yegū gūhure boya.

23 'Uhmuse cjāno masa puhoro tiqiro ijiye ahri queoye yero saha ijire. Ijipihtiequina masa puhoro tiqiro cahacjēnare tiqirore wapamoñequinare wapa ye peho duti duamahye. 24 Tiquina wapamori tiqiro queo ducagū, tiqirore dahra cohteyequina pehe pajiro wapamoriqirore tiqiro cahapū ne cāhtahye. Wapamoriqiro paji yuhduaro wapamoahye tiqiro puhoro. 25 Sa yero tiqiro wapa ye masiedagū tiqiro puhoro tiqirore, tiqiro namonore, tiqiro pohnene cahacjēna sō, tiquinare apeqinare dua dutimahye. Sa ye ijipihtie tiqiro cūoye gūhure dua dutimahye, tiqiro wapamonore wapa ye peho dutiro. 26 Tiqiro sa dua dutigū pajiro wapamoriqiro pehe dusepe curi mehna quehe sa, tiqiro puhoro tutuaro siniahye: “Puhato, yuhure paja ihñagu cohteniña. Mūhure wapa ye pehoutja”, niahye tiqiro puhoro. 27 Tiqiro sa nigū tuhoro, tiqirore paja ihñano tiqiro wapamonore sata bo cāhye.

28 Tiqiro sa yeri bato wapamoriqiro pehe waha, apeqiro

cahacjānore tiqirore mehenogā wapamoriqirore boca sahye. Sa boca saro wamūa ñeheahye tiqirore. “Yuhure mūhū wapamonore wapa ye pehoya”, niahye tiqiro mehna cjānore tiqiro yero saha ijiriqirore cahacjānore. 29 Tiqiro sa nigū apeqiro cahacjāno pehe dusepe curi mehna quehe sa, tiqirore tutuaro sinimahye.

“Yuhure paja ihñagu mehenogā cohteniña. Mūhure wapa ye pehoutja”, nimahye apeqiro cahacjāno tiqirore. 30 Tiqiro sa ni sieniepegūta yuhtierahye.

Sa yero tiqiro apeqiro cahacjānore peresu ye dutiahye. Tee tiqiro wapa ye pehogāpū wioro taro niahye tiqirore. 31 Pajiro wapamoriqiro mehenogā wapamoriqirore tiqiro sa yegū ihña, usua, apeqina cahacjēna pehe tiquina puhoro yehusāñe wahahye. 32 Tiquina sa ni yahusāgū tuhoro tiquina puhoro tiquina yahusāriqirore pijio, ohō saha niahye: “Mūhū ña yuhduagu ijire. Mūhū yuhure tutuaro sinigū mūhū wapamonore bo pehomi yuhū. 33 Mūhure yuhū sa yepegūta mūhū pehe mūhure wapamoriqirore boerañohti. Mūhū wapamono pehere yuhū boriro sahata tiqiro mūhure wapamono gūhure mūhū bogū quehnoa yuhduaboaga. ¿Duhsegu tiqirore paja ihñedari mūhū, sa yegu?” niahye puhoro tiqirore.

34 Sa nino tutuaro usua, peresu yeahye tiqiro cahacjānore. Tee tiqiro wapa ye pehogāpū wioro taro niahye, ni yahuri Jesu.

35 Sa yero ohō saha ni ahri quitire yahu bato tiri:

—Sata yerota yuhū Pacū uhmuse cjāno mūsare. Mūsa ijipiltina mūsa acaye mūsare tiquina ñano yerire quehnoano mūsa bo pehoeragū tiqiro mūsare buhiri

dahrerota, nidi Jesu.

19

*Tiquina namosānumiare co-
hāñene yahuahye Jesu*

(Mr 10.1-12; Lc 16.18)

¹ Tire tiquiro sa ni yahuri bato tiquiro Galileapu ijiriquiro Judea yehpapu usāre siho wahari. Jordā wame tiri ma ape sie pahrēpu esau usā. ² Topu usā wahagū peyequina masa usāre nūnu tā cāri. Tiquina mehna cjēnare dohatiyequinare yāhdugū yeri tiquiro.

³ Sa ye ihquēquina fariseo masa Jesure yahusā duaye, ñano tiquiro yahuducugū taho duaye, tiquirore sinituri:

—¿Mari namosānumiare cohāgū quehnoaboagari? ¿Mari dutiye pehe sata ye dutiagari, mahu tshotugū? ni sinituri tiquina.

⁴ Jesu yāhtiri:

—¿Cohācjū yere tiquina ojoari pūpu ne ahrire buherari masa? Ohō saha ni ojoahye: “Coā waropure ahri yehpare bajumehnediquiro amuno, numino gūhare yeahye”, ni ojoahye.

⁵ Sa yero ohō saha ni ojoa nemoahye: “Sa yero amuno tiquiro pacusummare cohā wijia, tiquiro namono mehna ijirota. Sa ye tiquina pūaro ijiepetā ihcā pagu yero saha ijire. ⁶ Sa ye tiquina pūaro yero saha ijierare. Ihcā pagu yero saha ijiye nine. Cohācjū tiquiro omoca dāhte dutiyequina ijire. Sa ye tiquinare cahme duhuerare cahmene”, ni ojoahye, nidi Jesu tiquinare.

⁷ Tiquiro sa nigū fariseo masa sinituri tja:

—Mahu ohō saha ni yahuepegūta ohō saha ni ojoahye Moise pehe: “Mahu namonore cohā duagu papa pūre tire ojoaya. Sa ojoagu ti pūre mahu namonore mahu ohori bato ticorore cohā masine mahu”, ni ojoahye Moise. ¿Mahu nino saha ijiepegūta Moise pehe dūhsero ohō

saha ni ojoayari? ni yāhtiri tiquina tiquirore.

⁸ Jesu yāhti cahmedi tiquinare:

—Cohācjūre masa ñecusumma panopu cjēna tiquina taho dueragū ihñano tiquina namosānumiare tiquina cohāgū, “Sata wahacūnahdo”, niahye Moise. Tiquiro sa niepegūta coā waropure ahri yehpare sa ijierari. ⁹ Musare niita niaja. Masano tiquiro namono ticoro ñano yerapegūta ticorore cohāno, apecorore namo tiro, tiquiro apecoro mehna ñano yero nine. [Sa yero ahriquiro cohāricorore namo tiriquiro gūhu ticoro mehna ñano yeriquiro ijire,] nidi Jesu.

¹⁰ Tiquina sa nigū tūhona, usā tiquiro buhena pehe tiquirore ohō saha nii:

—Sata amuno tiquiro namono mehna tiquina cahme cohāedagū mari pehere mari namo tieragū quehnoaboaga, nii usā.

¹¹ Jesu yāhtiri:

—Ihquēquinareta namo ti dutiare Cohācjū. Tiquiro namo ti dutiriquina dihita namo ti-eta. ¹² Umare namo ti dutieraye ihquēgā ijire. Ihquēquina amma numiare cahmeeñequina masa bajuare. Apequina amma masa tiquina apēni tōho tiquina weriquina pehe namo ti masiedare. Apequina amma ahmuse cjāno tiquina pūhoro yere yedoho duaye, namo tierare. Sa ye ahriquina namo ti dueyequina sata tūhotu cāhñequina, sata tiquina sohtori tigū quehnoare, nidi Jesu usāre.

*Macanagā ye ijiatire Cohācjūre
sini basahye Jesu*

(Mr 10.13-16; Lc 18.15-17)

¹³ Sa ye masa macanagāre Jesu cahapu ne wihiri. Sa ne wihiye, tiquina Jesure tiquiro omocare tiquinagā bui ña peo duti duamed. Sa ye tiquinagāre Cohācjūre sini

basa duti duamedi Jesure. Tiquina sa yegū ihñana usā tiquiro buhena tiquinare tuhtimi. ¹⁴ Usā sa tuhtigū ihñano, usāre Jesu ohō saha nidi:

—Macanagā yuhū cahapū ahtaahro. “Waharīsa”, niedacāhña tiquinagāre. Tiquinagā Cohācjūre tiquina pūhtoro tūhoture. Sa ye tiquiro uhmūse cjūno pūhtoro ijīropū ahriquinagā yero saha tūhotuyequina ijire topūre, nidi Jesu usāre.

¹⁵ Sa ninota tiquiro omocare tiquinagā bui ña peo tuhasa, wahaa wahari.

Doeri cjē upūro Jesure sinituahye (Mr 10.17-31; Lc 18.18-30)

¹⁶ Tiquiro sa yeri bato ihcāquiuro Jesu cahapū wihi, sinituri tiquirore:

—¿Ne quehnoagu buhegu, ijipihitiye decori Cohācjū mehna iji duagu, quehnoañene ye duagu dūhse yeboagari yuhū? nidi tiquiro.

¹⁷ —¿Dūhse ijiro boro yuhūre quehnoañene sinituajari mūhū? Cohācjū dihita quehnoariquiuro ijire. Ijipihitiye decori Cohācjū mehna iji duagu tiquiro dutiyere yeya, nidi Jesu.

¹⁸ —¿Dise boro dutiye pehere nigū nijari? ni sinitu nemori tiquiro.

Jesu yūhtiri:

—Masare wejēdacāhña. Wūana tieracāhña. Yaqueracāhña. Ni mehoedacāhña. ¹⁹ Mūhū pacūsumūare ño peoya. Mūhū basi mūhū cahīno saha mūhū cahapū ijīriquiuro gūhūre cahīña. Ahri dutiyere yero cahmene, nidi Jesu.

²⁰ —Ahri dutiyere ne yūhdūcaera tii yuhū. ¿Dūhse ye nemoagari yuhū ijipihitiye decori Cohācjū mehna iji duagu? nidi tiquiro Jesure.

²¹ Tiquiro sa nigū tūhoro Jesu yahu nemori:

—Mūhū ñañe mariegu iji duagu mūhū ye ijipihitiye duagu wahaya. Sa duagu ijipihitiye mūhū wapatarī niñerure pejecūoyequinare ohoya. Mūhū sa yegū pajiro mūhū ye uhmūserū, Cohācjū cahapū ijīrota. Mūhū sa yeri bato yuhū mehna cjū ijīgu ahtaya, ni yahuri Jesu.

²² Tiquiro sa nigū tūhoro tutuaro bujūa witiri. Tiquiro doeri cjē upūro ijipihitiye cūoriquiuro ijiri. Sa yero Jesu yahugū tūhoro tutuaro bujūa witiri. Pejecūoyequinare oho dueraro wahaa wahari.

²³ Tiquiro sa wahari bato Jesu usāre tiquiro buhenare yahu nemori:

—Ijīrota mū sare niita nijaja. Doeri cjē upūro Cohācjū pūhtoro ijīropūre tiquirore waharo basioera cjūre. ²⁴ Mū sare yahu nemoutja: Camello pehe awia copepū tiquiro sajā duagū basioerare tiquirore. Tiquiro sa ijiro yūhdūoro doeri cjē upūro Cohācjūre cahmedaro, Cohācjū pūhtoro ijīropūre waharo basioerare, nidi tiquiro.

²⁵ Tiquiro sa nigū tūhona usā tūho maria waha, usā basi ohō saha nii:

—Aa, dūhse tiquiro nino sahata ijīgū, ne ihcāquiuro masūno Cohācjū cahapū waha masiedaboaga, nii usā basi.

²⁶ Usā sa nigū Jesu usāre ihñano, yahuri:

—Masa tiquina esa tuharo tiquina quehnoano yeri mehna Cohācjū cahapū waha masiedare. Cohācjū pehe masare pecapū wahaboriquinare yūhdūo masine. Tiquiro ijipihitiyere quehnoano ye masi peho cāre, nidi tiquiro usāre.

²⁷ Tiquiro sa nigū Pedro tiquirore nidi:

—Tūhorīña. Usā pehe usā ye ijipihitiyere cū cāu mūhū mehna wahana tana. ¿Usā ohō saha yena, dūhse ijīyere wapatanatarī usā? nidi tiquiro.

28 Tiquiro sa nigū tūhoro ohō saha nidi Jesu:

—Mūsare niita niaja: Pihtiri deco bato ijipihtiyē wahma dihita comesaeta. Ti pjeḡare yūhū masū Cohācjū ohorigū yūhū pūhtoro yūhū dujiropū asi siteropū dujiitja yūhū. Topū yūhū dujigū masā gūhū doce ḡujiye pahtaripū pūhtoa tiquina ḡujiye pahtaripū ḡujinata. Sa yena Israe masare doce cururi cjēnare besenata mūsa quehnoañequina gūhūre, ñañequina gūhūre. 29 Sa ye yeere yena tana mūsa wūhūserē, mūsa bahanare, mūsa pacūsumāre, mūsa pohñare, mūsa weserire cūrīna ijīna, pajiro wapatanata. Sa yena ijipihtiyē decori Cohācjū mehna ijīnata. 30 Sa ijiepegūta yojopūre peyequina pūhtoa ijiriquina ti pjeḡare ihyo ijīyequina tojoaeta. Sa ye yojopūre peyequina ihyo ijīyequina ijīmediquina ti pjeḡare pūhtoa comesaeta, ni yahuri Jesu ūsāre tiquiro buhenare.

20

Ūhse wesere dahrayequina queoyere yahuahye Jesu

1 Sa ye Jesu pari turi queoye mehna yahu nemori tja:

—Ūhmuse cjāno masa pūhtoro ijire. Wese upūro queoye mehna tiquiro pūhtoro ijīyere yahutja mūsare. Tiquiro wese upūro bohrea quehagū tiquiro ya wesere dahratiquinare pjiro wahahye. 2 “Ihcā cjoe niñeru cjoe wapa yegūtja ihcā decore”, niahye tiquinare. “Añ”, niahye dahratiquina. Tiquina sa nigū wesepū dahra dutiro ohoahye tiquiro tiquinare. 3 Sa yero decopū nueve ijigū doeri cjē duaropū wahahye tiquiro. Topū esaro, apequina dahraeyequinare ihñahye. 4 Sa ihñano tiquinare niahye: “Mūsa gūhū ya wesere dahrana wahaya.

Quehnoano wapa yegūtja”, niahye tiquiro. 5 Sa ye tiquina wesepū dahraye wahahye. Sa ye wese upūro coheri pje ijigū, ñamicahapū tres ijigū gūhūre dahra dutiahye. 6 Sa ye ñamicahapū cinco ijigū doeri cjē duaropū tiquiro wahahye tja. Topū esa, apequina dahraeyequinare ihñano, tiquinare niahye: “¿Mūsa ḡuhse yena nijari dahraerapenata ohōḡare?” ni sinituahye tiquinare. 7 “Ne, ūsāre dahraye mariedare”, ni yūhtiahye tiquina. “Mūsa gūhū ya wesere dahrana wahaya”, niahye tiquinare. Sa ye tiquiro nidiro sahata tiquiro ya wesere dahraye wahahye.

8 ‘Sa ye ñamicahapū dahra duhuri pje ijigū wese upūro tiquiro dahrayequinare coheriquirore ohō saha niahye: “Dahrayequinare pjiya. Tiquina wihigū tiquinare wapa yeya. Camepū yūhū dahra dutiriquinare wapa ye mūhtaña. Tiquinare wapa ye tuhasa, apequina gūhūre wapa ye tuhasa, yūhū dahra duti mūhtariquinare wapa ye bato tiya”, niahye tiquiro. 9 Sa yero cinco ijigū dahra ḡucayequinare ihcā cjoe niñeru cjoe wapa yeahye. 10 Tiquiro sa wapa yegū ihñañe, “Ūsāre paji cjūnogā wapa yerota”, ni tūhotumahye tiquiro duti mūhtariquina pehe. Tiquina gūhūre ihcāno saha wapa yeahye. 11 Sa ye niñerure tiquiro wapa yegū tiquina pūhtoro mehna usuaye, tiquina basi cahme niahye: 12 “Ahriquina ūsā batopū tiquiro dahra dutiriquina pehe ihcā horata dahrari. Ūsā pehe ihcā deco quehnoano dahra nahñoa wahami. Ñano asū asiri ūsāre. Ūsā sa yoari pje dahraepēgūta ūsā batopū dahra ḡucariquina gūhūre ihcāno saha wapa yeri tiquiro”, ni usuahye tiquina basi. 13 Ihcāquiro tiquina mehna cjāno

tiquiro sa nigū tūhoro, wese upuro yuhtiahye tiquirore: “Ne yūhū acayū, ‘Ihcā cjoie niñeru cjoere wapa yegutja’, nimi mūsare. Yūhū sa nigū yuhtiri mūsa. Sa yegū yūhū nidiro sahata mūsare wapa yei yūhū. Queoro wapa yei mūsare. Ne yaquerū mūsare. ¹⁴ Sa yegū yūhū wapa yerire ne, mūhū ya wūhūpū tojoarīsa. Ahriquirore came yūhū dahra dutiriquiro gūhūre mūsare yūhū wapa yeriro punota wapa yegutja. ¹⁵ Yee niñeru ijire ahri. Sa yegū yūhū cahmeno sahata ahri mehna wapa yegutja. ¿Apequinare bui cjunogā yūhū quehnoano wapa yegū ihñā tuhtiajari mūhū?” niahye tiquiro wese upuro, ni yahuri ti queoyere Jesu.

¹⁶ Sa nino, yahu nemori tiquiro:

—Ahri queoye nidiro saha came cĵā curua iji māhtari curua ijirota uhmūsepu. Sa ye iji māhtari curua pehe tiquina camepu cĵā curua tojoarota uhmūsepu, ni yahuri Jesu.

Pari turi Jesu tiquiro yaria masa wijiatiire yahuahye

(Mr 10.32-34; Lc 18.31-34)

¹⁷ Sa ye Jerusalēpu wahaducu, usāre doce tiquiro buhenare pijio tuhasa, ape siepu usāre usā sehsaro neari Jesu. Usā sehsaro usā ijigū usāre yahuri:

¹⁸ —Tūhoya yūhūre. Yojoḡure Jerusalēpu wahana niaja mari. Topū yūhūre masure Cohācjū ohorigure ñehe, apequinapure yūhūre ohoeta. Pahia puhtoare, judio masare buheyequina gūhūre yūhūre ohoeta. Sa ye yūhūre wejē dutieta tiquina. ¹⁹ Sa wejē dutiye, judio masa ijieyequinare yūhūre ohoeta. Tiquina sa ohori bato tiquina pehe yūhūre bujūpe, tana, curusapu quē bihaeta yūhūre. Sa yegū yūhū yariari bato ihtia deco wahaboro masa wijiagutja, ni yahuri Jesu usāre.

Santiago, Ñu mehna tiquina pacoro pehe tiquinare sini basahye Jesure

(Mr 10.35-45)

²⁰ Sa ye Zebedeo namono puaro ticoro pohne mehna Jesu cahapu esa, dusepe curi mehna quehe sahye tiquirore sinino taro.

²¹ —¿Dūhse yūhū yegū cahmeajari mūhū? niahye Jesu ticorore.

—Mūhū puhto sajāḡu yūhū pohnare dutiyequina sōña. Sa yegū mūhū puā peheripu duji dutiye tiquinare, ni siniahye ticoro.

²² Jesu ohō saha niahye:

—Mūsa ñano yūhdūatire masiedapenata sa sinine mūsa. ¿Yojoḡure yūhū ñano yūhdūato saha mūsa gūhū ñano yūhdūna ihcāno sahaboagari mūsa? niahye Jesu ticoro pohne.

—Ihcāno sahanata, ni yuhtiahye Santiago, Ñu mehna.

²³ —Ijirota niita niaja mūsare. Yūhū ñano yūhdūato saha ñano yūhdūnata mūsa gūhū. Sa ijiepegūta yūhū mehna dutiye tiquinare, yūhū mehna dujiye tiquinare bese masiedaja yūhū. Yūhū Pacū pehe quehno tuhasari tire. Sa ye tiquiro beseatiquina dihita yūhū poto pehe yūhū cū pehe pehe dujieta, niahye Jesu tiquinare.

²⁴ Sa yena usā apequina diez tiquiro buhena pehe Santiago, Ñu ahriquina puaro mehna usuau usā. Jesure tiquina pacoro ticoro sini basarire tūhona usuau tiquina mehna. ²⁵ Usā sa usuagū ihñano, Jesu usāre ijipihtina tiquiro buhenare piji cahmeco, yahuri usāre:

—Cohācjūre masieñequina puhto pehe tiquina masare dutiye, usuaro mehna dutire. ²⁶ Mūsa pehe ne sa yesi mūsa basi. Mūsa mehna cĵāno puhtoro iji duaro, ijipihtiequina tiquiro mehna cĵēna cahacjūno ijiro cahmene

tiquire. ²⁷ Sa yero ijipihitiye-quinare dutiriquiro iji duaro, apequina cacajuno ijiro cahmene tiquire. ²⁸ Sata ijigu ijiaja yuhu guhu. Yuhu masu Cohacju ohorigu ahri yehpapure masare yedohogu ahtau. Sa yegu peyequina masa ye buhirire yariagu ahtau nii. Sa yegu masare pecaru wahaboriquinare yuhduogu ahtau nii. Masare dutipegu tagu niedu, nidi Jesu usare.

Puaro caperi bajueyequinare ihñagü yeahye Jesu

(Mr 10.46-52; Lc 18.35-43)

²⁹ Sa ye Jericopu ijirina usã wahagü peyequina masa Jesure nunu tãri. ³⁰ Sa ye Jesu tiquire yuhduagü puaro caperi bajueyequina maha duhtu caharu dujiyequina tuhori. Sa tuhoye, ohõ saha ni sañuducuri:

—Puhto, Davi munano panami iji turiagu, masare yuhduoacju, usare paja ihñaña, ni sañuducuri.

³¹ Tiquina sa ni sañuducugü masa pehe tiquire tuhtiri.

—Dihta mariahña, nidi masa tiquire.

Tiquina sa tuhtigü tuhoye, to pano tiquina sañuducuriro yuhduoro sañuducu nemori tja.

—Usã puhto, Davi munano panami iji turiagu, usare paja ihñaña, ni sañuducu nemori.

³² Tiquina sa nigü tuhoro Jesu esadaca, tiquire pijio, sinituri:

—¿Duhse yuhu yegü cahmeajari musa? ni sinituri.

³³ —Puhto, usare ihñagü yeya, ni yuhtiri tiquina.

³⁴ Tiquina sa nigü Jesu tiquire paja ihñari. Sa paja ihñano tiquina caperire ña peori. Tiquiro sa ña peoguta tiquina pehe ihñaa wahari. Sa ihñañe, tiquire nunu tã cãa wahari.

21

Jerusalẽpu esahye Jesu

(Mr 11.1-11; Lc 19.28-40; Jn 12.12-19)

¹ Sa ye Jerusalẽpu esana tana Betfagé wame tiri macaru esa mahtau usã Jesu mehna. Cunu Olivo wame tidu caharu Betfagé ijiri. Topu esaro, usã tiquire buhena mehna cjenare puaro Jesu tiquire pano oho mahtari. ² Ohõ saha dutiri tiquire:

—Si macaru burroare nena wahaya. Topu esana, duita burrore ticoro macunogã mehna tiquina duhte docoricore bocanata. Tiquinare boca, yuta dare pã, ne cãhta basaya yuhare. ³ Musa sa yegü ihñano, burroare puaro “¿Duhse tana burroare pajari musa?” tiquire nigü tuhona ohõ saha ni yuhtiya. “Mari puhtoro burroare cahmedi. Sa yero mi-anogã wiarota tiquire”, ni yuhtiya tiquire, ni duti ohori Jesu puaro tiquire buheyequinare.

⁴ Sa yeri Cohacju yere yahu mahtariquiro tiquire ni ojoariro sahata. Ohõ sahata ni ojoahye panopu:

⁵ Jerusalẽ cjenare ohõ saha ni yahuya:

“Ihñaña musa. Musa puhtoro musa caharu ahtare. Tiquiro quehnoano masa quehnoariquiro ijire. Burro macunogã bui pesariquiro ahtarota”, ni yahuya Jerusalẽ cjenare, ni ojoahye panopu.

⁶ Jesu tiquire dutiriquina puaro ti macaru esa, tiquire dutiriro sahata yeahye tiquina. ⁷ Burrore, ticoro macunogã guhare ne cãhta, tiquina bui sañañe suhtire tu we ne, burrogã bui duhu peori tiquina. Tiquina sa yeri bato Jesu tiquiregã bui mija pjeri, waharo taro. ⁸ Mija pje tuhassa, tiquiregã bui Jerusalẽpu wahari. Tiquiro ahtagü ihñañe masa peyequina tiquina bui cje suhtire tu we ne, seõ cü mahtari tiquire wahari mahare, Jesure ño peoye. Apequina pehe püri tiye dapurire maharu cü

māhtari tiqirore ño peoye. ⁹ Sa ye tiqiro pano wahayequina, tiqiro bato nānā tāñequina mehna sañuducuri:

—Davi panamino iji turiariquirore marine yāhdūoatiquirore ño peouhna. Ahriquiro Cohācjū ohoriquiro quehnoano ijiahiro. Ūhmūse cjanore “Tutuagū ijire”, ni ño peouhna, ni sañuducuri masa.

¹⁰ Sa ye Jerusalēpū tiquina esagū to cjenā pehe ihña maria wahari.

—¿Noa ijiajari ahriquiro? ni cahme sinituri tiquina.

¹¹ Apequina masa yāhtiri:

—Ahriquiro Cohācjū yere yahu māhtariquiro Nazare cjanō Jesu wame tiriquiro ijire, ni yahuri tiquina masare.

Cohācjū wāhūpū esahye Jesu

(Mr 11.15-19; Lc 19.45-48; Jn 2.13-22)

¹² Came Cohācjū wāhūpū esari Jesu. Ti wāhūpū esa, sajāa wahari. Ti wāhūpū duayequinare, dúyequina gūhūre cohā wiori tiqiro. Sa yero niñeru comesaye mesarire ne majare cū mājari. Bujuaare duayequina tiquina dujiye pahtari gūhūre sata yeri. ¹³ Sa yero tiquinare ohō saha nidi:

—Cohācjū yere tiquina ojoari pūpū ohō saha nine: “Ya wāhū Cohācjū mehna yahuducuri wāhū wame tirota”, nimene tiqiro ojoari pūpū. Mūsa pehe ahri wāhūpū duana mūsa basi cahme yaquere mūsa, nidi tiqiro tiquinare.

¹⁴ Tiquiro sa yeri bato caperi bajueyequina, tini masieñequina gūhū Cohācjū wāhūpū tiqiro cahapū wihiri. Tiquina sa wihigū tiquinare yāhdūgū yeri tiqiro. ¹⁵ Sa quehnoañene tiqiro yegū ihñañe, pahia pūhtoā, marine judio masare buheyequina gūhū usuari tiqiro mehna. Sa ye macanagā Jesure “Davi panami iji turiagū, masare yāhdūoacjū, tutuagū ijire

māhū”, tiquina ni ño peogū tūhoye usuari pari turi tiquina. ¹⁶ Sa usuaye ohō saha nidi Jesure:

—¿Tiquina sa nigū tūhoerajari māhū? Sa niedacāhdo, ni tuhtiri tiquina Jesure.

—Tiquina sa nigū tūhoaja. ¿Cohācjū ojoari pūpū ahrire ne buherari mūsa?

Macanagāre Cohācjūre quehnoano ño peogū yeri māhū, nine Cohācjū yere tiquina ojoari pūpū, nidi Jesu.

¹⁷ Sa ni tuhasa tiquinare cohā cā, Betania wame tiri macapū esa, ti ñamine topū ijiri.

Jesu higeragūre yaria dutiahye
(Mr 11.12-14, 20-26)

¹⁸ Ape deco bohrearopū Jerusalēpū tojoaro, ūjūa ahbari Jesu. ¹⁹ Sa ūjūa ahbaro, maha dūhtū cahapū ijidu higeragū wame tidūre ihñano, tū dūcare macano wahamedi. Dūca mariedari tū pehe. Pūri dihita ijiri. Tū sa ijigū ihñano Jesu tūre ohō saha nidi:

—Ahdū ne pari turi dūca tisi, nidi tiqiro.

Tiqiro sa nigūta duita tū pehe ñaia wahari. ²⁰ Tū sa wahagū ihñana ūsā tiqiro buhena ihña maria wahaū.

—¿Yohou, dūhsero ahdū duita ñaia wahajari? ni sinituu ūsā.

²¹ Jesu yāhtiri:

—Ahrire wacūña mūsa. Cohācjūre quehnoano wacū tutuaya. “Potota sa yerota tiqiro”, nina, ahdūre yūhū yeriro sahata ye masinata mūsa gūhū. Sa yena ahdūre yūhū yaria dutiriro yāhdūoro ye masinata mūsa. Ahdū cūhūre “Dūha ne, pajiri mapū cohādu ijiahiro”, mūsa nigū dūha cohādu ijirota. ²² Cohācjūre mūsa wacū tutuagū, “Yūhū sinidiro sahata waharota”, mūsa ni wacūgū mūsa sinidiro sahata waharota, nidi Jesu ūsāre.

Jesure dutiriquirore sinituahye apequina

(Mr 11.27-33; Lc 20.1-8)

²³ Sa ye Cohãcjũ wuhapũ tojoa sa, buheri tiquiro. Tiquiro sa buhegũ pahia pũhtoa, mari judio masa bucũna mehna tiquiro cahapũ wihi, sinituri:

—¿Dũhsegũ canũ ñamicahare sa yeari mũhu? ¿Noa mũhure tire sa ye dutiari? ni sinituri tiquina.

²⁴ Tiquina sa nigũ Jesu yũhtiri:

—Mũsa pehere sinitu mũhtagũtja. Quehnoano yũhure mũsa queoro yũhtigũ mũsare yahutja yũhu gũhu.

²⁵ ¿Ñu masare tiquiro wame yegũ noa boro pehe tiquirore wame ye dutiyari, mũsa tũhotugũ? ¿O Cohãcjũ dutierayari? ¿O masa pehe dutiyari, mũsa tũhotugũ? ni sinituri Jesu tiquinare.

Tiquiro sa nigũ tiquina pehe tiquina basi ohõ saha nidi:

—¿Dũhse ni yũhtinatari mari? “Cohãcjũ Ñure dutie tiahye”, mari nigũ, “¿Dũhsena Ñu tiquiro dutiepegũta tũho duerari mũsa?” niboaga Jesu marine. Sa yena “Cohãcjũ Ñure dutie tiahye”, ni yũhti masiedaja mari. ²⁶ Ahriquina masa pehe “Potota Ñu Cohãcjũ yere yahu mũhtariquiro ijiri”, ni tũhoturi tiquina. Sa ni tũhotuye “Ñu tiquiro wame yegũ Cohãcjũ pehe tiquirore dutierahye”, mari nigũ tũhoye masa usueta mari mehna. Sa yena ti gũhare yahu masiedaja mari, nidi tiquina basi.

²⁷ Tiquina sa nidi bato Jesure yũhtiri tiquina.

—Ñure wame ye dutiriquirore usã masiedaga, nidi tiquina.

Tiquina sa nigũ tũhoro ohõ saha nidi Jesu:

—Ti pje pũrita yũhu gũhu mũsa sinitu mũhtarire yahueraja mũsare. Yũhu yerire dutiriquirore yahueraja mũsare, nidi tiquiro tiquinare.

Pũaro pacũro queoyere yahuahye Jesu

²⁸ Tiquiro sa nidi bato Jesu queoye mehna buhe nemori tiquinare:

—¿Ne, dũhse tũhotuajari mũsa ahri queoyere? Pũaro pacũro ijiahye. Wahmino pehere ohõ saha niahye tiquiro pacũro: “Macũ, wesepũ dahragũ wahaya”, niahye. ²⁹ “Wahaeraja”, ni yũhtimahye tiquiro macũno coã warore. Sa nieperota camerũre wesepũ waha duaro ijiahye tiquirore. Sa yero wahahye tiquiro. ³⁰ Sa yero tiquina pacũro tiquiro macũno dũhsariquiro cahapũ esa, tiquiro wahminore tiquiro dutiriro sahata wesepũ waha dutimahye. “Aũ”, nimahye dũhsariquiro. Sa nieperota wahaerahye tiquiro. ³¹ ¿Diquiro pehe tiquiro pacũro dutiriro sahata yeari? ni sinituri Jesu.

—Tiquiro wahmino pehe yeahye, ni yũhtiri tiquina.

Tiquina sa nigũ Jesu yahuri:

—Mũsare niita niaja. Wapa ne cohteyequina, amũa mehna ñano yeducuye numia tiquina buipũ waro mũsa pehe ña yũhdũana ijire. Sa ye Cohãcjũ pũhoro ijiropũre mũsa esaborirore tiquina pehe mũsare esa mũhtaboaga. ³² Ñu wame yeriquiro buhero mũsare “Quehnoano yeya”, ni yahumedi. Sa tiquiro yahugũ dũhsariquiro pacũrore tiquiro yũhtierariro sahata tiquirore tũhoerari mũsa. Sa yena tiquirore yũhtierari. Wapa ne cohteyequina pehe, amũa mehna ñano yeducuye numia gũhu tiquirore tũhori. Tiquina sa tũhogũ ihñari mũsa. Mũsa sa ihñapenata tiquirore ne tũho duerari. Sa yena tũhoerari mũsa, nidi Jesu pahia pũhtoare, mari judio masa bucũna gũhare.

Ñañequina dahra cohteyequina queoyere yahuahye Jesu
(Mr 12.1-12; Lc 20.9-19)

³³ Sa ye Jesu pari turi queoye mehna ohō saha ni tiquinare buhe nemori:

—Apeye queoyere tūhoya mūsa. Dihta c̄oriq̄uiro ijiahye. Tiquiro ya dihtap̄u ūhse darire oteahye. Ote tuhasa, sahr̄n̄ore ye tuhasa, ūhsere tiquina cahta m̄atoati copere sehe, ūhm̄ari w̄ahuḡa yeahye.

’Sa yero ti wesere apequinare ihc̄a pehe pah̄r̄ pahma c̄uahye. Sa yero ti wesere tiquinare ihña ihbo duti, ape yehpap̄u wahaa wahahye tiquiro. ³⁴ Sa ye ūhse ñidi p̄je ijiḡu wese up̄aro tiquiro cahacj̄enare wesere ihña ihboyequina cahap̄u ohoahye. Wese cj̄e tiquiro oteri d̄ucare tiquiro ya pah̄r̄ cj̄e d̄ucare ne dutiro ohomahye. ³⁵ Sa ye wesere ihña ihboyequina pehe tiquiro cahacj̄enare ñano yeahye. Ihc̄aquiore tutuaro quē, apequiore wej̄e, apequiore ut̄a mehna doqueahye. ³⁶ Came wese up̄aro pari turi tiquiro cahacj̄enare tiquiro oho m̄ahrt̄iquina ȳuhd̄uo cj̄ūno ijiri curuare ohomahye tja. Sa ye wesere ihña ihboyequina tiquina ḡuh̄are m̄ananota yeahye tja.

³⁷ ’Sa yero tiquiro oho bato tiriq̄uiro tiquiro mac̄ano ijiahye. “Yuh̄u mac̄u pehere ño peoeta”, nino tiquirore ohomahye.

³⁸ Tiquiro sa ni t̄uhotuepeḡata wesere ihña ihboyequina tiquiro mac̄ano ahtaḡu ihñañe, ohō saha niahye: “Wese up̄aro mac̄ano ijire ahriq̄uiro. Tiquirore wej̄eihna mari. Sa yero ahri wese mari ya wese tojoarota”, nimahye tiquina basi. ³⁹ Sa niñeta tiquirore ñehe, wese d̄uht̄u cahap̄u ne c̄a, wej̄eahye tiquina tiquirore.

⁴⁰ ’¿Ne, wese up̄aro ahtarō d̄ahse yerotari tiquiro wesere ihña

ihboyequinare? ni sinituri Jesu pahia p̄ah̄toare, b̄uc̄na ḡuh̄are.

⁴¹ Tiquiro sa niḡu tiquina ȳahrt̄iri: —Tiquiro apequinare wesere ihña ihboatiquinare came-sarota iji m̄ah̄tañequinare ña ȳuhd̄uayequinare wej̄ēno taro. Tiquirore queoro d̄ucare tu watiquina pehere ihña ihbo dutirotā, ni ȳahrt̄iri tiquina.

⁴² Tiquina sa niḡuta Jesu yahu nemori tiquinare:

—¿Coh̄ācj̄u yere tiquina ojoari p̄up̄u ahrire ȳuh̄are tiquiro ni ojoarire ne buherari m̄asa?

Ahriq̄uiro Cristo ut̄a yero saha ijire. Ut̄are w̄uh̄u dahreyequina tiquina coh̄āno saha masa tiquirore coh̄āeta. Tiquina sa yepeḡata yojop̄are w̄uh̄u dahreyequina w̄uh̄are yeye tiquina c̄u m̄ahrt̄aria ut̄are tiquina c̄ūno saha Coh̄ācj̄u tiquirore p̄ahrt̄oro s̄ori. Coh̄ācj̄u pehe ahrire yeri. Tiquiro sa yeḡu ihñana, “Quehnoa ȳuhd̄uare”, ni, t̄uhotuaia mari, ni ojoahye panop̄u.

’¿Tire ne buherari m̄asa? ⁴³ M̄usare niita niaia yuh̄u. Coh̄ācj̄u tiquiro p̄ahrt̄oro ijiro m̄asa ijiato ijiboaga. Tiquiro p̄ahrt̄oro ijirore apequina pehere m̄asa ijiborirore ohorota Coh̄ācj̄u. Apequina masa pehe tiquiro dutiro sahata yeeta. [⁴⁴ Ijipihtiyequina tia ut̄a bui doque queheyequinare m̄ata sitea wahaeta. Sa yero tia ut̄a pehe mas̄ano bui bora p̄jero m̄ataa wahaḡu yerota tiquirore. Tiquiro paḡu m̄ananore daye manariḡa wahaḡu yerota. (Sata ȳuh̄are ño peo dueyequina yuh̄u buhiri dahreatiquina ñano ȳuhd̄ueta.)] nidi Jesu pahia p̄ah̄toare, mari acaye judio masa b̄uc̄na ḡuh̄are.

⁴⁵ Ti queoyere tiquiro niḡu t̄ahoye, “Sohō tiquiro yahu m̄ahrt̄ari queoye, wesere ihña

ihboyequina queoye mehna marine nino niaga tiquiro”, ni tuhaturi tiquina. ⁴⁶ Sa ni tuhotuye, tiquirore ñehe duamedí. Masa pehe Jesure ño peo, “Cohãcjũ yere yahu mahtariquiro ijire tiquiro”, niñequina ijie tiri tiquina. Tire masiñe, pahia puhtoá, bucuna mehna masare cueye, Jesure ñehedari.

22

Pajiri bose deco cjẽ queoyere yahuahye Jesu

(Lc 14.15-24)

¹ Sa ye pari turi queoye mehna tiquinare buhe dacari Jesu.

² —Uhmuse cjãno puhtoro ijiro ahri queoye yero saha ijire. Ihcã yehpa cjẽna puhtoro ijiahye. Sa yero tiquiro macuno ya deco bose deco yeahye. Tiquiro omoca duhteri bose deco ijiahye. ³ Sa yero puhtoro tiquiro cahacjẽnare bose decore ihñañe ahtatiquinare piji dutiro ohomahye. Tiquina pehe ahta duerahye. ⁴ Sa yero apequinare piji dutiro ohomahye tja tiquiro cahacjẽnare. “Yuhũ pijioriquinare ohõ saha ni yahuya. ‘Mari ihyatire dahre tuhasari. Wecũare, wecũagã dihi tiyequinagã gũhare wejẽ tuhasari. Sa yero ijiphtiro bose deco cjẽ ijiatire quehno tuhasari. Sa yena bose deco cjẽne ihyana ahtaya’, ni yahuya tiquinare”, ni ohomahye puhtoro tiquiro cahacjẽnare. ⁵ Tiquina sa yahuri bato tiquiro pijionohriquina sa tuhotu cãhye. Bose decore ihñañe wahaerahye. Ihcãquiro tiquiro ya wesepũ waha wahahye. Apequiro tiquiro dahrayere ihñano wahahye. ⁶ Apequina pehe tiquiro cahacjẽnare ñehe, tiquinare ñano ye, wejẽ cãhye. ⁷ Tiquina sa yegũ tuhoro, puhtoro pehe usuahye. Usua, tiquina sa wejẽdi buhiri buhiri dahre dutiro tiquiro

surarare ohoahye. Sa ye surara tiquinare wejẽ peho, tiquina ya macare ujuã cãhye. ⁸ Tiquina sa yeri bato, puhtoro tiquiro cahacjẽnare ohõ saha niahye: “Bose deco cjẽ ijiatire quehno tuhasamedí. Sa ijiepegũta yuhũ pijio mahtariquina yuhũ bose decore ihñaboriquina ijierare. Ñañequina ijiri tiquina. ⁹ Sa yena macare ijieye maharipũ dahse ijieyequina mũsa boca sayequinare bose decore ihñatiquinare pijiya”, niahye tiquiro cahacjẽnare. ¹⁰ Tiquiro sa nigũ tiquiro cahacjẽna maharipũ waha, ijipihtieyequinare tiquina boca sayequinare, ñañequina, quehnoañequina gũhare yahuahye. Tiquina sa pijiri bato esahye tiquina pari. Quehnoano ti bose deco tiquina yeri tucũre masa wahpa yuhũna wahahye.

¹¹ Topũ tiquina dujigũ puhtoro pehe ihcãquirore omoca duhteri deco cjã suhtirore sañeniquirore ihñahye. ¹² “¿Ne yuhũ acayu, dahse yegũ omoca duhteri deco cjã suhtirore sañedapeguta sajã tari mũhũ?” ni sinituahye puhtoro.

“Tiquiro sa sinitugũ masũno pehe yuhtierahye. ¹³ Tiquiro sa yuhtieragũ ihñano tiquiro cahacjẽnare ohõ saha niahye: “Ahriquirore omocarine duhteya. Tiquiro dahpocãri gũhare duhteya. Duhte tuhasa ne wijia, sopecahapũ cohãña tiquirore nahitianopũ. Topũ tiquiro tutuaro uti, bujũna witiro mehna bahque dihorota”, niahye puhtoro, ni yahuri Jesu.

¹⁴ Tiquiro sa nidi bato ohõ saha ni bato tiri tiquiro:

—Ahri queoye ijiro saha Cohãcjũ peyequina masa tiquiro pijioriquina ijiepetã meheñequinagã tiquiro mehna tojoaeta, ni yahu bato tiri Jesu.

Puhtoá ye wapare apequina sinituahye Jesure

(Mr 12.13-17; Lc 20.20-26)

15 Tiquiro sa nidi bato fariseo masa waha, tiquirore tiquina yahusātire tiquina basi yahuducuahye. Tiquiro ñano yāhtigū tūho duaye nimahye tiquirore yahusāñe tehe. 16 Sa yahuducuye tiquina mehna cjēnare, Herode ya curua cjēna gūhure Jesure sinitu dutiye ohoahye. Tiquina pehe Jesu cahapū wihī, tiquirore meje cū sinitumedi:

—Buhegū, poto yahuducugū ni mehoñe mariegū mūhū ijigū masiaja usā. Cohācjū yere queoro mūhū yahugū gūhure usā masiaja. Sa yegū ihcāquiro pūhtoro waro ijiepegūta tiquiro gūhure dōyaro marieno potota yahure mūhū. 17 Sa yegū usāre yahuya. ¿Roma cjāno ijipihtiyequina pūhtoro yere marine wapa yero cahmeajari, mūhū tūhotugū? ¿Mari dutiye wapa ye dutiajari, mūhū tūhotugū? ni sinitumedi tiquina Jesure.

18 Tiquina sa nigū tūhoro tiquirore tiquina ñano ye duayere masino ohō saha nidi:

—Masa ihñono dihita quehnoano iji mehona ijire masa. ¿Dūhsena yahū ñano yahuducugū tūho duajari masa? 19 Yojoḡare niñeru cjoere pūhtoare wapa yeati cjoere ne cāhtaya. Ti cjoere ihñauhna, nidi tiquiro.

Tiquiro sa nigū tūhoye niñeru cjoere ne cāhtari tiquina.

20 Sa yero tiquiro sinituri tiquinare:

—¿Noa boro queoye wahñajari ahri cjoere? ¿Noa boro wame wahñajari? ni sinituri.

21 —César, masa ijipihtiyequina pūhtoro queoye, tiquiro wame gūhū wahñare, ni yāhtiri tiquina.

Tiquina sa nigū tūhoro Jesu yahuri:

—Ti pje pūrita masa ijipihtiyequina pūhtoro yere tiquiro pehere ohoya. Cohācjū yere Cohācjū pehere ohoya, nidi Jesu.

22 Tiquiro sa nigū tūhoye, tūho maria waha, wahaah wahari.

Saduceo masa Cohācjū tiquiro masoñene sinituahye Jesure

(Mr 12.18-27; Lc 20.27-40)

23 Sa ye ti decota ihquēquina saduceo masa Jesu cahapū wihiri. Saduceo masa pehe “Cohācjū yariariquinare masosi”, ni tūhotuyequina ijiri. Sa ye ohō saha nidi tiquina tiquirore:

24 —Buhegū, ohō saha ni buheahye Moise: “Ihcāquiro wahmino namo tiquiro pohna mariedaperota yariagū ihñano tiquiro baharore tiquiro wahmino namono ijiricorore nūoano cahmene. Sa yero wahmino mūnano tiquiro pohna tiboriro saha pohna tiro cahmene tiquiro baharore. Sa ye tiquiro pohne tiquiro wahmino mūnano pohne yero saha ijieta”, ni ojoahye Moise, nidi tiquina saduceo masa.

25 Tire sa ni yahu tuhasa ahri queoyere yahu nemori tiquina Jesure:

—Ihcāquiro masano ijiahye. Seis bahana tiahye tiquiro. Tiquina wahmino pehe namo ti, pohna mariediquiro yariaa wahahye. Sa yero apequiro tiquiro baharo gūhū tiquiro wahmino namono ijiricorore nūoahye. 26 Sa nūoari bato tiquiro wahmino yero sahata pohna mariedaperota yariaa wahahye tja. Sa yero ahriquiro baharo tiquiro wahmino mūnano yero sahata pohna mariedaperota yariaa wahahye. Sa dihita wahahye ihcāquiro pohne waro. Ne pohna mariedapeta yaria pihtia wahahye tiquina. 27 Tiquina namono ijiricoro gūhū tiquina bato yariaa wahahye. 28 ¿Cohācjū ijipihtiyequinare yariariquina mūnare tiquiro masogū diquiro boro namono pehe ijiboagari ticoro? Tiquina ijipihtiyequina ticoro namo tiquiro mūna

ijiahye. ¿Sa yero diquiro namono pehe ijiboagari ticoro pototi? ni sinituri tiquina.

²⁹ Jesu yuhtiri tiquinare:

—Cohãcjũ yere tiquina ojoari pũre, tiquiro masiñe gũhare ne masiedare m̄sa. Sa ye m̄sa tũhotuye pehe ne poto ijierare.

³⁰ Yariariquina m̄na tiquina masa m̄jari bato tiquina angele yero saha ijire. Namō marieñequina, man̄ marieñe numia ijire top̄re.

³¹ Yariariquina m̄na tiquina masa wijiato pehere m̄sare yahutja. ¿Cohãcjũ m̄sare tiquiro nidire ne buherari m̄sa? Ohõ saha niahye tiquiro. ³² “Yũhũ Abrahã, Isaac, Jacob tiquina puhto ijiaja”, nine Cohãcjũ”, ni ojoahye panop̄re. Tiquina yariari bato “Tiquina puhto ijiaja”, ni yahuahye Cohãcjũ. Sa nieperota yariariquina m̄na puhtoro ijierare Cohãcjũ. “Tiquina puhto ijiaja”, tiquiro niñe mehna catiyequina tiquina ijigũ masiaja mari. Tiquiro catiyequina puhtoro ijire, ni yahuri Jesu tiquinare.

³³ Tiquiro sa ni buhegũ tũhoye peyequina masa tũho maria wahari.

Quehnoa yũhdũari dutirore yahuahye Jesu

(Mr 12.28-34)

³⁴ Sa ye saduceo masa Jesure tiquina yuhti masiedagũ tũhoye, fariseo masa pehe tiquiro cahapũ cahmecoari. ³⁵ Sa yero tiquina mehna cãno marine judio masare buheriquiro pehe Jesu tiquiro ñano nigũ tũho duaro meje cũ sinitumedi tiquirore.

³⁶ —¿Buhegũ, Cohãcjũ ye dutiro quehnoa yũhdũari dutiro noho pehe ijiajari, m̄hũ tũhotugũ? ni sinituri tiquiro.

³⁷ Jesu tiquirore yuhtiri:

—“Tutuaro m̄sa jeripohna mehna, m̄sa tutuaye mehna, quehnoano m̄sa wacũñe mehna Cohãcjũre cahĩña”, nine Cohãcjũ.

³⁸ Ahri dutirota ijire quehnoa yũhdũari dutiro apeye dutiye yũhdũoro. ³⁹ Ahri dutiro bato apero dutiro quehnoa yũhdũare:

“M̄hũ basi m̄hũ cahĩno saha m̄hũ cahapũ ijiequina gũhare cahĩña”, nine Cohãcjũ. ⁴⁰ Ahri puã dutirota apeye dutiye gũhare masi pehogũ yere. Ahri puã dutirore yena, ijipihtiyē apeye dutiyere ye pehona niaja mari. Cohãcjũ yere yahu m̄htariquina panop̄re tiquina ojoari gũhare yena niaja mari, ni yahuri Jesu.

Cristo Davi m̄nana puhtoro ijire (Mr 12.35-37; Lc 20.41-44)

⁴¹ Sa ye fariseo masa top̄re cahmecoañequina tiquina ijigũ Jesu tiquinare sinituri:

⁴² —“Cristo Cohãcjũ tiquiro ohoa-tiquiro ijire”, nine m̄sa. ¿Noa boro ijiajari tiquiro ñecano m̄nana panop̄re cãno, m̄sa tũhotugũ? nidi tiquiro.

—Cristo Davi m̄nana panamino iji turiariquiro ijirota, ni yuhtiri tiquina.

Jesu yahuri:

⁴³ —¿Cristo Davi m̄nana panamino iji turiariquiro tiquiro ijigũ dũhse yero Davi pehe puhtoro tiyari Cristore? ¿Dũhse yero sa puhtoro ti dutiyari Espĩritu Santo tiquirore? Ohõ saha niahye Davi:

⁴⁴ Cohãcjũ yũhũ puhtoro ohõ saha nidi: “Ohõp̄re yũhũ poto pehep̄re dujiya. Sa yegũ m̄hũre ihñã tuhtiyequinare m̄hũre yũhdũdũca basautja yũhũ”, nidi Cohãcjũ yũhũ puhtoro, ni ojoahye Davi.

⁴⁵ Sa ni ojoarota Davi puhtoro tiahye Cristore. ¿Davi Cristo ñecano iji turiariquiro ijiro dũhse yero tiquiro puhtoro tiyari Cristore? Cristo Davi puhtoro ijire, ni yahuri Jesu.

⁴⁶ Tiquiro sa ni yahugũ tiquina tiquirore ne yuhti masiedari. Sa ye to punota sinitu duhu cãri tiquina

tiquirore. Sa ye cueye, pari turi sintuerari tiquirore.

23

Judio masare buheyequina, fariseo masa gũhu tiquina ñano yeyere yahuahye Jesu
(Mr 12.38-40; Lc 11.37-54; 20.45-47)

¹ Sa ye peyequina masare, usã gãhare Jesu yahuri tja.

² —Marine judio masare buheyequina fariseo masa gũhu Cohãcjũ dutiye Moisere tiquiro cũrire yahueyquina ijire tiquina.

³ Tiquina sa yahueyquina ijigũ masare tiquina yahuriro sahata tire ye pehoya masa. Sa yepenata tiquinare ihña cũedacãhña masa. Tiquina buheriro sahata yerare tiquina. ⁴ Masare peye dutire tiquina. Sa dutiepeta tiquina dutiro saha masa yeragũ ihñañe tiquinare yedohoerare. ⁵ Masa tiquina ihñoño dihita quehnoano ye ihñomene tiquina. Cohãcjũ yere tiquina ojoari pũre tiquina duhu sãñe acarigãre, bujũ cjũñe acarigãre tiquina wãhdoa bui ðahte yori, masare ihña dutiye. Tiquina omocari gãhare ðahte yori. Sa ye tiquina suhti tu pjeri da bui tiquina ohõri da ehsha yãhðuari da ijire. Cohãcjũre tiquina ño peorire masa pehere ye ihñoñe nimene tiquina. Ti queoro ijierare tiquina sa ye ihñoñe. ⁶ Sa ye bose decori ijigũ pãhtoa tiquina dujiyepũ duji duare. Sa ye judio masa mari buheye wãhusepũ gãhare quehnoañe dujiye pahtari dihitar cahmene tiquina. ⁷ Sa ye doeri cjẽ duaropũ apequina pãhtoare quehnoano ño peo tiquina sinino saha tiquina piti cagũ cahmene tiquina. Tiquinare “Buhegu”, masa tiquina ni pisugũ cahmene.

⁸ Apequina masare pisuye “Buhegu”, niedacãhdo. Mũsa ijipihitina ihcãno saha ijina nine.

Sa yegu masare buhegu ihcãta ijiaja. ⁹ Sa yena ahri yehpa cjẽnare “Mari pacũ”, nina tiquinare ño peona niaga. Ne sa niedacãhña. ðhmũse cjũno dihita mari Pacũ ijire. Tiquiro dihitar ño peoro cahmene marine. ¹⁰ Sa yena masunore “Pũhto”, niedacãhña. Mũsa pũhto yãhu Cristo pehe ihcãta ijiaja. ¹¹ Cahacjãno yero saha masare yedohoriquiro tiquiro ijire masa pũhtoro ijiatiquiro. ¹² Ihcãquiro pũhtoro iji duaro tiquirore ihyo ijiriquiro yero saha ijiro cahmene. Sa yero “Ihyo ijigũ ijiaja yãhu”, ni tãhoturiquiro pehe pũhtoro ijirota, ni yahuri Jesu.

Judio masare buheyequina, fariseo masa mehna tiquina ni mehoñene yahuahye Jesu

¹³ Tiquiro sa nidi bato tiquinare yahu nemori:

—Mũsa judio masare buhena, fariseo masa gũhu ñano yãhðanata. Masa ihñoño dihita quehnoano iji mehona ijire masa. Sijoro saha masa buhegũ tãhoye masa pehe Cohãcjũ pũhtoro ijirorpũre wahasi. Mũsa gũhu topũre wahasi. Sa yena topũre waha duayequinare cahmõtare masa.

[¹⁴ Mũsa judio masare buhena, fariseo masa gũhu ñano yãhðanata. Masa ihñoño dihita quehnoano iji mehona ijire masa. Wape wiha numia ye wãhusere tiquina cãoye gãhare ehmare masa tiquina numiare. Sa yena yolari pje masa ihñoñopũ Cohãcjũre sini ihñomene masa masare. Mũsa sa yeri buhiri peyequina yãhðuro Cohãcjũ buhiri dahrerota masare.]

¹⁵ Mũsa judio masare buhena, fariseo masa gũhu ñano yãhðanata. Masa ihñoño dihita quehnoano iji mehona ijire masa. Pajiri mapũ pehã, yoaro cjẽ yehparipũ wahare masa, masa dutiyere yeatiquirore macana tana. Mũsa dutiyere yeatiquirore boca, tiquirore buhere.

Musa sa yegū tiquiro pehe musa yuhduoro pecapū wahatiquiro ijirota.

¹⁶ 'Musa ñano yuhduanata. Caperi bajueyequina tiquina ihña masieno saha masiena ijire musa. Sa ijeppenata apequinare buhemene musa. Ohō saha ni buhemene musa: “ ‘Cohācjū wuhū mehna yuhū nino sahata yeitja’, nidiquiro, tiquiro nidiro sahata yerapegūta quehnoanota”, ni buhemene musa. “ ‘Cohācjū ya wuhū cjē uru mehna yuhū nino sahata yeitja’, nidiquiro tiquiro pehere tiquiro nidiro sahata ye sohtori tiro cahmene”, ni ti gāhare buhemene musa.

¹⁷ Caperi bajueyequina tiquina ihña masieno saha masiena ijire musa. Tūho masiena ijire. ¿Dise boro pehere ño peoro cahmeajari? Urure ño peeraro cahmene. Cohācjū pehe ti uru ti wuhūpū ijigū quehnoañe ijigū yere tire. Sa yena ti wuhū pehere ño peoro cahmene masare. Sa ye musa buheye pehe queoro ijierare. ¹⁸ Ahri gāhare buhemene musa: “ ‘Cohācjū wuhū cjā altar mehna yuhū nino sahata yeitja’, nidiquiro tiquiro nidiro sahata yeragū quehnoanota”, ni buhemene musa. “ ‘Ti altar bui ijiye mehna Cohācjūre tiquina ohori mehna yuhū nino sahata yeitja’, nidiquiro tiquiro pehere tiquiro nidiro sahata ye sohtori tiro cahmene”, ni buhemene musa.

¹⁹ Caperi bajueyequina tiquina ihña masieno saha masiena ijire musa. ¿Dise boro pehe ti waro ijiajari, musa tuhutugū? Cohācjūre masuno tiquiro ohori ti waro ijiera cjūre. Ti altar bui Cohācjūre tiquiro ohogū, quehnoañe wahare ti altar bui ijiye. Sa yero ti altar pehe ihyo ijiri altar ijierare. Cohācjūre tiquina ohori bui cjūnogā quehnoari altar ijire.

²⁰ Sa yero “Cohācjū wuhū cjā altar mehna yuhū nino sahata yeitja”,

ihcāquiro nino, ti altar bui cjē tiquiro ohori mehna sa nino niaga. Sa ye musa buheye pehe queoro ijierare. ²¹ Sa yero “Cohācjū wuhū mehna yuhū nino sahata yeitja”, ihcāquiro nino, potota Cohācjū mehnata sa ninota niaga. Cohācjū ti wuhū cjāno ijire. ²² Sa yero “‘Cohācjū wuhū mehna yuhū nino sahata yeitja’, ihcāquiro nino, Cohācjū ijiropū mehnata sa nino niaga. Sa yero Cohācjū mehnata sa nino niaga. Tiquiro pehe to cjāno ijire. Sa ye musa buheye pehe queoro ijierare.

²³ 'Musa judio masare buhena, fariseo masa gūhū ñano yuhduanata. Masa ihñono dihita quehnoano iji mehona ijire musa. Moa yero saha ijiyere ihyayere ocagū yeyere cuona mehenogā ohomene musa. Cohācjūre ño peona tana pahiare ohomene musa. Mehenogā ohomene musa. Menta, anís, comino wame tiye ocagū yeyere ohomene musa. Sa ohoopenata quehnoañene yerare musa. Sa yena masare paja ihñedare musa. Sa yena Cohācjūre wacū tuturarare musa. Oteye ducare musa nedire mehenogā pahiare musa ohogū quehnoare. Sa ohona ohō saha ye nemoña: Quehnoañene yeya. Sa yena paja ihñaña masare. Sa yena Cohācjūre wacū tutuaya.

²⁴ Caperi bajueyequina tiquina ihña masieno saha masiena ijire musa. Ohō saha yere musa: Musa ye dutiyere ye dutina, ihyo ijiyegā warore dutiyere yere musa. Sa yepenata Cohācjū pototi tiquiro dutiye warore yerare musa.

²⁵ 'Musa judio masare buhena, fariseo masa gūhū ñano yuhduanata musa. Masa ihñono dihita quehnoano iji mehona ijire musa. Musa waparire, musa sihniñe wajarire bui musa cosero saha quehnoañene ye ihñore musa buigā warona. Sa yepenata Cohācjū yere queoro yerare musa. Apequina

yere ehmana, m̄sa basi dihita buj̄yere ne duana ijire m̄sa. Sa dihita t̄hoture m̄sa. ²⁶ Caperi bajueyequina tiquina ih̄ña masieno saha masiena ijire m̄sa fariseo masa. M̄sa jeripohnarine came-saya m̄sa. Quehnoañe pehere yeya. M̄sa sa yena masa tiquina ih̄ñonop̄u quehnoana ijinata m̄sa.

²⁷ 'M̄sa judio masare buhena, fariseo masa ḡh̄u ñano ȳhd̄nata. Masa ih̄ñoño dihita quehnoano iji mehona ijire m̄sa. Masa cope, yehseye mehna tiquina wis̄ori cope yero saha ijire m̄sa. Masa ti copere tiquina ih̄ñaḡu quehnoari cope bajure. Sa bajuepeḡta, puhiap̄u ahbariquirote, tiqiuro coh̄arine, ñañene ih̄ñedare tiquina. ²⁸ Sata m̄sa ḡh̄u masa ih̄ñonop̄u quehnoañequina yero saha bajumene m̄sa. Sa quehnoañequina yero saha bajuna m̄sa ijiepeḡta m̄sa t̄hotuyep̄u ñañe, ni mehoñe iji ȳhd̄are ahbaye yero saha, ni yahuri Jesu.

Judio masare buheyequina, fariseo masa ḡh̄ure tiqiuro buhiri dahreatire yahuahye Jesu

²⁹ Sa ni tuhasa oh̄o saha ni yahu nemori tiquinare:

—M̄sa judio masare buhena, fariseo masa ḡh̄u ñano ȳhd̄nata. Masa ih̄ñoño dihita quehnoano iji mehona ijire m̄sa. Coh̄acj̄u yere yahu m̄htañequina panop̄u cj̄ena tiquina masa coperire quehnoano quehnomene m̄sa, tiquinare ño peoro saha yena. Sa yena quehnoano yeyequina m̄na tiquina queoyere m̄sa yeri queoyere quehnoano quehnomene m̄sa. ³⁰ Sa yena oh̄o saha niducumene m̄sa: “Panop̄ure us̄a ñec̄sum̄a iji turiayequina m̄na tiquina yeriro saha us̄a pehe yeraboaga. Ti p̄jep̄u ijiyequinare Coh̄acj̄u yere yahu m̄htariquinare us̄a wej̄edaboaga”, niducumene m̄sa. ³¹ Sa nina

m̄sa ñec̄sum̄a iji turiayequina Coh̄acj̄u yere yahu m̄htariquinare wej̄ediquina m̄na tiquina yerire ih̄ñoña nine. Tiquinare wej̄ediquina m̄na tiquina panamena iji turiana m̄sa ijiye ḡh̄ure ih̄ñoña nine m̄sa. ³² M̄sa ñec̄sum̄a iji turiayequina m̄na tiquina yeriro sahta ye sohtori tic̄nah̄ña.

³³ 'Añaa yero saha ña ȳhd̄ana ijire m̄sa. M̄sa ñañe yerire buj̄ua witi duerana Coh̄acj̄u m̄sa ñañe buhirire pecap̄u m̄sare tiqiuro coh̄ato pano duhti masiedare m̄sa. ³⁴ Sa yegu m̄sare niita niaja. Coh̄acj̄u yere yahu m̄htariquinare, apequina quehnoano masiñequinare, apequina m̄sare buheatiquinare m̄sa cahap̄u ohoutja. Yuh̄u sa ohoḡu m̄sa pehe ihqūequina tiquinare wej̄enata. Apequinare curusap̄u qūe bihanata. Apequinare m̄sa buheye w̄h̄usep̄u tananata. Sa yena macarip̄ep̄u tiquinare ñano yena, oma n̄n̄u t̄anata m̄sa. ³⁵ M̄sa sa yena ijiyequinare ñañe marieñequinare m̄sa wej̄edi buhiri buhiri tinata. Abe m̄nanore Cañ wej̄edi buhiri ijiptina m̄sa ḡh̄u buhiri tinata. Ijiptiyequina tiqiuro bato ijiyequinare quehnoañequinare tiquina wej̄edi buhiri ḡh̄ure buhiri tinata m̄sa ḡh̄u. Sa yena Coh̄acj̄u w̄h̄u cahap̄u wahiquinare m̄sa ohori altar cahap̄u Zacariare wej̄eahye m̄sa. Tiquiro pehe Berequia mac̄no ijahye. Sa yena tiqiuro ḡh̄ure m̄sa wej̄edi buhiri buhiri tinata m̄sa. ³⁶ Ijirota m̄sare yahuḡta niaja. Tiquina ijiptiyequinare tiquina wej̄edi buhiri yojop̄u cj̄ena ḡh̄u buhiri tieta, ni yahuri Jesu.

Jerusal̄e cj̄enare tutuaro cah̄ahye Jesu

(Lc 13.34-35)

³⁷ Sa ni tuhasa oh̄o saha ni nemori:

—Ahyou, Jerusalē cjāna, Cohācjū yere yahu mahtariquinare wejēdina ijire mūsa. Mūsa acaye panopu cjēna gūhu sata yeyequina mūna ijiahye. Sa yena mūsa cahapu tiquiro ohoriquinare utā paca mehna doque wejēdina ijire mūsa. Canaca ticoro pohnene ticoro wūye dūpuri mehna ticoro moha cuñano saha peye tahari cahīducumi mūsare. Mūsare cahmemi. Mūsa pehe yūhare ne cahmedari. ³⁸ Yojobu mūsa ya maca cohōri maca ijirota. ³⁹ Ijirota mūsare niita niaja. Camepu ahtaŋta yūhu. Sa yūhu ahtagū ihñana mūsa yūhare “Cohācjū tutuaye mehna ahtariquiro quehnoahdo”, ninata. Yūhare mūsa tire niato pano yūhu tojoa tato pano pari turi yūhare ihñasi mūsa, nidi Jesu tiquinare.

24

—Cohācjū wūhu cohāri wūhu ijirota, niahye Jesu

(Mr 13.1-2; Lc 21.5-6)

¹ Sa ye Cohācjū wūhapu ijiriquiro Jesu tiquiro wijia wihigū usā tiquiro buhena ti wūhare ti wūhu cahapu ijiye wūhuse gūhare ihñana, —Quehnoa yūhdūye wūhuse ijicjoare. Ihñaña mūhu gūhu, ni usā tiquirore.

² Jesu yūhtiri:

—Ahri wūhūserere yojobure ihñamene mūsa. Mūsare yahugūta niaja. Ahri wūhūserere ijipihtiyē mūsa ihñari, ahri wūhūserere cjē utā paca gūhare cohā pehoeta. Ne ihcāria utā tojoasi, nidi tiquiro usāre.

Pihtiri deco ijiatire yahuahye Jesu

(Mr 13.3-23; Lc 21.7-24; 17.22-24)

³ Came Olivo wame tidu cūnapu esa, topu dujiri Jesu. Topu dujigū usā tiquiro buhena usā sehšaro tiquiro cahapu esau.

—Yahuya usāre. ¿Dūhse ijigū sa waharotari mūhu nidiro saha waharo? ¿Ahri yehparu mūhu tojoa tati deco, pihtiatu deco panogā ijigū dūhse ti waha dūcagū ihñanataru usā? ni sinituu usā.

⁴ Jesu yūhtiri:

—Quehnoano yeya mūsa. Sa yena mūsare apequina tiquina ni mehoñene tuhoeracāhña. ⁵ Peyequina masa “Cristo ijiaja yūhu”, ni mehoñequina ahtaeta. Tiquina sa ni mehogū tuhoje peyequina masa Cohācjū yere duhueta. ⁶ Mūsa cahagāpu masa apequina tiquina cahme wejēgū tuhonata mūsa. Sa yena yoaropu gūhare tiquina cahme wejēgū tuhoonata mūsa. Sa tuhoopenata ne tire pajiro wacūedacāhña. Sa waharota. Tiquina sa yegū pihtiatu deco dūhsarīnota. ⁷ Ti pjere ihcā yehpa cjēna ape yehpa cjēna mehna cahme wejēeta. Sa ye ihcāquiro puhtoro yequina apequiro puhtoro yequina mehna cahme wejēeta. Sa ye peyequina masa uja mehna yarieta. Sa yero peye yehparipu yehpa űuhminota. ⁸ Sa wahagū ahri yehpa cjēnare tiquina űano yūhdū nemoato dūhsarota ti pjere. űano yūhdū nemoeta.

⁹ Ti pjere apequina mūsare űehe, űano ye dutiye ohoeta mūsare apequina puhtoapure. Tiquina sa ohogū mūsare wejēeta. Yeequina mūsa ijiri buhiri ijipihtiyequina mūsare ihña tuhtietu. ¹⁰ Ti pjere peyequina yeequina ijimediquina yūhare cohāeta. Sa ye tiquina mehna cjēnare tiquina ihña tuhtietu. Sa ye tiquina mehna cjēna tiquina ijiepegūta tiquinare űano yeatiquinare ohoeta tiquina. ¹¹ Ti pjere peyequina “Cohācjū yere yahu mahtana ijiaja”, ni mehoñequina ijietu. Sa ye peyequina masa tiquina ni mehoñene tuhoeta. ¹² Ti pjere űa yūhdūaro yeeta masa. Sa ye tiquina mehna cjēnare cahī nemosi. ¹³ Sa yena

musa tutuana ijina, ahri yehpapu musa catinino puno ihcāno sahana, yuhdunata musa. ¹⁴ Sa yero ahri quehnoañe buheye ijipihtiroru ahri yehpapure tiquina yahuri buheye ijirota. Cohācjū puhtoro ijiyere yahuri buheye tiquina yahu siteri buheye ijirota, ijipihtiyequina ti buheyere tiquina masiata saha. Tiquina sa yahuri bato pihtiri deco ducarota.

¹⁵ Cohācjū yere yahu mūhtariquiro Daniel mūnano panoru cjūno ña yuhdūariquirore Cohācjū yere ñano yeriquirore yahue tiahye panopure. Ti pjere tiquiro ñariquiro pehe Cohācjū ya wuhuru tiquiro ducugū ihñanata musa. Ahri yuhu nidire quehnoano masiña musa. ¹⁶ Topu tiquiro ducugū ihñañe, Judea yehpapu ijieyequina pehe cunu caharu oma duhtiahro. ¹⁷ Sojaro mehna oma duhtiahro. Ti pjere tiquina wuhūseri bui cjē paaripu ijieyequina wuhu puhiaipu ijiyere tiquina yere neñe wahaeracāhdo tiquina umuñano waharo. ¹⁸ Sa ye ti pjere apequina weseripu ijieyequina tiquina bui cjē suhti wuhuru ijieye suhtire neñe wahaeracāhdo tiquina umuñano waharo. ¹⁹ Ti pjere niji pacosānumia, tiquina pohnene apūoñe numia gūhu pejecuro wahaeta. ²⁰ Sa yena Cohācjūre ohō saha ni siniña: “Pohecū ijigū judio masa usā soye decori ijigū gūhure usā oma duhtiatu deco ijieracāhdo”, ni siniña musa Cohācjūre. ²¹ Ti decorire masa ña yuhduaro wahaeta. Ahri yehpare tiquiro bajumehnedi bato masa ñano yuhdūe tiahye. Tiquina sa yuhdūepēgāta ijipihtiyē ti puriñe yuhduoro pihtiri deco panogā ña yuhduaro yuhdūeta masa. Sa ñano tiquina yuhdūri bato pari turi sata ñano yuhdūsi ahri yehpapu. ²² Cohācjū ti decorire meheñe decorigā ijigū yerota. Tiquiro sa yeragū ne ihcāquiro masūno

yuhdūeraboaga. Sa yero tiquiro beseriquina tiquina yuhdūatiere meheñe decorigā cūnota Cohācjū.

²³ Ti pjere apequina musare “Ihñañe. Ohōpu ijire Cristo”, tiquina nigū tiquinare tūhoeracāhña. “Topu ijire Cristo”, tiquina nigū tiquinare tūhoeracāhña. ²⁴ “Cristo ijiaja”, ni mehoñequina, “Cohācjū yere yahu mūhtarina ijiaja”, ni mehoñequina ijietu ti pjere. Sa ye Cohācjū tiquiro beseriquinare ni mehoñe, tiquina bajumehneñene ye ihñoeta. Cohācjū yequinare Cohācjūre tiquina cohāgū ye duare tiquina ni mehoñequina. ²⁵ Ahri ijipihtiyere yahuyuaia musare ti sa wahato pano. Sa yena tūhoya musa. ²⁶ Apequina masa musare “Ihñañe. Masa marienopu ijire Cristo”, tiquina nigū topure ihñana wahaeracāhña. Sa yena “Ohōpu ahri tucūripu ijire tiquiro”, tiquina nigū tiquinare tūhoeracāhña. ²⁷ Yuhu masu Cohācjū ohorigu wacūeno mehna tojoa tautja. Upo miadoqueoro umūserē asū mūja taropu, asū sajānopu wacūeno mehna ti miadoqueoro saha wacūeno mehna tojoa tautja yuhu. ²⁸ Masa tiquina ñañe yeducuriporu topu Cohācjū tiquina ñañe buhiri buhiri dahrerota tiquinare, ni yahuri Jesu.

Cristo ahri yehpapu tiquiro tojoa tatire yahuahye tiquiro

(Mr 13.24-37; Lc 21.25-33; 17.26-30, 34-36)

²⁹ Sa ye tiquinare yahu nemori:

—Ti ñano yuhdūye decori bato asū deco cjūno, ñami cjūno gūhu buhrio duhueta. Tiquina sa wahagū ñahpicoha paca umūsepu ijieye paca bora dijia taeta. Sa ye umūse cjē yehpari, ñahpicoha gūhu ti sa wahaducurore comesaeta. Sa ye ñuhmieta. ³⁰ Ti pjeta yuhu masu Cohācjū ohorigu umūsepu yuhu bajumehnenore yuhu ihñogū ihñañe masa. Sa ye ijipihtiyē

cururi cĵena utieta. Sa yegũ yũhũ tutuaye mehna, yũhũ asi siteye mehna ƛhmũano cĵe ehmeo cururi bui ahri yehpapũre yũhũ tojoa tagũ ihñæeta tiquina. ³¹ Corneta bisirota. Sa yegũ yeequina angelere ijip-
ihtiropũ ahri yehpapũ ohoutja yũhũ. Sa ye ijipihtiropũ yeequina yũhũ beseriquinare tiquina neeta.

³² 'Yojoapũre higeragũre tahotuya mũsa. Tũ queoye mehna mũsare buheitja. Tũ yucũgũ pũri tigũ ihñana, cahma mehenogã dũhsagũ masine mũsa. ³³ Sata ahri ijipihtiye yũhũ nidire ti sa wahagũ ihñana, yũhũ tojoa tato mehenogã ti dũhsagũ masinata mũsa. ³⁴ Ijirota niita niaja mũsare. Ti pje cĵena tiquina yariato pano ijipihtiye yũhũ nidiro sahata sa waharota. ƪhmũse, ahri yehpa gũhũ pihtia waharota. ³⁵ Yũhũ yahuducuye pehe ne comesasi. Ijipihtiye yũhũ nidiro sahata sa waha sohtori tirota.

³⁶ 'Ti decore yũhũ tojoa tati decore, ti hora gũhũre masiedaja yũhũ. Angele gũhũ tire masiedare. Masa gũhũ masiedare. Yũhũ Pacũ dihita tire masine.

³⁷ 'Noé tiquiro ijiri pje cĵena tiquina ijiriro sahata ahri yehpapũ yũhũ tojoa tato panogãre sata ijieta masa. ³⁸ Yehpa miniato pano masa ihya, sihni, yeahye. Sa yeye ƛmũa, numia mehna omoca dũhteahye. Noé gũhũ yucũsapũ tiquina sajãto pano sa yee timahye masa. ³⁹ Duita tutuaro acoro ahta, wacũeno mehna yehpa minia wahahye. Masa gũhũ mini pihtia wahahye. Wacũeno mehna tiquina minidiro saha yũhũ masũ Cohãcĵũ ohorigũ ahri yehpapũre wacũeno mehna tojoa tautja. ⁴⁰ Ti pjere wesepũ pũaro dahrayequina ijigũ ihcãquiro yũhũre cahmediquirore neitja. Sa yero yũhũre cahmediquiro topũ tojoarota. ⁴¹ Ti pjere pũaro numia ihcãnopũ tiquina trigore ña mũtoñequina numia ijigũ ihcãcoro

yũhũre cahmedicorore neitja. Sa yero yũhũre cahmeedicooro topũta tojoarota.

⁴² 'Quehnoano wacũ masi cohteya. Yũhũ mũsa pũhto, yũhũ tojoa tati decore ne masiedare mũsa. ⁴³ Ahrire wacũña. Yaqueriquiro wũhũpũ tiquiro sajã yaqueato panore wũhũ upũro masino, ti ñami tiquiro carĩedaboaga, yaqueriquirore cohtero. Sa yero yaqueriquirore tiquiro ya wũhũpũ sajã dutieraboaga. Yaqueriquiro tiquiro wacũeno mehna tiquiro ahtariro saha wacũeno mehna ahtautja yũhũ. ⁴⁴ Sa yena yeere sa yeducuna yũhũre cohteya. Yũhũ masũ Cohãcĵũ ohorigũ ahri yehpapũ tojoa tagũ wacũeno mehna ahtautja, nidi Jesu.

Apequiro dahra cohteriquiro tiquiro pũhtoro ño peo, apequiro ño peoerare

(Lc 12.41-48)

⁴⁵ Sa ye Jesu queoye mehna ohõ saha ni buhe nemori tja:

—Dahra cohteriquiro tiquiro pũhtoro ño peoriquiro tũho masiniquiro ijire. Tiquiro sa ijigũ ihñano apequina dahra cohteyequina bui cũre tiquirore tiquiro pũhtoro pehe waharo taro. Sa tiquirore cũ tuhasa wahaa wahare pũhtoro. Sa yero ihyari pje ijigũ dahra cohteriquiro apequinare ihyayere itire. ⁴⁶ Came pũhtoro tiquiro ya wũhũpũ tojoa wihire. Tiquiro tojoa wihigũ ihñano dahra cohteriquiro pehe tiquiro pũhtoro dutiriro sahata ye pehoriquiro ijiro, bucueriquiro ijirota. ⁴⁷ Ijirota mũsare niita niaja. Tiquiro sa yegũ ihñano tiquiro pũhtoro ijipihtiye tiquiro yere ihña ihboriquiro cũnota tiquirore. ⁴⁸ Sa yepegũta ñariquiro dahra cohteriquiro pehe "Yũhũ pũhtoro bajuerare", nino, ⁴⁹ apequina dahra cohteyequinare quẽpe, pajiro ihya, sihni, queheyequina mehna queherota.

50 Came tiquiro puhtoro wacüeno mehna tojoa tarota. Ti deco, ti hora gūhare ne masiedare dahra cohteriquiro. 51 Puhtoro pehe tojoa taro ñariquiro tiquiro ñano yerire tuhoro, tiquirore tutuaro buhiri dahrerota. Sa yero ni mehoñequina tiquina waharopu cohānota tiquirore. Topure tiquiro tutuaro uti, bujua witiro mehna bahque dihorota, ni yahuri Jesu.

25

Pua omope nuhmia queoye mehna buheahye Jesu

1 Sa ye Jesu pari turi queoye mehna ohō saha ni buhe nemori tja:

—Uhmuse cjūno puhtoro tiquiro ijiye ahri queoye yero saha ijire: Pua omope nuhmia ijiahye. Ihcā ñami tiquina sihōñe paca mehna omoca dūhteatiquirore piti caye wahahye. 2 Tiquina mehna ihcā omope numia tuho masieñequina numia ijiahye. Apequina numia pehe ihcā omope numia tuho masieñequina numia ijiahye. 3 Tuho masieñequina numia pehe tiquina sihōñe pacare, pose tiye pacare nemahye. Apee pacare uhse pose tiye pacare ti pihtigū tiquina pioborire nedahye. 4 Tuho masieñequina numia pehe tiquina sihōñe paca uhse pose tiye pacare neahye. Apee paca tiquina pioati paca gūhare neahye. 5 Sa ye omoca dūhteatiquiro tiquiro bajueragū tiquina numiare wujua purigū carīa wahahye. 6 Sa yero ñami decopu sañuducugū tuhoahye. “Tuhoaya. Omoca dūhteatiquiro ahtaro ca tare. Tiquirore piti cana ahtaya”, ni sañuducugū tuhoahye. 7 Tiquiro sa nigū tuhoaya numia wahcā, tiquina ye sihōñe pacare quehnoahye. 8 Sa ye tuho masieñequina numia pehe apee numia tuho masieñequina numiare ohō saha niahye: “Uśā

sihōñe paca yatiro nine. Sa yena mehenogā mūsa ye uhsero ohoya usāre”, ni sinimahye tiquina numia. 9 Tiquina sa siniepegāta tuho masieñequina numia ohō saha yūhtiahye: “Uśā ye uhse mari ijipihtinare esa tuhaeraboaga. Sa yena uhse cūoyequinare mūsa basi dūna wahaya”, ni yūhtiahye tuho masieñequina numia pehe. 10 Sa ye tuho masieñequina numia dūye wahahye. Tiquina sa wahari bato omoca dūhteatiquiro wihiahye. Tiquiro wihigū ihña tiquina yere quehno tuhasariquina numia tuho masieñequina numia tiquirore piti cahye. Piti ca bose deco omoca dūhteri decopu tiquiro mehna ihñañe wahahye. Sa ye bose decore tiquina yeri wuhupu apequina mehna numia tiquina sajāri bato, sopecahare biha cāhye. 11 Camepu tuho masieñequina numia pehe wihimahye. “Puhto, usāre pōohña”, nimahye tiquina numia. 12 “Ijirota mū sare niita niaja. Mū sare masiedaja yuhū”, niahye tiquiro tiquina numiare.

13 ‘Sa yena tuho masieñequina numia tiquina yere quehnoano quehno tuhasa, tiquina cohteriro saha quehnoana, ñañe mariena iji, cohteya mūsa gūhū. Yuhū tojoa tati decore ti hora gūhare ne masiedare mūsa, ni yahuri Jesu.

Niñeru cjoeri uru cjoeri queoyere yahuahye Jesu

14 Sa ni yahu tuhasa queoye mehna ohō saha ni buhe nemori tja:

—Ti pjere yuhū tojoa tati pje ahri queoye yero saha ijirota. Wuhū uparo ijiahye. Tiquiro ape siepu tinino waharo taro, tiquirore dahra cohteyequinare pijioahye. Sa yero tiquinare tiquiro yere cohte dutiahye.

15 ‘Sa cohte dutiro tiquina ihbo masino puno tiquinare niñeru cjoerire ohoahye. Ihcāquirore ihcā

omope cjoeri wapa bujaye cjoerire uru cjoerire ohoahye. Apequirore pua cjoerire ohoahye. Apequirore ihcã cjoerire ohoahye. Tiquinare oho tuhasa, wahaa wahahye. ¹⁶ Sa ye ihcã omope cjoeri tiquiro ohoriquiro duita tiquiro wahari batota ti cjoeri mehna apee borore dúahye. Tiquiro dúrire apequinare duahye. Tiquiro duari wapa pua omope cjoeri wapa yeahye tiquirore. Sa yero pua omope cjoeri cnoahye. ¹⁷ Sa yero pua cjoerire ohoriquiro duita tiquiro wahari batota ti cjoeri mehna apee borore dúahye. Tiquiro dúrire apequinare duahye. Tiquiro duari wapa pititia cjoerire wapa yeahye tiquirore. Sa yero pititia cjoerire cnoahye. ¹⁸ Ihcã cjoerire tiquiro ohoriquiro pehe cope sehe, ti cjoerire yahye, ti cjoerire nnono.

¹⁹ 'Came yoari bato tiquina puhtoro wihyahye. Sa wihiro tiquiro niñeru cjoerire mehna tiquina ñehe nemorire queoro ahtaro tiquirore dahra cohteyequinare pijioahye. ²⁰ Sa yero ihcã omope cjoerire tiquiro ohoriquiro puhtoro cahapu esa, pua omope cjoerire wiahye tiquirore. "Ihcã omope cjoerire yahye ohori mahu. Ihñaña. Ti cjoerire mehna apee cjoerire ñehe nemou", niahye tiquirore. ²¹ "Quehnoano yeaya mahu. Mahu quehnoagu, yahye dutiriro saha yerigu ijire. Mehenogãre quehnoano yeaya mahu. Sa yegu yojopare mahure pajiro mahu dahratire cõtja. Sa yegu yahye mehna bucueya mahu", niahye tiquiro puhtoro. ²² Sa yero pua cjoerire ñehediquiro puhtoro cahapu esa, yahyahye tiquirore: "Pua cjoerire yahye ohori mahu. Ihñaña. Ti cjoerire mehna apee cjoerire pua cjoerire ñehe nemou", niahye tiquiro. ²³ "Quehnoano yeaya mahu. Mahu quehnoagu, yahye dutiriro saha yerigu ijire.

Mehenogãre quehnoano yeaya mahu. Sa yegu yojopare pajiro mahu dahratire cõtja. Sa yegu yahye mehna bucueya mahu", niahye tiquiro puhtoro.

²⁴ Sa yero ihcã cjoerire ñehediquiro puhtoro cahapu esa, yahyahye tiquirore: "Puhto, mahu apequina pehere tutuaro dahra dutigu ijire. Sa tutuaro dahra dutigu ijigu mahu basi oterapegata ti ducare nene mahu. ²⁵ Mahu sa ijigã mahure cuei. Sa cuegu cope sehe, ti copegu mahu niñeru cjoerire nnono. Ihñaña. Ohõpu ijire mahu ya cjoerire niñeru cjoerire", niahye tiquiro. ²⁶ "Mahu ñagu, cape bujagu ijire. Yahye basi oterapegata ti ducare yahye negu ijigã masine mahu. ²⁷ Yahye sa ijigã ihñaepagata yahye niñeru cjoerire niñeru ihbori wuhuru ihboboaya mahu. Mahu sa ihbogã tiquina ti cjoerire wiayeru apee niñeru oho nemoboaya tiquina", niahye puhtoro tiquirore. ²⁸ Sa nino apequina tiquiro dahra cohteyequinare dutiahye tiquiro: "Niñeru cjoerire ehmaña tiquirore. Pua omope cjoerire cnoquirore pehere ohoya. ²⁹ Cnoyequinare oho nemoutja. Sa ye pajiro cnoeta. Cnoyequina pehere mehenogã tiquina cnoepagata tire ehmañtja. ³⁰ Ahriquiro dahra cohteriquiro dahseatiquiro ijierare. Nahitanoru ñanoru cohã cãhña tiquirore. Topu tiquiro tutuaro uti, bujua witiro mehna bahque dihorota", niahye puhtoro, ni yahuri Jesu.

Buhiri dahreatire yahyahye Jesu

³¹ Sa ye Jesu yahye nemori:

—Yahye masu Cohãcã ohorigu ijipihiyequina angele mehna puhto ijigu tagu, yahye puhtoro dujiropu yahye asi siteye mehna dujigatja. ³² Sa yahye dujigã, ahri yehpa cãena ijipihiyequina yahye cahapu cahmecoeta. Tiquina sa cahmecoari bato pua curua tu wañtja tiquinare. Ovejare

ihña ihboriquiro ovejare, cabra gũhare tiquiro tu wariro saha masare tu wa docoutja. ³³ Sa tu wagũ oveja yero saha ijiyequinare quehnoañequinare yũhu poto pehe bese docoutja. Sa yegũ cabra yero saha ijiyequinare ñañequinare yũhu cũ pehe pehepũ bese docoutja. ³⁴ Yũhu sa yeri bato yũhu ijipihtiyequina pũhto pehe yũhu poto pehepũ yũhu bese docoriquinare ohõ saha ni yahutja: “Yũhu Pacũ musare quehnoano yere. Ahri yehpare bajumehnenopũ mũsa ye ijiatire tiquiro pũhtoro ijirore quehnoyu tuhasari Cohãcjũ. Sa yena yojopũre tiquiro quehnororopũre ijina ahtaya. ³⁵ Yũhu ujuã ahbagũ mũsa pehe yũhare ihyayere ohori. Yũhu aco wũogũ yũhare mũsa sihõri. Mũsa cahapũ yũhu tinigũ yũhare ihña masiedapenata yũhare quehnoano piti cari mũsa. ³⁶ Suhti mariegũ yũhu ijigũ ihñana mũsa pehe yũhare suhti sãari. Dohatigũ yũhu ijigũ mũsa yũhare ihñana ahtari. Peresupũ yũhu ijigũ gũhare yũhare ihñana ahtari mũsa”, niitja quehnoañequinare. ³⁷ Yũhu sa nigũ tũhoye tiquina yũhare sinitueta: “¿Pũhto, dũhse ijigũ mũhu ujuã ahbagũ mũhare ihyayere ohori usã? ¿Dũhse ijigũ mũhu aco wũogũ mũhare sihõri usã? ³⁸ ¿Dũhse ijigũ mũhare ihña masiedapenata mũhare quehnoano piti cari usã? ¿Dũhse ijigũ suhti mariegũ mũhu ijigũ mũhare suhti sãari usã? ³⁹ ¿Dũhse ijigũ mũhu dohatigũ o peresupũ mũhu ijigũ gũhare mũhare ihñana esari usã?” nieta yũhare. ⁴⁰ Tiquina sa ni sinitugũ tũhogũ yũhu pũhto tiquinare yahutja. “Ijirota mũsare niita niaja. Ahriquina yeequina mehna cjãno ihyo ijiriquirore mũsa ne yedohoerari. Sa yena nidi mũsa”, ni yahutja tiquinare. ⁴¹ Sa yero tiquinare sa buhiri dahreducurota Cohãcjũ. Ti buhiri dahreye ne pihlisi. Sa ye, quehnoañequina pehe ijipihtiye decori quehnoano ijieta, ni yahuri Jesu.

tiquinare”, ni yahutja.

⁴¹ 'Quehnoañequinare yũhu sa ni yahuri bato yũhu cũ pehe pehepũ ducuyequinare yũhu ijipihtiyequina pũhto ohõ saha ni yahutja: “Cohãcjũ tiquiro buhiri dahreatina ijire mũsa. Yũhu mehna tojoeracãhña. Pecapũ wahaya mũsa. Ti peca ne yatierare. Watĩno, tiquiro yequina angele gũhu tiquina ijiatire ti pecare yeri Cohãcjũ. ⁴² Yũhu ujuã ahbagũ mũsa pehe yũhare ihyayere ohoerari. Yũhu aco wũogũ mũsa yũhare sihõedari. ⁴³ Yũhare masiedana mũsa yũhare piti caerari. Sa ihña cãri. Suhti mariegũ yũhu ijiepegũta, yũhare suhti sãedari mũsa. Dohatigũ yũhu ijigũ peresupũ yũhu ijigũ gũhare sa ihña cãri mũsa yũhare”, ni yahutja tiquinare ñañequinare. ⁴⁴ Yũhu sa nigũ tũhoye tiquina yũhare sinitueta: “¿Pũhto, mũhu ujuã ahbagũ, mũhu aco wũogũ, usã masiedigũ mũhu ijigũ, suhti mariegũ mũhu ijigũ, dohatigũ mũhu ijigũ, peresupũ mũhu ijigũ dũhse ijigũ usã pehe mũhare yedohoerari?” ni sinitueta yũhare. ⁴⁵ Tiquina sa ni sinitugũ yũhu tiquinare ohõ saha ni yahutja: “Ijirota mũsare niita niaja. Ahriquina yeequina mehna cjãno ihyo ijiriquirore mũsa ne yedohoerari. Sa ijiriquirore mũsa yedohoerana, yũhareta sa yena nidi mũsa”, ni yahutja tiquinare. ⁴⁶ Sa yero tiquinare sa buhiri dahreducurota Cohãcjũ. Ti buhiri dahreye ne pihlisi. Sa ye, quehnoañequina pehe ijipihtiye decori quehnoano ijieta, ni yahuri Jesu.

26

Pahia pũhtoa, judio masa bucũna mehna Jesure wejẽ duahye
(Mr 14.1-2; Lc 22.1-2; Jn 11.45-53)

1 Ti ijipihtiyere tiqiro buheri bato Jesu usāre tiqiro buhenare yahuri:

2 —Pua deco bato pascua ijirota. Tire masa masine. Ti pjere yūhū masare Cohācjū ohorigure űeheeta. űeheűe, yahure curusapu wejēeta, nidi tiqiro usāre.

3 Sa ye pahia puhtoā, judio masa bucūna gūhū cahmecoahye. Caifa pahia puhtoro ya wūhūpu cahmecoahye tiquina. 4 Topū cahmecoā, tiquina ni mehoűe mehna Jesure űehe tiquina wejēatire cahme yahuye niahye.

5 —Bose deco ijigū tiqirore űehedacūhna, “Masa usuari”, nina, niahye tiquina basi.

Numino ehme sitiye uhse mehna Jesure pio peoahye

(Mr 14.3-9; Jn 12.1-8)

6 Ti pjere Simo cami bucū mūna wihiro ijimediquiro ya wūhūpu ijiri Jesu. Tiqiro ijiri maca Betania wame tiri maca ijiri. 7 Ti wūhūpu tiqiro ihyari watoā ihcācoro numino ehme sitiye ne cāhta, Jesu dapu bui pio peori. Ti ehme sitiye alabastro wame tiriapu pose tiri. Wapa bujūye co ijiri. 8 Ticoro sa pio peogū ihñana usā Jesu buhena usuā.

—¿Dūhsero ahricoro ahri core wapa bujūyere sa ye siteajari? 9 Ti ehme sitiye duaboaya. Sa duaro pajiro wapa űeheboaya. Sa űeheno ti niűerure pejecūoyequinare ohoboaya ahricoro, nii usā tiqiro buhena.

10 Usā sa ni usuagū ihñano, Jesu yahuri usāre:

—Sa niedacāhñā ticorore. Yūhūre quehnoano yero nine.

11 Pejecūoyequina pehe masa mehna sa iiducuetā. Sa yena tiquina pehere masa oho masine. Yūhū pehe ahri yehpapūre masa mehna sa iiducusi. 12 Yūhūre tiquina yato pano yūhū pagūre quehnoyuro, ticoro yahure pio

peori. 13 Ijirota masare niita niaja. Ijipihtiro ahri yehpapū quehnoaűe buheyere tiquina yahuropū ahricoro yojopūre ticoro yerire yahueta. Tiquina sa yahugū tūhoye ticorore masa peyequina wacūeta, ni yahuri Jesu usāre.

Juda Iscariote Jesure ihñā tuhtiyequinare ihñoaűe

(Mr 14.10-11; Lc 22.3-6)

14 Ti pjere ihcāquiro usā mehna cjāno Juda Iscariote pahia puhtoā cahapu esahye. 15 Esa, tiquinare sinituahye.

—¿Jesure masare yūhū ihñogū noho puno wapa yenatari masa? ni sinituahye tiquinare.

Tiqiro sa nigū tiquina tiqirore treinta cjoeri plata cjoerire ohoahye.

16 Tiquina sa ohogū Juda pehe Jesure tiqiro ihñoati űamine cohtero niahye.

Jesu tiqiro buheyequina mehna tiqiro ihya bato tiri deco ijiahye

(Mr 14.12-25; Lc 22.7-23; Jn 13.21-30; 1 Co 11.23-26)

17 Sa ye pugū yeye moremehneűe pāre tiquina ihyati deco bose deco iji dūcari deco usā tiqiro buhena Jesu cahapu waha, sinituu tiqirore:

—¿Noho boropū bose deco ijigū mari ihyatire quehnoyu dutigū ohoutjari mūhū usāre? nii tiqirore.

18 Usā sa nigū tiqiro yūhtiri:

—Jerusalēpu wahaya. Topū ijiriquirore ohō saha ni yahuya: “Marine buheriquiro tiqiro űano yūhūati deco mehenogā dūhsatjāñohti. Pascua ijigū mūhū ya wūhūpu Jesu usāre tiqiro buhenare siho ihyati ijiñohti”, ni yahuya ti wūhū upūrore, ni ohori Jesu usāre.

19 Sa yena usāre tiqiro dutiriro sahata yena, pascua ijigū usā ihyatire quehnou usā.

²⁰ Sa ye ti ñamine usã mehna doce tiqiro buhena mehna ihyaro nidi Jesu. ²¹ Usã ihyari watoa tiqiro usãre yahuri:

—Ijirota musare niita niaja. Ihcãqiro musa mehna cjãno yuhare ihña tuhtiequinare ihñonota yuhare, ni yahuri tiqiro usãre.

²² Tiqiro sa nigũ tãhona tutuaro bujãa witina, tiqirore sinitu dũcau usã ijipihtina:

—¿Puhto, yuhata ijiajari mähare ihñocjũ? ni sinituu.

²³ Usã sa ni sinitugã tiqiro yuhtiri:

—Yuhũ ihyari papũ yuhũ mehna soha ihyariqiro ijire yuhare ihña tuhtiequinare ihñoatiqiro.

²⁴ Panopũ yuhare tiquina ojoariro sahata yuhũ masũ Cohãcjũ ohorigũ yariagũtja. Sa yero yuhare ihña tuhtiequinare ihñoatiqiro ñano yuhdũrota. Tiqiro pehe masa bajueraro quehnoa yuhdũaboaya. Ñano yuhdũeraboaya, nidi Jesu.

²⁵ Tiqiro sa nigũta tiqirore ihñoatiqiro Juda sinituri:

—¿Buhegũ, mähare ihñocjũ ijiajari yuhũ? ni sinituri tiqiro.

Jesu yuhtiri:

—Ehũ. Mũhata ijire, nidi.

²⁶ Sa ni yahu tuhasa usã tiqiro buhena mehna ihyaro taro nidi. Sa yero Jesu pãre ne, Cohãcjũre “Quehnoare”, nidi. Sa ni tuhasa tire nuha, usãre tiqiro buhenare itiri.

—Ahrire ne, ihyaya. Ahri yuhũ pagũ ijire, nidi tiqiro.

²⁷ Sa ni tuhasa tiqiro sihniidi pare ne, Cohãcjũre “Quehnoare”, ni, usãre ohori.

—Musa ijipihtina ahrire sihniña.

²⁸ Ahri yuhũ dii ijire. Peyequina masa tiquina ñañe yerire cohãgũ tagũ yariũtja. Sa yegũ yuhũ diire cohãũtja. Cohãcjũ “Musare yuhdũoutja”, tiqiro nidiro esagũ yuhũ yariaro mehna tiqiro nidiro sohtori tirota. ²⁹ Musare niita

niaja. Yuhũ Pacũ tiqiro puhtoro ijiropũ uhmũsepũ musa mehna wahma core uhse core sihniitja. Mari sa sihniato pano ahri core sihni nemosi yuhũ, nidi Jesu usãre.

³⁰ Sa yena Cohãcjũ yere basa tuhasana cũũpũ Olivo wame tidũpũ wahũ usã.

Pedro Jesure tiqiro cohãtire yahuahye Jesu

(Mr 14.26-31; Lc 22.31-34; Jn 13.36-38)

³¹ Topũ usã esagũ Jesu pehe usãre yahuri:

—Mia ñami yuhare cohã cãnata musa. Ohõ sahata nine Cohãcjũ tiqiro yere tiquina ojoari pũpũ yuhare yahuro: “Ovejare ihña ihboriqiro yero saha ijiriquirore yuhũ Cohãcjũ cohãgũtja. Yuhũ sa cohãgũ tiqiro yequina oveja yero saha ijieyequina duhti site cãa wahæta”, nine Cohãcjũ tiqiro yere tiquina ojoari pũpũ.

³² Sa yegũ Cohãcjũ yuhare tiqiro masori bato musa pano Galileapũ wahayutja yuhũ, nidi tiqiro.

³³ Tiqiro sa nigũ tuhoro ohõ saha nimeri Pedro:

—Yuhũ mehna cjẽna ijipihtieyequina mähare tiquina cohãpepegũta yuhũ pehe mähare ne cohãsi, nimeri Pedro tiqirore.

³⁴ Jesu yuhtiri:

—Ijirota niita niaja mähare. Mia ñami canaca tiqiro yahuato pano “Yuhũ Jesure masiedaga”, niita mähũ. Ihtia taha sa niita mähũ, nidi tiqiro Pedrorre.

³⁵ Tiqiro sa niepegũta Pedro ohõ saha ni yuhtiri:

—Mũhũ mehna yuhare tiquina wejẽ duepegũta “Jesure masiedaga”, ne nisi yuhũ, ni yuhtimeri Pedro.

Sa yena usã gũhũ apequina tiqiro buhena Pedro tiqiro nidiro sahata nimi usã Jesure.

Getsemaní wame tiri wesepũ Cohãcjũre siniyahye Jesu

(Mr 14.32-42; Lc 22.39-46)

36 Sa ye Getsemaní wame tiri wesepu Jesu usã tiquiro buhena mehna waha, topu esa, usãre nidi:

—Ohõ dujiyuya. Mûsa ohõ dujiri watoa sohõ cjûnogãpu Cohãcjãre sinigû wahagû niaja, nidi tiquiro usãre.

37 Sa ni tuhasa, Pedrore, puaro Zebedeo pohnene tiquina ihtiarore piji cãri. Sa yero tiquiro tutuaro bujua witi, ñano jeripohna tiahye. 38 Sa bujua witiro tiquiro mehna cjênare tiquiro piji cãriquinare ohõ saha niahye:

—Tutuaro ñano jeripohna tiaja yuhu. Yuhure tutuaro purino saha tuhutugû niaja. Sohõ cjûnogã wahagû niaja. Ohõpu tojoaya. Sa yena yuhu mehnata cariedacãhña mûsa gûhu, niahye tiquiro tiquinare.

39 Sa ni tuhasa mehenogã waha nemo, yehparû quehe sa, Cohãcjãre niahye:

—Mai, yuhu ñano yuhduatire ye dueragû yeracãhña. Yuhu sa niepegûta yuhu cahmeno saha yeracãhña. Mûhu pehe masine. Mûhu cahmeno saha yeya yuhure, ni siniahye tiquiro Cohãcjãre.

40 Sa ni tuhasa, ihtiaro tiquiro buheyequina cahapu wihiro, carĩnequinare ihñahye. Tiquinare ihñano, Pedrore ohõ saha niahye:

—¿Ihcã hora waro yuhu mehna carĩegû iji masiedajari mûhu?

41 Quehnoano yeya mûsa. Sa yena Cohãcjãre siniducuya mûsa, “Ñano yeari”, nina. Mûsa tuhutuye mehna quehnoañene ye duamene mûsa. Mûsa sehsaro sa ye duepenata tire ye masiedare mûsa, ni yahuahye Jesu.

42 Sa ni yahu tuhasa, pari turi waha, Cohãcjãre siniahye:

—Mai, yuhu ñano yuhduatire ye duagû yeya yuhure. Mûhu cahmeno saha yeya, ni siniahye tiquiro.

43 Ni, tiquiro buheyequina ihtiaro buheyequina cahapu pari

turi wihiahye tja. Sa wihiro carĩnequinareta ihñahye tja. Wujua puri yuhduahye tiquinare. 44 Sa yero tiquinare cû cã, pari turi waha, Cohãcjãre siniahye. To pano tiquiro nidiro sahata niahye tja. 45 Sa ni tuhasa tiquiro buheyequina cahapu wihi, tiquinare ohõ saha niahye:

—¿Yojoapu pûritare carĩnina nijari mûsa? ¿Sorina nijari mûsa? niahye tiquiro.

Sa ni tuhasa, masa tiquina ah-tagû ihñano, ohõ saha niahye.

—Tuhoya. Mianogãta yuhu masure Cohãcjã ohorigure ñañequinare ohoeta yuhure. 46 Wahcãña, Isa wahana. Ihñaña. Yuhure ihña tuhtiequinare ihñoatiquiro ohõpu ahtare, niahye tiquiro.

Jesure ihña tuhtiequina tiquirore peresuyeahye

(Mr 14.43-50; Lc 22.47-53; Jn 18.2-11)

47 Tiquiro sa nino watoa usã mehna cjûno ijimediquiro Juda pehe wihiri. Masa peyequina ahtari tiquiro mehna. Tiquina pahia puhto, judio masa bucuna gûhu tiquina ohoriquina ijiri. Noseñe pjñine, yucu tiãri gûhure cuori. 48 Coã warore Jesure ihña tuhtiequinare ihñoatiquiro masare ohõ saha ni yahuyu tuhasahye:

—Yuhu wahsupu ihmidiquirota ijirota mûsa ñeheatiquiro. Tiquirore yuhu ihmidi bato ñeheña tiquirore, niahye Juda tiquinare.

49 Sa ye wihiro Jesu cahapu duita wahari.

—¿Buhegû, ijijari mûhu? ni, tiquirore wahsupu ihmidi.

50 Tiquiro sa ihmigû Jesu ohõ saha nidi:

—Yuhu acayu, ohõpûre mûhu yei tu ahtarire yeya mûhu, nidi tiquiro.

Sa ye tiquina Jesure ñehedi.

⁵¹ Tiquina sa yegū ihñano Jesu mehna cjäno tiquiro ñoseni pjine tuã we ne, pahia puhtoro cahacjñore cahnonore ðate pahre cãri. ⁵² Tiquiro sa yegū ihñano Jesu tiquirore yahuri.

—Mũhũ ñoseni pjine ihboya. Apequinare mũhũ ñosegũ tiquina ñose cahmegũ yariagũta mũhũ. ⁵³ Yũhũ Pacũre yũhũre yũhũ yedoho dutigũ tiquiro pehe peyequina angelere doce cururire yũhũ cahapũ ohoboaya tiquiro. ¿Tire masiedajari mũhũ? ⁵⁴ Sa yedohoboriquire tiquiro ijiepegũta tiquirore yũhũre yedoho dutisi yũhũ. Yũhũ sa dutieragũ Cohãcjũ yere tiquina ojoari pũ ti nidiro sahata sa waharota, nidi tiquiro.

⁵⁵ Sa ni tuhasa masare yahuri tiquiro:

—¿Dũhse ijiro boro mũsa ñoseñe pjini mehna, yucũ tiãri mehna yaque bũcũrore yero saha mũsa yũhũre ñehena ahtajari? Decoripe Cohãcjũ wũhũpũ mũsare yũhũ buhe dujigũ, mũsa yũhũre ne ñehedari. ⁵⁶ Sa ijiepegũta ahri ijipihtiye sa waharo nine Cohãcjũ yere yahu mũhtariquina tiquina ni ojoariro sahata, nidi Jesu.

Tiquirore tiquina sa ñehegũ ihñana usã tiquiro buhena tiquirore cohã oma cãa wahũ usã.

Judio masa puhtoa Jesure sinituahye

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Sa ye tiquirore ñehediquina pahia puhtoro Caifa wame tiriquire ya wũhũpũ ne sahye tiquirore. Ti wũhũpũta marine judio masare buheyequina, bũcũna gũhũ cahmecoahye. ⁵⁸ Topũ Jesure tiquina neagũ Pedro yoaropũ tiquinare ihña nũnũ tãhye. Sa nũnũ tãho Caifa ya wũhũre cahmotari sahrĩnore esa, ti sahrĩno puhiapũ sajãa wahahye. Sajã sa, ti wũhũre

cohteyequina surara mehna dujiahye. Jesure tiquina dũhse yegũ ihñano taro niahye.

⁵⁹ Sa ye pahia puhtoa, apequina puhtoa mehna Jesure wejẽ duti duaye, ni mehoñe mehna tiquirore tiquina ñano buhiri dahreatire wacũ macamahye. ⁶⁰ Tiquina yahusãtire wacũ bocaerahye. Sa wacũ bocaerapeta peyequina masa tiquirore sa ni meho yahusã maca cãhye. Sa ye puaro tiquina bato wihiyequina tiquirore yahusãhye tja.

⁶¹ —Ahriquire ohõ saha nidi: “Cohãcjũ wũhũre cohã masiaja. Sa cohãgũ ihtia deco wahaboro ti wũhũre pari turi yeitja”, tiquiro nigũ tũhou usã, ni yahusã maca cãhye Jesure.

⁶² Tiquina sa nidi bato pahia puhtoro wahcãdũca sa, Jesure sinituahye:

—¿Ahriquina mũhũre tiquina yahusãiepegũta tiquinare yũhti cahmedajari mũhũ? niahye puhtoro.

⁶³ Tiquiro sa nigũ tũhoeperota Jesu sata tũhotu cãhye. Tiquiro sa yũhtieragũ ihñano pahia puhtoro pari turi sinituahye tja:

—Cohãcjũ catiriquire wame mehna poto niña mũhũ. Mũhũ sa niedagũ tiquiro mũhũre buhiri dahrerota. Yahuya usãre. ¿Cristo Cohãcjũ macũta ijiajari mũhũ? ni sinituahye tja.

⁶⁴ Tiquiro sa nigũpũta Jesu yũhtiahye:

—Tiquirota ijiaja. Mũsare poto yahugũta niaja. Came yũhũ masũ Cohãcjũ ohorigũ yũhũ Pacũ tutuariquire cahapũ tiquiro poto pehepũ yũhũ dujigũ ihñanata mũsa. Sa yena umhũse cjẽ ehmeo cururi bui yũhũ ahtagũ gũhũre ihñanata mũsa, ni yũhtiahye Jesu.

⁶⁵ Tiquiro sa nigũ tũhoro pahia puhtoro tiquiro sañari suhtirore

tahrē cāhye apequinare “Usua yuhdware”, ni ihña masi dutiro.

—Cohācjäre pajiro ñano yahuducuro nine ahriquiore. Sa ye tiquiore ñano yahuducuyere taho tuhasaja mari. Sa ye topequinata yahusāahdo ahriquiore. Ohōpata tiquiore ñano yahuducugū tahoaja mari basita. ⁶⁶ ¿Duhse yenatari mari yojopare ahriquiore? ni sinituahye tiquiore apequina pūhtoare.

—Tiquiore ñari buhiri wejē cāno cahmene tiquiore, ni yūhtiahye tiquina.

⁶⁷ Tiquina sa nidi bato tiquiore wāhdoare sihco puti ohō, tiquiore quēpeahye tiquina. ⁶⁸ Tiquiore quēpe tuhasa, ohō saha niahye tiquiore:

—¿Noa pehe mūhare quēajari? Cristo ijigū ihñedapeguta yahuya usāre, ni bujūpeahye tiquina.

—*Tiquiore masiedaga, niahye Pedro Jesure*

(Mr 14.66-72; Lc 22.56-62; Jn 18.15-18, 25-27)

⁶⁹ Sa ye ti wūhū cahapū ijiri paapū quehnoari paapū Pedro pehe dujahye. Tiquiore sa dujigū ihñano pahia pūhtoro cahacjōno tiquiore cahapū esaro, ohō saha niahye:

—Mūhū gūhū Jesu Galilea cjāno mehna ijiri, niahye ticoro.

⁷⁰ Ticoro sa nigū tūhoro, Pedro ohō saha niahye:

—¿Duhse ni maca cōo niajari mūhū? Mūhū nidiquiore ne masiedaga yūhū, niahye Pedro ticorore ijipihtiyequina tiquina tūhoropū.

⁷¹ Tiquiore sa nidi bato ti paa cjā sahrīno sopecaha cahapū wahahye Pedro. Topū tiquiore ijigū apecoro cahacjōno tiquiore ihñano, topū ijiyequinare ohō saha niahye:

—Jesu Nazare cjāno mehna ijiri ahriquiore, niahye ticoro Pedore tja.

⁷² Ticoro sa nigū tūhoro Pedro yūhtiahye:

—Cohācjū mehna poto nii niaja. Tiquiore mūhū nidiquiore ne masiedaga yūhū, ni yūhtiahye Pedro.

⁷³ Sa ye came cjūno topū ducuyequina Pedro cahapū waha, tiquiore ohō saha niahye tja:

—Poto tjire. Jesu yequina mehna cjū ijire mūhū gūhū. Tiquina yero saha yahuducure mūhū, niahye tiquina Pedore.

⁷⁴ Tiquina sa nigū Pedro yūhtiahye:

—Poto Cohācjū mehna nii niaja mūhare. Yūhū poto yūhū niedagū Cohācjū yūhūre buhiri dahreahro. Tiquiore mūsa nidiquiore ne masiedaga yūhū, ni yūhtiahye tiquiore tiquinare.

Tiquiore sa nigūta canaca yahuahye. ⁷⁵ Tiquiore yahugū tūhoro Jesu tiquiore nidire wacūahye. “Canaca tiquiore yahuato pano Jesure masiedaga’, niita mūhū. Ihtia taha waro sa niita mūhū”, Jesu tiquiore nidire wacūahye Pedro. Sa wacūno, ti sahrīnore wijia, tutuaro utiahye.

27

Pilato cahapū Jesure neahye

(Mr 15.1; Lc 23.1-2; Jn 18.28-32)

¹ Sa ye bohrea quehagūpū pahia pūhtoa mari judio masa bēcūna gūhū Jesure tiquina wejē dutiatire cahme yahuducuahye. ² Tiquina sa yeri bato tiquiore dūhte, Pilato cahapū nea, tiquiore ohoahye Pilatore. Pilato pehe ti yehpa cjēna pūhtoro ijiri.

Juda Iscariote yariaa wahahye

³ Sa yero Jesure tiquina wejē dutigū ihñano Juda pehe Jesure ihñoriquiore tiquiore tiquiore ihñorire tutuaro wacū bujūa witi-ahye. Sa bujūa witiro treinta cjoeri tiquiore ñehedi niñeru cjoerire wiaro waharo, pahia cahapū,

bucuna cahapu esa, ohō saha niahye:

⁴—Jesu musare yahu ihñoriqiro ñañe marieniqiro tiqiro ijiepegūta tiquina wejē dutiri tiqirore. Sa yegu musare tiqirore ihñogu ñano yegu niaya yahu, ni yahuahye Juda tiquinare.

Tiqiro sa ni yahuri bato tiquina yahtiahye:

—Sata yecūnahdo. Usāre dūhseati ijierare ti mahu sa niñe. Mahu dihita sa ni tuhoture tire, ni yahtiahye tiquina tiqirore.

⁵ Tiquina sa ni yahtiri bato Cohācjū ya wahuḡu Juda tiqiro ye niñeru cjoerire doque site cūahye. Doque site cū, wahaa wahahye. Waha, yuta dare dūhte ohō, tiqiro basi wamūare tu suha, uhpu cjū sa, yariaa wahahye.

⁶ Sa ye pahia pūhtoā niñeru cjoerire ne, ohō saha niahye:

—Ahri niñerure Cohācjū wahu cjā acaropu niñeru ihbori acaropu mari cū masiedaja. Ahri niñeru mehnata masunore wejē dutiri. Sa ye mari ye dutiye marine sa ijiye niñerure ihbo dutierare, niahye tiquina basi.

⁷ Tiquina sa nidi bato “Ohō saha yeihna”, tiquina ni yahuri bato dihi suturire yeriqiro ya yehpare dūahye. Ti cjoeri mehna dūahye. Ape sie cjēna tiquina wihi tiquina yariagū tiquina yati yehpa ijiatore ti yehpare dūahye. ⁸ Sa ye ti yehpare “Dūi yehpa”, wame yeri masa. Yojopu gūhure sata wame tire. ⁹ Ahri ijipihtiye sa wahahye Jeremia panopu “Sa waharota”, tiqiro ni ojariro sahata. Tiqiro Cohācjū yere yahu māhtariqiro ijiahye. Ohō saha ni ojoahye tiqiro: “Treinta niñeru cjoerire plata cjoerire ‘To punota wapa yenata tiqirore usā ñeheatire’, nieta Israe masa. ¹⁰ Sa ye ti cjoeri mehna dihi suturire yeriqiro ya yehpare dūeta tiquina. Ohō

sahata yūhure ye dutiri Cohācjū”, ni ojoahye Jeremia panopu.

Pilato Jesure sinituahye

(Mr 15.2-5; Lc 23.3-5; Jn 18.33-38)

¹¹ Sa ye Pilatore tiquina ohori bato tiqiro pehe Jesure sinituahye:

—¿Potota judio masa pūhtota ijiajari mahu? ni sinituahye Jesure.

—Mahu nino sahata ijiaja, ni yahtiahye Jesu.

¹² Sa ni yahtieperota, pahia pūhtoā, bucuna gūhu tiquina tiqirore yahusāgū yahtierahye Jesu. ¹³ Tiqiro sa yahtieragū ihñano Pilato sinituahye:

—¿Ahri ijipihtiye mūhure tiquina yahusārire tuhoerajari mahu? ni sinituahye tiqiro Jesure.

¹⁴ Tiqiro sa ni sinituepegūta Jesu ne mehenogā yahtierahye. Tiqiro sa yahtieragū ihñano Pilato ne dūhse ni masiedahye.

Jesure wejē dutiahye

(Mr 15.6-20; Lc 23.13-25; Jn 18.38-19.16)

¹⁵ Cūhmaripe pascua ijigū masa yaqiro ijiatiqirore ihcāqiro peresupu ijiriqirore Pilato sa wio basaducue tiahye. ¹⁶ Ti pjere Barrabá wame tiriqiro peresupu ijiahye. Tiqirore masiahye masa. ¹⁷ Sa yero tiquina cahmecoagū Pilato pehe sinituahye tiquinare:

—¿Diquiro pehere musare wio basaboagari yahu? ¿O Barrabá pehere o Jesure Cristo tiquina nidiquirore wio basaboagari yahu? ni sinituahye tiqiro.

¹⁸ Jesure masa cahīgū ihñañe judio masa mari pūhtoā tiqirore ihña tuhtiahye. Sa ihña tuhtiye tiqirore ohoahye Pilatore. Sa yero masa tiquina cahīdi buhiri tiquina ihña tuhtirire masino Pilato Jesure wio duamahye.

¹⁹ Sa ye Pilato masare ñañe yeyequinare tiqiro beseri pahtapu dūjigū tiqiro namono tiqirore

quiti ohoahye: “Mia ñamine Jesure quehēgo, tutuaro ñano yūhdū. Sa yegū tiquirore ñañe marieniquirore ne sijoro saha yeracāhña mūhū”, ni yahudoqueoahye tiquiro namono Pilatore.

²⁰ Sa ye coā waropare pahia pūhtoa, būcūna gūhū masare ohō saha ni duti tuhasahye. “Barrabá pehere wio duti, Jesu pehere wejē dutiya”, ni dutiahye masare. ²¹ Sa yero Pilato masare sinituahye:

—¿Ahriquina pūarore diquiro pehere mū sare wio basaboagari yūhū? ni sinituahye.

—Barrabá pehere wio basaya usāre, ni yūhtiahye.

²² —¿Ahriquiro Jesu Cristo tiquina nidiquiro pehere dūhse yeitari yūhū, mūsa sa ni sañuducugū? ni sinituahye tiquiro.

—Curusapū quē biha wejēña tiquirore, ni yūhtiahye masa ijipihtiyequina.

²³ —¿Yabe borore ñañene yeari ahriquiro, mūsa sa nigū? niahye tiquiro.

Tiquiro sa nigū tūhoye tiquina tutuaro mehna sañuducuahye:

—Curusapū quē biha wejēña tiquirore, ni sañuducuahye masa tiquirore.

²⁴ Tiquina sa ni sañuducugū tūhoro, tiquirore tiquina tūho dueragū ihñano “Masa usua, cahmequeboaga”, nino, yūhtiro ohō saha yeahye Pilato. Masa tiquina ihñonopū tiquiro omo coseahye. Sa omo cosero ohō saha niahye.

—Ahriquirore wejēdi buhiri yee buhiri ijierare. Mūsa ye buhiri ijire, nino omo coseahye.

²⁵ Tiquiro sa nigū tūhoye ijipihtiyequina masa ohō saha niahye.

—Ahriquirore wejēdi buhiri usā, usā pohna gūhū usā ye buhiri ijiahro, niahye masa.

²⁶ Tiquina sa nigū tūhoro Pilato Barrabāre peresupū ijiriquirore

wio dutiahye masa tiquina cahmeniquirore. Sa ye tuhasa Jesu pehere yuta dari mehna tana duti, tiquirore curusapū wejē dutiro ohoahye surarare.

²⁷ Tiquiro sa ohogū Pilato ya wūhūpū tiquiro yequina surara Jesure neñe esahye. Sa ye tiquina surara ijipihtiyequina Jesu cahapū cahmecoahye. ²⁸ Sa ye tiquiro suhtire tu we ne, pūhtoro ya suhtiro saha bajuri suhtirore tiquirore sāahye. ²⁹ Sa sāa tuhasa, pota behtore ye tuhasa, tiquiro dapu bui duhu peoahye. Sa duhu peo tuhasa, yucūgure poto pehe dahra suhahye. Dahra suha tuhasa, dūsepe curi mehna quehe sa, būjūpeahye tiquirore.

—Quehnoano ahtaya. Judio masa pūhto, quehnoano ahtaya, ni būjūpeahye tiquirore.

³⁰ Sa nieta tiquirore sihco puti ohō, tiquina dahra suhadūre tiquirore tūā we ne, tiquiro dapure quēahye tū mehnata. ³¹ Tiquina sa būjūperi bato tiquina sāari suhtirore tu we ne, tiquiro ye suhti pehere sāahye tja. Sāa tuhasa, curusapū wejēñe tehe, tiquirore ne wijiahye.

Tiquina Jesure curusapū quē biha, wejēahye

(Mr 15.21-32; Lc 23.26-43; Jn 19.17-27)

³² Tiquirore ne cā, Simo wame tiriquirore Cirene cjanore piti ca, tiquirore Jesu wūari curusare wūa cā dutiri.

³³ Wūa cā Gólgota wame tiropū esari. “Gólgota”, nino “Dapu pūhtoro”, nino nine. ³⁴ Sa ye vinore sūēñe co mehna tiquina moreñe core Jesure ohomedi. Ti acore sihni tuhu, sihniedari tiquiro.

³⁵ Sa ye Jesu ye suhtire tiquina tu we nedi bato tiquirore curusapū quē bihari tiquina. Sa quē biha tuhasa, tiquiro ye suhtire “¿Noa yaro ijiroitari ohō?” ni, cahme

doqueperi, ni ojoahye panopu.
³⁶ Doquepe tuhasa tiquireore ihña dujuducuri tiquina. ³⁷ Tiquireo dapu bui curusapu ohõ saha ni ojoari pjine duhu ohõri tiquina tiquireo ñañe buhirire yahu duaye. “AHRIQUIRO JESU JUDIO MASA PHTORO IJIRE”, ni ojoari tiquina ti pjine.

³⁸ Came puaro yaque bucunare Jesu cahapu apeye curusaripu quẽ biha docori tiquina. Ihcãquiro tiquireo potu pehe, apequiro tiquireo cũ pehe pehe quẽ biha docori tiquina. ³⁹ Curusari cahapu yuhdu cãñequina Jesure ihña, tiquina dapu pacare yure, tiquireore ñano yahuducuri:

⁴⁰ —¿Cohãcjũ wuhure cohã, ihtia deco wahaboro pari turi ti wuhure dahreborigu ijjajari mahu? Cohãcjũ macu ijigu mahu basi dijia taya. Sa yegu mahu basi yedohoya, nidi masa.

⁴¹ Sata ni bujuperi tiquireore. Pahia puhto gũhu, marine judio masare buheyequina gũhu, bucuna gũhu tiquireore sa ni bujuperi.

⁴² —Tiquireo apequinare yuhdhoriquiro ijiro tiquireo basi gũhu yuhduoahro. “Israe masa puhto ijjaja”, nimene tiquireo. Sa yena tiquireo basi dijia tagũ ihñana tiquireore wacũ tutuanata. ⁴³ Tiquireo pehe Cohãcjũre wacũ tutuamene. Sa yero “Cohãcjũ macu ijjaja”, nimene tiquireo. Tiquireo sa ijigũ Cohãcjũ pehe tiquireore yedohoahro, ni bujuperi tiquina.

⁴⁴ Yaque bucuna tiquireo cahapu tiquina quẽ bihanohriquina sata tiquireore bujupe, ñano yahuducuri tiquina gũhu.

Jesu yariaa wahahye

(Mr 15.33-41; Lc 23.44-49; Jn 19.28-30; He 6.19-20; 10.19-20)

⁴⁵ Sa ye coheri pje ijigũ ihtia hora waro ijipihtiropu nahitiano ijiri.

⁴⁶ Sa yero ti pjere nahitia yuhduagũ waro Jesu tutuaro sañuducuri:

—¿Elí, Elí lema sabactani? nidi tiquireo. Sa nino ohõ saha nino niahye: “¿Yuhu Pacu, yuhu Pacu, dahsegũ yuhure cohãjari mahu?” nino nidi.

⁴⁷ Tiquireo sa nigũ tuhoye ihquẽquina topu ducuyequina ohõ saha nimedi:

—Cohãcjũ yere yahu mahtariquireore Eliare pijioro niboaga, nimedi tiquina.

⁴⁸ Sa yero ihcãquiro tiquina mehna cjãno oma cã, aco ihmini sahte mehna vino suẽñe core soha tuhasa, yucũgu sohtoapu dũhte ohõ, Jesu cahapu esa, tiquireore sihõmedi. ⁴⁹ Tiquireo sa yegũ ihñañe apequina sihõriquireore ohõ saha nidi:

—Cohteniña. Elia ahriquireore tiquireo yuhduogũ ihñaahna mari, nidi apequina.

⁵⁰ Tiquina sa nidi bato pari turi sañuducu, Jesu pehe yariaa wahari.

⁵¹ Tiquireo yariagũta Cohãcjũ wuhũ cjã suhtiro cahsero, topu tiquina cahmotari cahsero deco tuhnu maa dijia, cjũ saa wahahye. Sa yero yehpa gũhu ñuhmidi. Sa ñuhmigũ atã paca bujaye paca wahtia wahari. ⁵² Sa ye masa coperi parigũ, peyequina Cohãcjũ yequina mana panopu yariariquina mana masa wijiahye. ⁵³ Masa wijia, Jesu masa wijari bato ti coperire cohã cã, quehnoari macapu Jerusalẽpu wahari tiquina. Topu tiquina wahagũ peyequina masa ihñaahye tiquinare.

⁵⁴ Sa ye ti ijipihtiyere ihñañe, yehpa ñuhmigũ ihñañe, surara puhtoro tiquireo yequina surara mehna ihña maria wahari. Tiquina Jesure curusapu ijiriquireore cohteyequina ijiri. Ihña maria waha, ohõ saha nidi:

—Ijirota ijire. Ahriquireo Cohãcjũ macunota ijimeya, nidi tiquina.

⁵⁵ Sa ye Galileapu Jesu mehna ahtariquina numia tiquireore yedohoriquina numia yooropu tiquireore curusapu ijiriquireore

ihñaducuye nidi. ⁵⁶ Tiquina numia mehna María Magdalena ijiri. Apecoro María wame tiricoro gāhū ijiri. Ticoro pehe Santiago, José gāhū pacoro ijiri. Apecoro Zebedeo namono ijiri.

Jesu pagure masa copepū cūahye José

(Mr 15.42-47; Lc 23.50-56; Jn 19.38-42)

⁵⁷ Sa ye ñamicahapū José Ari-matea cjāno doeri cjē uparo topū wihiahye. Tiquiro Jesu buheriquiro ijiri. ⁵⁸ Wihi, Pilato cahapū esa, Jesu pagure siniahye. Tiquiro sa sinigū tuhoro Jesu pagure tiquirore oho dutiahye Pilato. ⁵⁹ Tiquiro sa dutiri bato José pehe tiquiro pagure ne dijio, quehnoari suhtiro wete marieni suhtiro mehna tiquiro pagure wahmeahye. ⁶⁰ Wahme tuhasa, José tiquiro ya masa copepū cūahye Jesu pagure. Ti cope tiquina utāpū seheri cope wahma cope ijiri. Ti copepū ne sajā duhu cū tuhasa, pajiria utāre tu torē cāhye tia mehna biharo taro. Biha tuhasa, wahaa wahahye. ⁶¹ Sa ye María Magdalena, apecoro María mehna ti copere ihña dujuducuahye.

Jesure tiquina cūri copere surara cohteahye

⁶² Sa ye ape deco, pascua ijiatire tiquina quehnoari deco bato, saurū ijigū pahia pūhto, fariseo masa gāhū Pilato cahapū cahmecoahye. ⁶³ Cahmeco tuhasa ohō saha niahye tiquina Pilatore:

—Pūhto, tiquiro ni mehoriquiro Jesu catiro ohō saha niahye: “Ihtia deco wahaboro masa wi-jiagutja yūhū”, niahye tiquiro. ⁶⁴ Tiquiro sa nidiquiro ijigū tiquiro buheyequina pehe tiquiro pagure yaqueboaga. Sa yaqueye masare ohō saha niboaga: “Jesu masa wijiari”, niboaga tiquina. Tiquiro Jesu pehe masare ni mehono nidi. Sa ijiepegāta tiquiro buheyequina

pehe “Tiquiro masa wijiari”, niñe, ni mehoñe nieta. Sa yero Jesu tiquiro ni mehoriro yūhdūoro tiquina ye ni mehoñe pehe ña yūhdūarota. “Sa yaqueari”, nigū ihtia deco waro tiquiro masa copere mūhū yequina surarare cohte dutiya, niahye tiquina Pilatore.

⁶⁵ Pilato yūhtiahye:

—Aū. Ti copere cohteahro. Sa yena masa gāhū mūsa ye masino puno ti copere quehnoano cohteya, niahye tiquiro tiquinare.

⁶⁶ Tiquiro sa nigū tiquina waha, ti copere biharia utā mehnapūta ñehogūpūta wihtā ñeheahye masa tiquina sajāgū ihña masiñe tehe. Sa ye surarare ti copere cohte dutiahye.

28

Jesu masa wijiahye

(Mr 16.1-8; Lc 24.1-12; Jn 20.1-10)

¹ Sa ye judio masa mari sori deco saurū pehe yūhdūgū domingo ijigū ñami cjūnogā ijigū María Magdalena apecoro María mehna Jesu masa copere ihñañe wahahye.

² Sa yero duita yehpa tutuaro ñuhmiahye. Sa ñuhmigū mari pūhtoro tiquiro yaquiro angel ūhmūsepū ijiriquiro dijia ta, masa copere biharia utāre tu torē cā, tia bui dujiahye. ³ Upo miadoqueoro yero saha quehnoano asi siteahye tiquiro. Sa ye tiquiro suhti ehmeo curua yero saha quehnoano yehseye suhti ijiahye. ⁴ Tiquiro sa bajuagū ti copere cohteyequina surara cue yūhdūye, nanare yūhdūa waha, buigā warona yaria yūhdūa wahahye. ⁵ Sa yero angel pehe tiquina numiare ohō saha niahye:

—Yūhūre cueracāhña. Curusapū tiquina quē bihariquiro, Jesure masa macagū masiaja yūhū. ⁶ Tiquiro yojoḡpūre ohōre mariedare. Tiquiro nidiro sahata

masa wijiaa wahari. Tiquiro pagure tiquina cūrirore ihñana ahtaya. ⁷ Sa yena tiquiro buheyequina cahap̄m̄ umñano waha, ohō saha ni yahuna wahaya: “Jesu masa wijari. Sa yero m̄asa pano Galileap̄m̄ tiquiro wahayurota. Top̄m̄ tiquirore ihñanata m̄asa”, ni yahuna wahaya m̄asa. Ahrita ijire m̄asare ȳh̄m̄ yahuri quit̄i, niahye angel tiquina numiare.

⁸ Tiquiro sa nidi bato tiquina numia masa copere ij̄iye numia sojaro mehna wijia, tiquirore cuepeta bucue yah̄d̄ȳe mehna Jesu buheyequinare yahuye oma c̄aa wahahye. ⁹ Sa wahayequina numiare Jesu piti ca, ohō saha niahye:

—¿Quehnoano ij̄iajari m̄asa? niahye tiquiro.

Tiquiro sa nidi bato, tiquina pehe tiquiro cahap̄m̄ esa, dah-poc̄arine ñehe, tiquirore ño peoh̄ye.

¹⁰ —Cuerac̄ahña m̄asa. Ȳh̄m̄ bahanare “Galileap̄m̄ wahaya”, ni yahuna wahaya. Top̄m̄ ȳh̄re ihñæta tiquina, niahye Jesu tiquinare.

Masa copere cohteyequina surara tiquina ihñar̄ire yahuahye

¹¹ Tiquiro sa nidi bato numia wahari watoa ihquēquina masa copere cohteriquina mehna c̄j̄ena surara, Jerusalēp̄m̄ pahia p̄htoare ij̄ipiht̄iyere yahu pehōye wahahye. Jesu tiquiro masa copere wijiarire yahu peho c̄ah̄ye. ¹² Tiquina sa ni yahuḡa pahia p̄htoa, judio masa mari buc̄na mehna cahmecoahye. Cahmecoa, yahuducuahye. Sa yeye surarare ni meho dutiye niñerure wapa yeahye.

¹³ —Ohō saha niña m̄asa masare: “Ñami us̄a car̄idi bato tiquiro buheyequina pehe masa copere wih̄i, tiquiro pagure ne c̄ari j̄iri”, ni yahuya masare. ¹⁴ M̄asa sa ni yahuḡa Pilato pehe m̄asa car̄i

yah̄d̄arire t̄uhoboaga. Tiquiro sa t̄uhoḡa, “M̄asare tuht̄iari”, nina, m̄asare yahu basanata us̄a tiquirore, niahye tiquina surarare.

¹⁵ Tiquina sa nidi bato surara pehe niñerure ñehe, tiquinare tiquina ni meho dutiriro sahata masare yahuye wahahye. Sa ye tiquina ni mehoriro sahata Jesu tiquiro masa copere wijiarire yahuducuri judio masa. Yojop̄m̄ ḡah̄re sata nine tiquina.

Jesu tiquiro yere buhe dutiro ohoahye tiquiro buheyequinare
(Mr 16.14-18; Lc 24.36-49; Jn 20.19-23)

¹⁶ Sa ye us̄a Jesu buhena once buhena c̄n̄p̄m̄ Galileap̄m̄ ij̄id̄p̄m̄ Jesu tiquiro waha dutid̄p̄m̄ wahau us̄a. ¹⁷ Top̄m̄ esa, Jesure ihñana, ño peou us̄a tiquirore. Sa ño peope-nata, us̄a ihquēquina “Ahriquiro Coh̄c̄j̄ mac̄no ij̄ieraboaga”, ni t̄uhotumi. ¹⁸ Us̄a sa ño peoḡa tiquiro pehe us̄a cahap̄m̄ wih̄i, ohō saha nidi:

—Ahri yehpap̄re, ahm̄sepe ḡah̄re Coh̄c̄j̄ ij̄ipiht̄iyequina bui tutuayere ohori ȳh̄re. ¹⁹ Tiquiro sa ohoḡa ohō saha dutiaja m̄asare: Ij̄ipiht̄iro c̄j̄enare yeere buhena wahaya. Yeequina tiquina wahatire buhena wahaya. Sa yena mari Pac̄m̄ wame mehna, ȳh̄m̄ wame mehna, Esp̄ritu Santo wame mehna tiquinare wame yeya. ²⁰ Sa yena m̄asare ȳh̄m̄ dutirire tiquina ye pehoatire buheya tiquinare m̄asa. Sa yena ahrire ȳh̄m̄ niatire wac̄ña: Ij̄ipiht̄iye decori ahri yehpa ij̄iro puno m̄asa mehna sa ij̄iducuḡt̄ja. M̄asa mehna ȳh̄m̄ sa ij̄iducuatire wac̄ña m̄asa, ni yahuri us̄are Jesu.

San Marcos

Ñu wame yeriquiro buhe ducahye

(Mt 3.1-12; Lc 3.1-9, 15-17; Jn 1.19-28)

¹ Ahri pūpu Jesucristo Cohācjū macano tiquiro yerire quehnoañe buheyere yahu ducaja. ² Cohācjū yere yahu mātariquiro manano Isaia tiquiro ojoariro sahata yahuye ijire. Ohō saha ni ojoahye tiquiro:

Cohācjū tiquiro macanore ohō saha niahye: “Mūhu pano mahare yahuyuatiquirore ohoyugu niaja. ³ Sa yero tiquiro masa marienopu wahaarota. Tiquirore tūhoyequinare yahuro sañuducurota: ‘Mari puhtoro tiquiro ahtato pano mahare mari quehnoyuro saha quehnoana ijiyuya musa. Mūsa ñañe yerire bujua witiya,’ ni sañuducurota,” niahye Cohācjū, ni ojoahye Isaia.

⁴ Ñu wame yeriquiro masa marienopu buhee tiahye.

—Musa ñañe yerire bujua witiya. YojoPURE quehnoañe pehere came-saya. Sa yena wame yenohrina ijiya. Musa sa comesagū ihñano Cohācjū musa ñañe yerire borota, ni buhee tiahye tiquiro.

⁵ Sa yero ijipihtiequina Judea dihta cjē macari cjēna Jerusalē cjēna mehna tiquiro cahapu esagū ihñano Ñu pehe Jordā wame tiri mapu wame yeahye tiquinare. Tiquinare tiquiro wame yegū tiquina pehe tiquina ñañe yerire yahu yūhdūahye Cohācjūre.

⁶ Sa yero Ñu camello poari suhtirore sañariquiro wahiquina cahsero mehna tūā dihoriquiro ijiahye. Poreroare, umiquina nūcu

cjēna umine ihyae tiahye. ⁷ Sa yero ohō saha ni buhee tiahye.

—Yūhu bato yūhu yūhdūoro tutuariquiro ahtarota. Quehnoa yūhdūariquiro ijire tiquiro. Tiquiro yero saha ijieraja yūhu pehe. Sa yegu tiquirore tūhotugu, “Ihyo ijigu ijiaja yūhu”, ni tūhotuaja yūhu. ⁸ Mūsare wame yegu aco mehna wame yei. Tiquiro pehe yūhu yūhdūoro yerota. Espiritu Santore masa mehna ijiducugū yerota, ni buhee tiahye Ñu.

Ñu Jesure wame yeahye
(Mt 3.13-17; Lc 3.21-22)

⁹ Sa ye ti pjere Jesu Nazarepu Galilea yehpapu ijiri macapu ijiriquiro Jordā wame tiri mapu esahye. Topu tiquiro esagū Ñu wame yeahye tiquirore. ¹⁰ Tiquiro wame ye tuhasagū Jesu diapu ijiriquiro maja saduca ahmuanopu ihña mūoahye. Ūhmuse parī maa wahahye. To parī maagāta Espiritu bujua yero saha Jesu bui dija tahe. ¹¹ Sa yero ahmūsepu yahuducuro ca tahe:

—Mūhu yūhu macu yūhu cahīgu ijire. Mūhu mehna tutuaro bu-cueaja, nino ca tahe ahmūsepu.

Satana ñañene ye dutimahye Jesure

(Mt 4.1-11; Lc 4.1-13)

¹² Ti pjere Jesure masa marienopu Espiritu Santo neahye. ¹³ Topure esaro cuarenta decori waro ijiahye. Watīno pehe Jesu tiquiro ñañene yegū ihña duaro ñañene ye dutimahye tiquirore. Sa yero Jesu wahiquina nūcu cjēna mehna ijiahye. Topu tiquiro ijigū ihñañe angele pehe tiquirore yedohoahye.

Jesu Galilea yehpapu buhe ducahye

(Mt 4.12-17; Lc 4.14-15)

¹⁴ Sa ye Ñure peresupu tiquina biha daporī bato Jesu pehe Galilea yehpapu quehnoañe buheyere

Cohãcjũ pũhtoro ijyere yahuro wahahye. ¹⁵ Ohõ saha ni yahuahye:

—Yojopũre ohõ saha ijire. Cohãcjũ tiqiro pũhtoro ijato mehenogã dũhsare. Mũsa ñaňe yerire bujũa witiya. Sa yena quehnoañene comesaya. Quehnoañe buheyere tũhoya mũsa, ni buhee tiahye Jesu.

Jesu pititiaro wahi yohyeyequinare “Yũhũ mehna cjãna ijiana ahtaya”, niahye

(Mt 4.18-22; Lc 5.1-11)

¹⁶ Tire yahu tuhasaro Galilea wame tiri ditara dũhtũ cahapũ esaro, ihňahye Simore, tiqiro bahũro Andre mehna. Tiquina wahi yohyeyequina ijiahye. Sa ye tiquina wẽñecjũre doque ñoňe niahye ti ditarapũ.

¹⁷ —Yũhũ mehna cjãna ijiana ahtaya mũsa. Yũhũ mehna mũsa ahtagũ mũsa wahire ñehe cahmecoana mũsa ijiro saha Cohãcjũ yequina ijiatiquinare masare piji cahmecoana ijigũ yeitja mũsare. Yũhũ mehna mũsa ahtagũ sa yeanajare cũtja mũsare, niahye Jesu.

¹⁸ Tiquiro sa nigũ tũhoye tiquina wẽñecjũre cũ cã, tiqiro mehna wahahye.

¹⁹ Sa ye tiquina mehenogã yũhdũ cã, Santiagore, tiqiro bahũro Ñũ gũhũre boca sahye tja. Tiquina pehe Zebedeo pohne ijiahye. Tiquina yaria yucũsapũ wẽñecjũre quehnoňe niahye. ²⁰ Sa yero tiqiro pijjogũ tiquina pehe tiquina pacũrore, tiqirore yedohoyequina mehna yucũsapũ cũ cã, Jesu mehna wahahye.

Watĩare cũoriqiro Jesure piti cahye

(Lc 4.31-37)

²¹ Sa ye tiquina Capernau wame tiri macapũ esahye. Sa yero saurũ ijigũ judio masa buheri wũhũpũ buhero esahye tiqiro. ²² Sa

yero tiqiro quehnoano masi pehoriqiro buhero usã judio masare buheyequina yero saha ijierahye tiqiro. Tiquiro sa buhegũ ti maca cjẽna tũho maria wahahye. ²³ Ti pjere ti wũhũpũ ijiriquiro watĩare cũoriqiro ijiahye. Sa yero ohõ saha niahye Jesure:

²⁴ —Mũhũ Jesu Nazare cjũ cariboeracãhña usãre. ¿Dũhse yei tũũ nijari usãre? ¿Mũhũ usãre butigũ yei tũũ nijari? Cohãcjũ macũ quehnoagu mũhũ ijigũ yũhũ masi-aja, ni sañuducuahye tiqiro Jesure.

²⁵ Tiquiro sa nigũ tũhoro Jesu tuhtiahye watĩare:

—Dihta mariahña. Duhuya tiqirore, niahye Jesu.

²⁶ Sa yeye watĩa tiqirore yehpapũ doque quehe sa tunugũ yeye, tiqiro tutuaro sañuducuri watoa duhuahye tiqirore. ²⁷ Sa ye ijipihtiyequina ti wũhũpũ dujiyequina acũa yũhdũa waha, ohõ saha niahye:

—Ahyou. ¿Ahri wahma buheye ijiajari? Tiquiro pũhtoro yero saha dutire watĩare. Tiquiro dutigũ tiquina watĩa pehe yũhdũdũcaerare tiqirore, ni yahuducuahye ti wũhũpũ dujiyequina tiquina basi.

²⁸ Sa ye meheňe decori batota duita ijipihtiyequina Galilea yehpa cjẽna tire tiqiro sa yerire tũhoahye.

Jesu Simo Pedro mareonore duti yũhdũgũ yeahye

(Mt 8.14-15; Lc 4.38-39)

²⁹ Sa ye Jesu gũhũ judio masa buheri wũhũpũ ijiriquina wijiaa wahahye. Tiquina sa wijari bato Jesu, Santiago, Ñũ, apequina tiquina mehna cjẽna gũhũre, Simo, tiqiro bahũro Andre mehna tiquina ya wũhũpũ siho sajã sahye.

³⁰ Ti pjere Simo mareono ujuaye dohatĩricoro cuňano bui ticoro cuňagũ ihňañe yahuahye Jesure.

³¹ Tiquina sa ni yahugũ tũhoro

tiquiro pehe ticoro cahap̄u esaro, ticoro omocare ñehe, ticorore weje wahcō dapoahye. Tiquiro sa weje wahcō dapogūta ticorore ujuaye surua wahahye. Ti sa sururi bato ticorota ihyayere peoahye.

Jesu peyequina dohatiyequinare yuhd̄uoahye

(Mt 8.16-17; Lc 4.40-41)

³² Ñamicahap̄u asū sajāri bato masa peyequina dohatiyequinare, watīa c̄oyequinare Jesu cahap̄u ne sahye. ³³ Sa ye ijipih̄tiyequina ti maca cjēna cahmecoa d̄uca sahye ti wuh̄u sopecahap̄u. ³⁴ Sa yero Jesu peyequina dohatiyequinare, peyequina watīa c̄oyequinare quehnoa wahagū yeahye. Peyequina watīare cohāhye. Sa yero Jesure watīa tiquirore masigū ihñano Jesu pehe tiquinare yahuducu dutierahye.

Jesu buhe tinino wahahye

(Lc 4.42-44)

³⁵ Sa ye ñami cjūno wahcā, nahitia cjūgū masa marienop̄u Cohācj̄are sinino wahahye Jesu. ³⁶ Tiquiro sa wahagū ihñañe Simo gūh̄u tiquirore macañe esahye. ³⁷ Sa ye tiquirore piti caye, ohō saha niahye:

—Masa ijipih̄tiyequina mah̄ure macañe nidi, niahye tiquina.

³⁸ Tiquina sa nigū t̄horo ohō saha niahye Jesu:

—Ahri macarine buhegū ahtaū yuh̄u. Sa yena apeye macari ohō cahagā cjē macarip̄u wahañhna mari. Yuh̄u ti macari gūh̄ure buheitja, niahye Jesu tiquinare.

³⁹ Sa yero ijipih̄tiye Galilea yehpare buhe tiniahye. Sa yero macaripe judio masa buheye wuh̄usep̄u buhero, watīare masa mehna ijieyequinare cohā wioahye.

Jesu camī b̄uc̄u m̄una wih̄iroke yuhd̄uoahye

(Mt 8.1-4; Lc 5.12-16)

⁴⁰ Sa ye apequiro dohatiriquiro camī b̄uc̄u m̄una wih̄iroke Jesure piti caro d̄usepe curi mehna quehe sa siniahye:

—Mah̄u yuh̄ure yuhd̄uo duagū yuhd̄uoaya, niahye camī b̄uc̄u m̄una wih̄iroke.

⁴¹ Tiquiro sa nigū t̄horo Jesu tiquirore paja ihñahye. Sa yero tiquiro omocare siōdoqueo tiquirore ña peoahye. Sa ña peoro ohō saha niahye:

—Tire ye duaja. Quehnoagū ijiya mah̄u, niahye Jesu.

⁴² Tiquiro sa nigūta tiquiro camī ahbari yati maa wahahye. Quehnoa wahahye tiquiro.

⁴³ Tiquiro sa wahagū ihñano Jesu tiquirore tutuaro mehna yahuahye:

⁴⁴—Apequinare ahrire yahu sit-eracāhña. Sa yahuerapegūta mah̄u pagure pahire ihñoña. Cohācj̄u dutiye Moisere tiquiro cūriro sahata yeya. Sa yegū minicj̄are ohoya pahire mah̄u quehnoagū mah̄u waharire masare mah̄u ihñoatire, niahye Jesu. Sa ni tuhasa “Wahaya”, niahye tiquirore.

⁴⁵ Tiquiro sa yahu dutierapegūta tiquiro waha, ijipih̄tiye macari cjēnare Jesu yerire yahuahye. Tiquiro sa yahuri bato Jesu masa peyequina ijirōp̄are waha masiedahye. Sa yero tiquiro meheñequinagā ijirōp̄u ijiahye. Top̄u tiquiro ijigū peye macari cjēna tiquiro cahap̄u esahye.

2

Jesu tini masieniquirore tinigū yeahye

(Mt 9.1-8; Lc 5.17-26)

¹ Meheñe decori bato Jesu Capernaup̄u tojoa wahahye. Wuh̄up̄u tiquiro ijigū masa t̄hoahye. ² Sa ye top̄u masa peyequina cahmecoa, ti wuh̄ure wahpa wijiad̄uca saa wahahye. Sa yero Jesu tiquinare quehnoañe buheyere yahuahye.

³ Sa ye apequina gūh̄u ahta,

pititiaro amua tini masieniquirore ne wihiahye. ⁴ Tiquina masa peyequina ijigū ihñañe Jesu cahapū sajā masiedahye. Sa ye tiquina wahu buipū muji pahmare ne wedoqueo, Jesu bui waro meheni copegā dahre, tini masieniquirore tiquiro cuñari cahsero mehna duhu dijioahye Jesu caha waro. “Jesu ahrikirore tiquiro dohatiyere yuhdugū yerota”, ni tūhotuahye tiquina. ⁵ Tiquina sa ni tūhotugū masino Jesu pehe dohatiriquirore ohō saha ni yahuahye:

—Yuhu macu, mahu ñañe yerire cohā tuhasau, niahye Jesu tini masieniquirore.

⁶ Tiquiro sa nigū tūhoye, usā acaye judio masare buheyequina topure dujiyequina tiquina basi ohō saha ni tūhotumahye: ⁷ “Ahrikirore sa ni yahuducueracāhdo. Cohācjūre ñano yahuducuro nine tiquiro. Masano mari yero saha ijirikirore ijire tiquiro gūhu. Sa yero tiquiro ahrikirore ñañe yerire cohā masiedare. Cohācjū dihita masa tiquina ñañe yerire cohā masine”, ni tūhotumahye tiquina. ⁸ Tiquina sa ni tūhotugū ihñano Jesu tiquina tūhotuyere masino ohō saha niahye:

—¿Dahse yena mūsa sa ni tūhotuajari? ⁹ “Muhu ñañe yerire cohā tuhasaja”, yuhu nigū, “Ni mehogu ijire”, yuhare nina nine mūsa masiedapenata. Tiquiro tini masieniquirore “Wahcādaca, wahaya”, yuhu nigū, tiquiro tinigū ihñana yuhu nidi potota ijigū duita masinata mūsa. ¹⁰ Yuhu masu Cohācjū ohorigu ahri yehpapure masa tiquina ñañe yerire cohā masiaja yuhu. Yuhu sa cohārire mūsa masiato saha ohō saha tiquiro wahagū yeitja, niahye Jesu judio masare buheyequinare.

Sa ni tuhasa tini masieniquirore ohō saha niahye:

¹¹ —Muhure niita niaja. Wahcādaca. Muhu cuñari cahserore ne cāhña mahu ya wahuḡpū, niahye Jesu tiquirore.

¹² Tiquiro sa nigāta tini masieniquirore wahcādaca sa, tiquiro cuñari cahserore ne, ijipihiyequina tiquina ihñono wijiaa wahahye. Tiquiro sa yegū ihñañe tiquina ijipihiyequina ihña acuaa wahahye. “Cohācjū tutuarikirore ijire. Ne mari ohō saha yegūre ihñeda tii”, niahye tiquina basi.

Jesu Levíre “Yuhu mehna cjū ijicjū ahtaya”, niahye

(Mt 9.9-13; Lc 5.27-32)

¹³ Sa ye pari turi Jesu ditara dūhtu cahapū wahahye. Sa yero masa peyequina tiquiro cahapū tiquina cahmecoagū ihñano tiquiro buheahye tiquinare. ¹⁴ Sa ye tuhasa topū ijirikirore waharo Levíre Alfeo macanore tiquiro dahrari tucūpū boca sahye. Apequina mehna pūhtoa ye ijiatire wapa ne cohteyequina ijiahye Leví gūhu. Tiquirore boca saro ohō saha niahye:

—Yuhu mehna cjū ijicjū ahtaya mahu, niahye Jesu Levíre.

Tiquiro sa nigū Leví pehe wahcādaca sa, Jesu mehna wahahye.

¹⁵ Jesu mehna wahayequina peyequina ijiahye. Sa yero Leví ya wahuḡpū mesa cahapū peyequina wapa ne cohteyequina mehna, “Ñano yeyequina”, tiquina niñequina mehna tiquiro buheyequina mehna dujiahye Jesu. ¹⁶ Topū tiquina dujiri bato apequina usā judio masare buheyequina, fariseo masa mehna Jesu tiquiro ihyagū ihñahye tiquina. Sa ihñañe ohō saha niahye:

—¿Dahsero ñano yeyequina, wapa ne cohteyequina mehna ihyajari Jesu? ni sinituahye judio masare buheyequina Jesu buheyequinare.

17 Tiquina sa nigū tūhoro queoye mehna yūhtiahye Jesu:

—Dohatieyequina duturure macaedare. Dohatieyequina dihita duturure macare. Ñañequina dohatieyequina yero saha ijire. Sa yegū ñañequina dihitare tiquina ñañe yerire bujua witi duti, quehnoañe pehere tiquinare comesagū yegū tagū nii yūhū. Tiquina basi “Quehnoana ijiaja usā”, ni tūhotuyequinare yedohogū tagū niedū yūhū, niahye tiquiro tiquinare.

*Sijiyere Jesure sinituahye ape-
quina*

(Mt 9.14-17; Lc 5.33-39)

18 Ti pjere Ñu buheyequina, fariseo masa gūhū Cohācjūre ño peoye tehe, sijie tiahye. Sa ye masa Jesure sinituahye:

—Ñu buheyequina, fariseo masa buheyequina gūhū Cohācjūre ño peoye tehe sijire. ¿Dūhse ye mūhū buheyequina sijierajari? niahye tiquina Jesure.

19 Jesu tiquiro tūhotuyē mehna queoye mehna buhero tiquinare ohō saha ni yūhtiahye:

—Ohō saha ijire ti: Omoca dūhteriquiro bose deco ijigū tiquiro mehna cjēna bujua witiro mehna ijierare. Sa ye sijiyequina ijierare. Sata yūhū buheyequina gūhū yūhū mehna ijiye, siji masiedare. 20 Yūhū Pacū Cohācjū yūhūre tiquiro neari bato pūritare pari turi yūhū buheyequina mehna ijisi yūhū. Sa ye ti pjerū yūhū buheyequina gūhū sijieta, niahye Jesu.

21 Panorū cjē buheye mehna tiquina buhe more duagū ihñano ohō saha ni nemoahye Jesu tiquinare queoye mehna buhero.

—Ne wahma cahsero suhtiro cahsero mehna mūnano suhtirore sere ohōno cahmedare. Sa yegū wahma cahsero mari coseri bato mūnano suhtirore weje cahmecoā,

paji yūhdūaro tūhnūgū yere. (Sata mūna buheye wahma buheye mehna piti dahre buheraro cahmene.) 22 Sa yena ne ūhse co bisiye core wahiquiro cahsero ajuropūre mūna ajuropūre pose yeraro cahmene. Sa yegū ūhse co bisiye pahmuñepū mūna ajurore tūhnū dijiaa wahare. Ti ajuro tūhnūgū ūhse co gūhū ajuro gūhū cohāa wahare. Sa yena ūhse co wahma core wahma ajuropū pose yero cahmene. (Sata wahma buheye mūna buheye mehna buhe moredaro cahmene,) ni buheahye Jesu tiquinare.

*Saurū ijigū Jesu buheyequina
trigo parorire peheahye*
(Mt 12.1-8; Lc 6.1-5)

23 Ape deco saurū ijigū Jesu gūhū trigo wesepū wahahye. Tiquiro buheyequina pehe trigo parorire pehe yūhdū cāhye. 24 Tiquina sa yegū ihñañe ohō saha ni tuhtiahye fariseo masa Jesure:

—Tūhorīña usāre. ¿Dūhse ye mūhū buheyequina saurū mari sori deco ijiepegūta dahrajari? Mari dutiyere yūhdūdcayē nine, niahye tiquina Jesure.

25-26 Tiquina sa nigū tūhoro Jesu tiquinare yūhtiahye. “Yūhū buheyequina yūhdūdcayē niedare”, nino taro ohō saha niahye:

—Davi mūnano tiquiro mehna cjēna mehna ūjua ahbaro, Cohācjū wūhūpū sajā, Cohācjū ye pāre ihyahye. Sa yero tiquiro mehna cjēna gūhūre ti pāre ohoahye. Ti pāre pahia dihita ihyae tiahye. Cohācjū dutiye tiquina ojoari pū apequinare ti pāre ihya dutierare. Ti pjere Abiatar wame tiriquiro pahia pūhtoro ijiahye. ¿Davi gūhū tire tiquina yerire Cohācjū yere tiquina ojoari pūre buherari mūsa? (Ti pāre ihyaro Cohācjūre yūhdūdcaro niedahye. Miare

ahri pjerire ihyaye yuhū buheye-
quina gūhū Cohācjūre yuhdudcaye
niedare,) niahye Jesu tiquinare.

²⁷ Sa ni tuhasa ohō saha ni
nemoahye:

—Sa yero Cohācjū saurú
decore tiquina sori deco cūno,
masa ya deco cūno nidi dahra
wahyariquinare so dutiro. Ti
deco cahacjēna ijiatire cūno niedari
masare. ²⁸ Sa yegū yuhū masū
Cohācjū ohorigū ahri deco saurú
decore masa tiquina yeatire
yahugū ijigū pūhto ijiaja, niahye
Jesu tiquinare.

3

Omoca bħhariquiro quti ijire
(Mt 12.9-14; Lc 6.6-11)

¹ Sa ye Jesu usā judio masa
buheri wħhupū esaro, sajāhye tja.
Sa yero omoca bħhariquiro gūhū
topū ijiahye. Sa ye ti wħhupū
ijiyequina Jesu dihitare ihñadoque
ohōahye. ² Saurú ijigū Jesu omoca
bħhariquirore tiquiro yuhdugū
ihñā duahye tiquina. Tiquiro
sa yegū ihñāñe tiquirore yahusā
duahye. “Mari sori decore Jesu
dahrarō nine”, ni yahusā duahye
tiquina. ³ Sa yero ohō saha niahye
Jesu omoca bħhariquirore:

—Wahcāduca saya. Ohōpū ah-
taya, niahye.

Sa ni tuhasa ti wħhupū ijie-
quinare yahuahye:

⁴ —¿Saurú ijigū quehnoañene
yegū quehnoaedajari? ¿O ñāñe
yegū pehere quehnoajari, msa
tuhotugū? Saurú ijigū masunore
masogū quehnoañene. Masunore
wejēgū pehere quehnoaedare, ni
yahuahye Jesu tiquinare.

Tiquiro sa niepegūta tiquina
pehe ne yūhtierahye. ⁵ Tiquina
sa yūhtieragū ihñāno Jesu tiquina
mehna usuahye. Tiquina tūho
dueragū ihñāno Jesu bħjua witi-
ahye.

—Mūhū omocare siō potoya, ni-
ahye tiquiro omoca bħhariquirore.

Tiquiro sa nigū tūhoro tiquiro
omocare siō potohye. Tiquiro
siō potogūta omoca quehnoa wa-
hahye. ⁶ Sa omoca quehnoa wa-
hagū ihñāñe fariseo masa wijiaa
wahahye. Wijia, Herode mehna
cjēna mehna cahmecoa, “¿Dūhse ye
Jesure wejēnatari mari?” niahye
tiquina basi.

*Masa peyequina ditara dūhtū ca-
hapū ijiahye*

⁷⁻⁸ Sa ye Jesu tiquiro buheye-
quina mehna ditara cahapū wa-
hahye. Tiquina sa wahagū ihñāñe
Galilea cjēna masa peyequina
tiquiro bato esahye. Sa ye Judea
yehpa cjēna, Jerusalē cjēna, Idumea
yehpa cjēna, Jordā wame tiri ma
ape sie pahrē cjēna, Tiro wame tiri
maca cjēna, to cahapū ijieyquina,
Sidō wame tiri maca cjēna, to
cahapū ijieyquina mehna masa
peyequina ijipihtieyquina tiquiro
yerire tūhoye, tiquiro cahapū
esahye. ⁹ Sa ye masa peyequina
ijiey, Jesu cahare bihsa dūca
sahye. Sa yero Jesu yucāsare
quehno pahsa dutiahye tiquiro
buheyequinare. ¹⁰ Peyequina
dohatiyequinare tiquiro yuhdugū
ihñāñe apeyquina dohatiyequina
gūhū Jesure piha duaye, bihsa dūca
sahye. ¹¹ Sa ye watīare cūoyequina
pehe Jesure ihñāñe tiquiro cahapū
dūsepe curi mehna quehe sahye.

—Mūhū Cohācjū macū ijire, ni
sañuducuahye tiquina tiquirore.

¹² Sa yero tiquinare Cohācjū
macūno tiquiro ijieyere tutuaro
mehna apeyquinare yahu dutier-
ahye Jesu.

*Jesu tiquiro buheyequinare
doce tiquiro ohoatiquinare bese
docoahye*

(Mt 10.1-4; Lc 6.12-16)

¹³ Sa ye Jesu cūnupū mūja,
tiquiro cahmeñequinare pijiahye.
Tiquiro pijigū tūhoye, tiquiro

cahapu esahye tiquina. ¹⁴ Sa yero doce amare tiquiro mehna cjenare, tiquiro ohoatiquinare, apeye macaripare tiquiro yere buheatiquinare bese docoahye Jesu. Sa ye tiquina ya curua Jesu cūriquina wame tiahye. ¹⁵ Sa yero dohatiyequinare yuhduoatire, watiare cohāti gāhare cūahye tiquinare. ¹⁶⁻¹⁹ Ahriquina ijiahye doce ama Jesu tiquiro bese docoriquina: Simo, Santiago Zebedeo macano, Ñu Santiago bahuro, Andre, Felipe, Bartolomé, Mateo, Tomasu, Santiago Alfeo macano, Tadeo, Simo celote ya curua cjanō ijimediquiro, Juda Iscariote, ahriquina ijiahye tiquiro bese docoriquina. Jesu Simore Pedro wame yeahye. Santiagore, Ñu mehna Boanerges wame yeahye. Boanerges “Upo cjenā”, nino nine. Juda Iscariote Jesure ihña tuhtiyequinare ihñoatiquiro ijiahye.

—*Jesu watīno tutuayere chore, ni yahusāhye masa*

(Mt 12.22-32; Lc 11.14-23; 12.10)

²⁰ Tiquinare bese doco tuhasa, dijia, Jesu tiquiro buheyequina mehna wuhuru saajā wahahye. Sa ye topu pari turi masa peyequina cahmecoañe, bihsaa wahahye. Tiquina sa bihsagū ihñano Jesu ihya masiedahye. Sa ye tiquiro buheyequina gāhu ihya masiedahye. ²¹ Sa ye apequina Jesu acaye tire tūhoye tiquiro cahapu esahye, tiquirore ñehemahye. “Tiquiro tūho masieniquiro wāharo nine”, nimahye tiquina.

²² Apequina ohō saha nimahye:

—Beelzebú tiquirore sa wahagū yero niaga. Tiquiro watiare cohāno, Beelzebú watia pūhoro tutuaye mehna tiquinare cohāre, nimahye Jerusalēpu ahtariquina usā judio masare buheyequina.

²³ Tiquina sa nigū tūhoro Jesu pehe tiquinare piji, tiquiro

tūhotuye mehna queoye mehna yahuahye tiquinare, “Watīno ye tutuaye mehna watiare cohāgu niedaja”, nino taro.

²⁴ —Watia tiquina basi cohā masiedare. Sa ye ihcā yehpa cjenā tiquina basi cahme wejē, ti yehpa cjenā yaria pihtia wahaboaga. ²⁵ Sa ye ihcā wāhu cjenā tiquina basi cahmequeñe ti wāhu cjenā waha pihtia wahaboaga. ²⁶ Sa yero Satana watia pūhoro pehe watiare cohāno tiquina basita cahmequeñe niboaga. Sa ye tiquina waha pihtia wahaboaga.

²⁷ Ohō saha ni yahuahye mehna buhegū. Tutuariquiro ya wuhuru apequiro saajā sa yaque masiedare. Tutuariquirore dūhteraro tiquiro ya wuhuru saajā sa yaque masiedare. Tutuariquirore tiquiro dūhteri bato saajā sa yaque masine, ni yahuahye Jesu.

(Ohō saha ni yahuahye watīnore tiquiro yuhducarire yahuro. Watīno tutuariquiro tiquiro ijiepegūta Jesu tiquirore yuhducare watiare cohāno.)

²⁸ Sa ni tuhasa ohō saha ni yahu nemoahye Jesu:

—Poto niita niaja māsare. Ijipihtiye ñañe masa tiquina yegū tiquina yahuducugū gāhare Cohācū bo masine. ²⁹ Sa boeperota Espiritu Santore tiquina ñano yahuducugū ti pūritare ne bosi. Tiquina sa nidi buhiri sa buhiri tiducuyequina ijietā, niahye Jesu tiquinare.

³⁰ Jesu Espiritu Santo tiquiro tutuaye mehna watiare tiquiro cohāepēgūta “Tiquiro watīno tutuaye mehna watiare cohāno nine”, nimahye masa. Tiquina sa nigū tūhoro ti quitire Espiritu Santo quitire yahuahye Jesu tiquinare.

Jesu acaye tiquirore pijiahye
(Mt 12.46-50; Lc 8.19-21)

³¹ Sa ye Jesu bahana tiqiro paco mehna wihiahye. Sa wihye sopecahapu ijiahye. Apequinare piji dutiahye tiqirore. ³² Sa ye masa tiqiro cahapu dujiyequina yahuahye tiqirore.

—Mahu paco, mahu bahana mehna sopecahapu mahare pijiri, niahye.

³³ Tiquina sa nigū tūhoro ohō saha niahye Jesu tiquinare buhero taro:

—¿Noa ijiajari yahu paco, yahu bahana gūhu, masa ihñagū? niahye tiqiro tiquinare buhero.

³⁴ Sa nino tiqiro caha dujiyequinare ihñano ohō saha niahye:

—Ahriquina ijire yahu paco, yahu bahana yero saha ijiyequina. Cohācjū cahmeñene yere ahriquina. ³⁵ Sa yeyequina yahu bahu, yahu baho, yahu paco yero saha ijire, ni buheahye Jesu tiquinare.

4

Jesu oteriquiro quitire buheahye
(Mt 13.1-9; Lc 8.4-8)

¹ Sa ye pari turi ditara dūhtu cahapu Jesu buhe dūcahye. Sa ye topure buhe dūcaro masa peyequina tiqiro cahapu tiquina cahmecoagū ihñano Jesu pehe yucasapu buhe pahsahe. Sa ye masa pehe ditara dūhtu cahapu ducuahye. ² Sa yero Jesu peye tiqiro tūhotuye mehna piti dahre yahuahye tiquinare buhero.

³ —Ahri quitire tūhoya masa, niahye tiqiro.

—Oteriquiro otero wahahye.

⁴ Tiquiro sa otegū apeye pjeri maha dūhtu cahapu bora quehe sahye. Sa bora quehe saye pjerire minicjua ahta, ihya cāhye. ⁵ Sa ye apeye pjeri utā pjeri watoa bora quehe sahye. Utā pjeri watoa dihta marieda cjūno ijepegū duita pihnimahye. ⁶ Sa pihnidi ijeperota, asū tutuaro asigū nūhcori marieda, ñaia wahahye. ⁷ Apeye pjeri taa watoa

bora quehe sahye. Taa pehe dia yūhdūa waha, oteri pehere wejē cāhye. Sa yero dūca mariedahye.

⁸ Apeye pjeri quehnoari dihtare bora quehe sahye. Quehnoano pihniñe ijiro quehnoano dūca tiahye. Apeye cju treinta pjeri, apeye cju sesenta pjeri, apeye cju cien pjeri dūca tiahye. ⁹ Ahrire quehnoano tūhoya masa, niahye Jesu.

Jesu quti mehna tiqiro buherire yahuahye

(Mt 13.10-17; Lc 8.9-10)

¹⁰ Sa ye tiquina sehsaro ijiye doce buheyequina, apequina Jesu mehna ijiyequina ti quitire masi duaye, Jesure sinituahye. ¹¹ Tiquina sa sinituri bato Jesu ohō saha ni yahuahye:

—Cohācjū masa pūhtoro tiqiro ijiyere, panopu apequina tiquina masiedarire masare masigū yere Cohācjū. Apequina pehere sa yerare tiqiro. Tiquinare quti mehnata buheitja. ¹² Sa ye tiquina ihñapeta ihñedariquina yero saha tojoare. Sa ye tūhoepeta masisi. Tiquina masiñe quehnoañe pehere comesaboaya. Tiquina sa comesagū ihñano tiquina ñañe yerire boboaya Cohācjū. (Sa ijepegūta tiquina pehe ne tūho duerare,) niahye Jesu.

Jesu oteriquiro quitire yahu pehoahye

(Mt 13.18-23; Lc 8.11-15)

¹³ Tiquiro sa nidi bato ohō saha ni yahu nemoahye tiquinare:

—¿Ahri quitire tūhoena niajari masa? ¿Masa ahri quitire tūhoerana, dahse apeye quitire tūhonatari masa? niahye Jesu tiquinare.

Sa ni tuhasa ohō saha ni yahu nemoahye tiquinare:

¹⁴ —Oteriquiro tiqiro oteri pjeri quehnoañe buheye yero saha ijire. ¹⁵ Sa yero maha dūhtu caha bora quehe sari pjeri quehnoañe

buheye yero saha ijire. Sa yero masa quehnoañe buheyere tiquina tuhogū ihñano Satana pehe ahta, ti buheye quehnoañe buheyere masi dutierare tiquinare, minicjua ti pjerire tiquina dote nediro saha yero. ¹⁶ Sa ye utā pjeri watoa bora quehe sari pjeri quehnoañe buheye yero saha ijire. Sa ye masa quehnoañe buheyere tūho, bucueye mehna duita tire tūho ñehe maa wahare. ¹⁷ Sa tūho ñehepeta utā pjeri watoa ijiye cjū nahcori marieñe cjū yero saha ahriquina masa gūhū tutuerare. Sa tutueraye, ñano yūhdūye, yeequina tiquina ijiri buhiri apequina tiquinare ñano yegū ihñañe yee pehere duhu cāhre. Apequina tiquinare ñano yegū tire ihcāno sahaeraye, yeere duhu cāhre. ¹⁸ Sa ye taa watoa bora quehe sari pjeri quehnoañe buheye yero saha ijire. ¹⁹ Sa ye masa quehnoañe buheyere tūhoepeta, ahri yehpa cjēne pajiro bujua witi tūhotuye, niñeru pehere cahñe. Apee boro gūhare peye tutuaro cahmene. Tiquina sa ni tūhotugū ti pehe quehnoañe buheyere cahmotare. Ti sa cahmotagū masa quehnoañe pehere yerare. ²⁰ Sa ye quehnoari yehpapū bora quehe sari pjeri quehnoañe buheye yero saha ijire. Sa ye masa quehnoañe buheyere tūhoye tire cahmene. Sa masiñequina ijiye, Cohācjū tiquiro cahmeno sahata quehnoañene yere tiquina. Ihquēquina mehenō quehnoañene yere treinta pjeri dūca tiro saha. Apequina bui cjūno quehnoañene yere sesenta pjeri dūca tiro saha. Apequina pajiro quehnoañene yere cien pjeri dūca tiro saha, ni yahuahye Jesu tiquinare.

Jesu sihāria quitire buheahye
(Lc 8.16-18)

²¹ Sa ni tuhasa ohō saha ni nemoahye:

—Ne sihāriare dihi sutu docapū cūedare. Sa ye tiare cumuno docapū cūedare. Ūhmuanopū duhu peore quehnoano buhrio dutiye. ²² Ijipihtiye tiquina masiedarire came masa masieta. Sihāria buhriogū mari ihña masino saha panopūre tiquina masiedarire masieta masa. ²³ Ahrire quehnoano tūhoya masa. ²⁴ Mehenogā masi duana mehenogā masinata. Pajiro masi duana pajiro masinata. Sa yena masa tūhona quehnoano tūho nūnūña. ²⁵ Quehnoano tūho nūnūriquiō quehnoano masinata. Tūho nūnūeniquiō, “Mehenogā tūhoaja”, tiquiro niepegūta ti pehe butia waharota, niahye Jesu tiquinare.

Jesu trigore oteriquiō quitire buheahye

²⁶ Sa ni tuhasa ohō saha ni yahu nemoahye:

—Cohācjū masa pahtoro tiquiro ijiye trigore oteriquiō yero saha ijire. ²⁷ Ote tuhasa bohrearo tiquiro oteri pihniñene ihñare tiquiro. “¿Dūhse pihni wijia ta dūcajari?” ni ihña masiedare oteriquiō tiquiro basi. ²⁸ Ti oteri ti basi dūca tire. Pari pūgā wijia mūhtare. Came pari paro wijia, būcūare. ²⁹ Ti parori būcūa tuhasagū ihñano, pehere peheri pje ijigā. (Tiquiro ote, ti būcūarire tiquiro masiedaro saha Cohācjū yequina masa tiquina wahari gūhare yahu peho masiedare masa,) ni buheahye Jesu.

Mostaza pje quitire yahuahye Jesu

(Mt 13.31-32; Lc 13.18-19)

³⁰ Sa ni tuhasa ohō saha ni buhe nemoahye queoye mehna buhero:

—¿Ne Cohācjū masa pahtoro tiquiro ijiye yabe boro yero saha ijiajari, masa tūhotugū? ¿Dise quitī mehna tire yahunatari?

³¹ Mostaza pjegā yero saha ijire

Cohãcjũ puhtoro ijiye. Ti pjegã tiqiro otegãre meheni pjegã waro ijire. ³² Sa ijieperota ti pjegã quehnoano pihnine. Sa yero pajidu wahare. Sa ye tu dũpuri bujuye dũpuri bucãagũ ihñañe minicjua ti dũpuri suhti suhare, niahye Jesu. (Sa nino ohõ saha nino niahye. Mostaza pjegã pajidu tu bucãariro saha umhuse cjũnore mari puhtorore masiñequina meheñequinagã tiquina iji mũhtaepẽgũta camerũre peyequina wahaeta.)

Quiti mehna tiqiro buherire yahuahye Jesu

(Mt 13.34-35)

³³ Sa yero ti quiti tiqiro nidiro saha peye quitire tiquina tũho ñeheno puno quehnoañe buheyere buheahye tiquinare. ³⁴ Quiti marieno yahuerahye tiquinare. Sa yero tiquina sehsaro ijiyequinare Jesu quehnoano yahu pehoahye tiqiro buheyequinare.

Jesu wihnonore yũsu dutiahye

(Mt 8.23-27; Lc 8.22-25)

³⁵ Sa ye ti decore ñamicahapũ Jesu tiqiro buheyequinare ohõ saha niahye:

—Isa, si pahrẽpũ pehãhna, niahye tiquinare.

³⁶ Tiquiro sa nigũ tuhoye yucũsapũ sajã, masare yehpapũ ducuyequinare tota cũ, tiqiro buheyequina dihita Jesure ne pehã wahahye. Sa ye apeye yucũsari mehna apequina tiquina bato pehãhye. ³⁷ Tiquina sa pehãgũ wihnono tutuaro wẽahye. Sa wẽno yucũsare tutuaro pahcõri quẽ sajãhye. Mehenogã dũhsamahye tiquina miniboriro. ³⁸ Sa wahari watoa Jesu yucũsa ohoturopũ suhti puti buipũ carĩno niahye. Sa ye tiquina tiqirore wahcõahye.

—¿Buhegũ, mũhũ cuerajari? Mari minina tana niajú, niahye tiquina tiqirore.

³⁹ Tiquina sa nigũta Jesu pehe wahcã, wihnonore,

—To punota wẽ duhuya, niahye.

Sa ninota pahcõri gũhare,

—Yũsahya, niahye.

Tiqiro sa nigũta wihnono yũhdũa wahahye. Sa ye pahcõri gũhũ yũsu dijiaa wahahye.

⁴⁰ —¿Dũhse yena cue maca cãna nijari mũsa? ¿Mũsa yũhare wacũ tutuerajari? niahye Jesu.

⁴¹ Sa wahagũ ihñañe acũa yũhdũa wahahye.

—¿Yohou, dũhse ijiriquiro boro masũno ijiajari ahriqiro? Ahri wihnono, pahcõri gũhũ tiqiro dutigũ yũhdũdũcaerare tiqirore, niahye tiquina pehe.

5

Watĩare cũoriquirore yũhdũoahye Jesu

(Mt 8.28-34; Lc 8.26-39)

¹⁻² Sa ye tiquina si pahrẽpũ Gerasa cjẽna ya yehpapũ pehã sahye. Sa yero Jesu pehe yucũsapũ sañariqiro maja sadũcahye. Tiquiro sa maja sadũcari bato watĩa cũoriquiro masa coperi utã coperi watoapũ ijiriquiro wijia ta, tiqiro cahapũ ahtahye. ³ Watĩa cũoriquiro masa coperi watoa ijiriquiro ijiahye. Apequina pehe tiqirore come da pajiri da mehna ñehe dũhte masiedahye. ⁴ Sa ye peye tahari masa tiqirore dahpocãri apõñe behtori mehna, come dari mehna dũhtemahye. Tiquiro omocari gũhare dũhtemahye. Sa yero tiqiro pehe come darire nuha, dahpocãri apõñe behtori gũhare nuha site majahye. Sa ye tutuariqiro tiqiro ijiro mehna masa pehe tiqirore ñehe masiedahye. ⁵ Ñami ijigũ, deco ijigũ utã coperi watoapũ cũnũpũ sa sañuducue tiahye tiqiro. Sa yero utã mehna tiqiro basi tiqiro pagũre quẽe tiahye. ⁶ Sa yero yoaropũ Jesure ihñadoqueo tiqiro

cahapu oma maa cãhta, dusepe curi mehna quehe sahye tiqiurore ño peoro taro.

⁷⁻⁸ —Watia duhuya tiqiurore, ni ahye Jesu.

Tiqiuro sa nigũ tãhoro watia cãoriqiuro ohõ saha niahye:

—¿Jesu, Cohãcjũ tutuariqiuro macu, yabere yegu tuu niajari mahu yuhare? Cohãcjũ tiqiuro ihñonopu siniaja yahu mahare. Yuhare ñano yeracãhña, ni sañuducuahye watia cãoriqiuro Jesure.

⁹ —¿Dahse wame tiajari mahu? niahye Jesu tiqiurore.

—Ûsã peyequina ijiaja. Sa yena “Peyequina watia” wame tiaja. ¹⁰ Ûsã ahri dihtapu ijinare ape siepu waha dutieracãhña, niahye watia cãoriqiuro.

¹¹ Ti pjere yesea peyequina tiquina cahapu cunu dahpotopu ihyaye niahye. ¹² Topu tiquina iyaducugũ ihñañe, ohõ saha ni siniahye watia:

—Sisequina yesea cahapu waha dutiya usãre. Tiquina mehna iji dutiya usãre, ni siniahye watia tiqiurore.

¹³ Tiquina sa nigũ tãhoro tiquinare waha dutiahye Jesu. Tiqiuro sa waha dutigũ watia masano mehna ijiriquina waha, yesea dos mil yesea cahapu esahye. Tiquina cahapu tiquina esari bato yesea pehe ijipihtiequina ditara dãhtu cahapu oma buha, ti ditarapu bora ñojoa, mini yaria pihãtia wahahye.

¹⁴ Tiquina sa minigũ ihñañe, yeseare cohteyequina pajiri macapu, daye macarigãpu gãhare tire yahuye waha, oma cãa wahahye. Tiquina sa yahugũ tãhoye masa pehe peyequina tiqiuro yerire ihñañe wahahye. ¹⁵ Sa ye Jesu cahapu wihiye, watia cãoriqiuro tiqiuro suhti tiriqiuro, tãho masiniqiuro tiqiuro dujigũ ihñañe, ihña maria waha, cueahye.

¹⁶ Sa ye watia cãomediqiuro, yesea gãhare tiquina sa waharire ihñariquina apequinare yahu pehoahye. ¹⁷ Tiquina sa yahu pehogũ tãhoye, Jesure tutuaro mehna ape siepu waha dutiahye.

¹⁸ Sa yero yucasapu Jesu tiqiuro sajãgũ ihñano, “Mahu mehna waha duaja”, ni tutuaro sinimahye watiare cãomediqiuro Jesure.

¹⁹ Tiqiuro sa nigũ Jesu tiqiurore yahuahye:

—Yuhu mehna wahaeracãhña. Mahu ya wãhupu mahu caha ijieyequina cahapu yuhu mahu puhto mahare yuhu yerire yahugũ wahaya. Mahare yuhu paja ihñarire yahugũ wahaya tiquinare, niahye tiqiurore.

²⁰ Tiqiuro sa nigũ watia cãomediqiuro pehe Decapoli wame tiri macapu Jesu tiqiurore yuhdũorire yahu dũcahye. Tiqiuro sa ni yahugũ tãhoye ijipihtiequina masa tãho maria wahahye.

Jairo maconore yuhdũoro, dii muna wihoro dohatiducuricoro gãhare yuhdũoahye Jesu

(Mt 9.18-26; Lc 8.40-56)

²¹ Sa ye pari turi Jesu tiqiuro majare pehã sagũ masa peyequina tiqiuro cahapu ditara dãhtu cahapu cahmecoahye. ²² Sa yero usã judio masa buheri wãhare ihña ihbõriqiuro Jairo wame tiriqiuro ahta, Jesure ihña, tiqiuro dahpocãri cahapu dusepe curi mehna quehe saro, ohõ saha niahye:

²³ —Yuhu macogã yariaro nidi. Sa yegu ticorore mahu omoca mehna ña peogu, yuhdũogu ahtaya. Mahu sa yegũ ticoro masanota, niahye tiqiuro Jesure.

²⁴ Tiqiuro sa nigũ Jesu gãhu pehe tiqiuro mehna wahahye. Mahapu tiqiuro wahagũ masa peyequina tiqiurore nãnu tã cã bihsaro esadũca sahye. ²⁵ Sa yero numino doce cãhmari waro decoripe dii muna dohatiducuricoro topu

ijiahye. To pano peyequina duturuu ticorore ñano yuhdugũ yeahye. ²⁶ Sa yero duturuare ijipihtiye ticoro niñeru mehna wapa yemahye ticoro aco ye dutiro. Tiquina sa yepegũta ticoro mananota ijiducu cãhye. Sa yero ticoro tiquinare ihñari bato to pano ijiriro yuhduoro ñano wahahye. ²⁷ Ticoro sa ñano yuhduri bato Jesu yeyere tãhoye, apequina yahuahye ticorore. Sa yero ticoro Jesu bato masa peyequina watoa ahta, Jesu suhtirore ñehe tuhuahye. ²⁸ “Yuhũ tiquiro suhtiro dihitare ñehe tuhugo quehnoa wahagota”, ni tãhotuahye. ²⁹ Sa yero ticoro sa ñehe tuhuri bato ticoro dii mana dohatiyere yuhdugũ ticoro pagure quehnoari pagũ tãhotuahye. ³⁰ Sa yero Jesu tiquiro tutuaye mehna dohatiyere tiquiro cohãrire masino, masa watoa majareduca sa ihñahye.

—¿Noa yuhũ suhtirore ñehe tuhuajari? niahye tiquiro.

³¹ Tiquiro sa nigũ tãhoye tiquiro buheyequina ohõ saha niahye:

—Bihsarĩne. Sa ye masa peyequina mũhare pihare. “¿Noa yuhũre ñehe tuhuajari?” nigũ, ¿duhse nigũ sa nijari mũhũ? niahye tiquina pehe tiquirore.

³² Sa yero Jesu tiquirore ñehe tuhuricorore macahye. ³³ Tiquiro sa macano watoa ticoro pehe ticoro pagũ quehnoa wahagũ tãhoturo, cue nanare dũsepe curi mehna quehe sahye tiquiro caha tiquirore ño peoro. ³⁴ Sa yero ticoro potota yahu pehoahye tiquirore. Ticoro sa ni yahuri bato Jesu ticorore yahuahye:

—Maco, yuhũre mũhũ wacũ tutuaye mehna quehnoago tojoare yojopũre. Bucueye mehna wahaya. Dohatiye mariego ijiya, niahye Jesu ticorore.

³⁵ Tiquiro sa ni yahuducuri bato judio masare buheri wuhũre ihña

ihboriquiro ya wuhũ cjẽna yahuye wihiahye.

—Mũhũ maco yaria wahari. Sa yegũ buheriquirore piji cãhteracãhña, niahye tiquina.

³⁶ Tiquina sa niepegũta sa tãhotu cãhno, Jesu ti wuhũre ihña ihboriquirore ohõ saha ni yahuahye:

—Bũjũa witieracãhña. Yuhũre wacũ tutuaya. Ti dihitare yeya, niahye ti wuhũre ihña ihboriquirore.

³⁷ Sa ni tuhasa Santiago, tiquiro bahũro Ñu, Pedro tiquina dihitare “Yuhũ mehna ahtaya”, niahye Jesu. ³⁸ Sa yero judio masa buheri wuhũre ihña ihboriquiro ya wuhũpũ esahye. Ti wuhũpũ masa peyequina ñano bisi ñehe quea utigũ, tiquina sañuducugũ tãhoahye Jesu.

³⁹ —Ñano ni, ñehe quea utieracãhña mũsa. Ticorogã mũsa sa ni utigũ yarierare. Carĩno nine, niahye Jesu tiquinare.

⁴⁰ Tiquiro sa nigũ tãhoye “Sa ni maca cãhno nine ahriquirõ”, ni bujũahye tiquina pehe tiquirore.

Sa yero tiquiro tiquinare sopecahapũ wio peho cãhye. Sa wio tuhasaro ticorogã pacasũmũare, tiquiro mehna cjẽna gũhũre ticorogã cahapũ neahye Jesu. ⁴¹ Sa yero Jesu ticoro omocare ñehe, “Talita cum”, niahye tiquiro. “Talita cum”, nino, “ ‘Mehenicorogã wahcãhña’, niaja yuhũ”, nino nine.

⁴² Tiquiro sa nigũ ticorogã wahcãdũca sa, tiniahye. Doce cãhmari cãoricoro ijiahye ticoro. Ticorore tiquiro sa yegũ ihñañe tiquina ihña maria wahahye. ⁴³ Sa yero Jesu tutuaro mehna tiquiro sa yerire yahu site dutierahye. Sa ye tuhasa ticorore ihyayere oho dutiahye.

6

Nazare cjẽna Jesure cahmedahye (Mt 13.53-58; Lc 4.16-30)

1 Sa ye topu ijiriquiro Jesu waha, tiquiro buheyequina mehna tiquiro ya dihtapu tojoa sahye. 2 Sa yero Jesu sauru ijigū judio masa buheri wuhuru buhe dūcahye. Tiquiro sa buhegū masa peyequina tiquirore tūhoye, acua wahahye.

—¿Ahriquiro nohopu tūhoyari ahri buheyere? ¿Dūhse yero quehnoano masi pehoajari ahriquiro? Cohācjū tutuaye mehna ye ihñore ahriquiro masare. 3 Ahriquiro taboa dahrari masano María macano, Santiago, José, Juda, Simo tiquina wahminota ijimero. Sa ye tiquiro bahana numia mari ya macapu ijinimedi. Sa yero tiquiro gūhu mari yero saha ijiriquiro ijire, niahye tiquina Jesure tūhoriquina.

Sa ye Jesure ihña tuhtiye, tiquirore cahmedahye. 4 Tiquina sa cahmedagū ihñano ohō saha niahye Jesu:

—Cohācjū yere yahu māhtariquirore 12 Sa ye doce buheyequina apequina ño peore. Tiquina sa ño peoepegūta tiquiro ya maca cjēna, tiquiro acaye tiquiro ya wuhuru ijieyequinata ño peoerare tiquirore. Sa yena yuhare ño peoerare masa ohōre bucarigu yuhu ijigū, niahye Jesu tiquinare.

5 Sa yero ti macapu ijiriquiro Jesu Cohācjū tutuaye mehna ye ihño masiedahye. Sa ye ihñodaperota ihquēquina dohatieyequina bui tiquiro omocare duhu peo, yūhdūoahye tiquiro. 6 Sa yero to cjēna Jesure tiquina wacū tutueragū ihñano, “¿Dūhse ijiro boro yuhare cahmedajari?” ni tūhotuahye tiquiro. Sa yero Jesu ti maca cahapu ijieye macaripū buhero wahahye.

Jesu doce buheyequinare buhe dutiro ohoahye

(Mt 10.5-15; Lc 9.1-6)

7 Sa ye Jesu doce tiquiro buheyequinare pijio, pūeyequina dihita ohoahye tiquinare macaripūre

buhe dutiro. Sa yero tiquiro tutuayere ohoahye tiquinare watīare tiquina cohātire. 8 Sa ohoro apee boro, ihyayere, ajurire, niñure tiquiro ne cā dutierahye tiquinare. Tiquina tuaye cju dihitare ne cā dutiahye tiquinare. Ihcānota suhtirore saña dutiahye tiquinare. Pūaro saña dutierahye. 9 Sa yero cūhta cūñe cahserire saña dutiahye tiquinare. Ihcā suhtirota saña dutiahye tiquinare. Pūaro saña dutierahye. 10 Sa yero ohō saha ni yahuahye tiquinare:

—Ijipihtiye macaripūre masare tiquina carīno ohogū ti wuhurūta tojoarīña. Coā wahanapū wijiaya ti wuhure. 11 Sa yena ape maca cjēna masare tiquina cahmedagū tiquina tūho dueragū ti macare yūhdūana dahpocāri cjē dihta esa wahārire wejē site cūña masa tiquinare tiquina ye buhirire masigū yena, ni yahuahye Jesu tiquinare.

12 Sa ye doce buheyequina masare tiquina ñañe yerire bujua witi dutiye, quehnoañe pehere ye dutiye, buheye wahahye. 13 Sa wahaye peyequina watīare cohāñe, dohatieyequinare uhse mehna wisōñe yūhdūgū yeahye.

Ñu wame yeriquirore apequina wejēahye

(Mt 14.1-12; Lc 9.7-9)

14 Sa ye Jesure masa peyequina masiahye. Sa yero tiquiro yerire pahtoro Herode tūhooahye. Sa tūhoro ohō saha ni tūhotumahye tiquiro: “Ñu wame yeriquiro yariariquiro pari turi bajoaro niaga. Sa bajoariquiro ijiro tiquiro tutuaye mehna tire yero niaga”, ni tūhotumahye Herode. “Jesu Ñuta ijire”, ni tūhotumahye. 15 Apequina pehe ohō saha ni tūhotumahye: “Elia ijire”, ni tūhotumahye. Apequina pehe “Cohācjū yere yahu māhtariquiro panopū cjēna yero saha ijire tiquiro”, ni tūhotumahye

tiquina Jesure. ¹⁶ Tiquina sa ni tãhotuepegãta Herode pehe Jesu tiquiro yerire tãhoro ohõ saha ni tãhotumahye. “Ñu yahũ dapu ðate sure dutiriquiro bajuaro niãga”, ni tãhotumahye.

¹⁷⁻¹⁸ Ñure tiquina wejẽato pano Herode tiquirore ñehe duti, peresu ye dutiahye. Herode tiquiro bahũro Felipe namonore Herodia wame tiricorore ehma, namo tiahye.

—Mũhũ bahũ namonore namo tigũ Cohãcjũ dutiyere yahũdũdũcagũ nine mãhũ, ni yahuahye Ñu Herodere.

Tiquiro sa nidi buhiri Herode namono Herodia Ñure peresu tiquina yegũ cahmeahye. ¹⁹ Sa yero ticoro pehe Ñure ihña tuhtiro, tiquirore wejẽ duti duamahye. Sa ye dueperota ticoro tiquirore wejẽ duti masiedahye. ²⁰ Herode Ñure cuero “Ñu quehnoañene yeriquiro, quehnoariquiro ijire”, ni tãhotuahye. Sa yero Herodere cariboro yeahye Ñu pehe tiquirore yahuro. Sa cariboepegãta tiquiro bucueye mehna tãhomahye Ñure. ²¹ Tiquiro sa bucueye mehna tãhoepegãta Herodia tiquirore ticoro wejẽ dutiati deco umũ sahye. Ti pje Herode masa bajuari deco ijigũ tiquiro bose deco dahreahye. Sa ye tiquiro yequina gobierno cjẽna, surara puhtoã, Galilea cjẽna puhtoã gãhũ tiquiro ya bose decore ihñañe wihiahye. ²² Sa yero Herodia macono bose decore ihñano wihiro tiquina ihñonopũ basa ihñogũ ihñañe, Herode tiquiro pijioriquina gãhũ bucueahye. Tiquina sa bucuegũ ihñano ohõ saha niahye Herode:

—Mũhũ cahmeñene siniña yahũre. Sa yegũ ohogutja mãhũre mãhũ cahmeñene. ²³ Cohãcjũ mehna poto niaja mãhũre. Mũhũ sinino puno yeere deco mehna

ohogutja mãhũre, niahye tiquiro ticorore.

²⁴ Tiquiro sa nigũ ticoro Herodia macono pehe ticoro pacoro cahapũ waha, sinituahye:

—¿Yabere sinigotari yahũ? ni sinituahye ticoro pacorore.

—Ñu wame yeriquiro dapure siniña, niahye ticoro pacoro pehe.

²⁵ Ticoro sa nigũta Herodia macono umũñano puhtoro Herode cahapũ waha, siniahye:

—Mianogãta Ñu wame yeriquiro dapure waparo mehna ohoya yahũre, niahye ticoro.

²⁶ Ticoro sa nigũ tãhoro puhtoro Herode pehe tutuaro bujãa witi-ahye. Masa tiquina ihñonopũ “Ohogutja mãhũre”, niahye tiquiro. Sa yero bæ tiro, tiquiro “Mũhũre ohoeraja”, ni masiedahye ticorore. ²⁷ Sa yero ðuita surarare peresupũ ijieyequinare cohteriquirore Ñu dapure ðate sure ne cãhta dutiahye. ²⁸ Tiquiro sa dutigũ tãhoro surara pehe waha, tiquiro dapure ðate sure, waparo mehna ne cãhtahye. Ne cãhta nuhminore Herodia maconore ohoahye. Sa yero ticoro tiquiro dapure ñehe, ticoro pacorore oho yahũdũoahye.

²⁹ Sa ye Ñu buheyequina ijiriquina pehe tire tãhoye, topũ esa, tiquiro pagare masa copepũ ne cã, cũahye.

Jesu cinco mil masare ihyaye ohoahye

(Mt 14.13-21; Lc 9.10-17; Jn 6.1-14)

³⁰ Sa ye Jesu ohoriquina tiquiro cahapũ tojoa saye, tiquina yerire, tiquina buherire yahuahye tiquirore. ³¹ Ti pjere masa peyequina sa majareducuye, tiquinare ne ihyaro ohoerahye. Sa yero ohõ saha niahye Jesu tiquinare.

—Masa marienopũ mari sehsaro sona wahaũhna, niahye tiquinare.

³² Sa ye tiquina sehsaro yucusa mehna masa marienopu wahahye.

³³ Tiquina sa wahagū ihñañe masa peyequina tiquinare masiahye. Sa masiñe peye macari cjēna mahapu waha, Jesu tiquiro esatopu tiquina masa pehe oma cā esa muhtahye.

³⁴ Tiquina sa esagū Jesu tuha sa paha, yucsapu sañariquiro maja ducarō, tiquiro masa peyequina ijigū ihñahye. Oveja coheriquiro marieñequina yero saha ijiahye masa, tiquiro ihñagū. Sa yero Jesu tiquinare paja ihñano, peye quehnoañe buheyere buheahye.

³⁵ Ñamicahapu doce buheyequina Jesu cahapu esa, ohō saha niahye:

—Ohō masa marienopu ijire. Ñamicaha waharo nine. ³⁶ Ohō cahagā ijiye wuhuseripu, macaripu gūhure tiquina ihyatire dú dutiya masare tiquina pohe tiatire, niahye tiquina Jesure.

³⁷ —Ihyayere ohoya tiquinare, nimahye Jesu tiquiro buheyequinare.

Tiquiro sa nigū ohō saha ni yuhtiahye:

—¿Dos cientos niñeru cjoeri mehna tiquina ihyati pāre dúnatari usā? niahye tiquina Jesure.

³⁸ —¿Nohope paca pā ijiajari? Ihñana wahaya, niahye tiquiro.

Tiquiro sa nigū tiquina pehe ihyayere bocaye, ohō saha niahye:

—Ihcā omope paca pā paca, puaro wahi ijire, niahye tiquina pehe.

³⁹ Tiquina sa nigū tuhoro Jesu pehe pe cururi taa bui duji dutiahye masare. ⁴⁰ Tiquiro sa duji dutiri bato tiquina pe cururi dujiahye. Ihquē cururire cincuenta masa ijiahye. Apeye cururi pehere cien masa ijiahye.

⁴¹ Tiquina sa duji tuhasagū ihñano Jesu pehe ihcā omope paca pā pacare, puaro wahi mehna ne, ummuserpu ihña muoahye. Sa ihña muono Cohācjüre “Quehnoare”,

nino niahye. Tiquiro sa nidi bato pā pacare nuha, tiquiro buheyequinare masare iti duti ohoahye. Sa yero puaro wahire iti dutiahye ijipihtiyequinare.

⁴² Sa ye ijipihtiyequina ihya, yapi yuhdua wahahye. ⁴³ Tiquina ihya duharire doce puhuse waro pāre, wahi gūhure ne cahmecoahapō dapoahye tiquina. ⁴⁴ Sa ye pāre ihyariquina umma dihitare tiquina queogū cinco mil umma ijiahye.

Jesu aco bui tiniahye

(Mt 14.22-27; Jn 6.16-21)

⁴⁵ Ti pjeta Jesu tiquiro buheyequinare yucsapu sajā duti, ape sie pahrēpu Betsaidapu tiquiro pano pehāyu dutiahye. Sa yero tiquina pehāri watoa Jesu pehe masare cohe tiahye. ⁴⁶ Cohe ti tuhasa canapu Cohācjüre sinino wahahye.

⁴⁷ Came ñamipu yucusa mehna ditarapu tiquina pehāducugū Jesu ihcāquirotā tiquina pehā tariropu ijiahye. ⁴⁸ Sa yero tiquina ñano yuhdu wajagū, tiquina pano wihnono wēgū ihñadoqueoahye tiquiro.

Sa yero bohrea maja tato pano tiquina cahapu esaro, aco bui tini cāa wahahye. Tiquinare tiquiro yuhdu cā duamahye. ⁴⁹ Tiquiro yuhdu cā duepegāta tiquirore aco bui ahtagū ihñañe, cue niahye. “Yariariquiro ijiboaga”, ni ihñamahye tiquina. Sa ni tuhutuye tiquina sañuducuahye.

⁵⁰ Ijipihtiyequina tiquirore ihñañe, ihña maria wahahye. Tiquina sa ihña mariagū ihñano Jesu tiquinare yahuahye:

—Wacū tutuaya masa. Ne, yuhare cueracāhña. Yuhuta ijiaja, niahye tiquinare.

⁵¹ Sa ni tuhasa tiquiro tiquina mehna yucsapu sajāhye. Tiquiro sajāri batogāta wihnono yuhdua wahahye. Sa wahagū tiquina pehe acna yuhdua wahahye. ⁵² Tiquiro pāre peye yerire wacūedahye

tiquina. Tire quehnoano masiedahye.

Jesu Genesare cĵēnare, dohatiye-quinare yuħduoahye

(Mt 14.34-36)

⁵³ Sa ye tiquina pehã sa, Gene-sare dihtarũ pehã sa, tiare duhte poho, duhtũ cahapũ pahsahye. ⁵⁴ Sa ye yucũsarũ ijiriquina tiquina majagũta masa pehe Jesure ihña masiahye. ⁵⁵ Sa ihña masiñe ijipihtiro tiquina ya yehpapũ oma maja, dohatiyequinare tiquina cuñañe cahseri mehna yo cãhtahye. “Jesu topũ ijiri”, masa nigũ tãhoye topũre esahye tiquina. ⁵⁶ Sa ye ijipihtiye macari tiquiro esaye macaripũ, bujũye macaripũ, daye macarigãpũ, meheñe wãhũsegã ijiye cahapũ gãhũre masa dohatiyequinare Jesu cahapũ nea cũahye. Sa topũ maharipũ tiquina cũnopũ Jesure tiquiro suhtiro duhtũ cahare ñehe tuhu duaye, tutuaro siniahye tiquina:

—Mũhũ suhtiro duhtũ caha dihitare usãre ñehe tuhu dutiya, ni siniahye.

Sa ye tiquiro suhtirore ñehe tuhuriquinape quehnoa wahahye tiquina.

7

Masa ñañequina wahagũ yeyere yahuahye Jesu

(Mt 15.1-20)

¹ Sa ye Jerusalẽpũ ahtariquina usã acaye judio masare buheye-quina, fariseo masa gãhũ Jesu cahapũ cahmecoahye. ²⁻⁴ Fariseo masa ijipihtiyequina apequina judio masa mehna panopũ cĵēna tiquina dutiriro saha tiquina omocarine omo coserape ihyera tiahye. Sa ye doeri cĵē duayequina cahapũ esayequina tiquina ye wãhũsepũ wihiye tiquina dutiriro saha tiquina omocarine omo coserape ihyera tiahye. Sa ye peye apeye dutiyere panopũ cĵēna

judio masa tiquina dutiyere yee tiahye. Sihniñe parire coseye, dihi suturire coseye, come suturire coseye, yee tiahye tiquina judio masa, “Cohãcĵũ sa cahmene”, niñe. Sa ye Jesu cahapũ cahmecoañe Jesu buheyequina judio masa tiquina dutiriro saha tiquina omo coseragũ ihñahye fariseo masa. ⁵ Sa ihña tuhasaye Jesure sinituahye:

—Mũhũ buheyequina ihyaye mari ñecũsumũna mũna tiquina dutiriro sahata tiquina omocarine omo coserare. ¿Dũhse yeye mari dutiyere yerajari? niahye tiquina Jesure.

⁶ Tiquina sa nigũ tãhoro Jesu yahuahye tiquinare.

—Masa tiquina ihñono dihita quehnoano iji mehona ijire mũsa. Cohãcĵũ yere yahu mãhtariquiro mũnãno Isaia mũsare panopũre potota yahue tiahye. Ohõ saha niahye:

Ahriquina masa yũhũre quehnoano yahuducuepeta yũhũre ne ño peerare. ⁷ Sa ye yũhũre tiquina ñũ buheye dũhseati ijierare. “Cohãcĵũ ye dutiye ijire ahri”, ni meho buhere tiquina buheye, ni ojoahye Isaia.

⁸ Ti ijirota ijire. Panopũ cĵēna ye dutiye pehere yena tana Cohãcĵũ ye dutiyere yerare mũsa. ⁹ Cohãcĵũ ye dutiyere cohãna, mũsa acaye ye dutiye pehere yere mũsa. ¹⁰ Ohõ saha yena Cohãcĵũ ye pehere yũhũduũcãna nine mũsa. Panopũre ohõ saha niahye Cohãcĵũ tiquiro dutiyere Moiserere cũno: “Mũsa pacũsumũare ño peoya. Ihcãquiro tiquiro pacũsumũare ñano quiti dahreriquiro ijiro ti buhiri tiquina wejẽatiquiro ijirota”, niahye Cohãcĵũ Moiserere tiquiro cũri dutiye. ¹¹ Tiquiro sa niepegãta ohõ saha ye dutire mũsa tiquina pacũsumũare yedoho dutierana: Tiquina pacũsumũare tiquina ohoborire Cohãcĵũ pehere oho

ditire m̄sa. Sa ni buhemene m̄sa. ¹² Sa buhena tiquina pac̄s̄m̄are ño peogū yerare m̄sa tiquinare. ¹³ Sa yena Cohācjū dutiyere ȳhd̄d̄c̄ana nine m̄sa mari acaye panop̄ cjēna ye dutiye pehere yena. Apequinare m̄sa ye buheye dihitare t̄ho dutire m̄sa. Peye sa ijiyere yere m̄sa, niahye Jesu tiquinare.

¹⁴ Sa ni tuhasaro apequinare pijioahye. Ohō saha niahye:

—M̄sa ijipih̄tina t̄hoya ȳh̄re. Ȳh̄ niñene quehnoano masiña m̄sa. ¹⁵ M̄sa d̄serire sajāñe pehe m̄sa ihyaye pehe m̄sare ñana ijigū yerare. M̄sa ñañe yahuducuye pehe m̄sa d̄seri wijiaye pehe m̄sare ñana ijigū yere. [¹⁶ Ȳh̄re quehnoano t̄hoya,] niahye Jesu.

¹⁷ Sa ni tuhasa Jesu masa cahap̄ ijiriquiro waha, w̄h̄p̄ sajāa wahahye. Sa sajā sagū ihñañe tiquiro buheyequina pehe tiquiro buherire sinituahye. Tiquina sa sinitugū t̄horo ohō saha niahye tiquiro:

¹⁸ —¿Ne t̄ho ñehedajari m̄sa? M̄sa d̄serire sajāñe pehe m̄sa ihyaye pehe m̄sare ñana ijigū yerare. ¹⁹ Ti m̄sa t̄hotuyep̄re sajāedare. M̄sa paap̄ sajā ȳhd̄a wahare, niahye Jesu.

Sa nino “Ijipih̄tiye ihyaye quehnoañe ijire”, nino niahye. ²⁰ Ohō saha ni nemoahye:

—M̄sa ñañe yahuducuye pehe m̄sa d̄seri wijiaye pehe m̄sare ñana ijigū yere. ²¹⁻²² Ñano t̄hotuye, w̄ana tiye, numia mehna ñano yeducuye, am̄a mehna ñano yeducuye, masare wejēñe, yaqueye, apequiro yere tutuaro cahme ȳhd̄aye, ñano yeye, ni mehoñe, peye ñañene yeducuye, apequiro yere coo ihña tuhtiye, ñano quiti dahreye, “Apequinare ȳhd̄d̄caja”, ni t̄hotuye, t̄ho masieñequina ijiye, ti ijipih̄tiye

m̄sare m̄sa t̄hotuyep̄ ahtare. ²³ Ijipih̄tiye ahri ñañe m̄sa t̄hotuyep̄ ahta, m̄sare ñana ijigū yere, niahye Jesu.

Judio masono ijericoro Jesure wacū tutuahye

(Mt 15.21-28)

²⁴ Sa yero Tiro wame tiri maca cahap̄ esaro, to cjā w̄h̄p̄ sajāa wahahye. Sa yero apequinare tiquiro ijiri w̄h̄re yahu dutierahye. Sa yahu dutieraperota tiquinare tiquiro duhti masiedahye. ²⁵ Ti pjereta numino ticoro macono wat̄no c̄oricoro tiquiro cahap̄ ijiahye. Sa ye Jesu yerire ihñañe apequina ticoro pacorore yahuahye. Tiquina sa yahuri bato ticoro pacoro pehe waha, Jesu dahpoc̄ari cahap̄ d̄sepe curi mehna quehe sahye tiquirore ño peoro. ²⁶ Ticoro Siria yehpap̄ ijiri yehpa Fenicia wame tiri yehpa cjōno ijiahye.

—Wat̄nore cohārīña ȳh̄ macore, ni siniahye ticoro Jesure.

²⁷ Ticoro sa sinigū t̄horo ohō saha niahye Jesu:

—Wahmanore w̄h̄ up̄ro pohne ye ihyayere diayeare ȳh̄ oho m̄htagū to wahaerare. (Israe masa yere ape yehpa cjēnare ȳh̄ oho m̄htagū to wahaerare,) niahye Jesu ticorore queoye mehna yahuro.

²⁸ —Sa tjire p̄hto. Sa ijiepegūta diayea ḡh̄ mesa doca tiquina pohne ihya site dijioyere ihya cohtere tiquina ḡh̄. (Ape yehpa cjō ȳh̄ ijiepegūta ȳh̄ ḡh̄re yedoho masine m̄h̄,) ni ȳhtiahye ticoro.

²⁹ —M̄h̄ sa ni ȳhtigū m̄h̄ macore wat̄no duhu tuhasari. Ihñago wahaya, niahye Jesu ticorore.

³⁰ Tiquiro sa nigū t̄horo waha, ticoro w̄h̄p̄ esaro, ticoro maconore wat̄no marienicorop̄re cuñanop̄ ijiricorore ihñahye.

Cahmono tũhoeriquirore, yahuducu masieniquirore yũhdũoahye Jesu

³¹ Ti pjere Jesu Tiro wame tiri maca cahapũ ijiriquiro waha, Sidõ wame tiri macare esa yũhdũ cã, Decapoli wame tiri macare esa yũhdũ cã, Galilea wame tiri ditarapũ esahye. ³² Sa ye cahmono tũhoeriquirore, yahuducu masieniquirore Jesu cahapũ ne cãtahye apequina.

—Mũhũ omoca mehna ña peoya tiquirore, ni siniahye tiquina tiquirore.

³³ Tiquina sa nigãta Jesu pehe tũhoeriquirore ne cã, masa marienopũ siho esahye. Tiquina sehsharo ijiahye. Sa yero Jesu tiquiro omo piri mehna tũhoeriquirore cahmo coperire ohbe sõahye. Sa ye tuhasa, sihco puti, tiquiro ñehmenore ña peohye.

³⁴ Sa ye tuhasa aũmũsepũ ihña mũo, jeri ne, ohõ saha niahye:

—Efata, niahye Jesu. “Efata”, nino “Põohña”, nino nine. Sa nino tiquirore tũho dutiro niahye. Sa yero yahuducu dutiro niahye.

³⁵ Tiquiro sa nigãta tiquiro pehe tũho boca, tiquiro ñehmeno cahbiro wahagũ tũhoturo quehnoano yahuducuahye. ³⁶ Sa yero Jesu tiquinare tire apequinare yahu site dutierahye. Tiquiro sa yahu site dutierape taharita tja tiquina apequinare yahu site nemoahye. ³⁷ Sa ye masa tũho maria wahaye, ohõ saha niahye:

—Ijipihtiyere tiquiro quehnoano yere. Tũhoeyequinare quehnoano tũhogũ yere. Yahuducu masieñequina gũhare quehnoano yahuducugũ yere Jesu, niahye masa.

8

Cuatro mil masare ihyayere ohoahye Jesu (Mt 15.32-39)

¹ Ti pjere pari turi masa peye-
equina cahmecoari bato ihyaye marieñequina tiquina ijigũ ihñaano Jesu tiquiro buheyequinare pijioahye:

² —Ahriquina masa ihtia deco waro yũhũ mehna iji tuhasari. Sa ye tiquinare pohe mariedare. Tiquina pohe mariedagũ ihñagũ tiquinare paja ihñaja yũhũ.

³ Apequina tiquina mehna cjẽna yoaropũ ahtari. “Tiquinapũ aũmũ ahbayequina mahapũ borari”, nigũ tiquinare ihyaye marieno tiquina ye wũhũsepũ waha duti dueraja. Sa yegũ tiquinare pohe oho duaja, niahye Jesu tiquiro buheyequinare.

⁴ —¿Dũhse ye mari ohõre masa marienopũre pãre boca ohobogari mari? niahye Jesu buheyequina tiquirore.

⁵ —¿Nohope paca pã pacare cũoajari mũsa? ni sinituahye Jesu.

—Siete pã paca ijire, niahye tiquina.

⁶ Sa yero tiquiro masare yehpapũ duji duti, siete pã pacare ne, Cohãcjũre “Quehnoare”, niahye. Sa ni tuhasa, ti pacare nuha, tiquiro buheyequinare oho, masare iti dutiahye. Tiquiro sa dutiri bato tiquiro buheyequina pehe pãre masare itiahye. ⁷ Sa ye wahi gũhare meheñequinagã cũoahye tiquina. Sa yero tiquinare Cohãcjũre “Quehnoare”, ni, wahi gũhare iti dutiahye. ⁸ Tiquina iti tuhasagũ tiquina ihyaye, yapi yũhdũa wahahye. Tiquina ihya dũharire siete pũhũse waro ne cahmecoahye wapo dapohye tiquina. Tiquina cuatro mil masa ijiahye.

⁹⁻¹⁰ Sa ye tuhasa Jesu masare cohe tiahye. Cohe ti tuhasa tiquiro buheyequina mehna yucũsapũ sajãhye. Sajã tuhasa Dalmanuta wame tiri maca cahapũ wahahye.

Fariseo masa Jesure Cohãcjũ tutuaye mehna ye ihño dutiahye
(Mt 16.1-4; Lc 12.54-56)

11 Sa ye fariseo masa wihí, Jesu mehna cahme duse tutuahye. Tiquina Jesure Cohãcjũ tutuaye mehna ye ihño dutiye, tiquiro ye ihño masiedagũ ihña duamahye. 12 Tiquina sa dutigũ tuhoro Jesu tutuaro bujua witi pihopũri, jeri sajãedaro, ohõ saha niahye:

—¿Musa yojopu cjãna duhse yena musa Cohãcjũ tutuaye mehna ye ihñoñene ihña duajari? Potota nita niaja musare. Yojopu cjãnare musare Cohãcjũ tutuaye mehna ne ye ihñosi yũhũ, niahye Jesu.

13 Sa ni tuhasa waha, pari turi yucũsapu sajã, ape sie pahrẽpu pehãa wahahye.

Fariseo masa, Herode mehna cjẽna gãhũre tiquina ñañe buheyere yahuahye Jesu
(Mt 16.5-12)

14 Sa wahaye, pãre bo cũ, yucũsapu ihcãriata pãre cuoahye tiquina. 15 Sa yero Jesu cua pesaro mehna yahuahye tiquinare.

—Quehnoano yeya. Fariseo masa, Herode mehna cjẽna gãhũ tiquina ye pãre pugũ yeyere ihñana quehnoano yeya. Cuarĩne ti, ni yahuahye.

16 Tiquiro sa nigũ tuhoye tiquiro buheyequina pehe tire tiquina basi yahuducuahye.

—Mari pãre mari ne cãhtaeragũ ihñano sa niaga ahriquiro, nimahye tiquina.

17 Tiquina sa nidire masino tiquinare sinituahye Jesu:

—¿Duhse yena musa pã borire wacũajari musa? ¿Musa masiedajari? ¿Tuhøerajari? ¿Tuhø duerajari musa? 18 ¿Caperi tina ijiepenata ihñedajari musa? ¿Sa yena cahmono tina ijiepenata tuhøerajari musa? ¿Musa ahrire wacũedajari? 19 ¿Yũhũ ihcã omope paca pã pacare nuha, cinco mil masare yũhũ ohõrire

wacũedajari musa? ¿Tiquina ihya duharire nohope puhũsere pã pacare musa ne cahmecoa wahpo dapori puhũsere neari musa? niahye Jesu tiquinare.

—Doce puhũse nei, niahye tiquina tiquirore.

20 —¿Sa ye yũhũ siete pã pacare cuatro mil masare yũhũ ohõri bato nohope puhũsere pã pacare musa wahpo dapori puhũsere neari musa? niahye Jesu.

—Siete puhũse nei, niahye tiquina tiquirore.

21 —¿Sa ihñæpenata quehnoano masiedajari musa? niahye Jesu tiquinare.

Jesu caperi bajueriquirore ihñagũ yeahye

22 Sa ye Betsaidapu tiquina esagũ ihñañe, masa pehe caperi bajueriquirore ne cãhtahye.

—Tiquirore ña peoya, ni tutuaro siniahye tiquina Jesure.

23 Sa yero Jesu caperi bajueriquiro omocare ñehe, ti maca duhtũ cahapu tiquirore tuã cãhye. Topu ne sa, tiquiro caperire sihco puti, tiquiro omocari mehna tiquirore ña peohye.

—¿Mũhũ ihñagũ bajuajari? ni sinituahye Jesu.

24 Tiquiro sa nigũ tiquiro pehe ihñano ohõ saha niahye:

—Umũare ihñaja. Yũhũ sa ihñæpegũta tiquina yucũri tiniñe cju yero saha bajure, niahye caperi bajueriquiro.

25 Tiquiro sa nigũ tuhoro Jesu pehe tiquiro omocari mehna tiquiro caperire ña peohye tja. Tiquiro sa ña peori bato caperi bajueriquiro tutuaro tiquiro ihñagũ caperi quehnoano bajuahye. Sa yero ijipihtiyere quehnoano ihñahye tiquiro. 26 Sa yero Jesu tiquirore tiquiro ya wũhũpu ohoahye.

—Macapu pũritare wahaeracãhña, niahye Jesu tiquirore.

Jesu potota Cristo tiquiro ijyere Cohācjū ohoriquiro tiquiro ijyere yahuahye Pedro

(Mt 16.13-20; Lc 9.18-21)

²⁷ Sa ye Jesu tiquiro buheye-quina mehna Cesarea Filipo wame tiri maca cahapū ijiye macaripū waha nemoahye. Topū waharo Jesu sinituahye tiquiro buheye-quinare:

—¿Noa boro ijiagari yahū, masa yahūre tiquna tūhotugū? ni sinituahye tiquiro.

²⁸ Tiquiro sa sinitugū tūhoye yahūtiahye tiquna:

—“Ūu wame yeriquiro ijire”, nine. Apequina “Elia ijire”, nine. Apequina “Cohācjū yere yahu māhtariquina mehna cjāno iji-boaga”, nine, ni yahūtiahye tiquiro buheyequina tiquirore.

²⁹ Tiquiro sa nidi bato Jesu sinitu nemoahye:

—¿Masa pehe tūhotugū noa boro ijiagari yahū? ni sinituahye tja.

—Māhū Cristo Cohācjū ohorigū ijire, ni yahūtiahye Pedro.

³⁰ Tiquiro sa nigū tūhoro Jesu ohō saha niahye:

—Yahūre “Cristo ijire tiquiro”, ni yahu site niedacāhña ape-quinapūre, niahye tiquinare.

Jesu tiquiro yaria masa wijiature yahuahye

(Mt 16.21-28; Lc 9.22-27)

³¹ Sa ye tiquiro buhe dūcahye tiquinare.

—Yahū masū Cohācjū ohorigū ijijaja. Sa yegū tutuaro űano yahūdgūta. Sata waharo cahmene yahūre. Judio masa būcūna, pahia pūhūto, mari judio masare buheye-quina yahūre cahmedaye, yahūre wejēeta. Tiquina sa wejēgū ihtia deco wahaboro masa wijiagūtja, niahye Jesu tiquinare.

³² Sa nino ne tūho wisiagū yero marieno yahuro niahye tiquinare. Tiquiro sa nigū tūhoro Pedro pehe yoa cjūnogā Jesure ne

sadūca, tiquirore sa ni dutierahye. ³³ Tiquiro sa ni dutieragū tūhoro Jesu tiquiro buheyequinare majare ihña, tuhtiahye Pedore.

—Satana yero saha yahuducugū nine māhū. Sa niedacāhña. Māhū tūhotuye masa ye ijire. Cohācjū ye ijierare, niahye tiquiro Pedore.

³⁴ Sa ni tuhasa masare tiquiro buheyequina mehna tiquiro cahapū pijio ohō saha niahye:

—Ihcāquiro yaquiro iji duaro, tiquiro esa tuhoro ye duamedire duhu cānota. Sa yero yaquiro tiquiro ijiri buhiri űano yahūdūperota yahūre duhusi. Sa yero yeere yeducuriquiro ijirota.

³⁵ Masūno tiquiro esa tuhoro tiquiro cahmeno sahata yeriquiro pecapū waharota. Sa yero masūno, yeere sa yeducuro, quehnoañe buheyere sa yeducuro, ijipihtiyē decori yahū mehna űmūsepe ijiducurota. ³⁶ ¿Ihcāquiro masūno ahri yehpa cjēne ijipihtiyere cūoriquiro pecapū waharo yabere wapatajari tiquiro? Sa ijiriquiro ne wapataerare. ³⁷ Pecapū tiquiro jeripohna wahagū ne dūhse wapa ye wioro basioeraga. Masūno jeripohna ihyo waro ijierare. ³⁸ Yojoṗure, űañequina Cohācjūre cahmeeñequina tiquna esa tuhoro yeri deco ijiro nine. Ihquēquina yahūre, yahū buheye gūhūre bue tisāboaga. Tiquina sa yegū ihñagū yahū masū Cohācjū ohorigū quehnoañequina angele mehna yahū Pacū asi sitero mehna tojoa tagū yahūre bue tisāñequinare bue tisāgūtja yahū gūhū, ni yahuahye Jesu.

9

¹ Sa ni tuhasa ohō saha ni nemoahye Jesu:

—Potota niita nijaja mū sare. Ihquēquina mūsa ohōṗure ijina mūsa yariato pano Cohācjū tiquiro pūhūto ijiorṗure yahū sajāgū

yuhure ihñanata, niahye Jesu tiquinare.

Jesu tiquiro pagure comesahye
(Mt 17.1-13; Lc 9.28-36)

² Sa ye seis decori bato Jesu Pedrore, Santiagore, tiquiro bahuro Ñu gũhure uhmuanu canuru tiquina dihitare piji mujahye. Uhmuanoru esari bato tiquina ihñonoru tiquiro pagure comesaa wahahye. ³ Tiquiro suhtiro asi sitero yero saha yehsero wahahye. Ahri yehpa cjēna numia suhti coseyequina numia sa yehseye ye masiedare. ⁴ Sa ye Jesu Elia mnanano, Moise mnanano mehna tiquina yahuducugũ ihñahye tiquina ihtiaro tiquiro buheyequina. ⁵⁻⁶ Sa ye tiquina tutuaro cueahye. Sa cuero dahse ni masiedamehno ohõ saha nimahye Pedro:

—Puhto, mari ohõ ijigũ quehnoa duare. Ihtia wuhugã yematja. Mũhu ya wuhugã, Moise ya wuhugã, Elia ya wuhugã yematja, nimahye tiquiro Jesure.

⁷ Sa ye ro tiquina bui ehmeo curua cahmotahye. Sa cahmotagũta ehmeo watoaru nino ca tahye:

—Ahriquiro yũhu macu yũhu cahñiquiro ijire. Tũhoya tiquirore, nino ca tahye.

⁸ Sa nigũta Pedro gũhu ihñamahye. Jesu dihitare ihñahye. Tiquina ihñariquina pehe mariedahye. ⁹ Sa yero canuru tiquina dijia tagũ Jesu tiquinare yahuahye:

—Mianogã yuhure sa waharire apequinare yahueracãhña. Yũhu masu Cohãcjũ ohorigu yũhu yaria masa wijiari bato tire apequinare yahuya masa, ni yahuahye tiquiro.

¹⁰ Sa ye tiquiro dutiro sahata tiquina ihñarire yahuerahye apequinare. Sa ye tiquina basi ohõ saha ni sinituahye yahuducuahye:

—¿Yũhu yaria masa wijiari bato”, nino dahse nino niari

tiquiro? ni, yahuducuahye tiquina.

Sa ye Jesure ohõ saha ni sinituahye:

¹¹ —“Cristo tiquiro ahtato pano Eliare ahta mahtano cahmene”, nine mari acaye judio masare buheyequina. ¿Dahse ijero boro sa niagari tiquina? ni sinituahye tiquina tiquirore.

¹²⁻¹³ Jesu yahthiahye:

—Ijirota ijire. Eliare ahta mahta dutiri Cohãcjũ, ijipihtiyere quehno mahtatiquirore. Yũhu masu Cohãcjũ ohorigu peye tahari ñano yahdugata. Apequina yuhure cahmedaye, ñano yeeta. ¿Dahse ijero boro tire sa ni ojoari, masa tũhotugũ? Sa yegu ahrire nitja masare: Elia wihi tuhasari. Tiquiro sa wihiepegũta tiquina cahmediro saha tiquirore ñano yeahye. Sata ni ojoahye tiquirore, niahye Jesu tiquinare.

Jesu coã wahmua cãhtariquirore
yuhduoahye

(Mt 17.14-21; Lc 9.37-43)

¹⁴ Sa ye dijia ta, apequina buheyequina caharu esa, peyequina masare ihñahye. Tiquiro buheyequina pehe judio masare buheyequina mehna cahme duse tutuaye niahye. ¹⁵ Sa ye Jesu gũhu tiquina dijia tagũ ihñañe, ijipihtiyequina masa acua waha, tiquiro caharu oma cãa wahahye. Tiquiro caharu esaye,

—¿Ahtajari? niahye tiquirore.

¹⁶ —Ahtaja, ni tuhasa,

—¿Dahse ni cahme duse tutuana niari masa tiquina mehna? ni sinituahye Jesu tiquiro buheyequinare.

¹⁷ Tiquiro sa ni sinitugũ tũhoru, masa watoa ducuriquiro yahuahye tiquirore:

—Buhegu, yũhu macure watino cuoriquirore mũhure ne cãhtami. Watino pehe tiquirore yahuducu dutiare. ¹⁸ Yũhu macure tiquiro

ñehegū yehparū bora, bahque diho, buhaa wahae tiri tiqiro. Sa waharo sahpo tua wahae tiri. Sa yegū māhū buheyequinare watīnore cohā dutimi. Yūhū sa dutiepegūta tiquina cohā masiedari watīnore, ni yahuahye Jesure.

¹⁹ Tiqiro sa nigū tūhoro Jesu ohō saha niahye tiquinare:

—Ne, yūhūre wacū tutuerare mūsa. Yoari pje mūsare buhemaja yūhū. ¿Noho puno yoari pje yūhūre mūsa cariboajari? Tiquirore ne cāhtaya yūhūre, niahye Jesu.

²⁰ Tiquiro sa nigū tūhoye watīno cūoriquirore Jesu caha ne cāhtahye. Tiquina ne wihigū ihñano watīno pehe coā wahmūa cāhtariquirore yehparū doque quehe sa, tunu nanaregū yeahye. Sa yero sahpo tuua wahahye.

²¹ —¿Noho puno yoari pje watīnore cūoajari ahriquiro? ni, sinituahye Jesu pehe tiquiro pacūrore.

—Nijnogā ijiropata tiquirore cūo dūcari. ²² Sa yero watīno pehe tiquirore pecarū, acopū cohā wejēmedi. Sa yegū māhū ye masigū ūsāre paja ihñā, yedohoya, niahye tiquiro pacūro Jesure.

²³ Tiquiro sa nigū tūhoro ohō saha niahye Jesu:

—¿“Mūhū ye masiegū ijire”, ni-ajari māhū yūhūre? Yūhūre māhū wacū tutuagū ihñano, Cohācjū iji-ihitiyere ye peho masine, māhūre yedohoro, niahye Jesu.

²⁴ Tiquiro sa nigūta coā wahmūa cāhtariquiro pacūro ohō saha ni sañuducuahye:

—Mūhūre wacū tutuaja. Yūhū wacū tutueragū ihñagū yūhūre yedohoya māhūre yūhū wacū tutuato saha, niahye tiquiro.

²⁵ Sa yero masa peyequina tiquina caharū oma cāhta, tiquina cahmecoagū ihñano, Jesu watīnore ohō saha ni tuhtiahye:

—Mūhū yahuducu dutiegū, tūho dutiegū ahriquiro mehna ijirigū wahaya. Sa wahagū tiquirore pari turi cariboeracāhñā, niahye Jesu.

²⁶ Tiquiro sa nigū tūhoro watīno sañuducu, coā wahmūa cāhtariquirore yehparū doque quehe sa tunu nanaregū ye, wahahye. Tiquiro sa yegū coā wahmūa cāhtariquiro yariariquiro yero saha wahahye.

²⁷ —Tiquiro yariaa wahare, nimahye masa peyequina.

Tiquina sa niepegūta Jesu pehe tiquiro omocare ñehe, tiquirore wahcōahye. Tiquiro sa wahcōgū wahcāhye tiquiro pehe. ²⁸ Came Jesu gūhū wūhūpū tiquina sajā sagū tiquiro buheyequina tiquirore sinituahye:

—¿Dūhse yena ūsā pehe watīnore cohā masiedayari, māhū tūhotugū? ni sinituahye tiquina.

²⁹ —Ahriquiro boro watīnore cohā duana Cohācjūre tutuaro sinino cahmene mūsare, ni yūhtiahye Jesu tiquinare.

Pari turi Jesu tiquiro yaria masa wijiatiye yahuahye

(Mt 17.22-23; Lc 9.43-45)

³⁰ Sa ye topū ijiriquina waha, Galilea yehparū esa, yūhdūa wahahye. Topū tiquina waharire apequina masigū cahmedahye Jesu tiquiro yequinare buhero taro. ³¹ Topū esaro tiquiro buheyequinare buheahye. Ohō saha ni buheahye:

—Yūhū masū Cohācjū ohorigū ijijaja. Masa yūhūre ñehe, apequinapūre yūhūre ohoeta. Tiquina sa ohori bato yūhūre wejēeta. Tiquina sa wejōrigū ijipegūta ihtia deco wahaboro masa wijiagūta, niahye tiquinare.

³² Tiquiro sa nigū tūhoye tiquina quehnoano tūho ñehedahye. Sa ye cueye, tiquirore tire sinitu nemoedahye.

*Jesu buheyequina tiquina mehna
cjånore pũhto sō duaye nimahye
(Mt 18.1-5; Lc 9.46-48)*

33 Sa ye Capernaupũ tiquina esari bato wũhũpũ tiquina ijigũ Jesu pehe sinituahye tiquinare.

—¿Mahapũre ahtana, dahse ni yahuducu cãhtana niari mũsa? ni, sinituahye tiquinare.

34 Tiquiro sa sinitugũ tiquina yũhtierahye. Mahapũre ahtaye, cahme ohõ saha ni yahuducu cãhtaye niahye:

—¿Mari mehna cjånore diquiro pehere mari pũhtoro sōnatari mari? ni yahuducuye niahye mahapũre ahtaye.

35 Sa ye tiquina sa nidire bæ tiye Jesure yũhtierahye. Tiquina sa yũhtieragũ ihñano Jesu nuju sa, tiquiro buheyequinare doce buheyequinare pijio ohõ saha niahye:

—Mũsa pũhtoia iji duana ijip-
ihtieyequina masa tiquina ca-
hacjãna ijiro cahmene mũsare.
Sa yena ihyo ijina ijipihitiyequina
docapũ ijinata mũsa, niahye Jesu
tiquinare.

36 Sa nino nijinogãre tiquina wa-
toa duhu docoahye. Duhu doco
tuhasa tiquirogãre ne wũa, ohõ
saha ni yahuahye:

37—Yeere ye duana ahriquirogãre
mũsa cahmena, yũhũ gũhũre
cahmene mũsa. Sa yena yũhũre
cahmena, yũhũre ohoriquiro
mari Pacũ gũhũre cahmene mũsa,
niahye Jesu tiquinare.

*Marine ihña tuhtiriquiro ijier-
aro, mari mehna cjãno ijire
(Mt 10.42; Lc 9.49-50)*

38 Came Ñũ ohõ saha niahye
Jesure:

—Buhegũ, mũhũ wame mehna
watĩare cohãriquirore usã ihñau.
Mari mehna cjãno tiquiro ijieragũ
ihñana tire tiquirore ye dutierahiti
usã, niahye tiquina.

39 Tiquina sa nigũ tũhoro Jesu
tiquinare yahuahye:

—Sa niedacãhña mũsa tiquirore.
Ihcãquiro yũhũ wame mehna
Cohãcjũ tutuaye mehna yero,
came yũhũre ñano ni yahuducu
masiedare. ⁴⁰ Marine ihña
tuhtiriquiro ijieraro, tiquiro mari
mehna cjãno ijire. ⁴¹ Mũsare
potota nii niaja. Yeequina mũsa
ijigũ ihñañe apequina mũsare
tiquina yedohogũ ihñano Cohãcjũ
tiquinare quehnoano yerota.
Acore mũsare tiquina mehenogã
sihõgũ tiquinare quehnoano
yerota Cohãcjũ tiquina sa yeri
wapa, niahye Jesu tiquinare.

*Ñañene yegũ cuarĩne
(Mt 18.6-9; Lc 17.1-2)*

42 Sa yero Jesu yahu nemoahye:

—Ahriquirogã yero saha
ijiriquirore yũhũre wacũ tu-
tua dũcariquirore yahugũtja
mũsare. Apequiro ahriquirogã
yero saha ijiriquirore ñañene
ye dutiro tiquiro ña yũhũaro
yũhdũrota. Ihcãquirore tiquiro
wamũapũ pajiria utãre dũhte yo,
pajiri mapũ tiquirore tiquina
cohãgũ ñano wahaboaga tiquiro.
Sa ijiepegũta ahriquirogã yero
saha ijiriquirore ñañene ye du-
tiriquiro tiquiro pehe pajiri mapũ
tiquina cohãriquiro yũhdũoro ñano
yũhdũrota. ⁴³⁻⁴⁴ Mũhũ omoca
mehna ñano yegũ ti omocare
mũhũ dũte cohãborio saha ti
mũhũ ñano yeye pehere duhuya.
Tire duhueragũ pecapũ wahagũta.
Topũre ne peca yatierare. Sa ye
becoa ne yarierare. Mũhũ omocare
cohãgũ ti si dihita butiboaga.
Sa yegũ mũhũ pehe sa bajuri
turu ijiepegũta came Cohãcjũ
mehna ijigũta. Pũa omoca mehna
pecapũ wahagũ mũhũ sa wahagũ
ña yũhdũaboaga. Sa yegũ ti
mũhũ ñano yeye pehere duhuya.
⁴⁵⁻⁴⁶ Mũhũ dahpocã mehna ñano
yegũ ti dahpocã gũhũre mũhũ dũte

cohāboriro saha ti mahu ñano yeye pehere duhuya. Tire duhueragu pecapu wahaguta. Topure ne peca yatierare. Sa ye becoa ne yarierare. Mahu dahpocāre mahu cohāgū ti si dihita butiboaga. Sa yegu sa bajuri turu ijiepeguta came Cohācjū mehna ijiguta. Pua dahpocā mehna pecapu wahagu mahu sa wahagū ña yuhduaboaga. Sa yegu ti mahu ñano yeye pehere duhuya. ⁴⁷⁻⁴⁸ Mahu capea mehna ñano yegu tiare ore we mahu cohāboriro saha ti mahu ñano yeye pehere duhuya. Tire duhueragu pecapu wahaguta. Topure ne peca yatierare. Sa ye becoa ne yarierare. Tiare mahu cohāgū tia dihita butiboaga. Ihcā capea mariedapeguta came Cohācjū mehna ijiguta. Pua capea mehna pecapu wahagu mahu sa wahagū ña yuhduaboaga. Sa yegu ti mahu ñano yeye pehere duhuya.

⁴⁹ Ahri yehpapu ijina ñano yuhduanata musa. Pecapu mari ujūgū marine purīno saha ñano yuhduanata musa. ⁵⁰ Moa quehnoano ocare. Moa ocaeragū ti moare ocagū yero basioerare. Moa ocaeraro ti moa ne quehnoaedare. Ti moare dahsero basioerare. Sa ijigū ihñana ti moare cohāno cahmene. Moa quehnoano ti ocaro saha musa gūhū masa quehnoana ijiya. Sa yena apequina mehna quehnoano mehna ijiya, ni yahuahye Jesu tiquinare.

10

Tiquina namosānumiare cohāñene yahuahye Jesu
(Mt 19.1-12; Lc 16.18)

¹ Sa ye tiquiro topu ijiriquiro waha, Judea yehpa cahapu esa, Jordā wame tiri ma ape sie pahrēpu esahye. Topu tiquiro esagū ihñañe masa peyequina tiquiro cahapu cahmecoahye tja. Tiquina sa cahmecoagū ihñano to pano

tiquiro buheriro sahata pari turi buheahye tja. ² Tiquiro sa buheri watoa fariseo masa wihiahye. Jesure ñano tiquiro yahuducugū tūho duamahye tiquina. Sa tūho duaye tiquina Jesure sinituahye.

—¿Mari namosānumiare cohāgū quehnoaboagari? ¿Mari dutiye pehe sata ye dutiajari, mahu tūhotugū? ni sinituahye tiquina.

³ —¿Dahse ye dutiajari to Moise musare tiquiro cūri? ni yūhtiahye Jesu.

⁴ —“Popera pūre musa cohāñene yahuyere ojoana musa namosānumiare cohā masine”, niahye Moise, ni yūhtiahye fariseo masa pehe.

⁵ Tiquina sa nigū tūhoro ohō saha ni yahuahye Jesu:

—Cohācjū dutiyere musa ye dueragū ihñano sa ni ojoahye Moise. ⁶ Tiquiro sa ni ojoari ijiepeguta ahri yehpare bajumehnediquiro umano, numino gūhūre yeahye. ⁷ Sa yero umano tiquiro pacusumare cohā wijia, tiquiro namono mehna ijirota. ⁸ Sa ye tiquina puaro ijiepetā ihcā pagu yero saha ijire. Sa ye tiquina puaro yero saha ijierare. Ihcā pagu yero saha ijiye nine. ⁹ Cohācjū tiquiro omoca dahnte dutiriquina ijire. Sa ye tiquinare cahme duhueraro cahmene, niahye Jesu tiquinare.

¹⁰ Sa ni tuhasa tiquiro buheyequina mehna wuhapu sajāa wahahye. Wuhapu sajā sa, tiquina namosānumiare cohāñene tiquiro buheyequina sinituahye tja tiquirore. ¹¹ Tiquina sa sinitugū tiquiro yūhtiahye:

—Tiquiro namonore cohāriquiro apecorore namo tiro, apecoro mehna ñano yeriquiro ijire. Sa yero tiquiro cohāricorore ñano wahagū yero nine. ¹² Sa yero numino pehe ticoro manūnore cohāno, apequirore manū tiro,

tiquiro mehna ñano yericoro ijire, niahye Jesu tiquinare.

Macanagã ye ijiatire Cohãcjãre sini basahye Jesu

(Mt 19.13-15; Lc 18.15-17)

¹³ Sa ye macanagãre Jesure ña peo dutiye tehe tiquinagãre Jesu caharũ ne cãhtaye niahye. Tiquina sa yegũ ihñañe tiquiro buheyequina pehe tiquinagãre ne cãhtayequinare tuhtiahye.

¹⁴ Tiquina sa tuhtigũ ihñano Jesu usuaro, ohõ saha niahye tiquinare:

—Macanagã yuhũ caharũ ahtaahro. “Waharĩsa”, niedacãhña tiquinagãre. Tiquinagã Cohãcjãre tiquina pũthoro tũhoture. Sa ye Cohãcjũ tiquiro pũthoro ijirorpãre ahriquinagã yero saha tũhotuyequina ijire topãre.

¹⁵ Ijirota niita niaja mũsare. Ahriquinagã Cohãcjãre tiquina cahmeno saha mũsa pehe cahmedana, tiquiro caharũ wahaasi mũsa. Mũsa wahaeragũ mũsa pũthoro ijisi tiquiro, niahye Jesu.

¹⁶ Sa ni tuhasa Jesu macanagãre ne wña, tiquinagãre ña peoro ohõ saha niahye:

—Ahriquinagã quehnoañequina wahaahro, ni sini basahye Cohãcjãre.

Doeri cjẽ upũro Jesure sinituahye
(Mt 19.16-30; Lc 18.18-30)

¹⁷ Sa ye Jesu maharũ tiquiro waducugũ apequiro pehe oma cã, tiquiro dahpocãri caharũ dũsepe curi mehna quehe sahye tiquirore ño peoro.

—¿Ne, quehnoagu buhegu, yuhũ ijipihtiyehi decori Cohãcjũ mehna iji duagu dũhse yegũtari yuhũ? niahye tiquiro Jesure.

¹⁸ Tiquiro sa nigũ Jesu yahtiahye:

—¿Dũhse ijiro boro yũhũre “Quehnoagu”, ni pisuajari mũhũ? Cohãcjũ dihita quehnoariquiro ijire. ¹⁹ Ahri Cohãcjũ dutiyehi masine mũhũ: Masare wejẽdacãhña. Wñana tieracãhña. Yaqueracãhña.

Ni mehoedacãhña. Apequina yere ni meho nedacãhña. Mũsa pacũstũhãre ño peoya. Ahri dutiyehi yero cahmene masare, ni yahuahye Jesu tiquirore.

²⁰ —Buhegu, tire ijipihtiyehi coã wahmũa cãhtagũ ijigũpũta yũhdũdũcaera tii yuhũ, niahye tiquiro Jesure.

²¹ Tiquiro sa nigũ tũhoro Jesu pehe tiquirore ihñadoque ohõ, cahĩahye. Sa yero ohõ saha niahye:

—Mehenogã dũhsare mũhũre mũhũ ye pehoato. Ijipihtiyehi mũhũ yere duagu wahaya. Sa yegu ijipihtiyehi mũhũ wapatarĩ niñerure pejecũoyequinare ohoya. Mũhũ sa yegũ pãjiro mũhũ ye uhmũsepu, Cohãcjũ caharũ ijirota. Mũhũ sa yeri bato yuhũ mehna cjũ ijiajũ ahtaya, niahye Jesu tiquirore.

²² Tiquiro sa nigũ tũhoro tiquiro pehe peye doeri cjẽ cãoriquiro ijiro tire pejecũoyequinare oho dueraro, bujũa witi, coaera, wahaahya.

²³ Tiquiro sa bujũa witi gũ ihñano Jesu majaredũca sa, tiquiro buheyequinare ihñadoque ohõ, ohõ saha niahye:

—Doeri cjẽ cãoyequina Cohãcjũ pũthoro ijirorpãre tiquinare waharo basioera cjũre, niahye tiquinare.

²⁴ Tiquiro sa nigũ tũhoyehi tiquina pehe tiquirore tũho maria wahaahye. Sa ni tuhasa Jesu pari turi yahuahye tiquinare:

—Yuhũ acaye, ijipihtiyehi doeri cjẽ opana Cohãcjũre wacũno marieno Cohãcjũ pũthoro ijirorpãre tiquinare waharo basioerare.

²⁵ Camello pehe awia coperpũ tiquiro sajiã duagũ basioerare. Tiquiro sa ijiro yũhdũoro doeri cjẽ cãoriquirore Cohãcjũre wacũno marieno Cohãcjũ pũthoro tiquiro ijirorpãre tiquirore waharo basioerare, ni yahuahye tiquinare.

²⁶ Tiquiro sa nigū tūhoye to pano tiquina tūho mariariro yūhdūoro tūho maria waha, tiquina basi ohō saha niahye:

—Yohou, tiquiro nino sahata potota ijigū ne ihcāquiro masūnore yūhdūoeraboaga Cohācjū, niahye tiquina basi.

²⁷ Tiquina sa nigū tūhoro Jesu tiquinare ihñadoque ohō, ohō saha niahye:

—Masa tiquina esa tuhoro quehnoano yeri mehna Cohācjū cahapū waha masiedare. Cohācjū pehe masare pecapū waha-boriquinare yūhdūo masine. Tiquiro ijipihtiyere quehnoano ye masi peho cāhre, niahye Jesu tiquinare.

²⁸ Tiquiro sa nigū Pedro tiquirore ohō saha niahye:

—Tūhorīña. Ūsā pehe ijipihtiyere ūsā yere cū cāhū mūhū mehna waha tana, niahye tiquiro Jesure.

²⁹ Tiquiro sa nigūta Jesu ohō saha niahye:

—Ijirota niita niaja mūsare. Quehnoañe buheyere, yeere yena tana yūhūre ño peona tana mūsa wūhūserere, mūsa bahanare, mūsa pacosūmūare, mūsa pohinare, mūsa weserire cūrina ijina, pajiro wapatanata mūsa yojopūre.

³⁰ Sa yena mūsa wūhūserere, mūsa bahanare, mūsa pacosānumiare, mūsa pohinare, weserire, to pano mūsa cūroro yūhdūoro yojopūre peye cūonata mūsa. Sa ye apequina mūsare ñano yeeta. Sa yena camerūre ape tjurorū ijipihtiyere decori Cohācjū mehna ijinata.

³¹ Yojopūre peyequina pūhtoā ijiriquina ti pjerūre ihyo ijieyehina tojoaeta. Sa ye yojopūre peyequina ihyo ijieyehina ijiriquina ti pjerūre pūhtoā comesaeta tja, ni yahuahye Jesu tiquinare.

Pari turi Jesu tiquiro yaria masa wijiatiye yahuahye

(Mt 20.17-19; Lc 18.31-34)

³² Sa ye tiquina mahapū maja, Jerusalēpū mūjañe niahye. Jesu tiquina panogā ūhmū tāhye. Sa tiquiro ūhmū tāgū ihñañe tiquiro buheyehina ihñā maria wahahe. Sa ye tiquina bato nūnū tāriquina pehe cuero mehna nūnū tāhye. Sa yero Jesu tiquiro buheyehinare tiquina sehsaro neahye tja. Sa yero masa tiquirore dūhse yeatiye Jesu yahu dūcahye tiquinare.

³³ —Tūhoya yūhūre. Yojopūre Jerusalēpū wahana niaja mari. Topū masa yūhū masūre Cohācjū ohorigūre ñehe, apequinapūre yūhūre ohoeta. Pahia pūhtoare, mari acaye judio masare buheyehina gūhūre yūhūre ohoeta. Sa ye yūhūre wejē dutieta tiquina. Sa wejē dutiye judio masa ijieyehina pehere yūhūre ohoeta.

³⁴ Tiquina sa ohori bato tiquina pehe yūhūre būjape, sihco puti ohō, tana, wejēeta. Sa yegū yūhū yariari bato ihtia deco wahaboro masa wijiagatja, ni yahuahye Jesu tiquinare.

Santiago, Ūnu mehna Jesure sini-

ahye

(Mt 20.20-28)

³⁵ Sa ye Santiago, Ūnu mehna Jesu cahapū esaye, siniyahye tiquirore. Tiquina Zebedeo pohne ijiahye. Sa ye ohō saha ni siniyahye:

—Buhegū, ūsā sinino saha ūsāre yeya mūhū, niahye tiquina Jesure.

³⁶ —¿Dūhse yūhū yegū cahmeajari mūsa? niahye Jesu tiquinare.

³⁷ —Ijipihtiyehina pūhtoro ijigū ūsāre mūhū mehna duji dutiya. Ihcāquiro mūhū poto pehe, apequiro mūhū cū pehe pehe duji dutiya ūsāre, mūhū mehna pūhtoā ūsā ijiato saha, niahye tiquina Jesure.

³⁸ Tiquina sa nigū tūhoro ohō saha ni yahuahye Jesu tiquinare:

—Musa ñano yuhduatore masiedapenata sa sinine yuhure. ¿Yojoপুরে য়হু ñano yuhduato saha musa gūhū ñano yuhduna ihcāno sahaboagari? ni sinituahye tiquinare.

³⁹ Tiquiro sa sinitugū tūhoye tiquina yūhtiahye:

—Ihcāno sahanata, ni yūhtiahye tiquina.

Tiquina sa nigū Jesu ohō saha ni yahuahye:

—Yūhū ñano yuhduato saha ñano yuhdunata musa gūhū. ⁴⁰ Musa sa yuhdunanaja musa ijepegūta, yūhū mehna dutiatiquinare, yūhū mehna dujiatiquinare bese masiedaja yūhū. Ahrire yūhū Pacu pehe quehno tuhasari. Sa ye tiquiro beseatiquina dihita yūhū poto pehe yūhū cū pehe pehe dujieta, niahye Jesu tiquinare.

⁴¹ Sa ye apequina pua omopequina buheyequina Santiago, Ņu ahriquina puaro mehna usuahye tiquina sa sinidire tūhoye. ⁴² Tiquina sa usuagū ihñano Jesu tiquiro buheyequinare pijio ohō saha niahye:

—Cohācjāre masieñequina puhto pehe tiquina masare dutiye, usuaro mehna dutire. ⁴³ Musa pehe ne sa yesi musa basi. Musa mehna cjāno puhtoro iji duaro, ijipihtiequina tiquiro mehna cjēna cahacjāno ijiro cahmene tiquirore. ⁴⁴ Sa yero ijipihtiequinare dutiriquiro iji duaro, apequina cahacjāno ijiro cahmene tiquirore. ⁴⁵ Sata ijigū ijiaja yūhū gūhū. Yūhū masu Cohācjū ohorigū ijepegūta ahri yehpau masare yedohogu ahtau. Sa yegu peyequina masa ye buhirire yariagu ahtagu nii. Sa yegu peyequina masare pecapu wahaboriquinare yuhduogu ahtagu nii. Masare dutipegu ahtagu niedu, niahye Jesu tiquinare.

Bartimeore, caperi bajueriquirore ihñagū yeahye Jesu

(Mt 20.29-34; Lc 18.35-43)

⁴⁶ Sa ye tiquina Jericōpu esahye. Sa yero Jesu tiquiro buheyequina, masa peyequina mehna ti macapu ijiyequina tiquina wahagū Bartimeo pehe maha dūhtu cahapu dujiahye. Tiquiro Timeo macano caperi bajueriquiro ijiro, decoripe masare niñerure siniducuriquiro ijiyahye. ⁴⁷ Sa yero topu Jesu Nazare cjāno tiquiro cahapu ahtagū tūhoro Bartimeo ohō saha ni sañuducuahye:

—Jesu, Davi mūnana panami iji turiagu, masare yuhduoacju, paja ihñāña yūhure, ni sañuducuahye Jesure.

⁴⁸ Tiquiro sa nigū tūhoye masa peyequina Bartimeore “Dihta mariahña”, ni tuhtiahye tiquina tiquirore. Tiquina sa tuhtigū tūhoro Bartimeo to pano tiquiro sañuducuro yuhduo cjūno sañuducu nemoahye tja:

—Jesu, Davi mūnana panami iji turiagu, masare yuhduoacju, paja ihñāña yūhure, ni sañuducuahye tiquiro.

⁴⁹ Tiquiro sa ni sañuducugū tūhoro Jesu pehe esaduca, “Pijiohya tiquirore”, niahye. Tiquiro sa nigū tiquina pehe caperi bajueriquirore piji cāhye:

—Bucueya. Wahcāducaya. Tiquiro mūhare pijiore, niahye tiquina Bartimeore.

⁵⁰ Tiquina sa nigū tūhoro tiquiro bui cjā suhtirore tu we cū, uhpu yuhdu cā, Jesu cahapu esaducahye. ⁵¹ Sa yero Jesu sinituahye tiquirore.

—¿Dūhse yūhū yegū cahmeajari mūhu? niahye Jesu tiquirore.

—Yūhū puhto, yūhure ihñagū yeya, niahye caperi bajueriquiro.

⁵²—Wahaya. Mūhu yūhure wacū tutuagu quehnoa wahare, niahye Jesu tiquirore.

Tiquiro sa nigāta caperi baueriquiro ihñaa wahahye. Sa quehnoa waharo Jesu mehna mahapꝫ wahaa wahahye.

11

Jerusalēꝫ esahye Jesu

(Mt 21.1-11; Lc 19.28-40; Jn 12.12-19)

¹ Sa ye Jerusalēꝫ tiquina esato panogā Betfagé wame tiri maca cahapꝫ, Betania wame tiri maca cahapꝫ ijidꝫ, Olivo wame tidꝫ cꝫꝫꝫ esa mahtahye. Topꝫ esaro ꝫꝫꝫꝫ tiquiro buheyequina mehna cjēnare Jesu ohoro ohō saha niahye:

² —Si macapꝫ wahaya. Topꝫ esana duita burrogāre tiquina dꝫhte docoriquirogāre bocanata. Apequina pesamehnediquirogā ijiaga. Tiquirogāre bocana, yuta dare pā, ne cāhta basaya yahare. ³ Mꝫsa sa yegū ihñano burrogā upꝫꝫ “¿Dꝫhsena burrogāre pājari?” tiquiro nigū tuhona, ohō saha ni yahtiya tiquirore: “Mari ꝫꝫꝫꝫ burrogāre cahmedoqueo nidi. Sa yero mianogāta wiarota tiquiro”, ni yahuya tiquirore, ni yahu duti ohoahye tiquiro buheyequinare ꝫꝫꝫꝫ.

⁴ Tiquiro sa nigū waha, wꝫꝫ cahapꝫ ijiri mahapꝫ sopecaha cahapꝫ burrogāre tiquina dꝫhte docoriquirogāre bocahye. ⁵ Sa ye tiquirogāre yuta dare tiquina pāgū ihñāñe topꝫ ducuyequina sinituahye tiquinare:

—¿Dꝫhse yena tana mꝫsa yuta dare pājari burrogāre? ni sinituahye tiquina.

⁶ Tiquina sa nigū tuhoye, tiquina pehe Jesu tiquiro nidiro sahata yahuahye topꝫ ducuyequinare. Tiquina sa yahugū tuhoye topꝫ ducuyequina pehe “Neahña”, niahye tiquinare. ⁷ Sa ye tiquina burrogāre Jesu cahapꝫ ne sahye. Tiquina ne sari bato tiquirogā bui

tiquina suhtire duhu peo tuhasagū ihñano, Jesu pehe tiquirogā bui mꝫja pjeahye, waharo taro. ⁸ Sa ye masa peyequina tiquina bui sañāñe suhtire tu we ne, mahapꝫ seō cū mahtahye, Jesure ño peoye. Apequina pehe pūri tiye dꝫꝫꝫꝫ weseripꝫ tiquina ne cāhtari dꝫꝫꝫꝫ mahapꝫ cūahye.

⁹ Sa ye tiquiro pano wahayequina, tiquiro bato ahtayequina mehna ohō saha ni sañuducuahye:

—Ahriquirore ño peouhna. Ahriquiro Cohācjū tiquiro ohoriquiro quehnoano ijiagro. ¹⁰ Mari ñecꝫ iji turariquiro Davi mꝫnꝫno ꝫꝫꝫꝫ tiquiro ijiriro saha ahtariquiro quehnoano ijiagro. Ũhmꝫse cjānore “Tutuagꝫ ijire”, ni ño peouhna, ni sañuducuahye tiquina.

¹¹ Sa yero Jesu Jerusalēꝫ esaro Cohācjū ya wꝫꝫꝫꝫ sajā saro, ti wꝫꝫꝫꝫ ijiyere ijipihtiyere ihñā peho cāhye. Ihñā tuhasa “Ñamicahapꝫ ijire. Deco cjūnota wahauhna”, nino, Jesu tiquiro buheyequina doce buheyequina mehna Betaniapꝫ wahahye.

Jesu higeragꝫre yaria dutiahye
(Mt 21.18-19)

¹² Sa ye ape deco tiquina Betaniapꝫ ijiriquina wahaa wahahye. Sa yero Jesu pehe ꝫꝫꝫ ahaa waha, yoaropꝫ higuera wame tidꝫre quehnoano pūri tidꝫre ihñano tꝫ dꝫꝫꝫ macano wahamahye. ¹³ Dꝫca mariedahye. Dꝫca tiri pje ijieraro pūri dihita ijiyahye. ¹⁴ Sa yero dꝫca mariedagū ihñano ohō saha niahye:

—Ahꝫꝫ dꝫꝫꝫ masa ne pari turi ihyeracāhdo. Ne dꝫca tieracāhdo, niahye Jesu.

Tiquiro sa nigū tiquiro buheyequina pehe tuhohye.

Jesu Cohācjū wuhare Cohācjū mehna yahuducuri wuhu ye duti-ahye

(Mt 21.12-17; Lc 19.45-48; Jn 2.13-22)

¹⁵ Tiquiro sa yeri bato tiquina Jerusalēpu esahye. Topu esaro, Jesu Cohācjū ya wuhupu sa jā saro apee boro duayequinare, dúyequina gāhare cohā wioahye. Sa yero niñeru comesaye mesarire yo wahcō, ne majare cū majahye. Bujuaare duayequina tiquina dujiye pahtari gāhare sata yeahye. ¹⁶ Sa yero apee borore ne sa jā dutierahye masare. ¹⁷ Sa yero Jesu ohō saha ni buheahye tiquinare:

—Ohō saha nine Cohācjū yere tiquina ojoari pū: “Ya wuhu Cohācjū mehna yahuducuri wuhu wame tirota. Sa yero ijipihtiro cjēna ya wuhu ijirota”, ni ojoahye Cohācjū yere tiquina ojoari pū. Ti pū sa niepegūta masa pehe ahri wuhupu duana, masa basi cahme yaquere masa, ni buheahye tiquinare.

¹⁸ Tiquiro sa ni buhegū ijipihtiyequina masa pehe tūho maria wahahye. Sa ye pahia pūhtoā, usā judio masa buheyequina mehna tiquire cue niahye. Sa ye tiquina tiquire wejēatire wacū macamahye. ¹⁹ Tiquina sa yegū ñamicahapu Jesu tiquire buheyequina mehna ti macapu ijiriquina wahaa wahahye.

Higueragu ñaia wahahye

(Mt 21.20-22)

²⁰ Sa ye bohrearo mahapu maja taye, higueragure ihñahye. Tu nūhcoripu ñai dūca, ñaia wahahye tū. ²¹ Tūre ihñano Pedro pehe wacū, ohō saha niahye:

—Buhegu, ihñañā. Higueragu mūhu yaria tudidū yaria wahaya, niahye Pedro.

²² Tiquiro sa nigāta Jesu yahuahye tiquinare:

—Cohācjūre wacū tutuaya masa.

²³ Ijirota niita niaja masare. Ahdu canure pajiri mapu masa cohā dutigū masa nidiro saha sa waharota. Cohācjūre quehnoano masa wacū tutuagū “Yuhū sinidiro saha waharota”, masa ni tūhotugū masa nidiro saha waharota. ²⁴ Sa yegu ahrire yahugātja masare. Cohācjū mehna yahuducuna, tiquire sinina, “Yuhū sinidiro saha ohorota yuhare”, ni tūhotuya. Masa sa yegū ihñano Cohācjū masa siniñene ohorota. ²⁵ Sa yena Cohācjū mehna masa yahuducuatō pano masare apequina tiquina ñano yegū masa usarire duhuya. Masa sa yegū ihñano mari Pacu ūhmuse cjūno masa ñañe yeri pehere tiquire gāhu usua duhurōta. [²⁶ Masare ñano yeriquinare masa usua duheragū mari Pacu gāhu ūhmuse cjūno masa ñañe yeri pehere usuaro ne duhūsi tiquire gāhu,] niahye Jesu.

Pahia pūhtoā, judio masare buheyequina, būcūna mehna Jesu mehna cahme dūse tini wiahye

(Mt 21.23-27; Lc 20.1-8)

²⁷ Tiquiro sa nidi bato tiquina Jerusalēpu wahahye tja. Sa ye Jesu Cohācjū wuhupu tiquire tinigū ihñañe pahia pūhtoā, usā judio masare buheyequina, būcūna gāhu tiquire cahapu esaye, tiquire sinituahye:

²⁸ —¿Dūhsegu canure sa yeari mūhu? ¿Noa mūhare tire sa ye dutiari? ni sinituahye tiquina Jesure.

²⁹ Tiquina sa nigū Jesu yūhtiahye:

—Masa pehere sinitu māhtagātja. Quehnoano yuhare masa yūhtigū masare yahugātja yuhū gāhu.

³⁰ ¿Ñu masare tiquire wame yegū noa boro pehe tiquire wame ye dutiyari, masa tūhotugū? ¿O Cohācjū dutierayari? ¿O masa pehe tiquire dutiyari, masa tūhotugū? ni sinituahye tiquinare.

³¹ Tiquiro sa nigū tiquina pehe tiquina basi ohō saha niahye:

—¿Duhse ni yuhtinatari mari? “Cohācjū Ñure dutiri jiri”, mari nigū, “¿Duhseña Cohācjū Ñure tiquiro dutiepegūta tiquirore taho duerari mūsa?” niboaga Jesu marine. ³² Sa yero “Ñu tiquiro wame yegū Cohācjū pehe tiquirore dutierari jiri”, mari nigū masa pehe usueta mari mehna, niahye tiquina basi.

“Potota Ñu Cohācjū yere yahu mahtariquiro ijire”, ni tūhotue tiahye masa pehe. Sa ye pahia pūhtoa, usā judio masare buheyequina, bucūna mehna tiquinare cue niahye. ³³ Sa ye tiquina Jesure ohō saha ni yuhtiahye:

—Ñure wame ye dutiriquirore usā masiedaga, niahye tiquina Jesure.

—Ti pje pūrita yūhū gūhū ahrire yūhū yerire dutiriquirore yahueraja mū sare, niahye Jesu tiquinare.

12

Ñañequina dahra cohteyequina quitire yahuahye Jesu

(Mt 21.33-46; Lc 20.9-19)

¹ Sa ye Jesu tiquiro tūhotuye mehna ohō saha ni queoye mehna buhe dūcahye tiquinare.

—Wese upūro uhse darire oteahye. Ote tuhasa, sahrīnore doco, uhsere tiquina cūhta mūtoati copere sehe, uhmūari wūhūgā dahreahye tiquiro. Sa yero ti wesere apequinare ihcā pehe pahma cūno, ti wesere cohte dutiahye. Cohte duti tuhasa ape sierū wahaa wahahye tiquiro. ² Came uhse űidi pje ijigū wese upūro tiquiro cahacjūnore wese cjē tiquiro ya pahma cjē dūcare ne dutiro ohomahye. ³ Sa ye wesere cohteyequina pehe tiquiro cahacjūnore űehe, quēahye tiquirore. Sa ye tuhasa tiquiro cahacjūnore uhse tōhorine ohoerapeta tojoa dutiahye

tiquirore. ⁴ Sa yero wese upūro apequiro tiquiro cahacjūnore ohomahye tja. Sa ye cohteyequina pehe tiquiro dapure camī dahre, űano yeahye tiquina tiquirore. ⁵ Sa yero apequiro pehere tiquiro ohogū cohteyequina tiquirore wejēahye. Peyequina apequina gūhare sa dihita ye mūjahye. Apequina pehere quē, apequina pehere wejēahye tiquina.

⁶ Sa yero wese upūro macūno dihita dūhsahye. Tiquiro cahīniquiro ijiahye. Sa yero tiquiro macūnore ohoahye, “Yūhū macū pehere űo peoeta”, nino. ⁷ Tiquiro sa ni tūhotuepegūta cohteyequina tiquina basi ohō saha ni yahuducuahye: “Wese upūro macūno ijire ahriquiro. Tiquirore wejēihna mari. Sa yero ahri wese mari ya wese tojoarota”, nimahye tiquina basi. ⁸ Sa niñe tiquirore űehe, wejē, wese dūhtū cahapū ne cā, cohā cāhye tiquina tiquirore.

⁹ ¿Ne wese upūro ahtaro dūhse yerotari tiquiro wesere cohteyequinare, mūsa tūhotugū? Ohō saha yerota tiquinare: Tiquiro tiquinare wejēno, apequina pehere wesere cohte dutirota. ¹⁰⁻¹¹ ¿Cohācjū yere tiquina ojoari pūre ahrire buherari mūsa? Ohō saha ni ojoahye:

Ahriquiro Cristo utā yero saha ijire. Utāre wūhare dahreyequina tiquina cohāno saha masa tiquirore cohāeta. Tiquina sa cohāepegūta yojopūre wūhare dahreyequina wūhare yeye, tiquina cū mahtaria utāre tiquina cūno saha Cohācjū tiquirore pūhtoro sōri. Cohācjū pehe ahrire yeri. Tiquiro sa yegū ihñana, “Quehnoa yūhdūare”, ni tūhotuaja mari, ni ojoahye panopūre.

¿Tire ne buherari mūsa? niahye Jesu tiquinare.

12 Tiquiro sa nigū tūhoye pahia pūhtoa, usā acaye judio masare buheyequina, бачуна mehna ohō saha ni tūhotuahye: “Jesu wesere cohteyequina quiti mehna marine tuhtiro nine”, ni tūhotuahye. Sa ni tūhotuye Jesure ñehe duamahye. Sa ñehe duepeta masare cue ni-ahye. Sa cueye tiquirore cohā cā wahahye.

Fariseo masa, Herode ya curua cjēna mehna gobierno cjē wapare sinituahye Jesure

(Mt 22.15-22; Lc 20.20-26)

13 Waha, tiquina fariseo masare, Herode ya curua cjēna gūhure Jesure sinitu dutiye ohoahye tja. Jesu ñano tiquiro yūhtigū ye duamahye tiquina, tiquirore yahusāñe tehe. 14 Sa ye Jesu cahapū esaye, tiquirore niji sio sinitumahye:

—Buhegū, poto yahuducugū, ni mehoñe mariegū mūhū ijigū masiaja usā. Cohācjū yere queoro mūhū yahugū gūhure masiaja usā. Sa yegū ihcāquiro pūhtoro waro ijiepegūta tiquiro gūhure dóyaro marieno potota yahure mūhū. Sa yegū usāre yahuya. ¿Roma cjāno ijipihtiyequina pūhtoro yere marine wapa yero cahmeajari, mūhū tūhotugū? ¿Mari dutiye wapa ye dutiajari, mūhū tūhotugū? ni sinituahye tiquina Jesure.

15 Tiquina sa sinitugū tūhoro tiquina ñano ye duayere masino Jesu ohō saha ni sinituahye tiquinare:

—¿Dūhse yena yūhū ñano yahuducugū tūho duajari masa? Yojoṗare niñeru cjoere ne cāhtaya. Ti cjoere ihñāhna, niahye Jesu tiquinare.

16 Tiquiro sa nigū tūhoye tiquina pehe ihcā cjoere ne cāhtahye. Tiquina ne wihigū Jesu sinituahye tiquinare:

—¿Noa boro queoye wahñajari ahri cjoere? ¿Noa boro wame wahñajari? ni sinituahye tiquiro.

—César, masa ijipihtiyequina pūhtoro queoye, tiquiro wame gūhū wahñare, ni yūhtiahye tiquina.

17 Tiquina sa nigū Jesu yahuahye tiquinare:

—Ti pje pūrita masa ijipihtiyequina pūhtoro yere tiquiro pehere ohoya. Cohācjū yere Cohācjū pehere ohoya, ni yahuahye Jesu.

Tiquiro sa nigū tūhoye tūho maria wahahye.

Cohācjū tiquiro masoatire yahuahye Jesu saduceo masare

(Mt 22.23-33; Lc 20.27-40)

18 Sa ye ihquēquina saduceo masa Jesu cahapū wihiahye. Saduceo masa pehe “Cohācjū yariariquinare masosi”, ni tūhotuyequina ijiahye. 19 Sa ye tiquina ohō saha niahye tiquirore:

—Buhegū, ohō saha ni buheahye Moise: “Ihcāquiro wahmino namo tiriquireo pohna mariedaperota yariagū ihñano tiquiro bahūrore tiquiro wahmino namono ijiricorore nūoano cahmene. Sa yero wahmino mūnano tiquiro pohna tiboro saha pohna tiro cahmene tiquiro bahūrore. Sa ye tiquiro pohne tiquiro wahmino mūnano pohne yero saha ijietta”, ni ojoahye Moise, niahye tiquina Jesure.

20 Tire ni tuhasa, ahri quitireta yahu nemoahye Jesure:

—Ihcāquiro masūno ijiahye. Seis bahana tiahye. Tiquiro wahmino pehe namo ti, pohna mariedaperota yariaa wahahye.

21 Sa yero apequiro tiquiro bahūro gūhū tiquiro wahmino namono ijiricorore cūomahye. Tiquiro sa nūoari bato tiquiro wahmino yero saha pohna mariedaperota yariaa wahahye tja. Sa yero ahriquireo bahūro tiquiro wahmino mūnano yero saha pohna mariedaperota

yariaa wahahye. ²² Sa dihita wahahye ihcãquiro pohne waro. Ne pohna mariedapeta yaria pihtia wahahye tiquina. Tiquina namono ijiricoro gãhũ tiquina batota yariaa wahahye. ²³ ¿Ne, Cohãcjũ ijipihtiyequinare yari-ariquina mũnare tiquiro masogũ diquiro namono pehe ijiretari ticoro? Tiquina ijipihtiyequina ticorore namo tiriquina mũna ijiahye. ¿Sa yero diquiro namono pehe ijiboagari ticoro pototi? ni sinituahye tiquina.

²⁴ Jesu yũhtiahye tiquinare:

—Cohãcjũ yere tiquina ojoari pũre, tiquiro masiñe gãhũre ne masiedare mũsa. Sa yero mũsa tũhotuye pehe ne poto ijierare. ²⁵ Yariariquina mũna tiquina masa mũjari bato angele yero saha ijire. Namu marieñequina, manũ marieñe numia ijire topũre. ²⁶ Yariariquina mũna tiquina masa wijiato pehere mũsare yahugũtja: Tire Moise quehnoano yahu pehoahye. Mehenogã ẽjũri quitire ohõ saha ni yahuahye tiquiro: “Yũhũ Abrahã, Isaac, Jacob tiquina pũhto tjiaja”, ni yahuri Cohãcjũ yũhũre”, ni ojoahye Moise tiquiro ojoari pũrũ. ²⁷ Tiquina yariari bato “Tiquina pũhto tjiaja”, ni yahuahye Cohãcjũ. Sa nieperota yariariquina mũna pũhtoro ijierare Cohãcjũ. “Tiquina pũhto tjiaja”, tiquiro niñe mehna catiyequina tiquina ijigã masiaja mari. Tiquiro catiyequina pũhtoro ijire. Sa yena “Yariariquina masasi”, ni tũhotuna potota tũhotuerare mũsa, niahye Jesu tiquinare.

Quehnoa yũhdũro dutirore yahuahye Jesu
(Mt 22.34-40)

²⁸ Sa ye ihcãquiro usã acaye judio masare buheyequina mehna cjãno tiquina cahapũ wihi, tiquina cahme yahuducugã tũhoahye. Jesu

quehnoano yũhtiyere tũhoro sinituahye tiquirore.

—¿Cohãcjũ ye dutiro quehnoa yũhdũari dutiro noho pehe ijiajari, mũhũ tũhotugũ? ni sinituahye tiquiro Jesure.

²⁹ Jesu tiquirore yahuahye:

—Ahri dutiro ijire apeye dutiye bui quehnoa yũhdũari dutiro: “Israe masa, tũhoya. Cohãcjũ mũsa pũhtoro yũhũ ihcũta ijiaja. ³⁰ Tutuaro mũsa jeripohnari mehna, quehnoano mũsa wacũñe mehna, mũsa tutuaye mehna yũhũre cahĩña”, nine Cohãcjũ. ³¹ Ahri dutiro bato apero dutiro quehnoano ijire. “Mũhũ basi mũhũ cahĩno saha mũhũ cahapũ ijieyequina gãhũre cahĩña”, nine Cohãcjũ. Ahri pũaro dutirota ijipihtiyeyapeye dutiye yũhdũoro ijire, ni yahuahye Jesu tiquirore.

³² Tiquiro sa nigũ judio masare buheriquiro ohõ saha niahye:

—Sa tjire. Buhegũ, potota nine mũhũ. Cohãcjũ ihcãquirota ijire. Apequiro tiquiro yero saha ijiriquiro mariedare. Mũhũ niñe potota ijire. ³³ Cohãcjũre tutuaro mari jeripohnari mehna, mari wacũñe mehna, mari tutuaye mehna tiquirore cahĩno cahmene marine. Yũhũ caha ijieyequinare yũhũ basi yũhũ cahĩno saha tiquina gãhũre cahĩno cahmene yũhũre. Wahiquinare wejẽ ẽjũa mũo mari ohori mehna mari ño peogũ quehnoarĩmene. Ahri yũhdũoro Cohãcjũre, masa gãhũre mari cahĩne quehnoa yũhdũare. Mũhũ sa niñe ijirota ijire, niahye judio masare buheriquiro Jesure.

³⁴ Tiquiro sa quehnoano yũhtigũ tũhoro Jesu yahuahye tiquirore:

—Mehenogã dũhsare mũhũre Cohãcjũre mũhũ quehnoano masiato, niahye tiquirore.

Tiquiro sa nigũ tũhoye apequina cueye, ne sinituerahye Jesure.

*Cristo Davi m̄n̄ano p̄h̄toro ijire
(Mt 22.41-46; Lc 20.41-44)*

³⁵ Sa ye Cohācjū w̄h̄p̄u buhero ohō saha niahye Jesu:

—“Cristo Davi m̄n̄ano panamino iji turiariquiro ijire”, ni buhere mari acaye judio masare buheyequina. ¿D̄h̄se niñe sa ni buheajari tiquina? ³⁶ Davi tiquiro basi Espiritu Santo tiquiro dutiriro sahata ohō saha ni yahuahye:

Cohācjū ȳh̄u p̄h̄torore ohō saha nidi: “Ohōp̄u ȳh̄u poto pehe dujiya. Sa yeḡu m̄h̄ure ihña tuhtiyequinare m̄h̄ure ȳh̄d̄d̄ca basaḡtja ȳh̄u”, nidi Cohācjū ȳh̄u p̄h̄torore, ni ojoahye Davi m̄n̄ano.

³⁷ Sa ni ojoaro Davi m̄n̄ano p̄h̄toro tiahye Cristore. ¿Davi m̄n̄ano Cristo ñec̄no m̄n̄ano iji turiariquiro ijieperota d̄h̄sero Davi pehe p̄h̄toro tiyari Cristore? Cristo Davi m̄n̄ano p̄h̄toro ijire, ni yahuahye Jesu.

Tiquiro sa ni buheḡu peyequina masa bucueye mehna t̄h̄oahye tiquirore.

*Jesu judio masare buheyequina
tiquina ñañene yahuahye*

(Mt 23.1-36; Lc 11.37-54; 20.45-47)

³⁸ Sa yero tiquiro buhe nemono ohō saha niahye:

—Mari acaye judio masare buheyequina tiquina ñañe yeyere quehnoano ihñaña. Sa yena tiquina yero saha yerac̄h̄ña. Tiquina yoaye suhti saña, masa tiquina ihñonop̄u majare, doeri cjē duarop̄u apequina p̄h̄toare quehnoano ño peo tiquina sinino saha tiquina piti ca siniḡu cahmene tiquina. ³⁹ Sa ye mari judio masa buheye w̄h̄usep̄u quehnoañe dujiye dihitare duji duare. Sa ye bose deco ijiḡu top̄u ḡh̄ure quehnoañe dujiye dihitare cahmene tiquina.

⁴⁰ Tiquina wape wiha numia ye w̄h̄usere tiquina caoye ḡh̄ure

ehmare ti numiare. Sa ye tiquina masa ihñonop̄u yoari pje Cohācjūre siniducumene masare ihña dutiye. Tiquina sa yeri buhiri apequina bui cjūno tiquinare Cohācjū pajiro buhiri dahrerota, niahye Jesu tiquinare.

*Wape wihoro ticoro ohorire
yahuahye Jesu*

(Lc 21.1-4)

⁴¹ Sa yero Jesu Cohācjū w̄h̄u cjē niñeru tiquina s̄ari acaro cahap̄u dujiahye. Top̄u masa tiquina niñeru duhu s̄aḡu ihña dujiro niahye. Sa ye niñeru opana ti acarop̄u pajiro duhu s̄ahye. ⁴² Sa yero wape wihoro pejec̄oricoro ti acarop̄u ahta, p̄u cjoeḡa duhu s̄ahye. P̄u cjoie ihc̄a centavo pose ijire. ⁴³ Ti cjoeri ticoro duhu s̄aḡu ihñano tiquiro buheyequinare pijioahye:

—Ijirota niita niaja m̄sare. Ahricoro wape wihoro pejec̄oricoro pehe niñeru ihbori acarop̄u duhu s̄ano apequina ijipihtiyequina tiquina ohori ȳh̄d̄h̄oro ohori ticoro pehe. ⁴⁴ Apequina doeri cjē opana pajiro tiquina ohopeḡata tiquina ye pajiro d̄h̄sare. Ahricoro pehe pejec̄oricoro ijieperota ijipihtiyē ticoro ihyatire d̄uboriḡare oho pehori, niahye Jesu.

13

*—Cohācjū w̄h̄u coh̄ari w̄h̄u
ijirota, niahye Jesu*

(Mt 24.1-2; Lc 21.5-6)

¹ Sa ye Cohācjū w̄h̄p̄ure tiquina wijiaḡu ihc̄aqui buheyequina mehna cjūno ohō saha niahye:

—Buheḡu, ihñaña. Ahri w̄h̄use quehnoañe ut̄a paca mehna tiquina yeri w̄h̄use quehnoa ȳh̄d̄uaye w̄h̄use ijicjoare, niahye tiquiro.

² Tiquiro sa niḡu Jesu yahuahye tiquinare:

—Ahri ijipihtiyē mari ihñari w̄h̄use, ahri w̄h̄use cjē ut̄a paca

gũhare cohã pehoeta. Ne ihcãria utã tojoasi, niahye Jesu tiquinare.

Decori pihtiatire yahuahye Jesu (Mt 24.3-28; Lc 21.7-24; 17.22-24)

³ Sa ye Jesu Olivo wame tidũ canũpũ Cohãcjũ wãhũ potopũ ijidũpũ esahye. Tũ buipũ dujiahye. Topũ Pedro, Santiago, Ñu, Andre mehna tiquina sehsaro ijiye, tiquina tiquiore sinituahye:

⁴ —Yahuya usãre. ¿Dũhse ijigũ sa waha rotari mũhũ nidiro saha waha ro? ¿Deco pihtiato panogã ijigũ dũhse ti waha dũcagũ ihñanatarĩ usã? ni sinituahye tiquina Jesure.

⁵ Jesu yũhtiahye:

—Quehnoano yeya mũsa. Sa yena apequina tiquina ni mehoñene tũhoeracãhña mũsa. ⁶ Peyequina masa “Cristo ijiaja yũhũ”, ni mehoñequina ahtaeta. Tiquina sa ni mehogũ tũhoye peyequina masa Cohãcjũ yere duhueta.

⁷ Mũsa cahagã masa apequina tiquina cahme wejẽgũ tũhonata mũsa. Sa yena yoaropũ gãhũre tiquina cahme wejẽgũ tũhoonata mũsa. Sa tũhooopenata ne tire pajiro tũhotueracãhña. Sa waha rota. Tiquina sa yegũ pihtiatĩ deco dũhsarĩnota. ⁸ Ti pjere ihcã yehpa cjẽna ape yehpa cjẽna mehna cahme wejẽeta. Sa ye ihcãquiro pũhtoro yequina apequiro pũhtoro yequina mehna cahme wejẽeta. Sa yero ijipihtiri yehpa ñuhminota. Sa ye peyequina masa mũja mehna yarieta. Sa wahagũ ahri yehpa cjẽnare tiquina ñano yũhdũ nemoato dũhsarĩnota. Ñano yũhdũrieta.

⁹ Sa wahagũ ihñana mũsa basi quehnoano yeya. Apequina mũsare ñehe, ñano ye dutiye ohoeta apequina pũhtoapũre. Sa ye judio masa mari buh-eye wũhusepũ mũsare quẽeta. Tiquina sa yegũ bũjũye macari cjẽna pũhtoa, tiquina bui pũhtoa

gũhũ mũsare buhiri dahreye tehe sinitueta mũsare. Yeequina mũsa ijiri buhirere apequina mũsare yahusãeta. Sa yena yeere yahunata mũsa tiquinare. ¹⁰ Sa ye pihtiatĩ deco pano quehnoañe buheye ijipihtiyẽ yehpari cjẽnare buheripũ ijirota. ¹¹ Sa yena mũsare buhiri dahre dutiye, buhiri dahre dutiatiquiro cahapũ tiquina neagũ tiquiore mũsa niatire “Yahu masiedaboaga”, ni tũhotueracãhña mũsa. Ti pjere mũsa niatire mũsare Espĩritu Santo yahurota. Tiquiro sa yahurire yahuya mũsa. Mũsa esa tuharo yahuducusi mũsa. Espĩritu Santo mũsare yahuducu basarota. ¹² Ti pjere tiquina wahmisũmũa tiquina bahanare wejẽ dutiye ohoeta pũhtoare, yeequina tiquina ijiri buhiri. Tiquina pacũsmũa tiquina pohnene wejẽ dutiye ohoeta pũhtoare. Tiquina pohne pehe tiquina pacũsmũare wejẽ dutiye ohoeta pũhtoare. ¹³ Sa ye yeequina mũsa ijiri buhiri mũsare masa ijipihtiyequina ihña tuhtieta. Tiquina sa yepegãta ahri yehpapũ mũsa catiro puno mũsare tiquina ñano yerire ihcãno sahana yũhũre duhuerana, yũhdũnata mũsa.

¹⁴ Sa yena ña yũhdũariquiore Cohãcjũ yere ñano yeriquiore ihñanata mũsa. Cohãcjũ ya wũhũpũ tiquiore ducugũ ihñanata. Topũ tiquiore ijieraro cahmene. Topũ tiquiore ducugũ ihñañe Judea yehpapũ ijiyequina cũnũ cjũpũ duhti oma mũjaa wahaahro. Ahri yũhũ nidire quehnoano masiña mũsa. ¹⁵ Sojaro mehna oma duhtiahro. Ti pjere tiquina wũhũse bui cjẽ paaripũ ijiyequina wũhũ puhĩapũ ijiyere tiquina yere neñe wahaeracãhdo tiquina waha madoqueoato saha. ¹⁶ Sa ye ti pjere apequina tiquina weseripũ ijiyequina tiquina bui cjẽ suhtire wũhũpũ ijije suhtire neñe wahaeracãhdo tiquina waha

madoqueoato saha. ¹⁷ Ti pjere niji pacosānumia, tiquina pohnene apūoñe numia gūhū pejecuro wahaeta. ¹⁸ Sa yena ohō saha ni siniña Cohācjüre: “Pohecū ijigū sa wahaeracāhdo”, ni siniña tiquiore. ¹⁹ Ti decorire masa ña yūhdūaro wahaeta. Ahri yehpare tiquiore bajumehnedi bato masa ñano yūhdūe tiahye. Ti sa ijiepegūta ijipihtiye ti puriñe yūhdūoro pih-tiati deco ijigūre ña yūhdūaro masa yūhdūeta. Sa ñano tiquina yūhdūari bato pari turi sa ña yūhdūaro yūhdūsi ahri yehparū. ²⁰ Sa yero Cohācjū ti decorire meheñe decorigā ijigū yerota. Tiquiro sa yeragū ne ihcāquiore masūno yūhdūeraboaga. Sa yero tiquiro beseriquina tiquina yūhdūatire meheñe decorigā cūnota Cohācjū.

²¹ “Ti pjere apequina mūsare “Ihñañā. Ahriquiore ijire Cristo”, tiquina nigū tiquinare tūhoeracāhñā. “Topū ijire Cristo”, tiquina nigū gūhūre tūhoeracāhñā. ²² “Cristo ijiaja”, ni mehoñequina, “Cohācjū yere yahu mahtana ijiaja”, ni mehoñequina ijjeta ti pjereta. Sa ye Cohācjū beseriquinare ni mehoñe, tiquina tutuaye mehna ye ihñoeta. Cohācjū yequinare Cohācjüre tiquina cohā duagū ye duare tiquina mehoñequina. ²³ Ahrire yahuyuaja mūsare sa wahato pano. Sa yena quehnoano yeya mūsa, ni yahuahye Jesu.

Jesu ahri dihtapūre tiquiro tojoa tatire yahuahye

(Mt 24.29-35, 42-44; Lc 21.25-36)

²⁴ Sa ni tuhasa ohō saha ni yahuahye Jesu:

—Ti decori ijigū tiquina ñano yūhdūari bato asū deco cjāno, ñami cjāno gūhū buhrio duhu cāeta. ²⁵ Tiquina sa wahagūta ñahpicoha paca ūhmūsepū ijieye paca bora dijiaa wahaeta. Sa ye ūhmūse cjē yehpari, ñahpicoha gūhū ti sa

wahaducurore comesaeta. Sa ye ñuhmieta. ²⁶ Ti pjeta yūhū masū Cohācjū ohorigū ahtagūta. Sa ye ūhmūsepū yūhū tutuaye mehna yūhū asi siteye mehna ūhmūse cjē ehmeo cururi buipū ahri yehparūre yūhū tojoa tagū ihñāeta masa. ²⁷ Sa yegū yeequina angelere ijipihtiropū ahri yehparū ohogūta. Sa ye ijipihtiropū yeequina yūhū beseriquinare tiquina neeta.

²⁸ “Yojopare higuera gūre tūhotuya mūsa. Tū quti mehna mūsare queoye mehna buhegūta. Tū yucūgū pūri tigū ihñāna cūhma mehenogā dūhsagū masine mūsa. ²⁹ Sata ahri ijipihtiye yūhū nidi sa wahagū ihñāna, yūhū tojoa tato mehenogā dūhsagū masinata mūsa. ³⁰ Ijirota niita niaja mūsare. Ti pje cjēna tiquina yariato panore ijipihtiye yūhū nidiro sahata sa waharota. ³¹ ūhmūse, ahri yehpa gūhū pihtia waharota. Yūhū yahuducuye pehe ne comesasi. Ijipihtiye yūhū nidiro sahata sa waha sohtori tiarota.

³² “Ti decore yūhū tojoa tati decore, ti hora gūhūre masiedaja yūhū. Angele gūhū tire masiedare. Masa gūhū ne masiedare. Yūhū Pacū dihita tire masine.

³³ “Mūsa gūhū ti decore masiedare. Sa yena quehnoano yeya. Quehnoano cohteya. Cohācjüre siniña mūsa. ³⁴ Ohō saha cohteya mūsa. Ahri quti mehna mūsare queoye mehna buhegūta. Wūhū upūro yoaropū tiquiro tinino saha ijire ahri. Tiquiro wahato pano tiquiro cahacjēnare wūhūre cohte dutiahye. Tiquinape tiquina dahrayere cūahye. Sa yero wūhūre cohteriquirore tiquiro tojoa tatore cohte dutiahye. ³⁵ Sa yena mūsa gūhū quehnoano wacū masi cohteya. Wūhū upūro tiquiro tojoa tatore tiquina masiedariro saha yūhū mūsa puhto tojoa tati decore masiedare mūsa gūhū. Ñamicahapū, ñami deco, canaca tiquiro yahuri

pje ijigū bohrearopu ahtaboaga. ³⁶ Yuhu sa wacūeno mehna yuhu wihiatore masina, yeere sa yeducuya. Sa yena yuhare quehnoano cohteya. ³⁷ Sa yegu musare yuhu nino sahata ijipihtiequinare sa niaja: Quehnoano wacū masi cohteya, niahye Jesu tiquinare.

14

Pahia pūhtoā, judio masare buheyequina mehna Jesure wejē duahye

(Mt 26.1-5; Lc 22.1-2; Jn 11.45-53)

¹ Sa ye ti pjere pascua wame tiri bose deco pano pugū yeye moremehneñe pāre tiquina ihyati deco pano, pūā deco dūhsarīahye. Ti pjere pahia pūhtoā, usā acaye judio masare buheyequina mehna Jesure tiquina ni mehoñe mehna tiquina ñehe wejēatire cahme yahuducuye niahye.

² —Bose deco ijigū tiquiore ñehedacūhna “Masa usuari”, nina, niahye tiquina basi.

Numino ehme sitiye ūhse mehna Jesure pio peohaye

(Mt 26.6-13; Jn 12.1-8)

³ Sa ye Jesu gāhu Betaniapu, Simo camī būcu mūna wihiro ijimediquiro ya wūhūpu ijiahye. Sa yero tiquina ihyari watoa numino pehe alabastro mehna yeriare ehme sitiye nardo wame tiye ūhsere pose tiriare ne wihiahye. Ti ūhse pehe wapa būjūye ijiahye. Sa yero ticoro tiare pohadoqueo, Jesu dapu bui pio peohaye. ⁴ Ticoro sa yegū ihñañe apequina usuaa wahahye.

—¿Dūhse yero ahricoro ahri ehme sitiye co wapa būjūyere sa ye siteajari? ⁵ Tire ticoro duaboaya. Tire duaro tres cientos niñeru cjoerire wapataboaya. Sa yero ti niñerure pejecūoyequinare ohoboaya ticoro, ni cohteahye

apequina pehe ticoro sa yegū ihñañe.

Sa ye tiquina ticorore tuhtiahye.

⁶ Tiquina sa nigū tūhoro Jesu tiquinare yahuahye:

—Sa niedacāhña ticorore. Yuhare ticoro quehnoano yero nine. ⁷ Pejecūoyequina pehe mūsa mehna sa ijiducūeta. Sa yena mūsa cahmedi pje tiquinare oho masine. Yuhu pehe ahri yehpare mūsa mehna sa ijiducūsi. ⁸ Ticoro cūoro puno mehna ticoro yuhare sa yeri. Yuhare tiquina yato pano yuhu pagure quehnoyuro, ehme sitiye pio peori ticoro. ⁹ Sa yegu potota niita niaja musare. Ijipihtiro ahri yehpapū quehnoañe buheyere tiquina yahuatorū ahricoro yojopare ticoro yerire yahueta. Tiquina sa yahugū tūhoye ticorore masa peyequina wacūeta, ni yahuahye Jesu.

Juda Iscariote Jesure ihñā tuhtiequinare tiquiore ihñōatire yahuahye pahia pūhtoare

(Mt 26.14-16; Lc 22.3-6)

¹⁰ Ti pjereta Juda Iscariote doce buheyequina mehna cūāno Jesure tiquiore ihñōatire yahuro wahahye tiquiore ihñā tuhtiequinare, pahia pūhtoare. ¹¹ Sa ye pahia pūhtoā tire tūhoye bucueahye.

—Mūhure niñerure ohonatja, niahye tiquina Judare.

Sa yero Jesure ihñā tuhtiequinare tiquiore ihñōatire wacū macahye.

Jesu tiquiore buheyequina mehna tiquina ihya bato tiri deco ijiahye

(Mt 26.17-29; Lc 22.7-23; Jn 13.21-30; 1 Co 11.23-26)

¹² Pugū yeye moremehneñe pāre tiquina ihyati bose deco iji dūcari deco, ovejare pascua deco ijigū ihyatiquiore tiquina wejēati deco ijiahye. Ti pjere tiquiore buheyequina pehe sinituahye Jesure:

—¿Noho boropū bose deco ijigū mari ihyatire quehnoyu dutigū

ohoutjari m̄h̄u us̄are? niahye tiquiore.

¹³ Tiquina sa niḡata Jesu pehe p̄aro tiquiore buheyequina mehna c̄j̄enare ohoahye.

—Jerusalēp̄u wahaya. Top̄u m̄sa esaḡu aco suture w̄hariquiore m̄sare piti carota. Tiquiro piti caḡu tiquiore mehna wahaya. ¹⁴ Sa wahana tiquiore siho saj̄ari w̄h̄p̄u esana w̄h̄u up̄arore oh̄o saha ni yahuya: “¿Nohop̄u ȳh̄u buheyequina mehna pascua c̄j̄e ihyayere ihyanatari?” nidi buheriquiro”, niña w̄h̄u up̄arore.

¹⁵ M̄sa sa niḡu t̄horo uhm̄ano c̄j̄a tuc̄ure pajiri tuc̄ure mari cahmeñe mehna tiquina quehñori tuc̄ure ih̄ñonota w̄h̄u up̄aro. Top̄u mari ihyatire dahreya m̄sa, niahye Jesu tiquinare.

¹⁶ Tiquiro sa niḡu t̄hoye tiquina tiquiore buheyequina ti macap̄u wahahye. Top̄u esaḡu tiquinare tiquiore nidiro sahata wahahye. Sa ye tiquina pascua c̄j̄e ihyayere dahreahye.

¹⁷ Sa ye nahitia c̄ahtaḡu Jesu doce tiquiore buheyequina mehna top̄are esahye. ¹⁸ Sa yero tiquina mehna mesap̄u ihyaro Jesu tiquinare yahuahye:

—Poto niita niaja m̄sare. Ih̄c̄aquiore m̄sa mehna c̄j̄ano ȳh̄u mehna ihyariquiore ȳh̄ure ih̄ña tuhtiyequinare ih̄ñonota, ni yahuahye Jesu tiquinare.

¹⁹ Tiquiro sa niḡu t̄hoye tiquina pehe b̄j̄ua witiyahye.

—¿Ȳh̄uta ijiajari m̄h̄ure ih̄ñoc̄aj̄u? ni sinitu pihtiahye tiquina Jesure.

²⁰ —M̄sa mehna c̄j̄anota ijire tiquiore. Ȳh̄u ihyari pap̄u ȳh̄u mehna soha ihyariquiore ijire ȳh̄ure ih̄ña tuhtiyequinare ih̄ñotiquiro. ²¹ Panop̄u ȳh̄ure tiquina yahu ojariro sahata ȳh̄u masu Coh̄c̄j̄u ohorigu yariaḡata.

Sa yero ȳh̄ure ih̄ña tuhtiyequinare ih̄ñoriquiore pejec̄oro ȳh̄darota. Tiquiro pehe masa bajueraḡu, quehnoa ȳh̄d̄uaboya. Ñano ȳh̄d̄ueraboya, niahye Jesu tiquinare.

²² Sa ni yahu tuhasaro tiquiore buheyequina mehna ihyaro taro niahye. Sa yero Jesu p̄are ne, Coh̄c̄j̄ure “Quehnoare”, niahye. Sa ninota tiare nuha, itiahye tiquinare.

—Ahrire ne ihyaya. Ahri ȳh̄u paḡu ijire, niahye tiquiore tiquinare.

²³ Sa ni tuhasa tiquiore sihnini pare ne, Coh̄c̄j̄ure “Quehnoare”, ni tuhasa, ohoahye tiquinare. Tiquiro oho tuhasaḡu tiquina ijipihtiyequina tire sihniahye.

²⁴ —Ahri ȳh̄u dii ijire. Peyequina masa tiquina ñañe yerire coh̄aḡu taḡu yariaḡutja. Sa yeḡu ȳh̄u diire coh̄aḡutja. Mari Pac̄u “M̄sare ȳh̄d̄uoḡutja”, tiquiore nidiro esaḡu ȳh̄u yariaro mehna tiquiore nidiro sohtori tirota. ²⁵ Poto niita niaja m̄sare. Coh̄c̄j̄u tiquiore p̄atoro ijirop̄u wahma core uh̄se core ȳh̄u sihniato pano, ahri dihtap̄are uh̄se core pari turi sihnisi ȳh̄u, niahye Jesu tiquinare.

Pedro Jesure tiquiore coh̄atire yahuahye Jesu

(Mt 26.30-35; Lc 22.31-34; Jn 13.36-38)

²⁶ Sa ye tiquina ih̄c̄a taha Coh̄c̄j̄u ye basayere basa tuhasa, c̄anap̄u Olivo wame tid̄p̄u wahaa wahahye. ²⁷ Top̄u siho esaro Jesu tiquinare yahuahye:

—Yojop̄are m̄sa ijipihtina ȳh̄ure coh̄anata. Oh̄o sahata nine Coh̄c̄j̄u yere tiquina ojoari p̄p̄u ȳh̄ure yahuro: “Ovejare ih̄ña ih̄boriquiro yero saha ijiriquirore Coh̄c̄j̄u coh̄anota. Sa tiquiore coh̄aḡu tiquiore yequina oveja yero saha ijieyquina duhti site c̄a wahaeta”, nine Coh̄c̄j̄u yere

tiquina ojoari pūrū. ²⁸ Sa yegū Cohācǵū yūhure tiquiro masori bato mūsa pano Galilearū wahayugūtja yūhū, niahye Jesu tiquinare.

²⁹ Tiquiro sa nigū Pedro ohō saha niahye:

—Yūhū mehna cǵēna ijipihitiye-quina tiquina cohā cāepegūta yūhū pehe mūhure ne cohāsi, nimahye Pedro tiquirore.

³⁰ Jesu yūhtiahye:

—Potota niita nijaja mūhure. Mia ñamita canaca pūa taha tiquiro yahuato pano “Yūhū Jesure masiedaja”, nigūta mūhū. Ihtia taha sa nigūta mūhū, niahye Jesu Pedrore.

³¹ Tiquiro sa niepegūta Pedro ohō saha ni tutuaro bisiro yūhtiahye:

—Mūhū mehna yūhure tiquina wejē duepegūta “Jesure masiedaja”, ne nisi yūhū, ni yūhtimahye tiquiro Jesure.

Pedro sa nigū tūhoye tiquiro mehna cǵēna gūhū sa dihita ni yūhtiahye.

Getsemaní wame tiri wesepū Jesu Cohācǵūre siniahye

(Mt 26.36-46; Lc 22.39-46)

³² Sa ye tiquina Getsemaní wame tiri wesepū wahahye. Topū esaro ohō saha niahye Jesu:

—Yūhū Cohācǵūre yūhū sinino watoa ohō dujiyuya, niahye tiquiro buheyequinare.

³³ Sa ni tuhasa Pedrore, Santi-agore, Ņure tiquinare ihtiarore piji cāhye. Tiquinare sa piji cāno, pajiro tūhotu dūcahye tiquiro. Sa yero ñano jeripohna tiahye.

³⁴ Sa bujūa witiro tiquiro mehna cǵēnare tiquiro piji cāriquinare ohō saha niahye:

—Yūhū ñano jeripohna tiaja. Yūhure tutuaro purīno saha tūhotugū nijaja. Ohō tojoaya. Sa yena yūhū mehnata carīedacāhña mūsa gūhū, niahye Jesu tiquinare.

³⁵⁻³⁶ Sa ni tuhasa tiquiro topū mehenogā waha nemo, yehparū quehe saro, Cohācǵūre niahye:

—Mai, mūhū ijipihitiyere ye masine. Sa yegū yūhū ñano yūhdūatire ye dueragū yeracāhña. Yūhū sa niepegūta yūhū cahmeno saha yer-acāhña. Mūhū pehe masine. Mūhū cahmeno saha yeya yūhure, ni sini-ahye tiquiro Cohācǵūre.

³⁷ Sa ni tuhasa, ihtiaro tiquiro buheyequina caharū wihiro, carīñequinare ihñahye. Tiquinare ihñano Pedrore niahye:

—¿Simo, carīgū nijari mūhū? ¿Ihcā hora waro yūhū ihcāno mehna carīegū iji masiedajari mūhū? ³⁸ Quehnoano yeya mūsa. Sa yena Cohācǵūre siniducuya mūsa, “Ñano yeari”, nina. Mūsa tūhotuye mehna quehnoañene ye duamene mūsa. Mūsa sehvaro sa ye duepenata tire ye masiedare mūsa, niahye Jesu Pedrore.

³⁹ Sa ni yahu tuhasa pari turi waha, Cohācǵūre siniahye. To pano tiquiro sinidiro sahata siniahye tja. ⁴⁰ Sa sini tuhasaro pari turi tiquina caharū wihiahye tja. Sa wihiro carīñequinare ihñahye tja. Wujūa quehe yūhdūahye tiquina. Sa ye tiquina Jesure dūhse ni masiedahye. ⁴¹ Sa yero pari turi Cohācǵūre tiquiro sinidi bato tiquina caharū wihi, tiquinare niahye:

—¿Yojopū pūrītare carīnina nijari mūsa? ¿Sorīna nijari mūsa? To punota umū saro taro nine. Mi-anogāta yūhure Cohācǵū ohorigure ñañequinare tiquina ohoati pje umū saro nine. ⁴² Wahcāña. Isa wahana. Ihñaña. Yūhure ihña tuhtiyequinare ihñootiquiro ohō ahtare, niahye Jesu tiquinare.

Jesure ihña tuhtiyequina tiquirore peresu yeahye

(Mt 26.47-56; Lc 22.47-53; Jn 18.2-11)

43 Tiquiro sa nino watoata Juda, doce buheyequina mehna cjūno ijimediqiro wihiahye. Sa ye masa peyequina ņoseņe pjīni, yucu tiāri cūoyequina tiquiro mehna wihiahye. Pahia p̄h̄toa, judio masare buheyequina, b̄uc̄na, tiquina ohoriquina masa pehe ijiahye. 44 Coā warore Jesure ih̄na tuhtiyequinare ih̄noatiqiro masare oh̄o saha ni yahu queo tuhasahye.

—Wahsupure ȳh̄u ihmidiquiro tiquirota ijirota m̄sa ņeheatiquiro. Tiquirore ȳh̄u ihmidi bato ņeheña tiquirore. Sa yena quehnoano ņeheña tiquirore “Duhtiarī”, nina, ni yahu tuhasahye Juda pehe.

45 Sa yero wihirota Jesu cahap̄u duita waha madoqueoahe.

—Buheḡu, ninota wahsupure ihmiahye tiquirore.

46 Tiquiro sa yeḡu ih̄ñaņe tiquina Jesure ņeheahe.

47 Tiquina sa yeḡu ih̄nano to cahap̄u ducuyequina mehna cjūno tiquiro ņoseni pjīne t̄ā we nedoqueo, pahia p̄h̄toro cahacj̄n̄ore tiquiro cahmonore d̄ate pahr̄e c̄ahye.

48 Sa yero Jesu oh̄o saha niahye:

—¿D̄uhse ijiro boro m̄sa ņoseņe pjīni mehna, yucu tiāri mehna ahtana, yaqueriquirore yero saha ȳh̄u ņehena ahtajari?

49 Decoripe Coh̄acj̄ w̄h̄p̄u m̄sare ȳh̄u buhe dujiḡu, m̄sa ȳh̄u ne ņehedari. Sa ijiepeḡuta ahri ijipihtye sa waharo niaga Coh̄acj̄ yere tiquina ni ojoariro sahata, niahye Jesu masare.

50 Sa ye Jesu buheyequina tiquirore coh̄a c̄a, ijipihtyequina oma site c̄a wahahye.

51 Sa yero wahm̄no suhti mariediquiro ihc̄ano coma cjūno dihita comariquiro Jesu bato n̄n̄u t̄amahye. Tiquiro sa n̄n̄u t̄aḡu ih̄ñaņe tiquirore ņehemahye.

52 Tiquirore tiquina ņehē duaḡu

ih̄nano tiquiro coma cjūnore coh̄a c̄a, suhti mariediquiro oma c̄a wahahye.

P̄h̄toa cahap̄u neahye Jesure

(Mt 26.57-68; Lc 22.54-55, 63-71; Jn 18.12-14, 19-24)

53 Sa ye pahia p̄h̄toro cahap̄u Jesure ne c̄ahye. Sa ye ijipihtyequina pahia p̄h̄toa, b̄uc̄na, us̄a acaye judio masare buheyequina ḡh̄u cahmecoahye. 54 Sa yero Pedro pehe Jesu bato yoarop̄u n̄n̄u t̄ahye. Sa n̄n̄u t̄ano pahia p̄h̄toa ya w̄h̄u cahap̄u esahye. Sa yero tiquiro ti w̄h̄u cohteyequina surara mehna peca d̄h̄tu cahap̄u sohma dujahye.

55 Pahia p̄h̄toa, ijipihtyequina apequina p̄h̄toa ḡh̄u Jesure wej̄e duti duaye, ni mehoņe mehna tiquirore tiquina ņano buhiri dahreatore wac̄u macaņe nimahye. Tiquina yahus̄atire wac̄u bocaerahye. 56 Sa wac̄u bocaerapeta peyequina masa tiquirore sa yahus̄a maca c̄ahye. Tiquina yahus̄aņe poto ijierahye. Apequiro sijoro saha ni, apequiro sijoro saha niahye. 57 Sa ye apequina top̄u esaye, Jesure yahus̄ahye.

58 —Ahriqiro oh̄o saha nidi: “Ȳh̄u ahri w̄h̄u Coh̄acj̄ w̄h̄u masa tiquina dahreri w̄h̄u coh̄aḡutja. Sa coh̄aḡu ihtia deco w̄h̄u h̄oro ti w̄h̄u pari turi yeḡutja. Ti w̄h̄u masa tiquina dahreri w̄h̄u ijisi”, tiquiro niḡu us̄a t̄hou, niahye ni meho yahus̄aņequina.

59 Tiquina sa ni yahus̄aep̄eḡuta tiquina yahus̄aņe ḡh̄u poto ijierahye. Apequiro sijoro saha ni, apequiro sijoro saha niahye.

60 Tiquina sa niḡu t̄horo pahia p̄h̄toro tiquina watoa ducuriquiro wahc̄ad̄uca sa, Jesure sinituahye:

—¿Ahriquina m̄h̄u tiquina yahus̄aep̄eḡuta tiquinare yahti cahmedajari m̄h̄u? ¿M̄h̄u tiquina yahus̄arire d̄uhse ni yahti

cahmeajari m̄h̄u? niahye tiquiro Jesure.

⁶¹ Tiquiro sa nigū t̄h̄oerota Jesu sata t̄hotu c̄ahye. Tiquiro sa ȳhtieragū ih̄ñano pahia p̄htoro tiquirore sinituahye tja:

—¿Cristota ijiajari m̄h̄u? ¿Quehnoariquiro Coh̄c̄j̄ macu warota ijiajari m̄h̄u? niahye tiquiro Jesure.

⁶² —Tiquiro tjiaja. Sa yena ȳh̄are mas̄re Coh̄c̄j̄ ohoriḡre ȳh̄u Pacu tutuariquiro poto pehep̄u ȳh̄u dujigū ih̄ñanata m̄sa. Sa yena āhm̄se cj̄ ehmeo cururi watoa ȳh̄u ahtagū ḡh̄are ih̄ñanata m̄sa, niahye Jesu tiquirore.

⁶³⁻⁶⁴ Tiquiro sa nigūta pahia p̄htoro pehe tiquiro sañari suhtirore tiquiro basi t̄hr̄e c̄ahye, apequinare “Usua ȳhd̄are”, ni ih̄ña masi dutiro.

—Coh̄c̄j̄are ñano yahuducuro nine ahriquiro. Sa yena tiquiro ñano yahuducuyere t̄ho tuhasaja mari. Sa ye topequinata yahus̄ahdo ahriquirore. ¿Sa yena d̄h̄se yenatari mari yoj̄p̄re ahriquirore? niahye pahia p̄htoro apequina p̄htoare.

—Tiquiro ñari buhiri wej̄eno cahmene tiquirore, ni ȳhtiahye apequina p̄htoa.

⁶⁵ Sa ye tiquina mehna cj̄ena Jesure sihco puti, tiquiro caperire d̄hte biha, tiquirore qūepeahye. Qūepe tuhasa oh̄o saha nīpeahye:

—¿Noa pehe m̄h̄are qūeari? Ih̄ñdapeguta yahuya us̄are, ni buj̄peahye tiquina.

Sa ye p̄htoro yequina surara pehe Jesure qūepe tuhasa, neahye.

—*Tiquirore masiedaga, niahye Pedro Jesure*

(Mt 26.69-75; Lc 22.56-62; Jn 18.15-18, 25-29)

⁶⁶ Sa yero w̄h̄u caha ijiri paapu quehnoari paapu Pedro ijigū pahia p̄htoro cahac̄j̄ono wih̄ahye. ⁶⁷ Pedro tiquiro sohmagū

ih̄ñano ticoro tiquiro dihitare ih̄ñaducuahye.

—Nazare cj̄ano mehna, Jesu mehna m̄h̄u ḡh̄u ijiri, niahye ticoro Pedrore.

⁶⁸ Ticoro sa nigū t̄h̄oro tiquiro oh̄o saha niahye:

—¿D̄h̄se ni macago niajari m̄h̄u? M̄h̄u nidiquirore ne masiedaja ȳh̄u, niahye Pedro ticoro.

Tiquiro sa nidi bato Pedro sahr̄ino sopecaha cahap̄u wahahye. Sa yero top̄u tiquiro ducugū canaca yahuahye. ⁶⁹ Top̄u tiquiro ijigū ih̄ñano cahac̄j̄ono pehe ticoro cahap̄u ducuyequinare yahuahye tja:

—Ahriquiro ḡh̄u Jesu buheyequina mehna cj̄ano ijire, niahye ticoro.

⁷⁰ Ticoro sa nigū t̄h̄oro Pedro pari turi oh̄o saha niahye tja:

—Tiquirore masiedaja ȳh̄u, niahye tja.

Sa yero came cj̄unop̄u top̄u ducuriquina Pedrore oh̄o saha niahye:

—Ijirota ijire. M̄h̄u Galilea cj̄u ijire. Sa yeḡu tiquina mehna cj̄uta ijire m̄h̄u, niahye tiquina tiquirore.

⁷¹ Tiquina sa nigū t̄h̄oro tiquiro ȳhtiahye:

—Potota Coh̄c̄j̄ mehna niaja m̄sare. Potota ȳh̄u niedagū Coh̄c̄j̄ ȳh̄are buhiri dahreahro. Tiquirore m̄sa nidiquirore ne masiedaga ȳh̄u, ni ȳhtiahye Pedro tiquinare.

⁷² Tiquiro sa nigūta canaca yahuahye tja. Tiquiro sa yahugū t̄h̄oro Jesu tiquirore nidire wac̄ahye Pedro: “Canaca p̄a taha tiquiro yahuato pano m̄h̄u ȳh̄are ‘Jesure masiedaga’, nigūta m̄h̄u. Ihtia taha sa nigūta m̄h̄u”, Jesu tiquiro nidire wac̄ahye Pedro pehe. Tiquiro sa nidire wac̄uno, tutuaro utiahye Pedro.

15

Pilato Jesure sinituahye

(Mt 27.1-2, 11-14; Lc 23.1-5; Jn 18.28-38)

¹ Sa ye bohrearopu pahia puhto, bucuna, usã masare buheyequina, ijipihtiequina apequina puhto mehna cahmeco, yahuducuahye tiquina yeatire masiñe tehe. Tiquina basi yahuducu tuhasa, Jesure duhte, ne cã, Pilatore ohoahye tiquire. ² Tiquina ne sagũ ihñano Pilato tiquire sinituahye:

—¿Potota judio masa puhtota ijijari mahu? niahye tiquire Jesure.

—Mahu nino sahata ijiaja, ni yuhtiahye Jesu.

³ Sa ye pahia puhto peye yahusãhye tiquire. ⁴ Tiquina sa ni yahusãgũ tuhoro Pilato tiquire sinituahye tja:

—Ahriquina mahure peye yahusãñe nine. ¿Tiquina sa yahusãepegũta yuhtierajari mahu? niahye tiquire.

⁵ Tiquire sa niepegũta Jesu ne pari turi yuhti nemoedahye. Sa yero Pilato ne duhse ni masiedahye.

Jesure wejẽ dutiahye

(Mt 27.15-31; Lc 23.13-25; Jn 18.38-19.16)

⁶ Cuhmaripe pascuaripe masa yaquiro ijiatiquire ihcãquiro peresupu ijiriquire tiquina cahmediquire Pilato wio basaducue tiahye. ⁷ Ti pjere Barrabá wame tiriquire peresupu iji-ahye. Tiquire puhtoare cohã duayequina, masare wejẽnequina mehna cjãno ijiahye. ⁸ Sa ye masa peyequina Pilato cahapu esaye, tiquire siniahye:

—Cuhmaripe usãre mahu yeducuro sahata yeya usãre. Ihcãquiro peresupu ijiriquire usãre wio basaya, niahye tiquina.

⁹ Tiquina sa nigãta Pilato tiquire sinituahye:

—¿Musa yaquiro ijiatiquire masa judio masa puhtoro wio basaboagari yahu? ni sinituahye masare Jesure wio duaro.

¹⁰ Jesure masa tiquina cahĩgũ ihñañe pahia puhto gũhu tiquire ihña tuhtiahye. Sa ihña tuhtie tiquire ohoahye Pilatopare. Sa yero masa tiquina cahĩdi buhiri tiquina ihña tuhtire masino Pilato Jesure wio duamahye. ¹¹ Tiquire sa wio duepegũta pahia puhto Jesu mehna masare usuagũ yeahye. Ohõ saha ni dutiahye tiquire: “Barrabá pehere wioya. Jesure wejẽ dutiya”, ni dutiahye masare. ¹² Sa yero Pilatore Barrabãre tiquina wio dutiri bato Pilato tiquire sinituahye tja:

—¿Ahriquire judio masa puhtoro masa nidiquiro pehere duhse yegutari yahu, masa sa nigũ? ni sinituahye tiquire.

¹³ —Curusapu quẽ biha wejẽña tiquire, ni sañuducuahye masa.

¹⁴ —¿Yabe borore ñañene yeari ahriquire, masa sa ni sañuducugũ? ni sinituahye tiquire.

Tiquire sa nigũ tuhoye tiquina sañuducu nemoahye tja:

—Curusapu quẽ biha wejẽña tiquire, ni sañuducuahye tiquina.

¹⁵ Tiquina sa ni sañuducugũ tuhoro Pilato pehe masare bucugũ ye duaro Barrabá pehere peresupu ijiriquire wio dutiahye masa tiquina cahmediquire. Sa yero Jesu pehere yuta dari mehna tana duti, curusapu quẽ biha wejẽ dutiro ohoahye surarare.

¹⁶ Sa ye surara Pilato ya wuhupu pretorio wame tiri wuhupu tiquire ne sahye. Ne sa tuhasa tiquina apequina surarare tiquina mehna cjẽnare cahmecoñe tehe pijioahye. ¹⁷ Sa ye tiquina puhtoro ya suhtiro yero saha bajuri suhtiro Jesure sãa, pota behtore dahre, ti behtore tiquire dapu bui duhu peohye. ¹⁸ Sa ye tuhasa

ohō saha ni bujapeahye tiquina tiquireore:

—Quehnoano ahtaya. Judio masa puhto, quehnoano ahtaya, ni bujapeahye.

¹⁹ Sa nieta yucugū mehna tiquireo dapure quē, tiquireore sihco puti wisō, cua pesaro yeyequina yero saha tiquireore quehe sa, ño peoro saha yeahye. Tiquireore ñano yeye niahye. Sa ye bujapeye niahye. ²⁰ Sa yepe tuhasa tiquina sãari suhtirore tu we nedoqueo, tiquireo ye suhti pehere tiquireore sãa, tiquireore curusapu quē biha wejēne wahaye, nea wahahye tiquina.

Tiquina Jesure curusapu quē biha wejēahye

(Mt 27.32-44; Lc 23.26-43; Jn 19.17-27)

²¹ Sa ye topu wahariquireo, Simo Cirene cãno ihquē wuhuse ijiropu esariquireo, tiquina cahapu wihigū ihñañe surara pehe tiquireore Jesu ya curusare wna cã dutiahye. Alejandro, Rufo pacuro ijiahye Simo pehe.

²² Waha, Gólgota wame tiropu esahye. Gólgota nino “Dapu pehtoro”, nino nine. ²³ Sa ye vinore mirra wame tiye co mehna tiquina moredi core Jesure ohomahye. Sa yero ti core sihni duerahye tiquireo. ²⁴ Sa ye curusapu Jesure quē bihahye tiquina. Quē biha tuhasa tiquireo suhti ijiirire “¿Noa yaro ijirotari ohō?” ni cahme doquepeahye tiquina.

²⁵ Jesure curusapu tiquina quē bihagū ihtia hora duhsahye coheri pje esato. ²⁶ Sa ye curusapu ohō saha ni ojoari pjine duhu ohōahye tiquina tiquireo ñañe buhirire yahu duaye. “AHRIQUIRO JUDIO MASA PUHTORO IJIRE”, ni ojoahye tiquina ti pjine. ²⁷ Sa ye puaro yaque bucana Jesu caha apeye curusaripu tiquina quē biha ohōriquina ijiahye tiquina.

Ihcãquiro potu pehe, apequiro cū pehe pehe quē biha ohōahye tiquina gūhare. [²⁸ Tiquina sa yegū panopu Cohãcjū yere tiquina yahu ojoariro sahata waharo niahye. Ohō saha ni ojoahye: “ ‘Dutiyere yuhduhcayequina mehna cãno ijire’, ni, tãhoturi masa tiquireore”, ni ojoahye panopu.]

²⁹ Sa ye curusari cahapu yuhdu cãñequina Jesure ihña, tiquina dapu pacare yuredoqueo, tiquireore ñano ni yahuducuahye:

—Quehnoare. Quehnoare. ¿Cohãcjū wuhure cohã, ihtia deco wahaboro pari turi ti wuhure dahreacjū ijiajari mahū? ³⁰ Mahū basi dijiahya. Sa yegū mahū basi yedohoya. Sa yegū yuhdu wutigata mahū, ni bujapeahye tiquina.

³¹ Tiquina yero sahata pahia puhto gūhu usã judio masare buheyequina gūhu tiquireore sa ni bujapeahye. Sa ni bujapeye ohō saha niahye tiquina basi:

—Tiquireo apequinare yuhduoriquiro ijieperota tiquireo basi yuhduo masiedare. ³² “Israe masa puhto, Cristo ijiaja”, nimesi tiquireo. Sa yena tiquireo basi dijia tagū ihñana tiquireore wacū tutuanata, ni bujapeahye tiquina.

Sa ye yaque bucana tiquireo caha tiquina quē biha ohōriquina gūhu sata ñano ni bujapeahye tiquireore tja.

Jesu yariaa wahahye

(Mt 27.45-56; Lc 23.44-49; Jn 19.28-30; He 6.19-20; 10.19-20)

³³ Sa ye coheri pje ijigū ihtia hora waro ijipihtiropu nahitiaa wahahye. ³⁴ Sa yero nahitia yuhdugū waro Jesu tutuaro sañuducuahye:

—¿Eloi, Eloi lema sabactani? niahye tiquireo.

Sa nino ohō saha nino niahye. “¿Yuhū Pacu, yuhū Pacu, duhsegu yuhure cohãjari mahū?” nino niahye.

³⁵ Tiquiro sa nigū tūhoye ihquēquina topu ducuriquina ohō saha nimahye:

—Cohācjū yere yahu mūhtariquirore. Elia mūnanore pijioro niboaga, nimahye tiquina.

³⁶ Sa yero ihcāquiro tiquina mehna cjāno oma cā, aco ihmini sūhtere vino sūēñe core tiquiro sohari sūhtere ne cā, yucūgu sohtoapu dūhte ohō, Jesure sihōmahye. Sa sihōno ohō saha nimahye:

—Cohteniña. Elia mūnana ahriquirore tiquiro yūhdūogū ihñarihna mari, nimahye tiquiro apequinare.

³⁷ Tiquiro sa nidi bato Jesu pehe tutuaro sañuducu, yariaa wahahye.

³⁸ Tiquiro yariagūta Cohācjū wūhu cjā suhtiro cahsero tore tiquina cahmotari cahsero deco mehna bui pehe tūhnū dijia ta, tūhnū maa cjū saa wahahye. ³⁹ Tiquiro sa yariagū ihñano surara pūhtoro Jesu caha ducuriquiro ohō saha niahye:

—Ijirota ijire. Ahriquiro Cohācjū macūnota ijire, niahye tiquiro.

⁴⁰ Sa ye yoaropu ducuye numia Jesure ihñaducuye niahye. Tiquina numia mehna María Magdalena ijiahye. Apecoro María wame tiri-coro gūhu ijiahye. Ticoro pehe José, tiquiro baharo Santiago, tiquina pacoro ijiahye. Apecoro Salomé ijiahye. ⁴¹ Tiquina numia Jesu yere quehnoano tūhoyequina numia ijije, Galilea yehpapu tiquiro ijigū tiquirore yedohoe tiahye. Tiquina numia mehna peyequina apequina numia gūhu Jerusalēpu Jesu mehna ahtariquina numia ijiahye.

Jesu pagure masa copepu cūahye
(Mt 27.57-61; Lc 23.50-56; Jn 19.38-42)

⁴²⁻⁴³ Sa ye ti deco tiquiro yariari deco saurú pano judio masa usā sori deco pano ijiri deco ijiahye. Sa yero pascua cjē ijjatire tiquina quehnoyuri deco ijiahye. Ti

ñamita José Arimatea cjāno cuero marieno Pilato cahapu esahye Jesu pagure sinino esaro. José judio masa usā pūhtoa mehna cjāno, pūhtoa tiquina cua pesaro ihñariquiro waro ijiahye. Sa yero Cohācjū masa bui tiquiro pūhtoro sajātore cohtero niahye. ⁴⁴ Sa yero José Pilatore tiquiro sini tuhasagū tūhoro tūho maria wahahye Pilato pehe. “¿Jesu yaria tuhasayari?” ni tūhoturo, tūho maria wahahye. Sa yero surara pūhtoro pijio ohō saha niahye tiquirore:

—¿Jesu yariaa wahari? ni, sinitu-ahye tiquirore.

⁴⁵ Tiquiro sa nigū surara pūhtoro yūhtiahye:

—Yariaa wahari, niahye.

Tiquiro sa nigū Pilato Jesu pagure oho dutiahye Josére.

⁴⁶ Tiquiro sa oho dutiri bato José quehnoari suhtirore dúahye. Dú tuhasa, Jesu pagure ne dijio, suhtiro mehna wahme, masa copepu utāpu tiquina seheri copepu tiquiro pagure cūahye. Cū tuhasa, ti cope caha ijiria utāre pajiria utāre tu torē cā, ti copere bihahye.

⁴⁷ Sa ye María Magdalena, María José pacoro Jesure tiquina cūriroro ihñahye.

16

Jesu masa wijiahye
(Mt 28.1-10; Lc 24.1-12; Jn 20.1-10)

¹ Sa ye saurú yūhdūgū María Magdalena, María Santiago pacoro, Salomé mehna wisōñe co ehme siti yere dúahye tiquiro pagure wisōñe tehe. ² Sa ye domingo bohrea queharo Jesure tiquina cūri copepu wahahye tiquina. ³ Wahaducuye, ohō saha niahye:

—¿Ti copere biharia utāre noa marine pōo basarotari na? niahye tiquina basi.

4 Ti copep_u esaye, ti copere biharia utāre pajiria utāre tiquina pōo cūriare ihñahe tiquina. 5 Sa ihñahe ti copep_u sajā sahye. Sa sajā saye, wahmānore poto pehe dujiriquireore yehseye suhti tiriquireore ihña, acuaa wahahye. 6 Tiquina sa acuaagū ohō saha niahye tiquireo:

—Yuhare ihña acueracāhña. Jesu Nazare cjūno tiquina quē biha wejēdiquireo mūsa macariquireo masa wijia tuhasari. Ohōre mariedare. Tiquireore tiquina cūriore ihñaña. 7 “Tiquireo mūsa pano Galileap_u waharota”, ni yahuna wahaya tiquireo buheyequinare, Pedro gāhare. Top_u tiquireo nidiro sahata mūsa tiquireore ihñanata, ni yahuahye wahmāno tiquireore.

8 Tiquireo sa nigū tuhoye tiquina cueye, nanare, masa cope cahap_u ijiriquina oma cāa wahahye. Sa cueye apeqinane yahuerahye.

Jesu María Magdalenare bajuahye

(Jn 20.11-18)

[9 Sa ye domingo ijigū Jesu tiquireo masa wijiarī bato María Magdalenare bajua mūhtahye. Ticoro siete watīare cūomedicoro ijimahye. Sa yero Jesu tiquireo yariato pano watīare tiquireo cohānohricoro ijiahye. Sa yero ticoro pehere bajua mūhtahye tiquireo masa wijiarī bato. 10 Sa ye Jesu mehna cjēna tiquireo yariagū ihñahe tutuaro bājūa witi, utiye niahye. Sa tiquina utiri watoa ticoro pehe tiquireore ihñarire yahumahye tiquireore. 11 “Cristo catiri. Ihñau”, ticoro ni yahuepegūta tūho duerahye.

Jesu tiquireo buheyequinare bajuahye

(Lc 24.13-35)

12 Came pūaro tiquina mehna cjēna wūhuse marienop_u tiquina tinigū Jesu sijoro saha bajuriquireo

tiquireore bujahye. 13 Tiquireo sa bajuagū ihñahe tiquina tojoaa waha, apeqinane Jesu yequireore tire yahuahye. Tiquina sa ni yahuepegūta tiquina pehe tūho duerahye.

Jesu tiquireo yere buhe dutiro ohoahye tiquireo buheyequinare

(Mt 28.16-20; Lc 24.36-49; Jn 20.19-23)

14 Came doce tiquireo buheyequinare mesa cahap_u tiquina dujigū tiquireore bujahye tiquireo. Sa yero tiquireore ihñariquinare tiquina yahugū tūho dueyequinare masino Jesu tiquireore tuhtiahye. Tiquireore tiquina quehnoano wacū tutuerarī buhirire tuhtiahye tiquireore. 15 Sa tuhti tuhasaro tiquireore ohō saha niahye:

—Ahri yehpa ijipihtirop_u quehnoañe buheyere ijipihtiyequina masare buhena wahaya. 16 Yuhare wacū tutuayequinare tiquina wame yenohriquireore pecap_u wahaboriquinare yūhdūorota Cohācjū.

Sa ye yuhare wacū tutuayequina Cohācjū tiquireo buhiri dahreatiquina pecap_u wahatiquina ijieta. 17 Sa ye yuhare wacū tutuayequina yuhū tutuaye mehna ohō saha yeeta: Yuhū tutuaye mehna, yuhū wame mehna watīare cohāeta. Sa ye wahma yahuducuyere yahuducuenta. 18 Sa ye añare tiquina ñehegū, ijipihtiyē nima dūhse ijiye nimare tiquina sihnigū, tiquireore ne purīsi. Sa ye dohatiyequina bui tiquina omocarine tiquina ña peogū dohatiyequina pehe quehnoa wahaeta, niahye Jesu tiquireo buheyequinare.

Jesu uhmūsep_u mūjaa wahahye

(Lc 24.50-53)

19 Sa ni yahu tuhasa mari pūhtoro Jesu uhmūsep_u mūjaa wahahye. Top_u esaro Cohācjū poto pehe dujahye tiquireo mehna

pəhtoro ijiro. ²⁰ Sa ye Jesu buheye-
quina ijipihropu quehnoañe
buheyere buheye wahaahaa wa-
hahye. Tiquina sa buhegā mari
pəhtoro tiquinare yedohoahye.
Tiquiro tutuaye mehna ye ihño,
masigā yeahye tiquinare, masare
tiquiro ye buheyere tūho dutiro.
To punota ijire.]

San Lucas

1-2 Puh̄to Teófilo, ah̄rire m̄uh̄u buheatire m̄uh̄are ojoa ohoḡu niaja. Jesu us̄a mehna ijinino tiq̄uiro yerire apequina ojoa d̄uca tuhasari jiri. Coã warop̄are Jesure ih̄nariquina, tiq̄uiro yere buheriquina tiquina ni yahuriro sahata apequina tire ojoa d̄uca tuhasari jiri. ³ Sa yeḡu ah̄ri ijip̄ihtiyere quehnoano masi peho duaḡu buhei. Sa yeḡu yuh̄u ḡuh̄u tire quehnoano ojoa duaja m̄uh̄u buheatire yeḡu. ⁴ Jesu yere yahuyequina m̄uh̄are buhe tuhasari. Tire quehnoano m̄uh̄u masi nemoatire ah̄ri p̄ure m̄uh̄are ojoa ohoḡu niaja.

Ñu wame yeatiquiro tiq̄uiro masa bajuatire angel yahuahye

⁵ Jesu masa bajuato pano, Herode Judea yehpa cj̄ena puhtoro tiq̄uiro ijiḡu Zacaria wame tiriq̄uiro pehe pahi ijiahye. Sa yero Zacaria tiq̄uiro ya curua cj̄ena pehe pahia curua Abia m̄unano ya curua cj̄ena ijiahye. Zacaria namono ḡuh̄u pahi Aaron m̄unano panameono iji turiaricorop̄u ijiahye. Ticoro pehe Elisabe wame tiricoro ijiahye. ⁶ Tiquina puaro Coh̄c̄j̄u dutiyere quehnoano ye pehoyequina tiquina ijiḡu ih̄n̄ano, “Decoripe quehnoañene yere”, ni ih̄nahye Coh̄c̄j̄u tiquinare. ⁷ Elisabe ne pohna marienico ijiahye. Ticoro Zacaria mehna sata muh̄nu c̄ahye pohna mariedape.

⁸ Pahia dahrayere dahraye tehe, decoripe tiquina comesae tiahye. “Zacaria ya curua cj̄ena ijire”, tiquina nidi bato tiq̄uiro pahia decoripe tiquina yeducuriro saha Coh̄c̄j̄u ya wuh̄up̄u dahraro taro niahye Zacaria. ⁹ Pahia sa yeducuriro saha tiquina “¿Noare ijirrotari uj̄ua m̄uoatiquiro?” niñe, doquepeye mehna bueyere ehme

sitiyere uj̄ua m̄uoatiquirore be-seahye. Coh̄c̄j̄ure ño peori altarpu tiquina beseriquiro Zacaria ehme sitiyaere uj̄ua m̄uoatiquiro ijiahye. Sa yero tiq̄uiro Coh̄c̄j̄u wuh̄up̄u saj̄aa wahahye uj̄ua m̄uono waharo. ¹⁰ Wuh̄up̄u ijiro ehme sitiyaere tiq̄uiro uj̄ua m̄uono watoa ijip̄ihtiyequina masa pehe sopecahap̄u Coh̄c̄j̄ure sinie tiahye. ¹¹ Ti pjere Coh̄c̄j̄u yaq̄uiro angel Coh̄c̄j̄ure ño peori altar poto pehe bajuad̄uca sahye Zacariare. ¹² Tiquiro sa bajuaḡu ih̄n̄ano Zacaria tiq̄uirore ih̄n̄a maria, cuea wahahye. ¹³ Sa tiq̄uiro cueḡu ih̄n̄ano angel tiq̄uirore yahuahye:

—Zacaria, cuerac̄ah̄na. Coh̄c̄j̄u m̄uh̄u sinidire tuhori. Sa yena masa pohna tinata. M̄usa mac̄u masa bajuarota. Tiquiro bajuaḡu Ñu wame yeya tiq̄uiroḡare. ¹⁴⁻¹⁷ “Tiquiro quehnoariq̄uiro, tutuariq̄uiro ijire”, ni, ih̄n̄anota Coh̄c̄j̄u m̄uh̄u mac̄ure. Tiquiro masa bajuari bato vinore, sih̄biorire sih̄nisi. Sa yero tiq̄uiro masa bajuari bato Esp̄iritu Santo nidiro sahata yeriquiro ijirota tiq̄uiro. Sa yero peyequina m̄uh̄u acaye Israe masare Coh̄c̄j̄u mari puhtorore quehnoano cahmeḡu yerota m̄uh̄u mac̄u. Sa yero tiq̄uiro Coh̄c̄j̄u yere buhero Elia m̄unano Coh̄c̄j̄u yere yahu m̄uhtariq̄uiro tiq̄uiro buheriro sahata Esp̄iritu Santo yedohoro mehna Coh̄c̄j̄u tutuaye mehna m̄uh̄u mac̄u ḡuh̄u buherota. Sa buhero tiquina pac̄us̄m̄ua tiquina pohne mehna quehnoano cahme cah̄iḡu yerota. Sa yero dutiyere yuh̄d̄ud̄ucariquinare quehnoano tiquina ño peoye mehna yuh̄tiḡu yerota. Sa buhero mari puhtoro Coh̄c̄j̄u yequina ijiatire yerota tiq̄uiro. Sa yeḡu tiq̄uiro masa bajuari bato m̄uh̄u bucueḡata. Peyequina apequina ḡuh̄u bucueeta, niahye angel Zacariare.

¹⁸ Tiquiro sa niḡu tuhoro Zacaria

pehe sinituahye angelre:

—Ûsã bucuna ijiaja. ¿Sa yegũ mũhũ nidi potõ ijigũ ðũhse masigutari yũhũ? niahye tiquiro.

¹⁹ Tiquiro sa nigũ angel pehe tiquirore yahuahye:

—Yũhũ Gabriel wame tigũ ijiaja. Cohãcjũ cahacjũ tiquiro cahapũ ducugũ ijiaja yũhũ. Cohãcjũ ahri quehnoañe quitire yahu dutiro, mũhũ cahapũ yũhũre ohori. ²⁰ Yũhũ yahuriro sahata potota waharota. Yũhũ sa niepegũta yũhũre mũhũ potõ tũhoerari. Sa yegũ yojopũre mũhũ yahuducuegũ wahagũta. Mũhũ macũ tiquiro bajuari bato yahuducugũta tja, niahye angel Zacariare.

²¹ Sopecahapũ ijiequina masa Zacariare cohtey niahye. “¿Ðũhse ijiro boro tiquiro Cohãcjũ wũhũpũ ijiro, sojaro wijia taerajari?” ni, cohtey niahye masa tiquirore. ²² Sa yero ti wũhũpũ ijiriquiro wijia wihi, tiquina mehna yahuducu masiedahye. Tiquiro sa yahuducu masiedagũ ihñãñe “Tiquiro Cohãcjũ wũhũpũ bajuano hno niaya”, ni, tũhotuahye tiquina. Sa yero yahuducu masiedaro tiquiro omocari mehna masare yahuducuahye.

²³ Cohãcjũ wũhũpũ tiquiro dahraye pihtigũ, tojoaa wahahye tiquiro ya wũhũpũ. ²⁴ Tiquiro sa wahari bato tiquiro namono Elisabe coã nijinore cwo cãhtaro niahye. Sa yero ticoro ihcã omope asũri waro masa cahapũ wahaerahye. ²⁵ Ohõ saha niahye ticoro: “Yojopũre yũhũre Cohãcjũ yedohori. Yũhũ pohna mariego ijigo tutuaro bũoro tũhotuu yũhũ. Cohãcjũ yedohoro mehna nijinogãre bocagota”, ni tũhotuahye ticoro.

Jesu tiquiro masa bajuatire yahuahye angel

²⁶⁻²⁷ Elisabe seis asũri ticoro niji pacoro ticoro ijiri bato

Cohãcjũ pehe angel Gabriel wame tiquirore nuhmino cahapũ ohoahye. Ticoro Nazarepũ Galilea yehpapũ ijiri macapũ ijiahye. María wame tiricoro ijiahye. José wame tiquiro ijiahye ticoro mehna omoca ðũhteatiquiro. Tiquiro panopũ cjãno Davi mũnano panamino iji turariquiro ijiahye. ²⁸ Sa yero María cahapũ esaro, angel yahuahye:

—¿Ne, ijiajari mũhũ, María? Cohãcjũ mũhũ mehna ijiro nine. Sa yero mũhũre quehnoano yero nine. [Ijipihtiyẽ numia apeqũna numia yũhũoro quehnoano yere mũhũre.] niahye angel ticoro.

²⁹ Tiquiro sa nigũ tũhoro, ticoro tutuaro wacũ tũhotuahye. Angel tiquiro yahurire tũhoturo “¿Ðũhse nino yũhũre sa niagari?” ni wacũahye ticoro. ³⁰ Ticoro sa ni wacũgũ ihñano angel yahuahye ticoro:

—María, Cohãcjũ mũhũre tutuaro cahĩne. Sa yego mũhũre yũhũ yahuatire tũho acũeracãhña. ³¹ Quehnoano tũhoya. Nijinore bocagota mũhũ. Sa yero mũhũ macũ masa bajuarota. Tiquirore Jesu wame yegota mũhũ. ³²⁻³³ Tiquiro tutua yũhũariquiro ijirota. Sa ye tiquirore “Cohãcjũ ãhmũse cjãno macũno ijire”, nieta masa. Sa yero mũhũ macũ ñecũno iji turariquiro mũnanopũ Davi mũnano Israe masa tiquina pũhtoro tiquiro ijiriro sahata mũhũ macũ gũhũre cũnota Cohãcjũ. Sa yero ijipihtiyẽ decori tiquiro Israe masare dutirota. Sa yero tiquiro pũhtoro ijie pehe ne pihtisi, niahye angel.

³⁴ Tiquiro sa nigũ María pehe sinituahye:

—¿Ðũhse yũhũ manũ mariedapegota pohna tiboagari yũhũ? niahye ticoro.

³⁵ Ticoro sa nigũ angel pehe yahuahye:

—Espíritu Santo mähäre pohna tigü yerota. Sa yero Cohäcjü tiquiro tutuaye ehmeo curua yero saha ahtarota mähäre. Sa ye “Cohäcjü macano ijire”, nieta masa mähü macäre ñañe yerariquirore. ³⁶⁻³⁷ Cohäcjü ijipihtiyere ye masine. Sa yero mähü acayoro Elisabe бисного ijieperota nijinogäre bocari ticoro gähü. Ticoro pohna tirota umänogäre. Masa ticorore “Pohna marienico ijire”, tiquina nidicoro, yojopäre seis asüri waro wahare nijino ticoro bocari bato, niahye angel Mariare.

³⁸ Tiquiro sa nigü María yähtiahye:

—Yähäre tühoya. Mari pühtoro tiquiro cahacjõ ijiaja yähü. Mähü nidiro saha yähäre sa wahaahro, niahye ticoro.

Ticoro sa nidi bato angel wahaahro wahahye.

María Elisabere ihñano wahahye

³⁹ Tiquiro sa nidi bato María сәнү cjä ijiri yehpapü Judea yehpapü ijiri macapü sojaro mehna wahaahro wahahye. ⁴⁰ Topü esaro, Zacaria ya wühapü sajāno, “¿Ne, ijiajari?” niahye ticoro Elisabere. ⁴¹ Ticoro sa nigü Elisabe tühogüta, ticoro macano pehe niji suhtiropü ijiriquiro ñuhmiahye. Elisabe Espiritu Santo dutiro sahata ye pehoricoro ijero, tiquiro tutuayere сгоричоро ijiahye. ⁴² Sa yero tutuaro bucueye mehna ticoro tutuaro yahuducuahye.

—Ijipihtiyequina numia yähüoro mähäre quehnoano yeri Cohäcjü. Mähü macü gähäre quehnoano yeri Cohäcjü. ⁴³ Cuehi, yähü pühtoro pacoro yähü cahapü ahtagü quehnoano yeri yähäre Cohäcjü. ⁴⁴ Mähü yähäre “¿Ne, ijiajari?” mähü nigü yähü macü pehe niji suhtiropü ijiriquiro bucueye mehna ñuhmiahti yähäre. ⁴⁵ Cohäcjü tiquiro nidiro sahata yerota. Sa yero tiquiro yahurire

tühorigo ijigo bucuego ijire mähü, niahye Elisabe.

⁴⁶ Ticoro sa nigü María yähtiahye:

“Cohäcjü quehnoariquiro, tutuariquiro ijire”, niaja. Yähü quehnoano jeripohna tiaja. ⁴⁷ Cohäcjü yähäre pecapü wahaborigore yedohoriquiro ijire. Sa yero yojopäre yähäre quehnoano bucueye mehna ijigü yere. ⁴⁸⁻⁴⁹ Yähäre tiquiro cahacjõre wacüri jiri. Cohäcjü tutua yähüariquiro quehnoañe dihitare yähäre yedohori. Sa ye yojopäre “Ticorore Cohäcjü quehnoano yeri”, ijipihtiyequina masa sa ni, yahuducueta yähäre. Cohäcjü ñañe marieniquiro ijire. ⁵⁰ Ijipihtiyequina tiquirore ño peoyequinare tiquiro paja ihñariquiro ijire. ⁵¹ Cohäcjü tiquiro tutuaye mehna yeahye. “Apequinare masi yähüdücaja”, niñequinare yähüdücahye tiquiro. ⁵² Pühtoare cohähäre tiquiro. Sa yero cahacjēna pehere pühtoa yero saha cūahye tiquinare. ⁵³ Ujüa ahbayequinare tiquiro quehnoañe ihayere ohoahye. Sa yero peye doeri cjē сюyequinare doeri cjē сюeragü yeahye tiquiro. ⁵⁴⁻⁵⁵ Mari ñecusumäa iji turiayequina munare tiquiro yahu cüriro sahata ye pehoahye Cohäcjü. “Pecapü wahaboriquinare yähüoutja”, tiquiro ni yahu cüriro sahata ye pehoahye. Sa yero tiquiro cahacjēnare Israe masare tiquiro yedoahoahye. Abrahā munanore mari ñecusumäa munare

ijipihtiyequina tiqiro acaye tiqiro bato ijiye-
quina gāhare Cohācjū
ijipihtiyē decori sa paja
ihñaducuriqiro ijie tiahye.
Tiqinare tiqiro yahu
cūrire boerahye Cohācjū,
niahye María.

⁵⁶ Ihtia asū waro Elisabe mehna
ijiahye. To puno ticoro ijiri bato
ticoro ya macarū tojoaa wahahye
María.

Ñu masa bajuahye

⁵⁷ Elisabe ticoro nihi wahcō,
pohna tiahye. Ticoro macūno
masa bajuahye. ⁵⁸ Sa yero Cohācjū
ticorore tiqiro sa yegū ticoro
ya maca cjēna ticoro acaye gūhu
ticoro mehna bucueahye. ⁵⁹ Ocho
decori tiqiro masa bajuari bato,
tiqiro pacūsumūa tiqirogāre
cuhnucunū sohtoa cahserogāre
yūhre ne dutiye tee niahye. Sa
yeye tiquina mehna cjēna tiquina
caharū esahye tiquina yūhre negū
ihñañe tehe. Tiquina mehna cjēna
Zacaria tiqiro pacūro wamene
tiqirogāre wame ye duamahye.
⁶⁰ Tiquina sa wame ye duepegāta
tiqiro pacoro ohō saha niahye:

—Tiqiro pacūro wamene
wame yeraja. Ñu wame yematja
tiqirogāre, niahye ticoro.

⁶¹ —Mūhu acaye ne ihcāqiro Ñu
wame tiriqiro mariedare, niahye
tiquina ticorore.

⁶² Sa ye tiquina omocari mehna
yahuducu, Zacariare sinituahye
tiquina:

—¿Mūhu waro dūhse wame ye
duajari mūhu macare? ni, sinitu-
ahye tiqirore.

⁶³ Tiquina sa nigū tiqiro pehe
ojoari pjīne sini, ñehe, ojoahye:
“Yūhu macū Ñu wame tirota”, ni,
ojoahye Zacaria. Tiqiro sa ni
ojoagū tiquina pehe tūho maria
wahahye. ⁶⁴ Tiqiro sa ni ojoari
bato tiqirore yahuducugā yeahye

Cohācjū. Sa yero tiqiro yahudu-
cua wahahye.

—Cohācjū tutuariqiro, quehnoariqiro
ijire, niahye tiqiro.

⁶⁵ Tiqiro sa ni yahuducugū
tūhoye to cjēna tūho maria wa-
hahye. Sa ye ahri ijipihtiyere Judea
yehpa cjēnare cūnū cūwatoa ijiye-
quinare masa yahu siteahye. Sa
ye masa to cjēna quehnoano masi
pihtia wahahye. ⁶⁶ Ijipihtiyequina
tire tūhoye wacūahye. “Cohācjū
tutuayere ahriqirogā cūore. Sa
yero ihyo ijiriqiro ijisi tiqirogā”,
ni, tūhotuahye masa.

Zacaria Cohācjūre ño peoahye

⁶⁷ Sa yero tiqiro pacūro Zacaria
Espíritu Santo dutihiro sahana ye
pehoriqiro ijiro tiqiro tutuayere
cūoriqiro ijiro Cohācjū yere
yahuahye:

⁶⁸ Cohācjūre ño peouhna mari.
Mari Israe masa tiqiro
yequina ijiaja mari. Sa
yero mari caharū wi-
hiro, marine yedohoro
quehnoano yūhdūgū yerota.
⁶⁹ Sa yero Cohācjū tutu-
ariqirore marine pecarū
wahaborinare quehnoano
yūhdūgū yeatiqirore ohori
jiri. Marine quehnoano
yūhdūoatiqiro tiqiro
acayūro mūnano Davi ijire.
Davi mūnano pehe marine
yūhdūoatiqiro cahacjūno
ijire. ⁷⁰ Panorū tiqiro
yere yahu māhtariquinare
Cohācjū ohō sahana ni
ahrire yahu dutiahye.
⁷¹ Marine ihña tuhtiyē-
quina marine ñano tiquina
ye duagū ihñano “Mūsare
yedohoutja”, ni, cūahye
Cohācjū marine. ⁷² Mari
ñecūsumūa mūnare “Mūsare
paja ihñagū, yedohoutja.
Mūsare yūhu yahu cūrire
wacūtja”, niahye Cohācjū

mari ñecusumua iji turi-
ayequina mñanare. Ti
pjeppure tiqiro nidiro
sahata marine yojopure
yere. ⁷³⁻⁷⁵ Ohõ saha ni
cũahye Cohãcjũ panopure
Abrahãre: “Mũhu acaye
camerũ ijiyequinare ihña
tuhtiyequina tiquina ijigũ
cohãntja. Sa yegũ mũhu
acayere yedohoutja. Sa
ye tiquina cuero marieno
yũhu dutiyere ye masieta.
Sa yegũ tiquina ñañene
yũhu cohãgũ, tiquina yũhu
ihñonopũ ijipihitiye decori
quehnoañequina ijiducuetã”,
ni, yahu cũahye panopũ
Cohãcjũ mari acayuro
mñanore Abrahãre, niahye
Zacaria.

Sa ni tuhasa tiqiro macunore
ohõ saha niahye:

⁷⁶⁻⁷⁷ Macũ, mũhure ohõ saha
nieta masa: “Cohãcjũ tutua
yũhdũariqiro tiqiro yere
yahu mũhtariqiro ijire”,
nieta mũhure. Sa yegũ
mũhu mari pũhtoro Cristo
pano wahayugũta mũhu.
Sa wahagũ ohõ saha ni
yahugũta mũhu. “Cohãcjũ
mũsa ñañene cohãno, pecarũ
wahaborinare yũhdũorota
mũsare”, ni, yahugũta
mũhu. Sa ni yahugũ mari
pũhtoro tiqiro ahtatire
yahuyugũ nigũta mũhu.
⁷⁸ Cohãcjũ pehe marine tutu-
aro paja ihñariqiro marine
quehnoano yeriqiro ijiro,
tiqiro marine pecarũ wa-
haborinare yũhdũo duare.
Marine yũhdũoro ahtarõ
Cristo mari caharũ ahtarõta.
⁷⁹ Ijipihitiyequina marine
pecarũ wahaborinare
yũhdũo duare tiqiro. Sa
yero Cohãcjũre masiena
mari ijigũ ihñano marine
masigũ ye duare tiqiro.

Sa yero mari quehnoano
ihcãno mehna mari ijiatire
yahurota marine, niahye
Zacaria.

⁸⁰ Sa yero Zacaria macũno
quehnoano pagũ tiriqiro
masahye. Sa yero Cohãcjũre
tuturo ño peohaye. Sa yero yoari
pje masa marienopũ ijie tiahye.
Israe masare buhe dũcaro topũta
ijie tiahye.

2

Jesu masa bajuahye

(Mt 1.18-25)

¹ Ti pjere ijipihitiye yehpari
cjẽna pũhtoro Augusto ijie tiahye.
Sa yero ijipihitiyequinare queo
dutihaye. ² Ahriquina masare
tiquina coã queo dũcagũ Siria
yehpa cjẽna pũhtoro Cirenio
wame tiriqiro ijiahye. ³ Sa ye
ijipihitiyequina tiquina ñecusumua
panopũ cjẽna ye macaripũ tiquina
wamene ojoa ohõne wahahye.
⁴ José gũhu Nazarepũ Galilea
yehparũ ijiri macarũ ijiriquina
waha, Judea yehparũ Belẽ wame
tiri macarũ esahye. Pũhtoro Davi
mñano panopũ cjũno tiqiro
masa bajarõro ijiahye Belẽ.
José Davi mñano panamino iji
turiariqiro ijiro Belẽpũ tiqiro
wamene ojoa ohõ dutiro wahahye.
⁵ Sa yero María tiqiro omoca
dũhteaticoro mehna topũ tiqiro
wamene ojoa ohõ dutiro esahye.
Ticoro pehere meheñe decorigã
dũhsahye nijino bajuato. ⁶ Sa yero
Belẽpũ esaro ticoro niji wahcõahye.
⁷ Topũre masa tiquina carĩni wũhu
ne esa tuhaerahye tiquinare.
Sa yero ticoro pohna ti tuhasa,
tiquiogãre suhtiro mehna coma,
wecua tiquina ihyari cohropũ, taa
bui tiquiogãre duhu peohaye.
Tiquiogã ticoro coã macũ ti
mũhtariquiogã ijiahye.

*Angele ovejare ihña ihboye-
quinare bajuahye*

8 Ti ñamine oveja tiquina ijiropu ovejare ihña ihboyequina tiquina yequina ovejare ihña ihboye ni-ahye. 9 Sa yero Cohãcjũ ohoriquiro angel tiquinare bajuahye. Tiquiro sa bajuagũ Cohãcjũ asi siteye tiquinare buhrioahye. Tiquiro sa asi sitegũ ihñañe, ovejare ihña ihboyequina cuea wahahye. 10 Tiquina sa wahagũ angel tiquinare yahuahye:

—Quehnoañe quitire musare yahugũ ahtaja. Ijipihtiequinare masare bucuegũ yerota ahri quití. Sa yena yũhũre cueracãhña mũa. 11 Mía ñamine puhtoro Davi mũnãno ya macapũ musare pecapũ wahaborinare yũhdũoatiquiro, Cristo Cohãcjũ ohoriquiro mari puhtoro masa bajua tuhasari. 12 Sa yero suhtiro mehna comariquirogã wecũa ihyari cohro bui tiquina duhu peoriquirogã mũa ihñatiquirogã tiquiro ijirota, ni yahuahye angel tiquinare.

13 Tiquiro sa nigũta peyequina umũse cjẽna iji mũhtariquiro angel mehna Cohãcjũre ño peoahye. Ohõ saha ni ño peoahye tiquina:

14 Cohãcjũre umũse cjãnore ño peouhna. Sa ye Cohãcjũ tiquiro cahĩnequina cuero marieno cahmequeno marieno quehnoano ijiahiro, ni, ño peoahye angele pari.

15 Sa ni tuhasa umũsepu tiquina mũjari bato ovejare ihña ihboyequina pehe tiquina basi cahme yahuducuahye:

—Ahrire Cohãcjũ marine tiquiro yahurire Belẽpu isa ihñaũhna, ni-ahye tiquina basi.

16 Sa niñe sojaro mehna waha wahahye. Tiquina Mariãre, Josere boca sa, nijinogãre wecũa ihyari cohropũ tiquina duhu peoriquirogãre ihñaahye tiquina. 17 Ovejare ihña ihboyequina tiquirogãre ihña tuhasa nijinogãre angel tiquiro yahurire yahuahye

apequnare. 18 Tiquina sa ni yahugũ ijipihtiequina tiquinare tũho maria wahahye. 19 Ahri ijipihtiyere María wacũ tũhotuahye. 20 Sa yeye ovejare ihña ihboyequina pehe angel tiquiro yahuriro saha ijigũ ihñañe, “Cohãcjũ tutu-ariquiro ijire”, ni bucueahye. Sa ni bucueye tojoaa wahahye.

Cohãcjũ wũhũpu Jesu pacũsmũa tiquirogãre neahye

21 Ihcã semana bato nijinogã tiquiro cuhnucunũ sohtoa cahserogãre yũhre ne tuhasa tiquirogãre tiquina Jesu wame yeahye. Jesure coã waro ticoro bocato pano angel pehe “Jesu wame yeya tiquirogãre”, ni yahu tuhasahye. Sa yeye tiquirogãre Jesu wame yeahye.

22-24 Cohãcjũ dutiye Moise tiquiro yahuriro saha yeye tehe, José, María mehna Jerusalẽpu wahahye. Topũ wahahye María ticoro pohna tiri bato pagũ quehnoaricoro ticoro tojoarire ihñono taro. Cohãcjũ dutiriro sahata tiquina minicjũare ohoye wahahye Cohãcjũre ño peoye. Ohõ saha dutiahye Cohãcjũ: “Bujuaare puaro ohoya yũhũre. O tiquina mariedagũ apequna boro minicjũare ohoya yũhũre ño peona”, ni dutiahye Cohãcjũ. Tiquiro dutiriro sahata yeahye tiquina ticoro pagũ quehnoari pagũ ticoro waharire ihñoñe taye.

Topũ wahaye tiquina Jesugãre neahye. Tiquirogãre Cohãcjũre “Ahriquirogã mũhũ yaquiro ijiatiquirogã ijire”, ni ihñoñe wahahye. Ohõ saha yeahye Cohãcjũ yere tiquina ojoari pũpu tiquiro ye dutiriro sahata. “Ijipihtiequina mũa pohna coã bajua mũhtañequinagãre Cohãcjũre ihñoña. ‘Ahriquirogã mũhũ yaquirogã ijiatiquiro ijire’, ni ihñoña”, ni dutiahye Cohãcjũ. Sa

ye tiquiro dutiriro sahata yeahye tiquina, Jerusalēpū ijiye.

²⁵ Ti macapū Simeo wame tiquiro ijiahye. Tiquiro quehnoariquiro, Cohācjāre ño peoriquiro ijiro, Israe masare Cohācjū yedohoatire coheriquiro ijiahye. Sa yero Simeo Espiritu Santo tiquiro nidiro saha yeriquiro ijiahye. ²⁶ Sa yero tiquiro yariato pano Cohācjū tiquiro ohoatiquirore Cristore tiquiro ihñatire yahuahye Espiritu Santo tiquirore Simeore. ²⁷ Sa yero Espiritu Santo tiquirore dutigū Cohācjū wuhapū sajāa wahahye. Tiquiro sajā sari bato Jesu pacasumua tiquina macanogāre ne sajāhye. Cohācjū tiquiro dutiriro sahata yeye niahye. ²⁸ Simeo pehe tiquirogāre wua ne, Cohācjāre ño peo, “Quehnoare”, ni, tiquiro mehna yahuducuahye.

Ohō saha niahye tiquiro Cohācjāre:

²⁹⁻³² Yojoḡpū pūritare pūhto, mūhu nidiro sahata masare pecapū wahaboriquinare yuhdūoatiquirore ohori jiri mūhu. Tiquiro judio masa ijieyequinare buhero mūhare quehnoano masigū yerota tiquinare. Masare yuhdūoatiquiro Israe masunore mūhu cūahye. Usā acayūrore Israe masunore mūhu cūgū ijipihtiyequina masiñe, “Israe masare quehnoano yere Cohācjū”, nieta masa. Ahriquirogā usāre yuhdūoatiquiro ijire. Sa yegū ahriquirogāre ihñā tuhasagū, yojoḡpūre quehnoano bucuegū yariūtja, niahye Simeo.

³³ Simeo tiquirogāre tiquiro sa nigū tiquirogā pacasumua pehe tūho maria wahahye. ³⁴ Sa yero Simeo tiquinare “Quehnoano ijiya mūsa”, nino tiquiro María Jesu pacore yahuahye:

—Cohācjū ahriquirogāre be-seahye. Sa beseriquirogā tiquiro ijiepegūta judio masa peyequina tiquirore yuhdūoatiquiro. Sa ye tiquina pecapū wahaeta. Sa yero judio masare peyequina tiquiro yuhdūoatiquiro gūhare Cohācjū beseri tiquirogāre. Tiquiro Cohācjū yere yahuriquiro tiquiro ijiepegūta masa peyequina tiquirore ñano ni yahuducuetā. ³⁵ Tiquina sa yegū apequina tiquina ñano wacūñene masieta. Sa yego mūhu tutuaro purīno yero saha bujūa witigota, niahye Simeo Mariāre.

³⁶ Topū Cohācjū yere yahu mūhtaricoro Ana wame tiricoro ijiahye. Ticoro Fanuel macono ijiro, Aser mūnāno ya curua cḡōno ijiahye. Bucūoro waro ijiahye. Ticoro nuhmino ijiro manū tiahye. Sa yero siete cūhmari waro ticoro manūno mehna ijiahye. To puno tiquiro ijiri bato ticoro manūno yariaa wahahye. ³⁷ Sa yero ochenta y cuatro cūhmari waro wape wihero ijie tiahye ticoro. Sa yero ticoro deco gūhare ñami gūhare Cohācjū yere yero taro siji, Cohācjū mehna yahuducu, Cohācjū wūhare ne wijiaera tiahye. ³⁸ Simeo tiquiro yahuducuri watoa ticoro tiquina cahapū wihiro, bucūero, Cohācjūre “Quehnoare”, niahye. Sa yero Jerusalē cḡēnare pecapū wahaboriquinare yuhdūoatiquirore cohteyequinare ticoro Jesugāre yahuahye peyequina masare.

José, María, Jesu mehna Nazarepū tojoaa wahahye tja

³⁹ Cohācjū dutiriro sahata ye tuhasaye, tiquina ya macapū Nazarepū tojoaa wahahye. Galilea yehpapū ijiahye ti maca Nazare. ⁴⁰ Sa yero Jesu quehnoano masa, tutuariquiro wahahye. Sa yero tiquiro quehnoano tūho masiniquiro ijiahye. Sa yero

tiquirore Cohãcjũ quehnoano yeahye.

Jesu coã wahmna dũcaro, Cohãcjũ ya wũhũpũ judio masare buheyequina mehna yahuducuro niahye

⁴¹ Cũhmaripe Jesu pacũsumna Jerusalẽpũ pascua decorire bose decorire ihñañe wahae tiahye.

⁴² Jesu doce cũhmari tiquiro cũogũ tiquina yeducuro sahata tiquina ijipihtiyequina Jerusalẽpũ wahahye.

⁴³ Sa yeye bose decorire ihña tuhasa tiquina ya macapũ tojoaa wahahye tja. Tiquina sa tojoepẽgũta Jesu pehe Jerusalẽpũ tojoa cãhye. Tiquiro pacũsumna tiquiro tojoa queherire masiedahye. ⁴⁴ “Tiquiro mari mehna cjẽna mehna ijiaga”, ni tuhutumahye tiquina. Sa ye tiquina ihcã deco waro Jesu marieno wahamahye. Sa ye tiquina Jesure tiquina acaye watoa macamahye. ⁴⁵ Ne bocaerahye. Sa ye tiquina Jerusalẽpũ tiquirore macañe wahahye.

⁴⁶ Ihtia deco bato Cohãcjũ wũhũpũ tiquirore boca sahye. Sa yero Jesu judio masare buheye-quinare tũho, tiquinare sinituro niahye. Sa ye cahme yahuducuye niahye. ⁴⁷ Tiquina ijipihtiyequina Jesure tuhoye quehnoano masiniquirogã tiquiro ijigũ ihñañe, tiquina tũho maria wahahye. ⁴⁸ Tiquiro pacũsumna gãhũ Jesure ihñañe, ihña maria wahahye. Sa yero tiquiro pacoro tiquirore ohõ saha niahye:

—¿Macũ, dũhsegũ sa yeajari mũhũ usãre? Mũhũ pacũsumna ohõ saha ni tuhutuu usã. “Tiquiro butia wahaga”, ni macaja usã mũhũre, niahye ticoro macũnore.

⁴⁹ Ticoro sa nigũ tiquiro pacũsumnaare yahuahye:

—¿Dũhsena yũhũre macajari mũsa? Yũhũ Pacũ yũhũre tiquiro

dutiro saha yegũ niaja. ¿Tire masiedajari mũsa? niahye tiquiro.

⁵⁰ Tiquiro sa niepegũta tiquina tũho ñehedahye.

⁵¹ Sa yero Jesu Nazarepũ tojoaa waha, tiquiro pacũsumnaare ne yũhdũdũcaerahye. Ahri ijipihtiyequina tiquiro yerire María quehnoano wacũahye. ⁵² Sa yero Jesu bũcna, quehnoano tũho masiniquiro wahahye. Sa ye Cohãcjũ, masa gãhũ “Quehnoariquiro ijire”, ni ihñañe tiquirore.

3

Ñu wame yeriquiro masare Cohãcjũ yere yahuahye

(Mt 3.1-12; Mr 1.1-8; Jn 1.19-28)

¹ Ti pjere tiquina pũhoro Tiberio wame tiriquiro pũhoro ijiri bato quince cũhmari wahahye. Sa yero Poncio Pilato wame tiriquiro Judea yehpa cjẽna pũhoro ijiahye. Sa yero Herode wame tiriquiro Galilea yehpa cjẽna pũhoro ijiahye. Tiquiro bahũro Felipe Iturea yehpa cjẽna, Traconite yehpa cjẽna gãhũ tiquina pũhoro ijiahye. Sa yero Lisania wame tiriquiro Abilina yehpa cjẽna pũhoro ijiahye. ² Sa ye Anás, Caifa mehna ijipihtiyequina pahia pũhoro ijiahye. Ahriquina ijipihtiyequina tiquina ijiri pjere Ñu Zacaria macũno masa marienopũ ijiriquirore Cohãcjũ pehe tiquirore tiquiro yere yahu dutiahye. ³ Sa yero Jordã wame tiri ma dũhtũ cahapũ ijiri yehparũ ijipihtiropũ Ñu buhero wahahye.

—Mũsa ñañe yeyere bujũa witiya. Yojoapũre quehnoañe pehere comesaya. Sa yena wame yenohrina ijiya. Mũsa sa comesagũ ihñaño Cohãcjũ mũsa ñañe yerire borota, ni, buhee tiahye tiquiro.

⁴ Isaia mũnãno panopũ cjũno Cohãcjũ yere yahu mũhtariquiro ojoariro sahata ahriquiro yojoapũre

yero niahye. Ohō saha ni ojoahye Isaia Ñu tiquiro buheatire:

Masa marienopu yahuducu sañuducuriquiro ohō saha ni buherota: “Mari puhtoro ahtato pano mahare mari quehnoyuriro saha quehnoana ijiyuya musa. Musa ñaño yerire bujua witiya. ⁵ Pe wuhturi, pe buhuari gũhure quehnoari paa mari yeriro saha, pari yawi ijiye maharine potoye mahari mari yeriro saha, ñaño maharine quehnoañe maharine mari yeriro saha, wetere musa coseriro saha musa ñaño yeyere duhuya. ⁶ Musa sa yegũ Cohãcjũ musare pecapu wahaborinare tiquiro yuñduogũ ihñaeta ijiptihiri yehpa cjẽna”, ninota tiquiro sañuducu yahuriquiro pehe, ni ojoahye Isaia manano panopure.

⁷ Masa peyequina Ñu cahapu wihiye tiquiro tiquinare wame yegũ cahmeahye tiquina. Sa yero tiquiro tiquinare yahuahye:

—Aña pari yero saha ña yuñduna, cue duhti duana ijire musa. Musa ñaño yerire bujua witi duerana Cohãcjũ musa ñaño buhirire tiquiro buhiri dahreato pano duhti masiedare musa. ⁸ Sa yena potota musa ñañene bujua witina ijina, quehnoañene came-sana ijina, quehnoañe pehere yeya musa. Ohō saha ni tuhotueracãhña. “Panopu cjãno Abrahã mari ñecu manano ijie tiahye. Sa yena tiquiro panamena ijina mari Cohãcjũ yequina ijiaja”, ni tuhotueracãhña musa. Musare niita niaja. Abrahã panamena iji turiana ijimene musa. Musa sa ijiepegũta ti musa sa ijiye duhseati ijierare. Cohãcjũ pehe ahri utã paca mehna Abrahã acayere dahre masine. Sa ye Abrahã acaye musa ijiye ihyo waro

ijire utã paca ihyo waro ti ijiro saha. ⁹ Ohō saha ijire: Masa yucari yero saha ijire. Cohãcjũ pehe yucarire quẽatiare comeare cuoriquiro yero saha ijire. Sa yero ñaño dũca tiye cjure dũte cohã, ti nuhcori gũhure dũte sure peho cãnota. Dũte sure tuhasa, pecapu ujũanota tiquiro ti cjure, nuhcori gũhure. Sata yerota masa gũhure tiquirore cahmeeñequinare, niahye Ñu masare.

¹⁰ Tiquiro sa nigũ tuhoye masa pehe tiquirore sinituahye:

—¿Dũhse yenatari usã? niahye tiquina Ñure.

¹¹ —Pu suhtiro cuoriquiro suhti mariediquirore ihcãno ohoya. Sa yena musa ihyaye cuona apequina gũhure ohoya, niahye Ñu.

¹² Meheñequinagã puhtoa ye iji-atire wapa ne cohteyequina wame yenohriquina iji duahye tiquina gũhũ. Sa yeye Ñu cahapu wihiye, tiquirore sinituahye:

—¿Buhegu, usã pehe dũhse yenatari usã? niahye tiquina tiquirore.

¹³ —Musa puhtoa tiquina dutiro punota masare wapa neña. Ni meho wapa ne nemoedacãhña, ni yahuahye Ñu tiquinare.

¹⁴ Apequina surara tiquirore sinituahye tja:

—¿Usã pehe dũhse yenatari? niahye tiquina tiquirore tja.

—Masa yere niñerure ehmedacãhña. Sa yena tiquina ye niñerure ni meho nedacãhña. Musare tiquina wapa yero punota bucueya, ni, yahuahye Ñu.

¹⁵ Masa Cristore Cohãcjũ tiquiro ohoatiquirore cohteye niahye. Sa yeye ohō saha ni tuhotu dũcahye tiquina Ñure. “Ahriquiro Ñu pehe Cristo ijiboaga”, ni tuhotumahye tiquina. ¹⁶ Tiquina sa nigũ tuhoro Ñu ijiptihyequinare yahuahye:

—Yũhũ bato yũhũ yũhdũoro tutuariquiro ahtarota. Quehnoa yũhdũariquiro ijire tiquiro. Tiquiro yero saha ijieraja yũhũ pehe. Sa yegũ tiquirore tũhotugũ, “Ihyo ijigũ ijiaja”, ni tũhotuaja yũhũ. Yũhũ pehe mũsare wame yegũ aco mehna wame yemi. Tiquiro pehe yũhũ yũhdũoro yerota. Espĩritu Santore masa mehna ijiducugũ yerota. Sa yero pecarũ ñañene tiquiro ujũa wero saha tiquiro ahtariquiro pehe mũsa ñano yeyere cose werota. ¹⁷ Yũhũ bato ahtariquiro trigo cahseri cohãriquiro yero saha ijire. Ti cahserire cohãriquiro tiquiro batiro mehna ijipihtiye trigo pjeri cahserire puti were. Sa ye tuhasa trigo pehere tiquiro ihbori wũhũpũ cũnota. Sata yerota tiquina ñañene bujũa witiyequinare yũhũ bato ahtariquiro. Tiquiro puti weri cahseri pehere ujũanota. Ti peca tiquiro ujũari peca ne yatisi. Sata yerota tiquiro yũhũ bato ahtariquiro tiquina ñañene bujũa witiyequinare, ni yahuahye Ñu.

¹⁸ Peye tiquiro sa ni yahuye mehna masare quehnoañe buheyere yahuahye Ñu. ¹⁹ Sa yero pũhtoro Herode pehe tiquiro bahũro Felipe namonore tiquiro namo tiri buhiri, pajiro ñañene tiquiro yeri buhiri gũhare Ñu tiquirore yahumahye. ²⁰ Tiquiro sa ni yahuri buhiri Herode pehe Ñure peresu yeahye, pari turi ñañene yero.

*Ñu Jesure wame yeahye
(Mt 3.13-17; Mr 1.9-11)*

²¹ Ñure tiquina peresu yeato pano apequina masare Ñu pehe wame yero niahye. Tiquinare wame yero Jesu gũhare wame yeahye. Sa yero Jesu diarũ ducuriquiro Cohãcjũre tiquiro sinino watoa uhmũse parĩ maa wahahye. ²² Sa parĩ maari bato

Espĩritu Santo bujua yero saha bajuriquiro Jesu buipũ dijia tahye. Tiquiro ahtagũ uhmũsepu yahuducuro ca tahye:

—Mũhũ yũhũ macũ yũhũ cahĩgũ ijire. Mũhũ mehna tutuaro bucueaja, nino ca tahye uhmũsepu.

*Jesu acaye panopũ cjẽna ijiahye
(Mt 1.1-17)*

²³ Jesu buhe dũcari cũhmare treinta cũhmari cũoahye tiquiro. “Tiquiro Josẽ macũno ijire”, ni, tũhotumahye masa. Josẽ pehe Elĩ macũno ijiahye. ²⁴ Elĩ Matat macũno ijiahye. Matat Levĩ macũno ijiahye. Levĩ Melqui macũno ijiahye. Melqui Jana macũno ijiahye. Jana Josẽ macũno ijiahye. ²⁵ Josẽ Matatĩa macũno ijiahye. Matatĩa Amõs macũno ijiahye. Amõs Nahũm macũno ijiahye. Nahũm Esli macũno ijiahye. Esli Nagai macũno ijiahye. ²⁶ Nagai Maat macũno ijiahye. Maat Matatĩa macũno ijiahye. Matatĩa Semei macũno ijiahye. Semei Josec macũno ijiahye. Josec Judá macũno ijiahye. ²⁷ Judá Joanán macũno ijiahye. Joanán Resa macũno ijiahye. Resa Zorobabel macũno ijiahye. Zorobabel Salatiel macũno ijiahye. Salatiel Neri macũno ijiahye. ²⁸ Neri Melqui macũno ijiahye. Melqui Adĩ macũno ijiahye. Adĩ Cosam macũno ijiahye. Cosam Elmadam macũno ijiahye. Elmadam Er macũno ijiahye. ²⁹ Er Josuẽ macũno ijiahye. Josuẽ Eliezer macũno ijiahye. Eliezer Jorim macũno ijiahye. Jorim Matat macũno ijiahye. ³⁰ Matat Levĩ macũno ijiahye. Levĩ Simeo macũno ijiahye. Simeo Judá macũno ijiahye. Judá Josẽ macũno ijiahye. Josẽ Jonam macũno ijiahye. Jonam Eliaquim macũno ijiahye. ³¹ Eliaquim Melea macũno ijiahye. Melea Mena macũno ijiahye. Mena Matata macũno

ijiahye. Matata Natán macuno ijiahye. ³² Natán Davi macuno ijiahye. Davi Isaí macuno ijiahye. Isaí Obed macuno ijiahye. Obed Booz macuno ijiahye. Booz Salmón macuno ijiahye. Salmón Naasón macuno ijiahye. ³³ Naasón Aminadab macuno ijiahye. Aminadab Admin macuno ijiahye. Admin Arni macuno ijiahye. Arni Esrom macuno ijiahye. Esrom Fare macuno ijiahye. Fare Judá macuno ijiahye. ³⁴ Judá Jacob macuno ijiahye. Jacob Isaac macuno ijiahye. Isaac Abrahã macuno ijiahye. Abrahã Taré macuno ijiahye. Taré Nacor macuno ijiahye. ³⁵ Nacor Serug macuno ijiahye. Serug Ragau macuno ijiahye. Ragau Peleg macuno ijiahye. Peleg Heber macuno ijiahye. Heber Sala macuno ijiahye. ³⁶ Sala Cainán macuno ijiahye. Cainán Arfaxad macuno ijiahye. Arfaxad Sem macuno ijiahye. Sem Noé macuno ijiahye. Noé Lamec macuno ijiahye. ³⁷ Lamec Matusalê macuno ijiahye. Matusalê Enoco macuno ijiahye. Enoco Jared macuno ijiahye. Jared Mahalaleel macuno ijiahye. Mahalaleel Cainán macuno ijiahye. ³⁸ Cainán Eno macuno ijiahye. Eno Sete macuno ijiahye. Sete Adán macuno ijiahye. Adán Cohãcjü yeriquiro ijiahye.

4

Watĩno ñañene ye dutimahye Jesure

(Mt 4.1-11; Mr 1.12-13)

¹ Jesu Espĩritu Santo dutiriro saha ye pehoriquiro ijiro, Jordã wame tiri ma cahapũ ijiriquiro tojoaa wahahye. Tiquiro sa tojoaa wahagũ Espĩritu Santo pehe tiquirore masa marienopũ neahye. ² Topũ esaro cuarenta decori ijiahye. Sa yero watĩno pehe Jesure ñañene yegũ cahmemahye. Sa yero

ñañene ye dutimahye tiquirore. Ti decorire ne Jesu ihyerahye. Sa yero ti decori pihtigã waro tiquiro ujũa ahbahye.

³ Tiquiro sa ujũa ahbagũ ihñano watĩno ohõ saha nimahye Jesure:

—Mũhu Cohãcjü macu ijigũ, ahria utãre ihyaye dojomehneña, nimahye Jesure.

⁴ Jesu ohõ saha ni yũhtiahye:

—Yeraja. Cohãcjü yere tiquina ojoari pũpũ ohõ saha nine: “Masare ihyaye mehna dihita catieraro cahmene. Ijipihtiye Cohãcjü ye yahuye mehna ijiro cahmene”, nine Cohãcjü, ni yũhtiahye Jesu watĩnore.

⁵ Tiquiro sa nidi bato watĩno pehe tiquirore cunũ uhmuanũ buipũ ne mũja saro, duita ijipihtiye macarine ihño dijioahye Jesure. ⁶ Sa ihñono Jesure yahuahye:

—Ijipihtiye ahri macari yũhure tiquiro ohori ijire. Sa yegũ yũhũ cahmediquirore oho masiaja. Sa yegũ ahri macarine, ahri macari cjẽnare dutiati gãhure, tiquina cũoye mehna mũhure ohoutja. ⁷ Yũhure mũhu ño peogũ ahri macari ijipihtiye macarine mũhure ohoutja, niahye watĩno Jesure.

⁸ Jesu ohõ saha ni yũhtiahye tiquirore:

—Mũhure ño peoraja. Ohõ saha nine Cohãcjü yere tiquina ojoari pũ: “Mũhu pũhtoro Cohãcjü dihitarẽ ño peoya. Tiquiro ye dutiye dihitarẽ yeya”, ni ojoahye Cohãcjü yere, niahye Jesu watĩnore.

⁹⁻¹¹ Tiquiro sa nidi bato Jerusalẽpũ watĩno pehe tiquirore ne cã, Cohãcjü wũhũ buipũ ne sahye. Ne sa tuhasa tiquirore ohõ saha nimahye:

—Cohãcjü yere tiquina ojoari pũ ohõ saha nine: “Cohãcjü tiquiro yequina angelere mũhure ihña ihbo dutirota. Sa yeye tiquina pehe mũhure ihña ihboeta, ‘Mũhũpũ

utāpᵃ pᵃhari', niñe", ni ojoahye Cohācjū yere tiquina ojoari pᵃpᵃ. Tiquiro sa nidi poto ijigū māhᵃ Cohācjū macᵃ ijigᵃ, yehpapᵃ uhpu dijia ihñoña yᵃhᵃre. Mᵃhᵃre tiquina yedohogū ihñoña yᵃhᵃre, nimahye watīno Jesure.

¹² Jesu uhpu dijia ihño dueraro ohō saha ni yᵃhtiahye tiquirore:

—Cohācjū yere tiquina ojoari pᵃ ohō saha nine: "Mᵃsa pᵃhtoro Cohācjū tiquiro nidire '¿Poto ijia-jari?' ni masi duana, Cohācjūre ye ihño duti tuhueracāhña", nine Cohācjū yere tiquina ojoari pᵃpᵃ, niahye Jesu watīnore.

¹³ Sa yero watīno ijipihtiye ñañene Jesure ye dutimahye. Sa duti tuhasaro mehenogā duhu cārīahye.

Galilea yehpapᵃ Jesu buhe dᵃcahye

(Mt 4.12-17; Mr 1.14-15)

¹⁴ Came Jesu Galileapᵃ tojoaa wahahye. Sa yero tiquiro Espíritu Santo tutuaye mehna yeahye. Topᵃ ijipihtiropᵃ masa tiquirore qᵃiti tiahye. ¹⁵ Judio masa buh-eye wᵃhᵃsepᵃ Jesu gᵃhᵃ buhee tiahye. Sa ye ijipihtieyequina masa tiquirore quehnoano yahuducuahye.

Nazare cjēna Jesure ne cahmedahye

(Mt 13.53-58; Mr 6.1-6)

¹⁶⁻¹⁷ Came Nazarepᵃ Jesu tiquiro masarirōpᵃta esahye. Topᵃ esa, saurú ijigū tiquiro sa yeducuriro saha judio masa tiquina buheri wᵃhᵃpᵃ sajā sahye. Topᵃ tiquiro Cohācjū yere tiquina ojoari pᵃre buhero taro topᵃ ducuahye. Tiquiro sa ducugū ihñañe to cjēna pehe Cohācjū yere yahu māhtariquiro Isaia mᵃnano tiquiro ojoari pᵃre tiquirore ohoahye. Ti pᵃpᵃ Jesu ahri yahuyere bocaro buheahye:

¹⁸ Cohācjū yaquiro Espíritu yᵃhᵃ mehna ijiro, yᵃhᵃre dutiri.

Tiquiro pejecᵃoyequinare quehnoañe buheyere yahu dutiro ohori yᵃhᵃre. Sa yero peresupᵃ ijieyequina gᵃhᵃre tiquinare tiquiro yᵃhdᵃoatire yahu dutiro ohori yᵃhᵃre. Caperi bajueyequina tiquina quehnoano ihñatire ohori yᵃhᵃre. Sa yero masa ñano tiquina yenohriquinare wioacjᵃre yᵃhᵃre ohori. ¹⁹ Mari pᵃhtoro Cohācjū tiquiro yequinare pecapᵃ wahaboriquinare tiquiro yᵃhdᵃoatire yᵃhᵃre yahu dutiro ohori, ni buheahye Jesu.

²⁰ Sa ni buhe tuhasa Jesu ti pᵃre quehnoari tunu torē, wᵃhᵃ cjānore wia tuhasa, nuju sahye. Tiquiro nuju sagū ihñañe topᵃ ijieyequina ijipihtieyequina tiquiro dihitare ihñahye. ²¹ Tiquina sa yegū tiquiro tiquinare yahu dᵃcahye:

—Ahri mianogāta yᵃhᵃ buhero saha Cohācjū tiquiro nidiro sahata waharo nine, niahye Jesu.

²² Tiquiro sa nigū tᵃhoye "Ahriquiro quehnoariquiro ijire", ni tᵃhotuahye tiquina. Sa yeye tiquina tiquiro quehnoano yahuducugū tᵃhoye, tᵃho maria wahahye. Sa yeye ohō saha niahye tiquina basi:

—¿Yohnah, José macᵃno ijierajari ahriquiro? niahye tiquina basi.

²³ Tiquina sa nigū masino Jesu yahuahye tiquinare:

—Yᵃhᵃ buheyere tᵃho duerana, ohō saha ni tᵃhoture mᵃsa yᵃhᵃre: "Duturu dohatiro tiquiro basi aco ti masine duturu waro tiquiro ijiyere ihñoño. Mᵃhᵃ gᵃhᵃ duturu tiquiro ye ihñoño saha māhᵃ nidiro saha ijigᵃ Cohācjū tutuaye mehna ye ihñoña usāre. Capernaupᵃre Cohācjū tutuaye mehna ye ihñoñohti māhᵃ. Usā gᵃhᵃre sa ye ihñoña, māhᵃ buheyere 'Poto tjire',

usã niato saha”, ni duare masa yahure. ²⁴ Ahrire yahutja masare. Cohãcjũ yere yahu mahitariquirore tiquiro ya maca cjẽna ño peoerare. Sa yena yahure ño peoerare masa ohõpũ yahũ masarigũ ijigũ. ²⁵ Sata ijiahye panopũre. Panopũ Elia tiquiro ijiri pjere ihtia cahma ape cahma deco waro ne acoro ahtaerahye. Sa yero ijipihtiropũta ne ihyaye mariedahye. ²⁶ Ti pjere peyequina wape wiha numia Israe yehpapũ tiquina ijiepegũta Cohãcjũ Elia mananore tiquinare yedoho dutiro ohoerahye. Tiquiro ya macare sa ye dutieraperota ape yehpapũ Sidõ cahapũ ijiri macapũ Sarepta wame tiri maca cjõno wape wihorore yedoho dutiro Elia mananore ohoahye Cohãcjũ. ²⁷ Came Cohãcjũ yere yahu mahitariquiro Eliseo manano tiquiro ijiri pjere Israe yehpapũ peyequina cami bucũ muna wiha tiquina ijiepegũta ihcãquiro Israe masunore ne quehnoa wahagũ yerahye Eliseo manano. Tiquiro ya yehpa cjẽnare yeraperota Naamãn wame tiriquiro Siria yehpa cjẽno dihitare quehnoa wahagũ yeahye tiquiro. Sa yero Israe masare yedohoeraro, Israe masa ijieyequina pehere yedohoahye Cohãcjũ, niahye Jesu tiquinare.

²⁸ Tiquiro sa nigũ tũhoye ijipihyequina ti wũhũpũ ijieyequina usua yahũna wahahye. ²⁹ Sa yeye tiquina wahcãdũca, Jesure ne wijia, ti maca dũhtũ cahapũ ijiri cũnũpũ tiquirore tũdoque dijio duamahye. ³⁰ Tiquina sa ye duepegũta Jesu tiquina watoata wahaa wahahye.

Watĩnore cũoriquiro Jesure piti cahye

(Mr 1.21-28)

³¹ Came Jesu Galilea yehpapũ ijiri macapũ Capernaũ wame tiri macapũ esa, saurũ ijigũ masare buheahye. ³² Quehnoano masi

pehoriquiro tiquiro buhegũ tũhoye masa tũho maria wahahye. ³³ Ti wũhũpũ watĩnore cũoriquiro ijiahye. Tutuaro sañuducuahye:

³⁴ —Mũhũ Jesu Nazare cjũ usãre cariboeracãhña mũhũ. ¿Dũhse yegũ tagũ nijari usãre? ¿Mũhũ usãre butigũ yegũ tagũ nijari? Cohãcjũ macũ, quehnoagũ mũhũ ijigũ yahũ masiaja, ni sañuducuahye Jesure.

³⁵ Tiquiro sa nigũ tũhoro Jesu tuhtiahye watĩnore:

—Dihta mariahña. Duhuya tiquirore, niahye Jesu.

Tiquiro sa nidi bato masunore watĩno pehe yehpapũ doque quehe sa tunugũ yeahye. Tiquiro sa yeri bato tiquiro pehe quehnoa wahahye. ³⁶ Topũ ijieyequina ijipihyequina tiquiro sa wahagũ ihñañe, ihña maria wahahye. Sa ye tiquina basi ohõ saha ni yahuducuahye:

—¿Yabe boro buheye ijiajari ahri sa wahagũ yeye? Yohnah. Tutuaro mehna pũhtoro yero saha ahriquiro watĩare dutire. Sa yeye tiquiro dutiro sahata tiquina masare duhure, ni yahuducuahye tiquina basi.

³⁷ Tiquiro sa yegũ ihñañe ti yehpapũ ijipihropũ masa Jesure quitidahreahye.

Jesu Simo Pedro mareonore dutire yũhdũoahye

(Mt 8.14-15; Mr 1.29-31)

³⁸ Judio masa tiquina buheri wũhũre wijia, Simo ya wũhũpũ sajã sahye Jesu. Topũ Simo mareono dohatiro niahye. Tutuaro ujuaye tiahye. Sa ye tiquina ticoro dohatigũ yahuahye Jesure.

³⁹ Tiquina yahuri bato tiquiro ticoro cahapũ esa, ujuayere suru dutiahye. Tiquiro sa suru dutiri bato ticorore ujuaye surua waha, duita quehnoa wahahye. Ticoro sa waharo wahcã nuju sa, ticorota tiquinare ihyayere peoahye.

Peyequina dohatiyequinare yuhduoahye Jesu
(Mt 8.16-17; Mr 1.32-34)

⁴⁰ Asā sajāri bato ijipihtiyequina masa tiquiro cahapū ijiyequina dohatiyequinare Jesu cahapū ne sahye. Dohatiyequina peyequina sijoro saha ijiye dohatiyere cūoahye. Sa yero Jesu tiquiro omocari mehna tiquina bui ña peo, ijipihtiyequinare tiquina dohatiye quehnoano yuhduoahye. ⁴¹ Watia gūhure Jesu duhu dutigū tiquina duhuye sañuducuahye:

—Mūhū potota Cohācjū macū ijire, niahye tiquina Jesure.

Jesu Cohācjū ohoriquiro tiquiro Cristo ijigū watia masiahye. Sa yero Jesu tiquinare yahuducu dutierahye, “ ‘Cristo ijire’, ni yahu siteari”, nino.

Galilea yehpapū buheahye Jesu
(Mr 1.35-39)

⁴² Bohrea māja tagū Jesu ti macapū ijiriqiro waha, masa marienopū esahye. Tiquiro sa esari bato masa tiquirore maca cā, boca saye, ohō saha niahye:

—Usā ya macapū tojoaya usā mehna. Ape sie wahaeguta, nimahe tiquina Jesure.

⁴³ Tiquina sa niepegāta tiquiro pehe ohō saha ni yūhtiahye:

—Cohācjū tiquiro pūhtoro ijiyere quehnoañe buheyere apeye macaripū gūhure buhe duaja yūhū. Cohācjū yūhure ohori tire yahuacjūre, niahye Jesu tiquinare.

⁴⁴ Sa yero Judea yehpapū ijiye wūhūsepū, judio masa tiquina buheye wūhūsepū tiquiro buhe tini-ahye.

5

Jesu tiquiro buheyequinare peyequina wahi wejēgū yeahye
(Mt 4.18-22; Mr 1.16-20)

¹ Ape deco Jesu Genesare wame tiri ditara dūhtū cahapū esahye.

Topū tiquiro ijigū ihñañe peyequina masa Cohācjū yere tūho duaye tiquirore nūnū tā sahye. Quehnoano wahpa dūca saa wahahye masa pari. ² Pūa yucūsa padaropū pahsaye yucūsarire Jesu ihñahye. Ti yucūsari cjēna yohyeequina maja sadūca, tiquina wēñecjūre coseye niahye. ³ Sa yero Jesu Simo yariapū sajāhye. Sajā tuhasa tia yucūsare dia dūhtū cahapū cuñariare weje buho dutiahye. Sa yero yucūsapū duji, masare buheahye. ⁴ Buhe tuhasa, Jesu Simore ohō saha niahye:

—Deco cjūnogā tu wioya. Sa yena mūhū mehna cjēna mehna mūsa wēñecjūre doque ñoña wahi ñeheanaja, niahye Jesu.

⁵ Tiquiro sa nigū tūhoro Simo Jesure yūhtiahye:

—Pūhto, wahi wejē bohreami usā mia ñamine. Bohreepenata ne ihcāquirogā wejēdahti usā. Sa wejēdapenata mūhū dutiro saha doque ño tuhunata, ni yūhtiahye Simo.

⁶ Sa ni tuhasa tiquina doque ñoahye. Sa tiquina doque ñogū tiquina wēñecjūre peyequina wahi sajāhye. Peyequina tiquina sajāgū wēñecjū tūhnūa wahamahye. ⁷ Sa wahagū ihñañe aperia cjēnare tiquina mehna cjēnare pijioahye.

—Mūsa gūhū yedohona ahtaya usāre, ni pijioahye Simo gūhū.

Tiquina sa yedohori bato pūaria yucūsa quehnoano miniparo bocahye wahire. ⁸ Simo Pedro sa wahi peyequina tiquina sajāgū ihñano, Jesu cahapū dūsepe curi mehna quehe sa, tiquirore niahye:

—Yūhū pūhto, mūhū mehna iji-bogū ijieraja yūhū. Ñagu ijiaja yūhū. Sa yegū yūhure duhuya, niahye Simo Jesure.

⁹ Tiquiro, ijipihtiyequina tiquiro mehna cjēna gūhū peyequina wahi sajāgū ihñañe, ihñā maria wahahye tiquina gūhū. ¹⁰ Pūaro Simo mehna

cjēna Zebedeo pohne Santiago, tiquiro baharo Ñu mehna, tiquina gāhū ihña maria wahahye. Tiquina sa ihña mariagū ihñano Jesu Pedreiro yahuahye:

—Ihña mariedacñña. Yojoꝑure mūhū wahire ñehe cahmecoagu mūhū ijiro saha Cohācjū yequina ijiatiquinare piji cahmecoagu ijigata mūhū, niahye Jesu Simore.

¹¹ Tiquiro sa nidi bato tiquina yucsarire ditara dūhtū cahapū weje mo cū cā, tiquina ye ijipihiyere topūta cū cā, Jesu mehna wahaa wahahye.

Jesu camī būcū mūna wihirore camī yatigū yeahye

(Mt 8.1-4; Mr 1.40-45)

¹² Jesu ape macapū tiquiro ijigū camī būcū mūna wihiro tiquirore piti cahye. Sa piti caro tiquiro Jesure ihña, dūsepe curi mehna quehe sa, tutuaro siniahye:

—Pūhto, mūhū yūhūre yūhdūo duagu yūhdūoya, ni siniahye.

¹³ Tiquiro sa nidi bato Jesu tiquirore ña peoro ohō saha niahye:

—Tire ye duaja. Yojoꝑū quehnoagu ijīya mūhū, niahye.

Tiquiro sa nigūta tiquiro camī ahbari yatia wahahye. ¹⁴ Sa yero Jesu tiquirore dutiahye:

—Ahri yūhū ohō saha yerire apequinare yahueracñña. Pahi cahapū wahaya yojoꝑure. Sa yegū mūhū pagūre quehnoari pagū waharire ihñoña tiquirore. Cohācjū dutiye Moiserere tiquiro cūri nidiro saha yeya. Sa yegū pahire pūaro minicjūare ohoya mūhū camī yūhdūgūre ijipihiyequinare ihñogū tūhū, niahye camī būcū mūna cūomediquirore.

¹⁵ “Yahueracñña”, tiquiro sa niepegūta ijipihitropū masa Jesure quiti dahre nemoahye. Tiquina sa quiti dahregū tūhoye masa peyequina tiquiro cahapū esahye. Dohatiyequina yūhdū

duaye, tiquina gāhū tiquiro cahapū esahye. ¹⁶ Tiquina sa esaepegūta Jesu masa marienopū Cohācjūre sinino wahaa wahahye.

Jesu tini masieniquirore yūhdūoahye

(Mt 9.1-8; Mr 2.1-12)

¹⁷ Ape deco Jesu buhegū fariseo masa, judio masare buheyequina gāhū topū dujahye. Tiquina peye macari Galileapū ijīye macari cjēna, Judeapū ijīye macari cjēna, Jerusalē cjēna ijīahye. Sa yero Jesu Cohācjū tutuaye mehna dohatiyequinare yūhdūoahye.

¹⁸ Meheñequinagā ūmūa tini masieniquirore tiquiro cuñari cahsero mehna yō wūa wihiahye. Sa yeye tiquirore Jesu cahapū cū duaye, wūhūꝑū yō sajā duamahye tiquina tiquirore. ¹⁹ Sa sajā duepeta masa peyequina ijigū tiquina tiquirore yō sajā masiedahye. Sa yeye tiquirore wūhū buipū yō mūjahye. Yō mūja sa, mehenogā pōo we, ti copeꝑū tini masieniquirore tiquiro cuñari cahsero mehna duhū dijioahye Jesu cahapū ijīyequina watoa. ²⁰ “Jesu ahriquirore tiquiro dohatiyere yūhdūgū yerota”, ni tūhotuahye tiquina. Tiquina sa ni tūhotugū masino Cohācjūre tiquina wacū tutuayere masino, Jesu tini masieniquirore ohō saha ni yahuahye:

—Yūhū acayū, mūhū ñañe yeyere yūhū cohā tuhasū, niahye Jesu tiquirore.

²¹ Tiquiro sa nigū tūhoye fariseo masa, judio masare buheyequina gāhū tiquina basi ohō saha ni tūhotumahye: “Ahriquiro sa ni yahuducueracñhdo. Masūno mari yero saha ijiro, tiquiro ñañe yeyere cohā masiedare. Cohācjū dihita masa tiquina ñañe yeyere cohā masine”, ni, tūhotumahye tiquina.

²² Jesu tiquina tūhotuyere masino, ohō saha niahye:

—¿Duhse yena sa ni tuhoutuajari musa? ²³ “Muhu ñañe yeyere yuhu cohã tuhasaja”, yuhu nigã, “Ni mehogu ijire”, yuhure nine musa quehnoano masiedapenata. “Wahcãduca wahaya”, yuhu nigã tiquiro tinigã ihñana yuhu nidi poto ijigã duita masinata. ²⁴ Yuhu masu Cohãcjũ ohorigu ahri yehrapu ñañe yeyere cohã masiaja yuhu. Masa tiquina ñañe yeyere cohãcjũre cãri Cohãcjũ yuhure. Yuhu sa cohãrire musa masiato saha ohõ saha ye ihñoutja musa ihñatire, niahye Jesu.

Sa ni tuhasa tini masieniquiروه ohõ saha niahye:

—Muhure niita niaja. Wahcãducaya. —Dohatieyequina duturure macaedare. Dohatieyequina dihita duturure macare. Ñañequina dohatieyequina yero saha ijire.

²⁵ Tiquiro sa nigã tuhoroa ijipihtieyequina tiquina ihñonopu wahcãduca, tiquiro cuñari cahserore ne, tiquiro ya wuhuru tojoa wahahye. Sa waharo tiquiro Cohãcjũre ño peoro, bucueye mehna quehnoano yahuducuahye. ²⁶ Tiquiro sa yegũ ihñañe masa pehe ijipihtieyequina ihña maria wahahye. Tiquina ihña maria waha, Cohãcjũre ño peoye, bucueye mehna quehnoano yahuducuahye:

—Miare sijoro saha ijiyere ihñau mari, niahye tiquina.

Jesu Levíre pijiahye

(Mt 9.9-13; Mr 2.13-17)

²⁷ Sa ye tuhasa waha, Leví wame tiriquire tiquiro dahrari tucũpu ijiriquire boca sahye Jesu. Leví pehe puhto ya ye ijiatire masare wapa ne cohteriquiro ijiahye. Sa boca saro tiquire ohõ saha niahye:

—Yuhu mehna cjũ ijiacju ahtaya, niahye tiquiro Levíre.

²⁸ Tiquiro sa nigã Leví pehe ijipihitiye tiquiro dahrayero duhu cã, Jesu mehna waha wahahye.

²⁹ Came Leví ya wuhuru Jesu ya bose deco yeye niahye. Topu peyequina wapa ne cohtieyequina, apequina Leví gũhu mehna dujahye. ³⁰ Tiquina mehna Jesu gũhu dujigã ihñañe meheñequinagã fariseo masa, judio masare buheyequina mehna usua, Jesu buheyequinare sinituahye.

—¿Duhse ñano yeyequina, wapa ne cohtieyequina mehna ihyajari musa? ni tuhtiahye tiquina.

³¹ Tiquina sa nigã tuhoro Jesu yuhtiahye tiquinare. Ohõ saha ni queoye mehna buheahye:

—Ñu buheyequina peye tahari Cohãcjũre ño peoye tehe, sijire. Sa yeye, tiquina peye tahari Cohãcjũre sinine. Fariseo buheyequina gũhu tiquina yero saha yere. Tiquina sa yepegãta muhu buheyequina pehe ihya, sihnine. Sa ye Cohãcjũre ño peoye tehe, sijierare. ¿Duhse yeye sa yerajari tiquina? niahye tiquina Jesure.

³² Sa yegu ñañequina dihitare tiquina ñañene bujua witi dutigu, quehnoañe pehere comesagã yegu tuu nii yuhu. Tiquina basi “Quehnoana ijiaja usã”, ni tuhutueyequinare yedohogu ahtaera yuhu, niahye Jesu.

Sijiyere Jesure sinituahye apequina

(Mt 9.14-17; Mr 2.18-22)

³³ Sa yeye meheñequinagã masa Jesure ohõ saha ni sinituahye:

—Ñu buheyequina peye tahari Cohãcjũre ño peoye tehe, sijire. Sa yeye, tiquina peye tahari Cohãcjũre sinine. Fariseo buheyequina gũhu tiquina yero saha yere. Tiquina sa yepegãta muhu buheyequina pehe ihya, sihnine. Sa ye Cohãcjũre ño peoye tehe, sijierare. ¿Duhse yeye sa yerajari tiquina? niahye tiquina Jesure.

³⁴ Tiquina sa nigã Jesu tiquiro tuhutueye mehna quitu dahre buhero taro tiquinare ohõ saha ni yuhtiahye:

—Ohõ saha ijire ti: Omoca dahreropu tiquina pijioriquina omoca dahreriquiro mehna ijiye,

siji masiedare. Sata yuhū buheye-quina gūhū yuhū mehna ijiye, siji masiedare. Yuhū omoca dāhteriquiro yero saha ijiāja. Omoca dāhteriquiro bose deco tiquiro yegū tiquiro mehna cjēna ihyeyequina ijierare. ³⁵ Yuhū Pacu Cohācjū yahūre tiquiro nedi bato pūritare yuhū buheyequina mehna ijisi yuhū. Sa yeye ti pjerūta yuhū buheyequina gūhū sijieta, niahye Jesu.

³⁶ Panopū cjē buheye wahma buheye mehna tiquina buhe more duagū ihñano ohō saha ni nemoahye Jesu tiquinare queoye mehna buhero.

—Ne wahma suhtirore meheni cahserogā tūhrē ne, mūna suhtirore sere ohōno cahmedare. Mari sa sere ohōna wahma cahserore tūhrē cohāna niaja. Sa yero wahma cahsero mūna suhtiro mehna ihcāno saha bajuerare. ³⁷ Sa yena ne ūhse co bisiyē core wahiquiro cahsero ajuropūre mūna ajuropūre pose yero cahmedare. Sa yegū ūhse co bisiyē pahmuñepū mūna ajurore tūhrē cāhre. Sa tūhnūgū ūhse co gūhū, ajuro gūhū cohāa wahare. ³⁸ Sa yena ūhse co wahma core wahma ajuropū pose yero cahmene. (Sata wahma buheye mūna buheye mehna buhe moredaro cahmene.) ³⁹ Mūna core masa tiquina sihnidi bato, wahma core cahmedare tiquina. Ohō saha nine masa. “Mūna co wahma co bui cjūnogā quehnoañe ijire”, nine masa, niahye Jesu tiquinare.

6

Judio masa tiquina sori decore trigore peheahye Jesu buheyequina
(Mt 12.1-8; Mr 2.23-28)

¹ Ape deco saurū ijigū Jesu gūhū trigo wesepū esahye. Topū esa, tiquiro buheyequina pehe trigo parorire pehe, ti pjerire sahqūē site dijio, ti pjerire ihya cā waha wahahye tiquina. ² Tiquina sa

yegū ihñañe meheñequinagā fariseo masa tiquinare sinituahye:

—¿Dahse yena masa saurū mari sori deco ijepegūta Cohācjū tiquiro dutierari decore dahrajari masa? niahye fariseo masa.

Tiquina sa nigū tūhoro Jesu tiquinare yūhtiahye “Yuhū buheyequina yūhdūdcaye niedare”, nino táro:

³⁻⁴ —Davi mūnāno tiquiro mehna cjēna mehna ūjua ahbaro, Cohācjū wūhūpū sajā, Cohācjū ye pāre ihyahye. Sa ihyaro tiquiro mehna cjēna gūhūre ti pāre ihya dutiro ohoahye. Ti pāre pahia dihita ihyae tiahye. Cohācjū dutiye ti pāre apequinare ihya dutierare. ¿Davi mūnāno tire tiquiro yerire buherari masa? (Ti pāre ihyaro Cohācjūre yūhdūdcaro niedahye. Miare ahri pjerire ihyaye yuhū buheyequina gūhū Cohācjūre yūhdūdcaye niedare.) ⁵ Yuhū masū Cohācjū ohorigū ahri deco saurū decore masa tiquina yeatire yahugū ijigū pūhto ijiāja, niahye Jesu.

Omoca bñhariquiro quitī
(Mt 12.9-14; Mr 3.1-6)

⁶ Ape deco saurū ijigū Jesu judio masa tiquina buheri wūhūpū sajā saro, buheahye masare. Topū omoca poto pehe bñhariquiro ijiāhye.

⁷ Meheñequinagā judio masare buheyequina, fariseo masa gūhū Jesure yahusā duamahye. “Saurū decore masūnore dohatiyere yūhdūoboaga Jesu”, ni, ihñā nūnū yahusā duamahye tiquina Jesure.

⁸ Jesu tiquina tūhotuyere masino, omoca bñhariquirore ohō saha niahye:

—Wahcādūcaya. Ohōpū ahtaya, niahye tiquiro.

Tiquiro sa nidi bato omoca bñhariquiro pehe wahcādūca, topū ducuahye. ⁹ Sa yero Jesu tiquinare sinituahye.

—M̄sare sinitutja: ¿Saurú ijigū yabere ye dutiajari Cohācjū dutiye? ¿Quehnoañene yegū quehnoaedajari? ¿Ñañene yegū pehere quehnoaboagari, m̄sa t̄hotugū? Saurú ijigū mas̄nore masogū quehnoar̄ne. Saurú ijigū mas̄nore wejēgū pehere quehnoaedare. Ñar̄ne, niahye Jesu tiquinare.

¹⁰ Sa nino Jesu tiquinare ijip-
ihtiyequinare ihñadoqueo, omoca
b̄hariquiore ohō saha niahye tja:

—M̄h̄u omocare siō potoya, ni-
ahye tiquiro.

Tiquiro sa nigūta omoca
b̄hariquiore pehe siō potogūta,
omoca quehnoa wahahye.

¹¹ Tiquiro sa yegū ihñañe tiquina
tiquiro mehna tutuaro usuahye.

—¿D̄h̄se yenatari mari
ahriquiore? niahye tiquina basi.

*Jesu tiquiro buheyequinare do-
cere tiquiro ohoatiquinare bese do-
coahye*

(Mt 10.1-4; Mr 3.13-19)

¹² Ti decorire Jesu c̄n̄p̄u
Cohācj̄re sinino m̄jaa wa-
hahye. Top̄u ijiro, ñamine Cohācj̄
mehna yahuducu bohreahye.

¹³ Bohrearop̄u tiquiro buheye-
quinare tiquiro cahap̄u pijioahye.
Pijio tuhasa, tiquina mehna
cj̄nare doce waro tiquiro ohoa-
tiquinare bese docoahye. Sa ye
tiquiro c̄riquina wame tiahye.

¹⁴⁻¹⁵ Ahriquina ijiahye Jesu tiquiro
bese docoriquina: Simo ijiahye.
Simore Pedro ni pisuahye Jesu
pehe. Simo bah̄ro Andre, Santi-
ago, Ñu, Felipe, Bartolomé, Mateo,
Tomasu, Santiago ijiahye. Santiago
pehe Alfeo mac̄no ijiahye. Sa
ye Simo celote ya curua cj̄no
ijimediquiro, ¹⁶ Juda Santiago
bah̄ro, Juda Iscariote tiquina
ijiahye tiquiro bese docoriquina.
Juda Iscariote pehe Jesure ihñā
tuhtiyequinare ihñoatiquiro iji-
ahye.

*Jesu peyequina masare
buheahye*

(Mt 4.23-25)

¹⁷ Sa ye Jesu tiquiro buheye-
quina mehna c̄n̄u buip̄u ijiriquina
dijia taye, peyequina apequina
tiquiro buheyequina mehna di-
jia wihid̄ca, quehnoari paap̄u
ducuahye tiquina. Ijipihtirop̄u
Judea yehpap̄u ijiye macari cj̄na,
Jerusalē cj̄na, Tiro wame tiri
maca cj̄na, Sidō wame tiri maca
cj̄na pajiri ma d̄ht̄u cahap̄u
ijiye macari cj̄na masa peye-
quina tiquiro cahap̄u wihiahye.

¹⁸ Tiquina Jesu buheyere t̄hoye
tehe, tiquina dohatiyere cohāgū
cahmeahye. Wat̄ia c̄oyequina
ḡh̄u tiquiro cahap̄u wihi, quehnoa
wahahye. ¹⁹ Jesu tiquiro tutuaye
mehna ȳhd̄gū yeahye tiquinare.
Sa ye tiquina ijipihtiyequina
tiquirore dahra tuhuye ahtahye.

*Jesu buceye, b̄j̄ua witiye
ḡh̄ure buheahye*

(Mt 5.1-12)

²⁰ Came Jesu tiquiro buheye-
quinare ihñā, yahuahye:

—M̄sa pejec̄ona, (m̄sa ñañene
b̄j̄ua witina), Cohācj̄ tiquiro
p̄htoro ijirop̄u wahanata m̄sa. Sa
yena m̄sa bucuenata.

²¹ 'Yojop̄re m̄sa ̄j̄ua ahbana,
yapina ijinata. Sa yena bucuenata.

'Yojop̄u utina ijiina, came m̄sa
b̄j̄unata. Sa yena m̄sa bucuenata.

²² 'Ȳh̄u mas̄ Cohācj̄ ohorigū
ijiaja. Sa yena yeere yena m̄sa ijiri
buhiri apequina m̄sare tiquina
ihñā tuhtiepegūta bucuena ijire
m̄sa. M̄sare tiquina cohāepēgūta
bucuenata. M̄sare tiquina ñano
yahuducuepegūta “Ñana ijire”,
m̄sare tiquina niepegūta m̄sa
pehe bucuenata. ²³ M̄sare tiquina
sa yegū ihñano ̄hm̄sep̄u m̄sa
esagū pajiro quehnoano yerota
Cohācj̄ m̄sare. Sa yena tutu-
aro bucuena ijiya. Quehnoano
jeripohna tina ijiya. M̄sare

ihña tuhtiyequina tiquina acaye panopu cjēna sata ñano yeahye Cohācjū yere yahu mahtariquina gūhure.

²⁴ 'Sa yena mūsa vojopu peye cūona ahri yehpau mūsa quehnoano iji cā tuhasari. Sa yena ñano yūhdana ijinata mūsa.

²⁵ 'Yojopu yapina mūsa ujua ahbanata. Mūsa sa ijinata ñano yūhdanata.

'Yojopu mūsa bujūrina ijina cameru utinata. Sa yena ñano yūhdanata.

²⁶ ' "Cohācjū yere yahu mahtana ijjaja", ni mehoñequinare "Quehnoañequina ijire", nimahye peyequina panopu cjēna. Sa nimeđiquina tiquina acaye vojopu cjēna gūhu sata "Quehnoañequina ijire", niboaga ihquēquina mūsa mehna cjēnare. Tiquina sa ninohrina mūsa ijina ñano yūhdanata mūsa gūhu, ni buheahye Jesu.

Mūsare ihña tuhtiyequina tiquina ijiepegāta tiquina gūhure cahña

(Mt 5.38-48; 7.12)

²⁷ Sa yero ohō saha ni buhe nemoahye Jesu:

—Yūhure tūho duanare, mūsareta nigu niaja. Mūsare ihña tuhtiyequina tiquina ijiepegāta tiquina gūhure cahña. Mūsare ihña tuhtiyequinare quehnoano yeya. ²⁸ Mūsare "Ñano yūhdahro", niñequina tiquina ijiepegāta quehnoa dutiya tiquinare. Mūsare ñano yeyequina tiquina ijiepegāta "Tiquina gūhu quehnoano ijjahro", ni sini basaya Cohācjūre.

²⁹ Ihcāqui mūsa wahsupure tiqui quēgū, ape sie gūhure quē dutiya tiquiore. Mūsa bui cā suhtirore tiqui ehmagū mūsa camisa gūhure sa oho cāhña tiquiore. ³⁰ Mūsare sinidiquirore tiqui sinino punota ohoya tiquiore. Mūsa yere tiqui negū tiquiore sinitueracāhña pari

turi tire. ³¹ Apequina mūsare tiquina quehnoano yegū cahmene mūsa. Tiquinare mūsa quehnoano yegū cahmeno saha quehnoano yeya tiquina gūhure. Tiquina quehnoano yerapegāta mūsa pehe tiquinare quehnoano yeya.

³² 'Mūsare cahñequina dihitare mūsa cahīgū ti ne dahseati ijierare apequina pehere mūsa cahiedagū. Ñañequina gūhu sata yere. ³³ Sa yena mūsare quehnoano yeyequina dihitare mūsa quehnoano yegū ti gūhu ne dahseati ijierare apequina pehere mūsa quehnoano yeragū. Tire ñañequina gūhu yere. ³⁴ Sa yero "Yūhure wiaya tire", mūsa niñequina dihitare mūsa wasogū ne ti dahseati ijierare. Ñañequina gūhu apequinare "Yūhure wiaya tire", tiquina niñequinare wasore. ³⁵ Sa yena mūsa pehe mūsare ihña tuhtiyequina gūhure cahña. Sa yena tiquinare quehnoano yeya.

Apequiore wasona "Yūhure ne wiasi ahriquiore", ni tūhotuenata tiquiore wasoya. Cohācjū pehe tiquiore "Quehnoare", niñequina gūhure, ñañequina gūhure quehnoano yere. Tiquiore yero saha yeya mūsa gūhu. Mūsa sa yegū Cohācjū tutuaro quehnoano yerota mūsare. Sa yena Cohācjū tutua yūhdariquiore uhmuse cjūno pohna ijinata. ³⁶ Mari Pacu uhmuse cjūno tiquiore paja ihñariro sahata mūsa gūhu masare paja ihñaña, ni yahuahye Jesu.

Apequina gūhure "Ñañequina ijire", niedacāhña

(Mt 7.1-5)

³⁷ Sa yero tiquinare yahu nemoahye:

—Apequinare "Ñañequina ijire", niedacāhña mūsa. Mūsa sa niedagū Cohācjū mūsa gūhure "Ñana ijire", nisi. Apequina mūsare tiquina ñano yerire tiquina ñano nidi gūhure boya mūsa. Mūsa

sa bogū ihñano Cohācjū m̄sa gūhure m̄sa ñañe yerire borota. ³⁸ Apee borore c̄ona apequinare ohoya. M̄sa sa ohogū Cohācjū gūh̄a m̄sare ohorota. Sa ohoro quehnoano queoro m̄sare pajiro ohorota. Quehnoano wahpa yūhd̄uro ohorota. Apequinare m̄sa ohoriro punota Cohācjū gūh̄a m̄sa gūh̄are ohorota, niahye Jesu tiquinare.

³⁹ Sa ni tuhasa Jesu quitu mehna buhero ohō saha ni yahu nemoahye:

—Caperi bajueyequina sehsaro tiquina basi quehnoano t̄ā cā masiedare. Sa t̄ā cāñe, tiquina p̄arop̄a bora maa sajāa wahaeta cop̄ep̄a. (Sata Cohācjū yere masieñequina apequinare buhe masiedare. Sa ye tiquina ijipih̄tiyequina pecap̄a wahaeta.) ⁴⁰ Buheyequina tiquinare buheriquirore masi yūhd̄ud̄caerare. Sa ijiepet̄a ijipih̄tiyequina buheyequina tiquina quehnoano buhe pehori bato tiquinare buheriquiro yero saha ijiet̄a, niahye Jesu.

⁴¹ Sa ni tuhasa apeye quitu mehna yahu nemoahye:

—Mari queoye mehna buhegū ohō saha yena ijire m̄sa: M̄sa acaȳuro tiquiro capeap̄a meheni pohcarogā tiquirore bora sajāgū ti pohcarogāre quehnoano ihñare m̄sa. M̄sa ya capeap̄a pajiri p̄j̄i ijiepegūta ti p̄j̄ine ne ihñedare m̄sa. Meheni pohcarogāre m̄sa ihñano saha m̄sa acaȳuro tiquiro ñano yeye pehere quehnoano ihñare m̄sa. M̄sa basi m̄sa ñañene tutuaro yepenata tire masiedare m̄sa pajiri p̄j̄ine m̄sa ihñedaro sahata. ¿D̄ahse yena sa yeajari m̄sa?

⁴² Ohō saha nina yero saha ijire m̄sa: “Yūh̄a acaȳu, ñañene yegū nine m̄h̄a. Sa yegū tire duhuya”, nina yero saha ijire m̄sa. Sa nina ijiepenata pajiro ñañene yere m̄sa pehe. ¿D̄ahse yena m̄sa ñañene

yepenata tire masiedajari m̄sa? Masa ihñono dihita quehnoano iji mehona ijire m̄sa sa yena. Pajiri p̄j̄ine m̄sa capeap̄a ijiri p̄j̄ine m̄sa ne m̄htaboriro saha m̄sa ñano yeye pehere duhu m̄htaña. M̄sa sa yeri bato m̄sa acaȳuro tiquiro ñano yeyere duhugū ye masiboaga meheni pohcarogāre m̄sa neboriro saha, ni buheahye Jesu.

Masa yahuducuyere t̄uhona tiquina ijie tiyere masiaja mari
(Mt 7.17-20; 12.34-35)

⁴³ Sa yero queoye mehna buhero ohō saha ni yahu nemoahye tiquinare:

—Quehnoad̄u yuc̄uḡu ñañene d̄uca tierare. Sa yero ñad̄u quehnoañene d̄uca tierare. ⁴⁴ Yuc̄u d̄ucare masina t̄are masine m̄sa. Potaḡu higuera pacare d̄uca tierare. Sa yero pota buc̄uḡu ūhse t̄ōhorine d̄uca tierare. ⁴⁵ Sata ijire masa gūh̄a. Quehnoariquiro tiquiro t̄ahotuyep̄a quehnoañe ijire. Sa yero tiquiro quehnoañene yere quehnoad̄u quehnoañene d̄uca tiro saha. Ñariquiro tiquiro t̄ahotuyep̄are ñañe ijire. Sa yero tiquiro ñañene yere ñad̄u ñañene d̄uca tiro saha. Mari t̄ahotuyep̄a marine ti ijiro saha yahuducujaja mari, ni yahuahye Jesu.

P̄ua w̄uh̄u yeyequina quitire yahuahye Jesu
(Mt 7.24-27)

⁴⁶ Sa yero tiquinare yahu nemoahye:

—M̄sa yūh̄are “P̄uhto”, nine. Sa niepenata yūh̄u dutiye pehere yerare m̄sa. ¿D̄ahse ijiro boro sa yerajari? ⁴⁷ Ijipih̄tiyequina yūh̄are cahmeñequina yūh̄u yahuyere t̄uhore. Sa yeye yūh̄u dutiyere yūhd̄ud̄caerare. Ohō sahata ijire yūh̄are yūhd̄ud̄caeyequina: ⁴⁸ W̄uh̄u dahreriquiro yero saha ijire tiquina. Tiquiro ūh̄c̄añe cop̄erire sehe, w̄uh̄are doco

dũcare. Ti wũhũ quehnoano tiquiro yeri wũhũ ijiro dia minigũ tutuaro aco tutuepegũta ti wũhũ quehnoano tojoare. ⁴⁹ Sa yeye yũhũ dutiyere tũhoepeta yũhdũdũcayequina pehe wũhũre quehnoano yerariquiro yero saha ijire. Ti wũhũre buigã doco, quehnoano ye dũcaerare. Tiquiro sa yeri wũhũ ijiro dia minigũ aco tutuagũ duita ti wũhũ cohõ burũa wahare. Sa yero ti wũhũ tutuaro bora quehea wahare, niahye Jesu.

7

Surara pũhtoro cahacjũnoro tiquiro dohatigũ Jesu yũhdũwoahye tiquirore

(Mt 8.5-13)

¹ Ti quitire masare yahu tuhasa Jesu gũhũ Capernaupũ esahye.

² Topũ ijiriquiro cien surara pũhtoro tiquiro cahacjũnoro tutuaro cahĩahye. Tiquiro cahacjũno pehe tutuaro dohatiro, yariaropũ niahye. ³ Sa yero Jesu yeyere tũhoro, judio masa bũcũnare Jesu cahapũ ohoahye pũhtoro pehe.

—Dohatiriquirore yũhdũogũ ahtaya, ni, yahu dutiro bũcũnare ohoahye pũhtoro.

⁴ Tiquina Jesu cahapũ esa, ohõ saha ni tutuaro mehna yahuahye tiquirore:

—Surara pũhtoro usãre ohori. Tiquiro cahacjũnoro dohatiriquirore yũhdũgũ cahmedi tiquiro. Tiquiro pũhtoro pehe quehnoariquiro ijire. Tiquiro sa ijigũ yedohoya tiquirore. ⁵ Mari ya maca cjẽnare tiquiro cahĩne. Sa yero tiquiro usã buheri wũhũre tiquina yeri wapare wapa yere, niahye bũcũna Jesure.

⁶ Tiquina sa ni yahugũ tũhoro Jesu pehe tiquina mehna wahahye. Surara pũhtoro ya wũhũ cahagãpũ tiquiro esagũ pũhtoro pehe tiquiro mehna cjẽnare Jesure ohõ saha ni yahu dutiro ohoahye:

—Pũhto, quehnoanota. Ahtaeracãhĩa. Quehnoagũ ijieraja yũhũ. Ya wũhũpũ mũhũre sajã ta dutibogũ ijieraja yũhũ. ⁷ Sa yegũ mũhũ cahapũ wahaeraja. Yũhũ sa ijiepegũta mũhũ masiĩne mehna yũhdũ dutiya mũhũ tiquirore. Mũhũ sa yegũ yũhũ cahacjũno quehnoanota. ⁸ Yũhũre yũhũ bui ijieyequina apequina pũhtoa dutire. Sa yegũ yũhũ gũhũ surarare dutiaja. Ihcãquirore “Wahaya”, yũhũ nigũ tiquiro wahare. Apequirore “Ahtaya”, yũhũ nigũ tiquiro ahtare. Yũhũ cahacjũnoro “Ahrire yeya”, yũhũ nigũ tire tiquiro yere. Mũhũ gũhũ dutigũta ijire. Sa yero mũhũ dutiro saha tiquiro dohatiriquiro yũhdũrota, ni yahu dutiahye surara pũhtoro.

⁹ Tiquiro sa nigũ tũho maria waharo, peyequina masa tiquiro mehna ijieyequinare majaredũca sa, yahuahye:

—Mũsare niita niaja. Tiquiro surara pũhtoro Israe masũno ijieriquiro Cohãcjũre tutuaro wacũ tutuare. Tiquiro cahacjũnoro yũhũ yũhdũgũ yeatire masi tuhasare. Israe masare ne ahriquiro yero saha ijieyequinare ihĩeda tirũ yũhũ, niahye Jesu.

¹⁰ Tiquiro sa nidi bato surara pũhtoro Jesu cahapũ tiquiro ohoriquina tiquina pũhtoro ya wũhũpũ tojoaa wahahye. Tojoa sa dohatiriquiro yũhdũriquirore ihĩahye tiquina.

Jesu wape wihoro macũnoro masoahye

¹¹ Came cjũnogã Nai wame tiri macapũ Jesu tiquiro buheyequina mehna peyequina masa mehna wahahye. ¹² Ti macare sajãri sopecaha cahapũ tiquiro esagũ yariariquirore masa ne wijia taye niahye. Yariariquiro pacoro wape wihoro ijiahye. Ihcãquirota ijiriquiro yariahye. Sa ye to cjẽna masa peyequina ticoro mehna

wahahye. ¹³ Tiquina sa wahagū ihñano Jesu titorore paja ihñahye.

—Utieracāhña, niahye Jesu titorore.

¹⁴ Sa nino yariariquiro tiquiro masa putire ña peohaye. Tiquiro sa ña peogū ihñañe ti putire wñayequina pehe esaducahye.

—Macu, yuhñ mñhñe ohō saha niaja. Wahcā nujuña, niahye Jesu.

¹⁵ Tiquiro sa nidi bato yariariquiro mñnano wahcā nuju, yahuducuahye. Sa yero Jesu tiquirore tiquiro pacorore wiahye.

¹⁶ Tiquiro sa yegū ihñañe tiquina ijipihtiyequina cuea wahahye. Sa yeye tiquina Cohācjäre ño peo, ohō saha niahye:

—Cohācjū yere yahu mñhtariquiro masi yñdñariquiro yojopñ pñritare mari watoa ijire, niahye tiquina.

—Cohācjū marine tiquiro yequinare yedohoro wihi tuhasare, niahye apequina.

¹⁷ Sa yeye ijipihtiyequina Judea yehpa cjēnare ti yehpa dñhtñ cahapñ ijiye macari cjēnare Jesu yerire masa yahu site peohaye.

Ñu wame yeriquiro tiquiro buheyequinare Jesure sinitu dutiahye

(Mt 11.2-19)

¹⁸ Sa ye Jesu yerire ihñañe Ñure yahuahye tiquiro buheyequina. Sa tiquina yahugū tñhoro pñarore tiquiro cahapñ pijio, ¹⁹ Jesure sinitu dutiro ohoahye Ñu. Ohō saha ni sinitu dutiahye:

—¿Ñu “Yuhñ bato apequiro ahtarota”, tiquiro nidigūta ijiajari mñhñ? ¿Tiquiro nidigū mñhñ ijieragū apequirore cohtenatari usā? ni sinitu dutiahye Ñu pñaro tiquiro buheyequinare.

²⁰ Sa ye tiquina Jesu cahapñ esa, sinituahye tiquirore:

—Ñu wame yeriquiro mñhñe sinitu dutiro ohori usāre. ¿Ñu

“Yuhñ bato apequiro ahtarota”, tiquiro nidigūta ijiajari mñhñ? ¿Tiquiro nidigū mñhñ ijieragū apequirore cohtenatari usā? ni sinituahye tiquina Jesure.

²¹ Ti pjeta peyequina dohatiyequinare, watñ cñoyequinare, caperi bajueyequinare yñdñgū yeahye Jesu. ²² Sa yero Ñu ohoriquinare Jesu yñhtiahye:

—Yojopñe masa ihñarire masa tñhorire Ñure yahuna wahaya: Ohō saha niña: “Caperi bajueyequina ihñare. Tini masieñequina tinine. Cami ahbariquina quehnoa wahare. Tñhoerariquina tñhoa wahare. Yariariquina masaa wahare. Tiquina ijipihtiyequinare quehnoa wahagū yei yuhñ. Sa yegñ pejecñoyequinare quehnoañe buheyere yahuaja. ²³ Yuhñe tñhoriquiro ‘Poto ijire’, nidiquiro tiquiro bucuieriquiro ijire”, Ñure ni yahuna wahaya, niahye Jesu.

²⁴ Ñu buheyequina tiquina wahari bato Jesu pehe Ñu tiquiro ijiye tiyere yahu dñcahye peyequina masare:

—Masa marienopñ esana, taare wihnono wēdoqueo mñjagū ihñana eserari masa. ²⁵ “Quehnoañe suhti sañariquirore ihñana wahañhna”, niedari masa masa marienopñ wahana. Quehnoañe suhti sañañequina wapa bujñyere cñoyequina pñhtoā ye wñhñsepn ijire. Masa marienopñ ijierare. ²⁶ Masa marienopñ esana Cohācjū yere yahu mñhtariquirore ihñana esari masa. Ijirota ijire. Ñu Cohācjū yere yahu mñhtariquiro ijire. Apequina Cohācjū yere yahu mñhtariquina yñdñoro ijiriquiro ijire tiquiro pehe. ²⁷ Panopñ Cohācjū yere tiquina ojoari pñpñ Ñure ohō saha ni yahuahye:

Mari Pacñ tiquiro macñnore ohō saha niahye: “Mñhñ pano mñhñe yahuyuatiquirore

ohogatja. Mũhũ wihiatore quehnoyurota tiqiro”, niahye Cohãcjũ, ni ojoahye panopũre Ñũre.

²⁸ Mũsare poto niita niaja. Apequina masa ijipihitiyequina bui ijire Ñũ. Ahri decoripũre tiqiro sa ijiepegũta Cohãcjũ tiqiro pũhtoro ijirorpũre ijipihitiyequina docapũ ijiriquiro pũrita Ñũ bui ijire, niahye Jesu masare.

²⁹ Tiquiro sa nigũ tũhoye ijipihitiyequina masa, wapa ne cohteyequina mehna Ñũ tiqiro wame yenohriquina ijiye ohõ saha ni tũhotuahye Cohãcjũre. “Cohãcjũ poto yeriquiro ijire”, ni tũhotuahye tiquina. ³⁰ Fariseo masa pehe, judio masare buheyequina gũhũ Ñũ wame yenohriquina iji duerahye. Sa ye tiquinare Cohãcjũ yequina tiqiro ye duagũ cahmedahye tiquina.

³¹ Sa yero Jesu pari turi yahuahye:

—¿Yojopũ cjẽna masa disequina yero saha ijajari tiquina, mũsa tũhotugũ? ³² Tiquina macanagã yero saha ijire. Apequina tiquina cahmeno saha yeragũ bucuerare tiquinagã. Doeri cjẽ duaropũ apepe dujiye, ohõ saha ni pisuducure tiquinagã basi: “Mũsa basatire usã putipemi. ¿Dũhsena mũsa basaerari usã putipegũ? Usã tutuaro ñehẽ quea utipe, sañuducumi. ¿Mũsa pehe dũhsena usã mehna utiperari?” niducuyequina yero sahata ijire yojopũ cjẽna gũhũ. Yojopũ cjẽna tiquina cahmeno saha usã yeragũ ihñañe bucuerare tiquina gũhũ. ³³ Ñũ wame yeriquiro Cohãcjũre ño peoro taro sijiro, vinore sihniedare. Tiquiro sa sihniedagũ ihñana, “Watĩnore cũore. Sa yero tũho masieniquireo ijire”, nimesi mũsa tiquireore. ³⁴ Yũhũ masũ Cohãcjũ ohorigũ ijigũ, yũhũ ihya sihniaja. Yũhũ sa yegũ ihñana ohõ saha nine mũsa

yũhũ pehere. “Ihñaña. Ahriquireo pajiro ihyariquireo, queheriquiro ijire. Wapa ne cohteyequina, ñano yeyequina gũhũ tiquina mehna piti tiriquireo ijire tiqiro”, nine mũsa yũhũre. Sa nina macanagã yero saha yahuducuna ijire mũsa. Mũsa cahmeno saha usã yeragũ bucuerare mũsa. ³⁵ Sa masiedapenata usã ye ihñõrre ihñana, Cohãcjũ yere usã masigũ masinata mũsa, ni yahuahye Jesu.

Simo wame tiriquireo fariseo masũno ya wũhũpũ ijiahye Jesu

³⁶ Fariseo masũno tiqiro ya wũhũpũ ihya dutiro pijiahye Jesure. Tiquiro sa pijigũ Jesu tiqiro ya wũhũpũ esa, tiquina ihyari mesa cahapũ nuju sahye. ³⁷⁻³⁸ Ti macapũre ñañe yericoro ijiahye. Jesu fariseo masũno ya wũhũpũ tiqiro dujigũ ticoro tũhoahye. Sa tũhoro alabastro mehna yeriare ehme sitiye pose tiriare ne cãhta, Jesu behero pehepũ wihidũca, utiahye. Sa utiro, Jesu dahpocãrine ticoro yahco co mehna weo, ticoro poari mehna wũoahye. Tiquiro dahpocãri wũagũ ihñano ticoro tiqiro dahpocãrine ihmi, ehme sitiye mehna pio peoahye. ³⁹ Ticoro sa yegũ ihñano fariseo masũno Jesure pijiriquiro tiqiro basi ohõ saha ni tũhotumahye: “Ahricoro tiquireore ñehẽ tuhuricoro ñañe yericoro ijire. Ahriquireo Jesu Cohãcjũ yere yahu mũhtariquireo ijiro tire masiboaga”, ni, tũhotumahye. ⁴⁰ Tiquiro sa ni tũhotuyere masino Jesu yahuahye tiquireore:

—Simo, yojopũ pũritare mũhũre yahu duaja, niahye Jesu.

—¿Buhegũ, yũhũre dũhse ni yahu duajari mũhũ? niahye Simo.

⁴¹ Tiquiro sa nigũ Jesu ohõ saha ni queoye mehna buhe yahuahye:

—Pũhtorore pũaro wapamoñequina ijiahye. Ihcãquireo wapamoriquireo quinientos niñeru cjoerire

wapamoahye. Apequiro pehe cincuenta niñeru cjoerire wapamoahye. ⁴² Sa ye tire tiquina wapa ye masiedagū ihñano tiquiro tiquina wapamoñene wapa ye dutierahye. ¿Yojorū pūrítare diquiro pehe wapamoriquiro tiquiro pūhtorore cahī yūhdūrotari? ni sinituahye Jesu.

⁴³ Simo yūhtiahye:

—Ōbah, pajiro wapamoriquiro mehenogā wapamoriquiro yūhdūoro tiquiro pūhtorore cahīboaga, niahye Simo.

—Poto yūhtiri mūhū yūhūre, niahye Jesu.

⁴⁴ Sa ni tuhasa tiquirore pio peoricorore majare ihña, Jesu Simore yahu nemoahye:

—Ahricorore ihñaña mūhū. Mūhū ya wūhūpū yūhū sajā wihiri bato yūhū dahpocārine coseati acore yūhūre ohoerari mūhū. Ahricoro pehe ticoro yahco co mehna yūhū dahpocārine weo, ticoro poari mehna wūori yūhūre. ⁴⁵ Mūhū pehe yūhūre piti ca ihmiedari. Ahricoro pehe ohōpū yūhū dujuro puno yūhū dahpocārine ihmidi. ⁴⁶ Mūhū pehe yūhū dapure uhse mehna pio peoerari. Ticoro pehe yūhū dahpocārine ehme sitiye mehna pio peori. ⁴⁷ Sa nigū mūhūreta yahugata niaja. Ahricoro ticoro ñañe yeye pe yūhdūaye ijire. Sa ijieperota ticoro tutuaro cahīne yūhūre. Sa yegū ticoro ñañene bou. Sa yeye tiquina ñañene mehenogā yūhū bonohriquina mehenogā cahīne yūhūre, niahye Jesu Simore.

⁴⁸ Sa ni tuhasa tiquiro ticorore yuahahye:

—Yojorū pūrítare mūhū ñañe yeyere bou, niahye Jesu.

⁴⁹ Tiquiro sa nigū tūhoye Jesu mehna dujiyequina tiquina basi ohō saha ni yahuducuahye:

—Ahriquiro potota ñañe yeyere boriquiro ijire. ¿Dūhse ijiriquiro

boro ijajari ahriquiro ñañene boriquiro? niahye tiquina basi.

⁵⁰ Sa yero Jesu numinore ohō saha ni yuahahye:

—Yūhūre mūhū wacū tutuagū mūhūre pecapū wahaborigore yūhdūoaja. Cuero marieno mūhū ya wūhūpū tojoaa wahaya, niahye Jesu ticorore.

8

Numia Jesure yedohoahye

¹ Came būjūye macaripū, daye macarigāpū gūhūre esa, Cohācjū tiquiro pūhtoro ijyere quehnoañe buheyere yuahahye Jesu. Doce tiquiro buheyequina pehe tiquiro mehna ijiahye. ² Sa ye numia gūhū watā cūomediquina numia, dohatimediquina numia Jesu quehnoa wahagū tiquiro yeriquina numia tiquiro mehna tiniahye. “María”, tiquina nidicorore “Magdalena”, ni pisue tiahye ticorore. Ticorore siete watāre Jesu cohāhye to pano. Sa yero ticoro gūhū Jesu mehna tiniahye. ³ Chuza wame tiriquiro Herodere yedohomediquiro namono Juana gūhū Jesu mehna tiniahye. Susana wame tiricoro gūhū apequina numia mehna peyequina tiquina cūoye mehna Jesu gūhūre yedohoahye.

Jesu oteriquiro quitire yuahahye (Mt 13.1-9; Mr 4.1-9)

⁴ Sa ye peye macari cjēna Jesu cahapū cahmecoahye. Tiquina sa cahmecoari bato Jesu tiquiro tūhotuyē mehna queoye mehna tiquinare yuahahye buhero taro:

⁵ —Oteriquiro otero wahahye. Tiquiro sa otegū apeye pjeri maha dūhtū cahapū bora quehe sahye. Sa yeye ti pjerire masa cūhta diho cūahye. Sa ye minicjūa pari pehe ti pjerire ihyahye. ⁶ Sa ye apeye pjeri atā paca watoa bora quehe sahye. Topū yehparū aco mariedahye. Sa ye ti pjeri pihni wahcādūca ñaia wahahye.

⁷ Apeye pjeri taa watoa bora quehe sahye. Taa pehe ti oteye mehna pihniahye. Taa pehe dia yuhduu waha, oteyere wejēahye. ⁸ Apeye pjeri quehnoari yehpapu bora quehe sahye. Quehnoano pihni, dūca tiahye. Sa ye peye dūca tiahye, niahye Jesu.

Sa ni tuhasa ohō saha tutuaro ni nemoahye:

—Ahrire quehnoano tūhoya mūsa, niahye tiquiuro.

Jesu queoye mehna tiquiuro buherire yahuahye

(Mt 13.10-17; Mr 4.10-12)

⁹ Came tiquiuro buheyequina ti queoyere masi duaye, Jesure sinituahye tiquina:

—¿Ahri queoye mehna dūhse ni yahugū niajari mūhu? ni, sinituahye tiquina.

¹⁰ Tiquina sa nigū Jesu yuhntiahye:

—Cohācjū masa puhtoro tiquiuro ijiyere panopu apequina tiquina masiedarire mū sare masigū yerota Cohācjū. Apequina pehere sa yerare tiquiuro. Tiquinare queoye mehnata buheitja. Yūhu sa yegū tiquina yūhu buheyere tūhoepeta masisi, niahye Jesu tiquiuro buheyequinare.

Jesu oteriquiro quitire yahu pehoahye

(Mt 13.18-23; Mr 4.13-20)

¹¹ Sa ni tuhasa tiquinare yahu nemoahye:

—Ohō saha ni yahure ahri quti: Oteye pjeri quehnoañe buheye yero saha ijire. ¹² Sa ye maha dūhtu cahapu borari pjeri pehe quehnoañe buheye yero saha ijire. Sa yero masa quehnoañe buheyere tiquina tūhogū ihñano watīno pehe ahta, ti buheyere masi dutierare masare. Minicjūa ti pjerire tiquina dote nediro saha yere. Tiquiuro sa yeragū tiquina Cohācjūre wacū tutuaboa. Tiquina sa wacū tutuagū ihñano Cohācjū pehe tiquinare pecapu

wahaboriquinare yuhduoboa.

¹³ Utā pjeri watoa borari pjeri quehnoañe buheye yero saha ijire. Sa ye masa quehnoañe buheyere tūho, bucueye mehna tire tūho nene. Sa tūho nepeta utā watoa ijiye cju nūhcori marieñe cju yero saha ahriquina masa gūhu tutuerare. Sa tutueraye yeequina tiquina ijiri buhiri apequina tiquinare ñano yegū ihñañe yee pehere duhu cāhre.

¹⁴ Sa ye taa watoa borari pjeri quehnoañe buheye yero saha ijire. Sa ye masa quehnoañe buheyere tūhoepeta, ahri yehpa cjēne pajiro bujūa witi tūhotu, niñeru pehere cahī, ahri yehpa cjēne bucuere tiquina. Sa yeye ti pehe quehnoañe buheyere cahmotagū, masa pehe quehnoañe pehere yerare. ¹⁵ Sa ye quehnoari yehpapu borari pjeri quehnoañe buheye yero saha ijire. Sa yeye masa quehnoañe buheyere tūhoye, quehnoano mehna ti buheyere yuhduucaerare. Sa ye yucūgu dūca tiro saha quehnoañe buheyere tūhoyequina pehe Cohācjū tiquiuro cahmeno saha quehnoañene yere, niahye Jesu.

Jesu sihāria quitire buheahye

(Mr 4.21-25)

¹⁶ Sa ni tuhasa apeye queoye mehna buheahye tiquiuro:

—Ne sihāriare dihi sutu docapu cūedare masa. Sa ye tiare cumuno docapu cūedare. Uhmūanopu tiare duhu peore wūhūpu sajà tayequina tiquina quehnoano ihña sajà tato saha. ¹⁷ Ijipihtiye tiquina masiedarire came masa masieta. Sihāria buhriogū mari ihña masino saha panopu tiquina masiedarire masieta masa.

¹⁸ 'Sa yena mūsa tūhona quehnoano tūho nūnūña. Quehnoano tūho nūnūriquiuro, quehnoano masinota. Tūho nūnūmediquiuro "Mehenogā tūhoaja", tiquiuro

niepegāta ti pehere boaa waha-
harota, niahye Jesu.

Jesu acaye tiquirore pijiahye
(Mt 12.46-50; Mr 3.31-35)

¹⁹ Came Jesu bahana tiquina pa-
coro mehna tiquiro cahap̄ wa-
haye nimahye. Masa peyequina
ijigū tiquiro cahap̄ eserahye. ²⁰ Sa
yero ihcāquiro Jesure yahuahye:

—M̄h̄h̄u paco m̄h̄h̄u bahana
mehna sopecahap̄ ducuri.
M̄h̄h̄u ihñañe taye niñoh̄ti, niahye
tiquiro Jesure.

²¹ Tiquiro sa nigū Jesu ohō saha
ni yahuahye ijipihtiyequinare:

—Cohācjū buheyere t̄hoyequina,
tire ȳhd̄h̄u caeeyequina tiquinata
ȳh̄h̄u paco ȳh̄h̄u bahana yero saha
ijire, niahye Jesu tiquinare.

Jesu wihnonore ȳh̄h̄u dutiahye
(Mt 8.23-27; Mr 4.35-41)

²² Ape deco Jesu tiquiro buheye-
quina mehna yuc̄sap̄ sajāhye.

—Isa, pehāh̄na, ni, tiquina
ijipihtiyequina tia mehna ditarap̄
pehāa wahahye.

²³ Sa pehāno carīa wahahye Jesu.
Tiquina sa pehāducurop̄ tutuaro
wihnono wēahye. Wihnono wēgū
buj̄hye pahcōri wahcā, tiquinare
mio cāmahye. Sa waharo miono
cua ȳhd̄h̄u ahye tiquinare. ²⁴ Sa wa-
hagū ihñañe, ac̄h̄h̄a waha, Jesu ca-
hap̄ waha, tiquirore wahcōahye.

—Buheḡh̄, mari yariana tana
niaj̄, niahye tiquina.

Tiquina sa nigū Jesu pehe wahcā,
wihnonore,

—To punota wē duhuya, niahye.

Sa nino pahcōri ḡh̄h̄u,

—Ȳh̄h̄u wahaya, niahye.

Tiquiro sa nigūta wihnono
ȳhd̄h̄u wahahye. Sa ye pahcōri
ḡh̄h̄u ȳh̄h̄u dijiaa wahahye. ²⁵ Sa
wahari bato Jesu tiquinare ohō
saha niahye:

—¿M̄h̄h̄u ȳh̄h̄u wacū tutuera-
jari? niahye tiquiro.

Tiquiro sa nigū tiquina pehe cue,
ac̄h̄h̄a waha, tiquina basi ohō saha
ni yahuducuahye:

—¿Yohou, dahse ijiriquiro boro
mas̄no ijijari ahriquiro? Ahri
wihnono, pahcōri ḡh̄h̄u tiquiro
dutigū ȳhd̄h̄u caerare tiquirore,
niahye tiquina basi.

Watīa c̄oriquirore ȳhd̄h̄u ahye
Jesu

(Mt 8.28-34; Mr 5.1-20)

²⁶ Sa ye tiquina ape sie pahr̄p̄
Gerasa cjēna ya yehpap̄ pehā
sahye. Ti yehpa Galilea yehpa
poto ijiahye. ²⁷ Top̄ Jesu tiquiro
maja sad̄cagū waro to cjēno
watīa c̄oriquiro tiquiro cahap̄
ahtahye. Tiquiro yoari pje suhti
marieniquiro ijiro, tiquiro ya
w̄h̄h̄u ne ijierahye. Sa yero
masa coperi at̄p̄ tiquina seheri
coperi cahap̄ ijie tiahye tiquiro.
²⁸⁻²⁹ Sa ye peye tahari watīa
tiquirore ñeheahye. Sa yero tiquiro
peresup̄ ijigū tiquiro omocarine,
dahpoc̄arine come dari mehna
dahteriquiro ijieperota, ti darire
t̄ā sure m̄jahye. Sa ye watīa
pehe tiquirore masa marienop̄
ne cā m̄jae tiahye. Sa yero
tiquiro Jesure ihñadoqueo, tutuaro
sañuducu, Jesu cahap̄ d̄sepe curi
mehna quehe sahye. Tiquiro sa
yegū ihñano Jesu pehe tiquirore
dutigahye:

—Ahriquiro mehna ijieracāh̄na.
Wahaya watīa, niahye.

Tiquiro sa nigū t̄ahoro watīa
c̄oriquiro tutuaro sañuducu, sini-
tuahye Jesure:

—¿Jesu, h̄m̄se cjū Cohācjū
mac̄u yabere yei t̄h̄u nijari m̄h̄h̄u
ȳh̄h̄u? Ȳh̄h̄u ñano yeracāh̄na,
niahye watīa c̄oriquiro.

³⁰ Tiquiro sa nigū Jesu pehe sini-
tuahye tiquirore:

—¿D̄h̄se wame tiajari m̄h̄h̄u? ni-
ahye.

Peyequina watīa tiquiro mehna ijiahye. Sa yero ohō saha niahye tiquinare c̄oriquiro.

—Watīa peyequina wame tiaja usā, ni, yuhtiahye watīa c̄oriquiro.

³¹ —Uhcūāri copep̄u usāre waha dutieracāhña, ni, tutuaro siniahye watīa pehe.

³² Ti pjere top̄u c̄un̄u dahpotop̄u yesea peyequina ihyaye niahye. Tiquina top̄u ihyagū ihñañe watīa ohō saha ni siniahye Jesure:

—Sisequina yesea cahap̄u waha dutiya usāre. Tiquina mehna iji dutiya usāre, ni, siniahye watīa.

Tiquina sa nigū tūhoro Jesu tiquinare yesea cahap̄u waha dutiahye. ³³ Tiquiro sa waha dutiri bato watīa pehe mas̄no mehna ijimediquina waha, yesea cahap̄u esahye. Tiquina cahap̄u tiquina esari bato yesea pehe pari c̄j̄p̄u oma maa buhaa waha, ditarap̄u bora ñojoa mini yaria pih̄tia wahahye.

³⁴ Yeseare cohteyequina yesea tiquina sa minigū ihñañe, cue, oma cāa wahahye. Sa oma cā macap̄u esa, ti maca c̄j̄nare, ihquē wuh̄use ijiro c̄j̄na gāh̄ure tiquina ihñarire yahu siteahye. ³⁵ Tiquina sa yahu siteri bato masa ihñañe wahahye. Sa ye Jesu cahap̄u esa, watīa c̄omediquirore suhti sañariquiro tūho masiniquiro tiquiro dujigū ihñahye tiquina. Tiquina ijipihtiyere ihñañe, tiquina cue niahye.

³⁶ Watīa c̄omediquiro tiquiro quehnoa waharire ihñañequina apequinare tiquina ihñarire yahuahye. ³⁷ Ti pjeta Gerasa yehpa c̄j̄na peyequina Jesure tutuaro cueye, tiquirore waha dutiahye. Tiquina sa waha dutigū Jesu yuc̄sap̄u sajā, waharo taro niahye. ³⁸ Watīa c̄omediquiro Jesu wahato pano tutuaro sinimahye tiquirore:

—Muh̄u mehna waha duaja, ni sinimahye.

³⁹ Tiquiro sa nigāta Jesu tiquirore yuhtiahye:

—Muh̄u ya macap̄u wahaya. Sa wahagū Cohāc̄j̄u mah̄ure tiquiro yerire yahuya apequinare, niahye Jesu.

Tiquiro sa nidi bato waha, tiquiro ya macap̄u esaro, mas̄no pehe Jesu tiquirore yerire ijipihtiyequina tiquiro ya maca c̄j̄nare yahuahye.

Jairo maconore yuh̄d̄uoro, dii m̄na wihoro dohatiducuricoro gāh̄ure yuh̄d̄uohye Jesu

(Mt 9.18-26; Mr 5.21-43)

⁴⁰ Ape sie pahr̄ep̄u Jesu pari turi tiquiro pehā sagū ihñañe masa peyequina tiquirore cohte, bucu-eye mehna piti cahye tiquirore. ⁴¹⁻⁴² Top̄u judio masa buheri wuh̄u cohteriquiro Jairo wame tiriquiro Jesu cahap̄u esa, tiquiro dahpocāri cahap̄u d̄usepe curi mehna quehe sahye tiquirore ño peoro. Tiquiro macono yariaro niahye. Ticoro ihcācorota ijiricoro doce c̄uh̄mari c̄oricoro ijiahye. Sa yero tiquiro ya wuh̄ap̄u Jesure piji cāhye. “Au”, ni, tiquiro mehna wahahye Jesu gāh̄u.

Mahap̄u tiquina sa wahagū pe yuh̄d̄uayequina masa ijiye, wahpa yuh̄d̄uahye. ⁴³ Sa yero apecoro numino doce c̄uh̄mari waro dii m̄na dohatiducuricoro top̄u ijiahye. To pano duturuare ijipihtiyere ticoro ye niñeru mehna wapa yemahye ticoro aco ye dutiro. Tiquina sa aco yepegāta m̄nanota ijiducu cāhye ticoro. ⁴⁴ Sa yero ticoro Jesu behero pehep̄u ahta, tiquiro suhtiro sohtoare ticoro ñehe tuhugāta ticoro dohatiye pih̄tia wahahye. ⁴⁵ Ticoro sa ñehe tuhugū tūhoturo Jesu sinituahe.

—¿Noa yuh̄u suhtirore ñehe tuhuajari? niahye tiquiro.

Ijipihtiyequina “Ñehe tuhuera”, niahye. Sa ye Pedro gāh̄u ohō saha niahye:

—Buhegũ, bihsarĩne. Sa yeye masa peyequina mahũre ñehe tuture. ¿Duhsegũ sa ni sinituajari mahũ? niahye tiquina Jesure.

⁴⁶ Tiquina sa nigũ Jesu yũhtiahye:

—Mianogãta yũhũ yũhdũgũ yei ihcãcorore. Sa yegũ yũhũre ticoro ñehe tuhugũ masiaja, niahye tiquiuro.

⁴⁷ Tiquiuro sa nigũ tuhoro ticoro duhti masiedaro, nanarerico Jesu cahapũ dũsepe curi mehna quehe sahye tiquiore ño peoro. Sa ye ijipihtiequina masa tiquina tuhoropũ ticoro dohatiyere, Jesure ticoro ñehe tuhurire, ticoro quehnoa waharire yahuahye ticoro. ⁴⁸ Ticoro yahu tuhasagũ Jesu ticorore yahuahye:

—Maco, yũhũre mahũ wacũ tutu-aye mehna quehnoago tojoare yojopũre. Bucueye mehna wahaya, niahye ticorore.

⁴⁹ Tiquiuro sa nini watoa Jairo ya wũhũpũ ijiriquiro yahuro wihi-ahye:

—Mahũ macogã yariaa wahari. Sa yegũ buheriquirore piji cãhtaeracãhña, niahye tiquiuro.

⁵⁰ Tiquiuro sa nigũ tuhoro, Jairore ohõ saha ni yahuahye Jesu:

—Bũjũa witi tuhoteracãhña. Yũhũre wacũ tutuaya. Ti dihitare yeya. Mahũ sa yegũ ticorogã masaa waharota, niahye Jesu.

⁵¹ Sa ni tuhasa tiquiuro ya wũhũpũ esa, Pedro, Ñũ, Santiago, dohatirico pacũsumũa topequinata ne sajãhye. Apequina pehere Jesu sajã dutierahye. ⁵² Topũ ijipihtiequina masa tiquina ñehe quea utiri watoa sajã sahye Jesu.

—Utieracãhña. Ticorogã yarierare. Carĩno nine, niahye tiquiuro.

⁵³ Tiquiuro sa nigũ tuhoye tiquina pehe ticoro yariaricoro ijigũ masiñe, Jesure bũjũahye. “Sa ni maca cãno nine”, ni bũjũahye. ⁵⁴ Sa yero Jesu ticorogã omocare ñehe, pisuahye:

—Mehenicorogã wahcãña, niahye.

⁵⁵ Tiquiuro sa nigũta yariaricoro masaa waha, wahcãdũca sahye ticorogã. Ticoro wahcãdũcari bato Jesu ticorore ihyayere oho dutiahye. ⁵⁶ Ticoro sa masagũ ihñañe ticoro pacũsumũa ihña maria wahahye. Sa yero Jesu tire apequinare yahu dutierahye.

9

Jesu doce tiquiuro buheyequinare buhe dutiro ohoahye

(Mt 10.5-15; Mr 6.7-13)

¹ Sa ye Jesu docere tiquiuro buheyequinare pijio, tiquiuro tutu-ayere ohoahye tiquinare. Watĩare tiquina cohãtire, dohatiequinare yũhdũgũ yeati gũhũre tiquiuro tutuayere ohoahye tiquinare. ² Sa ye tuhasa tiquinare Cohãcjũ tiquiuro pũhoro ijiyere buhe dutiro, dohatiequinare yũhdũo dutiro ohoahye tiquinare. ³ Ohõ saha ni dutiahye Jesu tiquinare:

—Mũsa wahana apee borore nedacãhña. Tua dũre, ajurore, ihyayere, niñerure nedacãhña. Mũsa sañano dihitare saña cãhña. Apeye suhtire nedacãhña.

⁴ Ijipihtie macaripũ mũsare tiquina carĩno ohogũ ti wũhũpũta ijiniña. Coã wahanapũ wijiaya ti wũhũre. ⁵ Apeye macari cjẽna mũsare tiquina cahmedagũ ihñana ti macarine yũhdũ cãa wahaya. Sa wahana mũsa dahpocãri cjẽ dihta esa wahãrere wejẽ site cũña mũsa tiquinare tiquina ye buhirire masigũ yena, niahye Jesu.

⁶ Tiquiuro sa nidi bato tiquiuro buheyequina pehe waha, ijipihtie macaripũ quehnoañe buheyere yahu tiniahye. Sa ye dohatiequinare yũhdũoe tiahye.

Jesu tiquiuro yerire Herode tãhoahye

(Mt 14.1-12; Mr 6.14-29)

7 Sa ye Herode Galilea yehpa cjēna pūhtoro Jesu yerire tūhoahye. “¿Noa boro ijjajari tiquiro Jesu?” nieperota ne masiedahye. Ihquēquina ohō saha nimahye Jesure. “Ñu wame yeriquiro mūnano masa mujahye. Sa yero ‘Jesu’, tiquina nidiquiro tiquirota ijire”, nimahye ihquēquina. Tiquina sa nigū tūhoro Herode Jesure dūhse ni masiedahye. 8 Sa ye apequina “Tiquiro Elia mūnano yojopū bajuario nine”, nimahye. Apequina pehe “Cohācjū yere yahu māhtariquina panopū cjēna mehna cjāno yojopū masa bajuario nine”, nimahye Jesure. 9 Tiquina sa ni yahuducuepegāta ohō saha ni tūhotuahye Herode: “Ñu dapure dūte sure duti tuhasaū yūhū. ¿Yojopūre ijiriquiro masa tiquina yahuriquiro noa boro ijiboagari tiquiro pehe?” ni, tūhoturo tiquiro Jesure ihña duamahye.

Jesu cinco mil masare ihyayere ohoahye

(Mt 14.13-21; Mr 6.30-44; Jn 6.1-14)

10 Sa ye Jesu tiquiro ohoriquina tiquiro cahapū tojoa sa, tiquina yerire yahuahye Jesure. Tiquina yahu tuhasagū Jesu tiquina dihitare Betsaida wame tiri macapū siho wahahye. 11 Tiquina waharire masiñe, masa peyequina tiquinare nūnū tā cāa wahahye. Jesure tiquina mūnū sagū ihñano piti cahye Jesu tiquinare. Sa yero tiquiro Cohācjū pūhtoro ijyere tiquinare yahu, dohatiyequinare yūhdūgū yeahye.

12 Ñamicahapū doce tiquiro buheyequina tiquiro cahapū esa, Jesure yahuahye:

—Ohō masa marienopū ijire. Ohō majano cjē wūhūsepū ahriquina masare ohoya. Carīato, tiquina ihyati gūhūre maca dutiya tiquinare, niahye tiquina Jesure.

13-14 Tiquina sa nigū Jesu yūhtiahye tiquinare:

—Sa niedacāhña. Ihyayere ohoya tiquinare, niahye.

Tiquiro sa nigū tūhoye tiquina yūhtiahye:

—Ihcā omope paca pā paca, pūaro wahi to punota cūoaja mari. ¿Ahriquina peyequina masa tiquina ihyatire dūboagari usā? niahye tiquiro buheyequina.

Peyequina masa tiquina ijigū ihñañe sa niahye tiquiro buheyequina. Topūre cinco mil mūnū ijyahye. Sa yero Jesu yahuahye tiquiro buheyequinare:

—Cincuenta masare ihcā curua duji dutiya. Apeye cururi gūhūre topequinata duji dutiya, niahye Jesu tiquiro buheyequinare.

15 Tiquiro sa nigū buheyequina tiquiro dutiriro sahata ye, ijipihtiyequina masare duji dutiahye.

16 Duji duti tuhasa Jesu ihcā omope paca pā pacare pūaro wahire ne, mūmūanopū ihña mūoahye. Sa ihña mūono Cohācjūre “Quehnoare”, niahye. Tiquiro sa nidi bato pā pacare nuha, tiquiro buheyequinare masare iti dutiro ohoahye.

17 Sa ye tiquina ijipihtiyequina masa ihya, yapi yūhdūa wahahye. Tiquina yapi wehorire doce pūhūse ne cahmecoahapo dapoahye tiquiro buheyequina.

Jesu potota Cristo tiquiro ijyere Cohācjū ohoriquiro tiquiro ijyere yahuahye Pedro

(Mt 16.13-19; Mr 8.27-29)

18 Ihcā deco Jesu ihcāquirola ijyere, Cohācjūre sinino niahye. Tiquiro sinini watoa tiquiro buheyequina tiquiro cahapū esahye. Sa yero Jesu sinituahye tiquinare:

—¿Noa boro ijjagari yūhū, masa yūhūre tiquina tūhotugū? ni sinituahye.

Tiquiro sa sinitugū tūhoye tiquiro buheyequina yūhtiahye:

19 —“Ñu wame yeriquiro ijire”, nine mähare. Apequina “Elia ijire”, nine. Apequina “Cohãcjũ yere yahu mähariquina mehna cjãno panopũ cjãno masa bajuaro nine yojopũre”, nine, ni yuhtiahye tiquiro buheyequina pehe tiquirore.

20 Tiquina sa nidi bato Jesu tiquinare sinituahye tja:

—¿Mũsa pehe mũsa tuhotugũ, noa boro ijiagari yuhũ? ni, sinituahye tja.

—Mũhu Cristo Cohãcjũ ohorigũ ijire, ni yuhtiahye Pedro.

Jesu tiquiro yaria masa wijiatire yahuahye

(Mt 16.20-28; Mr 8.30-9.1)

21 Sa ye Pedro “Cristo ijire mähũ”, tiquiro nidire apequinare Jesu yahu site dutierahye tiquiro buheyequinare. 22 Sa ni yahu site dutiera tuhãsa ohõ saha ni nemoahye:

—Yuhũ masũ Cohãcjũ ohorigũ tutuaro ñano yuhũata. Sata yuhũaro cahmene yuhũare. Sa ye mari judio masare buheyequina, bucũna, pahia puhtoã mehna yuhũare cahmeda, yuhũare wejẽeta. Tiquina wejẽdi bato ihtia deco wahaboro masa wijiajutja, niahye Jesu tiquinare.

23 Came ijipihtieyquinare ohõ saha ni yahuahye Jesu:

—Ihcãquiro yaquiro iji duaro, tiquiro cahmeno ye duamedire duhu cãnota. Sa yero yaquiro tiquiro ijiri buhiri ñano yuhũdũeperota yuhũare duhusi. Sa yero yeere yeducuriquiro ijirota. 24 Masũno yuhũare wacũno marieno tiquiro esa tuhãro tiquiro cahmeno saha yero, pecapũ waharota. Sa yero yeere sa yeducuriquiro ijipihtiey decori yuhũ mehna uhmũsepũ ijiducurota. 25 ¿Ihcãquiro masũno ahri yehpa cjẽne ijipihtiyere cãoriquiro Cohãcjũre cahmedaro

pecapũ waharo, yabere wapatajari tiquiro? Sa ijiriquiro ne wapataerare. 26 Ihquẽquina yuhũare, yuhũ buheye gũhare bue tisãboaga. Tiquina sa yegũ ihũagu yuhũ gũhu yuhũare sa yeyequinare bue tisãgutja. Yuhũ masũ Cohãcjũ ohorigũ quehnoañequina angele mehna usã asi siteropũ, yuhũ Pacu tiquiro asi siteropũ tojoa tagũ tiquinare bue tisãgũta. 27 Poto niita niaja mũsare. Yojopũre ihquẽquina mũsa ohõpũre ijieyquina mũsa yariato pano Cohãcjũ ijipihtieyquina bui puhtoro tiquiro iji dũcagũ ihũanata mũsa, niahye Jesu tiquinare.

Jesu tiquiro pagũre comesahye

(Mt 17.1-8; Mr 9.2-8)

28 Sa ye ocho decori tire tiquiro yahuri bato Jesu Pedroro, Ñure, Santiagore tiquina dihitare pijiahye. Sa ye waha, Cohãcjũre siniñe waha, cũnũpũ mũjaa wahahye tiquina. 29 Cohãcjũre tiquiro sinini watoã Jesu ya wuhũdoã comesahye. Sa yero tiquiro suhtiro asi siteri suhtiro quehnoano yehseri suhtiro wahahye. 30 Tiquiro sa wahari watoã puaro amũã tiquiro mehna yahuducuye niahye. Yahuducuyequina pehe Elia mũnanano, Moise mũnanano gũhu ijiahye. 31 Tiquina uhmũse cjẽ asi siteye mehna bajuahye. Jesu camegãta Jerusalẽpũ tiquiro yariatire tiquina Jesu mehna yahuducuye niahye. 32 Pedro gũhare wũjũã purĩ yuhũdũahye. Sa carĩepeta acũã, wahcã wihi, Jesu tiquiro asi siteyere ihũañe, puaro tiquiro mehna ducuyequina gũhare ihũahye. 33 Moise mũnanano gũhu tiquina wahato panogã Pedro Jesure ohõ saha nimahye:

—Puhto, mari ohõre ijigũ quehnoã duare. Ihtia wuhũgã yematja. Mũhu ya wuhũgã, Moise ya wuhũgã, Elia ya wuhũgã yematja, nimahye Pedro.

Sa nieperota tiquiro nidire ne masiedahye. ³⁴ Tiquiro sa ni yahuducuri watoa tiquinare ehmeo curua cahmotahye. Sa cahmotagū ihñañe tiquina cuea wahahye. ³⁵ Sa yero ehmeo puhiapū yahuducuye bisiro ca tahye:

—Ahriquiro yūhū macū, yūhū beseriquiro ijire. Quehnoano tūhoya tiquirore, nino ca tahye ehmeo curua puhiapūre.

³⁶ Tiquiro sa nidi bato Jesu dihitarē ihñahye tiquina. Came tiquina ihñarire apequinare yahuerahye. Ne ihcāquiore yahuerahye.

Jesu watīno cūoriquirogāre yūhdūoahye

(Mt 17.14-21; Mr 9.14-29)

³⁷ Ape deco tiquina cūnūpū tiquina dijia tagū peyequina masa Jesure piti cahye. ³⁸ Sa yero tiquina mehna cñāno Jesure pisuahye:

—Buhegū, mūhūre tutuaro ahrire sini duaja yūhū. Yūhū macū ihcāquiota ijire. Sa yegū tiquirore ihñā basaya mūhū. ³⁹ Watīno tiquirore ñehe, sañuducu tunu nanaregū ye, sahpo tua wahagū yee tire. Sa yero watīno yūhū macūre ñāno yūhdūgū ye, ne duhu duerare. ⁴⁰ Mūhū buheyequinare watīnore cohā dutigū tutuaro sinimi. Yūhū sa siniepegāta tiquina tiquirore cohā masiedari, niahye tiquiro Jesure.

⁴¹ Tiquiro sa nigū Jesu pehe ohō saha niahye tiquiro buheyequinare:

—Yojoṛpū cñēna mūsa ñana ijire. ¿Yūhūre ne wacū tutuerabutiajari? Yoabutiari pje mū sare buhemi yūhū. ¿Noho pūno yoari pje yūhūre mūsa cariboboagari? ni tuhtiahye Jesu.

Sa ni tuhasa watīa cūoriquiro pacūrore ohō saha niahye:

—Mūhū macūre ne cāhtaya, niahye.

⁴² Tiquiro sa nidi bato tiquiro macūno Jesu cahapū tiquiro ahtari watoa watīno pehe tiquirore yehpapū doque quehe sa, tunu nanaregū yeahye. Tiquiro sa yegū Jesu watīnore waha dutiahye. Tiquiro sa dutigū watīnore cūoriquirogā yūhdūa wahahye. Sa yero Jesu pehe tiquirogāre wiahye tiquiro pacūrore. ⁴³ Ijipihtiyequina masa Cohācñū tutuaye mehna tiquiro quehnoa wahagū ihñañe, ihñā maria wahahye.

Pari turi Jesu tiquiro yaria masa wijiatare yahuahye

(Mt 17.22-23; Mr 9.30-32)

Masa Jesu tiquiro yerire tiquina ihñā, ihñā maria wahagū Jesu pehe tiquiro buheyequinare ohō saha ni yahuahye:

⁴⁴ —Mianogāta yūhū yahuatire boeracāhñā mūsa. Yūhūre Cohācñū tiquiro ohorigūre apequiro yūhūre ñehe dutiro ohorota masare, niahye Jesu.

⁴⁵ Tiquiro sa niepegāta tiquina pehe tiquiro yahuyere quehnoano tūhoerahye. Tiquiro yahurire tiquinare masino basioerahye. Ti pjeta Cohācñū tiquinare tire tūho dutiero niahye. Sa ye tiquina cueye, tire tiquirore sinituerahye.

Jesu buheyequina tiquina mehna cñānore puhto sō duamahye

(Mt 18.1-5; Mr 9.33-37)

⁴⁶ Came Jesu buheyequina cahme sehñā soye niahye:

—¿Mari mehna cñāno diquiro pehe puhtoro sajānotari? niñe niahye tiquina basi.

⁴⁷ Tiquina sa nigū Jesu pehe tiquina tūhotuyere masino, ni-jinogāre tiquiro cahapū ducu duti, tiquiro buheyequinare yahuahye:

⁴⁸ —Yeere yena tana ahriquiogāre cahmena, yūhū gūhūre cahmene mūsa. Sa yena yūhūre cahmena, yūhūre ohoriquiro gūhūre cahmene mūsa. Mūsa mehna cñāno

musa cahacjũno ijiro tiquiuro gũhu pũhoro ijirota, niahye Jesu.

Marine ihña tuhtiriquiro ijieraro, mari mehna cjũno ijire
(Mr 9.38-40)

49 Came Ñu Jesure ohõ saha ni yahuahye:

—Buhegu, mũhu wame mehna watĩare cohãriquiore usã ihña. Mari mehna cjũno tiquiuro ijieragũ ihñana tire tiquiore ye dutierũ usã, niahye Ñu Jesure.

50 Tiquiuro sa nigũ Jesu Ñure apequina buheyequina gũhure ohõ saha ni yahuahye:

—Sa niedacãhña musa tiquiore. Marine ihña tuhtiriquiro ijieraro, tiquiuro mari mehna cjũno ijire, niahye Jesu tiquiuro buheyequinare.

Jesu Santiagore, Ñu gũhure tuhtihye

51 Ti pjere Jesu uhmũsepũ tiquiuro wahato panogã, “Jerusalẽpũ wahaũtja”, niahye tiquiuro. Sa nino topũ waharo niahye. 52 Sa ye Jesu tiquiuro pano ohoriquina waha, Samaria yehpa cã macapũ esa, topũ Jesu tiquiuro ijiatire quehno duamahye. 53 Jesu Jerusalẽpũ waharo taro niahye. Topũ wahatiquiuro tiquiuro ijigũ tũhoye, to cjẽna tiquiore cahmedahye. 54 Tire tũhoye Santiago, Ñu mehna yahuahye Jesure:

—Pũhto, mũhu cahmegũ uhmũse cã peca mehna tiquinare wejẽ dutinata, nimahye tiquina tiquiore.

55 Tiquina sa nigũ Jesu majare ihña, tuhtiahye tiquina pũarore.

56 Sa tuhti tuhasa, ape macapũ Jesu gũhu waha wahahye.

Apequina Jesu mehna wahamahye
(Mt 8.19-22)

57 Ti mahapũ tiquina wahagũ, ihcãquiuro Jesure yahuahye:

—Mũhu mehna waha duaja noho mũhu waharopũ, niahye tiquiuro.

58 Tiquiuro sa ni tuhasagũ Jesu yũhtiahye:

—Ihquẽquina nũcũ cjẽna wahiquina tiquina coperi cũore. Minicjũa gũhu tiquina suhti cũore. Yũhu masũ Cohãcjũ ohorigũ pehe yũhu carĩni wãhu cũoeraja, niahye Jesu.

59 Came apequiore Jesu piji-ahye:

—Yũhu mehna cjũ ijiaçũ ahtaya, niahye.

Tiquiro sa nigũ yũhtiahye Jesure:

—Pũhto, yũhu pacũ tiquiuro yariagũ yarĩgũtja. Sa ya tuhasagũ pũrita mũhu mehna wahagũtja, niahye tiquiuro.

60 Tiquiuro sa nigũ Jesu yahuahye:

—Yũhure cahmeeñequina yariariquina yero saha ijire. Tiquina pehe yariariquinare yaahro. Sa yegũ mũhu pehe Cohãcjũ tiquiuro pũhoro ijiyere quehnoañe buheyere buhegu ahtaya, niahye Jesu tiquiore.

61 Sa yero apequiuro Jesure ohõ saha niahye:

—Pũhto, mũhu mehna wahaũtja. Mũhu mehna yũhu wahato pano yũhu acayere cohe tiniĩ wahaũtja, niahye tiquiuro Jesure.

62 Tiquiuro sa nigũ Jesu yahuahye tiquiore:

—Dahrariquiuro dahra dueraro tiquiuro dahseatiquiuro ijierare. Tiquiuro yero sahata ijiriquiro ohõ saha ijire: “Cohãcjũ yere ye duaja”, nieperota tire yerare. Tiquiuro Cohãcjũ yaquiuro ijiboriquiuro ijierare, niahye Jesu.

10

Jesu setenta y dos buheyequinare buhe dutiro ohoahye

1 Came Jesu apequina buheyequinare setenta y dos buheyequinare bese, macaripũ tiquiuro

wahato pano ohoyuahye. Ti macarine p̄eyequina dihita ohoyuahye tiqiro. ² Sa ohoyuro ohō saha ni yahuahye tiquinare queoye mehna buhero:

—Trigo peye ti b̄uca tuhasagū peye ijigū dahraye pajiro ijire. Sa ijiepegūta dahrayequina pehe meheñequinagā ijire. Sata quehnoañe buheyere t̄hoatiquina peyequina ijigū pajiro ijire mari dahraye. Sa ijiepegūta meheñequinagā dahrari masa yero sahata quehnoañe buheyere buheatiquina gūh̄u meheñequinagā ijire. Sa yena quehnoañe buheyere buheatiquinare apequinare tiqiro ohoatire siniña Cohācj̄ure m̄usa. ³ Wahaya m̄usa. M̄sare yuh̄u ohogū m̄usa oveja pohne yayia watoa tiquina ijiro sahata m̄usa gūh̄u ñañequina usuayequina watoa ijinata. ⁴ Niñeru ajurore, paji cj̄uri ajuro gūh̄ure, dahpo suhtire nedacāh̄ña. M̄usa mahap̄u tinina apequinare boca sa yahudcuercāh̄ña. Poto wahaya. ⁵ Ijipihtiyē m̄usa sajan̄e wuh̄usep̄u sajan̄a, “Ahri wuh̄u cj̄ena quehnoano ijiahero”, ni m̄htaña. ⁶ Ti wuh̄u cj̄ena quehnoano mehna ijiequina cahmequeno marieñequina tiquina ijigū, tire niña tiquinare. Quehnoano mehna tiquina ijieragū ihñana ti wuh̄u cj̄enare sa niedacāh̄ña. ⁷ Ihcā wuh̄up̄u sajan̄a sad̄ucana tiquina quehnoañequina ijigū ti wuh̄up̄uta tojoaya. Top̄u tiquina duhu peorire ihya, sih̄niña. Dahrayequinare tiquina wapatayere neno cahmene. Sa yena tiquina wapatayere tiquina neno sahata tiquina duhu peorire neña m̄usa gūh̄u. Sa yena ihcā wuh̄up̄uta m̄usa esari wuh̄up̄uta ijina, ti maca cj̄ē wuh̄usep̄u carī tiniedacāh̄ña. ⁸ Macap̄ure m̄usa esana to cj̄ena pehe m̄sare tiquina cahmeñequina ijigū ti ihyayere tiquina duhu peorire

ihyaya. ⁹ To cj̄ena dohatiyequinare yuh̄duoya. Sa yena ohō saha niña to cj̄enare: “Cohācj̄ū yojoap̄ure mari p̄h̄toro tiqiro ijati mehenogā d̄hsare”, niña tiquinare. ¹⁰ Ape macap̄u m̄usa esagū tiquina pehe m̄sare cahmedaboaga. Tiquina cahmedagū ihñana ti maca decop̄u waha, ohō saha niña tiquinare. ¹¹ “Ahri maca cj̄ē dihtare dahpocāri cj̄ē dihtare wej̄ē site cohāna niaja us̄āre m̄usa cahmedari buhiri ihñona. Sa yena ahrire wacūña. Cohācj̄ū mari p̄h̄toro yojoap̄ure tiqiro ijati mehenogā d̄hsare”, niña tiquinare. ¹² M̄sare poto niita niaja. Sodoma cj̄ena ña yuh̄duayequina ijiahye. Tiquina sa ijiepegūta pihtiatu deco ijigū Cohācj̄ū tiqiro buhiri dahreati deco ijigū Sodoma cj̄ena yuh̄duoro m̄sare cahmeñequina pehere buhiri dahrerota, niahye Jesu.

Apeye macari cj̄ena Cohācj̄ure yuh̄duocayequina ijire
(Mt 11.20-24)

¹³ Came Jesu ohō saha niahye macari cj̄enare:

—Corazín cj̄ana, m̄usa ñano yuh̄d̄nata. Betsaida cj̄ana, m̄usa gūh̄u ñano yuh̄d̄nata. M̄usa ye macarip̄ure Cohācj̄ū tutuaye mehna ye ihñomi. Tiro wame tiri macare, Sidō wame tiri maca gūh̄ure tiqiro tutuaye mehna yuh̄u ye ihñogū ihñañe panop̄u to cj̄ena pehe tiquina ñañene b̄uj̄ua witiboaga. Sa ye quehnoañene comesaboaga. Duita tiquina masa dija suhtire saña, tiquina basi peca cj̄ē nujuare tiquina bui dahra site peoboaga tiquina ñañene b̄uj̄ua witiyere ihñof̄e. ¹⁴ Cohācj̄ū tiqiro buhiri dahreati deco ijigū Tiro cj̄ena, Sidō cj̄ena yuh̄duoro m̄usa pehere m̄usa ñari buhiri m̄sare tutuaro buhiri dahrerota tiqiro. ¹⁵ Capernau cj̄ana, m̄usa esa tuharo ah̄m̄usep̄u waha duamene. M̄usa sa waha duepegūta m̄usa ñari

buhiri musare Cohācjū pecapū cohānota, niahye Jesu.

16 Sa ni tuhasa Jesu tiquiuro buheyequinare yahuahye:

—Musare tūhoyequina yūhū gūhare tūhore. Musare cahmeeñequina, yūhū gūhare cahmedare. Sa yeye yūhūre cahmeeñequina, tiquina yūhūre ohoriquiro gūhare cahmedare, niahye Jesu tiquinare.

Setenta y dos buheyequina tojoa wihiahye

17 Came setenta y dos buheyequina bucueye mehna tojoa wihiahye:

—Pūhto, mūhū wame mehna mūhū tutuaye mehna watīare usā dutigū tiquina pehe usāre yūhdūdūcaerare, niahye tiquina Jesure.

18 Tiquina sa nigū Jesu yūhtiahye tiquinare:

—Ūhmūsepū mia sitedoque dijoro sahata, watīno tiquiuro bora dijia tagū ihñān. 19 Quehnoano tūhoya. Musare yūhū tutuayere ohou yūhū. Sa yegū añāa parire, cutipa parire, watīnore marine ihñā tuhtiriquirore mūsa yūhdūdūcatire ohou yūhū. Sa ye tiquina musare ñāno ye masiedare. 20 Yūhū sa ohoepegūta watīa musare tiquina yūhdūdūcaeragū ihñāna ti dihitare bucueracāhñā. Ahri pehere bucueya. Ūhmūsepū Cohācjū yequina tiquina wamene tiquiuro ojoa ohōri tjupū mūsa wamene tiquiuro ojoa ohōgū ihñāna, ti pehere bucueya mūsa, niahye Jesu tiquinare.

Jesu bucueahye

(Mt 11.25-27; 13.16-17)

21 Ti pjere Espīritu Santo Jesure tutuaro bucuegū yeahye. Sa yero Jesu ohō saha niahye:

—Mai, mūhū ūhmūsepū gūhare yehpapū gūhare pūhto ijire. Masi yūhdūdūcayequinare mūhū yahuerarire ihyo ijiyequina pehere yahuri mūhū. Mūhū sa yegū ihñāgū “Quehnoa yūhdūare”, niaja.

Sata ijire mai. Mūhū ye duariro sahata, mūhū cahmediro sahata tiquinare mūhū yere yahuri mūhū, niahye Jesu.

Sa ni tuhasa apequinare ohō saha niahye:

22 —Yūhū Pacū ijipihtiyere yūhūre ohori. Yūhū Pacū di-hita yūhūre masine. Yūhū gūhū tiquiurore masiaja. Yūhū beseriquina gūhū tiquiurore masine, yūhū masi dutiyequina ijiye. Topequinata yūhū Pacūre masiaja usā, niahye Jesu.

23 Tiquiuro sa nidi bato tiquina sehsaro ijigū Jesu tiquiuro buheyequinare ohō saha niahye:

—Ahri ijipihtiyere mūsa ihñāna bucuenta ijire. 24 Ijirota ijire. Peyequina Cohācjū yere yahu māhtariquina, ihquē yehpari cjēna pūhtoa gūhū yojopū mūsa ihñārire ihñā duamahye tiquina gūhū. Sa ye mūsa tūhori gūhare tūho duamahye, niahye Jesu.

Quehnoariquiuro Samaria cjāno quitire yahuahye Jesu

25 Ti pjeta judio masare buheriquiro Jesu cahapū wihi, Jesure tiquiuro ñāno yahuducugū ye duamahye:

—¿Buegū, yūhū ijipihtiyē decori Cohācjū mehna iji duagū dūhse yeboagari yūhū? ni, sinituahye tiquiuro Jesure.

26 Tiquiuro sa nigū Jesu yūhtiahye tiquiurore:

—¿Dūhse ni yahuajari Cohācjū yere tiquina ojoari pūpū? ¿Cohācjū tiquiuro ni ojoarire dūhse ni tūhotuajari mūhū? niahye Jesu tiquiurore.

27 Jesu sa nigū tiquiuro yūhtiahye:

—Ohō saha niahye Cohācjū: “Tutuaro mūsa jeripohnari mehna, quehnoano mūsa tutuaye mehna, mūsa wacūñe mehna Cohācjāre cahñā. Sa ye mūhū basi mūhū

cahño saha mähü cahapü ijiye-
quina gühäre cahña”, niahye
tiquiro Jesure.

²⁸ Tiquiro sa nigü Jesu yähtiahye:

—Potota nine mähü. Tire yeya.
Sa yegü ijipihtiyē decori Cohäcjä
mehna ijigüta mähü, niahye
tiquirore.

²⁹ “Ahriquiro Cohäcjä dutiyere
ye pehoriquiro ijire”, masa
tiquirore tiquina ni ihñagü cah-
meahye judio masare buheriquiro.
Sa cahmeno tiquiro Jesure ohö
saha ni sinituahye:

—¿Noa boro ijiboagari yähäre
mähü cahñi dutiriquiro? niahye
tiquiro.

³⁰ Tiquiro sa nigü Jesu ohö
saha ni queoye mehna piti dahre
buheahye:

—Ihcä deco Jerusalëpü ahtariquiro
Jericöpü wahariquirore mahapü
tiquiro tinigü yaqueyequina
tiquirore ñeheahye. Sa ñeheñe,
tiquiro suhtirore tu we ne,
tiquirore tutuaro quëahye. Sa
tutuaro quë, tiquiro yariaro taro
yegü duhuahye tiquina tiquirore.

³¹ Ti pjeta pahi ti mahapü ahtahye.
Sa ahtarö tiquina quëdiquirore
ihñaeperota maha ape sie dühtü
cahapü yähdü cãa wahahye. ³² Sa
ye Cohäcjä wähüpü dahrariquiro
gähü pejecüoriquiro cahapü esa,
tiquirore ihña, maha ape siepü
yähdü cãa wahahye. ³³ Sa ye
Samaria cjäno pehe topü waha,
yoa cjänopü pejecüoriquirore ihña,
tiquirore paja ihñahye. ³⁴ Sa yero
tiquiro pejecüoriquiro cahapü
esa, ahse, vino mehna moredire
tiquiro camine pio peoahye.

Pio peo tuhasa suhtiro cahsero
mehna dahteahye tiquiro camine.
Tuhasa, pejecüoriquirore tiquiro
yaquiro burro bui duhu peo, carñi
wähüpü ne cãhye tiquirore. Topü
ijiro, Samaria cjäno quehnoano
ihña ihboahye tiquirore. ³⁵ Ape
deco tiquiro carñi wähü upürore

püa cjoē niñeru cjoerire oho,
ohö saha niahye: “Ahriquirore
ihña ihboya. Ahri esa tuhaeragü
pari turi tojō tagü wapa ye
pehoutja”, niahye Samaria cjäno
wähü upürore, niahye Jesu.

³⁶ Sa ni tuhasa judio masare
buheriquirore sinituahye Jesu:

—¿Ahriquina ihtiaro ümüa
diquiro pehe ijiajari pejecüoriquirore
cahñidiquiro? niahye Jesu.

³⁷ Tiquiro sa nigü tühoro
buheriquiro pehe Jesure yähtiahye:

—Pejecüoriquirore yedo-
horiquiro ijiaja tiquirore
cahñidiquiro, niahye tiquiro Jesure.

—Wahaya. Mähü gühü masare
sata yei wahaya, niahye Jesu
buheriquirore.

*Marta, María gühü cahapü tini-
ahye Jesu*

³⁸ Sa ye Jesu tiquiro buheye-
quina mehna tiquina wahagü,
ape macapü tiquina tinigü, Marta
wame tiricoro tiquinare ticoro ya
wähüpü sajã ta dutiahye. ³⁹ Ticoro
bahoro María tiquiro dahpocãri
cahapü duji, tiquiro buheyere
tühohahye. ⁴⁰ Ticoro sa yegü ihñano
Marta ticoro dahraye peye ijigü
usuahye. Sa yero ticoro Jesure
yahuahye:

—¿Pühoto, yähü ihcöta dahragü
yähäre yähü baho ticoro yedoho-
eragü mähäre quehnoajari, mähü
ihñagü? Ticoro yähäre yedoho
dutiya, niahye Marta Jesure.

⁴¹ Ticoro sa nigü Jesu yähtiahye:

—Marta, dahraye peye cüogo
pajiro tühoture mähü. ⁴² Cohäcjä
tiquiro yere tühö dutire. María
quehnoañene yero taro, tire
cahmene. Sa yegü yähäre ticoro
tühogü “Yedohogo wahaya”,
niedaja ticoro, niahye Jesu
Martare.

11

*Jesu Cohäcjäre siniñene buheahye
(Mt 6.9-15; 7.7-11)*

¹ Ihcã deco Jesu Cohãcjäre sinino niahye. Tiquiro sini tuhasagũ, ihcãquiro tiquiro buheyequina mehna cjãno tiquirore ohõ saha niahye:

—Puhto, Ñu tiquiro buheyequinare tiquiro buheriro sahata Cohãcjäre siniñene usã gãhure buheya mũhũ, niahye tiquiro Jesure.

² Tiquiro sa nigũ tuhoro Jesu tiquinare yahuahye:

—Ohõ saha Cohãcjäre siniña: “Usã Pacũ, uhmũse cjũ mũhũ quehnoagũ sa ijiducure. Yojopũre ijipihtiyequina puhto ijiya. ³ Sa yegũ decoripe usã ihyatire ohoducuya usãre. ⁴ Apequina usãre tiquina ñañe yerire usã boaja. Sa yegũ mũhũ gãhũ usã ñañe yerire boya. Sa yegũ usã ñañene ye duagũ usã tutuaro cahmegũ ihñagũ tire usãre ye dutiegũta”, ni siniña Cohãcjäre, niahye Jesu tiquinare.

⁵ Came Jesu quti mehna tiquiro buheyequinare ohõ saha ni buheahye:

—Ihcãquiro ñami decopũ tiquiro acayũro ya wũhũpũ waha, tiquirore siniahye: “Yũhũ acayũ, ihtiarĩa pã pacare ohoya yũhũre. ⁶ Apequiro yũhũ acayũro tinino ahtariquiro mianogãta ya wũhũpũ wihiri. Sa yegũ tiquirore yũhũ nuati mariedare”, niahye tiquiro acayũrore. ⁷ Tiquiro sa nigũ tiquiro acayũro wũhũ puhĩapũ ijiriquiro yũhtiahye: “Yũhũre cariboeracãhña. Sopecaha bihariro ijire. Yũhũ, yũhũ pohna mehna carĩna niaja. Wahcãno pjeraga yũhũre mũhũre ihyayere ohoborigũ”, niahye tiquiro acayũro. ⁸ ¿Dũhse waharotari sinidiquirore? Poto niaja mũsare. Tiquiro acayũro ijieperota, ihyaye ohoboriguero wahcã duerahye. Tiquiro wahcã

duerapegãta ihyaye sinidiquiro pehe bũe tiro marieno tiquiro yoari pje siniducugũ ijipihtiye tiquiro sinidiro sahata ohorota. ⁹ Sa yegũ ahrire mũsare ni yahugũ niaja: Cohãcjäre siniña. Sa sinina mũsa nenata. Mũsa sinidire bocanata. Tiquirore sa siniducuya. Mũsa sa yegũ tiquiro ohorota. ¹⁰ Ijipihtiyequina Cohãcjäre siniñequina neeta. Sa ye tiquina sinidire bocaeta. Sa yero ijipihtiyequina Cohãcjäre sa siniducyequinare tiquiro tiquinare ohorota.

¹¹ ¿Mũsa pohna mũsare wahire tiquina sinigũ añare ohoboagari mũsa tiquinare? ¹² ¿Mũsa pohna canaca dũere tiquina sinigũ cutipare ohoboagari mũsa tiquinare? Ne ohosi. ¹³ Mũsa ñana ijiepenata mũsa pohmare quehnoañene ohoe tiri mũsa. Sa yero Cohãcjũ pehe mũsa ohori yũhdũoro quehnoañene ohore mũsare. Tiquiro mari Pacũ uhmũse cjãno Espĩritu Santore ohorota tiquirore siniñequinare, niahye Jesu tiquiro buheyequinare.

—Jesu watĩno tutuayere cũore, ni, yahusãhye masa

(Mt 12.22-30; Mr 3.20-27)

¹⁴ Ti pjere Jesu watĩnore cohãno niahye. Watĩno pehe yahuducu masiedagũ yeahye masũnore. Sa yero watĩno masũnore tiquiro duhuri bato masũno pehe yahuducu dũcahye. Tiquiro yahuducugũ tuhoye masa peyequina tuhõ maria wahahye. ¹⁵ Tiquina sa tuhõ mariepegãta apeqũna pehe ohõ saha niahye:

—Ahriquiro Jesu watĩare tiquiro cohãgũ Beelzebũ wame tiriquiro watĩa puhtoro pehe tiquirore yedohore, niahye apeqũna.

¹⁶ Apequina “¿Jesu Cohãcjũ tiquiro ohoriquiro ijiajari?” ni masi duaye tiquirore Cohãcjũ tutuaye mehna ye ihño dutimahye.

17 Tiquina sa dutigū tūhoro “Watīno tutuaye mehna watīare cohāre”, ni, tiquina tūhotuyere masino, tiquinare ohō saha ni yahuahye Jesu, “Watīno ye tutuaye mehna watīare cohāgu niedaja”, nino taro:

—Ihcā yehpa cjēna tiquina basi cahmequeñe, ti yehpa cjēna yaria pihtia wahaboaga. Sa ye ihcā wūhū cjēna tiquina basi cahmequeñe, ti wūhū cjēna waha pihtia wahaboaga. 18 Sa ye, watīno yequina watīa tiquina basi cahmequeñe, tiquina watīa gūhū waha pihtia wahaboaga. Ihcā curua iji masiedaboaga. Mūsa yūhūre ohō saha nine. “Tiquiro watīno tutuaye mehna watīare cohāre”, mūsa yūhūre nina niaga. 19 ¿Yūhūre mūsa nidi poto ijigū mūsa mehna cjēna watīare cohāñe watīno tutuaye mehnata cohājari tiquina gūhū, mūsa ihñagū? Mūsa mehna cjēna watīare cohāñe, watīno tutuaye mehna cohāñe niedare. Ahrire masina watīno tiquiro tutuaye mehna watīare yūhū cohāedagū masinata mūsa. 20 Sa yegu yūhū pehe watīare cohāgu Cohācjū tutuaye mehna cohāja. Ahrire masina, Cohācjū tiquiro pūhtoro iji dūcayere masinata mūsa.

21 Tutuariquiro tiquiro ye wamoā mehna tiquiro ya wūhūre tiquiro ihña ihbogū tiquiro yere apequina yaque masiedare. 22 Tiquiro sa ihña ihboepēgūta apequiro tutua yūhdūriquiro tiquiro mehna cahmeque, tiquirore yūhdūdūca, tiquiro ye wamoare ehma cā, tiquiro yere ehma cāhre. Ohō sahata ye yūhdūdūcaro cahmene watīare. 23 Ihcāquiro yūhūre cahmedaro, yūhūre ihña tuhtiriquiro ijire. Ihcāquiro yūhūre yedohoeraro yūhūre ñano yero nine, ni buheahye Jesu.

Watīno pari turi masūnore

tiquiro sajāri quitire yahuahye Jesu (Mt 12.43-45)

24 Sa yero tiquiro tūhotuye mehna ohō saha ni queoye mehna buheahye tiquinare:

—Watīno masūno mehna ijiriquiro waha, tiquiro aco marieni yehpapū tinino, tiquiro ijiatore macamahye. Bocaeraro, ohō saha ni tūhotuahye: “Masūno yūhū duhuriquiro mehna pari turi ijigū wahautja”, ni, tūhotuahye tiquiro. 25 Sa nino tiquiro tojoa waha, masūnore bocahye. Sa tiquiro bocagū masūno pehe quehnoariquiro ijimahye. 26 Sa yero watīno apequina siete watīare tiquiro yūhdūoro ñañequinare pijiro wahahye. Tiquiro sa pijigū tiquina ijipihtiyequina watīa masūno mehna ijiahye. Sa yero masūno pehe to pano ihcāquiro watīnore cūoro, ñariquiro ijimahye. Camepū pehere peyequina watīare cūoriquiro ijiro, to pano tiquiro ijiriro yūhdūoro ña yūhdūariquiro ijiahye, niahye Jesu.

Jesu bucuyere yahuahye

27 Tire tiquiro sa nigū masa watoa ijiricoro numino Jesure yahuahye:

—Mūhūre pohna tiricoro, mūhūre apūoricoro bucuericoro ijire, niahye Jesure.

28 Ticoro sa ni tuhasagū tūhoro Jesu ticorore yūhtiahye:

—Cohācjū yahuducuyere tūhoyequina tiquiro dutiyere yeyequina tiquinata ijiaga bucuयेequina, niahye Jesu ticorore.

Masa ñañequina Jesure Cohācjū tutuaye mehna ye ihño dutiahye (Mt 12.38-42; Mr 8.12)

29 Sa ye peyequina masa Jesu cahapū tiquina wihigū, tiquiro tiquinare yahu nemoahye:

—Yojopū cjēna ñañequina ijire. Yūhūre poto nigū yūhū ijiyere

tiquina masi duaye, Cohãcjũ tutu-aye mehna yũhũ ye ihñogũ ihña dumene. Tiquina sa ihña duepegũta Jona panopũ cjãno Cohãcjũ tutu-aye mehna tiquiro yeri dihitare ihñonota Cohãcjũ tiquinare. ³⁰ Jona Cohãcjũ yere yahu mãtariquiro ijiro, tiquiro Nínive wame tiri maca cjẽnare Cohãcjũ yere tiquiro masigũ yeriro sahata yũhũ masũ Cohãcjũ ohorigũ masigũ yeaja yojopũ cjẽnare. ³¹ Buhiri dahreati deco ijigũ pãthoro sur cjõno panopũ cjõno ducu, yojopũ cjẽnare “Ñana ijire mũa”, ni, yahusãnota ticoro. Ticoro Salomo panopũ cjãno tiquiro masiñene tũho duaro yoaropũ ahri yelpha ape siepũ ijiricoro Salomoro tũhoro ahtahye. Sa yero quehnoano yero niahye yojopũ cjẽna yũhdũoro. Sa yero ticoro yahusãnota yojopũ cjẽnare. Sa nigũ mũsare poto niita niaja. Yojopũ mũsare yũhũ buheye Salomo tiquiro buheri yũhdũoro ijire. ³² Buhiri dahreati deco ijigũ Nínive wame tiri maca cjẽna gũhũ ducu, yojopũ cjẽnare “Ñana ijire mũa”, ni yahusãeta tiquina. Jona tiquinare Cohãcjũ yere tiquiro yahugũ tũhoye, tiquina ñañene bujua witi, quehnoañene cahmeahye tiquina pehe. Sa cahmeñe quehnoano yeye niahye yojopũ cjẽna yũhdũoro. Sa ye tiquina gũhũ yojopũ cjẽnare “Ñana ijire mũa”, ni yahusãeta. Mũsare poto niita niaja. Yojopũ mũsare yũhũ buheye Jona tiquiro buheri yũhdũoro ijire, ni yahuahye Jesu.

Masa tiquina tũhoturo sahata yere

(Mt 5.15; 6.22-23)

³³ Sa yero queoye mehna buhero ohõ saha ni yahu nemoahye tiquinare:

—Masa sihãriare sihãñe nũoedare. Tiare sihãñe dihi sutu docapũ duhu dapocerare. Tiare uhmũsepũ duhu peore

wũhũpũ sajã tayequina tiquina quehnoano ihña sajã tatore yeye. ³⁴ Sihãria quehnoano buhriogũ mari quehnoano ihña masino sahata quehnoañene tũhotuye mehna quehnoano ye masinata mũa. Mũa tũhoturo sahata yere mũa. Quehnoañene tũhotuna quehnoano yere mũa. Quehnoañene tũhotuerana ñañe pehere yere mũa. ³⁵ Sa yena quehnoano yeya. Mũa tũhotuyepũ ñañene wacũedacãhña. Ñañene ne cahmedacãhña. ³⁶ Tũhasa mũa tũhotuyepũ quehnoañe ijigũ, ñañe ne mariedagũ quehnoañe dihitare tũhotunata, ni buheahye Jesu.

Fariseo masare, judio masare buheyequina gũhũre Jesu tuhti yahuahye

(Mt 23.1-36; Mr 12.38-40; Lc 20.45-47)

³⁷ Jesu tiquiro buhe tuhasagũ ihña, fariseo masũno tiquirore tiquiro ya wũhũpũ ihya dutiro pijiahye. Sa yero Jesu tiquiro ya wũhũpũ sajã sa, tiquina ihyaropũ tiquina mehna nuju sahye. ³⁸ Tiquiro sa nuju sagũ fariseo masũno pehe Jesure ihña nũnũno judio masa tiquina omo coseducuro sahata tiquiro omo coseragũ ihñano ohõ saha ni tũhotuahye: “Yohou. ¿Ahriquiro dũhsero omo coserajari usã yero saha?” ni tũhotuahye. ³⁹ Tiquiro sa ni tũhotugũ masino Jesu tiquirore yahuahye:

—Musa fariseo masa sihniñe parire, wapari gũhũre bui pehe dihitare mũa cosero sahata quehnoañene ye ihñore mũa buigã warona. Sa yepenata Cohãcjũ yere queoro yerare. Apequina yere ehma mũjare mũa. Sa yena ñañe dihitare tũhoture mũa. ⁴⁰ Tũho masiedare mũa. Cohãcjũ mũa pagurire yeriquiro mũa tũho masiñe gũhũre yeahye. ¿Tire masiedajari mũa? ⁴¹ Sa yena mũa

yere pejesꝑoyequinare ohoya mꝑsa. Mꝑsa sa yena quehnoañene tꝑhotuna ijinata.

⁴² Mꝑsa fariseo masa ñano yꝑhdꝑnata. Moa yero saha ijiyere ihyayere ocagũ yeyere cꝑona mehenogã ohomene mꝑsa. Cohãcjũre ño peona tana pahiare ohomene mꝑsa. Sa ohoepenata quehnoañene yerare mꝑsa. Sa yena masare paja ihñedare mꝑsa. Sa yena Cohãcjũre ño peoerare mꝑsa. Oteye dꝑcagãre mꝑsa nedire mehenogã Cohãcjũre mꝑsa ohogũ quehnoarĩne. Sa ohona ohõ saha ye nemoña: Quehnoañene yeya. Sa yena paja ihñaña masare. Sa yena Cohãcjũre ño peoya mꝑsa.

⁴³ Mꝑsa fariseo masa ñano yꝑhdꝑnata. Buheri wꝑhꝑꝑũ ijiina, quehnoañe dujiye dihitare duji duare mꝑsa. Doeri cjẽ duaropũ apeqũna pꝑhtoare quehnoano ño peo tiqũna sinino saha mꝑsare piti cagũ cahmene mꝑsa.

⁴⁴ Ñano yꝑhdꝑnata mꝑsa. Masa cope nꝑori cope yero saha ijiire mꝑsa. Ti cope cahagã masa ijiye, puhiarũ cjãno ahbariquirore ihñedare tiqũna. (Sata masa mꝑsa cahagã ijiye, mꝑsa tꝑhotuyepũre ñaÑe ijiyere masiedare tiqũna,) niahye Jesu tiqũnare.

⁴⁵ Tiquiro sa nigũ tꝑhoro judio masare buheyequina mehna cjãno Jesure yahuahye:

—Buhegũ, tire nigũ usã gãhũre ñano nii niaga mꝑhũ, niahye tiquiro Jesure.

⁴⁶ Tiquiro sa nigũ Jesu yꝑhtiahye: —Ijirota ijiire. Judio masare buhena mꝑsa gãhũ ñano yꝑhdꝑnata. Mꝑsa apeqũnare tiqũna ye masiedarire ye dutire mꝑsa tiqũnare. Sa ye dutiepenata mꝑsa pehe tiqũnare ne mehenogã yedohoerare ti dutiyere tiqũna yeati pehere.

⁴⁷ Sa yena mꝑsa ñano yꝑhdꝑnata. Cohãcjũ yere yahu mꝑhtariquina panopũ cjẽna tiqũna masa

coperire quehnoano quehnomene mꝑsa tiqũnare ño peoro saha yena. Mꝑsa sa yepegãta panopũ cjẽna mꝑsa acaye pehe tiqũnare wejẽahye. ⁴⁸ Mꝑsa acaye panopũ cjẽna pehe Cohãcjũ yere yahu mꝑhtariquinare tiqũna wejẽdiro sahata mꝑsa gãhũ yeboaga. Sa yena yojopũre ti masa coperire quehnomene mꝑsa. Sa quehnona mꝑsa acaye tiqũnare tiqũna wejẽdire wacũre mꝑsa. Sa tiqũna wejõrĩre wacũna “Quehnoa cãhre”, ni wacũre mꝑsa.

⁴⁹ Cohãcjũ tiquiro masiÑe mehna ohõ saha ni yahuahye: “Yeere yahu mꝑhtariquina gãhũre yũhũ buhe duti cũriquina gãhũre ohoutja tiqũnare. Sa yeye tiqũna yũhũ ohoriquinare apeqũnare wejẽ, apeqũnare ñano yeeta”, niahye Cohãcjũ. ⁵⁰⁻⁵¹ Ahri yehpare Cohãcjũ tiquiro bajumehnedi bato Caĩ pehe Abere wejẽahye. Sa ye Cohãcjũ yere yahu mꝑhtariquinare Abe bato ijiyequina gãhũre ñaÑequina wejẽahye. Came Zacariare Cohãcjũ wꝑhꝑꝑũ Cohãcjũre ño peori altar caharũ mꝑsa acaye wejẽahye. Ijipihtiyequina tiqũnare tiqũna wejẽdi buhiri yojopũ cjẽnare Cohãcjũ buhiri dahrerota. Sata ijiire. Mꝑsare nigũta nijaja. Ijip-ihiyequina tiqũnare tiqũna wejẽdi buhirire yojopũ cjẽnare Cohãcjũ buhiri dahrerota.

⁵² Mꝑsa judio masare buhena, mꝑsa ñano yꝑhdꝑnata. Cohãcjũ masiÑene tiqũna ojoari pũrine cꝑoepenata apeqũnare yahuerare mꝑsa. Mꝑsa basi Cohãcjũ yere tꝑhoerare. Sa yena apeqũna tiquiro yere tiqũna tꝑho duepegãta tire mꝑsa tiqũnare tꝑho dutierare, niahye Jesu tiqũnare.

⁵³⁻⁵⁴ Tiquiro sa nigũ tꝑhoye judio masare buheyequina, fariseo masa gãhũ tiquiro mehna usua, tiquirore ñano yahuducuahye. Sa ye Jesu tiquiro ñano yꝑhtigũ tꝑho duaye, tiqũna peye ni meho cũ

sinitumahye tiquirore, tiquirore yahusā duaye.

12

Tiquina ni mehoducurire Jesu yahuahye

(Mt 16.6; 10.26-27; Mr 8.15)

¹ Sa ye Jesu cahap_u masa peyequina cahmecoa, wahpa yahduahye. Top_u Jesu tiquiro buheyequinare ohō saha ni yahu dūcahye:

—Quehnoano wacū masiña m_usa. Fariseo masa tiquina ye pāre pugū yeyere ihñana quehnoano wacū masiña. Tiquina ni mehoducurire nig_u niaja “Pāre pugū yeye”, nig_u. ² Ijipihtiye apequina tiquina masiedarire came masieta. ³ Sa yero ñamip_ure tiquina n_uo yahuducurire buhriorop_u bajugū yero sahata Cohācjū yahurota. Bihari tucū_u apequiore cahmono caha tiquina nidire masa peyequina watoa yahurota Cohācjū, ni yahuahye Jesu.

Masa tiquina cueatiquirore yahuahye Jesu

(Mt 10.28-31)

⁴ Sa yero Jesu yahu nemoahye tiquinare:

—Poto niita niaja m_usare. Masare wejēñequina wejē tuhasa pari turi tiquina wejōriquina m_unare ñano ye nemo masiedare. Sa yena m_usare wejē duayequinare cueracāhña. ⁵ Yojop_ure m_usa cueatiquirore m_usa ño peotiquirore yahutja. Cohācjū pehere cue, ño peoya. Tiquiro m_usa yariari bato pecap_u cohā masine m_usare. Sata ijire. Poto nig_u niaja. Cohācjū pehere cue, ño peoya.

⁶ 'Ihcā omopequina siripia wapa mariedare. Sa wapa mariedapegūta ihcāquiogāre Cohācjū ne boerare. ⁷ Sa yero m_usa poarire ne ihcā poa da d_uhsaro marieno masi pehere

Cohācjū. Sata m_usa ijire tiye gūhare masi pehere Cohācjū. Sa masino m_usare ihña ihboducure. Siripia yahduoro Cohācjū cahñe m_usa pehere. Sa yena tiquirore ño peona, cueracāhña m_usa, niahye Jesu.

Jesu yequina m_usa ijiyere yahuya masare

(Mt 10.32-33; 12.32; 10.19-20)

⁸ Sa ye Jesu yahu nemoahye:

—M_usare niita niaja. Ihcāquiore “Jesu yaquiore ijiaja”, masare tiquiro nigū ihñag_u, yah_u mas_u Cohācjū ohorig_u “Tiquiro yaquiore ijire”, ni yahutja Cohācjū yequina angelere. ⁹ Ihcāquiore “Jesu yaquiore ijieraja”, masare tiquiro nigū, yah_u gūh_u “Tiquiro yaquiore ijierare”, ni, yahutja Cohācjū yequina angelere.

¹⁰ 'Ihcāquiore yah_ure ñano tiquiro ni yahuducugū ti ñañene Cohācjū bo masine. Sa boeperota ihcāquiore Espiritu Santo pehere tiquiro ñano ni yahuducugū ti ñañene ne Cohācjū bosi.

¹¹ 'Mari judio masa buheri wahap_u p_uhtoa cahap_u apequina m_usare ne sajā “Ñañequina ijire”, ni yahusāeta. Tiquina sa yahusāgū m_usa yahuducuatire “Acuehi, masiedaboaga”, ni t_uhotueracāhña. ¹² Tiquina m_usare yahusāgūta Espiritu Santo m_usa yahuducuatire yahurota, niahye Jesu.

Doeri cjē up_uro quitire yahuahye Jesu

¹³ Sa ye masa mehna cjūno Jesure ohō saha ni yahuahye:

—Buheg_u, usā pac_u tiquiro yariari bato tiquiro ye usāre tojoare. Sa yeg_u yah_u wahmine tire yah_u gūhare queoro tu wa dutiya, niahye tiquiro Jesure.

¹⁴ Tiquiro sa nigū Jesu yah_utiahye: —Ne ti borore tu wabog_u ijieraja yah_u, niahye Jesu tiquirore.

¹⁵ Sa ni tuhasa Jesu ijipihtiyequinare yahuahye:

—Quehnoano yeya m̄sa. Doeri c̄jēne, apee boro ḡhure cah̄edac̄āh̄ña. Peye c̄uoopenata ti mehnata bucueducueraja mari, niahye Jesu.

¹⁶ Sa ni tuhasa Jesu quitu mehna yahuahye tiquinare:

—Doeri c̄jē up̄aro quehnoari yehpare c̄uoahye. Sa ye ti yehpap̄u tiquiro oteḡū quehnoano d̄uca tiahye. ¹⁷ Sa yero tiquiro basi oh̄o saha ni t̄hotumahye: “D̄uca ihboye w̄huse ne esa tuhaerare. ¹⁸ Yojoṗ̄are oh̄o saha yeitja: Yojoṗ̄u ȳh̄u ihboye w̄h̄usere coh̄ā c̄ā, m̄ana w̄h̄use ȳhd̄uro wahma w̄h̄use yeitja. Ti w̄h̄useṗ̄u ȳh̄u oteye d̄ucare, ijipih̄tiyere yeere ihboutja. ¹⁹ Ȳh̄u sa yeri bato, oh̄o saha ni, t̄hotutja ȳh̄u basi: ‘Ȳh̄u peye apee boro c̄uoḡu ijiaja. Quehnoano soutja. Sa yeḡu ihya, sihni, bucueitja’, ni t̄hotutja ȳh̄u basi”, ni t̄hotumahye tiquiro. ²⁰ Tiquiro sa ni t̄hotuḡū Coh̄āc̄j̄ū tiquirore yahuahye: “M̄h̄u ne t̄h̄o masieḡu ijire. M̄ia ñamita m̄h̄u yariagata. M̄h̄u sa wahaḡū m̄h̄u ye, m̄h̄u cah̄īdi butia waharota”, niahye Coh̄āc̄j̄ū tiquirore, niahye Jesu masare.

²¹ Tire nino, masare oh̄o saha ni yahuahye Jesu:

—Sata wahaeta doeri c̄jē opana Coh̄āc̄j̄ūre wac̄ūeñequina. Sa yero peye doeri c̄jēne, niñerure tiquiro ye ijia ti dihitare ihboriquiro Coh̄āc̄j̄ūre wac̄ūedarō, tiquiro pejec̄uoriquiro yero saha ijirota, Coh̄āc̄j̄ū tiquiro ihñaḡū. Sa yero Coh̄āc̄j̄ū tiquirore ihña bucuere, niahye Jesu.

Coh̄āc̄j̄ū tiquiro poh̄nene ihña ihbore

(Mt 6.25-34)

²² Sa ye Jesu tiquiro buheyequinare oh̄o saha ni yahuahye:

—Ahr̄ire m̄sare niḡu niaja: M̄sa ihyatire, m̄sa suhti sañatire, pajiro b̄j̄ua witi t̄hotuerac̄āh̄ña.

²³ Coh̄āc̄j̄ū m̄sare bajumeh̄neno, ihyatiquina dihitare yerari m̄sare. Sa yero suhti sañatiquina dihitare yerari m̄sare tiquiro.

²⁴ Minic̄j̄ua parire Coh̄āc̄j̄ū tiquiro ihña ihboyere masiña. Tiquina weseri marieñequina ijire. Sa ye ihyayere tiquina ihboye w̄h̄use tiquinare mariedare. Tiquina sa ijiḡū ihñano tiquinare Coh̄āc̄j̄ū tiquina ihyatire oh̄ore. Minic̄j̄ua ȳhd̄uro m̄sa pehere cah̄īne Coh̄āc̄j̄ū. ²⁵ Pajiro m̄sa t̄hotuyere mehna ti m̄sare ihc̄ā hora cati nemoḡū yerare. Sa yero m̄sa pajiro t̄hotuyere d̄h̄seati ijierare. ²⁶ Sa ye pajiro m̄sa t̄hotuyere mehna ne mehenoḡā ye masiedare m̄sa. ¿Sa yena pajiro m̄sa t̄hotuyere ti d̄h̄seati ijierapeḡūta d̄h̄se yena m̄sa ihyatire, m̄sa sihniatire, m̄sa sañatire pajiro b̄j̄ua witi t̄hotuajari?

²⁷ N̄uc̄u c̄jē coh̄ore t̄hotuya. Ti coh̄ori ti basi suhtire yerare. Sa yerapeta quehnoañe suhti sañañequina yero saha quehnoano bajure ti coh̄ori. Salomo m̄n̄ano quehnoañe suhtire sañariquiro tiquiro ijiepeḡūta ti coh̄ori pehe tiquiro ȳhd̄uro quehnoa ȳhd̄uaye coh̄ori waro ijire. ²⁸ Coh̄ore quehnoañe coh̄ori yere Coh̄āc̄j̄ū pehe. Tiquiro sa yepeḡūta coh̄ori pehe meheñe decoriḡā ijiducume ñai bora dijiaa wahare. Mehenoḡā iji, ape deco pecap̄u ūj̄ua wahare. Ti sa ijiepeḡūta coh̄ore quehnoañe coh̄ori ijiḡū yere Coh̄āc̄j̄ū. Sa yero Coh̄āc̄j̄ū coh̄ore tiquiro quehnoañe coh̄ori tiquiro yeriro ȳhd̄uro m̄sa ḡh̄ure quehnoano yerota. Suhtire oh̄orota. Mehenoḡā Coh̄āc̄j̄ūre wac̄ū tutuare m̄sa. ²⁹ Sa yena m̄sa ihyatire, m̄sa sihniatire pajiro b̄j̄ua witi t̄hotuerac̄āh̄ña. ³⁰ Coh̄āc̄j̄ūre cah̄meeñequina pehe ah̄ri yehpa c̄jēna pehe tire sa macaducuyere nine. Mari Pacu

uhmuse cjāno ijipihtiye m̄sa cahmeñe masine. Tiquiro sa masigū pajiro bajua witi t̄hotueracāhña. ³¹ “Cohācjū yuh̄u p̄htoro ijire”, ni t̄hotu, tiquirore cahmeña m̄sa. M̄sa sa yeri bato Cohācjū pehe m̄sa cahmeñe d̄hsagū ohorota, ni yahu nemoahye Jesu.

Uhmusep̄u mari peye c̄ho masiaja
(Mt 6.19-21)

³² Sa yero tiquinare yahu nemoahye:

—Yuh̄u cahña, meheñequinagā ijiepenata, cueracāhña m̄sa. Cohācjū tiquiro p̄htoro ijirop̄ure tiquiro mehna m̄sa ijigū cahmene tiquiro. ³³ Sa yena m̄sa yere dua pehoya. Tire dua, ti niñerure ne, pe-jec̄oyequinare ohoya. Sata m̄sa yegū uhmuse cjē m̄sa wapataye ne pihtisi. Uhmusep̄u m̄sa ye ijiro ne pihtierare. Top̄ure m̄sa yere nea masiedare yaqueriquiro. Sa ye mecasia gūh̄u tire t̄ua masiedare. ³⁴ Uhmusep̄u m̄sa ye ijigū uhmuse cjē dihitaro t̄hotunata m̄sa, niahye Jesu.

Jesu tiquiro tojoa tatire cohte dutiahye tiquiro yequinare

³⁵⁻³⁶ Sa ni tuhasa tiquinare yahu nemoahye:

—M̄sa yere quehnoyu tuhasariquina yero saha yeere sa yeducuna ijina yah̄are cohteya. Dahra cohteyequina tiquina p̄htoro omoca d̄hateri bose decop̄u tiquiro wahagū tiquiro tojoa tatire tiquina cohtere. Tiquina sa cohteriro saha yuh̄u tojoa tatire cohteya m̄sa gūh̄u. P̄htoro tiquiro wuh̄up̄u wihi, sopecahare tiquiro dotegū t̄hoye tiquina d̄uita p̄o s̄ore tiquirore. ³⁷ Dahra cohteyequina tiquina p̄htoro wihigū tiquiro cahmeno sahata yeducuyequina ijieye, bucueyequina ijietā. Tiquina sa yegū ihñano p̄htoro pehe dahra cohteriquiro yero saha comesarota. Sa yero dahra cohteyequinare duji

dutiro, tiquiro tiquina ihyayere peorota. ³⁸ Tiquiro wihiri p̄je ñami decop̄u, o bohreagūp̄u ijiepegāta dahra cohteyequina pehe tiquiro wihiri p̄jere tiquirore quehnoano cohteyequina ijieye, bucueyequina ijietā tiquina. ³⁹ Ahrire wacūña. Yaqueriquiro wuh̄up̄u tiquiro wihiatō pano ti wuh̄u cjāno masiedare. Wuh̄u cjāno yaqueriquiro tiquiro wihiatōre masino, yaqueriquirore sajā ta dutieraboaga. Sa yero wacūeno mehna ahtare yaqueriquiro. ⁴⁰ Sa yena m̄sa gūh̄u cohteya. Yuh̄u mas̄u Cohācjū ohorigū wacūeno mehna ahtat̄ja. Sa yena yeere sa yeducuna ijina cohteya m̄sa, niahye Jesu tiquinare.

Apequiro dahra cohteriquiro tiquiro p̄htoro tiquiro ño peogū, apequiro pehe ño peoerahye
(Mt 24.45-51)

⁴¹ Tiquiro sa nigū Pedro pehe sinituahye Jesure:

—¿Ahri quitire yahugū usāre nigū nijari? ¿O ijipihtiyequinare sa nigū nijari? niahye Pedro.

⁴² Tiquiro sa nigū Jesu tiquiro t̄hotuye mehna ohō saha ni queoye mehna buheahye tiquinare:

—Dahra cohteriquiro tiquiro p̄htoro ño peoriquiro t̄ho masiniquiro ohō sahata ijire. P̄htoro tinino waharo, dahra cohteriquirore tiquiro ya wuh̄are cūre. Tiquiro cūnohriquirō pehe dutiriquiro ijirota. Sa yero tiquiro ihyari p̄je ijigū apequina dahra cohteyequinare ihyayere itire. ⁴³ Came p̄htoro tiquiro wihigū dahra cohteriquiro pehe tiquiro p̄htoro tiquiro dutiriro sahata ye pehoriquiro ijiro, tiquiro bucueriquiro ijirota. ⁴⁴ Poto nigūta niaja m̄sare. Tiquiro sa yegū tiquiro p̄htoro ijipihtiye tiquiro yere ihñā ihboriquiro cūnota tiquirore. ⁴⁵ Apequiro dahra cohteriquiro

pehe “Yũhũ pũhoro yoari pje bajuerare”, niboaga. Sa nino apeqũna dahra cohteyeqũnare Ʃmũare, numia gũhare quẽ mũja, pajiro ihya, sihni, queheboaga. ⁴⁶ Tiquiro sa yeri bato wacũeno mehna tiquiro pũhoro wihirota. Sa wihiro tiquirore ñano buhiri dahrerota. Sa yero Cohãcũre yũhdũdũcayeqũnare tiquiro cohãnopũ tiquirore cohãnota.

⁴⁷ Sa yero dahra cohteriquiro tiquiro pũhoro cahmeñene masiniquiro ijieperota tire tiquiro yeragũ, tiquiro quehnoano dahraeragũ tiquiro pũhoro pehe tiquirore yuta da mehna tananota. ⁴⁸ Apeqũro pehe dahra cohteriquiro tiquiro pũhoro cahmeñene masieniquiro ijiro quehnoano yeragũ ihñano tiquiro pũhoro pehe derogã tiquirore tananota. Cohãcũ pajiro masare ohoro pajiro tiquinare apeqũnare oho dutirota. Sa yero tiquiro cahmeñene masigũ yere masare. Quehnoano tiquiro masigũ yenhriquinare quehnoano yahti dutire tiquiro, niahye Jesu.

Jesu masare cahme tu wagũ yere
(Mt 10.34-36)

⁴⁹ Sa ni tuhasa Jesu tiquinare yahuahye tja:

—Peca Ʃjũa weriro sahata yũhũ ahri yehpapũre masa tiquina ñaũe yeyere cose wegũ ahtagũ nii. Yojoũ pũrita peca Ʃjũa wero saha ñaũe marieñeqũna masa tiquina ijigũ tutuaro cahmeaja yũhũ. ⁵⁰ Yũhũ ñano yũhdũtja. Yũhũ sa ñano yũhdũatire cohtegũ, ñano jeripohna tiaja yũhũ. ⁵¹ ¿Dũhse ni tũhotuajari mũsa yũhare? ¿“Tiquiro masare tiquiro buheri bato apeqũna tiquina basi ihña tuhtisi”, ni tũhotuajari mũsa yũhare? Sa ijierare. Masare yũhũ buheri bato ihquẽquina yeere tũhoeta. Apeqũna pehe tiquinare ihña tuhtieta. Ihcãno saha ijisi

masa. Mũsare nigũta niaja. Masa yũhũ buheyere tũhoye, pũa curua cahme tu waeta. ⁵² Yojoũre ihcã wũhũ cãna ihcã omopeqũna masa yũhũ buheyere tũhoye, pũa curua tiquina basi cahme tu waeta. Ihcã curua ihtiaro, ape curua pũaro ijietã. ⁵³ Tiquiro pacũro tiquiro macũnore ihña tuhtirota yaquiro tiquiro ijiri buhiri. Tiquiro macũno gũhũ tiquiro pacũrore ihña tuhtirota yaquiro tiquiro ijiri buhiri. Sa yero ticoro pacoro maconore ihña tuhtirota yacoro ticoro ijiri buhiri. Sa yero apecoro macono gũhũ ticoro pacoro ihña tuhtirota yacoro ticoro ijiri buhiri. Sa yero ticoro mareono ticoro macũ namonore ihña tuhtirota yacoro ticoro ijiri buhiri. Sa yero apecoro macũ namono gũhũ ticoro mareonore ihña tuhtirota yacoro ticoro ijiri buhiri. Sa waharota, yũhũ buheyere tiquina tũhogũ, niahye Jesu.

Quehnoari deco ijiatire, ñari deco ijiatire masa tiquina masiñene yahuahye Jesu

(Mt 16.1-4; Mr 8.11-13)

⁵⁴ Sa ye Jesu masare ohõ saha ni yahuahye tja:

—Ahrie pehepũ acoro cururire ihñana, duita “Acoro ahtarota”, nine mũsa. Mũsa sa nidi bato acoro ahtare. ⁵⁵ Sa yena surpũ wihnono ahtagũ “Asiri deco ijirota”, nine mũsa ahri yehpapũ ijina. Mũsa sa nidi bato cahmari deco ijire. ⁵⁶ Mũsa masa ihñonopũ quehnoano iji mehoducuna ijire. Mũsa ahri yehpare Ʃhmũse gũhare ihñana, quehnoari deco ijiatire, ñari deco ijiatĩ gũhare masine mũsa. ¿Sa yena yojoũ cã decorire masiepenata dũhsena ahri yehpa cãna yojoũre mũsa dũhse wahatire masiedajari mũsa? niahye Jesu.

Mũsare ihña tuhtiriquiro mehna mũsa cahmequedire cahmeque

duhuya

(Mt 5.25-26)

⁵⁷ Sa ni tuhasa ohõ saha ni yahu nemoahye:

—¿Musa poto yeatire yojopu masiedajari musa? ⁵⁸ Apequiro mähure yahusãno waharo buhiri dahre dutiri wãhpũ waha dutiboaga. Topu wahana “Pari turi mähure sa yesi”, nigũ cahmeque duhuya. Mähũ sa duhueragũ tiquiro buhiri dahre dutiriquiro cahapu neaboaga mähure. Sa yero buhiri dahre dutiriquiro pehe mähure surarare tiquiro ohogũ, mähure surara peresu yeeta. ⁵⁹ Mähure nigũ niaja. Topu ijiniita mähũ. Tee tiquina wapa ye dutirire mähũ wapa ye pehogupũ wijiaguta mähũ, niahye Jesu.

13

Musa ñaÑe yerire bujua witi, quehnoañe pehere comesaya

¹ Ti pjere meheÑequinagã masa Jesure ohõ saha ni yahue tiahye:

—Galilea cjẽna wahiquirore wejẽ ujãa mũo Cohãcjũre tiquina ño peori watoa Pilato pehe tiquinare wejẽahye. Tiquiro sa wejẽgũ wahiquiro dii mehna masa dii moreahye, ni, yahuahye tiquina Jesure.

² Tiquina yahu tuhasagũ Jesu yahutiahye:

—¿Galilea cjẽna Pilato tiquiro wejẽgũ wejõriquina munare duhse ni tuhotuajari musa? ¿Tiquina sa yariagũ apequina Galilea cjẽna yãhdũoro ñaÑequina tiquina ijiri buhiri sa yeyari Cohãcjũ tiquinare, musa tuhutugũ? ³ Ijierare. Musare niita niaja. Musa pehe musa ñaÑene bujua witierana, quehnoañe pehere comesaerana, musa gãhũ yariana pecapu wahanata. ⁴ Sa ye sohõ ijiriquina diez y ocho masa Siloé wame tiri wãhũ uhmũari wãhũ tiquina bui wihnoa dijiaro, tiquinare wejẽ pehoahye. ¿Sa

waha yariaye, apequina Jerusalẽ cjẽna yãhdũoro ñaÑequina ijiyari tiquina, musa tuhutugũ? ⁵ Ijierare. Musare niita niaja. Musa ñaÑene bujua witierana quehnoañe pehere comesaerana, musa gãhũ yariana. Sa yena pecapu wahanata, niahye Jesu tiquinare.

Higueragũ dũca mariedũ quitire yahuahye Jesu

⁶ Sa ni tuhasa apeye queoye mehna piti dahre yahuahye tiquinare:

—Wese upũro tiquiro wesepepu higueragũre cũoahye. Sa yero tiquiro tũ dũcare macano wahamahye. Bocaerahye. ⁷ Bocaeraro tiquiro wese dahrariquirore yahuahye. “Tuhoya yahure. Ihtia cãhma waro higueragũ dũcare macamaja. Dũca mariedare. Tũ dũca mariedagũ tũre quẽ cohã cãhña. Tũ ya wesepepu ijigũ apedure otero basioerare. Apedu tũ ihyaborire ihyaboaga tũ dũca mariedũ pehe”, niahye wese upũro tiquirore dahra cohteriquirore. ⁸ Tiquiro sa nigũ tũhoro dahra cohteriquiro ohõ saha niahye: “Pũhto, ahdu ihcã cãhma waro ducuriãhdo. Tũ nũhcoripũ yãhũ sehegũtja. Tuhasa, wahiquiro cãhta mehna ti copere yautja. ⁹ Yũhũ sa yeri bato tũ ape cãhma dũca tiro dũca tiboaga. Tũ dũca mariedagũ mähũ quẽ cohã dutigũta”, niahye dahra cohteriquiro wese upũrore, ni, yahuahye Jesu.

Saurũ deco ijigũ Jesu dohatiricorore yãhdũoahye

¹⁰ Ti pjere saurũ deco ijigũ Jesu judio masa buheri wãhpũ buhero niahye. ¹¹ Topu watĩno cãoricoro ijiãhye. Watĩno pehe diez y ocho cãhmari waro dohatigũ yeahye ticorore. Sa yero pari tjũ ducuricoro ijiro, poto ducu masiedahye. ¹² Ticoro sa ijigũ ihñano Jesu ticorore ihña, pisuahye:

—Numio, m̄h̄u dohatiye pihtia wahare, ni, pisuahye Jesu.

¹³ Tiquiro pisuri bato ticorore tiquiro ña peogū duita ticoro quehnoano poto d̄uca sahye. Sa waharo “Cohācjū tutuagū, quehnoagū ijire m̄h̄u”, ni ño peoahye ticoro. ¹⁴ Jesu ticorore saurú deco ijigū tiquiro ȳhd̄uogū ihñano judio masa buheri w̄h̄u coheriquiro pehe tiquiro mehna usuahye. Sa usuario tiquiro masare ohō saha niahye:

—Seis decori ijire mari dahraye decori. Sa yena m̄sa dohatiye-quinare ȳhd̄uo duana, ti decorire tire yeya. Saurú mari sori decore tire yeracāhña, niahye ti w̄h̄ure coheriquiro.

¹⁵ Tiquiro sa nigū Jesu ohō saha ni ȳht̄iahye:

—Masa ihñono dihita quehnoana iji mehona ijire m̄sa. M̄sa wec̄are, burro ḡh̄are c̄ona saurú decore tiquina d̄uhteri dare p̄a, tiquinare ne buha, sihni dutiboaga. ¹⁶ Yojop̄u ahricorore Abrahā m̄nano acayorore wat̄ino diez y ocho c̄hm̄ari waro ticorore dohatigū yere. ¿Saurú deco ijigū ticorore ȳhd̄uo dutierajari m̄sa? niahye Jesu.

¹⁷ Tiquiro sa nigū t̄ahoye, tiquina b̄oro wahahye. Sa ye apequina pehe ijipihtiyequina Jesu yerire ihñā, bucueahye.

Mostaza pje queoyere yahuahye Jesu

(Mt 13.31-32; Mr 4.30-32)

¹⁸ Sa ye Jesu queoye mehna buheahye masare:

—¿Ne Cohācjū masa p̄htoro tiquiro ijiye yabe boro yero saha ijiajari? Ahri quit̄i mehna tire tiquiro p̄htoro ijiyere yahutja ȳh̄u. ¹⁹ Mostaza p̄jegā yero saha ijire. Ti p̄jegāre oteriquiro tiquiro ya wesere otere. Tiquiro oteri bato ti p̄jegā pihnine. Sa ye t̄u b̄uc̄agū minic̄ua pari ti d̄ap̄rip̄u

suhti suhare, niahye Jesu. (Sa nino ohō saha nino niahye. Mostaza p̄jegā pajid̄u t̄u b̄uc̄ariro saha h̄m̄use c̄j̄nore mari p̄htoro masiñequina meheñequinagā tiquina iji m̄htaep̄ḡta camep̄u tiquina peyequina wahaeta.)

P̄a pugū yeye queoyere yahuahye Jesu

(Mt 13.33)

²⁰ Sa yero pari turi Jesu queoye mehna buheahye:

—¿Ne Cohācjū masa p̄htoro tiquiro ijiye yabe boro yero saha ijiajari? ²¹ P̄are pugū yeye yero saha ijire. Tire numino ihcā ajuro trigore aco mehna quehnoano tire dahra morene p̄a b̄uc̄atire. Ticoro sa yegū p̄are pugū yeye pehe trigore quehnoano seh̄saa wahare, niahye Jesu. (Sa nino ohō saha nino niahye. P̄are pugū yeye trigore ti seh̄saa wahariro saha h̄m̄use c̄j̄nore mari p̄htoro peyequina masa ijipihtiro c̄j̄na masieta.)

Meheni sopecahagā quitire yahuahye Jesu

(Mt 7.13-14, 21-23)

²² Sa ye Jesu b̄uj̄ye macarip̄u, daye macarigāp̄u ḡh̄are buhe cā, Jerusalēp̄u esaro taro niahye. ²³ Tiquiro sa wahari watoa mas̄no Jesure ohō saha ni sinituahye:

—¿P̄hto, meheñequinagā masare pecap̄u wahaboriquinare ȳhd̄uorotari Cohācjū? niahye tiquiro Jesure.

Tiquiro sa nigū Jesu queoye mehna buhero ohō saha ni yahuahye:

²⁴ —Peyequina masa Cohācjū cahap̄u waha duaye, sajā duamene. Mehni sopecahagāre m̄sa sajā duagū mijor̄ne. Sata Cohācjū cahap̄u m̄sa waha duagū mijor̄ne. Masa sa sajā duepeta sajā masiedare. Sa yena m̄sa pehe mehni sopecahagāre m̄sa tutuaro sajā duaboro sahata Cohācjū pehere tutuaro masiña. ²⁵ Ohō

saha yerota Cohācjū peyequina masare. Tiquiro wuhū upuro yero saha ijire. Wuhū upuro wahcā, sopecahagāre biharota. Tiquiro sa yegū sopecahagāpū ducuna, dotenata. Dotena ohō saha ninata. “Pūhto, sope pahmare pōohña”, mūsa nigū wuhū upuro pehe yūhtirota. “Mū sare, mūsa ahtariro gūhure ne masiedaja yuhū”, ni yūhtirota. ²⁶ Tiquiro sa nigū mūsa yūhtinata. “Mūhū mehna ūsā ihya, sihnii. Ūsā ya macapū buheri mūhū”, ninata mūsa. ²⁷ Mūsa sa nigū tiquiro pehe yūhtirota. “Mū sare, mūsa ahtariro gūhure ne masiedaja. Ijipihtina mūsa ñañe yerina yuhū cahapū ahtaeracāhña”, ninota wuhū upuro. ²⁸ Sa ye Abrahāre, Isaare, Jacore, ijipihtiyequina Cohācjū yere yahu mūhtariquinare Cohācjū tiquiro pūhtoro ijimore tiquina ijigū ihñana, mūsa pehe sopecahapū cohōrina ijina tutuaro utinata. Sa yena mūsa tutuaro bujua witina, bahque dihonata. ²⁹ Ti pjere ijipihtiro cjēna Cohācjū tiquiro pūhtoro ijipopare esa, tiquiro mehna ihya dujieta. ³⁰ Yojopare ihyo ijিয়েquina ijiriquina ti pjere pūhtoa ijietta. Sa yeye yojopare pūhtoa ijiriquina ti pjeppure ihyo ijিয়েquina ijietta, niahye Jesu.

Jerusalē cjēnare tutuaro cahñahye Jesu

(Mt 23.37-39)

³¹ Ti pjere meheñequinagā fariseo masa Jesu cahapū esa, tiquirore yahuahye:

—Herode mūhure wejē duare. Sa yegū ape sierū wahaya mūhū, niahye tiquirore.

³² Tiquina sa nigū Jesu pehe yūhtiahye:

—Herode ni mehoñe pe-yariquiro ijire tiquiro. Ohō saha ni yahuya tiquirore: “Jesu watñare cohāno nine. Sa yero dohatiyequinare yūhdūoro nine.

Tire miare, ñamia gūhure yerota. Sa yero ñamia bohrearo dahra bato tirota”, ni yahuya Herodere. ³³ Sa yegū miare waha, ñamia gūhure waha, ñamia bohrearo gūhure waha, Jerusalēpū esautja. Cohācjū yere yahu mūhtagure yūhure wejēta masa. Cohācjū yere yahu mūhtariquinare tiquina wejēgū Jerusalēpū ijire cahmene tiquinare. Sa yegū yuhū gūhure Jerusalēpū ijire cahmene.

³⁴ ‘Ahyou, Jerusalē cjāna, mūsa Cohācjū yere yahu mūhtariquinare wejē, mūsa cahapū tiquiro ohoriquinare utā paca mehna doque wejēdi mūsa. Canaca ticoro pohnene wūye dūpūri mehna ticoro moha cuñano saha peye tahari mū sare cahñducumi. Mū sare cahmemi. Mūsa pehe yūhure ne cahmedari. ³⁵ Yojopū mūsa ya maca cohōri maca ijirota. Ijirota niita niaja mū sare. Cohācjū mari pūhtoro tiquiro tutuaye mehna ahtañtja yuhū. Yuhū ahtagū mūsa yūhure “Cohācjū tutuaye mehna ahtariquiro quehnoahdo”, ninata. Yūhure mūsa tire niato pano pari turi yūhure ihñasi mūsa, niahye Jesu.

14

Dohatiriquirore yūhdūoahye Jesu

¹ Ape deco saurū ijigū fariseo masa pūhtoa mehna cjāno ya wūhūpū Jesu ihyaro wahahye. Ti wūhūpū ijিয়েquina tiquirore ihñā nūnūahye. ² Sa yero omoca, ñesū gūhū ipinohriquiro tiquiro cahapū esahye. ³ Sa yero Jesu judio masare buheyequinare, fariseo masa gūhure sinituahye:

—¿Saurū ijigū dohatiriquirore yūhdūo dutiajari Cohācjū yere tiquina ojoari pūpū? niahye Jesu.

⁴ Tiquiro sa ni sinituepegāta tiquina yūhtierahye. Tiquina

yahtieragū ihñano Jesu dohatiriquirore yuhduo, “Wahaya”, niahye tiquireore. ⁵ Sa ye tuhasaro, tiquire sinituahye tja:

—¿Ihcāquiro msa mehna cjāno tiquire macno saurū deco mari sori deco ijigū aco ijiri copepu tiquire bora sajāgū ne wioeraboagari, msa tuhutugū? ¿Tiquiro yaquiro wecu gūhare ne wioeraboagari, msa sa nina? Ne wioboaga tiquire, niahye Jesu.

⁶ Tiquiro sa niepegāta tiquina tiquire siniturire yahti masiedahye tja.

Omoca dūhteri bosc deco ijigū pijoriquire yahuahye Jesu

⁷ Fariseo masno ya wūhūpu ijiro ti wūhū cjāno tiquire pijoriquire quehnoañe dujiyere tiquina bescgū ihñahye Jesu. Sa ihñā tuhasa ohō saha ni yahuahye ijipihtiyequinare:

⁸ —Omoca dūhteri bosc deco māsare tiquire pijiogū, quehnoañe dujiyere besc dujieracāhñā. Msa yuhduoro cua pesayequinare pijioboaga ahri wūhū uparo. ⁹ Tiquiro sa yegū msa quehnoañe dujiyepū dujigū “Ahriquirena cua pesayequina pehere msa dujiyere ohoya”, niboaga wūhū uparo māsare. Tiquiro sa nigū msa pehe buoro wahana, ñāne dujiyepū dujiboaga. ¹⁰ Sa yena wūhū uparo māsare tiquire pijiogū, ñāne dujiyepū duji mahtañā. Msa sa yegū wūhū uparo māsare “Quehnoañe dujiye pehere dujina ahtaya”, ninota māsare tiquire. Msa sa wahagū apequina tiquire pijoriquirena pehe māsare ño peoye mehna ihñāeta. ¹¹ Ihcāquiro tiquire basi “Pūhtota ijiaja”, ni tuhoturiquiro cahacjāno ijirota. Sa yero apequiro “Cahacjū ijiaja”, ni, tuhoturiquiro, apequirena yuhduca dueriquiro tiquire pehe pūhtoro ijirota, niahye Jesu tiquire.

¹² Sa ni tuhasa Jesu wūhū uparore yahuahye:

—Mūhū bosc deco dahregū mūhū cahapū ijiequirena, mūhū bahanare, mūhū acayere, doeri cje opanare pijioeracāhñā. Mūhū tiquirena pijiogū mūhū gūhare tiquina gūhū piji cahmeeta. Sa piji cahmeñe mūhūre tiquina wapamonore wapa yeeta. ¹³ Mūhū bosc deco dahregū pejecuoyequinare, tini masieñequinare, pari yuri wahayequinare, caperi bajueyequinare pijiohya. ¹⁴ Mūhū sa yegū ihñano Cohācjū mūhūre quehnoano yerota. Tiquina pehe mūhūre tiquina wapamonore wapa ye masiedare. Sa yero quehnoañequina yariariquina tiquina masa mūjari pje ijigū Cohācjū pehe quehnoano mūhū yeri wapa mūhūre quehnoano yerota, niahye Jesu wūhū uparore.

Pajiri bosc deco queoyere yahuahye Jesu
(Mt 22.1-10)

¹⁵ Tiquiro sa nigū tuhoro apequiro ihyari mesa cahapū dujiriquiro, Jesure yahuahye:

—Cohācjū tiquire pūhtoro ijiropu tiquire ihyari mesa cahapū dujiyequina tutuaro bucuyequina ijietā, niahye tiquire Jesure.

¹⁶ Tiquiro sa nigū Jesu ahri queoyere yahuahye tiquireore:

—Pajiri bosc deco dahreriquiro peyequina masare pijioahye.

¹⁷ Tiquiro pijiori bato bosc deco tiquire cahacjānore tiquire pijoriquirena yahu dutiro ohoahye. “Isa, ijipihtiyere bosc deco cje ijiatire quehno tuhasari. Sa yero māsare pijiori”, ni, yahu dutiahye tiquire cahacjānore. ¹⁸ Tiquiro cahacjāno tiquire sa ni yahuepegāta, tiquire pijionohriquirena pehe “Waha masiedaja”, niahye tiquina. Tiquiro pijio mahtanohriquire ohō saha ni yahuahye tiquire

cahacjūnore. “Mianogāta yehpare dūu. Sa yegū ti yehpare ihñagu wahagu niaja. Sa yero waharo basioeraga. Ńo peo cjūña mahu yuhare. Yuhare basioerare”, niahye tiqairo pijio mħntanohriqairo pehe tiqairo cahacjūnore. ¹⁹ Apeqairo pehe ohō saha niahye: “Wecūare pua omoca pihtiequinare mianogāta dūu. Buhe tuhugu wahau tūu niaja ti weje cātoe. Sa yegū wecūare ‘¿Quehnoano dahrajari?’ ni ihñagu wahagu tūu niaja. Sa yegū wahasi. Yuhare basioerare”, niahye tiqairo gūhu. ²⁰ Apeqairo pehe ohō saha niahye: “Yuhū mianogāta omoca dħteĩ. Sa yero bose decopū waharo basioeraga yuhare”, niahye tiqairo cahacjūnore.

²¹ Tiqairo sa nigū cahacjūno pehe tojoa waha, tiqairo pħtoropure tiqaina nidire yahu peho cāhye. Tiqairo sa ni yahugū tiqairo pħtoro tutuaro usua, ohō saha niahye tiqairo cahacjūnore. “Wahuse watoa cje maharipū wahaya. Pejecūoyequinare macarisa. Sa yegū pejecūoyequinare, tini masieñequinare, caperi bajueyequinare umñano ne cāhtaya tiquinare”, niahye pħtoro. ²² Came cjūnogā tiqairo cahacjūno yahuahye tiqairo pħtorore: “Pħto, mahu dutiriro sahata yei. Yuhū sa yepegāta apequina gūhu esa tuhaeta”, niahye tiqairo cahacjūno. ²³ Tiqairo sa nigū pħtoro tiqairore dutiahye: “Ihquē wahuse ijiorpū wahaya. Topū bħjue maharipū, daye maharigāpū gūhare masare ya wħpū ahta dutiya, ya wħpū tiqaina wahpagū. ²⁴ Poto niita niaja mħhare. Ahriquina yuhū pijio mħntamediquina yuhū ihyayere ne mehenogā ihyasi”, niahye pħtoro, ni yahuahye Jesu.

²⁵ Ti pjere peyequina masa Jesu mehna wahahye. Sa yero Jesu tiquinare majare ihña, yahuahye:

²⁶ —Ihcāqairo yuhū buheriqairo iji duaro apequina yuhdūoro yuhū pehere cahīno cahmene. Tiqairo pacarore, tiqairo pacorore, tiqairo namonore, tiqairo pohnene, tiqairo bahanare, tiqairo pagū gūhare tiqairo cahīno yuhdūoro yuhū pehere cahīno cahmene.

²⁷ Ihcāqairo yuhū buheriqairo iji duaro yeere sa yeducuriqairo ijirota. Sa yero yaqairo tiqairo ijiri buhiri ñano yuhdūeperota yuhare ne duhusi. ²⁸ Ahrire masiyuro cahmene mħsare. Ohō saha ijire ti: Wuhū dahreriqairo tiqairo ahmħari wuhare yeato pano wuhū wapa tiatire queo mħtare. Sa yero, ti wuhare tiqairo pehoatire masine tiqairo. ²⁹ Wapa tiyere queoeraro ti wuhare yero pehoeraboa. Sa ye tiqairore ihñañequina bħjūpeboa. ³⁰ “Ahriqairo ti wuhare yero, tutuerare”, ni, bħjūpeboa. ³¹ Pħtoro apeqairo pħtoro yeequina mehna tiqaina cahmequeato pano, tiqairo yequina surarare tiqairo cahme wejē dutiato pano, tiqairo yequina surarare queorota. “¿Yuhū diez mil surara mehna apeqairo veinte mil surara cħoriquiro mehna cahme wejēgū tutueraboagari yuhū?” ni, tħhoturo queorota tiqairo. ³² Sa queoro, tiqairo tutueratire masinota. Sa masino apeqairo pħtoro tiqairo yequina surara mehna cahme wejēno ahtariqairo yoropū tiqairo ijigāta, tutueriqairo pehe “Cahme wejēdacūhna”, ni dutiro ohoboaga dahra cohteriqairore. ³³ Sa yena yuhū buhena iji duana, mħsa yeatire mħsare masino cahmene. Mħsa ye duaye pehere duhu duerana, yuhū buhena iji masiedare, ni yahuahye Jesu.

*Jesu mehna wahagū mijorīne
(Mt 10.37-38)*

*Moa ocayere yahuahye Jesu**(Mt 5.13; Mr 9.50)*

³⁴ Sa yero tiquinare yahu nemoahye:

—Moa quehnoano ocare. Ti ocaeragū ocaye yero basioerare. ³⁵ Moa ocaeraro ti moa ne quehnoaedare. Ti moare dūhsero basioerare. Ti sa ijigū ti moare cohāno cahmene. Ne dūhseati ijierare ti moa. (Ti dūhseati ijieraro saha ijieracāhña mūsa. Cohācjū ye pehere cohāedacāhña.) Ahrire quehnoano tūhoya mūsa, niahye Jesu.

15*Oveja butiriquiro queoyere yahuahye Jesu**(Mt 18.10-14)*

¹ Sa ye ape deco peyequina wapa ne cohteyequina apequina “Ññaquina”, tiquina niñequina mehna Jesure tūhoye ahtahye. ² Tiquina sa yegū ihñañe fariseo masa, judio masare buheyequina gāhū Jesure ihña tuhtiyē, ohō saha niahye tiquina basi:

—Ahriquirō ñañequinare piti tire. Sa yero tiquina mehna ihyare, ni, yahuducuahye tiquina basi.

³ Tiquina sa ni yahuducugū Jesu tiquirō tūhotuyē mehna ohō saha ni, queoye mehna buheahye tiquinare:

⁴ —¿Cien oveja cūoriquiro ihcāquiro oveja butigū ihñano dūhse yerotari tiquirō? Ohō saha yerota. Tiquirō noventa y nueve ovejare tiquina ihyariropū cū, butiriquirore macano waharota. Ovejare bocaropū duhurōta.

⁵ Tiquirōre bocaro bucuero. Sa yero tiquirō butiriquirore wūa peo, tiquirō ya wūhūpū ne tojoaa waharota. ⁶ Ne tojoa sa, tiquirō cahapū ijiyequinare, tiquirō acayere pijī cahmecoanota. “Yaquirō oveja butiriquirore boca tuhasa. Sa yena yūhū mehna bucuera”, ninota tiquirō tiquinare. ⁷ Poto

niita niaja mū sare. Noventa y nueve oveja peyequina tiquina ijiro saha, peyequina masa ohō saha ni tūhoture: “Ñnano yeraja. Sa yegū yūhū ñañene būjūa witisī. Quehnoañe pehere comesasi yūhū”, ni, tūhoture peyequina masa. Tiquina sa ni tūhotugū ihñañe ūhmūse cjēna Cohācjū cahapū ijiyequina bucuere. Apequirō pehere bucuere. Butiriquiro oveja ihcāquirota butiriro saha tiquirō upūro tiquirōre bocariro saha ihcāquiro ñariquirō tiquirō ñañene būjūa witi gū, quehnoañe pehere comesagū ihñañe, Cohācjū cahapū ijiyequina tutuaro bucuere, niahye Jesu.

Niñeru cjoē butiri queoyere yahuahye Jesu

⁸ Sa ni yahu tuhasa, queoye mehna yahu nemoahye tja:

—¿Pūa omope cjoeri niñeru cjoeri cūoricoro ihcā cjoē butigū dūhse yerotari ticoro? Ohō saha yerota ticoro. Sihāriare sihā, wūhūre coha, quehnoano maca pehorota. Ti cjoere bocaropū duhurōta. ⁹ Ti cjoere boca tuhasa, ticoro cahapū ijiyequinare, ticoro mehna cjēnare pijī cahmecoanota. “Niñeru cjoē yūhūre butiri cjoere boca. Sa yena yūhū mehna bucuera”, ninota ticoro. ¹⁰ Potota niita niaja mū sare. Sata ihcāquiro ñariquirō tiquirō ñañene būjūa witi gū quehnoañe pehere comesagū Cohācjū yequina angele pehe tutuaro bucuera, niahye Jesu.

Tiquirō macano butiri queoyere yahuahye Jesu

¹¹ Sa ni yahu tuhasa Jesu queoye mehna yahu nemoahye tja:

—Būcūro pohne pūaro ūmūa ijiahye. ¹² Dūhsariquirō pehe ohō saha niahye tiquirō pacūrore: “Mai, mūhū yariari bato mūhū ohoatire yūhūre ohoya”, niahye tiquirō pacūrore. Tiquirō sa

nigū tiquina pacuro p̄arop̄ureta tiquiro pohnene itiahye tiquiro c̄orire. ¹³ Meheñe decorigā bato d̄hsariquiro tiquiro yere ijipihitiyere ne, yoarop̄u ape yehpap̄u wahaa wahahye. Top̄u esaro t̄ho masieniquiro yero saha ye, tiquiro niñerure, tiquiro yere ye site peho cāhye. ¹⁴ Tiquiro ye site pehori bato ti yehpap̄ure ne ihyaye mariedi pje iji d̄cahye. Sa yero tiquiro ūjua ahbahye. ¹⁵ Sa yero ti yehpa c̄jē dahrayere macahye. Tiquiro bocagū tiquiro p̄h̄toro yesea cohteriquiro s̄oh̄hye tiquiro. ¹⁶ Sa yero tiquiro yeseare nu, tiquina ihyayere ihya dueamahye. Tiquiro sa ihya duepegāta ti ihyayere to c̄jēna ohoerahye tiquiro. ¹⁷ Sa ye tiquiro top̄u wacūahye. “Ȳh̄u pacure dahra cohteyequina pehe b̄uj̄u ye ihyayere ihyare. Tiquina ihya d̄hari ḡh̄u b̄uj̄u ye d̄hsare. Tiquina sa quehnoano ȳh̄d̄ari watoa ȳh̄u pehe oh̄p̄u ijigū, ūjua ahbagū niaga. ¹⁸ Yojōp̄ure ȳh̄u pacu cahap̄u tojoagutja. Ȳh̄u pacu cahap̄u esagu oh̄o saha niitja tiquiro: ‘Mai, Cohācj̄ure ñano yei. M̄h̄u ḡh̄ure ñano yei. ¹⁹ Ñagū ijiaja ȳh̄u. M̄h̄u macu yero saha ijibogu ijieraja ȳh̄u. M̄h̄ure dahra cohteriquiro yero saha yeya ȳh̄ure’, niitja ȳh̄u pacure”, ni t̄hotuahye tiquiro. ²⁰ Sa ni t̄hoturota wahcā̄d̄ca, tiquiro pacuro cahap̄u tojoaa wahahye. Top̄u tiquiro esariquiro tojoa tagū tiquiro pacuro pehe yoarop̄uta tiquiro macunore ihñahye.

‘Tiquiro sa wihigū ihñano macunore paja ihñahye. Paja ihñano tiquiro cahap̄u oma cā, tiquiro quē suhsu maa, tiquiro wahsupure ihmiahye pacuro tiquiro macunore. ²¹ ‘Mai, Cohācj̄ure ñano yei. M̄h̄u ḡh̄ure ñano yei. Ñagū ijiaja ȳh̄u. M̄h̄u macu yero saha ijibogu ijieraja ȳh̄u’, niahye

tiquiro pacuro. ²² Tiquiro sa nigū t̄horo pacuro pehe dahra cohteyequinare pijiahye. “Sojaro mehna, quehnoa ȳh̄d̄ari suhtirore ne cāhtaya. Sa yena ȳh̄u macure s̄aña. S̄a tuhasa, tiquiro omoca sañari behtore s̄a, dahpo suhti ḡh̄ure s̄aña. ²³ S̄a tuhasa, dihi tiriquireḡare wec̄ḡare wejēña. Bose deco yeihna mari. ²⁴ Ahriquiro ȳh̄u macu yariariquiro yero saha wahariquiro ijire. Sa wahaeperota yojōp̄ure catire tiquiro. Tiquiro butimediquirore pari turi bocañ. Sa yena bose deco yeihna mari”, niahye tiquiro pacuro. Tiquiro sa nidi bato bose deco dahre d̄cahye tiquina.

²⁵ ‘Ti pjere tiquiro wahmino pehe wesep̄u ijiahye. Wesep̄u ijiriquiro cohe tojoa taro w̄h̄u cahap̄u esaro, tiquina basayere t̄hoahye tiquiro. ²⁶ T̄horo, ihcāquiro dahra cohteriquirore pijio, tiquirore sinituahye tiquiro: “¿D̄h̄se ijiro boro basaye niari?” niahye tiquiro dahra cohteriquirore. ²⁷ “M̄h̄u bah̄u coheri. Tiquiro quehnoariquiro, catiriquire tiquiro cohegū m̄h̄u pacu dihi tiriquireḡare wec̄ḡare wejē dutiri”, ni ȳhtiahye dahra cohteriquiro. ²⁸ Tiquiro sa ni yahugū tiquiro wahmino pehe tutuaro usuaro, w̄h̄up̄u sajāedahye. Tiquiro sajāedagū ihñano tiquiro pacuro sopecahap̄u wijia ta, “Sajā taya”, ni, pijimahye tiquiro macunore. ²⁹ Tiquiro sa pijigū macuno ȳhtiahye. “T̄hoya mai. Yoari pje m̄h̄ure dahra cohteriquiro yero saha m̄h̄ure yedohomi. Sa yegū m̄h̄u dutiyere ne ihcā taha ȳh̄d̄d̄caera. Ȳh̄u m̄h̄ure dahra cohtepegāta ȳh̄ure ne ohoerari m̄h̄u. Ne ihcāquiro wahiquireḡare ne ohoerari m̄h̄u ȳh̄ure ȳh̄u piti tiyequina mehna ȳh̄u bose deco dahreatire. ³⁰ Sa

yero ahriquiroy mahu macu pehe ñañequina numia mehna mahu yere ye site pehoñohiti. Tire ye site peho tuhasa, wahuꝑu tiquiro tojoa wihigū dihi tiriquireogāre wecugāre wejē dutiñohiti mahu tiquiro ihyatiquirore”, niahye tiquiro wahmino pehe pacurore. ³¹ “Macu, yahu mehna ijipihtiye decori mahu ijigū ijipihtiye yahu cuoye mahu ye ijire. ³² Mahu bahu pehe yariariquiroy yero saha wahari marine. Sa ye yojopure tiquiro catiriquiro ijire. Tiquiro butiriquiro yero saha ijiri. Tiquiro sa wahari bato yojopure tiquirore bocau. Sa yero tiquiro tojoa wihigū mari bose deco ye bucugū quehnoare”, niahye tiquiro macunore, niahye Jesu tiquinare.

16

Niñeru cohteriquiro tuho masiniquiro quitire Jesu yahuahye

¹ Sa ye ahri quitire tiquiro buheyequinare yahuahye Jesu:

—Doeri cje uparo ye niñerure cohteriquiro niñerure quehnoano tiquiro ihboeragū ihñano apequiroy pehe yahusāhye doeri cje uparore. “Mahu ye niñerure ye sitero nine”, ni yahusāhye tiquirore. ² Tiquiro yahusā tuhasari bato niñeru cohteriquirore pijioahye. Sa yero tiquiro wihigū ihñano, tiquirore puhtoro yahuahye. “Yee niñerure mahu ye siterire apequiroy yahure yahuri. Sa yegu yeere cohtegu iji nemosi mahu. Sa yegu yeere mahu yerire yahu peho ojoaya. Mahure cohāgu niaja”, niahye puhtoro tiquirore. ³ Tiquiro sa nidi bato ohō saha ni tuhotuahye cohteriquiro tiquiro basi: “Yahu puhtoro yahure cohāno taro niaga. Yahu tutueraja. Sa yegu tutuaro dahra masiedaja. Sa yegu apequinare yahu niñerure sinigū buoro yuhduboaga yahu. ¿Sa yegu dahse yeitari yahu?

⁴ Yojopu puritare yahu yeatire masiaja yahu. Ohō saha yahu yegū yahu dahraye mariedagū yahu puhtorore wapamoñequina yahure cahñeta. Sa ye tiquina ye wahuſepu sañā dutieta yahure”, ni tuhotuahye tiquiro. ⁵ Sa ni tuhoturo tiquiro ijipihtiyequina tiquiro puhtorore wapamoñequinare pijioahye. Pijio tuhasa, cohteahye. Wihi tuhtariquiroy ohō saha ni sinituahye tiquiro. “¿Yahu puhtorore noho puno wapamoajari mahu?” niahye tiquiro. ⁶ Tiquiro sa nigū wapamoriquiroy pehe yahtiahye. “Cien tambores uhsere olivo dca mehna tiquina yeri uhsere wapamoaja tiquirore”, ni, yahtiahye. Tiquiro sa ni yahugū cohteriquiro pehe ohō saha ni yahuahye. “Ohōꝑu ijire mahu wapamonore ojoa ohōri pū. Dujiya. Sa yegu mahu wapamonore deco mehna ne, deco mehna ojoa quehnoña”, niahye cohteriquiro wapamoriquiroyre. ⁷ Sa ni tuhasa apequiroy wapamoriquiroyre sinituahye tiquiro. “¿Mahu waro, noho puno wapamoajari?” niahye tja. “Cien ajuri trigo pjeri ajurire wapamoaja yahu”, niahye wapamoriquiroy niñerure cohteriquirore. “Ohōꝑu ijire mahu wapamonore ojoa ohōri pū. Mahu wapamonore ochenta ojoa quehnoña”, niahye cohteriquiro. ⁸ Tiquiro sa quehnoano ni meho mihnigū ihñano “Ahriquiroy ni mehoriquiroy quehnoano masidiquiro ijiaga”, ni tuhotuahye tiquiro puhtoro niñerure cohteriquirore. Ahri deco cjeña, Cohācjäre cahmeeñequina tiquina yere quehnore tiquina niñeru ihborire Cohācjū yequina yuhduoro masiaga tiquina, niahye Jesu.

⁹ Sa ni tuhasa Jesu yahu nemoahye:

—Sa yegu musare niita niaja. Msa cuoyere, pejecuoyequinare msa ohogū, tiquina pehe musare

cahîeta. M̄sa sa yegū m̄sa c̄oye pih̄tari bato m̄sa uhm̄sepē esagū m̄sare cahîeta top̄are.

¹⁰ 'Ihyo ijiyequina ye dahrayere poto yena, p̄h̄toa ye dahraye ḡh̄are poto yenata. Ihyo ijiyequina ye dahrayere queoro yerana, p̄h̄toa ye dahraye ḡh̄are queoro yesi m̄sa. ¹¹ Sa yena ahri yehpap̄ m̄sa c̄oye mehna m̄sa quehnoano yerana Coh̄c̄j̄ m̄sare tiqiro ye buheye ḡh̄are quehnoano yesi m̄sa. Sa yero ti buheyere c̄isi tiqiro. ¹² Sa yena apeqiro yere m̄sa quehnoano ye basaeragū ih̄ñano m̄sa ye ijiatire ohosi m̄sare.

¹³ 'Ihc̄aqui Coh̄c̄j̄ pehere wacūno, tutua ȳhd̄aro niñeru pehere wacūedare. Niñeru pehere tutua ȳhd̄aro wacūno Coh̄c̄j̄ pehere wacūedare. Niñeru dihitare cahmediqiro ijiro Coh̄c̄j̄re bucuegū yerare. Coh̄c̄j̄ ḡh̄are, niñeru ḡh̄are p̄arore cahme ȳhd̄arocar basioerare m̄sare. Niñerure cahme ȳhd̄ariqiro Coh̄c̄j̄re quehnoano ño peo masiedare, niahye Jesu.

¹⁴ Tiquiro sa nigū t̄hoye fariseo masa pehe tiqirore b̄j̄peahye. Tiquina pehe niñerure cahîahye. Sa ye b̄j̄peahye. ¹⁵ Tiquina b̄j̄pegū t̄horo Jesu tiquinare yahuahye:

—Masa tiquina ih̄ñonore m̄sa quehnoano yemene. M̄sa sa yegū “Quehnoañequina, poto yeyequina ijire”, nimene masa m̄sare. Coh̄c̄j̄ pehe m̄sa t̄hotuyere masine. Masa “Quehnoa ȳhd̄are”, tiquina nidire Coh̄c̄j̄ pehe sijoro saha ni t̄hoture. Tire ih̄ña yabire, niahye Jesu.

Coh̄c̄j̄ dutiyere, tiqiro p̄h̄toro ij̄yere yahuahye Jesu

¹⁶ Sa ni tuhasa oh̄ saha ni nemoahye Jesu:

—Ñu wame yeriquiro tiqiro ijiato pano Moiserere tiqiro c̄iri dutiye mehna Coh̄c̄j̄ marine dutiri.

Coh̄c̄j̄ yere yahu m̄htariquina tiquina ojoari mehna ḡh̄a marine dutiri. Yojop̄ pehere Ñu tiqiro buhe d̄cari bato quehnoañe buheyere, Coh̄c̄j̄ tiqiro p̄h̄toro ijiye ḡh̄are masi d̄care masa. Sa masiñe masa tiquina esa tuharo tiquina tutuaye mehna Coh̄c̄j̄ tiqiro p̄h̄toro ijirore saj̄ d̄amene. ¹⁷ Moiserere tiqiro c̄iri dutiyep̄ Coh̄c̄j̄ nidiro sahata ye pehorota tiqiro. Uhm̄se ḡh̄a ahri yehpa ḡh̄a pih̄tia wahaepegūta Coh̄c̄j̄ nidiro sahata ye pehorota, niahye Jesu.

Namonore coh̄añene yahuahye Jesu

(Mt 19.1-12; Mr 10.1-12)

¹⁸ Sa ni tuhasa oh̄ saha ni nemoahye Jesu:

—Masano tiqiro namonore coh̄ano, apecoro mehna omoca d̄h̄tero, ticoro mehna ñano yero nine. Apeqiro tiqiro coh̄aricoro mehna omoca d̄h̄tero, tiqiro ḡh̄a ticoro mehna ñano yero nine, niahye Jesu.

Doeri c̄j̄ up̄ro, pejec̄oriquiro queoyere yahuahye Jesu

¹⁹ Sa ye queoye mehna yahuahye Jesu:

—Ti p̄j̄pare doeri c̄j̄ up̄ro ijie tiahye. Tiquiro suhti pehe wapa b̄j̄ ȳhd̄ahye. Sa yero decoripe quehnoañe dihitare ih̄yaro, peye c̄oahye tiqiro. ²⁰ Sa yero ti p̄j̄ere apeqiro pejec̄oriquiro, L̄zaro wame tiriqiro ijie tiahye. Tiquiro paḡa peye cam̄i tiriqiro ijiahye. Sa ye apequina pehe tiqirore doeri c̄j̄ up̄ro ya w̄h̄a c̄j̄ sahr̄no cahap̄a ne sae tiahye. ²¹ Sa yero pejec̄oriquiro pehe doeri c̄j̄ up̄ro tiqiro ih̄yari mesa docap̄a yehpap̄a dujiro tiqiro ih̄ya site dijioyere ih̄yae timahye. “Tiquiro ih̄ya site dijiorire ih̄yaḡa yap̄igata ȳh̄a”, ni, t̄hotue timahye tiqiro. Sa ye diayea tiqiro camine nehneñe ahtae tiahye.

22 Sa yero pejecuoriqiro tiquiro yariaa wahagū, Abrahā cahapu paraiso wame tiropu angele tiquirore ne mājahye. Sa yero doeri cjē upuro gūhu tiquiro batogāta yariaa wahahye. Tiquiro yariagū tiquirore yahye. 23 Sa yero doeri cjē upurore tutuaro peca ujāahye. Sa yero pecapu ijiro ummusepu ijiriquirore Abrahāre ihñahye. Lázaro gūhure ihñahye. 24 Ihña tuhasa, tiquiro Abrahāre pisuahye. “Yuhu acayu Abrahā, paja ihñaña yuhure. Pecapu yuhu ñano yuhdugū niaja. Yuhu sa wahagū Lázarore yuhure ohoya. Sa yero acore tiquiro omo piriapu soha, yuhu ñehmenore aco mehna nehono ahtaahro. Tire yusuoahro tiquiro”, niahye doeri cjē upuro. 25 Tiquiro sa nigū Abrahā tiquirore yahuahye: “Yuhu acayu, catigupu mahu ijipihiyere quehnoañene cuori. Lázaro pehe decoripe ñano yuhdari. Yojopu pehere mahu ñano yuhdugū tiquiro pehe ohōpore bucueye mehna ijiro nine. 26 Sa ye mari watoa ahcūari cope ijire. Sa ye ohōre ijieyequina topre waha masiedare. Sa ye topu ijieyequina ohōpore ahta duayequina ahta masiedare”, niahye Abrahā doeri cjē upurore. 27 Tiquiro sa nigū doeri cjē upuro ohō saha ni nemoahye: “Yuhu acayu, tutuaro siniaja mūhure. Lázarore yuhu pacu ya wuhupu ohoya. 28 Yuhu ihcā omopequina bahana tii. Lázaro tiquinare yahuahro. Tiquina ohōre ñano yuhdūropure ahtaeracādo”, niahye tiquiro. 29 Sa nigū Abrahā pehe yuhtiahye: “Cohācjū dutiyere Moise marine cūrire, Cohācjū yere yahu mūhtariquina tiquina ojoarire cuore mahu bahana. Sa ye mahu bahana tireta tūhoahro”, niahye Abrahā. 30 Tiquiro sa nigū doeri cjē upuro pehe yuhtiahye: “Yuhu acayu Abrahā, tire cuoepeta quehnoano

tūhosi. Lázaro yariariqiro masa bajua, tiquina cahapu esagū ihñañe tiquina pehe ñañene bujua witi, quehnoañe pehere comesaeta. Sa ye quehnoañene yeeta yuhu bahana pehe”, niahye doeri cjē upuro mūnano. 31 Tiquiro sa nigū Abrahā pehe yahuahye: “Mahu bahana Moise cūri pū tiquiro yahuyere, Cohācjū yere yahu mūhtariquina muna tiquina yahuyere tūho dueyequina ijire. Sa ye Lázaro yariariqiro mūnano masa bajuepegūta tiquina Cohācjūre tūho duasi”, niahye Abrahā, ni, yahuahye Jesu.

17

Ñañene yegū cuarīne

(Mt 18.6-7, 21-22; Mr 9.42)

1 Sa ye Jesu yahuahye tiquiro buheyequinare:

—Masare ñañe yegū yeye peye ijire. Sa yeye masa ñañene yere. Ti sa ijiepegūta masunore ñañene yegū yeriquiro pehe ña yuhduaro yuhdūrota. 2 Masunore tiquiro wamūapu pajiria utāre duhte yo, pajiri mapu tiquirore cohāgū ñano wahaboaga tiquiro. Apequiro pehe ahriquinagā mehna cjūnogāre ñañene yegū yero pajiri mapu tiquina cohāriquiro yuhduoro ñano yuhdūrota. Tiquirore tutuaro buhiri dahrero cahmene. 3 Quehnoano yeya mūsa. Mūsa acayuro ñano tiquiro yegū ihñana “Yeracāhña”, niña tiquirore. Sa yena tiquiro ñañene bujua witiagū, quehnoañene comesagū mūsa pehe tiquiro ñañe yeyere boya. 4 Sa yero mūsa acayuro ihcā decota siete tahari mū sare ñano tiquiro yegū mū sare tiquiro bo dutigū boya. “Pari turi mūhure ñano yesi”, siete tahari tiquiro nigū tope taharita tiquiro ñano yerire boya, niahye Jesu.

Cohācjūre wacū tutuayere yahuahye Jesu

⁵ Sa ye Jesu buheyequina tiqiurore ohō saha niahye:

—Cohācjüre usāre quehnoano wacū tutua nemogū yeya, niahye tiquina Jesure.

⁶ Tiquina sa nigū Jesu yāhtiahye:

—Mostaza capegā meheni pjegā ijire. Ti yero saha Cohācjüre mehenogā wacū tutuana, ohō saha wahagū ye masinata mūsa: Ahdū yucūgure ohō saha ni masine: “Mūhū yucūgū mūhū basi duhtu cā, pajiri mapū bora űjoaña”, ni masine mūsa. Mūsa sa nigū tū yucūgū pehe mūsa dutiro sahata waharota, niahye Jesu.

Dahra cohteriquiro tiqiuro dahrayere yahuahye Jesu

⁷ Came ahri quitire yahuahye Jesu:

—Mūsare dahra cohteriquiro ijiro wesepū tanare. Sa yero ovejare ihña ihbore. ¿Dahra cohteriquiro tiqiuro tojoa wihigū dūhse niboagari mūsa tiqiurore? ¿“Sojaro mehna ahtaya. Mūhū ihyaye ohōpū ijire”, niboagari mūsa? ⁸ Sa niedare mūsa. Tiquirore ohō saha nine mūsa: “Yūhū ihyayere doha quehnoña. Sa yegū yūhū ihya sihniḡū yūhare cohteya. Yūhū bato mūhū ḡūhū ihya sihniña”, nine mūsa dahra cohteriquirore. ⁹ Dahra cohteriquiro mūsa dutiyere tiqiuro yegū tiqiurore “Quehnoare”, niedare mūsa. Tiquiro dahraye dihitare yero niaga tiqiuro. ¹⁰ Mūsa ḡūhū tiqiuro yero saha ijire. Cohācjū dutiriro sahata ye pehona ohō saha ni, tūhotuya mūsa. “Usā ḡūhū dahra cohtena dihita ijiaja. Ihyo ijina ijiaja usā. Usā dahraye dihitare yei usā”, ni, tūhotuya mūsa, niahye Jesu tiqiuro buheyequinare.

Pūa omopequina cami būcū mūna wihare yūhdūoahye Jesu

¹¹ Ape deco Jerusalēpū Jesu waharo niahye. Topū waharo Samaria yehpa, Galilea yehpa,

ti pūa yehpa watoa yūhdū cāhye. ¹²⁻¹³ Ape macapū wahari mahapū tiqiuro tinigū pūa omopequina cami būcū mūna wiha pehe tiqiurore piti cahye. Sa ye yoa cjūnopū ducuye pisuahye:

—Jesu, pūhto, usāre paja ihñaña, niahye tiquina.

¹⁴ Sa nigū tiquinare ihña, yahuahye Jesu:

—Pahire mūsa pagūrire quehnoañe pagūri mūsa waharire ihñona wahaya, niahye tiquinare.

Sa nidi bato tiquina wahari watoa quehnoa wahahye. ¹⁵ Sa yero ihcāquiro tiquina mehna cjūno quehnoano tiqiuro pagū wahagū ihñano, Jesu cahapū majare tojoa tahye. Sa tojoa taro tutuaro mehna Cohācjüre űo peoahye. “Cohācjū tutuariquiro, quehnoariquiro ijire”, ni, űo peoahye tiqiuro. ¹⁶ Sa nino tiqiuro Jesu dahpocāri caha dūsepe curi mehna quehe sa, “Quehnoare”, niahye tiqiuro. Samaria cjūno ijiahye. ¹⁷ Tiquiro sa yeri bato Jesu ohō saha ni sinituahye:

—Pūa omopequina ijiri masa quehnoa wahariquina. ¿Apequina nueve dūhsayequina pehe nohopū ijiagari tiquina? ¹⁸ Ahriquiro ape yehpa cjūno dihita Cohācjüre “Quehnoare”, nino taro tojoa tari. ¿Dūhse ijiro boro apequina ahtaerajari? niahye Jesu.

¹⁹ Sa ni tuhasa Jesu yahuahye dūsepe curi mehna quehe sariquirore.

—Wahcādūcaya. Wahaya. Mūhū Cohācjüre wacū tutuagū, yūhdūre mūhū, niahye Jesu tiqiurore.

Cohācjū tiqiuro pūhtoro ijiatire yahuahye Jesu

(Mt 24.23-28, 36-41)

²⁰ Ti pjere meheñequinagā fariseo masa Jesure sinituahye:

—¿Dūhse ijigū Cohācjū pūhtoro iji dūcarotari? niahye tiquina.

Tiquina sa nigū Jesu yāhtiahye:

—Cohācjū tiquiro pūhoro iji ducagū masa ihña masiedare.
²¹ “Cohācjū pūhoro ijiye ohōpū ijire”, ni masiedare. “Sohōpū ijire”, ni masiedare. Cohācjū tiquiro pūhoro ijiye masa tiquina tūhotuyepū ijire, niahye Jesu fariseo masare.

²² Sa ni tuhasa Jesu tiquiro buheyequinare ohō saha ni yahuahye:

—Came yūhū masū Cohācjū ohorigū ahri yehpapū yūhū tojoa tatire tutuaro cahmenata mūsa. Mehenogā yūhūre ihña duepenata yūhūre ihñasi mūsa. Mūsa yūhūre sa ihña duepegāta ti pjere ahtasi yūhū. ²³ Apequina mū sare ohō saha nieta. “Tiquirore ihñāñā. Cristo ijire. Ahriquirōre ihñāñā. Cristo ijire”, nieta mū sare. Tiquina sa niepegāta tiquinare tūhoeracāhña. ²⁴ Ūpo miadoqueoro wacūeno mehna ti mia sitedoqueoro sahata yūhū gūhū masū Cohācjū ohorigū wacūeno mehna tojoa tautja. ²⁵ Ahrire yūhū yeato pano yūhū tutuaro ñano yūhdūta. Sa ye yojopū cjēna yūhūre cahmesi. ²⁶ Noé tiquiro ijiri pje cjēna tiquina ijiriro sahata yūhū masū Cohācjū ohorigū yūhū tojoa tagū sata ijieta masa. ²⁷ Noé tiquiro ijiri pjere ijipihtiyequina masa sa ihyaducue tiahye. Sa ye sihniducue tiahye. Ūmūa, numia mehna omoca dahtee tiahye. Noé pajiria yucūsapū tiquiro sajāto pano Cohācjū tiquinare tiquiro mioato pano ti ijipihtiyere masa yeducue tiahye. Sata ijirota yūhū tojoa tagū gūhūre. ²⁸ Lote tiquiro ijiri pje cjēna tiquina ijiriro sahata yūhū tojoa tagū ijieta masa. Lote tiquiro ijie tiri pjere masa ihya, sihni, dú, dua, weserire ote, wūhūse yeahye. ²⁹ Tiquina sa yeri watoa Sodoma wame tiri macapū ijiriquiro Lote tiquiro wahari deco ahmūse cjā peca, peca asiye paca

atā pjeri gūhū acoro ahtaro saha tiquina bui bora pje, tiquinare wejē pehoe tiahye. ³⁰ Yūhū masū Cohācjū ohorigū wacūeno mehna yūhū tojoa tagū tiquina yero sahata yeyequina ijieta masa ti pjere.

³¹ Ti pjere ihcāquiro tiquiro ya wūhū bui cjā paapū quehnoari paapū ijiriquiro wūhū puhiapū tiquiro ye ijigū tire neno waheracāhdo tiquiro sojaro mehna wahato saha. Sa yero wesepū ijiriquiro gūhū ti pjere tiquiro ya wūhūpū piheracāhdo tiquiro sojaro mehna wahato saha. ³² Lote namono ticoro waharire wacūñā mūsa. ³³ Masūno yūhūre wacūno marieno tiquiro esa tuharo tiquiro cahmeno saha yero, pecapū waharota. Sa yero yeere sa yeducuriquiro ijipihtiyere decori yūhū mehna ahmūsepū ijirota.

³⁴ Ti ñamine pūaro ihcā cuñanopū carñequinare ihcāquiro yūhūre cahmeniquirore neitja. Sa yero yūhūre cahmedariquiro topū tojoarota. ³⁵ Ti pjere pūaro numia ihcānopū tiquina trigore tu mūtoñe numiare ihcācoro yūhūre cahmenicorore neitja. Sa yero yūhūre cahmedaricoro topūta tojoarota. ³⁶ [Sa ye wesepū pūaro dahrayequina tiquina ijigū ihcāquirota neitja. Ihcāquiro topū tojoarota,] niahye Jesu.

³⁷ Sa nigū tiquiro buheyequina pehe sinituahye tiquirore.

—¿Nohopū sa waharotari? ni sinituahye tiquina.

Tiquina sa nigū Jesu yūhtiahye:

—Masa tiquina ñano yeducurirōpū, topū Cohācjū buhiri dahrerota tiquinare, niahye Jesu.

18

Wape wihoro ticoro buhiri dahre dutiye queoyere yahuahye Jesu

¹ Sa ye Jesu tiquinare Cohācjūre siniñene yahuro ohō saha niahye:

—Musa Cohācjüre sinina, cohteya tiquiro yuhtiatire. Yoari pje cohtepenata bujua witieracāhña. Tiquirore sinina duhueracāhña, niahye Jesu.

² Tiquiro sa nidire buhero taro ahri queoye mehna yahuahye tiquinare:

—Ape macapū tiquina buhiri dahre dutiriquiro ijiahye. Tiquiro Cohācjüre ño peerahye. Sa yero masa gūhare ño peerahye. ³ Sa yero wape wihoro gūhu topū ijiahye. Ticoro tiquiro cahapū sa majareno ohō saha niahye: “Yūhare ihña tuhtiriquirore buhiri dahre dutiya mūhu. Yūhare ni cahmota basaya”, ni siniducuahye ticoro tiquirore. ⁴ Ticoro sa nigū peye tahari tiquiro “Yesi yūhu”, nimahye ticorore. Tiquiro sa niepegūta ticoro peye tahari sa siniducuro tiquirore ni cariboro ye cāmahye. Ticoro caribogū, ohō saha niahye tiquiro basi. “Yūhu Cohācjüre, masa gūhare ño peeraja. ⁵ Yūhu sa ño peogū yūhu ijiepegūta ahricoro pehe yūhare caribo ye cāmaga. Yūhare sa cariboro yūhare caributigū yerota ticoro. Sa ni yahusāducugū ticorore ihña tuhtiriquirore buhiri dahre dutiitja”, niahye buhiri dahre dutiriquiro, niahye Jesu.

⁶ Sa nino Jesu tiquinare yahu nemoahye:

—Sa niahye ñariquiro buhiri dahre dutiriquiro. Tiquiro nidire wacūña musa. ⁷ Tiquiro yūhduro Cohācjū pehe tiquiro yequina tiquiro beseriquinare ñamipū, decopū tiquirore sinidiquinare yuhtiro, yedohorota. ⁸ Musare niita niaja. Cohācjüre tiquina sinidiro sahata duita tiquinare yedohorota. ¿Tiquiro sa yuhtiriquiro ijiepegūta yūhu masū Cohācjū ohorigū ahri yehrapū tojoa tagū Cohācjüre wacū tutuayequinare bocaboagari yūhu? niahye Jesu.

Puaro masa Cohācjüre tiquina siniñe quitire yahuahye Jesu

⁹ Sa ye apeye quti mehna ohō saha ni yahuahye Jesu: “Usā pehe quehnoana ijiaja. Apequina pehe ñano yeyequina ijire”, ni, tuhotuyequinare ahri quitire yahuahye:

¹⁰ —Cohācjū ya wūhupū puaro umua Cohācjüre siniñe wahahye. Ihcāquiro fariseo masūno ijiahye. Apequiro wapa ne cohteriquiro ijiahye. ¹¹ Sa yero fariseo masūno pehe ducu, ohō saha ni yahuahye Cohācjüre: “Yūhu yaquerigū, ñañene yerigū, numia mehna ñano yerigū ijieraja. Apequina yero saha ijieraja. Ahriquiro wapa ne cohteriquiro yero saha ñagū ijieraja. Sa yegū mūhare ‘Quehnoare’, niaja Cohācjū. ¹² Yūhu semanaripe pua decore mūhu yere yegū sijiaja. Sa yegū pua omope cjoeri niñeru cjoerire wapatagū ihcā cjoere mūhare ohoaja”, niahye fariseo masūno Cohācjüre. ¹³ Sa yero wapa ne cohteriquiro pehe yoaropū muhri yo ducu, tiquiro ñañene bujua witi, uhmūsepure ihñedahye. Tiquiro ñañene bujua witi tiquiro ijiro tiquiro cutirore quē ohō, siniahye Cohācjüre: “Cohācjū, yūhu ñagū ijiaja. Sa yegū mūhu paja ihñaña yūhare”, niahye tiquiro Cohācjüre. ¹⁴ Musare niita niaja. Ahriquiro wapa ne cohteriquiro pehere tiquiro ya wūhupū tojoagū Cohācjū pehe “Mūhu ñañene cohā tuhasa”, niahye tiquirore. Apequiro fariseo masūnore “Mūhu ñañene cohā”, niedahye Cohācjū. “Yūhu quehnoagu ijiaja”, nidiquiro Cohācjū ihñagū ñariquiro ijire. “Yūhu ñagū ijiaja. Sa yegū yee ñañene bujua witiaja”, nidiquirore Cohācjū quehnoariquiro ijigū yerota tiquirore, niahye Jesu.

Macanagāre tiquina ye ijiatire Cohācjüre sini basahye Jesu
(Mt 19.13-15; Mr 10.13-16)

15 Sa ye masa tiquina pohnene macanagäre Jesure ña peo dutiye tehe, tiquiro cahapu ne wihiahye. Tiquina sa yegü ihñañe Jesu buheyequina tiquinagäre ne wihieyequinare tuhtiahye. 16 Tiquina sa tuhtigü ihñano Jesu macanagäre pijioahye tiquiro cahapu. Pijio tuhasa ohõ saha niahye tiquiro buheyequinare:

—Macanagã yuhu cahapu ahtaahro. “Waharisa”, niedacãhña tiquinagäre. Tiquinagã Cohãcjäre tiquina puhtoro tuhoture. Sa ye Cohãcjü puhtoro ijirõpäre ahriquinagã yero sahata tuhotuyequina ijire topäre. 17 Potota niita niaja musare. Ahriquinagã Cohãcjäre tiquina cahmeno saha musa pehe cahmedana, tiquiro cahapu wahasi musa. Musa wahaeragü musa puhtoro ijisi tiquiro, niahye Jesu.

Doeri cjë upuro Jesure sinituahye (Mt 19.16-30; Mr 10.17-31)

18 Tiquiro sa nidi bato judio masa puhtoa mehna cjüno Jesure sinituahye:

—¿Ne, quehnoagu, buhegu, ijipihtiyehiye decori Cohãcjü mehna iji duagu, dahse yeboagari yuhu? niahye tiquiro.

19 Tiquiro sa nigü Jesu yuhtiahye:

—¿Dahse ijiro boro yuhure “Quehnoagu”, ni pisuajari muhu? Cohãcjü dihita quehnoariquiro ijire. 20 Ahri Cohãcjü dutiyere masine muhu. “Wana tieracãhña. Masare wejêdacãhña. Yaqueracãhña. Ni mehoedacãhña. Musa pacusumare ño peoya”, ni, sa ye dutire Cohãcjü. Sa yegu tire yeya muhu, niahye Jesu.

21 Tiquiro sa nigü Jesure yuhtiahye:

—Tire ijipihtiyere yuhu coã wahmua câhtagu ijiguputa yuhducaerahti, niahye tiquiro.

22 Tiquiro sa nigü tuhoro, Jesu tiquirore ohõ saha ni yuahyehiye:

—Mehenogã dahsare mähure muhu ye pehoati. Ijipihtiyere muhu yere duagu wahaya. Sa yegu ijipihtiyehiye muhu wapatarari niñerure pejecoyequinare ohoya. Muhu sa yegü peye muhu ye uhmusepu, Cohãcjü cahapu ijirota. Sa ye tuhasagu yuhu mehna cjü ijiaclu ahtaya, niahye Jesu tiquirore.

23 Tiquiro sa nigü tuhoro tiquiro pehe peye doeri cjë cõoriquiro ijiro tire pejecoyequinare oho dueraro, tutuaro bujua witi, wahaa wahahye.

24 Tiquiro sa bujua witigü ihñano Jesu ohõ saha ni yuahyehiye apequinare:

—Doeri cjë opana Cohãcjü tiquiro puhtoro ijirõpäre tiquinare waharo basioera cjüre. 25 Camello pehe awia copepu tiquiro sajã duagü basioerare tiquirore. Tiquiro sa ijiro yuhduoro doeri cjë upuro Cohãcjäre cahmedaro, Cohãcjü tiquiro puhtoro ijirõpäre waharo basioerare, niahye Jesu.

26 Tiquiro sa nigü tiquirore tuhoyequina ohõ saha niahye:

—Aa, dahse tiquiro nino saha poto ijigü, ne ihcãquiro masano Cohãcjü cahapu waha masiedaboaga, niahye tiquina basi.

27 Tiquina sa nigü Jesu yuhtiahye:

—Masa tiquina esa tuhoro quehnoano yeri mehna Cohãcjü cahapu waha masiedare. Cohãcjü pehe masare pecapu waha boriquinare yuhduo masine. Tiquiro ijipihtiyere quehnoano ye masi peho cãre, niahye Jesu tiquinare.

28 Tiquiro sa nigü Pedro tiquirore ohõ saha niahye:

—Tuhorña. Usã pehe ijipihtiyehiye usã yere cü cãu muhu mehna wahana, niahye tiquiro Jesure.

29 Tiquiro sa nigü Jesu ohõ saha niahye:

—Potota musare niita niaja. Musã Cohãcjü yere yena

tana m̄sa w̄h̄sere, m̄sa pac̄s̄m̄are, m̄sa bahanare, m̄sa namos̄ānumiare, m̄sa poh̄nare c̄urina ijina pajiro wap̄atanata m̄sa yojop̄re. ³⁰ M̄sa c̄uri ȳhd̄oro wap̄atanata. Sa yena m̄sa yariari bato ijip̄ihtiyē decori Coh̄ācj̄ū mehna ijinata m̄sa, niahye Jesu tiquinare.

Pari turi Jesu tiquiroyaria masa wijiatiroyahuahye

(Mt 20.17-19; Mr 10.32-34)

³¹ Sa ye Jesu doce tiquiroy buheyequinare neahye. Sa neano tiquinare yahuahye:

—T̄hoyā ȳh̄re. Yojop̄re mari Jerusal̄ēp̄ wahana niaja. Top̄ ȳh̄re masare Coh̄ācj̄ū ohorigare Coh̄ācj̄ū yere yahu m̄htariquina panop̄ tiquina yahuriro sahata sa yeeta ȳh̄re. ³² Top̄ masa ȳh̄re ñehēñe, judio masa ijieyequinare ohoeta ȳh̄re. Ȳh̄re tiquina ohori bato tiquina ȳh̄re baj̄ape, ñano ni, ȳh̄re sihco puti oh̄eta. ³³ Sa ye yuta dari mehna tana tuhasa wej̄eta ȳh̄re. Sa yeḡ ih̄tia deco wahaboro masa wijiaḡata ȳh̄, niahye Jesu tiquinare.

³⁴ Tiquiroy sa ni yahurire quehnoano masiedahye tiquiroy buheyequina. Coh̄ācj̄ū tire tiquinare quehnoano masiḡ yeraniahye.

Caperi bajueriquiroy ih̄ñaḡ yehye Jesu

(Mt 20.29-34; Mr 10.46-52)

³⁵ Sa ye Jesu ḡh̄ Jericó wame tiri maca cahaḡap̄ esahye. Top̄ caperi bajueriquiroy maha d̄ht̄ caha duji, niñeru sinino niahye. ³⁶ Sa yero masa peyequina tiquiroy caha ȳhd̄aḡ t̄horo sinituahye tiquinare:

—¿D̄hse ijiro boro masa peyequina ȳhd̄ajari? ni sinituahye tiquiroy.

³⁷ —Jesu Nazare cj̄āno waharo nine, ni, yahuahye apequina tiquiroy.

³⁸ Tiquiroy sa ni yahuḡ t̄horo tiquiroy sañuducuahye:

—Jesu, Davi m̄nāno panami iji turiaḡ, masare ȳhd̄oac̄j̄, ȳh̄re paja ih̄ñaña, ni sañuducuahye Jesure.

³⁹ Tiquiroy sa niḡ tiquiroy caha ih̄ñaducuyequina pehe, “Dihta mariañña”, ni tuhtiahye tiquiroy. Tiquiroy sa ni tuhtiepeḡata to pano tiquiroy sañuducuriro ȳhd̄oro sañuducu nemoahye tja:

—Davi m̄nāno panami iji turiaḡ, masare ȳhd̄oac̄j̄, ȳh̄re paja ih̄ñaña, ni sañuducuahye tiquiroy.

⁴⁰ Tiquiroy sa ni sañuducuḡ t̄horo, Jesu pehe esad̄ca, “Pijioya tiquiroy”, niahye. Tiquiroy sa niḡ tiquina pehe caperi bajueriquiroy piji c̄ahye. Tiquiroy sa piji c̄aḡ Jesu cahap̄ esaḡ Jesu pehe tiquiroy sinituahye:

⁴¹ —¿D̄hse ȳh̄ yeḡ cahmeajari m̄h̄? niahye Jesu.

—Ȳh̄ p̄hto, ȳh̄re ih̄ñaḡ yeya, ni ȳhtiahye caperi bajueriquiroy.

⁴² —Ih̄ñaña. Ȳh̄re wac̄ tu-tuaḡ, quehnoa wahare m̄h̄, niahye Jesu tiquiroy.

⁴³ Tiquiroy sa niḡata caperi bajueriquiroy ih̄ñaa wahahye. Sa quehnoa waharo, tiquiroy Jesu mehna wahahye. “Coh̄ācj̄ū tu-tuariquiroy ijire”, niahye tiquiroy. Sa ye masa peyequina caperi bajueriquiroy ih̄ñaḡ ih̄ñaña “Coh̄ācj̄ū quehnoariquiroy, tutuariquiroy ijire”, niahye tiquina ḡh̄.

19

Zaqueo Jesure piti cahye

¹ Sa ye Jesu Jericópa esa, ti macap̄ ȳhd̄ c̄āno taro niahye.

² Doeri cj̄ up̄ro Zaqueo wame tiriquiroy wapa ne cohteyequina p̄htoro top̄ ijiahye. ³ Sa yero tiquiroy Jesure “¿Diquiroy boro ijiagari?” ni ih̄ña masino taro

Jesure ihña duamahye. Sa tiquiroy ihña duepegūta uhmēdiquiroygā ijigū masa peyequina tiquiroygāre cahmotahye. ⁴ Sa yero tiquiroy masare oma yuhdu cā, sicōmoro wame tidu yucuguru mājahye Jesure ihñano taro. Came cjunogā tu caharu Jesu yuhduaro taro niahye. Sa yero Zaqueo turu cohtero niahye. ⁵ Tiquiroy sa cohte pesari watoa Jesu pehe tu dahpotoru esaduca, Zaqueore ihña mo, tiquiroyre pisuahye:

—Zaqueo yojopure mahu ya wuhuru tojoagutja. Sa yegu sojaro mehna dijia taya, niahye Jesu.

⁶ Tiquiroy sa nigū Zaqueo pehe sojaro mehna dijia ta, tutuaro bucueye mehna tiquiroy ya wuhuru waha dutiahye Jesure. ⁷ Tiquiroy sa piti cagū ihñañe, ijipihtiequina masa tiquina basi ohō saha ni yahuducuahye:

—Ahriquiroy Jesu ñariquiroy ya wuhuru tinino waha duare, ni, yahuducuahye ijipihtiequina tiquina basi.

⁸ Zaqueo pehe piti ca tuhasa toru ducuro, Jesure yahuahye:

—Puhto, tahoya yahure. Ijipihtie yeere deco mehna pejeoyequinare ohoutja. Sa yegu yahu apequiroyre cien niñeru cjoerire ni meho ehmarigu ijigu, cuatro cientos niñeru cjoerire wapa ye bui peoutja tiquiroyre, niahye Zaqueo Jesure.

⁹ Tiquiroy sa nigū Jesu pehe yahuahye tiquiroyre:

—Miare mahure mahu ya wuhuru ijiequina gūhure pecaru wahaboriquinare Cohācju yuhduo tuhasare. Mahu gūhu Abrahā manano acayu ijire. ¹⁰ Yuhu masu Cohācju ohorigu pecaru wahaboriquinare macagu ahtagu nii. Toru wahaboriquinare quehnoano yuhduogu ahtagu nii, niahye Jesu Zaqueore.

Niñeru cjoeri uru cjoeri quitire yahuahye Jesu
(Mt 25.14-30)

¹¹ Sa ye tiquiroyre tahoyequinare Jesu apeye queoye mehna yahuahye. Mehenogā dahsahye Jerusalēru tiquiroy esato. Sa ye tiquiroyre tahoyequina ohō saha ni tahotuahye: “Cohācju puhtoro yojopure iji ducaro taro nine”, ni, tahotuahye tiquina. ¹² Tiquina sa ni tahotugū Jesu yahuahye tiquinare:

—Ihcāquiroy puhtoro macano puhtoro sajātiquiroy yoropu ape yehparu waharo taro niahye. Topure esagū ihñano tiquina tiquiroyre puhtoro sōñe tee niahye. Came tiquiroy ya wuhuru tojoa wihiro taro niahye. ¹³ Coā warore tiquiroy wahato panore puhtoro ru omoyequina dahra cohteyequinare pijioahye. Sa pijioro, tiquiroy tiquinare tiquinape cjoeri niñeru cjoeri wapa bujuye cjoeri uru cjoerire ohoahye. Oho tuhasa, yahuahye tiquinare: “Yuhu mariedagū ahri niñeru mehna masa wapata nemoatire macaña”, niahye tiquiroy dahra cohteyequinare. ¹⁴ Sa ye tiquiroy ya maca cjenata tiquiroyre cahmedahye. Sa cahmedaye, apequinare tiquiroyre puhtorore yahu dutieye ohoahye. “Mahu usā puhto ijigū cahmedaja usā”, niahye tiquina yahu dutiquina pehe. ¹⁵ Sa tiquina cahmedapegūta came tiquina puhtoro sajāhye tiquiroy. Puhtoro sajā tuhasa tiquiroy ya wuhuru tojoa tahye.

’Sa tojoa wihiro dahra cohteyequinare tiquiroy ye niñeru mehna tiquina wapata nemorire masino taro, tiquinare pijioahye. ¹⁶ Tiquiroy pijiori bato, wihi mahitariquiroy tiquiroyre yahuahye: “Puhto, mahu niñeru cjoey, yahure mahu ohori cjoey mehna ru omoye cjoeri wapata nemou

yuhũ”, niahye dahra coheriquiro pũhtorore. ¹⁷ “Quehnoano yeaya mũhũ. Mũhũ quehnoagũ dahra cohtegũ ijire. Mũhũ mehenogã mehna yuhũ dutiriro sahata ye pehogũ ijigũ yojopũ pũa omope macari cjẽna tiquina pũhto ijiacũ wahagũta mũhũ”, niahye pũhtoro dahra coheriquirore. ¹⁸ Tiquiro bato wihiriquiro tiquiro mehna cjũno ohõ saha niahye: “Pũhto, mũhũ ya cjoe niñeru cjoe yuhũre mũhũ ohori cjoe mehna ihcã omope cjoeri wapata nemou yuhũ gãhũ”, ni yahuahye tiquiro pũhtorore. ¹⁹ “Ihcã omope macari cjẽna pũhto ijiacũ wahagũta mũhũ”, niahye pũhtoro tiquirore. ²⁰ Tiquiro sa nidi bato apequiro dahra coheriquiro wihi, yahuahye: “Pũhto, mũhũ niñeru cjoe ohõ ijire. Suhtiro cahsero mehna coma, ti cjoere ihbou. ²¹ Mũhũ tutuaro dahra dutigũ ijire. Sa tutuaro dahra dutigũ ijigũ mũhũ basi oterapegũta ti dũcare nene mũhũ. Sa yegũ yuhũre cue niĩ”, niahye tiquiro pũhtorore “Ti cjoe mehna wapataerũ yuhũ”, ni yahuro. ²² Tiquiro sa nigũ tiquiro pũhtoro ohõ saha niahye: “Mũhũ sa nigũ ñagũ ijire mũhũ. Yuhũre mũhũ sa nidi buhiri mũhũre buhiri dahregũtja yuhũ. Yuhũ mũhũre tutuaro dahra dutigũ yuhũ ijigũ masine mũhũ. Apequina yere yuhũ negũ yuhũ oterarigũ ijiepegũta dũcare negũ yuhũ ijigũ masine mũhũ. ²³ Yuhũ sa ijigũ ihñapegũta ya cjoere niñeru ihbori wũhũpũ cũedahya mũhũ. Tire tiquina wasori wapa wapata nemoboaya mũhũ. ¿Dũhsegũ sa yerari mũhũ? Tire mũhũ yegũ tojoa wihigũ wapata nemoboaya yuhũ”, niahye tiquina pũhtoro. ²⁴ Sa ni tuhasa tiquiro cahapũ ducyequinare dutiahye: “Niñeru cjoere ehmaña tiquirore. Pũa omope cjoerire cũoriquirore

ohoya”, niahye pũhtoro. ²⁵ Tiquiro sa nigũ tiquina pehe yahuahye tiquirore: “Pũhto, pũa omope cjoeri cũoriquiro peye cũo tuhasare”, niahye tiquina. ²⁶ Tiquina sa nigũ pũhtoro yũhtiahye: “Mũsare niita niaja. Ijipihtiyequina cũoyequinare oho nemoutja. Cũoeriquiro pehere mehenogã tiquiro cũoepẽgũta tire ehmagũtja. ²⁷ Yojopũ pũritare yuhũre ihña tuhtiyequinare yuhũre tiquina pũhtoro iji dutierariquinare yuhũ cahapũ ne cãhtaya. Sa yena yuhũ ihñonopũ wejẽña tiquinare”, niahye pũhtoro dahra cohteyequinare, ni, buheahye Jesu.

Jerusalẽpũ esahye Jesu

(Mt 21.1-11; Mr 11.1-11; Jn 12.12-19)

²⁸ Sa ni tuhasa Jesu apequina pano Jerusalẽpũ wahahye. ²⁹ Tiquiro Betfagẽ wame tiri maca cahapũ Betania wame tiri maca cahapũ esa, cũnũ Olivo wame tidũ cahapũ esa mũhtahye. Jerusalẽpũ tiquiro esato mehenogã dũhsatjãhye. Sa yero pũaro tiquiro buheyequinare Jesu ohoro ohõ saha niahye:

³⁰ —Si macapũ burrogãre nena wahaya. Topũ esana, burrogãre tiquina dũhte docoriquirogãre boca sanata. Apequina pesamehnediquirogã ijiaga. Tiquirogãre bocana, yuta dare pã, ne cãhta basaya yuhũre. ³¹ Mũsa sa yegũ ihñano, burrogã upũro “¿Dũhsena burrogãre pãjari?” tiquiro nigũ tũhona ohõ saha ni yũhtiya tiquirore: “Mari pũhtoro burrogãre cahmedoqueo nidi”, ni, yahuya tiquirore, ni yahu duti ohoahye tiquiro buheyequinare pũarore.

³² Tiquiro sa nigũ tiquina pũaro pehe tiquiro nidiropũ esahye. Tiquina sa esagũ ijipihtiyẽ Jesu tiquiro nidiro sahata ijiahye. ³³ Sa ye tiquirogãre tiquina pãgũ

ihñañe tiquirogã opana tiquinare sinituahye:

—¿Dahse yena tana m̄sa yuta dare p̄jari burrogãre? ni, sinituahye tiquina.

³⁴ —Mari p̄h̄toro burrogãre cahmedoqueo nidi, ni yuhtiahye tiquina.

³⁵ Sa ni yahu tuhassa tiquirogãre Jesu cahap̄ ne sahye. Ne sa tuhassa tiquina bui c̄j̄e suhtire tiquirogã bui seõ peo, tiquirogã buip̄ Jesu m̄ja p̄jegũ yedohoahye tiquina.

³⁶ Jesu tiquirogã bui pesagũ tiquirop̄ wahato pano masa tiquina bui c̄j̄e suhtire tu we ne, mahap̄ seõ c̄ũ m̄htahye Jesure ño peoye.

³⁷ Sa ye tiquina Jerusalẽ cahagãp̄ esa, Olivo wame tid̄p̄ dijia tari mahap̄ esahye. Top̄ Jesu buhegũ tuhoyequina peyequina ijipihtiye Cohãcjũ tutuaye mehna tiquirop̄ ye ihñorire, tiquirop̄ quehnoañe yerire tiquina ihñarire wacũñe, Cohãcjũre “Quehnoagu, tutuagu ijire”, ni sañuducuahye. Sa ye tutuaro sañuducu, Cohãcjũre ño peoye, ohõ saha niahye:

³⁸ —Ahriquirop̄ Cohãcjũ tiquirop̄ ohoriquirop̄, mari p̄h̄torore Cohãcjũ quehnoano yeahro. Ʋhm̄se c̄j̄ena quehnoano ijiahro. Cohãcjũ tiquirop̄ tutuariquirop̄ ijigũ ijipihtiyequina masiahdo, ni ño peoahye tiquina.

³⁹ Tiquina sa nigũ tuhoye fariseo masa meheñequinagã tiquina watoa ijieyequina Jesure yahuahye:

—Buhegũ, m̄h̄n̄ buheyequinare dihta maria dutiya, niahye tiquina.

⁴⁰ —M̄sare niita niaja. Tiquina sañuducueragũ utã paca pari pehe sañuducuboaga, niahye Jesu fariseo masare.

⁴¹ Sa ni tuhassa Jesu Jerusalẽ cahagãp̄ esa, ti macare ihñano, utiahye. ⁴² Ohõ saha niahye tiquirop̄:

—Jerusalẽ c̄j̄ana yojop̄ p̄ritare m̄sare pecap̄ wahaborinare Cohãcjũ tiquirop̄ yuhtuohatire m̄sa masigũ quehnoa yuhtuaboaga. Sa

ijiepegũta yojop̄are m̄sa tire ne tuho duerare. Sa yero Cohãcjũ tire m̄sare masi dutierare. ⁴³ M̄sare ihña tuhtiyequina m̄sa ijiri macare cahmota sotoa peho quẽheeta. Sa ye, m̄sare tiquina wijia dutisi. ⁴⁴ Ti p̄jeta tiquina m̄sa ya macare cohã pehoeta. M̄sa gũh̄re wejẽeta. M̄sare ihña tuhtiyequina quehnoano cohã pehoeta m̄sa ya macare. Cohãcjũ pecap̄ wahaborinare m̄sare tiquirop̄ yuhtuohatire m̄sa masi duerari. M̄sa masi duerari buhiri m̄sare ihña tuhtiyequinare Cohãcjũ m̄sare cohã dutirota, niahye Jesu Jerusalẽ c̄j̄enare.

Cohãcjũ wuh̄p̄ Jesu esahye
(Mt 21.12-17; Mr 11.15-19; Jn 2.13-22)

⁴⁵ Sa ye Jerusalẽp̄ esaro, Jesu Cohãcjũ wuh̄p̄ sajãa wahahye. Sa yero apee boro duayequinare ti wuh̄p̄ ijieyequinare boca saro, tiquinare cohã wio cãhye. Ohõ saha niahye tiquinare:

⁴⁶ —Cohãcjũ yere tiquina ojoari p̄p̄ ohõ saha nine: “Ya wuh̄ Cohãcjũ mehna yahuducuri wuh̄ wame tirota”, niahye tiquirop̄ yere tiquina ojoari p̄p̄. Tiquirop̄ sa niepegũta m̄sa pehe ahri wuh̄p̄ duana, m̄sa basi cahme yaquere m̄sa, niahye Jesu.

⁴⁷ Sa ye decoripe Cohãcjũ wuh̄p̄ Jesu buheahye. Sa ye pahia p̄h̄toa, judio masare buheyequina, masa p̄h̄toa gũh̄ tiquirop̄ tiquina wejẽatire wacũ macahye.

⁴⁸ Masa ijipihtiyequina tiquirop̄ sa tuhoducuye, tiquirop̄ buheyere quehnoano tuho n̄n̄ñequina ijiahye. Tiquina sa quehnoano tuho n̄n̄ngũ Jesure wejẽ duayequina pehe tiquirop̄ tiquina wejẽatire bocaerahye.

20

Pahia p̄h̄toa, judio masare buheyequina, bucs̄na gũh̄ Jesu

mehna cahme tuhtiye niahye

(Mt 21.23-27; Mr 11.27-33)

¹ Ape deco Cohācjū wuhupū Jesu masare quehnoañe buheyere buhero niahye. Tiquiro sa buhegū pahia pūhtoa, judio masare buheyequina, bucūna mehna tiquiro cahapū wihiye, sinituahye:

² —Yahuya usāre. ¿Duhsegū canare sa yeari mūhū? ¿Noa mūhare tire sa ye dutiari? niahye tiquina Jesure.

³ Tiquina sa nigū Jesu yūhtiahye tiquinare:

—Musa pehere sinitu māhtagūtja. Yahuya yūhare. ⁴ ¿Ñu masare tiquiro wame yegū noa boro pehe tiquirore wame ye dutiyari, musa tūhotugū? ¿O Cohācjū dutierayari? ¿O masa pehe dutiyari, musa tūhotugū? ni sinituahye Jesu tiquinare.

⁵ Tiquiro sa nigū tiquina pehe tiquina basi ohō saha niahye:

—¿Duhse ni yūhtinatari mari? “Cohācjū Ñure dutie tiahye”, mari nigū, “¿Duhseña Ñure Cohācjū dutiepegūta tiquirore tūho duerari musa?” niboaga Jesu marine. Sa yena “Cohācjū Ñure dutiye tiahye”, ni yūhti masiedaja mari. ⁶ Ahriquina masa pehe “Potota Ñu Cohācjū yere yahu māhtariquiro ijire”, ni tūhoture tiquina. Sa ni tūhotuye “Ñu tiquiro wame yegū Cohācjū tiquirore dutierahye”, mari nigū tūhoye marine masa utā paca mehna doqueeta. Sa yena ti gūhare yūhti masiedaja mari, ni yahuducuahye tiquina basi.

⁷ Sa ni yahuducu tuhasa tiquina Jesure yūhtiahye:

—Ñure wame ye dutiriquirore usā masiedaja, niahye tiquina.

⁸ Tiquina sa nigū Jesu yūhtiahye:

—Tī pje pūrita yūhū gūhū musa sinitu māhtarire yahueraja musare. Ahrire yūhū yerire dutiriquirore yahueraja musare, niahye tiquinare.

Ñañequina dahra cohteyequina queoyere yahuahye Jesu

(Mt 21.33-44; Mr 12.1-11)

⁹ Sa ye Jesu tiquiro tūhotuye mehna queoye mehna ohō saha ni buhe dūcahye masare:

—Wese upūro uhse darire oteahye. Ote tuhasa, ti wesere apequinare ihcā pehe pahma cūahye. Pahma cūno ti wesere tiquinare ihña ihbo dutiahye. Sa duti tuhasa ape yehpūpū waha, yoari pje bajuerahye. ¹⁰ Sa yero uhse ñidi pje ijigū wese upūro tiquiro cahacjūnore wesere ihña ihboyequina cahapū ohoahye. Wese cjē oteri dūcare tiquiro ya pahrē cjēne ne dutiro ohomahye. Sa ye ihña ihboyequina pehe tiquiro cahacjūnore piti ca quēahye tiquirore. Sa ye tiquina tiquirore dūcare ohoerapeta tojoa dutiahye. ¹¹ Sa yero wese upūro apequiro tiquiro cahacjūnore ti wese cjē oteri dūcare ne dutiro ohomahye tja. Sa ye wesere ihña ihboyequina tiquiro gūhare quē, ñano yeahye tiquirore. Sa ye tuhasa tiquirore ti dūcare ohoerapeta tojoa dutiahye tja. ¹² Tiquina sa yeri bato wese upūro apequiro cahacjūnore ohomahye tja. Sa ye wesere ihña ihboyequina pehe tiquiro gūhare camī dahre, ti wese dūhtū cahapū cohā cāhye tiquirore.

¹³ Tiquina sa yeri bato wese upūro ohō saha ni tūhotumahye: “¿Duhse yegūtari yūhū? Ohō saha yegūtja. Yūhū macūre yūhū cahīniquirore ohogūtja. Ijirota ijire. Tiquina tiquirore ño peoeta”, ni tūhotumahye wese upūro pehe.

¹⁴ Sa ye tiquiro macūnore tiquiro ohoriquirore esagū ihñañe ihña ihboyequina pehe tiquina basi ohō saha ni, yahuducuahye. “Ahriquiro wese upūro macūno ijire. Tiquirore wejēihna. Sa yero ahri wese mari ya wese tojoarota”, nimahye tiquina basi. ¹⁵ Sa ni

tuhasa wese uparo macunore wese dũhtũ cahapũ nea, wejẽ cãhye tiquiore. ¿Tiquina sa yegũ ihñano dahse yerotari wese uparo wesere ihña ihboyequinare? niahye Jesu.

¹⁶ —Ti wesere ihña ihboyequinare wejẽno taro, apequinare wesere ihña ihbo dutirota, ni yahtiahye Jesu tiquiore basi.

Tiquiro sa nigũ tãhoye masa pehe ohõ saha niahye:

—Marine sa wahaeracãhdo, niahye tiquina.

¹⁷ Tiquina sa nigũ Jesu pehe tiquinare sinituahye:

—¿Cohãcjũ yere tiquina ojoari pũre ohõ saha ni yahuducuye, dahse nino niajari, mũsa tãhotugũ? Ahriquiore Cristo utã yero saha ijire. Utãre wũhũ dahreyequina tiquina cohãno saha masa tiquiore cohãeta. Tiquina sa yepegũta yojopũre wũhũ dahreyequina wũhũre yeye tiquina cũ mãhtaria utãre tiquina cũno saha Cohãcjũ tiquiore pũhoro sõri, ni ojoahye.

¹⁸ 'Ijipihtiequina tia utã bui doque queheyequinare muta sitea wahaeta. Sa yero tia utã masũno bui bora pjero, mũtaa wahagũ yerota tiquiore. Tiquiro pagũ mũnanore daye manarigã wahagũ yerota, niahye Jesu. (Sa nino tiquiore cahmedariquina, tiquiore buhiri dahreatiquina tiquina ñano yahũnatire yahuro niahye.)

Pũhtoa ye wapare apequina sinituahye Jesure

(Mt 21.45-46; 22.15-22; Mr 12.13-17)

¹⁹ Tiquiro sa nigũ tãhoye judio masare buheyequina, pahia pũhtoa gũhũ, “Jesu wesere ihña ihboyequina queoye mehna marine tuhtiro nĩne”, ni, tãhotuahye tiquina.

Sa ni tãhotuye tiquina Jesure ñehe duamahye. Sa ñehe duepeta

tiquina masare cue niahye. ²⁰ Sa cueye, Jesure tiquina ñeheatĩ pjero cohteahye tiquina. Sa ye “Poto ijiyequina yero saha ye meho ijiya mũsa”, niahye tiquina apequinare. Tiquiro ñano ni yahtigũ ye duaye nimahye tiquiore yahusã duaye. Sa ye Jesure sinitu dutiye ohoahye ni mehoñequinare. Jesu ñano ni yahuducugũ tãhoye ti yehpa cjẽna pũhoro peresu ye dutiye tee nimahye. ²¹ Sa ye tiquina Jesure ni meje cũ sinituye nimahye:

—Buhegũ, poto yahuducugũ, ni mehoñe mariegũ mũhũ ijigũ usã masiaja. Sa yegũ ihcãquiore pũhoro waro tiquiore ijepegũta tiquiore gũhũre dõyaro marieno potota yahure mũhũ. Mũhũ Cohãcjũ yere poto mũhũ buhegũ gũhũre usã masiaja. ²² Yahuya usãre. ¿Ne, Roma cjũnore ijipihtiequina pũhoro gobierno cjẽne marine wapa yero cahmeajari, mũhũ tãhotugũ? ¿Mari dutiye wapa ye dutiajari, mũhũ tãhotugũ? ni sinituahye tiquina Jesure.

²³ Tiquina sa nigũ tãhoro Jesu tiquina ñano ye duayere masino, tiquinare yahtiahye:

²⁴ —Yojopũre niñeru cjoere pũhtoare wapa yeati cjoere ne cãhtaya. Ti cjoere ihñahna, niahye.

Ti cjoere tiquina ne wihigũ ihñano ohõ saha niahye Jesu:

—¿Noa boro queoye wahñajari ahri cjoere? ¿Noa boro wame wahñajari? niahye Jesu tiquinare.

—César, masa ijipihtiequina pũhoro queoye, tiquiore wame gũhũ wahñare, ni yahtiahye tiquina.

²⁵ Tiquina sa nigũ Jesu yahuahye:

—Ti pje pũrita masa ijipihtiequina pũhoro yere tiquiore pehere ohoya. Cohãcjũ yere Cohãcjũ pehere ohoya, niahye Jesu tiquinare.

²⁶ Sa ye masa tiquina ihñonopũ Jesure ñano ni yahuducugũ ye

masiedahye tiquina. Sa ye Jesu yuhtiyere tuhoye, tiquina tuho maria wahahye. Sa tuho maria waha, dihta maria wahahye.

Cohācjū tiqiro masoatire yahuahye Jesu saduceo masare
(Mt 22.23-33; Mr 12.18-27)

²⁷ Sa ye meheñequinagā saduceo masa Jesu cahapū wihiahye. “Cohācjū yariariquinare masosi”, ni tuhoye tiquina ijiahye saduceo masa. Sa ye tiquina ohō saha niahye tiquiore:

²⁸ —Buhegū, ohō saha ni buheahye Moise: “Ihcāquiro tiqiro wahmino namo tiriqiro pohna mariedaperota tiqiro yariagū ihñano tiqiro baharore tiqiro wahmino namono ijiricorore nūoano cahmene. Sa yero tiqiro wahmino mūnano tiqiro pohna tiboriro sahata pohna tiro cahmene tiqiro baharore. Sa ye tiqiro pohne tiqiro wahmino mūnano pohne yero saha ijieta”, ni, ojoahye Moise, niahye tiquina.

²⁹ Tire ni tuhasa ahri quitire tja yahu nemoahye Jesure:

—Ihcāquiro masūno ijiahye. Seis bahana tiahye. Tiquina wahmino pehe namo ti, pohna mariediquiro yariaa wahahye.

³⁰ Sa yero apequiro tiqiro baharo gūhū tiqiro wahmino namono ijiricorore nūoahye. Tiquiro sa nūoari bato tiqiro wahmino yero sahata pohna mariedaperota tiqiro gūhū yariaa wahahye.

³¹ Sa yero ahriquiro baharo gūhū tiqiro wahmino mūnano yero sahata pohna mariedaperota yariaa wahahye. Sa dihta wahahye ihcāquiro pohne waro. Ne pohna mariedapeta yaria pihtia wahahye.

³² Tiquina namono ijiricoro gūhū tiquina batota yariaa wahahye. ³³ ¿Ne, Cohācjū ijipihtiyequinare yariariquina mūnare tiqiro masogū diquiro namono pehe ijiboagari ticoro

pototi? Tiquina ijipihtiyequina ticorore namo tiriquina mūna ijiahye. ¿Sa yero diquiro namono pehe ijiritari? ni sinituahye tiquina.

³⁴ Tiquina sa nigū Jesu yuhtiahye:

—Yojopū cjēna omoca duhtere.

³⁵ Tiquina sa duhtepegūta apequina pehe topū cjēna pehe sa ijierare. Apequina amūare, numia gūhūre poto yeyequinare Cohācjū quehnoañequina ijigū yerota. Tiquina yariari bato masa mūjaeta. Sa ye tiquina topū omoca duhterare.

³⁶ Sa ye tiquina angele yero sahata ne yariasi. Tiquina Cohācjū masoriquina ijiye, Cohācjū pohne ijire.

³⁷ Yojopūre yariariquina mūna tiquina masa wijiati pehere mūsare yahutja. Tire Moise quehnoano yahu pehoahye. Tiquiro mehenagā ujūri quitire ohō saha ni yahuahye:

“Abrahā, Isaac, Jacob tiquina puhtoro ijire Cohācjū,” ni ojoahye Moise.

³⁸ Tiquina yariari bato “Tiquina puhto ijiaja”, ni yahuahye Cohācjū. Sa nieperota yariariquina mūna puhtoro ijierare Cohācjū. “Tiquina puhto ijiaja”, tiqiro niñe mehna catiyequina tiquina ijigū masiaja mari. Tiquiro catiyequina puhtoro ijire. Ijipihtiyequina masa catire, Cohācjū ihñagū, niahye Jesu tiquinare.

³⁹ Tiquiro sa nigū meheñequinagā judio masare buheyequina ohō saha niahye:

—Buhegū, mūhū quehnoano yuhtiri, niahye tiquina Jesure.

⁴⁰ Sa ye pari turi Jesure sinitu duerahye tiquina.

Cristo pehe Davi mūnano puhtoro ijire

(Mt 22.41-46; Mr 12.35-37)

⁴¹ Came Jesu ohō saha ni yahu nemoahye tiquinare:

—“Cristo Davi mūnano panamino iji turiariquiro ijirita”, ni buhere apequina. ¿Duhse ye tiquina sa ni

buheajari? ⁴² Davi m̄n̄n̄ano tiquiro basi Salmop̄u tiquiro ojoari p̄p̄u oh̄o saha ni, ojoahye:

Cohācjū ȳh̄u p̄h̄torore oh̄o saha nidi: “Oh̄op̄u ȳh̄u poto pehep̄u dujiya. ⁴³ Sa yeḡu m̄h̄ure ih̄na tuhtiequinare m̄h̄ure ȳh̄d̄uca basautja ȳh̄u”, nidi Cohācjū ȳh̄u p̄h̄torore, ni, ojoahye Davi m̄n̄n̄ano.

⁴⁴ Sa ni ojoaro Davi m̄n̄n̄ano Cristore “Ȳh̄u p̄h̄toro”, ni pisuahye. Davi m̄n̄n̄ano Cristo ñec̄ano iji turiariquiro ijieperota Cristore “Ȳh̄u p̄h̄toro”, ni pisuahye. ¿Davi m̄n̄n̄ano Cristo ñec̄ano iji turiariquiro ijieperota d̄h̄se ijiro boro tiquiro “Ȳh̄u p̄h̄toro”, ni pisuyari Cristore? Cristo pehe Davi m̄n̄n̄ano p̄h̄toro ijire, ni yahuahye Jesu.

Judio masare buheyequina tiquina ñāñe yeyere yahuahye Jesu
(Mt 23.1-36; Mr 12.38-40; Lc 11.37-54)

⁴⁵ Masa peyequina Jesure tiquina t̄h̄ori watoa Jesu pehe tiquiro buheyequinare oh̄o saha ni yahuahye:

⁴⁶ —Mari judio masare buheyequina tiquina ñāñe yeyere ih̄n̄ana quehnoano wac̄u masiña. Sa yena tiquina yero saha yerac̄añ̄a. Tiquina yoaye suhti saña, masa tiquina ih̄ñonop̄u tini, doeri cjē duarop̄u apequina p̄h̄toare quehnoano ño peo tiquina sinino saha tiquina piti ca siniḡu cahmene tiquina. Sa ye tiquina mari judio masa buheye w̄h̄usep̄u quehnoañe dujiye dihitare duji duare. Sa ye bose deco ijiḡu top̄u ḡh̄are quehnoañe dujiye dihitare cahmene. ⁴⁷ Tiquina wape wiha numia ye w̄h̄usere tiquina c̄oye ḡh̄are ehmare ti numiare. Sa ye tiquina masa ih̄ñonop̄u yoari pje Cohācjūre siniducumene masare ih̄n̄a dutiye. Tiquina sa yeḡu apequina bui cjūno tiquinare

Cohācjū buhiri dahrerota, niahye Jesu tiquinare.

21

Wape wihoro Cohācjū w̄h̄up̄u ticoro ohorire yahuahye Jesu
(Mr 12.41-44)

¹ Sa ni yahu tuhasa Cohācjū w̄h̄u cjē niñeru tiquina s̄ari acarore niñeru opana tiquina ye niñerure duhu s̄aḡu ih̄n̄a dujiro niahye Jesu. ² Sa ih̄n̄ano wape wihoro pejec̄oricoro p̄a cjoeḡare ticoro duhu s̄aḡu ḡh̄are ih̄ñahye. ³ Tire ih̄n̄a tuhasa oh̄o saha ni yahuahye: —Potota niita niaja m̄sare. Ahricoro wape wihoro pejec̄oricoro pehe niñeru s̄ari ac̄arop̄u duhu s̄ano apequina ijipihtiequina ohori ȳh̄d̄uro ohori ticoro pehe. ⁴ Apequina niñeru opana pajiro tiquina ohoepeḡuta tiquina ye pajiro d̄h̄sare. Ahricoro pehe pejec̄oricoro ijieperota ijipihtie ticoro ihyatire ticoro d̄uboriḡare oho pehori, niahye Jesu.

—Cohācjū w̄h̄u coh̄ori w̄h̄u ijirota, niahye Jesu
(Mt 24.1-2; Mr 13.1-2)

⁵ Sa ye apequina Cohācjū w̄h̄ure oh̄o saha niahye:

—Quehnoañe ut̄a paca mehna yeri w̄h̄u, quehnoa ȳh̄d̄ari w̄h̄u ijicjoare. Masa Cohācjū ya w̄h̄u ijiatire tiquina ohori ḡh̄u ti w̄h̄up̄u quehnoano c̄uri jire, ni, yahuducuye niahye.

Tiquina sa niḡu Jesu yahuahye tiquinare:

⁶ —Ahri ijipihtie mari ih̄n̄ari w̄h̄usere, ahri ut̄a paca ḡh̄are coh̄a pehoeta. Ne ih̄c̄aria ut̄a tojoasi, niahye Jesu tiquinare.

Pihtiati deco ijiatire yahuahye Jesu
(Mt 24.3-28; Mr 13.3-23)

⁷ Tiquiro sa niḡu tahoye tiquina pehe sinituahye tiquirore:

—¿Buheḡu, d̄h̄se ijiḡu m̄h̄u ni-diro saha sa waharotari? ¿Pihtiati

deco panogã ijigũ dahse ti waha ducagũ ihñanatarĩ usã? ni sinitu-ahye tiquina Jesure.

⁸ Jesu yuhtiahye tiquinare:

—Quehnoano yeya m̄sa. Sa yena m̄sare apequina tiquina ni mehoñene tahoeracãhña. Peyequina masa “Cristo ijiaja yuhũ”, ni mehoñequina ahtaeta. Sa niñe, “Yojopure pihtiatĩ deco ijiato mehenogã d̄hsare”, nieta. Tiquina sa nigũ tahoeracãhña. ⁹ Sa ye apequina “Cahme wejẽne nine”, m̄sare nieta. “Yojopure puhtoare masa cohãne nine”, nieta. M̄sa tire tuhoña cueracãhña. Pihtiatĩ deco pano ohõ saha waha mahtanota. Sa wahagũ pihtiatĩ deco wahato d̄hsarĩnota, niahye Jesu.

¹⁰ Sa ni tuhasa ohõ saha ni yahu nemoahye:

—Ihcã yehpa c̄jẽna ape yehpa c̄jẽna mehna cahme wejẽeta. ¹¹ Sa yero tutuaro yehpa ñuhmi, masa peyequina eña mehna yaria, ijipihti c̄jẽna dohatieta. Sa ye ahm̄se c̄jẽ cua pesaye bajuagũ ihñañe, masa ihña maria wahaeta.

¹² Ahri ijipihtiye sa wahato pano, apequina m̄sare ñehe, ñano yeeta. Sa ye mari judio masa buheye w̄husep̄u tiquina m̄sare yahusã, peresu yeeta m̄sare. Tiquina sa yegũ peye yehpari c̄jẽna puhto cahap̄u, peye macari c̄jẽna puhto cahap̄u ducunata m̄sa tiquina yahusãnohrina. Yequina m̄sa ijiri buhiri sa yeeta.

¹³ Tiquina sa yahusãgũ m̄sa pehe quehnoañe buheyere tiquinare yahunata. ¹⁴ Ti pjere m̄sare tiquina yahusãgũ puhtorore m̄sa yuhtiatire “Yahu masiedaboaga”, ni tuhotueracãhña m̄sa. ¹⁵ Yuhũ m̄sare yahu basatja. M̄sare sa yedohogu tuho masiñene, quehnoañe yahuducuye ḡhure m̄sare yahugũ yeitja. M̄sa sa yegũ m̄sare ihña tuhtiyequina pehe m̄sa yahuducuyere tuho,

“Ti poto ijierare”, ni, yuhti masisi. ¹⁶ Ti pjere m̄sa pacusumua, m̄sa bahana, m̄sa acaye, m̄sa mehna c̄jẽna ḡhũ m̄sare ihña tuhtiyequinare ohoeta m̄sare, yeequina m̄sa ijiri buhiri. Tiquina sa yegũ m̄sare ihña tuhtiyequina m̄sa mehna c̄jẽnare apequinare wejẽeta. ¹⁷ Sa ye yeequina m̄sa ijigũ ihñañe, ijipihtiyequina m̄sare ihña tuhtietia. ¹⁸ M̄sare sa ihña tuhtiepetã ne mehenogã m̄sare ñano yesi. ¹⁹ Sa yena m̄sa wacũ tutuana ijiya. M̄sa sa yena, Cohãc̄jũ mehna sa ijiducunata.

²⁰ Sa ye peyequina surara Jerusalẽp̄u tiquina cahmota sotoa peho cãgũ ihñana, Jerusalẽne tiquina cohãto mehenogã d̄hsagũ masinata m̄sa. ²¹ Ti sa wahagũ ihñañe Judea yehpap̄u ijieyequina c̄n̄u c̄jũ cahap̄u oma duhtiahro. Sa ye Jerusalẽp̄u ijieyequina wahaahro. Sa ye weserip̄u ijieyequina Jerusalẽp̄u tojoeracãhdo sojaro mehna tiquina wahato pehe. ²² Ti decorip̄u buhiri dahreye decorip̄u ijipihtiye Cohãc̄jũ tiquirop̄u ojoari pũ tiquirop̄u niidiro sahata sa wahaeta. ²³ Ijipihtirop̄u ahri yehpap̄u ñano yuhdueta. Ti sa wahagũ, niji wahcõne numia, tiquina pohne apũoñe numia ḡhũ pejecuoro wahaeta. ²⁴ Apequina ahri macã c̄jẽna mehna cahme wejẽeta. Sa ye apequina ahri macã c̄jẽnare ijipihtiye yehparip̄u ne cã, peresu yeeta. Sa ye judio masa ijieyequina Jerusalẽne ñano ye, tiquinare yuhdueta. Judio masa ijieyequina ya deco pihtigup̄u Jerusalẽ c̄jẽnare ñano ye duhueta, ni yahuahye Jesu.

Jesu ahri yehpap̄u tiquirop̄u tojoa tatiye yahuahye

(Mt 24.29-35, 42-44; Mr 13.24-37)

²⁵ Sa yero tiquinare yahu nemoahye:

—Ti pjere asū deco cĵano, ñami cĵano, ñahpicoha gāhu sijoro saha ijipihtiyequina wahaeta. Ijipihtiyequina ahri yehpa cĵena “Acuehi, yarianata”, ni tuhohuetequina pajiri ma cĵe pahcōri cua yuhduaro ti pahcōri bisi cāhtagū tuhoye tutuaro cueeta. ²⁶ Ti pjere uhmuse cĵe yehpari, ñahpicoha gāhu ti sa wahaducurore comesaeta. Sa ye ñuhmieta. Ti sa wahagū ihñañe, masa pehe ahri yehpa pihtiatire cohteye, tutuaro cueeta. ²⁷ Ti pjeta yuhmasu Cohācĵu ohorigu Cohācĵu tutuaye mehna tiqiro asi siteye mehna ehmeo curua buipru yuhū ahtagū ihñaeta masa. ²⁸ Ahri sa waha ducagū ihñana, wacū tutuana ijiya. Sa yena uhmusepu ihñaña. Ti pjere Cohācĵu musare pecapu wahaborinare tiqiro yuhduoato mehenogā dūhsarota, niahye Jesu.

²⁹ Sa ni tuhasa ahri queoye mehna buheahye Jesu:

—Higueragure, apeye cĵu gāhure tuhohutuya musa. ³⁰ Tu yucugū pūri tigū ihñana, cūhma mehenogā dūhsagū masine musa. ³¹ Sata ahri ijipihtiye yuhū nidire ti sa wahagū ihñana, Cohācĵu tiqiro puhtoro ijiati pje mehenogā dūhsagū masinata musa.

³² Musare poto niita niaja. Ti pje cĵena tiquina yariato pano ijipihtiye yuhū nidiro sahata sa waharota. ³³ Uhmuse, ahri yehpa gāhu pihtia waharota. Yuhū yahuducuye pehe ne comesasi. Ijipihtiye yuhū nidiro sahata sa waha sohtori tirota.

³⁴ Yuhū tojoa tati decore ne masiedare musa. Sa yena quehnoano yeya. Bose decorire queheye decorire yeducueracāhña. Sa yena queheracāhña. Ahri yehpa cĵene pajiro tuhohueracāhña. Masa yuhū nidiro sahata yena, wacūeno mehna ahri yehparū yuhū ahtagū musa ne acūasi. ³⁵ Wahiqirore yuri da wacūeno mehna ti da tuā suharo

saha wacūeno mehna ahtaŭtja yuhū. Ijipihtiyequina ahri yehpa cĵena tiquina masiedi watoa ti deco wacūeno mehna sa waharota. ³⁶ Quehnoano wacū masi cohteya. Sa yena Cohācĵure ahrire sa siniducuya: “Ahri pihtiatire decore sa wahagū yuhure yedohoya. Tutuayere ohoya yuhure ahrire quehnoano yuhū yuhduatire. Sa yegu Cristore mahu ohoriquirore cuero marieno yuhure piti cagū yeya”, ni, siniña Cohācĵure, niahye Jesu.

³⁷ Sa ye ti decorire Cohācĵu wuhupu Jesu buhee tiahye. Ñaminipe buhe tuhasaro Olivo wame tidu cunupu waha, topu iji bohreaye tiahye. ³⁸ Bohreayepe tahari ijipihtiyequina masa Cohācĵu wuhupu tiqirore tuhoye wahae tiahye.

22

Pahia puhtoā, judio masare buheyequina mehna wejē duahye Jesure

(Mt 26.1-5, 14-16; Mr 14.1-2, 10-11; Jn 11.45-53)

¹ Sa ye ti pjere pugū yeye moremehneñe pāre tiquina ihyati bose deco mehenogā dūhsahye. Ti bose deco pascua wame tiahye.

² Sa ye pahia puhtoā, judio masare buheyequina mehna Jesure wejē duaye, tiquina wejēatire wacū macahye. Jesure wejē duepeta, masa pehere cueahye, “Usuari”, niñe.

³ Sa ye watīno Juda Iscariotere ñano tiqiro ye dutigū Juda pehe yahtiahye tiqirore. Juda doce buheyequina mehna cĵano ijimahye. ⁴ Sa yero tiqiro pahia puhtoare, Cohācĵu wuhū cĵena surara puhtoā mehna gāhure yahuro wahahye. Tiquina cahapu esa, tiquinare Jesure tiqiro ihñoatire yahuahye tiquinare. ⁵ Tiqiro sa nigū tuhoye, tiquina bucie, “Muhure niñerure wapa

yenatja”, niahye tiquina Judare.
⁶ Tiquina sa nigū Juda “Au, tiqiurore m̄sare ihñoutja”, ni, masa tiquina ihñeno watoa Jesure ihña tuhtiyequinare tiqiuro ihñoati ñamine cohtero niahye.

Jesu buheyequina mehna tiqiuro ihya bato tiati deco ijiahye

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Pugū yeye moremehneñe p̄re ihyati bose deco iji d̄cari deco ijiahye. Sa yero pascua c̄jē ijiatire ovejare tiquina ihyatiquinare tiquina wejēdi deco ijiahye. ⁸ Ti pjeta Pedrore, Ñu gūh̄are Jesu yahuahye:

—Bose decop̄a mari ihyatire quehnona wahaya, niahye Jesu tiquinare.

⁹ —¿Noho borop̄a mari ihyatire quehnoyu dutigū ohoajari m̄h̄u us̄are? ni sinituahye tiquina tiqiurore.

¹⁰ Tiquina sa nigū Jesu yahtiahye:

—Jerusalēp̄a m̄sa esagū aco sutu w̄ariqiuro m̄sare piti carota. Tiquiro piti cagū tiqiuro mehna wahaya. ¹¹ Sa wahana tiqiuro siho sajāri w̄ah̄ap̄a esana w̄h̄u up̄arore ohō saha ni yahuya. “¿Nohop̄a ȳh̄u buheyequina mehna pascua c̄jē ihyayere ihyanatari?” nidi buheriquiro”, niña w̄h̄u up̄arore. ¹² M̄sa sa nigū t̄horo ūhm̄ano c̄jā tuc̄re pajiri tuc̄re mari cahmeñe mehna tiquina quehñori tuc̄re ihñonota w̄h̄u up̄aro. Top̄a mari ihyatire dahreya m̄sa, niahye Jesu tiquinare.

¹³ Tiquiro sa nigū tiquina ti macap̄a wahahye. Top̄a tiquina esagū tiquinare tiqiuro nidiro sahata wahahye. Sa ye tiquina pascua c̄jē ihyatire dahreahye.

¹⁴ Ihyari pje ijigū Jesu doce tiqiuro buheyequina mehna ihya dujiahye. ¹⁵⁻¹⁶ Top̄a ihyarop̄a dujiro Jesu tiquinare yahuahye:

—M̄sare niita niaja. Ahri pascua bose decore mari dahreja Cohācjū tiqiuro yequinare tiqiuro ȳh̄d̄otire wacūna. Came Cohācjū tiqiuro p̄htoro ijirop̄a tiqiuro yequinare ȳh̄d̄o tuhasarota. Tiquiro sa ȳh̄d̄oato pano ahri deco c̄jēne pari turi ihyasi ȳh̄u. Sa yegū yojop̄are ȳh̄u ñano ȳh̄d̄oato pano ahri pascua c̄jē ihyayere m̄sa mehna tutuaro ihya duahti ȳh̄u, niahye Jesu.

¹⁷⁻¹⁸ Sa ninota Jesu sihnidi pare ne, Cohācjūre “Quehnoare”, ni sini, tiquinare yahuahye:

—M̄sare niita niaja. Cohācjū ijiptiyequina p̄htoro tiqiuro ijiato pano ahri vinore ne pari turi sihnisi ȳh̄u. Sa yena ahri vinore ne, m̄sa basi iti sihniña, niahye Jesu.

¹⁹ Sa ni tuhasa p̄are ne, Cohācjūre “Quehnoare”, niahye. Sa yero tiare nuha, itiahye tiquinare. Tiare itiro, tiquinare yahuahye:

—Ahri ȳh̄u pagū ijire. Ȳh̄u pagū ȳh̄ure ihña tuhtiyequinare tiquina ohori pagū ijirota m̄sare ȳh̄u ȳh̄d̄oati. Sa yena ȳh̄ure m̄sa wacūatire ahrire ihyaya, niahye Jesu.

²⁰ Sa ihya tuhasa sata tiqiuro tiquinare sihnidi pa gūh̄are ohoahye. Sa ohoro, tiquinare yahuahye:

—M̄sa ñañe yeyere cohāgū tagū yariatja. Sa yegū ȳh̄u diire cohāutja. Cohācjū “M̄sare ȳh̄d̄outja”, tiqiuro nidiro esa tuhagū ȳh̄u yariaro mehna tiqiuro nidiro sohtori tirota.

²¹ Yojop̄are t̄hoya m̄sa. Ȳh̄ure ihña tuhtiyequinare ȳh̄ure ihñoatiqiuro yojop̄are ȳh̄u mehna ohō dujire. ²² Cohācjū tiqiuro dutiro sahata ȳh̄u masū Cohācjū ohorigū yariatja. Tiquiro sa yaria dutiepegūta ȳh̄ure ihña tuhtiyequinare ihñoatiqiuro p̄rita ña ȳh̄d̄aro ȳh̄d̄arota, niahye Jesu tiquinare.

²³ Tiquiro sa nigū tiquina pehe tiquina basi ohō saha ni sinituahye:

—¿Jesure ihña tuhtiequinare ihñoatiquiro mari mehna cjāno diquiro boro ijiagari? ni, yahuducuahye tiquina basi.

—¿Mari mehna cjāno diquiro pehe ijiagari pūhtoro? ni yahuducuahye Jesu buheyequina tiquina basi

²⁴ Came Jesu buheyequina ohō saha ni yahuducuahye:

—¿Mari mehna cjāno diquiro pehe ijiagari pūhtoro? ni yahuducuahye tiquina basi.

²⁵ Tiquina sa ni yahuducugū tūhoro Jesu tiquinare yahuahye:

—Cohācjüre cahmeeñequina pūhtoa pehe tiquina masare dutiye, purīno mehna dutire. Sa ye pūhtoare “Tiquina masare yedohoyequina ijire”, nimene apequina masa tiquinare. ²⁶ Mūsa pehe sa yesi mūsa basi. Mūsa mehna cjāno mūsa wahmi pehere tiquiro baharo yero saha ijiro cahmene. Mūsa mehna cjāno pūhtoro iji duaro cahacjāno yero saha ijiro cahmene tiquirore.

²⁷ ¿Diquiro ijiagari pūhtoro? ¿Ihya dujiriquiro pehe pūhtoro iji-agari? ¿O ihyayere itiriquiro pehe pūhtoro ijiagari? Ihya dujiriquirota ijiaga pūhtoro. Tiquiro sa ijiepegūta yūhu pehe cahacjāno yero saha mūsa yedohogū ahtau.

²⁸ Mūsa yūhure tiquina ñano yepegūta mūsa pehe yūhure duhuerare. ²⁹ Sa yegū yūhu Pacū yūhure tiquiro pūhtoro sōriro sahata mūsa gūhure pūhtoa sōgūtja yūhu. ³⁰ Yūhu pūhto yūhu ijigū yūhu ihyari mesapū mūsa gūhu ihya, sihninata. Sa yena mūsa pūhtoa dujiyere dujinata. Mūsa topū dujina Israe masare doce curūri cjēnare besenata mūsa ñañequinare, quehnoañequinare, niahye Jesu tiquiro buheyequinare.

Pedro Jesure tiquiro cohātire yahuahye Jesu

(Mt 26.31-35; Mr 14.27-31; Jn 13.36-38)

³¹ Sa ni tuhasa Pedrore Jesu ohō saha ni yahuahye:

—Simo Pedro yūhure tūhoya. Mūsa ye ijipihtinare wafīno yūhure cohāgū ye duare. Trigo wese cjāno trigore tiquiro wejē site cohāriro sahata mūsa ye ijipihtinare wafīno ñano ye duare. Sa ye duaro, Cohācjüre sinidi. ³² Tiquiro sa sinigū ihñagū yūhu pehe Cohācjüre sini basau mūhure. Yūhure mūhu wacū tutua duhueratire sini basau mūhure. Sa yegū mūhu yūhu mehna cjū pari turi ijigū yeequinare yedohoya mūhu, yūhure tiquina wacū tutua nemoati, niahye Jesu Pedrore.

³³ Tiquiro sa nigū Pedro yūhtiahye:

—Pūhto, yūhure tiquina peresu yepegūta, yūhure tiquina wejē duepegūta mūhu mehna cjū ijiitja, niahye Pedro.

³⁴ Jesu yūhtiahye:

—Pedro, mūhure niita niaja. Mia ñami canaca tiquiro yahuato pano “Jesure masiedaja”, nigūta mūhu apequinare. Ihtia taha sa nigūta mūhu, niahye Jesu Pedrore.

Jesure tiquina ñano ye dūcato mehenogū dūhsahye

³⁵ Sa ni tuhasa Jesu tiquiro buheyequinare yahuahye:

—¿Sohō ijiri pje niñeru ajuro mariena, pajiri ajuro mariena, dahpo suhti mariena mūsa yūhu ohogū apee boro dūhsari mūsa? ni sinituahye Jesu.

—Ne usāre yabe dūhsaerari, ni yūhtiahye tiquina.

³⁶—Ti pjere mūsa dūhsaerapegūta yojopū pehere niñeru ajurore cūona tire neña. Pajiri ajurore cūona gūhu neña. Sa yena mūsa ñoseni pji mariedagū mūsa suhtire duana ti pjiñe dūya. ³⁷ Ahrire mūsa nī niaja. Cohācjū yere

tiquina ojoari p̄p̄u tiquina ni diro sahata ȳhure sa waharo cahmene. Ohō saha niahye ti p̄p̄u: “TiQUIRO dutiyere ȳhd̄ud̄ucayequina mehna c̄j̄no ijire”, nieta masa”, ni, ojoahye, niahye Jesu.

38—Ihñaña p̄h̄to. P̄u p̄j̄ ñoseñe p̄j̄nine c̄uoa ja us̄a, niahye tiQUIRO buheyequina.

—To punota ijire, ni ȳhtiahye Jesu.

*Getsemaní wame tiri wesepe
Jesu Coh̄c̄j̄re siniahye*

(Mt 26.36-46; Mr 14.32-42)

39 Sa ye Jesu tiQUIRO sa yeducuro sahata Olivo wame tid̄u c̄un̄p̄u wahahye. TiQUIRO sa wahaḡu tiQUIRO buheyequina tiQUIRO mehna wahahye. 40 Top̄u esaro tiQUIRO tiQUINARE yahuahye:

—Coh̄c̄j̄re siniña masa ñano yeratire, niahye Jesu tiQUINARE.

41 Sa ni tuhasa tiQUIRO dihita mehenoḡa waha nemo, d̄usepe curi mehna quehe sa, Coh̄c̄j̄re siniahye:

42—Mai, ȳh̄u ñano ȳhd̄uatiye ye dueraḡu yerac̄h̄ña. Ȳh̄u sa niepeḡuta ȳh̄u cahmeñe pehere yerac̄h̄ña. M̄h̄u pehe masine. M̄h̄u cahmeno saha yeya ȳh̄ure, ni siniahye Jesu Coh̄c̄j̄re.

43 TiQUIRO sa siniḡu ̄hm̄usep̄u ahtariQUIRO angel Jesure bajua, yedohoahye tiQUIRORE. 44 Sa yero Jesu ñano jeripohna ti, tutuaro mehna Coh̄c̄j̄re siniahye. Sa yero tiQUIRO asi ti cuhsaye dii p̄jeri yero saha tiQUIRORE wijia, yehpap̄u bora quehe sahye.

45 Coh̄c̄j̄re sini bato ti, wahc̄ad̄uca sa, tiQUIRO buheyequina cahap̄u wihiahye. TiQUIRO wihiḡu tiQUIRO buheyequina tutuaro b̄j̄ua witiyequina ijiye, carĩñe niahye. 46 Sa yero Jesu tiQUINARE ohō saha ni yahuahye:

—¿D̄ah̄sena car̄ij̄ari m̄usa? Wahc̄aña. Coh̄c̄j̄re siniña m̄usa,

“Ñano yeari”, nina, niahye Jesu tiQUINARE.

*Jesure ihña tuhtiyequina
tiQUIRORE peresu yeahye*

(Mt 26.47-56; Mr 14.43-50; Jn 18.2-11)

47 TiQUIRO sa ni yahuducuri watoa masa peyequina wihiahye. Juda doce buheyequina mehna c̄j̄no ijimediquiro masare ̄hm̄u t̄a c̄ahrtariQUIRO ijiahye. Sa yero tiQUIRO Jesu cahap̄u wihi, wahsupu ihmiahye tiQUIRORE. 48 TiQUIRO sa ihmiḡu Jesu tiQUIRORE sinituahye:

—¿Juda, ȳh̄u mas̄ure Coh̄c̄j̄u ohorigure ȳh̄ure ihña tuhtiyequinare ih̄oḡu ȳh̄ure wahsupu ihm̄iñe mehna sa yeajari m̄h̄u? niahye Jesu.

49 TiQUIRO sa nidi bato Jesu buheyequina masa Jesure tiquina ñeheatire masiñe, tiQUIRORE sinituahye:

—¿P̄h̄to, us̄a ñoseñe p̄j̄ni mehna tiquina mehna cahmequema? niahye tiquina.

50 TiQUINA sa nidi bato ihc̄aQUIRO Jesu buheyequina mehna c̄j̄no pehe pahia p̄h̄to cahac̄j̄n̄ore tiQUIRO ñoseni p̄j̄i mehna tiQUIRO cahmonore poto pehe ijiri cahmonore d̄ate pahr̄e c̄ahye. 51 TiQUIRO sa yeḡu ihñano Jesu tiQUIRORE ohō saha niahye:

—Sa yerac̄h̄ña, niahye.

Ni, cahac̄j̄no cahmono ijirirop̄u ña ohōahye. TiQUIRO ña ohōḡuta cahmono m̄unano sahata iji-ahye tja. 52 Sa ye tuhasa pahia p̄h̄toare Coh̄c̄j̄u w̄h̄u c̄j̄na surara p̄h̄toare, b̄uc̄na ḡah̄ure tiQUIRORE ñeheñe ahtariQUINARE Jesu sinituahye:

—¿D̄ah̄se ijiro boro m̄usa ñoseñe p̄j̄ni, yuca tīari mehna yaqueriQUIRORE tiquina yeriro saha m̄usa ȳh̄ure ñehena ahtajari? 53 Decoripe Coh̄c̄j̄u w̄h̄p̄u m̄usa mehna ȳh̄u ijiḡu, m̄usa ȳh̄ure ñehedari. Sa ijiepeḡuta yojopure

musa ya deco yuhure musa ñano yeati deco ijire. Yojopu watino tiquiro ñano yeati deco gũhu ijire, niahye Jesu.

—*Tiquirore masiedaja, niahye Pedro Jesure*

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tiquina Jesure ñeche tuhasa pahia puhtoro ya wuhapu neahye tiquina tiquirore. Tiquina topu neagũ Pedro yoaropu tiquinare ihña nunu tãhye. ⁵⁵ Puhtoro ya wuhapu esa, topu wuhu cahapu ijiri paapu, quehnoari paa decopu peca wijiãhye apequina. Tiquina wijiãgũ ihñano Pedro peca cahapu dujiyequina mehna dujiahye. ⁵⁶ Tiquiro dujiri bato ihcãcoro cahacjõno tiquirore quehnoano ihña, apequinare ohõ saha ni yahuahye:

—Ahriquiro gũhu tiquiro mehna ijiri, niahye ticoro.

⁵⁷ Ticoro sa nigũ tãhoro Pedro yuhtiahye:

—Numio, tiquirore ne masiedaja yuhu, nimahye tiquiro.

⁵⁸ Came cjũnogã apequiro Pedroro ihña, ohõ saha ni yahuahye:

—Muhu gũhu tiquina mehna cjũ ijire, niahye tiquiro.

—Ne ijieraja, nimahye Pedro.

⁵⁹ Ihcã hora bato apequiro apequinare ohõ saha ni yahuahye:

—Ijirota ijire. Ahriquiro Galilea cjãno ijire. Sa yero potota Jesu mehna ijiri ahriquiro gũhu, niahye tiquiro apequinare.

⁶⁰ Tiquiro sa nigũ Pedro yuhtiahye:

—Ne, muhu nidiquirore masiedaja yuhu, ni yuhtiahye Pedro.

Tiquiro sa ni yahuducuri watoa canaca yahuahye. ⁶¹ Tiquiro yahugũta Jesu wuhu cahapu ijiriquiro Pedroro majare ihñadoqueohaye. Tiquiro sa yegũ Pedro pehe Jesu tiquiro nidire

wacũahye. “Mia ñami canaca tiquiro yahuato pano, ‘Yuhu Jesure masiedaja’, niguta muhu. Ihtia taha sa niguta muhu”, Jesu tiquiro nidire wacũahye Pedro. ⁶² Sa wacũno Pedro topu wijia ta, tutuaro utiahye.

Jesure bujape, quẽahye tiquina

(Mt 26.67-68; Mr 14.65)

⁶³ Sa ye Jesure cohteyequina surara tiquirore bujape, quẽpeahye.

⁶⁴ Sa quẽpeye, tiquiro caperire dahnte cahmota, tiquirore sinituahye:

—¿Diquiro muhare quẽari? Ihñedapeguta yahuya usãre, ni sinitupeahye tiquina.

⁶⁵ Sa ye peye ñano ni yahuducuahye tiquina tiquirore.

Jesure puhtoa sinituahye

(Mt 26.59-66; Mr 14.55-64; Jn 18.19-24)

⁶⁶ Bohrearopu judio masa bucuna, pahia puhtoa, judio masare buheyequina gũhu cahme-coahye. Tiquina sa cahmecoanopu apequina tiquina cahapu Jesure ne cãhtahye.

⁶⁷ —Yahuya usãre. ¿Cristota ijijari muhu? ni sinituahye tiquina Jesure.

Tiquina sa nigũ Jesu yuhtiahye:

—Musare yuhu yahugũ, yuhure tuhosi musa. ⁶⁸ Musare yuhu sinitugũ yuhure yuhtisi musa. Sa yena yuhure wiosi musa. ⁶⁹ Musa wio-erapegũta came cjũnogã ijipihtiyede cori yuhu masu Cohãcjũ ohorigu Cohãcjũ tutuariquiro tiquiro potopeheru dujigatja, niahye Jesu.

⁷⁰ Tiquiro sa nigũ tiquina ijipihtiyequina sinituahye tja pari turi:

—¿Sa nigũ Cohãcjũ macuta ijijari muhu? niahye tiquina.

—Musa nino sahata ijijaja, ni yuhtiahye Jesu tiquinare.

⁷¹ Tiquiro sa nigũ tiquina ohõ saha ni yahuducuahye tiquina basi:

—Ahriquiuro Cohãcjüre pajiro tiquiro ñano yahuducugũ mari basi tãhou. Sa ye topequinata yahusãahdo ahriquiore, niahye tiquina basi.

23

Pilato Jesure sinituahye

(Mt 27.1-2, 11-14; Mr 15.1-5; Jn 18.28-38)

¹ Sa ni tuhasa tiquina ijipihitiyequina wahcãdũca, Jesure Pilato cahapũ neahye. ² Ne esa, Jesure yahusã dũcahaye:

—Ahriquiuro mari ya yehpa cjãnare tiquiro ñano ye dutigũ usã tãhou. Mari pãhtore ahriquiuro wapa ye dutiare. Sa yero tiquiro “Pãhto ijiaja. Cristo masare yãhdũoacjũ ijiaja yũhũ”, ni yahuducure tiquiro basi, ni yahusãhaye tiquina Jesure.

³ Tiquina sa ni yahusãri bato Pilato Jesure sinituahye:

—¿Judio masa pãhtota ijiajari mũhũ? niahye tiquiro Jesure.

—Mũhũ nino sahata ijiaja, ni yũhtiahye Jesu.

⁴ Tiquiro sa nigũ Pilato pahia pãhtoare, masa gãhũre yahuahye:

—Ahriquiuro buhiri mariedare, niahye tiquiro.

⁵ Tiquiro sa niepegũta tiquina tutuaro yahusã nemoahye:

—Tiquiro buheye mehna masare cahmequegũ yere. Galilea yehpapũ tiquiro tire ye dũcari. Sa ye dũca tuhasa ijipihitiro Judea yehpapũ tire tiquiro yere. Sa yero yojopũ ohõpũ gãhũre tire yero taro nine, ni, yahusãhaye tiquina.

Herode Jesure sinituahye

⁶ Tiquina sa ni yahusãgũ tãhoro Pilato pehe sinituahye:

—¿Ahriquiuro Galilea cjãno ijiajari? niahye tiquiro.

⁷ —To cjãnota ijire, ni yũhtiahye apequina.

Tiquina sa ni yũhtigũ tãhoro Pilato pehe Jesu tiquiro ijiri

yehpare masino pãhtoro Herode ya yehpa cjãno Jesu tiquiro ijigũ masiahye. Tire masino Jesure Herode cahapũ ohoahye. Ti pjere Herode Jerusalẽpũ ijiahye.

⁸ To pano Herode Jesure tãho tuhasahye. Tiquiro sa tãhori bato yoari bato tiquirore ihña duahye. Jesu Cohãcjũ tutuaye mehna tiquiro ye ihñogũ ihña duamahye tiquiro. Sa yero tiquiro Jesure ihñano, bucueahye.

⁹ Sa yero peye tahari sinituahye Jesure. Tiquiro sa sinituepegũta Jesu ne yũhtierahye tiquirore. ¹⁰ Pahia pãhtoa, judio masare buheyequina gãhũ Herode cahapũ esa, tutuaro Jesure yahusãhaye.

¹¹ Tiquina yahusãri bato, Herode tiquiro yequina surara mehna bũjũpe, Jesure ñano yeahye. Sa bũjũpeye, quehnoari suhtirore pãhtoro tiquiro sañari suhtiro yero saha bajuri suhtirore sãahye tiquina Jesure. Sa bũjũpe tuhasa, tiquirore Pilato cahapũ ohoahye tja.

¹² Ti decore Herode, Pilato mehna quehnoano tiquina basi cahme yeyequina iji dũcahaye. To panore tiquina basi cahme ihña tuhtiequina ijinimahye.

Masa Jesure wejẽ dutiahye

(Mt 27.15-26; Mr 15.6-15; Jn 18.39-19.16)

¹³ Sa ye Pilato pahia pãhtoare, apequina pãhtoare, masa gãhũre tiquiro pijogũ, cahmecoahye.

¹⁴ Tiquina cahmecoa pihtigũ ihñano ohõ saha niahye Pilato tiquinare:

—Ahriquiore yũhũre ne cãhtana, “Tiquiro masare ñano ye dutiri”, nĩmedi mũsa yũhũre. Yojopũ mũsa ihñonopũ ahriquiore quehnoano sinitu pehou tja. Yũhũ sa sinituri bato mũsa tiquirore sa yahusãducugũ tiquirore ñãñe buhiri ne mariedare, yũhũ ihñagũ. ¹⁵ Herode gãhũ tiquirore “Ne, ñãñe buhiri mariedare”, nidi.

Sa nino ahriquirore pari turi usāre oho majare tojore tja. Sa yena ahriquirore tiqirore ñañe buhiri mariedagū tiqirore mūsa wejē duti masiedare. ¹⁶ Sa yegū tiqirore yuta dari mehna tana dutiitja yūhū. Sa tiquina tanari bato tiqirore wioutja, nimahye Pilato masare.

[¹⁷ Cūhmaripe pascua bose decorire masa yaquiro ijia-tiqirore ihcāquiro peresupū ijiriquirore Pilato wio basaducue tiahye.] ¹⁸ Sa ye Pilato “Jesure wioutja”, tiqirore nigū tūhoye ijipihtiyequina masa ohō saha ni sañuducuahye:

—Tiqirore Jesure wejēña. Barrabá pehere usāre wio basaya, ni sañuducuahye masa.

¹⁹ To pano Barrabá pehere Jerusalēpū pūhtoare tiqirore cohā dutiri buhiri, masare tiqirore cahmeque dutiri buhiri, tiqirore wejēdi buhiri, peresuyeahye tiqirore. Sa ye camepūre tiqirore masa wio dutiye niahye. ²⁰ Pilato Jesu pehere wio duamahye. Sa yero tiqirore masare sinituahye tja. ²¹ Tiqirore sa wio duepegūta tiquina tiqirore niahye tja:

—Curusapū quē biha wejēña tiqirore. Wejēña tiqirore, ni sañuducuahye tiquina.

²² Tiquina sa nigū Pilato ihtia taha waro ohō saha nimahye tiquinare:

—¿Yabere ñano yeri tiqirore mūsa sa ni sañuducugū? Ne tiqirore ñañe buhiri mariedare. Sa yegū tiqirore wejē duti masiedaja. Tiqirore yuta dari mehna tana dutiitja. To punota ye dutiitja. Sa yegū wioutja tiqirore, nimahye Pilato.

²³ Tiqirore sa niepegūta tiquina tutuaro mehna sañuducu nemo, Jesure curusapū wejē dutiahye. Tiquina sa ni sañuducugū tūhoro tiquina cahmediro sahata Pilato yeahye. ²⁴ Sa yero tiquina sinidiro

sahata Pilato Jesure wejē dutiahye. ²⁵ Sa dutiro tiqirore peresupū ijiriquirore masare cahmequegū yeriquirore, masare wejēdiqirore masa tiquina sinidiro sahata Pilato Barrabá pehere wioahye. Sa yero Pilato Jesure curusapū wejē dutiahye.

Tiquina Jesure curusapū quē biha wejēahye

(Mt 27.32-44; Mr 15.21-32; Jn 19.17-27)

²⁶ Sa ye tiquina Jesure wejēñe wahaye, neahye. Ti pje tiquina sa yeri watoa Simo wame tiriqirore Cirene cjāno ihquē wāhūse ijiropū esariqirore tojoa taro niahye. Jerusalēpū tiqirore wihigū ihñañe Jesure neañequina tiqirore piti ca, ñehe, curusare tiqirore wūa cā dutiahye Jesu bato pehe.

²⁷ Sa ye masa peyequina Jesure ihña nūnū tāhye. Sa ye masa watoa ijiyequina numia tiqirore tiquina sa yegū ihñañe tutuaro utiahye. ²⁸ Tiquina utigū tūhoro, tiquina numiare Jesu majare ihña, ohō saha niahye:

—Jerusalē cjāna numia, yūhūre utieracāhña. Mūsa ye ijiatire, mūsa pohna ye ijia ti gūhūre utiya. ²⁹ Apeye decori ijigū ña yūhdūaro yūhdūnata mūsa. Ti pjere masa ohō saha nieta. “Pohna mariena numia, pohna tien numia, apūoedari numia yojopū mari ijigū quehnoa yūhdūaboaga”, nieta numia. ³⁰ Ti pjere cūnūre ohō saha ni yahuducueta masa. “Mūhū cūnū usā buipū bora dijia taya. Usāre nūoña”, nieta masa cueye. ³¹ Masa yūhūre buhiri mariegūre ohō saha tiquina yegū, ñañe buhiri cūoyequina pehe ña yūhdūaro wahaeta, niahye Jesu.

³² Apequina pūaro dutiyere yūhdūdcayequina tiquina ijigū tiquina gūhūre Jesu mehna tiquina wejēatiquinare neahye tiquina. ³³ Tiquinare nea, “Dapu pehtoro”,

wame tiropu esa, curusapu Jesure quē biha ohōahye. Sa ye puaro yuhduducayequina gāhare apequirore tiquiro potō pehe, apequirore tiquiro cū pehe pehe quē biha ohōahye. ³⁴ Tiquina sa yegū Jesu ohō saha niahye:

—Mai, ahriquina yuhare wejēatiquina yojopu tiquina ñano yerire boya tiquinare. Tiquina dūhse yerire masiedare tiquina. Sa yegū tiquina ñano yerire boya, niahye Jesu.

Sa ye Jesu suhtire cahme itiyē, tiquina doquepeahye. Tiquiro suhtire “¿Noa yaro ijirotari ohō?” ni cahme doquepeahye tiquina. ³⁵ Sa ye masa topu ducuyequina tiquina ihñaducuri watoa judio masa puhto Jesure bujupeahye:

—Tiquiro apequina masare yariaboriquinare yuhduoñohiti. Sa yero tiquiro Cristo Cohācjū beseriquiro ijiro, yojopu yariaboriquiro ijiro, tiquiro basi yuhduoahro, ni, bujupeahye tiquina.

³⁶ Surara gūhu tiquirore bujupeahye. Jesu cahapu esa, tiquina tiquirore ñañe co vinore ohomahye. ³⁷ Tire yeye ohō saha niahye tiquina:

—Mahu judio masa tiquina puhto ijigū mahu basi yuhduya. Sa yegū yuhdu witiguta mahu, ni, bujupeahye tiquina.

³⁸ Sa ye tiquiro bui ohō saha ni ojoa ohōahye. “AHRIQUIRO JUDIO MASA PUHTORO IJIRE”, ni, ojoa ohōahye.

³⁹ Apequiro tiquiro mehna tiquina quē biha ohōriquiro yuhduducariquiro pehe ñano yahuducuahye Jesure:

—¿Mahu Cristo masare yuhduoacjū ijierajari? Mahu basi, usā gāhare yedohoya, niahye tiquiro Jesure.

⁴⁰ Tiquiro sa nigū tuhoro apequiro yuhduducariquiro Jesu potō peheru tiquina quē biha ohōriquiro pehe tiquirore ohō saha niahye:

—Mari gāhare potō ijiye mehna buhiri dahrere tiquina. ¿Dūhsegū Cohācjūre ne ño peerajari mahu? ⁴¹ Marine ñañe buhiri ye, potō yeye nine tiquina. Ñañene mari yeri buhiri marine buhiri dahrere tiquina. Ahriquiro pehe ñañene yerare, niahye tiquiro apequiro yuhduducariquirore.

⁴² Sa nino, tiquiro Jesure ohō saha niahye:

—Jesu, mahu puhto ijigū tojoa tagū, yuhare wacūña, niahye tiquiro Jesure.

⁴³ —Muhare ahrire nii niaja. Miare paraíso wame tiropu mahu yuhu mehna ijiita, niahye Jesu tiquirore.

Jesu yariaa wahahye

(Mt 27.45-56; Mr 15.33-41; Jn 19.28-30; He 6.19-20; 10.19-20)

⁴⁴ Sa ye coheri pje ijigū asū asi duhuahye. Sa yero ijipihtiro ti dihtapare ihtia hora waro quehnoano nahitiahye. ⁴⁵ Nahitiari watoa, Cohācjū wahu cja suhtiro cahsero, tiquina tore cahmotari cahsero decopu ti cahsero ahmusepu tuhnu dūca, tuhnu yojoa saa wahahye. ⁴⁶ Sa yero Jesu tutuaro sañuducuahye:

—Mai, yuhu jeripohnare muhare wiaja mahu ihña ihboatire, ni, sañuducuahye Jesu.

Sa ni tuhasa yariaa wahahye.

⁴⁷ Tiquiro sa yariagū ihñano, surara puhtoro pehe “Cohācjū tutuariquiro ijire”, nino, “Ahriquiro Jesu manano potota quehnoariquiro ijimeya”, niahye surara puhtoro.

⁴⁸ Sa ye tiquina wejēgū ihñañe ahtariquina Jesu tiquiro yariagū ihñañe, tiquina ye wuhusepu tojoaa wahahye. Tojoaa waha, tiquina ñañe yerire bujua witiye mehna tiquina cutiro bui quē ohōahye.

⁴⁹ Ijipihtiyequina Jesu yequina tiquiro mehna cjeña Galileapu tiquiro mehna ahtariquina numia gūhu Jesure yoaropu ihñaducuahye.

Jesu pagure masa copepũ cũahye
(Mt 27.57-61; Mr 15.42-47; Jn 19.38-42)

⁵⁰⁻⁵¹ Ti pjere José wame tiriquireo topũ ijiahye. Judea yehpa cã maca Arimatea wame tiri maca cãno ijiahye. Sa yero tiquireo quehnoariquireo, poto yeriquiro ijero, Cohãcã pãhtoro iji ducatiere cohteriquiro ijiahye. Sa yero tiquireo judio masa pãhtoa mehna cãno ijieperota Jesure tiquina wejẽ dutigã cahmedamahye tiquireo. ⁵² Sa yero Pilato cahapũ esa, Jesu pagure siniahye. ⁵³ Sini tuhasa, Jesu pagure ne diji, quehnoari suhtiro mehna tiquireo pagure wahmeahye. Sa wahme tuhasa, masa copepũ utãpũ tiquina seheri copepũ cũahye tiquireo pagure. Ti copere ne apequina yariariquinare cũedarãahye. ⁵⁴ Ti deco saurũ deco ijiatire tiquina quehnoyuri deco ijiahye. Saurũ tiquina sori deco ijiasi mehenogã dahsahye.

⁵⁵ Sa ye Galileapũ Jesu mehna ahtariquina numia masa copepũ José mehna wahahye. Masa copepũ esa, ti copere ihña, Jesu pagure tiquina cãrire ihñahye. ⁵⁶ Came tiquina ye wãhũsepe tojoaa waha, ehme sitiye co, wisõñe mehna quehnoahye tiquina. Sa ye saurũ ijigũ Cohãcã dutiye Moiseri tiquireo cãri dutiye nino sahata tiquina soahye.

24

Jesu masa wijiahye

(Mt 28.1-10; Mr 16.1-8; Jn 20.1-10)

¹ Domingo ijigũ bohrearopũ tiquina numia ehme sitiye tiquina quehnoaire Jesu masa copepũ ne cãmahye. ² Ti copepũ esa, ti copere bihariare utãre tiquina põo duhu cãria utãre ihñahye. ³ Sa ihñañe tiquina ti copepũ sajãa wahahye. Jesu pagure bocaerahye tiquina.

⁴ Tiquiro pagure bocaera, “¿Dũhse wahayari?” ni tãhotuahye tiquina. Tiquina sa ni tãhotu yahuducuri watoa pãro umãa asi siteye suhti sañañequina tiquina cahapũ ducuahye. ⁵ Topũ tiquina ducugã ihña, numia cueye, dũsepe curi mehna quehe sahye. Sa ye umãa pehe tiquinare yahuahye:

—¿Dũhsena yariariquireo ijero Jesure macajari mãsa? Yojopeure tiquireo catiriquiro ijire. ⁶ Tiquiro ohõre mariedare. Masa wijia tuhasari. ¿Sohõ ijiri pjere tiquireo Galileapũ mãsa mehna ijero mãsare tiquireo nidire wacũajari mãsa? ⁷ “Yãhare Cohãcã ohorigure apequireo ohorota ñãñequinare. Tiquiro ohori bato yãhare curusapũ quẽ biha wejẽeta tiquina. Sa yegũ yãhũ yariari bato ihtia deco wahaboro masa wijiagetja yãhũ”, nidi mãsare. ¿Tiquiro sa nidire wacũajari mãsa? niahye umãa pehe.

⁸ Tiquina sa nigũ tãhoye, numia pehe tiquireo nidire wacũahye. ⁹ Tiquina sa nidi bato tiquina tojoaa waha, once buheyequinare apequina gãhũre tire yahu pehoahye. ¹⁰ Tiquina numia pehe María Magdalena, Juana, María Santiago pacoro ijiahye. Tiquina numia apequina numia gãhũ ijiahye Jesu buheyequinare yahuri numia. ¹¹ Tiquina sa ni yahuepegũta Jesu buheyequina pehe “Poto niñe niedaga. Ni mehoñe niaga ahriquina numia”, ni tãhotumahye. Sa ye tiquina numiare tãho duerahye.

¹² Tiquina sa nigũ tãhoro, Pedro pehe masa copepũ oma cã, ihñano wahahye. Ti copepũ esa, tiquireo muhri ihña sõahye. Jesure tiquina wahmedi suhtiro dihitare ihñahye. “¿Dũhse wahayari?” ni, tãhotu, tiquireo ya wãhũpũ tojoaa wahahye.

Emau wame tiri maca cĵa mahapũ Jesu bajuahye
(Mr 16.12-13)

13 Ti decota pũaro Jesu buheye-quina mehna cĵena Emau wame tiri macapũ wahaye niahye. Jerusalē once kilómetro yoaro ijire Emaupũ esato. 14 Emaupũ waha, ijipihtiye Jerusalēpũ ti pjere Jesu tiqũiro sa waharire tiqũirore tiquina ñano yerire yahuducu cãne niahye. 15 Tiquina sa ni yahuducuri watoa Jesu pehe tiquina cahapũ esa, tiquina mehna wahahye. 16 Sa ye tiqũirore ihñaepeta tiquina tiqũirore ihña masiedahye.

17 —¿Dũhse ni yahuducu cãna najari mũsa? ni, sinituahye Jesu.

Tiqũiro sa nigũ tiquina bujũa witiyequina esadũcahye.

18 Cleofa wame tiriqũiro pehe Jesure yũhtiahye:

—¿Yojopũre Jerusalēpũ tiquina yerire mahũ dihita masiedajari? ni sinituahye tiqũiro.

19 —¿Dũhse wahari Jerusalēpũre? niahye Jesu.

Tiqũiro sa nigũ Cleofa yũhtiahye:

—Jesure Nazare cĵanore tiquina yerire nina niaja. Tiqũiro Cohãcĵũ yere yahu mũhtariqũiro ijimedi. Sa ye tiqũiro yahuducurire tũhoye, tiqũiro yeri gũhare ihñañe, “Tutuariqũiro ijire”, ni, tũhotumedi masa. Cohãcĵũ gũhũ sata ni tũhotuaga. 20 Mari pahia pũhtoa, apequina pũhtoa mehna tiqũirore wejē dutiye, apequinare ohori. Tiquina sa ohogũ apequina pehe tiqũirore curusapũ quē biha wejēdi. 21 “Roma cĵenare cohãtiqũiro Israe masa pũhthora ijiatiqũiro ijire”, ni, tũhotumi usã tiqũirore. Mia mehna ihtia deco wahare tiqũiro yariari bato.

22 Meheñequinagã numia usã mehna cĵena numia usãre acũagũ yerĩ. Bohrearopũ Jesu tiqũiro masa copepũ tiquina numia esa,

23 tiqũiro pagũre bocaerañohiti. Tiqũiro pagũre bocaeraye, tiquina tojoa wihi yahuri. “Usãre angele bajuari. Jesu catiñohiti”, ni yahuri usãre numia pehe. 24 Tiquina sa nigũ apequina usã mehna cĵena ti copepũ esa, numia tiquina nidiro sahata ihñañohiti. Tiquina gũhũ Jesure ihñedañohiti, niahye tiqũiro Jesure.

25 Tiqũiro sa nidi bato Jesu yahuahye tiquinare:

—Mũsa ne tũho masiedare. ¿Cohãcĵũ yere yahu mũhtariquina mũna tiquina nidire quehnoano tũhoerari mũsa? 26 Cristore tiqũiro pũhthora ijato pano ahmũsepepũ tiqũiro mũjato pano tiqũirore ñano yũhdũro cahmedi. ¿Tire masiedajari mũsa? niahye Jesu tiquinare.

27 Sa nino Cohãcĵũ Cristore tiqũiro ni yahu tiquina ojoarire Jesu yahu peho cãhye tiquinare. Moise mũnano tiqũiro ojoarire Jesu yahu dũcahye. Sa yero ijipihtiyequina Cohãcĵũ yere yahu mũhtariquina Cristore tiquina ojoari gũhare yahu peho cãhye tiqũiro.

28 Tiquina wahari macapũ tiquina esaye taye yegũ, Jesu pehe tiquinare yũhdũ cãa wahamahye. 29 Tiqũiro sa yepegũta tiquina tiqũirore waha dutierahye:

—Usã mehna tojoaya. Ñamicahapũ ijire. Nahinopũ nine, niahye tiquina tiqũirore.

Sa yero Jesu tiquina mehna wũhũpũ sajãa wahahye. 30 Wũhũpũ sajã sa, tiqũiro tiquina mehna ihyari mesapũ nuju sa, pãre ne, Cohãcĵũre “Quehnoare”, niahye. Sa nino ti pãre nuha ne, tiquinare ohoahye. 31 Tiqũiro sa yegũ ihñañe tiquina Jesure ihña masiahye. Tiquina ihña masi dũcagũta tiqũiro buti maa wahahye. 32 Tiqũiro sa buti maa wahagũ ihñañe tiquina basi ohõ saha ni yahuducuahye:

—Mahapɯ tiqiro marine tiqiro yahuducuri watoa Cohăcĵũ tiqiro ojoarire tiqiro yahuri watoa mari jeripohnari mehna quehnoano bucueye mehna tãhotuu mari, niahye tiquina basi.

³³ Sa ni tuhasa tiquina duita Jerusalẽpɯ majare tojoaa wahahye tja. Topɯ esa, once buheyequinare apequina mehna cahme-coaŋequinare bocahye. ³⁴ Tiquina esagũ, once buheyequina ohõ saha niahye:

—Potota mari pãthoro masa wijiañohti. Simo Pedro tiqirore ihñañohti, niahye once buheyequina.

³⁵ Tiquina sa nigũ pãaro Emau cĵena mahapɯ Jesure tiquina ihñarire yahuahye:

—Jesu pãre tiqiro nuhagũ usã ihña masii tiqirore, ni, yahu pehoahye tiquina apequinare.

Jesu tiqiro buheyequinare bajuahye

(Mt 28.16-20; Mr 16.14-18; Jn 20.19-23)

³⁶ Tiquina sa ni yahuri watoa tiquina cahapɯ iji tuhasahye Jesu pehe.

—¿Ijiajari mɯsa? niahye tiqiro tiquinare.

³⁷ Tiquiro sa nigũ tãhoye tiquina “Mari yariariqiro mɯnanore ihñana niaja”, ni tãhotuye, tutuaro cueahye. ³⁸ Tiquina sa cuegũ ihñano tiqiro tiquinare yahuahye:

—¿Dũhsena cueajari mɯsa? ¿Dũhsena “Ahri poto ijierare”, niajari mɯsa? ³⁹ Yũhũ omocarine, yũhũ dahpocãri gũhũre ihñaña. Mɯsa yũhũre ihñana, ihña masinata. Yũhũre ñehe tuhuya. Ñehe tuhuna masinata mɯsa. Yariariqiro mɯnanopɯ pagɯ mariedare. Yũhũ pehe pagɯ tiaja, niahye Jesu.

⁴⁰ Sa nino tiqiro omocari gũhũre, tiqiro dahpocãri gũhũre ihñoahye tiquinare. ⁴¹ Tiquiro

sa ihñoepẽgũta tiquina tutuaro bucue, ihña maria waha, “Ahri poto ijieraga”, ni tãhoturiãhye. Tiquina sa tãhotugũ masino Jesu tiquinare sinituahye:

—¿Ohõpɯ ihyaye ijiajari? niahye tiqiro.

⁴² Tiquiro sa nigũ tãhoye wahi dohariqirore ohoahye tiqirore.

⁴³ Tire ne, tiquina ihñonopɯ Jesu ihyahye. ⁴⁴ Ihya tuhasa, Jesu yahuahye tiquinare:

—Sohõ ijiri pje mɯsa mehna ijigɯ mɯsare yũhũ yahuriro sahata yojopɯ yũhũ sa waha. Cohăcĵũ dutiye Moise marine tiqiro cũri tiqiro sa ni ojoariro sahata yũhũre sa wahari. Cohăcĵũ yere yahu mãhtariquina, Salmo ojoari pũre ojoayequina gũhũ panopɯ yũhũre tiquina ni yahuriro sahata yojopũre yũhũre sa wahari. Sa wahacĵata ijii yũhũ, niahye Jesu.

⁴⁵ Sa ni tuhasa Cohăcĵũ yere tiquina yahu ojoarire tiqiro buheyequinare masigũ yeahye Jesu:

⁴⁶ —Cohăcĵũ yere tiquina ojoari ohõ saha nine: “Cristore ñano yũhdũro cahmene. Sa yero ihtia deco wahaboro tiqiro yariari bato tiqiro masa wijiarota.

⁴⁷ Tiquiro masa wijiaro bato ijipihitiye yehparipɯ tiqiro yequina Cristo yere yahueta. Masa tiquina ñañene tiquina bujua witiatiye, quehnoañene tiquina comesatiye Cohăcĵũ tiquina ñañene tiqiro cohãtire yahueta tiqiro yequina. Sa yahuye taye, Jerusalẽpɯ yahu dũcaeta”, niahye Cohăcĵũ yere tiquina ojoari pũpɯ, niahye Jesu.

⁴⁸ Sa ni tuhasa ohõ saha ni yahu nemoahye:

—Mɯsa pehe ahri ijipihitiye ihñarina ijire. Sa yena apequinare yahunata. ⁴⁹ “Espĩritu Santore mɯsare ohoutja”, Cohăcĵũ tiqiro nidiquirore yũhũ pehe mɯsare ohoutja. Tiquiro ahmũse cĵẽ tutuayere ohoatiquiro ijire. Sa

yena Jerusalēpᵐ tiquiro wihiatire
cohteya mᵐsa, niahye Jesu tiquiro
buheyequinare.

*Jesu ᵐhmᵐsepᵐ mᵐjaa wahahye
(Mr 16.19-20)*

⁵⁰ Sa ni tuhasa Jesu tiquinare
Jerusalēpᵐ ijiyequinare Beta-
nia caḥapᵐ neahye. Topᵐ
esa, Jesu tiquiro omocarine ne
mᵐo, “Quehnoano ijiya”, niahye
tiquinare. ⁵¹ Sa ni tuhasa,
tiquinare cū, ᵐhmᵐsepᵐ mᵐjaa
wahahye. ⁵² Tiquiro mᵐjari
bato tiquina tiquirore ño peo,
Jerusalēpᵐ tutuaro bucueye
mehna tojoaa wahahye. ⁵³ Topᵐ
iji, decoripe tiquina Cohācjū
wᵐḥpᵐ Cohācjū mehna yahuducu,
“Quehnoare”, ni ño peohye
tiquina tiquirore. To punota ijire.

San Juan

Cohācjū ye yahuducuyere yahuriquiuro masano iji dūcahye

¹ Duitaputa ahri yehpa to ijiato panoputa Cohācjū ye yahuducuyere yahuriquiuro Cristo masare yūhdūoatiquiuro duita iji tuhasae tiahye. Tiquiro Cohācjū mehna ijiahye. Sa yero tiquiro Cohācjūta iji cāhno niahye. ² Duitaputa coā waropure Cristo Cohācjū mehna ijiahye. ³ Sa yero coā waropure ne mariedarire bajumehneahye. Ahri yehpare, ūhmāsere, ijipihiyere, masa gūhare bajumehne dutiahye Cohācjū tiquirore. Sa yero ahrire bajumehne pehoahye tiquiro. Ahrire vojopure mari ihñañene, mari ihñedari gūhare tiquiro bajumehnedagū ne mariedaboya. ⁴ Cristo catiyere ohoriquiro ijiro nine. Buhrioro marine to quehnoano ihña masigū yero saha mari Pacure quehnoano masigū yere. Sa yero mari Pacure masigū yere masare. ⁵ Ahri yehpa cjēna ñañene wacū, tiquina tutuaro cahmeñe nahitiano yero saha ijiye nine. Buhrioro quehnoano marine to ihña masigū yero saha Cohācjū ye yahuducuyere yahuriquiuro masare masigū yere. Sa yero nahitiano buhrioro to yūhdūdūcaero sahata Cristore ne ñañe yūhdūdūcaerare.

⁶⁻⁷ Cohācjū Ñu wame tiriquiuro pehere ohoahye, Cristo buhrioro yero saha ijiriquirore masare yahu māhta dutiro. Tiquiro ohogū Ñu pehe masare yahuro ahtari tiquiro yahuriquiurore Cristore ijipihiyequina tiquina wacū tutuati. ⁸ Ñu pehe Cristo ijierari. Sa ijieraro tiquiro Cristo pehere masare yahu māhtano ahtari. ⁹ Cristo buhrioro yero saha ijiriquiro ijipihiyequina masare

Cohācjūre masigū yeatiquiuro pehe ahri yehpapū ahtari jiri. Ijirota ijire ahri. Tiquiro buhrioro yero saha ijiriquiro warota ijire.

¹⁰ Sa yero Cristo ahri yehpapū ijiri jimedi. Ahri yehpare bajumehnediquiro ijiahye. Tiquiro sa ijiepegūta tiquiro ya yehpa cjēna tiquirore ne masiedari. ¹¹ Tiquiro ya yehpapū masa bajuari jimedi. Tiquiro ya yehpapū tiquiro masa bajuariquiuro ijiepegūta tiquiro ya yehpa cjēna pehe ne tiquirore cahmedari jiri. ¹² Tiquina sa cahmedapegūta apequina pehere ijipihiyequina tiquirore cahmeñequina pehere tiquinare Cohācjū tiquiro pohne ijigū yeri jiri. Tiquirore wacū tutuayequina pūrita potota tiquiro pohne warota ijire. ¹³ Tiquina Cohācjū pohmeta ijiye nine. Sa ye masa tiquina masa bajuariro saha ijierare, Cohācjū pohne tiquina wahagū.

¹⁴ Sa yero Cristo masano tiquiro iji dūcari bato mari mehnata ijire tiquiro. Tiquiro sa ijigū ihñana masare cahñiquiro, potota yahuriquiuro tiquiro ijigū usā masii. Tiquiro dihita Cohācjū macano ijiro tutuariquiuro quehnoariquiuro ijiri. Tiquiro sa ijiriquiro ijigū usā masii. ¹⁵ Ñu Cristore yahu māhtano ohō saha ni sañuducuri masare yahuro:

—Siquiro ahtare yūhū ohō saha ni yahuriquiuro: “Tiquiro yūhū bato ahtariquiuro ijire. Sa ijieperota tiquiro yūhū yūhdūoro tutuariquiuro ijire. Tiquiro yūhū masa bajuato panopū iji tuhasahye. Sa yero tiquiro yūhū yūhdūoro tutuariquiuro ijire”, māsare yūhū ni yahuriquiuro ahriquiurota ijire, nidi Ñu Jesure masare yahuro.

¹⁶ Tiquiro Cristo pehe quehnoano tutuaro masare cahñiquiro ijiro marine ijipihitinare quehnoano yeducuri. ¹⁷ Cohācjū dutiyere

Moise pehe cū mæhtahye marine. Jesucristo pehe Cohãcjū masare tiquiro cahĩñene buhero ahtari. Cohãcjū tiquiro potota yahuducuye gũhare buhero ahtari.¹⁸ Masa ne Cohãcjüre ihñedare. Tiquirore mari ihñedapegũta tiquiro macano ihcãquirola ijiriquiro tiquiro Pacuro mehna sa ijiducure. Sa yero tiquiro Pacurore marine masigũ yeri.

Apequina Ñu wame yeriquirore sinituahye

(Mt 3.3, 11-12; Mr 1.2-3, 7-8; Lc 3.4-6, 15-17)

¹⁹ Ûsã acaye judio masa pũtoa Jerusalẽpũ ijieyquinare pahiare, Cohãcjū wũhpũ dahrayequina gũhare Ñu cahapũ ohori jiri. “¿Noa boro ijiajari mũhũ?” ni sinitu dutiye ohori jiri tiquinare. Tiquina sa sinitugã ohõ saha ni yahuri Ñu pehe.²⁰ Yeero boro marieno yahuri. Potota yahuri:

—Yũhũ Cristo Cohãcjū masare yũhdũo dutiro tiquiro ohorigũ ijieraja, nidi tiquiro.

²¹ Tiquiro sa nigũ tiquina pehe tiquirore pari turi sinituri tja:

—¿Mũhũ Cristo ijieragũ Elia pehe ijiajari mũhũ? nidi tiquina.

—Ijieraja yũhũ, nidi tiquiro.

—¿Ûsã cohterigũ Cohãcjū yere yahu mæhtacjũ pehe ijiajari mũhũ? nidi tiquina.

—Tiquiro ijieraja yũhũ, nidi Ñu pehe.

²² Tiquiro sa nigũ tiquina tiquirore pari turi sinituri tja:

—Ûsãre sinitu dutiriquinare usã yahuro quehnoano poto usãre yahu madoqueohya. ¿Noa boro pehe ijiajari mũhũ? ¿Mũhũ basita dũhse ijigũ ijiajari mũhũ? “Sa ijigũ ijiaja yũhũ”, ni yahuya usãre, nidi tiquina Ñure.

²³ Tiquina sa nigũ ohõ saha ni yũhtiri tiquiro:

—Masa marienopũ ohõ saha ni sañuducugũ ijiaja yũhũ, Cohãcjū

yere yahu mæhtariquiro Isaia mũnano tiquiro ni yahuriro sahata: “Mari pũhtoro tiquiro ahtaro pano mahare mari quehnoyuro saha quehnoana ijiyuya mũsa”, ni masare yahu sañuducugũ ijiaja yũhũ, nidi Ñu tiquinare.

²⁴ Ñure sinituyequina fariseo masa tiquina ohoriquina ijiri.²⁵ Sa ye tiquina Ñure sinituri tja:

—¿Mũhũ Cristo, Elia, Cohãcjū yere yahu mæhtagũ usã cohterigũ ijierapegũta dũhsegũ masare wame yeajari mũhũ? nidi tiquina.

²⁶ Tiquina sa nigũ tũhoro yũhtiri tiquiro:

—Yũhũ aco mehna masare wame yeaja. Apequiro pehe mũsa masieniquiro pehe mũsa watoa iji tuhasare.²⁷ Tiquiro pehe yũhũ bato ahtariquiro yũhũ yũhdũoro tutuariquiro ijire. Quehnoa yũhdũariquiro ijire. Tiquiro yero saha ijieraja yũhũ pehe. Sa yegũ tiquirore tũhotugũ, “Ihyo ijigũ ijiaja yũhũ”, ni tũhotuaja yũhũ, nidi Ñu tiquinare.

²⁸ Sa ni yahuducuri tiquina, Betaniapũ Jordã wame tiri ma ape sie pahrẽpũ, Ñu masare tiquiro wame yerirorpũ.

Jesu Cohãcjū ohoriquiro tiquiro yaquiro cordero yero saha ijiriquiro ijire

²⁹ Ape decopũ Jesu Ñu cahagã cjũno tiquiro ahtagũ Ñu tiquirore ihñano ohõ saha nidi:

—Ihñaña. Ahriquiro Cohãcjū ohoriquiro tiquiro yaquiro cordero yero saha ijiriquiro ijire. Corderore mari wejẽdiro sahata masa ahriquiro gũhare wejẽeta. Sa yariaro ahri yehpa cjẽnare tiquina ñaño yerire cohãnota tiquiro.³⁰ Ahriquirola ijire yũhũ ohõ saha nidiquiro: “Yũhũ bato ahtariquiro yũhũ yũhdũoro tutuariquiro ijire. Yũhũ masa bajuato pano tiquiro iji tuhasahye. Sa yero tiquiro

yuhū yuhduoro tutuare”, yuhū nidiquiro ahriquirola ijire. ³¹ Yuhū pehe ahriquirola masiedahti. Sa masiedapeguta aco mehna wame yei ahtau nii yuhū acaye Israe masa ahriquirola tiquina masiatore, nidi Ñu.

³² Sa ni tuhasa Ñu yahu nemori:

—Espíritu Santo uhmasepu bujua yero saha Cristo bui dijia ta, tiquiro bui wihiducagū ihñau. ³³ Cohācjū yuhure tiquiro yahueragū tiquirola ne masiedaboaga yuhū. Tiquiro yuhure masare aco mehna wame ye dutiro ohoriquirola Cohācjū pehe ohō saha ni yahu mahta tuhasari yuhure: “Espíritu Santo dijia ta tiquiro bui wihiducanohriquirola tiquirola ijirola. Tiquiro pehe Espiritu Santore masa mehna iiducugū yerota”, nidi Cohācjū yuhure.

³⁴ Yojopu pūritare tiquirola ihña tuhasa yuhū. Sa ihñagu “Potota Cohācjū macano ijire”, nii yuhū masare, ni yahuri Ñu usāre.

Jesu buheyequina tiquiro piji mahtariquina ijire

³⁵⁻³⁶ Ape decopu Ñu mehna usā puana tiquiro buhena usā ducugū, Jesu usā cahapu yuhdu cāno nidi. Tiquiro sa yuhdu cāgū Ñu tiquirola ihñano, pari turi ohō saha nidi usāre:

—Ihñaña. Ahriquirola Cohācjū yaquirola cordero yero saha ijiquirola ijire, nidi Ñu.

³⁷ Tiquiro sa nigū usā puana tiquiro buhena pehe tire tuhona Jesure nānu tāu. ³⁸ Usā sa nānu tāgū ihñano Jesu usāre majare ihña, sinituri:

—¿Yabere macana niajari mūsa? nidi tiquiro.

Tiquiro sa nigū usā gūhu sinituu tiquirola:

—¿Buhegu, nohopu ijiari mūhu? nii usā tiquirola.

³⁹ —Yuhū mehna ahtatjiāna ihñana taya, nidi Jesu usāre.

Tiquiro sa nigū usā pehe tiquiro ijiropu ihñana waha. Ti pjere ñamicahapu cuatro hora ijiri. Sa yena ti decore tiquiro mehna tojoau usā.

⁴⁰ Usā puana Ñure tuhona, Jesure nānu tārina yuhū piti Andre mehna ijiri. Andre pehe Simo baharo ijiri. ⁴¹ Sa yero duita tiquiro wahminore Simore maca, boca, tiquirola ohō saha ni yahuahye:

—Mesiare Cohācjū marine yuhdu dutiro tiquiro ohoriquirola usā boca, niahye Andre Simore. Mesia usā ye mehna nina, Cristo nina niaja.

⁴² Sa ni tuhasa tiquiro Simore Jesu cahapu neari. Tiquiro cahapu esagū ihñano Jesu pehe Simore ohō saha nidi:

—Mūhu Simo wame tigu, Ñu maca ijire. Yojopu mūhure Cefa wame yeitja, nidi Jesu Simore. Cefa usā ye mehna nina, Pedro nina niaja.

Felipere, Natanae gūhure piji ahye Jesu

⁴³ Ape decopu Jesu Galilea yehpapu waha duari. Sa yero tiquiro wahato pano Felipere piti ca ohō saha nidi:

—Yuhū mehna cjū ijiacju ahtaya, nidi Jesu.

⁴⁴ Felipe pehe Betsaida cjāno ijiri. Tiquiro Andre, Pedro mehna ihcā maca cjēna ijiri tiquina. ⁴⁵ Sa yero Felipe Natanaene maca, tiquirola bocaro ohō saha ni yahuri:

—Cohācjū dutiyere Moise tiquiro ojoari pūpu tiquiro yahuriquirola apequina Cohācjū yere yahu mahtariquina gūhu tiquina yahuriquirola usā boca. Jesu Nazare cjāno, José macanota ijire, nidi tiquiro Natanaene.

⁴⁶ —Nazarepu ne ihcāquirola quehnoariquirola mariedare, nidi Natanae.

—Ihñagu taya mūhu, nidi Felipe.

⁴⁷ Sa ye Jesu cahapũ tiquiro esagũ ihñano Jesu pehe ohõ saha nidi Natanaene:

—Ahriquiro yojopũ ahtariquiro potota quehnoariquiro judio masano warota ijire. Tiquirore mehoñe ne mariedare, nidi Jesu Natanae pehere.

⁴⁸ Tiquiro sa nigũ tũhoro Natanae pehe tiquirore sinituri:

—¿Dũhsegũ yũhare quehnoano masiajari mũhũ? nidi.

—Felipe mũhare tiquiro pijiato pano, higuerağũ docapũ mũhũ ijigũ ihñau yũhũ mũhare, nidi Jesu.

⁴⁹ Tiquiro sa nigũ Natanae pehe ohõ saha nidi tja:

—Buheğũ, potota mũhũ Cohãcjũ macũ ijire. Mũhũ Israe masa usã pũhto ijiascjũ ijire, nidi Natanae.

⁵⁰ Tiquiro sa nigũ tũhoro ohõ saha ni yũhtiri Jesu:

—Higuerağũ docapũ yũhũ mũhare ihñarire masigũ yũhare “Cohãcjũ macũ ijire”, ni wacũ tutuare mũhũ. ¿Tita mũhare sa masigũ yeajari? Ahri mũhare yũhũ ihñari yũhdũoro Cohãcjũ tutuaye mehna ye ihñogũtja yũhũ mũhare. Yũhũ sa ye ihñogũ ihñaguta mũhũ, nidi Jesu Natanae.

⁵¹ Sa ninota ohõ saha ni yahu nemori:

—Potota mũhare niita niaja. Yũhũ masũ Cohãcjũ ohoriguta ijiaja. Uhmũsepeũ parĩ maagũ Cohãcjũ tiquiro yequina angele yũhũ bui tiquina dijia tagũ, tiquina mũjagũ gũhare ihñaguta mũhũ, nidi Jesu tiquirore.

2

Caná wame tiri macapũ tiquina omoca dũhteropũ Jesu wahahye

¹ Ihtia deco bato Canápũ Galilea yehpapũ ijiri macapũ omoca dũhteri bose deco ijiri. Sa yero Jesu pacoro ti wũhũpũ ijiri. ² Jesu mehna usãre tiquiro buhena gũhare omoca dũhteropũ pijiori tiquina. ³ Ti bose deco cjẽ vino

pihtigũ Jesu pacoro tiquirore yahuri:

—Yojopũre vino pihtia wahari, nidi ticoro Jesure.

⁴ Ticoro sa nigũ tũhoro Jesu ohõ saha nidi:

—¿Iño, dũhsego tago tire yũhare yahuajari mũhũ? Masa yũhare tiquina masiato dũhsarĩne, nidi Jesu tiquiro pacorore.

⁵ Tiquiro sa nidi bato tiquiro pacoro pehe tiquina cahacjẽnare dutiri:

—Yũhũ macũ tiquiro dutiro sahata yeya, nidi ticoro.

⁶ Ti pjepeũre usã acaye judio masa Cohãcjũ yere yeye tehe masare tiquina pagũrire sa coseducu dutie tiri. Sa ye ti wũhũpũre seis suturi utã mehna tiquina yeri suturi aco pose tiye suturi ijiri. Ti suturi Cohãcjũ yere yeye tehe tiquina coseye aco pose tiye suturi ijiri. Ti suturi cincuenta o setenta litro pose esa tuhari. ⁷ Sa yero tiquina cahacjẽnare dutiri Jesu:

—Ahri suturire acore pio sã nemoña. Quehnoano wahpo dapoya, nidi Jesu.

Tiquiro sa nigũ tiquina pehe quehnoano wahpo dapõ peho cãhri ti suturire.

⁸ Tiquina sa yeri bato Jesu tiquinare dutiri tja:

—Yojopũre ti acore wa ne, wũhũ cjãnore ohoya, nidi.

Tiquiro sa nigũ tũhoye ti acore wa ne, wũhũ cjãnore ohori.

⁹ Tiquina sa ohogũ tiquiro pehe ti acore vino wahagũ yeri acore sihni tuhuri. Ti acore tiquiro dũhse yerire masiedari tiquiro. Tiquiro sa masiedapegãta tiquiro cahacjẽna ti acore wayequina pehe masidĩ. Wũhũ cjãno sa masiedaro omoca dũhteriquirore pijio, ohõ saha ni yahuri:

¹⁰ —Apequina masa quehnoañe vinore sihõ mãhtare. Masa tiquina quehnoano sihnidi batopũ ña cjũñe core sihõri tiquina. Mũhũ pehe

quehnoañe core ihbo, came cjũno ti core sihõri usãre, nidi wuhũ cjũno omoca duhteriquirore.

¹¹ Canãpũ Galileapũ ijiri macapũ Jesu acore vino tiquiro wahagũ yero, topũ Cohãcjũ tutuaye mehna coã ye dũcari. Sa yero apequinare tiquiro tutuayere ihñori Jesu. Tiquiro sa ihñori bato usã tiquiro buhena tiquirore wacũ tutuaũ.

¹² Came Jesu tiquiro pacorore, tiquiro bahanare, usãre tiquiro buhena gãhare Capernaupũ siho esari. Topũ esana, meheñe decorigã tojoarũ usã.

Jesu Cohãcjũ wuhũpũre esahye

(Mt 21.12-13; Mr 11.15-18; Lc 19.45-46)

¹³ Pascua ijigũ judio masa usã bose deco ijiato mehenogã duhsatjiãri. Sa yero Jesu Jerusalẽpũ esari. ¹⁴ Topũ esaro tiquiro Cohãcjũ wuhũpũ sajã saro, wecuare, ovejare, bujuaare duayequinare boca sari. Sa yero niñerure comesayequina mesaripũ dujigũ tiquina gãhare boca sari. ¹⁵ Sa boca saro yuta dari mehna tanari da ye, tiquinare ijipihtiequinare sopecahapũ tana nũnũ wiori. Oveja, wecuã gãhũ tana nũnũ wio cãri tiquiro. Sa yero niñeru comesayequina ye mesarire ne majaredoqueo, doque cũ cãri. Ti niñeru cjoeri gãhare doque site cãri. ¹⁶ Sa ye tuhasa bujuaare duayequinare ohõ saha nidi:

—Musa bujuaare ne wijiaya. Yuhũ Pacũ ya wuhũre apee boro duari wuhũ yeracãhña, nidi Jesu tiquinare.

¹⁷ Tiquiro sa yegũ ihñana usã tiquiro buhena pehe Cohãcjũ yere tiquina ojoari pũpũ tiquiro nidire wacũu: “Cohãcjũ, mũhũ ya wuhũre tutuaro cahãja. Sa cahĩgu ti wuhũre ñano tiquina yegũ ihñagu tutuaro bujua witiãja yuhũ”, ni ojoahye Cohãcjũ yere tiquina ojoari pũpũ”, ni wacũu usã Jesu buhena.

¹⁸ Jesu tiquiro sa yeri bato usã acaye judio masa pũtoa tiquirore sinituri:

—¿Duhsegu mũhũ ahriquinare Cohãcjũ wuhũpũre ijieyequinare cohã wioari? Cohãcjũ mũhũre tire ye dutiriquiro tiquiro ijigũ Cohãcjũ tutuaye mehna ye ihñõña mũhũ usã ihñatire, nidi tiquina Jesure.

¹⁹ Tiquina sa nigũ Jesu yãhtiri:

—Ahri wuhũre mũsa cohãgũ ihtia deco wahaboro tuhasaũtja yuhũ, nidi Jesu tiquinare.

²⁰ —Ihtia deco ahri wuhũre yesi mũhũ. Cuarenta y seis cuhmari waro tiquina yeri wuhũ ijire ahri wuhũ, nidi tiquina pehe Jesure.

²¹ Tiquiro sa nigũ tiquina tiquirore quehnoano tuhoerari. Jesu “Ahri wuhũre”, nino tiquiro pagure nino nidi jimedi.

²² Sa ye tiquiro yariari bato, tiquiro masa wijiari bato usã tiquiro buhena pehe tiquiro nidire wacũna, Cohãcjũ yere tiquina ojoari pũre Jesu tiquiro yahuri gãhare “Ti ijirota ijire”, ni wacũu usã.

Ijipihtiequina tiquina wacũñene Jesu masine

²³ Pascua bose deco ijigũ Jesu Jerusalẽpũ ijiri. Topũ tiquiro ijigũ masa peyequina Cohãcjũ tutuaye mehna tiquiro ye ihñogũ ihñañe tiquirore wacũ tutuari. ²⁴ Tiquina sa wacũ tutuepegãta Jesu masa tiquina wacũñene quehnoano masino, “Yuhũre sa wacũ tutuaducuetã”, ni tuhotuerahye. ²⁵ Masa tiquina tuhotuyere quehnoano masidi tiquiro. Sa masino masa tiquina tuhotuyere apequinare ne sinituerari.

3

Jesu Nicodemore yahuahye

¹ Ti macare Nicodemo wame tiriquire, judio masa pũtoa mehna cjũno ijiri. Tiquiro fariseo masa ya curua cjũno ijiri. ² Sa yero

ihcã ñami tiqairo Jesu cahapũ ahta, tiqairo mehna yahuducuahye:

—Buhegũ, mũhu Cohãcjũ buhe dutiro tiqairo ohorigũ mũhu ijigũ usã masiaja. Cohãcjũ mũhũre tiqairo yedohoeragũ mũhu pehe tiqairo tutuaye mehna ne ye ihñoedaboaga. Mũhu peye tahari Cohãcjũ tutuaye mehna ye ihñore, niahye Nicodemo Jesure.

³ Tiquiro sa nigũ Jesu pehe yahuahye:

—Ijirota mũhũre niita niaja. Wahma masa bajuariquiro yero saha pari turi masa bajuariquiro dihita Cohãcjũ yaquiro iji masine, niahye Jesu.

⁴ —Yohnah. ¿Bũcũro pehe dũhse ye pari turi masa bajuaboari tiqairo? Tiquiro pacoro niji suhtiropũ majare sajã, pari turi bajua masiedaboaga tiqairo, niahye Nicodemo.

Tiquiro sa nigũ Jesu yũhtiahye:

⁵ —Ijirota niita niaja mũhũre. Wahma masa bajuariquiro yero saha aco mehna, Espĩritu Santo tiqairo tutuaye mehna pari turi masa bajuariquiro dihita Cohãcjũ yaquiro iji masine. ⁶ Numia niji pacosãnumia ijiye, macanagãre masa bajuagũ yere. Espĩritu Santo pehe masare Cohãcjũ pohne ijigũ yere. ⁷ “Wahma masa bajuariquiro yero saha pari turi masa bajuariquiro dihita Cohãcjũ yaquiro iji masine”, yũhu nigũ, tũho wisieracãhña. ⁸ Espĩritu Santo masare Cohãcjũ pohne tiqairo yegũ ti wihnono yero saha ijire. Wihnono to ahtariropũ ahtare. To ahtarõ ca tagũ mari tũhoaja. Sa tũhoopenata to ahtarirõre, to waharirõre ne masiedaja. Sata yere Espĩritu Santo masare Cohãcjũ pohne yero, niahye Jesu Nicodemore.

⁹ —Mũhu niñene quehnoano masiedaga, niahye Nicodemo.

¹⁰ Tiquiro sa nigũ tũhoro ohõ saha niahye Jesu:

—¿Mũhu judio masare buhegũ ijiepegũta, dũhsegu yũhu niñene tũhoerajari? ¹¹ Ijirota niita niaja mũhũre. Usã masidire usã ihñarire usã yahuaaja. Usã sa yahuepegũta ne mũsa acaye judio masa ne tũho duerare. ¹² Ahri yehpa cjẽ mehna masa tiquina masa bajuari mehna mũsare queoye mehna yũhu buhe mũhtarire “Ijirota ijire”, niedare mũsa. Sa niedana queoye mehna buhero marieno Cohãcjũ yere yũhu yahugũ gũhũre “Ijirota ijire”, nisi mũsa.

¹³ 'Ne ihcãquiro uhmũsepũ Cohãcjũ cahapũ wahariquiro ne pari turi tojoa tasi. Yũhu masũ Cohãcjũ ohorigũ yũhu dihita uhmũsepũ ijirigũ ahri yehpapũ ahtaũ. Sa yegũ yũhu dihita Cohãcjũ yere mũsare yahu masiaja. ¹⁴ Panopũre masa marienopũ Moise mũnano bronze wame tiri come mehna tiquina yeriquirore añare yucũgũ tiquina docodũpũ duhu yoahye. Yucũgũpũ tiquina duhu yoriro sahata yũhũre masũre Cohãcjũ ohorigũre tiquirore tiquina yeriro sahata yũhu gũhũre duhu yoeta. ¹⁵ Yũhũre tiquina sa yeri bato ijipihtiyequina yũhũre wacũ tutuayequina ijipihtiye decori Cohãcjũ mehna iiducueta, niahye Jesu.

Cohãcjũ ijipihtiyequinare cahĩne

¹⁶ Sa ni tuhasa ohõ saha ni nemoahye:

—Cohãcjũ ijipihtiyequina ahri yehpa cjẽnare tutuaro cahĩne. Sa yero yũhũre tiqairo macũre ihcãta ijigũre Cohãcjũ ohori ijipihtiyequina yũhũre wacũ tutuayequina pecapũ tiquina “Wahaeracãhdo”, nino. Sa ye ijipihtiye decori Cohãcjũ mehna ijietta tiquina. ¹⁷ Cohãcjũ yũhũre tiqairo macũre masare buhiri dahre dutiro ohoerari yũhũre ahri yehpapũre. Sa yero masare pecapũ wahaboriquinare yũhdũoacjũre yũhũre ohori.

18 'Yuhure Cohācjū macure wacū tutuayequinare ne buhiri dahresi Cohācjū. Yuhure wacū tutuayequina pūritare Cohācjū buhiri dahre duti tuhasari. Masa yuhure Cohācjū macure ihcāta ijigure tiquina wacū tutuerari buhiri, buhiri dahrerota tiquinare. 19 Yuhū, Cohācjū macū ahri yehpapū ahtagū buhrioro quehnoano marine to ihña masigū yero sahata Cohācjū yere quehnoano masigū yeaja. Yuhū sa masigū yegū ihñāne yuhure wacū tutuayequina yuhure cahmedare. Tiquina ñāne yeye pehere quehnoano cahmene. Tiquina sa cahmedi buhiri tiquinare buhiri dahrerota. 20 Ijipihtyequina ñāne yeyequina tiquina ñāne yeyere duhu duerare. Sa ye buhrioro to bajumehnenno sahata tiquina ñāne yerire "Bajumehneari", niñe, yuhure cahmedari tiquina. 21 Quehnoañene yeyequina pehe yuhure, yuhū buheye gūhure cahmene. Cohācjū yere tiquina yeyere yuhū quehnoano bajuro dahregū bue tierare tiquina. Sa ye yuhure buhrioro yero saha ijigure cahmene, ni yahuahye Jesu.

Pari turi Ñu wame yeriquiro Jesure yahuahye

22 Came Jesu usāre tiquiro buhenare Judea yehpapū siho wahari. Topū esaro to cjēna mehna meheñe decorigā tojoa, wame yeri tiquinare. 23 Ñu gūhū masare wame yero niahye Enón wame tiri macapū. Enón Salim wame tiri maca cahapū ijiri. Topū dia ijiri. Sa yero Ñu topū wame yero niahye masare. 24 Tiquina peresu yeato pano Enórū wame yero niahye Ñu. 25 Ti pjere Ñu buheyequina mehna cjēna meheñequinagā judio masano mehna wame yeyere yahuducuye niahye. 26 Sa ye tiquina Ñu cahapū esa, tiquirore yahuahye:

—Buhegū, Jordā si pahrēpū mūhū mehna ijiriquiro "Tiquirota ijiaga", mūhū nidiquiro pehe yojopure masare wame yero nine. Tiquiro sa yegū ijipihtyequina tiquiro cahapū dihita wahare, niahye tiquina Ñure.

27 Tiquina sa nigū tūhoro Ñu yūhtiahye:

—Tiquiro tutuariquiro ijigū Cohācjū pehe tiquirore sa ijigū yere. 28 "Cristo ijieraja", yuhū nigū masa tūhori. Sa ijierapegūta tiquiro pano ohonoho mūhtarigū ijiaja yuhū. 29 Cristo mehna masa tiquina wahagū ihñagū tutuaro bucueaja. Ohō saha ijire ti: Omoca dūhtericoro ticoro manūno mehna ijiro wahare. Omoca dūhtegū cohteriquiro pehe dūhteatiquiro namo tigū ihñano tiquiro yahuducugū tūhoro tutuaro bucuere. Sa yegū yuhū omoca dūhtegū cohteriquiro tiquiro bucuero saha Cristo mehna masa tiquina wahagū ihñagū tutuaro bucueaja. 30 Cristo pehere wacū tutuaro cahmene masare. Yuhū pehere wacū tutuaro cahmene masare, ni yūhtiahye Ñu.

Cohācjū masano ūhtūsepu ahtariquiro ijire

31 Sa ni tuhasaro ohō saha ni nemoahye Ñu:

—Ūhtūsepu ahtariquiro ijipihtyequina yūhdūoro tutuariquiro ijire. Ahri yehpapū masarina ijina ahri yehpa cjāna ijiaja mari. Sa yena ahri yehpa cjēne yahuducuaaja mari. Ūhtūsepu ahtariquiro pehe ijipihtyequina yūhdūoro tutuariquiro ijire. 32 Tiquiro ihñāre, tiquiro tūhore tiquiro yahure. Tiquiro sa yahuepegūta tiquiro yahuyere masa pehe ne tūho duerare. 33 Ūhtūsepu ahtariquiro tiquiro yahuyere masa tūhoye, "Cohācjū potota nidiquiro ijire", niñe nine tiquina. 34 Ahriquiro Cristore Cohācjū

ohoriquiروه Espírítu Santo ye tutuayere oho pehore Cohācjū. Sa yero tiquiro Cohācjū ye yahuducuyere yahure. ³⁵ Cohācjū tiquiro macanore tutuaro cahñe. Sa yero ijipihtiyequina pahtoro iji dutiri tiquiro macanore. Ijipihtiye uparo iji dutire tiquirore. ³⁶ Cohācjū macanore wacū tutuayequina pehe ijipihtiye decori Cohācjū mehna ijietā. Tiquiro macanore yūhduducayequina pehe Cohācjū cahapū wahasi. Sa ye ijipihtiye decori uhmūsepū ijisi. Sa yero Cohācjū tiquinare tutuaro buhiri dahrerota, niahye Ņu.

4

Jesu Samaria cjōno mehna yahuducuro niahye

¹ Jesu Ņu yūhdūoro peyequina buheyequinare tiquiro cuogū, Ņu yūhdūoro masare tiquiro wame yegū fariseo masa tūhoahye. ² Tiquina sa tūhoepegūta Jesu pehe tiquiro basi masare wame yerari. Ūsā tiquiro buhena pehe masare wame yei. ³ Fariseo masa tiquina sa masigū tūhoro Jesu pehe Judea yehpapū ijiriquiro Galilea yehpapū usāre siho tojoaa wahari.

⁴ Topū wahana Samaria yehpare esa yūhdū cāna tana nii usā. ⁵ Sa yūhdū cāna Samaria yehpapū ijiri macapū Sicar wame tiri macapū esā. Ti maca cahapū panopū cjāno Jacob manano tiquiro macano José mananore tiquiro ohori yehpa ijiri. ⁶ Topū Jacob manano tiquiro sihnidi cope ijiri. Sa yero Jesu pehe yoaropū ahtariquiro ijiro, tiquiro wahyia yūhdūaro ti cope dūhtū cahapū nuju sari. Ti pje tiquiro nuju sari pje coheri pje waro ijiri. ⁷⁻⁸ Ūsā tiquiro buhena pehe macapū ihyayere usā dūna wahari bato ihcāquirola tiquiro topū tojoa nuju sari. Sa yero Samaria cjōno ti copere aco waro wihigū Jesu ticorore acore siniahye:

—Acore ohoya yūhure, niahye.

⁹ —Mūhū judio masū ijire. Yūhū pehe Samaria cjō ijiaja. ¿Dahsegū yūhure acore siniajari mūhū? niahye ticoro Jesure.

Judio masa Samaria cjēnare ihña tuhtiyequina ijire. Sa yero ticoro sa niahye.

¹⁰ Ticoro sa nidi bato Jesu ticorore yahuahye:

—Mūhure Cohācjū tiquiro yedoho duayere masigo, mūhure acore sinigūre masigo, mūhū yūhū pehere siniboaya. Mūhū sa sinigū apeye aco pehere ohoboaya yūhū. Ti aco pehe catigū yere, niahye Jesu ticorore.

¹¹ Tiquiro sa nigū tūhoro ticoro yūhtiahye tiquirore:

—Ne mūhure sutu mariedare. Sa yero ahri cope uhcāñe. ¿Sa yegū ahri catigū yeye acore nohorū wa neboagari mūhū? ¹² Marī ñecu manano Jacob panopū cjāno ahri copere marine cūe tiahye. Tiquiro, tiquiro pohne, nuñequina gūhū ahri acore sihnie tiahye. ¿“Apeye acore ohoboaya yūhū”, mūhū nigū, Jacob yūhdūoro tutuagū ijiajari mūhū, sa ni tūhotugū? niahye ticoro.

¹³ Ticoro sa nigū Jesu yūhtiahye:

—Ijipihtiyequina ahri acore sihniñequina, pari turi aco wūoeta. ¹⁴ Yee aco pehere sihniñequina ne pari turi aco wūosi. Sa ye, yee acore sihniñequina Cohācjū mehna sa ijiducueta. Ma pohterū aco to sa wijiaducuro sahata yee aco ne pihtisi, niahye Jesu.

¹⁵ Tiquiro sa nigū tūhoro numino pehe ohō saha niahye:

—Ti acore ohoya yūhure pari turi yūhū aco wūoeraro quehnoano. Sa yego pari turi ne ohōpūre aco wasi yūhū, niahye ticoro.

¹⁶ Ticoro sa nigū Jesu ticorore yahuahye:

—Ti pje pūrita mūhū mananore pijigo wahaya. Piji tuhasa ohōpū ahtaya tiquiro mehna, niahye Jesu ticorore.

17-18 —Manu mariego ijiaja yahu, niahye ticoro.

—Ijirota nimene mahu. Ihca omope tahari manu ti tuhasamedu mahu. Sa yero yojopare mahu mehna ijirota mahu manano ijierare. Sa ye “Manu mariego ijiaja”, nigo potota nimene mahu, niahye Jesu ticorore.

19 Tiquiro sa nigu tuthoro ohō saha niahye ticoro:

—Āa, Cohācjū yere yahu mahatagū ijire mahu, yahu tuthorugū. 20 Ūsā űecusumma iji turiayequina mana ahdu canaru Cohācjūre űo peoetiahye. Sa yena masa pehe judio masa “Jerusalēru Cohācjūre űo peoro cahmene masare”, nie tiri masa judio masa, niahye ticoro.

Ticoro sa nigū Jesu yuhtiahye:

21 —Numio, yahu pehere tuthoriña. Cameru ahdu canaru, Jerusalēru gūhure mari Pacure űo peosi masa. 22 Masa pehe masa űo peoriquirore masiedare. Masare yuhduoatiquiro judio masanota ijire. Sa yena usā judio masa pehe usā űo peoriquirore masiaja. 23 Yojopare, cameru gūhure Cohācjūre potota űo peoyequina tiquina quehnoano tuthoruyeh mehna tiquirore űo peoeta. Sa mari űo peogū cahmene Cohācjū. 24 Cohācjūre, pagu marieniquiro tiquiro ijigū masa tiquirore ihñedare. Sa ye tiquirore űo peoye, tiquina quehnoano tuthoruyeh mehna tiquirore quehnoano potota űo peoro cahmene masare, niahye Jesu.

25 Tiquiro sa nigūta ticoro yuhtiahye:

—Mesia, “Cristo” tiquina nidiquiro pehe masare yuhduoatiquiro tiquiro ahtatire masiaja yahu. Tiquiro ahtaro marine ijipihtiyere buhe peho cānota, niahye ticoro.

26 —Yuhuta ijiaja Cristo, niahye Jesu ticorore.

27 Tiquiro sa nigū waro wihii usā. Sa yena usā tiquiro buhena pehe Jesu numino mehna tiquiro yahuducugū ihñana, ihña maria waha. Sa ihña mariepenata, “¿Duhse cahmeajari mahu? ¿Duhse niari mahu ticorore?” ni sinitueru tiquirore. 28 Sa yero numino ticoro ya suture duhu dapo cā, macaru waha wahari. Topu esaro masare yahuro, ohō saha niahye:

29 —Yahu yerire yahu pehoriquirore ihñana ahtaya masa. Tiquiro potota Cristo ijiboaga, ape taha yero, niahye ticoro.

30 Ticoro sa nigū tuthoro ti maca cjēna pehe Jesure ihñañe ahtari. 31 Ti pjere usā Jesu buhena pehe tiquirore tutuaro ihya dutimi:

—Buhegu, ihyaya, nimi usā.

32 —Sijoro ijiye ihyayere caoaja yahu. Tire masa masiedare, nidi tiquiro.

33 Tiquiro sa nigū tuthoro usā basi ohō saha ni yahuducuu:

—¿Apequina tiquirore ihyaye oho tuhasayari? ni usā basi.

Ūsā sa nigū Jesu yahuri:

34 —Masa pehe ihya coare. Yuhure ohoriquiro tiquiro cahmeñe pehere ye coaja yahu pehe. 35 “Pititia asū duhsare mari dūca duha neato”, wese uparo tiquiro nidiro saha masa pehe ni tuthorueracāhña. “Cohācjū yere usā yahuato duhsarīne”, ni tuthorueracāhña.

Ijirota niita niaja masare. Yojopu pūritare masare ihñaña. Ducare neni pje to ijiro sahata, yojopu pūrita masa yahu buheyere tiquina tuthoroati pje ijiro nine. 36 Oteye ducare neñequinare tiquina wapa yeriro sahata yeere buheriquinare, yeequina ijiatiquinare pijiyequinare, tiquina sa yeri wapa tiquinare quehnoano yeitja yahu. Tiquina sa buhegū tuthoro yahu buheyere tuthoro equina yeequina pehe Cohācjū mehna ijipihtiyere decori ijiducueta. Sa ye tiquinare buhe

mãhtañequina, came yeequina wahagũ yeequina gãhũ ihcãno saha bucueducueta. ³⁷ “Ihcãquiuro ote mãhtariquiuro ijire. Apequiuro pehe dũcare nenuquiuro ijire”, nie tiahye panopũ. Ti ijirota ijire. Tiquina sa nidiro sahta ihquẽquina yeere yahu mãhtañequina ijire. Apequina pehe yeere buheye, yeequina wahagũ yere. ³⁸ Wese upũro yequina dahra cohteyequina oterariquina tiquina ijiepegũ tiquiro oteye dũcare tiquinare ne dutiro ohore. Sa mãsare buhe mãhtaedarina mãsa ijiepegũta yeequina wahatiquinare buhe dutigu ohoaja mãsare. Apequina pehe tiquinare buhe mãhta tuhasari. Tiquina buheriquinapũre pari turi buhe nemona, yeequina wahagũ yenata mãsa pehe. Sa ye buhe mãhtañequina pehe tiquina yedohoro mehna apequinare yeequina wahagũ yenata mãsa, nidi Jesu.

³⁹ Ti pjere Samaria cjõno “Yũhũ yerire tiquiro yahu pehori”, ticoro sa nigũ tũhoye Samaria cjẽna peyequina Jesure cahmeahye. ⁴⁰ Sa ye Samaria cjẽna Jesu cahapũ esaye, “Usã mehna tojoarĩna”, nidi tiquirore. Tiquina sa nigũ usã gãhũ tiquiro mehna pũa deco tojoarĩi.

⁴¹ Apequina gãhũ peyequina Jesure tũhoye, cahmedi tiquirore.

⁴² Ohõ saha nidi masa numinore:

—Coã waropũre mãhũ yahurire tũhona, Jesure cahmei. Yojoũ pũritare tiquiro yahuducuyere tũhona tiquirore cahmeaja. Sa yena tiquiro pehere tũhona ahri yehpa cjẽnare pecapũ waha-boriquinare yũhdũoriquiuro potota tiquiro ijigũ yojoũ usã masiaja, nidi masa Samaria cjõnore.

Pũhtoro macũnore dohatiriquirore yũhdũoahye Jesu

⁴³ Pũa deco bato Jesu usãre Galilea yehpapũ siho wahari.

⁴⁴ Coã waropũre ohõ saha nie tiri tiquiro: “Cohãcjũ yere yahu

mãhtariquiurore tiquiro ya yehpa cjẽna tiquirore ño peoerare. Sa ye yũhũre ño peoerare ohõ cjẽna ohõpũ yũhũ bũsũarigũ ijigũ”, nie tiri Jesu. ⁴⁵ Sa ye Galileapũ tiquiro esagũ to cjẽna tiquirore quehnoano piti cari. To pano Jerusalẽpũ bose deco Jesu tiquiro yerire ihñariquina ijiri tiquina.

⁴⁶ Sa ye Canápũ Galileapũ ijiri macapũ acore tiquiro uũse co bajumehnedi macapũ wahau usã tiquiro mehna. Caná cahapũ ijiri macapũ Capernau wame tiri macapũ pũhtoro macũno dohatiro niahye. ⁴⁷ Sa yero Jesu Judeapũ ijiriquiro tiquiro Galileapũ esagũ pũhtoro tũhoahye. Tire tũhoro Jesu cahapũ wihiri:

—Yũhũ macũ yariaro nidi. Sa ye tiquirore yũhdũogũ ahtaya, ni tutuaro mehna pijiri tiquirore.

⁴⁸ Tiquiro sa nigũ tũhoro Jesu yũhtiri:

—Cohãcjũ tutuaye mehna yũhũ yegũ ihñedana, ne yũhũre wacũ tutuerare mãsa, nidi Jesu tiquirore.

⁴⁹ Tiquiro sa nigũ pũhtoro pehe ohõ saha nidi:

—Pũhto, yũhũ macũ tiquiro yariato pano ahtaya, nidi tiquiro Jesure.

⁵⁰ —Tojoahya. Mũhũ macũ cati-aga, nidi Jesu.

Tiquiro sa nigũ tũhoro, “Tiquiro nidiro sahta catirota yũhũ macũ”, nino, pũhtoro tojoaa wahari.

⁵¹ Sa tojoaducuriquirore tiquiro cahacjẽna tiquirore piti ca, yahuahye:

—Mũhũ macũ catiri, ni yahuahye tiquina tiquirore.

⁵² —¿Noho asũ ijigũ yũhdũari yũhũ macũ? ni sinituahye tiquiro cahacjẽnare.

—Canũre coheri pje batogã ujuaye sururi tiquirore, niahye tiquina.

⁵³ Tiquina sa nigū tūhoro ohō saha ni tūhotuahye tiquiro: “Jesu yūhure tiquiro sa ni yahuri pjeta yuayye suruaya”, ni tūhotuahye pūhtoro pehe. “Poto ninota niaya yūhure”, nino, tiquiro ijipihtiyequina tiquiro acaye mehna Jesure wacū tutuahye.

⁵⁴ Jesu Judea yehpapū ijiriquiro Galilea yehpapū tiquiro esari bato pūhtoro macūnore tiquiro yūhdūorire mari queogū pūa taha Cohācjū tutuaye mehna ye ihño tuhasari Jesu.

5

Tini masieniquirore yūhdūoahye Jesu

¹ Came judio masa Cohācjūre usā ño peori bose deco ijigū Jesu Jerusalēpū esari tja. ² Topū oveja wame tiri sopecaha cahapū cuhsari cope ijiri. Usā judio masa ye mehna niñe Betzata wame tiri cope ijiri. Ti cope cahapū ihcā omope tihamehneñe tucūri ijiri. ³ Ti tucūripū peyequina dohatiyequina cuñari. Caperi bajueyequina, pari yuri wahayequina, tini masieñequina tiquina ti cope cahapū ijiri. [Topū ijīye aco ñuhmi maanore cohteye nidi. ⁴ Topū buharo ti cope cjē acore ihquē tahari ñuhmigū ye mujahye angel. Ti cope cjē aco ñuhmīdi bato ña mio māhtariquiro pehe dūhse ijīyere dohatiyere cūoriquiro quehnoa wahahye.] ⁵ Sa yero tore treinta y ocho cūhmari waro dohatiriquiro ijiri. ⁶ Topū tiquiro cuñagū ihñano tiquiro sa yoari pje dohatiriquiro ijigū masidi Jesu tiquirore. Sa masino tiquirore sinituri:

—¿Pagū dohatiyē mariegū iji duajari māhū? nidi Jesu.

⁷ Tiquiro sa nigūta dohatiriquiro yūhtiri:

—Ti aco ñuhmigū yūhure aco ijiri coperū neaboriquiro mariedare. Ti coperū yūhū ña mio duepegūta

apequina pehe yūhū pano sa ña mio māhtaducure, nidi tiquiro Jesure.

⁸ —Wahcādūcaya. Mūhū cuñari cahserore ne cāhña, nidi Jesu tiquirore.

⁹ Tiquiro sa nigūta dohatiriquiro pehe tiquiro cuñari cahserore ne, tini dūcari. Ti deco saurū judio masa usā sori deco ijiri. ¹⁰ Ti decore Jesu sa yegū ihñañe judio masa usā pūhtoa pehe dohatimediquirore ohō saha ni yahuahye:

—Miare saurū deco mari sori deco ijiepegūta māhū cuñari cahserore neare māhū. Sa yegū mari dutiyere yūhdūdūcagū nine māhū, niahye tiquina tiquirore.

¹¹ —Yūhūre yūhū dohatiyere cohāriquiro pehe ohō saha nidi yūhūre: “Mūhū cuñari cahserore ne cāhña”, nidi tiquiro yūhūre, ni yūhtiahye dohatimediquiro.

¹² —¿Tire māhūre sa nidiquiro pehe noa boro ijari tiquiro? ni sinituahye tiquina.

¹³ Topū masa peyequina tiquina ijigū ihñano Jesu pehe waha tuhasari. Sa yero dohatimediquiro pehe tiquirore yūhdūoriquiro wamene masiedahye. ¹⁴ Came Cohācjū wahūpū Jesu tiquirore piti ca yahuri:

—Tūhorīña māhū yūhūre. Yojopūre quehnoano pagū tire māhū. Ñañene ye nemoedacāhña. Pari turi ñañene ye nemogu māhū dohatiriro yūhdūoro wahagūta māhū, nidi Jesu tiquirore.

¹⁵ Tiquiro sa nidi bato dohatimediquiro pehe usā judio masa pūhtoa tiquirore sinituriquina cahapū esaro yahuahye tiquinare:

—Jesu wame tiriquiro yūhūre yūhdūgū yeri, ni yahuahye tiquiro.

¹⁶ Sa ye saurū ijigū dohatiriquirore tiquiro dohatiyere Jesu cohāgū masiñe, judio masa usā pūhtoa pehe tiquirore ñano ye dūcari.

17 Sa ñano tiqirore tiquina ye duagũ masino Jesu pehe yahuri tiquinare:

—Yũhũ Pacũ yojopũre dahrarĩno nine. Yũhũ gãhũ dahrarĩ niaja, ni yahuri tiqirore ñano ye duayequinare.

18 Tiqiro sa nigũ judio masa usã pũhtoa pehe tiqiro mehna tutuaro usuaye, to pano tiquina nidiro yũhdũoro tiqirore wejẽ duari. Saurũ decore tiquina sorĩ decore ihcãqiro dohatĩriqirore tiqiro yũhdũogũ ihñañe tiquina usuari. Sa usuaye tiqiro Cohãcjũre “Yũhũ Pacũ”, nigũ tũhoye, tiquina pehe to pano tiquina nidiro yũhdũoro usua nemoahye tja. “ ‘Yũhũ Pacũ’, nino Jesu tiqiro basi ‘Cohãcjũ mehna ihcãno saha ijiaja’, ni wacũaga tiqiro”, ni tũhoturi judio masa usã pũhtoa.

Jesu Cohãcjũ ohoriquiro ijire

19 Sa ye Jesu tiquinare yahuari:

—Ijirota niita niaja mũsare. Yũhũ Cohãcjũ macũ, yũhũ esa tuharo yeraja. Yũhũ Pacũ tiqiro yerire ihñaagũ, tire yeaja. 20 Yũhũ Pacũ yũhũre tiqiro macũre cahĩne. Sa yero tiqiro yerire yũhũre ihño pehore. Ahri yojopũ tiqiro tutuaye mehna yũhũ yeri yũhdũoro tiqiro apeyere ye dutirota yũhũre. Tiqiro sa ye dutigũ tiqiro tutuaye mehna ye ihñoutja yũhũ. Sa yena ihña maria wahanata mũsa. 21 Yũhũ Pacũ yariariquinare tiqiro masoriro sahata yũhũ gãhũ yũhũ cahmeñequinare masoutja. 22-23 Ne yũhũ Pacũ pehe masa tiquina ñañe buhirire buhiri dahreriquiro ijierare. Yũhũ pehere tire tiquina ñañe buhirire buhiri dahreacjũre cũri yũhũ Pacũ. Ijipihtyequina masa tiqirore tiquina ño peoriro sahata yũhũ gãhũre tiquina ño peoatire buhiri dahreacjũre cũri yũhũre. Yũhũre tiqiro macũre ño peoerana yũhũ Pacũ gãhũre

ño peoerare mũsa. Tiqiro ijire yũhũre ohoriquiro, nidi Jesu.

24 Sa ni tuhasa ohõ saha ni yahu nemori:

—Ijirota niita niaja mũsare. Yũhũ yahuducuyere tũhoyequina, yũhũre ohoriquirore wacũ tutuayequina ijipihtye decori uhmũsepũ sa ijiducueta. Sa yegũ tiquinare buhiri dahresi yũhũ. Sa ye tiquina pecapũ wahaboriquina yũhdũeta. 25 Ijirota niita niaja mũsare. Pecapũ wahatiquina yũhũre Cohãcjũ macũre tiquina tũhoati pje yojopũ ijire. Camerũ gãhũre yũhũre tiquina tũhoeta tja. Sa tũhoye tũho nũnũñequina pehe Cohãcjũ mehna sa ijiducueta. 26 Cohãcjũ yũhũ Pacũ pehe sa ijiducugũ yeriquiro ijire. Sa yero yũhũre tiqiro macũre sa ijiducugũ yeacjũ iji dutiri tiqiro yũhũre. 27 Sa yegũ yũhũ masũ Cohãcjũ tiqiro ohorigũ yũhũ ijigũ tiqiro masare buhiri dahreacjũre cũri yũhũre. 28 Ahrire tũhona, tũho mariedacãhña mũsa. Ape decopũre ijipihtyequina yariariquina masa coperipũ ijiequina yũhũ yahuducugũ tũhoeta. 29 Sa tũhoye, quehnoañene yeriquina ijipihtye decori Cohãcjũ mehna ijiatiquina masa mũjaeta. Ñañene yeriquina pehe ñañene tiquina yeri buhiri pecapũ wahaeta, ni yahuri Jesu.

30 Sa ni tuhasa ohõ saha ni yahu nemori:

—Yũhũ esa tuharo ne yeraja. Ne yũhũ basi yũhũ cahmeno ye dueraja. Yũhũre ohoriquiro tiqiro dutiro sahata ye duaja. Sa yegũ tiqiro nidiro sahata buhiri dahreaja. Sa yegũ yũhũ masare buhiri dahregũ queoro yeaja. 31 “Yũhũ tutuagũ ijiaja”, yũhũ ni yahugũ “Mũhũ yahuye ne poto ijierare”, ni masiboaga mũsa. 32 Apeqiro ijire yũhũre yahuriquiro. Tiqiro Ñũ pehe

masare yahure yuhure. Masare yuhure tiqiro yahuri ijirota ijire. Tire yuh quehnoano masiaja. ³³ MUSA apequna pehere Nupare yuhure sinitu dutina ohori. Sa yero potota yahure tiqiro musare. ³⁴ “Cohãcjũ macũno ijire ahriqiro”, yuhure ni yahuatiquinare macaedaja. Sa macaedapegũta Ñu masũno tiqiro ijiepegũta yuhure “Cohãcjũ macũno ijire”, tiqiro ni yahurire yahugũ niaja. MUSA yuhure wacũ tutuatire, mUSA pecapũ wahaborina mUSA yuhuatire yuhure Ñu tiqiro yahurire yahugũ niaja. ³⁵ Sihãria meheñe decorigã ihña masigũ yero sahata Ñu musare buhe mũhtano mehenogã tiqiro catiro puno musare masigũ yeri. Tiquiro sa buhegũ tũhona meheñe decorigã bucueri mUSA. ³⁶ Yuhũ ijyere tiyere tiqiro sa buhepegũta Cohãcjũ pehe yuhũ ijyere quehnoano yahure. Tiquiro sa yahugũ Ñu yuhũ ijyere tiqiro yahuye yuhũoro ijire Cohãcjũ ye yahuye. Sa yegũ Cohãcjũ tiqiro tutuaye mehna yuhure tiqiro ye dutirire vojopũ yei niaja. Ahrire yuhũ yegũ ihñana potota Cohãcjũ ohorigũ yuhũ ijyere masine mUSA. ³⁷ Sa yero yuhũ Pacũ yuhure ohoriqiro tiqiro basi “Tiquiro yuhũ ohoriqiro ijire”, ni yahure musare. Tiquiro sa ni yahuepegũta tiqiro yahuducuyere ne tũhoerari mUSA. Sa yena mUSA tiqirore ne masiedari. ³⁸ Yuhure Cohãcjũ ohorigure mUSA ne tũho duerari. Sa yena mUSA Cohãcjũ yere ne cahmedari. ³⁹ Cohãcjũ yere tiquina ojoari pũre mUSA buhena, “Mari ahri pũre buhena ijipihtyere decori Cohãcjũ mehna sa ijiducunata”, nine mUSA. Ti pũta yuhure yahure. ⁴⁰ Ti pũ yuhure ti yahuepegũta mUSA pehe yuhure cahmedare. Ijipihtyere decori Cohãcjũ mehna mUSA sa ijiducuatire yuhure sini duerare

mUSA, ni yahuri Jesu.

⁴¹ Sa ni tuhasa ohõ saha ni nemori:

—Yuhure mUSA ño peoeragũ ihñagũ usueraja yuhũ pehe. ⁴² MUSA pehe Cohãcjũre mUSA cahĩedagũ masiaja yuhũ. ⁴³ Cohãcjũ yuhũ Pacũ tiqiro yuhure dutiriro sahata yuhũ ahtaepẽgũta mUSA yuhure cahmedari. Apeqiro pehere Cohãcjũ ohoeriqiro tiqiro ijiepegũta tiqiro pehere cahmedana mUSA. ⁴⁴ Apequna masa musare tiquina ño peogũ cahmene mUSA. Cohãcjũ mUSA mehna tiqiro bucuegũ cahmedare mUSA. Tiquiro dihita Cohãcjũ waro ijire. Sa cahmedana yuhũ gũhure tũhoerare mUSA. Yuhure wacũ tutuerare. ⁴⁵ Musare yuhũ Pacũre ne yahusãsi yuhũ. Tire masiña mUSA. Moise tiqiro ojoari pũ pehe musare yahusãnota. “Ti pũ cjẽ dutiyere mari ye pehona, Cohãcjũ cahapũ wahanata”, mUSA nidi pũ pehe musare yahusãnota. ⁴⁶ Moise tiqiro ojoari pũpũ yuhũ pehere yahuahye. Sa yena ti pũre “Ijirota ijire”, nina, yuhũ yahuye gũhure “Ijirota ijire”, niboaya mUSA. ⁴⁷ Moise tiqiro ojoari pũre “Ijirota ijire”, niedana, yuhũ yahuducuyere gũhure “Ijirota ijire”, nisi mUSA, nidi Jesu tiquinare.

6

Cinco mil masare ihyayere ohoahye Jesu

(Mt 14.13-21; Mr 6.30-44; Lc 9.10-17)

¹ Sa tiqiro buheri bato Galilea wame tiri ditara ape sie pahrẽpũ usã Jesu mehna pehãa wahan. Ti ditara pajiri ditara Tiberia wame tiri. ² To pano Galilea yehpapũ Jesu dohatiyequinare tiquina dohatiyere tiqiro cohãgũ masa ihñae tiri. Tiquina sa ihñari bato Jesu pehãgũ ihñañe masa peyequina tiqirore nanũ tã cãri. ³ Topũ esana usã tiqiro buhena

pehe tiqiro mehna canap̄u m̄aja sa, t̄u buip̄u dujii. ⁴ Ti deco pascua wame tiri bose deco ijiato judio masa us̄a ya bose deco mehenoḡa d̄uhsari. ⁵⁻⁶ Top̄u dujiro, Jesu peyequina masa tiqiro cahap̄u tiquina ahtaḡu ihñadoqueori. Sa ihñadoqueoro Felipere sinituri:

—¿Ahriquina masa tiquina ihyatire nohop̄u d̄unatari mari? nidi Felipere.

Jesu tiqiro basi tiqiro yeatire masieperota Felipere sinituri, “¿Dahse yahtiroitari?” nino. ⁷ Tiqiro sa sinituḡu t̄ahoro Felipe yahtiri:

—Doscientos niñeru cjoeri pose ihyayere mari dúpeḡuta masare dayeḡa ihyayere mari itiepeḡuta ne esa tuhasi, nidi Felipe Jesure.

⁸ Us̄a mehna c̄jano Andre, Simo Pedro bahuro pehe Jesure yahuri:

⁹ —Ihc̄a omope p̄a pacare, p̄h̄aro wahire nijino oh̄o c̄uore. To punoḡata tiqiro c̄uorepeḡuta masa pehe peyequina waro ijire. Sa yero ahri mehenoḡa ihyaye ne esa tuhasi, nidi Andre.

¹⁰ —Masare duji dutiya m̄usa, nidi Jesu us̄are tiqiro buhenare.

Top̄u taa dayeḡa ijiro ijiri. Us̄a duji dutiḡu masa nuju sa pihtiaritaa buip̄u. Um̄ua dihitare mari queoḡu cinco mil ijiri. ¹¹ Tiquina sa nuju saḡu ihñano Jesu pehe p̄are ne, Coh̄ac̄j̄ure “Quehnoare” nidi. Sa ni tuhasarota us̄are tiqiro buhenare iti dutiri. Tiqiro sa dutiḡu us̄a pehe dujiyequinare iti c̄au. P̄h̄aro wahi ḡuh̄are iti c̄au. Ijip̄-ihtieyquinare quehnoano tiquina esa tuharo ihyayere tiquinare itii. ¹² Sa ye masa pehe yapia wahari. Tiquina sa yapiḡu ihñano Jesu us̄are nidi:

—Tiquina ihya d̄uharire quehnoano ne peho c̄ah̄ña. Sa yena tiquina ihya d̄uharire ne bos̄i, nidi.

¹³ Tiqiro sa niḡu us̄a pehe ihc̄a omope p̄a paca d̄uhsarire us̄a ne cah̄mecoaḡu doce puh̄use

waro wijiari. ¹⁴ Sa ye masa ti bajumehnenore Jesu tiqiro yeḡu ihñañe, oh̄o saha nidi:

—Ijirota ijire. Ahriqiro Coh̄ac̄j̄u yere yahu mahtariqiro ahri yehpap̄u ahtariqiro mari cohteriquirota ijire, nidi tiquina.

¹⁵ Tiquina Jesure tiquina p̄h̄atoro ijiatiqiro ñehe s̄o duamed̄i. Jesu tire masino pari turi ihc̄aquirotota canap̄u wahaa wahari.

Jesu aco bui tiniahye

(Mt 14.22-27; Mr 6.45-52)

¹⁶ Ñamicahap̄u us̄a tiqiro buhena ditarap̄u buha. ¹⁷ Top̄u re buha sa, yuc̄sap̄u saj̄a, Capernau wame tiri macap̄u peh̄au. Us̄a peh̄ari p̄je ñamip̄u ijiri. Sa yero Jesu us̄a cahap̄u ahtaeranidi. ¹⁸ Wihnono tutuaro w̄eḡu, pajiri ma pahc̄ori wahc̄ari. ¹⁹ Ihc̄a omope kilómetro esaboro waro us̄a esaḡu waro Jesu us̄a cahap̄u wihiri. Aco bui tiqiro ahtaḡu ihñau us̄a. Sa us̄a cahap̄u tiqiro ahtaḡu ihñana us̄a cuei. ²⁰ Sa us̄a cueḡu ihñano tiqiro us̄are yahuri:

—Ne yuh̄are ihña cuerac̄h̄ña. Yuh̄ata ijiaja, nidi Jesu.

²¹ Tiqiro sa niḡu t̄uhona us̄a bucueye mehna tiqirore piti ca saj̄a dutii. Tiqiro saj̄ari batoḡata us̄a wahari yehpap̄u peh̄a sa tuhasau.

Masa pehe Jesure macahye

²² Ti ñamine masa top̄u tojoariquina pehe ihc̄ariata us̄a peh̄atiare ihñahye. Tia mehna us̄a peh̄aḡu ihñari tiquina. Jesu us̄a mehna tiqiro wahaeraḡu ḡuh̄are ihñari tiquina. Sa ye ape decore tiqirore cohteye nimahye.

²³ Tiberia wame tiri macap̄u ahtaye, Jesu Coh̄ac̄j̄ure “Quehnoare”, tiqiro niديو cahaḡa c̄j̄unop̄u, masare tiqiro ihyaye itiriro caha c̄j̄unop̄u wah̄a sahye tiquina yuc̄sa mehna. ²⁴ Sa ye ape deco us̄a Jesu mehna ijirore us̄a mariedaḡu ihñañe, masa yuc̄sap̄u

sajã, Capernaupũ usãre nãnũ tã pehã sari. Jesure maca saye nidi tiquina.

Jesu catiyere oho, ihyaye yero saha ijiriquiro ijire

²⁵ Ditarapũ pehã, Jesure boca saye, masa sinituri tiquirore:

—¿Buhegũ, ðahse ijigũ ahtari mũhũ ohõpũre? ni sinituri tiquina.

²⁶ Tiquina sa sinitugũ Jesu tiquinare yahuri:

—Ijirota niita niaja mũsare. Bajumehnedire yũhũ yepegũta yũhũ pehere wacũ tutuerare mũsa. Yũhũre wacũ tutuerapenata yũhũre macare mũsa. Yũhũ mehna bũjũye ihyana, mũsa yapirina yũhũre maca cãhtari tja. ²⁷ Ihyaye ne sa iiducuerare. Camepũ pihtia wahare. Sa yena tire wacũducueracãhña. Apeye ihyaye sijoro saha ijiye ihyaye pehere macaña mũsa. Ti ihyayere bocana ijipihitiye decori Cohãcjũ mehna ijinata. Sa ye ti ihyaye pũrita ne pihtierare. Ti ihyayere yũhũ masũ Cohãcjũ ohorigũ mũsare ohoutja. Cohãcjũ yũhũ Pacũ yũhũre tire oho dutiriquiro ijire. Cohãcjũ tiquiro ohorigũ yũhũ ijiyere ihño tuhasari mũsare, nidi Jesu.

²⁸ Tiquiro sa nigũ tiquina sinituri tiquirore:

—¿Cohãcjũ tiquiro ye dutiyere yena tana ðahse yenatari usã? ni sinituri tiquina.

²⁹ —Ahrire Cohãcjũ mũsare ye dutire: “Yũhũ ohoriquirore wacũ tutuaya”, nino mũsare ye dutire Cohãcjũ, nidi Jesu.

³⁰ Tiquiro sa nigũ tũhoye tiquina ohõ saha nidi tja:

—Cohãcjũ ohorigũ ijigũ tiquiro tutuaye mehna ye ihñoña usãre mũhũre usã quehnoano wacũ tutuatire. ¿Yabe borore yeitjari mũhũ? ³¹ Mari ñecusũmũa mũnapũ panopũ cjẽna masa marienopũ manã wame tiye pacare ihyae tiahye. Cohãcjũ yere tiquina

ojoari pũpũ ohõ saha ni yahuahye: “Tiquiro tiquinare uhmũse cjẽ ihyayere oho tiahye tiquina ihyatire”, ni ojoahye Cohãcjũ yere tiquina ojoari pũpũ. ¿Tiquiro sa yeriro sahata yeitjari mũhũ gũhũ? nidi tiquina.

³² Tiquina sa nigũ Jesu yahuri tiquinare:

—Ijirota niaja mũsare. Moise uhmũse cjẽ ihyayere ohoerari mũsare. Yũhũ Pacũ pehe uhmũse cjẽ ihyaye potota ijiyere mũsare ohoriquiro ijire. ³³ Cohãcjũ ye ihyaye uhmũsepũ dijia taye, ijipihitiri yehpa cjẽnare catiyere oho masine, nidi Jesu tiquinare.

³⁴ —Pũhto, decoripe ti ihyayere ohoya usãre, nidi tiquina.

³⁵ Tiquina sa nigũ tũhoro Jesu yahuri tiquinare:

—Yũhũ pehe catiyere oho, ihyaye yero saha ijigũ ijiaja. Mari ye ihyayere mari ihyari batota duita ujuã ahbaa wahaja mari tja. Sihniñe gũhũre mari sihnidi batota aco wũoa wahaja tja. Sa ijiepegũta yũhũre cahmediquiro, yũhũre wacũ tutuariquiro ujuã ahbaerariquiro yero saha tiquiro bucueye tiquirore pihtisi. ³⁶ Mũsa pehe yũhũre ihñaepenata yũhũre wacũ tutueranine. Tireta mũsare yahue timi yũhũ. ³⁷ Ijipihitiyequina yeequina ijiatiquinare yũhũre yũhũ Pacũ tiquiro cũriquina pehe yũhũre cahmeeta. Sa ye yũhũre cahmeñequinare ne cohãsi yũhũ. ³⁸ Uhmũsepũ ahtagũ yũhũ cahmeno yei ahtagũ niedũ yũhũ. Yũhũre ohoriquiro tiquiro cahmediro sahata yei ahtagũ nii yũhũ. ³⁹ Ahrita ijire yũhũre ohoriquiro tiquiro cahmeñe waro: Ijipihitiyequina yeequina yũhũre tiquiro ohoriquinare yũhũ boeragũ cahmene yũhũre ohoriquiro pihtiri deco ijigũ tiquina masa mũjatire. ⁴⁰ Ijipihitiyequina yũhũre Cohãcjũ macare ihñañequina,

yuhare wacū tutuayequina ijipihitiye decori tiquiro mehna tiquina ijigū cahmene yuh Pacu. Sa yegu pihtiri decopu tiquinare masoutja, nidi Jesu.

41 “Yuhuh umhusepu ahtaye ihyaye yero saha ijigu ijiaja”, tiquiro nigū tūhoye judio masa usā puhtoā pehe tiquiro mehna usua, tiquina basi Jesure ñano ni yahuducuri.

42 —¿Ahriquiroy Jesu José macano ijierajari? Tiquiro pacuro, pacoro gūhare mari masiaja. Sa yero mari yero saha pagu tiriquireta ijire. ¿Sa ijieperota dūhsero “Uhmusepu ahtau”, niajari tiquiro? ni usuari tiquina.

Tiquina sa nigū tūhoro Jesu yahuri tiquinare:

43 —Musa yuhare ñano ni yahuducueracāñā. 44 Yuhuh Pacu yuhare ohoriquiro pehe masare yuhuh pehere cahmegū yere. Tiquiro sa yeragū masa pehe yeequina iji masiedaboaya. Pihtiri deco ijigū yeequinare masoutja yuhuh. 45 Cohācjū yere yahu mūhtariquina pehe ohō saha ni ojoahye: “Cohācjū tiquinare buherota”, ni ojoahye Cohācjū yere yahu mūhtariquinapu. Ijipihtiyequina yuhuh Pacu ye buheyere tūhoyequina, tiquirore yuhtiyequina yuhare cahmene. Sa yeye yeequina ijire.

46 Yuhuh Pacure ne ihcāquiro masano ihñedare. Yuhuh Cohācjū ohorigu dihita yuhuh Pacure ihñau. 47 Ijirota niaja mū sare. Yuhuhare wacū tutuariquiroy ijipihtiyey decori yuhuh Pacu mehna sa ijiducurota. 48 Yuhuh catiyere oho, ihyaye yero saha ijigu ijiaja. 49 Musa ñecusumna muna iji turiayequina masa marienopu manāre ihyaetiahye. Sa tire ihyaepeta yariaa wahae tiahye. 50 Uhmusepu ahtari ihyayere yuhuh niñe ihyayere masano ihyaro, ne pecapu wahasi.

51 Yuhuh umhusepu ahtari ihyaye catiyere oho, ihyaye yero saha ijigu ijiaja yuhuh. Ahri ihyayere ihyariquiroy ijipihtiyey decori yuhuh Pacu mehna sa ijiducurota. Ahri ihyaye catigū yere. Ahri ihyaye yero saha ijiye yuhuh paguta ijire. Ijipihtiri yehpa cjēna Cohācjū mehna tiquina sa ijiducuatire yuhuh pagure ohogutja. Sa ohogu yariagutja, nidi Jesu.

52 Tiquiro sa nigū tūhoye usā acaye judio masa pehe tire ohō saha ni yahuducuri tiquina basi:

—¿Ahriquiroy dūhse ye tiquiro pagure ihyatire ohorotari? nidi tiquina basi.

53 Tiquina sa nigū tūhoro Jesu yahuri:

—Ijirota niaja masare. Yuhuh masu Cohācjū ohorigu ijiaja. Yuhuh pagure ihyeriquiro, yuhuh diire sihnieniquiro umhusepu wahasi. 54 Sa yuhuh pagure ihyariquiroy, yuhuh diire sihnidiquirore pihtiri deco ijigū masoutja. Sa yero umhusepu sa ijiducurota tiquiro. 55 Yuhuh pagu potota ihyaye waro yero saha ijire. Yuhuh dii potota sihniñe yero saha ijire. 56 Yuhuh pagure ihyariquiroy yuhuh diire sihnidiquiro yuhuh mehna bucueye mehna ijiducurota. Sa yegu yuhuh gūhu tiquiro mehna bucueye mehna ijiducuaaja. 57 Yuhuh Pacu yuhare ohoriquiro sa ijiducure. Sa ijiducuro, yuhuh gūhare sa ijiducugū yere. Sa yeye yuhuhare sa ijiducugure masa ihyaye, Cohācjū mehna umhusepu sa ijiducuetā tiquina gūhu. 58 Ahri tjire umhusepu ahtari ihyaye. Mari ñecusumna muna iji turiayequina tiquina ihyari yero saha ijierare ahri ihyaye. Tiquina pehe ti ihyayere ihyaepeta yaria pihtia wahae tiahye. Ahri ihyaye pehere ihyariquiroy umhusepu sa ijiducurota, nidi Jesu.

59 Capernaupu judio masa usā buheri wuhapu Jesu buhero, sata ni

yahuri.

Jesu ye buheyere t̄hona
ūhm̄usep̄u sa ijiducunata mari

⁶⁰ Peyequina Jesure cah-
meñequina tiqiro sa ni buheyere
t̄hoye, oh̄o saha ni yahuducuri:

—Ahri buheye tutuaro mijore.
Sa yena mari t̄ho duera c̄j̄aja, ni
yahuducuri tiquina basi.

⁶¹ Tiquina sa nigū Jesu pehe
tiquina yahuducurire masidi. Sa
masino tiqiro sinituri tiquinare:

—¿Ahri buheyere t̄hona usua-
jari m̄usa? ⁶² ¿Yuh̄u mas̄u
Coh̄ācj̄u ohorigu ūhm̄usep̄u yuh̄u
tojoaa wahagū ih̄nana d̄uhse ni
t̄hotunatari m̄usa? ¿To ḡuh̄ure
usuanatari m̄usa? ⁶³ Mas̄uno
tiqiro jeripohnare c̄uro catire.
Tiqiro pagu pehe tiqirore
catigū yerare. Mas̄uno tiqiro
jeripohna tiqirore catigū yero
saha yuh̄u buheye pehe m̄usare
Coh̄ācj̄u mehna sa ijiducugū yere.
⁶⁴ Apequina m̄usa mehna c̄j̄ena ne
yuh̄ure wacū tutuerare, nidi Jesu.

Coã warop̄ure Jesu tiqirore
wacū tutueyequinare masidi. Sa
yero tiqirore ih̄na tuhtieyquinare
ih̄noatiqiro ḡuh̄ure masi tuhasari.
Sa tiqirore wacū tutueyequinare
masino “Apequina m̄usa mehna
c̄j̄ena yuh̄ure wacū tutuerare”, nidi
Jesu. ⁶⁵ Sa ni tuhasa oh̄o saha ni
nemori:

—Oh̄o saha ni yahumi m̄usare:
“Yuh̄u Pac̄u masare yuh̄u pehere
cahmegū yere. Tiqiro sa yeragū
masa pehe yeequina iji masied-
aboaya”, m̄usare nie timi, nidi Jesu.

⁶⁶ Tiqiro sa ni buhegū
t̄hoye peyequina Jesure cah-
memediquina tiqirore coh̄ā,
tiqiro mehna pari turi wahaerari.
⁶⁷ Tiquina sa yegū ih̄nana Jesu us̄are
doce tiqiro buhenare sinituri:

—¿M̄usa ḡuh̄u yuh̄ure coh̄ānatjari?
ni sinituri us̄are. ⁶⁸ Tiqiro sa nigū
Simo Pedro yuh̄tiri tiqirore:

—Puhto, us̄are apequiro
buheriquiro mariedare. M̄uh̄u ye
buheyere t̄hona Coh̄ācj̄u mehna
sa ijiducunatja us̄a. M̄uh̄u ye
buheye dihita tire yahure us̄are.
⁶⁹ Sa yena us̄a m̄uh̄ure wacū
tutuaja. Sa yena m̄uh̄u quehnoagu,
Coh̄ācj̄u mac̄u tiqiro ohorigu
m̄uh̄u ijigū us̄a masiaja. Sa yena
m̄uh̄ure coh̄āsi us̄a, nidi Simo Pedro
Jesure.

⁷⁰ Tiqiro sa nigū t̄horo Jesu
yahuri us̄are:

—Yuh̄u pehe m̄usare doce be-
sei. Sa ijiepegūta ih̄cāquiro m̄usa
mehna c̄j̄ano wat̄no yaquiro iji-
atiqiro ijire, nidi us̄are tiqiro
buhenare.

⁷¹ Sa nino Judare Simo Iscariote
mac̄unore nino nidi. Juda pehe
doce us̄a mehna c̄j̄ano Jesure ih̄na
tuhtieyquinare ih̄noatiqiro iji.

7

Jesu acaye tiqirore “Coh̄ācj̄u
mac̄uno ijire”, ni, ne masiedahye

¹ Came Jesu Galilea yehpap̄u
tinino wahari. Judea yehpap̄u
judio masa tiqirore wej̄ē duari.
Tiquina sa wej̄ē duagū masino
tiqiro ti yehpap̄u wahaerari.
² Judio masa daye wuh̄usegā
us̄a yeati bose deco mehenogā
d̄uh̄satjiāri. ³ Sa ye Jesu bahana
tiqirore yahuri:

—Judeap̄u wahaya. Top̄u m̄uh̄u
yequinare m̄uh̄u bajumehneñene
ih̄nogu wahaya m̄uh̄u. ⁴ Masare
m̄uh̄u bajumehneñene ih̄no duagu
ne n̄uosi m̄uh̄u. Ye ih̄nono
cahmene. Potota ahri ba-
jumehneñene ye masigu ijigū tire
masare ih̄noña, nimesi tiquina.

⁵ Tiqiro bahana ijiepet̄a Jesure
“Coh̄ācj̄u mac̄uno ijire”, niedari.
Sa yeye sa nidi tiquina tiqirore.
⁶ Tiquina sa nidi bato Jesu yahuri
tiquinare:

—Masa yuh̄ure tiquina quehnoano
masiati pje d̄uh̄sar̄ine. M̄usa
ih̄na duana bose deco ijigū waha

masine. ⁷ Ahri yehpa cjēna m̄sa pehere ih̄na tuhtierare. Tiquina ñaife yerire ȳhu yahugū tiquina ȳhu pehere ih̄na tuhtire. ⁸ Bose deco ijigū wahaya m̄sa sehsaro. Ȳhu pehere ȳhu wahati pje d̄hsarīne. Sa yegu ȳhu pehe bose decore mianogāre ih̄na waharīsi, nidi Jesu tiquinare.

⁹ Sa nino tiquiroy Galileap̄ tojoiari.

Jesu daye w̄h̄usegā tiquina yeri bose deco ijigū wahahye

¹⁰ Bose decop̄ Jesu bahana tiquina wahari bato Jesu ḡhu tiquina bato wahari. Sa waharo masa tiquina ih̄eno watoa wahari. ¹¹ Bose deco ijiyequina judio masa us̄a p̄h̄toa tiquiroy macari:

—¿Nohop̄ ijiagari tiquiroy? ni sinituahye tiquina.

¹² Sa ye masa ḡhu Jesure peyequina yahu wajahye. Apequina “Tiquiro quehnoariquiroy ijire”, ni ahye. Apequina “Tiquiro ñariquiroy ijire. Masare mehoriquiroy ijire”, ni yahu wajahye tiquina.

¹³ Sa niepeta judio masa us̄a p̄h̄toare cueye masa tiquina ih̄enop̄ Jesure yahu wajahye.

¹⁴ Bose decori deco mehna d̄hsagū Cohācjū w̄h̄ap̄ Jesu sajā saro, buheri. ¹⁵ Tiquiro sa buhegū us̄a acaye judio masa t̄ho maria waha, oh̄o saha nidi:

—¿Ahriquiroy buherop̄ buhemehnediquiro ijiiperota d̄hsero quehnoano masi pehoajari? nidi tiquina basi tiquiroy.

¹⁶ Tiquina sa nigū Jesu yahuri tiquinare:

—Ȳhu buheri yee yahuducuye ijierare. Ȳh̄are ohoriquiroy ye yahuducuye pehe ijire ahri buheye. ¹⁷ Cohācjū cahmeñene ye duayequina ȳhu buheye pehere Cohācjū ye yahuducuye ti ijigū masieta. Ȳhu esa tuharo ȳhu buheragū ḡh̄are masieta tiquina. ¹⁸ Ih̄cāquiroy tiquiroy esa tuharo

tiquiroy masiñe mehna buhero “Ȳh̄a dihitare ño peoya”, nino nine tiquiroy. Sa ijipegāta ȳh̄are ohoriquiroy pehere m̄sa ño peogū cahmeaja ȳhu pehe. Ȳhu sa nigū t̄hona “Potota ni yahuducure tiquiroy. Ne mehoedare”, ni masinata m̄sa.

¹⁹ Cohācjū dutiyere Moise m̄nano pehe cūahye m̄sare. Tiquiro sa cūpegāta m̄sa ijiptina ti dutiye pehere ne yuhtierari. ¿D̄hsena ȳh̄are wejē duajari m̄sa? nidi Jesu us̄a acaye judio masare.

²⁰ —T̄ho masiedare m̄h̄u. Wat̄nore c̄ore m̄h̄u. M̄h̄are wejē duayequina mariedare, ni yuhtiri tiquina Jesure.

Tiquina sa nigū Jesu yuhtiri:

²¹ —Mari judio masa mari sori deco saurū ijigū ih̄cā tahata Cohācjū tutuaye mehna dohatiriquiro tiquiroy dohatiyere ȳhu cohāgū m̄sa ih̄na maria wahari. ²² Mari ñec̄us̄m̄a m̄na panop̄ cjēna pehe tiquina pagare cuhnucun̄ sohtoa cahserogāre ȳh̄are neñequina tiquina yeriro sahata Moise ȳh̄are ne dutiahye. Potota Moise pehe ti dutiroy cūdahye. Mari ñec̄us̄m̄a m̄na iji turiayequina pehe tire cū, yahu turiahye. Tiquiro sa dutigū saurū sori deco ijipegāta mas̄nore tiquiroy cuhnucun̄ sohtoa cahserogāre ȳh̄are nene m̄sa. ²³ Saurū ijigū mas̄nore tiquiroy cuhnucun̄ sohtoa cahserogāre ȳh̄are nene m̄sa, Moise dutiyere yena tana. ¿M̄sa ḡhu saurū decore tire yepenata ti decop̄ dohatiriquiroy ȳhu yuht̄ogū d̄hsena ȳhu mehna usuajari m̄sa? ²⁴ Ȳhu yerire m̄sa quehnoano masiedapenata, ȳh̄are ñano t̄hotuerac̄h̄na. M̄sa quehnoano masidi bato ȳh̄are m̄sa t̄hotugū potota ijirota. Ȳhu yerire masina, queoro masiñe m̄sa, nidi Jesu.

Jesu coã waropu tiquiro ahtarirore yahuahye

²⁵ Tiquiro sa ni yahuri bato meheñequinagã Jerusalē cjēna tiquirore ohō saha ni yahu wajari:

—¿Ahriquiro judio masa pãhtoa tiquina wejē duariquiro ijierajari? ²⁶ Sa yero tiquirore tiquina wejē duepegãta ijipihtiequina ihñono masare buhero nine tiquiro. Sa ye tiquirore wejē duayequina ijiepetata sa ihña cãre. ¿“Tiquiro potota Cristo ijire”, ni, tãhotuagari pãhtoa pehe? ²⁷ Sa ijiepegãta ahriquiro Jesu tiquiro ahtarirore mari masiaja. Cristo pehe masare yãhdũoatiquiro tiquiro ahtagũ tiquiro ahtariro pehere masimehnedare. Sa yero masare yãhdũoatiquiro Cristo waro ijierare Jesu, ni yahu wajari tiquina Jerusalē cjēna.

²⁸ Tiquina sa niñene masino, Jesu ohō saha ni tutuaro sañuducu buheri Cohãcjũ wãhãpũ:

—Yãhũre ohō saha ni tãhoture mũsa: “Tiquirore masiaja. Sa yena tiquiro ahtariro gãhũre masiaja”, ni tãhotumene mũsa. Mũsa sa ni tãhotuepenata yãhũre ohoriquirore ne masiedare mũsa. Yãhũre ohoriquiro poto niniquiro, poto yeriquiro ijire. Tiquirore ne masiedare mũsa. ²⁹ Tiquirota yãhũre ohori. Sa yegũ tiquiro cahãpũta ahtaũ. Sa yegũ yãhũ pehe tiquirore masiaja, nidi Jesu judio masare.

³⁰ Tiquiro sa nigũ tãhoye tiquirore ñehe duamedĩ. Tiquina sa ñehe duepegãta Jesu tiquiro ñano yãhdũati pje dũhsarĩdi. Sa ye tiquina tiquirore ñehe masiedari. ³¹ Apequina masa pehe peyequina tiquirore wacũ tutuaye, ohō saha nidi:

—“Cristo peye tahari Cohãcjũ tutuaye mehna ye ihñonota”, panopũ tiquina ni yahu mãhtariro sahata ahriquiro Jesu pehe peye tahari Cohãcjũ tutuaye mehna

ye ihñore. Ijipihtiequina apequina yãhdũoro Cohãcjũ tutuaye mehna ye ihñore tiquiro. Sa yero Cristo Cohãcjũ ohoriquirota ijire ahriquiro Jesu, nidi Jesure wacũ tutua dũcayequina.

Fariseo masa Jesure peresu ye dutiahye

³² Masa Jesure tiquina sa ni yahuducugũ tãhoahye fariseo masa. Sa ye tiquina, pahia pãhtoa mehna Jesure ñehe dutiye ohoahye surarare, Cohãcjũ wãhũre cohteyequinare.

³³ Sa yero Jesu judio masare ohō saha nidi:

—Meheñe decorigã mũsa mehna ijiniitja. Sa yegũ mehenogã bato yãhũre ohoriquiro cahãpũ wahaũtja. ³⁴ Yãhũ ijiatore mũsa waha masiedare. Sa yena yãhũre macaepenata ne bocasi mũsa, nidi Jesu judio masare.

³⁵ Tiquiro sa nigũ tãhoye tiquina basi ohō saha ni yahuducuri:

—¿Ahriquiro sa nino nohopũ wãharotari, mũsa tãhotugũ? ¿Griego masa cahãpũ judio masa waha siteriquina tiquina ijiye macaripũ griego masapũre buhero wahaboa-gari ahriquiro? ³⁶ ¿“Yãhũ ijiatore mũsa waha masiedare. Sa yena mũsa yãhũre macaepenata ne bocasi”, tiquiro nigũ dũhse nino boro ahriquiro sa niajari? ni yahuducuri judio masa tiquina basi.

Catigũ yeye mãrine yahuahye Jesu

³⁷ Bose deco bato tiri deco ti deco waro ijiro nidi. Ti decore Jesu topũ ducuro, tutuaro mehna sañuducu yahuri:

—Aco wãhoyequina acore tiquina tutuaro cahmeno saha ijipihtie decori Cohãcjũ mehna mũsa ijiatire tutuaro cahmena yãhũre siniña. Mũsa sa sinigũ tiquiro yequina mũsare iji dutiitja. ³⁸ Yãhũre wacũ tutuayequinare ohō saha ni ojoahye Cohãcjũ yere tiquina

ojoari p̄p̄: “Mári pohterip̄ catigū yeye aco sa wijiaducuro sahata catigū yeriquiro tiquina mehna sa ijiducurota”, ni ojoahye Cohācjā yere tiquina ojoari p̄p̄, ni yahuri Jesu judio masare.

³⁹ Sa catigū yeriquirore wame peo yahuro “Yūhare wacū tutu-ayequina Espiritu Santore c̄oeta”, nino nidi Jesu. Tiquiro ūhm̄sep̄ tiquiro m̄jaedarīgū Espiritu Santo pehe wihieraniahye.

Judio masa tu wahye p̄a curua

⁴⁰ Jesu tiquiro sa nigū t̄hoye, masa peyequina ohō saha ni yahuducuri:

—Ahriquirō potota Cohācjā yere yahu m̄htariquiro mari cohteriquiro ijire, nidi masa.

⁴¹ Ohō saha nidi apequina ḡh̄:

—Ahriquirō Cristo marine yūhd̄oatiquirō ijire, nidi.

Apequina pehe ohō saha nidi:

—Cristo ahtarō, Galilea yehpa c̄jāno ijisi tiquiro. Ahriquirō Jesu pehe to c̄jānota ijire. ⁴² Cristo Davi m̄nāno panamino ape tjuro c̄jāno ijiatiquiro ijirota. Sa yero Davi ya maca ijirirōp̄ Belēp̄ Cristo masa bajarōta. Ohō saha ni yahure Cohācjā yere tiquina ojoari p̄p̄. Ahriquirō Jesu pehe Belēp̄ masa bajarahye. Sa yero tiquiro Cohācjā ohoriquiro Cristo waro ijierare, nidi tiquina.

⁴³ Sa ye Jesure t̄homediquina p̄a curua tu wari tiquina basi.

⁴⁴ Meheñequinagā masa pehe Jesure ñehe duamedi. Sa ñehe duepeta tiquirore ñehedari.

Judio masa p̄h̄toa Jesure ne wacū tutuerahye

⁴⁵ Sa ye surara pahia p̄h̄toa cahap̄ fariseo masa cahap̄ tojoaa wahahye. Tiquina tojoa sagū ihñāñe tiquina surarare sinituahye:

—¿D̄hsena Jesure ñehedari m̄sa? ni sinituahye tiquina pehe.

⁴⁶ —Tiquiro quehnoa yūhd̄aro yahuducuriquiro ijiri. Apequina tiquiro yero saha yahuducuyequina ne mariedare, ni yūhtiahye surara tiquinare.

⁴⁷ Tiquina sa nigū fariseo masa pehe ohō saha ni yahuahye:

—¿M̄sare tiquiro mehōgū “Potota nino niaga”, niajari m̄sa ḡh̄? ⁴⁸ Mari p̄h̄toa Jesure wacū tutueyequina ijiye ne tiquirore cahmedare. Ūsā ḡh̄ sa ijina tiquirore cahmedaja. ⁴⁹ Ahriquina masa pehe Cohācjā dutiyere Moiserē tiquiro c̄uire masiedare. (Sa masieñequina ijiye Jesure wacū tutuayequina ijiye, tiquirore cahmene.) Tiquina sa cahmedi buhiri tiquinare mari Pac̄ buhiri dahrerota, niahye fariseo masa.

⁵⁰ Fariseo mas̄no Nicodemo Jesure yahuducuro esariquiro top̄ ijiahye tiquina mehna. Tiquina sa nigū t̄horo ohō saha niahye tiquiro tiquinare:

⁵¹ —Jesu ñano yerire masiedaja mari. Sa masiedana marine tiquiro yahuato pano tiquirore buhiri dahre masiedaja mari. Sa masiedapenata tiquirore buhiri dahrena, mari ye dutiyere yūhd̄ad̄cana niaja mari, niahye Nicodemo tiquinare.

⁵² Tiquiro sa nigū t̄hoye ohō saha ni yūhtiahye tiquina:

—¿M̄h̄ ḡh̄ tiquiro yero saha Galilea c̄jāta ijiajari? Cohācjā yere tiquina ojoari p̄re buhe pehoya. Sa buhegū “Cohācjā yere yahu m̄htariquina ne ihc̄aquirō mariedare Galileare”, ni buhe masiita m̄h̄. (Sa yero sa ni maca c̄āno nine Jesu,) ni yūhtiahye tiquina Nicodemore.

[⁵³ Tiquina sa nidi bato tiquina ye w̄h̄sep̄ tojoaa wahahye.

8

Ūm̄no mehna ñano yericorore judio masa p̄h̄toa wacūeno mehna esa p̄jahye

¹ Jesu cunupu Olivo wame tidupu wahari. ² Sa yero bohrearo Cohăcju wuhupu tiquiro esari tja. Tiquiro esagū ihñañe masa peyequina tiquiro cahapu cahmecoari. Tiquina sa cahmecoagū ihñano tiquiro pehe dujitjiāno tiquinare buhe ducari. ³ Tiquiro sa buheri watoa usā acaye judio masa buheyequina, fariseo masa mehna ti wuhupu numinore ne cāhtari. Ticoro umano mehna ñano yegū waro wacūeno mehna esa pjeahye tiquina ticorore. Sa esa pjeje ticorore Cohăcju wuhupu ne sajāri tiquina. Ne sajā sa tuhasa ijipihtiyequina ihñono ticorore duhu docoye ohō saha nidi:

⁴ —Buhegu, ahricoro umano mehna ñano ticoro yegū waro wacūeno mehna ticorore esa pjei. ⁵ Cohăcju dutiyere Moise mananopu marine tiquiro cūri ohō saha nine: “Umuno mehna ñano yericorore utā paca mehna doque wejēña”, niahye Cohăcju dutiye. ¿Muhu waro dahse ni tūhotuajari ahrire? ni sinituri tiquina Jesure.

⁶ Jesu ñano nigū tūho duaye nimesi tiquina tiquirore yahusāñe tehe. Tiquina sa sinituepegūta Jesu muhri quehe, yehpupu tiquiro omo piria mehna ojoari. ⁷ Sa tiquina ni sinituducugū Jesu pehe wahcā nuju sa, tiquinare yahuri:

—Musa mehna cjāno ñano yeriariquiro ticorore utā mehna doque mahhtaahdo, nidi Jesu.

⁸ Sa ni tuhasa pari turi muhri quehe, yehpupu ojoari tja. ⁹ Tire tūhoye tiquina ñañe yerire wacūñe, tiquina wahmisumua pehe wijia mahitari. Tiquina bato tiriquina mehna cjēna gūhu wijia pihtia wahari. Sa yero numino topu ducurico Jesu mehna tojoari. ¹⁰ Sa yero Jesu wahcā nuju sa ticorore sinituri:

—¿Nohopu wahajari tiquina? ¿Muhare buhiri dahre du-

amediquina mariedajari yojopure? nidi ticorore.

¹¹ —Mariedare puhto, ni yūhtiri ticoro.

—Yuhu gūhu buhiri dahreraja muhare. Wahaya. Sa yego ñañene ye nemoedacāhña, nidi Jesu ticorore.]

Buhrioro marine ihña masigū yero saha Jesu ahri yehpa cjēnare mari Pacure masigū yere

¹² Pari turi Jesu ti wuhupu ijiyequinare yahuri:

—Buhrioro marine to ihña masigū yero sahata yuhu ahri yehpa cjēnare Cohăcjure masigū yeaja. Yuhare wacū tutuariquiro ijipihtiyecorore Cohăcju mehna sa ijiducurota. Sa yero tiquiro quehnoañene wacūnota. Sa yero tiquiro ñañene wacū duerare, ni yahuri Jesu.

¹³ Tiquiro sa nigū tiquirore fariseo masa ohō saha nidi:

—Muhu basi muhu ijiye tiyere sa ni yahuducugū nine. Sa ye muhu ohō saha ni muhu esa tuharo muhu ni yahuducū maca quēhe ne dahseati ijierare, nidi tiquina Jesure.

Tiquina sa nigū Jesu yūhtiri:

¹⁴ —Yuhu ahtarirore masiaja yuhu. Yuhu wahato gūhare masiaja yuhu. Mūsa ne tire masiedare. Mūsa ohō saha niepegūta yuhu ijiye tiyere musare yuhu yahuri potō tjire. ¹⁵ Mūsa esa tuharo mūsa ihñari dihitaro masine mūsa. Sa yena quehnoano masiedare mūsa. Sa masiedapenata yuhare ñano ni yahuducure mūsa. Yuhu pehe yuhu esa tuharo masare ne sa niedaja. ¹⁶ Sa yegū masa tiquina ijiye tiyere ihña masigū yuhu esa tuharo ihña masiedaja. Yuhu pūrita yuhare ohoriquiro mehna ihña masiaja. Sa yegū masa tiquina ijiye tiyere yuhu ihña masiñe potō tjire. ¹⁷ Mūsare dutiye tiquina ojoari pū ohō saha ni yahure. “Pūaro masa ihcāno saha tiquina yahugū

ohō saha tiquina yahuye poto tjire”, ni yahu ojoari jiri. ¹⁸ Yuhare yahuriquiro mehna usā pūana tjiaja. Yuhā ijiye tiyere yahuaja yuhā. Sa yero yuhā Pacu gūhū yahure yuhā pehere. Tiquiro tjire yuhare ohoriquiro, nidi Jesu.

¹⁹ —¿Nohopu ijiagari mūhū pacu? ni sinituri tiquina.

—Yuhare mūsa masiedare. Yuhā Pacu gūhūre masiedare mūsa. Yuhare masina, yuhā Pacu gūhūre masiboaga mūsa, ni yūhtiri Jesu tiquinare.

²⁰ Jesu tiquinare buhero sa ni yahuducuri Cohācjū wūhūpu tiquina niñeru sāñe acari cahapu. Tiquiro ñano yūhdūati pje ijieranidi. Sa ye tiquina mehna tiquiro ijiepegūta tiquina tiquirore ñehedari.

—Yuhā wahatopure mūsa pehe waha masisi, niahye Jesu

²¹ Pari turi Jesu tiquinare yahuri tja:

—Yuhā ahtaripuru wahatja. Yuhā wahari bato mūsa yuhare macanata. Sa yena mūsa ñañe buhiri tiye mehna yarianata. Yuhā wahatopure mūsa pehe waha masisi, ni yahuri Jesu.

²² —“Yuhā wahatopure mūsa pehe waha masisi”, tiquiro nigū tūhoye, “¿Ahriquiro tiquiro basi wejē yariarotari, sa nino?” nidi usā acaye judio masa tiquina basi.

²³ Tiquina basi sa nigū Jesu yahuri tiquinare:

—Mūsa pehe ahri yehpa cjanā ijire. Yuhā pehe ūhmūse cjā iji-aja. Ahri yehpuru bajarina ijire mūsa pehe. Ūhmūsepuru ahtarigū ijiaja yuhā pehe. ²⁴ Mūsa yuhā ijiye tiyere yuhā nidire “Poto ijierare”, nina, mūsa ñañe buhiri tiye mehna yarianata mūsa. Sa yegū “Mūsa ñañe buhiri tiye mehna yarianata mūsa”, nimi mū sare, nidi Jesu tiquinare.

²⁵ —¿Noa boro ijiajari mūhū? ni sinituri tiquina.

—Coā waropure yuhā niducuriro sahata ijiaja yuhā. ²⁶ Mū sare yuhā yahuati pajiro dūhsarñe. Sa yero mūsa ñano yeri buhirire mū sare yuhā yahuati pajiro dūhsarñe. Sa yegū yuhare ohoriquiro tiquiro yahurire ahri yehpa cjenare yahuaja. Tiquiro yahuri poto tjire, nidi Jesu tiquinare.

²⁷ “Yuhare ohoriquiro”, tiquiro nigū tūhoye, “Mari Pacu ijiaga”, ni tūhotuerari tiquina. ²⁸ Tiquina sa ni tūhotueragū ihñano Jesu yahuri tiquinare.

—Yuhare masure Cohācjū ohorigure mūsa yucu teō mehna wahcō doconata. Mūsa sa yena, “Tiquiro Cohācjū ohoriquiro tjire”, ni masinata mūsa yuhare. Sa yena yuhā esa tuharo yuhā yerarigū ijigū masinata mūsa. Sa yena yuhā Pacu yuhare tiquiro buheri dihitare yahurigū yuhā ijigū gūhūre masinata mūsa. ²⁹ Sa yero yuhare ohoriquiro pehe yuhā mehna ijire. Tiquiro cahmeñene ijipihtiyē decori yeducuaja. Sa yero yuhare tiquiro ne cohāedare, nidi Jesu.

³⁰ Tiquiro sa nigū tūhoye, tiquirore masa peyequina wacū tutuari.

Cohācjū pohnene, ñañe yeyequina gūhūre yahuahye Jesu

³¹ Sa ye apequina judio masa Jesure wacū tutuari. Sa yero Jesu tiquinare yahuri:

—Yuhā dutiyere ye pehona, potota yuhā buhena ijire mūsa. ³² Sa yena poto masinata mūsa. Poto ijiyere masina, ñañe yeyere duhu masinata. Sa yena cahacjēna yero saha iji nemosi mūsa, nidi Jesu tiquinare.

³³ Tiquiro sa nigū tūhoye ohō saha ni yūhtiri tiquina:

—Usã pehe panopu cjãno Abrahã mnanano panamena iji turiana iji-aja. Sa yena ne apequina tiquina cahacjãna ijieraja usã. ¿Sa yegu “Cahacjãna yero saha iji nemosi”, nigu, dahse ijero boro usãre sa niajari mahu? ni sinituri tiquina Jesure.

³⁴ Tiquina sa nigũ tuhoro ohõ saha nidi tiquiuro:

—Ijirota niaja musare. Ijipihitieuquina ñañene yeyequina pehe tiquina ñañene ye duhu masiedare. Sa yero ñañe pehe tiquina puhtoro yero saha ijire. Sa ijiyequina ijiye cahacjãna yero saha ijire tiquina. ³⁵ Cahacjãno pehe tiquiuro puhtoro ya curua cjãno ijipihitieu decori ijiducuerare. Ti wahu cjãno macu pehe ijipihitieu decori potota ti curua cjãno ijire tiquiuro. (Yahu pehe Cohãcjũ macu ijiaja. Sa yegu dutigu ijiaja. Musa ñañe yeyere duhu dutiitja.)

³⁶ Sa yena yahu Cohãcjũ macu ñañene yahu duhugũ yenohrina ijina potota ñañene duhurina ijire musa. ³⁷ Abrahã mnanano panamena iji turiana musa ijigũ masiaja. Sa ijiepenata yahu yahuye pehere tuho duerare musa. Sa yena yahure wejẽ duare musa. ³⁸ Yahu Pacu yahure tiquiuro masigũ yerire yahuaja musare. Yahu sa yahuepegũta musa pacu watĩno musare tiquiuro dutiyere yere musa gũh, nidi Jesu tiquinare.

³⁹ —Abrahã mnanano panopu cjãno usã ñecu mnanano ijie tiahye. Sa yero watĩno usã pacu ijierare, ni yahtiri tiquina.

Tiquina sa nigũ Jesu yahtiri:

—Abrahã panamena iji turiana ijina, tiquiuro yeriro sahata yeboaga musa. ⁴⁰ Cohãcjũ yahure poto tiquiuro yahuyere musare yahu yahuepegũta yahure wejẽ duare musa. Abrahã mnanano pehe ne sa yera tiahye. ⁴¹ Musa pacu tiquiuro yeriro sahata yere musa, nidi Jesu tiquinare.

Tiquiro sa nigũ tiquina yahtiri:

—Omoca duhtemehneñequina pohna ijieraja usã. Ihcãquirola ijire usã Pacu. Tiquirota ijire Cohãcjũ, nidi tiquina.

⁴² Tiquina sa nigũ Jesu yahtiri:

—Cohãcjũ mehna cjũ ijigu, ohõpũre ahtau. Sa yena Cohãcjũ musa Pacu tiquiuro ijigũ yahure cahũboya musa. Yahu esa tuharo ahtaeru yahu pũrita. Cohãcjũ tiquiuro ohogũ ahtau ohõpũre. ⁴³ ¿Dahsena yahu yahuducuyere tuhoerajari musa? Yahu yahuyere tuho duerare musa. Sa yena tuhoerare musa. ⁴⁴ Musa pacu pehe watĩno ijire. Sa yena watĩno cahmeñe pehere ye duare musa. Ahri yehpa coã waropu to iji ducagũpu, yojopu gũhure tiquiuro masare wejẽdiquiro ijire. Tiquirore poto yahuducuyere mariedare. Sa yero tiquiuro ne poto yahuducuerare. Tiquiro coã waropũre ni meho mahata ducariquiuro ijie tiahye. Sa yero tiquiuro sa ni mehoducuriquiuro ijero, ni mehoñene yahure. ⁴⁵ Yahu pehe musare poto yahuaja. Sa yahu yahuepegũta yahure tuhoerare musa. ⁴⁶ “Mahu ñano yegu ijire”, yahure ni masiedare musa. ¿Poto musare yahu yahuepegũta dahsena tuhoerajari musa? ⁴⁷ Cohãcjũ pohne pehe tiquiuro yahuducuyere tuhore. Tiquiro pohne ijierana, tiquiuro yahuducuyere tuho duerare musa, nidi Jesu tiquinare.

Abrahã tiquiuro ijiatu pano Cristo pehe iji tuhasae tiahye

⁴⁸ Tiquiro sa nigũ tuhoye judio masa tiquiuro ohõ saha nidi:

—“Mahu Samaria cjũ ijire. Sa yegu watĩnore cuore mahu”, usã nidi poto tjire, nidi tiquina Jesure.

⁴⁹ Tiquina sa nigũ tuhoro ohõ saha ni yahtiri Jesu:

—Watĩnore cuoeraja yahu. Yahu Pacu ño peoaja. Musa pehe yahure ño peoerare. ⁵⁰ Yahu masa tiquina ño peogũ cahmedaja

yuhũ. Yuhũ Pacũ pehe yuhũre ño peogũ cahmene masare. Tiquiro pũrita yuhũ ijiye tiyere quehnoano ihña masino, sata ño peo dutire. Sa yero yuhũre tiquina cahmedari buhiri, buhiri dahreatiquiro ijirota tiquiro. ⁵¹ Ijirota niaja m̄sare. Yuhũ dutiyere yeriquiro ijiphiytiye decori Cohãcjũ mehna sa ijiducurota, nidi Jesu.

⁵² Tiquiro sa nigũ tũhoye ohõ saha nidi tiquina:

—Yojopũ pũritare watĩnore c̄ogũ m̄hũ ijigũ usã quehnoano masiaja. Abrahã m̄nano yariaa wahahye. Cohãcjũ yere yahu m̄htariquina gũhũ varia pihitia wahahye. ¿Sa yegũ “Yuhũ dutiyere yeriquiro ijiphiytiye decori Cohãcjũ mehna sa ijiducurota”, nigũ dũhse nigũ sa niajari m̄hũ? ⁵³ ¿Usã ñecu m̄nano Abrahã yuhũoro tutuajari m̄hũ? Tiquiro, Cohãcjũ yere yahu m̄htariquina gũhũ variaa wahahye. ¿M̄hũ pehe noa boro ijiajari m̄hũ, sa ni yahuducugũ? M̄hũ sa nibogũ ijierare, nidi tiquina.

⁵⁴ Tiquina sa nigũ tũhoro Jesu yahu nemori:

—Yuhũ basi “Tutuagũ ijiaja yuhũ”, yuhũ nigũ, tutuagũ ijieraboaga yuhũ. Yuhũ Pacũ pehe “Tiquiro tutuariquiro ijire”, nine yuhũre. “Usã Pacũ”, m̄sa nidiquiro pehe yuhũ Pacũ tjire. ⁵⁵ M̄sa pehe yuhũ Pacũre ne masiedare. Yuhũ pehe tiquirore masiaja. “Tiquirore masiedaja”, nigũ m̄sa yero saha ni mehoñe peyagũ ijilboaga yuhũ. Potota tiquirore masiaja. Sa yegũ tiquiro dutiyere yeaja. ⁵⁶ Ahri yehpapũ yuhũ ahtatore mari ñecu Abrahã m̄nano masie tiahye. Sa masino tiquiro bucuee tiahye, nidi Jesu.

Tiquiro sa nigũ tiquina yũhtiri:

⁵⁷—Cincuenta c̄hmari c̄oeraga m̄hũ. Abrahã m̄nano panopũ cjãno ijiri. ¿Yojopũre tiquiro

m̄nanore m̄hũ dũhse masiboagari? nidi judio masa Jesure.

⁵⁸—Ijirota niaja m̄sare. Abrahã tiquiro ijiato pano yuhũ pehe iji m̄hta tuhasae tii, nidi Jesu tiquinare.

⁵⁹ Tiquiro sa nigũ tũhoye tiquina pehe utã pacare ne, tiquirore doque duamedí. Tiquina sa doque duepegũta Jesu pehe Cohãcjũ w̄hũpũ ijiriquiro duhti wijiãa wahari.

9

Caperi bajueriquirore ihñagũ yeahye Jesu

¹ Sa yena Jesu usã tiquiro buhena mehna mahapũ wahana, apequirore caperi bajueriquirore boca saũ. Tiquiro wahma masa bajuaropũta caperi bajueriquiro ijie tiahye. ² Usã gũhũ tiquirore ihñana, sinituu Jesure:

—¿Buhegũ, ahriquiro dũhsero caperi bajueriquiro masa bajuayari? ¿Ñañene yeyari tiquiro sa waharo? ¿O tiquiro pacusũmũa pehe ñañene yeyari tiquiro sa wahagũ? ni sinituu usã pehe Jesure.

³ Usã sa nigũ tũhoro ohõ saha ni yũhtiri tiquiro:

—Ahriquiro ñañene yeri buhiri caperi bajueriquiro wahaerari. Tiquiro pacusũmũa gũhũ ñañene tiquina yeri buhiri caperi bajueriquiro wahaerari. Cohãcjũ tiquirore caperi bajueragũ yeri tiquirore ihñagũ yero taro, masare tiquiro ihñoatire. ⁴ Yuhũre ohoriquiro tiquiro cũrire yojopũre yero cahmene marine. Ñamipũ mari dahra masieno sahata camepũ yuhũre ohoriquiro tiquiro cũrire ye masiedaja mari. ⁵ Ahri yehpapũ buhrioro marine to ihña masigũ yero saha ijigũ ahri yehpa cjẽnare Cohãcjũ yere masigũ yeaja yuhũ, nidi Jesu.

⁶ Sa ni tuhasarota yehpapũ sihco puti cũri. Tiquiro sa sihco puti

cūrire dihta mehna dahra more, caperi bajuerameditirore tiquiro caperire wisōri. ⁷ Sa wisōno ohō saha nidi Jesu:

—Siloé wame tiri copep_u cuhsari copep_u mah_u caperire coseg_u wahaya, nidi Jesu.

Siloé usā ye mehna niñe “Ohori cope”, niñe nidi.

Jesu tiquiro caperire cose dutiriquiro pehe waha, cose, caperi ihñariquirope tojoa wihiri. ⁸ Tiquiro tojoa wihigā tiquiro cahap_u ijিয়ে-quina tiquirore ihñari. To pano niñeru sinimediquiro tiquiro ijigā ihñariquina tiquirore ohō saha nidi tiquina basi:

—¿Ahriquiroy sohō ijiriquiro niñeru sinidiquiro ijierajari? nidi tiquina.

⁹ —Tiquirota ijire, nidi apequina pehe.

—Tiquiro ijierare. Tiquiro saha bajuriquiro ijire, nidi apequina pehe.

Tiquina sa nigū tūhoro caperi bajuerameditirore pehe ohō saha nidi:

—Tiquiro tjiaja yuh_u, nidi tiquinare.

¹⁰ Tiquiro sa nigū masa tiquirore sinituri.

—¿Caperi bajueg_u ijirig_u dahse waha ihñari mah_u? ni sinituri tiquina tiquirore.

¹¹ —Jesu wame tiriquiro sihco co mehna dihta mehna dahra more, yuh_u caperire wisōri. Yuh_ure wisō tuhasa “Siloé wame tiri copep_u mah_u caperire coseg_u wahaya”, tiquiro nigū coseg_u esau yuh_u. Yuh_u sa coseri bato yuh_u caperi quehnoano bajuri yuh_ure, ni, yahuri tiquiro masare.

¹² —¿Muh_ure sa yeriquiro nohop_u ijiagari tiquiro? nidi tiquina.

—Ōbah. Noho ijiro ijiaga, nidi tiquiro.

Caperi bajuerameditirore fariseo masa sinituahye

¹³ Sa ni yahuducu tuhasa tiquina caperi bajuerameditirore fariseo masa cahap_u neari. ¹⁴ Ti deco Jesu dihtare sihco co mehna dahra more caperi bajuerameditirore tiquiro ihñagū yeri deco saurū deco ijiri. Ti deco usā sori deco ijiri. ¹⁵ Sa ye fariseo masa pehe tiquirore sinituahye tja.

—¿Dahse ye mah_u ihñari? ni sinituahye tiquina.

—Dihta mehna yuh_u caperire wisōri. Sa yeg_u yuh_u caperire yuh_u coseri bato ihñā ducan yuh_u, ni yahuahye tiquiro tiquinare.

¹⁶ —Tiquiro saurū decore mari sori decore mari dahra dutieri decore dahraya. Sa yero tiquiro Cohācjū yaquiro ijierare, niahye apequina fariseo masa pehe.

Apequina pehe ohō saha niahye:

—Ñañene yeriquiro ohō saha yuh_uno masiedare. Sa yero tiquiro quehnoariquiro ijiboaga, niahye apequina.

Sa ye tiquina pua curua tu wahye tiquina basi. ¹⁷ Sa ye pari turi tiquina caperi bajuerameditirore sinituahye tja.

—¿Muh_ure caperire quehnoano yeriquirore mah_u waro dahse ni tūhotuajari Jesure? niahye tiquina tiquirore.

—Tiquiro potota Cohācjū yere yahu mah_utariquiro ijire, niahye caperi bajuerameditirore.

¹⁸ Coā waropure judio masa ohō saha ni tūhotumahye. “Ahriquiroy caperi bajuerameditirore ijierare”, ni tūhotumahye tiquina. Sa ni tūhotuye caperi bajuerameditirore pacusum_uare pijioahye tiquina. ¹⁹ Pijio, tiquiro pacusum_uare sinituahye fariseo masa pah_utoa.

—¿Ahriquiroy potota m_usa mac_u ijiagari? ¿Duita tiquiro caperi bajuerameditirore masa bajuari? ¿Potota caperi bajuerameditirore ijieperota dahsero ihñajari yojopure? ni sinituahye tiquina tiquiro pacusum_uare.

20 —Ahriquiuro usã macuta ijire. Sa yero duita caperi bajueriquiro masa bajue tiri tiquiuro. 21 Tire masiepenata tiquiuro ihñarire, tiquiore ihñagũ yeriquiro gãhure masiedaja usã. Usã macure sinituya. Bũcuro ijire tiquiuro. Tiquiuro basi yahu masine, niahye tiquiuro pacusumua.

22 Judio masa usã pũtoa coã waropũre ohõ saha nie tiahye.

—“Jesuta Cristo Cohãcjũ ohoriquiro ijire”, niñequinare mari buheye wũhusepu sajã dutisi usã, nie tiahye judio masa pũtoa.

Tiquina sa nigũ tũhoye caperi bajueramediquiro pacusumua judio masa pũtoare cue niahye. 23 Sa cueye, “Bũcuro ijire tiquiuro. Tiquiore sinituya”, niahye tiquina judio masa pũtoare.

24 Came judio masa pũtoa pari turi pijioahye caperi bajueramediquirore tja. Pijio ohõ saha niahye tiquiore:

—Cohãcjũ mehna pota yahuya mũhu. Jesure ni mehoriquiro tiquiuro ñaňe yeriquiro ijigũ usã masiaja. Sa yegũ pota yahuya usãre, niahye judio masa caperi bajueramediquirore.

25 Tiquina sa nigũ tũhoro ohõ saha ni yũhtiahye tiquiuro:

—Jesure tiquiuro ñaňe yeriquiro ijigũ masiedaja yũhu. Ihcãnota masiaja yũhu. Panopũre caperi bajuegũ ijie tii yũhu. Yojopũre ihñaja yũhu. Ti dihitare masiaja yũhu, ni yũhtiahye caperi bajueramediquiro tiquinare.

26 —¿Dũhse yeri mũhure tiquiuro? ¿Mũhu caperi ihñatire dũhse yeri tiquiuro mũhure? ni sinituahye tiquina.

27 —Tireta mũsare yahu tuhasami yũhu. Yũhu sa niepegũta mũsa ne tũho duerare yũhure. ¿Dũhse ye duana pari turi yũhu yahugũ tũho duajari mũsa? ¿Mũsa

gũhu tiquiuro buhena iji duajari? niahye tiquiuro tiquinare.

28 Tiquiuro sa nigũ tũhoye tiquina tuhtiahye tiquiore:

—Mũhu Jesu buherigũ ijire. Usã pehe Moise buhena ijiaja.

29 Potota Cohãcjũ Moiserẽ yahuducue tiahye. Jesu tiquiuro ahtarirore usã masiedaja, niahye tiquina caperi bajueramediquirore.

30 Tiquina sa nigũ yũhtiahye tiquiuro:

—¿Tiquiuro ahtarirore mũsa masiedagũ yũhure ihñagũ yeriquiro ijiro, Cohãcjũ ohoriquiro ijieraboagari tiquiuro? 31 Cohãcjũ ñaňe yeyequinare tiquina siniñene tũhoerare. Ti pũritare mari masiaja.

Tiquinare tũhoeraperota Cohãcjũre ño peoriquirore, tiquiuro dutiyere yeriquirore tiquiuro siniñene tũhore Cohãcjũ.

32 Coã waropũre ahri yehpa iji dũcagũpũre ne coã masa bajuaropũ caperi bajueriquirore ne ihcãquiuro ihñagũ yeriquiro marieda tiahye.

33 Sa yero Jesu Cohãcjũ ohoriquiro ijieraro yũhure ihñagũ yeraboaya tiquiuro, niahye tiquiuro tiquinare.

34 —Mũhu duita ñagũ ijie tiahye. ¿Sa ijiepegũta usãre buhe duajari mũhu? niahye judio masa pũtoa tiquiore.

Sa ni tuhasayeta tiquina tiquiore cohã wio cãhye.

Jesu yere cahmeeñequina caperi bajueyequina tiquina ihña masieno saha mari Pacũre masiedare

35 Sa yero caperi bajueramediquirore tiquina cohã wiorire Jesu tũhori. Sa tũhoro caperi bajueramediquirore boca saro tiquiore sinituri:

—¿Masũnore Cohãcjũ ohoriquirore wacũ tutuajari mũhu? nidi Jesu.

36 —¿Pũto, noa ijiajari tiquiuro? Tiquiore masigũ wacũ tutuagũtja tiquiore, nidi caperi bajueramediquirore Jesure.

³⁷ —Tiquirore ihña tuhasari mähñ. Yojoḡḡe mähñ mehna yahuducugñ tiquirota ijiaja yähñ, nidi Jesu caperi bajueramediquirore.

³⁸—Pahto, mähñare wacũ tutuaja, nidi caperi bajueramediquiro.

Sa nino tiquiro Jesu caha dñsepe curi mehna quehe sa, tiquirore ño peori.

³⁹ Tiquiro sa ño peogũ ihñano ohõ saha nidi Jesu:

—Quehnoañequina, ñañequina gũñ tiquina yerire masigũ yei ahtañ ahri yehpapare. Caperi bajueyequina tiquina ihña masieno saha tiquina yero saha ijiyequina yähñ Pacure masiedare. Sa masieñequinare yähñ Pacure masigũ yei ahtañ yähñ. “Usã quehnoano masiaja”, ni tuhutumediquina quehnoano tiquina masiedarire masigũ yei ahtañ yähñ, nidi Jesu.

⁴⁰ Tiquiro sa nigũ tuhoye meheñequinagã fariseo masa tiquirore ohõ saha nidi:

—¿“Caperi bajueyequina tiquina ihña masieno saha quehnoano masiedare mäsã gũñ”, nii niajari mähñ usãre? nidi fariseo masa Jesure.

⁴¹ Tiquina sa nigũ ohõ saha nidi Jesu:

—Caperi bajueyequina tiquina ihña masieno saha poto mäsã quehnoano masiedagũ, mäsare buhiri mariedaboaya. “Usã quehnoano masina ijiaja”, mäsã nidi buhiri, buhiri tina ijinine mäsã yojoḡḡe, nidi Jesu tiquinare.

10

Ovejare cohteriquiro quitire yahuahye Jesu

¹ Came queoye mehna buhero ohõ saha nidi Jesu:

—Ijirota niaja mäsare. Ovejare cohteri sahrño sopecaha sajäedariquiro, sopecaha

marienopñ sajäriquiro pehe yaque bucuro ijire. ² Sopecaha sajäriquiro pehe ovejare cohteriquiro ijire.

³ Sopecahare cohteriquiro sopecahare põore ovejare cohteriquiro sajätoḡe. Ovejare cohteriquiro yahuducugũ tuho cãhtare tiquiro nuñequina oveja pari. Tiquinare pijioro tiquina wame mehna pisuducure tiquiro.

Sa yero tiquinare sahrñnopñ ijiriquire piji wiodocore sopecahapñ.

⁴ Tiquiro yequire ijihiyequire piji wio tiquinare sa ahmñ tãducure. Oveja pehe tiquiro yahuducuyere tuho masiñe tiquiro bato nññ tãre.

⁵ Apequirore tiquina ihña masieniquirore nññ tãedare tiquina. Sa ye apequina tiquina yahuducuyere tuhoye, cue oma sitea wahare, nidi Jesu tiquinare.

⁶ Ahri queoyere tiquiro sa yahuepegũta tiquiro yahuyere masiedari tiquina.

Jesu ovejare quehnoano cohteriquiro yero saha tiquiro yequire quehnoano cohtere

⁷ Pari turi Jesu tiquinare yahuri tja:

—Ijirota niaja mäsare. Ovejare cohteri sahrño sopecaha yero saha ijiaja yähñ. ⁸ Ijihiyequina yähñ pano ahtayequina ni mehoñene buheyequina yaqueyequina yero saha ijire. Tiquina sa ijipegũta oveja yero saha ijiyequina yequina pehe aquire ne tuho cãedare.

⁹ Yähñ ovejare cohteri sahrño sopecaha yero saha ijiaja. Sopecaha sajäñequina yero saha ijire yähñare wacũ tutuayequina.

Sa yegñ tiquinare pecapñ waboriquinare yãhdñoutja. Ovejare cahmotari sahrño tiquinare cahmotariro sahata yähñ yãhdñoyequinare cahmotãtja. Sa ye tiquina cahmeñene cõoeta tiquina, nidi Jesu.

10 Sa ni tuhasa ohō saha ni nemori:

—Musare ni meho buheyequina ovejare yaqueyequina yero saha ijire. Apequina yaque duaye, apequina wejē duaye ahtare. Oveja yero saha ijiyequinare, yeequina ijiphihiye decori Cohācjū mehna ijiatiquinare yegū ahtaū yūhū. Sa yegū yeequina decoripe tiquina bucueatire ahtaū yūhū. 11 Ovejare quehnoano cohteriquiro yero saha ijiaja yūhū. Ovejare quehnoano cohteriquiro yariatiquiro ijieperota tiquiro yequina ovejare cohtere, “Sijoro wahari”, nino. Yeequina Cohācjū mehna tiquina sa ijiducuatire yegū yariatja yūhū. 12 Oveja upuro cahacjāno pehe oveja upuro ijierare. Sa yeye oveja tiquiro yequina ijierare. Sa yero yairo ovejare tiquiro ihyaro ahtagū ihñano tiquiro cahacjāno pehe ovejare cohā doco cā, oma cāa wahare. Tiquiro sa cohā docori bato, yairo ovejare tiquiro ñehēgū ihñañe oveja pari oma site cāa wahare. 13 Tiquiro cahacjāno pehe tiquiro wapataye dihitare cahmene. Sa yero tiquiro ovejare quehnoano cohte coerare, nidi Jesu.

14 Sa ni tuhasa ohō saha ni nemori:

—Ovejare quehnoano cohteriquiro yero saha ijiaja yūhū. Sa yegū yeequinare masiaja yūhū. Sa yeye yeequina pehe yūhūre masine. 15 Sata yūhū Pacū gūhū yūhūre masine. Sa yegū yūhū gūhū yūhū Pacūre masiaja. Oveja yero saha ijiyequina yeequina Cohācjū mehna tiquina sa ijiducuatire yariatja yūhū. 16 Apequina oveja ape sahrīno cǣna yero saha ijiyequina apequina masa gūhū yeequina ijietā. Tiquina gūhūre neagutja. Sa ye yūhū yahuducugū tūho cāeta tiquina gūhū. Sa ye yeequina ijiphihiyequina ihcā

curuata ijietā. Sa yegū yūhū dihita yeequinare cohteitja, nidi Jesu.

17 Sa ni tuhasa ohō saha ni nemori:

—Yeequina Cohācjū mehna tiquina sa ijiducuatire yariatja yūhū. Yūhū yariari bato masa mājagutja. Sa yeacjū yūhū ijigū yūhū Pacū yūhūre cahīne. 18 Yūhū wejē dutieragū yūhūre wejē masiedaboaya tiquina. Yūhū cahmeno sahata yūhūre wejēeta. Sa yegū yeequina Cohācjū mehna tiquina sa ijiducuatire yariatja. Yaria masiaja yūhū. Sa yegū masa māja masiaja. Yūhū Pacū yūhūre tireta ye dutiri, nidi Jesu.

19 Tiquiro sa nigū tūhoye judio masa pūa curua tu wari. Apequina sijoro tūhotu, apequina gūhū sijoro tūhoturi.

20 —Tiquiro watīno cūore. Sa yero tūho masiedare. ¿Dūhsena tiquirore pari turi tūhoajari masa? nidi apequina peyequina judio masa.

21 Apequina pehe ohō saha nidi:

—Watīno cūoriquiro ijiro sa ni yahuducueraboaya. Caperi bājueriquirore ihñagū ye masiedare watīnore cūoriquiro. Sa yero watīnore cūoerare Jesu, nidi apequina judio masa.

Judio masa Jesure cahmedahye

22 Ape deco usā acaye judio masa Jerusalēpū bose deco yeye nidi pari turi. Cohācjū wūhūre panopū Cohācjūre tiquina ohorire tiquina wacūati deco ijiri. Ti pjere pohēcū ijiri. 23 Ti decore Salomo wame tiri tucūpū Cohācjū wūhūpū ijiri tucūpū Jesu ihñā tinino nidi. 24 Ti tucūpū tiquiro ijigū ihñañe usā acaye judio masa tiquiro cahapū cahmecoa, tiquirore sinituri.

—Yoabutiari pje usāre quehnoano yahueraga māhū. Poto usāre quehnoano yahu madoqueohya māhū. ¿Cohācjū ohorigū Cristota ijiajari māhū? nidi tiquina Jesure.

25 Tiquina sa nigū tūhoro ohō saha ni yūhtiri Jesu:

—Mūsare yahu tuhasamajagū. Yūhū sa yahuepegūta yūhūre tūho duerare mūsa. Yūhū Pacū yūhūre tiquiro dutiriro sahata tiquiro tutuaye mehna ye ihñōaja. Sa yegū yūhū Cristo ijiyereta mūsare ihñogū niaja. 26 Yūhū sa ihñōepēgūta yūhūre tūho duerare mūsa. Mūsa pehe yeequina ijierare. Sa yena apequiro yequina oveja yero saha ijina, yūhū pehere tūhoerare mūsa. 27 Ovejare cohteriquirore tiquiro yequina tiquina tūhoriro saha yūhūre yeequina tūhore. Sa yegū tiquinare masiaja yūhū. Sa ye tiquina yūhū mehna wahare. 28 Sa yegū ijipihtiye decori Cohācjū mehna ijigū yeaja tiquinare. Sa ye tiquina pecarū wahasi. Sa yegū yeequinare yūhū cohtegū apequina pehe ne yūhūre ehma masiedare yeequinare. 29 Yūhū Pacū yūhūre yeequinare ohoriquiro ijipihtiyequina yūhūdūoro tutuariquiro ijire. Sa ye yūhū Pacū pehe yeequinare tiquiro cohtegū apequina pehe tiquiro gūhūre ne ehma masiedare tiquinare. 30 Yūhū, yūhū Pacū mehna ihcāta ijiaja, nidi Jesu judio masare.

31 Tiquiro sa nigū tūhoye judio masa pehe tiquirore tiquina doque wejēati utā pacare pari turi nemedi tja. 32 Tiquina sa yegū ihñano Jesu sinituri tiquinare:

—Yūhū Pacū tutuaye mehna peye tahari ye ihñomi mūsare. ¿Dise boro pehere yūhū yeri buhiri yūhūre utā paca mehna doque wejē duajari mūsa? ni sinituri Jesu.

33 Tiquiro sa nigū tūhoye ohō saha nidi tiquina:

—Cohācjū tutuaye mehna mūhū ye ihñori buhiri mūhūre utā mehna doque wejē dueraja usā. Cohācjūre mūhū ñano yahuducuri buhiri mūhūre utā paca mehna doque wejē duaja usā. Masū ijiepegūta

“Cohācjū ijiaja yūhū”, mūhū niñe buhiri mehna mūhūre utā paca mehna doque wejē duaja usā, ni yūhtiri tiquina.

34 Tiquina sa ni yūhtigū tūhoro Jesu tiquinare yahuri:

—Mūsa gūhūre “Cohāmana”, ni pisuri Cohācjū. Sata ni ojoahye tiquiro dutiyere tiquina ojoari pūpū. 35 Cohācjū yere tiquina ojoari pū potota ijigū mari masiaja. “Ni mehoñe ijire”, ti pūre ni masiedaja mari. Sa yero tiquiro yere tūhoyequinare potota tiquiro “Cohāmana”, ni pisure. 36 Cohācjū yūhūre besetjiāno, ahri yehpapūre ohori. Sa yegū yūhū “Cohācjū macū ijiaja”, yūhū nidi buhiri “Cohācjūre ñano yahuducuro nine Jesu”, nine mūsa yūhūre. ¿Dahsena yūhūre sa niajari mūsa? 37 Yūhū Pacū tiquiro cahmediro sahata tiquiro tutuaye mehna yūhū ye ihñōedagū pūritare yūhū buherire “Poto tjire” niedaboaga mūsa. 38 Yūhū Pacū tiquiro tutuaye mehna yūhū ye ihñōepēgūta yūhū pehere tūho duerare mūsa. Sa tūho duerapenata tiquiro tutuaye mehna yūhū ye ihñogū ihñana yūhū yerire “Poto tjire”, niñā mūsa. Mūsa sa naha, yūhū Pacū mehna usā ihcāno saha ijigū masinata mūsa. Sa yena tūhonata mūsa, nidi Jesu tiquinare.

39 Tiquiro sa nigū tiquina pari turi tiquirore ñehe duamedī. Tiquina sa ñehe duagū ihñano tiquiro duhti wijiaa wahari.

40 Sa wijiariquiropūta Ńu masare tiquiro wame ye mūhtaripū Jordā asū māja taro pehepū pari turi Jesu wahari tja. Topū esaro tojoa cāri tiquiro. 41 Sa ye masa peyequina tiquirore ihñañe esari. Ohō saha nidi tiquina basi:

—Ńu pehe Cohācjū tutuaye mehna ye ihñōedari. Sa ye ihñōedapegūta ijipihtiye Jesure tiquiro yahuri pehe queorota ijire, nidi masa tiquina basi.

42 Sa ye topure masa peyequina wacū tutua ducari Jesure.

11

Lázaro wame tiriquireo yariaa wahahye

1 Sa ye Betania wame tiri maca cjūno Lázaro wame tiriquireo dohatiro niahye. Ti macapū tiquiro wahmiosānumia gūhū María, Marta mehna ijiri. 2 María pehe Jesure ehme sitiye pio wisōaticoro, ticoro poari mehna tiquirore tu coseaticoro ijire. Ticoro bahero Lázaro pehe dohatiro niahye. 3 Sa ye tiquina numia apequinare Jesure yahu dutiye ohoahye.

—Pūhto, mūhū cahñiquiro dohatiro nine, ni yahu dutiye ohoahye Lázaro wahmiosānumia.

4 Ti quitire tūhoro ohō saha nidi Jesu:

—Yojopure Lázaro tiquiro dohatiye tiquiro yariati ijierare. Cohācjū tutuayere masare ihñootire yojopure tiquiro dohatire. Sa ye yūhū tutuagū yūhū ijigū gūhare masa ihñæta, nidi Jesu.

5 Jesu Martare, ticoro bahoro gūhare, Lázaro gūhare tutuaro cahīdi. 6 Sa nino Lázaro tiquiro dohatigū tūhoeperota topū Jesu pūa deco tojoari. 7 Pūa deco bato Jesu ohō saha nidi usāre tiquiro buhenare:

—Pari turi Judea yehpapū tojoa wahaūhna tja, nidi usāre.

8 —Buhegū, canuagāta judio masa mūhare utā paca mehna doque wejē duamedī. ¿Dūhsegū pari turi tojoaa waha duajari mūhū? nii usā pehe.

9 Usā sa nigū tūhoro tiquirore tiquina wejē masiedarīne yahuro, queoye mehna buhero ohō saha nidi usāre:

—Pajiro tūhotueracāhña. Ihcā decore doce horari waro ijire. Asū deco cjūno ijigū quehnoano ihñaja mari. Sa yena decore tinina, ne pūha boraeraja mari.

10 Nahitianopū tiniñequina pūha boraa wahare. Asū deco cjūno mariedagū quehnoano ihñedare tiquina, nidi Jesu. (Sa nino ohō saha nino niahye: “Yojopure yūhū Pacū yere yūhū yahu pehoato dūhsarīne. Sa ye yūhare wejē masiedarīne”, nino niahye.)

11 Sa nino usāre yahu nemori tja: —Mari mehna cjūno Lázaro, carīno niaga. Tiquiro sa carīepēgūta yūhū tiquirore wahcōgū wahautja, nidi usāre.

12 —Pūhto, Lázaro carīniquiro ijiri, yūhdarota, nii usā.

13 Usā sa niepēgūta Jesu “Carīno niaga”, nino “Yariaa wahare”, nino nidi jimedi. Tiquiro sa nigū tūhona “Lázaro soro niaga”, ni tūhotumi usā pehe. 14 Usā sa ni tūhotugū masino Jesu poto yahuri usāre:

—Lázaro yariaa wahaga. 15 Yūhū marieno tiquiro yariagū quehnoarīne. Sa yena mūsa yūhare wacū tutua nemonata. Isa mari ihñana wahaūhna tiquiro cahapū, nidi Jesu.

16 Tomasu sūhdūariquireo tiquina ni pisuriquireo ohō saha nidi usāre: —Mari gūhū Jesu mehna wahaūhna. Tiquirore wejēne, mari gūhare wejēahdo, nidi Tomasu.

Jesu sa ijiducugū yeriquiro masare masoriquireo ijire

17 Sa ye topure usā esari bato to cjēna ohō saha ni yahuri Jesure:

—Pititia deco wahare Lázaro mūnanore masa copepū tiquina cūri bato, ni yahuri tiquirore.

18 Betania pehe Jerusalē cahapū ihtia kilómetro yoaro ijiri. 19 Sa ye usā acaye judio masa peyequina Martare, María gūhare ñehe quea utiye ahtahye Lázaro yariari bato. 20 Sa yero Jesu mehna usā esana tana yegū tūhoro Marta pehe usāre piti caro ahtari jiri. Ticoro sa piti caro wahagū María pehe tiquina ya wūhūpū tojoahye. 21 Sa piti caro Marta ohō saha nidi Jesure:

—Pũhto, yũhu bahũ tiquiro yariato pano mũhu ohõpũ ijigũ tiquiro yariaraboaya. ²² Yojobũ gãhũre Cohãcjũre mũhu sini basagũ tiquiro mũhu sinino sahata yerota, nidi Marta Jesure.

²³ —Mũhu bahũ masa wijiariota, nidi Jesu ticorore.

²⁴ —Ahri yehpa pihtiatu deco tiquiro masa wijiatore masiaja yũhu, nidi ticoro.

²⁵ Ticoro sa nigũ Jesu yahuri tja:

—Yũhu masa wijiagũ yegũ tjiaja. Yũhu sa ijiducugũ yegũ tjiaja. Yũhũre wacũ tutuariquiro yarieperota sa ijiducurota. ²⁶ Sa ye ijipihtiyequina Cohãcjũ mehna ijiducuyequina yũhũre wacũ tutuayequina ne pecapũ wahasi. ¿Ahrire masiajari mũhu? nidi Jesu ticorore.

²⁷ —Pũhto, masiaja yũhu. Cristo Cohãcjũ macũ, “Ahri yehpapũ ahtarota”, tiquina nidigũ mũhu ijigũ masiaja yũhu, nidi Marta Jesure.

Lázaro masa cope cahapũ esaro Jesu utiahye

²⁸ Marta sa ñi tuhasa ticoro bahoro Mariare pijiro wahari.

—Marine buheriquiro mari ya macapũre wihiri. Mũhũre pijire, derogã ni yahuahye Mariare.

²⁹ Ticoro sa nigũ tũhoro María sojaro mehna wahcãdũca, usã cahapũ ahtahye Jesure ihñano taro.

³⁰ Tiquina ya macapũ esera nii usã. Marta ticoro piti cariropũ ijiniũ usã. ³¹ Judio masa ti wũhũpũ Mariare ñehe quea utiye niahye. Sa ye ticoro wahagũ ihñañe, tiquina ticorore nũnũ tã cãhye. “Ticoro baharo mũnanore tiquina cũri copepũ utiro waharo nine ticoro”, ni tũhotumahye tiquina. Sa ni tũhotuye ticorore nũnũ tã cãhye.

³² Sa yero María usã cahapũ wihiro, Jesure ihña, tiquiro dahpocãri cahapũ dũsepe curi mehna quehe sari.

—Pũhto, yũhu bahũ tiquiro yariato pano mũhu ohõpũ ijigũ tiquiro yariaraboaya, nidi ticoro Jesure.

³³ Sa yero judio masa ticoro mehna ahtariquina gãhũ tiquina utigũ ihñano Jesu pehe tutuaro bujũa witi ñano jeripohna tiri.

³⁴ —¿Lázaro mũnanore nohopũ cohãri mũsa? ni sinituri Jesu.

—Ihñanũ taya, ni piji cãri tiquina.

³⁵ Tiquina sa nigũ tũhoro Jesu utiri.

³⁶ —Lázaro mũnanore Jesu tutuaro cahĩmeyari, nidi judio masa tiquina basi.

³⁷ Apequina pehe ohõ saha nidi:

—Caperi bajueriquirore ihñagũ yeriquiro ijire ahriquiro Jesu. ¿Sa yero Lázaro tiquiro yariato pano tiquirore yũhdũoeraboayari? nidi tiquina.

Lázaro masa wijiahye

³⁸ Sa yero Jesu pari turi tutuaro bujũa witi. Sa yena usã ijipihtina Lázaro masa copepũ esanũ. Utãpũ tiquina seheri cope ijiri. Sa yero tiquiro pagure tiquina siõ sãa cũri cope ijiri. Sa yero ti cope pajiria utã mehna tiquina bihari cope ijiri.

³⁹ —Utã bihariare neña, nidi Jesu.

Tiquiro sa nigũ tũhoro Marta yariariquiro mũnana wahmiono ohõ saha nidi:

—Pũhto, yojobũ pititia deco waha tuhasare tiquiro yariari bato. Sa yero tiquiro pagũ ijiriro arĩ yũhdũaga, nidi Jesure.

⁴⁰ —“Yũhũre wacũ tutuago Cohãcjũ tutuayere ihñagota”, mũhũre nimigũ, nidi Jesu Martare.

⁴¹ Tiquiro sa nidi bato tiquina utã bihariare ne wiori. Tiquina sa nedi bato Jesu pehe ahmũsepũ ihña mũo, Cohãcjũre ohõ saha nidi:

—Mai, yũhũre mũhu tũho tuhasari. Tire mũhu yegũ masigu bucueaja mũhũre. ⁴² Yũhũre mũhu decoripe tũhoducure. Tire masiaja. Sa masiepeguta yũhu

mãhũ ohorigũ yũhũ ijigũ ohõre ducuyequina tiquina masiatire mãhare sa niaja. Tire “Potota ijire”, tiquina nino quehnoano sa nigũ niaja, nidi Jesu tiquiro Pacãrore.

⁴³ Sa ni tuhasa Jesu tutuaro sañuducuri:

—Lázaro ahtaya, ni sañuducuri tiquiro.

⁴⁴ Tiquiro sa nigũ yariariquiro mnanano omocarine tiquiro dahpocãri gãhũre suhti cahseri mehna tiquina dahthemediquiro, tiquiro dapure suhtiro mehna tiquina wahmemediquiro, masa coperepũ wijia tari.

—Tiquina dahterire pãña tiquirore, nidi Jesu.

Judio masa pũhtoa pehe Jesure ñehe duamahye

(Mt 26.1-5; Mr 14.1-2; Lc 22.1-2)

⁴⁵ Tiquiro sa masogũ ihñañe peyequina judio masa mehna cjẽna María mehna ahtariquina Jesure wacũ tutua, cahmedi. ⁴⁶ Apequina tiquina mehna cjẽna pehe fariseo masa cahapũ esaye, Jesu yerire yahuahye tiquinare. ⁴⁷⁻⁴⁸ Sa ye pahia pũhtoa, fariseo masa pũhtoa gãhũ cahmecoa, tiquina basi ohõ saha ni yahuducuahye:

—Jesu peye tahari Cohãcjũ tutuaye mehna ye ihñore. Tiquiro sa ye ihñogũ “Tire yeracãhña”, mari niedagũ ijipihtiyequina masa tiquirore cahmeñe, tiquiro mehna wahaboaga. Sa ye Roma cjẽna pũhtoa Cohãcjũ wũhare cohã dutiye ohoeta tiquina yequina surarare. Mari ya dihta gãhũre ehmaeta tiquina. (Mari ya dihta cjẽna Jesure tiquina pũhthora cũgũ ihñañe Roma cjẽna pũhtoa “Marine cohãñe nine”, ni usua ñano yeeta marine.) ¿Sa yena dahse yenatari yojopũre? ni yahuducuahye tiquina basi.

⁴⁹ Tiquina sa niepegũta apequiro Caifa wame tiriquire ti cahmare

pahia pũhthora ijiro, tiquinare yahuahye:

—Musa pehe ne masiedare. ⁵⁰ Judio masa ijipihtina mari ye ijiatire ihcãquiro masano tiquiro yariagũ quehnoare. Tiquiro yarieregũ marine ijipihtina judio masare cohã peho cãboaga. Tire musa masiedare, niahye Caifa tiquinare.

⁵¹ Sa nino tiquiro esa tuhoro sa nino niedahye. Pahia pũhthora tiquiro ijigũ judio masa ye ijiatire Jesu yariatire mari Pacã pehe Caifare sa ni yahu dutiahye.

⁵² Jesu yariaro judio masa dihitare yũdhoro taro niedare. Sa yariaro ijipihtiyequina Cohãcjũ pohnene ahri yehpapũ iji siteyequina gãhũre ihcã curuata ijigũ yeaire yariatiquiro ijiri Jesu. ⁵³ Sa ye ti decota tiquina “¿Jesure dahse ye wejẽnatari mari?” ni yahuducuye, tiquirore wejẽne tee niahye.

⁵⁴ Tiquina sa wejẽ duagũ masino Jesu peyequina judio masa watoa pari turi tinino wahaerari. Sa yero masa marieno cahagã Efrai wame tiri macapũ usãre siho wahari. Usãre ti maca siho tojoarĩdi Jesu.

⁵⁵ Ti pjere pascua bose decori usã judio masa usã bose decori ijiate mehenogã dahsatjiãri. Sa ye bose deco panogã masa peyequina apeye macari cjẽna Jerusalẽpũ cahmecoari. Pascua cjẽne tiquina ihyato pano Cohãcjũ yere yeye tehe, tiquina cahmomohnore cohoro saha tiquina ñañene cosee tee nidi. ⁵⁶ Sa ye tiquina Jesure macañe niahye. Sa ye Cohãcjũ wũhpũ ijieyequina ohõ saha ni yahuducuahye:

—¿Bose decore ihñano ahtaeraboari Jesu, musa tuhutugũ? niahye tiquina basi.

⁵⁷ Sa ye pahia pũhthora, fariseo masa gãhũ ohõ saha ni yahu dutiahye masare:

—Jesu wihigū ihñana, yahuya usāre. Tiquirote ñehena tana niaja, niahye puhtoā masare.

12

María Jesu dahpocārine ehme sitiye mehna pio peohye
(Mt 26.6-13; Mr 14.3-9)

¹ Jesu, usā tiquiro buhena mehna Betaniapū usā esari bato pascua deco esato seis decori waro dūhsarīdi. Lázaro Jesu masoriquiro ti maca cjāno ijiri. ² Usā esari bato Jesu gūhū usā ihyatire dahreri apequina. Sa ye Lázaro, Jesu, usā mehna mesa cahapū nuju sau. Usā sa nuju sari bato Marta ihyayere peori usāre. ³ Sa yero María ehme sitiye uhsere nardo wame tiye cohorī uhsere kilo deco mehna ne cāhta Jesu dahpocārine pio peori. Ti uhsē wapa ti yuhduari. Pio peo tuhasa ticoro poari mehna wāori. Ticoro sa pio peori bato ti wūhū quehnoano ehme siti sehśaa wahari. ⁴ Usā mehna cjāno, Jesure ihña tuhtiyequinare ihñoatiquiro Juda Iscariote pehe ohō saha nidi:

⁵ —¿Dūhse yero ahricoro sa ye siteajari? Tire ticoro duaboaya. Tire duaro tres cientos niñeru cjoerire wapataboaya. Sa yero ticoro ti niñerure pejecuoyequinare ohoboaya, nidi tiquiro.

⁶ Juda pehe pejecuoyequinare yedoho duerari. Tiquiro usā niñerure ihbo basariquiro ijieperota yaqueriquiro ijiri. Sa yero tiquiro usā niñerure ihquē tahari ne mājari. Sa yero “Ti niñerure neitja”, nino, sa nidi Maríare tiquiro.

⁷ Tiquiro sa nigū tūhoro ohō saha nidi Jesu:

—Sa niedacāhña ticorore. Ticoro ehme sitiye yūhure ticoro dūharire yūhure pio peori, yūhure tiquina yato pano yūhū pagure quehnoyuro. Pejecuoyequina pehe mūsa mehna sa ijiducuetā. Sa yena tiquinare oho masine mūsa.

⁸ Yūhū pehe ahri yehpapure mūsa mehna sa ijiducusi, nidi Jesu.

Pahia puhtoā Lázaro wejē duahye

⁹ Sa ye Jesu Betaniapū tiquiro ijigū tūhoye, usā acaye judio masa peyequina tiquirote ihñañe ahtari. Tiquiro dihitare ihñañe ahtaye niedari. Lázaro yariamediquiro Jesu masoriquiro tiquiro gūhure ihñañe ahtaye nidi. ¹⁰ Tiquina ihñañe esarire masiñe, pahia puhtoā Lázaro gūhure wejē duari. ¹¹ Lázaro yariamediquiro Jesu masoriquiro ijigū ihñañe peyequina masa Jesure wacū tutuari. Tiquiro sa masogū ihñañe peyequina judio masa tiquina pahia ye buheye pehere duhu cāri. Tiquina sa duhugū ihñañe pahia puhtoā pehe usua yūhdūye Lázaro wejē duari.

Jerusalēpū esahye Jesu
(Mt 21.1-11; Mr 11.1-11; Lc 19.28-40)

¹² Pascua bose decore tiquina yegū peyequina masa Jerusalēpū ihñañe wahari jiri. Ape deco Jerusalēpū Jesu ahtatire masa tūhori. ¹³ Sa ye iqui pohnarine ne cā, tiquirote piti caye wahari. Sa piti caye ohō saha ni sañuducuri tiquina:

—Ahriquirore ño peouhna. Ahriquiro Cohācjū ohoriquiro quehnoano ijiahro. Ahriquiro judio masa mari puhtoro tjire, ni sañuducuri tiquina.

¹⁴ Jesu burrogā tiquiro bocariquirogā bui pesari. “Ohō sahata yerota”, ni ojoahye Cohācjū yere tiquina ojoari pūpū:

¹⁵ Jerusalē wame tiri maca cjāna, cueracāhña mūsa. Ihñaña. Mūsa puhtoro burrogā bui pesa cāhtare, ni yahuahye Cohācjū yere tiquina ojoari pūpū.

¹⁶ “Tiquina sa ni ojoari Jesure nino niaga”, ni, usā tiquiro buhena quehnoano masiedarīi.

Sa masiedapenata umasep̄ Jesu majari bato usã ti ojoaire wacũ boca tuho masii. Ohõ saha ni tuhotuu: “Cohãcjũ yere tiquina ojoari pũ pehe Jesure yahuro nimeya. Sa ye Cohãcjũ yere tiquina ojoari pũ nidiro sahata yeri masa Jesure”, ni tuhotu, masii usã.

¹⁷ Lázarore masa copep̄ ijiriquirore Jesu pisu masogũ ihñariquina pehe yahuri masare. ¹⁸ Sa ye Lázarore Jesu masorire tuhori bato masa peyequina Jesure ihñañe ahtari. ¹⁹ Tiquina sa ahtagũ ihñañe fariseo masa tiquina basi ohõ saha niahye:

—Ijipih̄tiyequina Jesu yequina dihita wahaye nine yojop̄are. Sa yena mari d̄ahse ye masiedaga tiquinare, niahye fariseo masa tiquina basi.

Meheñequinagã griego masa Jesure maca cãhtahye

²⁰ Sa ye bose deco Cohãcjũre ño peoye ahtayequina mehna cjẽna meheñequinagã griego masa ijiri. ²¹ Sa ye tiquina Felipe cahap̄ wihiahye. Felipe pehe Betsaida wame tiri maca Galilea yehpap̄ ijiri maca cjãno ijiri. Sa ye tiqiuro cahap̄ wihiriquina ohõ saha niahye tiqiurore:

—Jesure ihña duaga usã, niahye tiquina.

²² Tiquina sa nigũ tuhorõ Felipe Andrepp̄are tire yahuro wahahye. Sa ye tiquina p̄aro Jesure yahuri. ²³ Tiquina sa ni yahuri bato Jesu tiquinare yahuri:

—Yuh̄u masu Cohãcjũ ohorigu ijiaja. Yuh̄ure ijipih̄tiyequina tiquina ño peoati pje yojop̄are ijirota nine. Yojop̄are yuh̄u yariati pje ijirota nine. ²⁴ Potota masare yahugu niaja. Oteri pjere yehpap̄ mari yaeragũ, ti pjere mari oteragũ ihcã pjeta tojoarota. Sa yero ti pjere mari yari bato pihni, d̄uca tirota. (Sata yuh̄u yariari bato

yuh̄ure tiquina yari bato peyequina masare Cohãcjũ mehna sa ijiducuatiquina ijigũ yeitja yuh̄u.) ²⁵ Ahri yehpap̄ masu ijiyere pajiro tuhotuboaga masu. Sa tuhotuna Cohãcjũre wacũedana, pecap̄ wahanata masu. Ahri yehpap̄ masu ijiyere sa tuhotu cãna, Cohãcjũ mehna sa ijiducunata. ²⁶ Yeere ye duana yuh̄u buheyere quehnoano tuhoya masu. Masu sa yena masu gũhu yuh̄u ijiorop̄ ijinata. Yeere yeriquirore yuh̄u Pacu pehe ño peorota, nidi Jesu.

Jesu tiqiuro yariatore yahuahye

²⁷ Sa ni tuhasa ohõ saha ni nemori:

—Yojop̄are yuh̄u ñano jeripohna tiaja. ¿Yuh̄u Pacure d̄ahse nigutari yuh̄u? ¿“Mai, yuh̄u ñano yuh̄duatire yeracãhña yuh̄ure”, niboagari yuh̄u? Tire niedaja yuh̄u. Ñano yuh̄duacjuta ahri yehpap̄ ahtau. Sa yero yuh̄u ñano yuh̄duati pje yojop̄are ijirota nine, ni yahuri usãre tiqiuro buhenare.

²⁸ Sa yero ohõ saha nidi tiqiuro Pacurore:

—Mai, mah̄u tutuagu ijiyere yojop̄are ihñoña masare, nidi Jesu tiqiuro Pacurore.

Tiqiuro sa nigũ umasep̄ yahuducuro ca tari:

—Tutuagu yuh̄u ijiyere masare ihño tuhasau. Yojop̄are sa yegu pari turi ihñoutja masare, nino ca tari.

²⁹ Tiqiuro sa nigũ tuhoye top̄ ducuyequina masa peyequina ohõ saha nidi:

—Upo ijiaga sa bisiro, nidi masa.

—Angel Jesure yahuro nidi, nidi apequina masa.

³⁰ Ohõ saha nidi Jesu pehe:

—Umasep̄ sa bisiro yuh̄ure tuho dutiro niedari. Masu pehere tuho dutiro sa bisiro ca tari. ³¹ Yojop̄are ahri yehpa cjẽna tiquina ñañe yeri buhirire buhiri dahrerota tiquinare. Ahri yehpa cjẽna p̄utoro watĩnore cohãnota Cohãcjũ. ³² Sa yegu yuh̄ure

curusapũ tiquina wahcõ docogũ peyequina masare yeequina ijia-tiquinare yeitja yũhũ, nidi Jesu.

³³ Sa nino curusapũ tiquiro yariatire yahuro nidi Jesu masare. ³⁴ Tiquiro sa nigũ tũhoye masa pehe tiquirore ohõ saha nidi:

—Cohãcjũ yere tiquina ojoari pũpũ ohõ saha nine: “Cristo ijip-ihitiye decori ijirota”, ni ojoahye. ¿Tiquiro sa ni ojoagũ mũhũre masare Cohãcjũ ohorigure dũhse yeye curusapũ wahcõ docoetari masa mũhũre? ¿Masuno Cohãcjũ ohoriquiro noa ijajari tiquiro? ni sinituri tiquina.

³⁵ Tiquina sa nigũ ohõ saha ni yũhtiri Jesu:

—Buhriero mehna mari ihña masigũ yero saha masare Cohãcjũ yere quehnoano masigũ yeaja yũhũ. Came cjũnogã mũsa mehna ijisi yũhũ. Mũsare yũhũ buhegũ yojopũre tũhoya mũsa “Ñañe yeari”, nina, Cohãcjũ mehna mũsa sa ijiducuatire. Yũhũ buheyere tũhoeyequina nahitiano tiniñequina yero saha tiquina wahatore masiedare. ³⁶ Sa yegũ buhriero yero saha ijigũ ijiaja yũhũ. Sa yegũ mũsare buhegũ Cohãcjũ yere quehnoano masigũ yeaja mũsare. Yojopũre yũhũ wahato pano yũhũre wacũ tutuaya. Sa wacũ tutuana yeequina ijinata mũsa, nidi Jesu.

Sa ni yahu tuhassa duhti cãa wahari.

Judio masa Jesure cahmedahye

³⁷ Peye tahari Cohãcjũ tutuaye mehna tiquinare Jesu tiquiro ye ihñoepegũta peyequina judio masa tiquirore ne tũho duerari.

³⁸ Cohãcjũ yere tiquina ojoari pũpũ Isaia mũnano tiquiro ojoariro sahata yeye nidi tiquina. Ohõ saha ni ojoahye Isaia mũnano: Cohãcjũ, mũhũ buheyere usã yahugũ masa ne tũho

duerare. Mũhũ tutu-ayere tiquinare mũhũ ye ihñoepegũta, tire “Poto ijierare”, nidi tiquina, ni ojoahye Isaia mũnano.

³⁹ Tiquina sa tũho dueragũ ihñano Cohãcjũ tiquinare masiedagũ yeri. Ti gũhũre Isaia mũnano ohõ saha ni ojoahye:

⁴⁰ Caperi bajueyequina yero saha ijigũ yee tiahye Cohãcjũ tiquinare. Sa yero tiquiro yere masiedagũ yee tiahye tiquinare. Sa ye tiquiro tutuayere ihñaepeta tiquina ihñarire masiedare. Sa ye tiquiro buheyere tũhoepeta tire masiedare tiquina. Cohãcjũ ye buheyere masiñe tiquina ñañe yerire cohã dutiboaya. Sa yero tiquinare yũhdũboaya tiquiro, ni ojoahye Isaia mũnano Cohãcjũ yere tiquina ojoari pũpũ.

⁴¹ Sa ni ojoaro Isaia Cristo tutu-ayere masino tiquiro nidiro sahata Cristore yahu ojoahye.

⁴² Apequina Jesure tiquina cahmedapegũta judio masa usã pũhtoa mehna cjẽna peyequina Jesure wacũ tutua, cahmedi. Sa cahmepeta tiquina fariseo masare cueye apequinare “Jesu yequina wahau usã”, ni yahu duerari. Tire tiquina yahugũ tũhoye Jesure tiquina cahmedi buhiri judio masa usã buheri wũhũpũ tiquinare sajã dutieraboaga fariseo masa pehe.

⁴³ Cohãcjũre bucuegũ ye duepeta ti yũhdũoro fariseo masa pehere bucuegũ ye duari Jesure cahme dũcayequina. Sa ye tiquina “Jesu yequina wahau”, ni apequinare yahu duerari.

Jesu yahuyere tiquina tũho duerari buhiri masa buhiri tieta

⁴⁴ Sa ye Jesu tutuaro sañuducu, yahuri:

—Yũhũre wacũ tutuariquiro yũhũ dihitare wacũ tutuerare. Yũhũre ohoriquiro gũhũre wacũ tutuare tiquiro. ⁴⁵ Sa ye yũhũre masiñequina yũhũre ohoriquiro gũhũre masine. ⁴⁶ Buhrioro mehna mari ihña masigũ yero saha ahri yehpapũ Cohãcjũ yere masigũ yei ahtaũ nii yũhũ. Sa yegũ Cohãcjũ yere masare masigũ yeaja. Ihcãquiro nahitiano wahariquiro yero saha ñañene yeducure. Yũhũre wacũ tutuariquiro tiquiro yero saha yesi. Yũhũre wacũ tutuariquiro potota tũhorota. ⁴⁷ Apequina yũhũ yahuyere tũhoepeta yũhũ nidiro saha yerare. Tiquina sa yerapegũta tiquina yerari buhirire buhiri dahresi yũhũ pehe tiquinare. Ahri yehpapũre buhiri dahregũ ahtagũ niedũ yũhũ. Ahri yehpa cjẽnare pecapũ wahaboriquinare yũhdũoacjũ ahtagũ nii yũhũ. ⁴⁸ Yũhũre cahmeeñequina, yũhũ yahuye gũhũre cahmeeñequina buhiri dahrenohatiquina ijieta. Tiquina yũhũ yahuyere tiquina tũhoerari buhiri ahri yehpa pihtiri deco ijigũpũ buhiri tieta. ⁴⁹ Yũhũ esa tuharo yeraja. Yũhũ Pacũ yũhũre ohoriquiro pehe yũhũre yahu dutiri. Sa yero yũhũ yahuye pehe tiquiro ye yahuducuye ijire. ⁵⁰ Tiquiro ye yahuducuyere tũhona Cohãcjũ mehna sa ijiducunata mũsa. Sa yegũ yũhũ Pacũ tiquiro yahu dutiriro sahata yahuaja mũsare, nidi Jesu.

13

Jesu buheyequina dahpocãrine coseahye tiquiro

¹ Sa ye pascua deco bose deco panogã ahri yehpare tiquiro cohã cãtore tiquiro Pacũro cahapũ tiquiro wahatore masidi Jesu. Sa yero ahri yehpa cjẽnare tiquiro yequinare tiquiro tutuaro cahĩdi

tiquina mehna tiquiro ijiro puno. Sa cahĩducure tiquiro yequinare.

² Ti ñamine Jesu usã tiquiro buhena mehna usã ihyagũ Juda Iscariotere Simo macũnore Jesure ihña tuhtiyequinare ihño duti tuhasari jiri watĩno pehe. ³ Sa yero mari Pacũ Cohãcjũ Jesure ijipihtiyequina bui tiquiro pũhtoro sũrire masidi Jesu. Sa yero Cohãcjũ cahapũ tiquiro ahtarire came aũmũsepũ tiquiro mũjati gũhũre masidi. ⁴ Sa masino wahcãdũca, tiquiro suhtiro bui cjãnore tu we ne, tore cũ tuhasa, suhtiro cahsero mehna tiquiro pari yũjũ dũhteri. ⁵ Dũhte tuhasa, waparopũ acore pio sãa, usã tiquiro buhena dahpocãrine cose dũcari. Usãre cose tuhasa tiquiro dũhteri cahsero mehna wũori usã dahpocãrine.

⁶ Apequina buheyequinare cose cã, Simo Pedropũre esari. Tiquiro dahpocãrine tiquiro coseato pano Pedro pehe tiquirore ohõ saha nidi:

—¿Pũhto, yũhũ dahpocãrine cosegũ tũũ niajari mũhũ? nidi Pedro Jesure.

⁷ —Mianogã mũhũre yũhũ yeatire masiedare mũhũ. Sa masiedapegũta camepũ masiita mũhũ, nidi Jesu tiquirore.

⁸ —Yũhũ dahpocãrine ne cosesi mũhũ, nidi Pedro.

—Mũhũre yũhũ coseragũ yaquiro ijisi mũhũ, nidi Jesu.

⁹ —Pũhto, yũhũ dahpocãri dihitare cosercãhña. Yũhũ dahpocãrine, yũhũ omocarine, yũhũ dapu gũhũre coseya, nidi Pedro.

¹⁰ Tiquiro sa nigũ Jesu queoye mehna buhero ohõ saha nidi:

—Ihcãquiro masũno cuhsaro tiquiro pagũre quehnoano tu cose pehore. Sa yero pari turi tiquirore tu cosero cahmedare. Tiquiro dahpocãri dihitare tu cosero cahmene. Ijipihtina mũsa ñañe yerire coserina mũsa ijipegũta ihcãquiro mũsa mehna cjũno

tiqairo ñañene cosemehnediqairo ijire, nidi Jesu.

¹¹ Jesu tiqairore ihña tuhtiyequinare ihñootiqairore masidi: Sa masino “Ihcãquiro mûsa mehna cãño tiqairo ñañene cosemehnediqairo ijire”, nidi.

¹² Hsã dahpocãrine cose tuhasa, tiqairo suhtirore saña tuhasa, nuju sari tiqairo dujiriroputa.

—¿Mianogã mûsare yũhu yerire masiajari mûsa? ¹³ Mûsa yũhare “Buhegu”, ni pisuna, “Pũhto”, ni pisuna pota ninata nine mûsa yũhare. Mûsare buhegu, mûsa pũhto potota ijiaja yũhu. ¹⁴ Sa yena yũhu mûsare buhegu, mûsa pũhto ijiepeguta mûsa dahpocãrine yũhu cosegã ihñana mûsa gũhu mûsa mehna cãña dahpocãrine coseya. ¹⁵ Mianogã mûsa yeatire mûsare ihñou. Mûsa mehna cãñare mûsa yedohoatire ihñou. Mûsare yũhu yeriro sahata mûsa gũhu yeya. ¹⁶ Ijirota niaja mûsare. Mûsa yũhu cahacãña yero saha ijina yũhu bui ijierare. Mûsare buhe duti yũhu ohorina ijire mûsa. Sa yena yũhu bui ijierare mûsa. Sa yegu “Yũhu yeriro sahata yeya”, nii mûsare. ¹⁷ Ahrire masina, yũhu dutiyere yena, bucuena ijinata mûsa.

¹⁸ Mûsare ijipihtinare sa niedaja. Yũhu beseriquinare masiaja yũhu. Cohãcjũ tiqairo yere tiquina ojoari pũpũ tiqairo ni ojoariro sahata waharota. “Yũhu mehna ihyariquirota yũhare wejẽ duari”, ni ojoahye Cohãcjũ yere tiquina ojoari pũpũ. ¹⁹ Tiqairo sa yeato pano ahrire yahuyugu niaja mûsare. Yũhare tiqairo sa yeri bato, “Jesuta Cristo Cohãcjũ ohoriquirota ijire”, mûsa niatire ahrire mûsare yahuyugu niaja yũhu. ²⁰ Ijirota mûsare niaja. Yũhu ohoriquinare cahmediqairo yũhu gũhare cahmene tiqairo. Sa yero yũhare cahmediqairo yũhare ohoriquiro gũhare cahmene

tiqairo, nidi Jesu usãre tiqairo buhenare.

Juda Jesure ihña tuhtiyequinare tiqairo ihñootore yahuahye Jesu

(Mt 26.20-25; Mr 14.17-21; Lc 22.21-23)

²¹ Sa ni yahu tuhasa Jesu tutuaro bujua witiri. Sa bujua witiro yahuri tiqairo usãre.

—Ijirota mûsare niaja. Ihcãquiro mûsa mehna cãño yũhare ihña tuhtiyequinare yũhare ihñonota, nidi Jesu.

²² Tiqairo sa nigũ tũhona Jesure ihñootiqairore masiedana, usã basi cahme ihñau. ²³ Jesu buheyequina mehna cãñ yũhu, Jesu cahĩdigũ ijii. Sa yegu tiqairo cahapũ pari paha dujii. ²⁴ Sa yero Simo Pedro yũhare tiqairo omoca mehna sinituri:

—¿Jesure ihñootiqairo noa pehere nino niajari Jesu? Yahuya usãre, nino, tiqairo omoca mehna sinituri Pedro.

²⁵ Tiqairo sa nigũ yũhu pehe Jesu cahapũ dujirigu sinituu tiqairore:

—¿Pũhto, noare nigũ niajari mũhu? nii yũhu.

²⁶ —Ahria pãre dahra waha ne, yũhu ña mio yũhu ohoatiquiro pehe tiqairota ijire yũhare ihñootiquiro, nidi Jesu.

Sa ni tuhasa pãre tiqairo dahra waha nedirore ña mio tuhasa tire Simo Iscariote macunore Judare ohori. ²⁷ Sa yero pãre tiqairo ñehedi bato watĩno pehe Judare ñano ye dutiri jiri. Sa yero Jesu tiqairore ohõ saha nidi:

—Mũhu yeatore sojaro mehna ye madoqueohya mũhu, nidi Jesu Judare.

²⁸ Tiqairo sa nigũ tũhona usã mesapũ dujina, Jesu Judare tiqairo nidire quehnoano masiedũ. ²⁹ Ihquẽquina ohõ saha ni tũhotumi: “Juda usã niñerure ihboriquiro ijire. Sa yero bose deco usã ihyatire dú dutiro ohori Jesu Judare. O pejecuoyequinare niñerure oho dutiro niboaga Jesu”, ni tũhotumi

usã ihquẽquina. ³⁰ Sa yero Juda ti pãre ñehe tuhasa, wijiãa wahari. Tiqiuero wijiari pje ñami ijiri.

Wahma dutiroke yahuahye Jesu

³¹ Tiqiuero wijiari bato ohõ saha nidi Jesu:

—Yojopu pũritare yuhu masu Cohãcjũ ohorigu yuhu tutuagu yuhu ijiye tiyere ihñonota Cohãcjũ masare. Sa yegu Cohãcjũ tiqiuero tutuariquero ijiyere ihñoutja yuhu pehe. ³² Sa yegu Cohãcjũ tiqiuero tutuayere yuhu ihñogũ tiqiuero pehe yuhu tutuaye gũhare yojopu pũritare ihñõ madoqueorota. ³³ Yuhu pohna yuhure tuhoya. Meheñe decorigã musa mehna ijinigtja. Yuhu wahari bato yuhure macanata musa. Sa yegu mari acaye judio masare yuhu nidiro sahata musa gũhare niaja. “Yuhu wahatore musa pehe waha masiedare”, tiquinare yuhu nidiro sahata musa gũhare yahuaja. ³⁴ Wahma dutiroke musare yahugtja. Musa mehna cjẽnare cahĩña musa. Musare yuhu cahĩdiro sahata, musa mehna cjẽnare cahĩña. ³⁵ Sa yena musa mehna cjẽnare musa cahĩgũ ihñañe, yeequina musa ijiyere masieta apequina, nidi Jesu usãre.

“Jesure masiedaja”, Pedro tiqiuero niatire yahuahye Jesu

(Mt 26.31-35; Mr 14.27-31; Lc 22.31-34)

³⁶ Tiqiuero sa nigũ Simo Pedro Jesure sinituri:

—¿Pũhto, nohopu wahautjari mũhu? nidi Pedro.

—Yuhu wahatopure yojopure yuhu mehna waha masiedare mũhu. Yojopure waha masiedapegũta came yuhu cahapu wahautta mũhu, nidi Jesu Pedroke.

³⁷ —¿Pũhto, dũhsegu yojopure mũhu mehna waha masiedaboari yuhu? Yuhure tiquina wejẽ duepegũta mũhure ne duhusi yuhu, nidi Pedro Jesure.

³⁸ —¿Yuhure ne duhueragutari mũhu? Poto mũhure yahutja. Canaca tiqiuero yahuato pano “Jesure masiedaja”, niita mũhu apequinare. Ihtia taha sa niita mũhu, nidi Jesu Pedroke.

14

Jesu Cohãcjũ cahapu wahari maha yero saha ijire

¹ Came Jesu usãre ohõ saha ni yahuri:

—Ne buña witi, pajiro wacũedacãhña. Cohãcjũre wacũ tutuaya. Sa yena yuhu gũhare wacũ tutuaya. ² Yuhu Pacu tiqiuero ijiropure peye wũhuse ijire. Musa ijiatore quehnoyugu wahagtja. Ti ijirota ijire. Sa yegu musare tire yahuaja. ³ Sa yegu musa ijiatore quehno tuhasa, tojoa taugtja yuhu. Sa yegu yuhu cahapu musa ijiatire musare negu ahtaugtja yuhu. ⁴ Sa yena yuhu wahati mahare masine musa, nidi Jesu usãre tiqiuero buhenare.

⁵ —Pũhto, mũhu wahatore masiedaja usã. ¿Sa yena dũhse ye mũhu wahati mahare masinatari usã? ni sinituri Tomasu Jesure.

⁶ Tiqiuero sa ni sinitugũ Jesu yũturi:

—Cohãcjũ cahapu wahagũ yegu ijiita niaja yuhu. Sa yegu poto ijiyere yahugu ijiita niaja yuhu. Sa yegu uhmũsepure catiducugũ yegu ijiita niaja yuhu. Sa ye yeequina dihita yuhu Pacu cahapu wahaeta. ⁷ Yuhure masina, yuhu Pacu gũhare masiboya musa. Yojopure tiqiuore ihñari musa. Sa yena tiqiuore masi tuhasare musa, nidi Jesu usãre.

⁸ Tiqiuero sa nigũ Felipe ohõ saha nidi:

—Pũhto, mari Pacure ihñõña usãre. To punota ihña duaja usã, nidi tiqiuero.

⁹ Tiqiuero sa nigũ Jesu yahuri:

—¿Felipe, yoari pje yuhu mehna ijipegũta, mũhu masiedajari

yuhare? Yuhare ihñariquiro yuh Pacu gähure ihña tuhasari. ¿Sa yegu “Mari Pacu ihña usäre”, nigu dähsegü sa niajari mäh yuhare? ¹⁰ Yuhu, yuhu Pacu mehna puana ijiepenata ihcäta ijiaja. ¿Tire “Poto ijierare”, niimeje niajari mäh? Musare yahugu yuhu esa tuharo yahugu niedaja. Yuhu Pacu yahu basagu niaja. Sa yero tiquiro yuhu mehna ijiriquiro tiquiro tutuaye mehna ye ihñore. ¹¹ Yuhu, yuhu Pacu mehna puana ijiepenata ihcäta ijiaja. Tire “Ijirota ijire”, ni wacüña musa. Tire “Ijirota ijire”, niedana, Cohäcju tutuaye mehna yuhu ye ihñore wacüña, yuhu Pacu mehna yuhu ihcäta ijiyere “Ijirota ijire”, ni wacüña musa. ¹² Ijirota musare niaja. Yuhare wacü tutuariquiro yuhu yeriro sahata yerota. Sa yero tiquiro pehe yuhu yuhduoro yerota. Yuhu Pacu caharu tojoa wahan tu niaja yojopre. Sa yero yuhare wacü tutuariquiro yuhu yuhduoro Cohäcju tutuaye mehna ye ihñonota. ¹³ Sa yegu yuhare wacü tutuayequina tiquina sinino punota yeitja. Sa yegu yuhu Pacu tiquiro tutuariquiro ijiyere ihñoutja. ¹⁴ Yuhare wacü tutuana musa ijigü musa sinino punota yeitja, nidi Jesu.

—*Espiritu Santore musare ohoutja, ni yahuahye Jesu*

¹⁵ Sa ni tuhasa ohö saha ni nemori:

—Yuhare musa cahña, yuhu dutiyere quehnoano ye pehonata. ¹⁶ Yuhu Pacu sinitja. Yuhu sa sinigü yuhu Pacu pehe apeqirore musare yedohoatiquirore musare ohorota. Sa yero tiquiro musare yedohoatiquiro pehe ijipihtiye decori musa mehna ijirota. ¹⁷ Tiquiro poto yahuriquiro Espiritu Santota ijire. Ahri yehpa cjëna pehe Espiritu Santore masiedare. Sa ye tiquirore

cuo masiedare. Tiquirota musa mehna ijirota. Sa yena musa pehe tiquirore cuonata. Sa yena tiquirore masine musa. ¹⁸ Musare cohäsi yuhu. Musa mehna ijigü tagu, tojoa tautja yuhu. ¹⁹ Sa ijiepegüta mehenogä däh sare yuhu wahato. Yuhu wahari bato ahri yehpa cjëna yuhare wacü tutueyequina yuhare pari turi ihñasi. Musa pehe yuhare ihñanata. Yuhu catigu ijigü musa gähü ijipihtiye decori Cohäcju mehna catinata. ²⁰ Ti deco yuhu tojoa tati deco yuhu Pacu mehna ihcäta usä ijigü masinata musa. Sa yegu yuhu mehna cjëna musa ijigü musa mehna cjü yuhu ijigü gähure masinata musa. ²¹ Yuhu dutiyere yeriquiro yuhare cahñiquirota ijire. Sa yero yuhare cahñiquirore yuhu Pacu pehe cahñota. Sa yegu yuhu gähü tiquirore cahñitja. Sa ye yuhare quehnoano masigü yeitja tiquirore, nidi Jesu usäre tiquiro buhenare.

²² Usä mehna cjëno apeqiro Juda wame tiriquiro ijiri. Juda Iscariote Jesure ihña tuhtiyequinare ihñootiquiro ijierari tiquiro. Apeqiro Juda ijiri. Sa yero tiquiro Jesure sinituri:

—¿Puhto, dähse yeitjari mäh usäre sa nigü? ¿Ahri yehpa cjë nare mähure masigü yeragu, yabere yeitari mäh usä dihitaré mähure masigü yegu? ni sinituri Juda.

²³ Tiquiro sa nigü tuhoro Jesu tiquirore yahuri:

—Yuhare cahñequina, yuhu dutiyere quehnoano yeye nine. Tiquina sa yegü yuhu Pacu pehe tiquinare cahñota. Sa yena tiquina mehna ijina ahtanatja usä. ²⁴ Yuhare cahñiquiro yuhu dutiyere yerare. Sa ye yuhu yahuye musa tuhori pehe yee yahuye ijierare. Yuhare ohoriquiro ye yahuye pehe ijire. Tiquiro yuhu Pacu ijire.

²⁵ MUSA mehna ijinigū ahrire mūsare yahugū niaja. ²⁶ Came yūhū sinigū yūhū Pacū Espiritu Santore ohorota mūsare. Sa yero Espiritu Santo pehe mūsare yedohoatiquiro ijiro, mūsare buhe pehorota tiquiro. Sa yero mūsare yūhū yahurire mūsare wacūgū yerota tiquiro.

²⁷ Mūsare quehnoano ijigū yeitja yūhū. Yūhū quehnoano ijiriro sahata quehnoano ijigū yeitja yūhū mūsare. Ahri yehpa cjēna tiquina ni mehoriro sahata yesi yūhū mūsare. Yūhū pūrita potota quehnoano ijigū yeitja mūsare. Bujua witi pajiro wacūedacāhña mūsā. Sa yena cueracāhña mūsā. ²⁸ “Yūhū wahautja. Sa yegu mūsā mehna ijigū tagū tojoa tautja”, mūsare yūhū sa ni yahugū tūho tuhasari mūsā. Tire tūhona, bucueboaya mūsā. Yūhūre mūsā poto cahña, bucueboaya mūsā. Yūhū Pacū pehe yūhū yūhdūoro tutuare. Sa yena tiquiro cahapū yūhū wahatore mūsā masidi bato yūhūre cahña, bucueboaya mūsā. ²⁹ Mūsā yūhūre wacū tutuatire yūhū wahatore yahuyugū niaja mūsare.

³⁰ Ahri yehpa cjēna pūhoro watūno pūhoro ijiro taro nine yojopūre. Tiquiro sa ijiro tagū yūhū mūsā mehna yūhū yahuducu bato tiati pje mehenogā dūsare. Tiquiro pehe yūhūre yūhdūdūca masiedare. ³¹ Sa yegu yūhūre yūhū Pacū tiquiro dutiriro sahata yeaja yūhū. Sata yeaja yūhū, yūhū Pacūre yūhū cahñene ahri yehpa cjēna tiquina masiatire. Wahcādūcaya. Isa wahana, nidi Jesu usāre tiquiro buhenare.

15

Jesu uhse da yero saha ijiriquiro ijire

¹ Came queoye mehna buhero usāre ohō saha nidi Jesu:

—Yūhū potota uhse da yero saha ijigū ijiaja. Yūhū Pacū pehe uhse dare ihña ihboriquiro yero saha ijire. ² Yeequina uhse da dūpūri yero saha ijiequina yūhū mehna cjēnata ijire. Uhse da dūpūri dūca marieñe dūpūrire ihña ihboriquiro tiquiro pehe cohāriro saha yūhū Pacū tiquiro cahmeñene yerariquinare cohāre. Dūca tiye dūpūrire ihña ihboriquiro tiquiro quehnoriro saha yūhū Pacū tiquiro cahmeñene yeyequinare yedohorota tiquiro, “Yūhū cahmeñene ye nemoahdo”, nino. ³ Yeere tūhona, “Ijirota ijire”, nidi mūsā. Sa yero yūhū Pacū mūsā ñañe yerire cohā tuhasari. ⁴ Yūhū mehna cjāna ijiya mūsā. Sa yegu mūsā mehna ijiitja. Uhse da dūpūri uhse da mehna wahñaedaye dūpūri ijiye, ti dūpūri pehe dūca mariedare. Sata yūhū mehna cjāna ijierana, yūhū Pacū cahmeñene ye masiedare mūsā.

⁵ Yūhū uhse da yero saha ijigū ijiaja. Mūsā pehe ti da dūpūri yero saha ijina ijire. Yūhū mehna cjāno mehna yūhū ijigū dūca tiye dūpūri yero saha tiquiro yūhū Pacū cahmeñene yere. Yūhū mehna cjāna ijierana yūhū Pacū cahmeñene ye masiedare mūsā. ⁶ Ñañe dūpūrire tiquiro cohāboriro saha yūhū mehna cjēna ijieyequinare yūhū Pacū cohānota. Ti dūpūri ñai dijiaa wahagū uhse dare ihña ihboriquiro ti dūpūrire ne cahmeoca pecapū ujā cohānota. Sata yerota Cohācjū yūhū mehna cjēna ijieyequinare.

⁷ Yūhū mehna cjāna ijina, yūhū buheyere boeraboaga mūsā. Sa boerana, mūsā cahmeno punota siniña. Sa yegu mūsā sinino punota ye basautja. ⁸ Yūhū Pacū cahmeñene yena mūsā ijigū ihñañe “Jesu yequina ijire ahriquina”, ni masieta masa. Sa ye mūsare ihñañe yūhū Pacūre ño peoeta. ⁹ Yūhū Pacū yūhūre tiquiro cahidiro sahata mūsare yūhū gūhū cahñe

tii. Yuhū cahīna ijiducuya mūsa. ¹⁰Yuhū cahīnequina ijiducuyequina yuhū dutiyere yere. Yuhū Pacu ye dutiyere yeaja yuhū. Sa yegū tiquiro cahīnogū ijiducujaja yuhū. Sata mūsa gūhū yuhū dutiyere yena yuhū cahīna ijiducunata mūsa.

¹¹ 'Ahrire mū sare yahuu yuhū mehna mūsa quehnoano bucueatire. Sa yena tutuaro bucuenata mūsa. ¹² Ohō saha dutiaja mū sare: Mū sare yuhū cahīdiro sahata mūsa mehna cjēna gūhure cahīna. ¹³ Ihcāquiro masūno tiquiro mehna cjāno ye buhiri yariaro tiquiro mehna cjēnore tutuaro cahīne, apequina tiquina cahīdiro yuhūoro. ¹⁴ Sa yena yuhū dutiyere yena yuhū mehna cjāna ijire mūsa. ¹⁵ Potota yuhū mehna cjāna waro ijire mūsa. Mūsa sa ijigū ijipihtiye yuhū yerire yahuaja mū sare. Cahacjāno tiquiro puhtoro yerire masiedare tiquiro. Sa yegū "Yuhū cahacjāna ihyo ijina ijire mūsa", mū sare niedaja. Yuhū Pacu yuhūre tiquiro yahurire mū sare yahu pehou. Sa yahugū "Yuhū mehna cjāna ijire mūsa", mū sare niaja yojopure. ¹⁶ Mūsa pehe yuhūre ne beserari. Yuhū pehe mū sare besei yuhū Pacu cahmeñene mūsa yeatire. Mūsa sa yegū mūsa yeye ne ihyo waro ijisi. Ahri deco yoaro punota sa ijiducuatī ijire mūsa yeye. Mūsa sa yegū yuhūre mūsa wacū tutuagū yuhū Pacure mūsa sinino punota tiquiro mū sare ohorota. ¹⁷ Ahrire mū sare dutiaja yuhū: Mūsa mehna cjēnare cahīna mūsa, ni yahuri Jesu.

Jesure tiquiro yequina gūhure ahri yehpa cjēna ihña tuhtire

¹⁸ Sa yero tiquiro yahu nemori:

—Ahri yehpa cjēna mū sare tiquina ihña tuhtigū ihñana ahrire wacūña mūsa: Mū sare tiquina ihña tuhtiatano pano yuhū pehere ihña tuhti mahtari tiquina. ¹⁹ Cohācjāre cahmedana mūsa ijigū, ahri yehpa

cjēna tiquina cahme cahīdiro sahata mūsa gūhure cahīboaya tiquina. Ahri yehpa cjāna mūsa ijigū mū sare besei. Sa yena yojopure ahri yehpa cjāna waro ijierare mūsa. Mūsa sa ijieragū ihñañe ahri yehpa cjēna mū sare ihña tuhtire. ²⁰ "Yeequina ijina mūsa yuhū bui ijierare", mū sare yuhū nidire wacūña mūsa. Sa yena yuhū docapū ijina yuhū ñano yuhūdiro sahata ñano yuhūdnata mūsa gūhū. Yuhūre ñano yeriquinata mūsa gūhure ñano yeeta. Yuhū buhegū yuhūtiriquinata mūsa buhegū gūhūre yuhūtieta tiquina. ²¹ Ahri yehpa cjēna yuhūre ohoriquirore masiedare. Sa ye yuhūre wacū tutuana mūsa ijigū ihñañe tiquina ñano yeeta mū sare.

²² 'Tiquinare yuhū buhegū ahtaeragū yuhūre tiquina cahmedari buhiri, buhiri mariedaboaya. Yojopure tiquinare yuhū buheri bato "Ñañe buhiri mariedare usāre", ni masiedare tiquina. ²³ Yuhūre ihña tuhtiriquiro yuhū Pacu gūhūre ihña tuhtire. ²⁴ Cohācjū tiquiro tutuaye mehna apequina tiquina ne yerarire ye ihñou. Sa ye tiquinare tire yuhū ye ihñoadagū tiquinare ñañe buhiri mariedaboaya. Cohācjū tutuaye mehna yuhū ye ihñorire tiquina ihñari bato yuhūre yuhū Pacu gūhūre ihña tuhtire tiquina. ²⁵ Sa ihña tuhtiye Cohācjū yere tiquina ojoari pūpū duitapūta tiquiro ni ojoariro sahata yeye nidi tiquina. Ohō saha ni ojoahye: "Tiquinare yuhū ñano yerapegūta yuhūre ihña tuhtire tiquina", ni ojoahye duitapūta Cohācjū yere tiquina ojoari pūpū.

²⁶ 'Yuhū batopū mū sare yedo hoatiquiro, yuhū Pacu mehna ijiriquiro mū sare yuhū ohoatiquiro Espiritu Santota ijire. Tiquiro potota yahuriquiro ijire. Sa yero tiquiro ahtarō, yuhū ijije tiyere yahurota mū sare. ²⁷ Masare

yuhū buhe ducagūpata mūsa gūhū decoripe yuhū mehna ijiducuri. Sa yena mūsa gūhū yuhū ijiye tiyere yahunata apeqinane, ni yahuri Jesu.

16

¹ Sa ni tuhasa usāre ohō saha ni yahu nemori:

—Came yuhū buheyere yuhū gūhūre mūsa cohāedatire ahrire ijipihtiyere yahuu mū sare. ² Judio masa mari buheye wahūsepu mūsa sa jā duagū mū sare sa jā dutisi yeequina mūsa ijiri buhiri. Sa ye ape tahapu mū sare wejē, “Cohāc jū cahmeñene yena niaja”, ni tuhuetamaga apeqina. ³ Sa ye yuhū Pacu, yuhū gūhūre tiquina masiedare. Sa masiedaye mū sare ñano yeeta tiquina. ⁴ Sa yena mū sare ñano tiquina yegū ihñana “Tiquina ohō saha yeato panota Jesu yahu tuhasari usāre”, ni wacūnata mūsa. Mūsa sa ni wacūatire yojopure ahrire yahu mahtagu niaja mū sare, ni yahuri Jesu.

Espíritu Santo tiquiroyeatire yahuahye Jesu

Sa ni tuhasa ohō saha ni yahu nemori:

—Coā waropure mūsa mehna ijigu ahrire mū sare yahuera. ⁵ Yojopure pehere yuhūre ohoriquiro cahapu wahautja. “¿Nohopure wahautjari mūhū?” yuhūre ni, ihcāquiro borota ne sinituerari mūsa. ⁶ Sa sinituerapenata yuhū wahatire mū sare yuhū yahu ma jagū mūsa ñano jeripohna tire. ⁷ Mū sare ijirota yahugata niaja. Yuhū wahari bato mū sare quehnoanota. Yuhū uhmūsepu wahāeragū mū sare yedohoatiquiro pehe ahtaeraboaya. Wahagu mū sare tiquiore oho dijioutja yuhū. ⁸ Yuhū sa oho dijiogū tiquiroyahtarota. Sa wihiro ahri yehpa c jēna ñañe yeequina tiquina ijiyere tiquinare masigū yerota

tiquiroyahtarota. Sa yero quehnoano ijiye tiye gūhūre buherota tiquiroyahtarota. Sa yero Cohāc jū mū sare tiquiroyahtarota buhiri dahreato gūhūre yahurota masare yedohoatiquiro pehe. ⁹ Yuhūre wacū tutueyequina ijire ahri yehpa c jēna. Sa yero yedohoatiquiro pehe masa ñañe yeequina tiquina ijiye tiyere tiquinare masigū yerota. ¹⁰ Yuhū Pacu cahapu wahautja. Yuhū sa wahari bato masa yuhūre ihñasi. Sa yero quehnoano ijiye tiye gūhūre buherota yedohoatiquiro pehe. ¹¹ Ahri yehpa c jēna puhtorore watīnore Cohāc jū buhiri dahre duti tuhasari. Sa yero Cohāc jū mū sare tiquiroyahtarota buhiri dahreati gūhūre yahurota yedohoatiquiro pehe.

¹² Pajiro ijire mū sare yuhū yahuati. Yuhū sa yahu nemo duepegūta tire yuhū yahugū yojopure masinisi mūsa. Sa yena yojopure quehnoano tuhosi mūsa. ¹³ Yuhū sa yahu nemoedagū Espiritu Santo pehe mū sare yahu nemono ahtarota. Tiquiro esa tuharo mū sare yahusi. Tiquirore yuhū Pacu yahu dutirire tiquiroyahtarota mū sare. Sa yero mū sare pote yahu pehorota. Sa yero “Camepu ohō saha waharota”, ni yahurota tiquiroyahtarota. ¹⁴ Sa yero yeere mū sare tiquiroyahtarota. Sa yahuro yuhūre ño peogū yerota masare. ¹⁵ Ijipihtiyere yuhū Pacu ye, yee gūhū ijire. Sa yegū “Espiritu Santo pehe yeere yahurota mū sare”, ni mū sare, ni yahuri Jesu.

—Bujna witina ijiepenata came bucuenata mūsa, ni yahuahye Jesu

¹⁶ Sa ni tuhasa ohō saha ni yahu nemori:

—Mehenogā bato mūsa yuhūre ihñasi. Sa yena mehenogā bato mūsa yuhūre ihñanata tja, nidi Jesu usāre tiquiroyahtarota buhenare.

17 Tiquiro sa nigū tuhona, usā pehe meheñequinagā ohō saha ni yahuducuu usā basi:

—¿“Mehenogā bato mūsa yuhure ihñasi. Sa yena mehenogā bato mūsa yuhure ihñanata tja”, nino dūhse nino sa niajari marine? ¿Sa yero “Yuhū Pacū cahapū wahautja”, nino dūhse ijiro boro marine sa niagari tiquiro? 18 ¿“Mehenogā bato”, nino dūhse nino sa niajari ahriquirō? Tiquiro ni yahurire quehnoano masiedaja mari, ni yahuducuu usā basi.

19 Usā sa ni yahuducugū Jesu tiquirore usā sinitu duarire masino, usāre yahuri:

—¿“Mehenogā bato mūsa yuhure ihñasi. Sa yena mehenogā bato yuhure ihñanata tja”, yuhū nidire sinitu duajari mūsa? ¿Tire yuhū nidire masiedajari mūsa? 20 Ijirota mūsare nigū niaja. Yuhū yariagū ihñana mūsa utinata. Sa yena tutuaro bujua witinata. Sa ye yuhure ño peoyequina pehe bucueeta. Mūsa pehe bujua witina ijiepenata, came bucuenata mūsa. 21 Ohō saha ijire ti: Numino nijj wahcōno, ticoro ñano yuhdūato pano ijire. Sa yero ticoro tutuaro bujua witiere. Sa bujua witiereperota ticoro pohna tiri bato ticorore purīdire wacūedare ticoro. Nijjinogā ahri yehpapū tiquiro masa bajuagū ticoro bucuere. Sa yero ticorore purīdire wacūedare. 22 Sata mūsa yojopūre bujua witinata. Came mūsare ihñautja. Sa yena mūsa tutuaro bucuenata. Mūsa sa bucuegū apequina mūsare bujua witiagū ye masisi.

23 “Ti deco mūsa yuhure ihñari deco yuhure sinitusi mūsa. Masi tuhasarinapū ijinata. Ijirota mūsare nigū niaja. Yuhure mūsa wacū tutuagū ihñano yuhū Pacūre mūsa siniñene tiquiro mūsare ohorota. 24 Ahri deco pano yuhū tu-tuaye mehna Cohācjūre siniedarīdi

mūsa. Yuhure wacū tutuatjāna Cohācjūre siniña. Mūsa sa sinigū mūsa sinidire mūsare ohorota, mūsa quehnoano bucueatire, nidi Jesu usāre.

Ñañequinare Jesu pehe yuhdūcahye

25 Sa ni tuhasa ohō saha ni nemori:

—Queoye mehna mūsare yahue tii. Sa yahuepegūta came mūsare queoye mehna yahusi yuhū. Sa yahueragū yuhū Pacū pehere quehnoano poto yahutja mūsare. 26 Ti decore mūsare yuhū Pacūre sini basasi yuhū. Yuhure wacū tutuana, mūsa basi tiquirore sininata. 27 Mūsa yuhure cahīne. Sa yena yuhū Pacū cahapū yuhū ahtarigū ijigū “Ijirota ijire”, nine mūsa. Sa nina mūsa ijigū ihñano yuhure cahīna mūsa ijigū ihñano yuhū Pacū pehe mūsare cahīne. Tiquiro sa cahīgū tiquirore mūsa sininata. 28 Yuhū Pacū cahapū ijirigū ahri yehpapūre ahtaū yuhū. Sa yegū yojopūre ahri yehpapū ijirigū yuhū Pacū cahapū wahautja, nidi Jesu.

29 Tiquiro sa nigū usā tiquiro buhena ohō saha nii:

—Yojopū pūrita queoye marieno yahuducugū quehnoano bajuro yahugū nine mūhū usāre. 30 Mūhū quehnoano masi pehogū mūhū ijigū yojopū pūritare usā masi-aja. Sa ye apequina mūhure buhe masiedare. Tire yojopūre usā quehnoano masiaja. Usā quehnoano masina, Cohācjū cahapū ahtarigū mūhū ijigū “Ijirota ijire”, niaja usā, nii usā Jesure.

31 Usā sa nigū Jesu yuhūtiri usāre:

—¿Yojopūre “Ijirota ijire”, niajari mūsa? 32 Came cjūno ijipihtina mūsa wuhūsepū waha sitena, yuhure cohānata mūsa. Mūsa sa cohāepēgūta yuhū Pacū pehe yuhū mehna ijire. Sa yegū yuhū ihcāta ijieraja. 33 Ahrire mūsare yahū

mãhtau, yũhure mũsa wacũ tutu-aye mehna mũsa quehnoano ijia-tore. Cohãcjũre cahmeeñequina cahapũ mũsa ijigũ ñano yeeta mũsare tiquina. Tiquina sa yepegũta bucueya mũsa. Ahri yehpa cjẽna tiquina ñañe yerire yũhdũdũcagũ ijiaja yũhũ. Sa yena yũhure wacũ tutuana bucueya mũsa, nidi Jesu usãre tiquiuro buhenare.

17

Jesu tiquiuro buheyequinare Cohãcjũre sini basahye

¹ Sa ni yahu tuhasa Jesu uhmũanopũ ihña mũo, Cohãcjũre ohõ saha ni yahuducuri:

—Mai, yojopũre mũhũ yahu queoriro sahata yũhure ñano tiquina yeati pje esarota nine. Yũhure mũhũ maçure masare ño peogũ yeya. Mũhũ sa yegũ mũhũre masare ño peogũ yeitja yũhũ gũhũ.

² Ijipihtiyequina pũhto yũhũre cũri mũhũ. Sa yegũ yũhũre mũhũ ohoriquinare mũhũ mehna sa ijiducugũ yeitja yũhũ. Sa yegũ mũhũre masare ño peogũ yeitja yũhũ. ³ Mũhũ dihita Cohãcjũ waro ijire. Yũhũ Jesucristo mũhũ ohorigũ ijiaja. Sa ye ijipihtiyequina mũhũre masiñequina, yũhũ gũhũre masiñequina uhmũsepũ mari mehna sa ijiducueta, nidi Jesu.

⁴ Sa ninota ohõ saha ni nemori mari Pacũre:

—Ahri yehparũre mũhũ ye dutirire ye peho tuhasau yũhũ. Sa yegũ mũhũre masare ño peogũ yei yũhũ. ⁵ Ahri yehpa ijia to pano mũhũ mehna yũhũ ijigũ ijipihtiyequina yũhũre tiquina ño peo mãhtariro sahata yojopũre yũhũre tiquina ño peogũ yeya tja.

⁶ Ahri yehparũ ijieyequinare yũhũre mũhũ ohoriquinare mũhũre masigũ yei. Mũhũ ohoriquina mũhũ yequina ijire. Sa yegũ tiquinare ohori mũhũ yũhũre. Sa ye mũhũ dutiyere yerĩ tiquina.

⁷⁻⁸ Yũhũre mũhũ yahurire tiquinare buhei. Yũhũ sa buhegũ tũhoye yũhũ buheyere cahmedi tiquina. Sa ye potota mũhũ cahapũ ahtarigũ yũhũ ijigũ masine tiquina. Sa ye mũhũ ohorigũ yũhũ ijigũ “Ijirota ijire”, ni tũhoture tiquina. Sa ye ijipihtiyee yee mũhũ ye ti ijigũ masine tiquina.

⁹ Tiquinare mũhũre sini basagũ niaja. Apequina pehere sini basagũ niedaja yũhũ. Yũhũre mũhũ ohoriquina mũhũ yequina ijire. Sa yegũ tiquinare sini basagũ niaja mũhũre. ¹⁰ Tiquina ijipihtiyequina mũhũ yequina ijire. Sa ye mũhũ yequina pehe yeequina ijire. Yũhũre wacũ tutuaye yũhũ tutuagũ ijiyere masigũ yere tiquina masare.

¹¹ Yojopũre ahri yehparũre tojoasi yũhũ. Mũhũ cahapũ wahaũ tũhũ niaja. Yũhũ sa wahaepẽgũta yojopũre yũhũre mũhũ ohoriquina ahri yehpare tojoare. Mai, mũhũ quehnoagũ ijire. Yũhũre mũhũ ohoriquinare mũhũ tutuaye mehna ihña ihbo basaya. Mũhũ sa ihña ihbogũ mari ihcũta mari ijiro saha tiquina gũhũ ihcã curuata ijiaho. ¹² Tiquina mehna ijigũ mũhũ tutuaye mehna tiquinare quehnoano ihña ihbou. Ihcãquiuro pũrita pecapũ waharota mũhũ yere tiquina ojoari pũpũ yahuriro sahata.

¹³ Yojopũre mũhũ cahapũ wahaũ tũhũ niaja. Sa yegũ ahri yehparũ ahri ijipihtiyere yeequinare yahuaja yũhũ mehna tiquina quehnoano bucueature. ¹⁴ Mũhũ yere yahuu tiquinare. Tiquina gũhũ yũhũ yero sahata ahri yehparũ iji dojoatiquina ijierare. Sa ye ahri yehpa cjẽna pehe tiquinare ihña tuhtire. ¹⁵ “Ahri yehparũ ijieyequinare, yeequinare neahña”, niedaja. Yũhũ sa niedapegũta tiquinare quehnoano ihña ihboya. “Watĩno ñañene tiquinare ye dutiari”, niğũ, quehnoano ihña ihboya tiquinare. ¹⁶ Ahri yehpa cjũ

ijieraja. Tiquina gāhū yāhū yero sahata ahri yehpapū iji dojoatiquina ijierare. ¹⁷ Yeequinare mūhū buheye mehna quehnoañequina yeya tiquinare. Mūhū yahuye pehe ijirota ijire. ¹⁸ Ahri yehpapūre yūhūre mūhū ohoriro sahata yūhū pehe yeequina gāhūre mūhū yere buhe dutigū ohou. ¹⁹ Mūhū cahmeñene yegū tagū yariacjū ijigū yūhū pagūre ohoaja. Sa yeaja yūhū, yeequina gāhū mūhū cahmeñene poto tiquina quehnoano yeatire.

²⁰⁻²¹ ' "Yeequina yojopūre ijiyequina dihitare yedohoya", ni sini basaeraja yūhū. Yeequina apequina gāhūre yeere tiquina buheri bato tiquina gāhū yūhūre wacū tutuaeta. Tiquina gāhūre yedohoya, yeequina ijipihtiequina ihcā curua tiquina ijiro quehnoano. Yūhū mūhū mehna mari pūana ijipe-nata ihcāta ijiaja. Ihcāta mari ijiro sahata tiquina gāhū mari mehna ihcā curuata ijiahro. Ihcā curuata ijiahro, mūhū ohorigū yūhū ijiyere ijipihtiequina masa "Ijirota ijire", tiquina niatire. ²² Yūhūre mūhū tutuaye ohorire yeequinare ohou. Ti tutuayere cūoye, ihcāta mari ijiro sahata tiquina gāhū ihcā curuata ijieta. ²³ Yūhū tiquina mehna ijiaja. Sa yegū mūhū yūhū mehna ijire. Mari sa ijigū yeequina potota ihcā curuata quehnoano ijieta. Ihcā curuata tiquina ijigū ihñañe mūhū ohorigū yūhū ijiyere ahri yehpa cjēna masieta. Sa ye yūhūre mūhū cahīdiro sahata yeequina gāhūre mūhū cahīñene masieta masa.

²⁴ 'Mai, ahri yehpa iji dūcato pano yūhūre cahīe tiri mūhū. Sa cahīgū yūhū tutuagū ijiyere ihñori mūhū. Sa yegū yūhūre mūhū ohoriquinare yūhū mehna tiquina ijigū cahmeaja, yūhū tutuagū ijiyere tiquina masiatire. ²⁵ Mai, mūhū quehnoagū ijire. Ahri yehpa cjēna ñañequina mūhūre masiedare. Yūhū pehe mūhūre masiaja. Sa ye

mūhū ohorigū yūhū ijigū masine yeequina. ²⁶ Tiquinare mūhūre masigū yei. Came gāhūre mūhūre tiquinare masigū yeitja, yūhūre mūhū cahīdiro sahata apequinare tiquina cahīatire. Sa yegū yeequina mehna ijigūtja, nidi Jesu mari Pacare.

18

Jesure peresu yeahye

(Mt 26.47-56; Mr 14.43-50; Lc 22.47-53)

¹ Tiquiro sa nidi bato Jesu, usā gāhū tiquiro buhena Cedrō wame tiri mare pehā, olivo wame tiye cjū wesepū esau. ² Peye tahari ti wesepū Jesu mehna cahmecoae tii. Sa yero Juda Jesure ihñā tuhtiequinare ihñootiquiro ti wesere masidi. ³ Sa masino pūa curua surarare ūhmū tā cāhtari ti wesepū Jesure ihñono taro. Ihcā curua surara waro ijiri. Ape curua surara Cohācjū wūhūre cohtiequina ijiri. Tiquina pahia pūhtoā, fariseo masa tiquina ohoriquina ijiri surara, Cohācjū wūhūre cohtiequina mehna. Sa ahtaye sihāñe pacare, sihāñe cjū gāhūre sihā cāhtari. Tiquina wamoa gāhūre ne cāhtari tiquina. ⁴ Ti wesepū tiquina wihiri bato Jesu tiquiro ñano yūhdūatire masino, tiquinare piti ca, sinituri:

—¿Noare macana niajari mūsa? nidi Jesu.

⁵ —Jesu Nazare cjūnore macaja usā, ni yūhtiri tiquina.

—Tiquiro tjiaja yūhū, nidi Jesu.

Juda pehe Jesure ñehe dutiro ihñoriquiro tiquina mehna ijiri. ⁶ Sa ye "Tiquiro tjiaja yūhū", Jesu nigāta tiquina pehe tūho maria waha, du sītī maa, yehpapū bora quehe sari. ⁷ Tiquina sa wahagū ihñano pari turi sinituri tiquinare Jesu:

—¿Noare macana niajari mūsa? nidi.

—Jesu Nazare cjūnore macana niaja usā, ni yūhtiri tiquina tja.

8 —“Yuhũ tjiaja”, ni tuhasamigu yuhũ musare. Sa yena yuhũre ñehena ahriquinare yuhũ mehna cjẽnare peresu yeracãhña musa, nidi Jesu.

9 Sa usãre cahĩno ne ihcãquirore butigũ yerari. Sa yero to pano Cohãcjũre tiquiro nidiro sahata yero nidi tiquiro. “Yuhũre mũhũ ohoriquinare ne ihcãquiro boeru”, tiquiro nidiro sahata yero nidi Jesu. 10 Sa ye Simo Pedro ñoseni pjĩne curo, ti pjĩne tũã we nedoqueo, pahia pũhtoro cahacjũno Malco wame tiriquiro cahmonore dũte pahrẽ cãri. Poto pehe cjã cahmonore dũte pahrẽ cãri. 11 Tiquiro sa dũte pahrẽgũ ihñano Jesu tiquirore ohõ saha nidi:

—Mũhũ ñoseni pjĩne ihboya. Yuhũ Pacu yuhũre tiquiro ñano yuhũdu dutiriro sahata ñano yuhũdũtja yuhũ, nidi Jesu Pedore.

Pahia pũhtoro cahapu Jesure neahye tiquina

(Mt 26.57-58; Mr 14.53-54; Lc 22.54)

12 Tiquiro sa ni tuhasagũta surara, tiquina pũhtoro mehna, Cohãcjũ wuhũre cohteyequina surara gũhũ Jesure ñehe, tiquirore dũhteri. 13 Dũhte tuhasa Anás cahapu nea mũhtari tiquina. Anás pehe Caifa mareino ijiri. Caifa pehe ti cahmare pahia pũhtoro ijiri. 14 “Judio masa ye ijiatire ihcãquiro masano yariagũ quehnoanota”, nidiquiro boro ijiri Caifa pehe.

—Jesure masiedaja, niahye Pedro

(Mt 26.69-70; Mr 14.66-68; Lc 22.55-57)

15 Sa yena yuhũ Simo Pedro mehna Jesure yoa cjũnopũ ihña nũnũ tãũ. Caifa ya wuhũpu neañe nidi Jesure. Yuhũ pehe pahia pũhtoro tiquiro ihña masinohgũ ijigũ Jesu bato pũhtoro ya wuhũ ijiri sahrĩnopũ sajã wahaũ. 16 Yuhũ

sa sajãgũ Pedro pehe sahrĩno sopecahapũ tojoadaũca sari. Sa yegũ majare wijia ta, sopecahare cohtericorore sinituu. Yuhũ sa sinitu tuhasagũ ticoro Pedore sajã ta dutiri. Ticoro sajã ta dutiri bato yuhũ Pedore ne sajãa wahaũ. 17 Yuhũ sa ne sajãgũ ihñano sopecahare cohtericoro pehe Pedore sinituri:

—¿Jesu buheyequina mehna cjũ ijierajari mũhũ? nidi ticoro Pedore.

—Ijieraja yuhũ, ni yũhtiri Pedro pehe.

18 Usã esato pano to cjẽna pũhtoa cahacjẽna, surara mehna tiquina sohmati pecare wijiã tuhasari jiri. Yũsarĩdi. Sa ye tiquina ti peca dũhtũ caha ducuye, sohmañe nidi. Tiquina sa sohmagũ ihñano Pedro gũhũ ahta, sohmarĩ.

Pahia pũhtoro Jesure sinituahye
(Mt 26.59-66; Mr 14.55-64; Lc 22.66-71)

19 Sa ye pahia pũhtoro Jesu buherire, usã tiquiro buhena gũhare sinituahye Jesure. 20 Tiquiro sa sinitugũ Jesu pehe yũhtiahye tiquirore:

—Ijipihtiyequinare buhegũ tiquina ihñono ducuu. Sa buhegũ judio masa mari buheye wuhũsepu Cohãcjũ wuhũpu gũhare sa buheducuu yuhũ. Duhtitjãgũ buherũ yuhũ.

21 ¿Dũhsegũ yuhũre sinituajari mũhũ? Sinitu duagũ yuhũ buheyequinare sinituya. Yuhũ buherire tiquina masine, ni yũhtiahye Jesu.

22 Tiquiro sa nigũ tũhoro topũ ducuriquiro surara pehe tiquiro omoca mehna Jesure quẽahye.

—Sa niedacãhña pahia pũhtorore, niahye surara pehe Jesure.

23 Tiquiro sa nigũta Jesu ohõ saha niahye:

—Ñano yuhũ ni yahuducurire yahuya yuhũre. ¿Poto musare yuhũ yahuepegũta, dũhsegũ tagũ yuhũre quẽajari mũhũ? niahye Jesu surarare.

²⁴ Came Anás Jesure tiquina dũhteriquirore Caifa pahia pũthoro cahapũ ohoahye.

—*Jesure masiedaja, pari turi ni-ahye Pedro*

(Mt 26.71-75; Mr 14.69-72; Lc 22.58-62)

²⁵ Sa ye Simo Pedro peca dũhtũ cahapũ ducuro, sohmano nidi. Tiquiro sa sohmaducugũ ihñañe to cjẽna tiquireore sinituri:

—¿Mũhu gãhu Jesu buheyequina mehna cjũ mũhu ijierajari? nidi tiquina Pedrore.

—Ijieraja yũhu, ni yũhtiri Pedro.

²⁶ Sa yero pahia pũthoro cahacjẽna mehna cjũno Pedro tiquireo cahmono dũte pahrẽdiquiro acayaro pehe Pedrore sinituri:

—¿Jesure tiquina ñehedi wesepũ yũhu ijigũ mũhu gãhu tiquireo mehna ijieracoahye? ni sinituri tiquireo Pedrore.

²⁷ —Yũhu tiquireo mehna ijierũ, nidi Pedro.

Tiquiro sa nigũta canaca yahuri.

Jesure Pilato sinituahye

(Mt 27.1-2, 11-14; Mr 15.1-5; Lc 23.1-5)

²⁸ Ñami cjũno ijigũ Caifa ya wũhũpũ ijiriquina Jesure ne wijia, Roma cjẽna pũthoro Pilato ya wũhũpũ nea wahari tiquina. Sa wahaepeta tiquireo ya wũhũpũ sajãedari. Pascua deco ijigũ tiquina ihyatiquina ijiye, ohõ saha nidi: “Judio masũno ijierare Pilato. Tiquiro sa ijiriquiro ijigũ tiquireo ya wũhũre sajãna, mari dutiyere yũhdũdcana niboaga. Sa yena mari sajãgũ marine bõse deco cjẽ ihyayere ihya dutieraboaga”, nidi. Sa ñiñe pũthoro Pilato ya wũhũre sajãedari Jesure neariquina pehe.

²⁹ Tiquina sa sajãedagũ ihñano Pilato tiquina cahapũ wũhu sopecahapũ esadũcaro, tiquinare sinituri:

—¿Yabe buhirire ahriquireore yahusã duajari mũsa? nidi Pilato tiquinare.

³⁰ —Ahriquireo quehnoariquiro ijigũ mũhũre usã ohoeraboaya. Ñariquireo ijire tiquireo, ni yũhtiri tiquina.

³¹ Tiquina sa nigũ Pilato ohõ saha nidi:

—Mũsa basita tiquireore neañã. Sa yena mũsa ye dutiye ti nidiro sahata tiquireore buhiri dahreya, nidi Pilato tiquinare.

—Mũsa ye dutiye pehe usãre masũnore wejẽ dutierare, nidi tiquina Pilato.

Sa ñiñe Jesure wejẽ dutiye tee nidi.

³² Tiquina sa wejẽ dutigũ Jesu pehe curusapũ tiquireo yariatire to pano tiquireo yahuriro sahata wahari. ³³ Tiquina sa nidi bato, Pilato pehe wũhũpũ majare sajã, Jesure pijioahye. Pijio tuhasa, tiquireore sinituahye:

—¿Judio masa tiquina pũtho tjiajari mũhu? ni sinituahye Pilato.

³⁴ —¿Mũhu esa tuharota sa ni sinituajari mũhu yũhũre? ¿Oapequina pehe yũhũre tiquina yahusãri bato tire sinituajari mũhu? niahye Jesu Pilato.

³⁵ —Judio masũ ijieraja yũhu. Mũhu ya yehpa cjẽna, pahia pũthoa gãhu mũhũre ohori usãre. ¿Yabere ñano yeari mũhu tiquina sa buhiri dahre duagũ? niahye Pilato.

³⁶ —Ahri yehpa cjũ pũtho ijieraja yũhu. Ahri yehpa cjẽ pũtho yũhu ijigũ, yũhu buheyequina yũhũre yedohoboaya. Judio masare ñehẽ dutieraboaya. Yũhu pũtho ijiye ahri yehpa cjẽ ijierare, niahye Jesu Pilato.

³⁷ —¿Sa yegũ pũtho ijiajari mũhu sa nigũ? niahye Pilato.

—Mũhu nino sahata pũtho ijiaja. Masa tiquina pũtho ijigũ tagũ masa bajuũ yũhu. Sa yegũ ahri yehpũ ahtaũ tiquina pũtho ijii tũhu, poto ijiyere yahugũ tũhu. Ijip-ihtiyequina poto ijiyere tũho du-ayequina, yũhu yahuyere tũhore, niahye Jesu.

38 —¿Yabe boro ijajari poto ijiye? niahye Pilato.

Judio masa Jesure wejē dutiahye (Mt 27.15-31; Mr 15.6-20; Lc 23.13-25)

Sa ni tuhasa Pilato judio masa caha majare tojoa tiquinare yahuri:

—Ahriquiroy Jesure ne buhiri mariedare. ³⁹ Cuhmaripe pascua ijigū ihcāquiroy peresu ijiriquiroyre masa wio dutiducure. ¿Sa yegū ahriquiroy Jesureta masa puhtoro ijiatiquiroyre masare wio basagari yuhū? nidi Pilato judio masare.

⁴⁰ Tiquiroy sa nigū tuhoye judio masa ohō saha ni sañuducuri:

—Tiquiroyre wioeracāhña. Barrabá pehere usāre wio basaya, ni sañuducuri judio masa Pilatoyre.

Barrabá pehe yaque bucaro ijiri.

19

¹ Tiquina sa ni sañuducuri bato Pilato Jesure tana dutiahye. Sa ye tiquiroy yequina surara pehe tiquiroyre tanahye. ² Tana tuhasa tiquina pota behto ye tuhasa, Jesu dapu buipū duhu peohaye. Duhu peo tuhasa, puhtoa ye suhti borore tiquiroyre sãa tuhasa, tiquiroy cahapū esa dūca, ohō saha ni bujūpeahye tiquina:

³ —Quehnoano ahtaya. Judio masa puhto, quehnoano ahtaya, ni bujūpe, Jesu wuhdoare quē majahye.

⁴ Sa yero Pilato pari turi judio masa cahapū waha, tiquinare yahuri:

—Tuhoya masa. Ahriquiroy ne buhiri mariediquiroyre ijire. Sa yegū tire masa masiatire masa cahapū tiquiroyre ne cāhtau, nidi Pilato.

⁵ Tiquiroy sa ni tuhasagū Jesu pota behto pesariquiroyre, puhtoa ye suhti borore sañariquiroyre wuhūpū ijiriquiroyre wijia tari. Tiquiroy sa wijia tagū Pilato tiquinare ohō saha nidi:

—Ihñaña. Ahriquiroyre ijire tiquiroyre, nidi Pilato.

⁶ Tiquiroy sa ni tuhasagū tuhoye, pahia puhtoa, surara gūhū Jesure ihñañe, sañuducuri:

—Curusapū quē biha wejēña tiquiroyre. Curusapū quē biha wejēña tiquiroyre, ni sañuducuri tiquina.

—Tiquiroy ne buhiri mariedare. Sa yena masa basita tiquiroyre neahña. Sa yena masata tiquiroyre curusapū quē biha wejēña, nidi Pilato tiquinare.

⁷ —Tiquiroy basi “Cohācjū macū ijiaja”, nie tiri. Tire tiquiroy sa nigū usā dutiye pehe tiquiroyre wejē dutiye, nidi tiquina Pilatoyre.

⁸ Tiquina sa nigū tuhoro cue yuhdūa wahari Pilato pehe. ⁹ Sa yero pari turi wuhūpare majare sajā, Jesure sinituahye tja:

—¿Nohoy cjū ijajari mahū? ni sinituahye tiquiroy Jesure.

Tiquiroy sa ni sinituepegāta Jesu tiquiroyre yuhtierahye.

¹⁰ Tiquiroy sa yuhtieragū ihñano Pilato tiquiroyre sinitu nemoahye:

—¿Yuhūre yuhtierajari mahū? Yuhū mahūre peresupū ijirigūre wio masiaja. Sa yegū mahūre curusapū gūhūre quē biha wejē duti masiaja yuhū. ¿Tire masiedajari mahū? niahye Pilato Jesure.

¹¹ —Cohācjū mahūre tiquiroyre dutieragū yuhūre ñano ye dutieraboaya mahū. Yuhūre ihña tuhtiyequinare ihñoriquiroyre pehe mahū yuhdūoro ñano buhiri tire, niahye Jesu Pilatoyre.

¹² Tiquiroy sa nigū tuhoro Pilato pehe tiquiroyre wio duamahye. Tiquiroy sa wio duepegāta pari turi judio masa sañuducuri:

—Jesu “Puhto ijiaja”, nino mari ijipihtina puhtoroyre Roma cjūnoro ihña tuhtiriquiroyre ijire tiquiroy. Sa yegū tiquiroyre wioyū mahū gūhū mari puhtoroyre ihña tuhtigū ijiaja mahū, ni sañuducuri judio masa Pilatoyre.

¹³ Tiquina sa nigū tūhoro Jesure wāhupū ijiriquirore ne wijia ta, buhiri dahre dutiro taro tiquiro dujiri pahtapū nuju sari Pilato. Tiquiro buhiri dahre dutiri paa utā mehna tiquina yeri paa judio masa ye mehna Gabata wame tiri. ¹⁴ Ti deco pascua bose deco usā ihyatire usā quehnori deco ijiri. Ti pjere coheri pje waro ijiri. Nuju sa tuhasa Pilato masare ohō saha ni yahuri:

—Ahriquiroy tjiye mūsa pūhtoro, nidi tiquiro.

¹⁵ Tiquiro sa nigū tūhoye judio masa sañuducuri:

—Yariahro tiquiro. Yariahro tiquiro. Curusapū quē biha wejēña tiquirore, ni sañuducuri tiquina.

—¿Mūsa pūhtoro tiquiro ijiepegūta tiquirore curusapū quē biha wejē dutiajari mūsa? nidi Pilato.

Tiquiro sa nigū ohō saha ni yahtiri pahia pūhtoa:

—Mari ijipihtina pūhtoro Roma cjanota tiquiro usā pūhtoro ijire. Apequiroy pūhtoro usāre mariedare, ni yahtiri pahia pūhtoa.

¹⁶ Tiquina sa ni yahuducuri bato Pilato Jesure curusapū quē biha wejē dutiro, tiquirore ohori tiquinare.

Jesure quē biha wejēahye tiquina

(Mt 27.32-44; Mr 15.21-32; Lc 23.26-43)

Sa ye tiquina Jesure ne wijari.

¹⁷ Tiquina ne wijigū Jesu pehe tiquiro ya curusare tiquiro basi wūa ne, dapu pehtoro wame tiropū esari. Usā judio masa ye mehna Gólgota wame tiri. ¹⁸ Topū esaye tiquina Jesure quē biha ohōri. Sa ye apequina pūarore ihcāquiroy tiquiro poto pehe, apequiroy tiquiro cū pehe pehe quē biha ohōri tiquina. Sa yero Jesu tiquina deco curusapū wahñari. ¹⁹ Tiquina quē biha tuhasagū Pilato taboa pjine oja duti, Jesure tiquina quē biha ohōri curusapū quē biha ohō dutiri jiri ti pjine. Ohō saha ni oja dutiri

jiri tiquiro: “AHRIQUIROY JESU NAZARE CJENO, JUDIO MASA PŪHTORO IJIRE”, ni oja dutiri jiri Pilato ti pjine. ²⁰ Ti pjine ojaoro judio masa ye mehna, Roma cjenā ye mehna, griego masa ye mehna ojaori jiri apequiroy. Sa yero Jesure curusapū tiquina quē biha ohōriro maca cahagā ijiri. To cahagā ijiequina peyequina judio masa Pilato oja dutirire ihña, buheri.

²¹ Sa buhe tuhasa judio masa usā pahia pūhtoa ohō saha nidi Pilatoro:

—“Ahriquiroy judio masa pūhtoro ijire”, ni oja dutieracāhña. Usā pūhtoro ijierare ahriquiroy. Sa yegū ohō saha ni oja quehno dutiya māhū. “Ahriquiroy ‘Judio masa pūhto ijiaja’, ni ihcāquiroyta tiquiro basita sa ni tūhoturiquiroy ijiri”, ni oja quehno dutiya, nidi pahia pūhtoa.

²²—Yūhū oja duti māhtariro sahata ijirota, nidi Pilato tiquinare.

²³ Jesure tiquina quē bihari bato pititiaro surara pehe Jesu suhtire tiquina basi itiri. Tiquina sa iti duepegūta ihcā suhtiro yoari suhtiro dohori marieni suhtiro ijiri. Ti suhtiro suhari suhtiro ijiri. ²⁴ Ti suhtiro sa ijigū ohō saha nidi tiquina basi:

—Ahri suhtirore tūhrēdacūhna, Ahri suhtirore neatiquirore masi duana, doquepeihna mari, nidi tiquina basi.

Sa doquepeye, Cohācjū yere tiquina ojaori pūpū tiquina ni ojaoro sahata yeye nidi tiquina. “Yūhū suhtire tiquina basi itiri. Sa ye yūhū suhtire neatiquinare masi duaye, doqueperi tiquina”, ni ojaohye Cohācjū yere tiquina ojaori pūpū. Tiquiro sa ni ojaoro sahata sa yeye nidi tiquina.

²⁵ Surara tiquina sa yegū, Jesu pacoro, Jesu māono, María Cleofa namono, María Magdalena mehna Jesu curusa cahagā ihñaducuri tiquina. ²⁶ Sa yero tiquiro pacoro

yũhũ tiquiro cahñogũ gũhũ tiquiro cahapũ usã ducugũ ihñano tiquiro pacorore yahuri Jesu:

—Yojopare ahriquiro mũhũ macũ ijire, nidi Jesu tiquiro pacorore.

²⁷ Sa ni tuhasa, yũhare ohõ saha ni yahuri tiquiro:

—Yojopare ahricoro mũhũ paco ijire, nidi Jesu yũhare.

Tiquiro sa nidi bato Jesu pacorore ya wũhũpũ iji dutii.

Jesu yaria wahahye

(Mt 27.45-56; Mr 15.33-41; Lc 23.44-49)

²⁸ Tiquiro sa ni yahuri bato ohõ saha ni tũhotu, masiahye Jesu: “Ijipihtiyeh Cohãcjũ yũhare dahra dutiro tiquiro cũrire ye pehou”, ni tũhotu, masiahye Jesu. Sa masino Cohãcjũ yere tiquina ojoari pũpũ tiquiro ni yahuriro sahata ohõ saha nidi Jesu:

—Aco wũoaga yũhũ, nidi Jesu.

²⁹ Sa yero topũ vino suẽñe co pose tiri sutu dũjiri. Sa yero topũ ijiriquiro aco ihmini sũhtere suẽñe co mehna tiquina sohari sũhtere yucũgũ hisopo wame tidũ sohtoapũ dũhte ohõri. Sa yero Jesu dũseropũ siõ ohõri. ³⁰ Ti core Jesu ihmi tuhasa ohõ saha nidi:

—To punota ijiaga, ninota tiquiro dapure muhri yo, yariaa wahari.

Surara Jesu pati pahma batogã ñoseahye ñosenũ mehna

³¹ Ti deco pascua bose deco pano ijiri. Bose deco cjẽne usã ihyatire quehñori deco ijiri. Sa ye ape deco saurũ ijigũ tiquina bose deco ijigũ curusaripũ yariariquinare cũ duerari. Ti deco Cohãcjũre tiquina ño peori bose deco ijiri. Sa ye ti decopũ tiquina quẽ biha ohõriquinare curusaripũ tiquina wahñagũ cahmedari tiquina. Sa ye tiquina quẽ biha ohõriquinare tiquina ñecũ cohãrine quẽ nuha dutiye tehe, judio masa sini-ahye Pilatore, “Tiquina yaria

madoqueoahro”, niñe. Tiquina sa yeri bato tiquina pagũrire ne dijio madoqueoye tee nidi.

³² Tiquina sa dutigũ surara pehe curusari cahapũ esa, ihcãquiro yaqueriquiro ñecũ cohãrine quẽ nuhari. Apequiro gũhare sata yeri tiquina. ³³ Sa ye Jesu ñecũ cohãrine quẽ nuhae tee yemehe, tiquiro yariariquiro ijigũ ihñañe, quẽ nuhaedari.

³⁴ Sa quẽ nuhaedaye ihcãquiro surara tiquiro pati pahma batogã ñosenũ mehna ñosedĩ. Tiquiro sa ñosegũ duita tiquiro dii, aco mehna wijiari. ³⁵ Ti sa wahagũ ihñau yũhũ. Yũhũ ahri pũre ojoarigũ mũsare poto yahuaja. Poto yũhũ yahuye ijigũ masiaja yũhũ. Mũsare yahuaja mũsa gũhũ Jesure mũsa wacũ tutuato saha. ³⁶ Cohãcjũ yere tiquina ojoari pũ ti nidiro sahata sa wahari: “Tiquiro cohãrine ne ihcã cohãre quẽ nuhaedari”, tiquiro ni ojoariro sahata Jesu ñecũ cohãrine ne ihcã cohãre quẽ nuhaedari. ³⁷ Sa yero ape pũpũ Cohãcjũ yere tiquina ojoari pũpũ ohõ saha nine. “Tiquirore tiquina ñosediquirore ihñañe tiquina”, ni ojoahye Cohãcjũ yere tiquina ojoari pũpũ.

Jesu pagũre masa copepũ cũahye

(Mt 27.57-61; Mr 15.42-47; Lc 23.50-56)

³⁸ Tiquiro yariari bato José Arimatea cjũno Jesu pagũre ne dijioro taro, Pilatore siniahye. José pehe apequina judio masare cuero, Jesure wacũ tutuariquiro tiquiro ijiyere yahu duerahye. Sa yero tiquiro pagũre sinidi bato Pilato pehe Jesu pagũre nea dutiahye. Tiquiro nea dutigũ José curusa cahapũ esa, Jesu pagũre nea wahahye. ³⁹ Nicodemo gũhũ José mehna wahahye. Tiquiro yucũgũ cjẽ ehme sitiye, mirra wame tiye ehme sitiye yucũgũ cjẽ mehna dahra moredire ne

cāhye. Jesu pagure tiquina cohāto pano tiquina quehnoati ijiahye ti ehme sitiye. Tiquiro ne cāhtari treinta kilo nācāhye. Nicodemo sohō ijiri pje Jesu mehna tiquiro coā yahuducuri pje nāmipū Jesu cahapū esariquiro ijiahye. ⁴⁰ Sa ye tiquina pūaro Jesu pagure ne, judio masa yariariquinare usā cohāducuro sahata tiquiro pagure ehme sitiye mehna suhti mehna wahmeahye. ⁴¹ Curusapū Jesure tiquina wejēdiro cahapū wese ijiri. Ti wesepū masa cope utāpū wahma tiquina seheri cope ijiri. Ti copere ne ihcāquiro yariariquirore cohāedarīdi. ⁴² Pascua bose deco judio masa bose deco usā ihyatire quehnoari deco ijiri. Sa ijiri deco ijigū ti cope cahagā tiquiro curusa ijigū, topū cūahye tiquina Jesu pagure.

20

Jesu masa wijiahye

(Mt 28.1-10; Mr 16.1-8; Lc 24.1-12)

¹ Domingo nāmi cjūnogā ijigū, bohreato panogā Marīa Magdalena Jesu masa copepū esahye. Topū esaro ti copere tiquina tu biharia utāre yoa cjūnopū tiquina pōo cūria utāre ihñahye ticoro. ² Sa ijigū ihñano, usā cahapū oma tojoa tari ticoro. Simo Pedro mehna yūhū usā pūana ijii. Wihi ohō saha ni yahuri usāre ticoro:

—Mari puhtoro pagure ne cāri jiri. Nohopū ne cā cūcoayaye mari masiedaja, nidi ticoro usāre.

³ Ticoro sa nigū tūhona, Pedro mehna masa copepū ihñana wahaū usā. ⁴ Sa ihñana wahana usā pūana oma cānū. Sa oma cāna, yūhū Pedrore oma yūhdū cāgū masa copepū esa mūhtaū. ⁵ Topū esagū muhri ihña sōu ti copepūre. Muhri ihña sōgū tiquirore tiquina wahmedi suhtiro dhitare ihñanū. Sa ye ti copere sajāedū. ⁶ Yūhū sa ihñari batopū Simo Pedro

yūhū batopū wihiri. Wihi masa copepū sajā, tiquiro pagure tiquina wahmedi suhtirore ihñari tiquiro. ⁷ Sa yero Jesu dapure tiquina wahmedi cahsero gūhūre ihñari tja. Ti cahsero sijoro cuñano tiquiro torēdi cahsero ijiri. ⁸ Sa yegū yūhū gūhū masa copepū esa mūhtarigū ti copepū sajānū. Jesu sa mariedagū ihñagū “Potota Jesu masa wijiahye”, ni tūhotuu yūhū. ⁹ Ti copepū usā wahato pano Cohācū yere tiquina ojoari pūpū Cristo tiquiro yariatire yahurire, tiquiro masa wijiatire yahuri gūhūre usā quehnoano masiedarīmi. Ti copere yūhū ihñari bato, “Ijirota Jesu masa wijiahye”, ni, tūhotuu yūhū. ¹⁰ Sa ihña tuhasa usā ye wūhūsepu tojoaa wahaū.

Jesu Marīa Magdalenare bājua hye

(Mr 16.9-11)

¹¹ Sa ye masa copepū Marīa majare tojoa ta, ti cope sopecahapū wihi, ducuro, utiro niahye. Sa utieperota ticoro muhri ihña sōahye masa copepūre. ¹² Sa ihña sōno pūaro angelere, yehseye suhti sañānequinare Jesu tiquiro cuñamediropū tiquina dujigū ihñahye ticoro. Ihcāquiro tiquiro dapu timediropū dujiahye. Apequiro tiquiro dahpocāri timediropū dujiahye. ¹³ Tiquinare ticoro ihñagū tiquina pehe ticorore sinituahye:

—¿Numio, dūhse yego utiajari mūhū? niahye tiquina.

—Yūhū puhtoro pagure ne cāri jiri. Sa yego tiquiro pagure tiquina cūrire masiedaga yūhū, niahye ticoro.

¹⁴ Sa ni tuhasa, majaredūcameno Jesure topū ducuriquirore ihñahye ticoro. Sa ihñaeperota Jesure masiedahye ticoro.

¹⁵ —¿Numio, dūhse yego utiajari mūhū? ¿Noare macago niajari? niahye Jesu ticorore.

“Ahriquiuro ahri wesere cohteriquiro ijire”, ni tūhotumahye ticoro Jesure. Sa ni tūhoturo, ohō saha niahye ticoro:

—Mūhū tiquiro pagūre nedigū ijigū mūhū cūirōre yahuya yūhūre. Mūhū yahuri bato tiquiro pagūre negotja, niahye ticoro tiquirore.

¹⁶ Ticoro sa nidi bato Jesu ohō saha niahye:

—María, niahye.

Tiquiro sa ni pisugū tūhoro majare ihñadoqueo ticoro hebreo ye mehna ohō saha niahye:

—Rabuni, niahye ticoro Jesure. “Rabuni”, nino, “Buhegū”, nino niahye.

¹⁷—Yūhū Pacū cahapū mūjaedarīaja yūhū. Yūhū sa mūjaedarīgū yūhūre ñehedacāhña. Sa yego apequina yeequina cahapū wahaya. Tiquina cahapū esago ohō saha ni yahuya tiquinare: “Yūhū Pacū cahapū wahaū tūū niaja. Mūsa Pacū gūhū ijire tiquiro. Yaquiuro Cohācjū cahapū wahaū tūū niaja. Mūsa yaquiuro Cohācjū gūhū ijire tiquiro’, nidi Jesu”, ni yahuya tiquinare, niahye Jesu Maríare.

¹⁸ Tiquiro sa nidi bato María Magdalena usā Jesu buhena cahapū wihi, yahuri usāre:

—Mari pūhtorore ihñāū yūhū, ni, Jesu tiquiro yahu dutirire yahuri usāre ticoro.

Jesu tiquiro buheyequinare bājuahye

(Mt 28.16-20; Mr 16.14-18; Lc 24.36-49)

¹⁹ Ti deco domingo ñamicahapū usā Jesu buhena usā acaye judio masare cuena, wūhūpū biha sajā, dujii usā. Sa usā dujigū Jesu usā watoapū bajuadūca saro ohō saha nidi:

—¿Ne, ijiajari mūsa? Quehnoano ijia mūsa, nidi.

²⁰ Sa ni tuhasa, tiquiro omocarine, tiquiro patí pahma bato gūhūre usāre ihñori. Sa yena usā

tiquirore usā pūhtorore ihñana bucuēi. ²¹ Parí turi Jesu usāre ohō saha nidi:

—Quehnoano ijia mūsa. Yūhū Pacū yūhūre tiquiro ohoriro sahata, mūsa gūhūre yee buheye buheanare ohoaja, nidi Jesu usāre.

²² Sa ni tuhasa tiquiro usāre puti peori. Sa puti peoro Espiritu Santore usā ñeheatire ihñono nidi usāre. Ihño tuhasa ohō saha nidi:

—Yojopū Espiritu Santore ñeheña mūsa, mūsa mehna ijiatiquirore.

²³ Apequina tiquina ñañe yerire mūsa bogū, sata ijietā. Sa ye apequina tiquina ñañe yerire mūsa boeragū tí bori ijisi, nidi Jesu usāre tiquiro buhenare.

Jesure masa wijiariquiore Tomasu ihñahye

²⁴ Jesu usā watoapū tiquiro bajuagū Tomasu sūhdūariquiore tiquina ni pisuriquiro usā mehna mariedari.

²⁵ Tiquiro sa mariedagū usā mehna cñēna tiquirore yahumedi.

—Mari pūhtorore usā ihñāū, ni yahumi usā Tomasure.

Usā sa ni yahuepegūta ohō saha nidi Tomasu:

—Tiquiro omocarine tiquina quē bihari coperire ihñedagū, tí coperire yūhū omo piria mehna ohbe tuhueragū “Ijirota masa wijiáhya”, nisi yūhū. Sa yegū tiquiro patí pahma bato ijiri copere yūhū omoca mehna siō sōedagū, “Ijirota masa wijiáhya”, nisi yūhū tiquirore, nidi Tomasu.

²⁶ Ocho decori bato parí turi usā tiquiro buhena usā wūhūpū ijii. Tí pjere Tomasu usā mehna ijiri. Tí wūhū bihari wūhū ijiri. Bihari wūhū ijiepegūta Jesu wūhūpū sajā taro, usā watoapū bajuadūca saro ohō saha nidi:

—¿Ne, ijiajari mūsa? Quehnoano ijia mūsa, nidi.

²⁷ Sa ni tuhasa, tiquiro Tomasure yahuri:

—Ihñaña yuhū omocarine. Sa ye mūhū omo piria mehna yuhū omocarine tiquina quē bihari coperire ohbe tuhuya. Sa yegū mūhū omoca mehna yuhū patī pahma bato ijiri copere siō sō tuhuya. “Poto ijierare”, niedacāhña. “Ijirota ijire”, niña mūhū, nidi Jesu Tomasure.

²⁸ Tiquiro sa nidi bato Tomasu yuhtiri:

—Mūhū yuhū puhto ijire. Yaquiuro Cohācjū ijire mūhū, nidi Tomasu Jesure.

²⁹ —Yuhūre mūhū ihñari bato yuhūre wacū tutuare mūhū. Apequina pehe yuhūre ihñedapeta yuhūre wacū tutuaeta. Sa ye tiquina mūhū yuhūoro bucueeta, nidi Jesu Tomasure.

Jesure mari masiatire ahri pūre ojoahye Ņu

³⁰ Sa yero peye apeye gāhūre Cohācjū tutuaye mehna ye ihñori Jesu usā mehna ijiro. Tire tiquiro yerire ahri pūru ojoa pehoeradu yuhū. ³¹ Sa ojoa pehoerapeguta ahri pūru yuhū yahurire ojoau “Jesuta Cristo Cohācjū ohoriquiro ijire. Tiquiro potota Cohācjū macano ijire”, mūsa ni masiatire. Sa yena mūsa tiquirore wacū tutuana Cohācjū mehna mūsa sa ijducuatire ojoau ahri pūre.

21

Jesu siete tiquiro buheyequinare bajuahye

¹ Came Tiberia wame tiri ditara dūhtū caharu usāre tiquiro buhenare Jesu pari turi bajuari tja. Usāre bajuaro ohō saha yeri tiquiro. ² Simo Pedro, Tomasu sahdariquiro tiquina niniquiro, Natanae Galilea yehparu ijiri maca, Caná wame tiri maca cjūno, apequina puaro buheyequina, Zebedeo pohna puana usā ohōpequinata cahmecoau.

³ Sa usā cahmecoari bato Simo Pedro usāre ohō saha nidi:

—Wahi wejēgu wahaū niaja, nidi tiquiro.

—Usā gūhū mūhū mehna wahanatja, nii usā tiquirore.

Sa ni tuhasa buhaa wahaū. Sa yena yucūsa mehna wahaū. Ti ñamine usā quehnoano wahi wejē bohreepenata ne ihcāquiro wahi wejēdadu. ⁴ Bohrea parī quehagū Jesu paduropu ducugū tiquirore ihñami usā. Sa ihñapenata tiquirore ihña masiedu usā. ⁵ Sa yero tiquiro pehe usāre sinituri:

—¿Ne wahi wejēajari mūsa? nidi Jesu.

—Ne wejēdabutiaga usā, ni yuhtii usā.

⁶ —Yucūsa poto pehe pahrē pehe doque ñoña. Tie pehe doque ñona wahi wejēnata mūsa, nidi usāre.

Tiquiro sa nigū tuhona usā tiquiro nidirota doque ñou. Usā doque ño tuhasagūta peyequina wahi sajāri. Peyequina wahi sajāgū wēñanure yucūsapu weje sāana cūedadu usā. ⁷ Sa yegu yuhū Jesu cahñogu Pedrose yahuu:

—Mari puhtorota ijire siquiro paduropu ducuriquiro, nii yuhū Pedrose.

Yuhū sa nigū tuhoro Jesuta tiquiro ijigū masino, Simo Pedro tiquiro suhtirore sañari. Wahi wejēno taro tiquiro suhtirore tu weriquiro ijinidi. Tiquiro suhtirore saña tuhasa, diaru uhpu ñojoaa wahari. ⁸ Sa yena usā apequina buhena yucūsapu ijina, cien metro yoro diarupe pahsau usā. Sa yena wēñanure wahi peyequina sajādure yucūsa mehna weje nujuau usā. ⁹ Dūhtū caharu usā wahā sagū, topu peca niti dihita asi cuñari peca ijiri. Ti peca bui tiquiro puho cūriquirore wahire ihñau usā. Pā gūhūre ihñau usā.

¹⁰ Sa usā ihñagū ihñano Jesu usāre ohō saha nidi:

—Mianogā mūsa wejēdiquinare meheñequinagā ne cāhtaya, nidi usāre.

11 Tiquiro sa nigū Simo Pedro pehe Jesu mehna ijiriquiro yuc̄sap̄ sa jā, wēñan̄are, buj̄ȳequina wahi ciento cincuenta y tres wahi sajād̄ure weje majari. Peyequina wahi sajāepeta wēñan̄are tahr̄ēdari.

12 —Ihyana ahtaya, nidi Jesu us̄āre.

“¿Noa boro ijiajari m̄h̄u?” ni sinituer̄ us̄ā tiquirore. Us̄ā puhtoro tiquiro ijigū masii us̄ā.

13 Sa yero Jesu peca cahap̄ esaro, p̄āre ne, us̄āre itiri. Wahi ḡh̄ure itiri.

14 Sa yero Jesu tiquiro masa wi-jiari bato pad̄rop̄ bajuario ihtia taha us̄āre tiquiro buhenare bajuario nidi.

Jesu Simo Pedro mehna yahuduc̄ahye

15 Us̄ā ihyari bato Jesu Simo Pedroro sinituri:

—¿Simo Ñu mac̄, ahriquinare m̄h̄u cah̄ino yah̄d̄oro yah̄are cah̄ijari m̄h̄u? nidi Jesu Simo Pedroro.

—Puhto, m̄h̄ure cah̄ija yah̄u. M̄h̄ure yah̄u cah̄igū masine m̄h̄u, ni yah̄tiri Simo Pedro.

16 —Sa yeḡu ovejaḡare tiquina nuno saha yeequinare buheya m̄h̄u, nidi Jesu.

Sa ni tuhasa pari turi tiquiro Simo Pedroro sinituri:

—¿Simo Ñu mac̄, yah̄are cah̄ijari m̄h̄u? nidi Jesu.

—Puhto, m̄h̄ure cah̄ija yah̄u. M̄h̄ure yah̄u cah̄igū masine m̄h̄u, ni yah̄tiri Simo Pedro.

—Ovejare cohteriquiro ovejare tiquiro quehnoano cohtero saha, yeequinare quehnoano buhe cohteya, nidi Jesu Pedroro.

17 Sa ni tuhasa pari turi Simo Pedroro sinituri:

—¿Simo Ñu mac̄, yah̄are cah̄ijari m̄h̄u? nidi Jesu tja.

Ihtia taha sa ni tiquiro sinitugū t̄h̄oro Simo Pedro tutuaro buj̄aa witiri:

—Puhto, m̄h̄u masi pehore. M̄h̄ure yah̄u cah̄igū masine m̄h̄u, ni yah̄tiri Simo Pedro.

—Ovejare tiquina nuno saha yeequinare buheya m̄h̄u.

18 Ijirota m̄h̄ure n̄aja. M̄h̄u wah̄m̄u ijigū m̄h̄u suhtire saña, m̄h̄u cah̄medirop̄u tinie tiah̄ye m̄h̄u. Sa yerigū m̄h̄u ijepeḡata came m̄h̄u buc̄u ijigū, m̄h̄u omocarine m̄h̄u sīdoqueogū apequiro m̄h̄ure suhtiro s̄anota. Sa yero m̄h̄u waha duerop̄u m̄h̄ure neanota, nidi Jesu Simo Pedroro.

19 Sa nino Simo Pedroro d̄h̄se waha tiquiro yariatire yahuro nidi. Camer̄u buc̄uro tiquiro wahagū sa yeye taye niah̄ye apequina tiquirore. Coh̄c̄j̄u yere Pedro yeri buhiri apequina tiquirore wejēñe taye niah̄ye. Sa yero Pedro yariatire yahuro nidi Jesu. Sa ni yahu tuhasa, oh̄o saha ni nemori Pedroro:

—Poto yah̄u buheriro sahata yeya m̄h̄u, nidi Jesu Pedroro.

Jesu tiquiro cah̄iniquiro buheriquiro ahri p̄ure ojoariquiro ijire

20 Tiquiro sa nigūta Pedro pehe majare ih̄ñadoqueo, yah̄are Ñure Jesu tiquiro cah̄ñoḡu buheriḡure tiquinare yah̄u nan̄u t̄ḡū ih̄ñano Pedro Jesure sinituri. Yah̄u pehe Pedro ih̄ñariḡu to pano oh̄o saha nidiḡu ijii. “¿Puhto, m̄h̄ure ih̄ña tuhtiyeequinare ih̄ñootiquiro pehe noa boro ijiagari tiquiro?” ni Jesure sinituriḡu ijii yah̄u. Ti pjere Jesu tiquiro pari paha ih̄ya dujii yah̄u. Sa yero yah̄are ih̄ñano Pedro Jesure sinituri:

21 —¿Puhto, ahriquiro pehe d̄h̄se waharotari? ni sinituri.

22 —Tire m̄h̄ure yahueraja. Ahri yehpap̄u yah̄u tojoa tato pano ahriquirore ijiducugū yah̄u yeatire masiedare m̄h̄u. Sa yeḡu m̄h̄ure yahueraja. Poto yah̄u buheriro sahata yeya m̄h̄u, nidi Jesu Pedroro.

²³ Tire tiquiro yahurire ijipi-htiyequina Jesu yequina tiquina basi yahu sitemedi. Tire yahu siteye ohō saha nimesi tiquina pehe: “Jesu tiquiro cahñiquiro buheriquiro yariasi”, ni yahu sitemedi yahure Jesu yequina tiquina basi. Tiquina sa niepegāta “Tiquiro yariasi”, nino niedari jimesi Jesu. “Ahri yehpapu yahu tojoa tato pano ahriquiore ijiducugū yahu yeatire masiedare mahu. Sa yegu mahure yahueraja”, nidi Jesu Pedrore.

²⁴ Jesu buherigu ahrire yahurigu, ahri pūre ojoarigu ijiaja yahu. Sa yena ahri yahu yahuye poto ijigū masiaja mari.

²⁵ Peye apeye gūhure Jesu yeri. Tiquiro yerire mari oja pehogū ti pūri ojoari pūri peye waro wahaboaga. Sa ye ti pūrine mari ihbogū esa tuhaeraboaga ahri yehpa. Wahpaa wahaboaga, yahu tahotugū. To puno tjire.

Jesu buhe dutiro tiquiro cūriquina tiquina yerire yahuri pū ijire

—*Espíritu Santo ahtarota, niahye ahri pūre ojoariquiro*

¹⁻² Teófilo, ahri quitire m̄h̄ure ojoagu niaja. To pano ȳh̄u ojo mahtari pūre Jesu yerire, tiquiro buheyere m̄h̄ure yahu tuhasa. Tee āhm̄sepu tiquiro m̄jarire ȳh̄u yahu bato tii. Jesu tiquiro m̄jato pano Espiritu Santo tutuaye mehna dutiahye tiquiro bese cūriquinare. ³ Sa ye Jesu curusapu tiquiro yariari bato ihquē tahari pagu tiriquireo bajuahye tiquiro cūriquinare. Cuarenta decori bato bajua bato tiahye. Sa yero tiquiro basi catiriquireo ijiyere ihñoahye tiquinare. Sa bajuaro mari Pacu tiquiro p̄htoro ijiyere quehnoañe buheyere yahuahye tiquinare.

⁴ Jesu tiquiro cūriquina mehna ijinino tiquinare ohō saha ni yahuahye:

—Jerusalēpata ijiniña yojopure. “Espiritu Santore m̄sare ohogutja”, ȳh̄u Pacu tiquiro nidiquirore cohteniña. Tire tiquiro nidire m̄sare yahuu ȳh̄u. ⁵ Ñu m̄sare wame yero aco mehna wame yemedi. Ȳh̄u pehe ti ȳhd̄oro yeitja m̄sare. Mehenogā bato Espiritu Santore m̄sa mehna ijuducugū yeitja m̄sare, niahye Jesu.

Jesu āhm̄sepu m̄jaa wahahye

⁶ Sa ye ape taha cunapu Olivo wame tidapu Jesu tiquinare tiquiro bajuagū ihñañe tiquina sinituahye tiquirore:

—¿P̄hto, Israe yehpare tiquina ehmari yehpare d̄hse ijigū usāre pari turi cūgutjari m̄h̄u? ¿D̄hse

ijigū mari acaye warore p̄htoro sōgutjari m̄h̄u? niahye tiquiro yequina.

⁷ Tiquina sa nigū tūhoro Jesu ohō saha niahye:

—Mari Pacu dihita ti decore m̄sa ya yehpare m̄sa quehnoano ijiatire cū masine. Ti decore m̄sare masino basioerare. ⁸ Sa masiedapenata m̄sare Espiritu Santo tiquiro wihigū Cohācjā ye tutuayere c̄onata m̄sa. Tiquiro ye tutuayere m̄sa c̄ona Jerusalē cjēnare, ijipihtiyequina Judea yehpa cjēnare, Samaria yehpa cjēnare, sa ye ijipihtiye yehpari cjēnare quehnoañe buheyere buhenata m̄sa. Ȳh̄u yariarire, ȳh̄u masa m̄jarire tiquinare buhenata m̄sa, ni yahuahye Jesu tiquinare.

⁹ Sa ni yahu tuhasa, Jesu āhm̄sepu m̄jaa wahahye. Tiquina tiquirore ihña n̄nu tā m̄ogūta ehmeo curua puhiapu sajà, buti m̄jaa wahahye. ¹⁰ Sa ye tiquina Jesu m̄jariquireo tiquina ihña m̄ori watoa p̄aro angele yehseye suhti sañañequina Jesu tiquiro cūriquina watoa bajuad̄ca sahye. ¹¹ Sa ye tiquinare ohō saha niahye:

—¿M̄sa Galilea cjāna, d̄hse ijiro boro ihña m̄oducuna nijari m̄sa? Ahriquireo Jesu āhm̄sepu m̄jariquireo, tiquiro m̄jariro saha ahtarota, ni yahuahye angele.

Jesu cūriquina Juda m̄nanore comesatiquirore beseahye

¹² Sa ye Jesu yequina cunapu Olivo wame tidapu ijiriquina dijia ta, Jerusalēpu tojoa sahye. Tu cunapure ihcā kilómetro ȳhd̄o cjūno yoaro ijiahye Jerusalē d̄htu cahapare. ¹³ Tojoa sa, āhm̄anopu tiquina ijiri tucūpu m̄jaa wahahye. Ahriquina ijiahye: Pedro, Ñu, Santiago, Andre, Felipe, Tomasu, Bartolomé, Mateo, Santiago, Simo, Juda ijiahye. Santiago

pehe Alfeo macano ijiahye. Simo pehe celote wame tiri curua cjano ijimediquiro ijiahye. Juda pehe Santiago acayaro ijiahye. ¹⁴ Peye tahari ahriquina ijipihtiequina, numia mehna, Maria Jesu pacoro mehna, Jesu bahana mehna quehnoano cahmecoa, tutuaro mehna mari Pacare sinie tiahye.

¹⁵ Sa ye ti decorire masa peyequina cahmecoahye. Ciento veinte ijiye ijiyoaya. Sa yero Pedro pehe tiquiro mehna cjena Cristo yequina watoa ducu, yuahahye tiquinare:

¹⁶ —Yuhu acaye, Cohacju panopu tiquiro nidiro sahata waharo nidi. Tire Espiritu Santo Davire yahu dutiahye Juda mananore. Juda manano Jesure ñeheatiquinare ihñoriquiro ijiri. ¹⁷ Sa yeatiquiro ijieperota mari mehna Jesu yere yeriquiro ijimedi. Sa yero usã mehna cjenota ijimedi, niahye Pedro.

¹⁸ Jesure ihño dutiye tiquina wapa yerire Juda manano pehe wiari bato tiquiro basita wejê yariaa wahahye. Sa yero boraa waha, tiquiro cahata misi da tuhna waha, yariaa wahahye. Tiquiro wiari mehna apequina mehenogã yehpare dúahye. ¹⁹ Ijipihtiequina Jerusalê cjena masi pihti cari jiri Juda manano tiquiro ñano yerire. Sa masiñe tiquiro ye niñeru mehna tiquina dúri yehpare Acéldama wame yeri jiri tiquina ye yahuducuye mehna. Acéldama niñe, “Dii yehpa”, niñe nine. ²⁰ Came ohõ saha ni nemoahye Pedro:

—Panopu tiquina ojoariro sahata sa wahari Juda manano. Salmo tiquiro ojoari pũpu ohõ saha ni ojoahye:

Tiquiro wahu cohõri wahu ijiahiro.
Sa ye apequina ti wuhare
ijieracãhdo, ni, ojoahye.
Ohõ gũhure ohõ saha ni ojoahye:

Apequiro tiquiro dahrayere comesariquiro ijirota, ni, ojoahye Salmopu.

²¹⁻²² 'Sa yena mari ihcãquiro beseihna. Ñu wame yeriquiro manano masare tiquiro buheri watoa ihquẽquina Jesu yequina mari mehna wahari. Tiquina mehna cjenore ihcãquiro bese neno cahmene mari mehna cjano ijiatiquirore. Jesu mehna mari ijigũ mari mehna sa ijiducuriquirore besero cahmene. Sa mari beseri bato Jesu tiquiro masa m̃jarire mari mehna buherota, ni yuahahye Pedro tiquiro acayere Cristo yequinare.

²³ Tiquiro sa nigũ tahoye puarore bese bocahye tiquina. Ihcãquiro José Justo wame tiriquirore beseahye. Tiquiro Barsaba tiquina ni pisuriquiro ijiahye. Sa ye apequirore Matia wame tiriquirore beseahye. ²⁴⁻²⁵ Tiquinare bese boca tuhasa, tiquina mari Pacare ohõ saha ni siniahye:

—Mahu usã puhto, ijipihtiequina masa tiquina tahotuyere masine. Ahriquina puaro usã beseriquina ijire. Juda mananore comesatiquirore diquiro mahu cahmeniquirore beseya. Jesure cohãtjiano Juda manano pehe pecapu wahahye. Tiquirore comesariquiro Jesu tiquiro cūriquiro ijirota. Sa yero usã mehna quehnoañe buheyere buherota, niahye tiquina mari Pacare.

²⁶ Sa niñeta Juda mananore comesatiquirore beseye tehe utã paca mehna doque cū m̃jahye “Noa pehe sajãnotari”, niñe. Matia tiquiro quehnoano wijiagũ, tiquiro pehe Jesu cūriquina once cūriquina mehna cjano tojoahye.

2

Espiritu Santo Jesu yequina mehna iji dũcahye

1 Sa ye Pentecoste wame tiri deco ijigū tiquina ijipihtiyequina ihcā wuhurū cahmecoahye. 2 Ti pjereta wihnono tutuaro wēno saha uhmuanopū bisiro ca tahye. Sa bisiro ca tagū tūhoahye ijipihtiyequina ti wuhurū ijiriquina. 3 Sa ye peca pohna yero saha ijiye tiquina ijipihtiyequina dapu paca bui bajuahye. Ti peca pohnarigā ñehmeno yero saha bajuahye. 4 Sa yero Espiritu Santo wihiahye tiquinare tiquiroyo tutuayere ohoro taro. Espiritu Santo tiquinare yedohoro puno tiquina pehe apequina ye mehna quehnoano yahuducuahye.

5 Ti decorire Jerusalēpū peyequina judio masa ijiahye. Mari Pacure ño peyequina ijiahye. Tiquina macaripe cǵēna ijiahye. 6 Sa ye uhmasepū bisigū tūhoye Jesu buheyequina cahapū peyequina cahmecoahye. Masape ye yahuducuyere Jesu buheyequina tiquina yahuducugū tūhoahye. Sa tiquina yahuducugū tūhoye, tiquina tūho maria wahahye.

7-8 —Ahyou, ¿Dahse yeye ahriquina Galilea cǵēna ijiepetaquehnoano mari yere yahuducujari? Tiquina mari masa bajariorū ahtariquina yero sahata yahuducuye ca tare, niahye tiquina pehe.

9-10 —Ijipihtiyequina mari yere yojopūre yahuducuye nine: Partia cǵāna, Media cǵāna, Elā cǵāna, Mesopotamia cǵāna, Judea cǵāna, Capadocia cǵāna, Ponto cǵāna, Asia cǵāna, Frigia cǵāna, Panfilia cǵāna, Egipto cǵāna, Libiapū ijiye macaripū Cirene cahapū ijina, Romapū ahtarina ijiaja mari. Ihquēquina judio masa ijiaja mari. Apequina mari judio masa ijiena, judio masa ye buheyere buhenapū ijiaja mari. 11 Creta cǵēna gūhū, Arabia cǵēna gūhū ijire mari mehna. Sa yena ahriquina mari yere tiquina

yahuducugū tūhoaja mari. Tiquina mari ye mehna Cohācǵū tutuaye mehna tiquiroyo yerire yahuye nine, ni yahuducuahye masa tiquina basi.

12 Sa niñeta tiquina tūho acūaa waha, tiquina ihñarire tiquina tūhorire quehnoano masiedahye.

—¿Ahri dahse ijiro boro ahriquina apequina ye mehna Cohācǵū yere sa quehnoano yahuducujari, mūsa tūhotugū? ni cahme sinituahye tiquina basi.

13 Tiquina sa ni tūhotuepegāta apequina tiquina mehna cǵēna bujūpeahye:

—¿Dahse ahriquina sihbiori sihni, queheye niajari? ni bujūpeahye apequina tiquina basi.

Pedro masare yahuahye

14 Sa yero Pedro once Jesu cūriquina mehna ducu, masare yahuahye:

—Mūsa Judea yehpa cǵāna, ijipihtina Jerusalēpū ijina, ahrire masiña mūsa. Yūhū yahugū tūhoya mūsa. 15 Mūsa tūhotuyere pote ijierare. Yojopūta nueve hora ijire. Sa ye ahriquina queherare.

16 Ahriquina Cohācǵū panopū tiquiroyo nidiroyo sahata yeye nine. Ti pjerūre Joere Cohācǵū yere yahu mūhtariquirore, ahrire yahu dutiahye Cohācǵū pehe:

17 Iji bato tiye decori ijigū ohō saha ijirota: Yaquiroyo Espiriture masare ijipihtiyequinare ohogutja. Sa ye mūsa pohnapū yeere yahueta. Sa ye mūsa mehna cǵēna wahma pja bajumehneñene ihñāeta. Sa ye mūsa mehna cǵēna bucūna quehēnopū quehēeta. 18 Sa yegū yūhū cahacǵēnare, yūhū cahacǵēna numia gūhūre yaquiroyo Espiriture ohogutja. Sa ye tiquina yahueta yeere. 19 Sa yegū yūhū tutuaye mehna bajumehneñene

ye ihñogutja ʌhmʌnopʌ. Yehpapʌ gũhʌre yũhʌ ba-jumehneñene ihñogutja: Diire, pecare, peca ohme-ore ihñogutja. ²⁰ Sa yero asũ deco cjãno nahitiaa waharota. Ñami cjãno dii yero saha sohãriqui-ro comesarota. Ohõ saha wa-harota Cristo mʌsa pũhoro tiquiro ahtati deco, yũhʌ nidi deco pano. Ti decopʌ ihña maria wahaeta masa. Sa yero ihyo ijiri deco ijisi. Ti deco quehnoari deco ijirota. ²¹ Sa yero ohõ saha ijirota. Ijipihtiyequina masa Cristore tiquina ñañene cohã duti siniñequinare tiquiro tiquinare pecapʌ waha-boriquinare yũhdʌorota, nine Cohãcǔ, ni ojoahye Joel.

²² Mʌsa Israe masa yũhʌ yahugũ tũhoya: Jesu Nazare cjãno pehe Cohãcǔ ohoriquiro ijiri. Jesure tiquiro ohorire masa tiquina masiato saha tiquiro tutuaye mehna ye ihñori mʌsare. Mʌsa tire masine. ²³ Jesure ohori mʌsare apequiro. Panopʌ Cohãcǔ “Sa waharota”, tiquiro nidiro sahata sa yeri apequiro. Sa yena mʌsa Jesure curusapʌ wejẽ dutiri masa ñañequinare. ²⁴ Cohãcǔ pehe Jesure yariariquiro mʌnanore masori. Pari turi ne yariasi tiquiro. Tiquiro yaria dojoerare. Sa catiducua-tiquiro ijire. ²⁵ Ohõ saha niahye Davi panopʌ cjãno Cristo tiquiro niboriro sahata:

Yũhʌ pũhto, yũhʌ mehna ijire mʌhʌ. Ijipihitiye decori Cohãcǔ yũhʌ pũhto yũhʌ caha mʌhʌ ijigũ ihñae tii yũhʌ cuerato saha. ²⁶⁻²⁷ Mʌhʌ Cohãcǔ yũhʌ jeripohnare yariayequina tiquina ijiropʌre ne cohãsi. Yũhʌre ñanopʌ yũhʌ jeripohnare cohãsi mʌhʌ.

Yũhʌ mʌhʌ cahacǔ mʌhʌre ño peogʌ ijiaja. Yũhʌ pagʌre ahba dutisi mʌhʌ. Sa yegʌ tutuaro bucueaja. Bucueye mehna yahudu-cuaja. Sa yegʌ mʌhʌre Cohãcǔre quehnoano wacũ tutuagʌ ijigʌ cuero marieno quehnoano iji cjã. ²⁸ Yũhʌre pari turi catigũ yegʌta mʌhʌ. Yũhʌ mehna mʌhʌ ijigũ tutuaro bucueaja, ni, ojoahye Davi mʌnano Cristo tiquiro niboriro sahata.

²⁹ ‘Acaye, ohõ saha quehnoano yahugutja mʌsare Davire mari acayũro, panopʌ cjãnore. Tiquiro yariaa wahahye. Sa yero tiquirore tiquina yari cope yojopʌre ijire. Sa yero “Yũhʌ pagʌre ahba dutisi mʌhʌ”, ni ojoaro tiquiro basi wame peo yahuro niedahye. ³⁰⁻³¹ Panopʌ Cohãcǔ Davi mʌnanore ohõ saha niahye: “Poto niita niaja. Mʌhʌ panamena iji turiayequina mehna cjãno mʌhʌ yero saha ahri yehpa cjẽna pũhoro ijirota”, niahye Cohãcǔ Davire. Davi Cohãcǔ yere yahu mʌhtariquiro ijiahye. Sa yero Cristore Cohãcǔ tiquiro pũhoro sʌatire masino, Cristo tiquiro masa mʌjatire yahu mʌhta tuhasahye Davi pehe. Ohõ saha niahye: “Tiquiro yariayequina ijiropʌre iji dojoasi. Tiquiro pagʌ topʌ ahbasi”, niahye Davi. ³² Ahriquirore Jesure Cohãcǔ masori. ʒsã ijipihiti-na ihña. ³³ Cristo mari Pacʌ poto pehepʌ ijire dutiriquiro ijiro. Sa yero tiquiro Pacʌro “Espiritu Santore yehpapʌ ohogutja”, ni-ahye tiquirore. Sa yero Cristo pehe ahriquinare Espiritu Santore ohori. Yojopʌre Espiritu tiquiro yeyere mʌsa ihñana nine. Sa yena mʌsa tũhore. ³⁴ Davi mʌnano pehe Jesu tiquiro mʌjariro sahata ʌhmʌsepʌ mʌjaedahye. Sa yero tiquiro basi ohõ saha niahye: Cohãcǔ nidi yũhʌ pũhoro:

“Yuhu poto peheru dujiya mahu. ³⁵ Mauhure ihña tuhtiyequinare mahure yuhdudaca basautja yuhu”, nidi Cohācjū yuhu pūtorore, niahye Davi manano.

³⁶ Sa yena ijipihina Israe masa ahrire quehnoano masiña masa: Ahriquiuro Jesure masa curusapu wejēdiquire masa pūtoro sōri Cohācjū pehe. Tiquiuro masare yuhduoatiquiuro Cristore cūri Cohācjū, ni yahuahye masare Pedro.

³⁷ Tiquiuro sa nigū tuhoye tutuaro bujua witiye, cueye masa pehe Pedro gūhure sinituahye:

—¿Usā acaye, dahse yenatari usā? ni sinituahye tiquina.

³⁸ Tiquina sa ni sinitugū yuhhtiahye Pedro gūhu:

—Musa ñahe yeyere bujua witina ijiya. Quehnoahe pehere comesaya. Sa yena Jesu wame mehna wame yenohrina ijiya masa ijipihina. Musa sa yegū masa ñahe borota Cohācjū. Musa sa yegū Espiritu Santo masa mehna ijirota. Cohācjū yaquiuro Espiritu Santore sa oho cānota masare. ³⁹ Masare, masa pohinare, masa panamena iji turiayequinare, yoropu cjenare, ijipihiyequina Cohācjū mari pūtoro tiquiuro bseriquinare, “Potota yuhduogutja masare”, ni, cūahye Cohācjū, niahye Pedro.

⁴⁰ Sa ni tuhasa peye yahu nemoahye tiquiuro. Sa yero tutuaro mehna yahuahye tiquinare:

—Ahri yehpa cjenare tiquina ñano yeri buhirire buhiri dahrerota Cohācjū. Sa yena masa pehe Cohācjū yequina ijiya. Musa sa ijigū tiquiuro masare buhiri dahresi, niahye Pedro masare.

⁴¹ Tiquiuro sa nigū tuhoye peyequina tiquiuro yahuducuyere quehnoano tūhoahye. Sa yero tiquinare tiquiuro wame yeahye. Sa yero Cohācjū yequina mehna cjenā

tres mil masa waha nemoahye. ⁴² Sa ye tiquina masa Cristo cūriquina mehna decoripe ijie tiahye. Sa ye tiquina ti buheyere decoripe tūhoe tiahye. Tiquina ihyayere cahme iti, Cohācjūre sini, Cristo cūriquina mehna quehnoano ijie tiahye.

Jesu yequina coā iji dhucayequina tiquina ijie tiyere yahuahye

⁴³ Sa ye Cohācjū tutuaye mehna ye ihñoahye Jesu cūriquina. Tiquina sa yegū ihñahe masa ijipihiyequina ihña maria wahae tiahye.

⁴⁴ Sa ye ijipihiyequina Jesure wacū tutuayequina cahmecoa, quehnoano ijie tiahye. Sa ye tiquina yere cahme itie tiahye.

⁴⁵ Tiquina yere dua, ijipihiyequinare apee boro marieñequinare tiquinape ohoe tiahye tiquina.

⁴⁶ Sa ye decoripe tiquina Cohācjū wuhuru cahmecoae tiahye. Ijipihiyequina tiquina ye wuhusepu bucueye mehna cahmecoa, ihyae tiahye. ⁴⁷ Tiquina sa cahmecoa, “Cohācjū quehnoariquiuro ijire”, ni ño peoe tiahye. Sa ye apequina masa tiquinare cahme yuhdūe tiahye. Sa yero decoripe Cohācjū apequinare tiquiuro yequina wahagū yee tiahye.

3

Tini masieniquiuro yuhduoahye mari Pacu

¹ Namichapu tres ijigū Cohācjū mehna yahuducuri pje ijigū Pedro, Ñu mehna Cohācjū wuhuru wahaye niahye. ² Decoripe ti wuhu cja sopecaha quehnoari sopecaha wame tiri sopecahapu apequina ihcāquiuro masanore ne cāhta, duhu dapoe tiahye. Tiquiuro masano pehe wahma masa bajaroputa tini masiedahye. Sa yero tiquiuro ti sopecaha caha niñerure sini dujie tiahye ti wuhuru sañañequinare. ³ Sa ye Pedro, Ñu mehna ti wuhuru tiquina esaducagū tini

masieniquiro pehe tiquinare ihña, niñerure siniahye. ⁴ Sa ye Pedro gũhũ tiquirore ihña, Pedro pehe ohõ saha niahye:

—Ûsãre ihñaña mũhũ, niahye Pedro tiquirore.

⁵ Tiquiro sa nigũ tuhoro “Ahriquina mehenogã yũhare niñerure ohoeta”, ni tuhuro ihñadoque ohõ, tuhohaye tiquinare. ⁶ Tiquiro sa ni tuhrotuepegũta Pedro tiquirore ohõ saha ni yahuahye:

—Niñerure cũoeraja yũhũ. Cũoerapeita, ahrire yeitja mũhare. Jesucristo Nazare cjũno tiquiro tutuaye mehna tiniña mũhũ, niahye Pedro tini masieniquirore.

⁷ Sa ninota tiquiro omocare poto pehe cjã omocare ñehe, tiquirore weje wahcõ docohaye. Ti pjeta tini masieniquirore tiquiro ñecari tutuaa wahahye.

⁸ Tiquiro sa wahari bato tiquiro wahcãdũca sa, waha dũcahaye. Sa yero tiquiro waha, uhpu maa, “Cohãcjũ quehnoariquiro ijire”, ni bucueahye. Sa bucuero tiquina mehna Cohãcjũ wũhũpũ sajã wahahye. ⁹ Tiquiro sa tinigũ “Cohãcjũ quehnoariquiro ijire”, tiquiro nigũ masa ijipihtiyequina tiquirore ihñahye. ¹⁰ Sa ye masa tiquirore ihña masiahye. Tiquiro Cohãcjũ wũhũ cjã sopecaha quehnoari sopecaha caha niñerure tiquiro sini dujirire masiahye masa. Sa ye tiquiro tinigũ ihñañe, ihña maria wahahye.

Cohãcjũ wũhũpũ Pedro masare buheahye

¹¹ Sa ye tini masieniquiro Pedro gũhare tiquiro ñeheni watoa, masa ijipihtiyequina ihña maria waha, quehnoari paapũ Salomo wame tiri paapũ oma cã, cahmecoahye. ¹² Tiquina sa cahmecoari bato Pedro pehe yahuahye tiquinare:

—¿Mũsa Israe masa, dũhse yena ahriquirore ihña mariajari? ¿Dũhse yena usãre mũsa ihña

nũhũajari? Ûsã pehe usã ye tutuaye mehna Cohãcjũre usã wacũ tutuaye mehna usã esa tuhoro ahriquirore tinigũ yerũ usã. ¹³ Abrahã, Isaac, Jacob mari ñecũsumũa panopũ cjẽna Cohãcjũre ño peoe tiahye. Tiquiro Cohãcjũ pehe tiquiro cahacjũnore Jesure tutuariquiro, quehnoariquiro tiquiro ijigũ mũsare ihñoe tiri. Mũsa Jesure tiquirore ihña tuhtiyequinare ohori. Sa yena Pilato tiquirore peresu wio duepegũta mũsa pehe tiquirore wiogũ cahmedari. Pilatore Jesure ohori mũsa. ¹⁴ Pilato tiquirore wio duamedi. Tiquiro sa wio duepegũta mũsa Jesure quehnoariquirore, quehnoano yeriquirore cahmedana, apeqirore masa wejẽdiquiro pehere wio dutiri mũsa. ¹⁵ Sa yena Jesure marine catigũ yeriquirore wejẽdi mũsa, usã acaye judio masa. Tiquiro yariagũ Cohãcjũ tiquirore masori. Tire usã ihñahũ. ¹⁶ Sa yena usã tiquirore wacũ tutuana ijiaja. Ûsã sa wacũ tutuagũ ihñano ahriquirore mũsa yojopũ ihñariquirore mũsa ihña masiniquirore Jesu pehe tiquiro tutuaye mehna tinigũ yeri.

¹⁷ Yũhũ acaye, mari pũhtoa mehna Jesure quehnoano masiedapenata tiquirore wejẽdi mũsa. Tire masiaja yũhũ. ¹⁸ Sa ye panopũ cjẽna Cohãcjũ yere yahu mũhtariquina Cohãcjũ tiquinare tiquiro yahu dutiriro sahata yahuahye tiquina. “Cristo ñano yũhdũrota”, ni yahuahye tiquina. Tiquina sa ni yahuriro sahata sa wahari yojopũre. ¹⁹ Sa yena yojopũre mũsa ñañe yerire bũjũa witina ijiya. Quehnoañe pehere comesaya. Cristore wacũ tutuaya. Sa yero mũsa ñañe yerire borota Cohãcjũ. Sa yero mũsare bucueye decori cũnota tiquiro. Sa yena quehnoano jeri sajãnata. ²⁰ Sa yero Cohãcjũ Cristore tiquiro be-

seriquirore mäsare ohorota. Cristo Jesuta ijire. ²¹ Cohäcjä cahapü iji nine Jesu. Панору Cohäcjä tiqiuo yere yahu mähtariquinare yahuyu dutiahye. Masare ahri yehpa gähäre tiqiuo yeatire yahuyu dutiahye. Sa yero tiqiuo yahuriro sahata yojopäre ijipihiyere quehnono nine. Quehno tuhasaro pari turi Cristore ahri yehpapü ohorota. ²² Moise tire yahuro ohö saha niahye: “Mari mehna cjänore mari acayürore Cohäcjä yere yahu mähtariquirore Cohäcjä mari pähtoro ohorota müsare. Yühäre tiqiuo ohoriro saha ohorota tiqiuo gähäre. Sa yena müsare tiqiuo yahugü tüho pihti cähña mäsa. ²³ Ohö saha ijirota. Ijipihiyequina tiquirore tühoerariquinare, tiqiuo dutiyere yerariquinare tiqiuo cohänota. Cohäcjä yequina mehna cjäna ijisi tiquina”, niahye Moise.

²⁴ Ijipihiyequina Cohäcjä yere yahu mähtariquinape Samuel, tiqiuo bato ijiyequina gähü ahri decorire yahuahye. ²⁵ Mari ñecusumhare panopü cjäenare yahuahye Cohäcjä. Mari gähäre sa ni yahuro niahye. Abrahäre tiqiuo nidiro sahata mari gähäre ni yahuro niahye. Ohö saha ni yahuahye Cohäcjä Abrahäre: “Ijipihitiri yehpa cjäenare quehnoano yeitja. Ohö saha tire yeitja: Camerü iji nünu täriquiro mähü acayüro pehe masare quehnoano ye basarota yühäre”, niahye Cohäcjä Abrahäre. ²⁶ Sa yero Cohäcjä tiqiuo macünoare mari cahapü oho mähtari mari ñañe yeyere duhu dutiatiquirore. Sa yero marine tiqiuo quehnoano yeri, niahye Pedro tiquinare.

4

Pedro, Ñu mehna pähtoare yahuducuahye

¹⁻³ Masa mehna tiqiuo yahuducuri watoa pahia, Cohäcjä wühäre cohteyequina surara pähtoro, saduceo masa gähü tiquinare tühoahye. Ohö saha ni buheahye Pedro Ñu mehna masare:

—Jesu tiqiuo yariari bato masa müjaa wahari. Tiquiro sa masagü ihñana mari gähü came mari tiqiuo yequina mari masa müjatire masiaja mari, ni yahuahye Pedro gähü.

Tiquina sa nigü tühoye pähtoa pehe tiquina mehna usuahye. Sa usuaye nahi quehagü ihñañe tiquina Pedrore, apeqüna Jesu cüriquina gähäre ñehe, peresu yeahye. ⁴ Pähtoa tiquina sa cahmedapegüta peyequina Cohäcjä yere tühoyequina pehe “Ijirota ijire”, ni tühotuahye. Sa ye Jesu yequina peyequina sajähye. Tiquinare amüa sehsarore mari queogü Jesure wacü tutuayequina cinco mil masa ijiahye.

⁵ Sa ye ape decopü ti maca cjäna pähtoa, bucüna, judio masa buheyequina mehna Jerusalëpü cahmecoahye. ⁶ Sa yero pahia pähtoro, Anás wame tiriquiro topü ijiahye. Tiquiro acaye gähü ijiahye. Caifa, Ñu, Alejandro, apeqüna mehna Anás acaye gähü ijiahye. ⁷ Sa ye tiquina Pedro gähäre tiquina cahmedoqueogü, surara pehe pähtoa watoapü tiquinare ne wihi docoahye. Tiquina sa yeri bato pähtoa sinituahye Pedro gähäre:

—¿Noa ye tutuaye mehna mäsa tiquirore tinigü yeari? ¿Noa ijiajari müsare tire ye dutiriquiro? ni, sinituahye tiquina.

⁸ Tiquina sa nigü tühoro Espíritu Santo tutuaye mehna yahuahye Pedro tiquinare:

⁹ —¿Müsa pähtoa, mäsa bucüna, usä tini masieniquirore quehnoa wahagü usä yerire sinituna najari mäsa? ¹⁰ Ahrire masiña

musa ijiphtina, Israe masa. Ahrire Jesucristo sa yeri. Jesu Nazare cjāno, musa curusapū wejēdiqiro, Cohācjū tiqiro masoriqiro pehe ahriqiro tini masieniqirore quehnoa wahagū yeri. Sa yena ahriqirore yojopure musa ihñonopū tiqiro tinigū ihñare musa. Ohō saha nine Cohācjū yere tiquina ojoari pūpū Cristore yahuro: ¹¹ “Ahriqiro utā yero saha ijiriqiro ijire. Utāre wāhū dahreatiquina tiquina cohāno saha masa tiqirore cohāri. Tiquina sa yepegūta yojopure wāhū dahreriquina wāhūre yeye tiquina cū mūhtari utāre tiquina cūno saha Cohācjū tiqirore pūhtoro sōri. Tiquiro Cristo pehe mariedagū Cohācjū yequina wahaeraboaya masa. Tiquiro sa ihyo ijiriqiro ijierapegūta musa mari pūhtoa mehna tiqirore cahmedari. Musa sa cahmedapegūta Cohācjū pehe tiqirore mari pūhtoro sōri”, ni ojoahye panopure. ¹² Ne, apeqiro masare pecapū wahaboriqinare yūhdūoriqiro ne mariedare. Ahri yehpapure Jesu dihita masare yūhdūoriqiro ijire. Ne apeqina tiqiro yero saha ijieyquina ne mariedare, ni yahuahye Pedro tiquinare.

¹³ Tiquiro sa ni yahuri bato Pedro, Ņu mehna buhemehneñequina tiquina ijigū ihñañe, cuero marieno tiquina buhegū ihñañe, pūhtoa, bācūna, judio masa buheyequina mehna tūho maria wahahye. Sa ye Jesu yero saha tiquina buhegū ihñañe, ohō saha masiahye tiquina: “Pedro, Ņu gāhū potota Jesu mehna cjēna ijire ahriquina”, ni, masiahye tiquina. ¹⁴ Sa yero tini masieniqiro ijimediqiro Pedro gāhū mehna ijiahye. Tiquiro quehnoariqiro ijigū ihñahye pūhtoa, bācūna, judio masa buheyequina mehna. Sa ye

tiquina Pedro gāhūre “Ņano yeye nine”, ni yahusā masiedahye. ¹⁵ Sa yahusā masiedaye, pūhtoa tiquina cahmecoari tucūpū ijieyquinare Pedro gāhūre wijia dutiahye. ¹⁶ Tiquina wijari bato tiquina basi ohō saha ni yahuducuahye:

—¿Ahriquinare dahse yenatari mari? ni, yahuducuahye tiquina.

Ohō saha ni yahuducu nemoahye:

—Pedro, Ņu mehna Cohācjū tuuaye mehna tini masieniqirore tinigū yeri jiri. Sa ye Jerusalē cjēna ijipihtiyequina tiquina sa yerire masidi. Sa yena mari pehe “Sa yerari tiquina”, ni masiedaja mari. ¹⁷ Sa yena Jesu tiqiro buherire apeqinare buhe dutieracāhna tiquinare, “Apeqina ti buheyerer cahmeari”, nina, ni yahuducuahye tiquina basi.

¹⁸ Sa ni yahuducu tuhasa Pedro gāhūre pijio, ohō saha niahye:

—Jesu tiqiro buherire ne buheracāhña apeqinare. Tire ne yahuducueracāhña, nimahye tiquinare.

¹⁹ Tiquina sa nigū tūhoye Pedro, Ņu mehna ohō saha niahye tiquinare:

—Musa ohō saha nigū musare yūhtina, Cohācjū pehere yūhdūducana niboaga usā. ¿Noa pehere usā yūhtigū cahmeajari musa? ¿Musa pehere usā yūhtigū cahmeajari musa? ¿O Cohācjū pehere usā yūhtigū cahmedajari musa? ²⁰ Usā pehere usā ihñarire, usā tūhorire usāre nūono basioerare, ni yūhtiahye Pedro, Ņu mehna.

²¹ Tiquina sa nigū tūhoye pūhtoa pehe pari turi dutimahye tiquinare tja:

—Jesu tiqiro buherire musa buheri buhiri ñano yūhdūnata musa, nimahye pūhtoa tiquinare.

“Ņu, Pedro mehna ñano yeye nine”, ni masiedari jiri tiquina. Sa ye masa pehe tini masieniqiro

tiquiro yǎhdugǎ ihñañe, “Cohãcjũ potota quehnoariquiro ijire”, niahye masa. Tiquina sa nigũ tǎhoye pǎhtoa pehe Pedro gǎhǎre buhiri dahre masieda, tiquinare wioahye. ²² Tini masieniquiro, tiquina yǎhdũoriquiro cuarenta cǎhmari cǎoriquiro ijiahye.

Jesu yequina tiquina cueratire siniahye Cohãcjũre

²³ Sa ye Pedro, Ñu mehna tiquina mehna cjěna cahapũ esa, pahia pǎhtoa, bǎcǎna tiquinare tiquina nidire yahuahye. ²⁴ Tiquina sa nigũ tǎhoye tiquina ijipihtiyequina mari Pacũre Cohãcjũre siniahye:

—Usǎ pǎhto, mǎhũ ǎhmǎsere, yehpare, mǎri gǎhǎre yerigũ, ijipihtiyequina catiyequinare yerigũ ijire mǎhũ. ²⁵ Mǎhũ yaquiro Espĩritu Santo usǎ ñecũ mǎnano Davire mǎhũ cahacjǎnore ahrire yahu dutiahye mǎhũ nidiro sahata: ¿Dǎhse ye Israe masa ijieyequina usuajari? Tǎho masieñequina ijire masa. ²⁶ Peye yehpari cjěna pǎhtoa cahmeco, mari pǎhtoro Cohãcjũre, tiquiro pǎhtoro sǎoriquiro Cristo gǎhǎre ihña tuhti, ñano ye duare tiquinare, ni yahu dutiahye mǎhũ Davire panopũre.

²⁷ Sa tjire. Ahri macapũ Herode, Poncio Pilato, judio masa ijieyequina, judio masa mehna mǎhũ beseriquirore Jesure quehnoariquiro mǎhũ cahacjǎnore wejě duaye, cahmecoari. ²⁸ Ti pje mǎhũ cahmediro sahata “Sa waharota”, mǎhũ nidiro sahata yeri tiquina. Mǎhũ masiñe mehna sa ni yahuahye mǎhũ. ²⁹ Sa yegũ usǎ pǎhto, tiquina usǎre “Mǎsa buheri buhiri ñano yǎhdũnata”, tiquina nidire wacũña mǎhũ. Usǎre yǎhdũoya. Sa yegũ usǎre mǎhũ cahacjǎnare cuero marieno mǎhũ buheyere yahu dutiya usǎre. ³⁰ Mǎhũ

tutuaye mehna dohatiyequinare yǎhdũoya. Sa yegũ mǎhũ buheyere cuero marieno yahu dutiya usǎre. Sa yegũ Jesu quehnoariquiro mǎhũ cahacjǎno tiquiro tutuaye mehna ye ihña dutiya usǎre. Sa yegũ dohatiyequinare usǎ yǎhdũ dutigũ tiquiro tutuaye mehna yedohoya usǎre, ni siniahye tiquina mari Pacũre.

³¹ Tiquina sa ni sinidi bato, tiquina cahmecoari wǎhũ ñuhmia wahahye. Sa ñuhmigũta Espĩritu Santo tiquiro tutuaye mehna wacũ tutuayequina wahagũ yeahye tiquinare. Sa wahaye, Espĩritu Santo tiquiro dutiriro sahata yeye, cuero marieno Cohãcjũ yere yahuahye tiquina.

Jesu yequina tiquina yere itie tiahye

³²⁻³³ Sa ye Cohãcjũ tiquiro tutuaye mehna tiquina Jesu cũriquina ohõ saha ni yahue tiahye masare: “Jesu tiquiro masarire usǎ ihña”, ni, yahue tiahye tiquina masare. Sa yero tiquinare ijipihtiyequinare Cohãcjũ quehnoano yedohoducue tiahye. Sa ye Jesure wacũ tutuayequina peyequina ijiye, tiquina ihcǎno saha tǎhotuyequina ijie tiahye. Sa ye tiquina yere, tiquina doeri cjěne “Yee dihita ijire”, ne nieda tiahye. Tiquina ijipihtiyequina tiquina yere apee boro marieñequinare tiquina mehna cjěnare itie tiahye. ³⁴ Sa ye tiquina mehna cjěna pejecũoyequina marieda tiahye. Tiquina mehna cjěna dihta cũoyequina, wǎhũse cũoyequina tiquina yere duae tiahye. ³⁵ Sa duaye tiquina watarire ne cǎhta, Jesu cũriquinare ohoe tiahye. Sa ye tiquina pehe tire tiquina mehna cjěnare itie tiahye. Ijipihtiyequina cũoyequinare itie tiahye. ³⁶ Ti pje ihcǎquiro tiquina mehna cjǎno José wame tiriquiro ijiahye. Jesu cũriquina Josére Bernabé wame yeahye. Tiquiro wame

Bernabé “Masare bucueriquiro ijire”, nine griego ye mehna. Tiquiro Leví ya curua cjāno Chipre nūcno cjāno ijiahye. ³⁷ Sa yero tiquiro wese caoriquiro ijiro tire duahye. Sa yero tiquiro wapatarire Jesu cūriquinare ohoahye tiquiro apequinare iti dutiro.

5

Anania tiquiro namono Safira mehna ni mehoahye

¹ Apequina gāhu Bernabé yero saha yemahye. Tiquina Anania wame tiriquiro, tiquiro namono Safira wame tiricoro ijiahye. Tiquina ya wesere duahye tiquiro. ² Sa dueperota tiquiro wapatarire tiquiro basi neahye. Tiquiro namono gāhu tiquiro sa yerire masiahye. Sa yero tiquina wapatarire tiquina dūharire ne cāhta, Jesu cūriquinare ohoahye Anania pehe. Sa ohoro “Oho pehogu niaja”, nimahye tiquiro. ³ Tiquiro sa yegū ihñano Pedro tiquirore yahuahye:

—Anania, watīno mūhure ni meho dutiri jiri Espiritu Santore. Sa yegū mūhu ya yehpare dua, mūhu wapatarire mūhu basi nedi jiri. ⁴ Mūhu duato pano mūhu ya wese ijiri. Sa yero mūhu duari bato mūhu ye wapata ijiri. ¿Sa yegū dūhse ijiro boro sa ni mehoari mūhu? Mūhu ūsā dihitare ni mehoedari. Cohācjū gūhure ni mehoari mūhu, niahye Pedro tiquirore.

⁵ Tiquiro sa nigū tūhorota, Anania pehe doque quehe sa, yariaa wahahye. Sa ye ijipihtiyequina tiquiro sa wahagū masiñe, tutuaro cueahye. ⁶ Tiquiro yariari bato wahma pjia ahta, tiquiro pagure suhtiro cahsero mehna wahme, sopecahapū ne wijia, yahye tiquirore.

⁷ Sa ye ihtia hora bato Anania mūnano namono, tiquiro yariarire

masiedaro Pedro cahapū sajāhye. ⁸ Sa yero Pedro ticorore ohō saha niahye:

—¿Mūsa ya wesere duatjāna noho puno wapatarī mūsa? niahye tiquiro.

Sa yero ticoro manūno mūnano tiquiro nidiro punota, “To punota wapataū ūsā”, ni yahumahye ticoro.

⁹ Sa yero Pedro yahuahye ticorore:

—¿Dūhse yena mūsa ihcāno saha Cohācjū yaquiro Espiriture ni meho duajari? Tūhoya yojopure. Mūhu manūno mūnanore yariquina ahtare. Mūhu gūhure mūhu pagure neñe taye nine, niahye Pedro.

¹⁰ Tiquiro sa ni yahugūta ticoro doque quehe sa yariaa wahahye. Sa ye wahma pjia ti wūhure sajā wihi, ticoro pagure ne wijiaa wahahye. Ne wijia ticorore ne cāa wahahye. Ne cā, ticoro manūno mūnano pari paha yahye. ¹¹ Sa ye Jesu yequina ijipihtiyequina apequina tire tūhoye cue yūhdūahye.

Jesu cūriquina Cohācjū tutuaye mehna ye ihñohye

¹² Sa ye masa watoapū Jesu cūriquina peye tahari Cohācjū tutuaye mehna ye ihñoe tiahye. Sa ye tiquina Salomo wame tiri tucūpū quehnoari tucūpū cahmecoae tiahye. ¹³ Sa ye apequina tiquinare cueye, tiquina cahapū wahaera tiahye. Sa cuepeta tiquinare Jesu cūriquinare, “Quehnoañequina ijire ahriquina”, nie tiahye masa.

¹⁴ Sa ye ūmūa, numia peyequina Jesure wacū tutua dūcahye. ¹⁵ Sa ye tiquina dohatiyequinare ne cāhta, coma cjūñe mehna pū ta, duhu cūe tiahye mahapū tiquinare. Sa ye Pedro tiquinare tiquiro ña peogū cahmeahye tiquinare ne cāhtariquina pehe dohatiyequina tiquina yūhdūgū cahmeñe. Tiquinare tiquiro ña peeragū Pedro tiquina bui watīdoque peogū

cahmeahye tiquina. Ti dihitare cahmeahye tiquina yahduato saha. 16 Sa ye Jerusalē caha ijiye macari cjēna gāhū dohatiyequinare, watia mehna ijiyequina gāhūre ne cāhtae tiahye. Ijipihtiyequina tiquina paguri quehnoa wahahye.

Jesu cūriquinare apequina ñano yee tiahye

17 Tiquina sa yegū ihñañe pahia puhtoro, tiquiro mehna cjēna mehna Pedro gāhūre ihña tuhtiahye. Pahia puhtoro mehna cjēna saduceo masa ijiahye. 18 Sa ye tiquina usua yahdua, Jesu cūriquinare ñehe, peresu yeahye. 19 Sa yero ñamipū Cohācjū yaquiro angel pōoahye tiquinare peresupū dujiyequinare. Sa ye tiquinare wijia ta dutiro yahuahye angel:

20 —Cohācjū wuhupū wahaya. Ti wuhupū ijina Cohācjū tiquiro masorire ahri quehnoañe buheyere yahuya masare, niahye angel tiquinare.

21 Tiquiro sa nigū tuhoye, ñami cjūno Cohācjū wuhupū sajā, masare buheahye tiquina. Ti decota pahia puhtoro, tiquiro mehna cjēna, Israe masa puhtoa mehna cahmecoa, Jesu cūriquinare peresupū ijiyequinare ne cāhta dutimahye surara puhtoare. 22 Sa niepegūta surara puhtoa peresu tiquina yeri wuhupū waha, ihñahye. Tiquinare bocaerahye. Bocaera, tojoaa wahahye. Tojoa sa yahuahye tiquina puhtoare:

23 —Peresupū ijiye sope pahmari bihari pahmari dihita ijiri. Sa ye ti pahmari cahapū tiquina peresu yeriquinare cohteyequina ducuri. Sa ihñau usā. Usā sa ihñapegūta pōo sāa, usā ihñagū, tiquina peresu yeriquina mariedari, ni yahuahye tiquina.

24 Tiquina sa nigū tuhoye, surara Cohācjū wuhūre cohteyequina puhtoro, pahia puhtoa mehna tire tuho, tuho maria wahahye.

“¿Duhse waha sohtori tirotari ahri, tiquina sa yeye?” ni, tuhotuahye tiquina. 25 Sa yero tiquina cahapū apequiro ahta, tiquinare yahuahye:

—Musa peresu yeriquina Cohācjū wuhupū ijiri. Ihñana wahaya. Ti wuhupū masare buheye nidi tiquina, ni yahuahye.

26 Tiquiro sa nigū tuhorro, surara puhtoro tiquiro yequina surara mehna waha, Jesu cūriquinare pari turi ñehe cāhtahye tja. Sa ñehepeta tiquinare surara tuhtierahye. Sa ye tiquinare quēboriquina ijiepetā, masare cueye quēdahye tiquinare. “Ahriquinare mari quēgū apequina masa pehe utā paca mehna doqueeta marine”, ni, tuhotuahye tiquina surara pehe. 27 Sa ye tiquinare ne cāhta, puhtoa caha duhu docoahye tiquina. Tiquina sa ne wihi duhu docogū pahia puhtoro tiquinare tuhtiahye:

28 —Masare usā tutuaro dutimi, “Jesu yere buheracāhña”, nimi usā musare. Usā sa niepegūta musa pehe ijipihtiyequina Jerusalē cjēnare buheri musa. Jesu tiquiro yariari buhiri, usāre buhiri tigū ye duana niaga musa, niahye puhtoro pehe.

29 Tiquiro sa nigū tuhorro Pedro pehe apequina Jesu cūriquina mehna yuhitiahye:

—Cohācjū dutiri pehere ye muhtanatja. Sa yena came Cohācjū cahmegū masa tiquina dutiyere yematja. 30 Cohācjū, mari acaye panopū cjēna puhtoro Jesure masori jiri. Tiquirota ijire musa curusapū quē biha wejēdiquiro. 31 Jesure “Quehnoagū ijire”, ni, tiquiro poto pehe duji dutiri Jesure tiquiro Pacuro pehe. Sa yero Jesu masa puhtoro, masare masoriquiro ijiro, Israe masare tiquina ñañe yerire bujua witiyequina iji dutiro, tiquina ñañene cohā duare Jesu. 32 Sa yena usā

pehe Jesu tiquiro yerire ihñarina ijina tire yahuaja usã. Espiritu Santo tire ihñariquiro ijiro yahure tiquiro gãhu. Tiquirore Espiritu Santore Cohãcjũ ohori. Ijipihtiyequina Cohãcjũ dutiyere yeyequinare tiquiro Espiritu Santore ohori, ni yahuahye tiquinare.

³³ Tiquiro sa nigũ tãhoye pãhtoa pehe usua yãhdũahye. Sa ye tiquina Jesu cãriquinare wejẽ duamahye. ³⁴ Sa wejẽ duepegãta Gamalie, fariseo masano topũ ijiriquiro tiquinare “Wejẽari”, nino tiquinare yahuro taro niahye. Tiquiro pãhtoa mehna cjãno, dutiyere buheriquiro ijigã, masa tiquirore ño peoe tiahye. Tiquiro Jesu cãriquinare mehenogã cohte dutiro ape siepũ tiquinare ne cã dutiahye surarare. Tiquina sa ne cãri bato tiquiro yahuahye masare:

³⁵—Musa Israe masa, ahriquinare m̄sa yeatire quehnoano tãhotuya “M̄sapũ wejẽari”, nina. ³⁶ Wacũña Teuda m̄nanore. Tiquiro basi “Masare yãhdũdcagũ ijiaja yãhu”, nidi masare. Sa ye masa peyequina cuatro cientos masa tiquiro mehna cjẽna tojoari. Sa ye apequina pehe tiquirore wejẽdi jiri. Tiquiro buheyere buheriquina pehe waha sitea wahari jiri. Sa ye tiquina m̄na yojoapũre mariedare. ³⁷ Came masare tiquina queori pje ijigã Galilea cjãno Juda wame tiriquiro m̄nanao masare tiquiro buhegũ tiquiro mehna masa peyequina tojoari. Tiquiro gãhu yariaa wahari jiri. Sa ye tiquiro yequina ijipihtiyequina waha sitea wahari jiri. ³⁸ Sa nigũ m̄sare yojoapũ ahrire yahugũ niaja. Sa ihña cãhña ahriquinare Jesu yere yahuyequinare. Sa ye ahri buheye, ahriquina ye buheye Cohãcjũ ye buheye ijieraro, pihtia waharota Teuda gãhu tiquina ye buheye ti pihtiriro sahata. ³⁹ Sa ijiepegãta ahri Cohãcjũ ye buheye ijiro, ne

pihtisi. Ahri buheye Cohãcjũ ye ijigũ ne ahrire butigũ ye masiedare m̄sa. M̄sa ahrire butigũ ye duana Cohãcjũ mehna cahmequena niboaga m̄sa, niahye Gamalie tiquinare.

⁴⁰ Tiquiro sa ni yahugũ tãhoye, “Ijirota ijire”, ni tãhotuahye masa. Sa ye tiquina Jesu cãriquinare pijio, tiquina wihigũ ihñañe, tiquinare tanahye. “Jesu yere buheracãhña m̄sa”, ni tuhasa, tiquinare waha dutiahye. ⁴¹ Tiquina sa waha dutigũ tãhoye tiquina pãhtoa cahapũ ijiriquina wahaa wahahye. Jesu yere tiquina yeri buhiri ñano yãhdũye tutuaro bucueahye Jesu cãriquina. ⁴² Sa ye decoripe Cohãcjũ wãhũpũ, tiquina ye wãhũsepeũ Cristo Jesu ye buheyere yahue tiahye tiquina.

6

Siete yedohoyequinare beseahye Jesu yequina

¹ Ti decorire Jesu buheyequina peyequina wahahye. Sa ye judio masa tiquina quehnoano yeragũ ihñañe griego masa pehe tiquina mehna cahme tuhtiahye Jesu yequina dihita ijiepetã. Griego masa wape wiha numiare decoripe tiquina ihyayere quehnoano tiquina itieragũ ihñañe, judio masare tuhtiahye. ² Sa ye doce Jesu cãriquina, peyequina Jesu buheyequinare tiquina cahapũ pijio, ohõ saha ni yahuahye:

—Usã Cohãcjũ yere buhena ijiaja. Ihyayere itiborina ijieraja usã. ³ M̄sa usã acaye, siete m̄m̄are, “Quehnoañequina”, apequina tiquina niñequinare, quehnoano tãho masiñequinare, Espiritu Santo c̄oyequinare macaña. Tiquinare ihyayere iti dutiya m̄sa. ⁴ Sa yena usã pehe decoripe Cohãcjũre sini, Cohãcjũ yere buhenatja, niahye tiquina Jesu cãriquina.

⁵ Tiquina sa nigū tūhoye, “Au, sata yeihna”, niahye tiquina ijipihtiyequina Jesu yequina. Sa ye Estebāre Cristore wacū tutuariquirore, Espiritu Santo tutuayere pajiro cōriquirore be-seahye tiquina. Apequina gūhare beseahye. Felipere, Prócorore, Nicanore, Timore, Parmenare, Nicolare ihyaye itiatiquinare be-seahye tiquina. Nicola pehe judio masano ijieriquiro Antioquia cjēno judio masa ye buheyere cahmeno, tiquina mehna sajāmediquiro ijiahye. ⁶ Tiquina beseriquinare Jesu cūriquina cahapū ne wihiahye apequina Jesu yequina pehe. Tiquina sa ne wihigū ihñañe tiquina Cohācjāre sini basaye, tiquina beseriquina bui omocarine duhu peohaye.

⁷ Sa ye ti yehpa cjēna Cohācjū yere masi pihti cjūñe niahye. Sa ye Jerusalēpū ijiyequina Jesu buheyequina peyequina wahahye. Sa ye pahia gūhū peyequina Jesu yequina wahahye.

Apequina Estebāre ñeheahye

⁸ Sa yero Estebā Cohācjū tutuayere cōriquirore ijiahye. Tiquiro Cohācjū quehnoano yenhriquiro ijiahye. Sa yero tiquiro Cohācjū tutuaye mehna ye ihñoahye masa tiquina ihño. ⁹ Tiquiro sa yepegūta judio masa tiquina buheri wūhū cjēna tiquirore ihña tuhtiahye. Sa ye tiquiro mehna cahme duse tini wiaye niahye. Cahacjēna ijjirire yūhdū witiriquina wame tiyequina ijiahye tiquina. Cirene cjēna, Alejandría cjēna, Cilicia cjēna, Asia cjēna mehna peyequina ijiahye tiquina. ¹⁰ Sa ye Estebā quehnoano masiniquiro Espiritu Santore pajiro cōriquiro tiquiro yahuducugū tūhoye tiquina “Mūhū nidi poto ijierare”, tiquirore ni ihño masiedahye. ¹¹ Sa tūho dueraye tiquina apequinare ni meho dutiye, wapa yeahye

tiquinare. Tiquina sa ni meho dutigū ohō saha ni yahusāmahye tiquina:

—Ahriquiro Cohācjāre tiquiro ñano yahuducugū, Moisere tiquiro ñano yahuducugū gūhare usā tūhou, ni yahusāmahye ni mehoñequina pehe apequinare.

¹² Tiquina sa nigū tūhoye masa, judio masa buheyequina, bucūna gūhū tiquiro mehna usuahye. Sa ye tiquina Estebāre ñehe, tiquina pūhtoa cahapū neahye tiquirore. ¹³⁻¹⁴ Sa ye tiquina apequinare ni meho dutiahye:

—Ahriquiro decoripe Cohācjū wūhare, tiquiro dutiye gūhare ñano yahuducuriquiro ijire. Tūhou usā tiquirore tiquiro ohō saha nigū: “Jesu Nazare cjēno Cohācjū wūhare cohānota. Sa yero tiquiro Moise dutiyere marine yahurire camesarota Jesu”, nidi Estebā usā tūhogū, ni meho yahusāmahye tiquina.

¹⁵ Sa ye ijipihtiyequina topū dujiyequina Estebāre quehnoano ihñadoque ohō, tiquiro wūhdoare ihñahye tiquina. Angel yero saha bajuahye tiquiro wūhdo.

7

Estebā Jesu yere yahuahye

¹ Sa ye pahia pūhthora sinituahye Estebāre.

—¿Ahriquina niñe potota ijiajari? ni, sinituahye tiquiro Estebāre.

² Tiquiro sa nigū tūhoro, Estebā pehe tiquinare ohō saha ni yahuahye:

—Yūhū acaye, bucūna, usā pacasūmūna tūhoya. Abrahā mari ñecu mūnāno panopū cjāno Mesopotamiapū tiquiro ijigū, Harāpū tiquiro ijiato pano, Cohācjū tutuariquiro asi siteriquiro pehe tiquirore Abrahāre bajuahye. ³ Sa bajoaro Cohācjū yahuahye tiquirore. “Mūhū ya yehpare mūhū acaye mehna ijieracāhña. Sa yegū

ape yehparu wahaya. Mũhu sa wahagũ mũhure ti yehpare ihñogutja yũhu”, niahye Cohãcjũ Abrahãre. ⁴ Tiquiro sa nigũ tũhoye, Abrahã gũhu Caldea yehpa cjẽna ya yehparu ijiriquina wahahye. Sa yero Harãru esahye. Topu esa, ijiahye. Sa yero tiquiro pacuro yariari bato ahri yehpa yojopu masa ijiri yehparu Cohãcjũ ahta dutiahye Abrahãre. ⁵ Cohãcjũ Abrahã tiquiro ijiri yehpare quehnoano waro cũedarĩahye tiquirore. Ne mehenogã cũedarĩahye. Sa yero Abrahã pohna marieniquiro ijiepegũta Cohãcjũ pehe tiquirore ohõ saha ni yahuahye. “Mũhure, mũhu panamena ape tjuro cjẽnapure ahri yehpare ohogutja”, niahye Cohãcjũ Abrahãre. ⁶ Sa ninota ohõ saha ni yahu nemoahye Cohãcjũ. “Mũhu panamena ape tjuro cjẽna ape yehparu wahaye, topu apequina caharu ijieye, tiquina cahacjẽna ijietia tiquina. Sa ye cuatro cientos cũhmari waro to cjẽna ñano yeeta mũhu panamena iji turiayequinare. ⁷ Sa yegu to cjẽnare tiquina sa yeri buhiri buhiri dahregutja yũhu. Yũhu sa yeri bato mũhu panamena iji turiayequina ahri yehparu wihietia tja. Sa ye ahri yehparu yũhu cahacjẽna ijietia tiquina”, niahye Cohãcjũ Abrahãre. ⁸ Sa nino Cohãcjũ “Yũhu nidiro sahata yegutja”, nino Abrahã tiquiro wacũatire ohõ saha cũahye tiquirore. Cũhuncunũ sohtoa cahserogãre yũhre ne dutiahye tiquirore, tiquiro ni yahuripure wacũ dutiro. Sa ye Abrahã Isaare pohna tiahye. Ocho decori bato cũhuncunũ sohtoa cahserogãre yũhre neahye Isaare. Came Isaac Jacore pohna tiahye. Sa yero Jacob doce waro pohna tiahye. Tiquina doce pehe mari ye cururipe mari dahpoto cjẽna ijiatiquina ijiahye.

⁹ Sa ye tiquina mari ñecusũmũ

mũna panopu cjẽna Josere cooye ihña tuhtiyey, tiquirore dua cjãhye Egiptopu wahayequinare. Sa yero Josere Cohãcjũ yedohoahye. ¹⁰ Tiquiro ñano yũhdũgũ ihñano Cohãcjũ tiquirore yedohoahye. Tiquiro sa yedohogũ Josẽ pehe quehnoano tũho masiniquiro wahahye. Sa yero faraõ Egipto cjãno puhtoro pehe Josere cahmeahye. Tiquirore cahmegũ yeahye Cohãcjũ pehe. Tiquiro sa yegũ faraõ pehe Josere puhtoro sõahye tiquiro yequina masare dutiatiquirore. Tiquiro faraõ ya wũhu gũhure puhtoro ijiahye.

¹¹ Sa ye ti pjere Egiptopu, Canaaru ne acoro ahtaerahye. Sa ye ñano yũhdũahye to cjẽna. Sa ye mari ñecusũmũ mũna panopu cjẽna ihyayerẽ bocaerahye. ¹² Sa bocaeraro Egiptopu trigo ijigũ tũhoro, Jacob tiquiro pohnene mari ñecusũmũ mũnare topu coã ohoro niahye. ¹³ Came Egiptopu tiquina esagũ Josẽ tiquiro wahmisũmũare yahuahye. “Mũsa bahũta ijiaja yũhu”, niahye tiquinare. Sa yero Josẽ acayere coã ihñano niahye puhtoro faraõ. ¹⁴ Came Josẽ tiquiro wahmisũmũare tiquiro pacuro Jacore piji dutiro ohoahye. Tiquiro acayey setenta y cinco masa ijiahye. ¹⁵ Tiquiro macũno pijiogũ tũhoro Jacob wahahye Egiptopu tiquiro macũno caharu. Tiquiro macũno caharu ijero, came yariaa wahahye. Sa ye mari ñecusũmũ mũna gũhu topu yaria pihtia wahahye. ¹⁶ Sa ye Siquẽ wame tiropu tiquina pagurire nea, masa coperire sehe tuhasa cohãhye tiquina pagurire. Abrahã tiquiro dũri yehpa ijiahye ti yehpa. Panopu Abrahã ti yehpare Hamor pohnene dúahye niñeru mehna.

¹⁷ Sa yero Cohãcjũ Abrahãre “Ahri yehpare ohogutja mũhure”, niahye. Ti yehpare “Ohogutja”,

tiqiro nidi pje am̄a sagū tiqiro acaye Israe masa peyequina masa wahahye. ¹⁸ Egiptop̄a tiquina ijinigū, apeqiro p̄htoro sajahye. Sa yero tiqiro p̄htoro pehe Josere masiedahye. ¹⁹ Tiqiro mari acayere ñano ye dua, tiquina pohne wejē dua, cohā dutiahye tiquinare. Sa yero mari ñec̄sum̄na m̄na iji turiayequinare ñano yeahye p̄htoro faraō pehe. ²⁰ Tiqiro sa yeri watoa Moise m̄nanao pehe masa bajuahye. Tiqiro quehnoariqiro, Cohācjū tiqiro quehnoano ihña coariqiro ijiahye. Sa ye ihtia asū waro quehnoano ihboahye tiqirogāre tiqiro pac̄sum̄na. ²¹ Sa yero Moisere tiquina n̄o nemoedagū faraō macono tiqirogāre ihña boca, ne maja, ticoro mac̄noro yero saha c̄oahye tiqirogāre. ²² Sa ye Egipto cjēna quehnoano masiñequina yere buheahye Moisere. Sa yero cuero marieno yahuducuriqiro p̄htoro yero saha yeriqiro ijiahye Moise.

²³ Sa ijieperota tiqiro cuarenta c̄hmari c̄oro tiqiro acayere Israe masare ihña duaro tiquina cahap̄a tinino wahahye. ²⁴ Sa tinino esaro Egipto cjāno Moise acayore tiqiro ñano yegū Moise ihñahye. Sa ihñano tiqiro acayore yedohoahye Moise. Tiqiro acayore yedohoro, Egipto cjāno pehere wejēahye tiqiro. ²⁵ Sa yero Moise ohō saha ni t̄hotumahye. “Ȳh̄u acaye tiquina acayore ȳh̄u yedohogū ihñañe ‘Cohācjū marine quehnoano yedohogū ye dutiro oho ahriqirore’, ni t̄hotueta ȳh̄u acaye”, ni t̄hotumahye Moise. Tiqiro sa ni t̄hotuepegūta tiquina pehe ne sa ni t̄hotuerahye. ²⁶ Ape decop̄a Moise tiqiro acayere p̄aro tiquina basi cah-

mequeñequinare ihñahye. Sa yero tiqiro tiquinare yahumahye. “¿M̄sa basi ijiepenata cahmequeajari m̄sa?” nimahye Moise tiquinare. ²⁷ Tiqiro sa nigū t̄horo ihcāqiro tiqiro acayore ñano yeriqiro Moisere t̄doqueoahye. “M̄h̄u usā p̄hto ijierare. Usāre dutigū ijierare m̄h̄u. ²⁸ ¿Can̄re Egipto cjānore m̄h̄u wejēdiro sahta ȳh̄u wejē duagū nijari m̄h̄u?” niahye tiqiro Moisere. ²⁹ Tiqiro sa nigū t̄ho maria waha, Moise oma duhti cāa wahahye. Madiā yehpap̄a waha wahahye. Top̄are numino boca p̄aro pohna tiahye.

³⁰ Sa ye Moise cuarenta c̄hmari waro top̄a tiqiro ijiri bato Sinaí wame tid̄u c̄na caha masa marienop̄a tiqiro ijigū angel tiqirore bajuahye. Angel pehe yuc̄gū mehenugā uj̄ri peca pohnap̄a bajuahye. ³¹ T̄u sa uj̄gū ihñano Moise ihña maria wahahye. Ti pecare cahagā quehnoano tiqiro ihñano wahagū waro Cohācjū tiqirore yahuahye. ³² “Cohācjū ijiaja ȳh̄u. M̄h̄u ñec̄sum̄na Abrahā, Isaac, Jacob tiquina ño peorigū ijiaja”, niahye Cohācjū Moisere. Tiqiro sa nigū t̄horo Moise pehe nanarea wahahye. Ne ihña wahcōedahye. ³³ Sa yero Cohācjū yahuahye tiqirore. “Mianogāta ȳh̄u cahap̄a duc̄gū nine m̄h̄u. Sa yegū cua pesaro mehna m̄h̄u dahpo suhtire tu weya. ³⁴ Yeequina masa Egiptop̄a tiquina ñano ȳh̄udugū ihñan̄. Tiquina utiyere t̄hou. Sa yegū tiquinare yedohogū ahtan̄. Tiquina sa wahagū ihñagū wahaya m̄h̄u gāh̄u. Egiptop̄a m̄h̄u ohoḡt̄ja tiquinare yedoho dutigū”, niahye Cohācjū Moisere.

³⁵ Tiquina pehe mari acaye Israe masa Moisere cahmedahye. “M̄h̄u usā p̄hto ijierare. M̄h̄u usāre dutigū ijierare”, Moisere sa

niñe cahmedaye niahye tiquina. Tiquina sa cahmedapegāta Cohācjū tiqiurore Egiptorū ohoahye, mari acayere Israe masare yedohoatiqiurore, pūhoro ijiatiqiurore. Angel tiqiurore yucūgūpū bajuariqiuro pehe oho basahye tiqiurore. ³⁶ Moise mari acayere Israe masare Egiptorū ijiyequinare wioahye. Sa yero Egiptorū ahriqiuro Moise Cohācjū tutuaye mehna ye ihño dūcahaye. Sa yero pajiri ma sohāri marū sa yeahye tja. Camerū masa marienopū gūhare cuarenta cūhmari waro Cohācjū tutuaye mehna ye ihñoahye tiqiuro. ³⁷ Ahriqiuro Moise pehe mari acayere Israe masare yahuahye. “Yūhū yero saha ijiriqiurore Cohācjū yere yahu mūhtariqiurore Cohācjū ohorota. Sa yero tiqiuro mūsa mehna cĵeno mūsa acayūro ijirota”, niahye Moise tiquinare. ³⁸ Moise masa marienopū mari acaye Israe masa mehna iji-ahye. Sa yero Sinaí wame tidū cūhūpū tiqiurore yahuriqiuro angel mehna ijiyahye. Sa yero mari ñecūsumūa panopū cĵena mehna ijiyahye tiqiuro. Cohācjū tiqiuro dutiyere cūriqiuro ijiyahye Moise.

³⁹⁻⁴⁰ 'Sa ye ti dutiyere cūhūpū Moisere tiqiuro cūri watoa mari ñecūsumūa panopū cĵena Egiptorū tojoaa duahye, Moisere yūhdūdcaye. Tiquina tiqiurore cahmedahye. Sa cahmedaye, tiquina Moise bahūro Aarōre ohō saha niahye: “Cohāmana queoyere yeya mari yequina ijiatiquinare. Sa ye tiquina mūhū yeriquina marine dutiye mari waha duari mahapū marine neaeta. ¿Tiqiuro Egiptorū ijiyequinare marine ne cāhtariqiuro Moise dūhse wahayari tiqiuro? Masiedaja usā”, niahye tiquina. ⁴¹ Sa ye ti decorire tiquina wecū queoyere uru mehna yeahye. Sa ye tuhasa, tiquina wahiquinare

wejē, tiquina yeriquiro cahapū ne cāhta, ño peoahye tiqiurore. Sa ye tiquina yeriquiro wecare ihñā, bu-
cue, bose deco yeahye. ⁴² Cohācjū wecare tiquina ño peogū ihñano tiquinare cohā cāa wahamahye. “Yūhūre cohā, ñahpicoha pehere ño peocūnahdo”, nino cohā cāa wahamahye. Cohācjū yere yahu mūhtariquina sa ni, ojoahye.

Mūsa yūhūre ña yūhdūaro yeri. Israe masa masa marienopū cuarenta cūhmari waro ijina, wahiquinare mūsa we-
jēñequinare mūsa ūjūañequinare ohona, yūhūre mūsa ño peoboriro sahata yemedi mūsa. Sa yepenata yūhū pehere mūsa ño peoerari. ⁴³ Sa yena mūsa Molo wame tiriqiurore ño peona ijina, tiqiurore ño peori wūhūre cūori mūsa. Ñahpicoha apequiuro cohācjū Rejā wame tīria queoyere mūsa yeriare mūsa ño peori tja. Ti queoyere mūsa yeriquinare mūsa ño peori. Mūsa sa yeri buhiri mū sare Babilonia ape sie pahrēpū cohāgutja yūhū, ni, yahu ojoahye Cohācjū yere yahu mūhtariquina.

⁴⁴ 'Sa ye masa marienopū Cohācjū masa mehna tiqiuro ijiri wūhūre wahiquina cahseri wūhūre cūoahye mari ñecūsumūa panopū cĵena. Ti wūhū Cohācjū masa mehna tiqiuro yahuducuri wūhū ijiyahye. Ti wūhūpū Cohācjū dutiye tiqiuro ojoari pĵīni utā pĵīni ijiyahye. Ti wūhūre Cohācjū tiqiuro yahuriro sahata Moisere tiqiuro ihñoriro sahata dahre dutiahye Cohācjū Moisere. ⁴⁵ Sa ye mari ñecūsumūa panopū cĵena Josué mehna ti wūhūre wahiquina cahseri mehna tiquina yeri wūhūre ne cāhtahye ahri yehpapū mari ijiri yehpapū. Tiquinare mari acaye Israe masare Cohācjū

tiquiro cūati yehpapure ahri yehpapure tiquina wihiato pano ahri yehpapure iji mahtariquina Canaa cĵena mĵnare Cohācĵū cohā cāhye. Ti pjere Cohācĵūre űo peori wĵhure wahiquina cahseri wĵhure cĵoahye mari űecĵsumĵa. Tee Davi mĵnano tiquiro ijigĵpĵ cĵo bato tiahye ti wĵhure. ⁴⁶ Sa yero Davi mĵnano Cohācĵūre bucuegĵ yeahye. Sa yero Cohācĵū ya wĵhĵ ijiatire Davi pehe ye duaro, sinimahye Cohācĵūre. ⁴⁷ Tiquiro sa siniepegĵta Salomo pehe Cohācĵū ya wĵhure yeahye. ⁴⁸ Tiquiro sa yepegĵta Cohācĵū pehe masa tiquina yeri wĵhĵpĵre ijierare. Ohō saha niahye Cohācĵū yere yahu mahtariquiro.

⁴⁹ “Ūhmĵsepĵ yĵhĵ dujiro ijire. Тopĵ dujigĵ dutiaja yĵhĵ. Sa yero yehpa pehe yĵhĵ dahpocĵrine duhu peoro yero saha ijire. Yĵhĵ tutua yĵhdĵagĵ ijiaja. Ya wĵhĵ ijiatore ye masiedare mĵsa. Cohācĵū yĵhĵ ijigĵ yĵhĵ ijiati wĵhure mĵsa ye masiedare. ⁵⁰ Yĵhĵ basi ahri yehpare ijipihtiro yei yĵhĵ”, niahye Cohācĵū, ni ojoahye Cohācĵū yere yahu mahtariquiro.

⁵¹ ‘Mĵsa ne yahti duena ijire. Cohācĵū yere tĵhoepenata, tiquirore yahti duerare. Espĵritu Santore yĵhdĵdĵca yĵhdĵare mĵsa. Mĵsa űecĵsumĵa tiquina yeriro sahata yere mĵsa. ⁵² Mĵsa űecĵsumĵa ijipihtiyequina Cohācĵū yere yahu mahtariquinare űano yeahye. Tiquina Cohācĵū yere yahu mahtariquina pehe “Came quehnoariquiro Cohācĵū yere yahu mahtariquiro ahtarota”, tiquina ni yahuyequina ijigĵ tĵhoye mĵsa űecĵsumĵa mĵna sa ni yahuriquinare wejĵe tiahye. Sa yena “Quehnoariquiro”, tiquina nidiquirore mĵsa gĵhĵ yojopĵre tiquiro ya curua cĵana iĵiepenata

tiquirore wejĵedi. ⁵³ Cohācĵū dutiyere angele pehe yahumahye mĵsare. Sa yena mĵsa ti dutiyere cĵomahye. Sa yena ti dutiyere yĵhdĵdĵcari mĵsa, niahye Estebā.

Tiquina Estebāre utā paca mehna doque wejĵahye

⁵⁴ Tiquiro sa nigĵ tĵhoye tiquina pehe tutuaro usuahye. Sa tutuaro usuaye, cuayequina wahahye. ⁵⁵ Tiquina sa usuepegĵta tiquiro Espĵritu Santo dutiriro sahata ye pehoriquiro ijiro, tiquiro tutuayere quehnoano cĵoriquiro ijiro, ahmĵsepĵ ihĵadoque mĵo, Cohācĵū asi siteyere ihĵahye Estebā. Jesu Cohācĵū poto pehepĵ ducugĵ ihĵahye tiquiro. ⁵⁶ Sa ihĵano ohō saha niahye:

—Ūhmĵsepĵ mehenogā parĵ we maagĵ Jesu Cohācĵū ohoriquiro Cohācĵū poto pehepĵ tiquiro ducugĵ ihĵaja yĵhĵ, niahye Estebā.

⁵⁷ Tiquiro sa nigĵ tĵhoye tiquina tutuaro saűuducu, tiquina cahmo coperire biha cā, ihcāno mehna tiquiro cahapĵ oma maa cā, tiquirore űeheahye. ⁵⁸ űehe tuhasa, tiquirore ne cā, ti maca dĵhtĵ cahapĵ cohāhye tiquirore. Sa ye utā paca mehna doque wejĵahye tiquirore. Tiquina sa wejĵato pano tiquirore yahusāriquina tiquirore utā paca mehna doqueatiquina tiquina suhtire tu we, wahmĵnore Saulo wame tiriquire tiquina suhtire cĵo basa dutiahye. ⁵⁹ Sa yero Estebāre tiquina wejĵato pano ohō saha niahye tiquiro:

—Jesu yĵhĵ pĵhto, yĵhĵ jeripohnare neĵa, niahye tiquiro.

Tiquiro sa nino watoa tiquina pehe utā paca mehna doqueye ni-ahye tiquirore.

⁶⁰ Sa yero tiquiro dĵsepe curi mehna quehe sa, ohō saha niahye:

—Pĵhto Jesu, ahriquina yojopĵ űano yĵhure tiquina yeyere tiquinare buhiri dahreracāhĵa mĵhĵ, niahye Estebā.

Sa nidi bato tiquiro yariaa wahahye.

8

¹ Sa yero Estebã tiquiro yariagũ ihñano, “Quehnoare”, niahye Saulo pehe.

Saulo Jesu yequinare ñano yeahye

Sa ye ti decoreta Jesu yequinare Jerusalẽpũ ijiyequinare ñano ye dũcahye apequina pehe. Tiquina sa ye dũcagũ Jesu yequina Judea yehpapũ, Samaria yehpapũ, yoaropũ duhti site cãa wahahye. Jesu cũriquina dihita wahaerahye.

² Sa ye apequina Cohãcjũre ño peoyequina Estebãre ya, tutuaro utiahye tiquina. ³ Sa yero Saulo pehe Jesu yequinare ña yũhdũaro yee timahye. Tiquiro tiquina ye wũhũsepũ sajã, amũare, numiare ñehe, peresupũ biha docoe tiahye.

Samariapũ Jesu yere bueahye Felipe

⁴ Sa yeye yoaropũ waha siteriquina Jesu yere bueahye. ⁵ Sa yero Felipe Samaria wame tiri macapũ esa, Cristo yere bueahye ti maca cjẽnare. ⁶ Tiquiro sa buhegũ ti maca cjẽna quehnoano tũhoe tiahye. Sa ye Cohãcjũ tutuaye mehna tiquiro ye ihñogũ ihñahye tiquina. Sa ihñañe tiquirore quehnoano tũhoe tiahye.

⁷ Peyequina watĩare cũoyequina tiquiro cahapũ tiquina wihigũ ihñano watĩa pehere waha dutie tiahye tiquiro. Watĩa pehe tutuaro sañuducu, duhu cãa wahahye tiquina. Sa yero peyequina tini masieñequinare, pari yuri wahayequinare quehnoano pagũ tiyequina wahagũ yeahye.

⁸ Tiquiro sa yegũ ihñañe ti maca cjẽna peyequina masa bucueahye.

⁹ Ti pjere Simo wame tiri tiquiro ti maca cjãno yairo ijiahye. Sa yero yayia tiquina yerire ye ihñoe tiahye Samaria cjẽnare. Tiquiro sa

ye ihñogũ ihñañe, ti maca cjẽna ihña maria waha, tiquirore cua pesaro ihñaie tiahye.

—Yũhũ masi pehogũ ijiaja, nimahye Simo pehe tiquinare.

¹⁰ Tiquiro sa yegũ ihñañe masa pehe ohõ saha nie timahye:

—Ahriquiro Cohãcjũ ye tutuayere cũoriquiro ijire. Cohãcjũ yero saha tutuariquiro ijire, nie timahye tiquirore masa, pũhtoa mehna.

Tiquina ijipihtiyequina quehnoano tũhoahye tiquirore.

¹¹ Tiquiro yayia tiquina yeye mehna yoari pje ye ihñoe tiahye tiquinare. Tiquiro sa ye ihñogũ ihñañe tiquina ihña maria wahae tiahye. Sa ye tiquina tiquirore ño peoe tiahye. ¹² Tiquina sa ño peoepegũta Felipe pehe Cohãcjũ tiquiro pũhtoro ijiyere, Jesu-cristo yere quehnoañe buheyere yahuahye. Tiquiro sa yahugũ tiquina tiquirore quehnoano tũhoahye. Tiquina sa quehnoano tũhogũ ihñano amũa, numia gãhũre wame yeahye Felipe. ¹³ Sa yero Simo gãhũ Felipere quehnoano tũhoe tiahye. Sa yero tiquiro gãhũre wame yeahye. Tiquiro sa wame yeri bato Felipe mehna tojoae tiahye tiquiro. Felipe pehe Cohãcjũ tutuaye mehna tiquiro ye ihñogũ ihñano, dohatiyequinare tiquiro yũhdũogũ ihñano Simo ihña maria wahahye.

¹⁴ Sa ye Samaria cjẽna Cohãcjũ yere tiquina tutuaro cahmegũ Jesu cũriquina Jerusalẽpũ ijiyequina tũhooahye tiquinare. Sa tiquina cahmegũ tũhooye Pedrorre, Ñũ gãhũre ohoahye Samariapũ.

¹⁵ Topũ esaye Pedro gãhũ Cohãcjũre siniahye. “Ahriquina Samaria cjẽna mũhũre ño peoyequina mũhũ yaquiro Espĩritu Santore cũoahro”, ni, sini basahye tiquina Cohãcjũre.

¹⁶ Tiquina Samaria cjẽna Jesucristo wame mehna wame yeriquina

ijiahye. Ti dihitare masiahye tiquina. Sa ye Espiritu Santore cūoera tiahye ti pjere tiquina. 17 Sa ye Pedro, Ñu mehna Samaria cjēnare tiquina omocarine tiquina bui duhu peori bato Espiritu Santore cūo dūcae tiahye tiquina.

18 Sa yero Pedro gāhu tiquina omocari mehna tiquina duhu peogū ihñahye Simo. Espiritu Santore tiquina ñehegū gāhare ihñahye tiquiro. Sa ihñariquiro ijiro, ti tutuayere cahmeno, niñeru mehna wapa ye duamahye. Ohō saha nimahye Simo:

19 —Yūhu gāhare ohoya ahri tutuayere. Yūhu gāhu yūhu omocari mehna masa bui duhu peo yegū tūh niaja Espiritu Santore tiquina ñehheato saha. Sa yegū ahri yūhu yeati wapare wapa ye duaja, nimahye Simo tiquinare.

20-21 Tiquiro sa nigū tūhoro Pedro ohō saha niahye:

—Mūhu niñeru mehna Cohācjū ye tutuayere mūhu dú duari buhiri mūhu niñeru mehnata pecapū wahaya mūhu. Cohācjū mūhu tūhotuyere masine. Mūhu ñagu ijinine. Sa yegū ahrire usā yeyere ye masiedare mūhu. Ahrire yebogū ijierare mūhu. 22-23 Tutuaro ihña coore mūhu. Sa yegū ñañe yeyere ne duhu masiedare mūhu. Sa yegū ahrire mūhu ñañe yerire bujūa witiya mūhu. Cohācjūre mūhu ñañe tūhotuyere bo dutigu siniña mūhu. Mūhu sa yegū ihñano tiquiro mūhu ñañene borota, niahye Pedro tiquirore.

24 Tiquiro sa nigū tūhoro Simo yūhtiahye tiquirore.

—Yūhure sini basaya mūsa Cohācjūre mūhu nidiro saha yūhu wahaeragū. Ti buhiri pecapū waha dueraja yūhu, niahye Simo tiquirore.

25 Came Pedro Ñu mehna Cohācjū yere yahuahye. “Jesu tiquiro masa mūjagū ihñau usā”, ni, Samaria

yehpapū ijiye macari cjēnare quehnoañe buheyere buheahye. Tiquinare Cohācjū yere buhe tuhasa Jerusalēpū tojoaa wahahye.

Felipe Etiopía yehpa cjānore buheahye

26 Sa ye Cohācjū tiquiro yaquiro angel Felipere yahuahye:

—Yojopūre sur pehepū waha. Jerusalē caha ijiri mahapū Gazapū wahari mahapū wahaya, ni yahuahye angel Felipere.

Ti maha masa marienopū ijire.

27 Tiquiro sa nigū tūhoro tiquiro pehe ti mahapū wahahye. Came ti mahapū ihcāquiro masūnore piti caro taro niahye. Tiquiro piti catiquiro ijiahye Etiopía yehpa cjāno pūhtoro. Sa yero Candace wame tiricoro Etiopía cjōno pūhtoro yere, niñerure ijipihtiyere ihña ihboriquiro ijiahye. Sa yero tiquiro Jerusalēpū mari Pacūre ño peoro waha tuhasahye. 28 Tiquiro ya macapū tunuria mehna tojoa taro tiapū wahaeperota buhero niahye. Cohācjū yere yahu māhtariquiro Isaia tiquiro ojoari pūre buhero niahye. 29 Sa yero Espiritu Santo pehe Felipere ohō saha ni yahuahye:

—Siquiro tunuriapū wahariquiro cahapū wahaya, niahye Espiritu Santo tiquirore.

30 Tiquiro sa nigū tūhoro Felipe pehe tunuria cahapū oma cā, Isaia ojoarire Etiopía cjāno buhegū tūhoahye. Sa tūhoro Felipe sinitu-ahye tiquirore:

—¿Mūhu buheyere tūho masi-
jari mūhu? niahye tiquiro.

31 Tiquiro sa nigū tūhoro Etiopía cjāno ohō saha ni yūhtiahye:

—Apequiro yūhure yahu yūhdūoatiquiro mariedagū quehnoano masiedaga yūhu. Ohō yūhure yahu dujigū ahtaya yūhu pari paha, ni yūhtiahye tiquiro Felipere.

—Au, ni, nuju sahye tiquiro caha.

³² Sa ye Cohãcã yere Etiopía cjanore tiqiro buheri pũ ohõ saha niahye:

Ovejare tiquina ñehe wejẽdiro saha tiqiro gãhare ñehe wejẽeta masa. Sa yero ovejagãre tiqiro poarire tiquina segũ tiqiro dihta marieno saha tiqiro masano gãhu dihta marieno ijirota. ³³ Tiquirore tiquina bujũpeeta. Sa ye tiqiro ñano yerapegũta tiquina pehe ñano yeeta tiqirore. Tiquiro ahri yehpapũ ijigũ tiquina tiqirore wejẽeta. Sa yero tiqiro pohna marieniquiro yariaa waharota, ni ojoahye ti pũpare.

³⁴ Ti pũ sa ni yahugũ ihñano, Etiopía cjanõ sinituahye:

—Yahuya yũhare. ¿Ohõ saha Isaia tiqiro nidiquiro noa boro ijijari ahriquirõ? ¿Isaia tiqiro basi yahuro niagari? ¿O apeqirore yahuro niagari? ni, sinituahye Etiopía cjanõ.

³⁵ Tiquiro sa ni sinitugũ tũhoro Felipe pehe ti pũre ihña, Jesu yere yahuahye Etiopía cjanore. ³⁶ Sa ye tiquina tia mehna waha, mágãpu esahye.

—Ihñaña, ohõ mágã ijire. Ahri mágãpu yũhare wame yeya, niahye Etiopía cjanõ.

[³⁷ —Jesure mũhu quehnoano wacũ tutuagũ ihñagũ mũhare wame yeitja, niahye Felipe tiqirore.

—Jesure wacũ tutuaja yũhu. Tiquiro Cristo Cohãcã macũno ijire. Tire quehnoano masiaja yũhu, niahye Etiopía cjanõ.]

³⁸ Sa ninota tunuria ohoturiqirore yũũo dutiahye. Tia yũũ quehe sari bato wijiahye tiquina. Wijia, ti mágãpu esa, ñumudũca sahye tiquina. Topũ ñumudũca sa, Felipe pehe tiqirore wame yeahye. ³⁹ Wame ye tuhasa

tiquina majadũca sagũ Cohãcã yaquiro Espiritu Filipere nea wahahye. Tiquiro sa wahari bato Etiopía cjanõ quehnoano bucuertiquiro tiqiro ya yehpapũ tojoaa wahahye. Tiquiro sa yeri bato tigũ ne pari turi Filipere ihña nemoedahye. ⁴⁰ Sa ye tuhasa Azotopũ esahye Felipe pehe. Sa yero peye macarine quehnoañe buheyere buheahye masare. Cesareapũ buhe bato tiahye.

9

Saulo Jesucristore ihñano tiqirore wacũ tutua dũcahye
(Hch 22.6-16; 26.12-18)

¹ Ti pjere Saulo Jesu yequinare ihña tuhtiriquiro, “Tiquinare wejẽgatja”, nino, tiqiro pahia pũhoro cahapũ wahahye. ² Topũ esaro tiqiro ojoari pũrine siniahye pahia pũhoro. Ohõ saha niahye:

—Damasco cẽ wũhũsepũ judio masa mari buheye wũhũsepũ Jesu yequinare mũmare, numiare boca sagũ, tiquinare ñehe dũhte, Jerusalẽpũ ne cãhtagatja. Ti wũhũsepũ ijieyquinare yũhu ñeheatire papera pũre ohoya, ni siniahye Saulo pahia pũhoro.

³ Ti pũre ne tuhasa, waha, Damasco cahagã tiqiro esagũ waro mũmũanopũ asi sitedoque dijioahye tiqirore. ⁴ Sa asi sitedoque dijioagũta tiqiro yehpapũ bora quehe saro, yahuducugũ tũhoahye:

—¿Saulo, dũhsegũ mũhu yũhare ñano yeajari? nino ca tahye.

⁵ —¿Pũhto, noa boro ijijari mũhu? niahye Saulo pehe.

—Yũhu Jesu, mũhu ñano yenohrigũ ijiaja. [Mũhu yũhu mehna usuagũ yũhare yũhtieragũ, mũhu basita ñano yũhdũre, niahye Jesu Saulore.

⁶ Tiquiro sa nigũ Saulo cue nanare, ohõ saha ni sinituahye:

—¿Pũhto, dahse yũhu yegũ cah-meajari mũhu? niahye Saulo.

Tiquiro sa nigũ ohõ saha niahye Jesu:]

—Wahcãdũcaya mũhu. Si macapũ wahaya. Ti macapũ mũhu esagũ ti maca cjũno mũhu yeatire yahurota mũhare, niahye Jesu Saulore.

⁷ Tiquiro sa nigũ Saulo mehna cjẽna pehe tiquiro yahuducuye dihitare tũhoahye. Jesu pehere ihũedahye. Tiquiro sa wahagũ ihũaũe, cueye, tiquina yahuducu masiedahye. ⁸ Sa yero Saulo yehpapũ cuñariquiro wahcãdũca, tiquiro ihũagũ tiquiro caperi bajuerahye. Sa ye tiquina tiquiro omocare ñehe, Damascopũ tũã cãa wahahye tiquirore. ⁹ Sa yero tiquiro ihtia deco waro ne ihũeda, ihyera, ne sihniedahye.

¹⁰ Sa ye Jesu buheriquiro Anania wame tiriquiro Damascopũ ijiahye. Sa yero Jesu bajuahye Ananiare. Sa bajuaro pisuahye tiquirore:

—¿Anania, ijiajari mũhu? niahye Jesu.

—Ijiaja, ni, yũhtiahye Anania tiquirore.

¹¹ Tiquiro sa nigũ Jesu yahuahye tiquirore:

—Poto wame tiri mahapũ wahaya. Topũ wahagũ Juda ya wũhũpũ Tarso cjũnore Saulo wame tiriquirore macaũa. Tiquiro Cohãcjũre sinino niaga. ¹² Sa yero quehẽno saha tiquiro ihũarire ihũano niaga topũre. Ohõ saha ijiyere ihũano niaga tiquiro: Mũhu omocare tiquiro bui duhu peo, tiquiro caperi quehnoa wahagũ ihũano niaga tiquirore bajarire, niahye Jesu Ananiare.

¹³ Tiquiro sa nigũ tũhoro Anania ohõ saha niahye:

—Pũhto, tiquiro mũhu yequinare quehnoañequinare Jerusalẽ cjẽnare ñano yeñohti. Peyequina masa yũhare sa ni yahuri. ¹⁴ Sa yero

ohõre tiquiro ijipihtiequina mũhare cahmeñequinare peresu yero taro niñohti. Pahia pũhtoa tiquirore sa ye dutiñohti, niahye Anania Jesure.

¹⁵ Tiquiro sa nigũ Jesu pehe yahuahye tiquirore:

—Tiquiro Saulo pehe yũhu beseriquiro ijire. Tiquiro yee buheyere peye macari cjẽnare, Israe masa ijieyequinare, tiquina pũhtoare, Israe masa gũhare buherota. Sa yegũ wahaya mũhu.

¹⁶ Sa yero peye tahari yeere tiquiro yeri buhiri tiquiro ñano yũhdũrota. Tire tiquirore masigũ yegũtja, niahye Jesu Ananiare.

¹⁷ Tiquiro sa nidi bato Anania pehe waha, esa, Saulo tiquiro ijiri wũhũpũ sajãhye. Sajã sa, tiquiro omocare Saulo bui duhu peo, yahuahye tiquirore.

—Yũhu acayũ Saulo, mari pũhtoro Jesu pehe mahapũ mũhare bajuariquiro yũhare ohori, mũhu caperire ihũa dutiro, Espĩritu Santore mũhare cwo dutiro, tiquiro dutiro sahata mũhare ye dutiro, ni yahuahye Anania Saulore.

¹⁸ Tiquiro sa nigũta tiquiro caperire wahi nũtũri saha bajuyere tiquiro caperire pahna dijiagũ ihũahye Saulo. Tiquiro sa ihũa tuhasari bato wahcãdũca sagũ apequiro pehe wame yeahye tiquirore. ¹⁹ Sa yero tiquiro ihyari bato pagũ tutuariquiro wahahye.

Saulo Damascopũ Jesu yere buhe dũcahye

Sa ye meheñe decorigã Damasco cjẽna Jesu yequina mehna ijiahye Saulo.

²⁰ Sa yero ti pjereta tiquiro judio masa buheye wũhũsepũ Jesu yere buheahye masare. Jesu Cohãcjũ macũno tiquiro ijiyere yahuahye Saulo. ²¹ Tiquiro sa yahugũ ihũaũe ijipihtiequina tiquirore tũhoyequina acũaa wahahye.

—Ahriquiroy Cohācjū yequinare Jesure cahmeñequinare ñano yee tiriquiroy ijire. Sa yero tiquiroy tiquinare ñehe, duhte, pahia pūhtoare oho duari jimedi. Sa ye duaro ohōpūre ahtari jimedi tiquiroy, niahye masa tiquiroyre tūhoyequina.

²² Tiquina sa ni tūhotuepegāta Saulo cuero marieno tutuaro mehna buhe dūcahye. Judio masare Damasco cjēnare quehnoano yahuahye. “Ahriquiroy Jesu potota Cristo marine yūhdūoriquiroy ijire”, tiquiroy ni yahugū tiquina pehe tiquiroyre “Ni mehono nine ahriquiroy”, ni masiedahye tiquiroyre.

²³ Sa ye peye decori bato judio masa tiquiroyre wejē duaye, tiquina basi yahuducuahye. ²⁴ Sa yero Saulo tiquina wejē duagū masiahye tiquiroy basi. Sa ye ti maca cjē sopecaharire decopūre, ñamipū gūhūre cohtee tiahye tiquiroyre wejē duaye. ²⁵ Tiquina sa wejē duagū ihñañe ñamipū Saulo buheyequina tiquiroyre pūhūro pajiri pūhūdupū ne sāa, ti maca cjā sahrīno behero pehepū duhu dijioahye tiquiroyre.

Saulo Jerusalēpū ijiahye

²⁶ Sa ye Saulo Jerusalēpū esaro, topū Jesu yequina mehna tiquiroy iji duamahye. Tiquiroy sa iji duepegāta tiquina tiquiroyre “Jesu buheriquiroy ijierare ahriquiroy”, niñe, tiquiroyre cue niahye.

²⁷ Tiquina sa cuepegāta Bernabé pehe tiquiroyre ne cāhye Jesu cūriquina cahapū. Sa yero Saulo mahapū Jesure tiquiroy ihñarire, Jesu mehna tiquiroy yahuducurire, Damascopū cuero marieno Jesu yere tiquiroy buhe dūcarire yahuahye Bernabé pehe.

²⁸ Tiquiroy sa ni yahuri bato Saulo tiquina mehna sajāno, Jerusalēpū tiquina mehna ijie tiahye. ²⁹ Sa yero tiquiroy cuero marieno Jesu

yere buhee tiahye. Sa yero tiquiroy judio masare Jesu yere yahu yūhdūdūcaro niahye. Tiquina judio masa griego masa yere yahuducuyequina ijiahye. Sa ye Saulo tiquiroy sa yahu yūhdūdūcari buhiri tiquina tiquiroyre wejē duamahye. ³⁰ Tiquina sa wejē duagū ihñañe, Saulo mehna cjēna Jesu yequina pehe tiquiroyre Cesarepū ne duhti cāa wahahye. Topū tiquiroyre siho ijiducume Tarsopū ohoahye tiquiroyre.

³¹ Sa ye ijipihtiropū, Judea yehpapū, Galilea yehpapū, Samaria yehpapū Cohācjū yequina quehnoano ijie tiahye. Ti pjere ne masa ñano yera tiahye tiquinare. Sa ye quehnoano buheahye tiquina. Sa ye tiquina Cohācjūre cua pesaro ihñahye. Espiritu Santo tiquinare tiquiroy yedohogū tiquina pehe masa peyequina wahahye.

Pedro Eneare quehnoa wahagū yeahye

³² Sa ye Pedro ijipihtiye macaripū waharo, Jesu yequina Lida maca cjēna cahapū gūhūre esahye tiquiroy. ³³ Topū esaro Enea wame tiriquiroyre boca sahye. Enea tini masieniquiroy ijiro, ocho cūhmari waro cuñari cahsero mehna cuñae tiahye tiquiroy. ³⁴ Sa yero Pedro pehe tiquiroyre ohō saha niahye:

—Enea, Jesucristo mūhūre quehnoa wahagū yere. Wahcādūcaya. Mūhū eō tū cuñari cahserore quehnoña, niahye Pedro tiquiroyre.

Tiquiroy sa nigūta tiquiroy wahcādūca wahaahye. ³⁵ Sa ye ijipihtiyequina Lida cjēna, Saronā cjēna tiquiroyre ihñañe, tiquina ñañe yerire duhu, Jesure wacū tutuahye.

Dorca wame tiricorore masoahye Pedro Jesu tutuaye mehna

³⁶ Sa ye Jope wame tiri macapū Jesure ño peoricoro Tabita wame tiricoro ijiahye. Ticoro wame

Tabita griego ye yahuducuye mehna Dorca ijire. Ticoro quehnoañene yero, peye ohoetiahye pejecnoyequinare.³⁷ Sa yero ti pjere ticoro dohati wahcō, yariaa wahahye. Ticoro yariagū ihñañe, tiquina ticorore quehnoano cose, ummano cãã tucũpũ cũahye ticorore.³⁸ Lida wame tiri maca Jope cahagãpũ ijiri. Sa ye Jesu buheyequina Jope cããna Pedro Lidapũ tiquiro ijigũ tahoahye. Sa tahoey, pũaro ohoahye Pedro cahapũ. Tiquiro cahapũ esaye, Pedroro yahuahye tiquina.

—Sojaro mehna usã ijiropũ wahaya, ni yahuahye tiquina.

³⁹ Tiquina sa nigũ tãhoro tiquina mehna wahaa wahahye tiquiro. Topũ tiquirore tiquina ne sari bato ummano cãã tucũpũ ne majaa wahahye tiquirore. Sa ye ijipihtiyequina wape wiha numia tiquiro cahapũ esadũca, utiahye. Tabita tiquina mehna ijininopũ peye suhtire yee tiahye. Sa ye tiquina ticoro yeri suhti ijiire ihñaohye Pedroro.⁴⁰ Tiquina sa ihñoepẽgãta Pedro tiquinare ti tucũpũ ijiyequinare wijia dutiahye. Tiquina wijiri bato tiquiro dũsepe curi mehna quehe sa, Cohãcjãre ticorore sini basahye. Sa yero ticoro pagũre majare ihñaahye.

—Tabita wahcãña, niahye tiquiro.

Tiquiro sa nigãta ticoro pehe ihña wahcō, Pedroro ihña, wahcã nuju sahye.⁴¹ Ticoro wahcã nuju sagũ ihña, tiquiro ticoro omocare ñehe, tãã wahcō docoahye ticorore. Sa yero tiquiro to cããnare Jesu yequinare, wape wiha numiare pijio, ticorore catiricorore wiahye tiquinare.⁴² Tiquiro sa yeri bato ijipihtiyequina Jope cããna tire masiñe peyequina masa Jesure wacũ tutua dũcahye.⁴³ Came Jopepũ Simo wahiquina cahserire

quehnoriquiro mehna peye decori Pedro tiquiro mehna ijiahye.

10

Pedro Corneliore Jesu yere yahu dũcahye

¹ Ti pjere Cesareapũ Cornelio wame tiquiro ijiahye. Tiquiro cien surara puhtoro ijiahye. Tiquina surara pehe tiquina ya curua Italiano wame tiahye.

² Cornelio tiquiro ya wũhũ cããna mehna mari Pacũre ño peoyequina, cua pesaro ihñañequina ijie tiahye. Sa yero tiquiro judio masa pejecnoyequinare yedohoro, peye ohoahye. Sa yero decoripe tiquiro mari Pacũre sinie tiahye.

³ Sa ye ñamicahapũ tres hora ijigũ Cohãcjũ yaquiro angel tiquirore bajuahye. Sa bajuaro Cornelio cahapũ sajãhye.

—Cornelio, niahye angel tiquirore.

⁴ Sa yero Cornelio tiquirore ihña cuero ohõ saha niahye:

—¿Puhto, yabere cahmeajari? niahye tiquiro.

—Pejecnoyequinare mũhũ ohorire, mari Pacũre mũhũ sinidire tiquiro wacũno niaga.⁵ Sa yegũ Jopepũ mũhũ cahacãenare ohoya. Topũ Simo Pedro wame tiquiro ijire. Tiquirore ne cãhta dutiya mũhũ cahacãenare.⁶ Tiquiro apequiro Simo wahiquina cahseri quehnoriquiro cahapũ, pajiri ma dũhtũ cahapũ ijiri wãhũpũ ijire, niahye angel Corneliore.

⁷ Angel sa ni tuhasa, wijiaa wahahye. Tiquiro sa wijiri bato Cornelio pũaro tiquirore yedohoyequinare ihcãquiro surara mehna cããnore pijiahye. Surara pehe mari Pacũre ño peoriquiro ijiro, decoripe Corneliore yedohoe tiahye.⁸ Sa yero Cornelio tiquinare yahu peho, Jopepũ ohoahye tiquinare.

⁹ Sa ye ape deco Jopep_u tiquina wahari watoa coheri pje ijigū Pedro pehe w_uh_u buip_u Cohācjāre sinino wahahye. ¹⁰ Sa yero tiquiro _uja ahabagū ihya duahye. Sa ihya duaro apequina tiquiro ihyayere tiquina dahreri watoa tiquiro pehe bajuagū ihñahye. ¹¹ _uhm_uanop_u parī maagū, pajiri cahsero ti cahsero sohtorip_u dahteri cahsero dijia tagū ihñahye. ¹² Ti cahsero puhiap_u peyequina wahiquina n_uc_u cjēna, yehpap_u b_ua tiniñequina, minicj_ua pari ijiahye. ¹³ Tire tiquiro ihñari bato, Pedro yahuducugū tahoahye.

—Pedro, wahcād_ucaya. Ahriquinare wejē ihyaya, ni yahuducugū tahoahye tiquiro.

¹⁴ Tiquiro sa niepegāta Pedro ohō saha niahye:

—P_uhto, ne tiquinare ihyeraja y_uh_u. Ñañequinare, Cohācjū tiquiro ihya dutierariquinare ne ihyera tii y_uh_u, niahye Pedro.

¹⁵ Sa yero Pedro pari turi yahuducugū tahoahye:

—Cohācjū “Quehnoañequina ijire”, tiquiro nidiquinare “Ñañequina ijire”, niedacāhña m_uh_u tiquinare, ni yahuducugū tahoahye Pedro.

¹⁶ Sa ye ihtia taha tiquina sa ni yahuducuri bato ti cahsero _uhm_uanop_u m_ujaa wahahye tja.

¹⁷ Sa yero Pedro tutuaro wacū “¿D_uhse ni yahu duaro nijari sa bajuaro?” ni t_uhotuahye tiquiro basi.

Tiquiro sa t_uhoturi watoa Cornelio ohoriquina pehe Pedro ijiri w_uh_up_u esahye. “¿Simo ya w_uh_u nohop_u ijiajari?” ni, tiquina sinituri bato ti w_uh_up_u esahye tiquina. ¹⁸ Sa ye tiquina sinitu madoqueoahye. “¿Simo Pedro wame tiriquire ahri w_uh_ure ijiajari?” ni sinituahye tiquina.

¹⁹ Sa yero Pedro tiquiro t_uhoturi watoa Espiritu Santo tiquire w_uh_ure yahuahye:

—Ihñaña. Ihtiaro _um_ua m_uh_ure macañe nine. ²⁰ Wahcād_ucaya. Dijiahya. Tiquina mehna wahaya. Yabiro marieno wahaya quehnoano mehna. Y_uh_u pehe tiquinare ohōp_ure ahtagū yei, niahye Espiritu Santo Pedrore.

²¹ Tiquiro sa nigū t_uhoro Pedro tiquina cahap_u dijiaa wahahye.

—Ihñaña. Ohōp_u ijiaja y_uh_u m_usa maca cāhtarig_u. ¿D_uhse yena tana nijari m_usa y_uh_u cahap_ure? niahye Pedro tiquinare.

²² Tiquiro sa nigūta tiquina pehe ohō saha niahye:

—Cornelio cien surara p_uhtoro, quehnoañene yeriquire, mari Pac_ure cua pesaro ihñariquire, ijipihtiyequina judio masa “Quehnoariquire”, tiquina nidiquiro m_uh_ure piji dutiro ohori _usāre. Cohācjū quehnoariquire yaquire angel Corneliore m_uh_ure piji dutiñohti. Ohō saha niñohti: “Pedrore m_uh_u ya w_uh_up_u ne cāhta dutiya m_uh_u cahacjēnare. Sa ye tiquiro m_uh_ure yahurota”, ni piji dutiñohti angel Corneliore, ni yahuahye Cornelio Pedrore tiquiro piji dutiriquina pehe.

²³ Tiquina sa nigū Pedro pehe tiquinare sajā ta duti, ihyaye oho, tiquiro ijiri w_uh_up_u carī dutiahye tiquinare. Sa yero ape deco Pedro wahcā, tiquina mehna wahaa wahahye. Sa ye apequina Cristo yequina Jope cjēna Pedrore piti ti cāhye.

²⁴ Ape deco tiquina Cesareap_u esahye. Sa yero Cornelio pehe tiquiro acayere, tiquiro mehna cjēna g_uh_ure piji cahmecoa, Pedrore cohteahye. ²⁵ Sa yero Pedro Cornelio ya w_uh_u cahap_u tiquiro ahtagū ihñano Cornelio pehe tiquire piti ca wijia, tiquiro dahpocāri cahap_u quehe sahye.

²⁶ Sa yepegūta Pedro tiquire ne wahcō doco ohō saha niahye:

—Ducuya m_uh_u. Y_uh_u g_uh_u m_uh_u yero saha ijig_u ijiaja.

Cohācjū ijieraja yuhū, niahye Pedro tiqirore.

²⁷ Tiquiro sa ni tuhasari bato Cornelio tiqirore ne sajāa wahahye tiqiro ya wuhupū. Topū sajā saro masa pari ti wuhupū cahmecoā, tiqirore cohteyequinare ihñahye Pedro. ²⁸ Sa yero Pedro tiquinare yahuahye:

—Judio masū ijiepegūta ape curua cjēna mehna ijigū usā dutiyere yuhduducagū niaja yuhū. Tire quehnoano masine mūsa. Sa ijiepegūta ape curua cjēnare “Ñañequina ijire”, yuhure ni dutierari Cohācjū. Sa ni yahuri yuhure tiqiro. ²⁹ Tiquiro sa nigū tuhogū ohōpūre mūsa cahapūre ahtau. Mūsa yuhure pijiogū “Ne wahaeraja”, niedū yuhū. “¿Duhse ijiro boro yuhū ohōpū ahtagū cahmeari mūsa?” niahye tiquinare Pedro.

³⁰ Tiquiro sa nigū tuhoro Cornelio pehe ohō saha niahye:

—Tres hora ijigū waro mari Pacū yaquiro angel yuhure bajuari. Pititia deco wahare yuhure tiqiro bajuari bato. Ti decota mari Pacūre yuhū sinini watoa angel asi siteri suhtiro sañariquiro yuhū cahapū ducuri. ³¹ Sa yero tiqiro yuhure ohō saha nidi: “Cornelio, mūhū mari Pacūre mūhū sinigū tiqiro tuhori. Sa yero pejecūoyequinare tiquina cahmeñene mūhū ohogū ihñano mari Pacū wacūno mūhure yedohorota. ³² Sa yegū Jopepū mūhū cahacjēnare ohoya, Simore, Pedro wame tiriqirore mūhū cahapū tiquina ne cāhtagū. Tiquiro apequiro Simo wahiquina cahseri quehnoriquiro ya wuhupū pajiri ma dūhtū cahapū ijiri wuhupū ijire tiqiro”, ni yahuri yuhure tiqiro. ³³ Tiquiro sa nigū tuhogū yuhū cahacjēnare mūhure ne cāhta dutigū ohou yuhū. Sa yegū quehnoano yegū ahtari jiri mūhū usā cahapūre. Sa yena usā ijipihtina ohōre mari Pacū tiqiro ihñonopū ijina niaja

usā. Ijipihtiyere mari Pacū mūhure tiqiro yahu dutirire tuhō duana, cohteī usā, niahye Cornelio Pedröre.

Pedro Jesu yere yahuahye

³⁴ Tiquiro sa nigū tuhoro, Pedro ohō saha ni yahuahye:

—Yojopū masiaja. Ijirota ijire. Cohācjū ihcāno saha quehnoano yere marine. ³⁵ Sa yero ijipihtiyē macari cjēna Cohācjūre cua pesaro tiquina ihñagū, quehnoañene tiquina yegū Cohācjū pehe tiquina mehna bucuere. ³⁶ Cohācjū usā judio masa cahapū Jesucristore ohori. Masare Cohācjū mehna quehnoano iji dutiro Jesu pehe quehnoañe buheyere yahuri. Ti buheyere mūsa masine. Jesucristo pehe ijipihtiyequina masa pūtoro ijire. ³⁷ Ņu wame yeriquiro ohō saha ni yahuri: “Mūsa ñañene bujūa witiya. Sa yena wame yenohrina ijiya”, ni, yahuri Ņu. Masare tiqiro sa ni yahuri bato Galileapū quehnoañe buheyere Jesu pehe yahu dūcari. Came Judea yehpapū ti buheyere yahu pehori. ³⁸ Ahriquiro Jesu Nazare cjānore Cohācjū pehe tiqiro tutuayere, Espiritu Santo mehna tiqiro ye masiatire ohori Jesure. Sa yero Jesu quehnoano yero wahari. Sa waharo watūare cūoyequinare ñano yuhdūyequinare ijipihtiyequinare quehnoa wahagū yeri. Mari Pacū Jesu mehna ijiri. ³⁹ Judea yehpapū, Jerusalēpū gūhure ijipihtiyē tiqiro yerire usā ihñau. Came tiquina curusapū wejēdi tiqirore. ⁴⁰ Sa yero ihtia deco wahaboro Cohācjū tiqirore masori jiri. Sa yero Jesure apequinare bajuagū yeri jiri mari Pacū. ⁴¹ Ti pjere Jesure ijipihtiyequina ihñedari. Meheñequinagāre bajuari tiqiro. Mari Pacū tiqiro cahmenare, Jesure ihñatinare panopū usāre mari Pacū beseahye. Usā pehe Jesu tiqiro masari bato tiqiro

mehna ihya, sihnii. ⁴² Sa yero usāre tiqiro dutiri. “Masare yahuya. Yuh̄u Jesu ijipihitiyequina catiyequinare, yariariquina gūhare buhiri dahreacj̄u yuh̄ure ijigū yeri mari Pacu. Sa yena tire masare yahuya”, ni dutiri Jesu usāre. ⁴³ Ijipihitiyequina Jesure tiquina wacū tutuagū ihñano Cohācj̄u tiquina ñañene borota. Tire ijipihitiyequina Cohācj̄u yere yahu m̄h̄tariquina panop̄u cj̄ēna yahuyuahye, ni yahuahye Pedro.

Judio masa ijieyequina Espiritu Santore c̄uo d̄ucahye

⁴⁴ Ti ijipihitiyere tiqiro sa ni yahuri watoap̄u, ijipihitiyequina tire t̄hoyequina mehna Espiritu Santo iji d̄ucahye. ⁴⁵⁻⁴⁶ Sa ye judio masa ijieyequina t̄homehneñe yahuducuye mehna bucueye mehna yahuducu d̄ucahye. Ti yahuducuye mehna Cohācj̄are “Tutuagū, quehnoagū ijire”, niñe niahye. Tiquina sa nigū t̄hoahye Pedro acaye judio masa Jesu yequina. Sa ye Espiritu Santo judio masa ijieyequina mehna tiqiro iji d̄ucagū ihñañe judio masa pehe ihña maria wahahye. Sa yero Pedro ohō saha ni yahuahye judio masare:

⁴⁷ —Mari yero sahata Espiritu Santore c̄uore ahriquina gūhu. ¿Tiquina sa ijigū ihñana ahriquinare wame yeraboagari mari? niahye Pedro tiquinare.

⁴⁸ Sa ni tuhasa Jesu wame mehna judio masa ijieyequinare wame ye dutiahye Pedro. Tiquina sa yeri bato “Usā mehna meheñe decorigā tojoariña”, niahye tiquina Pedro gūhare.

11

Pedro Jerusalē cj̄ēnare Jesu yequinare yahuahye

¹ Sa ye judio masa ijieyequina gūhu Cohācj̄u yere tiquina quehnoano cahmegū Jesu cūriquina

pehe tiquina acaye Judeap̄u ijieyequina mehna t̄hooahye. ² Sa ye Pedro Jerusalēp̄u tiqiro tojoa sagū ihñañe judio masa Jesu yequina meheñequinagā tiqirore ohō saha niahye:

³ —¿Judio masa ijieyequinare d̄ahse ijiro boro ihñagū esari m̄h̄u? ¿D̄ahse ijiro boro tiquina mehna ihyari m̄h̄u? ni, tuhtiahye Pedore tiquina.

⁴ Tiquina sa nigū t̄horo Pedro tiqiro yerire yahu peho c̄ahye tiquinare. ⁵ Ohō saha ni yahuahye:

—Yuh̄u Jop̄ep̄u ijigū Cohācj̄are sinigū nii. Sa yero yuh̄ure ohō saha bajuari. Pajiri cahsero ti cahsero sohtorip̄u d̄ahteri cahsero uhm̄uanop̄u yuh̄u cahap̄u dijia tagū ihñau. ⁶ Sa yegū ti cahserore quehnoano ihñau, “¿Yabe boro ti cahserop̄ure ijjajari?” nigū. Sa yegū ihñau ti cahserop̄ure ijieyequinare: Wahiquinare n̄ucu cj̄ēnare, yehpap̄u bua tiniñequinare, minicj̄ua parire ihñau. ⁷ Sa yegū yuh̄ure tiqiro yahuducuyere t̄hou. “Pedro, wahcād̄ucaya. Wejē ihyaya ahriquinare”, nino ca tari yuh̄ure. ⁸ Tiquiro sa nigū t̄hogū ohō saha nii yuh̄u. “P̄uhto, ne tiquinare ihyeraja yuh̄u. Ñañequinare, Cohācj̄u tiqiro ihya dutieyequinare ne ihyera tii yuh̄u”, nii yuh̄u. ⁹ Yuh̄u sa niepegūta uhm̄uanop̄u pari turi yuh̄ure yahuducuro ca tari t̄ja. “Cohācj̄u ‘Quehnoañequina ijire’, tiqiro nidiquinare ‘Ñañequina ijire’, niedacāhña m̄h̄u”, nino ca tari yuh̄ure. ¹⁰ Sa yero ihtia taha usā sa ni yahuducuri bato ti cahsero uhm̄uanop̄u m̄j̄aa wahari t̄ja. ¹¹ Yuh̄u sa ihñari watoa ihtiaro am̄ua usā ijiri wuh̄up̄u esari jiri. Tiquina Cesarea cj̄āno ohoriquina ijiri. ¹² Sa yero Espiritu Santo pehe yuh̄ure tiquina mehna waha dutiro “‘Tiquina ñañequina ijire’, niedacāhña tiquinare”, ni yahuri

yuhare tiquiro. Sa ye ahriquina seis yuhu acaye mehna Cesarea cjano ya wuhuru sajau usa. ¹³ Sa yero tiquiro usare ohō saha ni yahuri. “Angel yuhu wuhuru ducugū ihñau yuhu. Ohō saha ni yahuri yuhare: ‘Joperu Simore Pedro wame tiriquire ne cāhta dutiya. ¹⁴ Tiquiro mahare mahu acaye mehna musare ijiphtinare pecaru wahaborinare musa yuhduatire yahurota’, nidi angel yuhare”, ni, yahuri Cesarea cjano yuhare. ¹⁵ Sa ye yuhu yahuducuri watoa Espiritu Santo pehe tiquina mehna iji ducari, marine tiquiro ye mhtariro sahata. ¹⁶ Sa yegu Jesu tiquiro yahurire wacū yuhu. Ohō saha ni yahuri tiquiro: “Ñu musare wame yero aco mehna wame yemedi. Yuhu pehe tiquiro yuhduoro yeitja musare. Came Espiritu Santore musa mehna ijiducugū yeitja”, ni yahuri. ¹⁷ Sa yero Jesucristo mari puhtoro mari wacū tutuagū ihñano Cohācjū yaquiro Espiritu Santore ohori marine. Sa yero Cohācjū marine Espiritu Santore tiquiro ohoriro sahata judio masa ijieyequina gūhare tiquiro ohori. Cohācjū tiquiro sa yegū ihñagu tiquirore yuhduaca masiedaja yuhu, niahye Pedro tiquinare, judio masare Jesu yequinare.

¹⁸ Tiquiro sa nigū tūhoye, tiquina tiquirore ne ni nemoedahye. Tiquirore tuhti masiedahye. Sa ye tiquina,

—Cohācjū quehnoariquiro, tutu-ariquiro ijire, niahye.

Ohō saha ni nemoahye:

—Judio masa ijieyequina gūhu tiquina ñañene buña witiyequina ijieye, Cohācjū yequina ijietā. Sa tiquiro yequina ijieye, tiquina gūhu ijiphtieye decori tiquiro mehna ijietā, ni nemoahye tiquina.

Antioquíaru apequina Jesu yequina ijiahye

¹⁹ Sa ye Estebāre tiquina wejēdi bato masa Jesu yequinare ñano yeahye. Tiquina sa yegū ihñañe Jesu yequina duhti sitea wahahye. Sa ye tiquina Feniciaru, Chiprepu, Antioquíaru waha, judio masa dihitare Cohācjū yere yahue timahye tiquina. ²⁰ Tiquina sa yepegāta apequina pehe Jesu yequina mehna cjēna Chipre cjēna, Cirene cjēna, Antioquíaru esa, judio masa ijieyequinare Jesu yere buheahye Cohācjū tiquinare tiquiro yuhduatire. ²¹ Sa yero mari puhtoro tiquinare yedo-hoahye. Sa ye masa peyequina Jesure wacū tutuaye, quehnoañe pehere comesahye.

²² Sa ye “Antioquía cjēnaru Jesure cahmeaga”, ni tūhoohye Jerusalē cjēna Jesu yequina. Tiquina sa tūhoori bato Jerusalē cjēna Bernabé wame tiriquire Antioquíaru ohoahye. ²³ Sa yero tiquiro Antioquíaru esaro, Cohācjū yedohoye mehna judio masa ijieyequina tiquiro yequina tiquina wahagū ihñano, tutuaro bucueahye. Sa yero tiquiro to cjēnare ohō saha ni yahuahye:

—Jesure sa wacū tutuaducuya. Tiquiro yere ne duhuercāhña, ni yahuahye tiquiro ijiphtieyequina tiquinare.

²⁴ Bernabé quehnoariquiro ijiro, Espiritu Santore pajiro cuoriquiro ijiro, tiquiro dutiriro sahata yeriquiro ijiro, Jesure quehnoano wacū tutuahye tiquiro. Sa ye tiquiro buheri bato masa peyequina wacū tutuahye Jesure.

²⁵ Came tiquiro Tarso wame tiri macaru Saulore macano wahahye. ²⁶ Topu tiquirore boca sahye. Tiquiro boca sari bato Antioquíaru ne cāhye Saulore. Topu tiquina esari bato ihcā cūhma waro tiquina Cohācjū yequina mehna cahmeoca, peyequina masare buhee tiahye tiquina. Sa

ye Antioquíap̄a Cristo yequina Cristiano wame ti ducahye.

²⁷ Ti pjere Cohācjū yere yahu māhtariquina Jerusalēp̄a ijiriquina waha, Antioquíap̄a esahye. ²⁸ Sa yero tiquina mehna cjāno Agabo wame tiriquireo Jesu yequina watoap̄a ducuro, Espiritu Santo tutuaye mehna yahuahye tiquinare. “Ijipihitiri yehpap̄are tutuaro aj̄na waharota”, ni yahuahye tiquireo. Ti pjere ihyaye mariedi pje ijigū ijipihitiyequina p̄ah̄toro Claudio ijiahye. ²⁹ Sa ye Cristo buheyequina, ijipihitiyequina tiquina curoo puno tiquina acayere oho duaye, tiquina basi cahme yahuducuahye. “Judea yehpa cjēna Jesu yequinare niñerure ohouhna”, niahye tiquina basi. ³⁰ Tiquina sa nidi bato Bernabé, Saulo mehna ti niñerure ne cā basahye. Top̄a esaye Judea yehpa cjēnare Jesu yequina p̄ah̄toare wiahye ti niñerure.

12

Pedrore peresu yeahye

¹ Ti pjere p̄ah̄toro Herode ihquēquinare Jesu yequinare ñano ye ducacae tiahye. ² Sa yero tiquireo Ñu wahminore Santiago pehere ñoseni pj̄i mehna tiquireo wejē dutigū apequina pehe tiquireore wejēahye. ³ Santiagore tiquireo wejēgū judio masa bucueahye. Tiquina bucueyere Herode masino, “Sa dihita cahmene tiquina”, nino Pedro gūhare peresu yeahye. Ti decorire pugū yeye moremehneñe p̄are tiquina ihyati bose deco pascua ijiahye.

⁴ Sa ye Herode ñehe dutiriquina Pedrore ñehe, peresu yeahye. Sa yero diez y seis surarare cohte dutiahye tiquireore. Pititiaro surara cohteahye tiquireore. Came pititiaro tiquina comesayequina tiquireore cohte mājae tiahye. Sata yeahye tiquina diez y seis surara.

Herode pehe pascua bato Pedrore peresup̄a ijiriquirore masa ihñonop̄a duhu doco duamahye tiquireore wejē dutiro taro. ⁵ Sa yero Pedro peresup̄a ijiahye. Top̄a tiquireo ijigū Jesu yequina pehe Cohācjūre tutuaro sini basae tiahye tiquireore.

Peresup̄a ijiriquirore Pedrore Cohācjū wioahye

⁶ Sa ye ñamine Pedro come dari p̄a da mehna tiquina d̄ah̄teriquiro p̄aro surara watoap̄a carīno niahye. Sa ye surara sopecahap̄a cohteducue tiahye tiquireore. Sa yero ti deco bohrearo Herode Pedrore judio masa ihñonop̄a duhu doco duamahye tiquireore wejē dutiro taro. ⁷ Sa yero Cohācjū yaquireo angel pehe Pedro cahap̄a tiquireo ducugū peresup̄a tiquireo ijiri tucū buhrio pihitia wahahye. Sa yero angel Pedro cahap̄a ducuro Pedro pati pahmap̄a ohbe careahye.

—Sojaro mehna wahcāña, niahye tiquireo Pedrore.

Tiquireo sa nigūta tiquireo omocarine tiquina d̄ah̄teri dari come dari suru site dijiaa wahahye. ⁸ Sa yero angel tiquireore yahuahye:

—Weje dihoya māh̄a weje dihori dare. M̄h̄a dahpo suhti gūhare sañaña, niahye tiquireo.

Tiquireo sa nigū Pedro pehe tiquireo nidiro saha yeahye.

—M̄h̄a bui cjā suhtirore sañaña. Ȳh̄a mehna wahaya, niahye angel.

⁹ Tiquireo sa nigū ti tucūp̄a ijiriquiro wijia, angel bato wahaa wahahye tiquireo. Sa wahaeperota ohō saha ni t̄ah̄otumahye tiquireo. “¿Ahri poto ijieragari? ¿Quehēgū niagari ȳh̄a?” ni, t̄ah̄otumahye tiquireo. ¹⁰ Sa ye tiquina tiquireo ijiri tucū sopecahap̄a ducuyequina surarare ȳh̄du cā, apequina yoa cjūno ducuyequina gūhare ȳh̄du cā, pajiri sopecahap̄a esahye.

Ti sope pahma macap̄u wahari mahare cahmotari pahma ijiahye. Ti sope pahma esa tuhoro parīgū tiquina wijiaa wahahye. Wijiaa waha, tiquina mahap̄u wahaa wahahye. Mehenogā tiquina waha nemogū angel pehe wahaa wahahye. Sa yero Pedro ihcāquirola tojoahye. ¹¹ Sa tiquireore angel tiquireo wahari bato tiquireo yerire Pedro masiahye. Ohō saha ni tūhotuahye tiquireo. “Angel Cohācjū ohoriquiro peresup̄u yūhū ijigū yūhūre wioro wihiri. Yojoṗu tire masiaja tiquireo sa yerire. Judio masa pehe yūhūre tiquina ye duarire Cohācjū pehe tiquinare ye dutierari. Sa yero yūhūre, Herode tiquireo peresu yerigūre wiori”, ni, tūhotuahye Pedro.

¹² Tiquireo sa ni tūhoturi bato María Ńu pacoro ya wūhūp̄u esahye Pedro. Ńu pehe Marco wame tiriquireo ijiri. Ti wūhūp̄u masa peyequina cahmecoa, Cohācjūre siniñe niahye. ¹³ Sa yero Pedro sope pahmare doteahye. Rode wame tiricoro cahacjōno tiquireo doteḡū tūhoro ihñano esahye ticoro. ¹⁴ Sa yero Pedro ticorore tiquireo pisugū tūhoro tiquireo yahuducuyere tūho masi, tutuaro bucie, sopecahare pōoedahye. Sa bucuemeno tiquireore pōoboricoro boaa wahahye. Pedro top̄u tiquireo ducugūta ticoro majaredūca oma sajāa wahahye.

—Pedro sopecahap̄u wihiri, ni, yahuro sajāhye.

¹⁵ Sa ye tiquina wūhūp̄u ijiye-quina ticoro sa nigū tūhoye,

—Sa nicōo niaga mūhū. Sa ni macacōo nine mūhū, niahye tiquina ticorore.

—Poto tjire. Poto nigota niaja, niahye ticoro.

Ticoro sa nigū tūhoye,

—Tiquireo ijieraga. Tiquireo jeripohna wihiro niaga, niahye tiquina pehe.

¹⁶ Tiquina sa nini watoa Pedro sope pahmare sata doteducuro niahye. Tiquireo sa yegū tūhoye, tiquina sopecahare pōo, tiquireore ihña, ihña maria wahahye. ¹⁷ Sa yero Pedro tiquireo omoca mehna “Dihta mariahña”, nino, Cohācjū peresup̄u tiquireore wiorire yahuahye tiquinare.

—Ahrire yahuya Santiagore, apequina Jesu yequina ḡūhūre, niahye tiquireo.

Sa ni yahu tuhassa tiquireo ape sie pahrēp̄u yūhū cāa wahahye. ¹⁸ Sa ye bohrea quehagū surara Pedro tiquireo dahse ye wijiarire ne masiedahye. Sa masiedaye acūaa wahahye. ¹⁹ Sa yero Herode Pedroro maca dutimahye. Sa yero tiquireo surarare peresu cohteriquinare tiquireo sinituri bato tiquinare wejē dutiahye Herode pehe. Sa yero Herode Judeap̄u ijiriquireo waha, Cesareap̄u ijiro wahahye.

Herode yariaa wahahye

²⁰ Sa yero Tiro wame tiri maca cjēna mehna, Sidō cjēna mehna Herode pehe usuahye. Tiquireo sa usuagū ihñañe ti macari cjēna pehe Herode tiquina mehna tiquireo usuarire quehnoñe waha, tiquireo mehna yahuducuyere wahahye. Sa ye tiquireo cahacjānore Blasto wame tiriquireore piti tiahye tiquina. Sa ye tiquina Blasto yedohoro mehna Herode cahap̄u esahye. Tiquireo cahap̄u esa, ohō saha niahye:

—Mari quehnoano ijiihna. Mari basi ihña tuhtieracāhna, ni sini-ahye tiquina Herodere.

Tiquina ya yehpa cjēna Herode ya yehpap̄u ihyayere bocaē tiahye. Sa ye Herode tiquinare ihña tuhtigū cahmedahye tiquina.

²¹ Sa yero Herode tiquireo queori decop̄u, pūhtoro tiquireo sañañe suhti quehnoañe suhtire sañañe tiquireo. Sa yero tiquireo

dujiropu dujitjiāno, masare yahuducu ihñoahe. ²² Tiquiro sa yahuducu ihñogū tahoye masa pehe sañuducuahe:

—Ahriquiroy yahuducuriquiroy masano ijierare. Cohācjū ijire, ni sañuducumahye tiquina Herodere.

²³ Tiquina sa nigūta Cohācjū yaquiroy angel Herodere dohatiyere ohoahye. “Cohācjū ijieraja yuhū”, ne niedahye Herode. Tiquiro sa niedari buhiri angel tiquirore dohatigū yeahye. Tiquiro sa dohatigū tiquirore becoa ihya wejē cāhe.

²⁴ Sa ye Jesu yequina peyequina masare Jesu ye buheyere buheetiahe.

²⁵ Sa ye Bernabé, Saulo mehna buhe peho, Jerusalēpu ijiyequina Antioquíapu tojoaa wahahye. Sa ye Ñu Marco wame tiriquire tiquina ne cāhe tiquina mehna.

13

Jesu yequina Bernabére Saulo mehna Cohācjū yere buhe dutiye ohoahye

¹ Ti pjere Antioquíapu Cohācjū yequina mehna cjēna, Cohācjū yere yahu mahtariquina ijiahe. Masare buheyequinata ijiahe tiquina gāhū. Bernabé, Simo Negro wame tiriquire, Ludio Cirene cjāno, Manae, Saulo mehna tiquina ijiahe. Manae pehe puhtoro Herode manano mehna tiquina puaro ihcāno mehna bucuariquina ijimahye. ² Sa ye tiquina Cohācjāre tiquina ño peori watoa, tiquina sijiri watoa, Espiritu Santo pehe yahuahye tiquinare.

—Bernabére, Saulo mehna cñña yuhū cahmeno saha yeatiquinare. Tire yeatiquinare bese cūgū niaja tiquinare, niahe Espiritu Santo.

³ Tiquiro sa nigū tiquina pehe siji Cohācjāre sini, Bernabé bui Saulo bui tiquina omocarine duhu

peoahye. Sa duhu peoye tiquinare buhe dutiye ohoahye.

Chiprepu Jesu cūriquina buheahye

⁴ Sa ye tiquina Saulo, Bernabé mehna Espiritu Santo tiquiro ohoriquina ijiye, Seleuciapu esa, ti macare yuhū cā, Chipre wame tiri nuchopu esahye tiquina. ⁵ Sa ye Salamina wame tiri petamahapu esahye. Ti macapu judio masa buheye wuhusepu, Cohācjū yere yahu dūcahye tiquina. Sa yero Ñu Marco gāhū tiquina mehna waha, tiquinare yedohoahye. ⁶ Sa ye tiquina ti nuchō sohtoapu maja, ti nuchō torepu ijiri macapu Pafō wame tiri macapu esaye, yairore boca sahe tiquina. Tiquiro judio masano, Barjesu wame tiriquire ijiahe. Barjesu griego ye mehna niñe Elima tiquina ni pisuriquire ijiahe. “Cohācjū yere yahu mahtagu ijiaja yuhū”, ni, masare ni mehoducuriquire ijiahe tiquiro. ⁷ Sa yero tiquiro Sergio Paulo wame tiriquire mehna cjāno ijiahe. Sergio Paulo pehe ti nuchō cjēna puhtoro masi pehoriquire ijiahe. Sa yero Cohācjū yere taho duaro tiquinare Bernabé, Saulo mehna pijioahye tiquiro. ⁸ Tiquiro sa pijioepēgūta Elima, yairo pehe tiquinare buhe dutierahye. Tiquiro Sergio Paulo Jesu yere tiquiro ño peogū cahmesāedahye yairo pehe. Sa yero yairo pehe Sergio Paulore Cohācjū yere cohā dutiro nimahye. ⁹⁻¹⁰ Tiquiro sa cohā dutiepēgūta Saulo, Pablo tiquina nidiquiro Espiritu Santore cūoriquiro ijiro, yairore quehnoano ihña diho cū tiquirore yahuahye:

—Muhū ni mehoñe peyagu, ñagu, watño tiquiro dutiyere yegu, quehnoañene ihña yabigu ijire muhū. ¿Duhse yegu Cohācjū yere “Ni mehoñe ijire”, sa niducujari muhū? ¹¹ Muhū sa nigū Cohācjū caperi bajueragū yerota mahare.

Sa yegũ meheñe decorigã mũhũ ihñasi, niahye Pablo.

Tiquiro sa nigũta yairo pehe bueri yero saha ijiyere ihña mũhtano, nahitiano dihitare ihñahye. Sa yero tiquirore tuãtiquirore macahye tiquiro. ¹²Tiquiro sa wahagũ ihñano, Sergio Paulo pehe Jesu yere “Ijirota ijire”, ni masiahye. Mari pũhoro yere tiquiro tũho, tũho maria waha, Jesure wacũ tutua dũcahye.

Pablo Bernabé mehna Antioquiapũ Pisidia yehpapũ ijiri macapũ ijiahye

¹³ Sa ye Pablo gãhũ Pafopũ ijiriquina yucũsa mehna waha, Pergepũ esahye. Perge Panfilia yehpapũ ijire. Topũ esa, Ñu Marco tiquinare cohã cã, Jerusalẽpũ wahaa wahahye. ¹⁴ Sa ye tiquina Pergepũ ijiriquina waha, Antioquiapũ esahye. Antioquiã Pisidia yehpapũ ijire. Topũ esaye, saurũ deco ijigũ tiquina judio masa buheri wũhũpũ sajã sa, topũ dujahye. ¹⁵ Sa ye ti wũhũre cohteyequina Cohãcjũ dutiyere, Moiserũ marine tiquiro cũrire, Cohãcjũ yere yahu mũhtariquina tiquina ojarire tiquina buheri bato tiquina pijiahye Pablo gũhũre.

—¿Usã acaye, masare mũsa yahu duaye ijiajari? Tire yahu duana yahuya mianogãta, niahye ti wũhũre cohteyequina.

¹⁶ Tiquina sa nigũ tũhoro, Pablo wahcãdũca sa, “Yahuducueracãhña”, nino tiquiro omoca mehna quẽ dijioahye. Tiquina dihta mariagã ihñano, tiquiro ohõ saha niahye:

—Israe masa, Israe masa ijiena gũhũ mari Pacũre ño peona, tũhoya mũsa. ¹⁷ Mari ñecũsumũa mũna panopũ cjẽna Cohãcjũre ño peoe tiahye. Tiquina mũnare Cohãcjũ besee tiahye. Sa ye mari ñecũsumũa mũna yoari pje Egiptopũ ijie tiahye ape yehpa

cjẽna ijiepetã. Topũ tiquina ijigũ Cohãcjũ quehnoano yee tiahye tiquinare. Sa ye peyequina masaputiahye tiquina. Ohõ saha yeahye tiquinare. Tiquinare Egiptopũ ijiriquinare tiquiro tutuaye mehna wioahye Cohãcjũ. ¹⁸ Tiquiro sa wiori bato tiquina cuarenta cũhmarĩ waro masa marienopũ tinie tiahye. Topũ tiquirore tiquina yũhdũdũcagũ Cohãcjũ sata tũhotu cãhye. ¹⁹ Sa yero Canaa wame tiri yehpapũre siete cururi cjẽnare cohã tuhasa, Cohãcjũ ti yehpare ohoahye Israe masa pehere. ²⁰ Ti ijipihtiyere tiquina yegũ cuatrocientos cincuenta cũhmarĩ waro yũhdũahye. Camepũ masare dutiatiquinare cũahye Cohãcjũ Israe masare. Cohãcjũ tiquiro cũriquina Samuel tiquiro ijigũpũ iji bato tie tiahye. Samuel pehe Cohãcjũ yere yahu mũhtariquiro ijie tiahye. ²¹ Came Israe masa pehe tiquina pũhoro ijiatiquirore macae tiahye. Sa ye Cohãcjũre sinie tiahye. Tiquina sa sinigũ ihñano Cohãcjũ Saulore cũahye tiquinare. Saulo Cis macũno ijiro, Benjami ya curua cjãno ijiahye. Sa yero cuarenta cũhmarĩ waro tiquina pũhoro ijiatiquiro cũahye Cohãcjũ tiquirore. ²² Sa yero Cohãcjũ Saulore tiquiro cohãri bato Davire cũahye tiquiro. Ohõ saha niahye Cohãcjũ Davire: “Davi Isaĩ macũnore bocaũ yũhũ. Tiquiro mehna bucueaja yũhũ. Tiquiro yũhũ cahmeñene yerota”, niahye Cohãcjũ.

²³ Ahriquiro Davi panamino iji turariquiro ijire Jesu. Cohãcjũ Jesure cũri jiri Israe masare yũhdũoatiquiro. “Masare quehnoano yeitja”, niahye Cohãcjũ. Tiquiro nidiro sahata yeri tiquiro. ²⁴ Tiquiro sa yeato pano Jesu wihiato pano Ñu ohõ saha ni buheri jiri: “Musa ñañene bujãa witiya. Quehnoañe pe-

here comesaya. Sa yena wame yeno hrina ijiya”, ni buheri jiri Ñu ijipihitiquina Israe masare. ²⁵ Sa yero Ñu tiquiro buhe bato tiato pano, tiquiro yariato pano ohō saha ni yahue tiri jiri: “¿Noa boro ijiajari yuhū, mūsa tūhotugū? Cristo ijieraja yuhū. Apegu ijiaja. Yuhū sa ijiepegū tūhoya yuhūre. Yuhū bato yuhū yuhūoro tutuariquiro ahtarota. Tiquiro quehnoa yuhūriquiro ijire. Tiquiro yero saha ijieraja yuhū”, ni yahuahye Ñu masare.

²⁶ Yuhū acaye, Abrahā panamena iji turiana, Israe masa ijiena gūhū ijipihitina mari Pacure ño peona, marine ahri tiquiro yuhūoatire yahuri buheyere ohori jiri mari Pacū. ²⁷ Jerusalē cĵēna tiquina pūhōa mehna saurū decori ijigū Cohācĵū yere yahu mūhtariquina tiquina ojoarire buhepeta quehnoano masiedari jiri. Sa masiedaye, Jesu tiquinare yuhūoatiquiro tiquiro ijigū gūhūre masiedari jiri. Tiquina sa masiedapeta Jesure wejē duti-ahye. Sa yeye Cohācĵū yere yahu mūhtariquina tiquina ojoariro sahata yeye niahye. ²⁸ Tiquirore tiquina wejēato pano tiquina Jesure yahusāmahye. Sa ye tiquiro ñañene yerapegūta tiquina Pilatore Jesure wejē dutiye tee, siniahye. ²⁹ Sa ye panopū tiquina ojoariro sahata Jesure ye tuhasa, tiquirore curapū ijiriquirene ne dijio, masa copepū utāre tiquina seheri copepū cūahye tiquirore. ³⁰ Sa ijiepegūta tiquiro yariari bato Cohācĵū masori jiri tiquirore. ³¹ Sa ye Galileapū ahtariquina Jerusalēpū tiquiro mehna esariquina peye decori tiquirore yaria masa bajuariquirene ihñae tiahye. Sa ye yojopūre tiquirore tiquina ihñarire masare yahuri tiquina.

³²⁻³³ Sa yena quehnoañe buheyere yahuaja usā mū sare.

Cohācĵū mari ñecusūmūare “Masare quehnoano yeitja”, panopū tiquiro nidiro sahata yojopūre marine tiquina acayere yeri. Tire tiquiro yahurire ohō saha yeri tiquiro. Cohācĵū Jesure masori jiri. Sa yena Jesure tiquiro masorire yahuaja mū sare. Pūaro Salmopū panopū tiquina ojoariro sahata sa wahari jiri. “ ‘Mūhū yuhū macū ijire. Miare mūhūre bajuagū yei’, nine Cohācĵū tiquiro macūnore”, ni ojoahye panopūre. ³⁴ Sa yero Cohācĵū Jesure tiquiro masoatire pari turi tiquiro yariere yahuyuro ohō saha ni, yahu ojoahye Salmore ojoariquiro. “ ‘Davire yuhū paja ihñariro sahata tiquirore yuhū nidiro sahata potota quehnoano yegutja mūhū gūhūre’, nidi Cohācĵū”, ni ojoahye. ³⁵ Sa yero ape Salmo gūhūre ohō saha ni, yahuahye: “Cohācĵū mūhū cahacĵāno quehnoariquiro tiquiro pagūre ahba dutierare mūhū”, ni, ojoahye. ³⁶ Sa yero Davi Cohācĵū tiquiro cahmediro sahata tiquiro ijiri pje cĵēnare yedohoahye. Came tiquiro yariaa wahahye. Tiquiro yariari bato tiquiro pacusūmūare tiquina yeriro sahata yahye tiquiro gūhūre. Sa yero tiquiro ahbaa wahahye. ³⁷ Tiquiro sa ahbaepegūta ahriquiro, Cohācĵū tiquiro masoriquiro pehe ne ahbaerari. ³⁸ Sa yena mūsa yuhū acaye ahrire masiña: Cohācĵū mūsa ñañene tiquiro cohātire mū sare yahuaja usā. Jesu pehe ñañene cohātiquiro ijire. ³⁹ Sa yero tiquirore wacū tu- tuayequinare tiquiro tiquina ñañe yerire borota. Moiserre Cohācĵū cūri dutiyere mūsa yeri mehna Cohācĵū cahapū wahasi mūsa. Sa yero dutiyere yeye mehna yuhū du- ayequinare tiquina ñañene cohāsi Cohācĵū. ⁴⁰ Sa yena quehnoano yeya. Mūsa quehnoano yeragū Cohācĵū yere yahu mūhtariquina tiquina ojoariro sahata mū sare

wahaboaga. Ohõ saha ni ojoahye:

⁴¹ Tuhoya musa. Ñano ni bujupena, yuhare ihña tuhtina ijire musa. Yuhu ohõ saha yegũ cueya musa. Sa yena butia wahaya. Musa ijieye decorire Cohãcjũ tu-tuaye mehna musare ye ihñogutja. Yuhu sa ye ihñogũ ihñaepenata “Ijirota ijire”, nisi musa. Apequiro tire musare tiquiro quehnoano yahuepegũta “Ijirota ijire”, nisi musa, ni ojoahye Cohãcjũ yere yahu mahitariquiro, ni yahuahye Pablo tiquinare.

⁴² Tiquiro sa ni yahuri bato judio masa buheri wuhupũ tiquina wijiari bato masa tiquirore tuhoriquina pehe tiquinare siniahye:

—Ape semanapũ saurũ ijigũ usãre ahrire buheya tja, ni siniahye tiquina Pablo gũhare.

⁴³ Sa ye ti wuhupũ ijiriquina wijia, judio masa peyequina, judio masa ijieyequina gũhũ Pablo gũhũ mehna wahahye. Judio masa ijieyequina judio masa yere buheyequina ijiahye. Tiquina sa wahagũ Pablo, Bernabé mehna quehnoano yahuahye tiquinare. “Cohãcjũ musare cahĩne. Sa yena tiquirore ño peoducuya”, ni buheahye tiquina.

⁴⁴ Sa ye ape semanare saurũ ijigũ ijipihtiequina Jesu yere tuhõ duayequina cahmecoahye.

⁴⁵ Sa yepegũta judio masa pehe peyequina masare Jesu yere tuhõ duayequinare ihñañe, ihña tuhtiahye. Sa ihña tuhtieye tiquina sijoro ni yahuducu, Pablõre ñano quiti dojomehneahye. “Musare tiquiro buheye poto ijierare”, niahye tiquina. ⁴⁶ Tiquina sa nigũ tuhoye, Pablo, Bernabé mehna tiquinare quiti dojomehnediquinare cuero marieno yahuahye:

—Cohãcjũ tiquiro dutiriro sahata musare buhe mahitami usã. Usã sa buhepegũta musa pehe tire cahmeda tuhasari. Ijipihtieye decori Cohãcjũ mehna ijieye gũhare cahmeda tuhasari musa. Sa yena usã pehe judio masa ijieyequina pehere buhe ducanatja. ⁴⁷ Sata dutiahye mari puhtoro usãre:

“Musa judio masa ijieyequinare buhena tiquinare Cohãcjũ yere quehnoano masigũ yenata musa. Sa yegũ musa yoaropũ ijieyequinare musa buhegũ tuhoyequinare tiquina pehere pecapũ waha-haboriquinare yuhduogutja yuhu”, ni yahuahye usãre Cohãcjũ, ni yahuahye Pablo, Bernabé mehna.

⁴⁸ Tiquina sa nigũ tuhoye judio masa ijieyequina pehe bucueahye. “Cohãcjũ ye pehe quehnoañe ijire”, niahye tiquina. Sa ye Cohãcjũ tiquiro cahmeñequina ijipihtieye decori tiquiro mehna tiquina ijiatire tiquiro oho duariquina Jesure wacũ tutua ducahye. ⁴⁹ Sa ye mari puhtoro Cristo yere ti yehpapure yahu pehoahye. ⁵⁰ Tiquina sa yahugũ ihñañe judio masa coerahye. Topũ mari Pacure ño peoye numia, quehnoañe numia ijiahye. Sa ye judio masa Pablo gũhare ñano ni yahu wajahye. Tiquina sa ni yahu wajagũ tuhoye ti numia Pablo mehna, Bernabé mehna gũhare usuahye. Sa ye ti maca cjẽna puhtoã gũhũ tiquina mehna usuahye. Sa usuaye to cjẽna ñano yeahye Pablo gũhare. Tiquina sa yeri bato Pablo gũhare tiquina ya yehpapũ ijieyequinare cohã wioahye. ⁵¹ Tiquina sa yegũ ihñañe Pablo, Bernabé mehna tiquina dahpocãri cjẽ dihta wahãrire wejẽ site boro cũahye ti maca cjẽna tiquina ñañe buhirire ihñoñe. Sa ye tuhasa tiquina Iconiopũ wahaa wahahye. ⁵² Sa ye tiquina Jesu yequina pajiro bucueye, Espiritu

Santo pajiro c̄oye, tiqiro dutiro sahata yeyequina ijiahye.

14

Pablo, Bernabé mehna Iconiopu ijiahye

¹ Sa ye Pablo, Bernabé mehna judio masa buheri w̄h̄p̄u sajā, Jesu yere yahuahye. Sa ye judio masa peyequina Jesure wacū tutua d̄acahye. Sa ye judio masa ijieyequina ḡh̄u Jesure wacū tutua d̄acahye. ² Sa ijiepegāta judio masa Jesure cahmedariquina ḡh̄u tiquina mehna ijiahye. Tiquina judio masa ijieyequinare usuagū yeahye. Jesu yequina mehna tiquinare usuagū yeahye judio masa pehe. Tiquina sa yegū judio masa ijieyequina ñano t̄hotuahye Jesu yequinare. ³ Tiquina sa t̄hotugū ihñañe Jesu yequina Pablo, Bernabé mehna topu yoari pje ijiye, cuero marieno mari p̄h̄toro yere quehnoano buheahye. Cohācjū masare tiqiro cahñene buheahye. Tiquina sa buheri watoa Cohācjū tutuaye mehna ye ihñoahe, “Ahri buheye ijirōta ijire”, niñe. ⁴ Sa ijiepegāta ti maca c̄jēna deco mehna judio masa yere cahmeñequina tojoahye. Deco mehna Jesu yere cahmeñequina ḡh̄u tojoahye. Tiquina p̄a curua tojoahye. ⁵ Sa ye judio masa ijieyequina, judio masa, tiquina p̄h̄toa mehna Jesu cūriquinare ñano yemahye. Utā paca mehna doque wejē duamahye tiquinare. ⁶ Tiquina sa ye duarire masiñe, Pablo, Bernabé mehna Licaonia yehp̄u duhti cāa wahahye. Ti yehp̄u ijiri maca Listra wame tiri macare ȳhd̄u cā, Derbep̄u esahye. ⁷ Topu esaye, quehnoañe buheyere buheahye tiquina.

Listrapu Pablore utā paca mehna doqueahye

⁸ Sa ye Listrapu tini masieniquiro ijiahye. Tiquiro wahma masa

bajuarop̄ta tini masieniquiro ijiahye. ⁹⁻¹⁰ Sa yero tiqiro Pablo buhegū t̄hoahye. Tiquiro t̄hori watoa Pablo pehe tiqiro dihitare ihñahye.

—Ahriquiro Jesure wacū tutuare. Sa yero tiqiro quehnoariquiro waha duare, ni t̄hotuahye Pablo.

Sa ni t̄hoturo tutuaro mehna ohō saha niahye Pablo tiqirore:

—Wahcād̄ucaya, niahye Pablo tiqirore.

Tiquiro sa nigū t̄horota tini masieniquiro pehe uhpud̄ca sa, wahaa wahahye. ¹¹ Pablo sa yegū ihñañe masa sañuducuahye. Tiquina Licaonia ye mehna sañuducuahye.

—Cohāmana, masa saha bajueyequina ah̄m̄sep̄u ijieyequina mari cahp̄u dijia tari jiri, ni sañuducuahye tiquina.

¹² Sa ye tiquina Bernabé “Zeus”, ni, pisuahye. Sa ye Pablo buhe m̄htariquiro p̄h̄toro yero saha tiqiro ijigū ihñañe “Hermes”, ni, pisuahye tiquina tiqirore.

¹³ Sa yero Zeure ño peoyequina ya w̄h̄u ti maca d̄ht̄u cahp̄u ijiahye. Sa yero Zeus yequina tiquina yaquiro pahi pehe wec̄are, cohoi mehna macap̄u sajā tari sopecaha cahp̄u ne cāhtahye. Zeure ño peo duaro wec̄are oho duamahye. Sa yero tiqiro wec̄are m̄jūa m̄ñoñe mehna Pablore, Bernabé ño peo duamahye tiqiro, masa mehna. ¹⁴ Tiquina sa yegū ihñañe Pablo, Bernabé mehna tiquina basi tiquina ye suhtire t̄hr̄edoqueohye tiquina b̄j̄ua witiyere masare ihñoñe tehe. T̄hr̄edoqueo tuhasa masa watoa oma cā, sañuducuahye tiquina:

¹⁵ —M̄sa ohō saha yeracāhña. Usā ḡh̄u m̄sa yero sahata masa ijiaja. M̄sa ohō saha yeye ne d̄h̄seati ijierare. Sa yena m̄sare buhena ahta m̄sa ohō saha yeyere duhu dutina

tana. Ahriquina cohāmanare m̄asa yeriquinare ñañequinare cohāña. Sa yena Cohācjüre catiriquiro pehere ño peoya. Cohācjũ pehe ũhm̄sere, yehpare, pajiri mare ijipihtiyere yeriquiro ijire. ¹⁶ Sa yero tiquiro panop̄u ijipihtiyere macari cjēna tiquina yerire sa ihña cāhye. ¹⁷ Sa yeperota tiquiro ijie tyere ihñore masare. Tiquiro masare quehnoañene ye, acoro ahtagũ ye, d̄aca tigũ ye, masare ihyayere ohoducure. Tiquiro sa ohogũ masa bucuere. Sata tiquiro ijie tyere ihñore masare, ñahye Pablo, Bernabé mehna.

¹⁸ Tiquina sa nigũ tuhoepeta masa wec̄are wejẽ uj̄ã m̄uo, tiquinare ño peo duamahye. Sata tiquina ño peo duagũ ihñañe tiquinare sa ye dutierahye Pablo gũh̄u. Tiquina sa yeyere duhu duerapeta duhuahye.

¹⁹ Sa ye apequina judio masa Antioquia cjēna, Iconio cjēna gũh̄u Listrap̄u esahye. Top̄u esaye, Pablöre ñano yahuducuahye judio masa. Tiquina sa ni yahuducugũ tuhoye, masa tiquiro mehna usuahye. Sa usuaye ut̄ã paca mehna doqueahye tiquirore. Ut̄ã paca mehna tiquirore doque tuhasa “Ahriquiri yariaa wahare”, ñiñe, ti maca d̄uht̄u cahap̄u tiquirore weje sa cũ cã, wahaa wahahye. ²⁰ Tiquina sa yeri bato Jesu yequina Pablöre ihñañe esahye. Tiquiro cahap̄u tiquina cahmeco ad̄uca sagũ waro Pablo wahc̄ad̄uca, tiquina mehna macap̄u tojoaa wahahye. Sa ye ape decop̄u tiquiro Bernabé mehna Derbep̄u wahahye.

²¹ Sa ye top̄u tiquina quehnoañe buheyere peyequina masare yahuahye. Sa ye peyequina Jesu yequina tiquina wahari bato, Pablo gũh̄u Listrap̄u esa, ti macare ȳhd̄u cã, Iconiop̄u esa, ti macare ȳhd̄u cã, Antioquiap̄u Pisidia yehpap̄u ijiri macap̄u esa,

ti macap̄u tojoahye. ²² Ti macarip̄u esaye to cjēna Jesu yequinare quehnoañe buheyere yahuye, tiquinare quehnoano jeripohna tigũ yeahye. Sa Jesure wacũ tutuaducu dutiye ohõ saha ni yahuahye tiquinare:

—Cohācjũ ijipop̄are mari waha duana, tutuaro marine ñano ȳhd̄aro cahmene, ni yahuahye Pablo gũh̄u.

²³ Sa ye macaripe cjēnare Jesu yequinare tiquina p̄h̄toa ijiatire cũahye Pablo, Bernabé mehna. Sa ye tiquina sijiri bato Cohācjüre sini-ahye:

—P̄h̄to, ahriquina m̄uh̄u yequinare ihña ihboya, ni sini basahye tiquina Cohācjüre, tiquina wacũ tutuariquirore.

Pablo Bernabé mehna Antioquiap̄u tiquina iji m̄uhtari macap̄u tojoaa wahahye

²⁴ Tiquina sa yeri bato tiquina Pisidia yehpap̄u ijiriquina wahaa wahahye Panfilia yehpap̄u. ²⁵ Sa ye Pergep̄are tiquina buhe tuhasa, Atalia wame tiri macap̄u wahaa wahahye. ²⁶ Sa ye ti macap̄u esa, Antioquiap̄u tojoaye, yuc̄sa mehna wahaa wahahye. Ti macap̄uta panop̄u tiquina ijinigũ Jesu yequina Cohācjũ yere buhe dutiye Pablo gũh̄are ohoahye. Sa ohoye, ohõ saha ñahye:

—Cohācjũ m̄uh̄u cahñe mehna ahriquinare ihña ihboya, ni ohoahye tiquina.

Sa ye tiquina buhe dutirire buhe pehoahye Pablo, Bernabé mehna. ²⁷ Sa ye tiquina Antioquiap̄u tiquina tojoa sari bato Jesu yequina mehna cahmeco, Cohācjũ tutuaye mehna tiquina yerire yahu pehoahye tiquina. Judio masa ijieyequina gũh̄u Cohācjũ yequina tiquina waharire yahuahye tiquina. ²⁸ Sa ye Pablo gũh̄u top̄are Jesu yequina mehna yoari pje ijie tiahye.

15

Jerusalēpɯ Jesu yequina cahme-coahye

¹ Sa ye Judea yehpa cjēna meheñequinagā Antioquiapɯ esaye, Jesu yequinare ohō saha ni buhe dɯcahye tiquina:

—Cohācjū dutiyere Moisere cūno ohō saha ni cūahye. Ijipihtiyequina tiquina cuhnucunɯ sohtoa cahserogāre tiquina yūhre neatire yahu cūahye Moisere. Mɯsa tire yeragū Cohācjū mɯsare yūhdɯosi, ni buheahye tiquina to cjēnare.

² Sa ni buheye Judea yehpa cjēna pehe cahme dɯse tini wiahye Pablo, Bernabé mehna. Tiquina sa cahme dɯse tini wiari bato Jesu yequina pehe Pablore, Bernabére apequina to cjēna gūhare Jerusalēpɯ ohoahye. Judea yehpa cjēna tiquina buherire Jesu cūriquinare, Jesu yequina pɯhtoa gūhare sinitu dutiye ohoahye Pablo gūhare.

³ Sa ye Jesu yequina tiquinare ohogū waha, Fenicia yehpare esa, yūhdɯ cā, Samaria yehpapɯ esahye. Ti macaripɯ esaye, judio masa ijieyequina Cohācjū yere tiquina cahme dɯcarire yahuahye tiquina to cjēnare. Tiquina sa yahugū tɯhoye to cjēna Jesu yequina tutuaro bucueahye.

⁴ Sa ye tiquina Jerusalēpɯ esagū ihñañe to cjēna Jesu yequina tiquiuro cūriquina, tiquiuro yequina pɯhtoa mehna bucueye mehna quehnoano piti cahye tiquinare. Sa ye Pablo, Bernabé mehna Cohācjū tutuaye mehna tiquina yerire yahuahye tiquina Jerusalē cjēnare. Judio masa ijieyequina Jesu yequina tiquina wahari gūhare yahuahye tiquinare. ⁵ Sa ijiepegūta topɯ fariseo masa Jesu yequina meheñequinagā ijiahye. Sa ye tiquina topɯre wahcādɯca, ohō saha ni yahuahye:

—Tiquinare judio masa ijieyequinare tiquina cuhnucunɯ sohtoa cahserogāre yūhre neno cahmene. “Cohācjū Moisere tiquiuro dutirire yeya mɯsa gūhɯ”, nino cahmene tiquinare, niahye tiquina fariseo masa gūhɯ.

⁶ Tiquina sa nigū tɯhoye Jesu cūriquina, Jesu yequina pɯhtoa mehna tiquina sa nidire quehnoñe tehe, cahmecoahye. ⁷ Sa ye peye tiquina yahuducuri bato Pedro wahcādɯca yahuahye tiquinare:

—Yūhɯ acaye, panopɯ yūhure mɯsa mehna ijirigūre Cohācjū ohō saha ye dutiro yūhure cūri. Tiquiuro yūhure quehnoñe buheyere judio masa ijieyequinare yahu dutiro cūri. Tiquinare Jesure wacū tutua dutiro yūhure tiquinare buhe dutiri. ⁸ Sa yero Cohācjū masa tɯhotuyere masine. Sa yero tiquiuro judio masa ijieyequinare tiquiuro yequina tiquiuro yerire ihñono taro Espiritu Santore ohori tiquinare, marine tiquiuro yeriro sahata. ⁹ Sa ohoro tiquiuro marine tiquina gūhare ihcāno saha quehnoano yeri. Tiquiore tiquina wacū tutuagū tiquina ñañene bori tiquiuro. ¹⁰ Mari pehe Cohācjū Moisere tiquiuro cūri dutiyere ye peho masiedaja. Sa ye mari ñecɯsumɯna mɯna gūhɯ ti dutiyere ye peho masiedahye. ¿Sa mari ye masiedapegūta dɯhse yena Jesu yequinare judio masa ijieyequinare tire ye duti duajari mɯsa? Sa ye dutina Cohācjū tiquinare tiquiuro yerire “Queoro wahaerare”, nina niaga mɯsa. ¹¹ Mɯsa sa niepegūta ohō saha ɯsā tɯhotuaja. Yojopare judio masa ijieyequina yero sahata mari gūhare mari pɯhtoro Jesu cahñe mehna Cohācjū yūhdɯorota, niahye Pedro tiquinare.

¹² Tiquiuro sa nigū tɯhoye ijipihtiyequina dihta maria wahahye. Sa ye Pablo, Bernabé mehna

judio masa ijieyequina watoa Cohâcjũ tutuaye mehna tiquina ye ihñorire yahuahye tiquinare.¹³ Sa tiquina yahu tuhasari bato Santiago yahuahye.

—Acaye, tãhoya yãhure.
14 Cohâcjũ judio masa ijieyequinare tiqiro yequina wahagã yeahye. Coã tiquinare sa wahagã yeahye. Tire yahu tuhasari marine Pedro pehe.¹⁵ Panopũ cjẽna Cohâcjũ yere yahu mãhtariquina tiquina yahuriro sahata sa wahari judio masa ijieyequinare. Ohõ saha ni mari Pacũ yere ojoahye tiquina:

16 Panopũ Davi mũnano ya curua cjẽna tiquina pãhtoa tiquina ijiri pihtia wahari. Came tojoa tautja yãhũ. Sa yegũ pari turi Davi ya curua cjãnore pãhtoro sũutja.
17 Yãhũ sa yeri bato ijipihitiyequina apequina judio masa ijieyequina yãhure tiquina pãhtore cahmeeta tiquina. “Yeequina ijiya”, yãhũ ni pisuriquina pehe yãhure cahmeeta.¹⁸ Sata nine mari pãhtoro. Panopũ tiqiro ahrire masare yahue tiri jiri, ni ojoahye Cohâcjũ yere yahu mãhtariquina.

19 Sa yegũ ohõ saha tãhotuaja yãhũ. Judio masa ijieyequinare Cohâcjũ yere wahma cahme dũcayequinare peye ye dutieracãhna mari.²⁰ Sa dutierapenata tiquinare oja ohouhna mari. Ohõ saha ni, oja ohouhna. “Ñãñe ihyayere, ‘Cohâcjũ ijire’, tiquina nimeri queoyere ño peo tiquina duhu peori ihyayere ihyeracãhña. Sa yena wũana tieracãhña. Sa yena wamũa tiquina ñehe wejẽdiquinare wahiquinare ihyeracãhña. Diire sihniedacãhña”, ni yahu oja ohouhna.²¹ Yoari pje judio masa buheye wãhũsepũ saurũ ijigũ Cohâcjũ Moiseri tiqiro cũri

dutiyere buhee tiri masa. Sa ye ijipihitiye macaripũ Moise tiqiro yahuyere buhee tiri. Sa yena yãhũ nidiro sahata judio masa ijieyequinare Jesu yequinare oja ohouhna, judio masa pehe tiquina mehna “Usuari”, nina, niahye Santiago.

Judio masa ijieyequinare Jesu yequina pãhtoa oja ohouhne

22 Ti pjere Jesu cũriquina, Jesu yequina pãhtoa ijipihitiyequina Jesu yequina mehna pãaro tiquina mehna cjẽnare beseahye tiquina ohouhniquinare. Antioquiapũ Pablo, Bernabé mehna wahatiquinare tiquinare bese ohouhne. Sa ye tiquina Judare, Sila mehna ohouhne. Juda pehe Barsaba pãaro wame wame tiahye. Tiquina acaye Jesu yequina tiquinare ño peoahye.²³ Tiquinare tiquina beseri bato Jesu yequina ojoari pũre ohouhne tiquina mehna. Ohõ saha ni ojoahye tiquina:

—Jesu cũrina, tiqiro yequina pãhtoa, mũsa acaye Jesu yequina mehna usã quehnoa dutiaja mũsare. Ijipihitiya judio masa ijienare Antioquiapũ, Siriapũ, Ciliciapũ ijinare mũsare Jesu yequinare quehnoa dutiaja usã.²⁴ Usã mehna cjẽna mũsa cahapũ esaye, mũsare peye dutiyere ye dutiñohiti. Sa ye mũsare caribonohiti. Tiquina sa dutiepegãta usã pehe tiquinare tire buhe dutina ohouhne.²⁵⁻²⁶ Sa yena usã ijipihitiya ihcãno mehna mũsa cahapũ ohouhniquinare usã besei. Mari cahĩñequinare Pablo, Bernabé mehna Cristo Jesu mari pãhtoro yere cuero marieno tiquina buhegũ peye tahari apequina tiquinare wejẽmahye. Tiquina sa wejẽ duagũ mehenogã mehna yãhũyahye tiquina. Tiquina mehna usã beseriquinare yojopũre ohouhne.²⁷ Sa yena Judare, Sila mehna mũsa cahapũ

ohoaja. Usã ojoarire tiquina pehe musare yahueta. ²⁸ Espiritu Santo wacũno sahata usã gãhu tuhutuaja. Ohõ saha ijire ti: Apeye dutiyepare cũedaja musare. Ahri dutiye dihitare cũnatja musare: ²⁹ Nãñe ihyayere, “Cohãcjũ ijire”, tiquina nimeri queoyere ño peo tiquina duhu peori ihyayere ihyeracãhña. Diire sihniedacãhña. Wamua tiquina ñehe wejediquire wahiquinare ihyeracãhña. Sa yena wãana tieracãhña. Ahri yãhu ye dutierarire yerana quehnoañene yena ninata musa. To puno tjire musare usã yahu duaye, ni ojoa ohoahye Jesu yequina Jerusalẽpũ ijiequina.

³⁰ Ti pũre ojoa tuhasa, ohoahye Antioquiãpũ wahayequinare. Tiquina ohori bato waha, Antioquiãpũ esahye. Topũ tiquina esari bato peyequina masare cahmecoa duti, tiquina ojoari pũre wiahye tiquire. ³¹ Ti pũre tiquina buheri bato quehnoañene tiquina yahugũ tuhoye, quehnoano bucueahye. ³² Sa ye Juda, Sila mehna Cohãcjũ yere yahu mãtariquina ijieye, yoari pje Jesu yequire Cohãcjũ yere yahuahye. Tiquina sa yahugũ tuhoye, Jesu yequina pehe bucue, quehnoano jeripohna tiahye. ³³ Sa ye Juda, Sila mehna topũ meheñe decorigã tiquina ijiri bato tiquina tojoa tagũ to cjẽnare tiquina cohe tigũ, “Quehnoano wahaya musa”, niahye Antioquiã cjẽna. Sa ye Juda gãhũre ohoriquire quehnoa dutioahye. Tiquina sa nidi bato Juda pehe tojoa wahahye. ³⁴ Sa ijiepegãta Sila pehe topũta tojoa cãhye Antioquiãpũta. ³⁵ Sa ye Pablo, Bernabẽ gãhũ meheñe decorigã tojoarihye ti macapũ. Sa ye tiquina apequina peyequina mehna Jesu yere buheahye.

Pari turi Pablo quehnoañene buheyere buhe tinino wahahye

³⁶ Sa ye meheñe decorigã bato Pablo, Bernabẽ mehna yahuducuahye:

—Ijipihitiyequire mari buhe dũcariquire ihñana wahañhna tja, niahye Pablo gãhu tiquina basi.

³⁷ Sa yero Bernabẽ pehe Nũre tiquina mehna nea duamahye. Nũ Marco pũaro wame wame tiriquiro ijiahye. ³⁸ To pano tiquire tiquina mehna Panfiliãpũ esaro tiquina mehna tojoerahye. Tiquina yerire ihcãno sahaeraro, tojoa wahahye. Tiquire ihcãno sahaeragũ ihñano Pablo pari turi tiquire nea duerahye. ³⁹ Tiquire nea dueragũ ihñano Bernabẽ Pablo mehna pũaro tiquina basi cahme yahuducu cahme tu wahye. Bernabẽ pehe Chipre wame tiri nũcũopũ Marco mehna pehãa wahahye. ⁴⁰ Pablo pehe Sila mehna piti ti cã, wahahye. Sa ye tiquina buheye wahato pano Jesu yequina tiquire ohoye, “Cohãcjũ musare quehnoano ihña ihboahro”, niahye. Tiquina sa nidi bato Pablo, Sila mehna waha wahahye. ⁴¹ Sa wahaye, Siria yehpapũ, Cilicia yehpapũ gãhũre esaye, topũ Jesu yequire quehnoano jeripohna ti bucuegã yeahye tiquire.

16

Timoteo Pablo mehna wahahye

¹ Tiquina sa yeri bato Pablo gãhũ Derbepũ, Listrapũ esaye, Timoteore boca sahye. Timoteo Jesu yaquire ijero, judio masono macũno ijiahye tiquire. Tiquire pacoro gãhũ Jesu yacorota ijiahye. Tiquire pacaro pehe griego masũno ijiahye. ² Sa ye Listra cjẽna, Iconio cjẽna Jesu yequina ohõ saha niahye Timoteore: “Timoteo masa quehnoariquire ijire”, ni yahue tiahye. ³ Sa yero Pablo Timoteore nea duahye. Sa ijiepegãta ti yehpa cjẽna judio masa pehe Timoteo pacaro griego masũno tiquire ijigũ

masiahye. Sa yero Pablo judio masare “Usuari”, nino, Timoteo cuhnucunꝫ sohtoa cahserogāre yũhre neahye. Judio masa dutiye nidiro sahata yeahye. ⁴ Tiquiro sa yeri bato tiquina esari macari cjēnare tiquina dutiyere ojoari pũ cjēne yahuahye. Ti pũ Jesu cūriquina, tiquiro yequina pũhtoa mehna Jerusalēpꝫ ijyiequina tiquina ojoari pũ ijiahye. Sa ye ti dutiyere quehnoano yahuahye to cjēnare Jesu yequinare. ⁵ Tiquina sa yahugũ tũhoye Jesu yequina pehe Jesure wacũ tutua nemoahye. Sa ye Jesu yequina decoripe peyequina wahaducuahye.

Pablo quehēnopꝫ Macedonia cjānore ihñahye

⁶⁻⁷ Sa yero Asia yehpapꝫ pehere quehnoañe buheyere buhe dutierahye Espiritu Santo tiquinare. Sa ye tiquina Frigia yehpare yũhdũa, Galacia yehpare yũhdũa, Misia yehpa dũhtũ cahapꝫ esahye. Bitinia yehpa pehe waha duamahye. Tiquina waha duepegũta Espiritu Santo pehe tiquinare topare waha dutierahye. ⁸ Tiquiro sa nidi bato tiquina pehe Misia yehpare yũhdũa, Troapꝫ wihiri. ⁹ Topꝫ tiquiro wihiri bato ohõ saha quehēahye Pablo. Macedonia yehpa cjāno tiquiro caha ducugũ ihñahye tiquiro. “Ūsāre Macedonia yehpa cjānare yedohogũ ahtaya”, ni, pijiahye tiquiro Pablöre. ¹⁰ Tiquiro quehēdi bato wahcã, usã yere quehno tuhassa, Macedoniapꝫ wahaa wahau usã. “Cohācjũ ti yehpapare quehnoañe buheyere buhe dutiro nine marine”, ni tũhotuu usã.

Pablo, Sila mehna Filipopꝫ ijiahye

¹¹ Sa yena usã Troapꝫ ijina yucusa mehna Samotracia wame tiri nũcũopꝫ pehã sau usã. Sa yena ape deco Neapolipꝫ wahau usã. ¹² Ti macare yũhdũ cãna

Filipopꝫ Roma cjēna ya macapꝫ esaũ usã. Ti maca Macedonia yehpapꝫ ijiri maca ijiri. Ihyo ijiri maca ijierari. Topare meheñe decorigã usã ijii. ¹³ Sa yena saurũ ijigũ usã ti maca dũhtũ cahapꝫ, dia dũhtũ cahapꝫ esaũ. Topꝫ Cohācjũ mehna tiquina yahuducuro ijiri. Topꝫ dujina topꝫ cahmecoañe numia mehna yahuducuu usã. ¹⁴ Ihcācoro usāre tũhoricoro Tiatira cjõno Lidia wame tiorico ijiri. Sa yero ticoro quehnoañe suhti wapa tiye suhtire duaricoro, mari Pacure ño peoricoro ijiri. Sa yero Pablo yahuyere quehnoano tũhogũ yeri Cohācjũ tiorore. ¹⁵ Sa ye tiorore, ticoro ya wũhũ cjēna mehna wame yeri Pablo. Tiquiro sa wame yeri bato ohõ saha nidi ticoro:

—“Jesu yacoro tjire mũhũ gũhũ”, nine mũsa yũhũre. Sa yena ya wũhũpũ sajã tariña mũsa. Yũhũ mehna tojoarĩna, nidi ticoro usāre.

Ticoro sa nigũ tũhona ticoro ya wũhũpũ tojoarĩ usã.

¹⁶ Ape deco Cohācjũ mehna tiquina yahuducuropꝫ usã wahagũ watĩnore cũoricoro piti cari usāre. Ticoro apequina cahacjõno ijiri. Sa yero ticoro masare “Ohõ saha waharota mũsare”, ni, yahuyuricoro ijiri. Sa yahuro pajiro wapata basari ticoro pũhtoare. ¹⁷ Sa yero Pablo mehna usã wahagũ, usāre nũnũ tã, sañuducuri ticoro:

—Ahriquina Cohācjũ tutua yũhdũariquiro yedohoriquina ijire. Mari yariari bato Cohācjũ marine tiquiro quehnoano yũhdũoatire yahure tiquina, ni sañuducuri ticoro.

¹⁸ Peye decori sa ni cariboducuri Pablöre. Sa yero pari turi ticoro sa ni sañuducugũ tũhoro Pablo majare ihña, ohõ saha nidi watĩnore:

—Jesucristo tutuaye mehna duti-aja mũhũre. Tiorore duhuya. Waharĩsa mũhũ, nidi Pablo.

Tiquiro sa nigãta watĩno pehe wahaa wahari.

19 Tiquina sa yeri bato ticoro p̄ahtoa pehe niñeru ticoro wap-ataericoro wahagū ihñañe, tiquina Pablora, Sila mehna ñehedi. Ñehe tuhasa, tiquinare neari ti maca decop̄a p̄ahtoa cahap̄a. 20 Sa ne cã, buhiri dahre dutiyequina cahap̄a cūri tiquinare.

—Ahriquina judio masa mari ya maca cjēnare cariboye nine. 21 Tiquina mari dutiyere cohã dutiye, apeye buheyere buheye nine. Mari ye dutiyere ȳhdud̄acagū ye duaye nine. Mari Roma cjāna ijina ahriquina yahuye pehere ye masiedaja mari. Sa yena tiquina buheyere mari cahmedaja, nidi ticoro p̄ahtoa buhiri dahre dutiyequina.

22 Tiquina sa nigū t̄hoye masa peyequina Pablo gūh̄a mehna usua ȳhd̄ua wahahye. Sa ye buhiri dahre dutiyequina pehe Pablo gūh̄a suhtire tiquina t̄hrē cohāri bato daye cj̄gã mehna tana dutiri tiquinare. 23 Tutuaro tana tuhasa peresu yeri tiquinare. Tiquina sa peresu yeri bato peresu ij̄iyequinare cohteriquirore quehnoano ihña ihbo dutiahye tiquina. 24 Tiquina sa dutiri bato tiquinare cohteriquiro pehe ti w̄h̄a puhia cjā tucūp̄a tiquinare cū, taboa mehna tiquina dahpocārine biha cūahye.

25 Ñami deco Pablo, Sila mehna Cohācj̄re sini, tiquiore basa peohye. Tiquina sa basagū t̄hoahye apequina peresup̄a ij̄iyequina. 26 Tiquina sa ni basagūta ti w̄h̄a tutuaro ñuhmiahye. Sa ñuhmigū ihcāno mehna ij̄ipihtiye sope pahmari par̄a wahahye. Sa ye peresup̄a ij̄iyequinare tiquina d̄h̄teri dari come dari suru site dij̄iaa wahahye. 27 Sa wahagū ihñano ti w̄h̄are cohteriquiro pehe “Peresu ij̄iyequina duhti tuhasari jiri”, ni t̄hotumahye. Sa ni t̄hoturo tiquiore ñoseni p̄j̄ne

nedoqueo tiquiore basi ñosemahye. 28 Tiquiore sa yegū ihñano Pablo tiquiore tutuaro sañuducu ohō saha niahye:

—M̄h̄a basi ñano yeracāhña. Ij̄ipihtina ohōre ij̄iaja usā, niahye tiquiore tiquinare cohteriquirore.

29 Tiquiore sa nigū t̄horo tiquinare cohteriquiro pehe sihã duti, tiquina cahap̄a oma cã, Pablo, Sila tiquina dahpocāri cahap̄a nanare doque quehe sahye tiquiore. 30 Sa yero tiquiore tiquinare ti tucūp̄a ij̄iyequinare ne wijia, sinituahye:

—¿D̄ahse yeagari ȳh̄a Cohācj̄a yaquiore iji duaḡa? ni, sinituahye tiquiore.

31 —Jesucristore wacū tutuaya m̄h̄a. M̄h̄a acaye gūh̄a tiquiore wacū tutuaro. M̄sa sa yegū m̄sare pecap̄a wahaborinare Cohācj̄a ȳhd̄uorota, ni, yahuahye tiquina.

32-33 Tiquina sa nidi hora ñami deco batogã ij̄iahye. Tiquina sa nidi bato tiquinare cohteriquiro ya w̄h̄ap̄a neahye tiquinare. Tiquiore ya w̄h̄ap̄a ne sa, tiquina camine coseahye tiquiore. Tiquiore sa cose tuhasari bato tiquiore cohteriquiro acaye mehna ij̄igū Cohācj̄a yere buheahye Pablo gūh̄a. Tiquina buheri bato wame yeahye tiquinare. 34 Tiquina wame ye tuhasari bato tiquinare cohteriquiro Pablo gūh̄are ihyaye peohye. Sa ye tiquiore acaye mehna quehnoañe buheyere tiquina t̄hori bato tutuaro bucueahye, Cohācj̄are masi d̄acaye.

35 Bohrea par̄i cāhtagū ihñañe p̄ahtoa pehe surarare peresu yeri w̄h̄ap̄a ohoahye Pablo gūh̄are wio dutiye. 36 Tiquina sa wio dutiri bato ti w̄h̄are cohteriquiro Pablo gūh̄are yahuahye:

—P̄ahtoa m̄sare wio dutiri. Sa yena cuero marieno wij̄iaa, niahye tiquiore Pablo gūh̄are.

37 Tiquina sa wio duepegūta Pablo yahuahye surarare:

—Usā ñano yeru. Sa yena usā ne buhiri mariedaja. Ihyo warota tiquina pūtoa pehe masa ihñonopu yucari mehna tanari usāre, usā Roma cjāna usā ijiepegūta. Tana tuhasa peresu yeri usāre. Sa ye yojopu masa tiquina ihñeno wio duare usāre, usāre ñano tiquina yerire “Buro yuhduri”, niñe. Pūtoa tiquina basita wioye ahtaahro usāre, niahye Pablo surarare.

38 Tiquiro sa nigū tūhoye surara pehe pūtoare yahuye wahahye. Tiquina sa ni yahuri bato Pablo, Sila mehna Roma cjēna tiquina ijigū masiñe pūtoa pehe cue niahye. 39 Sa ye tiquina Pablo gūhu cahapu esa, ohō saha niahye:

—Ñano yeahti usā mūsare. Ne pari turi sa yesi, niahye pūtoa Pablo gūhare.

Sa ni tuhasa pūtoa tiquinare peresupu ijiequinare wio, tiquinare ape siepu waha dutiahye. 40 Tiquina sa nidi bato Pablo, Sila mehna peresupu ijiriquina wijia, Lidia wame tiricoro ya wūhupu wahahye. Ti wūhupu tiquina esari bato Jesu yequinare piti cahye. Sa ye tiquina Jesu yequinare quehnoano buheye, quehnoano jeripohna tigū yeahye tiquinare. Tiquina sa yeri bato Pablo, Sila mehna wahaa wahahye.

17

Tesalónica cjēna usuahye Jesu yequina mehna

1 Sa ye tiquina Anfipolipu esa, yuhduaye, Apoloniapu esa, yuhduaye, Tesalónicapu esahye tiquina. Topu judio masa buheri wūhu ijiahye. 2 Semanaripe tiquiro yeriro sahata Pablo buheri wūhupu wahae tiahye. Topu esa, ihtia semana waro saurú decorire tiquiro panopu cjē tiquina ojoarire Cohācjū yere masare buhe, tire

tiquina basi cahme yahuducue tiahye Pablo. 3 Sa yero tiquiro Cohācjū yere yahuahye:

—Judio masa, masa pūtoaro masa coheriquiro Cristo ah-tahye ñano yuhduatiquiro. Sa yero tiquiro yariaa wahahye masa mūjano taro. Sa yero ahriquirō Jesu, yūhu yahuriquiro, tiquiro Cristo warota ijire marine yuhduoatiquiro. Tiquirota ijire masa coheriquiro. Ohō sahata nine Cohācjū yere tiquina ojoari pū, ni yahuahye Pablo.

4 Tiquiro sa nigū tūhoye meheñequinagā topu ijiequina “Potota ijire”, niahye. Sa ye tiquina Pablo gūhu mehna wahahye. Sa ye apequina gūhu griego masa peyequina mari Pacare ño peoyequina pehe Pablore tūhoye, tiquina mehna cjēna numia gūhu peyequina pūtoa numia gūhu tiquirore tūhoye Jesu yequina tojoahye. Sa ye Pablo gūhu mehna wahahye. 5 Sa ijiepegūta apequina judio masa pehe tiquina sa wahagū ihñañe, ihñā coahye. Sa ye tiquina ñañequina dahraeyequinare peyequinare piji cahmecoah ohō saha ni dutiahye: “Ahriquina ñano yeye nine”, ni sañuducu dutiahye tiquinare. Sa sañuducuye ijipih-tiyequina ti maca cjēnare usuagū yeahye Pablo gūhu mehna. Sa ye judio masa Jasō ya wūhupu sajā, Pablo gūhare macamahye, tiquinare masapure ohoye tehe.

6 Sa macaepeta tiquinare bocaer-ahye. Sa ye Jasōre, apequina Jesu yequina gūhare ñehe, weje wijiaa wahahye tiquinare. Pūtoa cahapu ne sa, ohō saha ni yahusāhye tiquina.

—Pablo gūhu masare ijipih-tiropure caribo yuhduare. Sa ye yojopure tiquina mari ya macare wihi tuhasari. 7 Sa yero ahriquirō Jasō tiquinare tiquiro ya wūhupu sajā ta dutiri. Tiquina ijipih-tiye-

quina mari puhtoro Roma cjāno tiqiuro dutiyere yuhduɔcare. “Apequiro masa puhtoro ijire. Jesu tiqiurota ijire”, niñe, mari puhtoro dutiyere yuhduɔcare tiquina, ni yahusāhye judio masa pehe puhtoare.

⁸ Tiquina sa ni yahusāgū tūhoye, ijipihtiyequina masa, puhtoa gūhū usua, tutuaro sañuducuahye.

⁹ Tiquina sa sañuducuepegāta puhtoa Jasōre, tiqiuro mehna cjēna gūhare, niñerure wapa ye duti, wioahye.

Pablo Sila mehna Bereapū esahye

¹⁰ Ti pjeta ñamipū Pablo gūhare Jesu yequina nūo ohoahye Bereapū. Topū esa tiquina judio masa buheri wuhapū sajāa wahahye.

¹¹ Berea cjēna pehe Tesalónica cjēna yuhduoro Jesu yere quehnoano tūhoyequina ijiahye. Sa ye tiquina Jesu yere tūhori bato “¿Potota ijiajari?” ni masi duaye, decoripe tiqiuro yere tiquina ojoari pūre sa buheducue tiahye tiquina.

¹² Sa ye tiquina peyequina Jesure wacū tutuayequina ijiahye. Griego masa gūhū, umūa, puhtoa numia mehna Jesure wacū tutuayequina ijiahye.

¹³ Sa ijiepegāta Pablo Bereapū Cohācjū yere tiqiuro buhegū gūhare tūhoye, Tesalónica cjēna judio masa topū esahye. Topū esaye, Berea cjēnare quti dojomehneñe, Pablo gūhū mehna usuagū yeahye tiquina.

¹⁴ Tiquina sa yegū ihñañe Jesu yequina Pablōre sojaro mehna pajiri ma dūhtū cahapū ohoahye. Tiquina sa ohoepēgāta Sila, Timoteo mehna Bereapū tojoahye.

¹⁵ Sa ye apequina Pablōre Atenapū ne cā soahye. Tiquirore so tuhasa, majare tojoaa wahahye Bereapū tja.

—Sojaro mehna waha, piti tina wahaya Pablōre, ni yahuahye Silare, Timoteo gūhare.

Sa ni yahu dutiahye Pablo tiquinare.

Pablo Atenapū ijiahye

¹⁶ Sa yero Pablo Atenapū cohtero niahye Sila, Timoteo gūhare. Sa yero Atena cjēna “Cohācjū ijire”, tiquina niñe queoyere peye tiquina cūogū ihñano Pablo tutuaro bujūa witiahye tiquina mehna.

¹⁷ Sa bujūa witiro judio masa buheri wuhapū judio masa mehna yahuducuahye. Sa yero tja judio masa ijieyequina gūhare yahuducuahye tiqiuro. Tiquina ihquēquina mari Pacūre ño peoyequina ijiahye.

Sa yero Pablo ti maca decopū decoripe tiqiuro cahapū sa tini majare sajāñequina mehna yahuducuahye.

¹⁸ Apequina Epicúreo yere buheyequina, Estoico yere buheyequina gūhū Pablo mehna yahuducuahye.

—¿Ahriquiuro yahuducuye peyariquiuro dūhse ni yahuducuro niajari tiqiuro? niahye tiquina.

Pablo Jesu yere, tiqiuro masa mūjarire tiqiuro yahugū tūhoye ohō saha ni tūhotumahye masa. “Tiqiuro apequina cohāmanare yahuro niaga”, ni, tūhotumahye tiquina.

¹⁹ Tiquina tūhori bato Areópago wame tiropū Pablōre nea wahahye.

—Ahri buheye, wahma buheyere yojopū māhū yahurire masi duaja usā.

²⁰ Mūhū buheye sijoro saha ijire. Sa yena usā tire masi duaja, niahye tiquina Pablōre.

²¹ Ijipihtiyequina Atena cjēna decoripe wahma buheyere yahuducuducu duahye. Sa ye tire tūho duahye. Ape yehpa cjēna gūhū Atenapū ijiye, sata ye duahye. Sa ye Pablo yahuyere tūho duahye tiquina.

²² Sa yero Pablo Areópago wame tiropū wahcādūca, ohō saha ni yahuahye:

—Atena cĵana, peyequina mŭsa cohāmanare mŭsa tutuaro ño peona mŭsa ijigŭ masiaja yŭhŭ. ²³ Ahri maca mŭsa ya macare cohāmanare mŭsa ño peorire ihña tini yŭhŭ. Sa ihña tinigŭ yŭhŭ ihcā cuhturŭ, cohāmanare ño peona mŭsa ohoyere mŭsa cŭnopŭ ahrire buhei. “Cohācĵŭ, mari masimehnediquiro ya cuhtu ijire”, ni, ojoari jiri mŭsa tire mŭsa cŭnopŭ. Mŭsa tiqiurore masiedapenata tiqiurore ño peori jiri mŭsa. Tiquiroreta mŭsa masiediquirore yahugŭ niaja yŭhŭ mŭsare.

²⁴ Cohācĵŭ ijipihitiri yehpare, ijipihitire bajumehnediquiro ijire. Tiquiro ŭhmŭsere, yehpapŭre, pŭhtoro ijiro, tiqiuro masa tiquina yeri wŭhŭpŭ ijierare. ²⁵ Sa yero tiqiuro mari ijiyere, mari jeri neñe gŭhŭre, ijipihitire marine apee borore ohoriquiro ijiro, mari yedohoyere cahmedare. Tiquiro pejecŭoriquiro ijierare.

²⁶ Tiquiro ihcāquiro ŭmŭnore ye dŭcahye. Tiquiro mehnata ijipihitiri yehpa cĵenare masare yeahye. Sa yero ijipihitiri yehpapŭre marine cŭahye tiqiuro. “Ohō puno yoari pje ohōpŭre catieta”, nino queo cŭahye marine. ²⁷ “Tiquina yŭhŭre macañe, bocaeta”, ni tŭhotuahye Cohācĵŭ. Sa yero Cohācĵŭ yoaropŭ ijierare. Mari mehnata ijire. Ohō saha ni ojoahye. ²⁸ “Marine ijigŭ yere tiqiuro. Sa yero masa mehna sa ijiducure tiqiuro”, ni ojoahye. Mŭsa mehna cĵena panopŭ cĵena basayere quehnoano ojoayequina tiquina ojoariro sahata nii niaja. “Mari gŭhŭ Cohācĵŭ pohna ijiaja”, ni ojoahye tiquina. ²⁹ Sa yena tiqiuro pohna ijina ohō saha ni tŭhotueracāhña mŭsa. Queoyere, uru, plata, ŭtā mehna mŭsa esa tuharo mŭsa yeriquinare “Cohāmana ijire”, ni tŭhotueracāhña mŭsa. ³⁰ Panopŭ

masa tiquina masieñequina ijinigŭ tiquina ñañene yepegŭta Cohācĵŭ sa ihña cāhriahye. Sa yeperota yojopŭre ijipihitiri yehpa cĵenare tiquina ñañene bajua witi dutire Cohācĵŭ. ³¹ Came Cohācĵŭ tiqiuro queori decopŭ ijipihitiri yehpa cĵenare queoro beserota quehnoañequinare, ñañequinare. Tiquiro bese duti cŭriqiuro Jesu pehe beserota. Jesure yariariqiurore masoahye tiqiuro. Sa masono “Ahriqiuro yŭhŭ cŭriqiuro ijire”, ni, ihñono niahye Cohācĵŭ masare, ni yahuahye Pablo Atena cĵenare.

³² Tiquiro sa nigŭ masa mŭjarire tiqiuro yahuducugŭ tŭhoye apequina tiqiurore bajŭpeahye. Sa ye apequina pehe ohō saha niahye:

—Pari turi ahrire mŭhŭ yahugŭ ŭsā tŭho duaja, niahye tiquina Pablora.

³³ Tiquina sa nidi bato Pablo wahaa wahahye. ³⁴ Sa ye meheñequinagŭ tiqiuro mehna ijieye, Jesure wacŭ tutua dŭcahye. Dionisio Areópago cĵano pŭhtoa mehna cĵano Jesure wacŭ tutua dŭcahye. Damari wame tiricoro gŭhŭ, apequina mehna Jesure wacŭ tutua dŭcahye.

18

Pablo Corintopŭ ijiahye

¹ Sa ye, Pablo Atenapŭ ijiriquiro waha, Corinto wame tiri macapŭ esahye. ² Topŭ esaro, judio masano Aquila wame tiriqiurore boca sahye tiqiuro. Ijipihitirequina pŭhtoro Claudio wame tiriqiuro judio masare Romapŭ ijieyequinare tiqiuro cohāgŭ, Aquila pehe tiqiuro namono Priscila mehna waha, Corintopŭ esahye. Aquila pehe Ponto wame tiri yehpapŭ masa bajuariqiuro ijiahye. Sa ye tiquina Corintopŭ tiquina ijigŭ, Pablo tiquina cahapŭ esahye. ³ Aquila

gũhũ carpa cahseri wũhũsere yeye-
quina ijiahye. Pablo gũhũ carpa
cahseri wũhũsere yeriquirota
ijiahye. Sa yero tiquiro tiquina
mehna dahra, topũ tojoahye.
4 Sa yero Pablo saurũ ijigũ sema-
naripe judio masa tiquina buheri
wũhũpũ judio masare, judio masa
ijieyequina gũhũre Cohãcjũ yere
yahuahye. Tiquiro sa ni yahugũ
tũhoye, “Ijirota ijire”, niahye
tiquina ihquẽquina.

5 Sa ye Sila, Timoteo mehna
Macedoniapũ ijiriquina, Pablo ca-
hapũ esahye. Topũ tiquina esari
bato Pablo pehe ijipihtiye decori
judio masare quehnoano buhee
tiahye:

—Jesu, Cristo marine yãhdũoatiquire
mari coheriquiro ijire, ni yahue
tiahye tiquiro.

6 Tiquiro sa ni buhepegũta,
judio masa pehe tiquirore tũho
duerahye. Sa ye tiquina ñano ni
quti dojomehneahye tiquirore.
Tiquina sa yegũ Pablo tiquinare
tiquiro tuhtiboriro sahata, tiquiro
suhtirore dihta wahãrire wejẽ site
cũahye.

—Mũsa ye buhiri pecapũ wa-
hanata. Cohãcjũ tiquiro dutiriro
sahata mũsare buhemi yãhũ.
Sa buhepegũta mũsa yũhũre
tũho duerari. Yojoapũre judio
masa ijieyequina pehere buhegũ
wahãtja, niahye Pablo judio
masare.

7 Tiquiro sa nidi bato tiquiro topũ
ijiriquiro waha, Ticio Justo wame
tiriquire ya wũhũpũ esahye. Justo
Cohãcjũre ño peoriquiro ijiahye.
Tiquiro ya wũhũ pehe judio masa
buheri wũhũ cahapũ ijiahye. 8 Sa
ye Crispo wame tiriquire buheri
wũhũre coheriquiro, tiquiro na-
mono, tiquiro pohne gũhũ Jesure
wacũ tutuayequina ijiahye. Sa ye
apequina Corinto cjẽna peyequina
Cohãcjũ yere tũhoye, Jesure wacũ
tutuahye. Tiquina sa wacũ tu-
tuayequina ijigũ tiquinare wame

yeahye. 9-10 Ihcã ñami Cohãcjũ
quehẽnopũ yahuahye Pablore.
Tiquirore ohõ saha niahye:

—Mũhũ mehna ijiaja. Ahri
macare yeequina peyequina ijire.
Sa ye apequina masa mũhũre ñano
ye masiedare. Sa yegũ cueracãhña
mũhũ. Sa cueragũ yeere tutuaro
yahuya. Sa tũhotueracãhña, ni
yahuahye Cohãcjũ Pablore.

11 Sa ye ihcã cũhma quehnoano,
ape cũhma deco waro to cjẽnare
Cohãcjũ yere buhe, ijie tiahye
Pablo.

12 Tiquiro sa ijiri watoa Galiõ
wame tiriquire Acaya yehpa cjẽna
pũhoro tiquiro ijigũ judio masa
ijipihtiyequina ihcãno mehna
Pablore yahusãñe taye, tiquirore
buhiri dahre dutiyequina cahapũ
neahye tiquina.

13—Ahriquire masare Cohãcjũre
ñõ peo dutiro ahri yehpa cjẽ
dutiye pehere cohã dutiro nine,
ni yahusãhye judio masa buhiri
dahre dutiyequinare.

14 Tiquina sa ni yahusãgũ
tũhoro Pablo pehe tiquinare
yahu duamahye. Sa yahu
duepegũta Galiõ pehe judio
masare yahuahye:

—Ahriquire usã Roma cjãna ye
dutyere yãhdũdũcariquire tiquiro
ijigũ mũsare yãhtiboaya yãhũ. 15 Sa
yena mũsa judio masa ye dutiye pe-
here ahriquire yãhdũdũcariquire
ijigũ mũsa basi quehnoña. Ahrire
mũsa mehna masino pjerare
yũhũre, ni yahuahye tiquiro judio
masare.

16 Sa ninota tiquinare judio
masa yahusãñe ahtamediquinare
tiquiro ya tucũpũ ijiriquinare cohã
wioahye tiquiro. 17 Tiquiro sa
cohã wiori bato ijipihtiyequina
ti wũhũpũ ijiriquina Sostenene
judio masa buheri wũhũre co-
heriquirore Jesu yaquire ñehe,
buhiri dahre dutiyequina cahapũ
queãhye tiquirore. Tiquina sa
quẽgũ ihũano Galiõ sa ihũna cãhye.

Pablo Antioquíap̄ tojoaa wahahye

18 Sa yero Pablo Corintop̄ yoari pje ijiriquiro “Wahap̄ niaja”, ni cohe tiahye tiquiro Jesu yequinare. Tiquiro sa nidi bato tiquiro Priscila, Aquila mehna Siria yehpap̄ ijiri macap̄ pehãa wahahye. Cencrea wame tiri petamahap̄ tiquina esari bato Pablo Cohãcjũre “Ohõ saha mah̄are ye basat̄ja”, tiquiro nidire ye tuhasariquirop̄ ijiahye. Sa yero sa yeriquina judio masa tiquina yeducuriro sahata tiquiro poarire waha peho dutiahye. 19 Sa yero tiquina Efeso wame tiri macap̄ pehã sa, Priscilare, Aquila gãh̄are cãahye Pablo. Tiquinare top̄ cũ, judio masa tiquina buheri wãh̄ap̄ wahahye. Ti wãh̄ap̄ esa, Cohãcjũ yere yahuahye. Sa yahuro judio masa mehna yahuducuahye. 20 Tiquiro sa yahuducuri bato tiquirore tiquina mehna tojoa dutimahye. Tiquina sa dutiepegãta ohõ saha niahye Pablo:

—Tojoeraja masa mehna, niahye Pablo tiquinare.

21 Sa ninota,

—Wahagũ niaja. Cohãcjũ cahmegũ pari turi tojoa taboaga, niahye tiquinare Pablo.

Sa ni tuhasa Efesop̄ ijiriquiro pehãa wahahye tiquiro.

22 Sa yero Cesareap̄ pehã sa, yãhdũ cã, Jerusalẽp̄ esahye. Top̄ esa, to cjẽna Jesu yequinare “¿Ne ijiajari masa?” ni, tiquinare ihña yãhdũ Antioquíap̄ esahye. 23 Top̄ meheñe decorigã ijiahye. Top̄ ijiriquiro yãhdũahye. Galacia yehpap̄ ijiye macarip̄, Frigia yehpap̄ ijiye macarip̄ pari turi esa, ti macari cjẽnare Jesu yequinare buhero, bucuegũ yeahye.

Apolo wame tiri quiro Efesop̄ buheahye

24 Ti pjere, judio masũno Apolo wame tiri quiro, Alejandría cjũno Efesop̄ esahye. Tiquiro quehnoano yahu mihnidiquiro ijiahye. Sa yero tiquiro Cohãcjũ ojarire quehnoano masiahye. 25 Apequiro tiquirore Cohãcjũ yere yahu tuhasae tiahye. Sa yero tiquiro Ñu wame yeriquiro ye buheye dihitare masiahye. Sa ijieperota tiquiro tutuaro bucueye mehna Cohãcjũ yere quehnoano buheahye. 26 Sa

yero judio masa tiquina buheri wãh̄ap̄ tiquiro cuero marieno tiquinare buhe dũcahye. Tiquiro sa buhegũ tiquina tãhori bato Priscila, Aquila mehna tiquirore tiquina mehna neahye. Cohãcjũ yere tiquiro quehnoano poto yahu pehoeragũ ihñañe quehnoano poto yahu pehoahye tiquina tiquirore.

27-28 Sa ye tiquiro Apolo pehe Acaya yehpap̄ tiquiro waha duagũ Jesu yequina tiquirore “Quehnoano wahaya”, ni, ojoari pũrine ohoahye tiquirore. Ti pũri Acayap̄ ijiyequina Jesu yequinare Apolore quehnoano piti ca dutiye pũri ijiahye. Sa yero Apolo top̄ esaro, to cjẽnare Jesure wacũ tutuayequinare Cohãcjũ cahñe mehna quehnoano yedohoahye. Judio masare ti macap̄ ijiyequinare ohõ saha ni yahuahye:

—Cohãcjũ ohoriquiro masa coheriquiro ijire Jesu. Cristo waro ijire tiquiro, ni yahuahye judio masare apequina masa tiquina ihñonop̄.

Cohãcjũ yere tiquina ojoari mehna tiquiro quehnoano queoro yahugũ tãhoye tiquina “Poto ijierare”, ni masiedahye. Sa yero Cohãcjũ cahñe mehna tiquirore wacũ tutuayequinare quehnoano yedohoahye Apolo.

19

Pablo Efesop̄ wahahye

¹ Corintop_u Apolo tiquiro ijiri watoa, Pablo pehe c_un_u c_up_u m_uja y_uhd_ua, Efesop_u esahye. Top_u esaro ihqu_equina Jesu yequinare bocahye. ² Tiquinare boca saro tiquiro tiquinare sinituahye:

—¿M_usa Jesure wac_u tutuari bato m_usa pehe Esp_iritu Santore c_uo d_ucari? ni, sinituahye Pablo.

Tiquiro sa nig_u t_uhoye tiquirore oh_o saha ni yahuahye tiquina:

—“Esp_iritu Santo ijire”, ni yahuerari _us_ure, ni yahuahye tiquina.

³ Tiquina sa ni yahuri bato Pablo tiquinare sinituahye tja:

—¿Noa ye buheyere m_usa t_uhori bato wame yeri m_usare? niahye tiquiro tja.

—Ñ_u ye buheyere _us_u t_uhori bato wame yeri _us_ure, ni yahuahye tiquina.

⁴ Tiquina sa nig_u t_uhoro oh_o saha niahye Pablo:

—Masa tiquina ña_une yerire tiquina duhug_u ih_uno wame yeahye Ñ_u. Sa yero tiquiro wame yeye pehe tiquina ña_une yerire tiquina duhurire masare ih_uoati ijire. Sa yero apee boro g_uh_ure yahu nemoahye Ñ_u. “Y_uh_u bato ahtariquiro pehere wac_u tutuaya m_usa”, ni yahuahye tiquiro. Sa nino Jesure yahuro niahye, ni yahuahye Pablo tiquinare.

⁵ Tiquiro sa nig_u tiquina t_uhori bato, Jesu wame mehna wame yeahye tiquinare. ⁶ Sa yero Pablo tiquina ihqu_equina bui tiquiro omoca duhu peog_u, Esp_iritu Santo pehe wihiahye tiquinap_ure.

Tiquiro sa wihiri bato tiquina pehe t_uhomehne_une yahuducuye mehna yahuducu, Coh_uc_u yere yahuahye. ⁷ Tiquina ijipihtiequina doce _um_ua ijiye iji_uoga.

⁸ Came Pablo judio masa tiquina buheri w_uh_up_u saj_u, ihtia as_u waro decoripe cuero marieno Coh_uc_u p_uhtoro tiquiro ijiyere

yahuducuahye tiquina mehna. Tiquirore tiquina sa t_uhori bato “Ahri ijirota ijire”, niahye tiquina.

⁹ Sa niepeg_uta apequina pehe t_uho duerahye. Sa ye tiquina masa t_uhoro quehnoa_une buheyere ñano niahye. Tiquina sa nig_u t_uhoro Pablo pehe Jesu yequinare piji wijia, ape siep_u wahahye.

Waha, Tirano wame tiri w_uh_u buheri w_uh_up_u decoripe masare Coh_uc_u yere yahuahye tiquiro.

¹⁰ P_ua c_uh_uma waro buhee tiahye tiquinare. Tiquiro sa buheg_u

ijipihtiequina Asia yehpa cj_una judio masa, judio masa ijieyequina mehna mari p_uhtoro Jesu yere t_uhoahye. ¹¹ Sa yero Coh_uc_u tutuaye mehna Pablo peye tahari ye ih_uoahye. ¹² Suhti cahseri Pablo tiquiro pag_ure pihari cahserire,

tiquiro pihari suhti g_uh_ure ne c_u, dohatiyequinare ohoahye. Ti suhtire ohog_u tire ñehe_une tiquina dohatiye y_uhd_ua wahahye. Sa ye wat_ua tiquina mehna ijiriquina waha wahahye ti suhtire tiquina ñehedi bato.

¹³ Sa ijig_u apequina judio masa, sa tiniducuyequina, wat_uare coh_uñequina judio masa yayia ijiahye. Sa ye Pablo tiquiro yeriro sahata Jesu tutuaye mehna wat_uare coh_u duamahye. Sa ye wat_uare duhu dutimahye tiquina.

—Pablo yahuriquiro, Jesu tiquiro tutuaye mehna dutiaja m_usare. Wahaya. Ahriquiro mehna pari turi ijierac_uh_una, nimahye tiquina wat_uare ohoye.

¹⁴ Esceva wame tiri quiro siete tiquiro pohne pehe sata yemahye. Esceva pehe judio mas_uno pahia p_uhtoro ijiahye. ¹⁵ Tiquiro pohne wat_uno tiquina waha dutiri bato, wat_uno pehe oh_o saha niahye tiquinare:

—Jesure masiaja. Pablo g_uh_ure masiaja. M_usa pehere masiedaja, niahye wat_uno tiquinare.

—Jesure masiaja. Pablo g_uh_ure masiaja. M_usa pehere masiedaja, niahye wat_uno tiquinare.

16 Tiquiro sa nigāta watīnōre cūoriquiro pehe tutuaro tiquinare ñehe maa wahahye. Sa yero tiquinare ña yūhdūaro yeahye. Tiquiro sa yeri bato suhti marieñequina, cami tiyequina oma wijiaa wahahye tiquina ti wūhure. 17 Tiquina sa yeri bato ijipihtiyequina Efeso cjēna, judio masa, judio masa ijieyequina mehna tire tūhoye, cue yūhdūahye tiquina. Sa ye mari puhtoro Jesu yere bujūpero marieno yahuducuahye masa pehe.

18 Sa ye masa peyequina Jesure wacū tutuayequina tiquina ñano yerire yahuye ahtahye. 19 Tiquina mehna cjēna peyequina yayia masare ujuayequina yero saha yeyequina ijiahye. Sa ye tiquina ojoari pūrīne yayia tiquina yerire yahuye pūrīne topū ne cāhta, masa ihñonopū ti pūrīne hūā cohā cāhye tiquina. Ti pūrī wapa tirire tiquina queogā, ijipihtiye pūrī cincuenta mil cjoeri niñeru cjoeri wapa timahye ti pūrī. 20 Sa ye Cohācjū yere cahmeñequina peyequina wahahye. Cohācjū tutuaye mehna tiquiro yequina wahahye.

21 Tiquina sa wahari bato Pablo ohō saha ni tūhotuahye: “Macedonia yehpapū esa mūhta, ti yehpare yūhdūa, Acaya yehpare esautja. Ti yehpare yūhū esari bato Jerusalēpū wahaatja. Ti macare yūhū esari bato Romapū wahaatja”, ni tūhotuahye Pablo. 22 Pūaro tiquirore yedohoyequinare tiquiro pano oho mūhtahye Macedonia yehpapū. Timoteo, Erasto gāhū ijiahye tiquina. Sa yero Pablo pehe ihcāquirotā tojoa nūnū tārīahye Asia yehpapū.

Efesopū masa usua, sañuducuahye

23 Ti pjere Efesopū Jesu yere apequina cahmedaye, Pablo gūhure tuhtiahye. 24 Plata mehna dahrariquiro Demetrio wame tiriquiro plata mehna cohācjōno

Artemisa wame tiricoro ya wūhū queoyere yeriquiro ijiahye. Sa yero tiquiro apequina plata mehna dahrayequina mehna ti queoyere dua, pajiro wapatahye tiquina. 25 Sa yero Demetrio apequina plata mehna dahrayequinare piji cahmecoa yahuahye tiquinare.

—Tūhoya mūsa. Ahri dahraye mehna pajiro mari wapatarire masine mūsa. 26 Ahriquiro Pablo yerire tiquiro buheri gāhure masine mūsa. Ohō saha ni buhere tiquiro. “Cohāmana queoye masa tiquina yeyequina catiyequina ijierare”, ni yahue tiri tiquiro. Tiquiro sa nigū tūhoye peyequina Efeso cjēna, ijipihtiropū apequina Asia yehpa cjēna gāhū ti buheyere “Ijirotā ijire”, nie tiri. 27 Sa niñe mari dahrayere masa ñano yahuducuboaga. Sa ye mari yacoro cohācjōno Artemisa ya wūhure masa cohāboaga. Sa yero ticoro ijipihtiyequina Asia yehpa cjēna, ijipihitiri yehpa cjēna tiquina ño peoricoro ticoro ijiepegāta ticoro tutuaye butiarota. Sa ye masa ticorore masiedaboaga, niahye Demetrio tiquinare.

28 Tiquiro sa nigū tūhoye tiquina pehe tutuaro usua, sañuducuahye:

—Artemisa Efeso cjāna mari yacoro cohācjōno tutuaricoro ijire, ni, sañuducuahye tiquina.

29 Sa ye Efeso cjēna ijipihtiyequina sañuducu yūhdūa, tūho masiñe pihtia wahahye. Sa wahaye, Gayore, Aristarco gūhure ñehe, masa tiquina cahmecoanopū tiquinare weje cāhye. Gayo, Aristarco mehna Macedonia cjēna ijiye, Pablo mehna tiniñequina ijie tiahye. 30 Sa ye Pablo masa cahapū tiquiro waha duagā, Jesu yequina pehe tiquirore waha dutierahye. 31 Sa ye apequina ti yehpa cjēna puhtoa, Pablo mehna cjēna ijiye, tiquina cahācjēnare yahu dutiahye Pablōre:

—Masa tiquina cahmecoanopu wahaeracãhña, ni yahu duti ohoahye puhtoia tiquina cahacjẽnare Pablorupe.

³² Sa ye topu cahmecoañequina mehna cjẽna pehe peyequina “¿Duhsena tana mari cahmecoana nijari?” ni, masiedahye. Sa ye tiquina sañuducu nemoahye. Ahrie pehepu ijyequina sijoro ni, sañuducuahye. Apequina gãhu sijoro ni sañuducuahye. ³³ Sa ye judio masa pehe Alejandro wame tiriquire masare yahu dutimahye. Sa yero Alejandro “Dihta mariahña”, nino tiquire omoca mehna quẽ dijiyahye. “Ahriquina usãre judio masare tuhtye nine”, ni tuhoturo judio masare cahmota duaro, yahuducumahye. ³⁴ Tiquire sa niepegũta judio masano tiquire ijigũ ihñañe masa ijipihtiyequina ihcãno mehna puã hora waro sañuducuahye:

—Artemisa, Efeso cjãna mari yacoro cohãcjõno tutuaricoro ijire, ni, sañuducuahye tiquina.

³⁵ Tiquina sa ni sañuducugũ ihñano, Efeso cjẽna puhtoare yedohoriquiro masare, “Dihta mariahña”, ni, yahuahye tiquire.

—Masa Efeso cjãna tuhoya. Efeso cjãna mari yacoro tutuaricoro cohãcjõno Artemisa ya wãhu cohtena mari ijigũ ijipihtiri yehpa cjẽna masine. Sa ye uhmũsepu bora dijia tari queoyere cohtena mari ijigũ gãhure masine masa. ³⁶ Sa ye apequina “Ahri poto ijierare”, ni masiedare. Sa yena usueracãhña masa. Quehnoano tuhotuya masa. ³⁷ Ahriquina masa ñehe tariquina mari cohãcjõnore ñano ni yahuducuerari. Sa ye tiquina cohãmana wãhũsepu sajà, yaquerari. Sa yena quehnoano yeya masa. ³⁸ Sa ye Demetrio, plata mehna dahrayequina mehna ahriquinare masa ñehediquinare yahusã duaye, buhiri dahre dutiyequina pehere

yahuahro tiquina. Tiquina buhiri dahre dutiyequinare ahriquinare yahusã masine. ³⁹ Pari turi cahmecoana quehnoano mehna cahmecoaña. Yojobure masa yeriro saha yeracãhña. ⁴⁰ Miare masa ihyo waro usua, sañuducurire mari puhtoia tuhoye, “Marine cohãñe niaga”, ni tuhotueta tiquina. Sa yena masa sa ni sañuducurire tiquire quehnoano poto yahu masiedaja mari, niahye puhtoare yedohoriquiro masare.

⁴¹ Sa ni yahu tuhasa, “To puno tjire. Wahaya”, niahye tiquire masare.

20

Macedonia yehpapu gãhure, Grecia yehpapu gãhure Pablo esahye

¹ Ti sa wahari bato, Pablo pehe Jesu yequinare piji cahmeco yahuahye. Yahu tuhasa, tiquire cohe tiahye. Cohe ti tuhasa, Macedonia yehpapu waha wahahye. ² Topu esa, buhe, to cjẽna Jesu yequinare bucuegũ yeahye tiquire. Tiquire buhe tuhasa, Grecia yehpapu esahye tiquire. ³ Topu tiquire ihtia asũ waro ijyahye. Topu ijiro Siria yehpapu pehãa waha duamahye. Tiquire sa waha duepegũta judio masa duhti queahye, tiquire ñehe duaye. Sa yero Pablo ape mahapu, Macedoniapu wahari mahapu wahahye. ⁴ Sa waharo Asiaputa esahye. Topu Berea cjãno Pirro macano Sõpater wame tiriquire pehe Pablore piti ti cãhye. Sa ye Tesalõnica cjẽna Aristarco, Segundo gãhu tiquire piti ti cãhye. Sa ye Asia cjẽna Tiquico, Trõfimo gãhu Asiapu tiquire piti ti cãhye. Derbe cjãno Gayo wame tiriquire Timoteo gãhu tiquire mehna wahahye. ⁵ Tiquire mehna cjẽna tiquire pano waha, Troa wame tiri macapu tiquire cohteri jiri. ⁶ Tiquina sa cohtegũ pugũ yeye

moremehneñe pãre tiquina ihyari bose deco bato usã pehe Filipopu ijirina yucusa mehna waha, ihcã omope decori pehã, Troapu usã esau. Siete decori waro ijii topure.

Troapu Pablo tinino wahahye

7 Domingo ijigũ Jesu yequina cahmecoã, pãre duhu peori Santa cena yeye tehe. Tiquina sa yeato pano Pablo tiquinare buheri. Sa yero Pablo ape decopu wahatiqiro ijiro yoari pje tiqiro buheri. Nami decopu buhe duhuro taro nimesi. 8 Sa yena uhmãno cãã tucũpu peye paca sihãñe paca ijiri tucũpu cahmecoã usã. 9 Pablöre tiqiro tãhori watoa wahmãno Eutico wame tiriqiro meheni sopecahagã buipũ mũja pje dujiri. Sa yero Pablo tiquinare yoari pje tiqiro buhe nemogũ wahmãnore wũjũa ahtari. Sa yero tiqiro carĩ maa, ihtia casario buipũ dujiriqiro majare maa dijiaã wahari. Tiquiro bora dijiaã bato tiquina tiqirore yariariqiropure tu wahcõ dapori. 10 Tiquina sa yegũ ihñano Pablo dijia, wahmãnore quẽ suhsuri. Tiquiro sa yeri bato Jesu yequinare yahuri tiqiro:

—Jeripohna ñadacãhña. Yariere ahriqiro. Catire, nidi Pablo pehe.

11-12 Tiquiro sa nigã wahmãno yariamediqiro masaa wahari. Tiquiro sa masagũ ihñañe tiquina bucue yuhduari. Sa bucueye uhmãno cãã tucũpu mũja, pãre duhu peori Santa cena yeye tehe. Tiquina sa yeri bato yoari pje Pablo tiquinare buheri. Tee bohreato panogãpu tiquinare buhe duhuri. Tiquiro buhe tuhasagũ wahaa wahau usã.

Pablo Troapu ijiriqiro waha, Miletopu esahye

13 Pablo pano yucusa mehna Asõpu usã pehe esa mũhtaũ. Pablo pehe mahapu waha duari. Pablo tiqiro nidiro sahata Asõpu

tiqirore usã piti caũ. 14 Tiquirore usã piti cagũ, usã mehna tiqiro sajãri yucusapu. Tia mehna waha, Mitilenepu usã esau. 15 Topure esa yuhduã, ape decopu Quõre yuhduã usã. Ape decopu Samopu esau usã. Ape deco pehere Miletopu esau usã. 16 Pablo Pentecoste deco ijigũ, Jerusalẽpu esa duari. Sa yero Asia yehpapu yoari pje iji duerari. Sa yero Efesore poto yuhduã, Miletopu wahã sau usã.

Pablo Efeso cãñare Jesu yequina puhtoare yahuahye

17 Sa yero Pablo Miletopu ijiro, Efeso cãñare Jesu yequina puhtoare pijiori tiqiro. 18 Sa tiqiro pijiori bato tiquina Pablo cahapu wihiri. Tiquina wihigũ ihñano tiquinare Pablo yahuri:

—Asiapu coã wihigũ mũsa mehna yuhu yerire masine mũsa. 19 Mũsa mehna ijigũ ne sijoro nino marieno Jesu, mari puhtoro yere yee tii yuhu. Sa yegũ mũsare paja ihñau. “Mũsare yuhduãcaja”, niedu yuhu. Judio masa yuhure tiquina ñano yepegũta Cohãcãjũ yere yee tii yuhu. 20 Sa yegũ mũsa quehnoano wahatire cahmegũ mũsare yahu peho cãũ yuhu. Masa tiquina ihñonopu mũsa wuhusepu gũhare buhei yuhu. 21 Sa yegũ judio masare, judio masa ijieyequina gũhare ihcãno mehna buhei yuhu. “Mũsa ñañene bujũa wõtina, Cohãcãjũ ye pehere comesaya. Sa yena Jesu mari puhtoro wacũ tutuaya”, ni yahuu yuhu. 22 Sa yegũ Espõritu Santo tiqiro dutiro sahata yojopure Jerusalẽpu wahau ñaja. Yuhu topu wahagu yuhu dahse wahatire masiedaja yuhu. 23 Ohõ saha nidi Espõritu Santo yuhure: “Jerusalẽpu mũhu ñano yuhduãta. Sa ye mũhure peresu yeeta”, nidi Espõritu Santo yuhure. Yojopure yuhu macaripe yuhu esagũ sa ni yahuri yuhure. Jerusalẽpu wahagu Espõritu Santo

tiquiro yahuri dihitare masi-
aja. ²⁴ Tiquiro sa yahuepegūta
quehnoañe buheyere, Cohācjū
tiquiro cahīne buheyere yahuacjū
ijiaja. Jesu mari puhtoro tiquiro
ye dutirire ye peho duaja. Ahrire
yerigū ijigū, yūhū yariatire cueraja
yūhū.

²⁵ 'Sa yegū mūsa mehna ijigū
Cohācjū tiquiro puhtoro ijiyere
yahue tii yūhū mūsare. Ne
mūsare pari turi ihñasi yūhū.
Ahrire masiaja yūhū. ²⁶⁻²⁷ Sa
masigū miare ahrire yahuaja
mūsare. Ijipihtiye Cohācjū yere
yahuu yūhū mūsare. Sa yero
ijipihtiyequina mūsa mehna
cjēna Cohācjū yere cahmeeñequina
tiquina ijigū yee buhiri ijierare.
²⁸⁻²⁹ Mūsa basi quehnoano yeya.
Sa yena Jesu yequinare Espiritu
Santo mūsare ihbo dutigū, tiquiro
ihbo dutiriquinare quehnoano
ihboya. Ovejare ihboyequina
ovejare tiquina ihboro saha Jesu
yequina gūhure ihboya mūsa.
Cohācjū macūno tiquiro yariaro
tiquiro dii cohāno mehna Cohācjū
tiquinare tiquiro yequina ijia-
tiquinare yeri. Yūhū ohōre wahari
bato apequina ñañequina pehe
yaquiro ovejare tiquina wejēno
saha Jesu yere mūsa yeborire
dojomehneeta. Sa yena Jesu
yequinare quehnoano ihboya.
³⁰ Camerūre apequina mūsa
mehna cjēna pehe Jesu yequinare
ni meho, apeye buheyere tūho
dutieta. Tiquina sa dutigū tiquina
tūhoeta. ³¹ Sa yena quehnoano
yeya mūsa. Decoripe, ñaminipe paja
ihñañe mehna buhei yūhū mūsare.
Ihtia cūhma waro quehnoano
buhei yūhū mūsare ijipihtinare.
Tire quehnoano wacūña mūsa.

³² 'Yojopure yūhū wahari bato
Cohācjū mūsare ihña ihborota.
Tiquiro cahīne buheyere buhena
quehnoano ijinata mūsa. Cohācjū
tiquiro buheye mehna mūsare

tiquiro yequinare quehnoano
yedoho masine. Sa yero tiquiro
yequina dihitare tiquiro ye
duariro sahata mūsa pūritare
quehnoano yerota. ³³ Mūsa niñeru
cūoyere, mūsa suhti cūoye gūhure
“Yūhūre ohoya”, niedū. ³⁴ Yūhū
basi dahra wapataū ye ijiatire. Sa
yegū yūhū cahmeeñene, yūhū mehna
cjēna tiquina cahmeeñe gūhure yūhū
dahra wapatari mehna nei. Yūhū
sa yerire masine mūsa. ³⁵ Mari ohō
saha tutuaro dahrana apee boro
cūoyequinare yedohoro cahmene
marine. Ahrire mūsare ye ihñou
yūhū. Jesu mari puhtoro tiquiro ni-
dire wacūña mūsa. “Tiquiro ohogū
ñehediquiro yūhdūoro ohoriquiro
pehe bucuere”, nidi jiri Jesu
tiquiro basi, ni yahuri Pablo Jesu
yequina puhtoare.

³⁶ Sa nidi bato Pablo tiquina
mehna dūsepe curi mehna quehe
sa, Cohācjūre sinidi. ³⁷ Tiquiro
sa sinidi bato tiquina ijipihtiyequina
Pablōre quē suhsu, wah-
supure ihmi, utiri. ³⁸ “Mūsare pari
turi ihñasi yūhū”, to pano tiquiro
nigū tahoye tutuaro bujūa wītiri
tiquina. Sa ye tiquirore tu nūnū
tā buhari petamahapū. Topū usāre
ihña nūnū tāri usā wahagū.

21

*Pablo Jerusalēpū pari turi wa-
hahye*

¹ Jesu yequinare “Wahana ni-
aja”, ni, yucūsa mehna, Cos wame
tiri nūcūopū poto waha, pehā saū
usā. Ape decopū Roda wame
tiri nūcūopū pehā sa, yūhdūa,
Pátara wame tiri macapū esau usā.
² Pátarapū ijina, Feniciapū waha-
tiare yucū sare bocaū usā. Sa yena
tia mehna wahaū usā. ³ Sa wahana
Chipre wame tiri nūcūore poto ihña
yūhdūū usā. Cū pehe pehe ijiri ti
nūcūo. Ti nūcūore yūhdūa, Siria
wame tiri yehpapū esau usā. Sa
yena yucūsa cjē doeri cjēne yucūsa

cjāno Tiro wame tiri macapū tiquiro dure mogū topū pahsarīi. ⁴ Topū Jesu yequinare ihñana, siete decori waro tojoarīi usā ti macapū. Sa ye to cjēna Jesu yequinare Espiritu Santo tiquiro yahuriro sahata tiquina Pablore Jerusalēpū waha dutieramedi. ⁵ Tiquina sa niepegāta ti macare siete decori usā ijiri bato, wahaū usā. Usā waha to panogā ijipihtiyequina Jesu yequina, tiquina namosānumia mehna, tiquina pohne mehna, maca dāhtū cahapū usāre ihñā tojoari. Sa yena ijiphtina usā padūropū esa, dūsepe curi mehna quehe sa, Cohācjūre sinii. ⁶ Usā sa sinidi bato, “Wahana nijā”, ni, tiquinare quē suhsu bato ti wahaū usā. Usā wahagū ihñā nūnū tā, tiquina pehe majāa wahari tiquina ye wahaūsepu.

⁷ Tiro wame tiri macare maja yūhdūū usā. Sa yena Tolemaidapū wahā sau usā. Topūta pajiri mare waha bato tii usā. Ti macapū esa, Jesu yequinare “¿Usā acaye, ijijajari?” ni, ihcā deco usā tiquina mehna ijinii. ⁸ Sa yena ape decopū tja Pablo mehna mahapū wahaū usā Cesarea wame tiri macapū wahana. Topū esa, quehnoañe buheyere yahuriquiro Felipe wame tiriquiro ya wahaū esau. Sa yena tiquiro mehna tojoau usā. Felipe Jesu yequina tiquina siete besenohriquina mehna cjāno ijiri. ⁹ Sa yero tiquiro pititiaro numia pacaro ijiri. Tiquina numia pehe Cohācjū yere yahuye numia ijiri. Nuhmia ijiri. ¹⁰⁻¹¹ Topū usā meheñe decorigā usā ijiri bato, Agabo wame tiriquiro Cohācjū yere yahu māhtariquiro Judeapū ijiriquiro usāre ihñano wihiri. Sa yero tiquiro Pablo ya dare jeri turi dare ne, tiquiro dahpocārine, tiquiro omocarine dāhtero, queo yahuri:

—Ohō saha nidi Espiritu Santo.

“Ahri dare cūoriquiro Jerusalēpū tiquiro esagū, judio masa sa dāhteeta tiquirore. Dāhte tuhāsa, judio masa ijieyequinare ohoeta tiquina tiquirore”, nidi Espiritu Santo, ni yahuri Agabo.

¹² Tiquiro sa nigū tuhona, usā Cesarea cjēna mehna Pablore tutuaro cahīi usā. Tiquirore Jerusalēpū waha dutierami. ¹³ Usā sa nigū Pablo pehe yūhtiri:

—¿Dāhse ni utina nijajari mūsa? Yūhū pehere bujūa witigū yeaga mūsa. Tiquina yūhūre peresu tiquina yegū quehnoanota. Yūhū Jerusalēpū Jesu mari pūhtoro yere yūhū yeri buhiri yūhū yariagū quehnoanota, nidi Pablo usāre.

¹⁴ “Wahaeraja”, tiquiro nigū tūho duana nimi usā. Tiquiro “Wahaūtja”, tiquiro nigū, sa tūhotu cāhū usā. Ohō saha nii:

—Mari pūhtoro tiquiro cahmeno sahata yeahro, nii usā.

¹⁵ Tire yahu bato ti, usā yere quehno, wahaā wahaū usā Jerusalēpū wahana. ¹⁶ Topū usā wahagū meheñequinagā Cesarea cjēna Jesu yequina pehe usā mehna wahari. Sa yena tiquina mehna cjāno Chipre cjāno Mnasō wame tiriquiro ya wahaū esau usā. Tiquiro yoari pje Jesu buheriquiro ijiri. Sa yero tiquiro ya wahaū usā ijiati wahaū ijiri. Sa yena Jerusalēpū esau usā.

Pablo Santiagoore ihñano wahahye

¹⁷ Jerusalēpū usā esagū, to cjēna Jesu yequina pehe “¿Wihijajari?” ni, bucueye mehna piti cari usāre. ¹⁸ Ape decopū Pablo usā mehna Santiagore ihñano esari. Usā topū esagū topū ijipihtiyequina Jesu yequina pūhtoa ijiri. ¹⁹ Sa yero Pablo tiquinare tiquiro omoca ñehedi bato judio masa ijieyequinare tiquiro buherire yahu pehori Jesu yequinare. Cohācjū tiquiro yedohoye mehna tiquiro

yerire yahu pehori. ²⁰ Tiquiro sa ni yahugū tūhoye, “Cohācjū quehnoagū, tutuagū ijire māhū”, ni ño peori tiquina pehe Cohācjūre. Sa ni tuhasa tiquina Pablore ohō saha ni yahuri:

—Usā acayū, yojopure peyequina judio masa Jesure wacū tutuayequina ijire. Tire masine māhū. Sa ye tiquina ohō saha ni tūhoture: “Cohācjū dutiyere, Moiseputa marine tiquiro cūrire marine ye pehoro cahmene”, niñe nine. ²¹ Ohō saha ni nemore tiquina. “Ape siepū ijiyequinare judio masa ijieyequina watoapū ijiyequinare judio masare Cohācjū Moiserie tiquiro cūrire cohā dutiahye Pablo”, nimedi ohō cjēna judio masa māhūre. “Pablo judio masa pohnene cuhnucunū sohtoahserogāre yūhre ne dutiare”, nimedi māhūre tiquina. “Judio masa tiquina yee tiyere Pablo duhu dutire”, ni ahri gūhūre ni yahu wājare māhūre. ²² Sa ye māhū ohōre wihigū tūhoye tiquina cahmecoaeta māhūre tuhtiyetehe. Sa yegū ohō saha yero cahmene māhūre. ²³ Māhūre usā dutiro sahata yeya. Yojopure ohōre pititiaro mūna Cohācjūre wacūñequina “Ohō saha yenatja”, niñequina ijire. ²⁴ Tiquina mehna wahaya. Sa ye Cohācjū Moiserie tiquiro dutiriro sahata tiquina basi Cohācjū yere yee tehe tiquina ñano yeyere coseye nine. Māhū gūhū sata yeya. Sa yegū tiquina sa yeati wapare wapa yeya māhū pehe. Māhū sa wapa yeri bato tiquina poarire wāha peho duti masine tiquina. Māhū sa yegū ihñāñe masa māhūre tiquina niñe ni mehori ijigū masieta ijipihtiyequina. Cohācjū Moiserie tiquiro cūri dutiyere yegū māhū ijigū masieta tiquina.

²⁵ Sa yena judio masa ijieyequina Jesu yequina pehere usā ojoari pūre oho tuhasau. Ohō

saha ni, ojoau usā. “ ‘Cohācjū ijire’, tiquina niñe queoyere ño peo tiquina duhu peori ihyayere, diire, wamūa tiquina ñehe wejēdiquinare wahiquinare ihyeracāhña masa. Sa yena wūana tieracāhña”, ni, yahu ojoau usā ojoari pūpūre, nidi tiquina Pablore.

Cohācjū wūhupū judio masa Pablore ñeheahye

²⁶ Tiquina sa ni yahuducuri bato ape deco Pablo pehe pititiaro mūna mehna tiquina basi Cohācjū yere yeye tehe tiquina ñano yerire coseye tehe, Cohācjū wūhupū sajāa wahahye. Ti wūhupū sajā saro, tiquinare yahuahye Pablo: “Ohōpe decori dūhsare mūsa coseato”, ni yahuahye tiquiro pititiarore. Sa ye tiquina cose bato tiri decopū tiquinapequina Cohācjūre wahiquinare tiquina ohoati deco ijiri.

²⁷ Sa ye tiquina cose pehoboriro mehenogā dūhsagū waro Cohācjū wūhupū Pablo tiquiro ijigū Asia yehpa cjēna judio masa pehe ihñāhye tiquirore. Sa ihñāñe Pablore quiti dojomehne, apequinare tiquiro mehna usuagū yeahye tiquina. Sa usua, judio masa Pablore ñehe, sañuducuahye:

²⁸ —Mūsa usā acaye, Israe masa usāre yedohona ahtaya. Ahriquirō ijire. Ahriquirō Cohācjū Moiserie tiquiro cūri dutiyere, ahri wūhū gūhūre cohā duti, buhere ijipihtiyequinare. Sa ye marine judio masare ñano ni yahuducure. Sa yero tiquiro Cohācjū wūhupūre judio masa ijieyequinare ne sajāri. Sa yero ahri wūhūre ñāñe mariedi wūhūre tiquiro dojomehnedi, ni, sañuducuahye judio masa Asia yehpa cjēna to cjēnare.

²⁹ To pano Jerusalēpū Pablo Tróximo mehna tiquiro ijigū judio masa ihñāe tiahye. Tróximo Efeso cjāno judio masano ijieriquiro ijiri. Tiquiro sa ijigū masiñe

ohõ saha ni tahotuahye tiquina: “Pablo Trófimore Cohãcjũ wahãre ne sajàno niaga”, ni tahotuahye judio masa. ³⁰ Masare sa ni yahu tiquina sañuducuri bato ti maca cjẽna peyequina tutuaro usuahye. Peyequina oma cãhta, Cohãcjũ wahãpũ ijiriquirore Pablora ñehe weje wijiaa wahahye. Sa ye ti wahã sopecaharire bihahye tiquina. ³¹ Sa ye tiquina tiquiore wejẽñe tee nimahye. Tiquina sa yegũ ihñañe “Ijipihtiequina Jerusalẽ cjẽna usua, sañuducuye nidi”, ni, apequina pehe yahuye wahahye surara pãhtorore. ³² Tiquina sa nigũ tãhoro pãhtoro pehe tiquiore yequina surarare, tiquina dutiequina gãhare cahmecoadoqueo, tiquina mehna Pablora wejẽ duayequina cahãpũ oma cã esahye. Surara tiquina esagũ ihñañe Pablora quẽmediquina quẽ duhu cãhye. ³³ Sa yero surara pãhtoro Pablo cahãpũ esa, pã da come dari mehna tiquiore dũhte dutiahye. Tiquina dũhte tuhasagũ ihñano, pãhtoro Pablora sinituahye:

—¿Noa boro ijiajari ahriquiore? ¿Yabe buhiri tiquiore sa yeajari mũsa? ni, sinituahye tiquiore tiquinare.

³⁴ Tiquiro sa sinitugũ tãhoye masa pehe “Ohõ saha yeri tiquiore”, ni, apequina gãhũ sijoro saha ni sañuducu, yahuahye surara pãhtorore. Sa ni tiquina sañuducugũ surara pãhtoro quehnoano tãhoerahye. Sa yero tiquiore surara ya wahãpũ Pablora nea dutiahye. ³⁵ Ti wahãpũ esa, Pablo mũjari escarera pũ tiquiore mũjano taro yegũ masa pehe tiquiore quẽ duaye nimahye. Tiquina sa yegũ surara pehe tiquiore ne wã mũjaa wahahye. ³⁶ Masa tiquinare peyequina nũnũ tã, sañuducu nũnũ tãhye.

—Tiquirore wejẽ cãhña, ni,

sañuducuahye tiquina Pablora.

Pablo “Ne masare ñano yeraja yũhũ”, ni, yahuahye

³⁷ Sa ye ti wahãpũ tiquina peresu yeato pano, Pablo pehe pãhtorore siniahye:

—Yũhũ mũhũ mehna yahuducu duaga, ni siniahye Pablo.

—¿Mũhũ griego masa yere yahuducuajari? ³⁸ ¿Sohõ ijirigũ, Egipto cjũ ijierajari mũhũ? Tiquiro masare tiquina pãhtoare cohã dutiriquiro, cuatro mil masa wejẽñequina pehere masa marienopũ neari jiri. ¿Tiquiro ijierajari mũhũ? niahye surara pãhtoro Pablora.

³⁹ Tiquiro sa nigũ tãhoro Pablo yũhtiahye:

—Tiquiro ijieraja yũhũ. Judio masũ ijiaja. Tarsopũ Cilicia yehpãpũ ijiri macapũ masa bajũũ yũhũ. Ihyo ijiri maca cjũ ijieraja yũhũ. Yũhũ ahriquina masa mehna yahuducu duaga yũhũ, niahye Pablo tiquiore.

⁴⁰ Tiquiro sa nigũ tãhoro pãhtoro pehe tiquiore yahuducu dutiahye masa mehna. Sa yero Pablo mũjari escarera pũ ducuro tiquiore omocari mehna “Dihta mariahña”, niahye masare. Tiquiro sa yegũ ihñañe, dihta mari pihtia wahahye. Tiquina dihta mariahgũ ihñano, Pablo judio masa ye mehna yahuahye tiquinare.

22

¹ —Yũhũ acaye, yũhũ yerire yahutja mũsare. Yũhũ yahugũ tãhoya mũsa, niahye Pablo.

² Tiquiro sa nigũ Pablo judio masa ye mehna tiquiore yahuducugũ tãhoye masa pehe dihta mari dojoa wahahye. Sa yero Pablo tiquinare yahuahye:

³ —Yũhũ judio masũta ijiaja. Tarso wame tiri macapũ, Cilicia yehpãpũ ijiri macapũ masa bajũũ yũhũ. Sa ijiepegũta ahri maca Jerusalẽpũta bũcũũ yũhũ. Sa yero

yahare Gamalie wame tiriquireo buhee tiri. Sa yegu yuhu mari ñecusumua mana panopu cjená dutiyere quehnoano buhei. Yo-jopure mari Pacure muša yero sahata yuhu gūhu ño peoe timi. ⁴ Sa yegu Jesu yequinare ñano yee tii yuhu. Ihuēquina tiquireare wejēe tii yuhu. Umare, numia gūhare ñehe, peresu yee tii yuhu. ⁵ Pahia pūhtoro, judio masa bucana mehna tiquina ojoaye pūrīne Jesu yequinare ñehe dutiye pūrīne yahare ojoa basari. Mari acayere Damasco cjenare ti pūrīne ihñogu tūni nimo Jesu yequinare ñehei tūhu. Tiquireare ñehe, ne cāhta peresu yei tūni nimi. Jerusalēpu tiquireare ne cāhta duami buhiri dahrei tūhu. Ohō saha yuhu nigū pahia pūhtoro, judio masa bucana gūhu quehnoano masine, ni yahuahye Pablo.

Pablo Jesu yaquireo tiquireo waha dūcarire yahuahye
(Hch 9.1-19; 26.12-18)

⁶ Sa ni tuhasa ohō saha ni yahu nemoahye:

—Sa yero coheri pje ijigū Damascopu yuhu esa quehegū waro ummanopu asi sitedoque dijiori yahare. ⁷ Sa wahagū yuhu yehrapu bora quehe saa waharu yuhu. Yuhu bora quehe sari bato yahuducuro ca tari yahare. “¿Saulo, dūhsegu yahare ñano yeajari?” nino ca tari yahare. ⁸ “¿Pūhto, noa boro ijiajari mūhu?” ni, sinituu yuhu. “Yuhu Jesu Nazare cjū, mūhu ñano yenohrigū ijiaja yuhu”, ni, yūhtiri yahare tiquireo. ⁹ Yuhu sa wahagū yuhu mehna cjená buhriorore ihñari. Sa ihñapeta yuhu mehna tiquireo yahuducugū tūhoerari tiquina. ¹⁰ “¿Pūhto, dūhse yegutari yuhu?” ni sinituu Jesure. “Wahcādūcaya. Damascopu wahaya. Topu mūhu wahagū, mūhare ijipihtiye yuhu ye dutiatire aquireo yahurota mūhare”, nidi

tiquireo yahare. ¹¹ Tutuaro tiquireo asi sitedoqueogū, yuhu caperi oboa waharu yuhu. Sa ye, yuhu mehna cjená yuhu omocare ñehe, Damascopu tuā cāri yahare.

¹² Topu Anania wame tiriquireo, Cohācjūre ño peoriquireo marine Cohācjū dutiyere ye pehoriquireo ijiri. To cjená judio masa ijipihtiye-quina tiquina ño peoriquireo ijiri. ¹³ Sa yero tiquireo yuhu caharu wi-hidūca yahare yahuri. “Yuhu acayu Saulo, ihñaña pari turi tja”, nidi tiquireo. Tiquireo sa nidi bato pari turi ihñau yuhu. Sa yegu tiquireore ihñau yuhu. ¹⁴ Yuhu sa ihñagū tiquireo Anania yahare yahuri. “Mari Pacu tiquireo cahmeñene quehnoano masiacjūre panopu bese tuhasahye mūhare. Sa yero ‘Yuhu macu quehnoariquireore ihñā, tūhorota’, ni yahuahye mūhare mari Pacu panopu. Tiquireo ijire mari ñecusumua mana tiquina ño peoriquireo. ¹⁵ Sa yegu mūhu ihñarire, mūhu tūhorire yahugūta mūhu ijipihtiyequinare. ¹⁶ Sa yena yo-jopure yoari pje ijieracūhna. Wahcādūcaya. Sa yegu wame yenohrigū ijija. Jesure mūhu sinigū mūhu ñañene cohānota”, nidi yahare tiquireo, niahye Pablo tiquireore wejē duariquireo.

Pablo judio masa ijieyequinare tiquireo buherire yahuahye

¹⁷ Sa ni tuhasa Pablo yahu nemoahye:

—Sa ye tuhasa yuhu Jerusalēpu tojoa ta, Cohācjū wūhūpu Cohācjūre sinigū esau. ¹⁸ Yuhu topu ijigū Jesu yahare bajue tiri. Sa bājuaro yahare yahuri. “Jerusalē cjená yeere mūhu yahugū tūho duerare. Sa yegu umñāno ape siepu wahaya”, nidi Jesu yahare. ¹⁹ Tiquireo sa nigū tūhogu yahuu tiquireore: “Pūhto, mūhu yequinare judio masa buhaye wūhūsepu ijieye-quinare yuhu ñehe, quēdire masine Jerusalē cjená. ²⁰ Sa yegu mūhare

yahuriquiore Estebã pehere tiquina wejêgũ ihñagu ‘Quehnoano yeye wejêne’, nimi. Tiquiore tiquina wejêgũ tiquina suhtire c̄uo basau yahũ. Ti gũhare masine ahri maca cjêna. Sa ye yahũ yahugũ tãhoboaga yahare”, ni yahuu yahũ Jesure. ²¹ Yahũ sa nigũ tãhoro Jesu yahare yahuri: “Yoaropũ judio masa ijieyequinare buheacjare ohoutja mũhare. Sa yegu wahaya mũhũ”, nidi yahare yahũ pãhtoro, niahye Pablo masare.

Surara pãhtoro Pablo mehna yahuducuahye

²² Tiquiro yahu mãhtari dihitare quehnoano tãhomahye masa. Sa tãhoepeta judio masa ijieyequina cahapũ Jesu Pãlore tiquiro ohoatire tiquiro yahugũ tãhoye tiquina sañuducu dũcahye tja:

—Ahriquiore yojopũ pũritare yari-acũnahdo, ni sañuducuahye tiquina.

²³ Sa ye tiquina sañuducu nemo, usuaye mehna tiquina suhtire wahba siteduca, dihta mehna doque mũoahye. ²⁴ Surara pãhtoro surara ya wahũpũ Pãlore ne sajã dutiahye tiquiro yequina surarare. Sa yero surara pãhtoro “¿Dũhse ijiro boro Pablo mehna usua ñano sañuducuye niajari masa?” ni sinitu duamahye. Pãlore tire sinituro taro, yuta dari mehna tana dutimahye tiquiore. ²⁵ Sa tana dutiepegũta tiquiore tiquina dũhteri bato, tiquiro cahapũ ijiriquiore surarare yahuahye Pablo:

—Yahũ Roma cjũ ijiaja. Sa yena “Ñano yeriquiro ijire ahriquiore”, yahare ni masiedare mũsa. Sa yena yuta dari mehna yahare tana masiedare mũsa, niahye Pablo tiquiore.

²⁶ Tiquiro sa nigũ tãhoro surara tiquiro pãhtorore yahuro wahahye:

—Ahriquiore Roma cjãno ijire. Sa yegu quehnoano yeya tiquiore, ni yahuahye tiquiro pãhtorore.

²⁷ Tiquiro sa nidi bato surara pãhtoro pehe Pãlore sinituro wahahye:

—¿Potota mũhũ Roma cjũ ijiajari? Yahuya yahare tire, niahye tiquiro.

—To cjãta ijiaja yahũ, ni yahũtiahye Pablo.

²⁸ Tiquiro sa nigũ tãhoro pãhtoro pehe tiquiore yahuahye:

—Yahũ Roma cjũ iji duagu niñeru pajiro wapa yei, niahye tiquiro.

—Yahũ Roma cjã macapũ masa bajũ. Sa yegu Roma cjũ ijiaja yahũ pehe, niahye Pablo.

²⁹ Tiquiro sa nigũ tãhoye tiquiore tanaboriquina wahaa wahahye. Sa yero Pablo Roma cjãno tiquiro ijigũ masino, tiquiore come dari mehna tiquina dũhterire wacũno, cue niahye pãhtoro pehe.

Pablo judio masa pãhtorore yahuahye

³⁰ Sa yero surara pãhtoro judio masa Pãlore tiquina yahusãrire quehnoano masi duahye. Sa masi duaro ape decopũ come darire tiquiore pã dutiri bato, pahia pãhtoare, judio masa bũcũna mehna cahmecoa dutiahye surara pãhtoro. Tiquiro sa cahmecoa dutiri bato tiquiro topũ Pãlore ne cã, tiquina ihñono duhu docoahye tiquiore.

23

¹ Sa yero Pablo judio masa bũcũnare ihña piti ca ducu, yahuahye:

—Yahũ acaye, Cohãcjũ tiquiro ihñonopũ ijipihtiye decori quehnoano yeducuaja yahũ, niahye Pablo.

² Tiquiro sa nigũ tãhoro ijipihitiyequina pahia bui ijiriquiro Anania pehe Pablo dũserore quẽ dutiahye. ³ Tiquiro cahapũ

ducuyequinare quē dutiahye. Tiquirore tiquina quēdi bato Pablo Anianiare tuhtiahye:

—Masa ihñono dihita quehnoano iji mehogu ijire mūhū. “Cohācjū dutiyere yūhduducagu nine”, yūhure niepeguta yūhure quē dutire mūhū. Sa quē dutigu mūhū pehe dutiyere yūhduducagu niaga, niahye Pablo tiquirore.

⁴ Tiquiro sa nigū tūhoye Pablo cahapū ducuyequina ohō saha niahye tiquirore:

—Cohācjū tiquiro beseriquiro pahia pūhtorore ñano yahuducueracāhña mūhū, niahye tiquina Pablore.

⁵ Tiquina sa nigū tūhoro Pablo ni nemoahye tja:

—Yūhū acaye, tiquiro pahia pūhtoro ijiyere masiedū yūhū. Sa yegu sa ni maca cāhti yūhū. Cohācjū yere tiquina ojoari ohō saha ni yahure tiquirore: “Mūhū ya maca cjēna pūhtorore ñano ni, yahuducueracāhña”, ni ojoahye, niahye Pablo tiquinare “Boya”, nino.

⁶ Sa ye topū pūa curua cjēna ijiahye. Ihcā curua saduceo masa ijiahye. Ape curua pehe fariseo masa ijiahye. Pūa curua tiquina ijigū masino, Pablo judio masa bācūnare tutuaro sañuducu yahuahye:

—Yūhū acaye, yūhū fariseo masū ijiaja. Fariseo masūno macūta ijiaja yūhū gāhū. “Yariariquina masa mūjaeta”, yūhū sa nidi buhiri yūhure ñano ye duare mūsa, niahye Pablo.

⁷ Tiquiro sa nigū tūhoye fariseo masa, saduceo masa tiquina basi cahme tuhtiahye. Sa ye tiquina basi pūa curua tu wahye.

⁸ Saduceo masa ohō saha niñequina ijiahye: “Yariariquina masa mūjasi. Espiritua, angele gūhū ne mariedare”, niñequina ijiahye. Sa ye fariseo masa pehe tiquina yero saha niedahye. Sa ye Pablo

“Yariariquina masa mūjaeta”, tiquiro nigū tiquina basi cahme tuhtiahye. ⁹ Sa cahme tuhtiyē, tutuaro sañuducuahye. Sa ye fariseo masa mehna cjēna judio masa buheyequina wahcādaca, tuhti, yahuahye:

—Ahriquiro Pablo ñano yerari. Sa yero espíritu o angel, potō tiquiro mehna yahuducuriquiro ijiboaga, niahye tiquina.

¹⁰ Tiquina sa nidi bato tiquina ijipihtiyequina cahme tuhti, tutuaro usuahye. Pablore tiquina wejē duagū ihñano cuesāhye surara pūhtoro pehe. Sa yero Pablore tiquiro ya wūhūpū ne cā dutiro, tiquiro masa watoapū surarare ohoahye.

¹¹ Ape ñami Jesu mari pūhtoro Pablo cahapū ducuro, yahuahye tiquirore:

—Cueracāhña. Yojopure ohōre Jerusalēpū yee buheyere yahuri mūhū. Sa yegu Romapū gūhure ohō sahata yei wahaya, niahye mari pūhtoro Jesu Pablore.

Judio masa Pablore wejē duamahye

¹²⁻¹³ Ape decopū ñami cjūno ijigū judio masa cahmecoahye.

—Ohō saha yeihna. Pablore wejēihna. Tiquirore mari wejēato pano sihniedacāhna. Ihyeracāhna. Tiquirore wejēdana ūjua mehna yariuhna. Sa yero Cohācjū mari pehere wejēahdo, niahye tiquina.

Tiquina cuarenta bui cjūno judio masa ijiahye. ¹⁴ Tiquina sa nidi bato tiquina pahia pūhtoare, bācūna gāhure yahuye wahahye:

—Pablore usā wejēato pano ihyayere usā ihyeraja. ¹⁵ Sa yena mūsa, bācūna mehna ohō saha ni pijioya. “Pablore pari turi sinitu duaja”, niña surara pūhtorore. Mūsa sa nidi bato surara pūhtorore ne cāhta dutiya Pablore. Sa yena Pablo ohō cahagā tiquiro wihigū

waro tiqiurore wejēnatja usā, niahye tiqiuna pahia pūhtoare.

¹⁶ Sa ye Pablo pacjūno tiqiuna sa ni yahuducugū tūhoahye. Tiquina sa nigū tūhoro waha, surara ya wūhupū Pablore yahuro sajāhye. ¹⁷ Tiquiro sa yahuri bato Pablo pehe ihcāquiro surarare pijio yahuahye tiqiurore:

—Ahriquiro wahmūnore pūhtoro cahapū neahña. Ahriquiro mūhū pūhtorore yahu duaro nine, niahye Pablo.

¹⁸ Tiquiro sa nigū tūhoro surara pehe Pablo pacjūnore tiqiuro pūhtoro cahapū ne sa, yahuahye:

—Peresupū ijiriquiro Pablo pehe yūhūre pijio, ahriquiro wahmūnore mūhū cahapū ne cā dutiri. Ahriquiro mūhūre yahuro taro niñohiti, niahye surara tiqiuro pūhtorore.

¹⁹ Tiquiro sa nigū tūhoro pūhtoro pehe wahmūno omocare ñehe tūā cā, masa marienopū tiqiurore sini-tuahye:

—¿Dūhse nigū tūū niari mūhū yūhūre? niahye tiqiuro Pablo pacjūnore.

²⁰ Tiquiro sa sinitugū tūhoro ohō saha ni yahuahye:

—Judio masa ihcāno mehna “Ohō saha yeihna”, ni, ñamiapū judio masa būcūna cahapū mūhūre Pablore nea dutieta. “Būcūna Pablore pari turi sinitu duare”, ni mehoeta. ²¹ Sa niepegūta cuarenta bui cjūno masa tiqiurore wejē duayequina duhti, cohte duare. Tiquina tiqiurore wejēato pano ihyayere ihyasi. Sa ye sihnisi. “Tiqiurore mari wejēdagū Cohācjū marine wejēahdo”, nidi tiqiuna basi. Sa ye yojopūre mūhūre Pablore ne cāhta dutiye tiqiuna pehe duhti, cohte tuhasari, Pablore wejēñe tehe. Sa yegū tiqiuna yahuye wihigū tiquinare yūhtieracāhña mūhū, ni yahuahye wahmūno surara pūhtorore.

²² Tiquiro sa nigū tūhoro surara pūhtoro ohō saha niahye:

—Yūhūre mūhū yahurire apequinare yahueracāhña, ni yahuahye wahmūnore.

Sa ni tuhasa wahmūnore “Waharīsa”, niahye tiqiuro.

Pablore pūhtoro Feli wame tiriqiuro cahapū ohoahye

²³ Sa yero surara pūhtoro pūaro tiqiuro yequina cien surara pūhtoare piji cā, tiquinare duti-ahye:

—Dos cientos surarare, setenta caballoa bui pesayequinare, dos cientos doqueye cju cūoyequina mehna Cesareapū wahatiquinare tiqiuna yere quehno dutina wahaya. Sa yena mūsa mia ñami nueve ijigū mūsa wahatore cohteya. ²⁴ Sa yena Pablore caballoare tiqiuro pesatiquinare quehno basaya. Pūhtoro Feli cahapū, Cesareapū, quehnoano soya tiqiurore, niahye surara pūhtoro.

²⁵ Sa ni tuhasa papera ojoahye. Ohō saha ni ojoahye tiqiuro:

²⁶ “Yūhū Claudio Lisia mūhūre tutuagū pūhto Felire quehnoa dutiaja. ²⁷ Judio masa ahriquiro Pablore ñehe, wejēmedi. Sa yegū Roma cjūno tiqiuro ijigū masigū, yequina surara mehna tiqiurore yedohou esau. ²⁸ Sa yegū tiqiurore tiqiuna yahusārire masi duagū judio masa būcūna cahapū ne sau tiqiurore. ²⁹ Sa yegū tiqiurore judio masa ye dutiye dihitare tiqiuro yūhdūdcagū mari ye dutiyere tiqiuro yūhdūdcāeragū ihñagū, tiqiurore peresupū cū duera. Yabe buhiri yariaro mariedare tiqiurore. ³⁰ Sa yero judio masa tiqiurore wejē dua, tiqiuna būca quehegū ihñano apeqiro yahuri yūhūre. Tiquiro sa yahuri bato Pablore yojopūre mūhū cahapū ohogū niája. Sa yegū tiqiurore yahusāriquinare tiqiuro ñañe yerire

muhare yahu duti tuhasa yuhu”, ni, ojoahye surara puhtoro.

³¹ Sa ye surara tiquina puhtoro tiquiro dutiriro sahata yeahye. Ti ñamine Antipatri wame tiri macapu Pablone ne sahye. ³² Ape decopu apequina surara caballoa bui pesaerariquina ti macapu tojoa tahye tiquina ya macapu. Apequina surara caballoa bui pesayequina dihita tiquirore ne yuhdu cahye. ³³ Tee Cesareapu ne sahye Pablone. Sa ye surara puhtoro tiquiro ohori pure puhtoro Felire wiahye. Sa ye Pablone ne sahye puhtoro cahapu. ³⁴ Tiquina sa wiari bato puhtoro ti pure tiquiro ihñari bato apequinare sinituahye:

—¿Di yehpa cjäno ijiajari ahriquiro Pablo? ni sinituahye tiquiro.

—Cilicia yehpa cjäno ijire, ni yahuahye tiquirore.

³⁵ Tiquinare sinitu tuhasa, Feli Pablone yahuahye:

—Muhare yahusäriquina ohöre tiquina wihigü muhu yahugü tuhoutja, niahye Feli Pablone.

Tiquiro sa nidi bato Herode ya wuhapu tiquirore cüahye. Sa yero tiquiro yequina surarare Pablone cohte dutiahye puhtoro.

24

Pablo “Ñano yeru yuhu”, ni yahuahye Felire

¹ Ihcä omope decori bato, Anania pahia puhtoro, apequina judio masa bucana, dutiyere mihni-diquiro Tertulo wame tiriquiro mehna Cesareapu esahye. Sa ye tiquina Pablone yahusä duaye puhtoro Feli cahapu esahye. ² Sa yero Pablone topure tiquina ne sari bato Tertulo tiquirore yahusä ducahye. Sa yahusä ducaro ohö saha ni yahusähye Felire:

—Muhu quehnoano masigu, usä puhto muhu quehnoano dutigü usä ahri yehpa cjäna quehnoano

iji cjä usä cahmequeno marieno. Muhu dutiye mehna quehnoañe pehere comesaro nine ahri yehpa.

³ Sa yena usä quehnoano iji cäna bucueaja. Sa yena muhu mehna quehnoano bucueaja.

⁴ Yojopure mehenogä muhare cariboutja yuhu. Mehenogä muhu mehna yahuducu duaja. Usäre tuhodoqueorña muhu.

⁵ Ahriquiro usäre caribo yuhduare. Ijipihtiyehpari cjenare judio masare tiquina usua sañuducugü yere ahriquiro. Sa yero masa tiquina basi cahme tuhtigü yere ahriquiro. “Puhtoare cohähna”, niñequina mehna cjäno ijire ahriquiro. Sa yero nazareno wame tiri curua puhtoro ijire.

⁶ Sa yero Cohäcjä wuhare ñano tiquiro ye duagü ihñana usä ñehi ahriquirore. [Usä ñehedi bato usä ye dutiyere tiquiro yuhducariquiro ijigü tiquirore

buhiri dahre duami usä. ⁷ Usä sa ye duepegüta surara puhtoro Lisia wame tiriquiro tiquirore

usäre tutuaro mehna ehma cäri. ⁸ Came tiquirore yahusäriquinare muhu cahapu waha dutiri Lisia.

Tiquiro sa nigü tuhona ahtau usä.] Muhu pürita ahriquirore sinitugu, ijipihtiyere tiquiro ye buhirire masigüta muhu, niahye Tertulo Felire.

⁹ Tiquiro sa nidi bato apequina judio masa “Tertulo tiquiro nidiro sahata poto ijire”, niahye tiquina gühu. ¹⁰ Tiquina sa ni yahusäri bato puhtoro Feli Pablone yahu dutiahye. Ohö saha ni yahuahye Pablo:

—Peye cuhmari ahri yehpa cjenare muhu dutirire masiaja yuhu. Sa yegu yuhu yerire muhare yahugü bucueaja.

¹¹ Doce decorita wahare Jerusalëpu Cohäcjäre yuhu ño peori bato. Muhu ahri poto ijigü masi duagu apequinare sinituya.

¹² Judio masa yuhare Cohäcjä wuhupure boca tiquina ñehegü masare ni sañuducugu niedu. Sa

yegu “Masa puhtoare cohãña”, nigu niedu. Sa yegu judio masa buheye wuhusere, tiquina ya maca gũhare ne ñano yera tii. ¹³ Sa ye yuhare yahusãriquina pehe tiquina yahusãrire “Ohõ saha yeri ahriquiuro”, ni, yahu masiedare mũhare. ¹⁴ Yojoꝑu yuhũ yerire yahutja mũhare. Duita usã ñecusũmũa tiquina ño peoriquiurore mari Pacare ño peoaja yuhũ gũhũ. Sa yegu tiquiuro yere yeaja Jesu ye quehnoañe buheye nidiro sahata. “Jesu ye ni mehoñe ijire”, ni yahuducure ahriquina judio masa. Tiquina sa niepegũta Cohãcjũ dutiye, Moiseꝑure tiquiuro cũrire ti gũhare ño peoaja yuhũ. Sa yegu Cohãcjũ yere yahu mũhtariquina tiquina ojoari gũhare ño peoaja yuhũ. ¹⁵ Ahriquina apequina judio masa tiquina tũhoturo sahata Cohãcjũ ijipihtiyequina masare yariariquinare quehnoañequina, ñañequina mehna tiquina masa mũjagũ yerota. Yuhũ gũhũ sata ni tũhotuaja. ¹⁶ Sa yegu buhiri mariedaja yuhũ. Cohãcjũ tire masine. Sa ye masa gũhũ tire masine. Sa ye potota yahuaja yuhũ mũhare. Sa yegu quehnoano tũhotuaja.

¹⁷⁻¹⁸ ’Peye cũhmarine ape sieꝑu tinidigu ijigu Jerusalẽne tojoa wihi, yuhũ acayere judio masa pejecũoyequinare niñerure ohogu tũũ nii yuhũ. Tojoa wihi Cohãcjũre ño peogu tũũ, tiquiuro ya wũhũꝑu sajãmi. Sa yegu Cohãcjũ tiquiuro cose dutiriro sahata yuhũ basi yuhũ ñañene coseri bato wahiꝑiurore oho duami tiquiurore ño peogu tũhũ. Topu yuhũ ijigũ ahriquina judio masa yuhũre bocari. Tiquina bocagũ apequina yuhũ mehna mariedari. Usua, sañuducuyequina mariedari. ¹⁹ Sa ye apequina judio masa Asia yehpa cjẽna topu ijiri. Tiquina yuhũ ñano

yegũ ihñariquina ijiye, yahusãñe ahtaahro. ²⁰ Ahriquina ohõꝑure ijieyequina pehe judio masa bucũna mehna yuhũ ijigũ ihñariquina yuhũ ñano yerire masiñe, tiquina gũhũ yahusãahdo. ²¹ Ihcãnogã pũritare yuhũre tiquina yahusã masine: Ti pje tiquina mehna ijigu ohõ saha ni tutuaro sañuducuu yuhũ. “Yariariquina masa mũjaeta’, yuhũ nidi buhiri, buhiri dahrere masa”, nii tiquinare, ni yahuahye Pablo Felire.

²² Tiquiuro sa ni yahuri bato Feli ohõ saha ni yahuahye Pabloure:

—Yojoꝑu to puno tjire. Surara puhtoro Lisia tiquiuro wihiri bato mũhare yuhũ yeatore masiitja yuhũ, niahye Feli Pabloure.

Feli pehe Jesu yequina tiquina yerire quehnoano masi pehoriꝑiurore ijiahye.

²³ Sa ni tuhasa, Pabloure cohteriquiuro surarare Feli quehnoano ihña nũhũ dutiahye “Peresupũ ijiriꝑiuro duhtiarĩ”, nino. Sa ijieperota mehenogã ohori tiquiuro tĩniatore. Pablo mehna cjẽnare tiquiurore peresupũ ijiriꝑiurore yedoho dutiro sa dutiahye Feli.

²⁴ Meheñe decorigã bato Feli, tiquiuro namono Drusila wame tiricoro mehna ahta, Pabloure pijiahye. Feli namono pehe judio masono ijiahye. Pabloure tiquina pijiri bato, Jesucristore tiquiuro wacũ tutuayere Pablo pehe yahuahye tiquinare.

²⁵ Sa yahuro quehnoañene, quehnoano wacũ masiñene, ñañene cahmedare, pihtiri deco ijigũ Cohãcjũ masare tiquiuro buhiri dahreatore yahuahye Pablo. Tiquiuro sa ni yahugũ tũhoro Feli cuero, Pabloure yahuahye:

—Yojoꝑure waharĩsa. Came yuhũre dahraye mariedagũ mũhare pijitja tja, niahye Pabloure.

²⁶ Sa nino Pablo tiquiuro niñerure ohogũ cahmemahye Feli. Sa

yero tiquiro niñerure cahmeno, peye tahari Pablore piji, tiquiro mehna yahuducue timahye Feli. Niñerure tiquiro wapa yegū Pablore wioboaga, ape taha yero. ²⁷ Pua cahma bato Porcio Festo wame tiriquire Feli comesariquire ijiahye. Sa ijiepegūta Feli pehe pūhtoro ijiro, judio masare bucugū ye duahye. Sa yero tiquiro Pablore peresupū iji dutinahye.

25

Pablo Festore tiquiro yerire yahuahye

¹ Sa ye Festo ti yehpapū ihtia deco tiquiro ijiri bato, Cesareapū ijiriquire waha, Jerusalēpū esahye. ² Topū tiquiro ijigū pahia pūhtoa, judio masa pūhtoa mehna Pablore tiquina yahusārire yahuahye Festore. ³ Pablo mahapū wahagū tiquire būca quehe, wejē duaye nimahye tiquina. Sa ye tiquina Festore tutuaro sinimahye:

—Pablore Jerusalēpū ohoya, ni, sinimahye tiquina Festore.

⁴ Tiquina sa nigū tūhoro, Festo yahuahye tiquire:

—Yojopūre Pablo Cesareapū peresu ijire. Yojopūre yahu topū wahaū tūta niaja. ⁵ Pablo tiquiro ñano yeriquiro ijigū, masa pūhtoa Cesareapū yahu mehna waha, tiquire yahusāhdo, niahye Festo.

⁶ Sa yero Festo ocho o diez decori tiquina mehna tiquiro ijiri bato Cesareapū tojoaa wahahye. Ape decopū tiquiro buhiri dahre dutiri wūhpū dujiro, Pablore ne cāhta dutiahye.

⁷ Sa ye Pablo Festo cahapū tiquiro wihigū, judio masa Jerusalēpū ahtariquina pehe Pablo cahapū ducu, tiquire tutuaro mehna yahusā dūcahye. Sa yahusāepeta “Ahriquire tiquiro ñano yegū ihñau”, ni, masiedahye. ⁸ Tiquina sa ni yahusāri bato Pablo tiquiro yerire yahuahye:

—Judio masa tiquina dutiyere, Cohācjū wūhū cjē dutiyere, Roma cjūno pūhtoro tiquiro dutiyere yūhdūcaerū, niahye Pablo.

⁹ Festo pehe judio masare bucugū ye duaro, Pablore sinitu-ahye:

—¿Jerusalēpū waha duajari mūhū? Mūhū yerire yūhūre topū yahuta mūhū, niahye Festo Pablore.

¹⁰ Tiquiro sa nigū tūhoro Pablo yahuahye:

—Ijipihtiequina pūhtoro tiquiro ya wūhpū buhiri dahre dutiri wūhpū ijiaja yojopūre. Ahri wūhū boropū yūhū yerire tūhoya. Judio masare yūhū ñano yerarire quehnoano masine mūhū. ¹¹ Dutiyere yūhdūcarigu ijigū “Yūhūre wejēdacāhña”, niedaboaya yūhū. Sa yegū ahriquina yahusāri pehe ni mehoñe ijigū yūhūre yahusāriquinare yūhūre oho masiedare mūhū. Yūhū yerire ijipihtiequina pūhtorore Césare yahu duaja, niahye Pablo.

¹² Tiquiro sa nigū tūhoro Festo pehe quehnoano masi yahuyequinare sinitu tuhasa, yahuahye Pablore:

—Mūhū ijipihtiequina pūhtorore mūhū yerire mūhū yahu duagū tiquiro cahapū ohonatja mūhūre, niahye Festo Pablore.

Festo pūhtoro Agripare Pablo tiquiro ijie tiyere yahuahye

¹³ Camepū pūhtoro Agripa, Berenice wame tūricoro mehna Cesareapū Festore ihñañe esahye.

—¿Ne, ijiajari mūhū? niahye tiquina Festore piti caye.

¹⁴ Topū peye decori tiquina ijiri bato Festo yahuahye Agripare Pablo tiquiro ijie tiyere:

—Ohōre Feli tiquiro peresu yeriquiro ijire. ¹⁵ Sa ye Jerusalēpū yūhū wahagū judio masa tiquina pahia pūhtoa, tiquina būcūna mehna ahriquire yahusāri.

“Tiquiro ye buhirire wejēña tiquirore”, ni, sinidi tiquina yuhure. ¹⁶ Tiquina sa ni sinigū tuhogū yuhū tiquinare ohō saha ni yahuu. “Roma cjēna pehe presu tiquina yeriquinare masare oherare. Sa yegū tiquirore oherera masare. Usā ñehediquirore tiquirore yahusāriquinare tiquiro ihñato pano tiquirore buhiri dahre masiedaja usā. Tiquiro basi tiquiro yerire tiquiro yahueragū tiquirore buhiri dahre masiedaja usā”, nii tiquinare. ¹⁷ Sa yegū ohōre tiquina wihigū ihñagū yoari pje yerū yuhū. Sa yegū ape decopū buhiri dahre dutiri wuhupū dujigū, tiquina yahusāriquirōre pijii. ¹⁸ Sa ye ti wuhupū tiquiro wihigū ihñañe tiquirore ihña tuhtiyequina wahcādūcari. Tiquina sa wahcādūcagū ihñagū “Ña yuhduaro ni yahusāeta”, ni, tuhutumī yuhū tiquinare. Tiquirore yahusā duepeta yahusā masiedari tiquina. ¹⁹ Sa ye ahriquirōre Cohācjū yere tiquiro yahuri buhiri judio masa tiquirore tuhtiri. Jesu wame tiriquiro tiquiro yaria masa mājare tiquiro yahuri buhiri yahusāri ahriquirōre. Ahri dihitare yahusāri. ²⁰ Tire masiedagū tiquirore quehnoano sinituu. “¿Jerusalēpū waha duajari mūhū yuhū mehna? Topū yahuya mūhū yerire yuhure”, nimi tiquirore. ²¹ Yuhū sa niepegūta tiquiro waha duerari. “Yuhū yerire ijipihiyequina pūhtorore yahu duaja”, nidi tiquiro yuhure. Tiquiro sa nidi bato ohōpūta tiquirore cohte dutii, ijipihiyequina pūhtoro cahapū tiquirore yuhū ohoato pano, niahye Festo Agripare.

²² —Yuhū basi tūho duaja tiquirore, niahye Agripa Festore.

—Ñamiapū tiquirore tūhoya mūhū, ni yahuahye Festo.

²³ Ape decopū Agripa, Berenice mehna tiquina buhiri dahre dutiri

wuhupū esa, “Pūhtoa ijiaja usā”, niñe cua pesaro ye ihñeahye tiquina, surara pūhtoa, ti maca cjēna pūhtoa mehna. Sata ye sañahye ti wuhupū. Tiquina sañā sari bato Pablōre pijiahye Festo. ²⁴ Sa yero Festo ohō saha ni yahuahye:

—Pūhto Agripa, mūsa ijipihitina ahri wuhure cahmecoana, tūhoya. Ohōre ahriquirō peyequina judio masa tiquina yahusāriquirō ijire. Jerusalēpū, Cesareapū gūhure tiquina tiquirore yahusāri. “Tiquirore wejēña”, sa niducuye nine tiquina. ²⁵ Tiquina sa niepegūta ohō saha tūhotuaja yuhū. Ahriquirō ne ñano yeriquiro ijierare. ¿Yabe buhiri wejēboagari mari tiquirore? Sa yegū ijipihiyequina pūhtorore César Augustore ahriquirō yerire tiquiro yahu duagū ijipihiyequina pūhtoro cahapū ohogūta tiquirore. ²⁶⁻²⁷ Sa yegū ahriquirō yerire tūho, quehnoano masiedarīaja yuhū. Sa masiedagū mari pūhtorore yahu oja masiedaja. Sa yegū masare tiquiro yahugū tūho dutigū niaja yojopūre. Pūhto Agripa, yojopū pūritare ahriquirō ijire mūhū sinituatiquiro. Mūhū sinitu tuhasa, mari masidi bato ahriquirōre tiquina yahusārire quehnoano yahu ojoautja. Ahriquirō ñano yerire yuhū masiedapegūta mari pūhtoro cahapū tiquirore yuhū ohogū quehnoaedare. Sa yegū yojopūre tiquina yahusārire quehnoano masi duagū niaja, niahye Festo tiquinare.

26

Pablo Agripare tiquiro yerire yahuahye

¹ Tiquiro sa nidi bato Agripa Pablōre yahuahye:

—Mūhū basita yahuya, niahye tiquiro Pablōre.

Tiquiro sa nidi bato Pablo pehe, “Dihta mariahña”, nino tiquiro

omocarine siō m̄uo, tiquiro yerire yahuahye:

² —P̄ahto Agripa, ȳuh̄are judio masa tiquina yahus̄arire, ȳuh̄u yerire m̄uh̄are yahuḡu, yojop̄are quehnoano jeripohna tiaja. ³ M̄uh̄u judio masa us̄a yee tiyere, us̄a buheye ḡuh̄are m̄uh̄u quehnoano masiḡu p̄ūritare bucueaja ȳuh̄u. Sa yeḡu m̄uh̄u ȳuh̄are quehnoano t̄ahoya, ni d̄ucahye Pablo.

Pablo Jesu yaquiro tiquiro ijiato pano tiquiro ije tirire yahuahye

⁴ Sa ni tuhasaro ohō saha ni nemoahye tiquiro:

—Wahm̄u ȳuh̄u ije tirire ijip-
ihtiyequina judio masa masine. Ijipihtiye decori ȳuh̄u masa ba-
juari bato ȳuh̄u ya dihtap̄are, Jerusalēp̄u ḡuh̄are ȳuh̄u ijirire
masine tiquina. ⁵ Coā warop̄are fariseo masu ijimi. Sa yeḡu fariseo
masa tiquina dutiyere, tiquina yeye borore ye pehoḡu ȳuh̄u ijiḡu
tiquina masine. Tiquina m̄uh̄are yahu duaye, tire yahu masine
tiquina. ⁶ Ahri buhirita ȳuh̄are yahus̄a m̄ujare. Us̄a ñecus̄um̄u
iji turiayequinare “Yariariquinare masoutja”, Coh̄ācj̄u tiquiro ni
c̄ūrire “Poto tjire”, ȳuh̄u nidi buhiri ahriquina ȳuh̄are yahus̄a m̄ujare.
⁷ Ȳuh̄u acaye judio masa ijipihtiyequina doce cururi cj̄ēna Coh̄ācj̄u
masare tiquiro masoatire bucue, cohteducure. Sa ye Coh̄ācj̄are ño
peoducure. Sa cohteducuyequina ijiye us̄a yero saha yere tiquina.
P̄ahto Agripa, sa ihc̄āno saha yena us̄a ijiepeḡata tiquina pehe tiquiro
masoatire ȳuh̄u cohteri buhiri ȳuh̄are yahus̄a m̄ujare judio masa.
⁸ ¿M̄usa judio masa pehe d̄uhse yena Coh̄ācj̄u tiquiro masorire
tiquina yahuḡu t̄aho duerajari m̄usa, judio masa? ni yahuahye
Pablo.

Pablo Jesu yequinare tiquiro ñano yee tirire yahuahye Agripare

⁹ Sa ni tuhasa ohō saha ni yahu nemoahye:

—Jesure Nazare cj̄ūnore ih̄ñedariḡu, ñañe dihitare ye duami tiquiro yequinare. ¹⁰ Sa yeḡu Jerusalēp̄u sa yee timi ȳuh̄u. Pahia p̄ahtoa ȳuh̄are tiquina dutiri bato peyequina Jesu yequinare peresu yee tii. Sa yeḡu p̄ahtoa tiquinare wej̄ē dutiḡu, wej̄ē dutii ȳuh̄u ḡuh̄u. ¹¹ Peye tahari ijipihtiye judio masa buheye w̄uh̄sep̄u Jesu yequinare ñano ye dutie tiru. Sa yeḡu Jesu yequina Jesure tiquina coh̄āḡu ye duagu nimi. Tiquina mehna tutuaro usuau ȳuh̄u. Sa yeḡu apeye macarip̄u ḡuh̄are tiquinare ñano yeḡu esae tii ȳuh̄u, ni yahuahye Pablo.

*Pablo Jesu yaquiro tiquiro waha-
harire yahuahye*

(Hch 9.1-19; 22.6-16)

¹² Sa ni tuhasa ohō saha ni yahu nemoahye:

—Damasop̄u Jesu yequinare ñano ye duagu esami. Tiquinare ñano ȳuh̄u ye duaḡu ih̄ñañe pahia p̄ahtoa ȳuh̄are waha dutiri. ¹³ Ohō saha ijiri p̄ahto Agripa: Coheri pje ijiḡu waro mahap̄u ȳuh̄u wahaḡu ahm̄uano cj̄ē asi siteye, as̄u deco cj̄ūno ȳuh̄d̄oro, ȳuh̄are ȳuh̄u mehna wahayequina ḡuh̄are asi siteri. ¹⁴ Us̄a ijipihtina yehpap̄u bora quehe sa, judio masa ye mehna ȳuh̄are tiquiro yahuducuḡu t̄ahou. “¿Saulo, d̄uhse yeḡu m̄uh̄u ȳuh̄are ñano yeajari? M̄uh̄u ȳuh̄u mehna usuagu ȳuh̄are yahtieragu, m̄uh̄u basi ñano ȳuh̄d̄are”, nidi ȳuh̄are. ¹⁵ “¿P̄ahto, noa boro ijiajari m̄uh̄u?” ni, sinituu ȳuh̄u. “Ȳuh̄u Jesu, m̄uh̄u ñano yenohriḡu ijiaja. ¹⁶ Wahc̄ād̄ucaya m̄uh̄u. M̄uh̄are ȳuh̄u cahac̄j̄u ijiaj̄u yeḡu taḡu, yojop̄u bajuaja ȳuh̄u. Miare ȳuh̄are m̄uh̄u ih̄ñarire, came m̄uh̄are ȳuh̄u ih̄ñoati ḡuh̄are apequinare yahuḡata m̄uh̄u. ¹⁷ Judio masare, judio masa ijieyequina ḡuh̄are

māhare buhe dutigū ohogutja. Tiquina caharū māhū ijigū, māhare tiquina ihñā tuhtigū māhare yedohogutja. ¹⁸ Yeere tiquinare masigū yeya māhū. Sa yegū tiquinare ñañene duhugū yeya. Quehnoañe pehere comesagū yeya tiquinare. Watīnore cahmedagū yeya māhū. Sa yegū Cohācjū ye pehere yegū yeya māhū tiquinare. Māhū sa yegū tiquina yahūre wacū tutuaeta. Tiquina sa wacū tutuagū ihñagū tiquina ñañe yerire boutja. Sa ye tiquina Cohācjū tiquiro beseriquina mehna cjēna ijjeta. Tiquiro ohoatire cūoatiquina ijjeta tiquina”, nidi Jesu yahūre, ni yahuahye Pablo.

Pablo tiquiro yerire tiquiro dahrayere yahuahye

¹⁹ Sa ni tuhasa ohō saha ni yahu nemoahye:

—Pūhto Agripa, ūhmūano cjē yahū tuhoyere yūhdūcaerū. ²⁰ Damascorū buhe māhtān. Came Jerusalērū buhei tja. Came Judea yehparū, judio masa ijieyequina caharū gūhare masare tiquina ñañe yerire bujūa witi dutii, Cohācjū yere cahme dutigū. “Quehnoañene mūsa yegū ihñañe ñañene mūsa bujūa witiire apequina masieta”, nigū, tiquinare quehnoañene ye dutigū buhei.

²¹ Cohācjū ya wūhūpū yahū ijigū yahū sa ni yahuri buhiri judio masa yahūre ñehe, wejē duamedī.

²² Tiquina sa yepēgūta decoripe Cohācjū tiquiro yedohoro mehna sa buheducuaja. Sa yegū yojopūre mūsa ijipihtina pūhtoare, ihyo ijina gūhare tiquiro yere yahugū niaja. Panorū cjēna Cohācjū yere yahu māhtariquina, Moise mehna tiquina yahuyuriro sahata yahuaaja yahū gūhū. Ohō saha ni yahuyuahye tiquina. ²³ “Cristo Cohācjū ohoriquiro pehe ñano yūhdūrota. Sa yero yariaro masa māja māhtariquiro waharota

tiquiro. Sa yero masare tiquiro yūhdūoatire judio masare, judio masa ijieyequina gūhare masigū yerota”, ni yahuyu ojoae tiahye panorū cjēna. Yūhū gūhū tiquina yero sahata yahuaaja, ni yahuahye Pablo Agripare.

Pablo Agripare Jesu yaquiro wahagū ye duamahye

²⁴ Tiquiro sa ni yahuri bato Festo tiquirore tutuaro sañuducu yahuducuahye:

—Pablo, māhū tūho masiegū ijire. Māhū peye buhegū cohto tia wahare, ni sañuducuahye tiquiro Pablore.

²⁵ Tiquiro sa nigū tūhoro Pablo yūhtiahye Festore:

—Pūhto, tūho masiegū ijieraja yahū. Yūhū yahuye ijirota ijire. Sa yegū yahū ahrire cua pesaro mehna quehnoano niaja.

²⁶ Pūhtoro Agripa pehe ahri yahū yahurire quehnoano masine. Sa yegū yahū tiquirore cuero marieno yahuaaja. Ahri yahuyere ijipihtiequina masa masine. Sa yegū ijipihtie ahrire yahū nidire pūhtoro Agripa tiquiro masigū masiaja yahū, niahye Pablo Festore.

Sa ni tuhasa ohō saha niahye Agripare:

²⁷ —Pūhto Agripa, Cohācjū yere yahu māhtariquina tiquina yahue tirire tūhore māhū. Tiquina yahue tirire māhū tūhogū masiaja yahū, niahye Pablo Agripare.

²⁸ —¿Ahrire yahūre yahugū mehenogā māhū yahuye mehna Jesu yaquiro yahū wahagū ye duagū niajari māhū? niahye Agripa Pablore.

Tiquiro sa nigū Pablo yūhtiahye:

²⁹ —Mehenogā yahuducugū o yoari pje yahuducugū mūsa ijipihtinare “Yūhū ijiro sahata Jesu yequina ijiahiro”, ni sini basaja Cohācjūre. Sa siniepegūta yahū yero saha peresupū mūsa ijigū

cahmedaja yuh̄u, niahye Pablo Agripare.

³⁰⁻³¹ Tiquiro sa nidi bato Agripa, Festo, Berenice ijipihtiyequina apequina mehna wahcād̄uca, wijia, tiquina basi yahuducuahye:

—Ahriquiro buhiri mariedare. Sa yena tiquirore ne peresu ye masiedaja mari. ¿Sa yena mari yabe buhiri tiquirore wejēboagari? ni, yahuducuahye tiquina basi.

³² —Ahriquiro “Ijipihtiyequina p̄htorore Cēsar pehere yuh̄u yerire yahu duaja”, tiquiro niedagū mari wioboaya tiquirore peresup̄u ijiriquire, niahye Agripa Festore.

27

Pablo tiquirore tiquina yahus̄irire Romap̄u yahuro wahaye

¹ Pablöre Italiap̄u yuc̄usa mehna ohoye tehe, tiquirore apequina mehna tiquina peresu yeriquina mehna Julio wame tiriquire mehna cūri tiquina. Julio cien surara p̄htoro ijiro, tiquiro ya curua “Augusto yequina surara”, wame tiri. ² Sa yena Adramitio wame tiro cj̄aria yuc̄sap̄u saj̄āu us̄ā. Tia Asiap̄u wahatia ijiri. Saj̄ā tuhasa, tia mehna wahau. Aristarco Tesalónica wame tiri maca cj̄āno us̄ā mehna wahari. Tesalónica Macedonia yehpap̄u ijire. ³ Ape decop̄u us̄ā Sidōp̄u esau. Top̄u esaro Julio Pablöre quehnoano yeri. Sa yero Pablöre tiquiro mehna cj̄ēna cahap̄u ih̄ñano waha dutiri. Sa yero Pablo mehna cj̄ēna tiquirore tiquiro cahmeñene tiquina ohogū “Quehnoanota”, nidi Julio. ⁴ Yuc̄usa mehna us̄ā pehāgū tutuaro wihnono us̄āre ape siep̄u wēdoque pehōri. Sa yena Chipre wame tiri n̄uc̄uo cahmotarop̄u poto pehep̄u wahau us̄ā. ⁵ Tee Ciliciare yuh̄d̄ua, Panfilia gūhare yuh̄d̄ua, Mira wame tiri

macap̄u Licia yehpap̄u ijiri macap̄u pehā sāu.

⁶ Top̄u esana, Alejandrīap̄u ahtariare, Italiap̄u wahatiare yuc̄sare bocau. Sa yero us̄āre tiap̄u waha dutiri surara p̄htoro.

⁷ Peye decori dero dero waha, “Wape c̄uo yuh̄d̄uare”, ni, waha, Gnido wame tiri maca potop̄u esau us̄ā. Top̄u esa yuh̄d̄ua, wihnono tutuaro wēgū, us̄ā waha duarirop̄u us̄āre wē ohōedari. Sa yena us̄ā cū pehe pehep̄u majare pehāa wahau. Sa yena Creta wame tiri n̄uc̄uo cahmotari pahrē pehe us̄ā pehāa waha, Salmón wame tiri ñoare yuh̄d̄ua wahau us̄ā. ⁸ Top̄u yuh̄d̄u, ti n̄uc̄uo d̄uht̄u cahap̄u waha, “Wape c̄uo yuh̄d̄uare”, ni, waha, Quehnoari petamaha wame tirop̄u wahā sāu. Petamaha Lasea wame tiri maca cahap̄u ijiri.

⁹ Top̄u yoari pje us̄ā ijiri bato, us̄ā wahato pehe cua yuh̄d̄uari. Sa yero tiquina sijiri deco bose deco yuh̄d̄ari bato, Pablo tiquinare yahuri:

¹⁰ —Tuhoya m̄usa. Sijiri deco bose deco bato mari wahagū marine minino cua yuh̄d̄uare. Ahria yuc̄usa, yuc̄usa cj̄ē, m̄usa doeri cj̄ē gūh̄u mari mehna cj̄ēna gūh̄u mari butiboaga mari wahana, nidi Pablo.

¹¹ Tiquiro sa niepegūta surara p̄htoro yuc̄usa up̄arore tuhoro, ohoturiquire gūhare tuhoro, Pablo yahuye pehere tuhoro duerari waha duaro. ¹² Tiquina pahsari petamaha quehnoari petamaha pohec̄u ijigū tiquina pahsari petamaha ijierari. Sa ijiri petamaha ijigū yuc̄usa cj̄ēna peyequina waha dua, Fenicep̄u yojoa duamedi. Fenice Creta wame tiri n̄uc̄uo cj̄ā petamaha ijiro, wihnono ahtaro pehe, asū saj̄āno pehe cū pehe pehep̄u, poto pehep̄u gūhare ih̄ñadoqueo, wihnono ahtagū quehnoano cahmotari maca ijiri. Sa ijiri petamaha ijigū

masiñe tiquina topu ihcã pohecu iji duamedí.

Pajiri mapu wihnono, acoro mehna pajiro wẽ cãhtahye

¹³ Sa ye sur pehe derogã wihnono ahta ducari. “Miare quehnoari deco mari wahati deco ijire”, ni tãhotumahye tiquina. Sa wihnono wẽgũ yucusa mehna waha dũca, Creta nucuo dũhtũ cahagã yojoau usã. ¹⁴ Sa yojoepegũta came cãũno wihnono noreste wame tiri wihnono tutuaro wẽdi. ¹⁵ Sa yero yucusare wihnono tutuaro wahã wihiri. Wihnono ahtaro pehere waha masiedana, majare paha, wihnono wẽonopu wahan usã. ¹⁶ Cauda wame tiri nucnogã cahapu sur pehepu waha, ti nucnogã usãre mehenogã cahmotari. “Marine wape cuo yũdũare”, nina tore pajiria yucusa cjãria meheniagã yucusagãre quehnoano weje peo dũhteí usã. ¹⁷ Tiagãre yucusapu usã weje peo dũhteri bato pajiria yucusapu pajiri da mehna tiquina wahme ñehe peori. Sirte wame tiri padurore “Tia yucusa doque wahã sari”, niñe, cue nidi tiquina. Sa ye wihno ñeheñe suhtire tiquina ne dijiori bato yucusa dihitare wihnono wẽdoqueori. ¹⁸ Wihnono, acoro mehna tutuaro ahtari. Ape deco gãhũre wihnono mananota ahtagũ ihñañe tiquina doeri cjẽne diapũ duredoque ño tuhasa, pehãa wahan usã. ¹⁹ Ape deco yucusa cjẽne diapũ cohãri tiquina basi. ²⁰ Peye decori ñicuñe decori ijigũ, asũ deco cãũno ñahpicoha paca gãhũ ne bajuerari. Sa yero tutuaro wihnono wẽdi. Sa yena “Minia wahaja mari. Sa yena yariaa wahanata”, ni tãhotumi usã.

²¹ Sa ye tiquina yoari pje tiquina sijiri bato Pablo tiquina poto ducu, yahuri tiquinare:

—To pano musare yũhũ yahugũ tãhoerari musa. “Cretapu ijrina mari wahagũ cuarãga”, yũhũ nigũ

tãhoerari musa. Yũhũre tãhona, ahria cjẽ ijipihtiyere boeraboaya musa. ²² Sa niepegũta yojopũ musare yahuaja. Cueracãhña. Ijipihtina mari yũdũnata. Ahria yucusa dihita marine wahtia waharota. ²³ Mia ñamine Cohãcjũ yaquiro angel yũhũre bajuari. Cohãcjũ yaquiro ijiaja yũhũ. Sa yegũ tiquirore ño peoaja yũhũ. Angel pehe yũhũ cahapu ahtaro, yahuri. ²⁴ “Pablo, cueracãhña. Ijipihtiyequina puhtorore mũhũ yerire mũhũre yahuro cahmene. Cohãcjũ quehnoariquiro ijire. Sa yero tiquirore mũhũ sinidiro sahata yojopũre mũhũ mehna cjẽna gãhũre yedohorota”, nidi yũhũre angel. ²⁵ Sa yena cueracãhña musa. Angel yũhũre tiquiro nidiro sahata waharota. Cohãcjũre wacũ tutuaja yũhũ. Sa yegũ tiquiro yahuriro sahata “Ijirota ijire”, ni tãhotuaja yũhũ. ²⁶ Yũhũ sa niepegũta marine nucopũ wihnono wẽdoque ohõnota, ni yahuri Pablo tiquinare.

²⁷ Ihcã ñami puã semana bato pajiri ma Adria wame tiri mapũ wihnono usãre tutuaro wẽdi. Ti pjere ñami decopũ yucusa cjẽna mũhũ pehe “Dũhtũ cahapu ijiaja mari”, ni tãhoturi tiquina. ²⁸ Sa ni tãhotuye nucãria comea yuta da mehna dũhte, duhudoque dijio, queori. Treinta y seis metro waro uhcũari. Mehenogã waha, queori tja. Ti pjere veintisiete metro waro uhcũari. ²⁹ Sa ye utã pacare “Doque wahã sari”, niñe yucusa ohoturopũ pititia pjĩne dũhte pohoye pjĩnine duhudoque dijiori diapũ. Sa ye “Sojaro mehna bohreahro”, ni, tutuaro sinidi tiquina. ³⁰ Yucusa cjẽna mũhũ pehe duhtimedi. Tiquina meheniagãre yucusa cjãriare diapũ weje boro poho, yucusa ehquẽapu dũhte pohoye pjĩnine tiquina dijiori sahata yeri tiquina meheniagãre “Marine ihñari”, niñe. ³¹ Tiquina sa yepegũta Pablo surara puhtorore,

tiquiro yequina surara mehna yahuri:

—Ahriquina amua meheniagã yucsa mehna tiquina wahagũ msa ijipihntina yarianata, nidi Pablo.

³² Tiquiro sa nigũ tãhoye surara pehe meheniagãre dũhteyẽ darire yãhre sure, tiare cohãri.

³³ Bohreato panogã Pablo tiquinare tutuaro ihya dutiri:

—Pna semana waro msa dũhse wahatire masi duana, cohtena, ne ihyerari msa. ³⁴ Sa yena yojopũre ihyana taya. Tutuaro msaare ihya dutiaja. Msa cati duana ihyaya. Ijipihntina msa yãhdũnata, nidi Pablo tiquinare.

³⁵ Tiquiro sa nidi bato Pablo pãre ne, ijipihntiyequina tiquina ihñonopũ Cohãcjãre “Quehnoare”, ni duhu peo, tire ihya dũcari tiquiro. ³⁶ Tiquiro sa ihyagũ ihñãñe tiquina cuero marieno waha, ijipihntiyequina tiquina gũhu ihyari. ³⁷ Usã ijipihntina doscientos setenta y seis masa yucsapũ ijii usã. ³⁸ Tiquina ijipihntiyequina yapia waha “Ahria yucsa nũcũ niaga”, ni, peye trigo ihyayere diapũ cohãri.

Yucsa padũropũ doque quehe sahye

³⁹ Bohreagũ yucsa cjẽna amua nũcũore ihñãñe, “Ohõ saha wame tiri nũcũo ijire ahri nũcũo”, ni, ihña masiedari. Sa masiedari tiquina pari tucũpũ padũro ijigũ ihñãñe, “Mari ti tucũpũ wahana, topũre doque pje saboaga padũropũ”, nidi tiquina. ⁴⁰ Sa niñe dũhte pohoye pñĩnine dũhteyẽ darire yãhre sure dijioahye. Ohoturi pñĩ dũhteyẽ dari gũhare yãhre sure cãri tiquina. Tiquina sa yeri bato yucsa ehquẽa cjã suhtirore wahcõ docori, potu wihnono wẽdoqueogũ cahmeñe. ⁴¹ Sa yepegũta yucsa ehquẽa pehe ape padũropũ quehe sa, nãjua masiedari. Sa yero ohoturora

tutuaro pahcõri quẽ ohõgũ tia ohoturo wahntia wahari. ⁴² Tia sa wahagũ ihñãñe ohõ saha nidi surara:

—Ahria minigũ mari peresu yeriquina dũhtũ cahapũ ba nãjua duhtietã. Sa yena tiquinare wejẽ pehouhna, nidi surara.

⁴³ Sa niepegũta surara pũhoro pehe Pablore wejẽ dueraro, ijipihntiyequina peresu ijieyequinare wejẽ duerari. Sa yero ijipihntiyequina ba masiñequinare surara pũhoro potu dũhtũ cahapũ ba nãjua dutiri. ⁴⁴ Sa ye apequina yucsa cjẽ pñĩni wahti siteri pñĩni mehna bora ñojoa, ti pñĩni bui pesa ba nãjuri. Usã sa yena usã ijipihntina dũhtũ cahapũ wahã sau.

28

Pablo Malta wame tiri nũcũopũ ijiahye

¹ Sa ye ti nũcũopũ usã ijipihntina majadũca sana, ti nũcũo wamene masii. Malta wame tiri nũcũo ijiri. ² Ti nũcũo cjẽna masa usãre quehnoano yeri. Sa yena usã acoro weri bato yũsua yãhdũari usãre. Sa ye to cjẽna pehe peca wijiã tuhasa, usãre sohna dutiri. ³ Pablo pecare ne cãhta, tu tiãri. Tiquiro tu tiãri bato ti peca puhiapũ sañariquiro aña tutuaro asigũ wijia taro, Pablo omocapũ bahque wahã sari yaha wero marieno. ⁴ Tiquiro bahque wahã sagũ ihñãñe ti nũcũo cjẽna tiquina basi ohõ saha ni yahuducuri:

—Ahriquiro masa wejẽdiquiro ijiboaga. Sa yero tutuaricoro buhiri dahrerico amũse cjõno tiquirore buhiri dahrero, cati dutierare. Tiquiro pajiri mapũ minino yãhdũ tuhasari jimedi. Yojopũre ticoro pehe tiquirore cati dutierare, nimedi tiquina basi.

⁵ Sa niepegũta Pablo añare pecapũ wejẽ sitedoqueori. Tiquirore aña purĩedari. ⁶ “Ipirota”, niñe, cohtemedi tiquina. Ne

ipierari tiqirore. “Tiqiro yariaa waharota”, niñe tiquina cohtemedi. Tiqirore puriedari. Yoari pje bato tiqirore ipieragã ihñañe, tiqirore puriedagã ihñañe, sijoro tãhoturi tiquina. “Ahriqiro cohãmana mehna cjãno ijiiboaga” nimesi tiquina.

⁷ Tiquina ba wahã sariro cahagãpũ Publio wame tiriqiro ye weseri ijiri. Tiqiro ti nũcũo cjãno pãhtoro ijiri. Sa yena usãre tiqiro quehnoano yegũ ihtia deco waro tiqiro ya wãhũpũ ijinii usã. ⁸ Publio pacũro yojoa mehna, ujuaye dohatiriqiro ijiri. Sa yero tiqiro cuñanopũ cuñari. Sa yero Pablo dohatiriqiro ya tucũpũ sajã, Cohãcjãre sini, tiqiro omocarine tiqiro bui duhu peo, quehnoa wahagã yeri tiqirore. ⁹ Tiqiro quehnoa wahagã ihñañe ijipihtiyequina apequina ti nũcũo cjãna dohatiyequinare Pablo cahapũ ne cãhtari. Tiquina sa ne cãhtagã ihñaño Pablo quehnoa wahagã yeri tiquina gãhũre. ¹⁰ Came tiquina peyequina usãre wapa marieno ohori. Usã wahato panogã ijipihtiyequina usã cahmeñene, usã wahana ihyatire yucũsapũ dure sãri tiquina.

Pablo Romapũ esahye

¹¹ Ihtia asã ti nũcũopũ usã ijiri bato yucũsa mehna wahaũ usã. Tia yucũsa ehquẽapũ pãaro cohãmana Cãstor, Pólux wame tiyequina tiquina queoye ducuri. Alejandríapũ ahtaria ijiri tia. Pohecũ ijiro puno ti nũcũopũ tia yucũsa pahsari. ¹² Waha, Siracusa wame tiri macapũ esana, ihtia deco waro ti macare ijii usã. ¹³ Ti macare wijia, waha, Regio wame tiri macapũ usã esau. Ape decopũ surpũ wiñnono ahta, usãre wẽdoqueori. Pũa deco bato Puteoli wame tiri macapũ esau. ¹⁴ Topũ Jesu yequina meheñequinagã usãre piti cari.

—Ihcã semana waro usã mehna tojoaya, nidi tiquina usãre.

Tiquina sa nigũ tãhona ihcã semana waro tiquina mehna tojoarĩ. Came mahapũ maja, Romapũ esau usã. ¹⁵ To cjãna Jesu yequina pehe Romapũ usã esatire tãhoye, Apio wame tiropũ doeri cjẽne duaropũ usãre piti cari. Apequina Jesu yequina ihtia wãhũ wame tiropũ usãre piti cari. Tiquina sa piti cagã ihñaño Pablo bucueye mehna Cohãcjãre “Quehnoare”, ni, quehnoano jeri sãa wahari.

¹⁶ Romapũ usã esari bato peresu tiquina yeriquinare to cjãnore peresu cohteyequina pãhtoro yahuri. Sa yahuepegãta Pablo pehere ihcãquirola cũri to cjãna pãhtoa. Sa yero tiqirore ihcãquirola surara cohteri.

Pablo Romapũ buheahye

¹⁷ Ihtia deco bato Pablo judio masa pãhtoa mehna cahmecoano taro, tiquinare pijiri. Tiquina cahmecoari bato tiqiro tiquinare yahuri:

—Yũhũ acaye, mari acayere, mari ñecũsumũa panopũ cjãna tiquina yee tirire, marine tiquina buheri gãhũre yãhdũdũcaera tii yãhũ. Yũhũ yãhdũdũcaerapegãta Jerusalẽpũ yãhũre ñehedi apequina judio masa. Tiquina sa yeri bato Roma cjẽnare yãhũre peresu ye dutiri tiquina. ¹⁸ Tiquina sa yegũ Roma cjãna yãhũre sinitu, yãhũ ñano yerarigũ yãhũ ijigũ yãhũre “Buhiri tiriqiro ijire”, ni masiedari. “¿Ne yabe buhiri wejẽboagari mari tiqirore?” nidi yãhũre tiquina. Sa ye yãhũre sinituyequina pehe yãhũre wio duamedĩ. ¹⁹ Judio masa pehe yãhũre wio dutierari. Sa yegũ yãhũ acayere judio masare yãhũre tiquina yerire yahu duerapegãta “Ijipihtiyequina pãhtoro yãhũ yerire poto yahu duaja yãhũ”, ni sinitu yãhũ. Judio masa

yahare tiquina wio dueragū ihñagū “Romapū yahuro cahmene yahare”, nii yūhū. ²⁰ Sa yegū māsare ahrire yahu duagū pijii. Cristo marine yūhdūoatiqūiro judio masa tiquina cohteriqūiro yere yūhū yahuri buhiri yūhū peresupū ijiaja. Sa yegū tire māsare yahugū tūhū pijii, nidi Pablo judio masa pūhtoare.

²¹ Tiquiro sa nigū tūhoye tiquina pehe tiquirore yahuri:

—Judio masa māhare quitī yahuye pūrīne usāre ne ohoerari. Sa ye topū ahtariquina gūhū usā acaye usāre māhū sa waharire yahuera tiri. Tiquina “Tiquiro ñano yeriquiro ijire” ni māhare yahuerari. ²² Tiquina sa yahuerapegāta māhū ya curuare ijipihtiropū masa ñano tiquina yahuducugū usā masiaja. Sa masina māhū buheyere māhū yahugū tūho duaja usā, nidi tiquina tiquirore.

²³ Sa ni tuhasa, “Ape decopū ijiihna”, nidi tiquina. Ape decopū Pablo mehna cahmecoa māhtariquina yūhdūoro masa peyequina tiquiro ijiropū wihiri. Ñami cjūnogā Cohācjū tiquiro pūhtoro ijiyere quehnoañe buheyere tiquiro buhe dūca, tee ñamipū buhe duhuri. Cohācjū dutiyere Moisepare tiquiro cūrire, Cohācjū yere yahu māhtariquina tiquina ojoari gūhare buheri. Sa buhero, tiquinare Jesure masigū ye duaro nimesi Pablo. ²⁴ Ihquēquina tiquiro buherire cahmedi. Sa cahmepegāta apequina pehe tūho duerari. ²⁵ Sa ye tiquina basi pūa curua tu wa, wahaye tee nidi. Tiquina wahato pano Pablo Isaia tiquiro yahuducurire yahuri. Ohō saha nidi tiquinare:

—Isaia Cohācjū yere yahu māhtariquiro tiquiro yahuri ijirota ijire. Mari ñecusamūa mūna iji turiayequinare yahuro taro

Espíritu Santo Isaiare ohō saha ni yahu ojoa dutiahye:

²⁶⁻²⁷ Ahrire ahriquinare yahugū wahaya: “Dapu paca batina ijire mūsa. Sa yena yeere tūho duerare mūsa. Cahmo coperi susueyequina yero saha tūho duerare mūsa. Sa yena yeere tūhoopenata tūhosi mūsa. Mūsa sa ijierana quehnoano tūhoboaya mūsa. Sa yena quehnoañe pehere comesaboaya mūsa. Sa yegū māsare pecapū wāhaborinare yūhdūoboaya yūhū”, nidi Cohācjū, ni ojoahye Isaia, nidi Pablo tiquinare.

²⁸ Tiquiro sa nidi bato Pablo yahu nemori:

—Ahrire masiña mūsa. Cohācjū ye buheyere masare tiquiro quehnoano yūhdūoyere judio masa ijieyequinare buhenatja usā. Tiquina pehe tūhoeta, nidi Pablo judio masare.

²⁹ Tiquiro sa nigū tūhoye judio masa tire tiquina basi tutuaro cahme dūse tini wia, wijari.

³⁰ Pūa cūhma waro Pablo apequina wasori wūhupū, tiquiro ijieye wapa wapa yeati wūhupū ijiri. Topū ijiro, ijipihtieyquina ti wūhupū wihiyequinare bucueye mehna piti cari tiquiro. ³¹ Sa yero tiquiro cuero marieno Cohācjū pūhtoro ijiyere, mari pūhtoro Jesucristo ye gūhare buhee tiri. Tiquiro sa buhegū ne apequina tiquirore “Buheracāhña”, nieda tiri.

Romanos

Pablo Roma cjenare Jesu yequinare oja ohoahye

¹ Yuhū Pablo mūsare Roma cjanare oja ohoaja. Yuhū Cohācjū cahacjū ijiaja. Sa yero quehnoañe buheyere buhe dutiro yuhare cūri tiquiro.

² Ti buheyere quehnoañe buheyere panopū Cohācjū “Yahugū tūū niaja”, nie tiahye. Tiquiro sa ni yahuriro sahata tiquiro yere yahu māhtariquinare panopū cjenare tiquiro yahuatire tiquiro ya pūpū oja dutiahye. ³ Ti buheyeta tiquiro macūnore yahuye ijire. Tiquiro masūno waro ijiro taro Davi mānāno panamino iji turiariquiro ijiahye tiquiro.

⁴ Jesucristo mari pūhtoro Cohācjū macūno ñañe marieniquiro tiquiro ijiyere ohō saha ihñoahye Cohācjū. Tiquiro yariari bato Cohācjū tutuaye mehna tiquirore masa wijagū yeahye. Sa yero Jesucristo potota Cohācjū macūno tiquiro ijiyere ihñoahye Cohācjū masare.

⁵ Tiquirota usāre paja ihñano usāre tiquiro yere buhe dutiro ohori ijipihtiyequina Jesucristore wacū tutua tiquina ño peoatire. ⁶ Sa yero mūsa gūhure Jesucristo yequina ijanare beseahye tiquiro.

⁷ Mūsare, Cohācjū cahīnare, Roma cjanare, tiquiro yequina ijanare yeri mūsare tiquiro. Mūsare ijiphtinare ahri pūre oja ohoaja. Sa yegū Cohācjū mari Pacū, mari pūhtoro Jesucristo mehna mūsare quehnoa dutiaja. Tiquina yedohoye mehna quehnoano ijiya mūsa.

Pablo Romapūre ihñano waha duaro nimahye

⁸ Ahrire yahu māhtaūtja mūsare: Ijipihtiye macari cjenā Jesucristore mūsa wacū tutuarire masa yahuri yuhare. Tiquina sa ni

yahugū tūhogū “Quehnoare”, niaja Cohācjūre. Jesucristo yedohoro mehna sa ni sini basaja. Cohācjūre sini basagū mūsare sa sini basaducujaja. ⁹ Yuhare tiquiro dutigū tiquiro macūno ye buheyere quehnoañe buheyere tutuaro buhegū tiquiro cahacjūta ijiaja yuhū. Sa yero mūsare Cohācjūre yuhū sa sini basaducugū tiquiro masine. ¹⁰ Sa sini basagū Cohācjū cahmegū yojopū pūritare mūsa cahapū yuhū ihñāū wahatore sini-aja. Yoari pje mūsare ihña duagū yuhū wahatire cohteī ye cāmaja yuhū. ¹¹ Cohācjū yere mūsare buhe duaja Jesure mūsa wacū tutua nemoatire. Sa yegū mūsare tutuaro ihña duaja yuhū. ¹² Jesure wacū tutuaja mari. Sa yegū mūsare ihña duaja Jesure mari wacū tutuaye mehna pūa peheri mari cahme bucuegū yeatore.

¹³ Yuhū acaye, ahrire mūsa masigū cahmeaja. Quehnoañe buheyere yuhū buheri bato apequina mūsa acaye judio masa ijieyequina Jesure wacū tutuari. Sa yegū peye tahari mūsa cahapū waha duami apequina Jesure tiquina wacū tutuariro sahata mūsa mehna cjenā gūhū tiquina wacū tutuatire. Sa waha duepegūta waha masiedū yuhū. ¹⁴ Ijipihtiyequinare quehnoañe buheyere buhero ijiro nine yuhare. Pecasāre, pohteri cje gūhure, masiñequinare, masieñequina gūhure buheacjū ijiita niaja yuhū. ¹⁵ Sa buheacjū ijigū mūsare Roma cjanare quehnoañe buheyere tutuaro buhe duaja.

Quehnoañe buheyere masa tūhoye Jesure wacū tutua dūcare

¹⁶ Quehnoañe buheyere tūhoye Jesure wacū tutua dūcare masa. Sa yero ijipihtiyequinare Jesure wacū tutuayequinare Cohācjū tutuaye mehna pecapū waha-boriquinare yūhdūore. Tiquina

sa yãhdugũ masigũ ti buheyere quehnoañe buheyere buhegũ buoro yãhdũeraja. Ti buheyere judio masa pehere buhe muhtari jiri Jesu gãhu. Tiquina buheri bato judio masa ijieyequina gãhũre usã buhei. ¹⁷ Ti buheyere ohõ saha ni yahure: Jesure wacũ tutuayequinare “Quehnoañequina ijire”, ni, ihñare Cohãcjã. Tiquirore wacũ tutua dũcayequinare sata ni ihñare Cohãcjã. Tiquiro sa ni ihñari bato tiquirore wacũ tutuaducure tiquina. Ahri panopũ tiquina ni ojoariro sahata ijire: “ ‘Quehnoañequina ijire’, tiquiro ni ihñañequina Cohãcjãre wacũ tutuayequinata ijire. Sa wacũ tutuaye, ijipihtiye decori Cohãcjã mehna sa ijiducuenta”, ni, ojoahye.

Masa tiquina ñañe yeri buhirire yahuahye Pablo

¹⁸ Cohãcjã uhmũsepu ijiriquirore masa tiquina yãhdũdũcarire, tiquina ñañe yeri ihñano, tiquina sa yeri buhiri usuare. Tiquiro sa usarire masigũ yere tiquinare. Masa tiquina ñañe yeye mehna apequinare quehnoañe buheyere tuhoeragũ yere tiquina pehe. ¹⁹ Tiquiro basi tiquiro ijieye tiyere masigũ yeahye Cohãcjã. Tiquiro sa yegũ Cohãcjãre masigũ mijoadare masare. ²⁰ Cohãcjã uhmũse cjãno tiquiro ijiyere, tutuariquiro tiquiro ijieye gãhũre mari ihñedapegũta tiquiro basi tiquiro ijiyere marine masigũ yere tiquiro. Ahri yehpare tiquiro bajumehnedi bato ijipihitiye tiquiro bajumehnedire ihñañe “Cohãcjã tiquiro yeri ijire ahri”, niñe, Cohãcjã tiquiro ijieye tiyere masine masa. Sa ye masa Cohãcjãre masiepeta sa ñañene yeducuye, buhiri tire. “Mũhũre masiedũ. Sa yegũ ñañene yei”, ni masisi Cohãcjãre. ²¹ Sa ye Cohãcjã tiquiro ijieye tiyere masiepeta tiquina tiquirore ño

peoerare. Sa ye tiquinare tiquiro quehnoano yepẽgũta tiquina pehe “Quehnoare”, niedare tiquirore. Sa tuho masieñequina ijieye, ñañe dihitarẽ tuhoture tiquina. ²² “Tuho masina ijiaja”, niepeta tuho masieñequina wahare tiquina. ²³ Sa wahaye Cohãcjãre sa ijiducuriquirore tiquina ño peoerare. Sa ño peoeraye, “Cohãcjã ijire”, tiquina niñe queoye pehere ño peore. Mari masa yarianaja dihita ijiaja. Mari sa ijina mari ijiepegũta Cohãcjãre ño peoyequina pehe masa queoyere yere tiquina. Tiquina sa yeri bato ti queoye pehere ño peore tiquina. Sa ye tja minicjũa queoyere, pinoa queoyere, wahiquina queoye gãhũre “Cohãcjã ijire”, ni ño peo maca cãhre tiquina.

²⁴ Tiquina sa yegũ ihñano “Tiquina esa tuharo ñañene yecũnahdo”, nino Cohãcjã cohã cãri tiquinare. Tiquiro sa cohãri bato tiquina ña yãhdũaro cahme yeducure tiquina basi. ²⁵ Sa ye Cohãcjã ye pehere cahmedaye, ni mehoñe pehere quehnoano tuhore tiquina. Cohãcjã ye pehere ni mehoñe yero saha ijigũ yere tiquina. Potota Cohãcjã warore ijipihtiye yeriquirore ño peoducuro cahmene. Sata ijiahro. Tiquina pehe tiquirore ño peoerare. Sa tiquirore ño peoeraye, Cohãcjã yeri pehere ño peore tiquina. Sata ijiahro.

²⁶ Tiquina sa yeducugũ ihñano “Tiquina esa tuharo ñañene yecũnahdo”, nino Cohãcjã cohã cãri tiquinare. Sa ye tiquina mehna cjẽna numia manũ tiyequina numia yero saha ijierare. Sa ye tiquina numia, numia sehsaro ñano yere tiquina pagãri mehna. ²⁷ Tiquina yero saha ijieyequina uũũa gãhu tiquina esa tuharo ña yãhdũaro yere tiquina pagãri mehna. Sa ye tiquina basita ñano

yeri buhiri tiquina paguri pehe ñano yuhdure.

²⁸ Sa Cohãcjüre tiquina cahmedari buhiri, Cohãcjü tiquinare cohãri. Tiquiro sa cohãgü tiquina pehe ñano wacüducu, ñano yeducure. ²⁹ Sa ye tiquina tutuaro ñano yeducure. Ñañene tutuaro cahmeducuyequina, apequina yere tutuaro cahmeñequina, apequinare ñano yeducuyequina, apequina apee boro tiquina cuogü ihña cooducuyequina, masare wejñequina, cahme duse tini wiayequina, ni mehoñequina, masare ihña tuhtiyequina, ñañe quitu dahreyequina, ³⁰ apequina tiquina yerapegüta ñano ni yahu wajayequina, Cohãcjüre ihña tuhtiyequina, apequinare purino yuhtiyequina, “Ûsã pehe masi yuhducaja”, ni tuhotuyequina, apequinare sa ni yahuyequina, apeye ñañene ye ducayequina, tiquina pacusumare yuhtiyequina, ³¹ tuho masieñequina, tiquina nino sahata yeeyequina, masare ne cahieñequina, tiquina basi cahme pihopuri duhueyequina, ne paja ihñeñequina ijire tiquina. ³² Sa ñano yeducuyequinare Cohãcjü pecapü cohãnota. Tiquiro sa cohãtire masiepetata tiquina ti ñañene sa yeducure. Sa ye apequina tiquinare ihña cü tiquina yero saha ñano tiquina yegü ihñañe, “Ûsã yero saha yere”, ni bucuere.

2

Masare buhiri dahre dutiro tire mehono marieno potota yerota Cohãcjü

¹ “Tiquina ña yuhduayequina ijire”, ni yahu wajaeracãhña apequinare. Mäsa gühü tiquina yero saha yere. “Ñañene yeraja. Sa yena ñañe buhiri mariedaga”, ni masiedare mäsa. Sa yena ijina tiquinare yahu wajana ijina, mäsa

basi buhiri dahre dutina niaga. ² Sa yena ñañe yena ijiepenata mäsa yahu wajagü mäsa gühure Cohãcjü buhiri dahrerota. Potota queoro tiquiro buhiri dahregü masiaja mari. ³ Apequinare “Buhiri tieta”, ni yahu wajana mäsa ijigü mäsa gühure buhiri dahrerota. Sa yena “Ûsäre buhiri dahresi”, ni tuhotuboaga mäsa. Ijierare. Mäsa gühure buhiri dahrerota tiquiro. ⁴ Mäsa ñano yepegüta Cohãcjü müsare paja ihñano duita buhiri dahrerare. Sa yena “Cohãcjü yühü mehna usuasi”, ni tuhotuboaga mäsa. Ijierare. Cohãcjü müsare paja ihñano, duita buhiri dahrerare mäsa ñañene bujua witigü ihña duaro, tiquirore mäsa yuhtigü cahmeno. ⁵ Sa buhiri dahre dueraperota mäsa Cohãcjüre yuhti dueragü, mäsa ñañe yerire bujua witiagü, buhiri dahrerota müsare. Buhiri dahreri deco pano müsare tiquiro buhiri dahreboriro yuhduoro ti deco waropure ñano müsare buhiri dahrerota Cohãcjü. Ni mehono marieno buhiri dahrerota. ⁶ Sa yero ijipihtiyequinare tiquina ñano yeri buhiri buhiri dahrerota Cohãcjü. Sa yero quehnoañene tiquina yeri wapa quehnoano yerota masare. ⁷ Ihuquëquina quehnoañene yeducuyequina ijire. Tiquina quehnoañene ye duayequina, Cohãcjüre quehnoano bucuegü ye duayequina, ijipihtiyequina decori Cohãcjü mehna iji duayequina ijire. Tiquina püritare decoripe tiquiro mehna ijigü yerota Cohãcjü. ⁸ Apequina pehe tiquina yero saha ijierare. Tiquina esa tuharo yeeyequina ijire. Cohãcjü yere cahmedare. Tiquina mehna Cohãcjü tutuaro usarota. ⁹ Ijipihtiyequina ñano yeriquina ñano yuhdueta. Judio masare sata waha muhtanota. Sa ye judio masa ijieyequina gühure sata waharota. ¹⁰ Ijipihtiyequina

quehnoañene yeyequina pehere Cohãcjũ “Quehnoare”, ninota. Sa ye masa tiquinare ño peoeta. Sa yero tiquinare quehnoano ijigũ yerota Cohãcjũ. Judio masare sata waha muhtanota. Sa ye judio masa ijieyequina gãhure sata waharota.

¹¹ Cohãcjũ mari yerire ihñano queoro besere ijipihtinare, ñana, quehnoana gãhure. ¹² Apequina Cohãcjũ Moisere tiquiro dutirire masieñequina tiquina ijiepegũta ñañene tiquina yegũ, buhiri dahrerota Cohãcjũ tiquina gãhure. Sa yero ti dutiyere cuoyequina ñañene tiquina yegũ ti dutiyere tiquina yuhduhcari buhiri buhiri dahrerota Cohãcjũ. ¹³ Cohãcjũ dutiyere tãhoepeta yãhtieyequinare “Quehnoañequina ijire ahriquina”, niedare Cohãcjũ. Tiquiro ye dutiyere yeyequina pehere “Quehnoañequina ijire”, ni ihñare tiquinare Cohãcjũ. ¹⁴ Judio masa ijieyequina Cohãcjũ Moisere tiquiro cũri dutiye cuoerapeta, tiquina esa tuharo quehnoañene yeye, Cohãcjũ dutiyere yeye nine. Sa ye Moisere tiquiro dutiyere ojoari pũre cuoerapeta tiquina tãhotuyepũ tiquiro ye dutiyere cuore. ¹⁵ Sa ye tiquiro ye dutiyere tiquina tãhotuyepũ potota cuore tiquina. Sa cuoye ñañene yeye, duita tiquina ñañe yerire masine tiquina. Sa yero ñañene yeriquiro “¿Dãhse ijiro boro ñañene yeri yãhũ?” ni tãhoture tiquiro. Sa yero quehnoañene tiquiro basi yeri gãhure masine tiquiro. ¹⁶ Sa ye Cohãcjũ Jesucristore tiquiro ohoati decopũ masa tiquina yahu duerarire Jesucristo masi pehoro, tiquiro tiquinare beserota quehnoañequina, ñañequina gãhure. Sata tiquina yerire masidiquiro ijiro, beserota tiquiro quehnoañe buheye ti nino sahata. Ti buheyeta ijire musare yãhũ buheri.

Cohãcjũ Moisere tiquiro dutirire

yahuahye Pablo

¹⁷ Mũsa pehe judio masa ijina, Cohãcjũ Moisere tiquiro dutiyere ño peona ijina, “Cohãcjũ yequina ijiaja”, ni tãhotumene mũsa. ¹⁸ Sa yena Cohãcjũ dutiyere masina ijina, tiquiro cahmeñene masine mũsa. Sa masina ijina, “Quehnoañene usã yeatire bese masiaja usã”, ni tãhotumene mũsa. ¹⁹ Sa ni tãhotuna ohõ saha ni tãhotu nemore mũsa: “Apequinare ne masieñequinare quehnoano masigũ yeaja usã. Tiquinare usã buheragũ ne Cohãcjũre masiedaboaga tiquina. Sa ye ñañene duhueraboaga”, ni tãhotumene mũsa. ²⁰ Sa yena “Tãho masieñequinare quehnoañene ye dutina, macanagã gãhure buhena ijiaja usã”, ni tãhotumene mũsa. Sa yena “Cohãcjũ dutiyere cuona, pota ijiyere masi pehoaja usã”, ni tãhotumene mũsa. ²¹ ¿Sa yena apequinare buhena ijiepenata, dũhse yena mũsa pehe mũsa buheriro saha yerajari? ¿Apequinare yaque dutierapenata dũhsena mũsa pehe yaqueajari? ²² ¿Apequiro namono mehna ñano ye dutierapenata dũhsena mũsa pehe apequiro namono mehna ñano yeajari? “Cohãcjũ ijire”, tiquina niñe queoyere ihña yabina ijire mũsa. Sa ihña yabina ijina Cohãcjũ waro pehere ño peona ijimene mũsa. ¿Sa ño peona ijiepenata dũhsena tiquirore quehnoano ño peerajari mũsa? ²³ “Cohãcjũ Moisere tiquiro dutiyere cuoaja usã”, nina ijiepenata ti dutiyere yuhduhcare mũsa. Sa yuhduhcana Cohãcjũre ño peeragũ yena niaga mũsa apequinare. ²⁴ Sata nine Cohãcjũ yere tiquina ojoari pũpũ: “Cohãcjũ dutiyere mũsa yuhduhcari buhiri judio masa ijieyequina pehere Cohãcjũre tiquina ñano yahuducugũ yere mũsa judio masa”, ni ojoahye Cohãcjũ yere tiquina

ojoari pũpũ.

25 “Cohãcjũ yequina ijiaja”, ni tãhoture ihquẽquina judio masa cuhnucunũ sohtoa cahserogãre yãhre nenohriquina. Cohãcjũ yere tiquina yegũ judio masa tiquina ijigũ quehnoarĩne. Tiquiro yere tiquina yeragũ judio masa tiquina ijiye tiye dũhseati ijierare. Yãhre nenohriquina tiquina ijiye tiye gãhũ dũhseati ijierare. 26 Sa yero judio masa ijieyequina cuhnucunũ sohtoa cahserogãre yãhre nemehneñequina tiquina ijiepegũta, Cohãcjũ dutiyere tiquina yegũ ihñano “Yeequina masata ijire”, ni ihñare Cohãcjũ tiquinare. Judio masa pehere tiquiro sa ni ihñaboriro sahata judio masa ijieyequina pehere sa ni ihñare. 27 Peyequina judio masa Cohãcjũ Moiserere tiquiro dutiyere cãoepeta tire yerare tiquina. Sa ye apequina judio masa ijieyequina pehe cuhnucunũ sohtoa cahserogãre yãhremehneñequina ijiepetata tiquiro dutiyere yere. Sa yeyequina ijiye judio masa tiquina ñano yerire masigũ yeye nine. 28 Yojopearẽ judio masano waro tiquiro ijiyere yahutja mũsare. Tiquiro cuhnucunũ sohtoa cahserogãre yãhre nenohriquiropetata Cohãcjũre ño peoeraro, potota judio masano waro ijierare. 29 Cohãcjũ yaquiro Espiritu Santo cãoriqũiro tiquirore yãhtiriqũiro tiquiro tjire judio masano waro. Sa yero tiquiro cuhnucunũ sohtoa cahserogãre tiquiro yãhre ne cohãriro sahata tiquiro ñañe yerire duhure tiquiro. Tiquiro esa tuharo dutiyere yeriquiro ijieraperota Espiritu Santo yedohoye mehna tiquiro ñañe yerire duhure. Sa ijiriquirore “Quehnoariqũiro ijire”, ni ihñare Cohãcjũ pehe. Masa pehe tiquirore tiquina sa niedapegũta, sa nine Cohãcjũ pehe.

3

1 ¿Yũhũ sa nigũ judio masa ijiye tiye ihyo waro ijiajari, masa tãhotugũ? Ne ihyo waro ijiro niedare. ¿Cohãcjũ judio masare tiquiro dutiriro sahata tiquina pagãrire cuhnucunũ sohtoa cahserogãre tiquina yãhre ne cohãñe ihyo waro ijiajari, masa tãhotugũ? Ne ihyo waro ijiro niedare. 2 Judio masa tiquina ijiye tiye ihyo waro ijierare. Cohãcjũ yere tiquina ojoari pũre judio masare cũ mãhtahye. Sa ye judio masa tiquina ijigũ quehnoarĩne tiquinare. 3 Sa ye ihquẽquina judio masa Cohãcjũre tiquina tãhoerapegũta tiquiro nidi ijirota ijire. Sa yero tiquiro ni cũriro sahata yerota tiquiro. 4 Sata ijire. Ijipihtiyequina masa ni mehoñequina tiquina ijiepegũta Cohãcjũ pehe ne ni mehoedare. Panopũ tiquiro yere yahu mãhtariqũiro tiquiro ni ojoariro sahata ne ni mehoedare Cohãcjũ.

Poto nigũ ijire mãhũ Cohãcjũ. Sa ye mãhũre masa ne “Queoro yahuducuerare”, ni yahusã masiedare, ni ojoahye panopũre.

5 Ohõ saha ni tãhotuboaga masa: “Mari ñañene yena Cohãcjũ quehnoañene tiquiro yeriquiro ijigũ masigũ yeaja. Sa yero ñañene mari yegũ quehnoarĩne. ¿Ti sa quehnoañe ijiepegũta dũhsero tiquiro mari ñañene yeri buhirire buhiri dahre maca cjãri?” ni tãhotuboaga masa. Masa tiquina tãhotuboriro saha nigũ niaja yãhũ. 6 Sa ijierare. Mari ñañe yeri pehe quehnoañe ijigũ Cohãcjũ mari ñañene yeri buhirire buhiri dahre masiedaboaga.

7 Masa pehe ni mehoñequina ijire. Cohãcjũ pehe ne ni mehoedare. Sa yena masa tiquina ni mehogũ ihñana Cohãcjũ pehe

ne ni mehoeniquiro tiquiro ijigũ quehnoano ihña masiaja mari. Sa ye masa ni mehoñe, Cohãcjũ tiquiro ni mehoeniquiro tiquiro ijiyere ihñoñe niboaga tiquina. Sata ni tãhotumene ihquẽquina. Sa ni tãhotuye ohõ saha ni tãhotu nemomene tiquina: “Usã ni mehoñe mehna Cohãcjũ tiquiro ni mehoeniquiro ijiyere ihñoña ni aja. Sa ihñoña quehnoano yena ni aja. Sa ye usã ni mehoñe quehnoarñe. ¿Usã ni mehoñe quehnoañe ijiepegũta dahse ijiro boro usã ni mehoñe buhire usãre buhiri dahre maca cãboari Cohãcjũ?” ni tãhotumene ihquẽquina masa. ⁸ Sa ye ohõ saha ni mehore ihquẽquina usãre: “Ñano yena Cohãcjũ tiquiro quehnoariquiro ijigũ ihñoña ni aja. Sa yena ñano yeihna”, nidi Pablo gũhũ”, ni meho yahusãre usãre ihquẽquina. Tiquina sa nidi buhiri tiquinare Cohãcjũ buhiri dahrerota. Sata yero cahmene tiquinare.

Ijipihntina buhiri tina iji aja mari

⁹ ¿Sa ye dahse ni tãhotuajari masa? ¿Mari judio masa apequina yahduoro quehnoana iji ajari mari? Ijieraja mari. Judio masa, judio masa ijiena gũhũ ijipihntina buhiri tina iji aja mari. Sata ijire ijipihntiequina yehũ buheriro sahata. ¹⁰ Panopũ tiquiro ni ojoariro sahata ijire ti: Ohõ saha ni ojoahye:

Ne ihcãquiro masano quehnoariquiro mariedare. ¹¹ Ijipihntiequina masa tũho dueyequina dihita ijire. Sa ye ijipihntiequina masa ne Cohãcjũre wacũ peerare. ¹² Sa ye tiquina Cohãcjũ yere cohãñe, ijipihntiequina ñañene yeyequina wahari. Ne ihcãquiro quehnoañene yeriquiro mariedare. ¹³ Tiquina duseri masa coperi tiquina põo docoro yero saha ijire.

Tiquina yahuducugũ, masa coperi urĩ wijiario saha ni mehoñe dihita tiquina duserire wijiare. Sa yahuducuye aña dusero tiquiro nima purñe wijiario saha purño tiquina yahuducuye wijiare tiquina duserire. ¹⁴ Sa ye tiquina apequinare ñano yahuducuyequina purño yahuducuyequina ijire. ¹⁵ Sa ye usua ñañequina duita masare wejẽñequina ijire. ¹⁶ Sa ye noho tiquina waharopũ tiquina masare ñano ye, ñano yahdugũ yere tiquinare. ¹⁷ Sa ye apequina masa mehna tiquina quehnoano ijierare. ¹⁸ Sa ye Cohãcjũre ne ño peerare, ni ojoahye panopũre.

¹⁹⁻²⁰ Cohãcjũ Moiserre tiquiro dutiyere marine judio masare ohoahye tiquiro dutiyere ijipihntina mari ye pehoatire. Ti dutiyere cuopeta, tire yeraye, “Ñañe buhiri mariedare usãre”, ni masiedare masa. Sa ye tiquina ijipihntiro cjena Cohãcjũ tiquiro buhiri dahrenohatiquina tiquina ijigũ, masieta tiquina basi. Sa ye ñañequina tiquina ijiyere masiñe, “Quehnoana iji aja usã”, ni masiedare Cohãcjũre. Cohãcjũ tiquiro ye dutiye pehere ne masa yerare. Sa ye tiquina ñañequina ijiyere tiquiro dutiye pehe masigũ yere tiquinare. Sa masiñe ohõ saha ni masiedare tiquina: “Cohãcjũ dutiyere ye pehou. Sa yero Cohãcjũ usãre ‘Quehnoañequina ijire’, ni ihñare”, ne ni masiedare masa.

Cohãcjũre quehnoano mari wacũ tutuana tiquiro yequina wahaja mari

²¹ Sa ye Cohãcjũ Moiserre tiquiro dutiye, tiquiro yere yahu mahtariquina tiquina ojoari gũhũ Cohãcjũ masare tiquina ñañe yerire tiquiro borire

yahuahye. Tiquiro dutiye sa yahuepegûta yojopûta Moisere tiquiro dutiri marieno masare tiquina ñaÑe yerire tiquiro borire yahure marine Cohâcjû. ²² Ijipihtiyequina Jesucristore wacû tutuayequinare, tiquirore tahoyequinare “Quehnoañequina ijire”, ni ihñare Cohâcjû. Cohâcjû ijipihtiyequinare ihcâno saha yeriquiro ijire. ²³ Mari ijiphtina ñaÑene yerina ijiaja. Sa yena Cohâcjû tiquiro cahmediro sahata ne yeru. ²⁴ Mari sa yerapegûta mari Pacu marine tiquiro paja ihñagû mari ñaÑe yerire Jesucristo pehe bore. Tiquiro sa bogû “Quehnoana ijire”, ni ihñare Cohâcjû marine Jesure wacû tutuanare. Mari esa tuharo ye dutiro marieno Jesu yedohoro mehna mari ñaÑe yerire bore. ²⁵ Panopu cjêna tiquina ñaÑe yerire ihñano Cohâcjû duita buhiri dahrerahye tiquinare. Sa buhiri dahreraro tiquina ñaÑe yerire ihyo warota sa tahotu cãno niedahye. Came tiquiro Jesucristore ohori jiri mari ñaÑe buhiri yariatiquirore tiquiro diire cohâtiquire. Jesucristore mari wacû tutuagû Cohâcjû pehe mari ñaÑe yerire borota. Sa yero tiquiro nidiro sahata yeriquiro tiquiro ijiyere masigû yero niahye. ²⁶ Sa yero yojopure tiquiro nidiro saha yeriquiro tiquiro ijiyere masa tiquina masigû cahmene tiquiro. Sa yero Jesure wacû tutuayequinare quehnoañequina tiquiro yerire tiquina masigû cahmene Cohâcjû. Tiquiro sa yerire tiquina masiatire tiquiro macanore mari ñaÑe buhirire yariatiquirore ohori jiri.

²⁷ ¿Yojopure “Quehnoana ijiaja mari”, ni masiagari mari, musa tahotugû? Tire ne ni masiedaja mari. ¿Dahsena tire ni masiedagari mari? ¿Cohâcjû tiquiro dutiyere yena, “Quehnoana ijiaja”, ni

masiboari mari? Ijierare. Ti gûhare ni masiedaja mari. Mari sa ni masiedapegûta Jesure mari wacû tutuagû “Quehnoana ijire”, ni ihñanota marine Cohâcjû. ²⁸ Ohô saha masiaja mari: Jesure mari wacû tutuagû ihñano marine ihña coare Cohâcjû. Sa yero marine “Quehnoana ijire”, ni ihñare tiquiro. Tiquiro ye dutiyere mari yeri wapa sa ni ihñedare. Tiquirore mari wacû tutuagû sa ni ihñare.

²⁹ Cohâcjû judio masa puhtoro dihita ijierare. Judio masa ijieyequina puhtoro gûhu ijire tiquiro. ³⁰ Sa yero Cohâcjû ihcâquirola ijiro, ijipihtiyequina puhtoro ijire. Sa ijiriquire ijiro judio masa Jesure tiquina wacû tutuagû tiquinare “Quehnoañequina ijire”, ni ihñanota. Sa yero judio masa ijieyequina gûhu Jesure tiquina wacû tutuagû tiquina gûhare “Quehnoañequina ijire”, ni ihñanota Cohâcjû. ³¹ ¿Sa yena Jesure wacû tutuana Cohâcjû Moisere tiquiro dutiyere cohãna niboari mari? Cohãedaja mari tire. Jesure wacû tutuana, Cohâcjû dutiyere yena niaja mari.

4

Abrahã Cohâcjûre tiquiro wacû tutuarire yahuahye Pablo

¹ Mari ñecu munano iji mahtariquiropare Abrahã munanore Cohâcjû ohô saha yeahye: ² Abrahã quehnoano tiquiro yepegûta “Quehnoariquire ijire”, ni ihñedarahye Cohâcjû tiquirore. Sa yero quehnoano yeperota ñariquire ijinino “Yuhu pûrita quehnoagu ijiaja”, ni masiedahye Abrahã, Cohâcjû ihñagû. ³ Cohâcjû yere tiquina ojoari pû ohô saha nine: “Abrahã Cohâcjû tiquiro nidire quehnoano tahogû, Cohâcjûre tiquiro wacû tutuagû Cohâcjû tiquirore ‘Potota quehnoariquire ijire’, ni,

ihñahye”, ni ojoahye tiquiore yere tiquina ojoari pūr. ⁴ Pūhoro dahrayequinare wapa yero, ihyo waro tiquiore paja ihñañe mehna wapa yero niedare. Tiquina dahrari wapa tiquinare wapa yero nine. ⁵ Cohācjüre wacū tutu-ayequina pehere dahrayequinare tiquiore wapa yero saha yerare Cohācjū. Cohācjüre wacū tutu-ariquiore “Quehnoariquiore ijire”, ni ihñare Cohācjū. Tiquiro sa ni ihñagū ti quehnoañe tiquiore yeri wapa ijierare. Cohācjū pehe tiquiore cahmeñequinare quehnoañequina wahagū yere. Sa yero masano Cohācjüre tiquiore wacū tutuagū ihñano “Quehnoariquiore ijire”, ni ihñare Cohācjū tiquiore. ⁶ Sata niahye panopū cjāno Davi mñano. Masano quehnoano tiquiore yepegūta Cohācjū pehe ihña coeranine. Cohācjüre tiquiore wacū tutuagū ihñano Cohācjū ihña coare. Sa yero tiquiore “Quehnoariquiore ijire”, ni ihñare. Tiquiro sa ni ihñanohriquiore masano pehe tiquiore bucuyere yahuahye Davi mñano. Ohō saha niahye:

⁷ Tiquina ñañe yerire tiquiore bonohriquina pehe tutuaro bucuere. ⁸ “Quehnoañequina ijire. Tiquina ñañe yerire wacūsi yuhū”, Cohācjū sa ninohriquina tutuaro bucuere, niahye Davi mñano.

⁹ ¿Judio masa tiquina cuhnucunū sohtoa cahserogāre yuhre nenohriquina dihitare tiquina ñañe yerire boyari Cohācjū? Ijierare. Judio masa ijieyequina yuhre nemehneñequina gūhure tiquina ñañe yerire bore tiquiore. Pari turi Abrahāre wacūña masa. Tiquiro Cohācjüre wacū tutuagū ihñano “Quehnoariquiore ijire”, ni ihñahye Cohācjū. ¹⁰ ¿Dahse ijigū sa yeari Abrahā, masa tuhohugū? Tiquiro

cuhnucunū sohtoa cahserogāre tiquiore yuhre neato panoputa tiquiore “Quehnoariquiore ijire”, ni ihñahye Cohācjū. Sa yero yuhre nenohno, tiquiore ñañe yerire bo tuhasanohriquiropū yuhre nenohahye. ¹¹ Sa yero duita Cohācjüre wacū tutua mūhtahye Abrahā. Tiquiro sa wacū tutuagū ihñano “Quehnoariquiore ijire”, ni ihñahye Cohācjū tiquiore. Sa tiquiore wacū tutuayere, Cohācjū yaquiore tiquiore ijiyere tiquiore ihñoatore Cohācjū tiquiore cuhnucunū sohtoa cahserogāre yuhre ne dutiahye. Sa yero Abrahā tiquiore yuhreato pano Cohācjū pehe “Quehnoariquiore ijire”, ni ihña tuhasahye tiquiore. Tiquiro yuhre neato pano tiquiore sa ihñariro saha ijipihtieyequina Cohācjüre wacū tutuayequinare judio masa ijieyequina yuhremehneñequinare “Quehnoañequina ijire”, ni ihñare Cohācjū. Tiquiro sa ni ihñañequina tiquina ijigū Abrahā tiquina ñecano mñano waro ijiriro saha wahare. ¹² Tiquina yero sahata judio masa, yuhrenohriquina Cohācjüre tiquina wacū tutuagū tiquina ñecano mñano poto ijie tiahye Abrahā. Tiquiro yuhreato pano Cohācjüre wacū tutuahye. Sa ye tiquiore yero saha wacū tutuayequina judio masa Abrahā panamena iji turiayequina ijire.

Cohācjū Abrahāre tiquiore ni cūrire “Poto tjire”, niahye Abrahā

¹³ Panopū ohō saha niahye Cohācjū Abrahāre. “Ahri yehpare mūhure, mūhū panamena iji turiayequinapū gūhure ohoutja”, ni, cūahye Cohācjū Abrahāre. Tī dutiyere tiquiore quehnoano yeri wapa sa niedahye Cohācjū tiquiore. Abrahā Cohācjüre tiquiore wacū tutuari wapa pehere sa niahye Cohācjū tiquiore, “Quehnoariquiore ijire”, tiquiore tiquiore ni ihñari bato. ¹⁴ “Cohācjū

Moisere tiqiro cūri dutiye dihitare yero cahmene”, nine judio masa. Sa niñequina Cohācjāre wacū tutuaro marieno ahri yehpa ijipihitirore ne duare. Wacū tutuaro marieno tiquina negū mari pehe Cohācjāre mari wacū tutuaye dūhseati ijieraboaya. Sa yero Cohācjū marine tiqiro ni cūri dūhseati ijieraboaya. ¹⁵ Moisere tiqiro cūri dutiye pehere yerare masa. Sa ye ti dutiyere tiquina yerari buhiri ahri yehpare tiquinare neno basioerare. Sa yero ti dutiyere tiquina yūhdūducari buhiri masare buhiri dahrerota Cohācjū. Sa ye ti dutiye mariedagū ti dutiyere yūhdūducaro gūhu mariedaboaya.

¹⁶ Sa ye Cohācjāre wacū tutuayequina dihita tiqiro ohoatire neeta. Abrahā Cohācjāre wacū tutuahye. Sa yero ijipihitiyequina tiqiro yero saha Cohācjāre wacū tutuayequina tiquina ñecano poto yero saha tojoare Abrahā. Sa yero “Ahrire māsare ohoutja”, Cohācjū nino ijipihitiyequinare tiqirore wacū tutuayequinare nino niahye. Sa ye Cohācjū Moisere tiqiro dutirire yeyequina Cohācjāre wacū tutuayequina Cohācjū ohoatire neeta. Tiquina dihita nesi. Ijipihitiyequina Abrahā yero saha Cohācjāre wacū tutuayequina gūhu tiquinare tiqiro ohoatire neeta. ¹⁷ Tire Abrahāre tiqiro nidiro sahata ojoahye panopare: “Peye macari cjēna tiquina ñecano ijiajāre cūu māhure”, ni cūahye Cohācjū Abrahāre”, ni ojoahye panopu. Sa yero tiqiro Cohācjāre wacū tutuahye. Sa ye tiqiro yero saha mari wacū tutuagū mari ñecu ijigū yeahye Cohācjū tiqirore. Cohācjū pehe yariariquinare masoriquiro, ijipihitiyequinare bajumehnediquiro ijire. Sa yero ijipihitiyere, yojopare mariedagū gūhure bajumehneatiqiro ijire.

¹⁸ “Peye macari cjēna māhu

panamena iji turiayequina ijietā”, Cohācjū tiqiro sa nigū Abrahā pehe pohna mariediquiro ijieperota, “Ijirota ijire”, ni tūhotuahye. ¹⁹ Sa yero cien cahmari caoriquiro ijieperota pohna dahre masieniquiro ijieperota Sara tiqiro namono ne pohna mariedicoro ticoro ijiepegāta “Pohna ti masiedaja usā”, ni tūhotuerahye Abrahā. Sa yero Cohācjū tiqiro ni cūrire “Ijirota ijire”, niahye Abrahā. ²⁰ “Tiqiro nidiro sahata yeraboaga”, ne ni tūhotuerahye Abrahā. Sa yero tiqiro Cohācjū cūrire quehnoano tūhoahye. Sa niñene tūhotjiāno “Cohācjū tutuariquiro ijire”, ni ño peoro niahye. Sa yero Cohācjāre wacū tutua nemoahye tiqiro. ²¹ “Cohācjū tiqiro nidiro sahata quehnoano ye masine”, ni tūhotu quehnoano masiahye Abrahā. ²² Tiqiro sa masigū Cohācjāre tiqiro wacū tutuagū Cohācjū pehe “Quehnoariquiro ijire”, ni ihñahye Abrahāre. Sata ni ojoahye Cohācjū yere tiquina ojoari pūpu.

²³ Sa ye Abrahā dihitare sa ni ojoaerahye. ²⁴ Tire mari masiatire mari gūhure sa ni ojoahye. Sa yero Cohācjāre mari wacū tutuagū “Quehnoana ijire”, ni ihñanota mari gūhure Cohācjū. Tiqiro pūrita mari pūtoro Jesu tiqiro yariagū masori jiri tiqirore. ²⁵ Jesu pehe mari ñañe buhiri yariari jiri. Tiqiro yariari bato masa wijari jiri tiqiro Cohācjū marine “Quehnoana ijire”, tiqiro ni ihñatire.

5

“Quehnoana ijire”, Cohācjū ni ihñagū ohō saha waharota marine

¹ Jesucristore mari wacū tutuagū ihñano “Quehnoana ijire”, ni ihñare marine Cohācjū. Tiqiro sa ni ihñagū Cohācjū mehna cjāna marine ijigū yere mari

pūhtoro Jesucristo. ² Sa yena mari tiqiurore wacū tutuagū ihñano Cohācjū marine cahīno, pecapū wahaborinare yūhdūori tiqiuro mehna mari ijiato saha. Cohācjū pūrita quehnoa yūhdūariqiuro ijire. Sa yero tiqiuro yero saha ijigū yerota marine tiqiuro. Tiquiro sa yeatire quehnoano masiaja mari. Sa yena bucueaja. ³ Mari ñano yūhdūna gūhū bucueaja mari. Ñano yūhdūna, tire dūca cjā mari. Sa dūca cāna, ñano yūhdūepenata quehnoano Cohācjūre wacū tutuana wahaja mari. Sa yena Cohācjū yere duheraja mari. ⁴ Mari sa yegū ihñano “Quehnoare”, ninota Cohācjū marine. Tiquiro sa nigū marine tiqiuro yūhdūoatire quehnoano masiaja mari. ⁵ Sa yero Cohācjū marine tiqiuro yaqiuro Espiritu Santore ohori mari mehna ijiatiqiurore. Sa yero Espiritu Santo pehe mari mehna ijiro Cohācjū marine tiqiuro sa cahīducuyere masigū yere. Tiquiro sa masigū yegū marine tiqiuro yūhdūoati quehnoano waro ijiro nine. Potota yūhdūanata mari.

⁶ Sa yero mari ñañe yerire mari basi mari yūhdūo masiedagū tiqiuro queoriro esagū mari ñañe buhirire Cristo yariahye. ⁷ Quehnoañe dihitare yeriqiurore yūhdūoro taro apeqiuro yariaboaga ape taha yero. ⁸ Mari pehe ñana mari ijinipegūta marine yūhdūoro taro Cristo yariahye. Tiquiro sa yegū Cohācjū marine tiqiuro tutuaro cahīñene masiaja mari. ⁹ Mari ye buhirire tiqiuro sa yariagū tiqiuro dii wijiagū Cohācjū pehe marine “Quehnoana ijire”, ni ihñare. Tiquiro sa ni ihñari bato yojopū pehere marine pecapū wahaborinare yūhdūorota Jesu. “Quehnoana ijire”, tiqiuro niato pano marine yūhdūoeranidī. Yojopū pehere marine Cohācjū yequina tiqiuro yeri bato marine

buhiri dahresi pecapū Cohācjū. ¹⁰ Sa yena Cohācjūre ihñana tuhtina mari ijinipegūta tiqiuro macāno yariaro, mari ñañe yerire cohāri. Sa cohāno Cohācjūre mari mehna usueragū yeri tiqiuro. Sa yena tiqiuro yequina wahaja mari. Yojopū pūritare ti yūhdūo cjūno yerota marine. Tiquiro yequina mari ijigū Jesu tiqiuro masa mājari mehna, marine pecapū wahaborinare quehnoano yūhdūorota tiqiuro. ¹¹ Camerū mari yūhdūatire bucueaja. Yojopūre ahri gūhūre bucueaja. Mari pūhtoro Jesucristo mari ñañe buhirire tiqiuro yariari bato Cohācjū yequina ijiaja mari. Sa yena bucueaja.

Adāre, Cristore yahuahye Pablo Roma cjēnare

¹² Adán tiqiuro ñañene yeri bato ahri yehpare ñañe iji dūcahye. Ñañe iji dūcagū masa yaria dūcahye. Ijipihtina mari ñañene yeaja. Sa yena ijipihtina ñana mari ijiri buhiri yariaja. ¹³ Cohācjū tiqiuro dutiyere Moise tiqiuro cūato pano potota ahri yehpa cjēna ñañene yee tiahye. Tiquina sa yepēgūta ti dutiye mariedagū ti dutiyere tiquina yūhdūdūcari buhiri buhiri dahre masiedahye. ¹⁴ Tiquiro sa buhiri dahre masiedapegūta Adán gūhū tiqiuro bato ijieyquina gūhū dutiye mariedapegūta yarie tiahye. Moise tiqiuro ijiato pano dutiye mariedapegūta masa yarie tiahye. Apequina ñañe yeye Adán tiqiuro ñano yeriro saha waro yera timahye. Sa ijiepetā tiquina gūhū yarie tiahye. Sa yero Adán ñañene tiqiuro ye dūcariro saha yoari batopū ahri yehpapū ahtariqiuro quehnoañene ye dūcari jiri.

¹⁵ Adán tiqiuro yūhdūdūcari Cohācjū masare tiqiuro paja ihñañe yero saha ijierare. Cohācjū tiqiuro paja ihñañe pehe quehnoa yūhdūare. Adán ihcāqiurota

ijieperota ñañene tiquiro ye ducari buhiri peyequina masa yarie tiahye. Cohãcjũ pehe marine paja ihñano, Jesucristore ohori jiri. Sa yero tiquiro ihcãquirola ijiriquiro pecapũ wahaboriquinare masare peyequinare yũhdũore. ¹⁶ Sa yero Cohãcjũ masare tiquiro paja ihñañe Adán tiquiro yũhdũducari yero saha ijierare. Adán pehe ihcãquirola ijiriquiro ñañene tiquiro yeri buhiri ijipihtiyequina masa buhiri tiyequina ijire. Sa tiquina buhiri tiyequina ijiepegũta masa pajiro ñañene tiquina yepegũta yojopũre masare paja ihñano Cohãcjũ tiquina ñañene bore. Sa boro “Quehnoañequina ijire”, ni ihñare tiquiro tiquinare. ¹⁷ Adán ihcãquirola ijiriquiro ñañene ye ducagũ ijipihtiyequina masa yariaducure. Ti poto tjire. Sa ijiepegũta ahri pehere bucuenata mari. Yojopũre Cohãcjũ masare paja ihñano Jesucristo ihcãquirola ijiriquiro tiquiro yariari mehna tiquina ñañene boro, tiquinare “Quehnoañequina ijire”, ni ihñare. Sa ye ijipihtiyequina tiquiro sa ni ihñañequina umũsepũ Cristo mehna puhtoia ijieta.

¹⁸ Ihcãquirola Adán ñañene ye ducagũ ijipihtiyequina ñañene ye ducahye. Tiquina sa yegũ Cohãcjũ buhiri dahrerota tiquinare. Apequiro Jesu pehe quehnoañene tiquiro yegũ ijipihtiyequina tiquina ñañene bonohriquina iji masine. Ñañene tiquiro bonohriquina tiquina ijigũ “Quehnoañequina ijire”, ni ihñanota tiquinare Cohãcjũ. Sa ye ijipihtiye decori tiquiro mehna ijiducueta tiquina. ¹⁹ Ihcãquirola Adán Cohãcjũre yũhdũducahye. Tiquiro sa yegũ peyequina masa ñano yeyequina iji ducahye. Sa yero apequiro Jesu pehe Cohãcjũre yũhtiahye. Tiquiro sa yegũ peyequina masa tiquina ñañe yerire

bonohriquina wahahye. Tiquina sa wahagũ “Quehnoañequina ijire”, ni ihñahye Cohãcjũ tiquinare.

²⁰ Cohãcjũ dutiyere Moiserere cũahye ijipihtiyequina masa tiquina ñañene tiquina quehnoano masiatire. Sa ye masa tiquina ñañene masiñe, ti yũhdũoro Cohãcjũ tiquinare tutuaro tiquiro cahĩñene masieta. Tiquiro marine cahĩ yũhdũare. ²¹ Tiquina ñañene tiquina yeri buhirire masa yari-atiquina ijire. Sa ye pecapũ wahaeta. Cohãcjũ mari Pacũ pehe masare cahĩ yũhdũare. Tiquiro sa tutuaro cahĩgũ mari puhtoro Jesucristore tiquiro ohogũ tiquiro pehe masare quehnoañequina wahagũ yere. Sa ye tiquinare “Quehnoañequina ijire”, Cohãcjũ tiquiro ni ihñagũ tiquina ijipihtiye decori tiquiro mehna sa ijiducueta.

6

Yariariquina mũna tiquina ñañene yerariro saha Cristo yequina gũhũ ñañene yeducuerare

¹ ¿Dũhse yenatari mari yojopũre, mũsa tũhotugũ? ¿Cohãcjũre marine cahĩ nemo duti duana ñañene ye nemoboagari mari? ² Ijierare. Ñañene yeracũhna mari. Yariariquina mũna ñañene tiquina yerariro saha Cristo yequina ijina mari gũhare ñañene yeraro cahmene. ³ Sa ye Jesu yequina mari ijiyere masa tiquina masiatire aco mehna wame yeri marine apequina. Jesu mari ñañe yeri buhiri yariari jiri. Sa yena tiquiro yequina ijina, mari ñañe yerire ye duerũ. Sa yena duhuu. Tiquiro mari ñañe buhiri yariari jiri. ⁴ Sa yena Cristo pagũre masa coperpũ tiquina ya cohãriro sahata mari ñañe yerire duhua. Sa yena mari Pacũ tiquiro tutuaye mehna Cristo tiquiro masa mũjariro saha mari gũhũ tiquiro tutuaye mehna

quehnoañe pehere comesaja. Sa yena quehnoana wahaja.

⁵ Sa yena Cristo yequina ijina Cristo yariaro ahri yehpa cã pagure tiquiro cohãriro saha mari gũh̄u yariariquina tiquina duhuriro saha mari ñañe yerire duhuu. Sa yena Cristo yequina ijina tiquiro masa m̄jariro sahata mari gũh̄u quehnoana ijinata. Ti poto tjire. ⁶ Cristo yequina iji d̄cana tiquiro mehna yariariquina yero saha wahau pari turi mari ñañene yerato saha. Sa waharina ijina ñañene yeducu nemosi mari. Tire mari masiaja. ⁷ Yariariquiro m̄nanop̄u ñañene ye nemoedare. ⁸ Cristo mehna yariariquina yero saha ijina, tiquiro masa m̄jariro sahata mari gũh̄u quehnoana ijinata. “Ti poto tjire”, ni t̄hotuaja mari. ⁹ Cristo tiquiro yaria masa m̄jari bato ne pari turi yariasi. Apequiro tiquirore pari turi yariagũ ye masiedare. Tire mari masiaja. ¹⁰ Sa yero Cristo ihcã taha yariaro, masa tiquina ñañe yerire cohãno taro yariah̄ye. Tiquiro catiriquiro ijiro mari Pacu tiquiro cahmeno sahata yeducuatiquiro ijire tiquiro. ¹¹ Tiquiro yero sahata m̄sa gũh̄u ohõ saha ni t̄hotuya: “Yariariquina m̄na tiquina yeraro saha mari gũh̄u ñañene yeraja. Jesu yequina ijina mari Pacu tiquiro cahmeno sahata yeanaja ijina niaja mari gũh̄u”, ni t̄hotuya m̄sa.

¹² Sa yena m̄sa yarianaja ijina ñañene yeducueracãh̄ña. Sa yena m̄sa ñañe ye duayere tutuaro cahmepenata tire sa t̄hotu cãh̄ña. ¹³ Ñañene yeracãh̄ña. Pecap̄u waha-borina Jesu tiquiro yãhd̄onohrina ijire m̄sa. Tiquiro sa yenh̄rina ijina Cohãcjũ cahmeñe dihitare yeya m̄sa. Sa yena quehnoañene yeya m̄sa. ¹⁴ Yojoꝑ̄re Cohãcjũ Moiserere tiquiro dutiye mehna marine dutierare. Cohãcjũ marine

cah̄no tiquiro pehe marine dutire. Sa yena tiquiro yedohoro mehna ñañene ye duasi mari.

M̄sa ñañene yeducugũ ti ñañe m̄sa p̄htoro yero saha ijire

¹⁵ ¿Yũh̄u sa nigũ d̄hse ni t̄hotuajari m̄sa? ¿Cohãcjũ pehere yãhtianaja ijina Moiserere tiquiro dutiyere yãhtianaja ijierana, ñañene yeducuboagari mari? Ijierare. Yeducusi. ¹⁶ ¿Ahrire masiedajari m̄sa? M̄sa quehnoano yãhtiriquiro m̄sa p̄htoro ijire. Sa yena tiquiro cahacjãna ijire m̄sa. M̄sa sa yãhti m̄sa p̄htoro tiriro sahata ñañene yeducuna m̄sa ijigũ ti ñañe m̄sa p̄htoro yero saha ijire. Sa yena ñañene duhu masiedare m̄sa. Sa yena ijina pecap̄u wahanaja ijire m̄sa. Cohãcjũre quehnoano ño peona ijina tiquiro cahacjãna ijire m̄sa. Sa yena tiquiro yequina quehnoana ijire m̄sa. ¿Tire masiedajari m̄sa? ¹⁷ Panop̄u ñañene yeducuna m̄sa ijigũ ti ñañe m̄sa p̄htoro yero saha ijimedi. Yojoꝑ̄u pehere quehnoañe buheyere tãhona Jesure wacũ tutuana Cohãcjũre quehnoano ño peona wahari m̄sa. Tire masigũ “Quehnoare”, niaja Cohãcjũre. ¹⁸ Sa wahana yojoꝑ̄re ñañe ti dutiro saha yerare m̄sa. Sa yena Cohãcjũ cahacjãna ijina quehnoañe pehere yere m̄sa. ¹⁹ Cahacjãna p̄htoare tiquina quehnoano ño peoyere masi pehore m̄sa. Sa yegũ ti m̄sa masidi mehna queoye mehna buhei m̄sare “Ahri buheyere m̄sa esa tuharo tãhoeraboaga”, nigũ. Panop̄u ñañene yeducuna ijimedi m̄sa. M̄sa sa yeducuriro sahata yojoꝑ̄u pehere quehnoañene yeducuna ijiya m̄sa. Sa yena Cohãcjũ cahmeñe dihitare yenata m̄sa. ²⁰ Panop̄u ñañe dihitare yerina ijina, quehnoañe pehere yera tiri m̄sa. ²¹ ¿Ti p̄jẽꝑ̄re ñañe dihitare

yena yabere wapatarī m̄sa? Ti m̄sa ñañe yerire wacūna yojop̄are bue tiaga m̄sa. Ti ñañene m̄sa yeri buhiri pecap̄a wahaboaya m̄sa. Sa yena ñañene yena ne wapataerare m̄sa. ²² Yojop̄a pehere m̄sa ñañe yerire duhuna Cohācjū cahacjāna wahari m̄sa. Sa yena Cohācjū cahmeñe dihitare yena ijinata. Sa yena ijipihtiye decori Cohācjū mehna ijinata. ²³ Ñañene mari yeri buhiri pecap̄a wahanaja ijijaja ijipihtina mari. Mari sa ijiepegūta mari p̄atoro Jesucristore mari wacū tutuagū ihñano, ijipihtiye decori tiqiro mehna marine ijiducugū yerota. Mari sa ijiducuatire sa oho cānota.

7

Cohācjū Moisere tiqiro ohoi dutiyere yahu nemoahye Pablo

¹ Yuh̄u acaye, Cohācjū Moisere tiqiro dutirire quehnoano masine m̄sa. Mas̄no tiqiro catinigū ti dutiyere yuh̄ud̄uca dutierare. Tiqiro yariari bato p̄iritare ti dutiyere yero basioerare. Ti gāh̄are masine m̄sa. ² Ohō saha ijire: Numinore ticoro man̄no mehna dihita iji dutire Cohācjū Moisere tiqiro dutiri pehe. Tiqiro sa dutiepegūta ticoro man̄no yariari bato ticoro pehe apequirore man̄u ti masine. Ticoro ti dutiro mehna iji nemoedare. Ohō saha ni yahure ti dutiyere. ³ Sa yero ticoro man̄no tiqiro catiepegūta ticoro apequirore man̄u tiro, ñano yero nine ticoro. Sa ijieperota ticoro man̄no yariari batop̄a apequirore man̄u tiro, Cohācjū dutiyere yuh̄ud̄ucaerare ticoro sa yericoro. Sa yero ñano yericoro ijierare ticoro.

⁴ M̄sa gāh̄u yuh̄u acaye Jesu yequina wahana, dutiyere m̄sa yeri wapa tiqiro yequina wahaerare m̄sa. Sa yena yariariquina man̄a dutiyere mehna tiquina

ijieraro saha m̄sa gāh̄u ti dutiyere mehna ijierare. M̄sa Cristo ya curua cjāna ijire. Sa yena yojop̄are tiqiro yequina ijire m̄sa. Tiqiro pehe yariari bato masa m̄jari jiri Cohācjū cahmeno saha mari yeatire. ⁵ Panop̄a ñañene mari esa tuharo yee timi. Sa yena Cohācjū Moisere tiqiro dutirire mari masidi bato ti dutiyere yuh̄ud̄uca duami. Ti dutiyere mariedagū yuh̄ud̄uca dueraboya. Sa yena ti dutiyere mari masidi bato ñañene tutuaro yemi mari. Sa mari ñañene yena mari pecap̄a waha-borinata ijie timi. ⁶ Sa wahaborina ijiepenata Cristo yequina ijina yojop̄are ti dutiyere mehna ijieraja mari. Sa yero Esp̄iritu Santo mari mehna ijiriquiro marine quehnoañe pehere comesagū yere. Tiqiro sa yegū panop̄a cjē dutiyere tiqiro ojoari ti mehna ijieraja mari yojop̄are.

Tiqiro ñañe yerire yahuahye Pablo

⁷ ¿Sa yena Cohācjū Moisere tiqiro dutirire dahse niboagari mari? ¿Ti dutiyere ñañe ijiagari, m̄sa t̄hotugū? Ijierare. Ti dutiyere mehna ñañene masii. Sa yegū ti dutiyere mariedagū ñañene masiedaboya yuh̄u. Ti dutiyere ohō saha ijire. “Apequina yep̄are tutuaro cahmedacāh̄ña”, niahye ti dutiyere. Sa niedagū apequina yep̄are tutuaro cahmeñe ti ñañe ijigū masiedaboya yuh̄u. ⁸ Sa yegū ti dutiyere yuh̄u masidi bato apequina yep̄are tutuaro cahmee timi yuh̄u. Ti dutiyere masiedagū apequina yep̄are tutuaro yuh̄u cahmeñe ti ñañe ijigū masiedaboya yuh̄u. ⁹ Ti dutiyere yuh̄u quehnoano masiato pano sa t̄hotu cāh̄u. Sa yegū ti dutiyere yuh̄u masidi bato tutuaro ñañene ye duami. Sa yegū pecap̄a yuh̄u wahatire masie tii. ¹⁰ Sa ye Cohācjū dutiyere yuh̄ud̄ucaeraye, masa tiqiro

mehna quehnoano ijiducuboya. Sa ye ti dutiye pehe quehnoano ijiducugū yebori dutiye ijire. Sa ijieperota yuhū yuhduducari buhiri yuhare pecarū waha dutimedi. ¹¹ Sa yegū ñañene yegū Cohācjū Moiserē tiquiro dutiyere yuhduduca duami. Ñañene tutuaro cahmegū yuhū ijigū quehnoañene masiedū. Ti ñañe pehe yuhare dojomehnedi. Sa yegū quehnoano masiedū. Sa masiedagū Cohācjū dutiyere yuhduducanū. Sa yegū ti dutiyere yuhū masidi bato yuhū ñañe buhirire pecarū yuhū wahaborirore masii. Ti dutiye mehna sa masii.

¹² Sa ye Moiserē tiquiro cūri dutiye quehnoañene ijire. Sa ye queoro ijirota nine ti dutiye. ¹³ ¿Sa ijieperota marine ti quehnoañene dutiye pehe pecarū wahagū yejari? Ijerare. Topū wahagū yerare. Mari ñañe yeye pehe marine pecarū wahagū yere. Ti dutiyere mari masidi bato ti dutiyere yuhduducana, ñañene yena mari ijiyere masiaja mari. Sa yena mari ñana mari ijiyere masina, mari pecarū wahati gūhare masiaja mari. Sa yena ti dutiyere masina mari yuhduducarire ti ña yuhduaye ijigū masiaja mari.

¹⁴ Moiserē tiquiro dutiri Cohācjū pehe tiquiro cūri ti ijigū masiaja mari. Yuhū pehe apequna yero saha ñagū ijlaja. Sa yegū ñañene yeducugū ijiaja. ¹⁵ Sa yeducugū ijiepeguta yuhū yerire ne masiedū yuhū. Yuhū cahmeno saha yeraja yuhū. Sa yegū yuhū tutuaro ye dueramedireta yeaga yuhū. Sa yegū yuhū yerire ne masiedaga yuhū. ¹⁶ Sa yegū ñañene ye duerapeguta ñañene yeaja yuhū. Tire yegū Cohācjū dutiye quehnoañene ijigū masiaja yuhū. ¹⁷ Sa yegū yuhū waro ti ñañene yojopure yeraja. Yuhū tūhotuyepū ijiye ñañe ti pehe yuhare ñañene yegū

yere. ¹⁸ Quehnoañene tutuaro ye duepeguta ne cūedaga. Ñañe pehe yuhare dojomehne mujare. Ahri yehpa cjū yuhū ijigū yuhū tūhotuyepū ñañe dihita ijire. Ne quehnoañene mariedabutiare. ¹⁹ Quehnoañene yuhū ye duaye pehere ne yeraja yuhū. Yuhū ñañene yuhū ye dueye pehere yeaja. ²⁰ Sa yegū yuhū ye dueyere yegū yojopure yuhū waro tire yeraja. Yuhū tūhotuyepū ijiye ñañe ti pehe yuhare ñañene yegū yere.

²¹ Sa yero yuhare ohō saha wahare: Quehnoañene yuhū ye duepeguta yuhū tūhotuyepū ñañe ijire. Sa yegū quehnoañene pehere yeraja. ²² Cohācjū Moiserē tiquiro dutirire yuhū tūhotuyere mehna tutuaro cahmeaja. ²³ Sa yegū yuhū ahrire masiaja: Yuhū tūhotuyere mehna quehnoañene ye duaja. Sa ye duepeguta yuhū basi ñañene tutuaro ye duaja. Sa yegū yuhū esa tuharo ñañene duhu masiedaga yuhū.

²⁴ Sa ñañene duhu masiedagū pejecuogu ijiaja yuhū. Ñañene yegū pecarū wahaguta yuhū. Yohnah. ¿Yuhū ñañene yuhare pecarū waha dutiye ñañene noa yuhare cohā basaboagari? ²⁵ Jesucristore yuhū wacū tutuagū tiquirota yuhū ñañene cohānota. Tiquiro sa yegū Cohācjūre “Quehnoare”, niaja yuhū. Sa yegū yojopure yuhū basi yuhū tūhotuyere mehna Cohācjū dutiyere yeaja. Sa yegū ijiepeguta yuhū esa tuharo ijigū ñañe pehe yuhare ñañene yegū yere.

8

Espíritu Santore cuoyequina tiquina ijiye tiyere yahuahye Pablo

¹ Yojopure Jesucristo yequinare tiquina buhiri tiato mariedare. [Tiquina ñañe tutuaro cahmeñene yerare. Sa ye Espiritu Santo tiquiro dutiro saha yeducure tiquina.]

² Sa yero Jesucristo yaquiro yuhū

ijigũ Espiritu Santo ñañene duhugũ yere yuhũre. Sa yero Espiritu Santo ijipihtiyere decori Cohãcjũ mehna ijigũ yere yuhũre. Ñañene yuhũre duhugũ yero yuhũre pecapũ wahaborigũre yuhduore tiqũiro. ³ Cohãcjũ Moisere tiqũiro dutirire mari esa tuharo ne ye pehosi. Sa ye pehoerana yuhduũcãna ijiaja mari. Sa yena mari ijigũ Cohãcjũ marine yuhduoeranidi. Mari sa ijina ijiepegũta ohõ saha Cohãcjũ marine yuhduorota. Tiqũiro mari ñañene buhirire yariatiqũirore, ti ñañene cohãtiqũirore tiqũiro macũno ohoahye. Sa yero tiqũiro macũno mari yero sahata pagũ tiahye. Sa yero mari tãhotuyepũ ijiye ñañene tiqũiro cohãri. ⁴ Marine sata yeri Cohãcjũ dutiyere tiqũiro tutuaye mehna mari ye pehoatire. Ti dutiyere ye pehona ijina mari esa tuharo ijieraja. Sa ijina Espiritu Santo yedohoye mehna tiqũiro dutiro sahata yeaja mari.

⁵ Ñañene ye duayequina, ti dihitare tutuaro cahmene. Espiritu Santo dutiro sahata yeducuyequina pehe ti dihitare ye duare tiquina. ⁶ Ñañene ye duayequina ti dihitare tutuaro cahmeñe, pecapũ wahaeta. Espiritu Santo cahmeno sahata tutuaro ye duayequina pehe ijipihtiyere decori Cohãcjũ mehna ijietta. Sa ye tiquina quehnoano iji cãeta. ⁷ Tiquina esa tuharo yeyequina Cohãcjũre ihña tuhtire. Tiquina Cohãcjũ dutiyere ne yuhtierare. Tiqũiro dutiyere yuhti duerare. Yuhti masiedare tiquina. ⁸ Sa ye tiquina esa tuharo yeyequina Cohãcjũre bucuegũ ye masiedare.

⁹ Mũsa pehe mũsa esa tuharo yerare. Espiritu Santo mũsa mehna ijigũ tiqũiro cahmeno sahata yere mũsa. Sa ye Espiritu Santore cũoeyequina pehe Cristo yequina ijierare. ¹⁰ Mũsa pehe tiqũiro

yequina ijire. Mũsa ñañe buhirita mũsa paguri yariare. Sa mũsa paguri yarianaja ijiepenata Cristo mũsa mehna tiqũiro ijigũ tiqũiro mehna sa ijiducunata mũsa. Cohãcjũ mũsare “Quehnoana ijire”, tiqũiro ni ihñagũ mũsa tiqũiro mehna sa ijiducunata. ¹¹ Cohãcjũta Jesure masori jiri. Sa masoritiqũiro ijiro Espiritu Santo mari mehna tiqũiro ijiducugũ mari yariari bato Cohãcjũ mari gũhũre masonota. Sa masono mari pagũire yariati pagũire catigũ yerota marine.

¹² Yuhtũ acaye, tiqũiro sa yegũ ihñana ñañe mari tutuaro cahmedire yeracũhna. ¹³ Mari ñañene yerina ijina, pecapũ wahaborina iji cãnata niaja. Espiritu Santo yedohoye mehna ñañe yeyere duhurina ijina, ijipihtiyere decori Cohãcjũ mehna ijinata.

¹⁴ Ijipihtiyequina Espiritu Santore yuhtiyequina Cohãcjũ pohne ijire. ¹⁵ Espiritu Santo mari mehna tiqũiro iji dũcagũta Cohãcjũ pohna iji dũcaũ. Sa yena tutuaro mehna tiqũiro dutinohrina ijieraja mari. Sa yena panopũ mari cueriro saha yojopũ pehere mari cueraja. Tiqũiro pohna ijina, Espiritu Santo yedohoye mehna yojopũre “Yuhtũ Pacũ”, niaja mari Cohãcjũre. ¹⁶ Sa yero Espiritu Santo mari wacũñepũ marine ohõ saha masigũ yere: Potota Cohãcjũ pohna ijiaja mari. Tire marine masigũ yere tiqũiro. ¹⁷ Sa yena tiqũiro pohna ijina, Cohãcjũ ijipihtiyere tiqũiro pohnene tiqũiro “Ohoutja”, tiqũiro nidire mari pehe cũonata. Jesucristo mehna mari cũonata tire. Cristo yere mari yeri buhiri ñano yuhduũrina ijina mari tiqũiro mehna uhmũsepũ quehnoano bucueye mehna iji cãnata. Sa yena Cohãcjũ tiqũiro pohnene “Ohoutja”, tiqũiro nidire cũonata mari.

¹⁸ Yojopũre ahri yehpapũ ñano

yuhdũrĩaja mari. Camerũre mari umũserũ quehnoano iji cãnata. Sa yena yojopũre ñano yuhdũna, pajiro bujũa witi wacũ tũhotueracũhna. Ahri mari ñano yuhdũri sa iji cãno nine. Came quehnoano iji cãnata Cohãcjũ mehna. Sa yena tutuaro bucuenata. Ahri pũrita ihyo waro ijierare. ¹⁹ Cohãcjũ pohna ijina Cohãcjũ mehna quehnoano ijinata. Mari sa wahatire cohteducuro saha yero nine Cohãcjũ bajumehnedi. ²⁰ Ijipihtiroperũre tiqũiro bajumehnedi quehnoano ijiborire dojomehneahye masũno ñano ye dũcaro. Ti esa tuharo sa wahaerahye. Ñaũe iji dũcari bato tiqũiro bajumehnedi sa wahahye. Sa yero Cohãcjũ tiqũiro bajumehnedire sata ñano iji dutiniahye. Came tiqũiro bajumehnedire quehnoaũe wahagũ yerota tiqũiro. ²¹ Sa yero Cohãcjũ tiqũiro bajumehnedire ahba pihtiborire quehnoaũe wahagũ yerota tja. Cohãcjũ pohnene quehnoaũequina tiqũiro wahagũ yeriro sahata, tiquinare quehnoano tiqũiro yuhdũoriro sahata quehnoaũe wahagũ yerota Cohãcjũ tiqũiro bajumehnedire. ²² Ijipihtiye Cohãcjũ tiqũiro bajumehnedi ñano ti iji dũcari bato ñano yuhdũe tiahye. Numino niji wahcũno ticoro ñano yuhdũro sahata tiqũiro bajumehnedi gũhũ decoripe ñano yuhdũducure. Tire mari masiaja. ²³ Mari pehe Espĩritu Santore cũona ijiaja. Tiqũiro yequina mari wahagũ Cohãcjũ tiqũiro yaqũiro Espĩritu Santore duita ohori marine. Tiqũiro bajumehnedi yero sahata mari gũhũ ñano yuhdũaja. Sa yena quehnoaũe pehere tiqũiro comesatire tutuaro cohteaja. Sa yena tiqũiro pohna mari tiqũiro mehna mari quehnoano ijiato gũhũre tutuaro cohteaja mari. Wahma pagure marine tiqũiro ohoati gũhũre cohteaja. ²⁴ Mari sa cohtena ijigũ,

tiqũirota marine pecarũ waha-borinare yuhdũore. Tiqũiro caharũ ijirina ijina tiqũiro caharũre mari wahatire cohteraboya mari. Marine tiqũiro yuhdũo tuhasari bato ijigũ tire cohte nemoedaboya. ²⁵ Sa yena tiqũiro ohoatire ihũedapenata Cohãcjũ marine tiqũiro yuhdũoatire cohtena, sa cohteducuaja.

²⁶ Sa yena Cohãcjũre wacũ tutuera cjũna tiqũiro cahmeũene quehnoano masiena mari ijigũ Espĩritu Santo marine yedohore. Cohãcjũre mari quehnoano sini masiedaja. Espĩritu Santo pehe marine Cohãcjũre tutuaro sini basare. Marine tutuaro paja ihũano marine tiqũiro Cohãcjũre tutuaro sini basare. ²⁷ Cohãcjũ cahmeno sahata marine Jesu yequinare sini basare Espĩritu Santo. Tiqũiro sa sini basagũ Cohãcjũ mari tũhotuyere masi pehoritũiro ijiro, Espĩritu Santo tiqũiro sini basarire masine.

Cristo tiqũiro tutuaye mehna ñaũe yeyere yuhdũducunata mari

²⁸ Ahrire yuhũ yahuatire masiaja mari: Ijipihtina Jesure cahĩna mari ijigũ tiqũiro cahmeũene yeanajare beseahye marine. Sa ijina mari ijigũ ihũano Cohãcjũ sa ihũa ihboducure marine. Sa yena mari ñano yuhdũepenata ñano yuhdũducu dojoeraja. Cohãcjũ tiqũiro yedohoro mehna quehnoano ijinata mari. ²⁹ Cohãcjũ marine tiqũiro yequinare duitapũta masi tuhasahye. Sa masino tiqũiro macũno Jesu tiqũiro ijiro sahata marine iji dutiro, marine quehnoaũe pehere comesa duti tuhasahye. Tiqũiro macũno yero saha marine iji dutiahye tiqũiro peyequina masa tiqũiro macũnore mari wahmi tiatire. ³⁰ Panopũ tiqũiro yequina tiqũiro iji dutirina mari ijigũ, tiqũiro pohna mari ijiatina gũhũre beseahye

marine. Sa yero marine tiqiro be-
serinare tiqiro “Quehnoañequina
ijire”, ni ihñare. Marine tiqiro
sa ninohrinare tiqiro mehna
uñmsepñ quehnoano ijigũ yerota
marine Cohãcjũ.

³¹ Tire masina ohõ saha
tuhotuaja mari: Cohãcjũ marine
tiqiro cahñonare ne apequina
ihña tuhtiyẽ cũedare. ³² Cohãcjũ
mari ye buhirire yariatiquirore
tiqiro macñonore ohoahye. “Yũhũ
macũre cahñaja. Sa yegũ tiqirore
ohoeraja”, niedahye tiqiro. Ma-
rine sa tutuaro yedohoriquiro
ijiro, ijipihtiyẽ mari cahmeñe
duhsarire marine oho pehorota.
³³ Cohãcjũ beserina mari ijigũ,
tiqiro marine “Quehnoana ijire”,
ni ihñari. Mari sa ijina ijigũ
apequina marine “Ñana ijire”, ne ni
yahusã masiedare. ³⁴ Cristo mari
ye buhirire yaria masa wijiahye.
Sa yero Cohãcjũ poto pehepũ
yojopũre tiqiro ijire dutiriquiro
ijiro. Sa yero tiqiro marine
potota sini basaro ñine Cohãcjũre.
Sa ye apequina pehe marine ne
buhiri dahre duti masiedare.
³⁵ Cristo marine tiqiro tutu-
aro cahĩgũ apequina tiqirore
“Cahĩedacãhña”, ne ni masiedare.
Cahĩ duhusi tiqiro. Mari ñano
yũhdũepegũta, mari cuepegũta,
apequina marine tiquina ñano
yepegũta, mari uñja ahbaepegũta,
suhti mariena mari ijiepegũta,
cuaropũ mari ijiepegũta, marine
tiquina wejẽpegũta Cristo marine
sa cahĩducurota. ³⁶ Cohãcjũ yere
tiquina ojoari pũpũ mari sa wa-
hatire yahuro, ohõ saha nine:

Mũhũ yequina usã ijiri buhiri
apequina usãre sa wejẽ
duaducure. Oveja tiquina
wejõatiquina tiquina ijiriro
saha usã gũhũre sa wahare,
ni ojoahye Cohãcjũ yere
tiquina ojoari pũpũ.

³⁷ Sa yena mari ñano yũhdũepenata
Cristo marine cahĩniquiro tiqiro

yedohoro mehna tutuaro mehna
ñañene duhu pehonata mari.
³⁸⁻³⁹ Jesucristo yequina mari
ijigũ ihñano Cohãcjũ pehe marine
tutuaro cahĩne. Sa yero tiqiro
marine ne cahĩ duhusi. Mari
yariagũ gũhũre, mari catigũ gũhũre,
yojopũre, camerũ gũhũre, tiqiro
marine cahĩ duhusi. Sa ye angele,
watĩa pũhũa, ahri yehpa cjẽna
pũhũa, uñmũse cjẽna, ñañequina
bajueyequina gũhũ Cohãcjũre
“Mũhũ yequinare cahĩedacãhña”,
tiquina niepegũta marine ne cahĩ
duhusi Cohãcjũ. Cohãcjũ tiqiro
bajumehnedi mehna marine ne
cahĩ duhugũ yeye mariedare.
Marine ne tiqiro cahĩ duhusi.

9

*Israe masa Cohãcjũ beseriquina
ijire*

¹⁻² Yũhũ acaye Israe masare
wacũgũ, tutuaro bajũa witiája
yũhũ. Cristore cahmedare tiquina.
Sa yegũ ñano bajũa witi jeripohna
tíaја yũhũ. Ti yũhũ sa ni yahuye
ijirota ijire. Yũhũ Cristo yaquirola
ijiaја. Sa yegũ masare potota
niaја. Sa yegũ Espĩritu Santo yũhũ
mehna tiqiro ijigũ yojopũre yũhũ
acayere yũhũ ni yahuye ti potota
ijigũ quehnoano masiaја yũhũ.
Tiqiro tire yũhũre quehnoano
masigũ yere. ³ Israe masa yũhũ
acaye ya maca cjẽna pecarũ wa-
haeta. Cohãcjũre tiquinare yũhdũo
dutigũ ohõ saha niboa yũhũ pehe:
“Tiquina ye buhirire yũhũ pehe
pecarũ wahaũtја. Sa yero tiquina
ye buhirire yũhũ pehere buhiri
dahreahro Cristo”, niboa yũhũ.
⁴ Tiquina yũhũ acaye Israe manano
panamena iji turiayequina ijire. Sa
yero Cohãcjũ pohne ijiatiquinare
cũahye Cohãcjũ tiquinare. Sa
yero Cohãcjũ tiqiro asi siteye
mehna tiquina watoa ijie tiahye.
Sa yero tiquina ijipihtiyequinare
tiqiro masare tiqiro yũhdũoatire

yahue tiahye tiquinare. Sa yero Moiseru tiqiro dutirire duita cũ mǎhtahye Israe masare. Sa ye Cohǎcjũre ño peoati wǎhũre ye mǎhtae tiahye tiquina. Sa yero tiquinare tiqiro quehnoano yeatire yahue tiahye Cohǎcjũ. ⁵ Ʋsǎ ye cururi waro doce cururi waro ijire. Sa yena Ʋsǎ ñecũsmũna iji mǎhtariquina mǎnapũ tiquina panamena iji turianapũ ijiaja Ʋsǎ Israe masa. Sa yero mari yero saha pagũ tiriqiro ahtaro, Ʋsǎ acayũro Israe masũno waro ijire Cristo. Tiquiro Cohǎcjũta ijire. Sa yero tiqiro ijipihtiyequina pũhtoro ijire. Ijipihtye decori tiqirore quehnoano ño peouhna mari. Sa ño peoducuhna.

⁶ Apequina Israe mǎnano panamena iji turiayequina ijiepetu Cohǎcjũ yequina waro ijierare. Sa yena tiquina tiqiro yequina ijieragũ ihñana ohõ saha ni tũhotuboa mũsa: “Israe masare yeequina ijigũ yeitja”, nieperota ihquẽquinare Cohǎcjũ tiqiro nidiro sahata yerare”, ni tũhotuboa mũsa. Sa ni tũhotueracǎhña. ⁷ Ohõ saha ijire: Apequina Israe masa Abrahã panamena iji turiayequina tiquina ijiepegũta “Abrahã panamena iji turiayequina waro ijire”, ni ihñedare Cohǎcjũ tiquinare. Sa yero ohõ saha niahye Cohǎcjũ: “Mũhũ macũ Isaac panamena iji turiayequina tiquina pũrita potota mũhũ panamena iji turiayequina waro ijietu”, niahye Cohǎcjũ Abrahãre. ⁸ Tiquiro sa ni yahugũ ahrire masinata mari: Abrahã panamena tiquina masa bajuari bato duita Cohǎcjũ pohne waharĩedaga tiquina. Cohǎcjũ tiqiro ni cũrre quehnoano tũhoyequina tiqirore wacũ tutuayequina pehe tiquinata ijiga Cohǎcjũ pohne. Sa ye tiquinata ijire Abrahã panamena iji turiayequina waro. ⁹ Ohõ saha niahye Cohǎcjũ Abrahãre: “Ape cǎhma ahri pje borota yũhũ

majare tojoa tagũ mũhũ namono Sara nijinogãre cũorota mũhũ macũre”, niahye Cohǎcjũ Abrahãre. Sa nino Cohǎcjũ Abrahã macũno tiqiro masa bajuatire yahuyuro niahye.

¹⁰ Came Isaac namono Rebeca wame tiricoro duita pũaro pohna tiahye. Tiquina pacũro Isaac Ʋsǎ ñecu mǎnano iji turiariqiro ijiahye. ¹¹⁻¹² Sa ye tiquina pohne tiquina masa bajuato pano quehnoañene, ñañe gũhũre tiquina yeato pano Cohǎcjũ tiquina pacoro ijaticorore ohõ saha nie tiahye: “Tiquiro bahũro pehe tiqiro wahminore dutirota. Sa yero tiqiro pũhtoro ijirota”, nie tiahye ticorore. Cohǎcjũ tiqiro cahmeno sahata besere tiqiro. Sa beseriquiro ijiro ihcãquirogãre besero ticorore sata ni yahue tiahye. Sa yero masa tiquina yeyere ihñedaperota tiqiro cahmeno sahata tiqiro yequina ijiatiquinare besere. ¹³ Sata ni ojoahye tiqiro yere tiquina ojoari pũpu: “Jacob pehere cahĩe tii. Sa yegũ Esau pehere cahĩeda tii”, niahye Cohǎcjũ”, ni ojoahye panopũ.

¹⁴ ¿Tire wacũna dũhse ni tũhotuboari mari? ¿Tiquina yeyere ihñedaperota ihcãquirore sa besero Cohǎcjũ queoro yeraboari, mũsa tũhotugũ? Ijierare. ¹⁵ Ohõ saha nie tiahye Cohǎcjũ Moiseru: “Yũhũ cahmediqiro dihitare paja ihñautja”, niahye tiqiro Moiseru. Sa yero ihcãquirore sa besero potota yero niahye Cohǎcjũ. ¹⁶ Sa yena mari esa tuharo mari cahmeno saha Cohǎcjũre marine paja ihñagũ yeraja mari. Sa yero ne mari quehnoañene mari yeri wapa gũhũre marine paja ihñedare tiqiro. Tiquiro esa tuharo tiqiro cahmeñequina pehere paja ihñare. ¹⁷ Sa yero sata tiqiro esa tuharo yeahye Egipto cjẽna pũhtoro gũhũre. Ohõ saha niahye Cohǎcjũ

tiquirore faraõre: “Egipto cjēna pũhto ijicjare cūgũ nii mũhare yũhũ tutuayere ijipihtiequinare yũhũ ihñõatire. Sa yegũ ijipihtie yehpari cjēna yũhare tiquina masiatire pũhto sũu nii yũhũ mũhare”, niahye Cohãcjũ tiquirore. Ohõ sahata nine Cohãcjũ yere tiquina ojoari pũpũ. ¹⁸ Sa yero tiquiro cahmeñequinare tiquiro esa tuharo paja ihñare tiquiro. Sa yero tiquiro esa tuharo apequinare yũhtieragũ yere tiquiro. Sa yero Cohãcjũ tiquiro cahmediro sahata yere.

¹⁹ Tiquiro sa yeriquiro ijigũ ihñana yũhũ pehere ohõ saha niboaga mũsa: “Cohãcjũ marine tiquiro cahmediro sahata tiquiro yegũ mari pehe tiquirore yũhdũdũca masisi. ¿Mari sa yũhdũdũca masiedapegũta dũhse ijero boro marine buhiri dahre duajari tiquiro?” ni pihopũri sinituboaga mũsa yũhare. ²⁰ Ohõ saha ni yũhtiaja mũsare: “¿Masa ihyo ijina ijiepenata Cohãcjũre tuhtiajari mũsa? Dihi sutu dahreriquirore ¿Dũhsegũ yũhare ohõ saha ijiri sutu yeri mũhũ?” ti sutu ni sinituboriro saha nina niaga mũsa Cohãcjũre. Sa ni masiedare mũsa. ²¹ Dihi sutu dahreriquiro dihi mehna tiquiro cahmeno sahata yere. Sa yero quehnoañene pose yeati suture ye masine tiquiro. Tia dihi yũbũ mehnata ihyo ijiyere pose yeati sutu gũhare ye masine tiquiro. Tiquiro yero saha Cohãcjũ gũhũ tiquiro ye duaro sahata yere.

²² Sa yero Cohãcjũ pecapũ tiquiro cohãtiquinare tiquina ñaňe yerire tiquiro ihña usuaro tiquinare buhiri dahre duamahye. Sa buhiri dahre dueperota, yolari pje tiquina ñaňe yeyere sa ihña cãñahye, ijipihtiequinare tiquiro buhiri dahreatire, tiquiro tutuayere ihñono taro. ²³ Sata yeahye Cohãcjũ tiquiro quehnoa butiariquiro tiquiro ijiyere, tiquiro tutuaye

gũhare mari masiatire. Panopũ marine tiquiro paja ihñanohanajare tiquiro beseahye, ijipihtie tiquiro tutuayere tiquiro quehnoañene mari cõoatire. ²⁴ Sa yena mari pehe tiquiro beserina ijinata niaja. Sa ye tiquiro beseriquina pehe ihquẽquina judio masa dihita ijierare. Ihquẽquina judio masa ijieyequina gũhũ ijire tiquiro beseriquina. ²⁵ Sata nine judio masa ijieyequinare Cohãcjũ yere Osea mũnano tiquiro ojoariro sahata:

Yeequina ijieyequina gũhare camepũ tiquinare “Yeequina ijire”, niitja. Sa yegũ yũhũ cahñeñequina gũhare camepũ tiquinare “Yũhũ cahña ijire mũsa”, niitja, niahye Cohãcjũ. ²⁶ “Yeequina ijierare mũsa”, Cohãcjũ tiquiro nimesi yehpari cjēna tiquina Cohãcjũ catiriquiro pohmeta ijietta, ni ojoahye Osea panopũre.

²⁷ Sa yero panopũ cjũno Isaia mũnano Israe masare ohõ saha ni yahuahye: “Pajiri ma cjẽ padũ pjerigãre mari queona cũedaja. Israe masa ti padũ pjerigã yero saha ijieyequina peyequina ijiepegũta meheñequinagã Cohãcjũ yũhdũorota tiquinare. ²⁸ Cohãcjũ ahri yehpa cjẽnare peyequina masare sojaro mehna potota buhiri dahre madoqueorota”, niahye Isaia. ²⁹ Sa yero pari turita ohõ saha ni ojoahye Isaia:

Mari pũhtoro ijipihtiequina pũhtoro meheñequinagã mari mehna cjẽnare yũhdũoeraro, marine judio masare ijipihinare butigũ yeboya tiquiro. Sodoma cjẽnare, Gomorra cjēna gũhare tiquiro butigũ yeriro sahata mari gũhare butigũ yeboya tiquiro, ni ojoahye Isaia yũhũ acaye

Israe masare tiquiro yeato panopu.

Judio masa quehnoañe buheyere cahmedahye

³⁰ Sa tjire. Sa yena ahrire masi nemoña msa: Judio masa ijieyequina Cohäcjüre macaedapeta tiquirore bocare. Jesucristore tiquina wacü tutuagü, “Quehnoañequina ijire”, ni ihñari tiquinare Cohäcjü. ³¹ “Cohäcjü dutiyere mari yegü tiquiro marine yuhduorota”, niñe judio masa pehe Cohäcjü Moiserere tiquiro dutiyere yepeta, cüedari. Sa yero ti dutiyere tiquina yepegüta Cohäcjü “Quehnoañequina ijire”, ni ihñedari. Sa ye quehnoañequina iji duepeta cüedari. ³² Ohõ saha ye, tiquina cüedari: Tiquina Cohäcjüre wacü tutuaro marieno tiquina esa tuharo Moiserere tiquiro dutirire ye duamedí, tiquiro yequina iji duaye. Mari queoye mehna buhegü Cristo utã yero saha ijiriquiro ijire. Omaperiquiro utãpu doque wahã sa bora quehero, tiquiro esaborirore ne eserare. (Tiquiro yero saha tiquina Cristore utã yero saha ijiriquirore cahmeeñequina Cohäcjü cahapu ne esasi.) ³³ Sata ni ojoahye Cohäcjü yere tiquina ojoari pũpu:

Jerusalẽ wame tiri macapu utã yero saha ijiriquirore cügu niaja. Mari queoye mehna buhegü ohõ saha ijire: Omaperiquiro utãpu doque wahã sa bora quehero tiquiro esaborirore eserare. (Tiquiro yero saha ti maca cjëna utã yero saha ijiriquirore tiquina cahmedari buhiri Cohäcjü cahapu ne esasi. Tiquiro pehe tiquinare topure waha dutisi.) Sa ye tiquirore wacü tutuayequina pehe quehnoano bucueeta, ni ojoahye.

10

¹ Yuhu acaye, Israe masare pecapu wahaboriqinare Cohäcjü tiquiro yuhduoatire, tutuaro yuhu jeripohna mehna cahmesãja yuhu. Sa yegu Cohäcjü tiquinare tiquiro yuhduoatire sini basaja yuhu. ² Potota tiquina Cohäcjü cahmeñene ye duamene. Sa ye duepeta tiquiro cahmeñene masiedare. ³ Sa ye tiquinare Cohäcjü tiquiro quehnoañequina wahagü yeborire tiquina masiedare. Sa masiedaye tiquina esa tuharo quehnoañene yepeta, cüedari. Tiquina sa yegü Cohäcjü tiquiro wacü tutu dutiriro sahata tiquina yeragü ihñano, tiquiro pehe tiquinare “Quehnoañequina ijire”, ni ihñedari. ⁴ Ijipihtiyequinare Cristore wacü tutuayequinare “Quehnoañequina ijire”, ni ihñare Cohäcjü. Sa yena dutiye yeye mehna yuhdu witieraja mari. Cristo mehna yuhduaja.

⁵ Moise manano panopu cjãno ohõ saha ni ojoahye: “Cohäcjü dutirire mari duhoro marieno ye pehogü Cohäcjü yuhduorota marine”, ni ojoahye tiquiro. ⁶⁻⁷ Tiquiro sa ni ojoaepegüta yojopure masa Cristore tiquina wacü tutuagü Cohäcjü tiquinare “Quehnoañequina ijire”, ni ihñare. Ti buheye quehnoañequina wahagü yeri buheye ohõ saha ni yahure: Cristo tiquiro basi ahri yehpapu wihi tuhasari jiri. Sa yero masa maja tuhasari jiri. Sa yena ohõ saha ni tãhotueracãhña msa: “¿Diquiro pehe ahmusepu Cristore ne cãhta basaro wahaboagari marine tiquiro yuhduoato saha? ¿Diquiro pehe yariariquina cahapu Cristore maso basaro ne cãhtaboagari? Tiquirore ne cãhtaboriquiro mariedare”, ni tãhotueracãhña msa. ⁸ Sa yero ohõ saha ni yahure Cohäcjü yere tiquina ojoari pũpu: “Cohäcjü

ye buheyere mari macagū ti buheyere ohōp_u ijire. Ti buheyere masi tuhasare m_usa. Sa yena ti buheyereta yahuducue tire m_usa”, ni ojoahye. Ti buheyere Cristore wacū tutuaye buheyere masare yahuaja *usā*.⁹ Ti buheyere ohō saha ni yahure: “Jesu mari p_uhtoro ijire”, ni mari yahugū, “Cohācjū Jesure yariariquirore potota masori”, ni mari t_uhotugū, Cohācjū marine pecap_u wahaborinare y_uhd_uorota.¹⁰ Jesure mari wacū tutuagū Cohācjū pehe marine “Quehnoana ijire”, ni ihñanota. Sa yero Jesure mari wacū tutuayere apequinare mari yahugū tiquiro marine pecap_u wahaborinare y_uhd_uorota.

¹¹ Ohō saha nine Cohācjū yere tiquina ojoari p_up_u: “Cohācjūre wacū tutuayequina tiquirore tiquina wacū tutuarire ne buja witisī”, niahye Cohācjū yere tiquina ojoari p_up_u.¹² Judio masare, judio masa ijieyequina gūhare Cohācjū ihcāno saha yedohore. Mari p_uhtoro ijipihtiyequina p_uhtoro ijire tiquiro. Sa yero ijipihtiyequinare tiquirore siniñequinare quehnoano pajiro ohorota tiquiro.¹³ Ohō saha ni ojoahye panop_ure: “Y_uh_u ñañene cohāña. Sa yeg_u y_uhare y_uhd_uoya’, ni mari p_uhtoro masa tiquina sinigū tiquinare pecap_u wahaboriquinare mari p_uhtoro y_uhd_uorota”, ni ojoahye Cohācjū yere.¹⁴ Sa ye masa Cristore wacū tutueraye tiquirore sini masiedare tiquina. Sa ye tiquiro buheyere t_uhoeraye, tiquirore wacū tutua masiedare. Sa ye tiquiro buheyere yahuriquiro mariedagū tire tiquina ne masisi.¹⁵ Sa ye tiquiro ye buheyere yahuatiquinare Cohācjū pehe tiquiro ohoeragū tiquiro ye buheyere yahu masiedare. Tire ojoahye Cohācjū yere tiquina ojoari p_up_u:

“Quehnoañe buheyere yahuatiquina tiquina ahtagū ihñana quehnoano bucueaja mari”, ni ojoahye panop_ure.

¹⁶ Ti sa ijiepegūta masa peyequina quehnoañe buheyere t_uho duerare. Sata ni ojoahye Isaia m_unano: “P_uhto, tiquinare mari yahurire tiquina ne t_uho duerari”, ni yahuahye Isaia Cohācjūre.¹⁷ Sa ye masa quehnoañe buheyere t_uhoeye Cristore wacū tutuari. Sa ye Cristo yequina tiquiro yere tiquina yahugū, tiquiro ye buheyere t_uhoere masa.

¹⁸ Sa yeg_u ahrire sinitu duaja m_usare: ¿Israe masa Cohācjū yere t_uhoera tiari, m_usa t_uhotugū? Poto waro tiquina t_uhomedī. Sata nine Cohācjū yere tiquina ojoari p_u gūh_u:

Cohācjū yere yahuequina ijipihtirop_u yahu siteye wahari. Sa ye ijipihtiro cjēnap_u tiquiro yere t_uhori, ni ojoahye panop_u.

¹⁹ Pari turi m_usare sinitu duaja tja: ¿Israe masa t_uhoepeta quehnoano masiedari tiquina, m_usa t_uhotugū? Masie timahye. Ahrire yahu nemog_u Moise nidire yahu m_uhta_utja. Ohō saha ni ojoahye tiquiro:

Ohō saha ni yahure Cohācjū Israe masare: “T_uho masieñequina, ñañequina, ihyo ijieyequina ijire”, ni m_usa ihñañequinare yeequina ijiatiquina yeitja. Y_uh_u sa yegū m_usa pehe tiquinare ihña coonata. Sa yeg_u m_usare usuagū yeitja y_uh_u, ni yahuri Cohācjū Israe masa ijieyequinare tiquiro yequina ijigū yero taro, ni ojoahye Moise.

²⁰ Ape p_up_ure Isaia cuero marieno ohō saha niahye: Ohō saha nine Cohācjū: Y_uhare macaedariquina pehe y_uhare bocari. Sa yeg_u

yuhare cahmeeñequinare tiquinare yuhare masigū yei yuhū, nidi Cohācjū, ni ojoahye Isaia judio masa ijieyequinare.

²¹ Israe masa pehere ohō saha ni ojoahye Isaia: “Ohō saha nine Cohācjū: Tiquina yuhare yuhduducayequina, yuhare cahmeeñequina ijire. Sa yegu tiquinare tiquina ñañene bujua witi dutigū ‘Yeequina ijia’, sa niducumi tiquinare”, nidi Cohācjū, ni ojoahye Isaia.

11

Meheñequinagā Israe masare pecarū wahaboriquinare yuhdudorota Cohācjū

¹ ¿Sa yero Israe masare Cohācjū tiquiō beseriquinare yojopure cohāyari tiquiō, masa tūhotugū? Ijierare. Tiquinare cohāedari tiquiō. Yuhū gūhū Israe masū, Abrahā panami iji turiagurū ijiaja. Sa yegu Benjami ya curua cjū ijiaja yuhū. ² Panopū Israe masare Cohācjū beseē tiahye. Tiquiō sa beseriquinare cohāedari. Cohācjū yere tiquina ojoari pūrū Elia mñnāno tiquiō yerire yahure. ¿Ti pūrū Israe masare Elia Cohācjūre tiquiō yahusārire masiedajari masa? Ohō saha ni yahusāhye tiquiō: ³ “Pūhto Cohācjū, tiquina Israe masa mūhū yere yahu māhtariquinare wejēdi. Sa ye tiquina mūhare wacū usā ño peoye altarire cohāri. Sa yegu yuhū dihita mūhū yaquiō dūhsaja yojopure. Yuhū sa ijigū tūhoye yuhū gūhare wejē duare tja, yojopure”, niahye Elia Cohācjūre. ⁴ Tiquiō sa nigū tūhoro Cohācjū pehe ohō saha ni yūhtiahye Eliare: “Siete mil umūa yeequina ijire yojopure. Tiquinare ihbou yuhū. Baal wame tiriquiō queoyere ne ño peoera tiri tiquina, yeequina”, niahye Cohācjū Eliare panopure cue dutieraro. ⁵ Ti

pjere Elia tiquiō ijiri pjere tiquiō yequina masare beseriro sahta yojopū gūhare meheñequinagā Israe masare tiquiō yequina ijiatiquinare beseri jiri Cohācjū. Cohācjū tiquinare paja ihñano beseri jiri. ⁶ Quehnoañene tiquina yeri wapa tiquinare beserari jiri. Tiquinare paja ihñano beseri jiri. “Quehnoañene masa yeri wapa masare beseitja”, nino, tiquiō tiquinare potota paja ihñano niedaboya.

⁷ Sa ye ohō saha ijire. Israe masa Cohācjū tiquinare “Quehnoañequina ijire”, tiquiō ni ihñagū cahmepeta tiquina ihcāno sahaerari. Cohācjū tiquiō basi tiquiō beseriquina pehe quehnoañequina tiquiō yequina wahari jiri. Apequina pehe tiquiore ihcāno sahaeraye, tiquina pehe tiquiō yere tūho duerari. ⁸ Sata niahye Cohācjū yere tiquina ojoari pūrū: “Cohācjū tiquiore cahmeeñequinare tiquiō yere tūhoeyequina ijigū yeri. Sa yero potota ijiyere tiquina tūhoepēgūta tiquinare quehnoano tūhogū yerari Cohācjū. Sata ijiducure tiquina yojopū gūhare”, ni ojoahye panopure. ⁹ Sa yero ohō saha niahye Davi panopū cjūno Cohācjūre:

Tiquina Israe masa tiquina bose decori tiquina bucuēye decori yeye, ñano yere tiquina. Tiquina sa yegū ihñagū buhiri dahreya mūhū. ¹⁰ Tiquinare quehnoano tūhoeragū yeya mūhū. Sa ye sa buhiri tiducuyequina ijiahro tiquina. Sa ye sa bujua witiducuenta, niahye Davi Cohācjūre.

Judio masa ijieyequinare pecarū wahaboriquinare yuhdudorota Cohācjū

¹¹ ¿Judio masare Cristore tiquina cahmedagū ihñano Cohācjū

tiquinare cohāno, cohā bo cāno niboari, masa tūhotugū? Cohā bosī tiquinare. Sa cohāedaperota tiquina Cristore tiquina cahmedagū yojopare judio masa ijieyequina pehere Cohācjū yūhdūorota. Yojopare tiquinare tiquiro yequina wahagū yeri Cohācjū. Tiquiro sa yegū ihñāñe ihquēquina judio masa pehe tiquinare ihñā cooboa. ¹² Judio masa tiquina yūhdūdcagū tiquina quehnoano yeragū apequina pehere ahri yehpa cjēnare ihquēquinare Cohācjū yūhdūori. Tiquiro sa yūhdūogū tiquina pehere quehnoano wahari. Tiquiro sa yeriro yūhdūoro, came judio masa pehe Cristore tiquina quehnoano wacū tutua dūcagū pūritare ahri yehpa cjēnare quehnoa yūhdūaro waharota.

¹³ Yojopare māsare judio masa ijienare yahugū tūu niaja. Cristo cūri yūhare judio masa ijieyequinare buheacjare. Sa buhegū ihyo waro yei niedaja. ¹⁴ Sa niaja yūhū acayere judio masare māsare tiquina ihñā coogū ye duagū. Cohācjū yūhdūorina mūsa ijigū ihñāñe tiquina gūhū Cristore cahme, tiquiro yūhdūoriquina wahaboa. ¹⁵ Judio masare mehenogā cohābo curero, judio masa ijieyequina pehere quehnoañe buheyere Cohācjū yahū dutiri. Ti buheyere tiquina tūhori bato Jesure tiquina wacū tutuari bato ihquēquina ahri yehpa cjēna Cohācjū yequina wahari. Sa ye judio masare mehenogā tiquiro cohābo curegū quehnoano wahari ahri yehpa cjēnare. Tiquiro sa yeriro yūhdūoro judio masare tiquiro yequina ijiatiquina tiquiro yegū pūrita quehnoa yūhdūaro waharota ahri yehpa cjēnare. Tiquiro yequina tiquina wahagū peyequina masa Jesure wacū tutuayequinare pecarū wahaboriquinare yūhdūorota. ¹⁶ Ohō

saha ijire: Mehenogā trigo yūbū Cohācjūre ño peo tiquina duhu peori yūbū quehnoari yūbū Cohācjū tiquiro yegū, dūhsari yūbū gūhū quehnoari yūbūta ijire. Sa yero yucagū nūhcori quehnoagū, tū dūpūri gūhū quehnoañe dūpūri ijire. (Ohō saha mari ni queoye mehna buhegū Abrahā usā ñecu mūnāno quehnoariquiro tiquiro ijiriro sahata tiquiro panamena iji turiayequinapū gūhū quehnoañequina ijietā Cristore wacū tutuayequina ijiye.)

¹⁷ Ihquēquina sa ijiatiquina tiquina ijiepegūta apequina tiquina acaye pehere judio masare Cohācjū mehenō cohābo cureri. Olivo wame tidū dūpūrire ihquē dūpūrire tiquiro dūte cohāboriro saha apequina judio masa pehere Cohācjū mehenō cohābo cureri. Sa yucagū dūpūrire cohāno tiquiro cohāri dūpūri ijiriropū apeye dūpūrire nūcu cjānū olivogū dūpūrire camesa doho ohōri. Sata Cohācjū māsare judio masa ijienare Abrahā panamena iji turianare camesari māsare, mūsa gūhare yūhdūoro taro. ¹⁸ Māsare tiquiro sa cūgū “Judio masa yūhdūoro quehnoana ijiaja usā”, ni tūhotueracāhñā. Ahrire yūhū yahuatire wacūñā mūsa: Judio masa pehere bese mūhtahye Cohācjū. Sa besero tiquina acayūro ijiatiquirore cūahye Cristore, marine yūhdūoro taro. Sa yena “Judio masa yūhdūoro quehnoana ijiaja”, ni tūhotueracāhñā mūsa.

¹⁹ Mūsa judio masa ijiena pehe ohō saha niboā: “Ihquē ñāñe dūpūrire tiquiro cohāboriro saha Cohācjū judio masare cohābo cureri ihquēquinare. Sa cohābo cureri tiquiro apeye dūpūrire camesa tiquiro doho ohōno saha tiquiro yequina marine cūno taro”, niboā mūsa judio masare yūhdūdūca duana. ²⁰ Ti mūsa ñiñe ijirota ijire. Sa ijiepegūta tiquina

Jesure tiquina wacū tutuerari buhiri Cohācjū cohābo cureri tiquinare. Sa yero masa gāhare Jesure masa wacū tutueragū tiquiore yequina ijianaja masare cūedaboaya. Sa yena “Judio masa yūhdūoro quehnoana iji-aja usā”, niedacāhña masa. Sa niedana Cohācjūre quehnoano ño peoya. ²¹ Ūhmū tāñe dūpūri yero saha judio masa pehe Cohācjū yequina iji mūhtahye. Tiquiore comesari dūpūrire tiquiore doho ohōboriro saha camepū Cohācjū tiquiore yequina masa pehere cūahye. Sa yero tiquiore yequina iji mūhtariquina judio masa tiquiore tiquina wacū tutueragū, tiquinare cohābo cureri. Tiquinare tiquiore cohāriro saha masa gāhare cohānota, tiquiore masa wacū tutueragū. Sa yena Cohācjūre quehnoano ño peoya masa. ²² Cohācjū masare quehnoano yeriquiro tiquiore ijigū masiña masa. Sa yena cua pesaro mehna buhiri dahreriquiro tiquiore ijigū gāhare masiña masa. Tiquiore ño peoyequinare tiquiore buhiri dahrerota. Sa masa tiquiore ño peoducugū pūrita masare quehnoano yerota tiquiore. Ño peoerana ñañe dūpūrire tiquiore cohāboriro saha masa gāhare cohānota Cohācjū. ²³ Sa yero judio masa tiquiore cohābo cureriquina Cristore tiquina wacū tua dūcagū, yucūgū dūpūrire masa tiquina doho ohōno saha Cohācjū tiquiore yequina ijigū yerota tiquinare. Cohācjū tiquiore sa yeati tutuayere cūori. Sa yero tiquiore tiquinare ihquēquinare tiquiore yequina wahagū yerota. ²⁴ Masa judio masa ijiena ijina, nūcū cjānū olivogū dūpūri yero saha ijire masa. Sa ijina masa ijiepegū olivogū otedūpū nūcū cjē dūpūrire masa tiquina ohōno saha Cohācjū masare tiquiore yequina ijigū yerota.

Judio masa Cohācjū tiquiore bese mūhtariquina ijire. Sa yero tiquiore bese mūhtarina masa ijierapegūta tiquiore yequina masare ijigū yeri tiquiore. Judio masare tiquiore bese mūhtariquina pehere tiquiore yequina ijigū ye duare. Tire tiquiore yegū masare yero yūhdūoro mijoeda cjūre.

Came judio masare pecapū wahaboriquinare yūhdūorota Cohācjū

²⁵ Yūhmū acaye, ahrire masa tiquina masiedarire masare yahutja. “Yojoopūre usā dihitare besere Cohācjū. Usā pehe masi peho cjā”, masa ni tūhotuerato saha ahrire yahutja. Ohō saha ijire: Yojoopūre peyequina judio masa Cohācjūre tūho duasi. Sa ye peyequina judio masa ijieyequinare Cohācjū tiquiore queoriro puno tiquiore yequina tiquiore yeri bato judio masa pehe tiquiore cahmeeta. ²⁶ Tiquina sa cahmegū ijipihtiyequina tiquiore cahmeñequinare judio masa pecapū wahaboriquinare Cohācjū yūhdūorota. Cohācjū yere tiquina ojoari pūpū sata ni ojoahye:

Jerusalē wame tiri macapū judio masa ya macapū tiquinare yūhdūoatiquiore ahtarota. Sa yero Jacob panamena iji turiayequinare tiquina ñañe yerire tiquiore cohānota. ²⁷ Sa yegū tiquinare yūhdūogū panopū tiquinare yūhmū ni cūriro sahata yei niaja, nidi Cohācjū, ni ojoahye Cohācjū yere tiquina ojoari pūpū.

²⁸ Yojoopūre tiquina judio masa Cristo yere ño peoyequina Cohācjūre ihña tuhtire. Tiquina sa yegū yojoopūre masa pehe judio masa ijiena Cristore wacū tutua dūcari. Judio masa pehere Cohācjū bese mūhtahye. Sa yero judio masa ñecusūmūna mūna panopū cjēna tiquiore beseriquina tiquina ijigū yojoopūre ijieyequina judio masa

gũhure tiquiuro cahĩne. ²⁹ Cohãcjũ tiquiuro ni cũriro sahata masare tiquiuro beseriro sahata potota yerota tiquiuro. Tiquiuro nidire bosu tiquiuro. ³⁰ Panopũre masa gũhu Cohãcjũre yũhdũdcari jiri. Yojopũre judio masa Cohãcjũre tiquina yũhdũdcagũ ihũano tiquiuro masa pehere paja ihũano yũhdũori. ³¹ Yojopũre judio masa tiquiore yũhdũdcari. Tiquina sa yepegãta Cohãcjũ masare tiquiuro paja ihũariro sahata tiquina gũhure camerũre paja ihũanota. ³² Ohõ saha ijire: Ijipihtiequina masare “Buhiri tiyequina ijire”, nine Cohãcjũ. Sa yero ijipihtiequina buhiri tiyequina tiquina ijigũ ihũano ijipihtiequinare paja ihũa masine tiquiuro.

³³ Yohou. Cohãcjũ tutua yũhdũariquiuro ijiajari. Quehnoano masi pehoriquiuro ijire tiquiuro. Sa yero tiquiuro tũhotuyere, tiquiuro yerire marine quehnoano masino basioerare. ³⁴ Ohõ saha ni ojoahye Cohãcjũ yere: “Cohãcjũ mari pũhoro tiquiuro tũhotuyere ne masa quehnoano masiedare. Sa ye masa tiquiore ‘Ohõ saha yeya’, ni masiedare. ³⁵ Sa ye masa Cohãcjũre apee borore tiquina oho bato ‘Tiquiuro marine wapamore’, ni masiedare masa”, ni ojoahye panopũre. ³⁶ Cohãcjũ ijipihtiyere yeahye. Sa yero tiquiuro tutuaye mehna ijipihtiyere ijigũ yere tiquiuro. Sa ye ijipihtiyere tiquiuro ye ijire. Tiquiuro sa ijiriquiuro ijigũ ijipihtiyere decori tiquiore ño peouhna mari. Sata yeducuuhna.

12

Cohãcjũ cahmeñene marine yeducu dutiahye Pablo

¹ Cohãcjũ marine tutuaro paja ihũari. Tiquiuro sa paja ihũariquiuro ijigũ ihũana yũhu acaye, masa basita Cohãcjũ yere yeducuya. Sa

yena quehnoañe pehere comesarina, ñañe mariena ijiaja. Masa sa ijigũ tiquiuro bucuero. Sata yero cahmene marine Cohãcjũre ño peona. Sa yegũ masare tire tutuaro ye dutiaja. ² Ahri yehpa cjẽna ñañequina tiquina yero saha ye nemoedacãhña masa. Sa yena masa tũhotuyepũre quehnoañe pehere comesaya masa. Sa yena quehnoañe pehere comesarina ijinata masa. Sa comesana Cohãcjũ masare tiquiuro ye dutire masinata masa. Sa yena quehnoañene, Cohãcjũ cahmeñene, ñañe marieñene masinata masa.

³ Cohãcjũ yũhure paja ihũano masare buhe dutiro beseri yũhure. Sa yegũ ijipihtinare masare ahrire ni dutieraja yũhu. “Quehnoa yũhdũana iji yũhdũdũcaja usã”, ni tũhotuercãhña. Sa tũhotu cãhña. Jesure masa wacũ tutuari bato Cohãcjũ masare tiquiuro yedohoro punota “To punota ye masiaja usã”, ni tũhotuya. ⁴ Ohõ saha ni yahu nemoutja yũhu: Mari omocari, mari dahpocãri, mari caperi, ijipihtiro mari pagũpũ ijiye peye ijire. Mari pagũpũ ijiye ihcã pagũpũ ijiepetata sijoro saha ijiye dahraye dihitare cãore. ⁵ Mari queoye mehna buhegũ ahri yero saha ijire. Cristo pagũ yero saha ijina ihcã curuata ijiaja mari. Sa yena mari ijipihtina peyequina ijiepenata ihcã curuapũta ijiaja mari.

⁶ Cohãcjũ marine tiquiuro yedohoro punota tiquiuro tutuaye mehna ye dutire. Sa yero maripe sijoro saha ijiye dahrayere cũre tiquiuro. Tiquiuro sa yegũ marine tiquiuro cũrire mari quehnoano yehna. Sa ye Jesu yequina ohõ saha yeahro. Ihquẽquinare Cohãcjũ tiquiuro yere yahuatiquinare cũre. Sa ye tiquina Cristore tiquina masino puno tiquiuro yere quehnoano yahuahro. ⁷ Ihquẽquinare Cohãcjũ masare

yedohoatiquinare cūre. Sa ye tiquina masare quehnoano mehna yedohoahro. Ihquēquinare Cohācjū masare buheatiquinare cūre. Sa ye tiquina masare quehnoano buheahro. ⁸ Masare bucuegū yeatiquina ijiye, tire quehnoano yeahro. Sa ye apee borore ohoyequina quehnoano mehna jeripohna ti, pajiro ohoahro. Sa ye apequinare dutiyequina quehnoano mehna dutiahro. Sa ye pejecuoyequinare yedohoyequina bucueye mehna yedohoahro.

Jesu yequina ijina ohō saha yena ijīya

⁹ Apequinare cahña, potota cahña tiquinare. Sa yena ñañene ihña yabina ijiya msa. Sa yena quehnoañe pehere cahmeña. ¹⁰ Msa bahanare msa cahño sahata Jesu yequinare msa mehna cjēnare cahña. Sa yena msa mehna cjēnare quehnoano cahme ño peoya.

¹¹ Cohācjū cahmeñene yena, ne caperacāhña. Sa yena mari puhtoro tiquiuro dutiriro sahata quehnoano bucueye mehna yeya.

¹² Cohācjū msare pecapū waborinare tiquiuro yuhduorinapū ijire msa. Tire masina bucueya msa. Sa yena ñano yuhduna, ihcāno sahaya “Cristo yere duhuari”, nina. Sa yena Cohācjūre sa siniducuya.

¹³ Apee boro Jesu yequinare dahsagū ohoya tiquinare. Sa yena msa ye wuhusepū masa tiquina esagū quehnoano jeripohna ti, tiquinare piti caya.

¹⁴ Msare ñano yeyequina pehere quehnoa dutiya. Sa quehnoa dutina, tiquinare “Ñano yuhducūnahdo”, niedacāhña.

¹⁵ Apequina bucueyequina mehna ijina msa gūhū bucueya. Sa yena utiyequinare ihñana, uti dohoya.

¹⁶ Msa mehna cjēna mehna quehnoano ijiya msa. Sa yena “Apequina yuhduoro quehnoana ijiaja”, ni tūhotueracāhña. Ohō saha ni tūhotuya. “Ihyo ijina ijiaja”, ni tūhotu, ihyo ijiyequina mehna ijiya. Sa yena “Masi yuhducana ijiaja msā”, ni tūhotueracāhña.

¹⁷ Apequina msare tiquina ñano yepegūta, tiquinare ñano ye cahmedacāhña. Sa yena quehnoañene yeya, quehnoana msa ijiye tiyere ijipihtiyequina masa tiquina masiatire. ¹⁸ Tutuaro mehna quehnoañene yeya msa, ijipihtiyequina mehna msa quehnoano ijiatire. ¹⁹ Msa yuhū cahña, yuhū acaye apequina msare tiquina ñano yepegūta tiquina yero saha ñano ye cahmedacāhña. Cohācjū pehe msare tiquina ñano yeri buhiri buhiri dahreahro tiquinare.

Cohācjū yere tiquina ojoari pūpū sata ni ojoahye: “Yuhū pehe masa tiquina ñano yeri buhiri buhiri dahreacjū ijiaja. Sa yegū potota buhiri dahreitja’, nine mari puhtoro”, ni ojoahye panopare.

²⁰ Sa yena ohō saha yeya msa: “Msare ihña tuhtiriquiro tiquiuro hja ahabgū ihñana nuña tiquiore. Tiquiuro aco wogū ihñana tiquiore sihñña. Msa sa yegū ihñano tiquiuro bæ tirota”, nine mari puhtoro.

²¹ Sa yena apequina msare tiquina ñano yepegūta msa pehe tiquinare ñano ye cahmedacāhña. Sa yena tiquinare quehnoano yeya. Sa yena ñañene ye duerana ninata msa.

13

¹ Ijipihtiyequina puhtoare Cohācjū dihita cūre. Sa yero msa puhtoa gūhure Cohācjū bese cūre. Tiquiuro sa cūriquina tiquina ijigū ihñana ijipiltina msa tiquinare yūhtiya. ² Mari bui cjēna puhtoare quehnoano

yũhtierana Cohãcjũ tiquiro bese cũriquinare yũhdũdcana niaga mari. Sa yũhdũdcariquinare Cohãcjũ pehe buhiri dahrerota. ³ Quehnoañequinare cuegũ yea-tiquina ijierare pũhto. Ñañene yeyequina pehere cuegũ yea-tiquina ijire tiquina. Quehnoañene yeya mũsa pũhtoare mũsa cueratire. Sa yena cuesi mũsa. Quehnoañene mũsa yegũ pũhtoro pehe “Quehnoano yeri mũsa”, mũsare ninota. ⁴ Mũsa pũhto mũsare yedohoatiquinata ijire mũsa quehnoano ijiatire. Sa ye tiquina mũsare buhiri dahreatiquinata ijire. Ijipihtiyequina ñañene yeriquinare buhiri dahre dutiro Cohãcjũ tiquinare beseri. Tiquina sa buhiri dahreatiquina ijigũ ñañene yena mũsa pũhtoare cueya. ⁵ Sa yena mari pũhtoare yũhtina, tiquina buhiri dahreatire cueracãhna. Sa yena ño peoye mehna “Quehnoañene yero cahmene yũhũre”, ni tũhoturo mehna quehnoano yũhtihna. ⁶ Mũsa pũhtoare tiquina dahrayere cũri Cohãcjũ. Sa yena tiquina dahrayere tiquina yegũ ihñana mũsa pũhtoare wapa ne cohteyequinare wapa yere mũsa.

⁷ Ijipihtiyequinare mũsa pũhtoare quehnoano yũhtiya. Sa yena pũhtoare wapa ne cohteyequinare wapa yeya mũsa. Sa yena pũhtoare pehe apeyere tiquina wapa ye dutigũ gũhũre wapa yeya. Sa yena ijipihtiyequina pũhtoare quehnoano ño peoya. ⁸ Apequina masare wapamoedacãhña. Tiquinare cahũno cahmene. Sa ye cahĩ nemono cahmene. Tiquiro cahapũ ijiriquirore cahĩdiquiro Cohãcjũ dutiyere ye peho tuhasariquiro ijire. Sa yena mũsa caha ijieyequina gũhũre cahĩña. ⁹ Ohõ saha nine Cohãcjũ dutiye: “Apequiro namono mehna ñano yeracãhña.

Masare wejẽdacãhña. Yaqueracãhña. Apequina yere tutuaro cahmedacãhña”, ni yahure tiquiro dutiye. Apeye dutiye gũhũ ijire. Sa ijiepegũta ihcãno dutirore mũsare yahugũ tũũ niaja. Ti dutiro ihcãno dutiro ijiepegũta ti dutirore yena, Cohãcjũ dutiyere ye pehona niaja mari. “Mũhũ basi mũhũ cahũno saha mũhũ caha ijieyequina gũhũre cahĩña”, nine ti dutiro. Ti dutirore yena Cohãcjũ dutiyere ye pehona ijina nine mũsa. ¹⁰ Mũsa caha ijiriquirore cahĩna, tiquirore ñano yesi. Sa yena tiquirore cahĩna, Cohãcjũ dutiyere ye pehona nine mũsa.

¹¹ Sa yena carĩñequina yero saha ijieracãhña mũsa. Quehnoano wacũ masiña. Jesure quehnoano wacũ cohteya. Jesu marine tiquiro tojoa ta, tiquiro neato mehenogã dũhsatjãre. Tiquirore mari coã masi dũcana, “Yoari batopũ marine yũhdũoro tarota Jesu”, ni tũhotumi. Mari sa ni tũhotuepegũta yojopũre mehenogã dũhsare Jesu marine tiquiro yũhdũoro ahtato. Ahri yũhũ nidire masine mũsa. ¹² Yojopũre ñañene tiquina yeri deco ijire. Cristo tiquiro ahtagũ ahri deco pihitota. Tiquiro ahtato mehenogã dũhsare. Tiquiro ahtato mehenogã dũhsagũ ihñana ñañene duhu pehocũhna mari. Sa yena Cohãcjũ cahmeñe pehere yeihna mari. Sa Cohãcjũ yere yena, ñañene duhu pehocũhna mari. ¹³ Sa yena quehnoañe pehere yeihna. Sa yena bese decorire yena ñano yeracãhna. Sa yena queheracãhna. Sa yena wũana tina, apequina mehna ñano yena, cahme dũse tini wiana, ihñana coona ijieracãhna. ¹⁴ Sa yena mari pũhtoro Jesucristo tiquiro yedohoye mehna quehnoano ijiya mũsa. Sa yena ñañene mũsa tutuaro cahmeñene yeracãhña.

Musa acayere Jesu yequinare “Ñano yee nine”, ni yahu wajaer-acãhña

(1 Co 8.1-13)

¹ Jesure wacũ tutuariquiro Jesu yere tiquiro quehnoano masiedarĩgũ tiquirore quehnoano yedohoya. Sa yena Jesu yere tiquiro quehnoano masiedarĩgũ ihñana “Ne masiedare mũhũ”, ni cahme duse tutueracãhña tiquiro mehna. ² “Ijipihtiyere ihya masiaja yũhũ”, ni tãhoture apequina. Sa ye apequina pehe Jesu yere quehnoano masiedarĩñe, wahiquinare ihyeraye, oteye dũca dihitare ihyare. ³ Ijipihtiyere ihyayequina pehe oteye dũcare ihyayequinare ihña tuhtier-acãhdo. Sa ye oteye dũca dihitare ihyayequina pehe ijipihtiyere ihyayequinare “Ñano yeye nine”, ni yahu wajaeracãhdo. Ijipihtiyere ihyayequina pehe Jesure wacũ tutuayequina tiquina ijigũ Cohãcjũ tiquinare tiquiro yequina ijigũ ye tuhasari. Tiquiro yequina tiquina ijigũ ihñañe wahiquinare ihyeyequina pehe tiquinare yahu wajaeracãhdo. ⁴ Jesure wacũ tutuayequina Cohãcjũ cahacjẽna ijire. Tiquina sa ijigũ ihñana mũasa tiquinare yahu waja masiedare. Jesure wacũ tutuayequina Jesu cahmeno saha tiquina yeragũ ihñano tiquiro dihita tire yahu masine. Tiquina quehnoano yegũ gãhũre tire yahu masine tiquiro tiquinare. Sa yero tiquiro pehe “Ñano yeri mũhũ”, ni yahuatiquiro ijirota. Sa yero tiquiro cahacjẽnare quehnoañene yeducu masigũ yeriquiro ijire Cohãcjũ.

⁵ Ihquẽquina ihcã decore Cohãcjũre tiquina ño peoati deco yere. Sa ye apeye decorire “Dahraye decori ijire”, ni tãhoture. Apequina pehe decoripe Cohãcjũre ño peoducure. Tiquina ihcãno saha sa yerariquina ijiepeta ijipihtiyequina ohõ saha ni tãhotuahro:

“Jesu tiquiro cahmeno sahata quehnoano yena niaja”, ni tãhotu masiahdo. ⁶ Masũno ihcã deco tiquiro ño peoati deco yere Cohãcjũre ño peoro taro. Sa yero decoripe ño peoducuriquiro Cohãcjũre quehnoano ño peore tiquiro gãhũ. Sa yero sijeriquiro gãhũ ihyaro, Cohãcjũre “Quehnoare”, ni sinine. Sa yero tiquiro gãhũ ihyariquiro ijiro Cohãcjũre ño peoriquiro ijire. Sa yero ihquẽ ihyayere sijiriquiro pehe tiquiro sijire Cohãcjũre ño peoro taro. Sa yero tiquiro gãhũ Cohãcjũre “Quehnoare”, ni sinine.

⁷ Mari cahmeñe dihitare yena iji masiedaja mari. Cristo ijire mari pũhtoro. Sa yero mari catigũ mari yariagũ gãhũre mari pũhtoro ijire. ⁸ Yojoũre mari catiro puno Cristo yere yeana ijiaja mari. Tiquiro yequina ijiaja. Mari yariari batopũ gãhũre tiquiro yequina ijinata. Sa yero mari catigũ mari yariagũ gãhũre Cristo mari pũhtoro ijire. ⁹ Sata ijire. Cristo yaria masa mũjahye, catiyequina, yariariquina gãhũ tiquina pũhtoro ijiro taro.

¹⁰ ¿Dũhsena tana mũasa acayũrore Jesu yaquirore “Ñano yero nine”, ni yahu waja duajari mũasa? ¿Dũhsena tana mũasa acayũrore cahãta diho cũ duajari mũasa? Mari ijipihtina Cristo caha mari ducugũ tiquiro pehe mari yerire masi pehorõ, marine beserota quehnoana, ñana gãhũre. Tiquiro sa beseatiquiro ijigũ mũasa acayũrore “Ñariquiro ijire” ni yahu wajaeracãhña. ¹¹ Cohãcjũ yere tiquina ojoari pũpũ ohõ saha ni ojoahye:

Ohõ saha nidi mari pũhtoro: “Ahri potota ijire. Ijipihtiyequina yũhũ poto dũsepe curi mehna quehe saeta. Sa ye ijipihtiyequina ‘Quehnoagũ, tutuagũ ijire’, ni, yũhũre ño

peoeta”, nidi mari p̄htoro, ni ojoahye.

¹² Sa yena ijipihtina mari yerire Cohācjū siniturota. “¿Duhse yena sa yeari?” ni siniturota. Tiquiro sa ni sinitugū yuhtiro cahmene marine.

Musa acayurore ñano yegū yeracāhña musa

¹³ Sa yena mari mehna cjēna gūhure “Ñañequina ijire”, ni yahu wajaeracāhna. Sa yena mari acayurore Jesu yaquirore ñano yegū yeracāhna. ¹⁴ Yūhu Jesucristo yaquiro ijiaja. Sa yegū ahri yūhu niatire quehnoano masiaja yūhu: Yūhu pehe ijipihtiyē ihyayere yūhu ihyagū yūhu ihyari buhiri, buhiri mariedare. Apequiro pehe “Ahri ihyayere ihyagū ñano yei niaja”, ni t̄hoturiquiro pehe ihyaro, potota buhiri tiriquiro ijire. ¹⁵ Ti potota ijire. Musa apee borore musa ihyagū musa acayuro musare ihña cū ihyaro, “Yohou, ñano yei niaga yūhu”, ni pajiro t̄hotuboaga tiquiro. Tiquirore sa ihña cū ihyagū yena, tiquirore cahiedare musa. Apee borore musa ihyagū ihña cū ihyaboaga tiquiro. Sa ihyaro “Ñano yei niaja”, ni t̄hoturo Cristore duhuboaga. Musa acayuro ye buhirire yariari Cristo. Sa yena “Cristore duhuari”, nina tiquirore ihña cūgū yeracāhña. ¹⁶ Sa ye “Ahri usā yeri quehnoarīaga”, musa ni t̄hotugū apequina musare yahu wajaboaga. Tiquina sa yahu wajagū ihñana, musa sa yerire ye nemoedacāhña, “Yahu waja nemoari” nina. ¹⁷ Cohācjū pehe mari p̄htoro ijire. Tiquiro sa ijigū mari ihyayē, mari sihniñe gūhu sa iji cāno nine. Ihyo warota ijire. Sa ye mari p̄htoro tiquiro dutiyere, quehnoañe gūhure mari yegū ti waro ijiro nine. Sa ye apequina mehna mari quehnoano ijigū gūhure quehnoañe waro ijiro nine. Sa ye Espiritu Santo yedohoye mehna mari bucuēgū quehnoañe

waro ijiro nine. ¹⁸ Sata Cristo yere yeriquirore ihñañe Cohācjū, masa gūhu “Quehnoano yeri muhu”, nieta.

¹⁹ Sata yeihna mari pūrita quehnoano mari ijiatire, mari basi mari cahme yedohotire. Sa yena Jesure wacū tutua nemonata. ²⁰ Apequiro Jesu yaquiro tiquiro ihya dutierare musa ihyagū ihñano tire coeraro, Cohācjū yere cohāboaga. Sa yena tire ihyeracāhña. Potota ijipihtiyē ihyayē quehnoañe ihyayeta ijire. Sa ijiepegūta apee borore mari ihyagū apequiro “Ñañe ihyayē ijiaga ahri”, nidiquiro ijieperota ihña cū ihyaboaga. Sa ihyaro ñano yero niaga tiquiro. Sa yena marine tiquiro ihña cū ihyagū, mari gūhu ñano yena niaja. ²¹ Wahiquina dihire musa ihyagū ihñano, vinore musa sihniñe ihñano, apequiro Jesu yaquiro “Tire ihyagū ñano yei niaga yūhu”, ni t̄hoturiquiro ijieperota tiquiro gūhu ihña cū, ihya sihniñoaga. Sa ni t̄hoturiquiro pūrita ihya sihniño ñano yero nine. Sa yena tiquiro ñano yerato saha Jesure tiquiro wacū tutua duhuerato saha wahiquina dihire, vino gūhure musa pehe musa duhugū quehnoarīne. ²² “Ijipihtiyere ihya masiaja”, ni t̄hotuna, tire Cohācjū dihitare yahuya. Ñañene yerariquiro, “Quehnoano yei niaga yūhu”, ni t̄hoturiquiro bucuēquiro ijire. ²³ Apequiro pehe “Ahri ihyayere ihyagū ñano yei niaboaga yūhu”, ni t̄hoturiquiro ijieperota ti ihyayere ihyaro, buhiri tiriquiro ijire tiquiro. “Ahrire ihyagū potota quehnoañene yei niaja”, ni t̄hotuerare tiquiro. Sa ni t̄hotueraro tire ihyaro, tiquiro ihyari buhiri buhiri tire tiquiro. “Quehnoañene yei niaja”, ni t̄hotueraro tire yero, buhiri tire tiquiro.

15

Mari caha ijieyquinare quehnoano yeihna

¹ Mari Cohãcjüre quehnoano wacũ tutuana pehe wacũ tutuera cjũñequinare yedohouhna. Sa yena mari ye dihitare yeducueracãhna.

² Sa yena mari caha ijieyquinare Jesu yequinare quehnoano yeihna tiquina quehnoano ijiatire, Cohãcjüre tiquina quehnoano wacũ tutua nemoatire.

³ Cristo pehe tiquiro ye dihitare yerahye. Sata nine Cohãcjũ yere tiquina ojoari pũpũ. Ohõ saha ni ojoahye: “Cristo ohõ saha nidi Cohãcjüre:

‘Mũhũ pehere ñano yahuducuboriquina yũhũ pehere ñano yahuducuri’, nidi Cristo Cohãcjüre”, ni ojoahye panopũre. (Sa tiquina ñano yahuducunohriquiri ijiro Cristo tiquiro Pacũro ye pehere ye basaro niahye.)

⁴ Panopũ Cohãcjũ yere tiquina ojoari pũpũ tiquina ojoahye mari quehnoano buheatire. Sa yena ti pũre buhena bucueaja. Sa buhena mari ñano yãhdũna ihcãno sahanata.

⁵ Cohãcjũ mũsare tutuagũ yeriquiro bucuegũ yeriquiro mũsare ijipihitnare ihcãno saha quehnoano ijigũ yeahro, Cristo cahmediro sahata. ⁶ Sata yeahro tiquiro mũsa ijipihitina ihcãno mehna Cohãcjüre mari pũhoro Jesucristo Pacũrore “Quehnoagũ, tutuagũ ijire”, ni mũsa ño peoatore.

Judio masa ijieyquinare quehnoañe buheyere yahu dũcahye

⁷ Cristo marine tiquiro yeriro sahata mũsa mehna cjẽnare quehnoano cahme piti caya. Mũsa sa yegũ ihñañe “Potota Cohãcjũ quehnoariquiri ijire”, ni ihñaeta masa pehe. ⁸ Mũsare ahrire niita niaja: Judio masare yedohoatiquiro ahtahye Cristo. Cohãcjũ tiquirore ohoro judio masa usã ñesũsmũna mũnapũre panopũ

rejẽnare tiquiro ni yahuriro sahata yero niahye. Tire tiquiro yerire masare masigũ yeatiquiro ahtahye Cristo. ⁹ Masare Cristo tiquiro yedohogũ Cohãcjũ paja ihñano nine tiquinare. Tiquiro sa paja ihñagũ judio masa ijieyquina gũhũ Cohãcjüre “Quehnoagũ, tutuagũ ijire”, ni, ño peore yojopũre. Tiquina gũhũre tiquiro yequina ijigũ yero ahtahye Cristo. Cohãcjũ yere tiquina ojoari pũpũ sata ni ojoahye:

Cristo ohõ saha niahye Cohãcjüre:

Judio masa ijieyquina caha mũhũre “Cohãcjũ quehnoagũ, tutuagũ ijire”, ni ño peoutja. Sa yegũ tiquina caha basagũ mũhũre basautja, niahye Cristo Cohãcjüre, ni ojoahye panopũre.

¹⁰ Sa yero ohõ saha ni ojoahye tja:

Cohãcjũ tiquiro beseriquina judio masa mehna cahme bucueya mũsa gũhũ judio masa ijiena, ni ojoahye panopũre.

¹¹ Sa yero ohõ saha ni ojoahye tja:

Judio masa ijieyquina ijipihitiyequina Cohãcjüre ño peohro. Sa ye ijipihitiro cjẽna tiquirore “Quehnoagũ, tutuagũ ijire”, ni ño peohro, ni ojoahye.

¹² Sa yero Isaia mũnanao gũhũ ohõ saha ni ojoahye:

Isaí panamino iji turiariquiri ahtarota. Sa ahtarota judio masa ijieyquina pũhoro ijirota tiquiro. Sa ye tiquina pehe tiquirore wacũ tutua, tiquinare pecapũ wahaboriquinare tiquiro yãhdũoatire masieta tiquina, ni ojoahye panopũre.

¹³ Cohãcjũ marine yãhdũoro ahtatiquiri quehnoano mũsare bucuegũ yeahro. Sa yero Jesure

musa wacū tutuagū musare quehnoano ijigū yeahro tiquiro. Musare tiquiro sa yegū musare tiquiro yuhduoatire Espiritu Santo tutuaye mehna bucueye mehna masi nemonata musa.

¹⁴ Ahrire musare yuhu yahuatire quehnoano masiaja. Musa pehe quehnoana ijire. Sa yena Jesu yere quehnoano masine. Sa masina musa mehna cjēnare cahme quehnoano yahu, buhe masine musa. ¹⁵ Musa sa masina musa ijiepegūta ihquē tahari ahri pūpūre musare cuero marieno quehnoano yahu peho ojoa musa wacūato saha. Cohācjū yuhare cahīno musare buhe dutiro cūri yuhare. Sa yegu tiquiro cūriro sahata yegu tagu musare wacūgū yei. ¹⁶ Yuhare tiquiro sa cūgū Jesucristo cahacjū ijigu tiquiro yere quehnoañe buheyere judio masa ijieyequinare buheaja yuhu. Yuhu sa buhegū tuhoye judio masa ijieyequina Jesure wacū tutuaeta. Tiquina sa wacū tutuagū ihñano tiquinare Cohācjū “Quehnoañequina ijire”, ni ihñanota. Sa yero tiquinare cahmenota. Sa yero Espiritu Santo pehe Cohācjū yequina ijigū yerota tiquinare. Pahia ūjūa mho Cohācjūre tiquina ohoriro sahata, tiquinare ñañe marieñequinare Cohācjūre oho duaja.

¹⁷ Sa yegu Jesucristore wacū tutuagu ijigū Cohācjū tiquiro buhe duti cūrigū ijigū bucueye mehna buheaja musare. ¹⁸⁻¹⁹ Apequina judio masa ijieyequinare Cristo yedohoye mehna tiquinare yuhu buhegū tuhoye, yuhu yerire ihñañe, Cohācjū tutuaye mehna ye ihñorire ihñañe, Espiritu Santo tiquiro tutuaye mehna tiquina Cristore wacū tutuari. Ahri pūritare musare pototi yahu duaja. Apequinapu tiquina yerire yahueraja. Jerusalēpu coā yuhu buhe ducari bato ijipihtiye macaripu buhe

ducari. Tee Ilirico yehpau gūhure Cristo ye buheye quehnoañe buheyere buhei esau. ²⁰ Sa yegu Cristo yere masieñequina dihitare quehnoañe buheyere tutuaro buhe dua, yuhu mehna cjēna tiquina buhenohriquinapūre buhe dueragu. ²¹ Sata ni ojoahye Cohācjū yere tiquina ojoari pūpu:

Panopu tiquirore ne tūhoerariquina tiquirore masieta. Sa ye tiquirore ne tūhoerariquina tiquiro yere quehnoano tūhoeta, ni ojoahye Cohācjū yere tiquina ojoari pūpu.

Pablo Romapu tiquiro wahatire yahuahye

²² Sa yegu ijipihtiroti cjēnare buherigu ijigu peye tahari musa cahapu waha duepegūta waha masiedahti. ²³ Yojoapūre ahri yehparipūre yuhu dahraye pih-tia wahari. Sa pih-tigū ihñagū, peye cahmari musa cahapu waha duarigu ijigu musa cahapu wahaŭtja. ²⁴ Sa ye Españapu wahagu musare topu ihña yuhdu cāŭtja. Sa yegu musa mehna bucueitja. Sa yegu musa mehna yuhu mehenogā ijiri bato yuhare musa yedohoye mehna Españapu wahaŭtja. ²⁵ Yojoapūre Jerusalēpu wahaŭ tūu niaja. To cjēnare Jesu yequinare yuhu acayerere niñerure sogu wahaŭ tūu niaja. ²⁶ Macedonia yehpa cjēna, Acaya yehpa cjēna gūhu quehnoano mehna Jesu yequinare Jerusalēpu ijieyequinare pejēcūoyequinare niñerure ohori tiquinare yedohoye. Sa yegu tiquinare tire oho basagu wahaŭ tūu niaja. ²⁷ Ti niñerure ohoye, quehnoano mehna ohori tiquina. Tiquina sa yegū quehnoañe, yuhu tūhotugū. Tiquinare judio masa ijieyequinare judio masa pehe Cohācjū yere buhe mahtari. Sa ye tiquinare tiquiro yuhduoato gūhure buhe mahtari judio masa. Tiquina sa buhegū

ihñagū Macedonia cjēna, Acaya cjēna mehna tiquinare tiquina yedohogū quehnoarīne yūhare. Tiquinare tiquina buheri wapa yero saha ijire ti, yūhu tuhotugū. ²⁸ Sa yegu Jerusalē cjēnare ti niñerure oho tuhasagu España wahaŭtja. Topu wahagu mūsare ihña yūhdū cāutja. ²⁹ Sa yegu mūsa cahapu yūhu wahagū Cristo yere mūsare yūhu buhegū tiquiō mūsare quehnoano jeripohna tigū yerota.

³⁰ Yūhu acaye, mari puhtoro Jesucristore wacū tutuare mūsa. Sa yena Espīritu Santo tutuaye mehna apequinare cahīne mūsa. Sa yena yūhu gūhare tutuaro sini basaya Cohācjūre. ³¹ Ohō saha ni sini basaya: Judea yehpa cjēna Jesure ño peoyequina yūhare tiquina ñano ye duagū Cohācjū yūhare tiquiō yedohoato saha sini basaya. Sa yena Jerusalē cjēnare niñerure yūhu ohogū tiquina tire bucueye mehna tiquina ñeheatō saha sini basaya. ³² Mūsa sa sinigū Cohācjū cahmegū bucueye mehna mūsa cahapu wahaŭtja. Sa yegu mūsa mehna ijigu bucueye mehna soutja. ³³ Cohācjū marine quehnoano ijigū yeriquiō mūsa mehna ijiducuahro. Sata ijiyahro.

16

Pablo quehnoa dutiahye

¹ Mari acayoro Febe wame tīcoro mūsa cahapu waharo taro nire. Ticoro Cencrea wame tiri macapu Jesu yequinare cahme-coañequinare yedohoricoro ijire. ² Sa yero peyequinare yedohoricoro yūhu gūhare yedohoricoro ijiri ticoro. Sa yero mari puhtoro Jesu yacoro ijire. Sa yena ticorore quehnoano mehna piti caya. Sata yero cahmene marine Jesu yequinare. Sa yena apee boro ticorore mariedagū ihñana ticorore ohoya mūsa.

³ Aquila, tiquiō namono Priscila gūhu quehnoahdo. Jesucristo yere yūhu buhegū tiquina gūhu yūhu mehna dahrari. ⁴ Tiquinare meheno wejēmedi, apequina yūhare tiquina wejē duagū tiquina yedohori buhiri. Sa yegu tiquina mehna bucueaja yūhu. Sa ye judio masa ijieyequina Jesu yequina ijip-ihtieyequina tiquina gūhu tiquina mehna bucuerē. ⁵ Sa ye Aquila ya wāhuru cahmecoañequina gūhu Jesu yequina quehnoahdo. Yūhu cahñiquiō Epeneto gūhu quehnoahdo. Tiquiō Asia yehpa cjēno topu ijiro Cristore wacū tutua māhtariquiō ijiri. ⁶ María gūhu quehnoahdo. Ticoro mūsa mehna tutuaro dahrari. ⁷ Yūhu acaye Andronico, Junia gūhu quehnoahdo. Peresupu yūhu ijigū tiquinata yūhare piti tiyequina ijiri. Sa ye yūhu pano Cristore wacū tutua māhtari tiquina pehe. Apequina Jesu cūriquina pehe tiquinare “Potota quehnoañequina ijire”, ni yahuducure.

⁸ Amplia gūhu yūhu cahñiquiō Jesu yaquiō ijire. Tiquiō quehnoahdo. ⁹ Sa yero Urbano gūhu quehnoahdo. Tiquiō gūhu mari mehna Cristo yere dahrari. Sa yero yūhu cahñiquiō Estaqui quehnoahdo. ¹⁰ Sa yero Apele gūhu quehnoahdo. Tiquiō potota quehnoano Jesure wacū tutuare. Tiquiō yerire ihñana tire masiaja mari. Sa ye Aristobulo ya wāhu cjēna ijipihtieyequina tiquiō namono tiquiō pohne gūhu quehnoahdo. ¹¹ Yūhu acayuro Herodiō quehnoahdo. Sa ye Narciso ya wāhu cjēna Jesu yequina quehnoa pihti cāhdo. ¹² Sa ye Trifena, Trifosa gūhu quehnoahdo. Ti numia mari puhtoro Jesu ye dahrayerē tutuaro yere. Mari cahñicoro Pérsida gūhu quehnoahdo. Ticoro mari puhtoro yere tutuaro dahrari. ¹³ Sa

yero Rufo mari pahtoro Jesure quehnoano wacū tutuariquiro, tiquiro yere quehnoano yeriquiro quehnoahdo. Tiquiro pacoro gūhū quehnoahdo. Ticoro yūhū paco yero saha ijiricoro ijire. ¹⁴ Asincrito, Flegonte, Herma, Patroba, Herme, apequina Jesu yequina tiquina mehna cĵēna gūhū quehnoahdo. ¹⁵ Sa ye Filologo, Julia, Nereo, tiquiro bahoro gūhū, Olimpa, apequina tiquina mehna cĵēna gūhū Jesu yequina quehnoahdo.

¹⁶ Sa yena mūsa mehna cĵēnare piti cana, quehnoano mehna piti caya. Ijipihtiyequina Jesu yequina ijipihtiro cĵēna mū sare quehnoa dutire.

¹⁷ Yūhū acaye, mūsa mehna cĵēna ihquēquina mū sare cahme ihña tuhtigū yeyequina, cahme tu wagū yeyequina ijiñohti. Sa ye mū sare Jesu ye buheyere dojomehnene. Sa yena sa yeyequinare ihñana quehnoano yeya, “Dojomehneari”, nina. Sa ijiyequinare piti tier-acāhña. ¹⁸ Sa yeyequina mari pahtoro Jesucristo yere yerare. Ñañene tiquina tutuaro cahmeñe dihitare yere. Sa ye quehnoano tūho coaro dero majare doco ni meho buhere quehnoano masieñequinare. Tiquina sa ni mehogū tiquinare quehnoano tūhore. Sa yena tiquinare piti tieracāhña mūsa. ¹⁹ Mūsa pehe Jesure quehnoano yūhtina ijiñohti. Tire ijipihtiyequina masine. Sa quehnoano yūhtina mūsa ijigū bucueaja yūhū. Sa yegū quehnoano mūsa yeatire mūsa masigū cahmeaja yūhū. Sa yegū ne ñañene mūsa yeragū gūhūre cahmeaja yūhū. ²⁰ Sa yero Cohācĵū marine quehnoano ijigū yeriquiro mehenogā bato mū sare yedohorota “Satanare yūhdūcaahro”, nino. Mari pahtoro Jesucristo mehna mū sare quehnoa dutiaja.

²¹ Timoteo yūhū piti mū sare quehnoa dutire. Yūhū acaye judio masa gūhū, Lucio, Jasō, Sosipate mū sare quehnoa dutire.

²² Yūhū Tercio ahri pūre Pablōre oja basagu ijiaja. Yūhū Jesu yaquiro ijigū mū sare Jesu yequinare quehnoa dutiaja.

²³ Gayo ya wūhūpū ijigū niaja yūhū Pablo. Tiquiro ya wūhūpū Jesu yequina cahmecoare. Tiquiro gūhū mū sare quehnoa dutire. Sa yero Erasto ahri maca cĵēna pahtoare niñeru ihbo cohteriquiro mū sare quehnoa dutire. Mari acayūro Jesu yaquiro Cuarto gūhū mū sare quehnoa dutire.

[²⁴ Mari pahtoro Jesucristo mehna mū sare ijipihtinare quehnoa dutiaja.]

Pablo Cohācĵūre ño peoro oja bato tiahye

²⁵⁻²⁷ Mari pahtoro Jesucristo ye buheye mehna quehnoañe buheye mehna Cohācĵū mū sare tiquirore wacū tutua nemogū ye masine. Panopūre quehnoañe buheye ne masare yahuerari buheye ijimahye. Yojoḡūre Cohācĵū yere yahu mūhtariquina māna tiquina ojoari mehna ti buheyere yahuri jire. Yūhū gūhū tire buheaja. Ti buheyere ijipihtiro cĵēna yojoḡūre masine. Cohācĵū sa ijiducuriquiro tiquiro dutiro sahata tiquina masine. Ti buheyere tiquirota yahu dutiahye masa tiquirore tiquina yūhtiatire, tiquirore tiquina wacū tutuati gūhūre. Sa yena tiquirore “Potota quehnoagu, tutuagu ijire”, ni ño peouhna. Tiquiro ihcāquirola Cohācĵū dihita quehnoano masi pehoriquiro ijire. Jesucristo yedohoye mehna Cohācĵūre sa ño peoducuuhna mari. Sata ijiducuuhna.

1 Corintios

Pablo Cohācjū yequinare Corinto cĵenare oĵo ohoahye

1-2 Yūhū Pablo, Jesucristo yere buhe duti tiquiro cūrigū ijiaja. Cohācjū tiquiro cahmeno sahata Jesu tiquiro cūacjūre beseahye yūhūre tiquiro. Mūsare Cohācjū yequinare Corinto cĵanare oĵo ohoaja yūhū. Sostene mehna quehnoa dutiaja mūsare. Ahriquiro gūhū mari acayūro Jesu yaquiro ijire. Jesucristo mehna cĵāna mūsā ijigū Cohācjū yequina ijiana beseahye Jesu mūsare. Sa ye ijipihtiyequina apequina mari pūhtoro Jesucristo sinequina iĵiye, tiquina gūhū Cohācjū yequinata ijire. Tiquina sa ijigū Jesucristo pehe mari ijipihtina pūhtoro ijire. Sa yena mūsare ijipihtinare oĵo ohoaja yūhū. ³ Sa yena Cohācjū mari Pacū, mari pūhtoro Jesucristo mehna mūsare quehnoa dutiaja. Tiquina yedohoye mehna quehnoano iĵiya mūsā.

Jesucristo pehe mūsare quehnoano ye basahye mari Pacū tiquirore dutiro sahata

⁴ Jesucristo yequina mūsā ijiri bato tiquiro pehe mūsare quehnoano ye basare Cohācjūre. Tiquiro sa yegū ihñagū, Cohācjūre “Quehnoare”, niducuaĵa yūhū decoripe. ⁵ Cristo yequina mūsā ijigū ihñano Cohācjū pehe mūsare quehnoano ijigū yere. Sa yero tiquiro yere mūsare apequinare quehnoano yahuanare yeri tiquiro. Sa yero tiquiro yere quehnoano masigū yeri mūsare. ⁶ Cristo yere mūsare ūsā buheriro sahata sata wahari mūsare, Cristo yequina mūsā wahagū. ⁷ Sa yero Cohācjū mūsare quehnoano yedoho peho cānota. Mari pūhtoro

Jesucristo ahri yehpapū tiquiro toĵo tatire mūsā cohtero watoa Cohācjū pehe mūsare sa yedohoducurota. ⁸ Sa yero Jesucristo pehe mūsā ñañe yerire cohāriquiro ijire. Tiquiro sa ijiriquiro ijigū mūsā pehe decoripe, ahri deco pihtigūpū gūhūre mūsā ñañe yerire tiquiro cohānohrina ijiducunata. Sata tiquiro mūsare yedohorota. Sa yena Jesucristo mari pūhtoro tiquiro toĵo tagūpūre ñañe buhiri mariena iĵinata mūsā. ⁹ Tire Cohācjū tiquiro nidiro sahata tiquiro yere. Tiquiro macano mari pūhtoro Jesucristo yequina iĵianare marine beseahye. Tiquiro sa besenohrinare Jesu yequina ijigū yeri marine.

Jesu yequina Corinto cĵēna cahmecoañe cahme tuhtiahye

¹⁰ Yūhū acaye, mari pūhtoro Jesucristo tiquiro dutiro mehna mūsare tutuaro dutigū tagū niaja ahrire: Mūsā basi cahme tuhtieracāhñā. Sa yena mūsā basi cahme tu waeracāhñā. Ihcā curuata iĵiya mūsā. Sa yena sĵoro saha ni yahuducueracāhñā mūsā basi. Sa yena mūsā yeaire tuhtotuna, ihcāno mehna yeya mūsā.

¹¹ Yūhū acaye, mūsā basi cahme tuhtina niñohiti mūsā. Sa ni yahuri Cloe ya wūhū cĵēna yūhūre. ¹² Ihquēquina mūsā mehna cĵēna ohō saha ni cahme tuhtiñohiti: “Pablo ya curua cĵāna ijiaja ūsā”, ni cahme tuhtiñohiti ihquēquina mūsā. Sa ye apequina “Apolo ya curua cĵāna ijiaja ūsā”, niñohiti tiquina gūhū. Sa ye apequina pehe “Pedro ya curua cĵāna ijiaja ūsā”, niñohiti tiquina gūhū. Sa ye apequina pehe “Cristo ya curua cĵāna ijiaja ūsā”, niñohiti tiquina gūhū. ¹³ Mūsā sa niepegūta Cristo yequina ihcā curuata ijiaja mari. Mari basi cahme tu wa doco masiedaja mari. Ihcā curuata ijiaja mari. Yūhū Cristo ijieraja. Tiquiro yero saha mūsā ye buhirire curusapū yariarigū

ijieru. Tutuayere curoeraja. Sa yegu ihyo ijigu ijiaja. Sa yero musare apequiro wame yero, Cristo ye tutuaye mehna wame yeri. Yee tutuaye mehna wame yerari. ¹⁴ Musare, musa mehna cjena guhure wame yera yuhu. Crispore, Gayo guhure tiquina dihitare wame yei. Apequina pehere wame yerarigu yuhu ijigu quehnoare yuhure. ¹⁵ Peyequina masare wame yerigu yuhu ijigu “Pablo ye tutuaye mehna tiquiro wame yeri usare”, ni ihñaboaga musa yuhure. Sa yegu tire cahmedu. ¹⁶ Estefana ya wuhu cjena guhure wame yei yuhu. Topequinata wame yei yuhu. Apequinare yuhu wame yeriquinare boaa waha yuhu. ¹⁷ Cristo yuhure ohoro, wame yeacjare cuedari tiquiro yuhure. Quehnoañe buheyere buheacjare pehere cūri yuhure. Cristo curusapu tiquiro yariarire yahuye buheye marine quehnoana wahagū yere. Tiquiro sa yepegūta quehnoañe buheyere yuhu esa tuharo yuhu buhegū yuhu pehere ihña wahāboaga musa. Musa sa ihña wahāna quehnoañe buheye pehere ño peoeraboaga musa. Sa yena quehnoana wahaeraboaga. Sa yegu Jesu ye buheyere buhegu yuhu esa tuharo yuhu masiñe mehna buheraja yuhu.

Cohācjū tiquiro tutuayere tiquiro masiñe guhure cūriquiro ijire Cristo

¹⁸ Pecapu butiatiquina pehe Cristo curusapu tiquiro yariarire yahuye buheyere “Taho masieñequina ye buheye ijire ti”, nimene butiatiquina pehe. Mari pehe Cristo tiquiro yuhdonohatina ijina ohō saha niaja: “Curusapu tiquiro yariarire yahuye buheye ti waro ijiro nine. Ti buheye Cohācjū tiquiro tutuayere yahure marine”, niaja

mari. ¹⁹ Cohācjū pehe tiquiro yere tiquina ojoari pūpu ohō saha nine:

Ahri yehpa cjenare “Quehnoano masieñequina ijire”, tiquina niñequinare tiquina masidire dahseati ijieragū masigū yeitja yuhu, niahye Cohācjū tiquiro yere tiquina ojoari pūpu.

²⁰ Sa ye ahri yehpa cjena quehnoano masieñequina dahseatiquina ijierare. Usā acaye judio masare buheyequina guhu dahseatiquina ijierare. Yojobure yahuducu mihniñequina guhu dahseatiquina ijierare. Ahri yehpa cjena quehnoano masieñequina tiquina ijiepegūta masieñequina tiquina ijyere masigū yeri Cohācjū. ²¹ Cohācjū pūrita quehnoano masiniquiro ijire. Tiquiro sa ijigū ahri yehpa cjena tiquina esa tuharo tiquina masiñe mehna Cohācjūre ne masiedare tiquina. Cohācjū tiquiro masi dutiero sahata sa wahari tiquinare. Cohācjūre cahmeeñequina pehe ohō saha nine quehnoañe buheye warore: “Taho masieñequina ye buheye ijire”, nimene. Sa yeye quehnoañe buheyere “Taho masieñe buheye”, tiquina niñe buheyere tahoye, Cristore masi ducare masa. Tiquina sa masi ducagū Cristore tiquina wacū tutuagū ihñano tiquinare tiquiro yequina wahagū yere Cohācjū. Sa waha dutiri tiquiro.

²² Judio masa Cohācjū tutuaye mehna tiquiro ye ihñorire ihña duaye nine. Sa yeye griego masa pehe, judio masa ijieyequina pehe quehnoano tiquina masiatire macañe nine. ²³ Mari pehe Cristo curusapu tiquiro yariarire yahuye buheyere buheaja mari. Ti buheyere judio masa pehe ihña tuhtire. Sa ye ti buheyere judio masa ijieyequina pehe “Taho masieñequina ye buheye ijire”, ni tūhoture. ²⁴ Tiquina sa ni

tahotuepegāta Cohācjū yequina ijiatire tiquiro beseriquina pehe ti buheyere ohō saha nine. “Cristo ye buheye Cohācjū tutuayere tiquiro quehnoano masiñene masigū yere marine”, nine tiquina ahri buheyere. Tiquina judio masa, judio masa ijieyequina ijiepetā, sa nine Jesu yequina.

²⁵ Cohācjū masi pehoriqiro ijire. “Tiquiro taho masieniqiro ijire”, masa tiquina ni tahotuepegāta ahri yehpa cjēna yuhduoro quehnoano masi pehoriqiro ijire tiquiro. Sa yero Cohācjāre “Tutueriqiro ijire”, masa tiquina ni tahotuepegāta tiquina bui tutua yuhduocariqiro ijire tiquiro. ²⁶ Ti yuhū nidi ijirota ijire.

Yuhū acaye, Cohācjū mūsare tiquiro yequina wahagū tiquiro yegū mūsa peyequina ihyo ijina mūsa ijirire wacūña mūsa. Ahri yehpa cjēnare “Quehnoano masiñequina”, tiquina niñequinare meheñequinagā Jesu yequina ijiatiquinare beseahye Cohācjū. Sa yero pūhtoā gūhūre meheñequinagā Jesu yequina ijiatiquinare beseahye tiquiro. Sa yero pūhtoā pohne gūhūre meheñequinagā Jesu yequina ijiatiquinare beseahye tiquiro. ²⁷ “Tūho masieñequina ijire”, tiquina niñequinare Cohācjū beseahye “Quehnoano masiñequina ijire”, tiquina niñequina tiquina buoro wahatire. Sa yero “Wacū tutueyequina ijire”, tiquina niñequinare Cohācjū beseahye, “Wacū tutuayequina ijire”, tiquina niñequina tiquina buoro wahatire. ²⁸ Masa tiquina ihña tuhtieyquinare “Dūhseatiquina ijierare”, nine masa. Tiquina sa nidiquinare Cohācjū tiquiro yequina ijiatiquinare beseahye tiquinare. Sa besero “Pūhtoā waro ijire”, tiquina niñequinare ihyo ijieyequina tiquina ijiyere masigū yeahye Cohācjū

tiquinare. ²⁹ Tiquiro sa yegū ahri yehpa cjēna ne ihcāqiro “Tutuagu, quehnoano masigū ijiaja”, ne ni yuhduorca masiedare, Cohācjū ihñonopu.

³⁰ Cohācjū pehe marine Jesu yequina ijigū yeri. Tiquiro yequina ijina marine tiquiro yuhduori bato ijipihtiye decori Cohācjū mehna ijinata mari. Jesucristo pehe Cohācjū yere quehnoano masigū yere marine. Sa yero mari ñañe buhirire cohāre. Sa yero mari ñañe yerire cosero, marine “Quehnoañequina ijire”, Cohācjū ni ihñagū yere Cristo Cohācjūre. Sa yero marine pecapu wahaborinare yuhduore. ³¹ Tiquiro sa yegū Cohācjū yere tiquina ojoari pūpu tiquiro ni ojoariro sahata sa wahare: “Yuhū esa tuharo masi pehogū ijiaja’, nidiquiro tire niedacāhdo. Ohō saha niahdo: ‘Mari pūhtoro Cristo pehe marine yuhduoriquiro ijire’, niahdo tiquiro”, nine Cohācjū yere tiquina ojoari pūpu.

2

Ahri buheye Cristo curusapu tiquiro yariarire yahure

¹ Yuhū acaye, mūsa cahapu esagu “Quehnoano masi pehoaja”, mūsare ni buheru. Cohācjū yere mūsare buhegu, sa ni buhegu niedu. ² “Ohō saha ni buheitja”, nigū mūsa mehna ijigū Jesucristo ye dihitare curusapu tiquiro yariari dihitare wacūgu, ti buheyere buhei yuhū. ³ Sa yegu mūsa mehna ijigū ihyo ijigū yero saha ijii yuhū. Sa yegu Cohācjū yere queoro buhe duagu ijigū cuegu, nanaredigu yero saha ijii yuhū. ⁴ Sa yegu Cohācjū yere buhegu, “Masi pehoaja”, ni buheru. Tiquiro yere yuhū buhegū Espiritu Santo tutuaye mehna yuhū buhegū ihñari mūsa. ⁵ Ohō sahata ni buhei yuhū mūsare masa tiquina esa tuharo buheye pehere mūsa cahmedatire. Cohācjū pehere

masa wacū tuatire sa ni buhei yuhū.

Espíritu Santo pehe Cohācjū ijiye tiyere buhere marine

⁶ Sa yena Cohācjū ye buheyere tiqiro masiñene masare Jesure quehnoano wacū tutuanapure yahuaja usā. Masa tiquina esa tuharo tiquina buheye yero saha ijierare ahri masare usā buheye. Ti buheye puhtoā ye buheye gūhū ijierare. Tiquina puhtoā pehe pihtia wahaeta. ⁷ Apequina tiquina masiedarire Cohācjū ye yahuducuyere yahuaja usā pehe. Panopū ahri buheyere Cohācjū yequina muna quehnoano masi pehoerahye. Ahri yehpa ijiato pano ahri buheye ti nidiro sahata “Sata wahaahro”, ni tuhasahye Cohācjū. Marine pecapū wahaborinare tiqiro yuhduoatire, tiqiro mehna mari ijiati gūhare “Sata wahaahro”, ni tuhasae tiahye tiqiro. ⁸ Tiquiro sa nigū Cohācjūre cahmeeñequina puhtoā ne tiqiro ye buheyere tuho dueraye, masiedare. Tire quehnoano masiñe, mari puhtorore Cohācjū macno warore curusapū quē biha wejēdaboaya tiquina. ⁹ Cohācjū yere tiquina ojoari pūpū ohō saha nine: Ijipihtiyequina Cohācjūre cahñequina

ye ijiatire Cohācjū quehnoano quehno basa tuhasahye. Quehnoa yuhdayere tiqiro quehno basahye. Tire masa ne ihñedari. Sa ye tire ne tuhoerari. Tire duhse masino basioerare marine, nine Cohācjū yere tiquina ojoari pūpū.

¹⁰ Tiquiro sa niepegūta Espiritu Santo pehe Cohācjū yere masigū yere marine. Ijipihtiyē Cohācjū yere Espiritu Santo masi pehore. Sa masino tiqiro marine tire masigū yere.

¹¹ Ne apequina pehe masno tiqiro masiñene ne masiedare. Sa ijiepegūta masno pehe tiqiro

esa tuharo tiqiro wacūñepū tiqiro tuhotuyere masine. Sata apequina Cohācjū tiqiro masiñene ne masiedare. Cohācjū yaqiro Espiritu Santo dihita tiqiro masiñene masine, masno tiqiro esa tuharo tiqiro wacūñene tiqiro masino sahata. ¹² Sa yena mari pehe Jesu yequina ijina masa tiquina esa tuharo tiquina buheyere caoeraja. Cohācjū yaqiro Espiritu Santore ohori marine masigū yero taro. Marine tiqiro quehnoano yeatire masigū yere Espiritu Santo pehe. ¹³ Sa yena Cohācjū yere masare buhena, masa ye masiñe mehna usā esa tuharo buheraja usā. Espiritu Santo tiqiro buheye pehere masare buheaja. Sa buhena Espiritu Santore caoyequinare Cohācjū yere quehnoano buheaja usā.

¹⁴ Espiritu Santore caoyequina pehe Espiritu Santo yere ne cahmedare. “Tiquiro ye ihyo warota ijire”, nimene tiquina. Espiritu Santo tiqiro yedohoro marieno tiqiro yere masino basioerare masare. Sa ye tiquina tiqiro yere ne masiedare. Espiritu Santo yedohoro mehna tiqiro yere masiaja mari. ¹⁵ Espiritu Santore caoyequina pehe Cohācjū yere quehnoano masine. Apequina pehe tiquinare “Quehnoañequina ijire. Ñañequina ijire”, ni bese masiedare Espiritu Santore caoyequinare. ¹⁶ Ohō saha nine Cohācjū yere tiquina ojoari pūpū: “Mari puhtoro Cristo tiqiro tuhotuyere masiñequina ne mariedare. Sa ye tiquirore masa duti masiedare”, nine tiqiro yere tiquina ojoari pūpū. Mari pehe Cristo yequina ijina, Cristo yero sahata masiaja.

3

Jesu yequina ihcāno saha Cohācjūre dahra cohteyequina ijire

1-2 Yuhũ acaye, musare buhegũ Espiritu Santore quehnoano yuhtiequinare yuhũ buheriro sahata buhe masiedũ mũasa pehere. Cristo yequina ijiepenata, macanagã dihire tiquina ihya masieno saha Cohãcjũ yere quehnoano masiedare mũasa. Yojobũ gãhũare quehnoano masiedañohti mũasa. Ahri yehpa cjẽna ñañequina yero saha tuhotuñohti mũasa. Sa yena macanagã epẽcore tiquina apũno saha mijoeda cjũne buheye dihitare tuhõñohti mũasa. Sa yegu ti yero saha ijiye buheye dihitare buhei musare. Cristo yequina ijiepenata macanagã tiquina ihya masieno sahata Cristo yere quehnoano masiedañohti mũasa. ³ Mũasa pehe mũasa mehna cjẽnare cahme coona, cahmequena, mũasa basi ihquẽ cururi tu wadũca sana, Espiritu Santore choeyequina yero saha yena niñohti mũasa. Sa yena ahri yehpa cjẽna Cristore cahmeeñequina yero saha yeñohti mũasa. ⁴ Ohõ saha niñohti mũasa: “Pablo ya curua cjãna ijiaja usã”, niñohti mũasa ihquẽquina. Sa yena apequina mũasa mehna cjẽna pehe “Apolo ya curua cjãna ijiaja usã”, niñohti. Mũasa sa ni yahuducuna Espiritu Santo marieñequina yero saha ni yahuducuñohti mũasa.

⁵ ¿Yuhũ Pablo, Apolo mehna dahseanaja ijiajari usã, mũasa tuhotugũ? Ohõ saha yeanaja ijina niaja usã: Cohãcjũ tiquiro dutiriro sahata tiquirore dahra cohtena ihyo ijina ijiaja usã. Sa yena musare usã buhegũ tuhona Jesucristore waçũ tutua dũcare mũasa. ⁶ Quehnoañe buheyere buheyequina wesepũ dahrayequina yero saha ijire, mari queoye mehna buhegũ. Wese upãro tiquiro ote mũhtariro saha yuhũ gãhũ musare buhe mũhtaũ. Sa yero apequiro wesere tiquiro cure nũnũ tãno saha Apolo pehe yuhũ bato musare buhe

nũnũ tãri. Usã sa buhepegũta wese cjẽ oteyere buçua nemogũ tiquiro yeriro saha Cohãcjũ pehe musare tiquiro yere masi nemogũ yeri. ⁷ Sa yegu yuhũ buhe mũhtarigũ ijiepegũta ihyo ijigũ ijiaja. Sa yero Apolo yuhũ bato buhe nemoriquiro gãhũ ihyo ijiriquirota ijire. Cohãcjũ pũrita oteyere tiquiro buçua nemogũ yeriro saha tiquiro yequinare tiquirore masi nemogũ yere. Sa yena Cohãcjũ pehere ño peoro cahmene musare. ⁸ Ote mũhtariquiro, came cure nũnũ tãriquiro ihcãno saha dahra cohteyequina ihyo ijiyequinata ijimene tiquina. Sa ye tiquina dahrariro punota wapatare tiquina. Sata ijiaja usã, Apolo mehna. ⁹ Sa yena usã Cohãcjũ yere dahra cohtena ijiaja. Sa yero Apolo yuhũ mehna cjãno ijire. Usã sa ijigũ mũasa pehe Cohãcjũ ya wese yero saha ijire. Mũasa sa ijigũ Cohãcjũ ya wese cjẽ oteyere tiquiro buçua nemogũ yero saha musare tiquiro yere masi nemogũ yerota tiquiro.

Sa ye Cohãcjũ musare tiquiro yequinare quehnoari curua yero nine. Sa yena utã mehna tiquina yeri wuhũ yero saha ijire mũasa tiquiro ya curua cjãna, mari queoye mehna buhegũ. ¹⁰ Mũasa sa ijigũ Cohãcjũ yuhũare tiquiro dutiriro sahata yuhũ pehe wuhũ dahre mihnidiquiro utãre tiquiro cũ mũhtariro sahata Jesucristo yere musare buhe mũhtaũ. Sa yero ti utã paca bui apequiro tiquiro ye nemo mũjano sahata apequiro yuhũ bato buhe nemo nũnũ tãno nine. Sa buhe nemono quehnoano mehna buherota. Sa yero Cristo ye dihitare buherota tiquiro. Sata buheahro tiquiro. ¹¹ Wuhũare tiquina dahre dũca tiquina cũ mũhtarria utã yero saha ijire Cristo. Sa yena ti utãre usã quehnoano cũ mũhtariro saha Cristo yere buhe tuhasaũ. Apequiro ye buheye pehere mari

buhegũ quehnoaedaga.

¹²⁻¹⁵ Uru mehna, plata mehna, wapa bujuye utã paca mehna mari yeri wuhare mari ujãa tuhugũ ujãedare. Sata Jesucristo yere mari quehnoano yeri bato pihtiri deco ijigũ Cohãcjũ mari yerire ujãa tuhuro saha yerota mari yerire masino taro. Sa tiquiro yegũ quehnoano yeri wuhũ ujãedariro saha mari yerire ti quehnoañe ijigũ masinota. Sa yero mari quehnoano yerina mari ijigũ masigũ yerota tiquiro. Quehnoano mari yeri wapa quehnoano yerota marine.

Sa yero yucuri mehna, taa mehna, ñaidi pũri mehna mari yeri wuhare mari ujãa tuhugũ ujãa wahare. Sata Jesucristo yere mari quehnoano yerari bato pihtiri deco ijigũ, Cohãcjũ mari yerire ujãa tuhuro yero saha yerota mari yerire masino taro. Sata tiquiro yegũ ñano yeri wuhũ ti wuhũ ujãeriro saha mari yerire ñañe ijigũ masinota. Sa yero mari quehnoano yerari bato ijigũ marine masigũ yerota tiquiro. Sa yero quehnoano yerarina mari ijigũ ihñano quehnoañene mari yemedi wapare quehnoano yesi marine. Sa ijiyequinare Cohãcjũ yuhduorota. Sa ye sa quehnoano yerariquina mehenogã mehna yuhdueta.

¹⁶ Mũsa pehe Jesu yequina Cohãcjũ ya wuhũ yero saha ijire. Mũsa sa ijigũ ihñano ti wuhũpũ tiquiro ijiboro saha Espiritu Santo pehe mũsa mehna ijire. ¿Tire masiedajari mũsa? ¹⁷ Cohãcjũ ya wuhũ ñañe marieni wuhũ ijire. Sa yena mũsa gũhu ti wuhũ yero saha ijina tiquiro yequina waro ijire. Sa yero Jesu yequinare ihcãquiro dojomehnegũ Cohãcjũ pecapũ cohãnota tiquiro pehere.

¹⁸ Ni mehoñene tuhoturacãhña mũsa. “Yojopũ cjãna ye masiñene quehnoano masiaja”, ni

tuhoturiquiro mũsa mehna cjãno ijiro Jesu ye pehere quehnoano masiaho. Tiquiro sa masigũ ihñañe apequina tiquirore “Tũho masieniquiro ijire”, nieta. Sa yero Jesu yere masino, potota quehnoano masidiquiro waharota. ¹⁹ Masa esa tuhuro tiquina basi tiquina masiñene “Thyo warota ijire”, ni tuhutore Cohãcjũ. Sata nine Cohãcjũ yere tiquina ojoari pũpũ: “Tiquina esa tuhuro masiñequina tiquina masiñe dahseati ijierare, Cohãcjũ tiquiro ihñagũ. Sa yero tiquina cahmeno saha yeragũ yere tiquinare”, nine Cohãcjũ yere tiquina ojoari pũpũ. ²⁰ Sa ye ape pũpũ ohõ saha nine: “Masa tiquina esa tuhuro masi pehoyequina tiquina tuhutuye dahseati ijieragũ masine mari pũhtoro Cohãcjũ pehe”, nine Cohãcjũ yere tiquina ojoari pũpũ.

²¹⁻²² Sa yena “Pablo ya curua cjãna ijiaja usã”, niedacãhña. “Apolo ya curua cjãna ijiaja usã”, niedacãhña. “Pedro ya curua cjãna ijiaja usã”, niedacãhña. Usã ijipihtina mũsa yequina dihita ijiaja. Ijipihtiyeye mũsa ye ijire. Cohãcjũ tiquiro bajumehnedire, catiye gũhare ohori mũsare. Sa yero pecapũ wahaeragũ yerota mũsare. Yojopũ ijiyere, camepũ ijiati gũhare mũsare ohorota. Sa ye ijipihtiyeye mũsa ye ijire. ²³ Sa yena mũsa pehe Cristo yequina ijire. Sa yero Cristo pehe Cohãcjũ yaquiro ijire.

4

Cristo tiquiro yere buhe duti tiquiro cũriquina tiquina dahrayere yahuahye Pablo

¹ Ohõ saha ni tuhutuya mũsa yuhare Apolo gũhare: “Tiquina Cristore dahra cohteyequina ijire. Sa ye masa tiquina masiedarire Cohãcjũ yere buheyequina ijire”, ni, tuhutuya mũsa usãre. ² Dahra

cohteyequinare tiquina puhtoro tiquiro dutiriro saha ye cohtero cahmene tiquinare. Yuhu gähure sata yero cahmene Cristore. ³ Sa ijiepegüta yuhure musa yahu wajaepegüta sa tuhotu cjã yuhu. Apequina puhtoa yuhure tiquina yahu wajaepegüta sa tuhotu cjã yuhu. Yuhu yerire ihñana “Ahri quehnoañe ijire. Ahri ñañe ijire”, ni masiedare musa. Yuhu gühu masuta ijiaja. Sa yegu yuhu yerire quehnoano masi pehoeraja yuhu gühu. ⁴ “Cristo yere yuhu yuhduducari yuhure mariedare”, ni tuhotumaja yuhu. Yuhu ohõ saha ni tuhotuepegüta buhiri tiboaga yuhu. Mari puhtoro Cristo dihita yuhu yerire ihñano, quehnoano masine. ⁵ Sa yena mari puhtoro tiquiro tojoa tato pano masare ñano ni yahu wajaeracähña musa. Tiquiro tojoa taro masa tiquina yerire, panopu apequina tiquina masiedarire Cristo masigü yerota. Sa yero mari ye duayere, mari tuhotuyere tiquiro masigü yerota. Sa yero tiquiro yere yeriquinare “Musa quehnoano yeri”, ninota Cohãcjã.

⁶ Yuhu acaye, yuhu Apolo mehna usã buherire yahuu yuhu, musare buhegu tagu. Sa ni yahuu yuhu Cohãcjã tiquiro yere tiquina ojoari pũpu tiquiro ni diro sahata musa yeducuatire. Sa yena musa mehna cjẽnare ihcãno saha cahme ño peoya. Ihcãquiroreta ño peoeracähña. ⁷ Musa pehe apequina yuhduoro quehnoana ijierare. Masi yuhduducana ijierare musa. Cohãcjã musare tiquiro ohori dihitarẽ core musa. Sa yena musare tiquiro yahuri dihitarẽ masine musa. ¿Musa esa tuharo cõona, musa esa tuharo masina ijierapenata, duhse yena “Masi pehona ijiaja”, niajari musa? Sa nina “Cohãcjã usãre ohoerari. Sa yero usãre yahuerari”, niboriro

saha yere musa.

⁸ Musa pehe “Cohãcjã yere masi pehoaja usã. Usãre yabe boro duhsaerare”, nimene musa. Sa yena musa cahapu usã ijieragũ musa ohõ saha ni tuhotumene: “Puhtoa yero saha masina ijiaja usã”, ni tuhotumene musa. Potota Cohãcjãre masi pehona puhtoa yero saha masina musa ijigũ musare quehnoa yuhduaboaga. Musa sa ijigũ musa mehna usã gühu puhtoa yero saha masina ijiboaga. “Masina ijiaja usã”, ni tuhotumene, quehnoa yuhduaro ni tuhotumene musa. ⁹ Ohõ saha ni tuhotuaja yuhu pũrita: Usãre Jesu tiquiro yere buhe dutiro cõno, ijipihtiyequina iji bato tiri cjã curua cõri usãre. Tiquina wejẽ dutinohriquina yero saha ijianare cõri usãre. Masa tiquina cahacjẽna yero saha ijiaja usã. Ahri yehpa cjẽna masa, angele gühu cahacjẽna yero saha ihñare usãre. ¹⁰ Cristo yere usã buhegũ ihñañe “Tuho masieñequina ijire”, nine masa usãre. Sa Cristo yere usã yegũ ihñañe, usãre ihña tuhtire. Musa pehe quehnoa yuhduaro Cristo yere masina ijiajari musa. “Cohãcjãre wacũ tutueyequina ijire”, ni tuhotumene masa usãre. Musa pehe quehnoa yuhduaro wacũ tutua yuhduana ijiajari. Musa pehere masa ño peore. Usã pehere masa ne ño peoerare. ¹¹ Usã pehe yojopure ñano yuhduana, ujua ahbana, aco wõona, ñano suhti mariena, wuhuse mariena ijiaja. Sa ye apequina usãre ño peoera, usãre ñano yere. ¹² Sa yena usã tutuaro dahraja. Sa yena apequina usãre tiquina ñano yahuducuepegüta usã pehe tiquinare “Quehnoano ijiya”, niaja usã. Sa yena apequina usãre ñano tiquina yepegüta sa tuhotu cjã usã. ¹³ Sa yena “Ñano yeyequina ijire”, usãre tiquina niepegüta usã pehe quehnoano mehna tiquinare yuhhtiaja. Sa ye panopu, yojopu

gũhare ñañe wete yero saha masape cururi iji bato tiri curua cjëna yero saha ihñare masa usãre.

14-15 Músare quehnoañe buheyere buhe mũhtagũ mûsa pacũ yero saha wahau yũhũ. Peyequina músare Cristo yere buheyequina tiquina ijiepegũta músare buhe mũhtarigũ ihcũta ijiaja yũhũ. Sa ijigũ músare buhe tigũ yegũ tagũ ahrire ojoagũ niedũ yũhũ. Yũhũ pohñare, yũhũ cahñare yũhũ dutiboriro saha músare quehnoano mehna dutigũ tagũ ahrire ojoagũ yũhũ. ¹⁶ Sa yegũ ahrire músare tutuaro mehna dutigũ tagũ niaja yũhũ. Yũhũre ihñã cuña mûsa.

¹⁷ Ahrire ye dutigũ tagũ mûsa cahapũ Timoteore ohou. Tiquiro yũhũ macũ yero saha ijiriquiro yũhũ cahñiquiro mari pũhoro Jesu yaquiro ijire. Sa yero Cristo yere yeducure tiquiro. Cristo yere mari yeatire ijipihtiyequina Jesu yequina cahapũ buhei yũhũ. Timoteo tire músare wacũducugũ yerota. Sa yegũ Cristo yere yũhũ yeriro sahata mûsa ihñã cũato saha Timoteore ohou yũhũ. ¹⁸ Timoteore yũhũ ohogũ ihquẽquina mûsa mehna cjëna pũhota iji duayequina ohõ saha ñine: “Pablo marine cuero, mari cahapũ ahtasi”, ni tũhotumene tiquina. ¹⁹ Cohãcjũ cahmegũ mûsa cahapũ mianogãta esautja. Sa esagũ pũhota iji duayequinare mûsa mehna cjëñare Cohãcjũ ye tutuayere tiquina cuogũ masigũtja yũhũ. Sa yegũ tiquina sa ni maca cãri gũhare masigũtja yũhũ. ²⁰ “Cohãcjũ usã pũhoro ijire”, mari ni yahuepegũta tiquiro yere mari yeragũ ti mari ñiñe dũhseati ijierare. Cohãcjũ tutuaye mehna tiquiro cahmeno saha ye masiaja. Ti ihyo waro ijierare. ²¹ ¿Mûsa cahapũ músare buhiri dahreacjũ músare tuhtiacjũ yũhũ wahagũ cahmeajari mûsa yũhũre? ¿O músare cahĩgũ músare bucuegũ yũhũ wahagũ cahmeajari mûsa

yũhũre? ¿Dũhse ijigũ yũhũ wahagũ cahmeajari mûsa?

5

Corinto cjëna tiquina wũana tire yahuahye Pablo

¹ Potota ohõ saha quti tire usãre apequina: Ihcãquiro mûsa mehna cjëno tiquiro mũnonore wũana tiñohti. Sa ni yahuri masa usãre. Apequina pehe Cohãcjũre cahmeeñequina ijiepetã tiquina pehe sa yerare. ² Mûsa mehna cjëno tiquiro sa yepegũta mûsa pehe “Quehnoana ijiaja usã”, ni tũhotumene. ¿Dũhse yena tiquiro ñano yeyere masiepenata bujũa witierajari mûsa? Sa yena sa ñano yeriquirore mûsa mehna Jesu yequina mehna ijiriquirore cohãña mûsa. ³⁻⁴ Yũhũ mûsa mehna ijierapegũta yũhũ wacũñepũ mûsa mehnata ijiaja yũhũ. Sa yegũ mûsa mehna ijigũ yũhũ niboriro saha ñano yeriquirore tiquiro sa ñano yeri buhiri buhiri dahre duti tuhasaja yũhũ. Jesu tiquiro dutiro mehnata sa ye dutiaja. Sa yena mûsa cahmecoana yũhũ wacũñe mehnapũ mûsa mehna yũhũ ijigũ mari pũhoro Jesu tiquiro tutuaye mehna tiquirore ñano yeriquirore cohãna, ohõ saha niña: ⁵ “Watĩno tiquiro cahmeno saha mũhũre yecũnahdo”, niña tiquirore. Sata niña tiquirore ñañene tiquiro tutuaro cahmeñene tiquiro duhuatire. Mûsa sa cohãgũ tiquiro ñano yũhdũrota. Mari pũhoro Jesu tiquiro tojoa tati deco ñano yeriquiro Jesu mehna tiquiro quehnoano yũhdũatire yojopũre tiquirore sa niña.

⁶ “Quehnoana ijiaja usã”, niepenata ñano yena niaga mûsa. Ñano yeriquirore mûsa sa ihñã cãna, ti ñañene mûsa ijipihtina piha pihtia wahanata. Pãre pugũ yeye trigore ti quehnoano sehsharo saha ti ñañe músare piharo quehnoano sehshaa

waharota. ¿Tire masiedajari m̄usa?
 7 Ȳh̄u acaye judio masa pascua
 ijiḡa ovejare wej̄e, ʉj̄ūa m̄uo,
 Coh̄ācj̄ure ño peore. Sata oveja
 tiq̄uiro yariariro saha Cristo mari
 ñañe buhirire yariaa wahahye.
 Tiqui sa waharire masina m̄usa
 pehe ñano yeriqui rore m̄usa
 mehna c̄j̄unore coh̄aña ti ñañe
 m̄usare “Pihari” nina. M̄usa ñañe
 yerire coh̄a tuhasari Cristo. Sa
 yena ñano yeriqui rore coh̄aña
 “Pari turi ti ñañene pihari”, nina.
 8 P̄are puḡa yeye trigore ti sehsariro
 saha panop̄a ñañene ih̄ña c̄ū, ye
 pihtirina ijimi mari. Sa yena
 pascua bose decop̄a p̄are puḡa
 yeye marieno p̄are tiquina ihyariro
 saha mari ḡūh̄a ñañene cahmeno
 marieno ñano yero marieno ijiihna
 mari. Panop̄a mari ñañene yeriro
 saha yerac̄h̄na. Sa yena potota
 quehnoano t̄hotuye mehna,
 quehnoañene yeihna.

9 M̄usare ȳh̄u ojoari p̄p̄are
 Jesu yaquiro tiq̄uiro ijiepeḡata
 sa w̄hana tiducuriquirore ne
 piti ti dutierami. 10 Sa niḡu
 w̄hana tiyequinare, apequina
 yere tutuaro cahmeñequinare,
 yaqueyequinare, “Coh̄ācj̄ū ijire”,
 tiquina niñe queoyere ño peoye-
 quinare Jesu yequina tiquina
 ijieraḡa “Tiquina mehna ijier-
 ac̄h̄ña”, niedaja. Ahri yehpap̄a
 sa ijieyequina marieno Jesure
 cahmeeñequina marieno mari
 dihita iji masiedaja. Ijipihtirop̄are
 ijire tiquina pehe. 11 Sa yeḡu
 m̄usare ojoaḡu oh̄o saha dutimi:
 M̄usa mehna c̄j̄eno “Jesu yaquiro
 ijiaja”, nidiquiro ijieperota nu-
 mino mehna ñano yeriqui ro, apee
 borore tutuaro cahmediqui ro,
 “Coh̄ācj̄ū ijire”, tiquina niñe
 queoyere ño peoriqui ro, ñano quiti
 yeducuriquiro, queheriqui ro, ya-
 queriqui ro tiq̄uiro ijiḡa tiquirore
 piti tierac̄h̄ña. Sa yeriqui ro “Jesu
 yaquiro ijiaja”, nidiquiro ijiḡa
 tiquirore piti tierac̄h̄ña. Sa yena

sa yeriqui ro mehna ihyerac̄h̄ña.
 12 Sa yeḡu Jesu yequina ijieye-
 quinare tiquina ñañe yeri buhirire
 buhiri dahre dutiriḡu ijieraja
 ȳh̄u. Sa ȳh̄ure yeraro cahmene.
 Ȳh̄u sa niepeḡata m̄usa mehna
 cahmecoañequina Jesu yequina
 m̄usa basi m̄usa yerire ih̄ñana,
 masino cahmene m̄usare. Sa ih̄ña
 c̄āedarō cahmene. Sa yena tiquina
 ñano yeḡu ih̄ñana m̄usare buhiri
 dahrero cahmene tiquinare.
 13 Jesu yequina ijieyequina pehere
 Coh̄ācj̄ū pehe buhiri dahrerota.
 Sa yena m̄usa pehe m̄usa mehna
 c̄j̄unore ñano yeriqui rore buhiri
 dahrena tiquirore coh̄aña.

6

Jesu yequinare yahus̄arire yahuahye Pablo

1 ¿M̄usa basi cahme ih̄ña tuhti
 yahus̄a duana d̄h̄se ijiro boro Jesu
 yequina ijieyequina cahap̄a m̄usa
 acayere Jesu yequinare yahus̄ana
 wahajari? Jesu yequinare m̄usa
 mehna c̄j̄enare yahus̄a duana
 apequina Jesu yequinare tire
 yahuro cahmene m̄usare. Sa
 ye Jesu yequinap̄a beseahro.
 2 Pihtiri deco ijiḡa mari Jesu
 yequina pehe masa ijipihtiyequina
 tiquina yerire ih̄ñana besenata
 mari tiquinare. ¿Tire masiedajari
 m̄usa? Sa yena pihtiri deco ijiḡa
 masa ijipihtiyequinare beseatina
 ijina, yojop̄a ḡūh̄ure bese masiaja
 mari. Sa yena yojop̄are ih̄yo
 ijiyeḡa buhiri ḡūh̄ure bese masiaja
 mari. 3 Angele tiquina yerire
 ih̄ñana tiquina ḡūh̄ure besenata
 mari. ¿Tire masiedajari m̄usa?
 Mari sa beseatina ijina potota
 ti yahd̄oro yojop̄a ḡūh̄ure Jesu
 yequina tiquina yerire ih̄ñana bese
 masiaja mari. 4 ¿Sa yena d̄h̄se
 yena m̄usa mehna c̄j̄enare yahus̄a
 duana Jesure cahmeeñequina
 cahap̄a ih̄yo ijiyeḡa buhirire
 yahus̄ana wahajari m̄usa? 5 Ahrire

nigũ niaja m̄sa queoro yerarire m̄sa bujua witiatire. ¿M̄sa mehna cj̄nare m̄sa cahme d̄se tini wiagũ m̄sare yahuatiquiro m̄sa mehna cj̄no quehnoano masiniquiro mariedajari? Ijire. ⁶ Sa ijiepegũta m̄sa mehna cj̄no Jesu yaquiro apequiro Jesu yaquirore yahusã duaro Jesu yequina ijieyequinare yahusãno wahare.

⁷ Masare beseyequina p̄htoa cahapũ m̄sa mehna cj̄nare yahusãna Cohãcjũ ye pehere yuhduacana nine m̄sa. Apequiro m̄sa mehna cj̄no m̄sare ñano tiquiro yegũ sa tuhutu cãboaga m̄sa. Jesu yequina ijieyequinare m̄sa yahusãto pano m̄sa acayurore m̄sa sa tuhutu cãgũ quehnoa yuhduaboaga. Jesu yaquiro m̄sare tiquiro yaquegũ tiquirore m̄sa yahusãto pano tiquiro yaquerire m̄sa sa tuhutu cãgũ quehnoa yuhduaboaga. ⁸ M̄sa gũhũ sa ijinata ijire. Apequinare ñano yere m̄sa. Sa yena yaquere m̄sa. Sa yena apequina m̄sa mehna cj̄na Jesu yequina tiquina ijiepegũta tiquinare ñano yena, yaquere m̄sa.

⁹ Sa yeyequina Cohãcjũ p̄hthora ijiorp̄re uhm̄sep̄re waha masiedare. ¿Tire masiedajari m̄sa? Ni mehoñene tuhutuercãhña m̄sa. Mari p̄hthora ijiorp̄re ne wahasi ohõ saha yeyequina: Wuana tiyequina, “Cohãcjũ ijire”, tiquina ñife queoyere ño peoyequina, numia mehna ñano yeyequina, um̄a mehna ñano yeyequina numia, um̄a sehsaro tiquina paguri mehna ñano yeyequina, numia sehsaro tiquina paguri mehna ñano yeyequina numia, ¹⁰ ni meho ehmañequina, apequina yere tutuaro cahmeñequina, queheyequina, masare ñano tuhtiequina, yaqueyequina, ne Cohãcjũ p̄hthora ijiorp̄re uhm̄sep̄re waha masiedare. ¹¹ Panop̄re m̄sa gũhũ

sa yerina ijimedi. Sa yemedina m̄sa ijiepegũta yojop̄re m̄sa ñano yerire cose tuhasari Jesucristo pehe. Sa tiquiro cosenohrina m̄sa ijigũ tiquiro yequina ijiatinare yeri Cohãcjũ m̄sare. Sa yero “Quehnoana ijire”, ni ihñare m̄sare tiquiro. Sata yere m̄sare mari p̄hthora Jesucristo, Espiritu Santo gũhũ tiquina tutuaye mehna.

Mari paguri Cristo ye paguri ijire

¹² “Yũhũ cahmeno saha ye masiaja yũhũ”, nine ihquẽquina. Sata ijire. Yũhũ gũhũ sa nidigũ ijiepeguta tire yegũ apequinare yedohorigũ ijieraboaga yũhũ. Yũhũ cahmeno saha ye masiaja. Sa ye masiepeguta ihquẽ tahari sa yegũ ijigũ duhu masiedaboaga yũhũ. Sa yegũ tire pari turi yesi yũhũ, “Duhu masiedaboaga”, nigũ. ¹³ Ohõ saha nine m̄sa: “Ijipihtye ihyaye mari paa cj̄e ijiati ijire. Sa yero mari paa ihyaye pose tiati paa ijire”, nine m̄sa. Ti ijirota ijire. Sa ijieperota came Cohãcjũ pehe mari ihyayere mari paa gũhũre pihtia wahagũ yerota. Sa ye mari ihyaye ihyo warota ijiro nine. Ihyaye mari paa cj̄e ijiati ijire. Sa ijieperota mari paguri numia mehna ñano yeati paguri ijierare. Mari paguri pehe mari p̄hthora Cristo ye paguri ijiye nine. Sa yero mari p̄hthora pehe mari pagurire quehnoano yeatiquiro ijire. ¹⁴ Sa yero Cohãcjũ tiquiro tutuaye mehna mari p̄hthora Cristore masoahye. Sa tiquiro yeriro sahata mari gũhũre masonota tiquiro.

¹⁵ ¿Sa yena m̄sa paguri Cristo ye paguri ijigũ masiedajari m̄sa? ¿Ti sa ijigũ Cristo ya pagũ mehna wuana tiricoro mehna mari ñano yegũ quehnoajari? Quehnoaedare. ¹⁶ Wuana tiricorore ñeheniquiro tiquiro pagũ pehe ticoro ya pagũ mehna ijiro, ihcã pagũ yero saha ijire. ¿Tire masiedajari m̄sa? Sata ni ojoahye Cohãcjũ yere

tiquina ojoari p̄p̄u: “Tiquina p̄aro ijiepetā ihcā pagu yero saha wahare”, ni ojoahye. ¹⁷ Mari p̄h̄toro Jesu tiquiro yaquiro masano mehna ijiro nine. Sa yero masano mari p̄h̄toro mehna p̄aro ijiepetā ihcā pagu yero saha ijire.

¹⁸ Sa yena w̄hana tieracāh̄ña. Tire m̄sa yabiro saha tire yeracāh̄ña. Apeye ñañene mari yena mari pagure dojomehnedaja. W̄hana tiriquiro pehe tiquiro pagure ñano dojomehnene. ¹⁹ Esp̄ritu Santore marine ohori Cohācjū. Sa yero mari paguri mehna ijire Esp̄ritu Santo. ¿Tire masiedajari m̄sa? Sa ye m̄sa paguri, m̄sa jeripohnari ḡhu m̄sa ye waro ijierare. ²⁰ M̄sa ñañe buhirire buhiri dahre tuhasari Cristore. Sa yena tiquiro yequina waro ijire m̄sa. Tiquiro yequina ijina m̄sa paguri mehna Cohācjū tiquiro cahmeno sahata yeya. Sa yena Cohācjüre ño peona nine m̄sa. Sa yena apequina ḡhure tiquirore ño peogū yena nine.

7

Namo tiyere yahuahye Pablo

¹ Yojopure yahure m̄sa sinitu ojoarire yahū ḡhu yuhti cahmegū tagu niaja: Masano namo tieragū quehnoare, yahū ihñagū. ² Ti sa ijiepegūta apequina um̄a pehe namo tiahro apequina numia mehna tiquina “Ñano yeari”, niñe. Sa ye ihquē numiata manū tiahro apequina mehna tiquina “Ñano yeari”, niñe. ³⁻⁴ Manū tiricoro pagu ticoro ya pagu dihita ijierare. Ticoro manano ya pagu ḡhu ijire. Ticoro manano ḡhu tiquiro pagu tiquiro ya pagu dihita ijierare. Tiquiro namono ya pagu ḡhu ijire. Sa yena m̄sa um̄a pehe m̄sa namosānumiare quehnoano c̄oaya. Sa yena m̄sa numia ḡhu

m̄sa manūsum̄are “Yahu pagure piheracāh̄ña”, niedacāh̄ña. ⁵ Sa ijiepegūta Cohācjüre p̄aro yahū sini duana “Meheñe decorigā yahū mehna ijieracāh̄ña. Cohācjüre siniihna”, ihcāno mehna sa nina, sa ye masine m̄sa. M̄sa sa nidi bato m̄sa iji m̄htariro saha ijiducuya tja, Satana m̄sare “Ñano ye dutiari”, nina. “Apequina mehna ñano yeboaga”, nina, m̄sa basi piti ti duhueracāh̄ña. M̄sa iji m̄htariro saha ijiducuya tja.

⁶ Ahrire m̄sare yojopu yahū nidire nigū m̄sare dutiye waro mehna niedaja. Sa yahugū niaja m̄sa yeatire m̄sa masiatire. ⁷ Ijipihtina m̄sa yahū yero saha namo tiena m̄sa ijigū quehnoaboaga yahure. Sa iji duepenata mari ijipihtina ihcāno saha ijieraja. Ihquēquinare namo ti dutire Cohācjū. Sa yero tiquiro ihquēquinare namo ti dutierare.

⁸ Sa yegū namo marienare, manū marienare, wape wiha numia ḡhure ohō saha niaja m̄sare: Namō mariena, manū mariena iji masina, sata iji cāh̄ña yahū yero saha. ⁹ Sa iji masiedana tutuaro ñañene cahmena, namo tiya. Sa yena manū tiya. Ñañene m̄sa tutuaro cahmegū quehnoaedare m̄sare. M̄sa sa tutuaro cahmegū m̄sa namo tigū p̄rita quehnoarīne. Sa yena m̄sa manū tigū ḡhure quehnoarīne.

¹⁰ M̄sa namo tinare, manū tina numiare ohō saha dutiaja. Yahu sa niepegūta yee dutiye waro ijierare ahri. Mari p̄h̄toro Cristo ahrire dutire: M̄sa numia pehe m̄sa manūsum̄are cohāedacāh̄ña. ¹¹ M̄sa manūsum̄are cohāna, manū mariena numia tojoaya. Sa tojoerana pari turi m̄sa manūsum̄a mehna quehnoano ijiya tja. Sa yena m̄sa ḡhu um̄a m̄sa namosānumiare cohāedacāh̄ña.

12 Sa yegu m̄sa gũh̄re apequinare oh̄o saha niaja yãh̄. Mari pũthoro tiquiro dutiye ijierare ahri. Yãh̄ pehe oh̄o saha niaja m̄sare: Ihquẽquina m̄sa mehna cjẽna Jesu yequina pehe Jesure cahmeeñequina numiare namo tiquina ijire. Sa ye tiquina namosãnumia tiquina mehna tojoa duagũ tiquina numiare cohãedacãhdo tiquina. 13 Sa ye ihquẽquina m̄sa mehna cjẽna numia Jesu yequina numia Jesure cahmeeñequinare manũ tiquina numia ijire. Sa ye tiquina manũsum̄na tiquina numia mehna tojoa duagũ tiquinare cohãedacãhdo. 14 M̄sa manũsum̄na Jesure cahmeeñequina ijiepegũta Jesu yequina numiare tiquina namo tigũ, Cohãcjũ quehnoañequina yero saha ihñare tiquinare. Sa yena m̄sa um̄na pehe Jesu yequina m̄sa ijigũ m̄sa namosãnumia Jesure cahmeeñequina numia ijiboaga. Tiquina sa ijiepegũta m̄sa mehna tiquina numia manũ tigũ Cohãcjũ quehnoañe numia yero saha ihñare tiquina numiare. Tiquiro sa ihñedagũ m̄sa pohna Jesure cahmeeñequina pohne yero saha ihñaboaga Cohãcjũ. Sa yero tiquina pohne gũh̄re quehnoañequina yero saha ihñare Cohãcjũ. 15 Sa ye m̄sa um̄na pehere m̄sa namosãnumia Jesure cahmeeñequina numia m̄sare cohã duaye, sata yeahro. M̄sa manũsum̄na gũh̄ sa cohã duaye, sata yeahro. Quehnoano mari ijigũ cahmene Cohãcjũ. Sa yero tiquina numia Jesu yequina ijieye numia m̄sare cohã duagũ “Tiquina numia mehna ijiniña”, ni, dutierare Cohãcjũ. 16 Tiquina namosãnumia Jesu yequina numia pehe quehnoano yegũ ihñañe camepũ tiquina manũsum̄na Jesure cahmeboaga. Sa cahmegũ

Cohãcjũ tiquinare pecapũ waha-boriquinare yãh̄horota. Sa ye tiquina manũsum̄na Jesu yequina pehe quehnoano yegũ ihñañe camepũ tiquina namosãnumia Jesure cahmeboaga. Sa cahmegũ Cohãcjũ tiquina numiare pecapũ waha-boriquina numiare yãh̄horota. Sa Jesure cahme-boriquina tiquina ijiepegũta potota Jesure tiquina cahmeatire masiyuro basioerare m̄sare.

17 Sa yena ijipihtina m̄sa mari pũthoro Cristo m̄sare tiquiro iji dutihiro sahana yeya. Sa yena Cohãcjũ m̄sare tiquiro cũrire yeya m̄sa. Tire ijipihtiyequina Jesu yequinare sa ye dutiducuaaja yãh̄. 18 Jesu yequina m̄sa ijiato pano cuhnucunũ sohtoa cahserogãre yãhre nena ijina, tire ihña yabier-acãhña. Sa yena Jesu yequina m̄sa ijiato pano cuhnucunũ sohtoa cahserogãre yãhre nedarina ijina yojopũ gũh̄re sata ijiducuya. 19 Yojopũre ti cahserogãre yãhre nedina m̄sa ijigũ dahseati ijierare. Tire yerarina m̄sa ijigũ gũh̄re dahseati ijierare. Sa ijiepegũta Cohãcjũ dutiyere mari yegũ ti pũrita ihyo waro ijierare. 20 Sa yena Cohãcjũ Jesu yequina m̄sare tiquiro cũri pje m̄sa ijiriro sahana tojoaya. 21 Jesu yaquiro m̄hũ iji dũcato pano apequiro cahacjũ m̄hũ ijigũ quehnoanota. Sata tojoaya. M̄hũ pũthoro m̄hũre tiquiro wio duagũ pehere wijiaya m̄hũ. M̄hũ wijiagũ quehnoanota m̄hũre. 22 Sa yero mari pũthoro Jesu yaquiro ihcãquiro ijiro masũno cahacjũno ijieperota Jesu tiquiro yãh̄horiquiro ijire. Sata apequiro mari pũthoro Jesu yaquiro ijiro, masũno cahacjũno ijieraperota Jesu cahacjũno ijire tiquiro gũh̄. 23 Mari ñañe buhirire buhiri ti tuhasahye Cristo. Sa yena tiquiro dihitaro potota m̄sa pũthoro waro tuhutuya m̄sa. Apequina m̄sare

tire tiquina ye dutieragū tiquinare tūhoeracāhña. ²⁴ Sa yena yūhū acaye, Jesu yequina ijiatiquina Cohācjū mūsare tiquiro cūri pje mūsa ijiriro sahata tojoaya. Sa tojoana Cohācjū mehna cjāna ijiya.

²⁵ Yojoṗure namo marienare, manū mariena numia gūhure yahu duaia mūsare. Mari pūhtoro ahrire “Ohō saha niña”, niedare yūhure. Yūhure tiquiro paja ihñagū yūhure tiquiro yedohogū tiquiro cahmeno sahata yeducurigu ijiaja yūhū. Sa ijirigu ijigu ahrire quehnoano yahutja mūsare.

²⁶ Yojoṗure mūsa ñano yūhdūna niaga. Sa yena mūsa namo mariena gūhū, manū mariena gūhū mūsa tojoagū quehnoanota, yūhū tūhotugū.

²⁷ Namō mariena, manū mariena numia mūsa ijina sata tojoaya. Sa yena mūsa pehe namo tina, manū tina numia gūhū sata tojoaya.

²⁸ Namō tina ñano yerare mūsa. Sa yena mūsa nuhmia manū tina, ñano yerare mūsa gūhū. Sa yena namo tina, manū tina numia mūsare wape cūoro tojoarota. Sa yegu mūsare “Sa wape tiari”, nigū “Namō mariena, manū mariena numia tojoaya”, niaja yūhū.

²⁹ Yūhū acaye, ahrire mūsare yahugū niaja. Cristo ahri yehpapū tiquiro tojoa tato mehenogā dūhsare. Sa ye yojoṗure namo marieñequina Cohācjū cahmeno saha tiquina quehnoano ye masino sahata quehnoano yero cahmene namo tiyequina gūhure. Sa ye manū tiyequina numia gūhure sata Cohācjū tiquiro cahmeno saha quehnoano yero cahmene. ³⁰⁻³¹ Ahri yehpa yojoṗū ijiro saha camerū ijisi. Camesa pihitia waharota. Sa pihitiati yehpa ijigū yojoṗure mari ñehe quea utiye, mari bucueye, mari cūoye pihitia waharota. Sa ye ti ihyo waro ijire. Cohācjū yere yeye pehe ihyo waro ijierare. Sa ye ahri yehpa cjēne cūoyequina,

yero saha ijiahro. Ahri yehpa cjēne pajiro tūhotueraro cahmene. Ahri yehpa yojoṗū ijiri yehpa camesa pihitia waharota.

³² Mūsa ñano yūhdūeragū cahmeaja yūhū. Sa yegu mūsa pajiro mūsa tūhotueragū gūhure cahmeaja. Namō mariediquiro Jesu yaquiro ijiro Jesu yere wacūducure. Sa wacūducuro Jesu cahmeñene tutuaro ye duare. ³³ Namō tiriquiro pehe tiquiro namono cahmeñe pehere tutuaro ye duare. Sa yero ahri yehpa cjēne pajiro tūhoture.

³⁴ Sa yero tiquiro pūarore ye duare. Jesu cahmeñene, tiquiro namono cahmeñe gūhure tiquiro ye duare. Sa yero bucūoro manū mariedicoro ijiro, ticoro mari pūhtoro Jesu cahmeñene tutuaro ye duare. Nuhmino gūhū sata ye duare. Sa ye duaro ticoro tutuaro Cohācjū yacoro iji duare. Manū tiricoro pehe ahri yehpa cjē pehere ticoro manūno cahmeñe pehere tutuaro ye duare. Sa yero ahri yehpa cjēne pajiro tūhoture.

³⁵ Ahrire mūsare nii niaja mūsare yedohogu tagū. Tutuaro dutiyere mūsare cū dueraja. Sa cū duerapeguta quehnoano mūsa yegū cahmeaja. Sa yegu Jesu mari pūhtoro yere mūsa tutuaro ye duagū cahmeaja yūhū.

³⁶ Mūsa mehna cjūno tiquiro cahmedicoro bucūoro wahagū ihñano ticorore namo tiahro. “Sata yero cahmene”, ni tūhoturo, namo tiahro. Sa yero ticorore namo tiro ñano yero niedare. ³⁷ Apequiro pehe tiquiro cahmedicore “Yūhure namo tiro cahmene”, ni dueraro, tiquiro cahmediro sahata yeahro. Tiquiro namo ti dueragū, quehnoanota. Quehnoano yero nine. ³⁸ Sa yero tiquiro cahmedicore namo tiriquiro gūhū quehnoano yere. Sa yero yojoṗure ticorore namo tieriquiro pehe apequiro yūhdūoro quehnoano yere.

39 Manu tiricorore ticoro manunore cohã dutierare Cohãcjũ. Tiquiro sa cohã dutierapegũta ticoro manuno tiquiro yariari bato ticoro apequiro mehna ticoro cahmediquiro mehna manu ti masine. Ticoro manu tiriquirore Jesu yaquiro ijiro cahmene tiquirore. 40 Ticoro manu mariedicoro tojoaro, manu tiricoro yuhduoro quehnoano bucuericoro ijirota ticoro. Sata ni tuhutuaja yuhu pehe. Cohãcjũ yaquiro Espiritu Santore cuogu ijiaja. Yuhu sa cuogu ijigũ masina, ahri yuhu yahurire masina masa.

8

“Cohãcjũ ijire”, tiquina niñe queoyere ño peo, ihyayere duhu peoahye masa. Ti ihyayere yahuahye Pablo

1 Yojopare “Cohãcjũ ijire”, tiquina niñe queoyere ño peo, tiquina duhu peori ihyayere yahu duaja. Ijipihina masa ti borore “Masijaja”, ni tuhutore masa. Sa ni tuhutuna “Apequinare masi yuhducaja”, ni tuhutumene masa. Sa ni tuhutuna apequinare yedohoerare masa. Apequinare cahina tiquinare yedohore masa. Sa ye masiñe yuhduoro apequinare cahiñe pehe ihyo waro ijierare. 2 “Masi peho cjã”, nina ijina, Cohãcjũ quehnoañene tiquiro masi dutiyere masiedarĩaga masa. 3 Sa ijiepegũta Cohãcjũre masa cahigũ masare masine tiquiro. Sa yena tiquiro yequina ijire masa.

4 “Cohãcjũ ijire”, tiquina niñe queoyere ño peo, tiquina ihyayere duhu peore. Ti ihyayere masare yahutja: Ti queoye ne dahseati ijierare. Potota ti queoye jeripohna mariedare. Cohãcjũ pehe ihcãquiota ijire. Apequina cohãmana mariedare. Ahrire masijaja mari. 5-6 “Peyequina cohãmana ijire. Tiquina mari puhtoa ijire”, ni tuhutumene masa. Sa yero

ahmasepu, ahri yehpapu gũhare “Cohãmana”, tiquina niñequina ijiepegũta mari pehere ihcãquiota ijire Cohãcjũ. Tiquiro mari Pacu ijipihiyere bajumehnediquiro ijire. Sa yero tiquiro yequina ijiatina yeahye tiquiro marine. Sa yero mari puhtoro Jesucristo ihcãquiota ijire. Tiquiro ijipihiyere mari Pacare ye basariquiro ijire. Tiquiro yequina ijiatinare yeahye tiquiro marine. Sa yena tiquiro mehna sa ijiducunata mari.

7 Yuhu nidiro saha ijiepegũta apequina Jesu yequina tire masiedare. Panopu tiquina “Cohãcjũ ijire”, tiquina niñe queoyere “Catiyequina ijire”, ni tuhotuducumahye. Ti pjepare sa yeriquina ijiye yojopu gũhare ti queoyere ño peo, tiquina duhu peo ihyayere “Cohãmana ye ihyaye ijire”, ni tuhutumene. Sa ye ti ihyayere ihyaye, “Mari ñano yena niaja”, ni tuhutumene. Tire tiquina yerire quehnoano masiedaye, sa ni tuhutumene. 8 Ti ihyayere mari ihyagũ mari ihyeragũ gũhare Cohãcjũ marine “Quehnoañequina ijire”, ni ihñedare. Sa ye ti ihyayere mari ihyagũ ihyo warota iji cãhno nine ti ihyaye. Mari tire ihyana ñano yeraja. Ti ihyayere mari ihyeragũ gũhare ihyo warota iji cãhno nine. Mari ihyerana apequina yuhduoro quehnoana ijieraja mari gũhu. 9-10 Sa ijiepegũta quehnoano yeya masa. Ti ihyayere ihyarina masa ijigũ apequina masare “Masijaja”, ninare ihña cũ ihyaboaga. Sa ihña cũ ihyaye tiquina yerire quehnoano masiedaye, “Ñano yena niaja mari”, ni tuhutueta tiquina gũhu. Tiquina sa ni tuhutugũ tiquina pehere ñano yegũ yena niaga masa. Sa yena quehnoano yeya masa. 11 “Mari ti ihyayere mari ihyagũ quehnoanota marine”, masa ni tuhutuna ijina apequina quehnoano masieñequinare ñano yegũ yeboaga masa, masare

tiquina ihña cūgã. Sa yeriquina ye ijiati gũhure yariahye Cristo. Sa yena Cristo yequinare m̄sa acayere ñano yegũ yena niboaga m̄sa. ¹² Quehnoano masieñequinare Cristo yequinare m̄sa ñano yegũ yena, Cristo gũhure ñano yena nine m̄sa. ¹³ Sa yegũ ti queoyere ño peo, tiquina duhu peo ihyayere yũhũ ihyagũ Cristo yequinare ñano yegũ yegũ niboaga yũhũ. Jesu yequina ñano yegũ cahmedaja. Sa yegũ “Yũhũ tiquinare ñano yegũ yeari”, nigũ ti ihyayere ne pari turi ihyasi yũhũ.

9

Pablo Jesu cūriquiuro tiquiuro ijiyere yahuahye

¹ Jesu tiquiuro yere buhe dutiro cūrigũ ijiaja. Sa yegũ apequina tiquiuro cūriquina tiquina yero saha ye masiaja yũhũ gũhũ. Jesu cūriguta ijiaja yũhũ gũhũ. Mari pũtoro Jesure ihñariguta ijiaja yũhũ. Sa yena Jesu yere yũhũ buhegũ m̄sa pehe tire quehnoano tũhona tiquiuro yequina wahare m̄sa. Sa yena Jesu cūrigũ yũhũ ijiyere masi tuhasare m̄sa. ² Apequina yũhure yahu wajaye “Jesu cūriquiuro ijierare”, niboaga. Tiquina sa niepegũta m̄sare yũhũ buheri bato Jesu yequina wahana, “Jesu cūriquiuro ijire”, ni, yũhure masi tuhasare m̄sa. Sa yena apequina yahu wajaeppegũta m̄sa pehe tiquiuro cūrigũ yũhũ ijiye tiyere masine.

³ Yũhure yahu wajayequinare ohõ saha ni yũhtiitja. ⁴ M̄sare yũhũ buheri bato yũhũ ihyatire yũhũ sihniati gũhure yũhure ohoro cahmene m̄sare. ⁵ ¿Sa yegũ namo tigũ ijigũ yũhũ namono Jesu yacoro ticoro ijigũ ticoro mehna tini masiedaboagari yũhũ? Apequina Jesu cūriquina, Jesu bahana, Pedro gũhũ tiquina namosãnumia mehna tiquina tinidiro sahata

yũhũ gũhũ tini masiboaga. Yũhũ sa tinigũ yũhũ namo tigũ ijigũ ticoro gũhure ihyayere ohoboaga m̄sa. ⁶ Yũhũ Bernabé mehna m̄sare quehnoañe buheyere usã buhepegũta usãre ne apee borogã ohoerari m̄sa. Sa yena usã basita usã ihyatire dahra wapataũ usã. ¿Usã dihitare wapataro marieno buhero cahmeajari, m̄sa tũhotugũ? ¿Usã sa buhena apeye dahraye pehere duhu masiedaboagari usã? ⁷ Ahriquina yũhũ queoye mehna yahuatiquina pehe tiquina dahrari wapa wapatare. Ihcãquiuro surara dahragũ tiquiuro pũtoa tiquiore wapa yere. Tiquiuro basi wapa yerare. Ihyayere oteriquiro gũhũ tiquiuro oteri dũca tigũ tireta ihya masine. Sa yero wapatare tiquiuro. Sa yero ovejare ihña ihboriquiro tiquiuro nuñequina epẽcore sihni masine tiquiuro. Sa yero wapatare tiquiuro gũhũ. ⁸ “Tiquina dahrari wapare wapa yero cahmene”, nigũ masa tiquina dutiye dihitare m̄sare yahueraja. Cohãcjũ dutiyepũ tiquiuro nidi gũhure m̄sare yahugũ niaja. ⁹ Tiquiuro dutiyere tiquina ojoari pũpũ ohõ saha ni yahure: “Wecũ trigo pjerire tiquiuro dahpocãri mehna suhti weriquiro ihya duagũ tiquiuro dũserore cahmotaeracãhña”, ni-ahye Cohãcjũ dutiye. Sa dutiro wecũare nino niedahye. ¹⁰ Sa dutiro marine nino niahye marine buhero taro. Wesere seheriquiro gũhũ ti dũcare nediquina gũhũ tiquina dahrari bato dũca tiri pje ijigũ tiquina wapatatire cohtere. Sa yena dahrayequinare tiquina dahrari wapare ohoro cahmene marine. ¹¹ M̄sare Cohãcjũ yere quehnoañe buheyere buhei usã. ¿Usã sa buhegũ m̄sa pehe usãre ihyayere ohoeraro cahmeajari, m̄sa tũhotugũ? Ohoro cahmene. M̄sa ohogũ quehnoaboaga usãre. Sa ijiepegũta m̄sa ohoerari usãre.

12 Sa ohoerapenata apequina ihyayere musare sinigũ tiquina pehere ohore musa. Tiquina musare ihyayere sinigũ tiquina yuhduoro usã pehe oho dutiboaga musare.

Sa oho dutiborina ijiepenata usã pehe “Usãre ohoya” ne niedu. “Cristo ye buheyere musapu cahmedaboaga” nina, usãre mariedapegũta musare ne siniedu. ¹³ Cohãcjũ wuhupu dahrayequina ti wuhupũta tiquina ihyayere nene. Sa ye Cohãcjũre tiquina ño peori altarpũ cohteyequina wahiquirore tiquina ujãa mworiquirore mehenogã ne, ihyari tiquina gũhũ. ¿Tire masiedari musa? ¹⁴ Sa tiquina yeriro saha quehnoañe buheyere buheyequinare tiquina buheri wapare tiquina ihyatire tiquinare ohoro cahmene musare. Sata ye dutiri mari puhtoro Jesu. ¹⁵ Sa yegu musare siniborigũ ijiepegũta yuhũ ne apee borore siniedu musare. Sa yegu ahrire yojopũre ojoa ohogu apee borore wapa cahmegũ tagũ ojoagu niedaja. Musare ne wapa cahme dueraja. Yariacjũ ijiepegũta ne wapa cahmesi yuhũ musare. Wapa marieno buhegu tutuaro bucueaja. Sa yegu musare yuhũ buheri wapa ne wapata ihyasi.

¹⁶ Quehnoañe buheyere buhe dutiro yuhũre cũri Cohãcjũ. Tire buheacjũta ijigu njaja yuhũ. Quehnoañe buheyere buheragu pejecuogu ijiboaga yuhũ. Sa yegu ti buheyere buhegu “Apequinare masi yuhduũcaja”, niacjũ ijieraja yuhũ. ¹⁷ Quehnoañe buheyere yuhũ esa tuharo buhegu yuhũ buheri wapa wapa neboaga yuhũ. Cohãcjũ yuhũre tiquiro yere buhe dutiro cũri yuhũre. Sa yegu yuhũre tiquiro cũrire yegu njaja. Sa buheacjũ ijiaja yuhũ. ¹⁸ ¿Tiquiro yere sa buhegu yabe borore wapatajari yuhũ? Ohõ saha ijire yuhũ wapataye: Quehnoañe

buheyere buhegu musare ne apee borore siniedagu wapa marieno ti buheyere buheaja musare. Yuhũ sa nidire masigu bucueaja. Yuhũ bucueyeta ijire yuhũ wapataye.

¹⁹ Ne masa cahacjũ ijierapegũta ijipihtiequina cahacjũ yero saha ijiaja yuhũ apequina masa Jesu yequina tiquina wahatire. ²⁰ Sa yegu yuhũ acaye judio masa mehna ijigu, tiquina yero saha yeaja yuhũ Jesu yequina tiquina wahatire. Cohãcjũ dutiyere Moisere tiquiro cũrire ño peorigũ ijierapegũta, ti dutiye dihitare ño peoyequina mehna ijigu ti dutiyere ño peoriquiro yero saha ijiaja yuhũ. Sata yeaja yuhũ tiquina Jesu yequina tiquina wahatire. ²¹ Sa yegu Cristo yaquiro ijigu Cohãcjũ dutiyere Moisere tiquiro cũrire cohã dueraja. Ti dutiyere cohã duerapegũta ti dutiye marieñequina mehna ijigu ti dutiye marieniquiro yero saha ijiaja. Sata yeaja yuhũ Jesu yequina tiquina gũhũ wahatire. ²² Jesu yere quehnoano masieñequina mehna ijigu tiquina yero saha ijiaja. “Masi pehogũ ijiaja”, niedaja yuhũ. Sata yeaja yuhũ Jesu yequina tiquina gũhũ wahatire. Sa yegu ijipihtiequina masa tiquina ijiro saha ijiaja yuhũ, ihquẽquina Jesu yequina tiquiro yuhduoriquina tiquina wahatire. ²³ Ahrire yeaja quehnoañe buheyere ijipihtiequina tiquina tuhoatire. Yuhũ sa yegu ihũano Jesu tiquiro buheriro saha yuhũ gũhũre quehnoano yere. Sa yegu masa tiquina ijie tiro saha ijiaja.

²⁴ Ohõ saha ijire mari queoye mehna buhegu. Oma cohãpeyequina omañe tiquina ijipihtiequina omare. Tiquina sa oma pihtiepegũta oma tutu-ariquiro pehe esa mahtare. Sa esa mahtariquiro wapatare. Sa yena tiquina omariro saha musa gũhũ Cohãcjũ cahmeñene yeya musa

wapatatire. ²⁵ Ijipihtiyequina omañequina tiquina pagare dojomehneñene duhu cã, quehnoano omapore tiquina oma tutuatire. Sa ye tiquina quehnoano omatire queoro ihyaye, queoro carñe, quehnoano yere tiquina. Sata yere tiquina wapatato saha. Sa ye tiquina wapataye pūri mehna tiquina yeri behto ijire. Ti behto pehe yoari pje ijierare. Duita ahbaa wahare. Mari pehe Cohãcjũ yere quehnoano buheaja tiquiro yere mari wapatato saha. Ti wapataye pūrita ne ahbaerare. ²⁶ Sa yegũ yũhũ ne siepũ omariquiro yero saha yeraja. Sa yegũ cahmequeperiquiro ape siepũ dote maca cãriquiro yero saha yeraja. Sa yegũ Cristo yere queoro ye duaja. ²⁷ Sa yegũ omapeyequina, cahmequepeyequina gũhũ tiquina pagũrire tiquina buheriro saha, quehnoano queoro tiquina yeriro saha yũhũ gũhũ yũhũ pagũ mehna quehnoañe dihitaro yepoaja. Sa yeragũ apequnare buherigũ yũhũ ijiepegũta dahseacjũ ijieraboaga yũhũ pehe.

10

“Cohãcjũ ijire”, tiquina niñe queoyere ño peo dutierahye Pablo

¹ Sa yena yũhũ acaye, ahrire masiña mũsa. Ũsã Israe masa ñecũsumtũna mũna panopũ cjẽna ijipihtiyequina Cohãcjũ ya ehmeo curuare ihña nũnũ tã cãa wahahye. Sa wahaye, aco sohãri mare aco pũa peheri tojoadũcari mahapũ wũa queheri mahapũ tiniñe, pehãa wahahye. ² Sa wahaye, tiquina ijipihtiyequina ehmeo curua mehna aco sohãri ma cjẽ aco mehna Cohãcjũ ye ijiatire wame yenohriquina yero saha wahahye. Wame yenohrina wahana Cristo yequina mari ijiyere ihña niaja. Sa tiquina aco sohãri mare wame yenohriquina yero saha wahaye,

Moise yequina tiquina ijiyere ihñañe niahye. ³ Sa ye tiquina ijipihtiyequina umũse cjẽ ihyayere ihyae tiahye Cohãcjũ tiquiro ohoyere. ⁴ Sa ihyaye tiquina ijipihtiyequina Cohãcjũ ohori aco gũhũre sihnie tiahye. Ti pjepeure ti acore Cohãcjũ cūri utãpũ wijiari acore sihnie tiahye tiquina. Tia utã yero saha ijiriquiro, tiquinare aco ohoriquiro Cristo ijiahye. ⁵ Tiquina sa wahariquina ijiepegũta apequna tiquina mehna cjẽna ñano yegũ ihñano Cohãcjũ pehe peyequina tiquina mehna bucuerahye. Sa yero tiquinare masa marienopũ yariagũ yeahye Cohãcjũ.

⁶ Sata yeahye tiquinare Cohãcjũ marine buhero taro. Sa yero tiquinare ihña cũ ñañene mari tutuaro cahmedatire Cohãcjũ sa yeahye tiquinare. ⁷ Sa yena “Cohãcjũ ijire”, tiquina niñe queoyere tiquina ño peoriro saha yeracãhña mũsa. Ti queoyere tiquina ño peorire Cohãcjũ yere tiquina ojoari pũpũ yahuro ohõ saha niahye: “Tiquina ihya duji sihni tuhasa, wahcãdũca, bose deco ye dũcahye wecũ queoyere ño peoye tehe”, ni ojoahye panopũre. ⁸ Came apequna Israe masa pehe numia mehna ñano yeahye. Tiquina yeriro saha yeraro cahmene marine. Tiquina ñano yeri bato ihcã decota tiquina veintitres mil masa yariaa wahahye. ⁹ Apequna Israe masa Cohãcjũre tiquina mehna usuagũ yeahye. “Marine buhiri dahresi”, niñe Cohãcjũre tuhtiahye. Sa tuhtiyere tiquirore usuagũ yeahye. Tiquina sa yeri buhiri Cohãcjũ añaa pari mehna bahque wejẽahye tiquinare tja. Sa yena tiquina yero saha Cristore yeracãhña mũsa. ¹⁰ Apequna Cohãcjũre unure tuhtigũ angel masare wejẽdiquiro tiquinare wejẽahye. Sa yena tiquina yero saha yeracãhña.

11 Sa wejē dutiahye tiquinare Cohācjū marine buhero taro. Mari pehe pihtiri deco panogā ijina ijiaja. Mari sa ijina ijigū panopu cjēna tiquina sa waharire Cohācjū ojoa dutiahye marine quehnoano buhero taro. 12 Sa yena “Quehnoana ijiaja, Cohācjū tiquiro ihñagū”, ni tahotu, quehnoano yeya msa “Ñañene yeari”, nina. 13 Mari ijipihtina ihcāquiro dūhsaro marieno ihquē tahari ñañene wacūaja. Sa wacūna ti ñañene ye duaja. Mari sa ye duepegūta Cohācjū marine yedohoducuriquiro ijire. Sa yero ti ñañe wacūñene mari bo masiedagū tiquiro pehe marine yedohorota. Sa yero ti ñañene mari ye duagū ihñano Cohācjū ti ñañene marine ye dueragū yerota. Tiquiro sa yegū ti ñañene ye duasi mari.

14 Sa yena yūhu cahña yūhure tahoya. “Cohācjū ijire”, tiquina niñe queoyere ne ño peoeracāhña. 15 Msa quehnoano masina ijigū msare yahuaja. Sa yena yūhu niato poto ijigū masiña msa basi. 16 Cristore tiquina ñehedi ñamine vinore tiquiro sihniato pano Cohācjūre “Quehnoare”, niahye. Tiquiro nidiro saha mari gūhu ti vinore sihniña Cohācjūre “Quehnoare”, nina, mari ye buhiri Cristo tiquiro yariarire masigū yena niaja. Tiquiro dii wijiarire masigū yena niaja. Sa yena tiquiro yequina mari ijiye gūhure masigū yena niaja mari. Sa yena pāre mari Cristo yequina nuhana mari ye ijiatire tiquiro pagu curusapu tiquiro yariarire masigū yena niaja. Sa yena tiquiro yequina mari ijiye tiye gūhure masigū yena niaja. 17 Sa yena peyequina masa ijiepenata ihcāria pāgāre ihyana, ijipihtina mari Cristo yequina ihcā curuata ijiaja. Sa yena peyequina ijiepenata ihcā curuata ijiaja.

18 Israe masa tiquina yerire wacūña msa: Tiquina wahiquire

wejēñe, ujā mso, ohoye, Cohācjūre ño peore. Sa tiquina ohori bato ihcā curuata tiquina ohoriquire ihyare. Sa ihyaye Cohācjū yequina tiquina ijiye tiyere masigū yere tiquina. 19 Ohō sahata nii niaja msare: “Cohācjū ijire”, tiquina niñe queoye dūhseati ijierare. Sa yero queoyere ño peo tiquina duhu peoye ihyaye pehe ihyo warota ijiro nine. Ti ihyaye marine sijoro saha wahagū yerare. 20 Ti ihyaye sijoro saha wahagū yerapegūta ti ihyayere ihyeraro cahmene. Ohō saha ijire ti. Cohācjūre cahmeñequina wahiquire wejē, ujā mso, Cohācjūre ño peoye niedare. Sa ye queoyere ño peoye watia pehere ño peore tiquina. Tiquina sa ño peoyequina ijigū tiquina mehna ihyana watino yequina yero saha yena niaga msa. Msa sa yegū pūritare ne cahmedaja. 21 Santa cenare mari yeri deco mari puhtoro Jesure wacūna tana sihniaja. Mari sa sihniña, watino ye pehere sihni masiedaja mari. Sa yena Jesure wacūna tana pāre ihyaja. Mari sa ihyana, watia ye pehere ihya masiedaja mari. 22 ¿Jesure msa mehna usuagū ye duajari msa? ¿Tiquiro yūhduoro tutuana ijajari msa? Ijierare msa. Sa yena quehnoano yeya msa.

Cohācjū cahmeñe dihitare yeya

23 Msa yeri ñañe ijierapegūta tire yena apequinare yedohoer-aboaga msa. Sa yena tire yena Jesure wacū tutua nemogū yer-aboaga msa apequinare. 24 Msa cahmeñe dihitare yeracāhña. Apequina pehere quehnoano yedohoya msa.

25-26 Ihyaye duaropure ihyayere dūna “¿Ahri ihyaye cohāmana queoye cahapu tiquina duhu peori ihyaye ijajari?” ni, sinituer-acāhña. “Ñañene yeari”, nina,

sinituboaga m̄sa. Sa ni sinitueracāhña. Ahri yehpa, ahri yehpap̄ ijiye gāh̄ Cohācjū ye ijire. Sa yena ti ihyayere “¿Ñañe ihyaye ijiajari?” niedacāhña.

²⁷ Jesure cahmeediquiro m̄sare ihya dutiro tiquiro pijiogū waha duana wahaya. Sa wahana m̄sare tiquiro duhu peoyere ihyaya. “¿Ahri ihyaye Cohācjū queoye cahap̄ tiquina duhu peori ihyaye ijiajari?” ni, sinitueracāhña. ²⁸ Sa yena apequiro Jesu yaquiro “Ahri ihyaye Cohācjū queoyere tiquina duhu peori ihyaye ijire”, m̄sare tiquiro ni yahugū ti ihyaye pūritare ihyeracāhña. M̄sare sa ni yahuriquiro “Ñañe ihyayere ihyare ahriquina”, m̄sare tiquiro ni tūhotueratire ihyeracāhña. ²⁹ Sa ihya dutieragū m̄sa pehere yedohogū tagū sa niedū. M̄sare ahrire yahuriquiro pehere yedohogū tagū sa ihya dutieraja. Tiquiro pehe m̄sare “Ñañe ihyayere ihyare ahriquina”, niboaga. “Sa niari”, nina ti ihyayere ihyeracāhña.

“Ihyeracāhña”, yuh̄ nigū ohō saha ni sinitu yūhtiboaga m̄sa yuh̄re: “¿Duhse ijiro boro apequirore ‘Sijoro saha wacūari’ ”, nina ihyeraboagari usā? ³⁰ “¿Ti queoyere ohori ihyayere usā ihyagū Cohācjū warore ‘Quehnoare’, usā niepegūta dahsero tire usā ihyari buhiri apequiro usāre yahu wajabogari?” ni sinitu yūhtiboaga m̄sa yuh̄re. ³¹ Ahri ijipihtiyere yahugū ohō saha nigū niaja m̄sare: Decoripe Cohācjū tiquiro dutiriro sahata bucueye mehna ihya, sihniaja, Cohācjūre masa tiquina ño peoatire. Sa yena ijipihtiyere quehnoano yeducuya Cohācjūre masa tiquina ño peoatire. ³² Ne judio masare, judio masa ijieyequinare, Cohācjū yequina gāh̄re ñano yegū yeracāhña m̄sa tiquinare. ³³ Ohō saha yeaja yuh̄

pehe. Masa ijipihtiyequinare yedoho duaja. Sa yegū yee ijia ti pehere pajiro tūhotueraja. Yuh̄ ñano yuh̄dugū quehnoanota. Masa pehere yedohoaja tiquinare pecap̄ wahaboriquinare Cohācjū tiquiro yuh̄dūoatire.

11

¹ Sa yena Cristore yuh̄ ihña cūriro sahata m̄sa gāh̄ yuh̄re ihña cūña.

Corinto cjēna cahmecoanop̄ n̄mia tiquina yeatire yahuahye

² M̄sare yuh̄ buhe turiarire wacū pehoñoh̄ti m̄sa. Sa wacūna m̄sare yuh̄ nidire yuh̄ ye dutiriro saha yeñoh̄ti m̄sa. Sa yena quehnoano yere m̄sa. ³ Sa yena m̄sa ijiepegūta ahri gāh̄re m̄sa masigū cahmeaja: Ijipihtiyequina am̄a tiquina p̄htoro, Cristo ijire. Sa yero tiquiro namono p̄htoro ijire ticoro man̄no. Sa yero Cristo p̄htoro tiquiro Pac̄ro ijire. ⁴ Cohācjūre sinidiquiro tiquiro dapure mohariquiro sinino, tiquiro basi p̄htoro ijiyere wijiario nine. Cohācjū yere yahuriquiro gāh̄ tiquiro dapure mohano, sata yero nine tiquiro gāh̄. ⁵ Sa yero ticoro dapure moheno Cohācjūre sinino, ticoro man̄no p̄htoro ijiyere wijiagū yero nine. Cohācjū yere yahuricoro gāh̄ ticoro dapure moheno, sata yero nine ticoro gāh̄. Sa yero ticoro poarire wahari p̄j mehna waha pehoricoro yero saha yere ticoro. ⁶ Ticoro dapure moha dueraro ticoro poarire se peho cā dutiahro. Ticoro sa yeri bato ticoro dapure b̄e tiro, ticoro mohaahdo ticoro dapure. ⁷ Um̄a pehe Cohācjū yero saha p̄htoa ijire. Sa ye Cohācjū quehnoariquiro, tutuariquiro tiquiro ijieye tiyere ihñore tiquina pehe. Sa ye tiquina dapure moheñequinata ijiahro. Numia pehe am̄a tiquina p̄htoa ijieye tiyere ihñore. Sa yeye tiquina

dapure mohaahdo. ⁸ Cohãcjũ umunore yero, numino ya pagũ cjê mehna umunore yerahye. Numino pehere yero, umunore ya pagũ cjê mehna yeahye ticorore. ⁹ Sa yero umunore yero, numino yaquiro ijiatiquirore yerahye. Numino pehere yero umuno yacoro ijaticorore yeahye Cohãcjũ ticorore. ¹⁰ Sa ye numia tiquina dapure mohaahdo angele gãhũ tiquina ihña bucueatire. Sa mohañe umua tiquina pũhtoa tiquina ijiyere ihñõñe nine. ¹¹⁻¹² Cohãcjũ numinore yero, umuno pagũ cjê mehna yeahye. Sata yojopũre umuno masa bajuaro, numino pagũpũ masa bajuare. Sa yero ijipihtiyequinare Cohãcjũ pehe yeahye. Sa yero umuno tiquiro iji mũhtaedagũ numino mariedaboaga. Sa ye numino ticoro mariedagũ umuno gãhũ mariedaboaga. Sa ye tiquina umua numia gãhũ tiquina basi cahme yedohore masa putiatire. Sa yero ijipihtiyequinare ijia-tiquinare bajumehnediquiro ijire Cohãcjũ.

¹³ ¿Musa basi dũhse ni tũhotuajari? ¿Numino ticoro dapu mohedico, Cohãcjũre ticoro sinigũ quehnoajari, mũsa tũhotugũ? Ne quehnoaedare.

¹⁴ Sa yero umuno poa nahmo cœoriquiro tiquiro ijigũ ñarĩne. Ijipihtiyequina masa tire masine.

¹⁵ Sa yero numino ticoro poa nahmo ticoro dapure mohari cahsero yero saha ijire. Sa yero ticoro poa nahmo cœoricoro ijiro quehnoaricoro bajure ticoro. Ti gãhũre ijipihtiyequina masine.

¹⁶ Mũsa mehna cjãno ahrire yũhũ yahurire tiquiro cahmedagũ, ohõ saha ni yahutja tiquirore: “Yũhũ ni yahuriro saha yeducuaja mari. Apequina Jesu yequina gãhũ sata yere tiquina gãhũ. Ûsã sa yerina ijigũ ihñagũ yũhũ ni yahuriro saha yero cahmene mũhũ gãhũre”, ni yahutja yũhũ yahurire cahmeed-

iquirore.

Santa cenare tiquina ihyari watoa dojomehneahye Corinto cjẽna

¹⁷ Yojopũre mũsare ahrire yahugũ tũhũ, “Quehnoano yena ijire”, niedaja yũhũ mũsare. Mũsa cahmecoana quehnoano yerare. Ñano yere mũsa. ¹⁸ Ohõ saha ni yahu mũhtaũtja mũsare: Mũsa cahmecoanopũ cahme dũse tutuana mũsa basi ihquẽ cururi tu wana niñõhti mũsa. Apequina tire yũhũre tiquina yahugũ “Potota ijiaga”, ni tũhotuaja yũhũ. ¹⁹ Sata yere mũsa. Sa yena ohõ saha ni tũhotumene mũsa. “Mari tu warina ijina, Jesu yequina waro ijiyequina pehere masinata mari. Sa yena marine tu waro cahmene”, ni tũhotumene mũsa. ²⁰ Mũsa basi sa cahme ihña tuhtina, mũsa ihcãnopũ cahmecoana ihyana quehnoano yerare. Potota Santa cena waro yena niedare. ²¹ Mũsa cahmecoana ihquẽquina mũsa sehsaro ihya mũhtana, apequina pehere uña ahbagũ yere. Sa ye sihni mũhtana quehea wahare. ²² ¿Mũsare mũsa ihyaye wũhũse mariedajari? ¿Mũsare mũsa sihniñe wũhũse mariedajari? Ti wũhũseputa ihya, sihniña. Yojopũre Cohãcjũ yequina tiquina cahmecoanore dojomehnena niaga mũsa. Sa yena apequina Jesu yequina pejecœoyequinare ihyaye marieñequina pehere mũsa pehe bũoro yũhdũgũ yere. ¿Dũhse ni yahugũtari yũhũ mũsare? “Quehnoano yerare mũsa”, ni aja yũhũ.

Santa cenare ihyarire yahuahye Pablo

(Mt 26.26-29; Mr 14.22-25; Lc 22.14-20)

²³ Mari pũhtoro Jesu tiquiro ihya bato tirire yahuri yũhũre. Sa tiquiro yahuri bato yũhũ pehe mũsare tire yahuu. Ti ohõ saha

ijire: Tiquirore ihña tuhtiyequinare Juda tiquiro ihñoati ñamine mari puhtoro Jesucristo pãre ne, ²⁴ Cohãcjũre “Quehnoare”, niñohti. Tiquiro sa nidi bato ti pãre nuha, tiquiro buheyequinare itiñohti. Sa itiro ohõ saha niñohti: “Ahrire ihyaya. Ahri yuhũ pagũ ijire. Mũsa ye ijatire yariãtja. Yuhũre mũsa wacũatire ahrire ihyaya”, niñohti Jesu mari puhtoro. ²⁵ Sa tiquina ihyari bato tiquiro sihnidi pare neno ohõ saha niñohti: “Mũsa ñaife yeyere cohãgũ tagũ yariãtja. Sa yegũ ye diire cohãgũtja. Cohãcjũ ‘Mũsare yuhũoutja’ tiquiro nidiro esagũ yuhũ yariaro mehna tiquiro nidiro sahata sohtori tirota. Ahri papũ pose tiyere sihnina, yuhũ dii wijiarire wacũnata. Ahrire sihnina, yuhũre mũsa wacũatire sihniña”, niñohti Jesu. ²⁶ Sa yena Santa cena cjẽ pãre mũsa ihyana, sihniñene sihnina, Jesu mari puhtoro mari ye buhirire tiquiro yariarire wacũ, ihñona nine mũsa. Sa ihñoducunata mũsa tee ahri yehpapũ tiquiro tojoa tato pano.

“Santa cenare ihya sihnina ohõ saha yeya”, ni yahuahye Pablo

²⁷ Santa cenare ihya, sihnina, Jesure ño peoro marieno cua pesaro yerana, tiquiro pagũre tiquiro dii cohãri gũhũre bujũpero saha yena niaja mari. Sa yena Jesure bujũpena niaja mari. Sa yeyequina buhiri tiyequina ijire. ²⁸ Sa yena mari yerire, mari ijiye tiyere quehnoano wacũuhna. Sa wacũna Santa cenare ihya, sihni masiaja mari. ²⁹ Mari puhtoro mari ye ijatire tiquiro pagũ yariarire wacũno marieno Santa cenare ihya, sihnina mari buhiri tinata. ³⁰ Ohõ saha dihita yere peyequina mũsa mehna cjẽna. Sa ye tiquina ihquẽquina tutueyequina, dohatiyequina wahare. Sa ye apequina tiquina sa yeri buhiri yariaa wahare. ³¹ Sa

ijiepegũta tiquina ihya, sihniñe tiquina yerire, tiquina ijiye tiyere quehnoano wacũñe, tiquina ñaife yerire duhu, ti buhirire buhiri tieraboaga. ³² Mari puhtoro pehe marine tuhtire, tiquina ye buhirire marine buhiri ti dutieraro. Apequina ñaifequina Jesure ño peoyequina buhiri tiatiquina dihita ijire. Tiquina yero saha marine buhiri tigũ cahmedare mari puhtoro.

³³ Sa yena yuhũ acaye, Santa cenare ihyana tana cahmecoana, mũsa basi cohteniña. ³⁴ Sa ye mũsa mehna cjẽna ujuã ahba, tiquina ye wuhũsepũ ihyarĩahdo. Sa yena Santa cenare ihyana tana cahmecoana, cua pesaro yerariquina ye buhiri buhiri tisi mũsa. Apee borore yahu duami mũsare. Came yuhũ basi esagũpũ mũsare yahutja tire.

12

Cohãcjũ yere mari yeatire cũno marine ye masigũ yere Espĩritu Santo

¹ Yuhũ acaye ahrire yahu duaja mũsare. Cohãcjũ yere mari yeatire cũno marine ijipihtinare ye masigũ yere Espĩritu Santo. Sa yegũ tire mũsa quehnoano masigũ cahmeaja.

² Jesu yequina ijieranina sijoro saha ijiye buheyere tuho nununa ijina, mũsa pehe “Cohãcjũ ijire”, tiquina niñe queoyere, yahuducueye queoyere ño peomedi. Tire masine mũsa. ³ Sa ijimedina mũsa ijigũ yojopũre ohõ saha ni yahutja mũsare. “Jesu ñano wahacũnahdo”, niñequina Cohãcjũ yaquiro Espĩritu Santo tutuaye mehna sa niñe niedare. Espĩritu Santo warore cuoerare tiquina. Sa ijiye “Jesu mari puhtoro ijire”, niñequina pehe Espĩritu Santo tutuaye mehna sa niñequina ijire tiquina.

⁴ Cohãcjũ yere ye masiñe peye ijire. Ti sa ijiepegũta marine ye

masigū yeriquiro pehe ihcāquirola ijire. Tiquiro Espiritu Santo ijire. ⁵ Sa ye apequinare yedohoye gūhū peye ijire. Ti sa ijiepegāta mari pahtoro Jesu pehe marine yedoho dutiriquiro ihcāquirola ijire. ⁶ Sa ye Cohācjū yere yeye gūhū peye ijire. Ti sa ijiepegāta Cohācjū ijiphtina marine ye masigū yeriquiro pehe ihcāquirola ijire. ⁷ Marine Jesu yequinare Espiritu Santo yedohoro, Cohācjū tutuayere ihñono nine. Ohō sahata yedohore tiquiro Jesu yequinare ijiphtiyequinare mari quehnoano yeatire. ⁸ Ihquēquinare quehnoano masi yahugū yere Espiritu Santo. Sa yero apequinare Cohācjū yere quehnoano buhegū yere tiquiro. ⁹ Sa yero apequinare Cohācjūre quehnoano wacū tutuagū yere tiquiro. Sa yero apequinare Cohācjū tutuayere ohore tiquiro. Ti tutuaye mehna tiquina pehe dohatiyequinare yahdugū yere. Cristore tiquina wacū tutuagū ihñano tiquirore tiquina sinidiro sahata yere tiquiro. Espiritu Santo ihcāquirola ijiriquiro ti tutuayere ohore. ¹⁰ Sa yero apequinare Cohācjū tutuaye mehna ihñone ye masigū yere tiquiro. Sa yero apequinare Cohācjū yere quehnoano yahu masigū yere tiquiro tiquinare. Sa yero apequina Jesu yequinare buheyere quehnoano bese masigū yere tiquiro. Sa masiñe watino ye buheye ti ijigū masine tiquina. Espiritu Santo waro ye buheye gūhare ti ijigū masine tiquina. Sa yero apequinare tūhomehneñe yahuducuyere yahuducu masigū yere tiquiro. Sa yero tūhomehneñe yahuducuyere yahuducyequina tiquina nino sahata yahu yahdwo masigū yere tiquiro apequinare. ¹¹ Espiritu Santo ihcāquirola ijiriquiro tiquiro cahmeno saha marine ijiphtinare yahū yahuriro

saha ye masigū yere. Ihquēquinare sijoro saha ye masigū yere. Apequina gūhare sijoro saha ye masigū yere.

Cristo yequina ijina ihcā curuata ijiaja mari

¹² Ohō sahata ijire ahri mehna mari queoye mehna yahugū: Mari pagū ihcā pagū ijiepegāta omocari, caperi, dahpocāri, cahmo ti pūrita peye ijire mari pagūpe ijie. Sata ijiaja mari Cristo yequina gūhū. Cristo yequina tiquiro pagū yero saha ihcā curuata ijiaja. ¹³ Sa yena Cristo yequina ijina, tiquiro pagū yero saha ihcā curuata ijiaja mari. Judio masa, judio masa ijiena, cahacjana, cahacjana ijiena peye cururi mari ijiepenata ihcāquirola ijiriquiro tiquiro pagū yero saha ihcā curuata ijiaja mari. Espiritu Santo ihcāquirola ijiriquiro tiquiro tutuaye mehna wame yenohrina ijiaja mari ijiphtina. Sa yena ihcāquirola Espiritu Santore caoaja mari, Cristo ya curua cjāna ijina.

¹⁴ Mari pagū ihcā pagū ijiepegāta omocari, caperi, dahpocāri, cahmo, ti mari pagūpe ijie peye ijire. ¹⁵ Mūhū dahpocā yahuducuri dahpocā ijiro, ohō saha niboaga mūhare sijoro saha ni duaro: “Omoca ijieraja yahū. Sa yegū pagū cjā dahpocā ijieraja yahū”, niboaga. Mūhū dahpocā sa nieperota pagū cjā dahpocā ijirota nine. ¹⁶ Mūhū cahmono yahuducuri cahmono ijiro, ohō saha niboaga mūhare sijoro saha ni duaro: “Capea ijieraja yahū. Sa yegū pagū cjā cahmono ijieraja yahū”, niboaga. Mūhū cahmono sa nieperota pagū cjā cahmono ijirota nine. ¹⁷ ¿Mari pagū capea dihita ijigū dahse tūhoboagari mari? Basioerare. ¿Sa yena mari pagū cahmono dihita ijigū dahse wijiboagari mari? Basioerare. ¹⁸ Sa ijierare mari pagū. Ohō saha ijire.

Mari pagurū ijiyere Cohācjū tiquiro cahmeno saha cūahye mari pagure. ¹⁹ ¿Mari pagurū ijiye mariedagū dūhse wahaboagari mari pagurū? ¿Mari omocari dihita ijigū dūhse wahaboagari mari pagurū? ²⁰ Mari pagurū ohō saha ijire: Ihcā pagurū ijiepegūta mari pagurū ijiye peye ijire.

²¹ “Mūhū yedohogū cahmedaja”, mūhū capea ni masiedare mūhū omocare. Sa yero mūhū dapu mūhū dahpocārine “Mūsa yedohogū cahmedaja”, ni masiedare. ²² Apeye mari pagurū ijiyere “Ihyo iji cjūne ijire”, mari niñe pehere pototi cahmeaja mari apeye mari pagurū ijiye yūhdūoro. ²³ Sa yena mari pagurū ijiyere “Ihyo ijiye ijire”, mari ni tūhotuepenata tire mari pagurū ijiyere cahmeaja mari, mari quehnoano ijiato saha. Sa yena apeye mari pagurū ijiyere mari bue tiyere suhti mehna nūoaja mari. ²⁴ Apeye mari pagurū ijiyere nūoedaja mari. Ti pūritare ihñona, bue tieraja. Ohō saha iji dutiahye Cohācjū mari pagurū. Mari ihñoeñene mari pagurū ijiyere mari quehnoano ño peoye mehna cūoaja. Sata ye dutiahye Cohācjū. ²⁵ Sa ye mari pagurū ijiye ti basi cahme yedohore. ²⁶ Sa ye mari caperi ñano yūhdūgū apeye mari pagurū ijiye gūhū ñano yūhdūre. Sa ye mari caperi quehnoañe wahagū mari pagurū ijiye gūhū quehnoano tūhoture.

²⁷ Sa yegū ohō saha nigū ni-aja mū sare: Mūsa pehe Cristo pagurū yero saha ihcā curuata ijire. Sa yena ijipihtina mūsa tiquiro pagurū ijiye yero saha tiquiro yequina ijire. ²⁸ Sa yero Jesu yequinare mari yedohotire cūahye Cohācjū marine. Ohō saha cūahye tiquiro marine. Ihquēquinare marine buhe dutiro Jesu cū mūhtarinare cūahye

tiquiro. Apequinare tiquiro yere yahu mūhtarinquinare cūahye. Apequinare masare buheatiquinare, apequinare Cohācjū tutuaye mehna yeatiquinare, apequinare dohatieyequinare yūhdūoatiquinare, apequinare masare yedohotiquinare, apequinare masa pūhtoā ijiatiquinare, apequinare tūhomehneñe yahuducuyere yahuducuatiquinare cūahye Cohācjū marine. ²⁹ Sa tiquiro cūgū ijipihtina ihcāno saha tiquiro cūrina ijieraja mari. Apequina Cohācjū buhe dutiro tiquiro cūriquina ijierare. Sa yena apequina Cohācjū yere yahu mūhtarina ijieraja mari. Sa yena apequina masare buhena ijieraja mari. Sa yena apequina Cohācjū tutuaye mehna yeatina ijieraja mari. ³⁰ Sa ye apequina dohatieyequinare yūhdūoatiquina ijierare. Sa yena apequina tūhomehneñe yahuducuyere yahuducuna ijieraja mari. Sa yena apequina tūhomehneñe yahuducuyere yahu yūhdūoana ijieraja mari. Sa yero maripe mari yeatire cūahye tiquiro. ³¹ Sa yena Cohācjū yere ye masi duana quehnoa yūhdūye pehere tutuaro cahmeña mūsa. Sa yegū ijipihtie yūhū nidi yūhdūoro mūsa cahmeatire yojopure yahutja mū sare yūhū.

13

Apequinare quehnoano tiquina cahñatire yahuahye Pablo

¹ Masa ye yahuducuyere yahuducu masiepenata, angele ye yahuducuyere yahuducu masiepenata apequinare cahñedana, dūhseanaja ijieraja mari. Sa ye mari yahuducuyere gūhū dūhseati ijierare. Sa yena apequinare cahñedana mari yahuducuna, ihyo waro yahuducuna niaja. ² Cohācjū yere quehnoano yahu masiepenata, masa tiquina masiedarire

Cohācjū yere tiquina buheri gūhare masi pehoepenata apequinare cahiedana dūhseanaja ijieraja mari. “Ahdū cūnū ape siepū wahaahro”, mari nigū “Potota mari nidiro sahata Cohācjū yerota”, ni mari tūhotugū sata yerota. Cohācjūre sa ni tūhotuyequina ijiepenata apequinare cahiedana ne dūhseanaja ijieraja mari. ³ Ijipihtiyere pejecūoyequinare mari ohopegūta apequinare mari cahiedagū ti mari oho dūhseati ijierare. Sa yena Cohācjū yere yena tana mari pagūre mari ūjūa mūo dutiepegūta apequinare mari cahiedagū ti mari sa yeye dūhseati ijierare.

⁴ Usueraja apequinare cahīna. Tiqinare cahīna quehnoano yeaja tiqinare. Sa yena apequinare cahīna tiqinare coeraja. Sa yena mari cahīniquiro mehna ijina “Mūhū yūhdūoro ijigū ijiaja”, niedaja mari. ⁵ Apequinare cahīna “Mūsare masi yūhdūcaja”, niedaja mari tiqinare. Sa yena apequinare cahīna tiqinare űo peoro mehna yeaja mari. Apequinare cahīna “Ūsā cahmeno saha yeaja. Mūsa cahmeno saha yeraja”, niedaja mari. Sa yena tiqinare cahīna duita usueraja mari tiquina mehna. Sa yena apequinare cahīna marine űano tiquina yegū gūhare tiquina mehna sa usuaducueraja mari. ⁶ Apequinare cahīna űañene tiquina yegū ihñana bucueraja mari. Quehnoañe pehere tiquina yegū ihñana tutuaro bucueaja. ⁷ Apequinare cahīna tiquina ye buhiri űano yūhdūepenata tiqinare sa cahīducuaaja mari. Apequinare cahīna apequina pehe mari cahīñequinare tiquina yahu wajagū tūhoepenata tire tūho dueraja. Mari cahīñequinare apequina yahugū quehnoañe dihitare tūho duaja mari. Apequinare cahīna “Tiquina űañene yesi”, ni tūhotuaja

mari tiqinare. Apequinare cahīna űano yūhdūepenata tiqinare cahī duhusi mari.

⁸ Ti cahme cahīne ne pihtisi. Cohācjū yere yahuye pehe came pihtia waharota. Tūhomehneñe yahuducuye gūhū came pihtia waharota. Cohācjū yere masa tiquina buheri gūhū came pihtia waharota. Apequinare cahme cahīne pehe ne pihtisi. ⁹ Yojoṗure Cohācjū yere mari masi peho masiedaja. Sa yena tiquiro yere yahuna mari yahu peho masiedaja. Mari masi pehoati dūhsare. ¹⁰ Sa yena Cristo űañe marieniquiro tiquiro tojoa wihiri bato mari masi pehonata. Sa yena űañe mariena ijinata. Ti ṗjere masi pehonata. “Masiedaja”, ni nemosi.

¹¹ Mari masi pehoati ohō saha ijire: Nijigū ijigū nijinogā yero saha yahuducumi yūhū. Sa yegū nijinogā yero saha tūhotumi. Sa yegū bucū wahagū nijinogā tiquiro yeriro saha duhu cāhū. Sata mari yojoṗure “Masi pehoeraja”, niepenata cameṗure masi pehonata. ¹² Eōno quehnoano wūhdoa bājuero saha yojoṗure quehnoano masi pehoeraniaja mari. Came apequirore quehnoano mari ihñā masino saha mari masi pehonata. Yojoṗure mari masi pehoati marine dūhsare. Cohācjū marine tiquiro quehnoano masi pehoriro saha came mari gūhū quehnoano masi pehonata. ¹³ Sa ye ihtiarore mari ye masiaja yojoṗure. Cohācjūre wacū tutua masiaja. Sa yena marine tiquiro yūhdūoatire masina, mari quehnoano cohte masiaja. Sa yena apequinare cahme cahī masiaja. Ahri ihtiaro ijire pototi mari yeati. Sa yena apequinare cahme cahīna, ahri ṗuaro yūhdūoro yena niaja. Wacū tutuaye, tiquiro yūhdūoatire cohteye yūhdūoro ijire cahme cahīne pehe.

14

T̄homehneñe yahuducuyere yahuahye Pablo

¹ Sa yena apequinare cahme cahña m̄sa. Sa ye Cohãcjũ yere m̄sa quehnoano ye masiatire cahmeña m̄sa. Cohãcjũ yere m̄sa yahuati p̄ritare tutuaro cahmeña m̄sa. ² T̄homehneñe yahuducuyere yahuducuriq̄iro Cohãcjũ mehna dihita yahuducure. Sa ni yahuducuro masa mehna yahuducuro niedare tiq̄iro. T̄iq̄iro sa ni yahuducugũ t̄hoye masa pehe ne t̄hoerare tiq̄irore. Masa tiquina masiedarire Esp̄ritu Santo tutuaye mehna yahuducuro nine tiq̄iro. ³ Cohãcjũ yere yahuriq̄iro pehe masa pehere yahure. Sa yahuro tiq̄iro masare yedohoro nine. Sa yero tiquinare buhero nine tiq̄iro. Sa yero tiquina ñano yãhdagũ tiquinare bucuegũ yere. ⁴ T̄homehneñe yahuducuyere yahuducuriq̄iro ihcãquiota buhere. Apequinare buherare. Cohãcjũ yere yahuriq̄iro pehe apequinare Jesu yequinare buhero, yedohore tiq̄iro.

⁵ T̄homehneñe yahuducuyere ijipihtina m̄sa yahuducugũ quehnoaboaga, yũhũ t̄hotugũ. Sa ijiepegũta Cohãcjũ yere m̄sa yahugũ p̄ritare tutuaro cahmeaja. Cohãcjũ yere yahuriq̄iro pehe t̄homehneñe yahuducuyere yahuducuriq̄iro yãhd̄oro apequinare yedohore. Sa ijiepegũta t̄homehneñe yahuducuriq̄iro tiq̄iro yahuducuyere apeq̄iro yahu yãhd̄ogũ tiquina pehe pototi apequinare yedohore. T̄iq̄iro yahuducuyere yahu yãhd̄oriq̄iro ijiro tiq̄iro pehe apequinare Jesu yequinare buhero nine. ⁶ T̄homehneñe yahuducuyere m̄sa mehna yũhũ yahuducugũ, apeq̄iro m̄sare tiq̄iro yahu yãhd̄oeragũ m̄sare yedohoeraboaga yũhũ.

Sa yegũ Cohãcjũ yahure tiq̄iro yahurire yahugũ, tiq̄iro yere yũhũ masiñene yahugũ, apeyere tiq̄iro yere yahugũ m̄sare yedohogũ niaja. Tire m̄sa t̄hoatire m̄sare buhegũ m̄sare quehnoano yedohogũ niaja yũhũ.

⁷ T̄homehneñene yahuducuriq̄iro tiq̄iro yahuducuyere basa wamoa yero saha ijire. Carisure putina, arpare b̄na put̄ena tire mari queoro yeragũ ti basayere apequinare masino basioerare. ⁸ Sa yero cornetare putiriq̄iro surara ijiro tiquina cahme wej̄ato panore queoro tiq̄iro putieragũ apequina surara pehe tiquina cahme wej̄atire masisi. Sa ye tiquina cahme wej̄ato pano tiquina wej̄atire wamoare quehnoyuriquina ijisi tiquina. ⁹ Sata m̄sa gũhũ t̄homehneñe yahuducuyere m̄sa yahuducugũ t̄hoye, yahu yãhd̄oriq̄iro mariedagũ apequina tire ne masisi. Tiquina sa masiedagũ m̄sa yahuducuyere d̄hseati ijierare. ¹⁰ Ahri yehpapũ peye yahuducuyere ijiaga. Sa ye tire yahuducuyequina tiquina basi sa yahuducuyere quehnoano t̄hore.

¹¹ Ihcãquiore ye yahuducuyere yũhũ t̄hoeragũ ihñano tire yahuducuriq̄iro pehe “Ape dihta cjãno ijire”, ni t̄hoturota yãhare. Sa yegũ yũhũ gũhũ sata ni t̄hotutja tiq̄irore. ¹² Sata ijiri m̄sa gũhũ t̄homehneñene yahuducuna. Esp̄ritu Santo tiq̄iro tutuaye mehna tutuaro ye duamene m̄sa. T̄iq̄iro tutuaye mehna sa ye duana apequina Jesu yequinare m̄sa buheatire tiquinare m̄sa yedohoatire tutuaro cahmeña m̄sa.

¹³ Sa yero t̄homehneñene yahuducuriq̄iro tiq̄iro yahuducurire tiq̄iro quehnoano yahu yãhd̄oatire Cohãcjũre siniahd̄o tiq̄iro. ¹⁴ T̄homehneñe yahuducuyere mehna Cohãcjũre sinigũ yũhũ

tahotuye mehna sinigũ niája. Sa sinigũ yũhũ tahotuyere apequinare quehnoano yahueraja. Sa yegũ apequinare yedohoeraja yũhũ.

¹⁵ Ahrire masina, ohõ saha yenata mari: Espiritu Santo tutuaye mehna tahomehneñe yahuducuye mehna Cohãcjũre sininata. Sa yena ape decopũ quehnoano masi tahotu, apequina tiquina quehnoano tãhoatire tiquina ye mehna Cohãcjũre sinina, ti gãhũre sininata tja. Espiritu Santo tutuaye mehna tahomehneñe yahuducuye mehna Cohãcjũ yere basanata. Sa yena ape deco quehnoano masi tahotu, apequina tiquina quehnoano tãhoatire tiquina ye mehna Cohãcjũ yere basana, ti gãhũre basanata tja.

¹⁶ Mari sa yeragũ tahomehneñe yahuducuye mehna Espiritu Santo tutuaye mehna Cohãcjũre “Quehnoariquiro, tutuariquiro ijire”, mari niepegũta apequina pehe ne tãhoerare. Sa tãhoeraye “Poto ijire”, ni masiedare.

¹⁷ Tahomehneñe yahuducuye mehna Cohãcjũre “Quehnoare”, ni masiaja mari. Mari sa niñe quehnoañe ijiepegũta tire yahu yũhdũoerana apequinare buheraja mari. Sa yena tiquinare yedohoeraja mari. ¹⁸ Ijipihtina mũsa yũhdũoro yũhũ pehe tahomehneñene yahuducuaaja. Sa yegũ Cohãcjũ yũhũre sa yahuducu masigũ tiquiro yegũ tiquirore “Quehnoare”, niája yũhũ. ¹⁹ Sa yahuducugũ yũhũ ijiepegũta Jesu yequina cahme-coañequina watoa yũhũ ijigũ, tahomehneñe yahuducuye mehna peye yũhũ yahuepegũta dũhseati ijierare. Ti yũhdũoro masa tiquina quehnoano tãhoati pehe meheñegã yũhũ yahuepegũta quehnoarĩne, yũhũ tahotugũ.

²⁰ Yũhũ acaye, macanagã tãho masieñequinagã tiquina ijiro saha

ijieracãhña mũsa. Sa yena coã bajuayequina ñañe yeyere tiquina masieno saha ijija mũsa gãhũ. Sa yena bũcũna tãho masieñequina tiquina ijiro saha ijija mũsa. ²¹ Cohãcjũ yere tiquina ojoari pũpũ ohõ saha nine: “Tahomehneñene yahuducuyequinare ahriquina masare yeere yahu dutiitja. Sa yegũ ape dihta cjẽnare yeere yahu dutiitja ahriquina masare. Yũhũ sa yahu dutiepegũta ahriquina yũhũ yahuyere tãhosi’, nine Cohãcjũ mari pũtoro”, nine Cohãcjũ yere tiquina ojoari pũpũ. ²² Sa ye tahomehneñene yahuducuye Jesu yequinare Cohãcjũ tutuayere masigũ yeati ijierare. Ti yahuducuye Jesure cahmeeñequina pehere Cohãcjũ tutuayere masigũ yeati ijire. Sa yero Cohãcjũ yere yahuyere Jesure cahmeeñequinare Cohãcjũ tutuayere masigũ yeati ijierare. Cohãcjũ yere yahuyere Jesu yequina pehere Cohãcjũ tutuayere masigũ yeati ijire.

²³ Sa ye ijipihtina mũsa Jesu yequina cahmecoagũ tahomehneñene mũsa yahuducugũ tire masieñequina, apequina Jesure cahmeeñequina gãhũ sajã, tãhoboaga. Sa tãhoye “Tiquina tãho masieñequina ijire”, niboaga mũsare tiquina. ²⁴ Ijipihtina mũsa Cohãcjũ yere mũsa yahugũ pũrita tire masiedariquiro, Jesure cahmedariquiro sajã dũca tãhoro, tiquiro ñañe yerire masiboaga tiquiro. Sa yero tiquiro ñañe yerire bũjũta witiboaga tiquiro. ²⁵ Sa yero poto tiquiro ijiye tiyere tiquiro tahotuye gãhũre masiboaga tiquiro. Sa yero Cohãcjũ poto dũsepe curi mehna quehe saro, tiquirore ño peorota. Sa yero “Cohãcjũ potota mũsa mehna ijire”, ninota tiquiro mũsare.

Mũsa cahmecoana quehnoano yeya dojomehnenno marieno

²⁶ Sa yegũ yahũ acaye, m̄sare ahrire nigũ niaja: Cahmecoana ihquẽquina m̄sa mehna cjẽna Cohãcjũ yere basa duare. Sa yena apequina buhe duare. Sa yena apequina Cohãcjũ m̄sare tiqũiro buherire yahu duare m̄sa. Sa yena apequina t̄homehneñe mehna yahuducu duare m̄sa. Sa yena m̄sa apequina ti yahuducuyere yahu yãhdũo duare m̄sa. Ti ijipihiyere sa yena apequina m̄sare t̄hoyequina tiquina quehnoano masiatire tire yeya.

²⁷ Sa yena t̄homehneñe mehna m̄sa yahuducuna p̄ana, ihtiana topenata yahuducuya m̄sa. Sa yena comesa yahuducuya. M̄sa sa yahuducugũ, ihcãquiro m̄sa mehna cjãno m̄sa yahuducurire apequinare yahu yãhdũoahro.

²⁸ M̄sa yahuducuyere yahu yãhdũoriquiro mariedagũ m̄sa cahmecoana ijipihitina m̄sa t̄homehneñene yahuducu duana yahuducueracãhña. Sa yena masa marienopũ Cohãcjũ mehna yahuducuya m̄sa. ²⁹ Sa yena Cohãcjũ yere yahu duana p̄ana, ihtiana topenata yahuya m̄sa. M̄sa sa yahugũ apequina m̄sare t̄hoyequina m̄sa yahurire quehnoano t̄ho n̄n̄hãhdo. ³⁰ Sa yero Espĩritu Santo Cohãcjũ yere apequirore topũ dujiriquirore yahu d̄caboaga. Tiquiro yahu d̄cagã tiquirore t̄horiquiro gũhũ Jesu yequinare yahu duaboaga. Sa yero tiqũiro pano yahuriquiro pehe dihta mariahdo. ³¹ Sa yena ijipihitina m̄sa Cohãcjũ yere yahuna, comesa yahuya m̄sa ijipihiyequina apequina tiquina quehnoano t̄hoatire, tiquina quehnoano buceatire. ³² Sa yena Cohãcjũ yere yahuna ijina, quehnoano t̄ho masi, quehnoano t̄hotu yahuducuya.

³³ Cohãcjũ tiqũiro yequina tiquina cahmecoanopũ tiquina

cahme yahuducugũ, suhri gũ cahmedare tiqũiro. Dojomehno marieno tiquina quehnoano ijigũ cahmene tiqũiro. Ijipihitropũ Jesu yequina cahmecoa, ohõ saha yere tiquina. ³⁴ Tiquina cahmecoanopũ numiare yahuducu dutierare. Tiquina numiare mari pehe yahuducu dutieraja. Cohãcjũ ojoari pũpũ tiqũiro ni-diro sahata numiare m̄m̄are quehnoano yãhtiyequina numia ijiro cahmene. Sa ye cahmecoanopũ numia masare yahuducueracãhdo. ³⁵ Jesu yequina tiquina cahmecoanopũ numia tiquina yahuducugũ ñarĩne. Sa yero apee borore masi duaro numino ticoro ya wãhũp̄ata ticoro man̄nore sinituahro.

³⁶ Ahri yahũ yahuatire quehnoano masiña m̄sa. Cohãcjũ yere yahu mahtana ijierare m̄sa. Sa yena tiqũiro yere t̄horina m̄sa dihita ijierare. Apequina gũhũ tiqũiro ye buheyere c̄ore. ³⁷ M̄sa mehna cjãno “Yahũ Cohãcjũ yere yahugũ ijiaja”, ni t̄hoturiquiro ijiro ahri m̄sare yahũ ojoari Cohãcjũ dutiye ijigũ masiahdo tiqũiro. Sa yero apequiro “Espĩritu Santo tutuaye mehna ye masiaja”, ni t̄hoturiquiro ijiro tiqũiro gũhũ ahri yahũ ojoari Cohãcjũ dutiye ijigũ masiahdo tiqũiro. ³⁸ Tire tiqũiro masi d̄ueragũ yahũ ojoarire “Poto ijierare”, tiqũiro nigũ tiquirore duhu cãhña. T̄hoeracãhña tiquirore.

³⁹ Sa yena yahũ acaye, Cohãcjũ yere yahuna m̄sa ijiatire tutuaro cahmeña m̄sa. Sa yena m̄sa mehna cjẽna m̄sa cahmecoanopũ t̄homehneñe yahuducuyere mehna tiquina yahu duagũ “Sa yahuducueracãhña”, niedacãhña tiquinare. ⁴⁰ Sa cahmecoana quehnoano, cahme dojomehno marieno yeya m̄sa.

Quehnoañe buheyere tiquiro yahurire yahuahye Pablo

¹Yojoṗure yuḥu acaye, quehnoañe buheyere mṣare yuḥu yahurire mṣare wacūgū ye duaja. Ti buheyere quehnoano cahmene mṣa. Sa cahmena ti buheyere ne cohāedare mṣa. ²Mṣa sa cahmegū tire mṣa cohāedagū Cristo mṣare pecapṁ wahaborinare yuḥduo tuhasari. Mṣa sa tuhori bato Cristo yere mṣa duhu cāgū ti mṣa tuhori dahseati ijierare.

³Ohō saha ni yahu maḥtautja mṣare. Ahri ihyo waro ijierare. Mṣare buhegū yuḥure Cristo tiquiro yahurire mṣare ohō saha ni yahuu: Cohācǰū yere tiquina ojoariro sahata mari ñañe buhirire Cristo yariahye. ⁴Sa yero Cohācǰū yere tiquina ojoariro sahata Cristo tiquiro yariari bato apequina tiquirore tiquina yagū ihtia deco wahaboro tiquiro pehe masa wijiahye. ⁵Tiquiro sa masa wijari bato Pedrore bajuahye. Tiquiro sa bajuari bato apequinare tiquiro buheyequinare bajuahye tja. ⁶Tiquiro sa bajuari bato ihcā tahata quinientos bui ijiyequinare tiquiro yequinare bajuahye tja. Ihquēquina tiquirore ihñariquina mṁna yojoṗure yariariquina mṁna ijire. Tiquina sa ijiepegūta peyequina tiquina mehna cǰēna yojoṗure ijinine. ⁷Came Cristo Santiagore bajuahye tja. Sa tiquiro bajuari bato ijipihtiyequina buhe duti tiquiro cūriquinare bajuahye tja.

⁸Ijipihtiyequina apequinare tiquiro bajuari bato yuḥu gūḥure bajuari tja. Nijinogā queoro masa bajueriquirogā tiquiro masa bajua nṁnu tāriro saha yuḥu gūḥu Jesure wacū tutua nṁnu tārigū ijiaja. Yuḥu sa ijirigū ijigū tiquina batopṁ bajuari Jesu yuḥu gūḥure tja. Yuḥureta tiquiro bajua bato tiri. ⁹Panopure Jesu yequinare ñano

yemi. Sa yerigū ijigū apequina Jesu cūriquina ijipihtiyequina tiquina docapṁ waro ijiaja yuḥu. Sa yegū yojoṗure gūḥure Jesu buhe duti tiquiro cūnohborigū ijierami yuḥu. ¹⁰Sa ijiepegūta Cohācǰū yuḥure cahīgū yojoṗure Jesu cūrigū ijiaja yuḥu. Sa yegū yuḥure tiquiro cahīgū yojoṗure tiquiro cahmeñene ye pehoaja. Sa yegū yuḥure cahīgū tiquiro yaquiro sa iji cāgū niedaja. Ijipihtiyequina apequina tiquiro cūriquina yuḥduoro yuḥu pehe tutuaro buhei. Sa buhegū yuḥu esa tuharo buherṁ. Cohācǰū yuḥure cahīno yuḥure yedohori. ¹¹Ṙsā buheye pehe ihyo waro ijierare. Yuḥu mṣare quehnoañe buheyere buherigū yuḥu ijigū apequina yuḥduoro yuḥure mṣa ño peogū ihyo waro ijiro nine. Tiquina gūḥu mṣare buheyequina ijigū apequina yuḥduoro tiquina gūḥure mṣa ño peogū ihyo waro ijiro nine. Ṙsā pehe ahrire buhena ijiepenata ihyo ijina ijiaja. Ṙsā buheye pehe ihyo waro ijierare. Sa yena mṣa pehe ahri buheyere quehnoano tuhare.

Yariariquina mṁna tiquina masa wijiarire yahuahye Pablo

¹²Cristo yariari bato tiquiro masa wijiarire ṁsā buhepegūta “Yariariquina mṁna ne masa wijiaerare”, nine mṣa mehna cǰēna ihquēquina. ¿Dahse ijiro boro sa nijari tiquina tire? ¹³Sa yero yariariquina mṁna masa wijiaeragū Cristo gūḥu ne masa wijiaeraboya. ¹⁴Sa ye Cristo masa wijiaeragū quehnoañe buheyere ṁsā yahuri ne dahseati ijieraboya. Tiquiro masa wijiaeragū tiquirore mṣa wacū tutuaye gūḥu dahseati ijieraboya. ¹⁵Masa wijiaro mariedagū ṁsā pehe Cohācǰū yere ni mehona niboya. Yariariquina mṁna tiquina masa wijiaeragū Cohācǰū pehe Cristore masa wijiaeragū yeraboya. Tiquiro sa yeragū

“Cohãcjũ Cristore masa wijiagũ yeahye”, nina ni mehona ijiaboaga usã. ¹⁶ Yariariquina mũnare Cohãcjũ masoedaro, Cristo gãhũre tiquireo masoedaboya. ¹⁷ Sa yero Cristo masa wijiærægũ tiquireore mũsa wacũ tutuaye dahseati ijieraboaga. Sa yena mũsa ñãñe buhiri, buhiri tiboaga mũsa. ¹⁸ Masa wijiaro mariedagũ Cristo yequina mũna yaria mũhtariquina pecapũ waha tuhasaboya. ¹⁹ Cristore mari wacũ tutuari bato mari yariana masa wija masiedana ijipihitiyequina apequina masa yãhdũro pejecũna ijiaboaga mari pehe. Sa yena tiquireore ihyo warota wacũ tutuana niboaga mari.

²⁰ Potota Cohãcjũ Cristore masa wijiagũ yeahye. Cristo masa wijiari bato mari gãhũ yarianapũ masa wijiãnata ijiãja. Tiquireo sa masa wijiaro, marine siho masa wija mũhtariquireo ijire. ²¹ Ohõ saha ijire ahri: Adãn mehna masa yaria dũcahye. Ohõ saha apequireo mehna yariariquina mũna masa wijiãeta. ²² Adãn yequina iji nũnũ tãnapũ mari ijipihitiã yarianata. Sata Cristo yequina mari ijigũ mari yariari bato marine masa wijiagũ yerota Cohãcjũ. ²³ Ihquẽ cururi masare tiquina queori pje ijigũ masa wijiãeta. Cristo marine iji mũhtariquireo masa wija mũhtahye. Came ahri yehpapũ tiquireo tojoa tagũ tiquireo yequina gãhũ masa wijiãeta. ²⁴ Ti pjeta pihtiri deco ijirota. Sa yero ijipihitiyequina watãre, watã pũhtoare, tutuayequinare cohãno, Cristo yãhdũdũcarota. Tiquireo sa yeri bato ijipihitiyequina pũhtoro tiquireo ijirire Cristo wijiaro, Cohãcjũre mari Pacũre comesarota. ²⁵ Tiquireo wijiato pano mari Pacũ Cristore ihña tuhtiyequinare tiquireo yãhdũdũca pehoato pano Cristo pũrita ijipihitiyequina pũhtoro

ijirota. Sa ijiriquirota ijiro cahmene tiquireore. ²⁶ Tiquireore ihña tuhtiyequinare tiquireo yãhdũdũcari bato, yariamedi gãhũre cohã cãnota. Yariaye pihtia waharota. ²⁷ Ijipihitiyequina bui dutiatiquirore cũahye Cohãcjũ Cristore. Ijipihitiyere cũoriquireo gãhũre cũahye tiquireore. Sata nine Cohãcjũ yere tiquina ojoari pũpũ. Cohãcjũ pehe tiquireore cũriquireo ijire. Sa yero “Ijipihitiyequina bui dutiatiquirore cũahye tiquireore”, nino, “Cohãcjũ bui dutiriquiro ijire tiquireo”, nino niedahye tiquireo yere tiquina ojoari pũpũ. ²⁸ Ijipihitiyequina bui dutiriquiro Cristo Cohãcjũ macũno ijigũ Cohãcjũ tiquireore cũriquireo pehe tiquireo macũno bui dutiriquiro ijirota. Sa yero Cohãcjũ pehe ijipihitiyequina pũhtoro waro ijire. Ijipihitiyere cũoriquireo gãhũ ijire.

²⁹ ¿Masa wijiaro mariedagũ dahse ye apequina masa yariariquina mũna ye ijiatire tiquina wame yenohriquina ijiãjari? Yariariquina mũna masa wijiærægũ tiquina ye ijiatire apequina wame yegũ ihyo warota wame yenohriquina ijiaboaya.

³⁰ Usã pehe usã buheri buhiri decoripe apequina usãre tiquina ñano ye duagũ cuarĩne usã gãhũre. Usãre sa cuaepẽgũta masa wijiaro ijigũ masina sa buhedcuaja usã. ³¹ Mari pũhtoro Jesucristo yequina mũsa ijigũ tiquireore wacũ tutua nemonã mũsa wahagũ yãhũ pehe tutuaro bucueaja yãhũ mũsa mehna. Ti ijirota ijire. Sa yero “Dahse ijiri decopũ yãhũre yariaro cuarĩne”, yãhũ nigũ ti gãhũ ijirota ijire. ³² Efeso cjẽna usuayequina quehnoañe buheyere yãhũ buheri buhiri yãhũre quẽdi. Masa wijiaro mariedagũ Jesu yaquireo yãhũ ijieragũ, yãhũ sa ñano yãhdũri dahseati ijieraboya. Ihyo waro

ñano yuhduḡu niboaya yaḡu. Yariariquina muna tiquina masa wijaeragū ohō saha niboaga mari: “Came cǰūnogā yarianata. Duhse wahasi mari. Sa yena ihya sihniihna. Mari esa tuharo yeihna”, niboaga mari.

³³ Ni mehoñene tuhotueracāhña musa. “Ñañequinare piti tina, quehnoañe musa yerire bonata musa”, nine masa. Ti ijirota ijire. ³⁴ Quehnoañene tuhotuna ijiya musa. Sa yena quehnoañene yena ijiya tja. Sa yena ñañene ye nemoedacāhña tja. Ihquēquina musa mehna cǰēna ne Cohācǰare masiedare. MUSA buoro wahati pehere musare sa niaja.

Yariariquina muna tiquina masa wijiare yahu nemoahye Pablo

³⁵ Sa ye mUSA mehna cǰāno ohō saha ni sinituboaga yuhure: ¿Duhse yariariquina muna masa wijaetari? ¿Duhse ijiye paguri masa wijaetari? ni sinituboaga. ³⁶ Sa sinituriquiro tuho masieniquiro ijire. Oteri pjere mari oteri bato ti pje ahbagū waro pihnine. Ahbaeraro ne pihnisi. Tire masine mUSA. ³⁷ Buḡyeye cǰupure oteraja mari. Ti pjeri dihitare oteaja mari. Ti pjeri trigo pjeri ijiro ijiaboaga. O apee boro pjeri ijiro ijiaboaga. ³⁸ Ti pjerire mari oteri bato Cohācǰū tiquiro cahmediro saha ti pjerire bucuḡa mǰagū yere. Sa yero oteye pjerire buḡyeye pihniḡū yere tiquiro. Sata pihni dutire Cohācǰū.

³⁹ Ijipihtiyequina paguri ihcāno saha bajuerare. Masa paguri pehe ihcāno saha ijire. Wahiquina paguri ḡūḡu sijoro saha bajure. Minicǰua paguri ḡūḡu sijoro saha bajure. Sa yeye wahi ḡūḡu sijoro saha pagu tire. ⁴⁰ Sa ye uhmuse cǰē ḡūḡu sijoro saha bajure. Sa yeye ahri yehpa cǰēna ḡūḡu sijoro saha pagu tire. Sa yeye uhmuse cǰēna paguri ḡūḡu sijoro saha bajure. Sa yeye ahri yehpa cǰē uhmuse cǰē

yero saha ijierare. ⁴¹ Ohō saha ijire. Asū deco cǰāno asi sitere. Sa ye ñami cǰāno ḡūḡu sijoro saha ijire tiquiro ḡūḡu. Ihyo buhriore. Sa yeye ñahpicoha ḡūḡu sijoro saha asi paare. Ñahpicoha pari ḡūḡure mari ihñagū ihquē paca mehenogā asiye paca bajure. Sa yeye apeye paca tutuaro asiye paca bajure.

⁴² Ohō saha ijire yariariquina muna tiquina masa wijiagū. Masuno tiquiro pagure mari yari bato tiquiro pagu ahbaa waharota. Sa yero ape pagu sijoro saha ijiri pagu ijipihtiyē decori catiati pagu masa wijiare. ⁴³ Ti pagure mari yagū yariariquiro mnanano pejecuḡo nine. Cohācǰū tiquirore masogū tiquiro pagu quehnoa yuhduari pagu ijire. Sa yero tiquiro pagu mari yari pagu tutuaye mariedi pagu ijire. Sa yero Cohācǰū tiquirore masogū tiquiro pagu tutua yuhduare. ⁴⁴ Ahri yehpa cǰā pagure mari yagū yariariquiro mnanano tiquiro masa wijiagū tiquiro pagu uhmuse cǰā pagu ijirota. Ahri yehpa cǰā pagure mari cuona, uhmuse cǰā pagu ḡūḡure cuonata, masa wijiana.

⁴⁵ Sata ni yahure Cohācǰū yere tiquina ojoari pǰpu: “Ahri yehpapu iji muhtariquiro Adán wame tiriquiro catiriquiro wahahye”, ni ojoahye. Ti sa ijiepegūta Adán yero saha ijiriquiro bato tiriquiro Cristo pehe catiyere ohoro ahtahye. ⁴⁶ Ahri yehpa cǰā pagu iji muhtari pagu ijire. Camepu uhmuse cǰā pagu ijirota. ⁴⁷ Ohō saha ijire: Iji muhtariquiro Adán pehe ahri yehpa cǰāno dihta mehna tiquiro yeri pagure pagu tiahye. Tiquiro bato ahtariquiro, Cristo pehe uhmusepu ahtahye. ⁴⁸ Dihta mehna tiquiro yeri pagure pagu ti muhtariquiro tiquiro ijiri saha ijipihtina apequina dihta mehna tiquiro yeri pagure pagu tina ijiaja mari. Sa yena

uhmusepu ahtariquiro yero saha tiquiro yequina ijipihtina tiquiro yero saha pagu tina ijinata mari. ⁴⁹ Dihta mehna tiquiro yeri pagure pagu tiriquiro yero saha bajuaja mari. Tiquiro yero saha mari ijiriro saha uhmuse cjanu yero saha bajunata mari.

⁵⁰ Yuhu acaye, musare ahrire yahu duaja: Ahri yehpa cja pagu dii mehna, dihi mehna ijiri pagu Cohacju pauto ijiropure uhmusepore ne wahasi. Mari pagu ahbati pagu ijire. Sa ye uhmusepu ijipihtiyere decori mari ijiatopure ahri pagu wahasi. ⁵¹⁻⁵² Panopure masa tiquina masedarire yojopure musare yahu duaja: Mari mehna cjenā ihquēquina yariasi. Sa ye duita, tiquina pagurire comesayequina ijieta. Cornetare tiquiro puti, bato tiri decopu sata wahaarota marine. Ohō saha wahaarota. Corneta bisiri bato yariariquina manare Cohacju masonota ijipihtiyere decori tiquina ijiatire. Sa yena pagurire comesarina ijinata mari gahu. ⁵³ Mari pagurire tiquiro comesagū to pano mari ahbati paguri ijiepegūta mari comesari bato ne ahbasi. Sa ye mari paguri comesagū to pano mari yariati paguri ijiepegūta ne yariasi. ⁵⁴ Mari ahbati paguri ne ahbaerati pagurire comesarota. Sa ye mari yariati paguri sa ijuducati pagurire comesarota. Sa marine comesagū panopu tiquiro ojoariro sahata sa wahaarota: “Cohacju yariayere cohā cāri. ⁵⁵ Yojopure ne pari turi mari yariasi. Sa yena yariaro mehna pari turi nāno yuhdasi mari”, ni ojoahye panopure. ⁵⁶ Mari nāne buhiri ijigū pūrita yariaro mehna nāno yuhdanata. Sa ye Cohacju dutiye Moisere tiquiro cūrire mari masidi bato, buhiri tiaja mari. Sa yero marine pecapu waha dutire Cohacju dutiye. ⁵⁷ Tiquiro sa dutiepegūta mari pauto Jesucristo

pehe marine pecapu wahaeragū yere. Tiquiro sa yeriquiro ijigū masina Cohacju mehna bucie, “Quehnoare”, niaja mari.

⁵⁸ Sa yena yuhu acaye, yuhu cahina, Cristore wacū tutua duhueracāhna. Sa yena apequina musare quehnoañe buheyere tiquina cohā dutigū, ne cohāedacāhna tire. Sa yena decoripe mari pauto Jesucristo tiquiro ye dutiyere quehnoano yeducuya musa. Mari pauto Jesucristo yere mari yegū, ahri ihyo waro ijierare. Ahrire masina tiquiro ye dutiyere quehnoano yeducuya musa.

16

Apequinare Jesu yequinare Corinto cjenā niñeru tiquina ohoatire yahuahye Pablo

¹ Yojopure apequinare Jesu yequinare musa niñeru ohoatire yahu duaja musare. Galacia yehpa cjenare Jesu yequinare yuhu dutiriro sahata musa gahu yeya. ² Semanaripe domingo ijigū ijipihtina musa Jesu yequinare ohoati niñerure mehenogā ohoya. Mehenogā cuona mehenogā ohoya. Sa yena paji cjunogā ohoya. Semanaripe musa sa yegū musa cahapu yuhu esagū musa ohoati niñeru iji tuhasarota. ³ Musa ohoatire yahuye pūrine ojoautja. Sa yegu yuhu topu esagu ti pūrine topu watiquinare musa beseriquinare ohoutja. Sa oho tuhasagu Jesu yequinare musa ohori niñerure neatiquinare ohoutja Jerusalēpu. ⁴ Ti macapure yuhu yeati ijigū yuhu gahu wahagutja. Yuhu sa wahagū yuhu mehna tiquina wahaeta.

Tiquiro tiniatire yahuahye Pablo

⁵ Macedonia yehpa cjenare ihna yuhdutja yuhu. Yuhdu cā, musa cahapu Corintopu esautja. ⁶ Topu esagu musa mehna meheñe

decorigã ijiboaga yũhũ ape taha yegu. Yoa cjũri pje pohero ijiro puno m̄sa mehna ijiboaga yũhũ. Sa yena ape siepũ yũhũ wahagũ m̄sa gãhũ yũhũre yedoho masine. ⁷ Meheñe decorigã iji dueraja yũhũ m̄sa mehna. Sa yegu Cohãcjũ cahmegũ yoa cjũri pje m̄sa mehna ijitja yũhũ. ⁸ Sa iji duepegũta Pentecoste bose deco ijigũpũ Efesopũ ijiniitja yũhũ. ⁹ Ohõpũ Efesopũ yojopũre mari pũhtoro Jesu yere tũho duayequina peyequina ijire. Tiquina sa ijigũ tiquinare yahuaja. Yũhũ sa yahugũ yũhũre ihña tuhtiyequina peyequina ijire.

¹⁰ Timoteo yũhũ yero saha mari pũhtoro yere yere. Tiquiro sa yeriquiro ijigũ m̄sa cahapũ esagũ quehnoano mehna tiquirore piti ca, tiquiro mehna quehnoano bucueye mehna ijiya m̄sa. ¹¹ Sa yena tiquirore yũhũdũcaeracãhña m̄sa. Sa yena tiquiro cohe tigũ quehnoano mehna tiquirore yedohoya yũhũ cahapũ tiquiro tojoa tagũ. Apequina Jesu yequina mehna usã tiquirore cohtena niaja. Sa yena quehnoano yedohoye mehna tiquirore ohoya.

¹² Apolo mari acayaro Jesu yaquiro m̄sare ihñano wahagũ tutuaro cahmemi. Sa yegu tiquirore waha dutimi apequina Jesu yequina mehna tiquiro waha tire. Yũhũ sa waha dutiepegũta yojopũre tiquiro waha duerare. Sa yero came tiquiro yeye mariedagũ m̄sa cahapũ waharota.

Pablo quehnoa duti bato tiahye

¹³ Quehnoano wacũ masiña m̄sa. Cristore wacũ tutua duhueracãhña. Ne cuenata ijiducuya m̄sa. Sa yena Cohãcjũ tutuaye mehna tutuana ijiya m̄sa. ¹⁴ Apequinare sa cahĩducuya.

¹⁵ Yojopũre yũhũ acaye m̄sare ahrire yahu duaja: Estefana ya wũhũ cjẽna Acaya yehpa cjẽna quehnoañe buheyere tũho

mãhtariquina, tiquina ya yehpapũ Cristore wacũ tutua mãhtariquina ijire tiquina pehe. Sa ye apequinare mari acayere Jesu yequinare tiquina quehnoano yedohoducure. Tire m̄sa masine. ¹⁶ Tiquina yero saha ijiyequinare, apequina Cristo yere yedohoyequinare m̄sa quehnoano yũhtigũ cahmeaja yũhũ. ¹⁷ Estefana, Fortunato, Acaico gãhũ yũhũ cahapũ wihi tuhasare. Ohõpũ tiquina ijigũ quehnoano bucueaja yũhũ. M̄sare tiquina bucuegũ yeriro saha yũhũ gãhũre bucuegũ yere tiquina. M̄sa mariedagũ m̄sare tutuaro wacũmi yũhũ. Sa yegu tiquina wihigũ bucueaja yũhũ. ¹⁸ Tiquina mehna ijigũ quehnoano jeripohna tigũ ijii yũhũ. M̄sa gãhũre sata bucuegũ yere tiquina, yũhũ tãhotugũ. Tiquinare quehnoano ño peoya m̄sa. Sa yena apequina tiquina yero saha ijiyequina gãhũre ño peoya.

¹⁹ Asia yehpa cjẽna Jesu yequina m̄sare quehnoa dutire. Sa ye Aquila, Priscila, tiquina ya wũhũpũ cahmecoañequina mehna Cristo tiquiro cahĩñe mehna m̄sare tutuaro quehnoa dutire. ²⁰ Ohõ cjẽna Jesu yequina ijipihtiyequina m̄sare quehnoa dutire. M̄sa mehna cjẽnare quehnoano mehna piti caya.

²¹ Yũhũ, Pablo yũhũ basi ahri dhitare ojoaja. M̄sare quehnoa dutiaja.

²² Mari pũhtoro Jesucristore apequiro tiquiro cahĩedagũ, Cohãcjũ tiquirore buhiri dahreahro. Mari pũhtoro sojaro mehna tojoa taahro.

²³ Mari pũhtoro tiquiro cahĩñe mehna m̄sare quehnoa dutiaja. ²⁴ Mari ijipihitina Jesucristo yequina ijiya. Sa yegu m̄sare tutuaro cahĩaja.

2 Corintios

Ohō saha ojoa ohoahye Pablo Corinto cĵēnare

¹ Yuhū Pablo, Jesucristo yere buhe duti tiqũiro cũrigũ ijiaja. Mari Pacũ tiqũiro cahmediro saha cũri yuhũre Jesu. Yuhū, mũsare Cohācĵũ yequinare, Corinto cĵānare ojoa ohoaja. Ijipihtina Cohācĵũ yequinare Acaya cĵānare mũsa gũhũre ojoa ohoaja. Mari acayũro Timoteo mehna quehnoa dutiaja mũsare. ² Sa yena Cohācĵũ mari Pacũ, mari puhtoro Jesucristo mehna mũsare quehnoa dutiaja. Tiquina yedohoye mehna quehnoano ijiya mũsa.

Pablo tiqũiro ñano yuhdũrire ohō saha ni yahuahye:

³ Mari puhtoro Jesucristo Pacũro Cohācĵũ marine paja ihñare. Sa yero tiqũiro dihita marine yedohore. Quehnoa yuhdũriqũiro ijire tiqũiro. ⁴ Mari ñano yuhdũgũ ihñano ijipihtinare marine tiqũiro yequinare yedohore tiqũiro apequinare mari yedohoatire. Sa yena apequina tiquina ñano yuhdũgũ ihñana tiquina pehere yedohoro cahmene marine. Cohācĵũ marine tiqũiro yedohoye mehna mari gũhũ tiquina gũhũre yedohonata. ⁵ Cristo yequina mari ijiri buhiri mari ñano yuhdũgũ tiqũiro tutuaro yedohorota marine. ⁶ Ūsā pehe mũsare yedohona ñano yuhdũaja. Sa yena Cristo mehna mũsa yuhdũatire mũsare usā yahuri buhiri ñano yuhdũaja. Sa yena Cristo usāre tiqũiro yedohogũ usā pehe mũsa gũhũre yedoho masiaja. Sa yena usā ñano yuhdũriro sahatata mũsa gũhũ ñano yuhdũna, quehnoano mehna ihcāno sahanata mũsa, yuhũ tũhotugũ. ⁷ Quehnoano mehna mũsa ihcāno sahatire usā masiaja. Ūsā ñano

yuhdũriro sahatata ñano yuhdũri mũsa gũhũ. Sa yena Cohācĵũ tiqũiro yedohoye mehna usā ihcāno sahariro sahatata mũsa gũhũ ihcāno sahanata, yuhũ tũhotugũ.

⁸ Ūsā acaye, yojopũre ahri yuhũ yahuatire mũsa quehnoano masigũ usā cahmeaja. Asia yehpapũ ña yuhdũaro yuhdũe tii usā. Ohō saha ni tũhotumi usā: “Ne yuhdũsi mari. Sa yena mari yarianata”, ni tũhotumi usā. ⁹ Sa yena “Marine wejē cāeta”, ni tũhotumi usā. Sa ñano yuhdũna Cohācĵũ dihitare usā wacũ tutua nemou. Ūsāre tiquina ñano yegũ cahmeahye Cohācĵũ tiqũirore usā wacũ tutua nemoatire. Tiquiro pehe yariariqũinare masoriqũiro ijire. Sa tiqũirore wacũ tutuana usā esa tuharo usā ihcāno sahaerarire masiaja. Cohācĵũ marine yedohore. ¹⁰⁻¹¹ Ūsāre cuaro yepegũta tiqũiro yedohoro mehna usā yuhdũhũ. Camepũ gũhũre pari turi usāre yuhdũorota. Ūsāre Cohācĵũre mũsa sini basagũ tiqũiro usāre yedohorota. Ūsāre tiqũiro yedohoatire masiaja usā. Sa yena usāre tiqũiro yedohogũ ihñana, tiqũirore “Quehnoare”, ninata mũsa. Peye mũsa sini basarire tiqũiro yahtigũ ihñana bucue, “Quehnoare”, ninata mũsa Cohācĵũre. Peyequina apequina gũhũ sata nieta.

Pablo Corintopũ tiqũiro waha duamedire yahuahye

¹² Sa yena mũsa mehna usā ijirire wacũna bucueye mehna ohō saha tũhotuaja usā: Ahri yehpapũ Cohācĵũ tiqũiro yedohoye mehna ñañe marieno quehnoano mehna masare piti ti buhei. Mũsa pũritare quehnoano piti ti buhei. Ohō saha yena usā esa tuharo yerũ. Cohācĵũ cahñe mehna tiqũiro tutuaye mehna sa yei. ¹³⁻¹⁴ Sa yena quehnoano yahu ojoau

m̄sare, quehnoano m̄sa masi-atire. Yojoṗure us̄are quehnoano masiedare m̄sa. Us̄a ijiye tiyere m̄sa quehnoano masigū tutuaro cahmeaja us̄a. Sa yena mari ṗuhtoro Jesu tiquiro tojoa tagū us̄a mehna bucuenata m̄sa. M̄sa mehna us̄a bucuero sahata m̄sa gūhu us̄a mehna bucuenata.

15-16 Ohō saha nigū Macedonia yehṗaru waha duamaja yūhu. Sa yegu m̄sare ih̄na yūhdu cā duamaja yūhu. Sa yegu toṗure esarigu tojoa tagū pari turi m̄sa mehna meheñe decorigā ijiṗoaga yūhu. Sa yena ṗua taha m̄sa mehna yūhu ijigū ih̄nana pajiṗo yūhu mehna m̄sa bucuēboaga. M̄sa caharu ijirigu Judea yehṗaru yūhu wahagū ih̄nana yūhure yedohoboaga m̄sa. 17 Ķ“Wahautja”, yūhu nigū tūhorina ijina m̄sa caharu yūhu eseragū ih̄nana “Pablo ni mehono nine”, ni tūhotuajari m̄sa? “Wahautja”, nigū yūhu esa tuharo sa nigū niedaja yūhu. Ķ“Tiquiro nidiṗo saha yerare”, yūhure ni tūhotuajari m̄sa? 18 Ohō saha ni mehogu ijieraja yūhu. Sa yegu “Yeitja”, nigū yūhu nidiṗo saha yeaja yūhu. Tire masine Cohācjū.

19 Yūhu, Sila, Timoteo mehna Jesucristo Cohācjū macno yere m̄sare yahuu us̄a. Cristo pehe “Yeitja”, nino, poto yeriquiro ijiro nine. Cohācjū tiquiro nidiṗo sahata Cristo yere. 20 Ijipihtiyere Cohācjū tiquiro yahurire Cristo ye pehoahye. Tiquiro sa yeriquiro ijigū ih̄nana tiquiro yere us̄a apequinare yahuaja Cohācjūre tiquina ño peoatire. 21 Cristo yequina marine ijiducugū yeriquiro Cohācjūta ijire. Sa yero tiquiro yere yahuanajare marine sōri tiquiro. 22 Sa yero tiquiro yequina mari ijiyere ih̄nana tire marine masigū yere tiquiro. Sa yero tiquiro yaquiro Espiritu Santore mari mehna iji dutiri tiquiro. Mari mehna ijiro tiquirota marine Cohācjū yūhduoatore masigū yere.

23 Yojoṗure poto yahutja m̄sare. Poto yūhu yahueraḡū Cohācjū pehe m̄sare poto yahuahro. Tiquirota yūhu tūhotuyere masine. M̄sare tuhti dueragu m̄sa caharu wahaeru. “M̄sare bujua witiḡū yeari”, nigū m̄sa caharu Corintopure wahaeru. 24 Sa yena “M̄sare dutina ijiaja us̄a”, nina niedaja. Cristore quehnoano wacū tutua tuhasari m̄sa. Sa yena “Ohō saha Cristore wacū tutuaro cahmene m̄sare”, nina niedaja us̄a. M̄sare quehnoano bucuēḡū ye duaja us̄a.

2

1 Sa yegu ohō saha ni tūhotuu: “Pari turi tiquinare bujua witiḡū ye dueraja. Sa yegu yojoṗure wahaeraja”, ni tūhotuu. 2 M̄sare bujua witiḡū ye dueraja. M̄sa bujua witiḡū ih̄nagu yūhu pehe m̄sare bucueraṗoaga. Sa yena yūhure bucuēḡū yeatina ijieraboaga m̄sa pehe. 3 Sa yegu m̄sa caharu wahaeru. Sa wahaeragu m̄sare ihyo ojoau. M̄sa yūhure bucuēḡū yeatina ijiepenata yūhure bujua witiḡū yeboaga m̄sa, m̄sa caharu yūhu esagū. M̄sa mehna yūhu bucuēḡū, m̄sa gūhu bucuenata. Tire masiaja yūhu. Sa yegu yojoṗure m̄sa mehna bujua witi dueragu wahaeru m̄sa caharu. 4 Pajiṗo tūhotugu, ñano jeripohna tigu, tutuaro utigu m̄sare ojoaepēgata m̄sare bujua witiḡū ye dueru. M̄sare tutuaro yūhu cahñene m̄sare masigū ye duagu m̄sare ojoau.

Corinto cjēna mehna cjāno tiquiro ñano yerire bo dutiahye Pablo Jesu yequinare

5 Ihcāquiro m̄sa mehna cjāno yūhure bujua witiḡū yeriquiro ijiri. Sa yeriquiro ijiepegāta m̄sare tiquiro tutuaro bujua witiḡū yeriro saha yūhu pehere pajiṗo bujua witiḡū yerari tiquiro. Tiquiro sa ñano yepegāta pajiṗo waro buhiri

dahre duti dueraja. ⁶ Peyequina m̄sa mehna c̄jēna tiq̄iurore buhiri dahre tuhasañoh̄ti. To punota buhiri dahre duhuro cahmene tiq̄iurore. ⁷ Tiq̄iurore m̄sa buhiri dahreducugū tutuaro buj̄na witiboaga tiq̄iuro. Sa yero Cristo yere duhuboaga. Sa yena tiq̄iuro ñañe yerire boya m̄sa. Tiq̄iurore yedohoya tiq̄iuro bucuegū. ⁸ Sa yena tiq̄iurore quehnoano yeya m̄sa tiq̄iurore m̄sa cahñene tiq̄iuro masigū. M̄sa sa yegū tutuaro cahmeaja ȳh̄n̄. ⁹ To pano m̄sare ojoagu “¿Potota ȳh̄n̄re ȳhtietari?” niḡn̄ sa ni ojoan̄ m̄sare. Ȳh̄n̄re m̄sa ȳhtigū ih̄ña duagu m̄sare sa ni ojoan̄. ¹⁰⁻¹¹ Yojoṗure tiq̄iuro ñañe yerire m̄sa bogū ih̄ñagu ȳh̄n̄ ḡh̄n̄ tire boutja. Ȳh̄n̄re ñano yerahye tiq̄iuro. M̄sa pehere ñano yeahye. Tiq̄iuro sa ijiepegūta tiq̄iuro ñañe yerire boaja ȳh̄n̄ ḡh̄n̄. M̄sare quehnoano yedoho duagu Cristo ih̄ñonop̄n̄ tiq̄iuro ñañe yerire boaja. Tire boaja Satana marine tiq̄iuro ȳhd̄n̄caerature. Tiq̄iuro marine ñañene yegū cahmene. Tire quehnoano masiaja mari. Sa yena Jesu yequina tiquina ñañe yerire wac̄ducueraja mari, “Tiquinap̄n̄ Satana yere yeari”, nina.

Troa wame tiri macap̄n̄ ijiro Titore bocaeraro pajiro buj̄na witi t̄hotuahye Pablo

¹² Sa yeḡn̄ Troa wame tiri macap̄n̄ esan̄ Cristo yere buheḡn̄ wahagu. Top̄n̄ ȳh̄n̄ ijigū peyequina masa quehnoañe buheyere t̄ho duayequina ijiri. Mari p̄htoro tiq̄iuro yedohoye mehna tiq̄iuro yere ȳh̄n̄ buheatiquina peyequina masa ijiri. ¹³ Sa ijiepegūta mari acaȳrore Titore bocaeragu pajiro buj̄na witi t̄hotuu. Sa yeḡn̄ to c̄jēnare cohe ti tuhasagu Macedonia yehpap̄n̄ wahan̄.

Cristo yedohoye mehna ñañene yeducueraja mari

¹⁴ Sa ye Coh̄c̄j̄ pehe marine ñañene yeragū yere. Cristo yequina mari ijigū ih̄ñano marine ñañene yeragū yere. Sa yeḡn̄ Coh̄c̄j̄ure bucue, “Quehnoare”, niaja. Sa yena Coh̄c̄j̄ marine tiq̄iuro dutigū masina ijipihtiroṗn̄ Cristore masare masigū yeaja mari. Sa tiq̄iurore masiñe tiquina quehnoano t̄hoture. ¹⁵ Cristo yequina ijina, Coh̄c̄j̄ pehere bucuegū yeaja mari, ehme sitiyyere mari bucuro saha. Sa ye Cristo yequina mari ijiyyere ih̄ña masine apequina Coh̄c̄j̄ ȳhd̄n̄oatiquina. Apequina tiquina ñañe buhiri pecap̄n̄ wahatiquina ḡh̄n̄ Cristo yequina mari ijiyyere ih̄ña masine. ¹⁶ Cristo yequina mari ijigū ih̄ñañe, tiquina ñañe buhiri pecap̄n̄ wahatiquina pehe pecap̄n̄ tiquina wahatire masine. Coh̄c̄j̄ ȳhd̄n̄oatiquina pehe marine Jesu yequinare ih̄ñañe, ijipihtiyē decori tiq̄iuro mehna tiquina ijiatire masine. Sa ye Cristo ye ihyo ijiye buheye ijierare. Sa yero ahr̄re Cristo yere ih̄c̄aquir̄o esa tuharo buhe sohtori tiriq̄iuro ne mariedare. Coh̄c̄j̄ yedohoro mehnata tiq̄iuro yere mari buhe masiaja. ¹⁷ Peyequina apequina Coh̄c̄j̄ yere buhemene niñerure wapata duaye. Ūs̄a pehe tiquina yero saha yeraja. Ni mehono marieno Cristo tutuaye mehna tiq̄iuro yere buheaja us̄a. Coh̄c̄j̄ us̄are c̄ḡū tiq̄iuro ih̄ñonop̄n̄ quehnoano buheaja us̄a.

3

“Ohō saha yeitja”, Coh̄c̄j̄ ni c̄r̄ire wahma buheyere yahuahye Pablo

¹ ¿Pari turi us̄a ijiye tiyere m̄sare yahuna niajari us̄a, m̄sa t̄hotugū? Apequina m̄sare tiquina buheato pano tiquina ijiye tiyere masi duana tiquina ojoari p̄re cahme māhtari m̄sa.

Usãre masi tuhasari m̄sa. ¿Usãre masiepenata ti pũ borore cahmeajari m̄sa? ¿O apequina cahap̄ usã buhena wahana ti pũ borore usãre neno cahmeajari, m̄sa t̄hotugũ? ² Ti pũ borore cahmedaja usã. M̄sa pehere ijipihitiyequina apequina ihñañe m̄sare usã quehnoano buherire masieta. M̄sare usã buhegũ Cristo yequina iji d̄cari m̄sa. ³ Cristo yequina m̄sa ijigũ ihñañe masa m̄sare Cohãcjũ ye buheye warore usã queoro buherire masi tuhasare. M̄sare buhena Cohãcjũ yaquiro Espiritu Santo tiquiro yedohoye mehna buhei. Tiquiro Cohãcjũ catiriquiro waro ijire. Usã sa buhegũ t̄hona Cristore quehnoano cahmedi m̄sa. Sa cahmena m̄sa ijigũ apequina m̄sare ihñañe Cristo yequina m̄sa ijiyere quehnoano masine. Sa masiñe m̄sare Cohãcjũ ye buheye warore usã queoro buherire masine masa. ⁴ Ahrire ijipihitiyere t̄hotuaja usã Cohãcjũre quehnoano wacũ tutuana. Cristo tiquiro yedohoye mehna sa wacũ tutuaducuaaja mari. ⁵⁻⁶ “Usã esa tuharo ahri dahrayere yeaja usã”, ni masiedaja usã. Cohãcjũ tiquiro yedohoye mehna ye masiaja usã.

Yojop̄re tiquiro yahuyere quehnoañe buheyere Cohãcjũ pehe quehnoano usãre buhe masigũ yere. Ahri buheye panop̄m tiquiro dutiye tiquiro ojoari yero saha ijierare. Quehnoañe buheye pehere buheaja usã. Panop̄m tiquiro dutirire mari esa tuharo ne ye masiedaja. Sa mari ye masiedari buhiri pecap̄m wahaboya mari. Quehnoañe buheye pehere t̄hona Cristore wacũ tutuaja. Sa yena ijipihitiye decori Cohãcjũ mehna ijinata mari. ⁷ Cohãcjũ tiquiro dutiyere utã p̄ñip̄m ojoaro Moisere cūahye. Tiquiro sa cūri bato tiquiro asi siteye bajuahye. Moise w̄hdoa asi siteahye. Asi site ȳhd̄uahye.

Came ti asi siteye pihtia wahahye. Came ti asi siteye pihtia wahati ijiepegũta coã warore tiquiro w̄hdoare masa ne ihñadoque ohõ masiedahye. Ti dutiyere masa tiquina ye pehoerari buhiri pecap̄m wahatiquina ijiahye. Sa ye ti dutiye masare pecap̄m waha dutiepeta, tutuaro asi siteye mehna iji d̄cahaye ti dutiye.

⁸ Ti dutiye ȳhd̄uoro quehnoañe buheye pehe quehnoa ȳhd̄uare. Ahri buheyere apequinare mari buhegũ tiquina quehnoano t̄hogũ Espiritu Santo tiquina mehna ijirota. Sa ye panop̄m cjẽ dutiye ȳhd̄uoro Cristo ye pehe quehnoa ȳhd̄uare. ⁹ Cohãcjũ dutiye panop̄m cjẽ masare pecap̄m waha dutiahye. Sa dutieperota Cohãcjũ tutuaye mehna tiquiro asi siteye mehna iji d̄cahaye. Ti ȳhd̄uoro quehnoañe buheye pehe Cohãcjũ tutuaye mehna ijire. Ti buheye mehna quehnoañequina wahare masa, Cohãcjũ ihñagũ. ¹⁰ Panop̄m Cohãcjũ tiquiro dutiri pehe ihyo ijiye dutiye yero saha tojoa cãhre yojop̄re quehnoañe buheye mehna mari ihña piti cagũ. Quehnoañe buheye pehe quehnoa ȳhd̄uare. Ti buheye mehna ahm̄serep̄m mari waha masiaja. ¹¹ Panop̄re tiquiro ye dutiye yoa cjũri pje asi siteye ijiducume, pihtia wahahye. Ti dutiye ȳhd̄uoro quehnoañe buheye pehe quehnoa ȳhd̄uare. Ti buheyere quehnoano t̄hona, Cohãcjũ mehna sa ijiducunata.

¹²⁻¹³ Mari sa ijiducuatire masina, cuero marieno quehnoañe buheyere quehnoano yahu peho cjã usã. Moise pehe usã yero saha ijierahye. “ ‘Cohãcjũ asi siteye pihtiro nine’, Israe masa ni ihñari”, nino, tiquiro w̄hdoare cahmotahye Moise. B̄e tiro sa cahmotahye. Tiquiro yee tiro saha b̄e tieraja usã pehe. Sa yena cuero marieno tiquiro yere quehnoañe

buheyere buheaja. ¹⁴ Ti pjeꝑu cĵena Israe masa pehe ne masieda tiahye. Yojoꝑu gāhure Cohācĵū yere panopu tiquiro ojoari pūrine tiquina buheye, ne masiedare. Moise tiquiro wāhdoare cahmotagū Cohācĵū asi siteyere tiquina ihñadoque ohōedariri saha tiquina quehnoañe buheyere quehnoano masiedare. Cristore cahmedaye, masisi tiquina. Tiquirore tiquina wacū tutuari bato, tiquiro yere masieta.

¹⁵ Yojoꝑu gāhure Israe masa Cohācĵū dutiye Moiseri tiquiro cūriri buheye, tiquinare cahmotaro saha ne masiedare tiquina. ¹⁶ Mari pehe mari puhtorore cahmegū tiquirota marine masigū yere. Moise tiquiro wāhdoa cahmotarirori tiquiro ne cāboriro saha mari puhtoro marine tiquiro yere quehnoano masigū yere. ¹⁷ “Mari puhtoro”, nigū Espiritu Santore nigū niaja. Cohācĵū yaquiro Espiritu mari mehna tiquiro ijigū pecapū wahaborinare tiquiro wāhdorina ijiaja. Sa yena “Panopu cĵē dutiye mehna mari wāhdanata”, niedaja mari. Sa yena ti dutiyere duhuna, Espiritu Santo ye dutiye pehere yeaja mari. ¹⁸ Sa yena Jesu yequina ijina, Cohācĵū yere masiaja mari. Tiquina wāhdoa pacare cahmotamehneñequina yero saha Cristo tutuayere ihñona niaja mari. Sa yero mari puhtoro Espiritu Santo marine quehnoañe pehere came-sagū yere. Tiquiro sa yegū Cristo quehnoa wāhdariquiro tiquiro ijiro saha wahana niaja mari.

4

¹ Sa ye Cohācĵū usāre paja ihñano, quehnoañe buheyere yahuanajare cūri usāre. Tiquiro sa cūgū masina, tiquiro yere buhena caributieraja usā. ² Tiquiro yere buhena ni meje cū buheraja. Sa yena usā tire camesaeraja. Sijoro saha cĵūnogā

buhena buoro wāhdaboaga. Sa yena tire buhe dueraja. Cohācĵū ihñonopu ijiaja usā. Sa yena quehnoañe buheyere quehnoano pototo buheaja usā. Usā sa buhegū ihñañe tire quehnoano masine usāre ihñañequina waro. ³ Usā buheyere quehnoañe buheyere buheaja usā. Usā tire buhepegūta apequina ne tūho duerare. Sa tūhoeyequina pecapū wahatiquina ijire. ⁴ Satana ñariquiro ahri yehpa cĵena puhtoro tiquinare masiedagū yere. Caperi bajueyequina tiquina ihñana masiedaro saha masiedagū yere tiquinare. Quehnoañe buheyere Cristo tutuayere tiquinare masiedagū yere tiquiro. Cristo pehe Cohācĵū ijiye tiyere marine masigū yere. Tiquiro Cristo Cohācĵū waro ijire. ⁵ Usā buhena “Usā pehere ño peoya”, ni buheraja. Ohō saha ni buheaja usā: “Jesucristo pehe ijire mari puhtoro”, ni buheaja usā. Usā pehe Jesure yūhtina ijiaja usā. Sa yena musare yedohoaja usā. ⁶ Panopu ohō saha niahye Cohācĵū: “Nahitianopure buhrioro ijiaja”, ni, dutiahye tiquiro. Yojoꝑure tiquirota ijire marine tiquiro tutuayere masigū yeriquiro. Buhrioro marine ti ihñagū yero saha, tiquiro tutuayere marine masigū yere. Cristo Cohācĵū tutuayere marine masigū yere.

Cristo tutuaye mehna mari ijiaja

⁷ Sa masina ijina, tiquiro tutuayere apequinare masigū yeaja. Sa yena ijiepenata tutueraja usā. Dihī sutu duita wahtiro ti butiro saha usā gāhu tutueraja. Sa ijiepenata Cohācĵū tutuayere apequinare buheaja usā. Usā sa tutuerapenata tire buheaja usā. Usā sa buhegū ihñañe usāre “Tiquina esa tuharo ahri buheyere masiedare. Cohācĵū pehe tiquinare masigū yere”, ni masieta apequina usāre. ⁸ Ijipihtiyequina apequina

usāre ñano yepeta Cohācjū usāre tiqiro yedohogū tiquina usāre yūhdūcaerata. Sa yena usā caributepenata, Cohācjū yere ne yahu duhueraja. ⁹ Usāre tiquina ñano yeducuepegūta Cohācjū usāre sa yedohoducure. Usāre tiquina quēdoque cū mūjaepēgūta tiqiro yedohoye mehna yarieraja usā. ¹⁰ Tiquina wejēatina ijinata niaja usā, Cristo ahri yehpapū tiqiro ñano yūhdūriro saha. Tiquina wejēatina ijiducuna niaja usā Cristo catiducugū yeriqiro tiqiro ijiyere masa tiquina masiato saha. Usā sa ñano yūhdūgū ihñāñe tire masieta masa.

¹¹ Sa ye decoripe usāre apequina wejēno cuarīne Cristo yequina usā ijiri buhiri. Ohō sahata ñano yūhdūaja usā Cristo catiducugū yeriqiro tiqiro ijiyere apequina tiquina masiato saha. Usā paguri came yariaa waharota. Usā sa wahatina ijiepenata Cristore catiducugū yeriqirore masigū yeaja usā apequinare. ¹² Sa ye mūsare usā buheri buhiri usā pehere apequina wejēno cuarīne. Usā buheyere mūsa tuhori bato ijipihtiye decori Cohācjū mehna ijiatina ijire mūsa.

¹³ Cohācjū yere tiquina ojoari pūpū ohō saha nine: “Cohācjūre wacū tutuagu, tiqiro yere buhei”, ni ojoahye panopū cjāno. Usā gūhū sata yeaja. Cohācjūre wacū tutuana, tiqiro yere buheaja. ¹⁴ Ahri yūhū niati gūhūre quehnoano masiaja usā: Cristo yariari bato Cohācjū tiqirore masoahye. Sa yero Cristo yequina mari ijigū ihñano tiqiro mari gūhūre masonota. Tiqiro sa masori bato tiqiro cahapū neanota marine. ¹⁵ Sa yena mūsare yedoho duana, ñano yūhdūaja usā. Sa yena Cristo yequina mūsa peyequina wahana, peyequina mūsa Cohācjūre bucueye mehna ño peonata. Tiqirore “Quehnoare”, ninata.

¹⁶ Mūsa sa wahagū ihñana, usā ñano yūhdūepenata bujūa witieraja. Sa yena Cristo yere buhe duhueraja. Usā pagū tutuaye decoripe pihti cāno nine. Usā tutuaye sa pihti cāepēgūta quehnoano jeri sajāja usā. ¹⁷ Yojopūre ñano yūhdūepenata ñano yūhdū dojoeraja. Ti mari ñano yūhdūye pihtia waharota. Sa yena marine mehenogā ñano yūhdūro cahmene. Sa mari ñano yūhdūrina ijina, camepūre tutuaro bucueye mehna ijiducunata Cohācjū mehna. Sa yena mari ñano yūhdūari yūhdūoro pajiro bucueye mehna ijiducunata. ¹⁸ Mari ihñari ahba pihtia waharota. Mari ihñedari pehe sa ijiducurota. Sa yena mari ihñarire wacūducueraja. Mari ihñedari pehere Cohācjū yere sa wacūducuaaja mari. Sa yena camepū mari quehnoano ijiatire bucueaja.

5

¹ Wūhūre tiqiro cohāboriro saha came mari paguri pehe butia waharota. Sa yero wahma wūhūre tiqiro yeboriro saha Cohācjū wahma pagurire yerota. Sa yero ti pagurire marine ohorota. Ti paguri masa tiquina yeri paguri ijierare. Sa yena ūhmūsepū sa ijiducunata ti paguri mehna. Tire mari masiaja. ² Sa yena ti pagurire ūhmūse cjē pagurire tutuaro cahmena, mari sa cohteducuna niaja. ³ Suhtirore tutuaro mari saña duaro saha ti pagurire tutuaro cahmeaja mari. Sata cohteaja mari paguri mariena iji duerana. ⁴ Yojopūre ahri pagurire cohā duerapenata wahma paguri pehere tutuaro cohteaja mari. Yojopūre mari pagurire cohā duerapenata ijipihtiye decori Cohācjū mehna mari ijiatire tutuaro cahmeaja mari. Sa yena ahri mari paguri yariati paguri ti ijigū masina, wahma paguri mehna Cohācjū mehna sa ijiducu duaja mari.

⁵ Mari sa ijiducuatire quehnoahye Cohãcjũ pehe. Sa quehnono tiquiro yaquiro Espiritu Santoro ohori marine. Sa yero tiquiro yaquiro Espiritu Santo mari mehna ijiro, marine Cohãcjũ tiquiro yeatire “Poto tjire”, nino, marine masigũ yere tiquiro.

⁶ Sa yena Cohãcjũre wacũ tu-tuaducuaaja mari. Cuero marieno ijiaja mari. Ahri mari iji muhtari pagapũ ijina, mari puhtoro mehna ijieraniaja. ⁷ Uhmũse cjẽne Cohãcjũ gãhare mari ihñedapenata “Ti potota ijire”, ni tuhotuaja mari. Sa yena tiquirore wacũ tutuaja mari. ⁸ Sa yena mari cueraja. Mari pagũre ahri yehpapũ cohãna mari puhtoro mehna uhmũsepũ ijiducunata mari. Sa yero mari yariagũ quehnoanota marine. ⁹ Sa yena Cristore bucuegũ ye duaja mari. Ahri yehpa cjã pagũ mehna ijinina tiquirore bucuegũ ye duaja. Uhmũsepũ gãhare tiquirore bucuegũ ye duaja. ¹⁰ Ijipihtina Cristo cahapũ mari wahagũ ihñano tiquiro mari yerire ihñano marine beserota. Nãno mari yerire masinota tiquiro. Sa masino marine tiquiro ohoborire marine ohosi tiquiro. Quehnoañene mari yeri gãhare masinota. Sa masino bucuero marine quehnoano yerota. Tiquiro sa masidiquiro ijigũ ihñana tiquirore bucuegũ ye duaja mari.

Cohãcjũre mari ihña tuhtigũ ihñano Cristo pehe marine bosare

¹¹ Sa yena cua pesaro mehna Cristore ño peoro cahmene marine. Tire masina, Cristo yere masigũ yeaja usã masare. Tiquinare cuesãna, tiquirore wacũ tutuagũ ye duaja usã tiquinare. Quehnoano mehna tire usã buherire Cohãcjũ quehnoano masine. Ušã sa buherire m̄sa gãhare quehnoano masigũ cahmeaja yũhũ. ¹² Pari turi quehnoana usã ijiye tiyere

m̄sare yahuna niedaja. “Apequinare yãhdũducaja”, niñequinare m̄sa yahuati pehere quehnoano mehna usã buherire yahuna niaja usã m̄sare. Tiquina pehe tiquina wacũñepũ ñañequina ni mehoñequina ijiepetata masa tiquina ihñono dihita quehnoañequina yero saha ye ihñomene. Sa yena usã mehna m̄sa bucueati pehere ahri ijipihtiyere m̄sare yahu ojoana niaja. “Pablo gãhũ usãre quehnoano mehna buhere”, usãre apequinare m̄sa ni cahmotati pehere ahri ijipihtiyere m̄sare yahu ojoana niaja. ¹³ ¿Usã ohõ saha ni yahuna tuho masiena ijiajari usã, m̄sa tuhotugũ? Masa usãre ihñañe, tuho masieñequina yero saha ihñare usãre. Cohãcjũ yere usã yegũ ihñañe sa ihñaboaga usãre. Sa tiquina ihñano hrina ijiepenata sa ijina ijieraja m̄sare yedoho nemonata tana.

¹⁴ Cristo marine tiquiro cahĩgũ ihñana m̄sare sa yedohoaja. Tiquiro sa cahĩgũ ihñana tiquiro yere sa yahuducuaaja usã. Ihcãquirotata Cristo ijipihtina mari ñañe buhirire yariari jiri. Tiquiro sa yariari bato mari pehe ijipihtina mari ñañe buhirire yariariquina yero saha ijiaja. Tiquiro buhiri dahre tuhasariquina yero saha ijiaja. Cristo tiquiro yariari mehna marine tiquiro buhiri dahre tuhasariquina yero saha ihñanota Cohãcjũ. ¹⁵ Ijipihtina mari ñañe buhiri yariari jiri Cristo tiquiro ye dihitaro mari yeato saha. Sa yero tiquiro cahmeñe pehere marine ye dutiro yariari jiri tiquiro. Mari ye ijiatire yariaro, masa m̄jari jiri. ¹⁶ Sa yena yojopũre usã esa tuharo masare “Quehnoañequina ijire. Ñañequina ijire”, ni ihñedaja usã. Panopũ usã esa tuharo yee timi. Sa yena Cristore masiedũ. Yojopũre Espiritu Santo yedohoye mehna tiquirore quehnoano masi tuhasaja. ¹⁷ Sa yena Cristo yequina

wahana quehnoañe pehere yena wahaja mari. Panopu mari esa tuharo mari yemedire duhu cjã mari. Yojoꝑure quehnoañe pehere comesana tire yeaja mari.

18 Cohãcjũ pehe marine quehnoañe pehere comesagũ yeri. Cohãcjũre ihña tuhtina mari ijigũ ihñano Cristo pehe mari ñañene cohãri. Sa cohãno mari ihña tuhtiyere duhugũ yeri tiqũiro. Sa yegũ yeri Cohãcjũ Cristore. Sa yero usãre tiqũiro yere buhe dutiro cũri. Sa buhena, apequinare Cohãcjũ mehna tiquina ihña tuhtirire duhugũ yeaja usã gãhu. 19 Ohõ saha masare yahu dutiri Cohãcjũ usãre: “Cristore mari wacũ tutuagũ ihñano mari ñañe buhirire buhiri dahrerare Cohãcjũ marine. Sa yero marine ihña tuhtiriqũiro ijieperota tiqũiro marine tiqũiro yequina ijigũ yere”, ni yahu dutiri Cohãcjũ usãre. 20 Sa yena Cristo yere buheanaja tiqũiro cũrina ijiaja usã. Cohãcjũ musare tiqũiro yahuboriro saha usã pehe ohõ saha ni musare yahuaja: Cristore yahu basana niaja. Sa yena musare ihña tuhtieragũ yeaja. Cohãcjũre musa ihña tuhtiyere to punota duhuya. 21 Cristo tiqũiro ñañene yerapegũta Cohãcjũ pehe tiqũirore mari ñañe buhirire yaria dutiahye. Sa yero mari ñañe buhirire buhiri dahreahye Cohãcjũ tiqũiro pehere. Sa yero Cristo yequina mari wahagũ Cohãcjũ yero saha quehnoana marine ijigũ yere tiqũiro.

6

1 Cohãcjũre yedohona ijiaja usã. Sa yena ahrire tutuaro musare ye dutiaja usã. Cohãcjũ yere quehnoañe buheyere musa tuhoriro sahata yeya musa. Musa tuhoriro sahata musa yeragũ ti musa tuhori duhseati ijierare. 2 Ohõ saha nine Cohãcjũ:

Musare yũhu quehnoano yeati pjeere musa siniñene tuho yuhtiitja. Sa yegu musare yũhu yũhdũoati decore musare yedohoutja, nine tiqũiro.

Tuhoya musa. Yojoꝑure Cohãcjũ musare tiqũiro quehnoano yeati pje ijire. Yojoꝑure Cohãcjũ musare tiqũiro yũhdũoati deco ijire.

3 Ne mehenogã apequinare ñano yeraja usã. Apequinare ne ñano ni yahuducueraja, “Quehnoañe buheye pehere cahmedari”, nina. 4 Sa yena Cohãcjũ cahacjãna usã ijiyere musare masigũ ye duaja. Sa yena ohõ saha ijiaja usã: Ñano yũhdũna, apee borore cuoerana sa tuhotu cjã. Usãre tiquina ñano yepegũta usuaro marieno ijiaja. 5 Ohõ saha ñano yũhdũu usã: Masa usãre quẽgũ, peresu tiquina yegũ, peyequina masa usãre wejẽ duagũ tiquina sañuducugũ ñano yũhdũu usã. Usã tutuaro dahra wahyia yũhdũna, wũjua purĩpepegũta carĩedana, ujuã ahbana ñano yũhdũu. 6 Numia mehna ñano yeru. Sa yena Cohãcjũ yere quehnoano masiñe mehna buhei musare. Sa yena ne usueru usã. Sa yena quehnoano cahĩñe mehna yei usã musare. Sa yena Cohãcjũ cahacjãna usã ijiyere musare masigũ yena nii usã. Espĩritu Santo tiqũiro yedohoye mehna Cohãcjũ cahacjãna usã ijiyere masigũ yena nii musare. Sa yena poto musare usã cahĩgũ ihñana, tiqũiro cahacjãna usã ijiyere masine musa. 7 Sa yena quehnoañe buheyere musare poto usã buhegũ ihñana, Cohãcjũ tutuaye mehna usã yegũ ihñana tiqũiro cahacjãna usã ijiyere masine musa. Quehnoañe pehe ijipihtiyẽ usã yeri usã wamoa yero saha ijire quehnoano usã cahmotati pehe. Tire quehnoañene yena wafĩnore usã cahmotana niaja. Sa yena ti quehnoañene usã yeri mehna

tiquirore usã yuhducaja.

⁸ Apequina usãre ño peore. Apequina pehe usãre ño peoerare. Apequina ñano ni yahuducure usãre. Apequina pehe quehnoano ni yahuducure usãre. Poto usã buhepegãta “Ni mehoñequina ijire”, ni yahusãre apequina usãre. ⁹ Apequina usãre ihña masiñequina yero saha yere. Ihuqẽ tahari usãre masiñequina yero saha yere. Usãre tiquina wejẽ duepegãta catiniaja usã. Ihñaña usãre. Ijirota ijire. Tiquina wejẽ dutinohrina ijiepenata, yarieraniaja usã. ¹⁰ Usã ihquẽ tahari buña witina ijiepenata, sa bucueducuaja. Pejecoña ijiepenata apequina quehnoañe buheyere buhena tiquinare pajiro doeri cjẽne usã ohoboro saha yena niaja tiquinare. Apee boro cuoena ijiepenata, potota Cohãcjũ ye pehere cuo peho cjã usã.

¹¹ Ne Corinto cjãna yuhũ acaye, musare quehnoano mehna yahu peho ojoa usã musare. Musare tutuaro cahña, sa yahuu musare. ¹² Usã pehe musare cahĩ duhueraja. Musa pehe usãre cahĩeda cjũre. ¹³ Sa yegu pohna tigu yuhũ pohnare yuhũ yahuboro saha musare yahutja: Musare usã tuhoturiro sahata musa gũhũ sata quehnoano tuhutuya usãre. Sa yena usãre cahĩña musa.

Cristore cahmeeñequinare piti ti dutierahye Pablo

¹⁴ Sa yena Cristore cahmeeñequina mehna sa piti tiducueracãhña. Tiquina mehna cjãna ijieracãhña. Ihcãno saha ijierare musa. Quehnoañene yeriquiro ñañene yeriquiro mehna quehnoano iji masiedare. Cohãcjũre cahmeeñequina Cohãcjũre cahmeeñequina mehna quehnoano cahme piti ti masiedare. ¹⁵ Sa yero Cristo watĩno mehna ihcãno saha tuhotuerare. Sa yero Cristo yaquiro, Cristore cahmeediquiro mehna quehnoano cahme piti ti

masiedare. ¹⁶ Cohãcjũ wuhũpu “Cohãcjũ ijire”, tiquina niñe queoyere mari cuogũ ñarĩne. Ti wuhũpu ti queoyere mari cũgũ quehnoaedare. Ti yero sahata Cristo yequina Cristore cahmeeñequina mehna mari piti tiducugũ gũhare ñarĩne. Ti cururi pua curua ihcãno mehna iji masiedare. Cohãcjũ catiriquiro tiquiro ya wuhũ yero saha ijiaja mari. Ti wuhũpu tiquiro ijiro saha mari mehna ijire tiquiro. Ohõ saha nine Cohãcjũ:

Tiquina mehna ijigutja yuhũ. Sa yegu tiquina watoa sa ijiducugutja. Yuhũ Cohãcjũ tiquina puhto ijigutja. Sa ye tiquina pehe yequina masa ijjeta, nine tiquiro.

¹⁷ Sa yero ohõ saha ni nemore tiquiro mari puhtoro:

Ñañequina mehna tojoeracãhña. Sa yena tiquinare piti tieracãhña. Cristore cahmeeñequinare tiquina ñañene ne piheracãhña. Sa yegu yuhũ pehe musare piti tigutja. ¹⁸ Sa yegu musa Pacũ ijigutja. Musa pehe yuhũ pohna ijinata, nine Cohãcjũ mari puhtoro tutua yuhũariquiro.

7

¹ Yuhũ acaye, yuhũ cahña, musare ahrire yahutja: Ahri ijipihtiyere Cohãcjũ tiquiro sa ni yahugũ tuhona ijipihtiyere mari ñañene yeyere duhuuhna. Sa yena mari ñañene wacũne gũhare duhuuhna. Sa yena Cohãcjũre quehnoano ño peoye mehna ñano yero marieno ijiihna mari.

Pablo bucueye mehna yahuahye Corinto cjẽnare

² Quehnoano mehna ijiya musa usã mehna. Ne mehenogã mehna ñano yegu usã musare. Sa yena usã buheyere mehna musare ñano

yegū yeru usā. Ne ihcāquiro mūsa mehna cjanore ni mehoñe mehna wapa cahmedu. ³ Sa nigū “Usāre wapa yerari. Sa yena buhiri tina ijire mūsa”, nigū niedaja mūsare. Mūsare yahu tuhasau. Mūsare cahñaja usā. Catinina ihcā curuata ijiaja mari. Mari yariari batopu gūhare ihcā curuata ijinata mari. ⁴ Quehnoano mūsa yerire masiaja yūhu. Sa yegu mūsare wacūdoqueogu bucueaja. Sa yena usā ñano yūhdari watoa mūsa pehe yūhare pajiro bucuegū yeri.

⁵ Sa ye Macedonia yehrapu usā esari bato topu ijina, ne soeru usā. Topure ñano yūhdūu usā. Apequina usā mehna cahmeque duari. Sa yena “Cristo yere duhuari”, nina Cristo yequina pehere cuesā nii usā. ⁶ Usā sa ñano yūhduepegūta Cohācjū usāre bucuegū yeri. Tiquiro bujua witiyequinare bucuegū yeriquiro ijire. Sa yero Tito usā cahapu tiquiro wihiro mehna usāre bucuegū yeri Cohācjū. ⁷ Tito wihigū ihñana bucuei. Ahri gūhare bucuei. Mūsare tiquiro quiti yahugū gūhare tutuaro bucuei usā. Yūhare mūsa ihña duarire yahuri usāre. Yūhare mūsa wacūe ti bujua witiri gūhare yahuri tiquiro. Tiquiro sa ni yahugū tūhogu tutuaro bucuei yūhu.

⁸ To pano yūhu ojoari pū mehna mūsare bujua witiḡū yemi. Sa yerigu ijiepegūta bujua witiaraja yūhu pehe. Ti pūre mūsa buheri bato bujua witiñohti mūsa. Sa yena mehenogā bujua witi, duhuñohti mūsa. Sa yegu coā ojoa mahtagu bujua witipegūta yojopure bujua witiaraja. ⁹ Yojopu pūritare bucueaja yūhu. Mūsa bujua witiḡū tūhogu bucueraja. Sa ijiepegūta sa bujua witina, quehnoañe pehere comesañohti mūsa. Sa yero mūsa bujua witiḡū ihñano, Cohācjū pehe mūsare quehnoañene comesagū

yere. Sa yena mūsare bujua witiḡū yena, ñano ye dojomehnena niedu usā mūsare. ¹⁰ Sa yena Cohācjū tiquiro cahmeno saha bujua witina, mari ñañene bujua witinata. Quehnoañe pehere comesanata. Sata mari bujua witiḡū ihñano marine pecapu wahaborinare yūhdūore Cohācjū. Mari sa bujua witiḡū quehnoarīne marine. Cristore cahmeeñequina pehe tiquina ñañene bujua witiarapeta, sa bujua witi maca cā, pecapu wahatiquina ijinine.

¹¹ Mūsa pehe Cohācjū tiquiro cahmeno saha bujua witiñohti. Mūsa sa bujua witina ohō saha yeñohti mūsa: Yojopure ñañene yeyequinare sa ihña cāedañohti mūsa. Tiquinare duhu dutiñohti mūsa. Sa yena tiquina ñañe yeyere cueñohti mūsa “Tiquina yero saha yeari”, nina. Sa yena yūhare ihña duañohti mūsa. Sa yena ñañene yeriquirore buhiri dahre duañohti mūsa. Ti ijipihtiyere mūsa yena yojopure poto yena mūsa ijiyere masigū yeri mūsa usāre. ¹² Panopu ñano yeriquirore mūsare yahu ojoaepēgūta tiquirore yedohogu tagu sa ni yahu ojoaeru. Tiquiro ñano yenohriquiro gūhare yedohogu tagu sa ni ojoaeru. Mūsa pehere yedohogu tagu ti pūre ojoau. Usāre quehnoano ño peore mūsa. Tire mūsa ño peorire quehnoano mūsa masiatire ti pūre ojoau mūsare. Cohācjū tire mūsare masigū cahmene. ¹³ Sa yena Tito mūsa yerire tiquiro quiti yahugū tūhona tutuaro bucuei usā.

Tito gūhu tutuaro bucueri. Tiquirore mūsa quehnoano mehna mūsa piti cagū tūhona, mūsa mehna tiquiro bucuereire tūhona usā gūhu quehnoano bucuei. ¹⁴ Coā waropu mūsa cahapu tiquiro wahato pano mūsa mehna yūhu bucuereire, quehnoana mūsa ijirire yahuu tiquirore. Sa yena yūhu nidiro sahata quehnoano yeñohti

musa tiquireore. Sa yegu tiquireore yahu nidire bue tieraja. Musare poto sa yahuducujaja usã. Ohõ saha Tito gũhare poto usã yahuu musare tiquireo ihñariro saha. ¹⁵ Musa cahapu tiquireo esagũ ño peoye mehna tiquireore piti cañõhti musa. Sa yena quehnoano yuhtina yuhduducaro mariena musa ijigũ ihñãñõhti tiquireo. Sa yero musare cahĩ nemore tiquireo. ¹⁶ Yojopure quehnoano yuhtina, Cohãcjũ cahmeno saha musa quehnoano ye pehona musa ijigũ quehnoano masiaja yahu. Sa masigũ tutuaro bucueaja.

8

Cristo yequina ijina, pejecoyequinare sa oho cãno cahmene marine

¹ Usã acaye, ahri yahu yahuatire musare masigũ cahmeaja usã. Cristo yequina Macedonia yehpa cjẽna Cohãcjũ cahĩñe mehna tiquireo paja ihñãñe mehna tiquina yerire musare yahutja. ² Tiquina ñano yuhdũepeta, niñeru marieñequina ijiepetata cahĩno marieno sa oho cãhri pejecoyequinare Jesu yequinare. Cristo mehna tutuaro bucueyequina ijiye, tiquina Judea yehpa cjẽnare quehnoano mehna tiquina cõoyere sa oho cãhri. ³ Musare niita niaja. Tiquina cõoro puno ohori. Ijierare. Bui cjũnogã ohori. Usã sini basaarepegũta pejecoyequinare ohori tiquina. ⁴ Cohãcjũ yequinare pejecoyequinare tutuaro yedoho duaye, tiquinare tiquina ohoatire nea dutiri usãre. ⁵ “Ohõ puno ohoeta”, tiquinare usã ni tuhoturiro bui cjũnogã ohori tiquina. Ohõ saha yeri tiquina: Coãwarore niñerure tiquina ohoatopano mari puhtoro Cristo cahmeno saha ye pehori jiri tiquina. Sa ye Cohãcjũ cahmeno saha usã gũhare ño peoye mehna yuhtiri jiri. Sa

yeyequina ijiye tiquina niñerure ohori.

⁶ Tiquina sa oho tuhasagũ ihñana Titore usã pehe ohõ saha nii: “Corinto cjẽnare muhu buhe ducariro sahata quehnoano mehna pejecoyequinare tiquina ohoatire buhe pehoya”, nii usã tiquireore. Musa gũhu apequinare paja ihñana, musa yedohoatire sa nii tiquireore. ⁷ Sa yena musa pehe ijipihtiyere quehnoano yena iji tuhasare: Cristore potota quehnoano wacũ tutuare musa. Sa yena tiquireo yere quehnoano yahure musa. Sa yena Cohãcjũ yere quehnoano masine musa. Sa yena Cohãcjũ cahmeno saha tutuaro ye duare musa. Sa yena usãre cahĩne musa. Ohõ saha quehnoano yena iji tuhasare musa. Musa sa quehnoana ijiepegũta mehenogã duhsare musare. Pejecoyequina puhtare musa paja ihñagũ cahmeaja usã. Sa yena cahĩno marieno tiquinare quehnoano mehna musa pajiro ohogũ cahmeaja usã.

⁸ Sa nigũ musare dutigũ niedaja. Sa ni yahugũta niaja musare. Apequina pejecoyequinare tiquina tutuaro yedohorire musare yahugũ niaja. “¿Potota paja ihñana ijiajari musa?” ni, masi duagu niaja. ⁹ Mari puhtoro Jesucristo pehe marine tiquireo paja ihñarire masine musa. Ti ijirota ijire. Tiquireo ahmũsepu pajiro cõoriquiro ijieperota ahri yehpau ahtaro pejecõoriquiro wahahye. Sa yero mari ye ijiatire yariaro pejecõoriquiro wahahye. Ohõ saha wahahye tiquireo mari pehe tiquireo yere pajiro mari cõoatire, tiquireo mehna mari sa ijiducuatire.

¹⁰ Musare sa yahugũta niaja. Ohõ saha tuhotuaja yahu pehe: Ihcã cahma wahare musa oho duagũ. Musa pehe pejecoyequinare oho dua mahtamedi. Sa yena tiquinare oho mahtaborina ijimedi musa.

11 Sa yena m̄sa ye duariro saha yojop̄re sohtori tiya. M̄sa oho dua mahtariro saha yojop̄re quehnoano oho pehoya. Sa yena pajiro c̄ona ijina pajiro ohoya. Mehenogã c̄ona ijina mehenogã ohoya. 12 Tutuaro m̄sa oho duagũ tire m̄sa ohorire Cohãcjũ bucuero. Sa yena noho m̄sa c̄oro puno ohoya. M̄sa ohoro punota bucuero Cohãcjũ. “Pejec̄oyequinare m̄sa c̄oye yãhd̄oro ohoya”, m̄sare nino niedare Cohãcjũ.

13 “Pejec̄oyequinare ohoya”, nigũ tiquinare pajiro c̄o dutigũ niedaja. Sa yegũ m̄sa pehere pejec̄oro ye dueraja. 14 M̄sare ihcãno saha c̄o dutigũ sa nigũ niaja. Yojop̄re m̄sa pehe pajiro c̄ore. Sa c̄ona apee boro marieñequinare oho masine m̄sa. Came m̄sare apee boro mariedagũ tiquina gũhũ oho masine m̄sare. M̄sa sa cahme ohona ihcãno saha c̄onata ijipihtina Cristo yequina. 15 Ohõ saha nine Cohãcjũ yere tiquina ojoari p̄p̄r̄: “Pajiro nediquiro gũhũ apequina bui cjũnogã c̄oerari. Mehenogã nediquiro gũhũre ne mehenogã dũhsaerari”, nine Cohãcjũ yere tiquina ojoari p̄p̄r̄.

Tito tiquiromo mehna cjẽna mehna Corintop̄r̄ wahahye

16 Sa ye m̄sare yãhũ yedohoriro sahata Tito gũhũ m̄sare yedoho duare. Cohãcjũ pehe tiquiromo yedoho duagũ yeri tiquiromo. Tiquiromo sa yegũ ihñagũ “Quehnoare”, niaja Cohãcjũre. 17 Titore m̄sa cahap̄r̄ usã waha dutigũ tiquiromo quehnoano mehna yãhtiri. Sa yero tiquiromo usã waha dutiatio pano tiquiromo basita m̄sa cahap̄r̄ tutuaro waha duariquiro iji tuhasari.

18 Tiquiromo apequiromo Jesu yaquiromo mehna piti dahrei usã tiquiromo. Tito mehna cjãnore

ijipihtiyequina apequina Jesu yequina quehnoano ño peore. Quehnoañe buheyere tiquiromo quehnoano yahuriquiro ijigũ ihñañe tiquiromo quehnoano ño peore. 19 Sa ye Jesu yequina tiquiromo cahmene usã mehna tiquiromo tinino wahagũ. Tiquina ye niñerure pejec̄oyequina cahap̄r̄ usã neagũ usã mehna waha-tiquiromo cahmene tiquiromo. Sa ye ti niñerure usã ohogũ ihñañe “Marine yedohoriquiro ijire”, nieta masa Cohãcjũre. Usã sa ohona, tiquinare tutuaro mari yedoho duarire masigũ yenata tiquinare. 20 Sa yena ahri niñerure, pajiro Jesu yequina tiquina ohorire neana, quehnoano ihña ihbonata tiquina ohorire, “Usãre yahusãri”, nina. 21 Mari pah̄toro tiquiromo ihñonop̄r̄ queoro, quehnoano ye duaja usã. Sa yena masa tiquina ihñono gũhũre queoro ye duaja.

22 Sa yena tana apequiromo mari acaȳrore ohonatja Tito gũhũ mehna. Usã piti dahreriquiromo peye tahari apequinare tiquiromo quehnoano yedohogũ ihñañe usã. Sa yero yojop̄re m̄sa pehe apequinare m̄sa yedoho duagũ ihñano to pano tiquiromo yeriromo yãhd̄oro quehnoano m̄sare yedoho duare. 23 Tito pehere m̄sare yahutja. Tiquiromo yãhũ mehna cjãno ijire. M̄sare yãhũ yedohogũ tiquiromo yãhũ mehna dahreriquiro ijire. Apequina tiquiromo mehna wahatiquina Jesu yequina tiquina bese ohoriquina ijire. Cristo yere tiquina yere, apequina tiquiromo ño peoatire. 24 Sa yena cahñno mehna quehnoano mehna tiquinare piti caya m̄sa. M̄sa sa yegũ ihñañe apequina Jesu yequina quehnoañequina pehe m̄sa cahññene masieta. “Quehnoano piti caeta Corinto cjẽna”, ni yahu tuhasar̄ apequinare. M̄sa sa quehnoano piti

cagū ihñañe tiquina usā yahuri potō ijigū masieta apequna Jesu yequina.

9

Jesuyequinare pejecoyequinare tiquina ohoatire yahuahye Pablo

¹ Sa yena Cohācjū yequinare m̄sa yedohatire m̄sa ohoatire masi tuhasare m̄sa. ² Apequnare m̄sa yedoho duagū masiaja yūh. Sa masigū Macedonia yehpa cjēna oho saha ni yahuu: “Corinto cjēna Jesu yequina pehe apequnare yedoho dua tuhasari. Ihcā cūhma yūhdure tiquina yedoho duari”, ni yahu tuhasa tiquinare. M̄sa sa yedoho duagū tūhoye peyequina tiquina gūh pejecoyequinare yedoho duari. ³ M̄sare sa ni yahugū yojopure ahriquinare mari acayere m̄sa cahapū ohogū tagū niāja, yūh yahuriro saha m̄sa yeato. Sa yegū pejecoyequinare m̄sa ohoatire m̄sa cahmecoa c̄oyuatire ahriquinare ohogū niāja. ⁴ Tiquinare ohoeragū Macedonia yehpa cjēna mehna m̄sa cahapū esagū, m̄sa ohoatire m̄sa c̄oeragū ihñagū b̄e tisāboaga yūh m̄sare. “Pejecoyequinare ohoeta”, m̄sare yūh ni tūhoturi bato m̄sa ohoeragū ihñagū b̄e tisāboaga yūh. M̄sa gūh b̄oro yūhdūboaga. ⁵ Sa yegū m̄sa cahapūre yūh esato pano tiquinare mari acayere oho m̄htagū niāja. “Pejecoyequinare ohonatja”, to pano m̄sa nidire m̄sa c̄oyuatire tiquinare oho m̄htagū niāja. M̄sa ohoatire m̄sa cahmecoa gū tiquina pehe m̄sare yahuetā. M̄sa ohoatire m̄sa c̄oyu tuhasagū bucueye mehna m̄sa oho duari ijigū masiitja.

⁶ Sa yena ahrire wacūña m̄sa: Meheñe pjerigā oteriquiro meheñe pacagā nenota. Peyē pjeri

oteriquiro peye paca nenota. (Ohō saha ijire pejecoyequinare mari ohogū. Mehenogā mari ohogū, Cohācjū mehenogā ohorota marine. Pajiro mari ohogū, pajiro marine ohorota.) ⁷ Sa yena ihquēquina m̄sa “Ohō puno ohonatja”, ni ohoya. Cahñino marieno ohoya. “Marine oho dutiri”, nino marieno ohoya. Bucueye mehna ohoyequinare cahñe Cohācjū. ⁸ Tiqiro pehe m̄sa cahmeno yūhdūoro m̄sare ohorota. Sa yena ijipihtiye m̄sa cahmedire dūhsaro marieno c̄o pehonata. Sa yero apequnare m̄sa ohogū gūhure quehnoano esa tuharota m̄sa c̄oye. ⁹ Sata nine Cohācjū yere tiquina ojoari pūpū:

Pejecoyequinare pajiro ohore tiqiro. Quehnoano mehna masare sa yeducure tiqiro, nine tiqiro yere tiquina ojoari pūpū.

¹⁰ Sa yero oteye dūca tiri bato oteriquiro tiqiro oteati capere ohore Cohācjū. Came tiqiro oterire dūca tigū yere tiqiro ihyatire. Pejecoyequinare m̄sa pajiro ohogū oteriquirore tiqiro ohoriro saha m̄sa gūhure pajiro ohorota Cohācjū. Sata m̄sare ohorota pejecoyequinare m̄sa oho nemoatire. ¹¹ Sata ijire. Pajiro ohorota m̄sare apequnare pajiro m̄sa sa ohoducuatire. Sa ye m̄sa oho dutirire pejecoyequinare usā ohogū peyequina tiquina pehe Cohācjūre bucueye mehna “Quehnoare”, nieta. ¹² Sa yena pejecoyequinare Cohācjū yequinare ohona, tiquinare yedohore m̄sa. Sa yedohona bucueye mehna Cohācjūre “Quehnoare”, tiquina nigū yenata m̄sa. ¹³ Sa m̄sa apequnare yedohogū ihñañe, Cohācjūre ño peoye mehna yahuducuetā masa. Sa ye tiquinare apequna gūhure pajiro m̄sa ohogū ihñañe Cohācjūre

“Quehnoa yuhduḡu ijire muḡu”, nieta masa. Ohō saha nieta Cristo buheye quehnoañe buheye ti nidiro sahata mḡsa yegū ihñañe, tiquinare mḡsa ohogū ihñañe. ¹⁴ Sa ye Cohācjū mḡsare tiquiro paja ihñano sahata mḡsa gūḡu tiquinare mḡsa paja ihñagū tiquina pehe mḡsare cahmeeta. Sa cahmeñe mḡsare sini basaeta Cohācjüre. ¹⁵ Cohācjū marine quehnoa yuhduaro yerota. Tiquiro sa yeatire masina “Quehnoa yuhduare”, niihna mari tiquirore.

10

Jesu cūriquiro tiquiro ijyere yahuahye Pablo

¹ Yojoḡare yuhḡu Pablo, mḡsare yahutja. Ihquēquina mḡsa mehna cjēna ohō saha nine yuhure: “Mari mehna ijiro apequinare yuhduḡuca dueriquiro, ihyo ijiriquiro yero saha ijire. Sa ijieperota ape sieḡu ijiro marine cuero marieno tuhti ojoadoqueore”, nine mḡsa ihquēquina yuhure. Cristo pehe ne usueriquiro, masare quehnoano yeriquiro ijire. Tiquiro yero saha yuhḡu gūḡu iji duaja. ² Sa yegū mḡsare ahrire tutuaro mehna yahutja: Mḡsa cahapḡu yuhḡu esagū quehnoano yeya mḡsa “Pablo usāre tuhtiari”, nina. Ihquēquina yuhure ohō saha nine: “Tiquiro esa tuharo, Cohācjū dutiro marieno yere”, nine yuhure ihquēquina. Sa niñequina pūritare tuhtiboaga yuhḡu.

³ Usā gūḡu ahri yehpa cjānata ijina niaja. Sa ijiepenata ahri yehpa cjēna tiquina esa tuharo tiquina yero saha yeraja usā. ⁴ Surara cahme wejē tiquina yuhduḡucariro saha usā pehe ñañene yuhduḡuca duaja. Ti ñañene ye dueraja. Usā sa yegū usā wamoa ahri yehpa cjēna tiquina wamoa yero saha ijierare. Surara tiquina wamoa tiquina cuoro saha usā pehe Cohācjū

tutuayere cuoaja. Ti tutuaye mehna Cohācjüre cahme dutieyequinare cohāja usā. Masa tiquina esa tuharo tiquina masiñene ti duhseati ti ijieragū masigū yeaja usā ti tutuaye mehna. ⁵ Sa yena ijipihtieyequina tiquina esa tuharo tuhotueyequinare Cohācjüre tiquina masi dutierarire duhugū yeaja usā. Sa yena ti tutuaye mehna Cohācjüre cahmeeñequinare Cristore quehnoano yuhtieyequina tiquina ijigū yeaja usā. Cristo cahmeno saha tiquinare tuhotugū yeaja usā. ⁶ Sa yena apequina mḡsa mehna cjēna Cristore tiquina yuhduḡucagū ihñana tiquinare buhiri dahrenatja usā. Mḡsa pehe mḡsa quehnoano yuhtiri bato Cristore yuhduḡucayequinare sa buhiri dahreatinata ijinata mḡsa.

⁷ Yuhḡu pagū dihitare masine mḡsa. Yuhḡu ijyie tiye pehere ne masiedare mḡsa. “Cristo yequina ijiaja”, nina ijina, ohō saha masiña mḡsa: Usā gūḡu mḡsa yero saha Cristo yequinata ijiaja. ⁸ “Mari puhtoro ye buheye quehnoañe buheye buhe dutiro, cūri usāre”, nigū peye tahari mḡsare sa ni yahuepegūta buḡe tieraja yuhḡu. Usāre sa buhe dutiro mḡsare yedohanajare cūri usāre. Mḡsare dojomehneanajare cūno niedari usāre. ⁹ Ohō saha poto ni yahuaaja mḡsare “Cueari”, nigū. Ahri yuhḡu ojoari pūre ihñana mḡsa ihñana mariagū cahmedaja. ¹⁰ Ihquēquina mḡsa mehna cjēna ohō saha nine: “Pablo ojoaro duḡero purñiquiro yero saha ojoa mḡjare marine. Sa ijiriquiro ijieperota mari mehna ijiro ne sa ijiaga niediquiro ijire. Pejecuoriquiro yero saha ijire. Sa yero marine tiquiro yahuducuye duhseati ijierare”, nine ihquēquina. ¹¹ Sa niñequinare ohō saha ni yahutja: Mḡsare usā ojoa ohoriro sahata yahunatja mḡsare mḡsa cahapḡu ijina. Sa yena “Ohō saha

yenata”, usã ni ojoariro sahata yematja usã, mûsa cahapû ijina.

¹² Ihquëquina mûsa mehna cjêna “Quehnoano masi pehona ijiaja”, ni yahuducure tiquina basi. Yohou, quehnoa yuhduaro masiñequina ijiajari tiquina sa ni yahuducuye. Usã pehe tiquina yero saha ne sa nisi. Tiquina basi cahme ihña piti ca “Mari pehe quehnoa yuhduacana ijiaja”, nine tiquina basi. Sa ni maca cãne nine tiquina basi. ¹³ Usã pehe tiquina yero saha yesi. Cohãcjû usãre buhe duti tiquiro cûri dihutare yahuaja usã pehe mûsare. Apequina ye dahrayere “Yei”, nina niedaja. Cohãcjû mûsare buhe dutiro usãre cûri. ¹⁴ Ohõ saha nina, ni mehona niedaja usã. Quehnoañe buheyere Cristo yere mûsare buhe mûhtana esah usã. ¹⁵ Sa yena apequina ye dahrayere “Usã pehe tire yei”, ne niedaja usã. Sa yena Cristore mûsa wacû tutua nemogû cahmeaja usã. Sa cahmena mûsare buhe nemo duaja usã. Sa buhena Cohãcjû tiquiro cûriro punota buhe duaja mûsare. ¹⁶ Sa yena mûsa ya yehpa yuhduropû quehnoañe buheyere yahuna wahanatja. Sa wahana apequina tiquina buheri bato esana, “Usã buhei”, nisi usã.

¹⁷ Mari yerire “Usãta yeaja”, niedaro cahmene. Mari pûhtoro Jesu tiquiro yeri pehere ihñana bucuero cahmene. Ti pehere apequinare yahuro cahmene. ¹⁸ Masa tiquina basi “Usã pehe yei”, tiquina nigû bucuere Cohãcjû. Mari pûhtoro Cristo “Ahriquina quehnoano yeri”, tiquiro ninohriquina pehere bucuere Cohãcjû.

11

“Jesu cûrina ijiaja usã”, ni mehoñequinare yahuahye Pablo

¹ Yuhû ijije tiyere yahugû tuhõ masiegû yero saha yahugû

niaja. Yuhû ijije tiyere yahugû mehenogã buë tiaja. Sa yahurigu yuhû ijiepegûta yuhure tuhoriña mûsa yojopûre. ² Cohãcjû mûsare tiquiro cahino saha tutuaro cahñaja yuhû gûhû mûsare. Sa yegu mûsare cuesãja yuhû “Ñañene yeari”, nigû. Nuhmino omoca dũhteatocoro umano mehna ijiericoro quehnoaricoro ticoro ijiro saha quehnoana mûsa ijigû tutuaro cahmeaja, Cristo dihutare mûsare cahme dutigu. Sa yegu Cristo cahapû mûsa wahagû ñañe mariena mûsa ijigû cahmeaja.

³ Apequina ñañequina mûsare ni mehoñe, sijoro saha ijije buheyere cahmegû yeboaga mûsare. Pinono Evare ni mehono tiquiro masiñe mehna ticorore Cohãcjûre yuhduacagû yeahye panopûre. Tiquiro sa yeriro sahata yojopûre ñañequina mûsare ni mehoñe, Cristore mûsare quehnoano ño peoeragû yeboaga. Sa yegu mûsare cuesãja. ⁴ “Ohõ saha ijiriquiro ijire Jesu”, tiquina esa tuharo sijoro saha ni meho buhepegûta tuhomene mûsa. Mûsare usã buheriro saha ijierapegûta mûsare ni meho buheyequinare tuhomene mûsa. Sa yena “Ohõ saha ijiriquiro ijire Espiritu Santo”, tiquina esa tuharo sijoro saha ni meho buhepegûta tuhomene mûsa. Usã mûsare buheriquiro Espiritu Santo waro ijire. Tiquiro pehere queoro tiquina yahuerapegûta mûsare ni meho buheyequinare tuhomene mûsa. Tiquina sijoro saha ijije buheyere tiquina ni meho buhegû quehnoañe buheyere tiquina buherapegûta tire tuhomene mûsa.

⁵ Mûsa mehna cjêna “Jesu cûrina ijiaja”, nimediquina yuhure masi yuhduacaerare. Tiquinare docadûcaeraja yuhû. ⁶ Quehnoano yahu mihnigû ijieraboaga yuhû. Quehnoano yahu mihniedapegûta Cohãcjû yere quehnoano masiaja.

Yũhũ sa masiñene peye tahari m̄sare quehnoano masigũ yei.

⁷ Quehnoañe buheyere Cohãcjũ yere m̄sare buhegũ ne wapa cahmedũ. M̄sare yedoho duagũ wapa cahmedũ. Ihyo ijiriquiro yero saha ijii yũhũ. ¿Yũhũ sa wapa cahmedagũ quehnoaedajari, m̄sa tũhotugũ? ⁸ M̄sare yũhũ buhegũ apeye macari cjẽna Jesu yequina yũhũre niñerure ohori. Tiquina sa ohogũ ti niñerure ñehei sinino marieno m̄sare buhegũ tagũ. M̄sa pehe yũhũre m̄sa ohoborire tiquina pehe yũhũre ohori. ⁹ M̄sa mehna ijigũ apee boro yũhũre dũhsaepẽgũta m̄sare niñerure ne siniedũ. Mari acaye Macedonia yehpa cjẽna Jesu yequina ijipihtiye yũhũ cahmedire ne wihiri yũhũre. Panopũre m̄sare ne cariboerũ yũhũ. Camerũ gãhũre m̄sare ne caribosi. ¹⁰ Cristo potota tiquiro yahuriro sahata yũhũ gãhũ yojopũre m̄sare potota yahugũ niaja. Ijipihtiro Acaya yehpapũ ijieyẽquinare ahri m̄sare yũhũ siniedarire sa yahuducugũtja. ¹¹ ¿M̄sare yũhũ siniedarire apeqũinare yũhũ sa yahuducugũ tũhona, dũhse tũhotuajari m̄sa? ¿Pablo sa yahuro usãre cahiedaro niaga”, ni tũhotuboagari m̄sa? Ijierare. M̄sare cahĩaja. M̄sare yũhũ cahĩgũ Cohãcjũ masine.

¹² Wapa cahmeno marieno m̄sare yũhũ buhe dũcariro sahata sohtori tiitja. Yũhũ buheri wapa yũhũ wapa negũ ihñañe tiquina “Jesu cũrina ijiaja”, ni mehoñequina ohõ saha niboaga: “Pablo quehnoañe buheyere buhero, wapa cahmene. Sa yena usã gãhũ tiquiro yero sahata yematja”, niboaga tiquina wapa cahmeñe. ¹³ Tiquina potota Jesu cũriquina waro ijierare. Tiquinare ne cũdari tiquiro. “Jesu cũrina ijiaja”, ni mehoñe, usã yero saha ijimene. ¹⁴ Tiquina sa ni

mehoñequina ijigũ masi tuhasaja yũhũ. Satana gãhũ quehnoariquiro yero saha camesa m̄ajare. Tiquiro angel asi siteriquiro yero saha iji duaro camesamene. ¹⁵ Tiquiro sa yeriquiro ijigũ masigũ, Satanare yedohoyequina “Jesu cũrina ijiaja”, ni mehoñequina Cohãcjũre yedohoyequina yero saha tiquina camesagũ ihñagũ, ni mehoñequina tiquina ijigũ masi tuhasaja yũhũ. Yojopũre tiquina sa camesaepẽgũta pihtiri deco ijigũ ijipihtiye tiquina ñano yeri buhirire buhiri dahrerota Cohãcjũ tiquinare.

Tiquiro ñano yũhdũrĩre yahuahye Pablo

¹⁶ Pari turi ahrire m̄sare yahutja. Ne “Tũho masieniquiro ijire”, yũhũre niedacãhña. Yũhũ sa ni dutierapẽgũta yũhũre m̄sa sa ni tũhotugũ quehnoanota yũhũre. “Tũho masieniquiro ijire”, yũhũre ni tũhotuepenata tũhorĩña m̄sa yũhũre. Mehenogã yũhũ ijieye tiyere yũhũ yahugũ tũhoya m̄sa. ¹⁷ M̄sare sa yahugũ tũho masiegũ yero saha yei ni-aja. Yũhũ ijieye tiyere yahugũ mehenogã bue tiaja. Mari pũhtoro Jesu yũhũre “Mũhũ basi mũhũ ijieye tiyere yahuya”, niedare yũhũre. ¹⁸ Tiquiro sa niedapẽgũta ahrire yahutja m̄sare. Tiquina esa tuharo “Quehnoana ijiaja”, niñequina tiquina ijigũ ihñagũ yũhũ gãhũ yũhũ ijieye tiyere m̄sare yahutja. ¹⁹ M̄sa pehe tũho masieñequinare tũhona bucueye mehna ihñare m̄sa tiquinare. Quehnoa yũhdũaro masina ijiajari m̄sa pehe sa tũhona. ²⁰ M̄sare cahacjãna tiquina yegũ, m̄sa yere tiquina ehmagũ, sa ihña cãhre m̄sa. Sa yena m̄sare tiquina doca cũgũ, m̄sa wahsupũrĩre tiquina quẽgũ sa tũhotu cãhre m̄sa. ²¹ Quehnoa yũhdũaro

yeajari mäsare tiquina. Üsä pehe tiquina yero saha yuhduäcaeraja.

Sa yena tiquina yero saha yeraja. Tiquina yero saha ijierapeguta tiquina “Ohõ saha ijina ijiaja”, tiquina nigã tãhogu yuhu gũhu sata ni yahuboaga. Pari turi bue tiepeguta ohõ saha ni yahutja mäsare tja. ²² Tiquina “Hebreo masa ijiaja”, nine apequinare masi yuhduäca duaye. Hebreo masata ijiaja yuhu gũhu. “Israe masa mari Pacu tiquiro beserina ijiaja”, nine tiquina pehe. Tiquina yero saha tiquiro beserigu ijimaja yuhu gũhu. “Abrahã panamena iji turiana ijiaja”, nine tiquina tja apequinare masi yuhduäca duaye. Tiquina yero saha Abrahã panami iji turiaguta ijimaja yuhu gũhu. ²³ “Cristo cahacjãna ijiaja”, nine tiquina pehe. Yuhu gũhu Cristo cahacjãta ijiaja. Tiquina yuhduoro Cristo yere quehnoano yeaja yuhu. Yohou, sa nigã tãho masieniquiro yero saha yahuducugu ni aja. Sa yahuducugu mehenogã bue tiaja yuhu. Tiquina yuhduoro tutuaro dahra yuhu Cristo yere yegu. Peye tahari tiquina yuhduoro Cristo yaquiro yuhu ijiri buhiri peresu yeri apequina yuhure. Tiquina yuhduoro peye tahari tanari yuhure masa. Tiquina yuhduoro Cristo yaquiro yuhu ijiri buhiri masa yuhure wejẽ duamedì. Sa yegu mehenogã yuhduu yari-aborigu. ²⁴ Ihcã omope tahari judio masa yuhure ñehedi. Yuhure tiquina ñehere tahari treinta y nueve tahari yuhure tanari. ²⁵ Ihtia taha apequina yuhure ñehedi. Sa ñehefe tiquina pũrita yuhure ñano yucari mehna quẽdi. Ape taha yuhure apequina utã paca mehna doqueri. Ihtia taha yucasa mehna utãpã doque quehe sa, minii. Sa yegu ihcã deco, ihcã ñami taboa pji bui pajiri ma decorare ba pahsa. ²⁶ Peye tahari macaripare buhe

tinigu esau. Yuhu sa buhe tinigũ cua yuhduari yuhure. Yuhure minino cua yuhduari. Yuhure apequina yaquero cua yuhduari. Ya dihta cjẽna judio masa, judio masa ijieyequina gũhu yuhure ñano yero cua yuhduari. Macaripu, masa marienopu, pajiri mapu gũhure yuhure yariaro cua yuhduari. “Mũhu mehna cjãna ijiaja”, ni mehoñequina gũhu yuhure ñano yero cua yuhduari. ²⁷ Cristo yere yegu tutuaro dahrae tii. Sa dahragu ñano wahyie tii. Peye tahari yuhure wãjua ñano puriepeguta sa dahraducue tii. Ñano wãjua ahbae tii. Sa yegu ñano aco wãoe tiru. Peye tahari ihyaye bocaera tii. Yuhu suhti sañaboye gũhu ne marieda tiri yuhure. Sa yero yuhure yusua yuhduere tiru.

²⁸ Sa ñano yuhduerepeguta decoripe ijipihtiyequina apequina Cristo yequinare, masa gũhure pajiro wacũ tãhotuaja. ²⁹ Sa yegu ihcãquiro Cristo yaquiro tiquiro sa iji cãriquiro ijigũ ihñagu bujua witi-aja. Apequina Cristo yaquirore ñano ye dutiboaga. Tiquina sa yegũ ihñagu Cristo yaquirore cuesãgu, tiquina ñañequina mehna usuaja.

³⁰ Yahu duerapeguta yuhu ijiye tiyere yahugu tagu, yuhu esa tuharo tutuegu yuhu ijiye tiyere mäsare bucueye mehna yahuaja. ³¹ Cohãcjã mari pãhtoro Jesu pacuro decoripe mari ño peoatiquiro tiquirota mäsare yuhu ni mehoedagũ masine. Ahrire mäsare poto yahutja. ³² Damasco wame tiri macapu yuhu ijigũ ihñano, ihcãquiro pãhtoro yuhure ñehere duamedì. Ijipihtiyequina masa pãhtoro Areta wame tiriquiro doca ijiriquiro pãhtoro pũrita yuhure ñehere duamedì. Sa ñehere duaro ti maca cjã sahrĩno sopecaharipe surarare cohte dutimedì. ³³ Tiquina sa cohteri watoata yuhu mehna cjẽna pajiri

pūhūdupū yūhūre duhu sā, ti sahrīno cĵā sopecahagāpū yūhūre duhu dijiori. Ti sahrīno behero peherū yūhūre duhu dijiori. Tiqūina sa duhu dijiori bato duhti cāa wahau.

12

Pablo Cristo tiqūiro ihñorire yahuahye

¹ Yūhū ijīye tiyere bucueye mehna yūhū yahugū dūhseati ijierare. Sa ni yahugū mehenogā bue tiepegūta yahu nemoutja māsare. Mari pūhtoro Jesu yūhūre tiqūiro ihñorire tiqūiro masigū yerire yahutja māsare. ² Ohō saha ihñō dūcari tiqūiro yūhūre: Catorce cūhmari waro wahare yūhūre Cristo yaquirore ūhmūsepū tiqūiro ne mūjari bato. Ūhmūsepū ñahpicoha buipū yūhūre ne mūjari. Yūhū jeripohna dihitare tiqūiro negū masiedaja yūhū. O yūhū pagū gūhūre tiqūiro negū masiedaja. Cohācĵū dihita tire masine. ³⁻⁴ Sa yero paraíso wame tiropū ne mūjari yūhūre. Yūhū jeripohna dihitare tiqūiro negū masiedaja yūhū. O yūhū pagū gūhūre tiqūiro negū masiedaja. Cohācĵū dihita tire masine. Tiqūiro sa ne mūjagū esagū topare tiqūiro yahurire tūhou. Ti yūhū tūhorire masa ne masiedare. Tiqūiro yahurire yahu dutiare.

⁵ Ohō saha yūhūre tiqūiro ihñorire māsare yahugū, “Yūhū ihcūta arequinare yūhdūdcāja”, niboaga yūhū. Sa niedaja yūhū. Yūhū esa tuharo masiegū yūhū ijīyere, yūhū tutuegū yūhū ijīyere bucuegū māsare yahutja. Ti dihitare bucuegū māsare yahutja. ⁶ “Arequinare yūhdūdcāja”, māsare ni yūhū yahu duagū yūhū nidi potota ijiboaga. Sa yegū sa ni yahugū tūho masiegū ijieraboaga yūhū. Sa ijierapegūta “Ohō saha arequinare yūhdūdcāja”, ni yahusi yūhū māsare, “Cua pesa

yūhdūaro yūhūre ihñari”, nigū. Yūhūre ihñā masina ño peore mūsa. Mūsa ño peorepegūta ti yūhdūoro yūhūre mūsa ño peogū cahmedaja.

⁷ Cristo quehnoa yūhdūayere ūhmūsere yūhūre tiqūiro ihñogū ihñarigū ijigū, “Arequinare yūhdūdcāja”, niboaga yūhū pehe. Sa yūhū niedatire Satana yūhū pagūre tiqūiro duti dahregū ihñano “Quehnoanota”, nidi Cohācĵū. Yūhūre duti dahreri Satana yūhūre ñano wahagū yero. Ahri dohatiye pota sajāno purīno saha yūhūre purīne. ⁸ Ohō yūhū dohatiyere yūhūre yūhdūo dutigū sinie timi Cristore mari pūhtore. Ihtia taha sinimi. ⁹ Ohō saha ni yūhtie tiri yūhūre tiqūiro: “Ohō mūhū dohatiye pūritare mūhūre yūhdūosi yūhū. Sa mūhūre yūhdūoerapegūta mūhūre cahĵaja. Yūhū cahñīe mehna quehnoano ijīita mūhū. Dohatigū tutuegū ijigū yūhū tutuayere quehnoano ihñogūta mūhū. Tutuayequina yūhdūoro mūhū pehe yūhū tutuayere masare masigū yeita mūhū”, ni yūhtie tiri tiqūiro yūhūre. Tiqūiro sa nigū tūhogū tutuegū yūhū ijīire masigū bucueaja. Sa yegū tutuegū yūhū ijīyere māsare bucueye mehna yahutja. Ohō saha ni yahutja Cristo tiqūiro tutuaye pehere māsare yūhū quehnoano masigū yeatire.

¹⁰ Sa yegū Cristo yaquiro yūhū ijīri buhiri yūhūre purīepēgūta bucueaja. Arequina ñano yūhūre tiqūina yahu wajaepēgūta, ña yūhdūaro yūhdūepēgūta bucueaja. Yūhūre tiqūina ñano yeduceepēgūta yūhūre bujūa witiĵū tiqūina yepegūta bucueaja yūhū. Sa ñano yūhdūepēgūta Cristo tutuaye mehna ihcāno sahaja, tiquirore wacū tutuagū. Sa yegū bucueaja.

Corinto cĵēnare Cristo yequinare pajiro bujūa witi tūhotuahye Pablo

11 Yuhũ ijiye tiyere yahugũ mahenogã bue tiaja yuhũ. Yuhũ sa yahuepegũta ti mũa ye buhiri ijire. Mũa pehe yuhũ ijiye tiyere apeqũinare quehnoano yahuboaga. Yuhũ esa tuharo ijigũ dũhseacjũ ijieraboaga yuhũ. Sa ijiborigũ ijiepegũta “Jesu cũrina, masi pehona ijiaja”, ni mehoñequinare docadũcaeraja yuhũ. 12 Potota ñano yũhdũrigũ ijiepegũta Cohãcjũ tutuaye mehna ye ihñomi mũare. Sa ihñogu Jesu cũrigũ yuhũ ijiyere ihñogu nimi mũare. 13 Apeye macari cjẽnare Jesu yequinare mũa gãhũre ihcãno saha yee timi yuhũ. Sa yepẽgũta mũa pehere sijoro saha cjũnogã yemi. Mũa dihitare cariboerami. Mũa dihitare apee boro gãhũre siniedami. ¿Yuhũ sa siniedagũ ñaniajari, mũa tũhotugũ? Ti ñaĩne ijigũ ti ñaĩne boya mũa yuhũre.

14 Ahri yuhũ yahuatire tuhoya mũa. Pũa taha mũa cahapũ yuhũ esari bato pari turi waha duaja tja. Topũ esagũ mũare caribosi yuhũ. Apee borore sinisi yuhũ mũare. Mũa yere cahmedaja. Cristo ye pehere mũa yũhtigũ cahmeaja yuhũ. Masa pohne pehe tiquina pacũsmũare tiquina cahmeĩene ohoerare. Tiquina pacũsmũa pehe tiquina pohne cahmeĩe pehere ohore. Ohõ saha mũa yuhũ pohna yero saha ijina yuhũ cahmeĩe pehere ohosi mũa. 15 Sa yegũ yuhũ pũrita yuhũ cũoye pehere oho duaja mũare yedohogu tagũ. Mũa cahacjũno yero saha iji duaja mũare yedohogu tagũ. Mũa pehere yuhũ tutuaro cahĩepẽgũta yuhũ pehere mũa mehenogã cahĩne, yuhũ tũhotugũ.

16 Sa yegũ mũa mehna ijigũ mũare cariboeru. ¿Sata ijiyari yuhũ, mũa tũhotugũ? Yuhũ sa ijiepegũta ihquẽquina mũa mehna cjẽna ohõ saha niboaga: “Pablo apee borore marine ne duaro ni mehorĩ marine”, niboaga. 17 ¿Mũa

sa nidiro saha yerigu ijigũ, dũhse tire yeari yuhũ, mũa ihñagũ? ¿Mũa cahapũ yuhũ ohoriquina yabe borore yuhũre ni meho ehma basari tiquina mũare, mũa ihñagũ? Ni meho ehmedari jiri. 18 Sohõ ijiri pjepũ mũa cahapũ Titore waha duti tuhasau tiquirore. Sa yegũ apeqũirore Cristo yaquirore tiquiro mehna piti dahre ohou. ¿Tito apee borore mũare ni meho ehmarĩ, mũa ihñagũ? Ni meho ehmedari jiri. Tiquiro yuhũ yero saha Cohãcjũ cahmeno saha yeriquiro ijire. ¿Sa yero yuhũ yero saha yerari tiquiro, mũa ihñagũ? Yuhũ yero saha yeri jiri.

19 “Ñano yeraja usã”, ni cahmotana niedaja usã. Cristo yequina ijiaja. Sa yena Cohãcjũ tiquiro ihñonopũ mũare yahuna niaja. Yuhũ acaye, yuhũ cahĩna, mũare yahuu mũa pehere yedoho duana. Mũare yahuna, usã pehere mũare cahmegũ yena niedũ. 20 Topũ yuhũ esagũ yuhũ cahmeno saha yerapena ijiboaga mũa. Sa yegũ mũare tutuaro cuesãja. Sa yegũ mũa cahmeno saha yerigu ijieraboaga yuhũ gãhũ, topũ esagũ. Sijoro saha mũa yegũ ihñagu yahutja mũare. Topũ yuhũ esagũ mũa pehe cahme dũse tini wiana, apee boro tiquina cũogũ ihña coona, duita usuana, mũa esa tuharo apeqũinare yũhdũdũca duana, apeqũinare ñano yahuducuna, ñano quiti yena, “Apeqũinare masi yũhdũdũcaja”, nina, mũa cahmecoanore dojomehnena ijiboaga mũa. “Tire yeari”, nigũ cuesãja yuhũ mũare. 21 Topũ yuhũ esagũ yuhũre mũare bue tisãgũ yeboaga Cohãcjũ. Sa yegũ ijipihtiyequinare panopũ ñano yeyequinare, tiquina ñaĩne bujũa wĩtieyequinare ihñagu, tutuaro bujũa wĩtiitja yuhũ. Numia mehna ñano yeyequinare, mũna

mehna ñano yeye numiare, wñana tiyequinare, ñañene tutuaro cahmeñequinare ihñagu buña witiitja yuhñ.

13

Pablo yahu bato tiahye

¹ Yojoþure mñsa cahapñ wahagñ ihtia taha esagñtja topñre. Pññ taha topñre esa tuhasañ. Sa yegñ mñsare ahrire yahutja. Ohñ saha nine Cohñcñ yere tiquina ojoari pñpñ: “Ihcñquiore mari buhiri dahreato pano ihtiaro tiquiore yahusñno cahmene. Ihtiaro mariedagñ pñaro tiquiore yahusñno cahmene. Tiquina sa yahusñri bato buhiri dahre masiaja mari”, nine Cohñcñ yere tiquina ojoari pñpñ. ² Panopñre ñano yerina mñsa ijigñ mñsare, ijipihtiequina apequina gñhñre pari turi ahrire cuaro mehna yahutja. Ihcñ taha mñsa cahapñ pari turi esagñ mñsare ahrire yahuu. Yojoþure mñsa mehna ijieragñ pari turi mñsare ahrire yahutja: Yojoþure mñsa cahapñre esagñ, ñano yeyequinare potota buhiri dahregñtja yuhñ. ³ Sa yeitja Cristo yuhñ mehna tiquiwo buherire mñsa ihñno dutigñ. Cristo pehe mñsare dutiriquiwo tutua yuhñdñariquiwo ijire. Sa yero tiquiwo tutuayere ihñore mñsare. ⁴ Mari yero saha pagñ tiro, tiquiwo tutueriquiwo ijiro, curusapñ yari-ahye. Sa yarieperota Cohñcñ tutuaye mehna catiriquiwo ijire tiquiwo yojoþure. Tiquiwo curusapñ ijiro tiquiwo tutuerariro saha usñ gñhñ tutuena ijiaja. Sa yena usñ esa tuharo mñsare yedoho masiedaboaga. Sa yena Cohñcñ tutuaye mehna ijinata mñsare yedohona tana.

⁵ Sa ye mñsa pehe mñsa basi ohñ saha ni tuhötuya. “¿Potota Cristore wacñ tutuajari yuhñ?” ni tuhötuya mñsa. ¿Potota Cristo

mñsa mehna cñño ijiajari? Tiquiwo ijieragñ tiquiwo yequina waro ijierare mñsa. Tiquiwo yequina ijierana ni mehona ijire mñsa. ⁶ Usñ pehe “Jesu yequina ijiaja”, ni mehona ijieraja. Tiquiwo yequina waro ijiaja usñ. Tire mñsa masigñ cahmeaja yuhñ. ⁷ Sa yegñ mñsa ñano yeratire Cohñcñre sini basaja mñsare. Sata sini basaja usñ mñsa quehnoañene mñsa yeatire. Mñsa sa yegñ ihñana usñ ohñ saha ni boaga: “Usñ pehe tiquinare quehnoañequina wahagñ yei usñ”, ni boaga usñ apequinare usñre ño peo dutina. Sa ño peo dutieraja usñ. Sa yena Cohñcñre sini basana, mñsa ye ijiatire sini basana niaja. Apequina usñre “Ni mehoñequina ijire”, tiquina niepegñta quehnoañene mñsa yegñ pñritare cahme yuhñdñaja usñ. ⁸ Ijipihtie mñsa quehnoañene yegñ cahmeaja usñ. Cohñcñ yere quehnoañene dojomehne masiedaja usñ. ⁹ “Cristo cahmeñene yeaja usñ”, ni ihñno masiedana, tutueyequina yero saha ijiboaga usñ, mñsa ihñagñ. Quehnoanota. Quehnoañene yena mñsa pehe tutuana ijire. Mñsa sa ijigñ ihñana tutueyequina yero saha usñ ijiepenata bucueaja. Sa yena quehnoana mñsa wahatire Cohñcñre sini basana niaja usñ mñsare. ¹⁰ Sa yegñ mñsa mehna ijieragñ mñsare ahri pñre ojoayugñ niaja. Mñsa cahapñ esagñ, mñsa ñano yerina ijigñ ihñagñ mñsare buhiri dahreitja. Cristo yuhñre tiquiwo dutiriro sahata mñsare buhiri dahreitja. Yuhñ sa buhiri dahreratire ahri pñre mñsare ojoayugñ niaja. Cristo yuhñre tiquiwo dutiriro sahata mñsare yedohoacñ ijiaja. Mñsare dojomehneacñ ijieraja.

¹¹ Yojoþure, yuhñ acaye, mñsare quehnoa dutiaja. Cristore wacñ tutua nemoña. Sa yena quehnoana ijiaja. Mñsare yuhñ yahurire quehnoano tuhñ ñññña. Mñsa

mehna cjēna mehna ihcāno mehna
ijiya. M̄sa basi quehnoano
mehna ijia. M̄sa sa ijigū ihñano
m̄sa mehna Cohācjū ijirōta.
Tiquiro marine cahme cahīgū
yeriquiro, marine quehnoano
mehna ijigū yeriquiro ijire.
¹² Sa yena m̄sa mehna cjēnare
quehnoano bucueye mehna piti
caya. ¹³ Ijipihtiequina ohō cjēna
Cohācjū yequina m̄sare quehnoa
dutare.

¹⁴ Mari puhtoro Jesucristo
mehna m̄sare ijipihtinare
quehnoa dutiaja. Sa yegu Cohācjū
mari Pacu tiquiro cahñe mehna
ijipihtina m̄sare quehnoa dutiaja.
Sa yero Espiritu Santo ijipihtina
m̄sa mehna quehnoano ijire.

Gálatas

Galacia wame tiri yehpa cjenare Jesu yequinare ojoa ohoahye Pablo

¹ Yuhu Pablo, Cristo yere buhe duti tiqairo cūrigu iji-aja. Masa cūrigu ijieraja yuhu. Masa pehe yuhare buhe dutiye cūedari. Cohācjū mari Pacu pehe Jesure yariariquirore masoriqairo yuhare cūri tiqairo yere buheacjare. Jesucristo gāhu yuhare cūri. Tiquina sa cūrigu ijigu ahrire ojoa ohoaja musare. ² Yuhu musare Jesu yequinare Galacia yehpa cjanare quehnoa dutiaja. Yuhu mehna cjēna Jesu yequina gāhu musare quehnoa dutire. ³ Cohācjū mari Pacu, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya musa. ⁴ Tiquiro Jesucristo pehe mari ñañene yeri buhirire yariahye. Yojopare masa tiquina ñañene yeri pje ijire. Sa yero tiqairo yariahye Cohācjū mari Pacu tiqairo cahmediro saha marine yuhduoro taro. Sa tiqairo yuhduogū yojopare ñañene tiquina yeriro saha ye duasi mari. ⁵ Sa ye ijipihtiye decoripe tiqirore mari Pacure ño peouhna. Sata yeihna.

Cohācjū masare tiqairo yuhduoati buheye ihcānota ijire. Apeye buheye mariedare

⁶ Cristo musare cahño tiqairo yequina ijianajare musare cūri. Sa yegu musare cūriqairo yere cohāna sijoro saha ijiye buheye pehere duita musa cahmegū ihña acuaa wahaja. ⁷ Apeye buheye quehnoañe buheye yero saha ijiye buheye waro ijierare. Ti sa ijierapegūta ihquēquina musa caharu ijiequina musare cariboye, sijoro saha ijiye buheye buheye, quehnoañe buheye dojomehne duare. ⁸ Sa yena musare usā

buhe muhtarire mari cohāgū sijoro saha ijiye buheye mari buhegū Cohācjū marine buhiri dahreahro. Sa yero angel umuse cjēno sa tiqairo buhegū tiqairo gāhare buhiri dahreahro Cohācjū. ⁹ Mianogāta usā nidiro saha pari turi niitja: Ihcāqairo musare usā buherire cohāno, sijoro saha ijiye buheye tiqairo buhegū Cohācjū tiqirore buhiri dahreahro.

¹⁰ Sa nigu yuhu “Pablo dihita quehnoano buheriquiro ijire”, yuhare ni dutigu niedaja. Cohācjū pehe yuhare “Quehnoano buheri mahu”, tiqairo nigū cahmeaja. Masare bucuegū yegu tagu sijoro saha ijiye buheye buheboaga yuhu. Masa dihitare bucuegū yegu ijigu ne Cristo cahacjū ijieraboaga yuhu.

Pablo Cristo cūriqairo tiqairo iji ducarire yahuahye

¹¹ Yuhu acaye, ahrire musa masigū cahmeaja yuhu: Quehnoañe buheye yuhu buheri masa ye buheye ijierare. ¹² Ti buheye masare yuhu tuhori ijierare. Sa ye apequina masa yuhare ti buheye yahuerari. Jesucristo pehe yuhare ti buheye masigū yeri.

¹³ Panopu judio masu yuhu ijie tirire masine musa. Ohō saha yee tii yuhu: Jesu yequinare tutuaro ñano yegu tiquinare quehnoano wejē peho cā duami. ¹⁴ Mari ñecsumma mana iji turiayequina tiquina buherire tutua yuhduaro ye duagu yuhu acaye yuhu ihcāno mehna masariquina yuhduoro ye muhtarigu ijie timi yuhu. ¹⁵ Yuhu sa ijirigu ijiepegūta yuhu masa bajuato pano Cohācjū yuhare bese tuhasari jiri. Sa yero yuhare cahño tiqairo yaqairo ijiajū cūri yuhare. ¹⁶ Sa yero tiqairo cahmeno saha tiqairo macunore yuhare masigū yeri. Tiquiro yere quehnoañe buheye judio masa ijieyequinare buheacjū yuhu

ijiatire tiquiro macanore masigu yeri yuhare. Tiquiro sa yegū “¿Dahse ni buhero cahmeagari yuhare?” ni masare sinitueru yuhu. ¹⁷ Sa yegu Cristo cūriquina yuhu pano ijiriquina cahapure Jerusalēpure sinitugu wahaeru. Duita Arabia yehparu waha. Sa yegu Damascopu majare tojoa wihii.

¹⁸ Ihtia cūhma bato Pedrore ihñagū waha Jerusalēpu. Topure puu semana waro iji. ¹⁹ Sa yegu apequinare Cristo cūriquinare ihñedu. Santiago dihitare mari puhtoro bahurore ihñau. ²⁰ Ohō saha ni ojoagu Cohācjū mehna ne ni meho ojoaeraja.

²¹ Came Siria yehparu, Cilicia yehparu gūhare waha. ²² Topure yuhu esagū ti pjere Judea yehparu ijiyequina Jesu yequina yuhare ihña masiedari. ²³ Sa ye ahri dihitare yuhare masi ducari tiquina: “Panopure marine ñano yeriquiro yojopure quehnoañe buheyere tiquiro cohā duari buheyere buhero nine”, ni, masi ducari tiquina. ²⁴ Yuhare sa masiñe Cohācjūre “Quehnoa yuhdagū ijire”, nidi tiquina.

2

Apequina Cristo cūriquina Pablöre piti ca, duita cahmene

¹ Catorce cūhmari bato pari turi Jerusalēpu wahagu Bernabé mehna waha. Tito gūhu wahari yuhu mehna. ² Cohācjū yuhare tiquiro waha dutigū topure waha. Jerusalēpu ijigu “Jesu yequina puhtoa”, masa niñequina tiquina sehsaro cahmecoagū quehnoañe buheyere judio masa ijieyequinare yuhu buherire yahuu tiquinare. “¿Judio masa ijieyequinare quehnoañe buheyere yuhu buhegū quehnoajari, mūsa tūhotugū?” niñu, sa yahuu tiquinare. Sa yahuu tiquinare panopu yuhu buherire,

yojopure yuhu buheri gūhare tiquina quehnoano masiatire, tire “Quehnoare”, tiquina niatire. Tiquina sa niedagū yuhu buheri dahseati ijieraboaga.

³ Yuhu mehna cūno Tito judio masano ijieriquiro ijiri. Sa yero cūhnucunū sohtoa cahserogāre yuhre nemehnediquiro ijire. Sa yuhremehnediquiro tiquiro ijiepegūta Jesu yequina puhtoa “Mūhu gūhu ti cahserogāre yuhre neña”, niedari tiquirore. ⁴ Tiquina sa niedapegūta ihquēquina “Jesu yequina ijiaja”, ni mehoñequina wacūeno mehna usā mehna sajā, tiquirore ti cahserogāre yuhre negū cahmemedi tiquina. Jesu yequina mari ijina “Panopu cūjēne tiquina dutiriro saha yena ti mehna yuhdasi”, ni tūhotuaja mari. Mari sa ni tūhotugū mari yeyere ihña duaye tiquina pehe usā mehna ni meho sajāri. Sa yeye usā ñecusumūa mūna iji turiayequina ye dutiyere ye duti duaye, ti dutiyere ño peoducugū ye duamedi usāre tiquina. ⁵ Tiquina sa ye duepegūta quehnoañe buheyere poto mūsa masiatire ne mehenogā mehna tūho dueru usā tiquinare.

⁶ Sa ye Jesu yequina puhtoa quehnoañe buheyere yuhu buherire tiquina tūhori bato “Ahri buheye mehna apeye buheyere buhe moreña”, ne niedari tiquina yuhare. Jesu yequina puhtoaare ihyo ijiyequina yero saha tūhotuaja tiquinare. Cohācjū pehe ijipihtiyequinare ihcāno saha ihñare. Sa yegu sata tūhotuaja yuhu gūhu puhtoa gūhare, ihyo ijiyequina gūhare. ⁷ Sa ye yuhu buheri mehna tiquina “Ahri buheye mehna apeye buheyere buhe moreña”, ne niedari. Sa ye judio masa ijieyequinare yuhu buheatire Cohācjū yuhare tiquiro cūrire tūhoye, “Tita ijire”, nidi tiquina. Judio masare

buheyere Cohãcjũ Pedrore tiqairo cūriro sahata yũhũ gũhare cūri judio masa ijieyequinare yũhũ buheatire. ⁸ Judio masare Pedrore buhe dutiriqirota Cohãcjũ yũhũ gũhare tiqirota buhe dutiri judio masa ijieyequinare.

⁹ Sa ye Santiago, Pedro, Ñu mehna Jesu yequina pũtoa waro quehnoañe buheyere buherire Cohãcjũ yũhare tiqairo cūrire tũhoye “Tita ijire”, nidi tiquina. Sa nieta yũhare Bernabé mehna quehnoano bucueye mehna omoca ñehedi usãre piti tiye tehe. Sa yena judio masa ijieyequinare buhena ijiaja usã. Santiago gũhũ pehe judio masare buheyequina ijire. “Sata ijiahro”, nii usã basi. ¹⁰ Sa niepeta tiquina judio masare pejecũoyequinare yedoho dutiri usãre. Pejecũoyequinare yedohoacjũ ijita niaja yũhũ.

Antioquíapũ Pablo Pedrore tuhti-ahye

¹¹ Sa ye Antioquíapũ yũhũ esari bato Pedro gũhũ esari. Sa yegũ quehnoano tiqairo yerari buhiri tuhtii tiqirore. ¹² Ohõ saha yeri tiqairo: Santiago ohoriquina Antioquíapũ tiquina esato panogã, Pedro pehe judio masa ijieyequina mehna ihyaro nidi, judio masũno ijieperota. Santiago ohoriquina judio masa ijieyequinare “Cuh-nucunũ sohto cahserogãre yũhre neña”, niñequina, usã judio masa panopũ cjẽna ye dutiyere ye dutieyequina ijiri. Pedro sa ihyari watoa Santiago ohoriquina esari. Sa ihyariqiro ijieperota tiquina tiqairo cahapũ esagũ ihñano, tiquinare cuero, Pedro judio masa ijieyequinare duhu cã, pari turi tiquina mehna ihyaro wahaerari. “Panopũ cjẽna mari judio masa yere yũhdũdcagũ niaja. Sa yeye yojopũre wihieyequina yũhare tuhtiarĩ”, nino, judio masa ijieyequina mehna ihya nemoedari. ¹³ Tiqairo

sa ye mehoriro saha tiqairo yegũ ihñañe, apequina judio masa gũhũ tiqiroreta ihña cū, tiquina gũhũ tiqairo yero saha yeri. Sa yero Bernabé quehnoariqiro ijieperota tiquina yero saha yeri tiqairo gũhũ.

¹⁴ Cristo ye buheye marine quehnoano, queoro ye dutire. Sa ye Pedro gũhũ ti buheye nidiro sahata yerari, judio masa ijieyequina mehna ihya duhuye. Tiquina sa yegũ ihñagũ, ijipihtieyequina Jesu yequina ihñonopũ Pedrore ohõ saha ni yahuu: “Mũhũ judio masũ ijiepegata judio masa ye dutiyere, tiquina ijieye tiyere duhu cãri mũhũ, Jesu yere yegũ tũhũ. Sa yegũ judio masa ijieyequina dutieye marieñequina yero saha yee tiri mũhũ. Sa yerigũ ijiepegata apequina judio masa wihigũ ihñagũ, judio masa ijieyequinare piti ti nemoedari mũhũ. ¿Judio masa dihitare mũhũ piti tigũ ihñañe, dũhse ni tũhotuetari judio masa ijieyequina pehe? ‘Judio masa yero saha ijihna’, ni tũhotuboaga tiquina. ¿Tiquina gũhare judio masare ihña cũgũ cahmeajari mũhũ? To ijierare”, nii tiqirore.

Judio masare apequina masa yero saha Jesure wacũ tutua duti-ahye Cohãcjũ

¹⁵ Usã pehe judio masa masa bajuana, apequina ñano yeyequina judio masa ijieyequina yero saha ijieraja usã. ¹⁶ Sa ijina ijiepenata Cohãcjũ dutiyere Moiserre tiqairo cūrire usã yerina ijigũ “Quehnoana ijire”, ni ihñedare Cohãcjũ usãre. Tire mari masiaja. Sa yero Jesucristore mari wacũ tutuagũ Cohãcjũ marine “Quehnoana ijire”, ni ihñanota. Tire masina, usã gũhũ Jesucristore wacũ tutuaja tiqirore usã wacũ tutuari mehna usãre “Quehnoana ijire”, Cohãcjũ tiqairo ni ihñatire. Sa yero tiqairo dutiyere usã yerina ijigũ “Quehnoana ijire”,

ni ihñedare Cohãcjũ usãre. Ne masa ti dutiyere yeye mehna “Quehnoañequina ijire”, ni ihñedare Cohãcjũ tiquinare.

¹⁷ Cristore mari wacũ tutuaye mehna quehnoana Cohãcjũ yequina mari waha duagũ, ñana mari ijiyere masigũ yerota Cristo. ¿Cristo mari ñañene marine masigũ yero, ñana marine ijigũ yeajari tiquiro, m̄sa tãhotugũ? Ne mehenogã mehna sa yerare. ¹⁸ Usã dutiye yeye mehna yũhdũ duamedina ijiepenata ti buheyere cohãũ. Sa cohãepenata pari turi ti buheyere yena ti dutiyere usã ye pehoerari buhiri potota buhiri tinata usã. ¹⁹ Cohãcjũ dutiyere Moiserere tiquiro cũrire ihcãno sahaeraja mari. Sa yena ti dutiye mehna ne yũhdũsi mari. Sa yena Cohãcjũ tutuaye mehna tiquiro yequina ijiaja mari.

²⁰ Cristo mehna curusapũ yariariquina yero saha ijiaja mari. Sa yena yariariquiro tiquiro esa tuharo tiquiro yerariro saha mari esa tuharo yeraja. Cristo ye tutuaye mehna yeaja. Sa yena yojopũre Cohãcjũ macũnore wacũ tutuaye mehna ijiducujaja mari. Tiquiro Cohãcjũ macũno marine cahĩne. Sa yero mari ye buhirire yariari. ²¹ Ti dutiye yeye mehna quehnoana Cohãcjũ yequina mari wahagũ Cristo yariari pehe ne dahseati ijieraboaga. Cohãcjũ marine tiquiro cahĩdire, Cristo tiquiro yariarire ihyo ijiye waro yero saha ijigũ ye dueraja yũhũ pehe. Sa yegũ “Dutiye mehna yũhdũgutja”, ne nisi yũhũ.

3

Cohãcjũ dutiye Moiserere tiquiro cũrire, wacũ tutuaye gũhare yahuahye Pablo

¹ Yũhũ acaye, m̄sa Galacia cjãna tũho masiena iji wame tire m̄sa. Jesucristo curusapũ

tiquiro yariarire buheyere ijip-ihtiyequina tiquina ihñonopũ m̄sare yahuu. ¿Sa yena yojopũre tiquiro yere m̄sa yũhdũducature ni mehoñequina m̄sare tiquina dojomehnegũ dahse yena tiquinare yũhtiri m̄sa? ² Ahrireta yahu duaja m̄sare: Dutiyere m̄sa yeye mehna Espĩritu Santore cũo dũcaerari m̄sa. Quehnoañe buheyere pehere tũhona Cristore m̄sa wacũ tutuaye mehna Espĩritu Santore cũo dũcari m̄sa. ³ Espĩritu Santo tutuaye mehna m̄sa Cristo yequina iji dũcagũ yojopũre m̄sa basi dutiyere m̄sa yeye mehna Cohãcjũ cahapũ m̄sa waha duagũ ñarĩne. Tũho masiena ijire m̄sa, sa yena. ⁴ ¿Quehnoañe buheyere m̄sa yeri buhiri peye tahari m̄sa ñano yũhdũna ihyo warota ñano yũhdũna niyari m̄sa, sa wahana? Ihyo waro ijierare m̄sa sa ñano yũhdũri. Dutiyere yeye mehna Cohãcjũ cahapũ m̄sa waha duana ihyo warota ñano yũhdũna niboaga m̄sa. ⁵ ¿Dahse m̄sa yeri wapa Espĩritu Santore m̄sare ohori Cohãcjũ, m̄sa tãhotugũ? Tiquiro dutiyere m̄sa yeri wapa ohoerari tiquiro. Tiquiro buheyere quehnoano m̄sa tãhogũ ihñano tiquirore m̄sa wacũ tutuari batopũ Espĩritu Santore ohori tiquiro. ¿Cohãcjũ m̄sa watoa tiquiro tutuaye mehna ye ihñono dahse ijiro boro sa ye ihñojari tiquiro, m̄sa tãhotugũ? Tiquiro dutiyere m̄sa yeri wapa sa ye ihñoedari tiquiro. Tiquiro buheyere quehnoano m̄sa tãhogũ ihñano tiquirore m̄sa wacũ tutuagũ sa ye ihñori tiquiro.

⁶ Abrahã Cohãcjũre wacũ tutuahye. Tiquiro sa yegũ tiquirore Cohãcjũ “Quehnoariquiro ijire”, ni ihñahye. ⁷ Sa yena ahri yũhũ niatire masiña m̄sa: Cohãcjũre wacũ tutuayequinata potota Abrahã panamena iji turiayequina

ape tjuro cjēna yero saha ijire.
 8 Panopꝛ Cohācjū yere tiquina ojoari pūꝛ ohō saha ni yahuahye: Judio masa ijieyequina Cohācjāre tiquina wacū tutuagū ihñano “Quehnoañequina ijire”, ni ihñare Cohācjū. Tiquiro sa ni ihñatire Cohācjū panopꝛ masiyuro, tiquiro quehnoañe buheyere Abrahāre yahu mǎhta tuhasahye. “Mǎhǎ mehna ahri yehpa cjēnare ijipihitiyequinare quehnoano yeitja”, niahye Cohācjū Abrahāre. 9 Sa yero Abrahā Cohācjāre quehnoano taho wacū tutuahye. Tiquiro sa wacū tutuagū ihñano Cohācjū tiquirore quehnoano yeahye. Sa ye apequina masa Cohācjāre tiquina wacū tutuagū, tiquina gūhure quehnoano yerota Cohācjū, Abrahāre tiquiro yeriro sahata.

10 “Ti dutiyere Moiserere tiquiro cūri mehna Cohācjū yequina wahanata”, ni tǎhotuyequina buhiri tiyequina ijire. Tiquiro ojoari pūꝛ sata nine: “Cohācjū dutiyere tiquiro ya pūꝛ tiquina ojoarire ye pehoeyequina buhiri tiyequina ijire tiquina ijipihitiyequina”, ni ojoahye. 11 Cohācjū yere tiquina ojoari pūꝛ ohō saha nine: “Cohācjāre wacū tutuayequinare ‘Quehnoañequina ijire’, ni ihñare Cohācjū. Sa wacū tutuaye ijipihitiye decori Cohācjū mehna sa ijiducuenta”, nine Cohācjū yere tiquina ojoari pūꝛ. Tiquiro sa nigū ahri yǎhǎ niatire mari quehnoano masiaja: Ti dutiyere tiquina yeye mehna masare quehnoañequina yero saha ihñedare Cohācjū. 12 Dutiyere yeye mehna Cohācjū cahapꝛ waha duayequina Cohācjāre wacū tutuerare. Ohō saha nine Cohācjū yere tiquina ojoari pūꝛ: “Dutiyere yeye mehna quehnoañequina waha duayequinare ti dutiyere ye pehero cahmene tiquinare”, nine Cohācjū yere tiquina ojoari pūꝛ.

13 Sa ye ti dutiyere marine buhiri tigū yere. Mari buhiri tigū ihñano Cristo pehe tiquiro basi mari ye buhirire buhiri tiriquireo waharo, mari buhiri tiborire buhiri ti basahye marine. Cristo tiquiro buhiri tiatire yahuro ohō saha ni ojoahye panopꝛare: “Ijipihitiyequina yucaripꝛ tiquina duhu ohōriquina buhiri tiriquireo ijire”, ni, ojoahye panopꝛare. 14 Tiquiro sa ni ojoariro sahata sa yeahye Cristore. Cohācjū Abrahāre “Ahri yehpa cjēnare quehnoano yeitja”, tiquiro nidiro sahata yero niahye masare. Sa yeahye Cristo mehna. Tiquiro yariahye judio masa ijieyequinare Cohācjū quehnoano tiquiro yeatire. Sa yero Jesucristo mehna sohtori tiahye Cohācjū Abrahāre tiquiro nidiro sahata. Sa yeahye tiquirore mari wacū tutuari bato Espiritu Santore mari cǎoatore.

Tiquiro buherire quiti mehna yahu nemoahye Pablo

15 Yǎhǎ acaye, masa ye quiti mehna ti yǎhǎ nidire yahutja mǎsare: Tiquina pacǎro tiquiro yariato pano tiquiro pohne came-satire yahuri pū ohō saha ni ojoare. “Yeere yǎhǎ pohmare ohoutja”, ni ojoare. Tiquiro sa ni ojoa cūri pūre tiquiro yariato pano apequireo pehe ti pūre sijoro saha ni ojoa nemo masiedare. Sa yero ti pūre “Poto ijierare”, ni masiedare. 16 Ti pūre tiquina pacǎro tiquiro pohnene tiquiro cūriro saha “Mǎsare quehnoano yeitja”, Cohācjū nino, Abrahāre tiquiro panamino iji turiariquiro gūhure nino niahye. Sa nino apequina tiquiro panamena iji turiayequinapꝛare nino niedahye. Ihcāquiroreta tiquiro panamino iji turiariquiro dihitarere nino niahye Cohācjū. Tiquiro Abrahā panamino iji turiariquiro Cristo ijire. 17 Yojoꝛare quehnoano yahutja mǎsare: Abrahā gūhure

Cohãcjũ “Mũsare quehnoano yeitja”, tiqiro ni cũri bato cuatro ciento treinta cahmari yahdãri bato tiqiro dutiyere Moiserẽ cũahye. Sa cũno Abrahã gãhũre Cohãcjũ “Mũsare quehnoano yeitja”, tiqiro nidire boro taro niedahye. ¹⁸ Cohãcjũ marine yahduoro dutiyere mari yeye mehna marine yahduoerare. Dutiyere yeye mehna mari yahdũgũ Cohãcjũ “Mũsare quehnoano yeitja”, tiqiro nidi pehe dahseati ijieraboaga. Marine yahduoro taro Cohãcjũ Abrahãre tiqiro ni cũri mehna sa yero taro niahye.

¹⁹ ¿Sa yero dahse yeatire tiqiro dutiyere cũri Cohãcjũ? Tiqiro dutiyere cũahye ti dutiyere mari yahduoerare mari quehnoano masiatire. Sa yero panopũre Cohãcjũ “Mũhũ panamino iji turiaritqiro mehna masare quehnoano yeitja”, Abrahãre tiqiro niditqiro tiqiro wihiatu pano Cohãcjũ dutiyere camahye masa. Sa yero Cohãcjũ dutiyere tiqiro cũgũ tiqiro yequina angele pehe tire duti turiahye. Sa ye Moiserẽ tiquina cũgũ, tiqiro pehe masare cũ turiahye tja. ²⁰ Ti dutiyere Moise cũ turigũ Cohãcjũ tiqiro basita masare cũedahye. Sa cũedaperota Cohãcjũ “Mũhũre quehnoano yeitja”, Abrahã pehere ni cũno, tiqiro basita sa ni cũahye.

²¹ Cohãcjũ Moiserẽ tiqiro dutiyere cũno, to pano Abrahãre tiqiro nidire “Abrahãre yũhũ nidiro saha yesi yũhũ”, nino niedahye tiqiro. Abrahãre tiqiro nidiro sahata yero taro niahye. Tiqiro dutiyere yeye mehna Cohãcjũ yequina wahana ti pje pũrita dutiyere mari yeye mehna quehnoana wahaboaga mari. ²² Sa yero Cohãcjũ tiqiro yere tiquina ojoari pũ pehe ijipihitiyequina ñãñe buhiri tiyequina tiquina ijiyere yahuahye. Sa ni yahuahye Cohãcjũ

“Mũsare quehnoano yeitja”, to pano tiqiro nidiro sahata yero taro. Sa yero Jesucristore wacũ tutuayequinare quehnoano yere to pano tiqiro nidiro sahata.

²³ Cohãcjũre wacũ tutuati buheyere marine tiqiro cũato pano tiqiro dutiyere pehe mari ñãñe yerire marine masigũ ye tuhasari. Sa ye marine yahuri ti dutiyere pehe. Cohãcjũre wacũ tutuati buheyere marine tiqiro yahugũpũ tiqiro dutiyere marine yahu duhuri. ²⁴ Sa ye Cohãcjũ dutiyere pehe Cristo wihiatu pano marine yahuri. Sa yahuri marine Cristore mari wacũ tutuaye mehna Cohãcjũ “Quehnoana ijire”, marine tiqiro ni ihñatire. ²⁵ Yojopũ pũritare Cristore mari wacũ tutuari pje ijire. Ti sa ijigũ tiqiro dutiyere pehe marine yahu nemoedare. Marine duti nemoedare.

²⁶ Sa yena Cristo Jesure mũsa wacũ tutuaye mehna Cohãcjũ pohna ijire mũsa. ²⁷ Ijipihitina mũsa Cristo wame mehna wame yeno hrina ijina, Cristo Cohãcjũ macũno tiqiro ijiro sahata tiqiro pohmata ijire mũsa gãhũ. ²⁸ Yojopũre pũa curua ijierare mũsa. Judio masa ijiena, judio masa mehna pũa curua ijierare mũsa. Cahacjãna, cahacjãna ijiena mehna pũa curua ijierare mũsa. Hmũa, numia mehna pũa curua ijierare mũsa. Sa yena ijipihitina mũsa Cristo yequina ijina, ihcã curuata ijire mũsa. ²⁹ Sa yena Cristo yequina ijina, Abrahã panamena iji turiana yero saha ijire mũsa. Mũsa sa ijina ijigũ Cohãcjũ Abrahãre “Mũsare quehnoano yeitja”, tiqiro nidiro sahata mũsa gãhũre quehnoano yerota tiqiro. Cristo yequina mũsa ijigũ ihñano mũsare quehnoano yerota.

4

¹ Ohõ saha ijire ahri quti mehna yũhũ yahu nemo gũ: Tiqiro pacũro

came tiquiro yere neatiquiro wahmuno iji cáhtariquiro ijiropu ijiptiye tiquiro ye ijiepegüta cahacjãno yero saha ijire tiquiro. ² Sa ye tiquiro wahmuno iji cáhtariquiro ijigü tiquirore ihña ihboyequina tiquiro yere ihña ihbore. Sa yero tiquiro pacuro queoriro esagüpu tiquiro pacuro yere cuorota. ³ Ohõ saha wahmuno iji cáhtariquiro yero saha ijimi mari gühu. Sa ijina mari ijigü cahacjãnare tiquina dutiro saha ahri yehpa cjẽ dutiye masa ye dutiye marine dutinimedi. ⁴ Mari sa ijina ijiepegüta tiquiro queori pje esagü Cohãcjü tiquiro macnore ohoahye. Sa tiquiro ohogü tiquiro macno ihcãcoro nuhmino mehna masa bajuahye. Sa yero tiquiro judio masuno masa bajuagü Cohãcjü dutiye Moiserre tiquiro cüri tiquirore dutinimahye. ⁵ Mari gühure ti dutiyeta dutinimahye. Sa yero marine yuhduoatiquirore ohoahye Cohãcjü tiquiro macnore, tiquiro pohna mari wahatire.

⁶ Sa yero tiquiro pohna mari ijigü Cohãcjü macno tiquiro yaquiro Espiritu Santore mari mehna ijiatiquirore ohoahye Cohãcjü. Tiquiro yaquiro Espiritu Santo pehe Cohãcjüre “Mai”, niniquiro ijire. ⁷ Sa yena masa Cohãcjü yedohoye mehna cahacjãna ijierare masa yojopure. Tiquiro pohna ijire masa. Sa yena tiquiro pohna ijina, Cohãcjü tiquiro ohoatire cuonata.

Pablo Galacia cjẽnare Jesu yequinare cuesãhye

⁸ Panopu Cohãcjüre masa masiena ijina “Cohãcjü ijire”, masa niñe queoyere ño peona ti queoye cahacjãna ijimahye masa. Masa sa ño peoyequina cohãmana waro ijierahye. ⁹ Sa ijirina ijiepenata yojopure Cohãcjüre masine masa. Ijierare. Tiquiro pürta masa pehere masine. ¿Tiquiro sa masiepegüta dühse yena ahri

yehpa cjẽna ye buheye pehere cahmeajari masa? Ti buheye dühseati ijierare. ¿Dühse yena panopu masa yeriro sahata Cristo marieno ye duajari masa? ¿Dühse yena dutiyere masa yeducuri mehnata Cohãcjü cahapu waha duajari masa? Wahasi masa. ¹⁰ Ihquẽ decorire, ihquẽ asürine, ihquẽ pohecürire, ihquẽ cühmarine bõse decorire dahre dutie masa. “Mari sa yeye mehna dutiye mehna yuhdunata”, ni, tuhutumene masa. ¹¹ Masa sa ni tuhutugü müsare tutuaro yuhu buheri dühseati ijieraboaya, yuhu tuhutugü. Sa yegu müsare cuesãja.

¹² Yuhu acaye ahrire tutuaro dutiitja müsare: Cristore yuhu tuhoturiro sahata masa gühu tiquirore tuhutuya. Panopu dutiye yeye mehna yuhdu duayequina ijieramahye masa judio masa ijiena ijina. Yojopu pehere yuhu gühu masa yero saha wahau, dutiye yeye mehna yuhdu dueragu. Sa yena Cristore yuhu tuhoturiro sahata masa gühu sata tiquirore tuhutuya.

Masa mehna yuhu ijigü quehnoano yeri masa yuhure. ¹³ Dohatigupata müsare quehnoañe buheyere coã warore buhe ducan yuhu. ¹⁴ Yuhu sa dohatigü ijiepegüta yuhure yabierari masa. Sa yena yuhure cohã tojoerari masa. Sa yena Cohãcjü yaquiro angelre, Jesucristo gühure masa piti caboriro saha yuhure quehnoano piti cari masa. ¹⁵ ¿Yojopure dühse wahari masa bucueye? Müsare ahrire niitja: Purĩñene ducana masa caperire ore we ne yuhure ohoboaya masa. ¹⁶ ¿Yuhu mehna cjãna ijiepenata yojopure queoro müsare yuhu yahuri buhiri ihña tuhtiajari masa yuhure?

¹⁷ Sohõ ijiriquina müsare tutuaro cahmesãre. Tiquina tuhutuye sijoro saha ijire. Quehnoañe

ijierare. Tiquina m̄sare ȳh̄ure ȳhd̄ud̄caḡū cahmene, tiquina pehere ño peo dutiye. ¹⁸ Quehnoano mehna m̄sa quehnoano wahati pehe m̄sare tiquina cahmes̄ḡū quehnoar̄boaga. Sa ye top̄re ȳh̄u mariedaḡū ḡh̄ure tiquina sa cahmes̄ḡū quehnoar̄boaga. ¹⁹ Ȳh̄u poh̄naḡā, niji wahc̄oricoro ticoro ñano ȳhd̄uro saha m̄sare ñano wac̄ū t̄hotuaja ȳh̄u. Tee Cristo yero saha m̄sa ijiḡp̄m̄ m̄sare wac̄ū duhutja. ²⁰ Mianoḡā m̄sa mehna ijiḡu tuhtiro marieno bucueye mehna m̄sa mehna ȳh̄u yahuḡū quehnoaboaga ȳh̄ure. M̄sare pajiro t̄hotuḡu niaja ȳh̄u.

Agar Sara mehna tiquina ijirire yahuahye Pablo

²¹ T̄h̄oya m̄sa ȳh̄ure. Coh̄ācj̄ū dutiyere yeye mehna ȳhd̄u duana ijiepenata tiquiro dutiye pehere quehnoano masiedare m̄sa. ²² Oh̄o saha niahye Coh̄ācj̄ū yere tiquina ojoari p̄p̄m̄: Abrah̄ā p̄aro pac̄ro ijiahye. Tiquiro cahac̄j̄ōno Agar wame tiricoro mehna ihc̄āquirore pohna tiahye. Sa ye tiquiro namono poto Sara wame tiricoro mehna ḡh̄ure ihc̄āquiro pohna tiahye. ²³ Sa ijiepeḡūta tiquiro cahac̄j̄ōno mac̄no masa mari yero saha masa bajuahye tiquiro. Tiquiro namono poto mac̄no pehe “Ihc̄āquiroḡā pohna tinata m̄sa”, Coh̄ācj̄ū ni yahuriro sahata masa bajuahye tiquiro pehe. ²⁴ Ahri quiti marine quehnoano queoye mehna yahure: Coh̄ācj̄ū p̄a taha masare “M̄sare yedohoutja”, tiquiro niñe yero saha ijire ahriquina numia p̄aro numia. Ihc̄ācoro Sinai wame tid̄p̄m̄ Coh̄ācj̄ū dutiyere ohori yero saha ijire. Ticoro Agar ijire. Ticoro mehna mari queoye mehna buheḡū judio masa ḡh̄u dutiyere yeducuye mehnata ȳhd̄u duayequina ticoro yero saha ijire. Tiquina cahac̄j̄ēna yero saha

ijire. ²⁵ Ticoro Sinai wame tid̄u Arabiap̄m̄ ijid̄u yero saha ijiricoro ijire. Yojoṗ̄re Jerusalē cj̄ēna judio masa dutiye yeye mehna ȳhd̄u duayequina dutiye cahac̄j̄ēna yero saha ijire. Sa yeye mari queoye mehna buheḡū tiquina ticoro yero saha ijire cahac̄j̄ōno ticoro ijiro saha. Tiquina Coh̄ācj̄ū pohne ijierare. ²⁶ Mari pehe Cristo yequina ijina Coh̄ācj̄ū pohna ijiaja. Sa yena uhm̄se cj̄āna ijiaja. Jerusalē uhm̄sep̄m̄ ijiri maca cj̄āna ijiaja mari. Top̄re masa tiquina ȳhd̄uatire dutiyere yeye mariedare. ²⁷ Coh̄ācj̄ū yere tiquina ojoari p̄p̄m̄ oh̄o saha ni ojoahye Coh̄ācj̄ū pohne warore, Sara yero saha ijiricorore yahuro:

Pohna mariego, bucueya. Sa ijigo bucueye mehna sañuducuya, niji wahc̄ōno pur̄ñore masiego ijigo. M̄h̄u pehe man̄ coh̄origo ijigo apecoro man̄ tiricoro ȳhd̄uro peyequina pohna tigota. Sa yego bucueya, ni ojoahye panop̄re ticoro pohna tiato pano Sara yero saha ijiricorore yahuro.

²⁸ Ȳh̄u acaye, Coh̄ācj̄ū nidiro sahata Isaac masa bajuahye. Mari ḡh̄u tiquiro yero saha Coh̄ācj̄ū nidiro sahata tiquiro pohna ijiaja mari. ²⁹ Sa ijiepeḡūta ti p̄ep̄re ihyo ijiriquiro yero saha masa bajuariquiro ñano yeahye apeqirore Esp̄ritu nidiro sahata masa bajuariquirore. Yojoṗ̄m̄ ḡh̄ure sata ijire Coh̄ācj̄ū yequinare masa ñano yeḡū. ³⁰ Sa yero oh̄o saha nine Coh̄ācj̄ū yere tiquina ojoari p̄p̄m̄: “Cahac̄j̄ōno mac̄no tiquiro pac̄ro yere c̄o masiedare. Tiquiro namono poto mac̄no pehe tiquiro pac̄ro yere c̄o masine. Sa ye tiquiro cahac̄j̄ōnore ticoro mac̄no mehnata coh̄ā c̄āh̄ā”, ni ojoahye. ³¹ Ȳh̄u acaye, ne cahac̄j̄ōno pohne yero saha ijieraja mari. Sa yena

Abrahã namono poto pohne yero saha ijiaja. (Sa yena Cohãcjũ mari Pacu yere cuo masiaja.)

5

Cristo marine cahacjẽna yero saha ijiyere tiquiro duhugũ yeri bato tutuana ijiro cahmene marine

¹ Sa yero mari cahacjẽna yero saha ijirire potota Cristo marine duhugũ yeri. Tiquiro sa duhugũ yeri bato tutuana ijiya m̄sa. Ti dutiye mehna yũhdũ duayequina cahacjẽna yero saha ijimedina pari turi cahacjãna sajãedacãhña m̄sa.

² Yojopure yũhũ Pablo ahrire yahutja m̄sare: “Cuhnucunũ sohtoa cahserogãre mari yũhre nedi mehna yũhdũnata”, m̄sa ni tãhotugũ Cristo m̄sare tiquiro yedohori dũhseati ijierare m̄sare.

³ Ijipihtina ti cahserogãre m̄sa yũhre nedi mehna yũhdũ duanare pari turi ohõ saha ni yahutja yũhũ. Ti cahserogãre m̄sa yũhre nedi mehna yũhdũ duana, apeye Cohãcjũ dutiyere ye pehoerana, yũhdũsi m̄sa. ⁴ Dutiyere yeye mehna yũhdũ duana Cristo pehere cohãri m̄sa. Sa yena m̄sare Cohãcjũ tiquiro cahĩñene, tiquiro yũhdũo duayere duhu cãri m̄sa.

⁵ Sa ijiepegũta Espĩritu Santo tutuaye mehna Cohãcjãre mari pehe wacũ tutuaja. Mari sa wacũ tutuagũ “Quehnoana ijire”, ni ihñare Cohãcjũ marine. Tiquiro sa ni ihñagũ marine tiquiro yũhdũoatire masiaja mari. ⁶ Cristo Jesu yequina ijina cuhnucunũ sohtoa cahserogãre mari yũhre negũ ne dũhseati ijierare. Ti cahserogãre mari yũhre nedagũ gãhũre ne dũhseati ijierare. Sa ijiepegũta Cristo pũritare wacũ tutuana apequinare cahĩnata mari. Ti wacũ tutuaye pehe ihyo waro ijiro niedare.

⁷ M̄sa Cristore quehnoano wacũ tutuamedi. ¿Quehnoañe buheyere

m̄sare yũhũ acaye judio masa tiquina yũhdũdũca dutigũ dũhse yena tiquinare yũhtiri m̄sa?

⁸ Tiquina ye buheye Cohãcjũ m̄sare cũriquiuro tiquiro ye buheye ijierare.

⁹ Ahri yũhũ niatire wacũña m̄sa: Mehenogã pã pugũ yeye trigo yũbũre quehnoano ti sehsaro saha yũhũ acaye judio masa ye buheye pehere peyequina m̄sa mehna cjẽna cahmeboaga.

¹⁰ Mari puhtoro Cristore wacũ tutuaja yũhũ. Sa yegu ahri yũhũ niatire masiaja yũhũ. Cristo yedohoye mehna apeye buheyere camepure cahmesi m̄sa. Tire masiaja yũhũ. M̄sare dojomehne cohteyequina noho ijieyequina ijiaga. Tiquinare Cohãcjũpu buhiri dahrerota.

¹¹ Yũhũ acaye, “Dutiye yeye mehna yũhdũnata”, tiquina ni buheyere yũhũ buhegu ijigũ judio masa yũhũre ñano yeraboaga. Cristo curusapu tiquiro yariarire yahuye buheyere yũhũ buheri buhiri tiquina ñano yeri yũhũre. Cristo ye buheye mehna judio masa ye buheyere yũhũ buhe moregũ yũhũre ñano yeraboaga tiquina. ¹² M̄sare dojomehne cohteyequina m̄sa cuhnucunũ sohtoa cahserogãre yũhre ne dutiyequina tiquina basi dihita yũhre neahdo.

¹³ Yũhũ acaye, “Dutiye mehna yũhdũnata”, ni tãhotu dutierare Cohãcjũ m̄sare. Ti dutiye mehna yũhdũerapenata ti dutiyere yũhdũdũcaeracãhña m̄sa. Sa ye m̄sa mehna cjẽnare cahme cahĩna, tiquina cahacjẽna yero saha yedohoya tiquinare.

¹⁴ Ihcã dutirore quehnoano yena, Cohãcjũ dutiyere ye pehona niaja mari. Ohõ saha ijire ti dutiro: “M̄hũ basi m̄hũ cahĩno saha m̄hũ cahapu ijieyequina gãhũre cahĩña”, ni, dutiahye. ¹⁵ Sa yena wahiquina yero saha m̄sa basi cahme

duse tutueracãhña. Sa yena cahmequedacãhña. MUSA mehna cjëna “Cristo yere duhuari”, nina, quehnoano yeya MUSA.

Masa ñañene tiquina tutuaro cahmeñene, Espiritu Santo cahmeñe gũhure yahuahye Pablo

¹⁶ Espiritu Santo tiquiro cahmeno sahata ijiya MUSA. Sa yena MUSA ñañene MUSA tutuaro cahmeñene yeracãhña. ¹⁷ Ñañene MUSA tutuaro cahmegũ Espiritu Santo ihña tuhtire. Tiquiro sa ihña tuhtigũ ti ñañene duhu duare MUSA. Sa yena ñañene MUSA tutuaro cahmena, Espiritu Santore ihña tuhtire MUSA. Sa ihña tuhtina tiquiro cahmeno saha yerare MUSA. Sa ye ñañene MUSA tutuaro cahmeñe Espiritu Santo tiquiro cahmeñe yero saha ijierare. Sa ye Espiritu Santo tiquiro cahmeñe ñañene MUSA tutuaro cahmeñe yero saha ijierare ti. Sa yena MUSA cahmeno saha yerare MUSA. ¹⁸ Sa yena Espiritu Santo tiquiro cahmeñene yena ijina “Dutiye mehna mari yũhdanata”, ni, tũhotuerare MUSA.

¹⁹ Masa ñañene tiquina yeyere mari quehnoano masi tuhasaja. Ohõ saha ijire ti: Numino mehna ñano yeye, amano mehna ñano yeye, wana tiye, bæ tiro marieno ñano yeye, ²⁰⁻²¹ “Cohãcjũ ijire”, tiquina niñe queoyere ño peoye, masare ujuayequina yayia tiquina yeye, ihña tuhtiyane, cahme duse tini wiaye, doeye, usuaye, tiquiro basi dihita cœo duaye, ihña tuhti cahme tu waye, ihcã curua cjëna ape curua cjënare ihña tuhtiyane, apequina yere cooye, masare wejẽñe, queheye, queheye bese decorire yeye, ohõ saha ijiye ijire ñañene yeye. Panopũ musare cuaro mehna yũhũ nidiro sahata yojopũ gũhure niitja: Ti borore yeriquina Cohãcjũ pũhtoro ijirõpũre ãhmũsepũre ne esasi.

²² Espiritu Santo pehe marine ohõ saha yena ijigũ yere: Masare cahña, bucuena, cueye mariena, usua mũñena, apequinare quehnoano yena, quehnoana, duhuro marieno Cohãcjũ cahmeñene yena, ²³ quehnoano mehna yena, tiquina ñañe ye duarire yerana ijigũ yere marine tiquiro. Sa yeyequinare “Sa yeracãhña”, ne ihcãquiroye niedare. ²⁴ Cristo Jesu yequina ijina tutuaro mari ñañene ye duarire cohã tuhasau. ²⁵ Espiritu Santo marine Cohãcjũ mehna sa ijiducugũ yerota. Sa yena tiquiro cahmeno sahata yeducuna ijiihna mari.

²⁶ “Apequinare masi yũhdũdũcaja usã”, ni, tũhotuna ijieracũhna mari. Sa yena mari mehna cjënare usuagũ yeracũhna mari. Sa yena mari basi cahme coeracũhna.

6

MUSA mehna cjënare yedohoya

¹ Yũhũ acaye, ihcãquiroye MUSA mehna cjãno tiquiro ñañene yegũ Cristore quehnoano wacũ tutuana ijina cahñe mehna tiquiro yedohoya quehnoañene pari turi tiquiro yeatire. Sa yena MUSA gũhũ “Ñañene tutuaro cahmeari”, nina quehnoano yeya. ² MUSA mehna cjëna tiquina ñano yũhdũgũ gũhure yedohoya tiquinare. MUSA sa yena Cristo tiquiro dutiro saha yena ninata MUSA.

³ Ihcãquiroye ihyo ijiriquiro ijieperota “Apequinare masi yũhdũdũcaja”, ni tũhoturo, tiquiro basi ni mehoñe dihitare tũhoturiquiro ijire. ⁴ Ihquẽquina MUSA sehsaro MUSA yerire “Ahri quehnoañe ijire. Ahri ñañe ijire”, ni masiña. Sa masina MUSA yeri quehnoañe ijigũ MUSA basi bucuenata. Sa yena “Apequinare masi yũhdũdũcaja”, nisi MUSA. Sa niedana apequinare MUSA yũhdũdũcari mehna bucuessi MUSA. ⁵ Sa yero Jesu yaquiroye Cohãcjũ

yere tiqiro basi yere. Apequiro masuno tiqirore tire yedoho masiedare.

⁶ Sa yena quehnoañe buheyere buheriquirore apee boro musa cuoyere tiqirore ohoya musa tiqiro buhena.

⁷ Oteyere oteriquiro ñañe pjerire otero ñañe ducare cuorota. Quehnoañe pjerire otero quehnoañe ducare cuorota. Ohō saha mari gũhũ ñañene yena ñañene cuonata. Sa yero mari ñari buhiri buhiri dahrerota. Quehnoañene yena quehnoañene cuonata. Sa yena quehnoano ijinata. Sa yena “Usã ñañene yegũ Cohãcjũ usãre buhiri dahresi”, ni tuhotueracãhña. Ñañene yeyequina Cohãcjũre bujũpeyequina ijire. Cohãcjũre bujũpeyequinare buhiri dahrerota tiqiro. ⁸ Mari ñañene tutuaro cahmena, tire yena, ti mehnata yarianata. Sa yena pecapũ wahanata. Espiritu Santo pehe tiqiro cahmeñene mari yegũ tiqiro marine ijipihitiye decori ahmũsepũ ijiducugũ yerota. ⁹ Sa yena quehnoañene yena tire caributieracãhna mari. Cohãcjũ tiqiro queori pje ijigũ quehnoañene cuonata mari caributierana. ¹⁰ Sa yena ijipihitiyequinare mari ihñañequinape quehnoano yehna mari. Mari acaye Jesu yequina pũritare apequina yãhdũoro quehnoano yehna.

Pablo yahu bato tiro, quehnoa duti bato tiahye

¹¹ Bujũye letra yũhũ ojoari mehna ya omoca mehna musare yũhũ ojoarire ihñaña musa. ¹² Musare cuhnucunũ sohtoa cahserogãre yũhre ne dutiyequina masa tiquinare ño peogũ cahmene. Cristo curusapũ tiqiro yariarire yahuye buheyere mari buheri buhiri masa ñano yere marine. Tiquina sa yegũ ihñañe ahriquina

musare cuhnucunũ sohtoa cahserogãre yũhre ne dutire “Judio masa ye buheyere yeaja”, niñe. Sa tiquina ye dutigũ judio masa tiquinare ñano yeraboaga. Sa ye ti cahserogãre yũhre ne dutire. ¹³ Musare ti cahserogãre yũhre ne dutiyequina pehe Cohãcjũ tiqiro dutirire ye pehoerare. Sa ye ti cahserogãre musare tiquina yũhre ne dutiri bato musa yũhtigũ ihñañe, judio masa pehe tiquinare musare yũhre ne dutiyequinare ño peoboaga. Tiquina sa ño peoatire musare dutire tiquina.

¹⁴ Yũhũ pehe masa yũhũre tiquina ño peogũ cahmeda yũhdũaja. Mari pũhtoro Jesucristo curusapũ tiqiro yariari pehere masa tiquina ño peogũ cahmesãja yũhũ. Sa curusapũ tiqiro yariagũ ahri yehpa cjẽ ñañene watĩno yũhũre tiqiro ye dutigũ yerũ yũhũ. Sa yariaro ti ñañene yũhũre cahmedagũ yeri tiqiro. ¹⁵ Tiquiro sa yegũ Cristo Jesu yequina ijina ti cahserogãre mari yũhre negũ ne dũhseati ijierare. Ti cahserogãre mari yũhre nedagũ gũhũre ne dũhseati ijierare marine. Sa ijiepegũta quehnoañe pehere mari comesagũ pũritare quehnoare. ¹⁶ Ijipihitina ahri yũhũ buherire yena, potota Cohãcjũ yequina ijina, cuero marieno quehnoano ijia musa. Sa yena Cohãcjũ tiqiro paja ihñano mehna ijia musa.

¹⁷ Mari pũhtoro Jesu cahacjũ yũhũ ijiri buhiri yũhũ pagure cami tiaja yũhũ. Yũhũ sa ijirigũ ijigũ vojopũre apequina yũhũre cariboeracãhdo.

¹⁸ Yũhũ acaye, mari pũhtoro Jesucristo mehna musare ijipihitinare quehnoa dutiaja. Sata ijiahero.

Efesios

Efeso cjēnare ojoa ohoahye Pablo

¹ Yuhū Pablo mūsare Efeso wame tiri maca cjānare ojoa ohoaja. Yuhū Jesucristo yere buhe duti tiqiuo cūrigū ijiaja. Cohācjū tiqiuo cahmeno sahata Jesu yuhūre tiqiuo yere buheacjare cūri. Sa yegū mūsare Jesucristore sa wacū tutuaducunare ojoa ohoaja yuhū. ² Sa yegū Cohācjū mari Pacū mehna, mari pūhtoro Jesucristo mehna mūsare quehnoa dutiaja. Tiquina yedohoye mehna quehnoano ijiya mūsa.

Cristo yequina mari ijigū ihñano Cohācjū quehnoano yere marine

³ Cohācjū, mari pūhtoro Jesucristo Pacūro marine quehnoano yeducure. Ijipihtiyere tiqiuo ye ūhmūse cjē quehnoañe mehna tiqiuo marine quehnoano yeducure. Marine tiqiuore quehnoano wacū tutuagū yeducure. Cristo yequina mari ijigū ihñano sa marine quehnoano yeducure. Tiqui sa yeriqui ijigū ihñana quehnoano ño peoye mehna tiqiuore quehnoano yahuducuuhna. ⁴ Ohō saha yeahye tiqiuo marine tiqiuo yequinare: Ahri yehpa ijiato pano tiqiuo yequina ijianajare bese tuhasahye tiqiuo marine. Sa beseahye marine ñañe mariena mari ijiatire. Sa yena ñañe mariena ijiaja mari, tiqiuo ihñagū. Sa yero marine “Ñana ijire mūsa”, nisi tiqiuo. ⁵ Marine cahño, paja ihñano panopū ohō saha niahye tiqiuo marine: “Yuhū maca Cristo yedohoro mehna tiquina yuhū pohna ijieta”, ni cūahye marine panopū. Tiqui cahmediro sahata sa yeahye tiqiuo marine. ⁶ Marine tiqiuo sa quehnoano yegū ihñana ño peoye mehna tiqiuore quehnoano

yahuducuuhna. Tiqui macano tiqiuo cahñiqui yequina mari ijigū ihñano quehnoano yere marine. Sa yena tiqiuore quehnoano yahuducuuhna.

⁷⁻⁸ Cristota ijire marine pecapū wahaborinare yuhūoriqui. Mari ñañe yerire tiqiuo cohāgū ihñano, Cohācjū pehe mari ñañene bore. Cristo mari ñañe buhirire yariaro tiqiuo diire cohāhye. Marine tutuaro cahño, marine paja ihñano sa ye dutiahye Cohācjū. Tiqui masi pehoye mehna sa ye dutiahye tiqiuo. ⁹⁻¹⁰ Sa yero marine tiqiuo yeatire marine masigū yeri. Panopū apequinare tire masigū yerahye tiqiuo. Ohō saha ijire marine tiqiuo yeati: Tiqui cahmediro sahata tiqiuo tūhoturiro sahata ijipihiyequinare ihcā curuata Cristo yequina ijigū yerota. Sa yero ijipihiyere tiqiuo ye ijigū yerota. Tiqui queori pje ijigū ūhmūse cjēnare, ahri yehpa cjēna gūhūre, ihcā curuata tiqiuo yequina ijigū yerota. Sa yero ūhmūse cjēne, ahri yehpa cjē gūhūre tiqiuo ye ijigū yerota. Sa yero Cristo pehe ijipihiyequina pūhtoro ijirota. Sa ye ijipihiyere tiqiuo ye dihita ijirota. Sa ijiatiqiuo iji dutiahye Cohācjū tiqiuore.

¹¹ Sa yero Cristo yequina mari ijiatire masino panopū Cohācjū marine bese tuhasahye tiqiuo yequina mari ijiatire. Ahri ijipihiyere cūahye tiqiuo tūhoturiro sahata, tiqiuo cahmediro sahata yero taro. ¹² Sa yeahye tiqiuo yere mari yeatire. Mari sa yegū ihñañe apequina tiqiuore ño peoye, “Tutuagū ijire mūhū”, nine. Ūsā pehe judio masa Jesure cahme dūcarina ijina tiqiuore wacū tutua mūhtarina iji. ¹³ Mūsa gūhū poto yahuducuyereta quehnoañe buheyere tūhori. Ti buhaye mehnata Cohācjū cahapū wahanata mūsa. Tire tūhona

tiqirore wacū tutuari m̄asa. Sa wacū tutuana tiqiro yequina wahari m̄asa. Tiqiro yequinare ohō saha niahye Cristo: “M̄sare Esp̄ritu Santore ohoutja”, ni yahu cūahye. Sa yero tiqirore m̄asa wacū tutuagū ihñano Esp̄ritu Santore ohori m̄sare. Sa yero Esp̄ritu Santo m̄asa mehna ijiro Cohācjū yequina m̄asa ijiye tiyere masigū yere tiqiro pehe. ¹⁴ Cohācjū marine yūhdugū yere. Sa yero came tiqiro cahapū neanota marine. Marine tiqiro neato pano Esp̄ritu Santo pehe Cohācjū yere mari c̄uoatire masigū yere marine. Cohācjū marine tiqiro sa yegū ihñana tiqirore ño peoye mehna “Quehnoagū ijire m̄uhū”, niaja mari.

Pablo Cohācjūre sini basahye Jesu yequinare

¹⁵⁻¹⁶ Cristore m̄asa wacū tutuana ijigū ihñagū Cohācjūre sa sini basaducuaaja m̄sare. Jesucristore m̄asa wacū tutuarire, ijiphiyequina tiqiro yequinare m̄asa cahīdire tuhogū Cohācjūre “Quehnoare”, niaja. Ohō saha tiqirore sini basaja m̄sare: ¹⁷ Cohācjū ūhm̄use cjūno tiqiro yere m̄asa quehnoano masiatire sini basaja. Sa yegū tiqirore m̄asa quehnoano masiatire sini basaja m̄sare. Tiqiro mari p̄hutoro Jesucristo Pacuro ijire. ¹⁸ Sa yegū m̄asa quehnoano masiatire m̄sare sini basaja Cohācjūre. Tiqiro m̄sare yūhduro, tiqiro yequina ijigū yerī m̄sare. Tiqiro sa yegū quehnoa yūhdūare marine. Tire m̄asa masiatire sini basaja m̄sare Cohācjūre. Sa yegū marine tiqiro ohoatire quehnoa yūhdūye ti ijigū gūhure m̄asa masiatire sini basaja. ¹⁹ Ohō saha m̄asa masiatire sini basaja m̄sare Cohācjūre. Cohācjūre wacū tutuana mari ijigū ihñano tiqiro tutuaye mehna marine

yedohore. Tutua yūhdūariqiro ijire. Ti gūhure m̄asa masiatire sini basaja Cohācjūre. ²⁰ Ti tiqiro tutuaye mehna tiqiro Cristo yariariqirore masoahye. Sa yero ūhm̄usepū tiqiro poto pehepū Cristore dujigū yeahye Cohācjū, ijiphiyequinare tiqiro dutiato saha. ²¹ Topū dujiro ijiphiyequina ūhm̄use cjēna p̄hutoa bui, ijiphiyequina apequina bui ijire Cristo. Sa yero yojop̄are ijiphiyequina ahri deco cjēna bui p̄hutoro ijire. Camepū ijiphiyequina ape deco cjēnapū gūhure tiquina bui p̄hutoro ijiatiqiurota ijire tiqiro. ²² Sa yero ijiphiyequina bui cūahye Cohācjū Cristore. Sa yero ijiphiyere c̄oriquiro yeahye tiqirore. Sa yero Cristo yequina ihcā curua ijiequina bui p̄hutoro sōahye tiqirore. Tiquina dapu ijire tiqiro pehe. ²³ Cristo yequina ihcā curuata ijina, tiqiro pagū yero saha ijiaja. Cristo ijiphiropū sa ijiducure. Sa yero ijiphiye tiqiro bajumehnedi mehna sa ijiducure.

2

Cohācjū marine cahño, paja ihñano yūhdūoahye marine

¹ Ñañe buhiri tina, pecapū buti-borina m̄asa ijiepegūta Cohācjū m̄sare yūhdūori. ² Panop̄are ahri yehpa cjēna Cohācjūre yūhdūdcayequina yero saha yemedi m̄asa. Sa yena watīno tiqiro nidiro saha yemedi m̄asa. Tiqiro watīno ahri yehpapū dutiriquiro Cohācjūre yūhdūdcayequina p̄hutoro ijire. ³ Panop̄are ijiphiyina mari ohō saha dihita yerina ijimi. Mari ñañe dihitare tutuaro cahmemi. Mari esa tuharo, mari tuhoturiro saha yemi. Sa yena ijina ijiphiyequina apequina yero saha, mari gūhū ñana ijimi. Mari sa yena ijigū ihñano Cohācjū mari mehna usuaro, buhiri dahre

duamahye. ⁴ Sa ye duariquiro ijieperota marine tutuaro paja ihñano, quehnoano cahīdi marine. ⁵ Sa cahī yuhduaro, mari ñañe buhiri pecapū butiborina mari ijiepegūta marine tiquiro mehna sa ijiducuanaja ijigū yeri. Cristo yequina mari ijigū ihñano marine sa yeri. Marine paja ihñano, yuhduori tiquiro marine. ⁶ Sa yero Cristo yequina mari ijigū ihñano Cohācjū marine came tiquiro masoatinare cūri. Cristo tiquiro masoatinare cūri marine. Sa yena tiquiro mehna masa mujanata mari. Sa yero uhmusepū marine Cristo mehna ijigū yerota Cohācjū. ⁷ Ohō saha yeri marine tiquiro paja ihñarire, camepū ijiatiquinare masigū yero taro. Sa yeri tiquiro tutuaro cahīñene tiquinare masigū yero taro. Cristo yequina mari ijigū ihñano sa yuhduori tiquiro marine.

⁸ Cristore mari wacū tutuagū ihñano Cohācjū marine pecapū wahaborinare yuhduori. Marine paja ihñano, marine cahīno marine yuhduori. Mari esa tuharo mari quehnoano yeye mehna Cohācjū cahapū waha masiedaja mari. Cohācjū pehe marine yuhduore. Sa yero tiquiro mehna mari sa ijiducuatire ohore marine. Tiquiro sa ohogū mari esa tuharo quehnoañene mari yeri wapa ijierare ti. ⁹ “ Ūsā esa tuharo pecapū wahaborina yuhduu”, niboaga”, nino ohō saha dutiahye tiquiro: Mari esa tuharo yuhdu dutierare marine. ¹⁰ Cristo yequina ijigū yeri marine Cohācjū pehe quehnoañe dihitare yeanaja mari ijiatire. Panopū quehnoañene mari yeatire cū tuhasahye tiquiro marine.

Cristore cūona mari quehnoano ijiaja

¹¹ Sa yena panopū mūsa ijie tirire yojopū gūhure wacūña mūsa. Cristo yequina ijieranina judio masa ijiena ijina mūsa acaye

yero saha yerina ijimedi mūsa. Cuhnucunū cahserogāre yūhre nedari mūsa. Mūsa sa yūhre nedagū ihñana ūsā judio masa pehe cuhnucunū cahserogāre yūhre nena pehe mū sare ihña tuhtina ohō saha nie tii. “Cuhnucunū cahserogāre yūhre neeñequina ijiye, Cohācjū yequina ijierare”, nie tii mū sare. ¹² Ti pjere Cristo yequina ijierari jimedi mūsa. Ūsā judio masa pehe Cohācjū beserina ijie tii. Ūsā sa ijigū “Mū sare yuhduoutja”, ni cūahye Cohācjū ūsāre. Sa yena mūsa pehe tiquiro sa ni cūrina ijierari jimedi. Sa ye Cohācjū beseriquinare ihña tuhtina ijinimedi mūsa. Mūsa ñañe buhirire pecapū wahanaja ijiri jimedi mūsa. Cohācjū mariena ijina pecapū waha, butiborina ijie tiri jimedi mūsa.

¹³ Yojopū pehere Cristo Jesu yequina ijire mūsa. Panopū Cohācjūre ihña tuhtirina ijiepenata, yojopūre tiquiro yequina ijire mūsa. Cristo mūsa ñañe buhiri curusapū tiquiro dii cohāri bato Cohācjū yequina ijigū yeri mū sare. ¹⁴ Ūsāre judio masare ihña tuhtina mūsa ijigū ihñano Cristo marine ihña tuhti dutierari. Masare sa ni yahuriquiro ijire tiquiro. Ūsā judio masa, judio masa ijiena mehna pūa curua mari ijigū ihñano, tiquiro ihcā curuata ijigū yeri marine. Mari cahme ihña tuhtirire duhugū yeri tiquiro. ¹⁵⁻¹⁶ Ohō saha tire yeri tiquiro: Mari ñañe buhirire curusapū yariaro marine pecapū wahaborinare yuhduori. Sa yuhduoro tiquiro yequina ijigū yeri marine. Sa yero pūa curua mari ijiepegūta ihcā curuata wahma curua ijigū yeri marine. Sa yero panopū mari cahme ihña tuhtirina mari ijiepegūta marine ihña tuhtieragū yeri. Sa yero judio masa ūsā dutiyere cohāri tiquiro. Ti dutiye marine pūa curua iji dutiri jimedi. Yojopūre

ihcã curuata ijiaja mari. Sa yero Cristo Cohãcjũ yequina ijigũ yeri marine.

¹⁷ Sa yero marine cahme ihña tuhtieragũ yero taro Cristo quehnoañe buheyere yahuro ahtahye. Mũsa judio masa ijiena Cohãcjũ yere cõoerari jimedi. Mũsa sa cõoeragũ ihñano mũsare yahuro ahtahye. Ûsã judio masa pehe Cohãcjũ yere cõou. Ûsã gũhare yahuro ahtahye. Sa yero ijipihtinare marine cahme ihña tuhtieragũ yero, bosaro ahtahye tiqiro. ¹⁸ Yojoþare ijipihtina mari judio masa, judio masa ijiena gũhu mari Pacu mehna quehnoano iji masiaja mari. Espiritu Santo tiqiro yedohoye mehna mari Pacu mehna quehnoano iji masiaja mari. Cristo pehe marine sa ijigũ yeri.

¹⁹ Sa yena yojoþare ape dihta cjẽna yero saha ijierare mũsa. Yojoþare Cohãcjũ yequinare ihña tuhtina ijierare mũsa. Cohãcjũ yequina mehna cjãna ijire mũsa. Tiquiro ya curua cjãna ijire mũsa. ²⁰ Cohãcjũ yere yahu mæhtariquina panopu cjẽna tiqiro ye yahuducuyere oja, mũsare yahue tiahye. Ûsã gũhu tiqiro yere yahu dutiro tiqiro cõrina gũhu Cristo yere yahue tii mũsare. Ûsã ijipihtina sa yahugũ tahona, Cristore wacũ tutua ducari mũsa. Quehnoa yæhdæariqiro, ñaÑe marieniqiro ijiro, tiqiro yequina ijigũ yeri tiqiro mũsare. Tiquiro mariedagũ mari ne yæhdæeraboya. ²¹ Sa yero tiqiro masiÑe mehna marine tiqiro yequinare ihcã curua ijigũ yeri tiqiro. Sa yena tiqiro masiÑe mehna quehnoana wahaja mari. Mari sa ijigũ ihñano, tiqiro mari mehna ijire. ²² Sa yena Cristo yequina ijina ijipihtiyequina apequina tiqiro yequina mehna ihcã curua wahari mũsa gũhu. Mũsa sa wahagũ Cohãcjũ yaqiro Espiritu Santo mũsa mehna ijiro nine.

3

Judio masa ijieyequinare quehnoañe buheyere yahuriqiro ijiahye Pablo

¹ Sa yegu yuhu Pablo, Cristo Jesu yere mũsare ijipihtina judio masa ijienare yuhu yahuri buhiri peresupu ijiaja yuhu. ² Cohãcjũ yuhare paja ihñano, yuhare cahño, quehnoañe buheyere mũsare judio masa ijienare yuhare yahu dutiro, cõri. Tire tæho tuhasari mũsa. ³ Panopu mũsare tiqiro yahuerarire Cohãcjũ yojoþare yuhare masigũ yeri. Ahrire mehenogã yahu, mũsare oja tuhasa. ⁴ Yuhu sa ojoarire buhena Cristo yere yuhare tiqiro masigũ yerire masinata mũsa. ⁵ Ti tiqiro yahurire panopu cjẽnare tiqiro yahuerahye. Yojoþu pehere usãre Jesu cõrinare, Cohãcjũ yere yahu mæhtariquina gũhare tiqiro yahurire masigũ yeri Cohãcjũ. Tiquiro yaqiro Espiritu Santo pehe usãre masigũ ye basari tiqirore. ⁶ Ohõ saha ijire tiqiro yahuri: Ûsã judio masa dihitare Cohãcjũ yæhdæoerare. Judio masa ijieyequina gũhare yæhdæorota tiqiro. Quehnoañe buheyere tiquina quehnoano tahogũ yæhdæorota tiqiro tiquinare. Sa yena usã judio masa, mũsa judio masa ijiena mehna ihcã pagu yero saha ihcã curuata ijiaja mari. Sa yena mari ijipihtina Cristo Jesu yequina ijina ihcãno saha Cohãcjũ “Mũsare yæhdæoutja”, tiqiro ni cõriro sahata tiqiro yæhdæonohrina ijiaja mari. ⁷ Cohãcjũ yuhare paja ihñano, yuhare cahño ahri quehnoañe buheyere yahucjere yuhare cõri. Tiquiro masiÑe mehna sa cõri yuhare tiqiro. ⁸⁻¹⁰ Ijipihtiyequina apequina Jesu yequina docapu ijieyequina tiquina docapu waro ijiaja yuhu. Yuhu sa ijiepegũta judio

masa ijieyequinare quehnoañe buheyere yahuacjüre cūri Cohācjū yuhare. Ti buheye Cristo quehnoa yuhdñariquiro tiquiro ijiyere, quehnoa yuhdñaye tiquiro cñoyere tiquiro ohoatire yahure marine. Yuhare sa cūno Cohācjū “Ohō saha yuhdñoutja masare pecarū wahaboriquinare”, nino tiquiro yuhdñoatire quehnoano yahu pehoacjüre cūri tiquiro yuhare. Sa yero panopū cjēnare ti buheyere ne yahu pehoeraniahye Cohācjū. Ijipihtiyere bajumehnediquiro ijire tiquiro. Yojoḡpüre quehnoañe buheyere yahu dutiro cūri tiquiro yuhare, tiquiro quehnoano masi pehoyere masigū yero taro. Masi pehoriquiro tiquiro ijieye tiyere ahmñase cjēna dutieyquinare, angele pñhtoa gāhure masigū ye duahye tiquiro. Sa yero taro quehnoañe buheyere buhe dutiri marine Jesu yequinare. Mñsare judio masa ijenare yahu dutiri yuhare.

¹¹ Ahri yehpa ijiato panopñta “Masare pecarū wahaboriquinare yuhdñoutja” niahye Cohācjū. Sa nidiquiro ijiro yojoḡpüre mari pñhtoro Cristo Jesu tiquiro yariaro mehna tiquiro nidiro sahata marine yuhdñori Cohācjū. ¹² Tiquiro sa yuhdñogū yojoḡpüre Cristore wacū tutuana tiquiro yequina wahaja mari. Tiquiro yequina ijina cuero marieno Cohācjū mehna yahuducu masiaja mari. ¹³ Quehnoañe buheyere mñsare yuhñ buhiri buhiri yojoḡpüre peresupñ ijigñ yuhñ ñano yuhdñgū ihñana bujñ witieracāñña. Quehnoañe buheyere yuhñ yahugū tñhona Cohācjū yequina wahari mñsa. Yuhñ sa yerñ buhiri peresupñ ijiaja. Sa yegñ mñsa ye ijiatire ñano yuhdñgñ niaja. Sa yena bucueya mñsa. Tire tutuaro bucue dutiaja mñsare.

Cristo masare tutuaro cahñe

¹⁴ Sa yegñ ahri ijipihtiyere mari Pacñ tiquiro yerire wacñgñ tiquiro potō ñusepe curi mehna quehe sagñ sini basaja mñsare. ¹⁵ Tiquiro ijipihtiyere cururi cjēna, tiquiro yequina ahmñasepñ ijieyquina, ahri yehparñ ijiniñequina gāhñ tiquina Pacñro ijire. Ijipihntina mari Pacñ ijire tiquiro. ¹⁶ Tiquiro ohō saha ni sini basaja mñsare: Tiquiro masi pehoriquiro ijire. Tutua yuhdñariquiro ijire. Sa yero tiquiro masiñe mehna mñsare quehnoano tiquiro wacñ tutuagñ yeatire sini basaja. Espñritu Santo yedohoro mehna sa yerota.

¹⁷ Sa yegñ Cristore mñsa wacñ tutua nemoatire tiquiro mñsa mehna tiquiro quehnoano ijiatire sini basaja mñsare. Sa yegñ apequinare quehnoano cahñna mñsa ijigñ, Cristo tiquiro tutuaro cahññene mñsa masiatire sini basaja mñsare. ¹⁸⁻¹⁹ Ijipihtieyquina apequina Cohācjū yequina gāhñ Cristo tiquiro tutuaro cahññene tiquina masiatire sini basaja. Tiquiro ijipihtieyquina masare cahñ yuhdñariquiro ijire. Sa cahñniquiro tiquiro ijieye tiyere mñsa quehnoano masiatire sini basaja mñsare. Sa yegñ tiquiro cahññene mñsa masigñ cahmeaja mñsa mehna Cohācjū quehnoano ijiatire. Quehnoa yuhdñariquiro, ñañe marieniquiro tiquiro ijiro saha mñsa wahatire tiquiro cahññene mñsa masigñ cahmeaja. Sa yegñ tiquiro cahññene mñsa masiatire sini basaja mñsare Cohācjüre.

²⁰ Sa ye Cohācjüre ño peoye mehna “Tiquiro tutuariquiro ijire”, niñna mari. Tiquiro masiñe mehna quehnoañe pehere camesa masine tiquiro marine. Marine quehnoana ijigñ ye masine. Mari sinidi yuhdñoro ye masine tiquiro. Mari cahmeñene mari tñhoturi yuhdñoro ye masine tiquiro.

²¹ Cristo Jesu yequina mari ijigñ

ihñañe, Cristo ijiye tiye gũhare ihñañe, ijipihtiye decori ijipihtiye-quina Cohãcjũre ño peohro. Sata yehro.

4

Cristo yequina ijina ihcã curuata ijiaja mari

¹ Sa yegu musare tutuaro yahuaja: Cohãcjũ tiquiro yequina ijiatinare musare besee tiahye. Sa yena tiquiro beserina ijina tiquiro iji dutiriro saha quehnoana ijiya musa. Tire musare yahuaja yũhũ. Mari puhtorore yũhũ yedohori buhiri peresupũ ijiaja yũhũ. Sa ye musare quehnoana iji dutiaja. ² “Usã pũrita masi yũhdũdũcaja”, ni tãhotuna ijieracãhña. Apequinare quehnoano mehna yeya usuaro marieno. Musa mehna cjẽna musare tiquina ñano yepegũta tiquinare cahĩñe mehna sa ihña cãhña. ³ Sa yena Espĩritu Santo yedohoye mehna quehnoano mehna ihcãno mehna ijiducuya musa. Sa yena cahmequeno marieno ijinata musa. ⁴ Ihcã pagũ yero saha ihcã curua ijiaja mari. Sa yero Espĩritu Santo ihcãquiota ijire. Cohãcjũ tiquiro yequina ijianajare musare besee tiahye musare yũhdũoro taro. Sa yena tiquiro yũhdũoatire masine musa. Ti musa masidi ihcãnota ijire. ⁵ Mari puhtoro Cristo ihcãquiota ijire. Tiquiro buheye gũhũ ihcãnota ijire. Tiquiro yequinare wame yeye gũhũ ihcãnota ijire. ⁶ Sa yero Cohãcjũ ihcãquiota ijire. Tiquiro ijipihtiyequina Pacũro ijire. Sa yero mari puhtoro ijire. Sa yero ijipihtinare marine yedohore tiquiro. Ijipihtina mari mehna ijire tiquiro. Sa yero ijipihitropũ ijire tiquiro.

⁷ Ihcã curua mari ijiepegũta ijipihitina marine mari ye masiatire cũri Cristo. Tiquiro cũriro sahata ye masiaja mari. Tiquiro marine

sa cũno apee borore tiquiro sa oho cãriro saha yero nidi tiquiro. ⁸ Sata nine Cohãcjũ yere tiquina ojoari pũpũ:

Cohãcjũre ihña tuhtiyequinare tiquiro yũhdũdũcari bato tiquiro pari turi mujaa waharota. Sa mujano tiquiro peye sa oho cãnota masare, ni ojoahye panopũre.

⁹ “Tiquiro pari turi mujaa waharota”, tiquiro nigũ coã warore tiquiro dijia tari gũhare mari masiaja. Ahri yehpapũre tiquiro dijia tarire mari masiaja. ¹⁰ Sa yero ohõpũre dijia tariquiro tiquiota ijire mujaa wahariquiro. Ijipihtiye bui mujaa wahari tiquiro, ijipihitropũ ijiro taro. ¹¹ Tiquiro ijire “Masare peye sa oho cãriquiro”, tiquina nidiquiro. Masare tiquiro sa oho cãno saha tiquiro peye tiquina ye masiatire cũri masare.

Ohõ saha cũri tiquiro: Ihquẽquinare Cristo ye buheyere buheatiquinare cũri. Apequinare Cohãcjũ yere yahu muhtatiquinare cũri. Quehnoañe buheyere buhe tiniatiquinare apequinare cũri. Cristo yequina cahmecoañequina puhtoa ijiatiquinare, quehnoano buheatiquinare cũri apequinare.

¹² Sa dihita cũri marine apequinare tiquiro yequinare mari yedohoatire. Sa cũri marine tiquiro yequinare tiquiore mari wacũ tutua nemoatire, tutuana mari wahatire. ¹³ Sa yena mari ijipihtina quehnoano mehna ihcãno mehna ijinata. Sata ijiro cahmene marine Cristore wacũ tutuana ijina. Sa yena mari ijipihtina Cohãcjũ macanore quehnoano masinata. Sa yena Cristo tutuariquiro, quehnoano masiniquiro tiquiro ijiriro saha mari gũhũ quehnoano masina wahanata.

¹⁴ Mari sa wahana macanagã yero saha ijisi mari. Macanagã quehnoano tuho masiedariaga.

Apequina tiquina buhegū “Ahri potō ijire”, ni tiquina ni meho buhegū macanagā yero saha ijiyequina apeye buheyere tūho, beseducure. Sa ye apequina tiquina sijoro saha buhegū ti buheye pehere cahmene. Tiquina yero saha ijisi mari.

¹⁵ Ohō saha yenatja mari: Mari mehna cjēnare cahme cahīna, potō quehnoañe buheyere yahunatja tiquinare. Sa yena macanagā tiquina bucua tūho masiñequina tiquina wahariro saha mari gūhu tutuana, Cohācjū yere quehnoano masina wahanatja. Cristo ijiro saha wahanata.

Tiquiro ijire mari dapu. ¹⁶ Tiquiro yequina ijina tiquiro pagu yero saha ihcā curuata ijiaja mari. Sa yena mari caperi, mari cahmo, mari dahpocāri ihcā pagupu ti quehnoano ijiro saha mari gūhu peyequina ijiepenata ihcāno mehna quehnoano ijiaja. Mari sa ihcāno mehna mari ijiatire Cristo yedohore. Mari omocari mari pagure ti quehnoano yedohoro saha mari quehnoano yedohojaja apequinare Cristo yequinare. Sa yena mari mehna cjēnare Cristo yequinare quehnoano cahīna, tiquinare quehnoano yedohona, tutuana Cristore wacū tutua nemonā wahanata mari.

Cristo yequina wahana mari ñañe yeyere duhu, quehnoañe pehere comesaja mari

¹⁷ Sa ye mari puhtoro Cristo tiquiro dutiro mehna ohō saha niitja musare: Cohācjūre cahmeeñequina waro yero saha yeracāhña mūsa. Tiquina tūhotuyē pehe ñañe dihita ijire. Sa ye tiquina tūhotuyē dahseati ijierare. ¹⁸ Sa yero Satana Cohācjū yere tiquinare tūhoeragū yere. Sa ye tiquiro yere ne tūhoerare. Tūho duerare tiquina. Sa ye Cohācjū tiquiro quehnoano iji dutiriro saha

ijierare tiquina. ¹⁹ Sa ye tiquina ñano yeye ne bue tiera yūhdūare. Ne bujua witierare. Ñañene tiquina tutuaro cahmeñe dihitare yeducure. Ijipihtiye ti ñañene yeducuyē duhu duerare. ²⁰⁻²¹ Mūsa pehe potō tiquiro yere tūhona mūsa ijigū, Jesu yere quehnoano masina mūsa ijigū mūsa pehere tiquina yero saha ye dutierare tiquiro. ²² Sa yena panopu mūsa yerire duhu cāhña. Ti pjere ñañene yeducuna mūsa ijigū ti ñañe pehe musare dojomehnenō nimesi. “Ñañene yena, quehnoano bucuenata”, ni tūhotuna ijiepenata ne bucuerari mūsa. ²³ Sa ye mūsa tūhotuyere quehnoañe pehere comesaro cahmene musare. ²⁴ Panopu mūsa ñañe yerire duhu cāhña. Sa yena quehnoañe pehere comesarina ijiya mūsa. Ohō saha ijiyequina Cohācjū yero saha ijire. Mūsa sa ijina, quehnoañene yeducunata. Sa yena ñañene yabinata mūsa.

²⁵ Sa yena mūsa ni mehorire duhu cāhña. Mūsa mehna cjēnare potō yahuya, ni mehono marieno. Mari ihcā pagu yero saha ihcā curua cjānata ijina niaja. Sa yena mūsa basi ni mehoedacāhña.

²⁶ Apequinare usuana, tiquinare ñano yeracāhña. Sa yena usuana, ne yoari pje usuaducueracāhña mūsa. ²⁷ Yoari pje usuana, watīno tiquiro cahmeno saha yena niaga mūsa. Sa yeracāhña.

²⁸ Ihquēquina mūsa mehna cjāna Jesu yequina mūsa ijiato pano yaquerina ijina pari turi yaqueracāhña. Sa yena yojopure quehnoano dahraya pejecoyequinare mūsa ohoatire.

²⁹ Ne ñano yahuducueracāhña. Quehnoañene yahuducuna apequinare yedohore mūsa. Sa yena quehnoañe dihitare yahuducuya. ³⁰ Ñañene yena Espiritu Santore bujua witiḡū yena niaga mūsa. Sa yeracāhña. Yojopure pihtiri

deco pano Cristo marine tiquiro neato pano Espiritu Santo marine ihña ihbore marine ñañene ye dutieraro. Sa yero Cristo yequina mari ijiyere masigū yere tiquiro marine. Sa yena tiquirore bujua witigū yeracāhña.

³¹ Sa yena ne ñano ye nemoedacāhña. Usua, cahme duse tutua nemoedacāhña. Apequinare ñano ni sañuducu nemoedacāhña. Apequinare quti dahre nemoedacāhña. Ne apequinare ñano ni tūhotu nemoedacāhña. ³² Sa ye mūsa mehna cjenare quehnoano mehna quehnoano yeya. Cristo yequina mūsa ijigū ihñano mūsa ñañene bo cāhri Cohācjū. Ohō saha apequina mū sare tiquina ñano yegū ihñana tiquina ñañene bo cāhña mūsa gūhu.

5

“Cohācjū pohne ohō saha ijiro cahmene”, ni yahuahye Pablo

¹ Sa ye Cohācjū pohna tiquiro cahñona ijina Cohācjūre ihña cūña mūsa. ² Sa yena apequinare sa cahīducuya. Cristo marine cahño, mari ñañe buhiri yariahye. Sa yariaro Cohācjūre bucuegū yeahye tiquiro. Sa yena marine tiquiro cahīdiro saha mūsa gūhu apequinare cahīña.

³ Sa yena Cohācjū yequina ijina ne numia mehna ñano yeracāhña. Numia gūhu mūsa mehna ñano yeracāhña. Apeye ñañene ohō saha ijiye ñañene yeracāhña. Apee borore cahme yūhdūeracāhña. Ne sa yeraro cahmene mū sare Cohācjū yequina ijina. ⁴ Sa yena buoyere cahme yahuducueraro cahmene mū sare. Tūho masieñequina yero saha yahuducueraro cahmene mū sare. Sa yena ñano ni bujūperaro cahmene mū sare. Ahri pehere yero cahmene mū sare. Cohācjū mehna yahuducuro

cahmene mū sare. Sa yahuducuna tiquirore “Quehnoano yeri mūhu usāre”, nino cahmene. ⁵ Apee borore cahme yūhdūana, “Cohācjū ijire”, mari ñañe queoyere mari cahmeno saha yena niaja mari tire. Doeri cjenē ño peoyequina yero saha yena niaja mari. Sa ye wūana tiyequina, ñañe dihitare tūhotuyequina, apee borore cahme yūhdūayequina Cohācjū, Cristo mehna tiquina pūhtoro ijiropū ne wahasi tiquina. Tire quehnoano masiaja mari. ⁶ Ohō saha ye yequina tiquina yeri buhiri buhiri dahrerota Cohācjū tiquirore yūhdūacayequinare. Sa yena apequina mū sare “Ahri ñañe ijierare”, tiquina ni mehogū tūhoeracāhña. ⁷ Sa yena ohō saha ñano ye yūhdūacayequinare ne piti tieracāhña.

⁸ Cristo yequina mūsa ijiato pano sa ijirinata ijimedi mūsa gūhu. Yojopū pehere tiquiro yequina ijina, Cohācjūre quehnoano masine mūsa. Cohācjū yequina quehnoañene yere. Sa yena sa yero cahmene mū sare. ⁹ Sa yena Cristo yequina ijina quehnoañene, Cohācjū cahmeñene, ni mehono marieno yeducunata mūsa. ¹⁰ Quehnoañene mari yegū ihñano mari pūhtoro Cristo bucuere. Sa yena tire yeya. ¹¹ Cristore cahmeeñequina ñañe tiquina yeye ñañe waro ijire. Sa yena tiquina yero saha mūsa pehe yeracāhña. Quehnoañe buheyere Cristo yere yahuya tiquinare. Sa yena tiquina ñañe yeyere tiquinare masigū yeya. ¹² Masa ihñenopū tiquina ñano ye cohtere. Tiquina sa yerire yahuducuna mari bue tiboaga. Sa yeye ña yūhdūaro yere tiquina. ¹³ Sa yena tiquinare quehnoañe buheyere mari yahuna, ña yūhdūayequina tiquina ijiyere masigū yena niaja mari tiquinare. Ijipihtiye

mari yerire marine masigū yere quehnoañe buheye, buhrioro marine ti ihña masigū yero sahata. ¹⁴ Ti ijirota ijire. Sa ye ohō saha ni yahure Cohācjū yere yahuyequina: Ne, yahure taho duena, tahoya mūsa. Mūsa ñañe yeyere bujua witi, tire duhuya. Cristo mūsa ñañe yeyere masigū yerota, ni yahure.

¹⁵ Sa yena decoripe quehnoano yeya mūsa. Taho masieñequina yero saha ijieracāhña. Taho masina ijiya. ¹⁶ Yojoꝑu cjēna masa ña yahduaro yeducure. Sa yena mūsa pehe quehnoañene, Cristo yere sa yeducuya mūsa. ¹⁷ Sa yena taho masiena ijieracāhña. Cohācjū cahmeñene quehnoano masiña. Sa yena tire yeya. ¹⁸ Sa ye pairure sihni queheracāhña. Queheyequinare ñano yahduaro cua yahduare. Sa yena pairure tutuaro cahmedacāhña. Espiritu Santo pehere tutuaro cahmeña mūsa mehna tiqiro quehnoano ijiatire. Tiquirore quehnoano yahtiya. ¹⁹ Sa yena mūsa basi Cohācjūre ño peo basayere cahme yahuducuya. Sa yena Salmore Cohācjū yere basayere, apeye tiquirore ño peo basaye gūhare tiquirore basa peoya mūsa. Quehnoano wacū ño peoye mehna basa peoya. Sa yena mari puhtoro Cristore ño peoya. ²⁰ Cohācjū mari Pacu ijiphtiyere masare tiqiro ohorire bucue “Quehnoare”, sa niducuya mūsa tiquirore. Mari puhtoro Jesucristo yequina ijina mari Pacure “Quehnoare”, sa niducuya mūsa.

“Mūsa ihcā wuhñ cjāna Jesu yequina ijina, ohō saha yeya”, ni yahuahye Pablo

²¹ Sa ye mūsa mehna cjēnare cahme ño peoye mehna yahtiya. Sa cahme ño peo yəhtina Cristo gūhare ño peona nine mūsa.

²² Mūsa namosānumiare yahutja yojoꝑure. Mari puhtoro Cristore mari yəhtiro saha mūsa manūsumhare quehnoano mehna yəhtina numia ijiya. ²³ Jesucristo marine yahduore tiqiro ya curua cjāna mari ijiatire. Sa yero mari tiqiro ya curua cjāna mari puhtoro tiqiro ijiro saha mūsa manūsumha mūsa namosānumia puhtoa ijire. ²⁴ Sa yena Cristo yequina ijina tiquirore sa yəhtiducuaja mari. Sata mūsa namosānumia mūsa manūsumhare quehnoano yəhtiducuna numia ijiya.

²⁵ Mūsa manūsumha pehere yahutja yojoꝑure. Cristo marine tiqiro yequinare cahño, mari ye ijiatire yariahye. Sa yena marine tiqiro cahñiro saha mūsa gūhu mūsa namosānumiare quehnoano cahñiducuya. ²⁶ Cristo mari ye ijiatire yariahye mari ñañe yerire cosero taro. Tiquiro buheye quehnoañe buheye mehna mari ñañe yeyere cosere. Sa yero tiqiro yequina mari ijigū ihñano aco mehna marine wame yere. ²⁷ Sa cosere marine tiqiro yequina ijianare yero taro. Tiquiro sa cosegū ne ñañe buhiri mariena ijinata, tiqiro ihñagū. Sa yena quehnoana, Cristo yero saha ijinata. ²⁸ Mūsa namosānumiare cahña, mūsa basi mūsa pagurire mūsa cahño saha tiqina numiare cahña. Mari namonore cahña mari pagure cahña niaja.

²⁹⁻³⁰ Ne mari pagurire ñano wahagū cahmedaja. Mari ihyayere ihyana quehnoano yena niaja mari pagurire. Cristo yequina ijina tiqiro pagu yero saha tiqiro ya curua cjāna ijiaya mari. Sa yero marine quehnoano yere tiqiro. Sa yena Cristo marine tiqiro quehnoano yeriro sahata mari gūhu mari pagure quehnoano yeaja. Mari namosānumia gūhare sata quehnoano yero cahmene

marine. ³¹ Sata nine Cohãcjũ yere tiquina ojoari pũpũ: “Sa ye ʔmũno tiquiro pacũsumũare wijiaro tiquiro namono mehna ijirota. Sa ye tiquina pũaro ijiepetahcãquiro yero saha ijieta”, ni ojoahye panopũ. ³² Ahri tiquiro ojoarire apequina quehnoano tuhoerari jiri. Sa yegũ tire ohõ saha ni yahutja mũsare. Ohõ saha ni yahuro niaga. “Cristo tiquiro yequina mehna ihcã pagũ yero saha ihcã curuata ijire”, ni yahuro niaga. ³³ Sa yegũ mũsare ohõ saha ni yahu nemoutja tja: Mũsa pagũrire mũsa cahĩno saha mũsa namosãnumiare cahĩña. Sa yena mũsa manũsumũare quehnoano ño peoya mũsa.

6

¹ Yojoũpũre macanagãre yahutja. Mari pũhtoro Cristo yequina ijina mũsa pacũsumũare quehnoano yũhtiya. Mũsa sa yegũ quehnoarĩne. ²⁻³ Ohõ saha niahye Cohãcjũ dutiye: “Mũsa pacũsumũare quehnoano ño peoya”, ni dutiahye tiquiro. Ahri dutiro mehna Cohãcjũ yahu nemoahye. Ohõ saha niahye: “Mũsa pacũsumũare ño peona, ahri yehrapũ yoari pje bucueye mehna ijinata mũsa”, ni yahuahye. Tiquiro sa ni yahugũ ahri dutiro ihyo ijiri dutiro ijierare. Sa yena tiquiro nidiro saha mũsa pacũsumũare ño peoya.

⁴ Yojoũpũre tiquina pacũsumũare yahutja: Mũsa pohnare sa tuhtiducueracãhña, “Usuagũ yeari”, nina. Mari pũhtoro Cristo tiquiro cahĩñe mehna tiquiro yedohoye mehna tiquinare quehnoano cohteya. Sa yena tiquinare quehnoano yahuya.

⁵ Yojoũpũre cahacjãnare mũsare yahutja: Cua pesaro mehna, ño peoye mehna ahri yehpa cjẽnare mũsa pũhtoare quehnoano yũhtiya. Ni mehono marieno quehnoano yũhtiya. Cristore mũsa

yũhtiro sahata tiquinare yũhtiya mũsa.

⁶ Tiquina ihñono dihitare yũhtina ijieracãhña. Sa yeyequina masa dihitare tiquinare ihña bucuegũ cahmene. Mũsa pehe Cristo tiquiro cahacjãna mũsa ijiro saha mũsa pũhtoa gũhũre sa yũhtiducuya. Cohãcjũ tiquiro cahmeno sahata quehnoano bucueye mehna yũhtiya. ⁷ Sa yena Cristore yũhtina mũsa ijiro saha bucueye mehna yũhtiya mũsa pũhtoa gũhũre. “Masa dihitare yũhtina niaja”, ni tuhotueracãhña. ⁸ Sa yena ahrire wacũña: Ijipihitina quehnoañene mari yegũ ihñano Cohãcjũ quehnoano yerota marine. Cahacjẽnare, cahacjẽna ijieyequina gũhũre quehnoano yerota.

⁹ Yojoũpũre pũhtoare yahutja: Mũsa cahacjẽnare quehnoano yeya. Tiquinare quehnoano yũhũ ye dutiriro sahata yeya mũsa gũhũ tiquinare. Tiquinare tuhtiperacãhña. Hmũse cjũno Cohãcjũ potota tiquina pũhtoro ijire. Mũsa yaquiro pũhtoro ijire tiquiro gũhũ. Sa yena ijipihtina mũsa tiquiro cahacjãna dihita ijire. Sa yero tiquiro ihcãno saha ihñare mũsare ijipihtinare. Sa yena mũsa cahacjẽnare tuhtiperacãhña.

Cristo yequina watĩnore tiquina cahmotarire yahuahye Pablo

¹⁰ Ahrire yahu bato tiitja mũsare: Quehnoano wacũ tutuana ijia mũsa. Mari pũhtoro Cristo mũsa mehna ijire. Sa yena tiquiro ye masiñe mehna wacũ tutuana ijia. ¹¹ Watĩno marine ni mehono, ñano ye dutire marine. Cohãcjũ marine cahmotare mari ñañene yeborire. Marine tiquiro cahmotaye surara tiquiro cahmotari suhtiro, come suhtiro yero saha ijire. Sa yena ti suhtirore mũsa sañano saha Cohãcjũ tiquiro cahmotayere quehnoano cũo pehoya. ¹² Jesu yequina mari ijigũ, marine ihña

tuhtiyequina masa waro ijier-are. Ʋhmuse cjēna ijimediquina ñañequina, tutuayequina, tiquina pehe ijire marine ihña tuhtiyequina. Watña ahri yehpa cjēna pũhtoa ijire. Sa ye tiquina gũhu ijire marine Jesu yequinare ihña tuhtiyequina.

¹³ Sa yena yojoꝑure cahmotari suhtirore m̄sa sañano saha Cohãcjũ m̄sare tiqũiro cahmotatire tiqũiro yere quehnoano cuo pehoya. Sa yena watĩno m̄sare tiqũiro ñano ye dutigũ, m̄sare tiqũiro ñano ye duagũ, tiqũirore cahmotanata. Sa yena yũhdũdcanata. Sa tiqũirore yũhdũdcana, tutuana tojoanata m̄sa.

¹⁴ Sa yena tutuana ijiya. Cohãcjũ m̄sare tiqũiro cahmotatire ohõ saha yeya m̄sa:

Surara tiqũiro come suhtiro mehna tiqũiro jeripohnare cahmotariro saha poto yahuyere Cohãcjũ yere quehnoano tũhoya m̄sa watĩnore m̄sa cahmotatire. Sa yena Cristo yedohoye mehna quehnoana ijiya m̄sa, watĩnore m̄sa quehnoano cahmotatire.

¹⁵ Surara tiqũiro dahpo suhti mehna tiqũiro dahpocãrine tiqũiro cahmotariro saha quehnoañe buheyere quehnoano masiña m̄sa, watĩnore m̄sa cahmotatire. Ti buheye marine quehnoano ijigũ yere.

¹⁶ Surara tiqũiro tohoriro mehna tiqũiro cahmotariro saha Cristore quehnoano wacũ tutuaducuya m̄sa watĩnore m̄sa cahmotatire. Bueye cjũ mehna tiqũiro sihã m̄sare tiqũiro bũedoqueboro saha watĩno m̄sare ñano yegũ ye duare. Sa yena Cristore quehnoano wacũ tuana, cahmotanata m̄sa.

¹⁷ Surara tiqũiro come sapea mehna tiqũiro dapure cahmotariro saha m̄sare pecapũ waha-borinare Cristo yũhdũorina ijiya m̄sa, watĩnore m̄sa cahmotatire.

Surara tiqũiro ñoseni pjĩ mehna tiqũiro cahmotariro saha Cohãcjũ ye buheyere quehnoano masiña m̄sa, quehnoano m̄sa cahmotatire. Sa yena apequinare quehnoano yahuya tiqũiro yere. Ti Cohãcjũ ye buheyere Espĩritu Santo marine yahure.

¹⁸ Sa m̄sa watĩnore cahmotana Cohãcjũre decoripe sa siniducuya. Espĩritu Santo yedohoye mehna sa siniducuya. Sa yena quehnoano wacũ masiña. Sa sinina, caributieracãhña. Ijipihtiyequina Cohãcjũ yequinare sa sini basaducuya.

¹⁹ Sa yena yũhu gũhure sini basaya Cohãcjũre. Ohõ saha ni sini basaya: Quehnoañe buheyere, panopũ tiquina masiedarire quehnoano yũhu yahuatire sini basaya yũhure. Sa yena cuero marieno yũhu yahuatire sini basaya yũhure. ²⁰ Cristo tiqũiro yere yahu dutiro yũhure oho. Yũhu sa yahuri buhiri peresupũ ijiaya yojoꝑure. Ohõpũ yũhu ijiepegũta cuero marieno tiqũiro yere yũhu yahuatire sini basaya yũhure. Tiqũiro yere yahuacjũ ijigũta niaja yũhu.

Pablo quehnoa duti bato tiahye

²¹ Yojoꝑure Tĩquico m̄sa cahapũ esaro yũhu ijiye tiyere m̄sare yahu pehorota. Tiqũiro mari acayũro mari cahĩniquiro ijire. Sa yero mari pũhoro yere quehnoano yedohoriquiro sa ijiducure. ²² Ʋsã ijiye tiyere m̄sare yahu dutigũ tiqũirore ohogũ niaja m̄sa quehnoano bucueatire.

²³ Cohãcjũ mari Pacũ mari pũhoro Jesucristo gũhu tiquina mehna m̄sa ijipihtinare usã acayere quehnoa dutiaja. Cristore m̄sa quehnoano wacũ tutuaye mehna m̄sa cahme cahĩatire Cohãcjũre sini basaja m̄sare.

²⁴ Ijipihtiyequina mari pũhoro Jesucristore sa cahĩducuyequinare Cohãcjũ mehna quehnoa dutiaja.

Filipenses

Peresupũ ijiriquire ahri pũre oja ohoahye Pablo

¹ Yũhũ Pablo, Timoteo mehna Jesucristo cahacjãna ijiaja usã. Sa yena ijipihtinare musare quehnoanare Jesucristo yequinare Filipino cjãnare quehnoa dutiaja usã. Musare, musa puhtoã gãhũre, musare yedohoyequina gãhũre oja ohoaja yũhũ, Pablo. ² Sa yena Cohãcjũ mari Pacũ, mari puhtoro Jesucristo mehna musare quehnoa dutiaja. Tiquina yedohoye mehna quehnoano ijiya musa.

Pablo Jesu yequinare Cohãcjũre sini basahye

³⁻⁶ Cohãcjũ musare quehnoañe pehere comesagũ yero nine. Sa yero musare tiquiro sa ye dũcariro sahata sohtori dahrerota tiquiro. Sa yena Jesucristo ahri yehpapũre tiquiro wihigũpũre ñaũe mariena ijinata musa. Sa yena coã waropũre Jesu yequina musa ijiri bato, yojopũ gãhũre yedohore musa yũhũre quehnoañe buheyere yũhũ buhegũ. Musa sa yegũ ihñagũ Cohãcjũre “Quehnoare”, niaja yũhũ. Musare wacũgũ sa dihita niaja yũhũ. Musare Cohãcjũre sini basagũ, bucueye mehna sini basaja.

⁷ Musare yũhũ sa tuhotugũ quehnoarĩne. Quehnoañe buheyere “Poto tjire”, puhtoare yũhũ tutuaro ni yahuducugũ musa yũhũre yedohori. Poto ti buheye ijigũ yũhũ tiquinare yahugũ musa yũhũre yedohori. Peresupũ yũhũ ijigũ gãhũre musa yũhũre yedohori. Sa yero Cohãcjũ marine quehnoano yero, tiquiro ye buheyere cũri marine. Musa yũhũre yedohori. Sa yena ti buheyere yũhũ mehna musa buheboriro saha yena nine musa,

yũhũre yedohona. Sa yegũ yũhũ jeripohna mehna tutuaro wacũaja yũhũ musare. ⁸ Jesucristo cahĩne mehna tutuaro musare wacũaja yũhũ. Yũhũ sa wacũgũ Cohãcjũ tire masine.

⁹ Musare ohõ saha ni sini basaja yũhũ Cohãcjũre: Cohãcjũ yere quehnoano masĩne mehna, tuho masi pehoye mehna apequinare musa cahĩ nemoatire sini basaja yũhũ musare Cohãcjũre. ¹⁰ Quehnoa yũhũyere musa masiati gãhũre sini basaja musare. Musa sa masina Cristo ahri yehpapũ tiquiro tojoa tagũ quehnoañene yena, ñaũe buhiri mariena ijinata musa. ¹¹ Sa yena ijina Cohãcjũ cahmeñene yenata musa. Musare sa yegũ yerota Jesucristo pehe. Cohãcjũ quehnoa yũhũariquire, tutu-ariquire tiquiro ijiyere ihñono taro, ijipihtiyequina tiquirore tiquina ño peoatire tiquiro cahmeñene musare yegũ yerota.

Pablo Cristo yaquire tiquiro ijiye tiyere yahuahye

¹² Yũhũ acaye, ahri yũhũ nitire musa quehnoano masigũ cahmeaja yũhũ. Yojopũre peresupũ yũhũ ijiepegũta quehnoañe buheye pehe sa uhmũ tãducuro nine. ¹³ Sa ye Cristo yaquire yũhũ ijiri buhiri peresupũ yũhũ ijirire masi phtire puhtoro ya wũhũ cjẽna surara. Ijipihtiyequina apequina gãhũ ohõpũ ijieyequina tire masine. ¹⁴ Sa ye peresupũ yũhũ ijigũ ihñañe, peyequina mari acaye Jesu yequina mari puhtoro Jesure wacũ tutua nemoñe nine. Sa wacũ tutuaye, cuero marieno quehnoañe buheyere apequinare buhere tiquina.

¹⁵ Ihquẽquina Cristo yere buheraboriquina ijiepetã yũhũre ihña cooye, Cristo yere buhere apequinare tiquinare ihña wahãgũ cahmeñe. Apequina pehe

quehnoano mehna Cristo yere buhere. ¹⁶⁻¹⁷ Quehnoañe buheyere yuhũ tutuaro yahuatire Cohãcjũ yuhũre tiquiro cũrire quehnoano masine ahriquina pehe. Sa masiñe tiquina cahĩne mehna Cristo yere buhere. Apequina pehe yuhũre ihña tuhtye, masare tiquina pehere tiquina ihña wahãgũ cahmeñe, Cristo yere buhere. Sa ye peresupũ yuhũ ijigũ tiquina yuhũre bujũa witigũ ye duare. ¹⁸ Quehnoanota. Cristo yereta buheye nine. Tiquina Cristore pota cahiedapeta Cristo yereta buhere. Apequina pehe quehnoano mehna buhere. Ijipihtyequina tiquina tiquiro yere buhegũ bucueaja.

¹⁹ Sa yegũ sa bucueducugatja yuhũ. Cohãcjũre mũa sini basari mehna Jesucristo yaquiro Espĩritu yedohoye mehna Cohãcjũ yuhũre wiorota peresupũ ijirigure. Tire masiaja. ²⁰ Ohõ saha yeitja yuhũ. Decoripe yuhũ yeriro sahata yojopũ gãhũre cuero marieno Cristo yere buheaja, masa tiquirore quehnoano tiquina ño peoato saha. Ohõ saha ye duaja yuhũ yerire yuhũ bũoro yuhũderato saha. Catinigũ waro ohõ saha ye duaja. Tiquina yuhũre wejẽ duepegũta ohõ saha ye duaja. ²¹ Catinigũ Cristo yere yenigatja. Yariagupũ pũrita ti yuhũdũoro quehnoano tojoagutja yuhũ. ²² Sa niepegũta catinigũ Cristo yere yuhũ ye nemoato saha cati nemo duaja. Sa niepegũta yariaye gãhũre cahmeaja. ¿Dise boro pehere yuhũ cahmeboagari? Masiedaja yuhũ. ²³ Yuhũ ohõ saha ni yahuducugã mijorĩne yuhũre. Cristo mehna tutuaro iji duaja. Sa yegũ yojopũre tiquiro cahapũ waha duaja. Catiye yuhũdũoro ahri pehe quehnoa yuhũdũucare. ²⁴ Sa ijipegũta mũare yuhũ yedohoato saha catinino cahmene yuhũre. ²⁵ Tire masigũ ohõpũ mũa mehna

yuhũ ijiniatire masiaja yuhũ. Sa ijinigatja Cristore mũa wacũ tutua nemoatire, ti wacũ tutuaye mehna mũa bucueatire. ²⁶ Ahri yehpapũ ijinigũ mũa cahapũ pari turi yuhũ wahagũ mũa bucuenata. Cristo Jesu yuhũre tiquiro yedohogũ masina, “Tutuagũ ijire mũhũ”, ni ño peonata mũa tiquirore.

²⁷ Yojopũre ahri dihitarẽ yahutja mũare. Cristo ye buheye ti nidiro sahata ijiducuya mũa. Wacũ tutuana ijiya. Sa yena cahme tu waro marieno quehnoañe buheyere yahu tutuaya. Sata yuhũ mariedagũ gãhũre yuhũ ijigũ gãhũre mũa yegũ cahmeaja. Sa ijina mũa ijigũ tũhoo duaja yuhũ. ²⁸ Mũare ihña tuhtyequinare cueracãhña. Mũa sa cueragũ ihñañe Cohãcjũ yequina mũa ijigũ masieta tiquina. Sa masiñe pecapũ tiquina wahati gãhũre masieta. Sa ye Cohãcjũ mũare tiquiro yuhũdũoati gãhũre masieta. Ohõ saha masigũ yere Cohãcjũ masare. ²⁹ Cristore mũa wacũ tutuatire Cohãcjũ cũri. Ahri gãhũre cũri. Cristo yere mũa yeri buhiri mũa ñano yuhũdũati gãhũre cũri Cohãcjũ. ³⁰ Sa ye Cristo yequina mũa ijiri buhiri apequina mũare ñano yere. Mũare tiquina yeriro saha yuhũ gãhũre ñano yere tiquina. Mũa mehna yuhũ ijigũ yuhũre tiquina sa yegũ ihñari mũa. Yojopũ gãhũre yuhũre tiquina sa yegũ tũhoore mũa. Sa yena mari ihcãno saha ñano yuhũdũaja.

2

Cristo ihyo ijiriquiro sajãno, ijipihitiyequina puhtoro ijiatiquiro iji-ahye

¹⁻² Cristo mũare quehnoano jeripohna tigũ tiquiro yegũ, Cristo tiquiro cahĩne mehna mũa bucuenta, yuhũre quehnoano bucuegũ yeya mũa. Sa yena Espĩritu Santo ijipihtina mũa mehna tiquiro

ijigū apeqinare cahīna, paja ihñana ijina, yahare quehnoano bucuegū yeya mūsa. Ahrire mūsa yegū bucueitja: Ihcāno mehna quehnoano jeripohna tiya mūsa. Sa yena mūsa basi cahme cahīña. Quehnoano mehna ijiducuya. Sa yena ihcāno mehna quehnoano ijiya. ³ Apeqinare yahdudca dueracāhña. Sa yena sa tūhotu cāhña mūsa. Sa yena apeqinare quehnoano ño peo, ohō saha ni tūhotuya: “Tiquina pehe yahū yahdūoro quehnoañequina ijire”, ni tūhotuya. ⁴ Ihcāquiro apeqinare yedoho dueraboaga. Tiquiro yero saha yeracāhña. Apeqina gūhare yedohoya.

⁵ Cristo Jesu apeqinare yahdudca dueriquiro tiquiro ijiro saha mūsa gūhū apeqinare yahdudca dueracāhña. ⁶ Tiquiro pehe Cohācjū waro ijieperota “Cohācjū mehna ihcāno saha ijigū wijiasi yahū”, ni tūhotuerahye tiquiro. ⁷ Sa yero tiquiro Cohācjū mehna ihcāno saha tiquiro ijiyere wijia, ohōpū ahtaro masūnota masa bajuaro tiquiro cahacjūno yero saha iji dūcahye. ⁸ Sa yero tiquiro masūno ihcāno saha pagū tiriqiro ijiro, ihyo ijiriquiro waro wahahye. Sa waharo “Curasapū wejēña tiquirore”, tiquina nigū tiquiro yahdudcaerahye. Curasapū yariatiquiro ijieperota tiquiro yahdudcaerahye. ⁹ Sa yero mari Pacū ijipihtiequina tiquina ño peoatiquirore cūahye Jesure. Sa yero ijipihtiequina apeqina pūhtoro sōahye Cohācjū tiquirore, ¹⁰ ijipihtiequina ūhmūse cjēna, ahri yehpa cjēna, yariariquina gūhū Jesu wamene tūhoyequina tiquina dūsepe curi mehna quehe sa, tiquina ño peoato saha. ¹¹ Sa pūhtoro sōahye tiquirore mari Pacū, “Jesucristo mari pūhtoro ijire”, ijipihtiequina tiquina niatiquirore. Sa niñe Cohācjūre

mari Pacure ño peoye nine.

Cristo yequina buhrioro yero saha ijiye, quehnoano masare yahu, masigū yere

¹² Sa yena yahū cahīna, mūsa mehna yahū ijigū mūsa yahituducuro saha, yojopū yahū yoaropū ijigū gūhare panopū mūsa yahitiro yahdūoro yahitiya yahare. Sa yena ijipihtina mūsa quehnoana ijina tana Cristo yedohoro mehna ñañene yeracāhña. Sa yena ño peoye mehna apepero marieno Cohācjū yere yeya. ¹³ Cohācjū quehnoañe pehere mū sare cahmegū yero nine tiquiro cahmeno saha mūsa yeato saha. Sa yero tire mūsa yeatire yedohorota Cohācjū. Tiquiro sa yedohogū ti yahū nidiro saha yeya mūsa.

¹⁴ Ijipihtiyere yena tuhtiro marieno, mūsa basi unureno marieno yeya. ¹⁵ Sa yeya mūsa ñañe buhiri mariena, ñañene yerarina Cohācjū pohna mūsa ijiatire. Sa yeya mūsa masa ni mehoñequina, ñañequina watoapū dojomehnenno marieno mūsa ijiato saha. Tiquina ñañequina watoapū ijina, buhrioro ihña masigū yero saha quehnoañe buheyere buhena, masigū yere mūsa ahri yehpa cjēnare. ¹⁶ Ti buheyere mūsa tūho ñehedi bato Cohācjū mehna sa ijiducuaana wahari mūsa. Ti buheyere ahri yehpa cjēna pehere mūsa sa buhegū ihñagū mūsa mehna bucueitja. Sa yegū mū sare yahū buherire “Ihyo waro buherari ijii yahū”, niitja yahū. Sa yegū Cristo ahri yehpapū tiquiro tojoa tagū mūsa mehna bucueitja. Sa yegū būoro yahdūsi yahū. ¹⁷ Cristore mūsa wacū tutuagū Cohācjū mūsa mehna bucuero. Tiquiro sa bucuegū masigū mū sare Cristo yere yahū buheri buhiri yahare tiquina wejē duepegāta bucueitja. Sa yena mari ijipihtina ihcāno saha bucuenata. ¹⁸ Sata

musa gũhure bucuero cahmene yũhũ mehna, came yũhũ sa yariagũ ihĩana.

Timoteore, Epafrodito gũhure yahuahye Pablo

¹⁹ Mari pũhoro Jesu tiquiore cahmegũ sojaro mehna Timoteore musa caharũ oho duaja yũhũ musa ijiye tiyere masigu tũhũ. Sa masigu bucueitja. ²⁰ Ijirota ijire. Timoteo musa quehnoano ijiatire pajiro tũhoture musare. Apequiore tiquiore yero saha ijiriquiro mariedare yũhũ mehna. ²¹ Apequina pehe ijipihitiyequina tiquina cahmeñe dihitare ye duaye, Cristo Jesu tiquiore cahmeñe pehere ye duere. ²² Timoteo pehe quehnoano yeriquiro tiquiore ijiyere masine musa. Yũhũ macũ yero saha tiquiore yũhũ mehna quehnoañe buheyere yahue tiri. Sa yena usã ihcãno saha Cristo yere buhee tii. ²³ Sa yegũ pũhoro yũhũre tiquina dũhse yeatire masigu, Timoteore musa caharũ oho duaja. ²⁴ Sa yegũ mari pũhoro Jesu yedohoye mehna sojaro mehna yũhũ gũhũ musa caharũ wahaũtja.

²⁵⁻²⁶ Yũhũre yedoho dutina musa Epafroditore ohori yũhũ caharũ. Tiquiro yũhũ acayũro yũhũ mehna dahrariquiore, yũhũ mehna cjãno, Cohãcjũ yere buhe tutuariquiore ijire. Tiquiro musare tutuaro wacũe tiri. Sa yero tiquiore dohatirire musa tũhogũ masino tiquiore pehe pajiro bũjũa witi tũhoturi. Sa pajiro tiquiore tũhotugũ ihĩagũ “Tiquirore musa caharũ oho majare tojoro cahmene yũhũre”, ni tũhotuaja yũhũ yojopũre. ²⁷ Potota ijire. Tiquiro tutuaro dohatiri. Meheno yariabo cure yũhdũri. Tiquiro sa tutuaro dohatiepegũta Cohãcjũ tiquiorere paja ihĩano, yũhdũgũ yeri. Tiquiro yariagũ yũhũ pehe tutuaro bũjũa witiyoa. Sa yero Cohãcjũ yũhũ gũhũre paja ihĩari

tiquiorere yũhdũgũ yero. ²⁸ Sa yegũ yojopũ pũritare sojaro mehna tiquiorere musa caharũ oho duaja pari turi musa tiquiorere ihĩa, musa jeri sajãno quehnoano. Musa sa bucuegũ ihĩagũ yũhũ gũhũ bucueitja. ²⁹ Sa yena tiquiorere Epafroditore mari pũhoro yaquiorere mari acayũrore quehnoano bucueye mehna piti caya. Sa yena apequinare tiquiore yero saha ijiyequinare ño peoya. ³⁰ Tiquiro Cristo yere yedohomehno yariamedi. Musa pehe yũhũ caharũ ijieragũ, yũhũre yedoho masiedagũ tiquiore pehe yũhũre yedohomedi. Sa yero yariamedi tiquiore.

3

Quehnoano yeye warore yahuahye Pablo

¹ Yojopũ pũritare ahrire yahutja. Mari pũhoro yequina ijina bucueya. Ahri buheyere to pano yũhũ yahurire pari turi musare ni ojoagũ bucueaja yũhũ. Sa yegũ musare ahrire yahugũ yedohogũ niaja musare. ² Quehnoano yeya musa. Ñañene yeducuyequina, diayea yero saha ijiyequina ñañequina cuhnucunũ cahserogãre yũhre ne dutiye, musa pagũrĩre yũhre ne duare. Quehnoano yeya musa, “Sa ye dutiyequina sijoro saha ni buhearĩ”, nina. ³ Tiquina cuhnucunũ cahserogãre yũhre nepeta Cohãcjũ dutiyere quehnoano yerare. Mari pehe potota Cohãcjũ dutiyere quehnoano yena ijiaja mari. Espĩritu Santo tiquiore yedohoye mehna Cohãcjũre ño peoaja mari. Sa yena Jesu yequina mari ijiyere bucueye mehna apequinare mari yahuaja. “Usã esa tuharo Cohãcjũ dutiyere ye peho masiaja”, ne ni tũhotueraja. ⁴ Sa ni tũhotuerapegũta “Tiquinare doca cũ cjã”, tiquina yero saha nidigũ ijigũ sa tjiboa yũhũ gũhũ. Apequiore ohõ saha ni yũhdũdũca

duare. Yuhũ pehe tiqũiro yũhdũoro sa niboaga yuhũ.

⁵ Ohõ saha yerigũ ijimi yuhũ. Ocho decori yuhũ masa bajuari bato cuhnucunũ cahserogãre yũhre nedi jiri yũhare. Israe masũ ijigũ Benjami ya curua cã jũ ijiaja yuhũ. Yuhũ paçusũmũa hebreo masa tiquina ijigũ potota hebreo masũ warota masa bajuũ. Cohãcã dutiyere potota peho duagũ fariseo curua mehna sajãmi yuhũ. ⁶ “Cohãcã ye ijiri”, nigũ quehnoano yemi. Sa yegũ Jesu yequina pehere ñano yee timi yuhũ. Potota Cohãcã dutiyere yegũ tire yũhdũũcaro marieno ye pehou.

⁷ Panopũre “Ti quehnoañe ijiri”, ni tuhotumi. “Ti yuhũ sa ni tuhoturi panopũ yuhũ ijie tiri dũhseati ijierari”, ni tuhotuaja yojopũre. Sa ni tuhotu dũcaũ yuhũ Cristore wacũ tutuagũ tuhũ. ⁸ Cristo Jesu yuhũ pũhtoro yuhũ masigũ pũrita quehnoa yũhdũare. Sa yegũ apeye pehere masa “Quehnoañe ijire”, tiquina nidire “Ti ijipihtiyere dũhseati ijierari”, ni tuhotuaja yuhũ. Tire ijipihtiyere duhu cãhũ Cristo ye pehere yegũ tuhũ. Sa yegũ tire yuhũ cohãrire “Ñañe waro ijire”, ni tuhotuu Cristore quehnoano masigũ tuhũ, tiqũiro mehna cã ijigũ tuhũ. ⁹ Sa yero yuhũ esa tuharo quehnoano yuhũ yeri wapa “Quehnoagũ ijire”, ni ihñedare Cohãcã yũhare. Sa yero Cohãcã dutiye Moiserẽ tiqũiro cũrire yuhũ yeri wapa gũhare “Quehnoagũ ijire”, ni ihñedare. Cristore yuhũ wacũ tutuari bato “Quehnoagũ ijire”, ni ihñare tiqũiro yũhare. Cohãcã pehe marine buhiri mariena ijigũ yere, tiqũirore mari wacũ tutuagũ. ¹⁰ Sa yegũ to pano yuhũ ni tuhotu mũhtamedire duhu cã Cristore quehnoano masigũ tuhũ. Cohãcã tutuaye mehna Cristo masa mũjahye. Ti tutuaye mehna

iji duaja. Sa yegũ ti tutuaye mehna quehnoañene ye duaja. Cristo curusapũ yariahye mari ñañe yerire cohãno taro. Sa yegũ tiqũiro yere yuhũ yeri buhiri tiqũiro yero saha ñano yũhdũ duaja yuhũ gũhũ. ¹¹ Sa yegũ Cristo tiqũiro masa mũjariro sahata masa mũjacã ijiiitja yuhũ gũhũ.

¹² Ahri ijipihtiyere sa nigũ, “Cristo yero saha ñañe mariegũ ijiaja”, ni tuhotueraja. Yuhũ sa ni tuhotuerapegũta Cristo tiqũiro yaqũiro ijigũ ye tuhasari yũhare. Sa yegũ tiqũiro yere tiqũiro gũhare quehnoano masi duagũ tutuaro mehna tiqũiro yere yeaja yuhũ. ¹³ Yuhũ acaye, “Tiqũirore quehnoano masi peho tuhasaja”, ni tuhotueraja. Sa ni tuhotuerapegũta ahri pũritare yeaja: ¹⁴ Omaperiqũiro tiqũiro wapata duariro saha tutuaro yeaja yuhũ, yuhũ wapatarire yuhũ ñeheatõ saha. Cristo yaqũiro yuhũ ijigũ ihñano Cohãcã ti yuhũ wapatarire yũhare ohoro taro ahmũsepũ pijiori yũhare.

¹⁵ Ohõ saha yuhũ tuhoturiro sahata tuhotuya masa gũhũ Cristore quehnoano masina. Sa yero ahri mũsare yuhũ yahurire masa tuho dueragũ, sijoro saha masa tuhotugũ Cohãcã mũsare quehnoano masigũ yerota. ¹⁶ Sa yena tiqũiro yere mari masidire quehnoano ye sohtori tiuhna.

¹⁷ Yuhũ acaye, masa ijipihtina yũhare ihña cũña. Sa yena apequina usã yero saha yeyequinare quehnoano ihña diho cũña masa tiquinare masa ihña cũato saha. ¹⁸ Peyẽ tahari apequina tiquina ijiye tiyere yahuu yuhũ mũsare. Yojopũ gũhare tutuaro bujũa witiqũ tiquinareta yahujã mũsare. Tiquina Cristo curusapũ tiqũiro yariari buheyere ihña yabiyequina ijire. ¹⁹ Tiquina pecapũ wahãtiquina ijire. Tiquina ñañe tutuaro

cahmeñe pehere tutuaro ye duare tiquina. Sa ye tiquina bue tiboyere yeye, tire quehnoañe yero saha tãhoture tiquina. Ahri yehpa cje dihitaro quehnoano tãhoture tiquina. ²⁰ Mari pehere mari ya maca ãhmãsepã ijire. Sa yero topãta marine yãhdãoatiquiro, mari pãhtoro Jesucristo ahtarota. Sa yena tiquiro ahtatire cohtena niãja mari. ²¹ Tiquiro ahtarota mari pagãrãre pejecãoye pagãrãre sijoro saha ijiye pagãri dihita comesarota tiquiro. Sa yero tiquiro ya pagã yero saha quehnoari pagãre asi siteri pagãre ohorota marine tiquiro tutuaye mehna. Ijipihtiyequina pãhtoro sajãri tiquiro, tiquiro tutuaye mehna. Sa yero ijipihtiye upãro ijire tiquiro ti tutuaye mehna.

4

Decoripe mari pãhtoro mehna bucueya

¹ Sa yena yãhã acaye, yãhã cahãna, tutuaro yãhã wacũna, yãhãre bucuegũ yena, yãhã buhegũ quehnoano tãhorina, panopã mãsa wacũ tutuaroro saha mari pãhtoro tutuaro wacũ tutuaya mãsa.

² Ahrire yahutja mãsare Evodiare, Sãntique gãhãre: Jesu yequina numia ijire mãsa. Sa yena cahme dãse tutuaro marieno quehnoano mehna ijiducuya mãsa. ³ Mãhã pehe potota yãhã mehna cje warota ijire. Mãhã gãhãre yahutja: Tiquina numia yãhã mehna, Clemente mehna, apequina yãhã piti tiyequina mehna dahrari quehnoañe buheyere mãã buhegũ. Cohãcãjũ tiquinare ijipihtiyequina wamene ojoa ohãhãye tiquiro ya tjupã. Ijipihtiye decori catiyere tiquiro ohoriquina wamene tiquiro ojoa ohãri tjupã ojoa ohãhãye. Sa yegã tiquina numiare bosaya mãhã.

⁴ Decoripe mari pãhtoro mehna bucueya. Pari turita yahutja: Bucueya. ⁵ Quehnoano yeya ijipihtiyequinare. Mari pãhtoro Cristo ahtato mehenogã dãhsare.

⁶ Ne bujãna witi tãhotueracãhãna. Cohãcãjũre quehnoano yahu pehoya. Sa yena tiquirore siniãna. Sa yena mãsa sinidire tiquiro yãhtigũ ihãana “Quehnoare”, niãna tiquirore. ⁷ Mãsa sa yegũ quehnoano ijigũ yerota mãsare Cohãcãjũ. Tiquiro sa yegũ quehnoa yãhdãare. Ahri mari quehnoano ijiye quehnoa yãhdãare. Sa yero Cristo Jesu yequina mari ijigũ marine quehnoano ijigũ yero, Cohãcãjũ marine quehnoano jeripohna tigũ yerota. Sa yero bujãna witi tãhotueragũ yerota marine.

Quehnoañene tãhotuya

⁸ Ahrire yahu bato tigã tãã niãja mãsare, yãhã acaye. Queoro ijiyere, masa tiquina ño peoyere, quehnoano yeyere, ñãñe marieñene, bucueyere, masa “Quehnoañe ijire”, tiquina niñene tãhotuya mãsa. Quehnoa yãhdãye ijigũ tireta tãhotuya. Masa quehnoañene ihãñe tiquina bucueye pehere mãsa gãhã bucue tãhotuya.

⁹ Mãsare yãhã buheriro sahata sa yeducuya mãsa. Sa yena yãhãre ihãna cãña mãsa. Mãsa sa yegũ Cohãcãjũ mãsare quehnoano ijigũ yeriquiro mãsa mehna ijirota.

Filipo cjeña Pablora tiquina ohorire yãhãhãye tiquiro

¹⁰ Yojopã pãrita yoari pje bato mãsa pari turi yãhãre wacũna, mãsa yedohoyere bucueaja. Sa bucuegã mari pãhtoro Cristore “Quehnoare”, niãja. “Yãhãre boaa wahari mãsa”, niedaja yãhã. Panopãre yãhãre yedoho duepenata yedoho masiedari mãsa. ¹¹ Yãhãre mãsa yedohorire yahugã yãhãre dãhsarãre mãsare

yahuu taa niedaja. Musare apee borore cahmegu sa nigu niedaja. Yuhu caoye mehna iji masiaja yuhu. ¹² Apee boro caoeragu guhu quehnoano iji masiaja yuhu. Sa yegu pajiro caogu guhu quehnoano iji masiaja. Decoripe ujua ahbagu guhu ducapoa wahaja. Yapigu ijigu guhu ijipoa wahaja. Pajiro caogu guhu ijipoa wahaja. Yuhure apee boro mariedagu guhure ijipoa wahaja. ¹³ Cristo yuhure tutuagu yeriquiro mehna ijipihiyere Cohacju cahmeñene ye masi pehoaja yuhu. ¹⁴ Yuhu sa ijiporigu yuhu ijiepegata yuhu ñano yuhdagu musa yedohona yuhure quehnoano yeri musa.

¹⁵ Quehnoañe buheyere yuhu buhe ducagu Macedonia yehpau musa ya yehpau ijirigu yuhu wahagu musa dihita yuhure yedohori. Sa yedohona, musare yuhu buheri wapa musa wapa yero saha yena nidi musa. ¹⁶ Sa yena Tesalonicapu yuhu ijiri watoa yuhure yedohona, ihque tahari ohori musa. ¹⁷ Apee borore sinigu sa nigu niedaja. Apequinare musa yedohogu Cohacju musare quehnoano yerota. Tiquirore musa yedohori wapa Cohacju musare tiquiro quehnoano yegu cahmeaja yuhu. Sa yegu yuhure musa yedohorire wacugu yeaja musare. ¹⁸ Yojopure yuhure quehnoano oho pehori musa. Yuhu cahmedi yuhdoro ohori musa yuhure. Yuhure Epafrodito mehna musa ohori bato apee boro ne duhsaerare yuhure. Cohacju wuhapu ehme sitiye bue mao, Cohacjare tiquina quehnoano bucuegu yeriro saha yuhure musa ohori guhu Cohacjare quehnoano bucuegu yeri. ¹⁹ Musa Cristore wacu tutuare. Sa yero ijipihiyere musare duhsarire ohorota mari Pacu musare, quehnoa yuhduye tiquiro caoyere. ²⁰ Ijipihiyere

decori mari Pacure Cohacjare ño peouhna. Sata yeihna.

Pablo quehnoa dutiahye

²¹ Ijipihiyequina quehnoañequina Jesucristo yequina quehnoahdo. Mari acaye guhu Jesu yequina yuhu mehna cjeña musare quehnoa dutire. ²² Ijipihiyequina ohõ cjeña quehnoañequina Jesu yequina quehnoa dutire. Roma cjeña puhtoro ya wahu cjeña purita tutuaro quehnoa dutire.

²³ Mari puhtoro Jesucristo cahñe mehna quehnoano ijiya.

Colosenses

Colosa cjenare ojoa ohoahye Pablo gũhũ

1-2 Yũhũ Pablo mari acayũro Timoteo mehna mũsare Colosa cjanare quehnoa dutiaja usã. Yũhũ Jesucristo yere buhe dutiro tiquiro cũrigũ ijiaja. Cohãcjũ cahmeno sahata Jesu yũhũre tiquiro yere buheacjũre cũri. Sa yegũ mũsare usã acaye Cristore wacũ tutuaducunare ojoa ohoaja yũhũ. Sa yena Cohãcjũ mari Pacũ mehna mũsare quehnoa dutiaja. Sa yena tiquiro mehna quehnoano ijiya mũsa.

Jesu yequinare Pablo sini basahye Cohãcjũre

3-8 Mũsa ye ijiatire Cohãcjũre sini basana "Quehnoare", sa niducuaaja usã. Tiquiro pehe mari pũhtoro Jesucristo Pacũro ijire. Ijipihtiye decori umũsepũ mũsare ijigũ yerota Cristo pehe. Tiquiro sa yeatiqũro ijigũ tire mũsa sa cohteducu wame tire. Cristo Jesure wacũ tutua wame tire mũsa. Sa yena tiquiro yequinare cahĩ wame tire mũsa. Mũsa sa iji wame tigũ Cohãcjũ mehna bucue, tiquirore "Quehnoare", niaja usã. Ijipihtiropũre Jesu yequina pototo ijiye buheyere quehnoañe buheyere tiquina yahugũ tũhoye masa quehnoañe pehere came-sare. Ahrireta mũsa gũhũre Epafra quehnoañe buheyere yahuri jiri. Tiquiro usã tutuaro cahĩniqũro usã mehna Cristore dahra cohteriquiro ijire. Sa yero Cristo yere ne duhuerare tiquiro. Mũsare tiquiro sa yahugũ tũhona, duita quehnoano ye wame tire mũsa. Sa yena Cohãcjũ mũsare tiquiro cahĩñene pototo masina, duita quehnoano ye wame tire mũsa. Mũsa sa yerire Epafra yahuri usãre. Espĩritu Santo yedohoye mehna

Jesu yequinare mũsa cahĩñene yahuri tiquiro usãre. Tiquiro sa yahugũ tũhona "Quehnoare", niaja usã Cohãcjũre.

9 Sa yena mũsare tũhona mũsare duita sa sini basaducuaaja usã Cohãcjũre. Cohãcjũ cahmeñene mũsa masi pehoatire tiquirore sini basaja usã. Tiquiro yere quehnoano masina mũsa ijiatire sini basaja usã. 10 Sa sini basaja usã mari pũhtoro Cristo cahmeno sahata quehnoano mũsa yeatire. Mũsa sa yegũ ihñano tiquiro bucuerota. Sa yena ijipihtiye quehnoañene mũsa yeatire sini basaja. Cohãcjũre mũsa masi nemoatire sini basaja. 11 Ahri yũhũ yahuatĩ gũhũre sini basaja usã. Cohãcjũ tutuaye mehna mũsa tutuatire mũsare sini basaja. Sa sini basaja ñano yũhdũepenata mũsa ihcãno sahatire. Ñano yũhdũepenata mũsa sa tũhotu cãtire, mũsa bucueye mehna mũsa sa ijiducuatĩ gũhũre sini basaja. 12 Cohãcjũ tiquiro yequina ijianare marine yere. Sa yero tiquiro ohoyere cũoanajare yere marine tiquiro. Tiquiro ijiropũ buhrioropũ marine ohorota tiquiro. Tiquiro sa yegũ ihñana tiquirore mũsa "Quehnoare", niatire sini basaja usã mũsare.

13 Tiquirota marine pecapũ wahaborinare yũhdũgũ yere. Panopũre ti ñañene ye duhu masiedami mari. Ñariqũro pehe marine dutiriquiro ijinimedi. Cohãcjũ pehe marine pecapũ wahaborinare yũhdũgũ yerĩ. Macũnore tiquiro cahĩniqũrore pũhtoro sũno umũsepũ marine ijigũ yere. Sa yena tiquiro macũno mehna ijinata. 14 Tiquiro macũno mehna marine yũhdũore Cohãcjũ. Tiquiro macũno yariari mehna mari ñañe yerire bori Cohãcjũ.

Masa Cohãcjũ mehna tiquina cahme ihña tuhtigũ ihñano Cristo

bosahye

¹⁵ Mari Pacuro ihñamehnedare. Tiquiro macano pehe tiquiro Pacuro ijiye tiyere ihñore masare. Tiquiro macano ijipihitiyequina pano, ijipihitiye pano iji tuhasari jiri. Sa yero puhtoro ijire tiquiro. ¹⁶ Mari Pacu tiquiro dutigā tiquiro macano pehe tiquiro Pacuro mehna ijipihitiyequinare, ijipihitiyere bajumehneahye. Uhmusepu ijiyere, ahri yehpapu ijiye gūhare bajumehneahye. Mari ihñarire, mari ihñedari gūhare bajumehneahye. Uhmuse cjēna puhtoare, dutiyequinare ijipihitiyequinare bajumehneahye. Tiquiro ijipihitiyequina gūhare ijipihitiye gūhare bajumehneahye. Sa yeye ijipihitiyequina tiquiro yequina ijiatiquina ijimahye. Ijipihitiye gūhu tiquiro ye ijiati ijimahye. ¹⁷ Ijipihitiyequina pano, ijipihitiye pano Cristo iji tuhasahye. Sa ye tiquiro tutuaye mehna ijipihitiye gūhu, ijipihitiyequina gūhu yojopare ijiye nine.

¹⁸ Mari tiquiro yequina ijipihitiye tiquiro pagu yero saha tiquiro ya curua cjāna ijiaja. Sa yero tiquiro mari dapu ijire. Tiquiro yariaro masa mūja mahtariquiro ijire ijipihitiyequina puhtoro, ijipihitiyere cuoriquiro ijiro taro. ¹⁹ Cristo ihcāno sahata ijire mari Pacu tiquiro ijiro sahata. Tiquiro sa ijigāta cahmeahye mari Pacu pehe. ²⁰ Ijipihitiyequina masa tiquiro Pacurore cahme ihña tuhtie tiahye. Sa tiquina cahme ihña tuhtigā ihñano Cristo bosa duahye. Uhmuse cjēnare, ahri yehpa cjēna gūhare tiquiro Pacurore ihña tuhtieragā ye duahye Cristo. Sa yero uhmuse cjē, ahri yehpa cjē gūhu quehnoano ijigā cahmeahye tiquiro. Sa bosa duahye tiquiro curusapu yariaro, tiquiro diire cohāno. Tiquiro Pacuro cahmediro sahata yeahye Cristo.

²¹ Musa gūhare sata yeri tiquiro. Tiquiro Pacurore ihña tuhtina tiquiro mehna cjāna ijieramahye masa gūhu. Nañene yeri jimedi masa. ²² Tiquiro yariari mehna tiquiro Pacurore masare ihña tuhtieragā yeri tiquiro. Sa yeri tiquiro quehnoana, ñañe mariena, buhiri mariena masare ijigā yero taro. Musa sa ijigā masare sa buhiri marienapare tiquiro Pacurore ohorota. ²³ Sata ohorota, masa tiquirore wacū tutuaducugā. Sa yerota tiquiro quehnoañe buheyere masa tuhorire masa boeragā. Ti buheyere quehnoañe buheyere ijipihitiyequina ahri yehpapare ijiyequina tuhori jire. Sa yegu yahu gūhu Pablo ti buheyereta yahugata ijiaja.

Jesu yequinare yedohoriquiro ijiro, bucueahye Pablo

²⁴ Cristo mari ñano yeri buhirire ñano yuhduahye. Sa yegu yahu gūhu masare yahu buheri buhiri ñano yuhdugu bucueaja. Sa ñano yuhdugu Cristo marine tiquiro cūrire ye sohtori tigu niaja. Sa yegu bucueaja. Cristo yere mari yeri buhiri mari ñano yuhdu nemoati duhsarīne. Sa yegu tiquirore masa wacū tutuatire ñano yuhdugu bucueaja yahu. Tiquiro pagu yero saha ijina tiquiro ya curua cjāna ijire masa. ²⁵ Jesu yequinare yedohoacjare cūri Cohācjā yuhare. Masa ye ijiatire yedohoacjare yuhare cūri tiquiro. Tiquiro yere masare yahu pehoacjare cūri yuhare. ²⁶ Tiquiro yere peye cūhmari panopu cjēnare yahu pehoera tiahye mari Pacu. Yojopu cjēnare tiquiro yequinare tire quehnoano yahu peho cāhre. ²⁷ “Judio masa ijieyequinare yahu buhegā yee buheyere quehnoa yuhduare”, ni tiquiro yequinare tire yahuri. Panopu tiquiro yahuerarire yojopu yahuri. Ohō saha ijire tiquiro ye: Cristo tiquiro yequina mehna ijire.

Tiquiro sa ijigū tiquiro yequina ũhm̄sēp̄m̄ quehnoa yãhd̄narop̄m̄ ijjeta. Ti ijire panop̄m̄ tiquina masiedari mari Pac̄m̄ ye.

²⁸ Cristoreta yahuaja. Ijipihtiyequinare cuesãḡm̄ tiquinare buheaja yãh̄m̄. Quehnoano masiñe mehna buheaja yãh̄m̄ quehnoano Cristore masare masigū yeḡm̄ taḡm̄. Sa buheaja yãh̄m̄ tiquiro yere tiquina quehnoano yeyequina ijigū yeḡm̄ taḡm̄. ²⁹ Ahri ijire yãh̄m̄ dahraye. Mari Pac̄m̄ tiquiro ye tutuaye mehna yãh̄m̄ tiquiro ohori tutuaye mehna tutuaro dahraja yãh̄m̄, tiquiro yere buheḡm̄.

2

¹ Ahrire m̄sa masigū cahmeaja. M̄sa ye ijiatire, Laodicea c̄jēna ye ijiatire, ijipihtiyequina apequina ye ijiasi ḡãh̄re tutuaro dahraja yãh̄m̄. Ijipih̄tina m̄sa yãh̄re ih̄ñena ye ijiasi ḡãh̄re tutuaro dahraja yãh̄m̄. ² Sa dahraja yãh̄m̄ m̄sa quehnoano jeripohna tiatire. M̄sa mehna c̄jēnare m̄sa cahme cah̄iati ḡãh̄re sa dahraja yãh̄m̄. Cohãc̄jū ye panop̄m̄ tiquiro yahuerari Cristore masigū yeye ijire. Tiquiro yere masina tiquirore wacū tutuare m̄sa. Tiquirore m̄sa quehnoano masiatire, tiquiro mehna m̄sa quehnoano ijiatire tutuaro yedohoaja m̄sare. ³ Apequina tiquina masiedarire Cristo dihita quehnoano masi peho cãhre. Sa yero quehnoano masiniquiro ijire tiquiro. ⁴ Ahrire niaja m̄sare “Apequina m̄sare sijoro saha tũho coaye buheye mehna ni mehoari”, niḡm̄. ⁵ Yãh̄m̄ m̄sa watoa ijierapeḡta yãh̄m̄ wacūno mehna m̄sa watoa ijiḡm̄ yero saha tũhotuaja. Sa yeḡm̄ Cristore m̄sa quehnoano wacū tutuaducurire, m̄sa quehnoano yeri ḡãh̄re masiḡm̄ bucueaja yãh̄m̄.

⁶ Sa yena Cristore m̄sa wacū tutuãcariro saha sata tiquirore wacū tutuaye mehna decoripe

quehnoano ijiducuya. ⁷ Tiquirore quehnoano masina ijija m̄sa. Sa yena decoripe tiquirore masi nemoña panop̄m̄ m̄sare apequina tiquina buheriro saha. Sa yena Cristore bucue, “Quehnoare”, niducuna ijija m̄sa.

Cristo yequina ijina, quehnoañe pehere cahmeaja mari

⁸⁻¹⁰ Quehnoano yeya m̄sa. Masa tiquina esa tuhãro tiquina buheye tiquina ni mehoñene tũhoeracãh̄ña. Tiquina panop̄m̄ c̄jēna tiquina esa tuhãro niñene buhere. Tiquina sa niñe dũhseati ijierare. ũhm̄sē c̄jēna pũtoa yere, wat̄ia ye ḡãh̄re sa buhe maca cãhre. Cristo ye pehere buherare. Cristo mari Pac̄m̄ ijiro saha ijiriquiro ijiro, Cohãc̄jū warota ijirota nine. Tiquiro yequina ijina Cohãc̄jū mehna quehnoano ijiaja mari. Tiquirota ijipihtiyequina pũtoa bui, angele pũtoa bui ḡãh̄re pũtoro ijire. Tire masina ni mehoñene buheyequinare tũhoeracãh̄ña. ¹¹ Sa yena Cristo yequina ijina cuhnucunũ cahserogãre yãh̄re nediquina yero saha ijire m̄sa. Ti cahserogãre tiquina yãh̄re ne cohãriro saha Cristo m̄sa ñañene tutuaro cahmeñene cohãri. ¹² Tiquiro yequina ijina wame yenohrina wahari jiri m̄sa. Tiquiro wame yenohrina wahana ohõ saha ni ih̄ñona nidi jiri m̄sa: Panop̄m̄ c̄jē m̄sa ñañe yerire m̄sa duhurire ih̄ñona nidi jiri m̄sa. Ti m̄sa ñañe yerire m̄sa ya cūboro saha tire duhuri jiri m̄sa. Cristo masa m̄jano quehnoanop̄m̄ wahahye. Tiquiro sa wahariro saha Cohãc̄jãre wacū tutuana “Tiquiro tutuariquiro ijire”, nina, quehnoañe pehere comesari jiri m̄sa. Tiquiro Cohãc̄jū pehe Cristore masoriquiro ijire. Tiquiro wame yenohrina ijina quehnoañe pehere m̄sa comesarire ih̄ñona niaga m̄sa.

13 Panopure m̄sa ñana m̄sa ijiri buhiri pecap̄ wahaborina ijimahye m̄sa. Sa wahaborina ijimahye m̄sa Cohācj̄u yequina ijieranana. Tiquiro dutiye mariena ijimahye m̄sa. Yojopure mari Pac̄u marine tiquiro mehna sa ijiducuanare yeri. Cristo tiquiro yariari mehna sa yeri tiquiro marine. Sa yero ijipihina mari ñaṇe yerire bo cāhri jiri tiquiro. 14 Cohācj̄u tiquiro dutiyere yuhduducana mari ijiepegūta tiquiro marine buhiri ti dutierari jiri. Ti dutiye marine buhiri dahre dutiepegūta ti dutiyere sa ihña cāhno, marine buhiri ti dutierari jiri. Cristo curusap̄u tiquiro yariari mehna Cohācj̄u pehe mari ñaṇe buhirire cohā cāhre. 15 Masa tiquina ihñonop̄u wat̄a p̄htoare Cohācj̄u yuhduducahye. Ihyo ijieyequina tojoa cāhye tiquina pehe. Sa yero tiquinare buoro wahagū yeahye. Curusap̄u yariaro Cristo ñaṇequina p̄htoare yuhduducahye.

Ḥmuse cjēne Cohācj̄u yere cahmeña

16 Sa ye apequina m̄sa ihyayere, m̄sa sihniṇe gāhure ihñaṇe m̄sare “Buhiri tina ijire”, ni ihñaboaga. Tiquina sa ni ihñagū sa ihña cāhña tiquinare. Cūhmaripe ijie decorire, asūripe ijie decorire, semanaripe ijie decorire bose decori m̄sa yeragū ihñaṇe m̄sare “Buhiri tina ijire”, niboaga tiquina. Tiquina sa nigū sa ihña cāhña tiquinare. 17 Panop̄u ti ihya dutiyere, bose decorire ye dutiyere, apeye dutiye gāhure cūahye Cohācj̄u marine buhero taro. Ti dutiye mehna camep̄u tiquiro yeatire Cohācj̄u ye ihñono niahye. Cristo tiquiro ijie tiatire mehenogā ye ihñono niahye masare. “Tiquiro ohō saha warota”, nino sa ye ihñono niahye. Sa yeati ijimahye ti dutiye. 18 Ohō

saha nimene ti dutiyere ye dutiyequina. “Sijoro saha ijieye bajuagū ihñau usā”, niṇe, tiquina angelere Cohācj̄ure tiquina ño peoboro saha ño peomene. Apequina masa yero saha tiquina ñaṇene tutuaro cahmeṇene t̄hotumene tiquina. Sa ijieyequina ijieye “Masi peho cjā usā”, ni t̄hotumene tiquina. Sa yeye tiquina apequinare “Yuhduducaeraja”, niṇequina, sijoro saha yeeyequina yero saha ye ihñomene m̄sare. Sa yeye m̄sare tiquinare ihña cū dutire. Tiquina sa dutigū tiquinare sa ihña cāhña. 19 Sa yepeta Cristo tiquiro dutiro saha yeye niedare. Cristo pehe tiquiro yequinare dapu yero saha ijire tiquiro yequina p̄htoro ijiro. Tiquiro yequina pehe tiquiro paḡu yero saha ijieyequina tiquiro ya curua cjēna ijire. Mari cohāri dohoye mari wa dari gāh̄u mari paḡure ihcā paḡu ijigū yere. Sata Cristo pehe tiquiro yequinare ihcāno mehna quehnoano mehna ijigū yere. Sa yero Cohācj̄u pehe tiquiro yequinare tiquirore masi nemogū yere.

20 Sa ye Cristo yequina ijina ñaṇene ye duhurina ijire m̄sa. Sa yena ahri yehpa cjē ñaṇe buheyere cahmedacāhña. Ti buheyere ḥmusep̄u ijimediquina ñaṇequina p̄htoa ye ijire. Sa yena ti buheyere cahmedacāhña. ¿Duhse yena masa tiquina esa tuharo dutiyere ño peoajari m̄sa?

21 Ohō saha ni dutire tiquina esa tuharo dutiyequina: Ahri borore ihyeracāhña. Ahri borore ne ihya tuhueracāhña. Ahri borore piheracāhña. Sata ni, dutire tiquina. 22 Mari apee borore ihyagū duita pihtia wahare. Sa ijieye borore pihtiyere borore t̄hotuye nine sa dutiyequina. Tiquina sa dutigū ahri yehpa cjē dutiye dihita ijire ti dutiye. Masa tiquina esa tuharo tiquina buheyere dihita ijire

ahri buheye. Sa ye dũhseati ijierare. ²³ Ti dutiyere yeyequina Cohãcjũre ño peoyequina yero saha ijimene. Sa ijiye apequinare yũhdũdũcaeyequina yero saha ye ihñomene. Tiquina pagũrire ñano yũhdũgũ yeye Cohãcjũre ño peoyequina yero saha ye ihñomene tiquina. Tiquina sa yegũ tiquina ye dutiye pehe masi pehoyequina ye dutiye yero saha ijimene. Sa ijierare. Ti dutiyere yepeta tiquina ñañene tutuaro cahmeñene duhuerare. Sa ye tiquina ye dutiye pehe dũhseati ijierare.

3

¹ Sa yena Cristo yequina ijire mũsa. Panopũ mũsa ñañe yerire duhu, quehnoañe pehere comesari jiri mũsa. Sa comesana ijina aũmũse cjẽne Cristo yere cahmeña mũsa. Topũre mari Pacũ potopũ pehepũ dujire tiquiro. ²⁻³ Uhmũse cjẽ Cohãcjũ yere quehnoano tũhotuya mũsa. Ahri yehpa cjẽ ñañene wacũ ñũñedacãhña mũsa. Cristo yequina ijina ti ñañene wacũ duerare mũsa. Tiquiro pehe ti ñañene cahmotare. Sa yena tire wacũ ñũñedaro cahmene mũsare. ⁴ Sa yena Cristo aũmũsepũ marine sa ijiducuatinare yeriquiro tiquiro ahtagũ tiquiro mehna wahanata mũsa. Sa wahana tiquiro mehna cjãna ijinata.

Cristo yequina mari ijiato panore ñañene yemi mari

⁵ Sa ye ñañene ye duhu cãhña mũsa: Omoca dũhterina gũhũ, dũhterina gũhũ wũana tiyere, ña yũhdũaro yeyere, apequiro namonore tutuaro cahmeñene, apecoro manũnore tutuaro cahmeñene, ñañene tutuaro cahmeñene duhu cãhña mũsa. Apee borore tutuaro cahmedacãhña. Apee borore tutuaro cahmena “Cohãcjũ ijire”, tiquina niñe queoyere mari cahmeno sahata yena niaja mari tire. Doeri cjẽne

ño peoyequina yero saha yena niaga mũsa. ⁶ Ti ñañene yeyequina Cohãcjũre yũhdũdũcayequina ijire. Tiquina sa ye yũhdũdũcagũ ihñano tiquinare buhiri dahrerota. ⁷ Panopũre mũsa pehe ti ñañene yena ijina tiquina mehna ijirina ijimahye mũsa.

⁸ Sa ijimedina ijiepenata yojopũre ahri ñañene duhu peho cãhña mũsa: Usuayere, apequinare ñano ni tũhotuyere, apequinare ñano quti dahreyere, ñano yahuducuyere tire ijipihtiyere duhu cãhña. ⁹⁻¹⁰ Mũsa pehe Jesu yequina wahana ti ñañe yeyere duhu tuhasari jiri. Sa yena quehnoañe pehere comesarina ijire mũsa. Mũsare quehnoañe pehere cahmegũ yero nine Cohãcjũ tiquiro yero saha mũsa ijiato saha. Sa yere tiquiro quehnoano tiquirore mũsa masiatio saha. Sa yena mũsa mehna cjẽnare ni mehoedacãhña. ¹¹ Cristo yequina ijina judio masa, judio masa ijiena gũhũ ihcãno saha ijire mũsa, Cohãcjũ ihñagũ. Cuhnucunũ cahserogãre yũhre nediquina, yũhre nedariquina gũhũ Cristo yequina ijiye ihcãno saha ijire, Cohãcjũ ihñagũ. Ape yehpa cjẽna, mũsa masieñequina, mũsa ya yehpa cjẽna gũhũ Cristo yequina ijiye ihcãno saha ijire, Cohãcjũ ihñagũ. Dahra cohteyequina, dahra cohteyequina ijieyequina gũhũ Cristo yequina ijiye ihcãno saha ijire, Cohãcjũ ihñagũ. Jesu ijipihtiyequina tiquiro yequina mehna ijire. Ihyo ijiriquiro ijierare, tiquiro yequina ihñagũ.

¹²⁻¹³ Sa ye Cohãcjũ beserina, quehnoana, tiquiro cahña ijina ohõ saha ijiya mũsa: Apequinare paja ihñana, apequinare quehnoano yena, apequinare quehnoano mehna yena, “Apequinare masi yũhdũdũcaja”, niena, mũsare tiquina ñano yepegũta sa

tahotu cāna ijiya m̄sa. M̄sa mehna cjēna mehna usuana, tiquinare q̄iti dahrena, m̄sa basi usua duhuya. Mari p̄htoro m̄sa ñañe yerire bori. Sa tiquiro boriro sahata m̄sa ḡh̄u m̄sa mehna cjēna m̄sare tiquina ñañe yerire boya. ¹⁴ Ahri dutiye ȳhd̄woro ohō saha ni dutiaja m̄sare: Apequinare cahñña. M̄sa sa yena quehnoano ijipihtiyequina mehna ihcāno mehna ijinata. ¹⁵ Cristo marine quehnoano ijigū yere unureno marieno mari ijiato saha. Tiquiro sa yegū quehnoano ijiya m̄sa basi. Sa yeatinare tiquiro yequina ijiatinare cūahye mari Pacu m̄sare. Sa yena Cristo pagu yero saha ihcā curuata ijire m̄sa. Sa ye Cohācj̄re “Quehnoare”, ni bucuena ijiya m̄sa.

¹⁶ Cristo ye buheyere quehnoano wacūducuya m̄sa. Quehnoano masi buheya tiquiro yere. Cua pesaro mehna tire yahuya. Sa yena Salmore Cohācj̄ yere basayere, apeye tiquirore ño peo basayere tiquirore basa peoya. Quehnoano wacū ño peoye mehna basa peoya. Sa basana tiquiro yere quehnoano wacūña m̄sa. Sa yena Cohācj̄re “Quehnoare”, ni bucuena ijiya m̄sa. ¹⁷ Ijipihtiyere dahse ijiyere m̄sa yeyere quehnoano jeripohna ti yeya, mari p̄htoro Jesu tiquiro bucueato saha. Cristore ño peore m̄sa. Sa yena tiquirore ño peoye mehna quehnoañe dihitare yahuducuya. Sa yena Cristo yedohoye mehna Cohācj̄ mari Pacure sinina “Quehnoare”, ni bucuena tiquirore.

Jesu yequinare ihcāno mehna iji dutiye ohō saha ijire

¹⁸ M̄sa man̄ tina numia, m̄sa man̄s̄m̄are quehnoano ȳhtiya m̄sa. Sata yero cahmene m̄sare mari p̄htoro Cristo yequina numia ijina.

¹⁹ M̄sa namo tina, m̄sa namos̄numiare cahñña. Sa yena tiquina numiare tuhtieracāhña.

²⁰ M̄sa tiquina pohna ḡh̄u, m̄sa pac̄s̄m̄are ȳhd̄w̄caeracāhña. M̄sa sa yegū ihñano mari p̄htoro quehnoano bucuere.

²¹ M̄sa tiquina pac̄s̄m̄a ḡh̄u m̄sa pohmare sa tuhtiducueracāhña “Buj̄a witigū yeari”, nina.

²² Cahācj̄ana, m̄sa p̄htoare ahri yehpa cjēnare quehnoano ȳhtiducuya. Tiquinare bucu dutina tiquina ihñonop̄ dihitare ȳhtina ijieracāhña. Tiquina mariedagū ḡh̄ure ȳhtiya. Mari p̄htoro Cristore cua pesaro mehna m̄sa ihñano sahata quehnoano mehna ȳhtiya m̄sa p̄htoa ḡh̄ure.

²³ Potota Cristo yequina ijina quehnoano ȳhtire m̄sa tiquirore. Sa yena m̄sa p̄htoare ahri yehpa cjēnare ȳhtina, Cristore m̄sa ȳhtiro saha ȳhtinata nine m̄sa. Sa yena m̄sa p̄htoa tiquina dutiro sahata tutuaro mehna dahraya, Cristo ye dutiye ti ijiboriro saha. ²⁴ M̄sa sa yegū Cristo m̄sare quehnoano yerota. “M̄sare ohoutja”, tiquiro niñene m̄sare ohorota mari p̄htoro. Tire masine m̄sa. Mari p̄htoro Cristo cahācj̄ana ijire m̄sa. Sa yero tiquiro pehe m̄sa p̄htoro waro ijire. ²⁵ Tiquina p̄htoare ȳhd̄w̄cayequinare buhiri dahrerota mari p̄htoro pehe. Sa ȳhd̄w̄cayequinare ihcāq̄iro dahsaro marieno ihcāno saha buhiri dahrerota tiquiro.

4

¹ M̄sa p̄htoa pehe, m̄sa cahācj̄nare poto queoro quehnoano yeya tiquinare. M̄sa ḡh̄u p̄htoro c̄ore. M̄sa p̄htoro m̄sa c̄oriquiro pehe uhm̄se cj̄ano ijire. ² Decoripe Cohācj̄re siniña m̄sa. Quehnoano wacū tahotu siniña. Sa yena

“Quehnoare”, niña mari Pacure. ³⁻⁴ Usã ye ijiati pehere sini basaya tja. Cristo yere apequina panopu tiquina masiedarire buhena niaja usã. Tiquinare usã quehnoano masigũ yeati pehere sini basaya mari Pacure. Cristo yere yũhũ buheri buhiri yũhũ yojopure peresupũ ijiaja. Sa yegũ mũa sa sini basagũ cahmeaja tiquiro yere yũhũ quehnoano yahuatire. Cristo dutiriro saha yũhũ yahuati pehere sini basaya.

⁵ Jesu yequina ijieyequina mehna ijina quehnoano yeya mũa. Cristo yere yahuya tiquinare. Tiquina mehna mũa ijiro puno sata quehnoano yeya. ⁶ Tiquina mehna yahuducuna quehnoano bucueye mehna yahuducuya. Quehnoañe dihitare yahuducuya. Apequina mũsare tiquina sinitugũ quehnoano masiña mũa yuhtiatire.

Quehnoa duti bato tiahye Pablo

⁷ Tiquico mari acayũro Jesu yaquiro ijire. Tiquiro yũhũ ijiye tiyere mũsare yahurota. Tiquiro mari cahĩniquiro ijire. Cristo yere buhero, usã mehna dahrariquiro ijire. Sa yero Cristo yere ne duhuerare tiquiro. ⁸ Mũa cahapũ tiquirore ohou yũhũ usã ijiye tiyere mũa masino quehnoano. Tiquirore ohou yũhũ mũsare bucuegũ yeatiquirore. ⁹ Onésimore mari acayũrore mũa cahapũ ohou. Tiquiro gũhũ Cristo yere ne duhuerare. Mũa mehna cjãno ijire. Tiquina pũaro usã ohõre dahse yuhdũrire yahueta mũsare.

¹⁰ Aristarco peresupũ ijiriquiro yũhũ mehna cjãno mũsare quehnoa dutire. Marco gũhũ quehnoa dutire. Tiquiro Bernabé basuriro ijire. Tiquirore yahu tuhasa mũsare. Mũa cahapũ tiquiro esagũ quehnoano mehna tiquirore piti caya. ¹¹ Jesu “Justo”, tiquina ni pisuriquiro quehnoa

dutire tiquiro gũhũ. Ahriquina ihtiarota yũhũ mehna dahrayequina judio masa waro ijire. Judio masa waro tiquina dihita Cohãcjũ yere yũhũ mehna buhere. Sa buheaja usã Cohãcjũ yequina masa wathatire, Cohãcjũre tiquina puhtoro tiatire. Tiquina yũhũre quehnoano yedohoriquina ijire. ¹² Epafra mũa mehna ijiriquiro mũsare quehnoa dutire. Tiquiro Cristore dahra cohteriquiro ijire. Cohãcjũre sinino, mũa ye ijiatire tutuaro sini basaducuro nine tiquiro. Cohãcjũre quehnoano wacũ tutuaducuatiquinare, tiquiro cahmeno saha yeatiquinare mũa ijiatire sa sini basaducuro nine tiquiro Cohãcjũre. ¹³ Tiquiro mũa ye ijiatire tutuaro sini basare. Laodicea cjẽna ye ijiatire, Hierapoli cjẽna ye ijiati gũhũre tiquiro tutuaro sini basare. Tiquiro sa yeriquiro ijigũ ihñagũ mũsare yahugũ niaja. ¹⁴ Duturu Luca mari cahĩniquiro mũsare quehnoa dutire. Dema gũhũ quehnoa dutire.

¹⁵ Quehnoahdo mari acaye Jesu yequina Laodicea cjẽna. Ninfa gũhũ quehnoahdo. Jesu yequina ticoro ya wũhũpũ cahmecoañequina gũhũ quehnoahdo. ¹⁶ Ahri pũre yũhũ ojoa ohori pũre mũa mehna cjẽnare mũa buhe tuhasari bato Laodicea cjẽna gũhũre ohoya. Sa yena tiquinare Laodicea cjẽnare yũhũ ojoa ohori pũre mũa gũhũ buheya. ¹⁷ Sa yena ohõ saha niña Arquipore: “Mari puhtoro Jesu yaquiro mũhũ ijigũ tiquiro yere buheacjũre cũri mũhũre. Tiquiro sa cũgũ quehnoano buhe sohtori tiya mũhũ”, niña tiquirore.

¹⁸ Yũhũ Pablo, yũhũ omoca mehna ahrire ojoaja. Mũsare quehnoa dutiaja yũhũ. Peresupũ yũhũ ijiyere wacũ, sini basaya mũa Cohãcjũre. Quehnoano ijiya mũa. Cohãcjũ cahĩne mehna

m̄sare quehnoa dutiaja.

1 Tesalonicenses

Pablo ojoa ohoahye Jesu yequinare Tesalónica cjēnare

¹ Yuhū Pablo, Silvano, Timoteo gūhū mūsare quehnoa dutiaja. Sa yegū ahrire mūsare ojoa ohoaja yuhū, Pablo. Mūsa pehe Tesalónica cjāna mari Pacū Cohācjū yequina ijire. Mari pūhtoro Jesucristo yequina gūhū ijire mūsa. Sa yena Cohācjū mari Pacū, mari pūhtoro Jesucristo mehna mūsare quehnoa dutiaja. Tiquina yedohoye mehna quehnoano ijiya mūsa.

Jesu yequina Tesalónica cjēna pehe Jesure quehnoano wacū tutuahye

² Cohācjūre sinina ijipihtiyequina Jesure mūsa wacū tutuayere wacūna, “Quehnoa yūhdūare ūsāre”, niducujaja ūsā mūsare. Cohācjūre sinina, mūsa ye iji-atire sa sini basaducuna niaja ūsā. ³ Mūsa pehe Jesucristore quehnoano wacū tutuañohiti. Sa wacū tutuana, Jesu yere yeñohiti mūsa. Jesucristore, apequina gūhūre mūsa cahññohiti. Sa cahña, Jesu yere tutuaro yena niaga mūsa. Jesucristore mari pūhtorore wacū tutuaducuñohiti mūsa. Sa wacū tutuaducuna mūsare tiquiro yūhdūoatire masina, tire cohtena niñohiti mūsa. Sa yena tiquirore wacū tutua duhuerañohiti mūsa. Cohācjū mari Pacūre sinina, tire mūsa sa yerire wacūaja ūsā. ⁴⁻⁵ Ūsā acaye, Cohācjū cahñona ijire mūsa. Mūsare tiquiro beserire masiaja ūsā. Sohō ijiri pje mūsare quehnoañe buheyere buhena sa yahu cāna niedū mūsare. Espiritu Santo tiquiro tutuaye mehna quehnoañe buheyere buhena nii mūsare. Sa buhena ti buheye potō ijigū quehnoano masii ūsā. Sa yena mūsa watoa ūsā ijina, ūsā yerire

masine mūsa. Mūsare yedohona sa yei ūsā. Mūsare buherina ijina, Cohācjū beserina mūsa ijigū masiaja ūsā.

⁶ Sohō ijiri pjepāre mūsa ñano yūhdūna, quehnoañe buheyere cahmedi mūsa. Mūsa sa cahmegū, Espiritu Santo pehe mūsare quehnoano bucuegū yeri. Tiquiro sa yegū mūsa pehe ūsāre ihña cū, ūsā yeriro sahata yeri. Sa yena Jesu gūhūre ihña cūri mūsa.

⁷ Sa ye Jesu yequina Macedonia yehpa cjēna, Acaya yehpa cjēna gūhū Jesu yere mūsa yerire masidi. Sa masiñe tiquina gūhū mūsare ihña cū, mūsa yeriro sahata yeri.

⁸ Macedonia yehpa cjēna, Acaya yehpa cjēna gūhū mari pūhtoro yere mūsa buhegū tūhooñohiti. Cohācjūre mūsa wacū tutuarire tūhoriquina pehe tiquina dihita ijierare. Ijipihtiro cjēna mūsa wacū tutuarire tūhooñohiti. Sa ye ūsā tiquinare yahuerapegūta tire masi tuhasari tiquina. ⁹ Sa ye mūsa cahapū ūsā tinidire, ūsāre mūsa quehnoano piti carire yahuri tiquina ijipihtiro cjēnare. Sa yena Cohācjū pehere wacū tutuana, “Cohācjū ijire”, ni mūsa ño peoye queoyere cohā cāri mūsa Cohācjū ye pehere yena tana. Tiquiro Cohācjū pehe catiriquiro, Cohācjū waro ijire. ¹⁰ Sa ye “Cohācjū macūnore ūhmūsepū ahtatiquirore Tesalónica cjēna cohteye nine”, ni yahuri masa mūsare. Tiquiro macūnore yariariquirore Cohācjū masoahye. Tiquiro sa masogū tiquiro macūno Jesu pehe marine ña yūhdūaro tiquiro buhiri dahreborinare yūhdūori jiri.

2

Tesalónica wame tiri macapū tiquiro dahrarire yahuahye Pablo

¹ Mūsa cahapū ijina ūsā sa iji cāna nieda tii. Mūsare quehnoano yedohorina ijie tii ūsā. Tire

quehnoano masine m̄sa, us̄a acaye. ² Sa yena Filipop̄ ijina ñano us̄a yuhdurire, us̄are ñano tiquina yerire quehnoano masine m̄sa. Us̄are tiquina sa yepeḡta Coh̄c̄j̄ yedohoye mehna cuero marieno Coh̄c̄j̄ yere quehnoañe buheyere buhei us̄a m̄sa ḡh̄ure. Us̄are masa peyequina tiquina ih̄na tuhtiepeḡta quehnoañe buheyere buhei us̄a m̄sare. ³ M̄sare buhena quehnoano us̄a masidire buhei us̄a m̄sare. Sa buhena potota m̄sare yedohona nii. M̄sare buhena ni mehoed̄. ⁴ Coh̄c̄j̄ cahmeno saha buheaja us̄a. Quehnoañe buheyere buheanare Coh̄c̄j̄ beseri us̄are. Tiquiro sa beserina us̄a ijiḡ tiquiro ye buheyere us̄a buheḡ quehnoar̄ine, Coh̄c̄j̄ ih̄naḡ. Sa yena oh̄ saha buheaja us̄a. Masa tiquina ih̄na bucueatire buhena niedaja us̄a. Coh̄c̄j̄ pehe us̄are tiquiro ih̄na bucueatire tiquiro yere buheaja us̄a. Tiquiro pehe mari tuhotuyere, mari ye duayere quehnoano masine. ⁵ Quehnoañe buheyere buhena tuho bucueati yahuducuye mehna buhena nied̄. Queoro quehnoano mehna buhei us̄a m̄sare. Ahrire masine m̄sa. Sa yena us̄a buhena, m̄sare apee borore wapa cahmena nied̄ us̄a. Ahrire Coh̄c̄j̄ masine. Potota niḡ niaja. ⁶ Sa buhena masa us̄are tiquina ño peoatire yena nied̄ us̄a. M̄sare apequina ḡh̄ure us̄are ño peo dutina tana nied̄.

⁷ Sa ño peo dutierapenata Cristo c̄rina ijiaja. Sa tiquiro c̄rina ijina m̄sare wapa cahmeboya us̄a. Sa yena puhto yero saha m̄sare dutina ijiboya us̄a. Sa ijiepenata numino ticoro nijinoḡare ticoro quehnoano masoriro saha quehnoano mehna yei us̄a m̄sare. ⁸ Sa yena m̄sare quehnoano cahmena, Coh̄c̄j̄ yere quehnoañe buheyere buhei us̄a m̄sare. Sa yena ti dihitare yena nied̄ m̄sare.

M̄sare quehnoano yedohou, us̄a catinina. Us̄a cah̄na m̄sa ijiḡ m̄sare sa yedohou us̄a. ⁹ Sa m̄sare cah̄na tutuaro yedohou us̄a m̄sare. Tire wac̄ure m̄sa, us̄a acaye. Coh̄c̄j̄ yere quehnoañe buheyere buhena m̄sa cuoyere sini cariboer̄ m̄sare. Sa yena decori, ñamini ḡh̄ure dahrā us̄a.

¹⁰ Quehnoano, poto, ni mehono marieno m̄sare Jesu yequinare us̄a yerire masine m̄sa. Coh̄c̄j̄ ḡh̄ure tire masine. ¹¹ Sa yena ih̄c̄aquiroye masano tiquiro pohnene tiquiro quehnoano yahu bucueḡ yeriro saha m̄sa ḡh̄ure yahuna bucueḡ yei. Tire masine m̄sa. ¹² Coh̄c̄j̄ tiquiro puhtoro ijirop̄, quehnoa yuhduarop̄ m̄sare pijiori. Sa yena tiquiro yequina m̄sa ijiḡ Coh̄c̄j̄ cahmediro sahata m̄sare iji dutii us̄a.

¹³ Coh̄c̄j̄ yere m̄sare us̄a yahurire m̄sa tuhona, oh̄ saha ni tuhoturi m̄sa: “Masa tiquina esa tuhoro tiquina buheye ijierare. Coh̄c̄j̄ ye buheyeta ijire”, ni tuhoturi m̄sa. Tire m̄sa tuhotuḡ masina bucueaja us̄a. Sa yena Coh̄c̄j̄re sinina “Quehnoare”, niaja us̄a tiquirore. Ijirota ijire. M̄sare us̄a buheye Coh̄c̄j̄ yahuducuye poto ijirota nine. Sa yero m̄sa Jesure wac̄u tutuana ijiḡ Coh̄c̄j̄ tiquiro ye buheye mehna m̄sare quehnoañe pehere camesaḡ yere. ¹⁴ Jesucristore wac̄u tutuayequinare Judea yehpa c̄jenare tiquina yeriro saha m̄sa ḡh̄ure yeri apequina. Judea yehpa c̄jena Jesu yequina pehere tiquina acaye ijiepet̄a ñano yuhduḡ yeri judio masa pehe. M̄sa ḡh̄ure m̄sa ya dihta c̄jena ñano yuhduḡ yeri. ¹⁵⁻¹⁶ Judio masa pehe Coh̄c̄j̄ yere yahu mahtariquinare panop̄ c̄jenare wej̄e tiahye. Sa ye mari puhtoro Jesu ḡh̄ure wej̄eahye tiquina. Sa ye ye tiquina us̄are coh̄ari. Coh̄c̄j̄re tiquina buj̄ua

witigū yeri. Sa ye peyequina masare ihña tuhtiri tiquina. Judio masa ijieyequinare Cohācjū yere usā yahu duami tiquina gūhure pecarū wahaboriquinare “Cohācjū yuhduoahro”, nina. Usā sa yahu duepegūta judio masa pehe usāre ne Cohācjū yere apequinare yahu dutierari. Sa yahu dutieraye pajiro buhiri ti nemoñe nine tiquina. Yojopure tiquinare tutuaro Cohācjū buhiri dahrerota.

Pablo Tesalónica cjēna caharū pari turi tini duamahye

¹⁷ Usā acaye, yojopure mehenogā mūsa caharū ijierana mūsare wacūna niaja. Sa yena mūsare tutuaro ihña duana, mūsa caharū waha duami. ¹⁸⁻¹⁹ Ihquē tahari yuhū Pablo mūsare ihñagū waha duami. Yuhū sa waha duepegūta Satana pehe usā wahaborirore dojomehnedi. Sa yena wahaeru usā. Usāre bucuegū yena mūsa ijigū mūsare ihña duami. Usā buhegū quehnoano tuhōrina ijire mūsa. Mari pūhtoro Jesu ahri yehparū tiquiro tojoa tagū mūsa pehe usāre bucuegū yenata. Sa yena bucueye mehna mūsa mehna Jesu poto ducunata. ²⁰ Sata ijire. Mūsare ihñano Jesu pehe “Quehnoano buheri mūsa”, ninota usāre. Sa yena quehnoano bucueaja usā.

3

¹⁻² Sa ye mūsare yoari pje ihñedana mūsare tutuaro tuhō duana tire wacūna, Timoteore mūsa caharū ohou. Tiquiro mari acayuro Jesu yaquiro Cohācjū cahacjūno ijiro, usā mehna quehnoañe buheyere buheriquiro ijire. Sa yena tiquirore ohou Jesucristore quehnoano mūsa wacū tutuatire, mūsa bucueati gūhare. Tiquirore ohona usā sehsaro Atena wame tiri macarū tojoarū. ³ Mūsa ñano yuhduepenata Jesu yere mūsa cohāedarire ohou usā Timoteore. Jesu yequina ijina

ñano yuhduenata mari. Tire masine mūsa. ⁴ Panopure mūsa mehna usā ijinina, mari ñano yuhduatireta yahu tuhasan mūsare. Sa yena usā nidiro sahata mari ñano yuhduhū. Tire mūsa quehnoano masine. ⁵ Sa yegu mūsare yoari pje ihñedagū mūsare tutuaro tuhō duau. Sa yegu Jesure mūsa wacū tutuarire masigu tagū Timoteore ohou yuhū. “Watīno mūsare ñano ye dutiari”, nigū, “Mūsare usā buherire mūsarū duhuari”, nigū, tiquirore ohou yuhū. Jesu ye buheyere mūsa duhugū mūsare usā buheri duhseati ijieraboaga.

⁶ Sa yero yojopure Timoteo mūsa caharū ijiriquiro usā caharū tojoa wihiri. Sa tojoa wihiro quehnoañe quitire usāre yahuri tiquiro. Jesure mūsa quehnoano wacū tutuayere, apequinare mūsa cahñe gūhare tiquiro yahuri usāre. Sa ni tuhasa usāre mūsa quehnoano wacūrire, mūsare usā ihña duariro sahata mūsa gūhū tutuaro usāre mūsa ihña duarire yahuri usāre tiquiro. ⁷ Sa yena usā acaye yojopure ñano yuhduepenata mūsa Jesure quehnoano wacū tutuagū tuhona usā bucueaja. ⁸ Jesure mūsa quehnoano wacū tutuarire tiquiro yere mūsa cohāedarire tuhona quehnoano jeri sajāja usā. ⁹ Sa ni tuhōtuna, Cohācjū ihñonopū usā tutuaro bucueaja. Sa bucuena Cohācjūre “Quehnoare”, niaja usā. ¹⁰ Deco gūhare, ñamipū gūhare Cohācjūre siniaja mūsare usā ihñatire. Jesu yere mūsa quehnoano masi pehogū ye duaja usā quehnoano mūsa tiquirore wacū tutua nemoatire.

¹¹ Cohācjū mari Pacū tiquiro basi, mari pūhtoro Jesu gūhū usāre tiquina yedohogū cahmeaja mūsa caharū usā wahatire. ¹² Sa yero mari pūhtoro Jesu ijipihtiequina mūsa mehna cjēnare, ijipihtiequina apequina gūhare cahñe nemogū yeahro mūsare. Mūsare

usã cahĩdiro sahata tutuaro cahĩ nemogũ yeahro musare. ¹³ Musare quehnoano tiquiro yedohogũ, buhiri mariena, ñañe mariena ijinata musa, Cohãcjũ mari Pacu ihñagũ. Mari puhtoro Jesu ijipihitiyequina tiquiro yequina quehnoañequina mehna ahri yehpapu tiquiro tojoa tagũ sata ijinata musa.

4

“Cohãcjũre bucuegũ ye duana ohõ saha yeya”, ni yahuahye Pablo

¹ Yojopure Jesu mari puhtoro tiquiro dutiro mehna musare ohõ saha ni yahuaja: “Cohãcjũre bucuegũ ye duana ohõ saha yeya”, ni buhei usã musare. Usã sa buheri bato usã buheriro sahata yefohti musa. Musa sa yeriro sahata ye nemoña. Tire tutuaro ye dutiaja musare.

² Jesu mari puhtoro tiquiro buhe dutiro mehna musare usã buherire quehnoano masine musa. ³ Ahrire musare yahu nemoutja: Musa ohõ saha ijigũ cahmene Cohãcjũ: Ñañene yeracãhña. Cohãcjũ ye pehere yeya. Sa yena numia mehna ñano yeracãhña. Musa numia gũhu umua mehna ñano yeracãhña. ⁴ Ñano yero marieno, ño peoye mehna musa namosãnumiare cuoya. Cohãcjũ musa tire masigũ cahmene. ⁵ Cohãcjũre cahmeeñequina Cohãcjũre masieñequina ñañene tutuaro cahmeñe, numia mehna ñano tiquina yeriro saha yeracãhña musa pehe. ⁶ Tiquina yero saha musa yeragũ cahmene Cohãcjũ, musa acayaro namono mehna musa ñano yeratire. Musa sa ñano yena musa acayarore yuhduducana niaga. Mari puhtoro Cohãcjũ ti ñañene tiquina yegũ ihñano buhiri dahreatiquiro ijiro nine. Sa yena musare cuesãna tire yahuaja musare. ⁷ Ñañene

yeanare beserahye Cohãcjũ marine. Ñañene ye dutieraro be-seahye marine. ⁸ Sa yena ijipihitina musa ahri usã buherire yuhduducana, masa ye buheyere yuhduducana niedare musa. Cohãcjũ ye pehere yuhduducana nine. Tiquiro musare Espiritu Santore ohoriquiro ijire.

⁹⁻¹⁰ Musa acayere Jesu yequinare cahme cahĩñene Cohãcjũ musare buhe tuhasari. Tiquiro sa buhegũ potota Jesu yequinare Macedonia cjẽnare ijipihitiyequinare quehnoano cahĩne musa. Musa sa cahĩgũ ihñana “Musa acayere cahme cahĩña”, ni buheraja musare. Tiquinare cahĩ tuhasare musa. Sa ni buhe nemoedapenata ahri pehere musare dutiaja. Yojopure apequinare musa cahĩno sahata cahĩ nemoña musa. ¹¹ Sa yena musa basi cahme ihña tuhtiro marieno ijiya musa. Apequinare sijoro saha ni yahuducueracãhña. Sa ihña cãhña tiquinare. Sa yena musa ye dahraye pehere quehnoano dahraya. Panoputa musare sa ye dutii. ¹² Sata yeya musa, apequina musare tiquina ño peotire, apequina yere musa cariboeratire.

Ahri yehpapure Jesu tojoa tatire yahuahye Pablo

¹³ Yojopure yariariquina munare yahutja musare: Jesure cahmedaye, masa Cohãcjũ cahapu wahaasi. Sa ye tiquina mehna cjẽna tiquina yariagũ ihñañe tutuaro bujua witire. Yariariquina muna tiquina dahse wahatire potota quehnoano musa masigũ cahmeaja usã, apequina tiquina bujua witiro saha musa bujua witiarotore. ¹⁴ Jesu yariari bato masa mujari jiri. “Ti potota ijire”, niaja mari. Sa yena ahri gũhure “Ijirota ijire”, ninata. Cohãcjũ pehe tiquiro yequina munare yariariquina munare masa mujagũ ye, neanota

Jesu mehna. Ti gūhare “Ijirota ijire”, niaja mari.

¹⁵ Jesu tojoa tagū tiquiro yequina yariariquina muna catiyequina pano masa mūja mūhtaeta. Mari pūhtoro Cohācjū ye yahuyeta ijire ahri. ¹⁶ Ohō saha ijirota Jesu tojoa tagū: Mari pūhtoro tiquiro basi tutuaro sañuducu mūhtanota. Sa yero tiquiro yequina angele pūhtoro tutuaro pisurota. Sa tiquiro pisugū Cohācjū ya corneta bisirota. Tiquina sa yegū Jesu yequina yariariquina muna masa mūja mūhtaeta. ¹⁷ Came catiyequinare, yariariquina muna mehna Cohācjū ahmusepu mūjagū yerota. Tiquiro sa yegū mari pūhtoro Jesure piti canata mari. Sa piti cana ijipihtiye decori mari pūhtoro Jesu mehna ijinata mari. ¹⁸ Ahri yūhū yahurire mūsa mehna cjēnare yahuya. Sa ni yahuna, bucuenata mūsa ijiphtina.

5

¹ Jesu tojoa tati decore “Ahri deco tojoa tarota”, ni, mū sare yahu ojoasi. ² Yojo pu mūsa masino saha tiquiro tojoa tati decore marine masino basioerare. Yaqueriquiro űamipū wacūeno mehna tiquiro yaquero ahtaro saha ahri yehpapure mari pūhtoro wacūeno mehna tojoa tarota. Ahrire mūsa basita masine. ³ “Yojo pu mari quehnoano ijiaja. Cuaro mariedare marine”, masa tiquina ni wacūgū duita űano waharota tiquinare. Sa wahagū tiquina duhti masisi. Niji wahcōricoro wacūeno mehna ticoro purīno tūhoturo saha wacūeno mehna sa waharota masare.

⁴ Yūhū acaye, mūsa pehere sa wahasi. Yaqueriquiro wūhū cjānore tiquiro cuegū yeriro saha mūsa pehere sa wahasi. Jesu ahtaro mū sare cuegū yesi. Nahitianopū ijiiyequina tiquina ihña masieno saha apequna Jesure ne

masiedare. Mūsa pehe tiquina yero saha ijierare. ⁵ Mūsa ijiphtina Jesu yequina ijire. Sa yena buhrioropū tiquina ihña masino saha Jesu ahtatire masine mūsa. Apequna tiquirore masieñequina yero saha ijieraja mari.

⁶ Sa yena Cohācjūre tuho nūnūna ijiihna. Carīñequina yero saha Cohācjūre tuho nūnūna ijieracāhna mari. Apequna sata yere. Tiquina yero saha yeracūhna mari. Carīñequina yero saha, queheyequina yero saha quehnoano wacū masina ijiihna mari. ⁷ Carīñequina űamipū carīne. Sa ye queheyequina űamipū quehere. ⁸ Mari pehe buhrioropū ijiiyequina yero saha Jesure masina ijina, quehnoano wacū masina ijiihna. Sa yena surara come suhtiro mehna tiquiro cutiurore saña cahmotariro saha Cohācjūre wacū tutuaya mūsa, watīnore tiquiro cahmotatire. Sa yena Cohācjūre, apequna gūhare cahñña. Mūsa sa yegū Cohācjū mū sare ihña ihborota. Sa yena mū sare pecapū wahaborinare Jesu tiquiro yūhdūoatire “Potota ijire”, niña mūsa. Mūsa sa nigū surara tiquiro dapure come sapea mehna tiquiro pesa cahmotariro saha watīno mū sare űano ye dutigū Cohācjū tiquirore cahmotarota.

⁹ Tiquiro buhiri dahreatinare marine beserahye Cohācjū. Jesu-cristo mari pūhtoro pecapū wahaborinare tiquiro yūhdūoatinare marine beseahye tiquiro. ¹⁰ Jesu mari ye ijiatireta yariahye tiquiro mehna mari ijiatire. Catiyequina, yariariquina gūhū tiquiro mehnata ijietā. Sa yena ijiphtina tiquiro mehna ijinata mari tiquiro yequina ijina. ¹¹ Sa yena mūsa mehna cjēnare yojo pu mūsa bucuegū yeriro saha mūsa basita bucuegū ye nemoñna mūsa. Sa yena mūsa basita Cohācjūre wacū tutua

nemogū yeya m̄sa mehna cjēnare.

Jesu yequinare Pablo yahu bato tiahye

¹² M̄sare buheyequinare mari p̄htoro buhe dutirō beseri jiri. Tiquiro sa ni besenohriquinare quehnoano ño peoya m̄sa. M̄sa sa ño peogū cahmegū m̄sare tutuaro dutiaja. ¹³ Tiquina dahrayere yegū tiquinare cahñe mehna quehnoano ño peoya. Sa yena m̄sa mehna cjēna mehna cahmequeno marieno ijiya.

¹⁴ M̄sare ḡsā acayere, ahrire tutuaro dutiaja: Dahra dueyequinare dahra dutiya m̄sa. Buja witiyequinare bucuegū yeya m̄sa. Jesure wacū tutuera cjñequinare yedohoya. Tiquina ijipihtiyequina mehna quehnoano usuaro marieno bucueye mehna ijiya m̄sa.

¹⁵ Ihcāquiro m̄sare tiquiro ñano yegū ihñana tiquirore ñano ye cahmedacāhña. Sa yena m̄sa mehna cjēnare, ijipihtiyequina apequina gūhare quehnoano yeya.

¹⁶ Sa yena decoripe sa bucueducuya m̄sa. ¹⁷ Sa yena decoripe Cohācjāre siniducuya. ¹⁸ M̄sa ñano yūhdūepenata Cohācjāre bucue, “Quehnoare”, niña. M̄sa quehnoano yūhdūri pje gūhare “Quehnoare”, niña. Sa nina Cohācjū cahmeno sahata yena niaga m̄sa. Cristo Jesu yequina m̄sa ijigū ihñano m̄sa sa nigū cahmene tiquiro.

¹⁹ Espiritu Santore yūhtiena ijieracāhña. ²⁰ Espiritu Santo masiñe mehna apequina m̄sare buhere. Tiquina sa buhegū ti buheyere yūhtiena ijieracāhña. ²¹ Apequina m̄sare sijoro saha tiquina ni buhegū ti Cohācjū ye ijieragū masiña m̄sa. Sa yena Cohācjū ye buheye ti ijigū gūhare masiña m̄sa. Sa masina quehnoañe buheye dihitare cahmeña. ²² Sa

yena ijipihtiye ñañene yeracāhña m̄sa.

²³ Cohācjū marine quehnoano ijigū yeriquiro ijire. Tiquiro basi m̄sare tiquiro yequinare quehnoana, ñañe mariena ijigū ye nemoahdo m̄sare. M̄sa pagari gūhare m̄sa jeripohnari gūhare quehnoano ihña ihboahro. Mari p̄htoro Jesucristo ahri yehpapure tiquiro toja tato pano m̄sare Cohācjū quehnoano ihña ihboahro m̄sare “Ñañene yeari”, nino. Tiquiro sa yegū Cristo ahtagū ñañe mariena ijinata m̄sa. ²⁴ Sata ijigū yerota Cohācjū. Tiquiro m̄sare beseriquiro tiquiro nidiro sahata yere.

Pablo gūhu quehnoa dutiahye

²⁵ ḡsā ye ijiatire Cohācjāre sini basaya m̄sa, ḡsā acaye.

²⁶ M̄sa mehna cjēnare quehnoano mehna piti caya.

²⁷ Ijipihtiyequina Jesu yequinare ahri pūre buheya m̄sa. Jesu mari p̄htoro dutiye mehna ahrire m̄sare dutiaja yūhu.

²⁸ Jesucristo mari p̄htoro cahñe mehna m̄sare tutuaro quehnoa dutiaja.

2 Tesalonicenses

Pablo ojoa ohoahye Jesu yequinare Tesalónica cjēnare

¹ Yuhū Pablo, Silvano, Timoteo gūhū mūsare quehnoa dutiaja. Sa yegū yuhū Pablo ahrire ojoa ohoaja. Mūsa pehe Tesalónica cjāna mari Pacū Cohācjū yequina ijire. Mari puhtoro Jesucristo yequina gūhū ijire mūsa. ² Sa yena Cohācjū mari Pacū, mari puhtoro Jesucristo mehna mūsare quehnoa dutiaja. Tiquina yedohoye mehna quehnoano ijiya mūsa.

Ahri yehpapure Cristo tojoa tagū buhiri dahrerota Cohācjū

³ Cohācjūre sinina, Jesure mūsa wacū tutuayere wacūna “Quehnoa yuhduare usāre”, niducujaja usā Cohācjūre. Usā sa nigū quehnoarīne. Decoripe Cohācjūre mūsa quehnoano wacū tutua nemonā niñohti. Sa yena decoripe mūsa mehna cjēnare cahī nemonā niñohti mūsa. Sa ye Cohācjūre “Quehnoa yuhduare usāre”, usā nigū quehnoarīne. ⁴ Apequina mūsare nāno tiquina yepegāta Jesure wacū tutuaducūñohti mūsa yojopū gūhare. Sa yena tiquirore wacūna duhuerañohti. Mūsa sa yegū ihñana tire mūsa yerire apequinare Cohācjū yequinare bucueye mehna yahuaja usā. ⁵ Sa wacū tutuaducuna Cohācjū mari puhtoro yequina mūsa ijiri buhiri nāno yuhdūna niñohti mūsa. Sa yero Cohācjū tiquiro puhtoro ijirōpūre waha dutiri jiri mūsare. Tiquiro sa dutigū queoro yeriquiro tiquiro ijigū masiaja mari.

⁶ Sa yero Cohācjū queoro yeriquiro ijire. Sa yero mūsare nāno yuhdugū yeyequina pehere nāno yuhdugū yerota tiquiro. ⁷ Sa yero mari nāno yuhdurina ijigū ihñano tiquiro marine quehnoano

ijigū yerota. Mari puhtoro Jesu tiquiro yequina angele tutu-ayequina mehna, peca mehna uhmūsepū bajuario quehnoano ijigū yerota marine, nāno yuhdurinare. ⁸ Sa yero Cohācjūre masieñequinare, mari puhtoro Jesu ye buheyere quehnoañe buheyere yuhduducariquinare Cohācjū buhiri dahrerota. ⁹ Sa yero Cohācjū tiquinare ohō saha buhiri dahrerota: Pecapū tiquina nāno yuhduducuetā. Sa ye tiquina tutuariquiro mari puhtoro Jesu cahapū ne waha masiedare. Sa ye tutua yuhduariquiro tiquiro ijiyere ihñasi tiquina. ¹⁰ Sata waharota ti decopū Jesu tiquiro tojoa tagū. Ti decoputa tiquiro ahtarota tiquiro yequina “Quehnoariquiro, tutuariquiro ijire Jesu”, tiquina ni ño peotire. Sa ye tiquirore wacū tutuayequina ño peoeta tiquirore. Mūsare usā buherire mūsa quehnoano tūhori. Sa yena mūsa pehe tiquiro mehna ijinata.

¹¹ Sa yena Cohācjūre sa sini basaducujaja usā mūsa ye ijiatire. Ohō saha ni Cohācjūre sini basaja usā: Tiquiro cahmeno sahata mūsa yeatire, mūsa mehna tiquiro bucueatire sini basaducujaja usā mūsare. Mūsa quehnoana iji duanata niñohti. Sa yena Cohācjū tutuaye mehna quehnoana mūsa iji duariro sahata mūsa ijiatire sini basaducujaja usā. Mūsa Cohācjūre wacū tutuañohti. Sa wacū tutuana tiquiro yere yeñohti mūsa. Tire mūsa quehnoano ye nemoatire Cohācjūre sini basaducujaja usā mūsare. ¹² Sa yena mari puhtoro Jesucristore apequinare tiquina ño peogū yenata mūsa. Mūsa sa yegū Jesucristo yequina mūsa ijigū ihñañe apequina ño peoeta mūsare. Cohācjū cahñe mehna, mari puhtoro Jesucristo gūhū tiquiro cahñe mehna sa waharota.

2

Ñano yeducuriqiurore yahuahye Pablo

¹ Yojopure mari puhtoro Jesucristo ahri yehpapure tiqiuro tojoa tatire, tiqiurore mari cahmecoa mari piti catire yahu nemo duaja yuhu. Ahrire tutuaro yahu duaja musare, usã acaye. ² Apequina musare ohõ saha niboaga: “Mari puhtoro tiqiuro tojoa tati deco, mianogã pihtiri decopu ijiro nine”, ni mehoboaga musare. Tiquina sa nigũ tuhona, tuho mariedacãhña. Sa yena tuho wisieracãhña. “Cohãcjũ yahure sata nidi ijiri”, ni mehoboaga musare apequiuro. Apequiuro gũhu musare buhero, sata ni mehoboaga. Apequiuro gũhu sata ni oja ohoboaga, “Yuhu Pablota ijiaja”, ni meho ojoaro. Tire musare yahuriqiurore masiedaja yuhu. ³ Apequina musare tiquina ni mehogũ tuhoeracãhña musa. Ti decopu ahri yehpa pihtiatu panogã peyequina masa Cohãcjũre duhueta. Sa yero ti decopu ñano yeducuriqiuro pecapu wahatiqiuro ijirota. ⁴ Tiquiro Cohãcjũ warore, “Cohãcjũ ijire”, tiquina niñe queoye gũhure ijipihtiyequina masare ño peo dutisi ñano yeducuriqiuro. Tiquiro ohõ saha ni tuhoturota. “Ahriquina ijipihtiyequina puhto tjaja yuhu”, ni tuhoturota. Sa yero Cohãcjũ wuhupũ dujiro “Yuhu pehe Cohãcjũ ijiaja”, ninota.

⁵ Musa mehna ijinigu tireta yahu musare. ¿Tire wacũajari musa? ⁶ Yojopure apequiuro pehe ñano yeducuriqiurore ne iji dutieranine. Sa yena tiqiurore iji dutieriqiurore masine musa. Sa yero tiqiuro dutigũ tiqiuro queori deco ijigũ ñano yeducuriqiuro ijirota. ⁷ Yojopure masa ihñenopũ tiqiuro yero saha apequina ñañene ye tuhasari.

Tiquina sa yepegũta ñañene ye dutieriqiuro tiqiuro wahato pano ñano yeducuriqiuro pehe ijisi. ⁸ Tiquiro wahari bato pũritare ñano yeducuriqiurota ijirota. Sa yero came mari puhtoro Jesucristo tiqiurore yaria dutirota. Tiquiro asĩ siteye mehna ahri yehpapu tojoa taro, tiqiuro putiye mehna tiqiurore wejẽ borota. ⁹ Ñano yeducuriqiuro pehe watino ye tutuaye mehna ahtaro, ti tutuaye mehna ni meho, peye ye ihñonota. ¹⁰ Tiquiro peye ñañe mehna ni mehogũ pecapu wahatiqiuna pehe tiqiurore tuhoeta. Tiquina pehe quehnoañe buheyere cahmedare. Tiquina sa cahmedagũ Cohãcjũ tiquinare pecapu wahatiquinare yuhduosi. Sa ye tiquina ñano yeducuriqiuro ni mehoriqiuro tiqiuro yerire “Ijirota ijire”, nieta. ¹¹ Sa yero, quehnoañe buheyere tiquina cahmedari buhiri Cohãcjũ tiquinare wisiagũ yerota. Sa wisiaye ni mehoñene cahmeeta tiquina. ¹² Sa yero ijipihtiyequina quehnoañe buheyere tuho dueyequinare, ñañe ye coayequinare tiqiurota buhiri dahrerota.

“Cohãcjũ musare beseahye tiqiuro yequina ijigũ yero taro”, ni yahuahye Pablo

¹³ Musa usã acaye, mari puhtoro Jesu tiqiuro cahñona ijire musa. Duita coã waropureta musare pecapu wahaborinare tiqiuro yuhduoatinare Cohãcjũ beseahye musare. Musare beseahye Espiritu Santo tutuaye mehna tiqiuro yequina ñañe mariena musare ijigũ yero taro. Sa yero quehnoañe buheyere “Ijirota ijire”, nianaja musa ijigũ ihñano musare bese neahye. Tiquiro sa besenohrina musa ijigũ ihñana Cohãcjũre bucuena, “Quehnoare”, niducujaja usã. ¹⁴ Quehnoañe buheyere musare usã buhegũ Cohãcjũ musare beseahye mari puhtoro Jesucristo

tiquiro masa m̄ajariro sahata m̄usa ḡuh̄a masa m̄ujatire.

¹⁵ Sa yena quehnoano wacū tutuana ijiya m̄usa. Sa yena us̄a yahuducuye mehna us̄a ojoari p̄uri mehna m̄usare us̄a buherire quehnoano wacūña m̄usa. Sa yena ti buheyere yuh̄d̄ud̄caerac̄h̄ña. ¹⁶ Mari p̄h̄toro Jesucristo tiquiro basi, Coh̄c̄j̄ mari Pac̄u ḡuh̄a marine cah̄ñe, ijiptiye decori marine bucueḡu yere. Marine cah̄ñe, marine pecap̄u wahaborinare yuh̄d̄uoeta. Sa yena Coh̄c̄j̄ tiquiro yuh̄d̄uoatire quehnoano masina, bucueaja mari. ¹⁷ Jesucristo, mari Pac̄u mehna m̄usare quehnoa duti- aja quehnoano m̄usa bucueatire. Sa ye ijiptiyere quehnoañene m̄usa yeatire, m̄usa quehnoano yahuducuatire Coh̄c̄j̄re m̄usare sini basaja.

3

“Us̄a ye ijiatire Coh̄c̄j̄re sini basaya”, ni ojoahye Pablo ḡuh̄a

¹ Yojop̄u us̄a acaye, us̄a ye ijiatire Coh̄c̄j̄re sini basaya mari p̄h̄toro Jesu ye buheyere peyequina masare us̄a buheatire. Sa yena tiquiro ye buheyere m̄usa quehnoano cahmediro sahata apequina pehe ti buheyere ño peoye mehna tiquina cahmeatire sini basaya m̄usa Coh̄c̄j̄re. ² Ihqūequinata Jesure wacū tutuare. Apequina pehe tiquiro yere t̄aho dueraye, Jesure wacū tutuerare. Sa yena ñañequina masa us̄are tiquina ñano ye duaḡu Coh̄c̄j̄re sini basaya m̄usa us̄are tiquiro yedohoḡu. ³ Mari p̄h̄toro Jesu tiquiro nidiro sahata yeriquiro ijire. Sa yero m̄usare tiquirore wacū tutuaḡu yerota. Sa yero wat̄ino m̄usare tiquiro ñano ye dutiḡu Jesu m̄usare yedohorota. ⁴ Coh̄c̄j̄ m̄usare tiquiro yedohorire masiaja us̄a. Sa yena m̄usare us̄a dutiriro sahata m̄usa

yeḡu ḡuh̄are masiaja us̄a. Sa yena sata yeducunata m̄usa. Ti ḡuh̄are masiaja us̄a. ⁵ Coh̄c̄j̄ m̄usare tiquiro cah̄ñene m̄usare masiḡu yeahro. Sa yero Cristo yero saha m̄usa ñano yuh̄d̄uepeḡuta ihc̄ano saha ḡu yeahro m̄usare mari p̄h̄toro. Sa ih̄ña c̄h̄ña m̄usare ñano ye yequinare.

Marine tutuaro dahraro cahmene

⁶ Jesucristo mari p̄h̄toro tiquiro dutiro mehna oh̄o saha ni dutinatja m̄usare: Jesu yequinare dahra dueyequinare, us̄a dutiyere ye yequinare, tiquinare piti ti duhuya. ⁷ Soh̄o ijiri pje m̄usa mehna us̄a ijiḡu tutuaro us̄a dahraḡu ih̄ñari m̄usa. Sa yena us̄a yeriro saha m̄usa ḡuh̄are dahraro cahmene. Tire quehnoano masine m̄usa. ⁸ Sa yena m̄usa ihyayere wapa yero marieno ihyer̄u us̄a. Sa yena decop̄re, ñamip̄u ḡuh̄are tutuaro dahra us̄a “M̄usa ihyayere siniari”, nina. ⁹ Us̄a buheri wapa m̄usare wapa ye dutiboaga us̄a. Sa wapa ye dutiborina ijiepenata wapa ye dutierana, tutuaro dahra us̄a, us̄are m̄usa ih̄ña c̄uatire. ¹⁰⁻¹¹ M̄usa mehna ijina, oh̄o saha ni buhei m̄usare: “Dahraeyequina ihyerac̄h̄do”, ni buhei us̄a m̄usare. Ihqūequina m̄usa mehna c̄j̄ena ne dahra duerañoh̄ti. Sa ye apequinare ñano quiti yeye, caribo yuh̄d̄uañoh̄ti tiquina. Sa ye yequina m̄usa mehna tiquina ijiḡu ih̄ñana oh̄o saha ni ojoaja m̄usare: “Dahraeyequina ihyerac̄h̄do”, niaja us̄a. ¹² Mari p̄h̄toro Jesucristo tiquiro dutiro mehna dahra dueyequinare oh̄o saha niaja: Quehnoano bucueye mehna dahraahro quehnoano tiquina ijiatire.

¹³ Us̄a acaye, m̄usa pehe quehnoañene yeducuna caributierac̄h̄ña. ¹⁴ Ihqūequina to c̄j̄ena ahrire us̄a ojoarire yuh̄d̄ud̄caboaga. Tiquina sa

yegã tiquina yerire quehnoano ihñaña. Sa ihñana tiquinare piti ti duhuya tiquina boro wahatire. ¹⁵ Sa piti ti duhuepenata tiquinare ihña tuhtieracãhña. Tiquina msa acaye, Jesu yequinata ijire. Tiquina sa ijigã tiquina yuhducarire yahuya tiquinare tire tiquina duhugã.

Pablo tiquinare quehnoa duti bato tiahye

¹⁶ Mari pãhtoro Jesu marine quehnoano ijigã yeriquiro mehna decoripe quehnoano ijiducuya msa. Sa yegã “Mari pãhtoro msa mehna ijipihina mehna ijiducuahro”, nigã msare quehnoa dutiaja.

¹⁷ Yuh Pablo, yuh omoca mehnata yojopure yuh basita oja bato tiaja. Sa yegã msare quehnoa dutiaja. Ijipihitiye yuh ojaari pãrine ohõ saha dihita yuh omoca mehna oja bato tiaja yuh. Yuh ohõ saha dihita yuh oja bato tigã ihñana yuh ojaari pã ijigã masinata msa. ¹⁸ Mari pãhtoro Jesucristo cahñe mehna tutuaro quehnoa dutiaja msare ijipihinare.

1 Timoteo

Pablo Timoteore ojoa ohoahye

¹ Yũhũ Pablo ahrire mũhũre Timoteore ojoa ohoaja. Cohãcjũ marine pecarũ wahaborinare yãhdũoriqũiro ijire. Jesucristo yere buhe duti tiqũiro cũrigũ ijiaja yũhũ. Mari Pacũ, Jesu mehnata tiqũina dutiriro sahata tiqũiro cũrigũ ijiaja yũhũ. Jesuta marine yedohore. Sa yena marine tiqũiro yãhdũoatire masina, tire cohteaja mari. ² Mũhũre Timoteore Jesu yere buhei. Yũhũ sa ni buhegũ tũhogũ Jesure wacũ tutua dũcari mũhũ. Sa yegũ mũhũ potota yũhũ macũ yero saha ijigũta nine. Sa yegũ Cohãcjũ mari Pacũ mehna, mari pũthoro Jesucristo mehna mũhũre quehnoa dutiaja. Sa yegũ mũhũre paja ihñañe tiqũina yedohoye mehna quehnoano ijiya mũhũ.

Pablo ni mehoñe buheyere buhe dutierahye

³ Sohõ ijiri pjere Macedonia yeh-rarũ wahagũ mũhũre Efesorũ cũ yãhdũ cãhũ. Topũ ihquẽquina tiqũina ye buheyere ni mehoñe buheyere buheyequina ijiri. Ti buheyere buhe dutieracjũre mũhũre cũu yũhũ. ⁴ Tiquina esa tuharo sa buhe maca cãre. Sa ye tiqũina acaye panorũ cjẽna tiqũina esa tuharo tiqũina buherire sa buheducure. Ti buheye mehna apequina mehna cahme dũse tutuaducure. Cohãcjũ marine tiqũiro dutirire quehnoano yegũ yerare tiqũina sa buheye. Cohãcjũ ye pehere yena tiqũirore wacũ tutuaja. Sa yegũ tiqũina esa tuharo tiqũina buherire buhe dutieracjũre cũu mũhũre.

⁵ Sa cũu mũhũre Jesu yequina apequinare “Cahãhdo”, nigũ. Ñañe buhiri marieno mehna, quehnoañe wacũñe mehna, poto

Cohãcjũre wacũ tutuaye mehna apequinare tiqũina cahĩatire sa cũu mũhũre. ⁶ Ihquẽquina ahri quehnoañe buheyere cohã tuhasa, apeye buheye pehere cahmene. Sa ye ti buheye pehere cahme dũse tutuaye wisia wahare. Ti buheyere tiqũina cahme dũse tutuaye ti dũhseati ijierare. ⁷ Sa ye tiqũina Cohãcjũ dutiyere buheyequina iji duamene. Sa buhe duepeta ti buheyere tiqũina basi quehnoano masiedare. Sa ye ti buheyere masiñequina yero saha buhepeta ti buheyere ne masiedare tiqũina.

⁸ Cohãcjũ dutiyere Moise marine tiqũiro cũrĩre queoro mari buhegũ quehnoañe dutiye ijire. Tire mari quehnoano masi-aja. ⁹⁻¹⁰ Ti dutiyere buhena ahrire masino cahmene: Ti dutiye quehnoañequinare tiqũina buheati ijierare. Ahriquina pehere tiqũina buheati ijire. Dutiyere yãhdũdũcayequinare, Cohãcjũre yãhdũdũcayequinare, ñañe dihitare yeyequinare, Cohãcjũre cahmeeñequinare, tiqũina pacũsũmũare wejẽñequinare, tiqũina pacosãnumia gũhũre wejẽñequinare, apequina masare wejẽñequinare, wũana tiyequinare, cahme numia mehna tiqũina ñano yeriro saha umũa sehsaro o numia sehsaro ijiepeta tiqũina paguri mehna ñano yeyequinare, masa tiqũina ijiepegũta tiqũinare du-ayequinare, ni mehoñequinare, Cohãcjũ dutiye Moise marine tiqũiro cũri pehe tiqũinare buheati ijire. Sa yero apequina ijipihitiye-quinare quehnoañe buheyere yãhdũdũcayequinare buheati ijire Cohãcjũ dutiye. ¹¹ Quehnoañe buheye pehe quehnoariqũiro Cohãcjũ tiqũiro ye buheyeta ijire. Ti buheye pehere yũhũre Cohãcjũ buhe dutiri.

Cohãcjũ paja ihñañene yahuahye

Pablo

¹² Sa yuhũ buhegũ Jesucristo mari pũhoro yuhũre tutuayere ohoro, yuhũre yedohore. “Pablo buhero, yee buheyere quehnoano buherota”, ni tuhoturi Jesu yuhũre. Sa yero yuhũre besero tiquiore yedohoacjũre cũri yuhũre. Tiquiore sa yegũ “Quehnoare”, niaja yuhũ tiquiore. ¹³ Panopũre Cristore yuhũ ñano yahuducuepegũta, tiquiore yequinare ñano yuhũ yepegũta, tiquiore yuhũre beseri. Sa yegũ tiquiore masiedarĩgũ tiquiore ñano yegũ “Ñano yei niaga yuhũ”, ni tuhotuerũ. Yuhũ sa masiedagũ ihñano tiquiore paja ihñari yuhũre. ¹⁴ Sa yero Cohãcjũ mari pũhoro yuhũre tutuaro cahĩno, quehnoano yeri yuhũre. Sa yero Cristo Jesure wacũ tutuagũ yeri yuhũre tiquiore. Sa yero apequinare cahĩgũ yeri yuhũre Cohãcjũ.

¹⁵ Yuhũ pehe apequina yuhũoro ña yuhũdagũ ijimi. Nana mari ijiepegũta Jesucristo ahri yehpapũ ahtari jiri ñañequinare pecapũ wahaboriquinare yuhũoatiquiore. Ti ijirota ijire. Tiquiore sa ijiriquiore ijigũ ijipihtiequina tire masiaho. ¹⁶ Ña yuhũdagũ yuhũ ijiepegũta tiquiore yuhũre paja ihñari. Sa paja ihñano Jesucristo usuaro marieno yuhũre tiquiore quehnoano yerire masigũ yero nidi apequinare came tiquiore wacũ tutuatiquinare masigũ yero taro. Sa wacũ tutuatiquina uhmũserũ sa ijiducuetã. ¹⁷ Cohãcjũ ijipihtie decori masa pũhoro ijire. Tiquiore ne yarierare. Sa yero mari mehna tiquiore ijiepegũta tiquiore ihñedaja mari. Sa yero tiquiore dihita Cohãcjũ waro ijire. “Potota quehnoariquiore, tutuariquiore ijire tiquiore”, niñna mari tiquiore. Ijipihtie decori tiquiore ño peuhna. Sata yeihna. ¹⁸ Timoteo yuhũ macũ yero saha ijire mũhũ. Sa yegũ yojopũre

ahrire mũhũre dutiaja: Mari acaye Jesu yequina Cohãcjũ yere yahu mũhtariquina mũhũre tiquina ni mũhtariro sahata mũhũre dutiaja. Cristo yere quehnoano yahuducuya. Sa yegũ ñano yuhũdũepegũta tiquiore wacũ tutua duhueracãhñã mũhũ. ¹⁹ Jesure sa wacũ tutuaducuya. Ñañe buhiri mariegũ ijija mũhũ. Sa yegũ quehnoañe dihitare yeya. Ihquẽquina tire yeraye, Jesu yere cohãre. Sa cohãñe tiquiore wacũ tutua duhuri. ²⁰ Sata yeri Himeneo, Alejandro mehna. “Watĩno tiquiore cahmeno sahata yecũnahdo mũsare”, ni cũu tiquinare, Cohãcjũre tiquina ñano yahuducu nemoedatire.

2

Cohãcjũre sini basayere yahuahye Pablo

¹ Yojopũre ohõ saha ni duti mũhtaja mũsare: Ijipihtiequina ye ijiatire Cohãcjũre sini basaya. Sa sini basana “Quehnoare. Bucueaja”, niñã Cohãcjũre. ² Pũhtoa, apequina masa bui dutiequina gũhũ tiquina ye ijiasi gũhũre Cohãcjũre sini basaya, cahmequeno marieno Cohãcjũre ño peona mari quehnoano ijiatire. Sa sini basana mari quehnoañene yena quehnoano iji masiaja. ³⁻⁴ Sata apequina ye ijiatire mari sini basagũ quehnoarĩne. Tire mari yegũ ihñano Cohãcjũ marine yuhũoatiquiore pehe marine quehnoano ihñã bucuere. Ijipihtiequina pecapũ wahaboriquinare tiquiore yuhũoriquina ijigũ cahmene Cohãcjũ. Sa yero quehnoañe buheyere tiquina masigũ cahmene tiquiore. Sa yero apequina ye ijiatire mari sini basagũ bucuere tiquiore. ⁵ Ihcãquiota ijire Cohãcjũ. Sa yero Cohãcjũre mari ihñã tuhtigũ Cohãcjũ gũhũ marine tiquiore ihñã tuhtigũ, marine bosariquiore

ihcãquirola ijire. Tiquiro Jesu-
cristota ijire. Jesucristo gũhũ
masunota ijiri. ⁶ Sa yero wapa-
monore wapa ye basaro saha
ijipihitina mari ñaÑe buhirire
yariahye. Cohãcjũ tiquiro queori
pjepũ tire masare masigũ yeri.
⁷ Tire yahuacjũre, Jesu tiquiro
cũacjũre Cohãcjũpũ yũhũre beseri.
Sa yero judio masa ijieyequinare
Jesure wacũ tutuayerere, quehnoañe
buheyere buheacjũre beseri
yũhũre. Potota masare yahugu
niaja yũhũ. Ni mehoedaja.

⁸ Cohãcjũ yere quehnoano
yeyequina, ijipihitiro cjẽna pehe
Cohãcjũre tiquina sinigũ cahmeaja.
Sa yegũ tiquina usuario marieno,
unureno marieno tiquiro mehna
tiquina yahuducugũ cahmeaja.

⁹ Sa yegũ numia pehere
quehnoañequina numia ye suhti
yero saha sañañequina numia
ijigũ cahmeaja. Sa ye sijoro
saha bajuye poari tiquina poarire
yeracãhdo. Uru dari busaye darire,
perla dari gũhũre busaeracãhdo,
tiquina amũare “Ihña ñe pjeari”,
niÑe. Sa ye wapa bajuye suhtire
sañaedacãhdo tiquina Jesu yequina
numia. Umũare tutuaro ñe pjegũ
yeracãhdo. ¹⁰ Sa ye tiquina numia
quehnoañe pehere yeahro. Sata
yero cahmene “Cohãcjũ yequina
numia ijiaja”, niÑequina numiare.
¹¹ Dihta marieno ño peoye mehna
buheyere tũhoahro tiquina nu-
mia. ¹²⁻¹⁴ Sa yeye numia amũare
buheracãhdo. Sa yeye amũare
dutieracãhdo. Tiquina numia
pehe dihta marieno ijiahro. Adãre
Cohãcjũ ye mãhtahye. Tiquiro
bato Evare yeahye. Sa yero
watno ni mehogũ tũhoriquire
Adãn ijierahye. Tiquiro ni mehogũ
tũhoricoro pehe Eva ijiahye.
Sa tiquiro ni mehogũ tũhoro,
Cohãcjũre yũhdũdũcaricoro wa-
hahye ticoro. Sa yeye, numia pehe
amũare dutieracãhdo.

¹⁵ Numino iji mãhtaricoro
ticoro yũhdũdũcaepẽgũta nu-
mia tiquina pohna tigũ ihñaano
tiquinare Cohãcjũ yedohorota.
Tiquina numia pohna tiye numia
pehe Cohãcjũre tiquina wacũ
tutuaducugũ tiquiro yedohorota
tiquinare. Sa yero masare,
Cohãcjũ gũhũre tiquina cahũducugũ,
quehnoañequina numia tiquina
ijiducugũ, ñaÑe marieñequina nu-
mia tiquina ijigũ Cohãcjũ tiquinare
yedohorota.

3

*Jesu yequina pũhtoa tiquina
yeatire yahuahye Pablo*

¹ Masa Jesu yequina pũhtoa iji
duaye, quehnoañene ye duaye
niaga tiquina. Ti ijirota ijire.
² Jesu yequina pũhtoare besegũ ohõ
saha ijieyequinare beseya: Buhiri
marieñequinare beseya “Apequina
tiquinare ñano ni yahusãri”, nigũ.
Sa yegũ ihquẽquina numiare namo
tiyequinare, quehnoano tũho
masiñequinare, cua pesayequinare,
masare quehnoano mehna tiquina
ya wũhũre sajã ta dutiyequinare,
apequinare quehnoano buhe mih-
niñequinare beseya mãhũ. ³ Sa be-
segũ queheye marieñequinare, cah-
mequeñe marieñequinare, masare
quehnoano yeyequinare, cahme
dũse tutueyequinare, niñerure
cahĩeñequinare beseya mãhũ. ⁴ Sa
ye mãhũ beseriquina tiquina
pohnene, tiquina namosãnumia
gũhũre ño peoye mehna yũhtigũ
yeyequina ijiahro. ⁵ Tiquinare
yũhtigũ ye masiedaye Jesu yequina
gũhũre yũhtigũ ye masiedaboaga
tiquina.

⁶ Jesu yequina pũhtoa iji
duayequina Jesu yequina coã
sajãñequina ijieye, tiquina pũhtoa
iji masiedare. Coã sajãñequinare
Jesu yequina pũhtoa mãsa cũgũ
tiquina “Quehnoa yũhdũana iji-
aja”, ni tũhotuboaga. Tiquina

sa ni tãhotugũ Cohãcjũ tiquinare buhiri dahre dutirota watĩnore tiquiro yero saha. Watĩno gãhũ sata ni tãhotumahye Cohãcjũre yũhdũdũca duaro.

⁷ Sa ye Jesu yequina pũthoa ijia-tiquina ohõ sahata ijiro cahmene. Jesu yequina ijieyequina tiquina ño peonohĩnequina ijiro cahmene tiquinare. Quehnoano yeyequina tiquina ijigũ ihñãñe apequina ño peoeta tiquinare. Sa quehnoano yeye, watĩno cahmeñene wacũeno mehna tiquiro ye dutigũ tiquina pehe watĩno cahmeñene yesi. Sa ye masa tiquinare ñano quiti dahresi.

Jesu yequinare yedohotiquina tiquina yeatire yahuahye Pablo

⁸ Sa yegũ Jesu yequinare yedohotiquina pehere besegũ ohõ saha ijieyequinare beseya: Tiquina cua pesaro ijieyequinare, quehnoano potota yahuducuequinare, queheye marieñequinare, apequina yere ni meho ehmeñequinare beseya mũhũ.

⁹ Sa yegũ ñãñe buhiri marieno Cohãcjũ ye buheyere sa wacũ tutuaducuequinare beseya mũhũ.

¹⁰ Sa yegũ Jesu yequinare yedohotiquina ijĩ duayequinare tiquina yerire ihñãña mũhũ. Tiquinare mũhũ sa ihñari bato tiquina pehe buhiri marieñequina ijieye, Jesu yequinare yedohotiquina sajãahdo tiquina.

¹¹ Sa yena tiquina namosãnumia ohõ saha tiquina ijigũ cahmeaja mari. Cua pesayequina numia, ñãñe quiti marieñequina numia, tũho masiñequina numia, ijipihtiyere quehnoañene yeducuequina numia tiquina ijigũ cahmeaja mari. ¹² Sa yegũ Jesu yequinare yedohotiquinare besegũ ihquẽquina numiare namo tiyequinare, tiquina pohnene apequina tiquina ya wũhũ cjẽna gãhũre quehnoano yũhtigũ yeyequinare beseya.

¹³ Sa ye mũhũ beseriquina Jesu yequinare tiquina yedohogũ apequina tiquinare quehnoano ihñã bucueeta. Sa ye tiquina yedohoyequina pehe quehnoañe buheyere, Jesucristore tiquina wacũ tutuaye gãhũre cuero marieno buheeta tiquina.

Cohãcjũ ye buheyere yahuahye Pablo

¹⁴⁻¹⁵ Yojopũre mũhũ cahapũ waha duagũ niaja. Sa waha duepegũta yojopũre wahaeranigũ ahri pũpũ yahu, mũhũre ojoa ohogũ niaja. Jesu yequina cahmecoañequina watoa mũsa yeatire mũhũre yahu ojoa ohogũ niaja, "Mianore waharĩsi", nigũ. Jesu yequina Cohãcjũ catiriquire yequina ijire. Tiquiro yequina pota ijieye buheyere Cohãcjũ ye buheyere cũore. Sa cũoye tire buheducure. ¹⁶ Ahri ijirota ijire. Marine Cohãcjũ tiquiro buheri, panopũ mari quehnoano masiedari quehnoa yũhdũaye buheye ijire. Ahri buheye ohõ saha ijire:

Tiquiro Cristo mari pagũ yero saha pagũ tiriquire masa bajuahye. Quehnoariquire, ñãñe marieniquiro tiquiro ijigũ ihñori Espĩritu Santo pehe. Angele gãhũ tiquirore ihñari. Sa ye tiquiro buhe duti cũriquina pehe apeye yehpari cjẽnare tiquiro yere yahu buhere. Sa ye ahri yehpapũ masa peyequina tiquirore wacũ tutuari. Came uhmũsepe Cohãcjũ neari tiquirore. Ti ijire quehnoañe buheye.

4

Quehnoañe buheyere cohãriquinare yahuahye Pablo Timoteore

¹ Espĩritu Santo ahriye quehnoano yahure: Pihitiri deco panogã ihquẽquina masa Jesu ye buheyere

cohãeta. Sa ye ni meho buheyere watino ye buheye pehere tuho naheta tiquina. ² Ti buheyere ni mehoducuyequina yahueta masare. Tiquina ni mehoducuyequina pehe “Ñañe buhiri mariedare usãre”, ni tuhotuyequina ijire. Sa ye tiquina ñañe yeyere “Ñañe ijire”, ni tuhotuerare. ³ Ohõ saha ni buheeta tiquina: “Namo tieracãhña. Ahri ihyayere ihyeracãhña”, ni buheeta tiquina. Tiquina sa ihya dutierapegãta Cohãcjũ ihyayere bajumehnenno mari ihyatire quehnoañene cũahye tiquiuro. Mari Cristore wacũ tutuana ijigũ quehnoañe buheyere mari masina ijigũ, mari ye ijiatire ti ihyayere bajumehneahye tiquiuro. Ti ihyayere cõona tiquiore “Quehnoare”, mari nigũ cahmene tiquiuro. ⁴ Ijipihtiye Cohãcjũ tiquiuro bajumehnedi quehnoañe ijire. Sa yena tiquiuro bajumehnedi ihyayere nena, Cohãcjũre “Quehnoare”, nina, tire marine cohãedarõ cahmene. Tire marine bucue ihyaro cahmene. Sa yegũ apequina tiquina ihya dutieragũ tuhoeracãhña tiquinare. ⁵ Tiquiuro bajumehnedi quehnoañe ti ijigũ yahu tuhasahye Cohãcjũ. Sa ye tiquiore “Quehnoare”, mari ni bucueri bato ti ihyaye tiquiuro yeri ihyaye quehnoañe waro ijiro nine.

Jesucristo cahacjãnore Timoteore quehnoariquiore yahuahye Pablo

⁶ Ahri yũhũ yahurire Jesu yequinare mari acayere buhegũ Jesucristo cahacjũ quehnoagũ ijire mũhũ. Sa buhegũ quehnoañe buheyere, quehnoano mũhũ tuhorire quehnoano masi pehogũ ijire mũhũ. ⁷ Sa yegũ tiquina esa tuharo tiquina buherire, Cohãcjũ ye ijieyere tuhoeracãhña. Sa yegũ Cohãcjũ cahmeñe pehere yepogũ ijija mũhũ. ⁸ Mũhũ dahrapogũ

quehnoa cjũre. Mũhũ dahraporiro yũhdũoro Cohãcjũ cahmeñene mũhũ yepogũ quehnoa yũhdũare mũhũre. Cohãcjũ cahmeñene yepogũ vojopãre quehnoano ijigũta mũhũ. Sa yegũ mũhũ yariari batopũ gũhũre masa mujagu quehnoano ijigũta mũhũ. ⁹ Ti ijirota ijire. Ijipihtiyequina tire yũhũ nidire masiñequinare “Ijirota ijire”, nino cahmene tiquinare. ¹⁰ Ijipihtiyequina tire tiquina niatire Cohãcjũ cahmeñene tiquina yeatire mari tutuaro dahraja. Sa yena ñano yũhdũaja mari apequina marine ñano tiquina yegũ. Cohãcjũ catiriquiro, ijipihtiyequinare pecapũ wahaboriquinare yũhdũoriquiro ijire. Tiquiore wacũ tutuayequina pũritare tiquiuro yũhdũorota. Sa yena tiquiuro yũhdũoatire masina, cohteaja mari. Sa yena Cohãcjũ cahmeñe pehere masa tiquina yeatire tutuaro buhe dahraja mari.

¹¹ Ti ijipihtiye yũhũ nidire dutiya Jesu yequinare. Sa yegũ tire buheya mũhũ. ¹² Wahmũ mũhũ ijigũ ihñañe apequina Jesu yequina mũhũre yũhdũũca duaboaga. Tiquina “Sa yeari”, nigũ, ohõ saha ye ihñõña tiquinare. Masare cahñña. Sa yegũ Jesure wacũ tutuaducuya. Sa yegũ buhiri mariegũ ijija. Wahmũ ijiepegũta mũhũ sa yegũ ihñañe mũhũre yũhdũũcasĩ tiquina. Sa ye mũhũ yahuducurire tuhoje, mũhũ yerire ihñañe mũhũre ihña cũeta. ¹³ Sa yegũ mũhũ cahapũ yũhũ esato pano Jesu yequinare Cohãcjũ yere tiquina ojoari pũre buhe tuhasa tiquinare sa yahu quehnoducuya. ¹⁴ Jesu yequina pũhtoare Cohãcjũ tiquiuro dutigũ tiquina pehe Cohãcjũ yere yahu tuhasa mũhũ bui tiquina omocarine duhu peori. Tiquina sa duhu peogũ Cohãcjũ ye ijiatire mũhũ ye masiatire cũri mũhũre Cohãcjũ. Tiquiuro sa cũrire ye

duhueracãhña.

¹⁵ Ahri dutiyere sa yeducuya m̃h̃h̃. Sa yeg̃u ahri dutiyere quehnoano masiña. M̃h̃h̃ sa yeri bato quehnoañene m̃h̃h̃ ye nemogã ijipihtiyequina ihñaeta. ¹⁶ M̃h̃h̃ pehe quehnoano yeya m̃h̃h̃, “Sijoro saha yeari”, nig̃u. Sa yeg̃u quehnoano buheya m̃h̃h̃, “Sijoro saha buheari”, nig̃u. Sa yeg̃u m̃h̃h̃ basita pecap̃u waha-borig̃u ỹhd̃g̃ata m̃h̃h̃. Sa ye m̃h̃h̃re t̃h̃oriquina g̃h̃h̃ pecap̃u wahaboriquina ỹhd̃h̃eta.

5

“Apequina Jesu yequinare ohõ saha yeya m̃h̃h̃”, niahye Pablo Timoteore

¹ Ne bucurore tuhtieracãhña. M̃h̃h̃ pacure m̃h̃h̃ quehnoano yeriro sahata bucuro g̃h̃h̃re quehnoano mehna yahuya. Sa yeg̃u m̃h̃h̃ bahanare m̃h̃h̃ quehnoano yeriro sahata wahma p̃jia g̃h̃h̃re quehnoano ño peoro mehna tiquinare yahuya. ² Sa yeg̃u m̃h̃h̃ pacore m̃h̃h̃ quehnoano yeriro sahata bucuna numia g̃h̃h̃re quehnoano ño peoye mehna yahuya. Sa yeg̃u m̃h̃h̃ bahana numiare m̃h̃h̃ quehnoano ño peoriro sahata nuhmia g̃h̃h̃re ñano ñe p̃jero marieno, quehnoano ño peoye mehna yahuya tiquinare.

³ Sa yeg̃u wape wiha numiare potota acaye marieñequina numiare ño peoye mehna yedohoya tiquinare. ⁴ Wape wihoro pohna t̃iricoro ijigã, o panamena t̃iricoro ticoro ijigã g̃h̃h̃re ticoro pohne, ticoro panamena g̃h̃h̃re yedohoahro ticorore. Sa yedohoye Cohãcjũ masare tiquina acayere tiquiro ye dutiyere yeye nine tiquina. Sa yeye tiquina ticorore wapamonore wapa yeye niaga. Tiquina sa yeg̃u ihñano Cohãcjũ quehnoano bucuere. ⁵ Pejecuricoro, wape wihoro acaye marienicoro ijiro, Cohãcjũ

ticorore tiquiro yedohoatire cohtere ticoro. Sa yero ñaminipe, decoripe ticoro Cohãcjũre sa siniducure. ⁶ Apecoro pehe wape wihoro ñañe mehna bucue duaricoro ijiro ticoro catiricoro ijieperota pecap̃u wahaticoro ijire.

⁷ Ahri ijipihtiyere ỹh̃h̃ yahurire Jesu yequina g̃h̃h̃re ye dutiya m̃h̃h̃, quehnoañe dihitare tiquina yeatire. Tiquina sa yeg̃u ihñañe apequina tiquinare “Ñano yeye nine”, ni masiedare. ⁸ Ihcãquiro tiquiro acayere ihña ihboeraro, tiquiro pohne tiquina pacoro g̃h̃h̃re quehnoano ihña ihboeraro “Jesu yaquiro ijiaja”, ni masiedare. Sa yero Jesure cahmeeñequina ỹhd̃h̃oro ña ỹhd̃h̃ariquiro ijire tiquiro.

⁹ Wape wiha numiare yedohonata m̃sa. Ohõ saha beseya m̃sa yedohoatiquina numiare. Tiquina wamene ojoa ohõati p̃p̃u ojoagu tag̃u ohõ saha beseya tiquina numiare: Sesenta c̃hm̃ari c̃uoricorore ticoro wamene ojoa ohõedacãhña. Sa yeg̃u wape wihoro ihcãquiroreta mañu timedicorore ticoro wamene ojoa ohõña. ¹⁰ Sa mañu timediquina numiare “Quehnoañene yeyequina numia ijire”, masa tiquina niñequina numiare, tiquina pohnene quehnoano masori numiare beseya. Sa yeg̃u tiquina ye w̃h̃h̃sepe apequinare quehnoano sajã ta dutiyequina numiare, cahacjẽna yero saha Jesu yequinare yedohoye numiare, tiquina dahpocãrine coseri numiare, ñano ỹhd̃h̃yequinare yedohoye numiare, quehnoañe dihitare yeye numiare beseya. Tiquina numiare m̃sa yedohoati numiare bese tuhasag̃p̃u, tiquina wamene ojoa ohõña m̃h̃h̃.

¹¹ Sa ye wape wiha numia nuhmia cjũno tiquina ijigã tiquina numia pehere beseracãhña. Sa yeg̃u ti p̃p̃u tiquina wamene ojoa

ohōedacāhña. Came tiquina yere tutuaro ye duaye, Cristore cohā, pari turi manū tiboaga. ¹² Tiquina Cristore “Māhū yequinare yedohonatja”, nidiquina numia ijiepetā camepūre tiquina nidiro sahata yedohoeraboaga tiquina. Tiquina sa yedohoerari buhiri buhiri tieta. ¹³ Tiquina numia ohō saha yere: Dahraeye numia ijipore. Sa ye apequina ye wāhūsepū waha, ñañe quitī dahre, sijoro saha mari yegū marine sa yahuducure. Sa ye tiquina yahu dutierarire yahu wājare tiquina numia.

¹⁴ Sa yegū tiquina numia ohō saha yegū cahmeaja yūhū: Wape wiha numia nuhmia cjūnogā ijiye numia manū tiahro. Sa ye Jesu yequinare “Ūsāre yedohoya”, nino marieno ijiahro tiquina numia. Sa ye tiquina pohna tiahro. Sa ye tiquina ye wāhūse cjēnare quehnoano ihña ihboahro. Mari ye numia wape wiha numia tiquina sa yegū marine ihña tuhtiyequina marine “Ñañene yeye nine”, ni tuhti masiedare. ¹⁵ Yojopū pūritare ihquē numia wape wiha numia Cristo yere duhu, watīno cahmeñe pehere ye tuhasare. Sa yegū sa ni yahuaja māhūre.

¹⁶ Jesu yequina tiquina acayoro wape wihoro ticoro ijigū tiquina ticoro acaye ticorore yedohoahro. Apequina Jesu yequina pehe ticorore yedohoeracāhdo. Sa ye Jesu yequina ticoro acaye cūoricorore yedohoeraye, apequina numia wape wiha numia acaye marieñe numia pehere yedoho masine.

¹⁷ Jesu yequina pūhtoā māsare tiquina quehnoano buhegū tiquina dahrayere tiquina quehnoano yegū ihñana ño peoya tiquinare. Sa yena quehnoano wapa yeya tiquinare. Ihquēquina tiquina mehna cjēna Cohācjū yere yahuyequina māsare buheyequina gūhū

ijire. Tiquina pūritare apequina yāhdūoro quehnoano ño peoya. ¹⁸ Cohācjū yere tiquina ojoari pūpū ohō saha nine, dahrariquirore tiquina wapa yeatire yahuro: “Wecū trigo pjerire tiquiro dahpocāri mehna suhti wegū tiquiro dūserore cahmotaeracāhña, Tiquiro cahmeno ihyaahro”, ni ojoahye. Sa yero ape pūpū ohō saha nine: “Dahrariquirore tiquiro dahrari wapare ohoro cahmene”, nine Cohācjū yere tiquina ojoari pūpū. Tiquiro sa nigū tāhona Jesu yequina pūhtoare quehnoano ño peoya māsā. Sa yena quehnoano wapa yeya tiquinare.

¹⁹ Jesu yequina pūhtorore tiquiro ñano yegū ihñano ihcāquiota yahusā masiedare. Pūhtorore ñañene yahusātiquina ihtiaro ijiye, tiquirore yahusā masine. Ihtiaro mariedagū pūaro yahusā masine. ²⁰ Sa yena ñañene yeducuriquirore ijipihtina māsā watoa tiquiro ijigū tiquirore tuhtiya, apequina cueatire, ñañene tiquina yeratire.

²¹ Sa yegū Cohācjū, Jesucristo, tiquiro beseriquina angele gūhū tiquina ihñonopū ahrire dutiaja māhūre: Yojopū māhūre yūhū dutirire ye pehoya. Sa yegū ijigū ijipihtiyequinare Jesu yequinare ihcāno saha yeya. Apequirore sijoro saha yeracāhña. ²² Apequinare Cohācjū dahrayere māhū cūatire tiquina bui māhū omocarine māhū duhu peoato pano sojaro marieno quehnoano tāho masiñe mehna tiquinare beseya. Tiquina ñañequina ijiboaga. Sa ijieyēquinare Cohācjū dahrayere cūedacāhña. Sa cūgū māhū gūhū māhū duhu peoyequina tiquina ñañene yero sahata yegū niboaga māhū. Sa yeracāhña. Sa yegū ñañe mariegū ijiya māhū.

²³ Usuro waro paa purĩnohgu ijire mahu. Sa yegu yojoꝑure aco dihitare sihnimene mahu. Sa yegu mehenogã vino gũhare sihniña mahu. Paa purĩne co ijire ti.

²⁴ Ihquẽquina tiquina ñañene yegũ mari ihñaja. Sa yena Cohãcjũ tiquinare tiquiro buhiri dahreatire masiaja mari. Apequina pehere tiquina ñañe yerire mari masiedaja. Tiquina ñañe yerire came masinata. ²⁵ Ti ijiro sahata ihquẽquina quehnoañene tiquina yegũ tire mari masiaja. Apeye tiquina quehnoañe yerire yojoꝑure masiedapenata cameꝑu masinata mari. Ti quehnoañene nuono basioerare.

6

¹ Cahacjẽna Jesu yequina pehe tiquina ꝑũhtoare quehnoano ño peoahro. Tiquina sa ño peogũ ihñañe apequina Cohãcjũre, mari buheye gũhare ñano yahuducu masiedare. ² Tiquina ꝑũhtoa Jesu yequina tiquina ijigũ ihñañe tiquina cahacjẽna pehe Jesu yequina ijiye, tiquinare ihñapoye ño peoeraboaga. Sa yeraro cahmene. Tiquina ꝑũhtoa Jesu yequina tiquina ijigũ ꝑũritare tiquina cahacjẽna quehnoano ño peoahro tiquinare. Sa ño peoye tiquina cahacjẽna pehe Jesu yequinare, tiquina cahĩnequinare yedohoye nine. Tiquina ꝑũhtoare Jesu yequinare yedohoye, Jesure cahmeeñequinare tiquina ño peoriro yũhdũoro Jesu yequina pehere ño peoahro tiquina cahĩnequina ijigũ. Ahri yũhu yahurire buheya. Sa yegu ahrire dutiya.

Cohãcjũre ño peoye gũhare quehnoano ijiye gũhare yahuahye Pablo

³ Sijoro saha ijiye buheyere buheriquiro mari ꝑũhtoro Jesu-cristo ye buheyere quehnoañe buheyere “Ijirota ijire”, ni tũho

duerare. Sa yero mari ye buheyere Cohãcjũre ño peoye buheyere cahmedare. ⁴ Sa yero tiquiro “Masi pehogũ ijiaja”, nieperota tire ne masiedare. Sa yero tũho masieniquiro yero saha tutuaro cahme dũse tutua duare tiquiro. Sa yero Cohãcjũ yere sa ni maca cãriquiru ijire. Masa tiquiro yero saha ijiyequina cahme dũse tutuaye, tiquina basi cahme ihña cooye, cahme ihña duerare. Sa ye apequinare ñano quiti dahreye, masiedapeta masare ñano ni tũhoture tiquina. ⁵ Sa ye tiquina ñañe dihitare tũhotuyequina, poto ijiyere ne masieñequina sa cahme dũse tutuaducure. Sa ye “Cohãcjũ yere buhena, niñerure wapatanata mari”, ni tũhoture tiquina.

⁶ Mari ye mehenogã mari cũoye mehna bucuenta, Cohãcjũre ño peona, potota quehnoano ijina niaja mari. ⁷ Ahri yehꝑapũre masa bajuana ne apee borore ne cãhtaeru mari. Sa yena mari yariari bato wahana, ne apee borore nea masiedaja mari. Sa yena masa yere masa cũoye mehna to punota bucueya. Pajiro cahme nemoedacãhña. ⁸ Sa yena mari ihyayere mari suhti gũhare cũona apeyere cahme nemoedacãhña. Masa cũoro punota bucueya masa. ⁹ Doeri cjẽ opana iji duayequinare watĩno ñañene tiquiro ye dutigũ tiquina pehe peye ñañene yeducuyequina ijiboaga. Sa ye tiquina peye tahari tũho masieñequina yero saha apee borore tutuaro cahmeñe, ñañe yeyere duhueraye, tiquina basita ñano yũhdũre. Sa duhueraye, ꝑecapũ wahaeta tiquina. ¹⁰ Niñerure tutuaro cahmeñe, peye ñañene ye dũcare masa. Ihquẽquina niñerure cahĩne, tutuaro cahmeñe, Jesure wacũ tutua duhuye, peye tahari ñano jeripohna tire tiquina.

Cohãcjũ yere yena ñañene duhuya

¹¹ M̄h̄u p̄rita Cohācj̄u yaquirola ijire. Sa yeḡu ahri ñañene yeracāh̄ña. Sa yeḡu quehnoañe pehere cahmeña. Cohācj̄u yere yeya. Sa yeḡu Jesure wacū tutuaya. Sa yeḡu apequinare cah̄ña. Ñano ȳhd̄uepeḡuta ihcāno sahaya. Sa yeḡu sa t̄hotu cāh̄ña. ¹² Uhm̄usep̄u sa ijiducuaçj̄ure Cohācj̄u beseri m̄h̄are. Sa yeḡu Cohācj̄ure m̄h̄u wacū tutuayere peyequina masare quehnoano yahuri m̄h̄u. Sa yeḡu ñano ȳhd̄uepeḡuta tiqiurore wacū tutua duhueracāh̄ña uhm̄usep̄u m̄h̄u sa ijiducuatire. ¹³ Cohācj̄u ijipihtiyequinare catiḡu yeriquiro ijire. Ijipihtiyere ijiḡu yeriquiro ijire. Sa yero Jesucristo pehe Poncio Pilatore Cohācj̄u yere quehnoano yahuriquirola ijire. Sa yeḡu Cohācj̄u, Jesucristo ḡh̄u tiquina ihñonop̄u ahrire m̄h̄are ye dutiitja: ¹⁴ M̄h̄are tiquirola dutirire ye peho cāh̄ña. Jesucristo tiquirola tojoa tato pano masa m̄h̄are ñañene tiquina “Yahus̄ari”, niḡu, tiquirola dutirireta yeducuya. ¹⁵ Tiquirola queoriro sahata Cohācj̄u Cristore tojoa taḡu yerota. Cohācj̄u quehnoariquirola, tiquirola dihita masare dutiriquirola ijire. Sa yero ijipihtiyequina apequina p̄h̄toa bui p̄h̄toro ijire tiquirola. ¹⁶ Sa yero tiquirola dihita ne yarieriquirola ijire. Tiquirola asi siteye mehna ijiriquirola ijire. Sa ye masa tiquirola asi siteye cahap̄u waha masiedare. Sa yeye tiqiurore masa ne ihñedari. Sa yeye yojop̄u ḡh̄ure tiqiurore ihñedare. Tiquirola pehere ño peouhna. Sa yena “Ijipihtiyede cori tutuariquirola ijire tiquirola”, niuhna tiqiurore. Sata niuhna.

¹⁷ Ahri yehpa çj̄ena doeri çj̄e opanare oh̄o saha ni dutiya m̄h̄u: “Apequinare masi ȳhd̄ud̄caja”, ni tiquina basi t̄hotueracāh̄do. Tiquina doeri çj̄e tiquina çoye pih̄tia waharota. Sa yeye tiquina çoye dihitaro bucuercāh̄do.

Cohācj̄u pehere bucuercāh̄do. Ijipihtiyede pototi mari cahmeñene ohoriquirola ijire tiquirola. Tiquirola pehere wacū tutuaro tiquina doeri çj̄e opana. ¹⁸ Sa yeye tiquina quehnoañe pehere yehro pajiro quehnoañene yeyequina tiquina ijiatire. Sa yeye tiquina çoyere apequinare ohohro. ¹⁹ Tiquina sa yeḡu uhm̄usep̄u Cohācj̄u cahap̄u tiquina ye ijirota. Top̄u tiquina ye ijiḡu ne butisi. Sa ye top̄u sa ijiducueti tiquina.

Pablo Timoteore duti bato tiahye

²⁰ Timoteo, m̄h̄are Cohācj̄u tiquirola çyire tiquirola buhe dutirire quehnoano yeya. Boercāh̄ña m̄h̄u. Ihquēquina masa Cohācj̄ure cahmeeñequina yero saha ni mehoñe, t̄ho masieñequina ye buheyere yahuducuducure. Sa yahuducuye “Quehnoano masieñequina ye buhede ijire”, niuhna tiquina. Sa tiquina ni buheyere t̄ho n̄n̄uedacāh̄ña. ²¹ Ihquēquina ti buheyere t̄ho n̄n̄ñequina Cristo yere cohā çahre. Cohācj̄u tiquirola cah̄ñe mehna m̄h̄are tutuaro quehnoa dutiaja.

2 Timoteo

Pablo Timoteore pari turi oja ohoahye

¹ Yũhũ Pablo, ahrire mũhũre Timoteore oja ohoaja. “Ijip-ihitiyequina Jesucristore wacũ tutuayequina umũsepu sa ijiducuetã”, ni, cũri marine Cohãcjũ. Tiquiro sa ni cũrire yahuacjũre yũhũre bese cũri Jesu. Sa cũno Cohãcjũ tiquiro cahmeno sahata yero nidi yũhũre. ² Mũhũ Timoteo yũhũ cahĩgu ijire. Mũhũre Jesu yere yũhũ buhegũ tuhogu tiquirore quehnoano wacũ tutua dũcari mũhũ. Sa yegu yũhũ macũ yero saha ijire mũhũ. Sa yegu Cohãcjũ mari Pacũ, mari pũtoro Jesucristo mehna mũhũre quehnoa dutiaja. Sa yeye mũhũre paja ihña, tiquina yedohoye mehna quehnoano ijiya mũhũ.

Masare Cristo yere tiquina yahurire yahuahye Pablo

³ Namipũ, decopũ gũhũre Cohãcjũ mehna yahuducugu mũhũ ye ijiatire sini basagu mũhũ mehna bucueaja. Sa bucuegu Cohãcjũre “Quehnoare”, niaja yũhũ. Panopũ cjẽna yũhũ acaye ñaũe buhiri marieno Cohãcjũ yere tiquina yeriro sahata yũhũ gũhũ yojopũre tiquiro yere yeaja. ⁴ Sohõ ijiri pjere yũhũ wahagũ mũhũ uti nũnũ tãe tirire wacũgu mũhũre tutuaro ihña duaja, mũhũ mehna quehnoano bucue duagu. ⁵ Sa yegu Jesure potota mũhũ wacũ tutuarire wacũaja yũhũ. Mũhũ ñeco, Loida, mũhũ paco Eunice gũhũ mũhũ yero sahata Jesure wacũ tutua mũhtari mũhũ pano. Sa yegu yojopũre mũhũ gũhũ tiquirore mũhũ wacũ tutuagũ quehnoano masiaja yũhũ.

⁶ Sa yegu ahrire mũhũre wacũgũ ye duaja. Mũhũ bui yũhũ omo-carine yũhũ duhu peogũ Cohãcjũ

yere mũhũ yeatire tutuayere ohori mũhũre. Ti tutuaye mehna ye nemoña mũhũ. ⁷ Cohãcjũ marine tiquiro yaquiro Espiritu Santore ohori. Sa yero masare marine cueragũ yere Espiritu Santo. Sa yero tutuana, masare cahĩna, tuhũ masina marine ijigũ yere tiquiro. ⁸ Sa yegu mari pũtoro ye ijiatire apequinare yahugu, bũe tier-acãhña mũhũ. Yũhũ tiquiro yere yũhũ yeri buhiri peresupu ijigũ niaja. Peresupu yũhũ ijigũ yũhũre bũe tisãedacãhña mũhũ. Sa yegu quehnoañe buheyerẽ mũhũ buheri buhiri ñano yũhdugũ “Quehnoanota”, niña mũhũ gũhũ. Mũhũ sa ñano yũhdugũ Cohãcjũ mũhũre yedohorota. ⁹ Cohãcjũ pehe marine pecapũ wahaborinare yũhdũori. Sa yero quehnoana, tiquiro yequina ijianare tiquiro beseahye marine. Mari quehnoano yeye mehna tiquirore marine besegũ yerũ. Tiquiro esa tuharo tiquiro cahmediro sahata yero ahri yehpare tiquiro bajumehneato pano marine cahĩno, tiquiro marine beseahye. Marine sa cahĩno marine yũhdũoatiquirore Jesucristore ohoahye Cohãcjũ. ¹⁰ Yojopũre Jesucristore marine yũhdũoatiquirore ohoro, marine potota tiquiro cahĩñene masigũ yero niahye Cohãcjũ. Jesu marine tiquiro yequinare pecapũ wahaeragũ yeri. Sa yero “Yũhũre wacũ tutuana Cohãcjũ mehna sa ijiducunata”, nino, quehnoañe buheyerẽ marine yahuro ahtahye tiquiro.

¹¹ Ti buheyere quehnoañe buheyere yahuacjũre tiquiro cũacjũre beseri yũhũre. ¹² Sa tiquiro beserigu ijigũ yojopũre ñano yũhdũaja yũhũ. Ohõ saha ñano yũhdũepeguta yũhũ bũe tieraja. Yũhũ wacũ tutuariquirore Jesure masiaja yũhũ. Tutuariquiro ijire tiquiro. Sa yero yũhũre tiquiro

yere buhe duti cūno quehnoano yedohorota. Sa yero ahri yehpapu tiqiuro tojoa tato pano, “Muhure yuhduogutja”, tiqiuro nidiro sahata sohtori tirota yuhure. Yuhure yuhduorota tiqiuro. Tire quehnoano masiaja.

¹³ Muhure quehnoano yuhu yahurire ye pehoya. Cristo Jesu yequina ijina tiqiurore quehnoano wacū tutuaja mari. Sa yena apequinare quehnoano cahñaja. Sa yegu tiqiurore sa wacū tutuaducuya muhu. Apequinare quehnoano cahīducuya. ¹⁴ Sa yegu Espiritu Santo mari mehna ijiriquiro tiqiuro yedohoro mehna quehnoañe buheyere quehnoano yeya. Queoro buheya.

¹⁵ Ijipihtiequina Asia yehpa cjēna Jesu yequina yuhure yedoho dueraye, cohā cāa wahari. Tiquina mehna cjēna puaro Figelo, Hermógene sata yeri tiquina gūhu. Tiquina sa cohā cārire masi tuhasare muhu. ¹⁶⁻¹⁷ Tiquina sa cohāpegūta Onesíforo pehe peye tahari yuhure yedohoro quehnoano jeri saǰāgū yeri. Sa yero yuhu peresupu ijigū tiqiuro yuhure buē tisāedari. Sa yero yuhu Romapu ijigū sa macaducuri jiri yuhure. Sa macaducuro yuhure bocari. Sa yero tiqiuro pohnene, tiquina pacoro gūhure paja ihñanota Jesu mari puhtoro. Tiquirore sa paja ihña dutigu tiqiurore sini basaja. ¹⁸ Sa yero ahri yehpapu Jesu mari puhtoro tiqiuro tojoa tati deco tiqiurore paja ihñanota. Tiquirore sa paja ihña dutigu tiqiurore sini basaja. Efesopu marine Onesíforo tiqiuro yedohore quehnoano masine muhu.

2

Ñano yuhduepenata Jesu yequina ijina ihcāno saharo cahmene marine

¹ Muhu pehe yuhu macu yero saha ijigu, Jesucristo yedohoro

mehna tiqiurore wacū tutuaducuya. ² Sa yegu peyequina masare yuhu buherire muhu tahore apequna gūhure buheya muhu. Tiquina muhu buheyequina Cohācjū yere yeducuequina ijiahro. Sa ye apequinare buhe masiñequina ijiahro.

³ Surara ñano yuhduerota tiqiuro ihcāno saharo saha muhu gūhu Jesu yaquiuro ijigu ñano yuhdugu, ihcāno sahaya muhu. Sa yegu apequna Jesu yequina yero saha yegu nine muhu. ⁴ Surara tiqiuro puhtoro dutiye pehere yere. Sa yero tiqiuro surara ijieyequina yero saha ihyo ijieyere yerare tiqiuro. Muhu gūhu sata Cohācjū dutiye dihitare yeya. ⁵ Omariquiuro oma dutiequina tiquina dutiyere queoro yeraro, tiqiuro oma yuhduacari wapare ne masiedare. (Sa yegu omariquiuro ti dutiyere queoro tiqiuro yeriro saha Cohācjū dutiyere quehnoano ye pehoya muhu.) ⁶ Sa yero wese dahrariquiuro quehnoano dahrariquiuro pehe apequna pano quehnoano wapatare. (Sa yegu muhu gūhu tiqiuro yero saha quehnoano dahraya muhu.) ⁷ Ijipihtiyere quehnoano masigū yerota Jesu mari puhtoro muhure. Sa yegu yojopure muhure yuhu nidire quehnoano wacū tahotuya.

⁸ Sa yegu Jesucristore wacūña. Tiquiro puhtoro Davi manano panopu cjāno tiqiuro panamino iji turiariquiuro ijiahye. Sa yero yariaro masa mujahye tiqiuro. Quehnoañe buheyere buhegu tiqiuro sa waharireta buhegu niaga. ⁹ Tiquiro yere buhegu ñano yuhduaja yuhu. Sa yegu tire yuhu buheri buhiri ñañene yeriquiro yero saha peresupu ijiaja yuhu. Yuhu sa ijiepegūta Cohācjū ye yahuducuyere buhe duhugū ye masiedare masa yuhure. ¹⁰ Sa yegu Cohācjū be-

seriquinare buhegu peye tahari ñano yahduaja yahu, tiquina gūhu Jesucristo yequina tiquina ijiatire. Tiquiro yequina ijiye tiquina pecaru wahaboriquina pehe tiquiro yahduoatiquina ijieta. Sa ye tiquina Cohācjū mehna sa ijiducueta.

11 Ahri yahu niati ijirota ijire. Cristo yere mari yeri buhiri apequina marine tiquina wejēgū tiquiro mehna ahmasepu sa ijiducunata.

12 Sa yena tiquiro yere mari yeri buhiri ñano yahduepenata ihcāno sahana tiquiro puhtoro ijiroru tiquiro mehna puhtoata ijinata mari gūhu.

13 “Cristore usā masiedaja”, mari nigū, tiquiro gūhu marine sata ninota. Tiquirore mari yahduducagū ihñano tiquiro nidiro sahata marine buhiri dahrerota. Tiquiro nidiro sahata yeriquiro ijire tiquiro. Ne ni mehoedare. Ahri ijipihtye tiquiro yahuri ijirota ijire.

Cohācjū tiquiro ihña coayequinare, tiquiro yere buheyequinare yahuahye Pablo Timoteore

14 Ahri yahu yojoru yahuatire mahū mehna cjenare wacūgū yeya. Tiquina esa tuharo ihyo ijiyere tiquina yahuducuye dahseati ijierare. Sa yeye tiquinare tuhoriquinare ñano yegū yere. Sa yegu mari puhtoro ihñonoru ohō saha ni yahuya tiquina esa tuharo buheriquinare. “Musa yahuducuro saha yahuducueracāhña”, niña tiquinare.

15 Mahū pehe Cohācjū yere quehnoano buheya. Sa yegu Cohācjū yere tutuaro yeya. Mahū sa yegū ihñano “Quehnoano yeri mahū”, ninota Cohācjū mahūre. Sa yegu mahū buherire tiquiro ihñagū bue tisi mahū. Sa yegu tiquiro

ye buheyere quehnoano masiña. Sa yegu tire queoro buheya.

16 Tiquina esa tuharo yahuducuyequina ñañene sa yeducure. Sa yegu tiquina sa ni yahuducuyere tuho yabiya mahū.

17 Tiquina pehe tiquina yahuducuye camino ahba mujano yero saha ijire. Camino ahba mujano saha tiquina yahuducuye gūhu apequina Jesu yequinare ñañequina wahagū yeeta. Sa yahuducuyequina mehna cjenā Himeneo, Fileto gūhu ijire.

18 Sa yeye tiquina “Jesu yequina masa mūja tuhasari”, ni buheye, quehnoañe buheyere duhu cāri tiquina. Sa sijoro saha buheye, meheñequinagā Jesu yequinare tiquirore wacū tutua duhugū yeri tiquina.

19 Tiquina sa ñano buhepegāta Cohācjū ye buheye pehe ne comesaerare. Ohō saha nine tiquiro ye buheye: “Mari puhtoro Jesu tiquiro yequinare masine. Sa ye, ijipihtyequina ‘Jesu yequina ijijaja’, niñequina ñañene duhu cāhdo”, ni yahure Cohācjū ye buheye.

20 Mari queoye mehna buhegū masa sihniñe pari yero saha ijire. Pajiri wahuuru, plata mehna tiquina yeri pari ijire. Sa yero ti wahuuru apeye pari yucūgū mehna, dihi mehna tiquina yeri pari ijire. Uru, plata mehna tiquina yeri pari quehnoañene tiquina pose yeati ijire. Apeye pari ihyo ijiyere tiquina pose yeati ijire. 21 Sa yero ñañene yerariquiro uru pa quehnoari pa yero saha ijirota. Sa yero tiquiro pehe Jesu ye dihitare yeducuriquiro ijirota. Sa yero wahu cjenā quehnoari pa mehna quehnoañene tiquiro yeriro saha, ñañene yerariquiro Jesu ye ijiatire quehnoañene yerota.

22 Wahmū ijire mahū. Sa yegu wahma pjia ñañene tiquina tutuaro ye duaro sahata yeracāhña mahū. Sa yegu quehnoañene

yeya. Jesure wacū tutuaducuya. Sa yegū tiquirore, masa gāhure cahīña. Sa yegū mūhū mehna cjēna Jesu yequina mehna ijigū cahmequeno marieno quehnoano ijiya mūhū. Sa yeya mūhū Cohācjāre yūhtiyequina tiquirore siniducuyequina mehna ijigū. ²³ Sa yegū tūhoturo marieno tiquina cahme yahuducuyere mūhū gūhū tūho nūnūedacāhīña. Sa yegū mūhū gūhū sa cahme yahuducueracāhīña. Sa ni yahuducuye masa tiquina basi cahme tuhti, usuare. ²⁴ Cohācjū cahacjāno ihcāquiro ijiro, cahme tuhtieraro cahmene tiquirore. Sa yero ijipihtiyequinare quehnoano yeriquiro, buhe mihnidiquiro, duita usueriquiro ijiro cahmene tiquirore. ²⁵ Sa yero apequina tiquiro mehna tiquina cahme tuhtigū tiquiro tiquinare yahuro, quehnoano mehna usuaro marieno yahuro cahmene tiquirore. Tiquiro sa yahugū ihñāñe Cohācjū yedohoye mehna tiquina pehe tiquina ñañe yerire bujūa witiboaga. Sa ye quehnoañe buheyere masi dūcaboaga. ²⁶ Tiquinare watīno cūomedi tiquiro cahmeñene yeatiquinare. Sa ye tiquina ñañe yerire bujūa witiri bato quehnoañe buheyere masiñe, watīnore cohā cāeta.

3

Pihtiati deco ijiatire yahuahye Pablo Timoteore

¹ Pihtiati deco panogāre ñano yūhdūeta masa. Tīre quehnoano masiña mūhū. ² Tī pjere masa apequinare wacū peoyequina, niñerure cahme yūhdūdcayequina, “Apequinare masi yūhdūdcāja”, ni tiquina basi tūhotuyequina, masare ñano tuhtiyequina, tiquina pacūsmūare yūhdūdcayequina, tiquina ohoepēgūta “Quehnoare”,

nieñequina, Cohācjāre ño peoyequina ijieta. ³⁻⁴ Sa ye masare cahīñequina, paja ihñēñequina, ñañe quiti dahreyequina, tiquina esa tuharo ñano yeducuyequina, masare sa quēducuyequina, quehnoañene yabiyequina, tiquina mehna cjēnare ñano yeyequina, tūho masieñequina, “Masi pehoaja”, ni tūhotuyequina ijieta masa. Sa ye ñañene cahme yūhdūdcayequina ijiye, Cohācjū pehere cahmeeñequina ijieta. ⁵ Sa ye tiquina masa ihñonopū Cohācjāre ño peopeta “Cohācjū ihyo ijiriquiro ijire”, ni tūhotumene tiquina.

Sa niñequinare piti tieracāhīña mūhū. ⁶ Tiquina mehna cjēna tūho masieñequina numia ye wūhūsepū sajā, tiquina numiare ni mehoñene buhere. Tiquina numia pehe sa ñañene yeducuyequina numia, tutuaro ñañene ye duare. ⁷ Tiquina numia sa buheducuye ihyo ijiye buheyere, sijoro saha ijiye buheyere tūhoje numia ijiye, Cohācjū ye buheyere pehere ne masiedare. ⁸ Panopū Jane, Jambre yayia mūna Moiserē tiquina ihñā tuhtiriro sahata pihtiati deco panogā ijiyequina masa quehnoañe buheye pehere ihñā tuhtieta. Tiquina ñañe dihitare tūhotuyequina ijieta. Sa ye Jesure wacū tutuayequina waro ijierare. ⁹ Sa yeyequina tiquina ni mehoñene tūho duasi apequina pehe. Came tiquina ni mehoñene, tūho masieñequina tiquina ijiye gāhure ijipihtiyequina masieta. Jane, Jambre mehna tiquina ni mehoñene panopū masa tiquina masidiro sahata sata masieta pihtiati deco panogā ni mehoñequina tiquina ijiyere.

Pablo Timoteore duti bato tiahye

¹⁰ Yūhū buheyere, yūhū yee tirire, yūhū ijiye tiyere, yūhū ye duayere, Jesure yūhū wacū tutuayere

masine m̄h̄u. Sa yeḡu usuaro marieno ȳh̄u yerire, masare ȳh̄u cahĩñene, ñano ȳhd̄uepegata ȳh̄u ihc̄ano sahare masine m̄h̄u. ¹¹ Sa yeḡu ȳh̄ure tiquina ñano yerire, ȳh̄u ñano ȳhd̄urire masine m̄h̄u. Sa yeḡu Antioquiap̄u, Iconiop̄u, Listrap̄u, ȳh̄ure ña ȳhd̄uaro tiquina yerire masine m̄h̄u. Ȳh̄u sa wahaḡu ihñano mari puhtoro Jesu pehe ȳh̄ure yedohori. ¹² Ijipihtiyequina Jesucristo yequina tiquina iji duaḡu Cohãcj̄u dutiriro sahata tiquina yeducu duaḡu apequina tiquinare ñano yeeta. Ti ijirota ijire. ¹³ Sa ye ñañequina pehe ni mehoñequina ḡh̄u ña ȳhd̄uayequina wahaeta. Apequinare ni mehoñe, tiquina basi ni mehoñene “Sa tjire”, niñe, ña ȳhd̄uayequina wahaeta.

¹⁴ M̄h̄u pehe m̄h̄ure ȳh̄u buherire, quehnoano m̄h̄u tuhore sa wac̄uducuya. Sa yeḡu ȳh̄u buheriro sahata yeya. M̄h̄ure buheriquinare masine m̄h̄u. ¹⁵ M̄h̄u nijiḡu ijigap̄ata Cohãcj̄u yere tiquina ojoari p̄ure masi d̄cahye m̄h̄u. Tiquiro yere tiquina ojoari p̄up̄u oh̄o saha ni yahure m̄h̄ure: Jesucristore wac̄u tutuayequina dihitare pecap̄u waboriquinare ȳhd̄ore Cohãcj̄u. ¹⁶ Cohãcj̄u yere tiquina ojoari p̄up̄u ijipihtiyere Cohãcj̄u pehe ojoa dutiahye. Sa yena ti p̄ure buhena mari masi nemoaja. Ti p̄ure buhena Cohãcj̄u dutiyere mari yeatire masiaja. Sa buhena mari ñañe yerire “Ahri ñañe ijire”, ni tuhotaaja mari. Sa yero ti p̄u marine quehnoañe pehere camesa dutire. Sa yero decoripe quehnoañene mari yeducuatire yahure ti p̄u. ¹⁷ Sa yero Cohãcj̄u yaquiro tiquiro ya p̄ure buhero, masi pehorota. Sa masino ijipihtiyere quehnoañene ye masinota tiquiro.

4

¹ Jesucristo ijipihtiyequina puhtoro, tojoa tatiquiro, catiyequinare, yariariquina ḡh̄ure buhiri dahre dutiatiquiro tiquiro ihñonop̄u m̄h̄ure oh̄o saha ni yahutja. Cohãcj̄u ihñonop̄u ḡh̄ure oh̄o saha ni yahutja m̄h̄ure: ² Decoripe masa tiquina tuho duaḡu tiquina tuho dueraḡu ḡh̄ure Cohãcj̄u yere yahuya. Sa yahuḡu masa tiquina ñañe yerire masiḡu yeya tiquinare. Sa yeḡu tiquina ñañe yerire “Ye nemoedacãhña”, ni yahuya tiquinare. Quehnoañe pehere ye dutiya. Sa buheḡu ne usueḡu, caributieracãhña m̄h̄u. Sa yeḡu ne apequinare buhe duhueracãhña. ³⁻⁴ Caper̄u masa quehnoañe buheyere tuho duasi. Sa tuho dueraye, tiquina cahmeno sahata yeye, tiquina tuho coaye dihitare buheyequinare cahmeeta tiquina. Sa ye ni mehoñe buheyere peyequina buheyequinare c̄ueta. Tiquina sa yeye quehnoañe buheye pehere cohã, tiquina sa buhe maca cãire tuho n̄n̄eta. Sa yeḡu quehnoañe buheyere buhe duhueracãhña m̄h̄u. ⁵ M̄h̄u ḡh̄u sa ijiḡu decoripe tuho masiḡu ijiya. Sa yeḡu ñano ȳhd̄uepegata ihc̄ano sahaya. Sa yeḡu quehnoañe buheyere sa buheducuya. Cohãcj̄u m̄h̄ure tiquiro ye dutirire ye peho cãhña m̄h̄u. ⁶ Ȳh̄u Cohãcj̄u yere ȳh̄u yeri buhiri ȳh̄u yariato mehenogã d̄hsare. Sa yeḡu meheñe decorigã catiniitja. ⁷ Ȳh̄u yariato panogã ahrire yahutja: Jesu quehnoañe buheyere ȳh̄ure buhe dutiro tiquiro c̄urire quehnoano buhe sohtori tii. Tiquiro ye dutiyere quehnoano ye pehou. Sa yeḡu ñano ȳhd̄uepegata tiquirore ne wac̄u tutua duhueru. ⁸ Yojoap̄ure quehnoañene ȳh̄u yeri wapare uhm̄sep̄u ihboro niaga. Sa yero mari puhtoro, ijipihtiyequinare masi pehoriquiro, buhiri dahre

dutiro queoro yahuriquiro tiquiro tojoa tati deco tiquiro yere yuhũ yeri wapare ohorota yuhũre. Apequina gũhũre tiquiro tojoa tatire cohteyequinare tiquirore cahĩnequinare tiquiro yere tiquina yeri wapare ohorota Jesu.

Pablo yahu nemoahye Timoteore

⁹ Yuhũ caharũ umũñano ihñagu ahtaya mũhũ. ¹⁰ Dema ahri yehpa cjẽ ijipihtiyere tutuaro cahmeno yuhũre yedoho dueraro cohã cãa wahari Tesalónicarũ. Crescente gũhũ Galacia yehparũ wahari. Sa yero Tito gũhũ Dalmaciapũ wahari. ¹¹ Luca dihita yuhũ mehna ijire. Marco yuhũre quehnoano yedo-hoatiquiro ijire. Sa yegu tiquirore ne cãhtaya mũhũ. ¹² Sa yegu Tíquicore Efesopũ ohou. ¹³ Ohõpũ ahtagũ, yuhũ bui sañari suhtirore, Troapũ Carpo ya wuhũpũ yuhũ cũri suhtirore ne cãhtaya. Sa ye sohõ ijiri tunuri ojoari tunuri gũhũre ne cãhtaya. Sohõ ijiri cahseri ojoari cahseri pũritare tutuaro cahmeaja yuhũ. Sa yegu ti cahseri gũhũre ne cãhtaya.

¹⁴ Alejandro comene dahrariquiro yuhũre ña yuhũaro yeri. Sa yero tiquiro sa yeri buhiri Cohãcjũ buhiri dahrerota. ¹⁵ Tiquiro Alejandro mari ye buheyere tutuaro ihña tuhtiri. Sa yegu tiquiro masare “Ñano yeari” nigu, tiquirore ihñagu, quehnoano wacũ masiña.

¹⁶ Masare beseriquirore perezupũ ye dutiriquirore yuhũ yerire, yuhũ buherire tiquirore yuhũ coã yahugũ ne ihcãquiro boro Jesu yaquiro yuhũre yedoho-erari. Ijipihtiyequina yuhũre yedohoeraye, cohã cãa wahari. Tiquina sa cohãepegũta yuhũre tiquina cohãri buhiri Cohãcjũ buhiri dahreracãhdo. ¹⁷ Yuhũ sa wahaepegũta Cohãcjũ yuhũre yedohori. Sa yero tiquiro ye buheyere

yuhũ quehnoano yahuatire tiquiro ye tutuayere ohori yuhũre, ijipihtiyequina judio masa ijieyequina ti buheyere tiquina tũhoatire. Sa yero yuhũre tiquina ñano tiquina ye duepegũta yuhũre tiquina ñano yeborigare yedohori mari pũhtoro. ¹⁸ Ijipihtiyequina yuhũre ñano yeyequinare yuhũdũdũcaro, yuhũre yedohorota mari pũhtoro. Sa yero umũsepu tiquiro pũhtoro ijirorpũ yuhũre iji dutiro, yuhũre yuhũdũhorota tiquiro. Sa yena “Tiquiro quehnoa yuhũdũariquiro, tutua yuhũdũariquiro ijire”, niihna mari ijipihtiyede decori. Sata niihna.

Pablo quehnoa dutiahye Timoteo caharũ ijieyequinare

¹⁹ Prisca, Aquila, Onesíforo ya wuhũ cjẽna gũhũ quehnoahdo. ²⁰ Erasto Corintopũ tojoari. Trófimo Miletopũ dohatia wahari. Sa yegu tiquirore topũ cũu yuhũ. ²¹ Pohero pano umũñano ahtaya mũhũ. Eubulo, Pudente, Lino, Claudia gũhũ, ijipihtiyequina Jesu yequina mũhũre quehnoa dutire.

²² Mari pũhtoro Jesucristo mũhũ mehna ijirota. Sa yegu masare ijipihtinare Cohãcjũ mehna pajiro quehnoa dutiaja.

Tito

Pablo Titore ojoa ohoahye

¹ Yũhũ Pablo Cohãcjũ cahacjũ, Jesucristo yere tiqũiro buhe duti cũrigũ ijiaja. Cohãcjũ beseriquina Jesure tiqũina wacũ tuatire quehnoañe buheyere tiqũina masiatire Jesu buhe dutiro yahũre cũri. Ti buheye Cohãcjũ dutiro saha mari yeatire yahure. ² Sa yegũ ijipihtiye decori Cohãcjũ yequina uhmũsepũ tiqũina ijiducuatigũhũre buheaja tiquinare. Cohãcjũ ne ni mehoñe marieniquiro ahri yehpare tiqũiro bajumehneato pano ohõ saha ni cũahye marine: “Uhmũsepũ sa ijiducunata mũsa”, ni cũahye marine. ³ Sa yero tiqũiro queori pje Cohãcjũ tiqũiro ni cũrire yahu dutiri masare. Sata yahũre ni yahu dutiri tiqũiro. Marine pecapũ wahaborinare yũhdũoriquiro ijire. ⁴ Mũhũre Titore Jesu yere buhei. Yũhũ sa buhegũ tũhogũ Jesure wacũ tutua dũcari mũhũ. Sa yegũ mũhũ potota yũhũ macũ yero saha ijigũta nine. Mũhũre ahrire ojoagũ njaja. Sa yegũ Cohãcjũ mari Pacũ mehna, Jesucristo marine yũhdũoriquiro mehna mũhũre quehnoa dutiaja. Sa ye paja ihñañe, mũhũre tiqũina yedohoye mehna quehnoano ijiya mũhũ.

Creta wame tiri nũcũopũ Tito tiqũiro yeatire yahuahye Pablo

⁵ Creta wame tiri nũcũopũ mũhũre yũhũ cũgũ Jesu yequina tiqũina buheati dũhsarĩdi ti pjere. Sa yegũ tiqũina yeatire yahuyuacjũre cũgũ nii yũhũ mũhũre. Sa yegũ macaripe cjẽna Jesu yequina pũthoa ijiatiquinare bese dutigũ cũgũ nii mũhũre. ⁶⁻⁸ Tiquina pũthoa Cohãcjũ cahacjẽna ijire. Sa yegũ tiquinare besegũ quehnoañequinare beseya sijoro saha yeeyequinare.

Sa yegũ ihquẽquina numi-areta namo tiyequinare, “Apequinare masi yũhdũdũcaja”, ni tũhotueyequinare, usueyequinare, queheye marieñequinare, cahmequeñe marieñequinare, apequina yere ni meho ehmeñequinare beseya. Sa besegũ tiqũina wũhũsepũ sajã sayequinare quehnoano ihña ihboyequinare, quehnoañe pehere quehnoano bucueyequinare, tũho masiñequinare, quehnoañene yeducueyequinare, ñañe marieñequinare, ñañene yeeyequinare, niji siaro marieno dahrayequinare, quehnoañene yeducueyequinare beseya. Sa ye mũhũ beseatiquina pohne ohõ saha ijiyequina ijiro cahmene: Jesure wacũ tutuayequina, quehnoano yeducueyiquina, ijipihtiyequinare quehnoano yũhtiyequina ijiro cahmene pũthoa pohne. ⁹⁻¹⁰ Sa ye quehnoañe buheyere queoro mari buheducuriro sahata ne duhueyequina ijiahro pũthoa mũhũ beseatiquina. Sa ye tiqũina quehnoañe buheyere yahuyequina ijieta. Sa ye quehnoañe buheyere ihña tuhtiyequinare buheye, tiqũina ye ni mehoñe ijigũ masigũ yeeta tiqũina. Sa yegũ quehnoano beseya Jesu yequina pũthoa ijiatiquinare.

Peyequina tiqũina pũthoare yũhdũdũcayequina, quehnoano tũhotu yahuducueyequina, ni mehoñequina ijire yojopãre. Sa yeeyequina judio masa pũrita ña yũhdũaro yeye nine. Tiquina ye buheye poto ijieragũ tiquinare masigũ yero cahmene. ¹¹ Tiquina judio masa pehe niñerure wapata dua, buhere. Sa yeraro cahmene. Sa buheye ihquẽ wũhũse cjẽnare ijipihtiyequinare Cohãcjũ ye pehere cohãgũ yeye niaga tiquinare. Tiquina sa yegũ tiquinare sa ye dutieraro cahmene.

¹² Tiquina yere panopũ

yahuriquiro ti нучоо сјѣно ijieper-ota ohō saha ni yahuahye: “Creta нучоо сјѣна sa ni mehoducuyequina ijire. Ti нучоо сјѣна wahiquina yero saha usuayequina ijire. Sa ye sa ihyaducuyequina ijieye ne dahra duerare”, niahye tiquiro, tiquiro ya нучоо сјѣнare. ¹³ Tiquiro sa niñe ijirota ijire. Tiquina sa ijigū ihñagū tiquinare tutuaro tuhtiya Jesu ye buheye pehere quehnoano tiquina masiatire. ¹⁴ Sa yegū judio masa panopū сјѣна tiquina esa tuhara tiquina ni maca cārire, Jesu yere cahmeeñequina tiquina dutiye gūhare Creta сјѣна tiquina tūho nūnūdatire tuhtiya tiquinare.

¹⁵ Buhiri marieñequina quehnoañe dihitare tūhoture. Ñañene yeducuyequina, Jesure wacū tutueyequina pehe ñañe dihitare tūhoture. Tiquina tūhotuyepāre ña yūhdūare. Sa ye quehnoañe pehere bese masiedare. ¹⁶ Tiquina “Cohācjāre masiaja usā”, niepeta, ñañene yere. Sa yeyequina tiquina ijigū ihñana Cohācjāre masieñequina tiquina ijigū masiaja mari. Sa ye tiquina ña yūhdūayequina, Cohācjū yere yūhdūdcayequina ijire. Sa ye tiquina quehnoañene ye masiedare.

2

Quehnoañe buheyere queoro yahu dutiahye Pablo Titore

¹ Mūhū pehe buhegū, quehnoañe buheye ti nidiro sahata quehnoano buheya. ² Būcūnare ohō saha ni yahuya: Cua pesayequina, masa ño peonohñequina, tūho masieñequina, Jesure quehnoano wacū tutuayequina, quehnoañe buheyere quehnoano yeyequina, Jesure masa gūhare cahñequina, ñano yūhdūepeta ihcāno sahayequina ijiahro tiquina. ³ Būcūna numia gūhare sata ni

yahuya: Cua pesaye numia, ñañe quiti dahreraye numia, queheraye numia ijiahro tiquina numia gūhū. Sa yeye numia ijieye, quehnoañene buheahro apequina numiare. ⁴ Apequina numiare ohō saha ni buheahro būcūna numia: Tiquina manūsumāare, tiquina pohne gūhare cahñahdo. ⁵ Sa yeye tiquina tūho masieñe numia, apequina mūhū mehna ñano yeraye numia, ihcā wūhū сјѣна ijieyequinare quehnoano ihñā ihboye numia, masa quehnoañe numia, tiquina manūsumāare quehnoano yūhtiye numia ijiahro tiquina, Cohācjū ye buheyere apequina “Ñano yahu wajari”, niñe.

⁶ Sa yegū wahma pija gūhare ohō saha ni yahuya: Tūho masieñequina ijiahro tiquina. ⁷ Sa yegū mūhū pehe quehnoañe dihitare yeducuya mūhare tiquina ihñā cūatire. Buhegū ne ni mehono marieno buheya. Sa buhegū cua pesaro mehna buheya mūhū. ⁸ Sa buhegū tūho masieñe mehna quehnoano buheya apequina mūhare “Yahu wajari”, nigū. Mūhū sa buhegū ihñañe marine ihñā tuhtiequina ijiepeta marine ihyo warota yahu waja masiedare. Marine sa yahu waja maca cāñe, būoro wahaeta tiquina.

⁹ Sa yegū cahacjēnare ohō saha ni yahuya: Tiquina pūhtoare quehnoano yūhtiahro. Sa yeye tiquina pūhtoare quehnoano bucuegū yeahro. Sa dihita yeahro. Sa ye tiquina pūhtoare purīno yūhtieracāhdo. ¹⁰ Sa ye tiquina pūhtoa yere yaqueracāhdo. Sa ye quehnoañequina ijiahro. Tiquina pūhtoa dutiyere queoro yeducuahro. Tiquina sa quehnoano yūhtiequina ijigū ihñañe, Cohācjū marine yūhdūoriquiro ye buheyere tūho bucueeta apequina.

¹¹ Masare tiquiro cahñene

Cohãcjũ ihño tuhasari. Sa cahño ijipihtiyequina pecapũ waha-boriquinare Cohãcjũ tutuaro yũhdũo duare. ¹²⁻¹³ Masare sa cahño Cohãcjũ marine ohõ saha ni buhere: Cohãcjũre ihña tuhtiyere, ñañe tutuaro cahmeñene duhu cã dutire marine. Cohãcjũ tutuariquiro, Jesucristo marine yũhdũoriquiro tiquiro asi siteyere mari ihñati decore, quehnoari decore mari cohtena niaja. Sa yero mari cohteri deco pano tũho masina, quehnoañene yeducuna, Cohãcjũre ño peoducuna marine iji dutire Cohãcjã. ¹⁴ Tiquiro Jesucristo mari ye ijiatire yariahye ijipihtiyere mari ñañe yerire duhugũ yero taro, marine tiquiro yequina wahagũ yero taro. Mari ñañene tiquiro sa cohãgũ mari ñañe buhiri mariena ijinata. Sa yena tutuaro quehnoañene ye duana ijinata.

¹⁵ Ahri ijipihtiyere ti nũcũo cjenare Jesu yequinare buheya mũhũ. Tiquina pũhtoro ijigũta nine mũhũ. Sa yegũ tiquinare yahuya. Sa yegũ tiquina ñañene yegũ ihñagũ tuhtiya tiquinare. Sa ye ijipihtiyequina apequina mũhũre doca cũedacãhdo.

3

Jesu yequina tiquina yeatire yahuahye Pablo

¹ Ohõ saha ni yahuya to cjenare Jesu yequinare: Tiquina pũhtoare quehnoano yũhtiyequina ijiahero. Ijipihtiyere quehnoañene yeatiquina ijiahero. ² Sa ye apequinare ne ñañe quti dahreracãhdo. Cahme tuhtieracãhdo. Sa ye masa quehnoañequina, ijipihtiyequinare ño peoyequina ijiahero.

³ Panopũre mari gũhũ tũho masiena, yũhdũũcãna, ni mehoñene tũho nũnũna, ñañene ye duana, ñañene tutuaro cahme duhu masiena, decoriye ñañene yeducuna, apequinare ihña coona

ijie timi mari gũhũ. Sa ye marine apequina ihña tuhtiri. Sa yena mari gũhũ tiquinare ihña tuhtimi. ⁴⁻⁵ Sa ijirina mari ijiepegũta Cohãcjũ marine pecapũ waha-borinare yũhdũori. Sa yũhdũoro tiquiro quehnoariquiro ijiyere, masare tiquiro cahñe gũhũre marine ihñono nidi. Quehnoano mari yeri mehna yũhdũoerare marine. Marine paja ihñano mari ñañe yerire cohãno Espiritu Santo mehna marine yũhdũori. Sa yero marine tiquiro pohna wahagũ yeri. Espiritu Santo pehe quehnoano mari ijiatire comesagũ yeri marine. ⁶ Jesucristo marine yũhdũoriquiro tiquiro yaria masa mũjañe mehna Cohãcjũ yaquiro Espiritu Santore ohori marine pajiro tiquiro tutuayere mari cũoatire. ⁷ Marine cahño, marine quehnoano ye duari. Sa yero tiquiro yaquiro Espiritu Santore marine ohori ñañe buhiri mariena mari ijiatire, mũmũsepũ mari sa ijiducuatire. Mari sa ijiducuatire masina, tire cohtena niaja.

⁸ Ti yũhũ nidi ijirota ijire. Sa yegũ tire yũhũ ni ojoariro sahata masare buhegũ, ti dutiyere ye peho dutiya mũhũ. Sa yegũ Cohãcjũre wacũ tutuayequinare tire buheya quehnoañene tiquina quehnoano yeatire. Ahri yũhũ ni buheri quehnoañe buheye ijire. Sa ye masa ahri buheyere tiquina tũho nũnũgũ ihyo waro ijierare. ⁹ Apequina tiquina yahuducuye pehe dũhseati ijierare. Sa ye masiedapeta tiquina yahuducu yũhdũũcayere mũhũ tũho nũnũgũ ihyo waro tũho nũnũgũ nine mũhũ. Sa ye tiquina acaye panopũ cjenã tiquina ijie tirire yahuducu yũhdũũcayere, Cohãcjũ Moiserere tiquiro dutirire tiquina yahuducu yũhdũũcayere ti ijipihtiyere quehnoano mũhũ tũho nũnũgũ ihyo waro tũho nũnũgũ nine mũhũ. Sa yegũ tire tũho nũnũedacãhña.

M̄h̄h̄ ḡh̄h̄ tiquina yero saha yahuducu ȳhd̄d̄caerac̄h̄h̄a.

¹⁰ M̄h̄sa mehna c̄j̄no sa ni ȳhd̄d̄cariquiro m̄sare cahme tu waḡū tiquiro yeḡū ih̄n̄aḡū “Yer-ac̄h̄h̄a”, nīna tiquirore. P̄ua taha tire tiquirore m̄h̄h̄ ye dutierari bato tiquiro ȳhtieraḡū ih̄n̄aḡū tiquirore piti ti duhuya. ¹¹ Oh̄o saha yeriquiro ñāne dihitare tutuaro cahmeducuriquiro ijire. Tiquiro sa ijiḡū ih̄n̄ana tiquiro ñariquiro ijiḡū masiaja mari.

Pablo duti bato tiahye

¹² Nicopolip̄h̄ pohech̄h̄ ijiro puno ijiḡū taḡū niaja. Sa yeḡū Artemare o Tiquicore m̄h̄h̄ cahap̄h̄ ȳh̄h̄ oho m̄htaḡū top̄re ȳh̄are piti caya m̄h̄h̄. ¹³ Sa yeḡū dutiyere quehnoano mihnidiquirore Zena wame tiriquirore, Apolo ḡh̄are quehnoano yedohoya tiquina wahatire. Sa yeḡū apee boro tiquina cahmeñene ijipihtiye tiquinare ohoya tiquinare tiquina cahmeno puno. ¹⁴ Sa ye Jesu yequina mari mehna c̄j̄na quehnoañene yepoahro apee borore d̄hsayequinare tiquina yedohoatire, quehnoañene yeducueyequina tiquina ijiatire.

Pablo quehnoa dutiahye Jesu yequinare

¹⁵ Ijipihtiyequina ȳh̄h̄ mehna c̄j̄na m̄h̄are quehnoa dutire. Top̄h̄ ijiequina Jesu yequina us̄are cahñequina quehnoahdo. Ijipih̄tinare m̄sare Coh̄c̄j̄ mehna pajiro quehnoa dutiaja.

Filemón

Pablo Filemo wame tiriquirore ojoa ducahye

¹ Yuhū Pablo, Jesucristo yaquiro yuhū ijiri buhiri peresupū ijiaja. Yuhū, mari acayūro Jesu yaquiro Timoteo mehna mūhare Filemore quehnoa dutiaja usā. Sa yegū mūhare ojoa ohoaja yuhū, Pablo. Mūhū usā cahīgū Cristo yere usā mehna dahradohogū ijire mūhū. ² Sa yena Jesu yequina mūhū ya wūhūpū cahmecoañequina gūhare ojoa ohoaja yuhū. Mari acayoro Jesu yacoro Apia gūhare ojoa ohoaja yuhū. Mari cahīniquiro Arquipo gūhare ojoa ohoaja yuhū. Arquipo pehe usā yero saha Cristo yere yahuriquiro ijire. ³ Sa yena Cohācjū mari Pacū, mari puhtoro Jesucristo mehna mūhare quehnoa dutiaja. Tiquina yedohoye mehna quehnoano ijiya mūsa.

Filemo apequinare tiquiro cahīñene, Cristore tiquiro wacū tutuayere yahuahye Pablo

⁴⁻⁵ Yuhū acayū Filemo, Cohācjūre mūhare sini basagū mūhare wacūgū “Quehnoare”, niaja tiquirore. Cristore mūhū cahīgū tiquirore mūhū wacū tutuagū, apequina Cohācjū yequinare mūhū cahīgū tuhōu yuhū. Sa yegū Cohācjūre “Quehnoare”, ni bucueaja. ⁶ Mari ihcāno mehna Cristore wacū tutuana ijiaja. Sa wacū tutuagū mūhū ijigū ohō saha ni sini basaja Cohācjūre. Jesucristo yequina ijina, pajiro quehnoañene cūonata mari. Tire quehnoano mūhare masi peho dutigū sini basagū niaja Cohācjūre. ⁷ Yuhū acayū, yojopūre apequinare mūhū cahīgū tuhōgū bucueaja yuhū. Ijipihtiyequina Cohācjū yequinare quehnoano bucuegū yeñōhti mūhū.

Mūhū sa yegū tuhōgū bucueaja yuhū.

Pablo Onésimore sini basahye Filemore

⁸⁻¹⁰ Sa yegū yojopūre Onésimore mūhū cahacjānore mūhū quehnoano yeatire mūhare sini basa duaja. Peresupū yuhū mehna tiquiro ijigū Cristo yere yahūu yuhū tiquirore. Tire tuhōro Cristore cahmedi tiquiro. Sa yero tiquiro Cohācjū yaquiro wahari. Sa waharo yuhū macū yero saha ijire. Sa yegū yuhū Pablo bucū ijigū Cristo yere yuhū buheri buhiri peresupū ijigū mūhare yahutja Onésimore mūhū yeatire. Cristo buhe dutiro tiquiro cūrigū ijiaja yuhū. Sa tiquiro cūrigū ijigū Onésimore mūhū yeatire dutioborigū ijiaja yuhū. Sa niepegūta mūhare dutisi yuhū. Cahīñe mehna mūhare yahutja, to punota.

¹¹ Cristo yaquiro tiquiro ijiato pano Onésimo mūhū cahacjāno ijiro dahseatiquiro ijierari jiri. Mūhare quehnoano yedoho masiedari jiri. Yojopū pūritare tiquiro mūhare, yuhū gūhare quehnoano yedohoriquiro ijirota. Yojopūre Cristo yaquiro ijiro ihyo ijiriquiro waro ijierare.

¹² Sa yegū yojopūre tiquirore mūhare wia tojogū niaja. Sa yegū tiquirore quehnoano piti caya mūhū. Tiquirore tutuaro cahīaja. ¹³ Quehnoañe buheyere yuhū buheri buhiri peresupū yuhū ijiri watoa tiquirore yuhūre yedoho dutiboaya yuhū tiquirore ohoeragū. Sa yegū yuhū mehna tojoa dutiboaya yuhū. Mūhū pehe yuhūre mūhū yedohoro basio-eragū tiquiro pehe mūhare came-sariquiro ijiboaya. ¹⁴ Yuhūre yedohoriquiro tiquiro ijiepegūta tiquirore mūhare oho tojoaja. Mūhū pehe tiquirore “Pablo mehna tojoarīña”, mūhū nigū masigū yuhū mehna tiquirore tojoa

dutiboaya yuhũ. Yuhũ pehe “Yuhũ mehna cũña tiquirore”, ni dueraja mähũre. Sa yegũ tiquirore oho tojoriája.

¹⁵ Tiquiro Onésimo meheñe decorigã mähũre tiquiro duhti cãri bato pari turi mähũ mehna ijire. Cohãcjũ tiquiro cahmediro sahata mähũre duhti cãri jiri tiquiro Cohãcjũ yaquiro tiquiro wahato saha, yuhũ tuhutugã. Sa yero pari turi mähũ mehna ijiro, sa ijiducurota mähũ mehna. ¹⁶ Sa yero tiquiro yojopũre cahacjãno ijierare. Cahacjãna tiquina bui cjũno ijiriquiro ijire tiquiro, yuhũ ihñagũ. Yojopũre tiquiro mähũ acayũro Jesu yaquiro ijire. Sa yegũ tiquirore tutuaro cahĩaja. Mähũ pehe yuhũ yuhdũoro tiquirore cahĩgũta. Mähũ sa cahĩdiquiro ijiro, cahacjãno ijieperota yojopũre cahacjãno tiquiro ijiriro saha ijierare tiquiro. Tiquiro mähũ acayũro Jesucristo yaquiro ijire.

¹⁷ Sa yegũ yuhũre mähũ piti caboriro sahata Onésimo gũhũre quehnoano piti caya. Mähũ mehna cjũ yuhũ ijigũ tuhutugũ tiquiro gũhũre quehnoano piti caya mähũ.

¹⁸ Sa yegũ mähũre sijoro saha tiquiro yeriquiro ijigũ mähũre tiquiro wapamoriqũro ijigũ yuhũ pehe tire wapa yeitja. ¹⁹ Yuhũ Pablo, yuhũ basi ahrire mähũre yahu ojoautja: Yuhũ pehe wapa yeitja mähũre. Mähũre yuhũ buheri bato Cristo yaquiro wahagũ ijipihtiye decori Cohãcjũ mehna ijiacja ijire mähũ. Mähũre yuhũ sa buheri bato mähũ gũhũ yuhũre pajiro wapamorigũ ijiboaya. Mähũ sa ijiepegũta mähũre wapa yeitja tiquiro wapamoñene. ²⁰ Sa yegũ yuhũ acayũ, yuhũ cahĩgũ, mari pũhoro Cristo yaquiro ijire mähũ. Sa yegũ Onésimore quehnoano piti caya. Cristo yaquiro ijigũ yuhũ acayũ ijire mähũ. Sa yegũ yuhũre quehnoano bucuegũ yeya.

²¹ Ahri yuhũ yahurire quehnoano yegũta mähũ. Sa yegũ yuhũ yahuri yuhdũoro yegũta mähũ. Tire masigũ mähũre ojoa ohogũ niaja. ²² Ahri gũhũre yahugũtja mähũre. Mũsa cahapũ yuhũ wahatire Cohãcjũre sini basañohti mũsa yuhũre. Mũsa sa sini basarire tiquiro yuhũtiboaga. “Aũ”, tiquiro nigũ cahmeaja yuhũ. Sa yegũ mũsa cahapũ yuhũ esati tucũre quehnoyuya mähũ.

Pablo quehnoa duti bato tiahye Filemore

²³ Epafra mähũre quehnoa dutire. Tiquiro pehe Cristo yere tiquiro yeri buhiri yuhũ mehna peresupũ ijire. ²⁴ Sa ye Marco, Aristarco, Dema, Luca mehna mähũre quehnoa dutire. Cristo yere yuhũ buhegũ tiquina pehe yuhũre yedohoyequina ijire.

²⁵ Mari pũhoro Jesucristo mehna quehnoa dutiaja mũsare. Tiquiro mũsare quehnoano yerota.

Hebreos

¹ Panopu Cohăcju ijiahye. Tiquiro peye tahari mari acayere panopu cjenare tiquiro yere yahuahye. Apequinare tiquiro bajuaro yahuahye. Apequinare quehēnopu yahuahye. Apequinare tiquiro piti caro yahuahye. Tiquiro yere yahu mūhtariquinare yahu dutiro, sa yahuahye tiquiro mari acayere. ² Yojopure pihtiri deco panogā ijiye decorire tiquiro macanore tiquiro yere yahu dutigū tiquiro pehe marine yahue tiri. Tiquiro Pacuro ye dutiro mehna ahri yehpare, ūhmuse gūhare yeriquiro ijire. Tiquiro Pacuro pehe pihtiri deco ijigū ijipihtiyere cūoatiqiurore cūahye tiquiro macanore. ³ Sa yero tiquiro macano pehe tiquiro Pacuro ye asi siteyere cūoriquiro ijiro, tiquiro tutuayere marine ihñore. Sa yero ihcāno saha tiquiro Pacuro yero sahata ijiro, tiquiro Pacuro ijiye tiyere marine ihñore tiquiro macano. Sa yero tiquiro macano tiquiro tutuaye mehna dutigū ahri yehpa, ūhmuse gūha sa ijiducure. Sa yero mari ñano yerire tiquiro coseri bato ūhmusepu tiquiro Pacuro tutua yūhdūariquiro poto pehe dujiahye, pūhtoro tiquiro ijiyere ihñono.

Cohăcju macano angele yūhdūoro ijire

⁴ Tiquiro “Cohăcju macano”, wame tire. Ti wamene Cohăcju cūahye tiquirore. Sa wame tiro apequina pūhtoro ijire. Sa yero tiquiro angele yūhdūoro ijire. ⁵ Tiquiro yequina angele pehere Cohăcju ne ohō saha ni yahuera tiahye:

Yūhu macu ijire mūhu. Miare mūhare bajuagū yei, niahye Cohăcju tiquiro macanore.

Angele pehere ne sa ni yahuera tiahye. Sa yero tiquinare ahri gūhare ne yahuera tiahye:

Tiquiro Pacuro ijiitja yūhu. Sa yero tiquiro yūhu macu ijirota, niahye Cohăcju tiquiro macanore.

Angele pehere ne sa ni yahuera tiahye. Sa yero tiquiro macano tiquina yūhdūoro ijire. ⁶ Sa yero ape taha tiquiro macanore coā masa bajuariquirore ahri yehpapu cūno ohō saha niahye Cohăcju tiquirore:

Ijipihtiyequina yeequina angele dūsepe curi mehna quehe sa, ño peoeta tiquina yūhu macare, niahye tiquiro.

⁷ Sa yero tiquiro yequina angele pehere yahuro taro ohō saha niahye tiquiro:

Yeequina angelere wihnono yero saha pagu tigū yeaja yūhu. Tiquina yūhu cahacjena ijire. Sa yegu tiquinare peca pohna yero saha pagu tigū yeaja yūhu, ni yahuahye Cohăcju.

⁸ Tiquinare sa nieperota tiquiro macano pehere ohō saha niahye:

Mūhu Cohăcju ijipihtiyequina pūhto sa ijiducugata. Queoro dutigata mūhu, mūhu yequinare. ⁹ Ni mehono marieno yeyere, quehnoano yeyere tutuaro cahmene mūhu. Sa yegu ñaŋe yeyere ihña yabire mūhu. Mūhu sa ijigū ihñagu yūhu mūhu Pacu ijipihtiyequina apequina yūhdūoro mūhare bucuegū yei, niahye Cohăcju mari Pacu.

¹⁰ Ahri gūhare niahye tiquiro, tiquiro macanore “Pūhto” ni pisuro:

Pūhto, coā waropure ahri yehpare, ūhmuse gūhare bajumehnedi mūhu. ¹¹ Ti ijipihtiyē comesa pihtia wahaŋota. Mūhu pehe ne

comesasi. Sa ijiducugata mahu. Ti ijipihtiye suhtiro ahba bora dijiaro saha pihitia waharota. ¹² Ti ijipihtiye ahmasure, ahri yehpa gahure comesagū yeita mahu. Munano suhtirore mahu cohaboro saha ti ijipihtiyere comesagū yeita mahu. Sa yero suhtiro ahba bora dijiaro saha ti ijipihtiye comesarota. Mahu pehe ne comesasi. Sa ijiducugata mahu, niahye Cohācjū tiquiro macunore.

¹³ Ne angele pehere ahrire yahuera tiahye mari Pacu:

Yahu potō pehe dujiya mahu. Pūhto ijire mahu. Sa yegu mahure ihña tuhtiyequinare yuhdudaca basagatja. Sa yegu tiquina pūhto ijigata mahu, niahye Cohācjū tiquiro macunore.

¹⁴ Ijipihtiyequina angele pehe Cohācjū cahacjēna ijire. Sa yero mari Pacu ohore tiquiro yequina angelere Cristo yuhdūoatiquinare yedoho dutiro.

2

Cohācjū yere quehnoañe buheyere marine sa tūhotu cāhno cahmedare

¹ Sa yena Cohācjū macuno waro marine yahuriquiro tiquiro ijigū masina tiquiro yahuyere mari tūhorire quehnoano wacūno cahmene marine, “Tire boari”, nina. ²⁻³ Angele yahurire masa pehe yuhdudacagū ihñano Cohācjū tiquinare buhiri dahreahye. Sa buhiri dahrero angele tiquina yahuri potō ijigū ihñono niahye. Sa yena angele yahuri potō ijigū masina, tire marine yūhtiro cahmene. Ti yuhdūoro Cristo pehere yūhtiro cahmene. Tiquiro mari pūhtoro marine tiquiro yuhdūoatire yahu māhtahye. Sa ye tiquirore tūhoriquina pehe tiquiro

yahurire marine yahu turiari, marine quehnoano masigū yee tehe. Sa yero ti buheyere marine tiquiro yuhdūoati buheyere mari sa tūhotu cāgū Cohācjū marine buhiri dahrerota. Tire duhti masiedaja mari.

⁴ Ti buheyere tūho māhtariquina tiquina buheri watoa Cohācjū pehe ti buheye potō ijigū ihñono nidi. Tiquiro tutuaye mehna ihñono nidi. Sa yero peye tahari tiquiro tutuaye mehna ye ihñono ti buheyere potō ijigū ihñono nidi. Sa yero tiquiro yequinare tiquina ye masiatire tiquiro cahmeno sahata cūahye. Espiritu Santo pehe ijire marine ye masigū yeriquiro.

Jesucristo mari yero sahata pagu tiriquire masa bajuahye

⁵ Pihtiri deco bato ijiyequina Cohācjū caha ijiyequina pūhtoa ijisi angele pehe. Tiquinare pūhtoa sōsi mari Pacu. ⁶ Sa yero ihcāquiro mari Pacure tiquiro yahuducurire ohō saha ni ojoahye panopu:

Masa ihyo ijiyequina tiquina ijipegūta tiquinare wacūre mahu. Masare quehnoano yere mahu. ⁷ Meheñe decorigā angele docapu masare cūahye mahu. Sa cūepēgūta yojopure tiquinare tutuayere ohogu, pūhtoa sōahye mahu. ⁸ Mahu sa sōgū ahri yehpau ijiyequina wahiquina gūhu bui dūhsaro marieno masare cūahye mahu, niahye panopu cjūno mari Pacure.

Sa sōno ahri yehpau ijiyequina wahiquina gūhu bui dūhsaro marieno masare cūahye. Masare tiquiro sa pūhtoa sōepēgūta ijipihtiyequina ahri yehpau ijiyequina wahiquina masare ihña wahāedarīaga, usā tūhotugū. Ahri yehpau ijiyequina wahiquinare ihña wahāgū yeraniaga masa. Ijipihtiye bui ijieraniaga masa.

⁹ Sa tiquinare ihña wahāgū yer-
apenata Jesu pehere wacū tutuaja
mari. Meheñe decorigā angele
docapū mari Pacū tiquiro macūno
gūhure cūahye, mari ñañe buhiri
yariatiquirore. Mari Pacū marine
cahño mari yariaborirore Jesure
yariagū cahmeahye. Sa yero
tiquiro sa yariagū ihñano tiquirore
tutuayere ohoro, pūhtoro sōahye
tiquirore.

¹⁰ Cohācjū ijipihtiyere ba-
jumehnediquiro ijire. Sa ye
ijipihtiyē tiquiro ye dihita ijire. Sa
yero Jesure yaria dutiro ñañene
cohāgū yeahye tiquirore. Sa
yeahye tiquiro masa peyequina
tiquiro yequina ijiatiquinare
uħmūsepū neano taro. Jesu sa
yero, ñañe marieniquiro, quehnoa
yūhdūariquiro tiquiro ijiyere
ihñono niahye. Sa yero Jesu
pehe marine yūhdūoriquiro, mari
pūhtorota ijire. ¹¹ Ijipihtiyequina
masare tiquina ñañe yerire cose
were tiquiro. Sa yero Jesu mari
tiquiro cose wenohrina mehna
Pacū tire Cohācjūre. Mari Pacū
ihcāquirota ijire. Mari Pacū tiquiro
ijigū Jesu marine tiquiro yequinare
tiquiro cose wenohrinare “Yūhū
acaye ijire”, ni pisuro ne bue
tierare. Tiquiro sa ni pisurire
mū sare yahutja. ¹² Ohō saha nino
niahye tiquiro:

Cohācjū, mūhū ijiye tiyere yahutja
yūhū acayerpūre. Ijipihtiyē-
quina yeequina ihñonopū
mūhūre ño peogū “Tutu-
ariquiro ijire”, ni yahutja
yūhū tiquinare, niahye
tiquiro Pacūrore.

¹³ Ahri gūhūre niahye tiquiro:

Cohācjūre wacū tutuautja yūhū, ni-
ahye tiquiro.

Ahri gūhūre niahye tiquiro:

Ohō ijiaja yūhū. Cohācjū pohne
mehna ohō ijiaja. Yūhūre
tiquiro cūriquina yūhū acaye
mehna ohō ijiaja, niahye

tiquiro yequinare “Yūhū
acaye” ni pisuro.

¹⁴ “Tiquiro pohne” tiquiro
niñequina pagū tiyequina mari
ijigū ihñano, Jesu pehe mari ya
pagū saha pagū tiriquiro ahtahye.
Sa ijiriquiro ahtahye tiquiro
curusapū yariaro taro, watñore
butigū yero taro. Tiquiro watño
pehe yaria dutiriquiro ijire. ¹⁵ Sa
ye watñore butigū yero, marine
yūhdūore. Mari pehe decoripe
mari yariatire cuemi. Sa cuerina
ijina pecapū wahaborina ijimi
mari. Sa ijina mari ijigū ihñano
tiquiro marine yūhdūore. ¹⁶ Sa
yūhdūoro angele pehere yedohoro
ahtaerahye tiquiro. Abrahā
panamena iji turianare Cohācjū
yequinare mari pehere yedohoro
ahtahye. ¹⁷ Sa yero tiquiro
mari acayūro warota ahtahye.
Ihcāno saha mari yero saha pagū
tiriquiro ahtahye. Sa ahtaro
mari yūhdūatire mari ñañe yerire
mari Pacūre cohā dutiro ahtaro
niahye. Sa yero mari yequina
pahia pūhtoa tiquina yeriro saha
yero ahtaro niahye. Mari yero
saha ijiro marine quehnoano paja
ihñare. Sa yero Cohācjū cahmeno
saha sa yeducuriquiro ijire. Sa
yero tiquiro mari yaquiro pahia
pūhtoro ijiro nine. ¹⁸ Tiquiro
ñano yūhdūahye. Sa yero watño
tiquirore ñano ye dutimahye.
Yerahye tiquiro. Sa ñañene yer-
ariquiro ijiro, tiquiro pehe mari
gūhūre ñañene yeragū ye masine.
Watño ñañene tiquiro ye dutigū
ihñano marine ñañene yeragū ye
masine Jesu.

3

*Jesu Moise yūhdūoro ijiriquiro
ijire*

¹ Jesu tiquiro sa ijiriquiro
ijigū ihñana tiquirore quehnoano
wacūña masa. Yūhū acaye Jesu
yequina, Cohācjū besenohrina ijire

musa. Tiquiro Jesu pehe Cohãcjũ cûriquiroy ijiroy mari yaquiroy pahia pãhtoro ijire. Tiquiro ye buheyere quehnoañe buheyere mari quehnoano ño peoaja. Tiquiro pehere quehnoano wacũña musa. ² Cohãcjũ tiquirore marine yãhdũoatiquirore tiquiro cûgũ tiquiro pehe Cohãcjũ cûriroy saha yeahye. Ne yãhdũdũcaerahye. Moise gãhũ Cohãcjũ yequina Israe masare yedohoro ne yãhdũdũcaerahye. Sata yeahye Jesu gãhũ.

³ Sa yero Moiseroy tiquina ño peoriro yãhdũoro Jesu pehere ño peoroy cahmene marine. Ohõ saha ijire ti mari queoye mehna buhegũ. Wãhũre mari ño peoriro yãhdũoro wãhũ dahreriquiro pehere ño peoroy cahmene marine. Sa yero Jesu pehe wãhũ dahreriquiro yero saha ijiriquiro tiquiro ijigũ Moiseroy mari ño peoriro yãhdũoro tiquiro pehere ño peoroy cahmene marine. ⁴⁻⁶ Ohõ saha ijire ti. Mari Cristo yequina Cohãcjũ ya curua cjãna ijiaja. Cristo pehe wãhũre tiquiro cûboriro saha marine tiquiro ya curua cjãna ijiatınare cũno nine. Masa pehe wãhũse yeyequina ijire. Cohãcjũ pehe ijipihıtyere yeriquiro ijire. Moise pehe Cohãcjũ ya curua cjẽnare yedohoducuriquiro ijiroy, camerũ Cohãcjũ yahuatire yahue tiahye masare. Cristo pehe Cohãcjũ macũno ijiroy, Cohãcjũ yere yeducuriquiro ijiroy, Cohãcjũ ya curua cjẽna pãhtoro ijire. Sa ijiriquiro ijigũ ihñana Moiseroy mari ño peoriro yãhdũoro Cristo pehere ño peoroy cahmene marine. Sa yena mari pehe Cristore wacũ tutua duhuerana, marine tiquiro yãhdũoatire sa bucueducuna, tiquiro ya curua cjãna ijiaja mari.

Cohãcjũ tiquiro yequinare tiquiro mehna quehnoano sogũ cahmene

⁷ Sa yena Cristore mari wacũ tutua duhueratire ohõ saha yero cahmene marine. Ohõ saha nine Espıritu Santo:

Miare yãhũ, Cohãcjũ, musare yãhũ yahugũ, yãhti dueyequina yero saha ijieracãhña.

⁸ Quehnoano yãhtiya musa yãhũre. Panopũ Israe masa masa marienopũ ijiye, sa yãhdũdũcari yãhũre. Sa ye yãhũre ne bucuerağũ yeri tiquina. Sa yena tiquina yero saha yeracãhña musa yãhũre.

⁹ Topũre cuarenta cãhmari waro tiquinare yãhũ tutuaye mehna ye ihñomi. Yãhũ sa ye ihñoepegũta tiquina pehe ohõ saha ni tãhotue timedı: “¿Ñañene mari yegũ ihñano Cohãcjũ marine buhiri dahreboagari?” ni tãhotue timedı. Sa ni tãhotuye ñano ye tuhue tiri.

¹⁰ Tiquina sa yegũ ihñagũ tiquina mehna usuau. Sa usuagũ ohõ saha nii: “Tiquina yãhũ yahuducuyere tãho dueraye, sijoro saha ijiye buheyere sa wacũducuye nine. Yee pehere ne yãhti duerare”, nii tiquinare.

¹¹ Sa yegũ tiquina mehna usuagũ ohõ saha ni yahuu: “Tiquina yãhũ mehna cjẽna ne ijisi. Sa ye wape tiro marieno ijisi tiquina”, ni yahuu yãhũ”, ni yahuahye Cohãcjũ, niahye Espıritu Santo pehe.

¹² Sa yena yãhũ acaye, quehnoano yeya musa, “Cohãcjũre cohãri”, nina. Musa ñañene tãhotuna, Cohãcjũre catiriquirore wacũ tutuerana, tiquirore cohãboaga musa. Ne ihcãquiroy musa mehna cjãno sa yeracãhdo. ¹³ Sa yena ahri pehere yero cahmene: Musa mehna cjẽnare decoripe Cohãcjũ yere musa basi cahme

yahuducuya “Ñañene yeari”, nina. Ñañene yena, “Ti mehna bucueaja”, nina ni mehoñene t̄hotuna niaja mari. Sa ni t̄hotuerac̄hña. Ñañene yeducuna Cohãcjũ ye pehere cahmedaja mari. Sa yena ñañene duhu dueraja. “Sa yeari”, nina, m̄sa mehna cj̄enare Cohãcjũ yere m̄sa basi cahme yahuducuya. Cristo tiquiro ahtato pano decoripe tire sa cahme yahuducuya. ¹⁴ Sa yena coã warop̄a Cristore mari wacũ tutua d̄ucariro saha mari wacũ tutuaducuna, mari catiro puno tiquiro yere duhuerana, tiquiro mehna cj̄ana ijiaja.

¹⁵ Ohõ saha nine Cohãcjũ yere tiquina ojoari p̄p̄a:

Miare ȳh̄a Cohãcjũ m̄sare ȳh̄a dutigã quehnoano ȳhtiya m̄sa ȳh̄are. Panop̄a cj̄ena Israe masa ȳh̄a yahuepegãta ño peo dueraye, ȳh̄are ȳhti duerari. Sa yena tiquina yero saha yerac̄hña m̄sa, niahye Cohãcjũ, ni ojoahye panop̄are.

¹⁶ Sa ye Cohãcjũ tiquiro yahurire t̄homediquina ijiepetata tiquina tiquirore ȳhtierahye. Tiquina ijipihtiyequina Eḡiptop̄a ijiepetata Cohãcjũ wioriquina ijiepetata tiquirore ne ȳhtierahye. ¹⁷ Sa ñano yeye cuarenta cahmari waro Cohãcj̄are usuagã yee tiahye. Tiquina sa yeri buhiri marienop̄a yariahye tiquina. ¹⁸ Tiquirore tiquina sa ȳhti dueragã ihñano ohõ saha cua pesaro mehna niahye tiquiro: “Tiquina ȳh̄a mehna cj̄ena ne ijisi. Sa ye wape tiro marieno ne ijisi tiquina”, niahye tiquiro. ¹⁹ Tiquiro sa nigã t̄hona ahri pehere masinata mari: Cohãcj̄are tiquina wacũ tutuerari buhiri tiquiro mehna cj̄ena iji masiedahye. Sa ye tiquiro mehna quehnoano so, iji masiedahye.

4

¹ Sa yero panop̄a cj̄enare tiquiro mehna tiquina quehnoano soatire cahmeno, tiquinare “Ȳh̄a mehna wape tiro marieno sonata”, ni c̄ahye Cohãcjũ. Mari ḡah̄are sata ni c̄ahye tiquiro. Sa yena cua pesaro mehna Cohãcj̄are quehnoano ȳhtiuhna mari, “Wiheari”, nina. Sa wihena tiquiro mehna quehnoano sosi mari. ² Panop̄a cj̄ena Cohãcjũ yere tiquina t̄horo saha mari ḡah̄a quehnoañe buheyere t̄hou. Tiquina t̄ho m̄htariquina pehe t̄hoye, “Cohãcjũ ye waro ijire”, ni t̄hotuerahye. Sa ye tiquina t̄hori d̄hseati ijierahye. ³ Mari pehe tiquirore wacũ tutuana Cohãcjũ mehna cj̄ana ijinata. Sa yena tiquiro mehna quehnoano iji, sonata. Wape tiro marieno ijinata. Cohãcjũ tiquiro nidiro sahata ijire ti. Ohõ saha niahye tiquiro tiquirore ȳhtierariquinare:

Tiquina mehna usuagã cua pesaro mehna ohõ saha ni yahuu: “Tiquina ȳh̄a mehna cj̄ena ne ijisi. Sa ye wape tiro marieno ne ijisi”, ni yahuu, niahye Cohãcjũ yere tiquina ojoari p̄p̄a.

Ahri yehpare tiquiro yeri bato dahra duhurĩahye tiquiro. ⁴ Ahrire mari masiaja. Seis decori ahri yehpare tiquiro yeri bato tiquiro dahra duhurire yahuro ohõ saha niahye Cohãcjũ ye yahuducuyere tiquina ojoari p̄p̄a:

Seis decori bato ijipihtiyere tiquiro dahrarire pehoru, Cohãcjũ dahra duhuahye, niahye tiquiro yere tiquina ojoari p̄p̄a.

⁵ Sa yero Cohãcjũ yere tiquina ojoari p̄p̄a ohõ saha ni yahure tiquiro mehna quehnoano ijieyequinare:

“Tiquina ȳh̄a mehna cj̄ena ne ijisi. Sa ye wape tiro marieno ne ijisi”, niahye Cohãcjũ, nine

tiqairo yere tiquina ojoari pũpũ.

⁶ Sa ye quehnoañe buheyere tũho mãhtariquina tiqairore tiquina yũhdũdcari buhiri tiqairo mehna cjẽna ijisi tiquina. Sa ye tiqairo mehna wape tiro marieno ijisi tiquina. Apequina pehe tiqairo mehna cjẽna ijjeta. Sa ye tiqairo mehna wape tiro marieno soyequina ijjeta. ⁷ Sa yero masare tiqairo yũhdũoati deco ihcã deco cũahye pari turi Cohãcjũ. Ti decota yojoũre ijire. Peye cũhmari bato Israe masa Cohãcjũre tiquina tũho mãhtari bato ti decore yahuahye Davi pehe. Cohãcjũ tiqairore yahu dutigũ yahuahye. Cohãcjũ ye yahuducuye tiquina ojoarire mũsare yũhũ yahuri decore ohõ saha ni ojoahye Davi:

Ahri decore yũhũ Cohãcjũ mũsare yũhũ yahugũ yũhdũdcaro marieno quehnoano yũhtiya mũsa yũhũre, ni ojoahye panopũre.

⁸ Coã waropũre Josuẽ Israe masare Cohãcjũ ohori yehpapũ ne sahye. “Yũhũ mehna wape tiro marieno soyequina ijjeta”, nino, ti yehpapũ tiquina soatire nino niedahye Cohãcjũ. Ti yehpapũ so dutiro, ape deco tiqairo yũhdũoati decore cũedaboaga tiqairo. ⁹ Seis decori bato ahri yehpapũre tiqairo yeri bato Cohãcjũ tiqairo dahra duhuriro saha mari tiqairo yequina gũhũ tiqairo mehna wape tiro marieno mari soati ijjirota. Tiqairo mehna mari quehnoano ijjiato ijjirota. ¹⁰ Sa yero Cohãcjũ tiqairo dahrarire duhu cãriahye. Sa yena mari gũhũ mari wape tirire duhu cãnata. ¹¹ Sa yena mari tiqairo yequina quehnoano yeihna. Cohãcjũ yere quehnoano yũhtiihna tiqairo mehna mari quehnoano soato saha. Panopũ cjẽna mari acaye tiquina yũhdũdcari bato Cohãcjũ

mehna cjẽna iji masiedahye tiquina. Tiquina yero saha yeracũhna mari.

¹² Cohãcjũ ye yahuducuye marine catigũ yere. Quehnoañe pehere marine comesagũ yere. Sa ye tiqairo ye yahuducuye ihyo ijiye ijjerare. Sa ye ñoseni pji pũa peheri siori pji mehna dihirore tiquina yũhre ihña tiquina masino saha tiqairo ye yahuducuye gũhũ mari ijiye tiyere quehnoano masigũ yere. Tiqairo ye yahuducuyere mari tũhogũ, tire mari buhegũ mari ijiye tiyere quehnoano masi pehogũ yere marine. ¹³ Ne Cohãcjũre mari ijiye tiyere mari yerire nũo masiedaja mari. Ijipihtiyere tiqairo bajumehnedire, tiqairo bajumehnediquina gũhũre ihñare tiqairo. Sa yena mari yerire tiqairore yahu yũhdũro cahmene marine.

Jesu tutuariquiro mari yaquiro pahia pũhtoro ijire

¹⁴ Jesu Cohãcjũ macũno tiqairo Pacũro cahapũ tojoariquiro ijire. Tiquiro tutuariquiro mari yaquiro pahia pũhtoro ijire. Sa yero marine Cohãcjũre sini basare. Tiquiro sa ijiriquiro ijigũ ihñana mari pehe tiqairo yere quehnoano yũhtiihna. Tiquirore quehnoano wacũ tutuaducuhna. ¹⁵ Tiquiro mari yaquiro pahi mari ñano yũhdũgũ ihñano quehnoano paja ihñariquiro ijire. Mari ñañene tutuaro cahmeñene masine tiqairo. Watĩno ijipihtiyere ñañene marine tiqairo ye dutiriro sahata tiqairo gũhũre ñañene ye dutimahye. Tiquiro sa ye dutiepegũta tiqairo ñañene yerahye. Sa ñañene tiqairo ye dutinohriquiro ijiro, marine paja ihñano tiqairo yedoho masine marine. ¹⁶ Sa yena cuero marieno Cohãcjũre sinihna. Tiquiro marine cahĩne. Sa yero tiqairore mari sinigũ tiqairo pehe paja ihñano, marine yedohorota. Watĩno

marine tiqairo ñañene ye dutigã, mari ñano yãhdugã gãhare tiqairo marine yedohorota.

5

1 Ijipihtiequinare pahia pãhtoare besero, masare besere Cohãcjã. Sa tiqairo beseri bato pahia pãhtoa pehe tiquina mehna cjẽnare yedohoye tehe Cohãcjã cahacjẽna ijire. Sa ye ñañene tiquina yeri buhiri Cohãcjũre sini basare tiquina mehna cjẽnare. Wahiqirore wejẽ ujã mũõñe, Cohãcjũre sini basare. 2 Pahia pãhtoa apequina masa yero saha quehnoano masi pehoeyequina ijire. Sa masieñequina ijiye, apequina masieñequinare yedoho masine. Sa ye quehnoano yerariquina gãhare quehnoano yedoho masine. 3 Sa ye pahia quehnoano ye pehoeyequina ijiye ñañe buhiri tiyequina ijire. Sa ye tiquina basi ñañene tiquina yeri buhiri wahiqirore wejẽ ujã mũo, Cohãcjũre sinine. Apequina masare yedohoye tehe, tiquina ñañe buhiri tiquina sini basariro sahata tiquina basi tiquina ñañe buhiri gãhare sinine Cohãcjũre.

4 Sa yero tiqairo basi tiqairo esa tuharo pahia pãhtoro sajãedare. Cohãcjũ pehe tiqirore besero, pahia pãhtoro sõre. Panopũ cjãno Aaron mũnanore tiqairo cũriro sahata apequina pahia pãhtoa gãhare cũre tiqairo. 5 Sata Cristo gãhũ tiqairo basi tiqairo esa tuharo pahia pãhtoro sajãedahye. Cohãcjũ pehe tiqirore pãhtoro sõno, ohõ saha niahye:

Yũhũ macũ ijire mũhũ. Miare mũhare bajuagũ yei, niahye Cohãcjũ.

6 Ape taha ohõ saha niahye Cohãcjũ Cristore:

Ijipihtie decori pahi ijiducugũta mũhũ. Melquisede tiqairo

ijiriro saha pahi ijiducugũta mũhũ, niahye tiqairo macãnore.

7 Cristo ahri yehpapũ ijiro sañuducuye mehna, utiye mehna mari Pacũre tutuaro siniahye tiqairo “Yũhare masoña”, nino. Mari Pacũ pehe tiqirore yariariqirore maso masiniqirore ijire. Tiqairo sa sinigũ mari Pacũ tãhoahye tiqirore. Mari Pacũ cahmeñe dihitarẽ tiqairo ye duagũ ihñano mari Pacũ pehe tiqairo sinidire tãhoro, tiqirore yãhtiahye. 8 Sa yero Cristo Cohãcjũ macãno ijieperota ñano yãhdũahye tiqairo. Sa ñano yãhdũro yãhtiahye mari Pacũre. Sa yãhtiro quehnoano yãhti masiahye. 9 Sa ñano yãhdũro, curusapũ yariaro ijipihtiequina tiqirore yãhtiatiequinare yãhdũoatiqirore wahahye. 10 Sa yero mari Pacũ pehe tiqirore pahia pãhtoro cũahye. Sa yero Melquisede pahia pãhtoro tiqairo ijiriro saha ijire Cristo.

Cristo yequina tiqirore wacũ tutua duhugũ cuarĩne

11 Peye ohõ saha ijiyere mũsare yahu nemo duaja usã. Usã sa yahu nemo duepegũta mũsa pehe dapu bũtina ijire. Sa yena mũsare yahuro basioerare usãre. 12 Yoari pje Cristo yequina ijimene mũsa. Sa yena yojopũre apequinare buhenapũ iji tũhasaboya mũsa. Mũsa sa ijiborina ijiepegũta apequina mũsa pehere buheeta. Cohãcjũ yere mijoeda cjũñe buheye dihitarẽ tũhore mũsa. Macanagã epẽco dihitarẽ tiquina apũ masino saha mũsa gãhũ mijoeda cjũñe dihitarẽ quehnoano tũhore. Coã buhe dũcayequina yero saha ijire mũsa. 13 Epẽcore apũñequina macanagã ijinine. Tiquina yero saha mũsa gãhũ ijire. “Ahri ñañe ijire. Ahri quehnoañe ijire”, ni ihña masiedare mũsa. 14 Ihyayere

ihyayequina pehe bucna ijire. Tiquina yero saha ijiyequina quehnoano taho masifequina quehnoano buheriquina ijire. “Ahri ñaÑe ijire. Ahri quehnoañe ijire”, ni ihña masine tiquina pehe.

6

1-2 Sa yena Cohãcjũ yere quehnoano masina, quehnoano yũhtina ijihna. Cristo yere coã warore mari buhe ducana ohõ saha masi ducan: Mari ñañene yerire bujua witi, duhuro cahmene. Mari ñañene yeri buhiri pecapũ wahanata. Sa yena Cohãcjũre wacũ tutuaro cahmene marine. Ahrire coã waropũre marine buhe ducari. Sa ye wame yeyere, omocarine marine tiquina duhu peoyere, yari-ariquina tiquina masa mñañene, ahri deco pihitiri bato Cohãcjũ buhiri dahreatire, tiqiro buhiri dahreatiquina tiquina ñano yũhdũducuato gãhũre ahri gãhũre coã waropũre marine buhe ducare. Sa ijiye buheyere masi tuhasana, quehnoano buhe nemouhna tja. 3 Sa yena Cohãcjũre, tiqiro ye gãhũre masi nemouhna. Cohãcjũ cahmegũ sa yenata mari.

4 Mari sa yerana Cohãcjũ yere duhuboaga mari. Cohãcjũ yere duhuriquinare ne pari turi tiquina ñañe yerire tiquinare bujua witi gã ye masiedare. Sa ijiyequina Cristo tiqiro yũhdũmediquina ijiye, Espiritu Santore cõmedi. 5 Sa ye Cohãcjũ ye yahuducuyere tãhoye quehnoañe ti yahuducuye ijigũ masimedi. Sa ye pihitiri deco batopũ Cohãcjũ tutuaye mehna mari sa ijiducuatire, masare tiqiro buhiri dahreato gãhũre tiquina masimedi.

6 Sa ijiriquinapũre Cristo yere tiquina duhugũ pari turi tiquina ñañe yerire tiquinare bujua witi gã ye masiedare. Sa duhuriquina

Cohãcjũ macũnore pari turi curusapũ tiquina quẽ bihaboriro saha tiqirore yeye nine. Tiquina sa yegũ ihñaÑe apequina masa Cristore bujũpere. Sa ye tiquina ñañe yerire tiquinare bujua witi gã ye masiedare. 7 Ohõ saha ijire ti mari queoye mehna buhegũ: Quehnoari yehpare pajiro acoro ahtagũ ti oteye quehnoano bucna, ducan tire. Sa yero ti wese upũro ducare cõore tiqiro ihyatire. Ti yehpa Cohãcjũ quehnoano tiqiro yeri yehpa ijire. Sa quehnoano yere tiqiro yequina gãhũre. 8 Sa ijiepegãta pota mehna, taa mehna ti yehpa diaro dũhseati ijierare. Sa ijiri yehpare Cohãcjũ ujuã cohãnota. Sata yere tiqiro tiqirore duhuyequinare.

Cristore sa ño peoducuyequinare yũhdũore Cohãcjũ

9 Yũhũ cahña, mũsare sa ni yahuepegata mũsa pehere “Cristore duhuna ijire”, nigũ niedaja. Mũsa pehe Cristo yũhdũonohrina ijire. Sa yena quehnoañene yena niaga mũsa. Ahrire masiaja yũhũ. 10 Quehnoano mari yeri wapa queoro marine quehnoano yeriqiro ijire mari Pacũ. Sa yero tiqiro yere mũsa tutuaro dahrari wapare bosì tiqiro. Tiquirore cahña quehnoano yedohore mũsa tiqirore. Apequina Cristo yequina gãhũre yedohona niaga mũsa. Sa yerina mũsa ijigũ ihñano bosì tiqiro. 11 Mũsa catiro puno apequinare mũsa cahĩducugũ, mũsa yedohoducugũ gãhũre cahmeaja usã. Mũsa sa yeri wapa queoro quehnoano yerota mari Pacũ mũsare. 12 Sa yena mũsa cape bujuna mũsa ijigũ cahmedaja usã. Apequina Cristo yequina ñano yũhdũepeta tiqiro yere ne duhuerare. Tiquina sa yegũ ihñano mari Pacũ “Mũsare ohoutja”, tiqiro nidire tiquinare

oho pehorota. Sa yena masa gāhū tiqina yero saha yeducuya.

13-14 Panopū Cohācjū Abrahāre ohō saha ni cūahye. “Yūhū wame mehna ahrire poto nii niaja mūhūre. Mūhūre quehnoano yeitja. Sa yegū mūhū panamena iji turiayequinare peyequina masa ijigū yeitja”, ni yahu cūahye Cohācjū. Sa ni yahu cūno tiqiro ye wame mehna wame peo yahuro niahye. Apeqiro tiqiro bui ijiriquiro ne mariedagū tiqiro ye wame mehna tiqiro basita sa wame peo yahuahye. ¹⁵ “Mūhūre quehnoano yeitja”, Cohācjū tiqiro ni cūrire Abrahā pehere quehnoano tiqiro cohtegū ihñano tiqiro nidiro sahata tiqirore quehnoano yeahye. ¹⁶ “Cohācjū mehna poto nina niaja”, masa pehe niñe, tiqina bui ijiriquiro wame mehna wame peo yahuye nine. “Cohācjū mehna poto nii niaja”, ihcāqiro nigū tūhoro apeqiro pehe tiqiro mehna cahme dūse tutuariquiro pehe “Ijirota ijire”, ninota. Sa ye cahme dūse tutua duhueta tiqina. ¹⁷ Sa yero Cohācjū Abrahāre “Mūhūre quehnoano yeitja”, ni cūno wame peo yahuahye. Tiqiro sa wame peorire tūhona “Ijirota ijire ti. Tiqiro sa nidi ne comesasi”, ni, masiaja mari. Tire mari masiato saha tiqiro ni cūri mehna wame peo yahuahye.

¹⁸ Sa yero pūaro tiqiro ni yahuducuri mehna tiqiro nidi poto ijigū masigū yeahye Cohācjū marine: Tiqiro ni cūri gāhū tiqiro wame peori gāhū ti pūaro mehna tiqiro ni yahuducurire yahuahye tiqiro. Sa ye tiqiro ni cūri gāhū, tiqiro wame peori gāhū ne comesaerare. Sa yero Cohācjū ne ni mehoedare. Tiqiro sa ijiriquiro ijigū masina, mari tiqirore quehnoano wacū tutuana, bucueye mehna marine

tiqiro yūhdūoatire cohtenatja mari. ¹⁹⁻²⁰ Sa tiqiro yūhdūoatire cohtena, wacū tutuana ijiaja mari. Sa yena cueraja. Pahia pūhoro Cohācjū ijiri tucū waropū sajāno, cahmotari suhtirore yūhdū sajāre. Sa sajāno masa ye ijiatire sini basare Cohācjūre. Tiqiro sa yeriro sahata Jesu gāhū came mari wahato sahata ūhmūsepeū Cohācjū cahapū waharo, mari ye ijiatire sini basare Cohācjūre. Topū mari wahato pano tiqiro pehe wahahye. Sa yero ijipihtiyē decori pahia pūhoro ijire tiqiro. Melquisede pahi tiqiro ijiriro saha pahia pūhoro ijire tiqiro gāhū.

7

Melquisede pahi tiqiro ijiriro saha Jesu pahia pūhoro ijire

¹ Melquisede Salē wame tiri maca cjēna pūhoro ijiahye. Sa yero pahi ijiro Cohācjū tutuariquirore, ūhmūse cjānore sini basariquiro ijiahye. Sa yero apequina pūhtoare Abrahā wejē tuhasa, tiqiro tojoa tagū waro Melquisede tiqiro ya macapū ijiriquiro Abrahāre piti caro esahye. Sa piti caro tiqirore sini basahye Cohācjūre. “Quehnoano yeya ahriquirōre”, ni sini basahye Abrahāre Cohācjūre. ² Tiqiro sa piti cato pano Abrahā pehe tiqirore ihñā tuhtiyequinare wejē tuhasa tiqiro wejēdiqina pūhtoa yere neahye. Tiqiro sa nedire mehenogā ohoahye Melquisedere. Melquisede tiqiro wame pehe “Pūhoro quehnoano yeriquiro ijire”, nino nine. Sa yero tiqiro Salē wame tiri maca cjēna pūhoro ijigū tiqiro wame ohō saha nino nine: “Pūhoro quehnoano ijigū yeriquiro”, nino nine. “Salē” nino, “Quehnoano ijiye”, nino nine. ³ Ne Melquisede pacūsmūare, tiqiro pano iji mūhtariquinare,

tiquiro acayere tiquina yahu ojoa ohōri mariedare. Tiquiro masa bajuarire, tiquiro yariari gāhure yahu ojoa ohōri mariedare. Sa yero sa ijiducuriquiro yero saha ijire tiquiro. Tiquiro sa ijiriquiro ijigū Cohācjū tiquiro mehna marine queoye mehna buhere. Cohācjū macano tiquiro pahi ijirire marine buhere. Melquisede pahi sa ijiducuriquiro yero saha ijire. Tiquiro yero saha Cristo gāhū pahi sa ijiducuriquiro ijire.

⁴ Sa yero Melquisede ne ihyo ijiriquiro ijierahye. Abrahā mari ñecū mnanano puhtoro waro ijieperota mehenogā tiquiro nedire Melquisede pehere ohoahye. ⁵ Sa yero Cohācjū dutiye Moiserere tiquiro cūri ijipihtiequina apequina Israe masare to punta wapa ye dutire. Sa dutiro Leví panamena iji turiayequinare tiquina acaye wapa yerire ñehe dutiro, cūahye. Leví panamena pahia wahae tiahye. Sa ye Israe masa Abrahā panamena iji turiayequina ijiepetata tiquina pahiare wapa yee tiahye. ⁶ Melquisede pehe Leví panamino iji turariquiro ijieraperota wapa neahye Abrahāre. Sa yero Cohācjū “Muhare quehnoano yeitja”, tiquiro ni cūriquiro ijieperota Abrahā pehe Melquisedere wapa yeahye. Sa yero Melquisede pehe Cohācjūre Abrahāre sini basaro quehnoano ye dutiahye.

⁷ Quehnoano ye dutiriquiro Melquisede pehe tiquiro quehnoano ye dutinohriquiro Abrahā bui ijire. Tire mari quehnoano masiaja. ⁸ Mari mehna cjēna pahia marine mehenogā wapa neñequina mari yero saha masa ijire. Sa ye yariatiquinata ijire tiquina gāhū. Ahriquiro Melquisede pehe Abrahāre mehenogā wapa nediquiro sa catiducuriquiro yero saha ijire. Tiquiro yariarire yahuerare, sata nino ni-

ahye Cohācjū yere tiquina ojoari pūpu. ⁹ Yojopū cjēna Leví panamena iji turiayequina pahia ijiye, mehenogā wapa nene. Sa ijiyequina tiquina ijiepegāta Abrahā Melquisedere mehenogā wapa yero, ijipihtiequina Leví panamena ye ijiatī gāhure oho basaro saha yero niahye. Sa ye tiquina gāhū Melquisedere mehenogā ohoyequina yero saha ijire. ¹⁰ Melquisedere Abrahā tiquiro wapa yeri pjere Leví pehe masa bajueraniahye. Sa ijieperota tiquiro ñecūno mnanano Abrahā pagupū tiquiro ijiboriro saha Leví pehe iji tuhasaro niahye. Sa yero Melquisede Abrahāre tiquiro piti cagū Leví gāhū tiquiro ñecūno mnanano mehna ijero saha ijero niahye. Sa ye Leví, tiquiro panamena mehna Melquisedere mehenogā wapa yeyequina yero saha ijiye, tiquina tiquiro docapū ijiye niahye.

¹¹ Tiquiro dutiyere cūno Cohācjū Levíre tiquiro acaye gāhure pahia iji dutiahye. Sa ye tiquiro dutiye nidiro sahata tiquina pahia wahiquinare wejē ujūa mho, Cohācjūre sini basahye masare. Tiquina sa yeri mehna mari yūhdūna, apequiro pahi sijoro saha ijiriquiro pahire cahme nemoedaboya mari. Sa yena apequiro pahire cahmeaja mari yojopūre, Melquisede yero saha ijiriquirore. Leví ya curua cjāno Aaron mnanano yero saha ijiyequina pahiare yojopūre mari cahmedaja. ¹² Sa yena pahiare comesana niaja mari. Mari sa comesana, marine dutiye gāhure comesaro cahmene marine. ¹³ Aaron, Leví gāhū tiquina ya curua cjēna dihitare pahia sajā duti mūhtamahye Cohācjū, tiquiro dutiyere cūno. Tiquiro sa dutiepegāta yojopūre mari puhtoro pahi sōriquiro ape curua cjāno

ijire. Sa ye ti curua cjēna ne pahia sajāedahye. ¹⁴ Tiquiro Cristo Judá ya curua cjēno masa bajuahye. Tire mari quehnoano masiaja. Sa yero, Moise pahia sōno, Judá ya curua cjēnare ne pahia sōeda tiahye.

¹⁵ Ahrire masina, ohō saha mari quehnoano masiaja: Yojoṗure wahma tiquiro sōriquiro pahi Cristo Melquisede yero saha ijiriquiro ijire. ¹⁶ Panopu cjē dutiye ti nidiro sahata Leví ya curua cjēna dihita pahia sajāhye. Yojoṗure tiquiro sōriquiro pahia tiquina yero saha pahi sajāedare. Tiquiro Cohācjū tutuaye mehna ijipihtiye decori ijiriquiro ijire. Sa yero ti tutuaye mehna pahi sajāhye tiquiro. ¹⁷ Ohō saha nine Cohācjū yere tiquina ojoari pūpu:

Ijipihtiye decori pahi ijiducugata māhū. Melquisede pahi tiquiro ijiriro saha pahi ijiducugata māhū, niahye Cohācjū tiquiro macunore, ni ojoahye panopu.

¹⁸ Ti dutiye tiquiro cū māhtari dutiye dahseati ijierahye. Sa yero ti dutiyere duhu cāhye Cohācjū. ¹⁹ Moiserie tiquiro cūri dutiye mehna ne yāhdūerare masa. Sa yero yojoṗu pehere Cohācjū marine tiquiro yāhdūotire marine cūre. Tiquiro sa yegū yojoṗure tiquiro mehna yahuducu masiaja.

²⁰ Sa yero Cristore pahi sōno, wame peoro mehna tiquirore sōahye. Apequina pahiare tiquiro yero saha wame peo sōedahye. ²¹ Cristo pehe Cohācjū wame peoro mehna pahi sajāhye. Ohō saha niahye tiquiro Pacuro Cristore:

Yūhū māhū pūhto yūhū wame mehna māhūre poto yahutja. Sa yegū ahrire ne duhu cūno marieno yahuaja māhūre. Pahi sa ijiducugata māhū, ni cūahye Cohācjū tiquiro macunore.

²² Sa wame peo cūno, wahma buheyere quehnoañe buheyere marine cūno, marine tiquiro yāhdūotire cūno niahye. Panopu cjē dutiye yāhdūoro mari quehnoano ijiatire cūno niahye. Sa yero Cohācjū “Masare yāhdūoutja”, tiquiro nidiro sahata yero taro, Jesure ohoahye marine yāhdūotiquirore. ²³ Iji māhtariquina pahia tiquina yariagū ihñañe apequina comesa sajāre tja. Sa ye tiquina peyequina pahia wahare. ²⁴ Jesu pehe sa ijiducure. Sa ye tiquirore comesayequina mariedare pahia. ²⁵ Sa yero tiquiro sa ijiducuro, Cohācjūre sa sini basaducure tiquiro yequina ye ijiatire. Sa yero Cohācjū mehna tiquina sa ijiducuoato saha masare yāhdūo masine tiquiro. Ijipihtiyequina tiquirore wacū tutuayequina Cohācjū cahapu wahaeta. Sa yero Jesu ijire potota tiquinare yāhdūoriquiro.

²⁶ Sa yero Jesu ijire mari yaquiro pahia pūhtoro. Tiquiro pūritare tutuaro cahmeaja mari. Ne ñañe buhiri marieniquiro ijire tiquiro. Sa yero masa yero saha ne ñañene yerare. Sa yero Cohācjū tiquirore ñañequina cahapu ijiriquirore neano, ahmūsepu cū, ijipihtiyequina apequina bui pūhtoro sōahye. ²⁷ Apequina pahia yero saha ijierare tiquiro. Tiquina pehe decoripe wahiquinare wejē, ūjūa mūo, Cohācjūre sinie tiri. Tiquina basi tiquina ñañe buhirire sini māhtae tiri. Came apequina masa tiquina ñañe buhiri gāhūre sini basae tiri tiquina. Sa ye peye tahari tiquina Cohācjūre sinie tiri. Jesu pehe pahi ijiro, ihcā tahata tiquiro yariari mehna siniahye Cohācjūre masa tiquina ñañe buhirire yāhdūoro taro. Sa yariaro tiquiro basi tiquiro pagure tiquiro jeripohna gāhūre tiquiro

ohoboriro saha yero niahye. ²⁸ Cohãcjũ dutiye Moiserere tiquiro cũri pahia pũhtoare sajã dutire. Sa sajãepeta ñañe marieñequina ijierare sa pahia sajãñe. Ti dutiye bato ijiye buheye mehna Cohãcjũ wame peoro mehna tiquiro yahuri buheye mehna tiquiro macuno pahia pũhtoro sajãhye. Tiquiro pehe ñañe marieniquiro sa ijiducure.

8

Cohãcjũ “Mũsare yũhdũoutja”, ni cũahye tja Moiserere tiquiro cũrire comesaro. Tire yahu basariquiro ijire Jesu

¹ Ti ijipihtiyere yahuna, ahri pũritare mũsare yahuna tana niaja: Mũsare mũsã yahuriquiro pahia pũhtoro tiquiro pũrita mari yaquiro waro ijire. Æhmũsepũ Cohãcjũ tutua yũhdũariquiro tiquiro pũhtoro dujiro poto pehe dujire Cristo mari yaquiro pahia pũhtoro. ² Sa yero ahri yehpa cjã wũhũpũ, masa tiquina yeri wũhũpũ pahia dahrayere yerare tiquiro. Æhmũsepũ ijiri wũhũpũre mari pũhtoro tiquiro yeri wũhũpũre pahia dahrayere yere tiquiro. Ti wũhũ pũrita Cohãcjũ waro ya wũhũ ijire.

³ Ijipihtiyequina ahri yehpa cjẽna pahia pũhtoa wahiquinare wejẽ mũjã mũo, ohore Cohãcjũre ño peoye. Sa ye dutie tiahye tiquinare. Mari yaquiro pahi gãhũre Cohãcjũre oho dutiahye. Mari ñañe buhirire tiquirore oho dutiahye. Sa yero Cristo mari ñañe buhiri yariaro bucuegũ yeahye Cohãcjũre, pahia pũhtoa Cohãcjũre ohoye tiquina bucuegũ yeriro saha. ⁴ Mari judio masa mari dutiye ti nidiro sahata ahri yehpũ pahia masa tiquina ñañe buhirire ohore Cohãcjũre siniñe. Sa ye ahri yehpũ pahia iji tuhasare. Sa yero Jesu pehe mari yaquiro pahi ahri yehpũ

ijinino, pahi ijieraboa tiquiro pehe. ⁵ Ahri yehpa cjẽna pahia tiquina dahrayere ahri yehpa cjã wũhũpũta dahrare. Ti wũhũpũ Cohãcjũre tiquina ño peorire ihũana ahmũse cjã wũhũpũre tiquirore mari ño peotire masi cjũna niaja. “Ti wũhũ yero saha ijire”, nino niahye Cohãcjũ cũpũpũ Moiserere tiquiro ya wũhũre dahre dutiro. Tiquiro sa dahreato panogã Cohãcjũ ohõ saha niahye tiquirore. “Cũpũpũ mũhũre yũhũ ihũoriro sahata ti wũhũ ijiriro sahata ya wũhũre queoro dahreya”, niahye Cohãcjũ tiquirore. ⁶ Sa yero yojopũ pehere Jesu pahi ijiro, tiquiro dahraye apequina pahia ye dahraye yũhdũoro ijire. Ihyo waro ijierare. Cohãcjũ marine “Mũsare yũhdũoutja”, tiquiro ni yahuri panopũ cjẽ dutiye Moiserere tiquiro cũri dutiye yũhdũoro ijire. Marine tiquiro yahuri ti dutiye yũhdũoro marine quehnoano ijigũ yeeta. Sa yero marine yũhdũo basariquiro ijiro, Cristo pehe apequina pahia yũhdũoro ijire.

⁷ Coã waropũre tiquiro dutiri mehna mari yũhdũeraja. Ti dutiye mehna mari yũhdũgũ, apeye buheyere cũedaboya Cohãcjũ. ⁸ Sa yero ti dutiyere tiquina ihcãno sahaerarire yahuro ohõ saha niahye tiquiro yeequinare Israe masare:

Ohõ saha nine mari pũhtoro: “Quehnoano tũhoya. Camepũ apeye buheyere yahutja yequinare Israe masare, Judã ya curua cjẽna gãhũre. ⁹ Ti buheye tiquina ñecũsumũa mũna iji turiayequinare yũhũ yahu cũri yero saha ne ijisi. Yũhũ basi tiquinare Egipito yehpũ ijiyequinare wĩogũ tiquinare yahu cũmi. Yũhũ sa ni yahu cũrire yũhdũũcare tiquina. Tiquina sa yegũ ihũagũ

wahmanore tiquinare yũhũ yahumedire duhu cãhũ.

¹⁰ Sa yegũ camepũ Israe masare ohõ saha ni yahutja: Yũhũ dutiyere tiquinare wacũgã yeitja. Sa ye yũhũ dutiyere yãhtietã. Sa yegũ yũhũ Cohãcjũ tiquina pũhto, tiquinare ihña ihbogũ ijigãtja. Sa ye tiquina pehe yeequina masa ijietã.

¹¹ Sa ye ti pjere tiquina mehna cjẽnare ne tiquina ohõ saha cahme nisi: ‘Mari pũhtorore Cohãcjũre masiña mũsa’, ne ni cahme buhesi. Tiquina ijipihtiyequina yũhũre masi tuhasaeta. Macanagã, bucũna gũhũ yũhũre masiñequina dihita ijietã. ¹² Sa yegũ tiquina ñãñe yerire boutja yũhũ. Sa yegũ tiquinare buhiri dahresi yũhũ. Tiquina ñãñe yerire pari turi wacũsi yũhũ”, niahye mari pũhtoro, nine Cohãcjũ yere tiquina ojoari pũpũ.

¹³ Yojoꝑũre marine tiquiꝑo ye buheyere cũno, panopũ cjẽ dutiyere duhuro nidi. Sa yero mũna dutiyere tiquiꝑo duhuri bato ti dutiye comesaa wahare.

9

Ahri yehpa cjã tucũre uhmũse cjã tucũ gũhũre Cohãcjũre ño peori tucũre yahuahye

¹ Coã waropũre Cohãcjũ tiquiꝑo dutiyere Moiserẽ cũno, masa tiquiꝑore tiquina ño peoato gũhũre cũahye. Sa yero Cohãcjũre tiquina ño peoati wũhũ gũhũre ye dutiro cũahye. ² Ti wũhũ wahiquina cahseri wũhũ ijiahye. Pũa tucũ cõoahye. Paji cjũri tucũ tiquina sajã sa mũhtari tucũ “Cohãcjũ ya tucũ”, wame tiahye. Ti tucũpũ tiquina sihõ docodũ ijiahye. Sa yero mesa gũhũ ijiahye. Ti mesa

bui Cohãcjũre tiquina ohori pã pesahye. ³ Ape tucũ suhti cahseri mehna tiquina cahmotari tucũ ijiahye. Ti tucũ “Cohãcjũ ijiri tucũ waro”, wame tiahye. ⁴ Ti tucũpũ uru mehna tiquina yeri altar, ehmeo bueyere tiquina ujuari altar ijiahye. Sa yero uru quehnoañe mehna tiquina duhu ohõri acaro topũ cuñahye. Ti acaro puhiapũ uru pa manã wame tiye ihyaye pose tiri pa ijiahye. Sa yero ti acaro puhiapũ Aaron yadũ tuadũ pũri tidũ ijiahye. Sa yero pũa pjĩ utã pjĩni Cohãcjũ dutiyere tiquiꝑo ojoari pjĩni gũhũ ti acaro puhiapũ sañahye. ⁵ Ti acaro bui pũaro angele queoye ijiahye. Ti queoye Cohãcjũ asi siteyere, ti tucũpũ tiquiꝑo ijiyere ihñõñe niahye. Ti acaro mohano bui tiquina wãye dũpũri mehna mohahye. Ti acaro mohano bui masa ñãñe buhirire tiquina ohorire wejẽ site peoe tiahye pahia pũhtoro. To punota yahutja ahri wũhũ cjẽne yojoꝑũre.

⁶ Sa ye ti wũhũre tiquina quehnoano quehnoari bato pahia decoripe tiquina sajã sa mũhtari tucũpũ sajã sa, tiquina dahrayere yee tiahye. ⁷ Sa yero pahia pũhtoro dihita ape tucũpũ sajãhye. Cũhmaripe ihcã tahata tiquiꝑo sajãri deco boropũta sajãe tiahye tiquiꝑo. Sa sajãno tiquina wejẽdiquiro wahiquiꝑo tiquina ohoriquiro diire ne sajãno, Cohãcjũre ño peoe tiahye. Dii marieno ne sajãedahye. Tiquiꝑo basi tiquiꝑo ñãñe yeri buhirire diire ne sajãe tiahye. Sa yero ijipihtiyequina apequina Israe masa “Ñãñe ijiaga”, nino marieno tiquina ñãñe yeri buhiri gũhũre diire ne sajãe tiahye tiquiꝑo Cohãcjũre sinino taro.

⁸ Ijipihtiye ahri mehna Espĩritu Santo ohõ saha ni marine buhero nine: Ti wũhũpũ Moiserẽ tiquiꝑo cũri wũhũpũ mari ño peoĩna, tiquiꝑo cũri dutiyere yeatina

ijinina, ihyo ijina Cohācjäre ño peona wahaeraboya mari. Pahia puhtoro dihita Cohācjü ijiri tucü waropu sajā masine. Sa yena ihyo ijieyequina tiquina ño peoye wahaeraro saha sa ijiboya mari Moisere tiquiro cūri dutiyere yena.

⁹ Ahri ijipihtiyere Cohācjäre ño peori wahuḥuḥu ijiyere marine cūno, marine yojopu cjēnare buhero ni-ahye Cohācjä. Wahiquinare wejē uḥā maḥo, masa Cohācjäre tiquina ño peori mehna ne Cohācjü cahapu wahasi. Tiquina sa yeri mehna tiquina ñaṇe yerire cose werahye. ¹⁰ Sa wahiquinare ohoye, tiquina ihyaye, tiquina sihniṇe, tiquina pagu coseye, tiquina ohō saha yeye mehna Cohācjäre ño peoe timahye. Ahri tiquina sa yeri ihyo warota ijire yojopare. Sa yeye ti dutiye Moisere tiquiro cūri dutiye marine quehnoana wahagū yerahye. Sa ye wahma buheyere Cohācjü tiquiro cūri bato mana dutiye pehe dahseati ijierare.

¹¹ Cristo pehe mari pahia puhtoro ijero ahta tuhasari jiri. Sa ijero marine quehnoañene cū tuhasari jiri. Cohācjäre ño peori wahuḥu uḥmusepu pahia puhtoro tiquiro dahrari wahuḥu apequina pahia tiquina dahraye wahuḥu ye yuhduoro quehnoari wahuḥu ijire. Uḥmuse cjä wahuḥu ijire. Ti wahuḥu ahri yehpa cjä wahuḥu ijierare. Sa yero masa tiquina yeri wahuḥu ijierare. ¹² Sa yero Cristo uḥmusepu Cohācjü ijero waropu ihcā taha sajāhye mari ñañene yeri buhirire Cohācjäre ohoro saha yero taro. Topu uḥmusepu ohōpu tiquiro ijiri tucü waro yero saha ijire mari queoye mehna buhegā. Sa yero chivoa diire, wecagā diire ne sajā, ohoerahye tiquiro. Tiquiro pehe tiquiro ye dū warore Cohācjäre tiquiro ohoro saha yero niahye yariaro. Ijipihtiyere decori Cohācjü mehna mari ijiducato saha

tiquiro ye diire cohāhye. Mari ñañe buhirire yariahye.

¹³ “Yariariquinare dahra peona mḥsa pagu wete tina ijire”, ni cūahye Cohācjü Moisere. Sa ijieyere ñañene wete tiyere cose wee tiahye chivoa diire tiquina ohori mehna. Wecua diire tiquina ohori mehna, wecagāre tiquina uḥjari nitine tiquina ohori mehna sa ijieyere ñañene cose wee tiahye. ¹⁴ Sa ijieyere ñañene wahiquina diire tiquina ohori mehna, nitine tiquina ohori mehna tiquina cose weriro saha ti yuhduoro Cristo pehe tiquiro diire cohāno mehna mari ñañe yerire quehnoano cose we peho cāre. Tiquiro ñañe marieniquiro ijero, curusapu yariaro tiquiro basita tiquiro pagu, tiquiro jeripohna mehna Cohācjäre ohoro saha yeahye. Espiritu Santo sa ijiducuriquiro yedohoye mehna sa yeahye tiquiro. Sa ye mari ñañe yerire tiquiro cose wegū ihñano mari ñañe buhirire Cohācjü bo cāhye. Ti ñañe buhirire cuona pecapu wahaborina ijimi mari. Tiquiro cose wenohrina ijina, Cohācjü catiriquiro tiquiro cahmeñene ye masiaja mari.

¹⁵ Sa yero “Ohō saha mḥsare yuhduoutja”, masare pari turi Cohācjü ni yahu cūgū Cristo pehe tiquiro yahuyere yahu basariquiro ijire. Sa yahu basare tiquiro Cohācjü beseriquinare yuhduoro taro. Tiquiro sa yuhduogū ijipihtiyere decori tiquiro mehna ijinata mari tiquiro yequina. Sa yena mari tiquiro yequinare Cohācjü marine ohoatire cuonata mari. Moisere tiquiro cūri dutiye dihita ijigū masa tiquina ñañe buhiri ijinahye. Sa yero curusapu yariaro ti pjeta tiquina ñañe yeri buhirire yuhduoahye tiquiro yequinare.

¹⁶⁻¹⁷ Masano came tiquiro acayere tiquiro ohoatire ojoa ohōyure papera pūpu. Tiquiro ohoatire yahuro taro ojoa ohōyure.

Ti pũre ojoa ohõyuriqiro tiqiro yariëranigã ti pũ dahseati ijierare. Tiquiro acaye tiqiro caõrìre nea masiedare. Sa ye tiqiro yariagã ihñañe ti pũpũ tiqiro ni ojarìro sahata tiqiro yere neañeta tiquina. ¹⁸ Tiquiro yariato pano ti pũ dahseati ijieraro sahata yariaro marieno dii wijiario marieno Cohãcjũ Moiserë tiqiro cũri dutiye gũhũ ne dahseati ijieraboya. Sa yero wahiquiro diire tiqiro wejẽ siteri bato ti dutiyere potota yero niahye.

¹⁹ Sa yero ohõ saha ye mahtahye Moise: Cohãcjũ tiqiro cũri dutiyere masare yahu pehoahye. Came wecuagã diire, chivoa diire aco mehna moreahye. Sa yero hisopo wame tidũ dapũ mehna oveja poari sohãñe mehna tiquina ñimiori poarìre torëahye. Ti dapũ mehna diire soharo, Cohãcjũ dutiyere tiqiro ojoari pũ bui wejẽ site peoahye. Ijipihtiyequina masa bui gũhare wejẽ site peoahye.

²⁰ Sa yero ohõ saha niahye tiqiro: “Cohãcjũ marine tiqiro yahuri tiqiro dutiri ahri dii mehna poto ijigã masiaja mari. Ahri diire ihñana tiqiro nidiro sahata marine tiqiro yeatire masiaja mari. Ti dutiyere yahti dutiahye tiqiro marine”, niahye Moise. ²¹ Sa yero masare tiqiro yeriro saha Cohãcjũre tiquina ño peori wũhũ wahiquina cahseri wũhare, ijipihtiye ti wũhũpũ ijiye gũhare wejẽ siteahye. ²² Sa tjire. Ti dutiye ti nidiro sahata peye ñañene dii cohãno mehna cose wero cahmene. Mehenogã dahsaye ñañene apee boro mehna cose wegũ quehnoare. Sa yero Cohãcjũ mari ñañe yerire ne bosì dii cohãedagũ.

Cristo tiqiro diire cohãno, yariaro, tiqiro yequina ñañe yerire cose weahye

²³ Ti ijipihtiye Cohãcjũre tiquina ño peori wũhũ, ti wũhũpũ ijiye gũhũ ahmũse cjã wũhũpũ ijiye yero saha ijiahye mari queoye mehna buhegã. Ëhmũse cjã wũhũ pehe potota Cohãcjũ ya wũhũ waro ijire. Sa yero ahri yehpa cjã wũhare, ti wũhũpũ ijiye gũhare wahiquina diire tiqiro wejẽ siteri mehna cose wero cahmeahye. Sa ye ti yũhdũoro ahmũsepũ wahatiquinare tiquina ñañe buhiri tiyequinare cose wero cahmene. Sa yero wahiquina yũhdũoro ijiriquiro ye dii tiqiro cohãno mehna tiquina ñañe yerire cose wero cahmene.

²⁴ Sa yero Cohãcjũre tiquina ño peori wũhũ masa yeri wũhũ ijire. Ëhmũse cjã wũhũ yero saha ijire ti wũhũ gũhũ, mari queoye mehna buhegã. Sa yero Cristo pahi ijiro, marine sini basaro taro ahri yehpa cjã wũhare sajãedahye. Potota ahmũsepũ wahahye tiqiro Cohãcjũ caha marine sini basaro taro. ²⁵ Mari judio masa mari pahia pũhtoro cahmaripe Cohãcjũ ijiri tucũ waropũ sajãe tiahye wahiquina diire ohoro taro. Cristo pehe tiqiro diire Cohãcjũre ohoro saha yero taro, yariaro, peye tahari sajãedahye. ²⁶ Peye tahari yariariquiro ijiro, ahri yehpa iji dũcari bato peye tahari yariaboya tiqiro. Peye tahari tiqiro mari ñañe buhirire yariaducuriquiro ijiboya. Sa ijiboriquiro ijeperota pihtiri deco panogã yojopũre marine ijiphtinare yũhdũoro taro ihcã taha bajuahye tiqiro ahri yehpapũ. Sa bajuahye yariaro taro, mari ñañe buhirire cohãno taro.

²⁷ Ijipihtiyequina masa ihcã tahata yarieta. Tiquina sa yariari bato masa quehnoañequinare, ñañequina gũhare beserota Cohãcjũ. ²⁸ Ihcã tahata mari yariaro saha Cristo gũhũ ihcã tahata yariahye peyequina masa tiquina ñañe

yerire cohãno taro. Came pari turi ahtarota. Mari ñaife yerire cohã tuhasariquiropu ijirota. Sa yero pari turi mari ñaife yerire cohãno taro ahtasi. Sa ahtarotiqiurore cohteyequinare, bucueye mehna tiqiurore ihña duayequinare yuhduoro ahtarota.

10

¹ Cohãcjũ dutiye Moiserer tiqiuro cûri quehnoañe buheye yero saha ijiepetata, ihcãno saha ijierare. Ti dutiye ti ye dutiriro saha cãhmaripe wahiquinare wejẽ, ujãa m̃uo, Cohãcjũre ño peoducure. Tiquina sa yeye mehna masa tiquina ñaife yerire boerare Cohãcjũ. ² Ti mehna tiquina ñaife yerire Cohãcjũ bogũ, ihcã tahata Cohãcjũre tiquina ño peori bato “Yojoꝑure buhiri mariedare usãre”, ni tuhutuboya masa. Sa ye pari turi wahiquinare wejẽ ujãa m̃uo, Cohãcjũre ño peo ohoeraboya. Duhu cãboya. ³ Cãhmaripe wahiquinare wejẽ ujãa m̃uo, Cohãcjũre tiquina ño peogũ tiquinare ñaife buhirire wacũgũ yere. To punogãta yedoho duare ti tiquinare. ⁴ Wecua dii mehna mari ño peori mehna, chivoa dii mehna mari ño peori mehna ne mari ñaife buhirire cohãedare.

⁵ Ti ijirota ijire. Ti sa ijigũ ihñano Cristo ahri yehpapure tiqiuro ahtato pano ohõ saha niahye Cohãcjũre:

Wahiquinare ujãa m̃uo tiquina ohogũ, trigore tiquina ohogũ gãhãre m̃uhũ ihñagũ bucuerare m̃uhũ. Sa yegũ yuhũ pagure yeri m̃uhũ ya pagũ ijiatire. ⁶ Ñañene tiquina cohãtore wahiquinare wejẽ, tiquina ujãa m̃uogũ ihñagũ bucuerare m̃uhũ. ⁷ M̃uhũ sa bucueragũ ihñagũ ohõ saha nii m̃uhãre: “M̃uhũ cahmeno sahata yegũ wahagũtja. Sata ni yahure m̃uhũ ya pũpũ”, nii

yuhũ, niahye Cristo tiqiuro Pacãrore.

⁸ “Wahiquinare ujãa m̃uo tiquina ohogũ, trigore tiquina ohogũ gãhãre ihñagũ bucuerare m̃uhũ”, ni yahu m̃uhãtaye tiqiuro. Coã waropure tiqiuro ye dutiye wahiquinare, trigo gãhãre tiquina ohoye mehna ti ño peo dutiepegũta sa niahye tiqiuro. ⁹ Sa ni tuhasa ohõ saha ni nemoahye: “M̃uhũ cahmeno sahata yegũ wahagũtja”, niahye. Tiquiro sa nigũ ohõ saha masiaja mari. Panopũ wahiquinare wejẽ ujãa m̃uoñe mehna tiquina ño peorire duhugũ yero, apeye buheye pehere cũno niahye Cohãcjũ. (Sa cũno yojoꝑure Cristo tiqiuro yariari mehna masare yuhduorota Cohãcjũ.) ¹⁰ Jesucristo tiqiuro pagure ohoro, yariaro, ijipihtina marine mari ñano yerire cohãre. Ihcã tahata tiqiuro pagure ohore mari ñañene cohãno taro. Sa yero Cohãcjũ cahmeno sahata yero niahye.

¹¹ Ijipihtina mari judio masa mari yequina pahia decoripe Cohãcjũre ño peori wuhũpũ dahraducure. Sa dahraducuye decoripe m̃nanota wahiquinare wejẽ, ujãa m̃uo, Cohãcjũre siniducure. Tiquina sa wejẽ ujãa m̃uoepegũta ti ujãa m̃uori mari ñano yerire ne cohãedare. ¹² Cristo pehe ihcã tahata mari ñaife buhirire yari-ahye, mari ñaife yerire quehnoano cohã pehorotaro. Tire cohã tuhasa, wahaa wahahye tiqiuro Pacãro cahapũ tiqiuro pototo pehe dujiro waharo. Pũhutoro ijiro, topũ dujire. ¹³ Topũ dujiro, cohtero nine. Tiquirore ihña tuhtiyequinare Cohãcjũ pehe tiqiuro yuhduũca basatore cohtero nine. ¹⁴ Sa yero ihcã tahata tiqiuro yariari mehna tiquina ñañene cohãnohriquinare ñañe marieñequina sa ijiducugũ yere tiquinare. ¹⁵ Ti ijirota ijire. Sata

ni yahure Espiritu Santo marine. Ohō saha ni yahure tiqiro:

¹⁶ Ohō saha nine Cohācjū: “Camep̄are ohō saha ni yahutja Israe masare. ‘Ȳh̄u dutiyere tiquina wacūñep̄a cūtja’, ni yahutja”, nine tiqiro.

¹⁷ Ohō saha ni nemore Cohācjū:

“Tiquina ñañe yerire pari turi wacū nemosi ȳh̄u”, nine tiqiro, ni yahure Espiritu Santo.

¹⁸ Mari ñañe yerire tiqiro sa bogū pari turi mari ñañe buhiri yaria-tiqirore cahmedaja mari.

Cohācjū cahap̄a esana, cuero marieno tiqiro mehna mari yahuducuboriro saha tiqiro mehna yahuducu masiaja yojop̄are (Mt 27.51; Mr 15.38; Lc 23.45)

¹⁹ Sa yena ȳh̄u acaye, Cristo tiqiro yariaro mehna tiqiro dii cohāno mehna yojop̄are mari gāh̄u cuero marieno Cohācjū mehna yahuducu masiaja. Sa yena tiqirore sini masiaja. ²⁰ Ahri yehpa cjāno pahia p̄h̄toro Cohācjū ijiri tucū warop̄a tiqiro yemedi yojop̄are marine d̄h̄seati ijierare. Ti mehna Cohācjū mehna yahuducu masiedaja mari. Cristo pehe mari ñañene yeri buhirire yariaro tiqiro dii cohāri mehna Cohācjū mehna yahuducu masiaja mari. Pahia p̄h̄toro ti tucūp̄a tiqiro sajāriro sahata Cristo pehe Cohācjū cahap̄a esahye mari ñañe yerire bo dutiro waharo. Ti tucū cjā cahserore cahmotari cahserore tiqiro t̄hr̄e cohāriro saha Cristo tiqiro pagare cohāh̄ye Cohācjū mehna marine iji dutiro.

²¹ Sa yero Cohācjū ya w̄h̄p̄a dahrariqiro mari yaqiro pahi tutua ȳh̄d̄uariqiro ijire tiqiro.

²² Sa yena Cohācjūre siniihna poto ni mehono marieno. Tiquirore quehnoano wacū tutua, cuero marieno tiqirore siniihna. Cristo

mari ñañe yerire tiqiro cose wenohrinap̄a ijiaja. Sa yena “Buhiri tina ijiaja mari”, ni t̄h̄otuna ijieraja mari. Sa yena wete marieñe aco mehna mari cose wero saha Espiritu Santo tiqiro cose wenohrinap̄a ijiaja. Sa yena Cohācjūre siniihna.

²³ “M̄sare ȳh̄d̄uoutja”, tiqiro ni-diro sahata yerota. Sa yena marine tiqiro ȳh̄d̄uatore quehnoano masiaja mari. Tire masina, ne boeracūhna. Cohācjūre sa wacū tutuaducuuhna. Sa wacū tutuana tire apequinare yahuaja. ²⁴ Mari mehna cjēnare cahīna, tiquinare yedohouhna mari, ijipihina mari ihcāno saha mari cahme cahī yedohoato saha. ²⁵ Sa yena quehnoano cahmecoadducuuhna Cohācjū yere yena tana. Apequina pehe tiquina cahmecoamedirore

duhuye nine. Tiquina yero saha yeracūhna. Mari mehna cjēnare bucuegū yeihna. Ahri yehp̄ap̄are mari p̄h̄toro ahtato mehenogā d̄h̄sare. Tire masina tutuaro bucuegū yeihna mari mehna cjēnare Jesu yequinare.

²⁶ Poto ijiye buheyere quehnoañe buheyere mari masiepenata ñañene mari pari turi sa yeducugū mari ñañene cose we nemoato ne mariedare. ²⁷ Sa yero sa yeyequinare cuarīne. Ijipihitiye-

quina tiqirore ihña tuhtiyequinare buhiri dahrero, tutuaro w̄j̄n̄op̄a cohānota Cohācjū tiquinare. Sa ye tiqiro buhiri dahreatire cueyequina dihita ijimene tiqirore duhuyequina.

²⁸ Cohācjū dutiye Moiserere tiqiro cūrire ȳh̄d̄ud̄ucayequinare buhiri dahreye, mari acaye judio masa wejēne tiquinare. Ne paja ihñano marieno wejēne tiquinare. Ihtiaro tiquina yahusāgū t̄h̄oro beseriquiro tiquina ȳh̄d̄ud̄ucarire masino tiquinare buhiri dahre dutire. Ihtiaro mariedagū p̄aro tiquina yahusāgū tiquinare buhiri

dahre dutire. Sa dutigū tiquinare wejēne.

²⁹ Ti bui cjūno Cohācjū macunore ihña yabiyequina tiquiro buhiri dahreatiquina ijietā. Cristo dii cohāri mehna mari ñañe yerire cohāre Cohācjū. Sa cohātore yahuahye tiquiro marine. Sa yeye tiquina ñañe yerire cohānohriquina ijiepetā pari turi ñañene yeye, tiquina ñañe yerire tiquiro cohārire tiquiro dii gūhure “Ihyo waro ijire”, niñe nieta. Sa niñequina tiquiro buhiri dahreatiquina waro ijieye nieta. Sa niñequina Espiritu Santore ñano ni yahuducuyequina ijire. Tiquiro tiquinare cahñiquiro ijire. Tiquina sa ñano yahuducugū ihñano tutuaro buhiri dahrerotā Cohācjū tiquinare. ³⁰ Ahrire mari quehnoano masiaja. Cohācjū tiquiro basita ohō saha niahye: “Yuhū ijiaja buhiri dahreacjū. Tiquina ñañene yeri buhiri buhiri dahreitja yuhū”, niahye tiquiro. Ohō saha ni nemoahye: “Yeequina ijimediquinare ñano yeequinare buhiri dahreitja yuhū”, niahye tiquiro. ³¹ Cohācjū catiriquiro marine tiquiro buhiri dahregū cua yuhūare.

³² Panopū mūsa ijirire wacūña mūsa. Ti pjere Cohācjū yere coā masi dūcana peye tahari ñano yuhūepenata tiquiro yere cohāedari mūsa. ³³ Ihquē tahari masa tiquina ihñonopū arequina mū sare ñano ni, ñano yeperi mū sare. Sa yena arequina Jesu yequinare tiquina ñano yegū ihñana, tiquinare paja ihñari mūsa. ³⁴ Peresupū ijieyequinare paja ihñari mūsa. Sa yena mūsa yere tiquina ehmaepēgūta bucueye mehna, “Quehnoanota”, nidi mūsa. Ahri yehpa cje yuhūoro quehnoañene cūore mūsa uhmūserū. Ti quehnoañe sa ijiducueta. Tire masina, mūsa cūoyere tiquina ehmagū

bujūa witierare mūsa. ³⁵ Sa yena cueracāhña. Cohācjūre sa wacū tutuaducueta. Mūsa sa yeri wapa tiquiro quehnoano yerota mū sare. ³⁶ Cohācjū “Mū sare ohō saha yedohoutja”, tiquiro ni cūrire quehnoano cohteya mūsa tiquirore wacū duhuro marieno. Sa cohtena tiquiro cahmeñene yenata mūsa. Sa yena tiquiro ni cūrire cūonata. ³⁷ Ohō saha nine Cohācjū yere tiquina ojoari pūpū: Mehēnogā dūhsare Cristo wihiato. Sa ahtarō duita wihi madoqueorota. ³⁸ Yeequina quehnoañequina pehe yuhūare wacū tutuaducueta. Sa ye yeequina yuhū mehna sa ijiducueta. Yeere cohāñequina pehere ihña yabi-aja yuhū, niahye tiquiro ye yahuducuye tiquina ojoari pūpū.

³⁹ Mari pehe Cohācjū yere cohārina ijieraja mari. Sa yena pecapū wahatina ijieraja mari. Cohācjūre wacū tutuaja mari. Sa yena tiquiro yuhūorina ijiaja.

11

Wacū tutuayere yahuahye

¹ Ohō saha ijire wacū tutuaye: Cohācjūre wacū tutuana, marine tiquiro quehnoano yeatire quehnoano masiaja mari. Cohācjū tiquiro nidiro sahata yeraniepegūta tiquiro yahuyere “Ijirota ijire”, ni tūhotuaja mari tiquirore wacū tutuana. Tiquirore ihñedapenata, wacū tutuana, “Ijirota ijire”, ni tūhotuaja mari tiquiro yahuyere tūhona. ² Panopū cjēna Cohācjūre tiquina wacū tutuagū ihñano bucueahye tiquiro pehe.

³ Cohācjū tiquiro yahuducuye mehna ijipihtiyere bajumehnee tiahye. Sa yero tiquiro mari ihñedari mehna ijipihtiyē mari yojopū ihñañene bajumehnee tiahye. Tire mari quehnoano

masiaja Cohãcjäre wacũ tutuana pũrita.

⁴ Cohãcjäre wacũ tutuaro Abe pehe corderore wejê, ujãa m̃o, Cohãcjäre ño peo “Quehnoare”, niahye. Tiquiro wahmino Caĩ yãhd̃oro quehnoanore ohoro, ño peohye tiquiro Cohãcjäre. Sa yero Cohãcjũ tiquiro ohorire bucueahye. Sa bucuero “Quehnoariquiro ijire”, ni ihñahye tiquiro Abere. Sa Cohãcjäre tiquiro wacũ tutuagũ ihñana mari tiquirore ihña cũaja. Sa yena tiquiro yariari bato ijiepegãta tiquiro wacũ tutuarire ihña cũaja mari.

⁵ Enoco Cohãcjäre tiquiro wacũ tutuagũ ihñano bucueahye Cohãcjũ. Sa bucuero tiquirore tiquiro cahapũ ne m̃oahye. Sata nine Cohãcjũ yere tiquina ojoari pũpũ. Tiquiro ne m̃ori bato masa tiquirore ne bocaerahye. Tiquiro ne m̃onohriquiri ijiro ne yarierahye. ⁶ Cohãcjäre wacũ tutuerana tiquirore bucuegũ ye masiedaja mari. Cohãcjäre wacũ tutuerana, tiquirore ño peo masiedaja mari. “Potota tiquiro Cohãcjũ warota ijire. Sa yero tiquirore mari ño peogũ marine quehnoano yere tiquiro”, mari ni tãhotuerana mari tiquirore sini masiedaja.

⁷ Noé Cohãcjäre wacũ tutuaro, tiquirore Cohãcjũ yahurire quehnoano yãhtiahye. Camerpũ tiquina ñano wahatore tiquiro yahugũ tãhoro quehnoano yãhtiahye tiquiro. Sa yãhtiro, pajiria yucũsare yeahye. Sa yeye tia yucũsa mehna tiquiro acaye mehna dia mininore yãhd̃uahye. Sa wacũ tutuariquiro ijiro ahri yehpa cãena ñãñequina tiquina wacũ tutuarire tiquina pecapũ wahato gãhãre ihñono niahye. Sa yero tiquiro wacũ tutuagũ ihñano “Quehnoariquiro ijire”, ni ihñahye Cohãcjũ tiquirore.

⁸ Abrahã gãhã Cohãcjäre wacũ tutuaro tiquirore yãhtiahye. Ape dihtapũre tiquirore ohoati dihtapũre Cohãcjũ waha dutigũ tãhoro Abrahã yãhtiahye. Tiquiro ya dihtapũ ijiriquiro wijiaa waharo, tiquiro masiedi dihtapũ esahye. ⁹ “Ahri dihtare mãhãre ohoutja”, Cohãcjũ nigũ tãhoro tiquirore wacũ tutuaro ti dihtapũta tojoahye tiquiro. Topũ ijiro ape dihta cãeno ijieperota topũta tojoa cãhye. Tiquirore, tiquiro macũno Isaac gãhãre, tiquiro panamino Jacob gãhãre tiquinare “Ahri dihtare mãsare ohoutja”, ni Cohãcjũ yahue tiahye tiquinape. Tiquina tãhoe tiahye. Sa yeye tiquina ti dihtapũ ijie, wãhiquina cahseri wãhũsepũ ijie tiahye m̃nanano ijieyequina ijieye. ¹⁰ Topũ ijinie tiahye Abrahã Cohãcjũ mehna tiquiro ijiatore cohtero. Ape macapũ Cohãcjũ ijiri macapũ ãhmũsepũ tiquiro wahatore cohtero niahye. Ti macare dahreahye Cohãcjũ. Sa yero ti maca ne pihtisi.

¹¹ Cohãcjäre wacũ tutuaro, bucũro waro ijieperota, tiquiro namono Sara bucũoro waro ticoro ijiepegãta, Abrahã pohna tiahye. “Tiquiro nidiro sahata yerota”, Cohãcjäre nino sa pohna tiahye. ¹² Sa yero Abrahã bucũro waro ijieperota pohna tiahye. Sa yeye tiquiro panamena iji turiayequinapũ peyequina waha cãhye. Ñãhpicoha parire, padũ pjeri gãhãre mari queona ihcãno sahaeraro sahata tiquiro panamena iji turiayequina gãhãre queona ihcãno sahaeraja mari.

¹³ Ijipihtiyequina ahriquina yãhã yahuriquina Cohãcjäre wacũ tutua tuhasayequinapũ yariahye. Cohãcjũ tiquinare “Mũsare ohõ saha yeitja”, tiquiro ni cũiroro eserapeta yariaa wahahye. Tire ñehedapeta Cohãcjũ tiquiro nidiro sahata camerpũ tiquina cãoatire

masiahye. Sa masiñe bucueahye. Sa yeye ohō saha niahye tiquina: “Ahri yehparu tinina ijiaja. Ape yehpa cjēna ijiaja”, niahye tiquina. ¹⁴ Sa niñequina ape yehpare tiquina ya yehpa ijiatore cohteye nine. Tire mari quehnoano masiaja. ¹⁵ “Ape yehpa cjēna ijire”, nigu panopu tiquina cohāri yehpare nigu niedaja. Ape yehparu tiquina iji muhtari yehparu waha dua, wahaa wahaboya. ¹⁶ Quehnoa yuhduari yehpa pehere cahmeñe niahye. Ti yehpa uhmusepu ijire. Tiquina sa cahmegū ihñano “Cohācjū usā puhtoro ijire”, tiquina nigū tuhtoro bue tisi Cohācjū. Tiquina ya maca ijiatore dahre basa tuhasahye tiquiro.

¹⁷⁻¹⁸ Cohācjū Abrahāre tiquiro macunore Isaare wejē ujūa nuo dutiahye. Tiquirore ihña duaro sa dutiahye, “¿Ijirota yuhare wacū tutuajari?” nino. Cohācjūre wacū tutuaro tiquiro nidiro sahata yemahye Abrahā. “Mahu macu Isaac mehna panamena iji turi-ayequinare peyequinare cuoguta mahu”, Cohācjū tiquiro nidiquiro ijiepegūta tiquiro macunore wejēno taro nimahye Cohācjūre ño peoro taro. ¹⁹ “Yuhu macu Isaare yuhu wejēgū Cohācjū tiquirore masonota”, ni tuhoturo, tiquirore wejēno taro nimahye. Sa nidiquiro ijieperota Cohācjū tiquirore cahmota, wejē dutierahye. Tiquiro pacaro tiquiro sa wejēboriquiro ijiro yaria masariquiro yero saha ijiahye Isaac, Abrahā ihñagū. Sa yero Abrahā tiquirore catiriquirore pari turi cuoahye.

²⁰ Isaac Cohācjūre wacū tutuaro, tiquiro pohne Jacore, Esaú gūhare “Cameru Cohācjū musare pajiro quehnoano yerota”, niahye.

²¹ Cohācjūre wacū tutuaro Jacob tiquiro yariato panogā José pohne, unuare “Cohācjū musare pajiro quehnoano yerota”, niahye

Jacob. Dusepe curi mehna quehe sa, tiquiro tuadu mehna tua ñehe cuña, Cohācjūre ño peoro “Cohācjū musare quehnoano yerota”, ni cūahye.

²² Cohācjūre wacū tutuaro José tiquiro yariato panogā Israe masa Egiptoru ijiyequina tiquina wijiatire yahuyuahye. Sa tiquina wijiatire masiyuro tiquiro yariari bato tiquiro pagure nea dutiahye tiquiro pohne.

²³ Cohācjūre wacū tutuaye, Moisegāre ihtia asū waro nuo cuoahye tiquiro pacusuma, tiquiro masa bajuari bato. Quehnoariquirogā tiquiro ijigū ihñañe tiquirogāre nuoahye. Ti yehpa cjēna puhtoro tiquina pohne tiquiro wejē dutirore yuhduca cāhye tiquina. Tiquirore cuerahye.

²⁴ Moiserere masoricoro Egipto yehpa cjēna puhtoro macono ijiahye. Sa ticoro masonohriquiro ijiro, Cohācjūre wacū tutuaro “Ticoro macuno ijire”, ni pisugū cahmedahye Moise. ²⁵ Cohācjūre yuhducariquiro ijiro tiquirore masoricoro caharu meheñe decorigā quehnoano ijiboya. Sa ijiboriquiro ijieperota ti yuhduoro tiquiro Cohācjū yequina mehna ñano yuhdu duahye. ²⁶ Sa ñano yuhduoro Cristore tiquina bujuprato sahata tiquina bujuperiquiro ijiahye. Cameru tiquiro quehnoano yeri wapa Cohācjū tiquirore tiquiro quehnoano yeatire masino ñano yuhdu duahye, Cristo tiquiro ñano yuhduato sahata. Ijipihtiyequina Egipto cjēna quehnoañene tiquina cuoro yuhduoro tiquiro Cohācjū pehere tutuaro cahmeahye. Ñano yuhduerperota, Cohācjūre cahmeahye.

²⁷ Cohācjūre wacū tutuaro, Egipto cjēna puhtoro tiquiro mehna usuagū cuerahye. Sa cueraro ti yehparu ijiriquiro ti yehpare cohā cāa wahahye. Sa

yero Cohãcjäre bajueriquirore tiqiro ihñaboriro saha cuerariqiro ijahye. Cohãcjü tiqirore ye dutirire ne cohãedahye Moise. ²⁸ Cohãcjäre wacü tutuaro Moise Israe masare Cohãcjü yãhdũoatire masiahye. Sa masino Cohãcjü dutiriro sahata Israe masa tiquina sopecaharire ohõñe pjĩnine dii mehna wejẽ site dutiahye tiqiro. Tiquina sa yegũ ihñano angel masare wejẽdiqiro tiquina wahmisũmũare wejẽboriqiro Israe masa pohne wahmisũmũare wejẽdahye.

²⁹ Cohãcjäre wacü tutuaye, Israe masa “Sohãri ma”, tiquina nidi mapũ aco watoa ijiri mahapũ aco marieni mahapũ pehãa wahahye. Tiquina sa pehãgũ ihñañe Egipto cjẽna gũhu tiquinare ihña cũ, nunũ tã pehãmehe, mini yariaa wahahye.

³⁰ Cohãcjäre wacü tutuaye, Israe masa Jericó wame tiri maca cjã sahrĩno pajiri sahrĩno behero pehe majare sotoahye. Siete decori waro ti macare majare sotoa tiniahye. Tope decori tiquina majare sotoa tinidi bato ti sahrĩno sehte bora dijia pihtia wahahye. ³¹ Cohãcjäre wacü tutuaro umũa mehna ñano yeducedicoro Rahab wame tiricoro, ti maca cjõno Israe masare yedohoahye. Ti macare tiquina cohãto pano meheñequinagã Israe masa topũ sajã tiquina duhti ihñagũ, ticoro tiquinare yedohoahye. Ticoro sa yedohogũ ihñañe Israe masa wejẽdahye ticorore. Sa yeye ti maca cjẽnare Cohãcjäre yãhdũdũcayequinare wejẽpeta ticoro pehere wejẽdahye.

³² Apequinare Cohãcjäre wacü tutuayequinare yahu nemoboa yũhu. Sa yahu duepegũta peyequinare sa Cohãcjäre wacü tutuayequinare yahu ojoa peho masiedaga yũhu. Peyequina ijire tiquina. Gedeõ, Barac, Sansõ,

Jefté, Davi, Samuel, Cohãcjü yere yahu mũhtariquina gũhu ahriquina ijipihtiyequina yũhu yahuboriquina ijire. ³³ Cohãcjäre wacü tutuayequina ihquẽquina apeye yehparipũ ijiye macari cjẽnare cahme wejẽ yãhdũdũcahye. Sa yeye apequina quehnoano dutyequina ijahye. Cohãcjü tiquinare “Mũsare yedohoutja”, tiqiro nidiro sahata tiquinare yedohoahye. Tiquirore tiquina wacü tutuagũ ihñano sa tiquinare yedohoahye. Sa wacü tutuaye, yaya tiquinare ihya duagũ tiquina dũserire bihagũ yeahye tiquina. ³⁴ Tutuaro uĩjũri pecapũ ijiepetã uĩjedahye tiquina Cohãcjäre wacü tutuaye. Apequina tiquinare ñose wejẽ duagũ duhti cãa wahahye Cohãcjäre wacü tutuaye. Tutueyequina ijiepetã Cohãcjäre wacü tutuaye tutuayequina wahahye. Cohãcjäre wacü tutuayequina ijiye, cahme wejẽne tutuayequina ijahye. Sa ye apeye yehpari cjẽna surara tiquinare wejẽne ahtayequina ne ihcãno sahaerahye tiquinare. ³⁵ Ihquẽquina numia Cohãcjäre wacü tutuagũ ihñano tiquina acaye yariagũ ihñano Cohãcjü pehe tiquinare maso basahye.

Apequina “Cohãcjäre cahmedacãhña”, tiquina ni peresu yenhriquina ijiepetã Cohãcjäre duhu duerahye. “Cohãcjäre mũsa duhugũ mũsare wionata”, nimahye tiquinare peresupũ yenhriquina Cohãcjü yequinare. Tiquina sa niepegũta tiquinare yũhtierahye, Cohãcjü cahapũ tutuaro waha duaye. Sa yeye tiquinare ña yãhdũaro tiquina yepegũ yariaa wahahye. ³⁶ Apequinare Cohãcjäre wacü tutuayequinare ñano ni buĩjũpe tiquinare tana mũjãe tiahye. Sa yeye apequinare dahpocãrine, omocarine dũhte cãa, peresu yeahye. ³⁷ Cohãcjäre wacü tutu-

ayequinare ñañequina utã mehna doque wejêahye. Apequinare tiquina pagũre seroti mehna yũhre sure majahye. Apequinare ñoseñe pĩni mehna ñose wejêahye tiquina. Sa yeye tiquina sa ñano yepenohñequina oveja cahseri mehna, cabra cahseri mehna suhti tiyequina pejecũoyequina ijiahye. Sa ye apequina tiquinare ñano yepeahye. ³⁸ Tiquina quehnoa yũhdũayequina ijigũ ahri yehpa cjẽna ñañequina tiquina mehna ijiboriquina ijierare. Ahriquina Cohãcjũre wacũ tutuayequina wũhũse marieñequina ijiye, masa marienopũ, cãnpũ cjurũ iji soto tae tiahye. Sa iji soto tae, cãnpũ ijiye coperipũ, yehparũ ijiye coperipũ gãhũre carĩ soto tae tiahye.

³⁹ Ahriquina ijipihtiyequina Cohãcjũre tiquina wacũ tutuagũ ihñano bucueahye tiquiuro. Tiquina sa wacũ tutuepegũta Cohãcjũ tiquinare “Mũsare yũhdũoutja”, tiquiuro nidiro eseraniahye. ⁴⁰ Tiquiuro yũhdũoerandire yahuro ohõ saha ni tũhotuahye Cohãcjũ. “Ahriquina yehquina camerũre ijiatiquina mehna ihcãno saha ihcã curuapũta yũhdũoutja”, ni tũhotuahye. Sa ni tũhoturo tiquiuro nidiro sahata yerota. Tiquiuro sa yegũ quehnoa yũhdũare panopũ tiquiuro yeriro yũhdũoro.

12

Jesure sa wacũducuhna mari

¹ Sa yena ahriquina yũhũ yahuriquinare peyequina Cohãcjũre wacũ tutuayequinare ñañene yeeyequinare masina, ijipihtiye ñañe yeyere duhu cãhna mari gãhũ. Ohõ saha ijire mari queoye mehna buhegũ: Omaperiquiurore oma tutuagũ cahmotaye ijire apeye. Tiquiuro dahpo suhti nũcũñe suhti tiquiurore oma tutueragũ yeboaga. Ti yero saha Cohãcjũ cahmeñene mari ye duagũ cahmotaye

gãhũ ijire. Ti gãhũre duhuuhna mari. Sa yena omapeyequina tiquina oma tutuaro saha mari gãhũ tutuaro Cohãcjũ cahmeno saha yeihna. ² Sa yena Jesure sa wacũducuhna mari. Tiquiurota ijire marine wacũ tutua dũcagũ yeriquiuro. Sa yero marine wacũ tutua nemogũ gãhũre yere tiquiuro. Curusapũ yariaro wacũ tutuahye. Came tiquiuro bucueatore masino curusapũ yariahye. Sa yariaro bæ tiboriquiuro ijieperota bæ tierahye tiquiuro. Sa yero yojopũre Cohãcjũ tiquiuro pãhoro dujiro poto pehe dujitiãno tiquiuro dutiriquiuro ijire.

³ Ñañequina masa tiquiurore tiquina ña yũhdũaro yegũ ihcãno sahahe tiquiuro. Tire wacũña mũsa, mũsa gãhũ ñano yũhdũna, “Ihcãno sahaeraboa”, nina. Tire wacũña mũsa “Tiquiurore wacũ tutua duhuari”, nina. ⁴ Ñano yũhdũepenata ñañene yerare mũsa. Sa ñano yũhdũepenata ña yũhdũaro waro yũhdũeraniaga mũsa. Ñañequina mũsare wejẽdarĩaga. ⁵ ¿Cohãcjũ mũsare tiquiuro pohñare tiquiuro yahurire bo cjãri mũsa? Mũsa ñano yũhdũatire tiquiuro yahurire wacũña mũsa. Ohõ saha niahye tiquiuro:

Yũhũ macũ, mũhũre yũhũ yahugũ usueracãhña ñano yũhdũepẽgũta. Mũhũre yũhũ tuhtigũ tũhogũ bujũa witiẽ-acãhña. ⁶ Ijipihtiyequina yũhũ cahññequinare yahuaja. Sa yegũ ijipihtiyequina “Yũhũ pohna ijire mũsa”, yũhũ ni ihñañequinare yũhdũdũca dutieraja. Sa yegũ tiquina yũhdũdũcagũ ihñagũ tiquinare buhiri dahreaja, niahye Cohãcjũ.

⁷ Ñano yũhdũna Cohãcjũ yere duhuẽracãhña. Cohãcjũ mũsare tiquiuro pohñare buhiri dahrero nine. Tiquina pacũsumũa tiquina pohñene sa yahuducure. Sa yeye

tiquinare buhiri dahreduceure. Sata yere Cohãcjũ gãhũ marine tiquiro pohname. ⁸ Ijipihtyequina tiquiro pohname yahure Cohãcjũ. Cohãcjũ m̄sare yahueragũ tiquiro pohna waro ijierare m̄sa. Pac̄sum̄a marieñequina yero saha ijire m̄sa tiquiro yahumehnaena ijina. Sa ijina “Usã pac̄ waro ijire”, ni masiedare m̄sa Cohãcjũre, m̄sare tiquiro yahueragũ. ⁹ Mari pac̄sum̄a marine tiquina yahugũ tuhona tiquinare ño peoaja mari. Mari pac̄sum̄are mari ño peoro yãhd̄oro ño peoro cahmene mari Pac̄are Cohãcjũre tiquiro yahugũ. Sa yena tiquirore yãhtiro cahmene marine. Sa yãhtina ijina ijipihtye decori tiquiro mehna ijinata. ¹⁰ Meheñe decorigã ahri yehpap̄ mari ijinigã mari pac̄sum̄a marine yahuye, buhiri dahrere. Tiquina esa tuharo tiquina masino punota marine yahuye, buhiri dahrere. Cohãcjũ pehe marine quehnoano yahure. Sa yero tiquiro masiñe mehna marine buhiri dahrere, marine quehnoana buc̄a dutiro. Sata yere marine tiquiro yero saha quehnoana marine iji dutiro. ¹¹ Marine tiquiro buhiri dahregã bucueraja mari. Mari ihyo buj̄a witiaja. Sa buj̄a witepenata tiquiro sa buhiri dahreri bato quehnoana wahanata mari. Sa yena ñañene yero marieno quehnoano ijinata.

Cohãcjũ marine tiquiro dutiyere mari yãhtieragũ cuarĩne marine

¹² Sa yena wacũ tutuera cjũna ijiepenata Cohãcjũre wacũ tutuana ijia. Tiquirore duhueracãhña. ¹³ Quehnoano potori mahare m̄sa waharo saha quehnoano poto yeya m̄sa. M̄sa sa yegũ ihña cũñe apequina Jesu yequina ñañene yesi. M̄sa quehnoano yegũ ihña cũñe quehnoano wacũ

tutuera cjũñequina gãhũ wacũ tutuayequina wahaeta.

¹⁴ Ijipihtyequina masa mehna quehnoano ijia, cahmequeno marieno. Sa yena ñano yeracãhña. Ñañe marieñequina dihita mari pãhtoro Cristore ihñaeta. ¹⁵ Quehnoano yeya m̄sa. Cohãcjũ m̄sare tiquiro yedohogũ quehnoano yahtiya. Ñañe taa diaye tiquina oteyere ti dojomehnoano saha m̄sa gãhũ Cristo yere duhueracãhña, “Apequinare dojomehneari”, nina. ¹⁶ Ne w̄ana tieracãhña. Sa yena Cohãcjũ yere cahmeena ijieracãhña. Cohãcjũre cahmeediquiro ijiahye Esaú. Tiquiro wahmino ijiahye. Sa yero tiquiro pac̄ro yariari bato tiquiro pac̄ro yere c̄oatiquiro ijiahye. Cohãcjũ tiquiro pac̄rore tiquiro ni c̄uri gãhare c̄oatiquiro ijiahye. Sa yero ihcã deco ihcã pa ihyaye pose tiri pare cahmeno, ti pa mehna tiquiro bah̄ro pehere tiquiro wahmino wahagũ yero taro comesahye. ¹⁷ Tiquiro sa yeri bato tiquiro d̄hse wahirire masine m̄sa. Tiquiro pac̄ro tiquirore ohoatire tutuaro cahmemahye Esaú. Tiquiro sa cahmepegãta tiquiro bah̄rore wahmino wahagũ yeri buhiri, came tiquiro c̄oborire ohoerahye tiquiro pac̄ro. Tire utiye mehna tiquiro siniepegãta tiquirore ohoerahye.

¹⁸ Cohãcjũ dutiyere Moiserere tiquiro c̄gũ mari acaye Israe masa m̄na Cohãcjũ mehna ijie tiahye. Tiquina tiquiro mehna ijiriro saha m̄sa pehe ijierare. Ohõ saha yeahye tiquina pehe. C̄an̄p̄ Cohãcjũ mehna ijie taye, esahye. Ti c̄an̄ pehe Sinaí wame tid̄ ijiahye. Ti c̄an̄re dahra tuhu masiahye masa. Ti c̄an̄p̄ tiquina esagũ tutuaro peca ñj̄ahye. Sa yero nahitiano, bueri, tutuaro wihnono mehna ijiahye ti

сннррре. 19-20 Ti сннрррр tiquina esagū corneta bisiro ca tahye. Sa yero yahuducuye bisiro ca tahye. Ti sa yahuducuye bisigū tuhoye, masa ihcāno sahaerahye. Cohācǰū cuaro mehna ohō saha ni, dutiahye tiquinare: “Ijipihtiyequina ahdu сннре dahra tuhuyequinare utā mehna doque wejēna tiquinare. Ahdare dahra tuhuriquiro wahiquiro waro tiquiro ijiepegāta tiquiro gūhare utā mehna doque wejēna tiquiore. O ñosenu mehna ñose wejēna tiquiore”, niahye Cohācǰū. Tiquiro sa nigū tuhoye ihcāno sahaerahye tiquina. 21 Sa yero ijipihtiye tu сннрррр ijiro tiquiro ihñarire ihña cuero, ohō saha niahye Moise: “Cuegu nanaregu niaja”, niahye tiquiro.

22 Sa Cohācǰū mehna tiquina iji ducariro sahata ijierare mūsa pehe. Cohācǰū mehna ijina wahana, Siō wame tidurū uhmūse cjādurū mūsa esaboro saha potota Cohācǰū mehna yahuducure mūsa. Cohācǰū catiriquiro ya macarū mūsa esaboro saha potota tiquiro mehna yahuducure mūsa. Ti maca ape maca wahma maca Jerusalē uhmūse cjā maca ijire. Topure peyequina angele pari ijire. 23 Tiquina Cohācǰū mehna bucueye tehe cahmecoañequina ijire. Sa yena mūsa pehe tiquiro ya maca cjāna ijina, topū Cohācǰū pohne iji mahtañequina mehna mūsa cahmecoaboriro saha ijire. Tiquina tiquiro pohne wamene tiquiro ojoa ohōri tjpurū uhmūsepū tiquina wamene tiquiro ojoa ohōnohriquina ijire tiquiro pohne. Tiquiro pehe mari Pacū pehe ijipihtiyequinare beseatiquiro ijire. Tiquiro mehna cjāna ijire mūsa pehe. Sa yena tiquina quehnoañequina Cohācǰū yequina mehna cahmecoano saha ijire mūsa gūhū. Tiquinare iji mahtariquinare

ñañe marieñequina ye tuhasahye Cohācǰū. 24 Sa yena Jesu mehna cjāna ijire mūsa pehe. Wahmanopū Moisere tiquiro duti cūrire came-saro “Mū sare yuhduoutja yuhū”, ni cūahye Cohācǰū marine. Tiquiro sa ni cūriro sahata yeriquiro ijire Jesu. Tiquiro diire cohā, tiquiro yariari mehna marine sa yuhduore. Abe mūnano tiquiro dii cohāgū ihñano Cohācǰū Abere wejēdiquiore buhiri dahreahye. Jesu pehe tiquiro diire cohāgū, tiquiro yariari mehna quehnoano yuhduaja mari. Sa yero Abe tiquiro dii cohāri ihyo warota ijiahye. Cristo pehe tiquiro dii cohāri bato quehnoa yuhduaro yeahye Cohācǰū marine. Sa ye tiquiro dii cohāri ihyo warota ijierare.

25 Sa yena quehnoano yeya mūsa. Cohācǰū yere mū sare yahuriquiore quehnoano yahtina ijija. Panopū ahri yehparū ijiriquiro Moise Cohācǰū yere tiquiro yahugū tuhoye, peyequina tire taho duerahye. Sa tiquina tahoerari buhiri buhiri dahreahye Cohācǰū tiquinare. Tiquina yuhduoro buhiri dahrerota Cristore cohāñequinare. Cristo pehe uhmūsepū ijiriquiro Cohācǰū yere yahuriquiro ijire. 26 Ti pjere Moisere tiquiro dutiyere cūri pjere Cohācǰū tiquiro yahuducuro mehna yehpa ñuhmigū yeahye. Yojopū pehere ohō saha ni yahuahye tiquiro: “Ihcā tahata ahri yehpa ñuhmigū ye nemoutja. Ahri yehpa dihitare ñuhmigū yesi yuhū. Uhmūsepū gūhare ñuhmigū yeitja”, ni yahuahye tiquiro. 27 “Ahri yehpa ñuhmigū ihcā tahata ye nemoutja”, nino, ijipihtiye-re tiquiro bajumehnedire tiquiro cohātire masigū yero niahye. Cohācǰū pahtoro ijiropure cohāno basioerare. Sa yero tiquiro bajumehnedire cohāgū tiquiro pahtoro ijiro dihita tojoarota.

28 Tiquiro puhtoro ijiropu wahanata mari. Sa yena tiquiro puhtoro ijirore tiquiro cohædagû ihñaana, Cohâcjüre “Quehnoare”, niihna mari. Sa yena tiquirore ño peoye mehna, cua pesaro mehna tiquiro yere yeihna mari tiquirore bucuegû yena tana. ²⁹ Peca ujûno cuaro saha Cohâcjû gûhu cuaro mehna buhiri dahreriquiro ijire.

13

Ohô saha Cohâcjüre bucuegû yeya

¹ Mûsa mehna cjênare cahî duhuercâhña. ² Masa mûsa ihña masieñequina tiquina ijiepegûta tiquinare mûsa wuhusepu quehnoano mehna sajã ta dutiia. Apequina sa yeye, masiedapeta angelere tiquina ye wuhusepu sajã ta dutiahye. Sa yena tiquina yero saha yeya mûsa gûhu.

³ Peresupu ijieyequinare paja ihñaña. Mûsa pehe tiquina mehna peresupu ijina mûsa ijiboro saha tiquinare paja ihñaña. Apequina tiquina ñano yenohriquina gûhare paja ihñaña. Tiquina yero saha mûsa gûhu ñano yuhduboro saha tiquinare paja ihñaña.

⁴ Omoca dâhterina ijipihtina mûsa basi quehnoano cahme ño peoya. Sa yena apequina mehna ñano yeracâhña. Ijipihtiequina numia mehna ñano yeyequinare, umna mehna ñano yeye numia gûhare buhiri dahrerota Cohâcjû.

⁵ Niñerure ne cahîedacâhña. Ohô saha niahye Cohâcjû: “Mûsare ne cohâsi yuhû. Mûsare sa yedohoducugutja”, niahye tiquiro. Sa yena noho puno mûsa cuoye mehna to punota bucueya. Pajiro cahme nemoedacâhña. ⁶ Sa yena cuero marieno ohô saha ni tuhotunata mari:

Mari puhtoro Cohâcjû marine yedohoriquiro ijire. Ne cuesi mari. Masa marine

tiquina ñano yeatire cuesi mari, ni tuhotunata.

⁷ Cohâcjû yere mûsare yahuriquinare mûsare dutiriquinare wacûña mûsa. Sa yena quehnoano tiquina ijie tirire quehnoano tiquina yee tirire wacûña. Sa wacûna, Cristore tiquina wacû tutuariro saha yeya mûsa gûhu.

⁸ Jesucristo ne comesaerare. Panopu, yojopu gûhare, cameru gûhare tiquiro ijiriro sahata ijiducurota tiquiro. ⁹ Peye buheyere sijoro saha ijieye buheyere tuhoeracâhña mûsa “Quehnoañe buheyere usâpu cohâri”, nina. “Ahrire ihyaya. Ahrire ihyeracâhña”, ni buhere ihquëquina. Sa tiquina ni buheyere mari yuhtigû ti marine yedohoerare. Sa yero sa ijieye buheyere mari yegû ihyo warota ijire. Ti marine wacû tutuana ijigû yerare. Cohâcjû pehe marine wacû tutuana ijigû yere. Sa yena tiquiro ye tutuaye mehna tiquirore wacû tutuana ijia mûsa gûhu.

¹⁰ Cristo mari ñañe buhirire yariahye mari ñañene cohâno taro. Pahia pehe ohô saha niñequina ijire: “Wahiquina mari wejê ujûa mûo, mari ohoyequina mehna yuhdanata”, niñequina ijire pahia. Sa niñequina tiquina ñañe yerire cohânohriquina iji masiedare.

¹¹ Mari judio masa mari pahia puhtoro Cohâcjû ijiri tucû waropu diire ne sajãno wejê siteahye, masa tiquina ñañe yerire cose wero taro. Sa yero tiquiro wejêdiquiro wahiquiro pagure ti maca duhtu cahapu ujûa cohã cãre. ¹² Tiquiro yeriro saha Jesu gûhu maca duhtu cahapu yariahye, masa tiquina ñañene tiquiro dii cohâno mehna cose wero taro. ¹³ Maca duhtu cahapu tiquiro yariagû ihñañe, tiquina ye buheyere tiquiro cohâgû ihñañe judio masa puhtoa tiquirore ihña tuhtiahye. Sa yena mari gûhu tiquiro mehna cjãna

ijiihna. Mari sa ijigū ihñañe, masa mari gūhure ihña tuhtietā. ¹⁴ Ahri yehpapū mari iji dojoati maca ne mariedare. Mari camerū ijiati macare cohtena niaja mari. ¹⁵ Sa yena Jesu yedohoro mehna mari Pacū mehna yahuducuaaja mari. Sa yena tiquireore quehnoano sini-ihna. “Mūhū ūsā Pacū quehnoagū, tutuagū ijire”, ni, ño peoducu-uhna. “Jesu yequina ijiāja”, ni, sa niña mari Pacūre. Mari sa nigū tiquireo bucuero. ¹⁶ Mūsa mehna cjenare quehnoano yeya. Sa yena tiquireore yedohoya. Tire boeracāhña. Mūsa sa quehnoano yena Cohācjūre ño peona niaga mūsa. Sa yena tiquireore bucuēgū yena niaga.

¹⁷ Mūsa pūhtoare quehnoano yūhtiya. Tiquireo dutiro sahata yeya. Cohācjū ihña ihbo, buhe dutiro cūre mūsa tiquireore. Sa cūnohriquina ijiye mūsa sa ihña ihboducaje nine “Cohācjūre yūhdūdacari”, niñe. Camerū mūsa tiquireo dutirire, tiquireo yerire Cohācjūre yahueta. Sa yena tiquireore quehnoano yūhtiya mūsa. Mūsa sa yūhtigū ihñañe bucuēye mehna mūsa yedohota tiquireo. Mūsa yūhtieragū ihñañe tiquireo bujūa witietā. Sa yūhtierāna quehnoano ijisi mūsa.

¹⁸ Ūsāre sini basaducuaaja Cohācjūre. Decoripe quehnoañe dihitare ye duaja ūsā. Sa yena “Ñañene yena niaja”, ni tūhotueraja ūsā. ¹⁹ Ahri pūritare tutuaro sini basaya Cohācjūre yūhure: Sojaro mehna mūsa cahapū yūhū wahatire tiquireore sini basaya.

Ahri pūre ojoariquireo quehnoa duti bato tiahye

²⁰ Cohācjū mari pūhtoro Jesure yariariquireore masoahye. Marine quehnoano ijigū yeriquiro ijire. Tiquireo “Mūsa yūhdūoutja”, ni cūahye Cohācjū marine. Tiquireo sa ni cūrere yeriquiro marine

yūhdūoriquireo Jesu pehe ijire. Mari ñañe buhirire yariahye tiquireo. Sa yero tutuariquireo ovejare ihña ihboriquireo yero saha ijiro, marine tiquireo yequinare quehnoano ihña ihbore. ²¹ Sa yero Cohācjū tiquireore masoriquireo mūsa gūhure yedohohoro ijipihtiye quehnoañene tiquireo cahmeñene mūsa yeatire. Sa yero Jesucristo yedohoro mehna Cohācjū cahmeno saha ijipihinare marine quehnoañe pehere comesagū yeahro. Sa yena ijipihtiye decori Cristore ño peouhna. Sata yeihna.

²² Yūhū acaye, ahrire tutuaro mūsa dutiitja: Ahri pūpū yūhū yahurire quehnoano mehna tūhoya mūsa. Ahri mūsa yūhū ojoari pū pajiro ijierare. Sa yena ahrire quehnoano tūhoya. ²³ Ahri gūhure mūsa yahutja: Mari acayūre Timoteore peresu ijiriquireore wioñohi. Sojaro mehna tiquireo wihigū mūsa ihñagū wahagū tiquireore neagutja. Yūhū mehna waharota.

²⁴ Mūsa pūhtoare, ijipihtiye-quina apequinare Cohācjū yequinare topū ijiyequinare quehnoa dutiaja. Italia cjenā Jesu yequina gūhū mūsa quehnoa dutire.

²⁵ Ijipihinare mūsa Cohācjū mehna quehnoa dutiaja.

Santiago

Santiago Israe masare macari wahariquinare ojoa ohoahye

¹ Yũhũ, Santiago ahri pũpũ mũsare quehnoa duti ojoa ohogu niaja. Mari Pacũ, mari pũhoro Jesucristo gũhũ cahacjũta ijiaja yũhũ. Sa yegũ Israe masa ye cururi cjãnare doce cururi cjãnare Jesu yequinare macari waharinare yũhũ acaye mũsare ojoa ohogu niaja.

Cohãcjũ pehe quehnoano masigũ yere

² Yũhũ acaye, peye ijietã mũsa ñano yũhdũati. Sa ñano yũhdũepenata quehnoano bucueye mehna tũhotuya. ³ Sa ñano yũhdũana, potota Jesure mũsa wacũ tutuarire ihũõna ninata mũsa. Sa yena ñano yũhdũepenata Jesure mũsa quehnoano wacũ tutuana ijina, tiqũirore wacũ tutua nemona wahanata. Sa wahana mũsa ñano yũhdũyere ihcãno sahanata. ⁴ Sa yena duhuro marieno sa ihcãno sahana ijiducuya mũsa quehnoano tũho masina mũsa ijiatire.

⁵ Mũsa masiati dũhsagũ tũhotuna Cohãcjũre siniña. Tiquiro dũhsaro marieno ijipihtiyequinare ohore. Sa ohoro tiqũirore siniñequinare sijoro saha nino marieno ohore tiqũiro. Tiquiro sa ijiriqũiro ijigũ masina, mũsa masiati dũhsagũ tũhotuna, tiqũirore siniña. Mũsa sa sinigũ mũsare masi nemogũ yerota tiqũiro. ⁶ Sa sinina Cohãcjũre quehnoano wacũ tutuatjãna siniña mũsa. “Usã sinigũ Cohãcjũ ohoeraboaga usãre,” ni tũhotueracãhña. Sa ni tũhotuyequina pajiri ma cjẽ pahcõri yero saha ijire. Pahcõri ti usũro comesaro saha tiquina gũhũ tiquina wacũñepũre usũro

comesare. Ihcãno saha yerare tiquina. Sa ye Cohãcjũre wacũ tutuerare. ⁷ Sa ni tũhotuyequinare tiquina siniñegũta ne mehenogã tiquina siniñene tiquinare ohosi mari pũhoro, Cohãcjũ. ⁸ Miare ahrire cahmediquiro ijieperota ñamiare sijoro saha tũhoture tja. Sa yeriquiro queoro yerare.

⁹ Jesu yequinare ihyo ijieyequinare Cohãcjũ pehe pũhõta sõnota. Sa ijiatiquina ijieye bucueahro tiquina. ¹⁰ Sa ye Jesu yequina doeri cjẽ opana ijieye tiquina ye doeri cjẽ pihtiatire masiñe bucueahro. Ti doeri cjẽ ihyo warota ijire, Cohãcjũ ihũagũ. Cohori ti duita ahba bora dijiaa waharo saha ti doeri cjẽ pihtia waharota. Sa ijieye tiquina gũhũ bucueahro. ¹¹ Asũ mũja taro tiqũiro tutuaro asigũ taa pehe ñaia wahare. Sa ye cohorĩ gũhũ ñai bora dijiaa waha, quehnoañe cohorĩ ti ijieye pihtia wahare. Sata waharota doeri cjẽ opanare doeri cjẽne tiquina ne cahmecoano watoa. Tiquina, ti doeri cjẽ mehnata butia wahaeta.

Ñano ye dutiyere yerariqũiro bucucriqũiro ijire

¹² Ñano yũhdũariqũiro ihcãno saharo, ñano ye dutiyere yeraro bucucriqũiro ijirota. Tiquiro sa ihcãno saha gũ, tiqũiro ñañene yeragũ ijipihtiyere decori ahmũsepũ ijiducugũ yerota Cohãcjũ tiqũirore. “Sa ahmũsepũ ijiducugũ yeitja”, ni cũahye Cohãcjũ ijipihtiyequina tiqũirore cahñequinare. ¹³ Mũsare apequina ñano ye dutigũ “Cohãcjũ yũhare ñano ye dutiro nine,” ni tũhotueracãhña. Ñano yeyere tũhoturiqũiro ijierare Cohãcjũ. Sa yero tiqũiro pehe masare ñano ye dutiriqũiro ijierare. ¹⁴ Masa ñañene tiquina tutuaro cahmeñeta tita tiquinare ñano yegũ yere. ¹⁵ Sa ye ñañene tutuaro cahmene masa. Sa ye ti pehere tũhoture.

Sa t̄hotuye, ti ñañene yeducure tiquina. Tiquina sa yeducuri buhiri Cohãcjũ tiquinare pecapũ cohãnota.

¹⁶ Sa yena yũhũ acaye yũhũ cahĩna, “Cohãcjũ yũhũre dutigũ ñano yei,” ni t̄hotueracãhña. Poto ijierare ti. ¹⁷ Mari Pacũ ùhmũse cjãno marine quehnoañe dihitare ohore. Tiquiro pũrita asũ deco cjãnore, ñami cjãnore, ñahpicoha paca gũhũre bajumehnediquiro ijiro, tiquiro pehe tiquiro ijiro sahata sa ijiducu cãre. ¹⁸ Tiquiro cahmediro sahata quehnoañe buheye mehna marine tiquiro pohna wahagũ yeri. Sa yeri tiquiro, tiquiro pohna iji m̄htana marine iji dutiro.

Potota Cohãcjũre ño peoye ohõ saha ijire

¹⁹ Yũhũ cahĩna, yũhũ acaye, ahrire quehnoano t̄hoya m̄sa. Cohãcjũ yere quehnoano t̄hoya m̄sa. Sa t̄hona, t̄hoturo marieno yahuducueracãhña. Sa yena usueracãhña. ²⁰ Ihcãquiro usuariquiro ijigũ tiquiro yerire bucuere Cohãcjũ. ²¹ Sa yena ijipihtiye m̄sa ñañe yeyere, m̄sa ñañene tutuaro cahmedire duhuya m̄sa. Sa yena Cohãcjũre quehnoano yãhtina ijina tiquiro buheyerere t̄ho, cahmeña m̄sa. Tiquiro ye buheyerere m̄sa t̄ho cahmegũ Cohãcjũ pehe m̄sare pecapũ wahaborinare yũhũorota.

²² Tiquiro yere t̄hoepenata yãhtierana ni mehoñene t̄hotuna nine m̄sa. “Yãhtieragũ quehnoanota,” ni t̄hotuna ni mehoñene t̄hotuna nine m̄sa. Sa yena tiquiro yere t̄hona ti pehere yeya. ²³ Cohãcjũ yere t̄hoepenata, yãhtierana, tiquiro wãhdoare eõno mehna ihñariquiro yero saha ijire m̄sa. ²⁴ Tiquiro wãhdoare tiquiro ihñari bato waha, tiquiro ihñarire boaa wahare. ²⁵ Sa yero apequiro pehe tiquiro ihñarire

boero saha Cristo ye dutirire t̄horo tire yero, bucueriquiro ijirota. Ti dutiye Cristo cahĩñe mehna masare tiquiro yũhũoati buheye ijire. Ti buheyerere ne cohãediquiro bucueriquiro ijirota. Tiquiro pũrita tiquiro t̄horire yeriquiro ijire. Sa yeriquirore quehnoano yerota Cohãcjũ.

²⁶ Ihcãquiro sa ni maca cãriquiro ijiro, potota Cohãcjũre ño peorerare. “Cohãcjũre quehnoano ño peoaja,” ni t̄hoturiquiro ijieperota ni mehoñene t̄hoture tiquiro. “Cohãcjũre ño peoaja,” ni diquiro ijiepegũta tiquiro ño peoye ne dũhseati ijierare. ²⁷ Ijirota Cohãcjũre mari Pacũre mari ño peona, tiquiro cahmeno saha ño peona, ohõ saha yeaja mari: Pacũsum̄na marieñequinare, wape wiha numia gũhũre tiquina ñano yũhũgũ ihñana, tiquinare yedo- hoaja mari. Sa yena ahri yehpa cjẽna ñañene tiquina yerire ne ye dueraja mari. Sa yena potota Cohãcjũre ño peonata ijiaya mari.

2

Masare ihcãno saha quehnoano yero cahmene marine

¹ Yũhũ acaye, quehnoa yũhũariquirore Jesucristore mari p̄htorore t̄hona, tiquirore wacũ tutuana ijire m̄sa. Sa wacũ tutuana masare ihcãno saha quehnoano yero cahmene m̄sare. ²⁻³ Sa ye uru behtorire, omoca sañañe behtorire c̄oriquiro, wapa bũjaye suhtire sañariquiro m̄sa Jesu yequina cahmecoano cahapũ tiquiro ahtagũ ihñana tiquirore quehnoano mehna piti caboaga. “Ohõpũ dujiro ijire,” ni boaga m̄sa tiquirore. Sa niepenata ti pjeta pejec̄oriquiro gũhũ ñano suhti tiriquiro m̄sa cahapũ tiquiro ahtagũ ihñana tiquiro pehere quehnoano piti caeraboaga. “Ohõpũ ducuya. O

yehpapu dujiya,” niboaga musa tiquirore. ⁴ Musa sa yena masare ihcāno saha yena niedaga musa. Sa yena ñañene t̄hotuyequina masare beseyequina yero saha ijina niaga musa. “Ahriquiroye pehe quehnoariquiroye ijire. Ahriquiroye ñariquiroye ijire,” ni besemene musa.

⁵ Yuhu acaye, yuhu cahña, yuhare t̄hoya. Peyequina pejec̄oyequina pehere Cohācjū beseahye. Tiquirore quehnoano wacū tutuatiquinare, tiquiro p̄htoro ijirop̄are ijiatiquinare beseahye tiquinare. “Top̄are wahanata musa,” ni cūahye Cohācjū tiquirore cahñequinare. ⁶ Tiquinare tiquiro sa besepegūta musa pehe pejec̄oyequinare quehnoano ño peorare. Doeri c̄jē opana pehe musare ñano yere. Sa ye tiquina masare beseriquiro caharu musare neare musare yahusāne tehe. ⁷ Musa pehe “Cristo yequina,” masa tiquina ninohna ijire. Peyequina doeri c̄jē opana pehe Cristore ñano ni yahuducuyequina ijire. Sa ye pejec̄oyequinare musa ño peoriro yuhduoro doeri c̄jē opanare musa ño peogū ñarīne.

⁸ Cohācjū dutiye mehna c̄jā dutirore apeye dutiye bui c̄jūnogā ijiri dutirore ohō saha ni ojoahye: “Muhu basi muhu cahño saha muhu caharu ijiyequina ḡhure cahña,” nine Cohācjū dutiro. Ahri dutirore yena, quehnoañene yere musa. ⁹ Masare ihcāno saha yerana ñano yena nine musa. Sa yena Cohācjū dutiyere yuhduocana ijire musa. Sata nine Cohācjū yere tiquina ojoari p̄p̄h. ¹⁰ Cohācjū dutiyere yena ijiēpenata ihcāno dutirogāre musa yeragū apeye dutiyere musa yepegūta d̄hseati ijierare. Sa yena ñañe buhiri tina ijinine musa. ¹¹ “Apequiroye namono mehna ñano yeracāhña,” ni, musare dutiriquiro Cohācjūta ijire.

“Masare wejēdacāhña,” nidiquiro tiquirota ijire Cohācjū. Apequiroye namono mehna ñano yerapenata masunore wejēna Cohācjū dutiyere yuhduocana ijire musa.

¹² Cristo marine tutuaro cahño, marine dutire marine yuhduoro taro. Tiquiro dutiyere mari yerire, mari yerari ḡhure ihñano marine besero ahtarota. Tiquiro sa besenohanaja ijina tiquiro dutiyere quehnoano yeihna. Sa yena tiquiro cahmeno sahata yahuducuhna mari. ¹³ Yojop̄are mari apequinare paja ihñedagū Cohācjū pehe masare tiquiro beseri pje ijigū marine paja ihñasi. Sa yena apequinare mari paja ihñagū Cohācjū pehe marine paja ihñano, marine buhiri dahresi.

Cristore wacū tutuayequina pehe quehnoañene yere

¹⁴ Yuhu acaye, t̄hoya musa. “Cristore wacū tutuaja yuhu,” ihcāquiroye tiquiro ni t̄hotuepegūta tiquiro quehnoañene yeragū tiquiro sa nimeri pehe ne d̄hseati ijierare. Sa ni wacū tutua maca c̄ariquiroye Cohācjū yuhduosi. ¹⁵⁻¹⁶ ¿Jesu yaquiroye, Jesu yacoro ñañe suhti dihita tiquina c̄ogū ihñana, tiquina ihyati mariedagū ihñana, d̄hse yeajari musa tiquinare apee boro c̄ona ijina? “Quehnoano ijiya musa. Sa yena quehnoano suhti sañaña. Sa yena quehnoano ihya yapi iji cāhña,” niepenata tiquina cahmeñene musa ohoeragū musa sa nimeri ne d̄hseati ijierare. ¹⁷ Sa yena “Cristore wacū tutuaja,” musa niepegūta quehnoañene musa yeragū Cristore musa wacū tutuaye ne d̄hseati ijierare.

¹⁸ Musa mehna c̄jūno ahri yuhu buherire t̄ho dueraro ohō saha masiahdo. Quehnoañene yerap̄erota “Cristore wacū tutuaja,” niboaga tiquiro. Quehnoañene yeraro Cristore tiquiro wacū tutuayere apequinare masigū

ye masiedare. Quehnoañene yeriquiro pūrta quehnoañene tiquiro yeye mehna Cristore tiquiro wacū tutuayere masigū ye masine. ¹⁹ “Cohācjū ihcāquirola ijire,” ni tūhoture mūsa. Mūsa sa ni tūhotugū quehnoarīne. Sa ijiepegūta to punota Cohācjūre yūhtiro marieno tiquirore mūsa masigū ti dūhseati ijierare. Watīa gūhu mūsa tūhoturo sahata tūhotuñohiti. Sa ijīye Cohācjū tiquiro ijīye tiyere masiñohiti tiquina. Sa masiñe, cue, nanareñohiti. ²⁰ Ihcāquirola quehnoañene yeraperota “Cristore wacū tutuaja,” ni tūhoturiquiro ijiro tūho masieniquiro ijire. Cristore wacū tutuamediquiro quehnoañene yeraro potota Cristore wacū tutuerare.

Ohō saha ni yahutja mūsare ahrire: ²¹ Abrahā mari ñecu mūnāno tiquiro macūno Isaac wame tiriquirore wejē basamahye Cohācjūre. Sa yero tiquirore utā paca mehna tiquina yeri buhu bui duhu peomahye. Sa duhu peoro Cohācjū dutiriro sahata tiquiro macūnore wejēno taro nimahye Cohācjūre ño peoro taro. Tiquiro sa yegū ihñano “Potota quehnoariquiro ijire,” ni ihñahye Cohācjū tiquirore. ²² Tiquiro sa ni ihñagū ahrire masine mūsa: Abrahā Cohācjūre wacū tutuaro tiquirore yūhtiahye. Sa yūhtiro Cohācjūre tiquiro wacū tutuayere ihñono niahye. ²³ Sa yero Cohācjū yere tiquina ojoari pūrta tiquiro nidiro sahata sa wahahye: “Abrahā Cohācjūre wacū tutuahye. Tiquiro sa yegū ihñano ‘Quehnoariquiro ijire tiquiro’, ni ihñahye Cohācjū tiquirore”, ni ojoahye Cohācjū yere tiquina ojoari pūrta. Tiquiro sa ni ihñagū masiñe “Abrahā Cohācjū mehna cjāno ijire”, nine masa tiquirore.

²⁴ Sa yena ahri yūhu yahuatire masine mūsa: “Cohācjūre

wacū tutuaja,” nidiquiro, tiquiro quehnoañene yeragū ihñano Cohācjū pehe tiquirore “Quehnoariquiro ijire,” ni ihñedare. Cohācjūre wacū tutuariquiro pehere potota tiquiro quehnoañene yegū ihñano “Quehnoariquiro ijire,” ni ihñare Cohācjū tiquiro pehere. ²⁵ Sata ni ihñahye Cohācjū Rahab wame tiricorore mūsa mehna ñano yeducumedicorore. Josué mūnāno tiquiro ohoriquinare quehnoano piti ca, “Quehnoano sajā taya,” niahye ticoro. Sa yero tiquina tojoa duagū ticoro pehe ape maha pehere ihñohye tiquinare “Tiquinare ihña tuhtiyequina wejēari,” nino. Ticoro sa yegū ihñano “Quehnoaricoro ijire,” ni ihñahye Cohācjū ticorore.

²⁶ Sata ijire. Mari pagūpūre jeripohna mariedagū catieraja mari. Sa yero jeripohna mariedagū mari pagū dūhseati ijierare. Sata “Cohācjūre wacū tutuaja,” mari niepegūta mari quehnoañene yeragū queoro ijierare mari wacū tutuaye. Sa yero mari quehnoañene yeye mariedagū mari wacū tutuaye dūhseati ijierare, jeripohna marieni pagū yero saha.

3

Mari duseropu wijiayere mari yahuducuyere yahuahye

¹ Cohācjū yere masare buheyequina tiquiro yere tiquina quehnoano yeragū ihñano tiquina pūrta masare buheyequina yūhdūoro Cohācjū buhiri dāhrerota. Tire mūsa masine. Sa yena mūsa mehna cjēna masare buheyequina peyequina ijieracāhdo.

² Ijipihtiyequina peye tahari mari ñañene yeaja. Ihcāquirola ñañene yahuducueriquiro Cohācjū cahmeñene quehnoano yeriquiro

ijire tiquiro. Sa yero apeye ñañe gũhare yerare.

³ Ohõ saha ijire ahri mari queoye mehna buhegũ: Caballo duseropũ come pji tiquiro ñehmenore ña dihori pjiñe mari cũaja, tiquirore mari majaredũcagũ yena tana. Sa yena ti pji come pji mehna tiquirore tiquiro wahatopũ mari weje majare docoaja. Ti pji gã meheni pji gã ijepegũta ti pji gã mehna tiquirore wahagũ yeaja mari. Sata mari dusero mehenogã ijepegũta ti dusero mehna pajiro yeaja mari.

⁴ Yucũsa quti mehna queoye mehna yahu nemoutja mũsare: Yucũsa pajiria ijepegũta tiare wihnono tutuaro wẽdoqueoepegũta ohoturiquiro pehe meheni pji gã mehna tiare noho tiquiro waha duaropũ ohoture. ⁵ Sata ijire mari duseropũ wijiaye. Mari dusero mehenogã ijepegũta ti dusero mehna pajiro yeaja mari. Meheni pecagã pajiro ti peca uju cãno saha mari dusero mehna mari yahuducuye mehna pajiro ñañene yeaja. ⁶ Sa yero mari dusero ujuiri peca yero saha ijire. Mari duseropũ wijiaye ijipihtiye ñañene yegũ yere marine. Peca uju dũcaro saha mari duseropũ wijiaye mehna mari quehnoano ijiborire ña yũhũaro yeaja mari. Ñañene yahuducuna watĩno tiquiro dutiro saha mari yena niaja.

⁷ Ijipihtiyequinare nũca cjenare wahiquinare, minicjũare, sihcõ cãñnequinare, wahire mari ihña wahãgũ ye masiaja. Sa yena mari peyequina tiquina borore ihña wahãgũ ye tuhasaũ. Sa ye tiquina quehnoano tũho masine. ⁸ Tiquinare mari yũhtigũ yepegũta mari dusero pehe ñañene yahuducuro ne duhuera yũhũare. Sa yero nuñnequinare mari yũhtigũ yero saha mari dusero pehere ne yũhtigũ ye masiedaja mari. Mari

duseropũ wijiaye ña yũhũaye ijire. Sa yero aña apequinare tiquiro wejẽno saha marine apequina gũhare ña yũhũaro wahagũ yere mari dusero.

⁹ Mari dusero mehna Cohãcjũ mari pũtoro mehna mari quehnoano yahuducuaaja. Sa yahuducuepenata masa Cohãcjũ yero saha ijiequinare tiquiro bajumehnediquina tiquina ijepegũta tiquinare ña yũhũaro ni yahuducuaaja mari. ¹⁰ Ihcã duseropũta quehnoañene yahuducuye gũhũ, ñañene yahuducuye gũhũ wijiare. Yũhũ acaye, sa ni yahuducueracãhña. ¹¹ Mágã pohtepũ aco wijiari coperũ quehnoañe aco, ñañe aco gũhũ ne wijaerare. ¹² Yũhũ acaye, higuera gũ olivo pacare dũca tierare. Sa yero uñse da higuera pacare dũca tierare. Sa ye moreno mehna pũe paca dũca tierare. Sa ye mágã pohtepũ aco wijiari coperũ moa yũaye co wijiagũ moa marieñe co wijaerare. Sata mari duseropũ quehnoañe yahuducuye, ñañe yahuducuye mehna wijaeracãhdo.

Quehnoano masiñe waro ohõ saha ijire

¹³ Ihquẽquina mũsa mehna cjenã quehnoano masiñequina ijire. Sa yena “Apequina yũhũoro quehnoano masiaja usã,” niedacãhña. Sa niedana quehnoañene yeya mũsa. Sa quehnoano yena potota quehnoano masina ijire mũsa. ¹⁴ Sa yena apequiro apee borore tiquiro cũogũ ihñana cahme ihña coona, apequina mehna usaducuna, apequinare yũhũdũca duana, “Cohãcjũ yere quehnoano masiaja usã,” niedacãhña mũsa. Mũsa sa nina ni mehona ijire mũsa. ¹⁵ Sa yeyequina tiquina wacũñe Cohãcjũ ye wacũñe ijierare. Tiquina wacũñe ahri yehpa

cjēna tiquina ñañe wacũñe ijire. Tiquina wacũñe pehe watĩno ye ijire. ¹⁶ Masare cahme ihña cooyequina, apequinare yedoho dueyequina sa cahme tuhtiducure. Sa ye ijipihtiye ñañene yeducure.

¹⁷ Apequina pehe Cohãcjũ yere quehnoano masiñequina pehe tiquina pũrita sa ye maca quēhe niedare. Sa ye tiquina ne cahme tuhtierare. Sa ye masa quehnoañequina, dutiyere quehnoano yahtiyequina, paja ihñañequina, masare yedohoyequina, masare ihcãno saha yeyequina ijire tiquina. Tire yeye, ni mehono marieno yere tiquina. ¹⁸ Sa yena cahmequeno marieno ijina, apequinare “Cahmequedacãhña,” mari ni yahuna quehnoañequina wahagũ yena niaja mari masare.

4

Ahri yehpa cjē ñañene cahmena, Cohãcjũre ihña tuhtina ijire m̄usa

¹ ¿Dahse ijiro boro m̄usa cahme tuhtiajari? ¿Sa yena dahse ijiro boro cahmequeajari m̄usa? Ñañene tutuaro cahmena, cahmeque duare m̄usa. Quehnoañene ye duepenata ñañene yere m̄usa. ² Apee borore m̄usa cahmene. Sa cahmena masare wejēne m̄usa tiquina yere nena tana. Sa yena apequiro apee borore tiquiro c̄ogũ ihñana tire m̄usa tutuaro cahmene. Sa cahmepenata tire nea masiedare m̄usa. Sa yena tire cahme sehña soducure m̄usa. Cohãcjũre siniedana, m̄usa cahmeñene ne bocaerare. ³ Sa yena Cohãcjũre sinina, m̄usa ye ijiasi dihitare sinimene m̄usa, m̄usa cahmeno sahata yeducuna tana. Apequina ye ijiasi pehere sini basaerare. Sa m̄usa sinigũ Cohãcjũ m̄usa siniñene ohoerare.

⁴ Cohãcjũre duhurina ijire m̄usa. Ahri yehpa cjē ñañene cahmena, Cohãcjũre ihña tuhtire m̄usa. ¿Tire

masiedajari m̄usa? Sa yero ahri yehpa cjē ñañene cahmediquiro Cohãcjũre ihña tuhtiriquiro iji tuhasare. ⁵ Ohõ saha niahye Cohãcjũ yere tiquina ojoari pũpũ: “Cohãcjũ yaquiro Espĩritu Santore mari mehna ijiatiquirore cũri. Sa yero Espĩritu Santo pehe marine cahño, ñañene mari tutuaro cahmepegũta cahmesãedare tiquiro. Ihcãquiro namonore tiquiro cahĩ doero saha marine tutuaro cahĩne Espĩritu Santo”, ni ojoahye panopũ. Tiquiro sa ni ojoari ihyo warota ijierare. Poto ijirota nine.

⁶ Sa yero Cohãcjũ marine quehnoano yedohore tiquirore mari quehnoano yahtiatire. Ohõ saha nine Cohãcjũ yere tiquina ojoari pũpũ: “ ‘Yuhũ pũrita apequinare masi yuhduducaja,’ nidiquire, Cohãcjũ ihña tuhtire. Apequiro pehere ‘Ñagũ, ihyo ijigũ ijiaja,’ nidiquire pehere Cohãcjũ yedohore, tiquirore quehnoano yahti dutiro”, nine tiquiro yere tiquina ojoari pũpũ.

⁷ Sa yena Cohãcjũre quehnoano yahtina ijiaja m̄usa. Sa yena watĩnore yahtieracãhña. Sa m̄usa yahtieragũ ihñano tiquiro pehe m̄sare duhti oma cãa waharota. ⁸ Cohãcjũre quehnoano yahtiya m̄usa. M̄usa sa yegũ tiquiro pehe m̄sare yedohorota.

Ñana ijire m̄usa. Sa yena ñañene ye nemoedacãhña. Ñañe gũhure cahmena, quehnoañe gũhure cahmena ijire m̄usa. Sa yena m̄usa ñañe yerire bujua witiya. M̄usa sa yegũ ihñano Cohãcjũ m̄usa ñañe yerire cohãnota. ⁹ M̄usa ñañene yerire tutuaro bujua witiya. Sa yena m̄usa ñañe yeri buhirire utiya. Bucueye mehna bujana ijieracãhña. Sa yena m̄usa ñañe yerire ñano jeripohna tina, tire buetina ijiaja. ¹⁰ “Ñagũ ihyo ijigũ ijiaja yuhũ”, nina, Cohãcjũre ño peoya. M̄usa sa yegũ tiquiro pehe m̄usa

ñañe yerire cohãno, quehnoano yerota musare.

Tiquina acayere Jesu yequinare tiquina basi ñano quiti ye dutierahye

¹¹ Yuhũ acaye, Jesu yequina ijina, musa basi ñano quiti yeracãhña. Musa acayare ñano quiti yena tiquirore buhiri dahre duti duana niaga musa. Cristo ye dutiye pehe masare buhiri dahre dutiye iji tuhasare. Sa yena masare ñano quiti yena Cristo ye dutiyere ohõ saha nina niaga musa: “Marine quehnoano dutierare Cristo ye. Sa yena mari esa tuharo buhiri dahre dutiuhna”, nina niaga musa masare ñano quiti yena. Sa nina Cristo ye dutiyere ñano ni yahuducuna tojoare musa. Sa yena ti dutiyere yerana tojoare. ¹² Masare dutiyere ohoriquire, masare beseriquiro Cohãcãta ijire. Sa yero masare pecapũ wahaboriquinare tiquirota yuhduo masine. Sa yero tiquirota masare pecapũ cohã masine. Sa yena mari pehe masare “Ñañequina ijire”, ni masiedaja. Cohãcã dihita mari acayere beseatiquiro ijire.

Ñamiare dũhse mari ijiatire masiedaja mari

¹³ Yojoapũre yuhũre tuhoya musa. Ohõ saha nina tuhoya yuhũre: “Miare, ñamiare ape macapũ ijina wahanata. Topũre ihcã cahma ijina, apee boro dua, dũnata. Sa yena wapatanata mari”, nine ihquẽquina musa mehna cãña Cohãcãre wacũno marieno. Sa nina ijina, yuhũ pehere tuhoya musa. Sa niñequinare ahrire yahugũ tagũ niaja. ¹⁴ Ñamiapũ dũhse musa ijiatire masiedare musa. Ehmeo iji, duita pihti majano saha ijire mari ijiye tiye. Ehmeo mehenogã iji, pihtia wahare. Ohõ saha mari gũhũ mehenogã ijina, yariaa wahanata. ¹⁵ Sa yena ohõ saha ni tuhotuya musa: “Cohãcã cahmegũ ijinata

mari. Sa yena tiquiro cahmegũ ohõ saha yenata mari”, ni tuhotuya musa. ¹⁶ Yuhũ sa niepegãta yojoapũre “Mari esa tuharo ohõ saha yenata”, niducumene musa pehe Cohãcãre wacũno marieno. Sa niducuna ñañene yere musa. ¹⁷ Quehnoañene mari yeatire masiepenata tire yerana, ñañene yena niaja mari.

5

Doeri cãjẽ opanare yahuahye Santiago

¹ Doeri cãjẽ opana musa yojoapũre tuhoya yuhũre. Camepũre musa ñano yuhduanata. Sa yena uti sañuducuya musa. ² Musa doeri cãjẽ ahba pihtia waharota. Sa ye musa suhtire casia gũhũ ihya pehoeta. ³ Musa niñerure musa pajiro ihbogũ ne ti dahseati ijierare. Pihtiri deco panogã musa sa ihbogũ ihñano niñerure musa cahĩgũ masine Cohãcã. Sa yena niñerure musa cahĩdi buhiri pihtiri deco ijigũ ñano yuhduanata pecapũ musa uãgũ musa pagũre uã pjero saha. ⁴ Musa weserire dahra cohteyequinare wapa yerari musa. Sa yena musa tiquinare ni mehorĩ. Sa yero tiquinare musa wapa yerari niñerure ihñano, musa ni mehorire masine Cohãcã. Musare dahra cohteyequina wapa ye dutiye, sañuducure tiquina. Tiquina sa ni sañuducugũ mari pũhoro Cohãcã tutua yuhduariquire tiquinare tuhore. ⁵ Ahri yehpapũre peye doeri cãjẽ mehna ijie tiri musa. Sa yena musa bucueye dihitare yee tiri musa. Sa yena pajiriquire wecũ tiquina quehnoano nuriquire yero saha ijire musa. Sa ye pajiriquire wecũ pajiro tiquiro ihyari bato tiquirore tiquina wejẽati cuhtupũ ne cãre. Sata musa gũhũre pajiro musa cuori bato musare tiquiro buhiri dahreatopũ ne cãnota Cohãcã. ⁶ Quehnoañequinare

peresu ye, wejē dutiri m̄sa tiquinare. M̄sa sa yegū tiquina pehe duhti wijia masiedare.

Cristo tiqiro tojoa tatire quehnoano cohte dutiahye marine Santiago

⁷ Sa yena yahu acaye, mari puhtoro Cristo ahri yehpapure tiqiro tojoa tatire quehnoano cohteya. Wese upuro tiqiro oteye d̄ca tiati pjere quehnoano tiqiro cohtero saha quehnoano cohteya. Tiqiro oteyepure “Acoro ahtaahro” nino tiqiro ya wesere ti quehnoano pihniatire quehnoano cohtere tiqiro. ⁸ Sata m̄sa ḡhu quehnoano cohteya. Mari puhtoro tiqiro tojoa tato mehenogā d̄hsare. Sa yena Cohācjüre sa wacū tutuaducuya m̄sa. Sa yena tiqiro ahtatire sa cohteducuya m̄sa. ⁹ Yahu acaye, m̄sa basi ñano quti yeracāhña Cohācjü m̄sare “Buhiri dahreari”, nina. Sa yena ahrire wacūña m̄sa. Buhiri dahreatiqiro tiqiro ahtato mehenogā d̄hsare. ¹⁰ Yahu acaye, ñano yuhd̄epenata mari puhtoro quehnoano cohteya Cohācjü yere yahu m̄htariquina tiquina yeriro sahata. Tiquina ihcāno sahariro sahata ihcāno sahaya, tiquinare ihña cūna.

¹¹ Sa yena ahri yahu yahuatire wacūña m̄sa. Ñano yuhd̄epeta Cohācjüre duhueyequina bucueyequina ijire. Panopu cj̄noro Job wame tiriquire t̄hori m̄sa. Tiqiro ñano yuhd̄eperota Cohācjüre duherahye. Sa yero tiqiro ñano yuhd̄ari bato Cohācjü tiquire quehnoano yeahye. Cohācjü mari puhtoro quehnoano paja ihñariquire ijiro, sata yeahye tiqiro. Ti ijipihiyere masine m̄sa.

¹² Yahu acaye, ahrire t̄hoya. Ohō saha ni wame peore masa: “Uhm̄use cj̄no mehna potō nina niaja”, nine masare t̄ho dutiye.

Tiquina yero saha sa ni wame peoeracāhña. Uhm̄use mehna, ahri yehpa mehna, apee boro mehna sa ni wame peoeracāhña. Ahrire m̄sare tutuaro dutiaja. M̄sa apeqinare yahuna, quehnoano potota yahuya tiquinare. Ni wame peo yahu nemoedacāhña. Sa m̄sa potō yahugū ihñano Cohācjü sijoro saha m̄sa nidi buhirire buhiri dahresi.

¹³ M̄sa mehna cj̄no ñano yuhd̄ariquire ijiro, Cohācjüre siniahdo tiqiro. Apequire bucuerequire ijiro Cohācjüre bucueye mehna basaahro. ¹⁴ M̄sa dohatina, Jesu yequina puhtoare pijioya m̄sa. M̄sa sa pijioyū tiquina pehe m̄sare uhse mehna wisōeta. Sa yeye mari puhtoro Cohācjüre m̄sare sini basaeta tiquina. ¹⁵ Sa tiquina sini basagū “Mari sinino sahata tiqiro yerota”, tiquina ni t̄hotugū Cohācjü m̄sare dohatinare yuhd̄orota. Sa yero m̄sare quehnoana wahagū yerota mari puhtoro. Sa ye m̄sa ñaŋe yeri buhiri m̄sa dohatina ijigū ihñaŋe m̄sare sini basaeta. Tiquina sa sini basagū ihñano m̄sa ñaŋe yerire borota Cohācjü. ¹⁶ Sa yena m̄sa mehna cj̄nare m̄sa ñaŋe yerire cahme p̄a peheri yahu yuhd̄aya. Sa yena m̄sa basi Cohācjüre cahme sini basaya. M̄sa sa sini basagū m̄sa sini basariquire Cohācjü yuhd̄orota. Quehnoañene yena m̄sa ijigū Cohācjüre tutuaro m̄sa sini basariro sahata yerota Cohācjü. Sa ye m̄sa sini basaye tutuar̄aga. Ihyo ijiye ijierare. ¹⁷ Cohācjü yere yahu m̄htariquire m̄nano Elia wame tiriquire mari yero sahata masano ijie tiahye. Sa yero “Acoro ahtaeracāhdo” ni tutuaro siniahye Cohācjüre. Tiqiro sa ni sinigū ihtia c̄hma quehnoano ape c̄hma deco ahri yehpapure ne acoro ahtaerahye. ¹⁸ Sa yero pari turi t̄ja Cohācjüre acorore tiquire

sinigũ acoro ahtahye. Sa yero pari turi ahri yehpapꝛ ꝑꝑꝛi pihni, bꝑꝑꝛa, dꝑꝑꝛa tiahye. Sa ye Cohãcjũre mari siniñe ihyo ijiye ijierare.

¹⁹Yũhũ acaye, mꝑꝑꝛa mehna cjũno Cohãcjũ yere cohãriquiuro Cohãcjũ yere pari turi tiquiuro cahmeatire tiquiore yahuna, quehnoano yena nine mꝑꝑꝛa. ²⁰Sa yena ahrire masiña mꝑꝑꝛa: Cohãcjũre duhuriquiore Cohãcjũre pari turi cahmegũ yena, pꝑꝑꝛa waha-boriquiore yũhdũgũ yena niaga mꝑꝑꝛa. Sa yero tiquiuro ñañe yerire Cohãcjũ borota.

1 San Pedro

Jesu yequinare macari wahariquinare ojoa ohoahye Pedro

¹ Уаһһ, Pedro, Jesucristo tiqiro buhe duti cūriguta ijiaya. Sa yegū mūsare yoaro cĵē macaripū waharinare Ponto yehparū, Galacia yehparū, Capadocia yehparū, Asia yehparū, Bitinia yehparū ti yehparipū waharinare mūsare ijipihinare ojoa ohoaja уаһһ. Mūsare quehnoa duti ojoaja уаһһ. ² Coā waropūre Cohācĵū mari Pacū “Ohō saha yeitja”, tiqiro ni wacūyuriro sahata mūsare beseahye. Tiqiro sa beseri bato tiqiro yaqiro Espiritu Santo mūsare Cohācĵū yequina ijigū yeahye. Sa yeahye tiqiro Jesucristore quehnoano уаһtianā mūsā ijiatire, tiqiro dii cohāno mehna mūsā ñañene cosenohrina mūsā ijiatire. Cohācĵū cahñe mehna tutuaro quehnoa dutiaja mūsare.

Jesu yequina ijina marine uhmūsepū tiqiro neatire cohtena niaja mari

³⁻⁵ Cohācĵū marine tutuaro paja ihñano, Jesucristo yaria masa mājari mehna marine pecapū wahaborinare уаһdūgū yere tiqiro. Sa marine уаһdūgū tiqiro yegū pari turi mari masa bajuariro saha Cohācĵū pohnata wahaja mari. Sa wahana tiqiro mehna mari sa ijiducuatire quehnoano masiaja mari. Sa yero mūsare quehnoano yero taro mūsare cohtero nine. Tiqiro mehna mūsā sa ijiducuatire cūnota tiqiro. Sa yena sa ijiducunata mūsā. Sa yero tiqirore mūsā wacū tutuagū, Cohācĵū tiqiro tutuaye mehna mūsare ihña ihboro, уаһdūgū yerota. Pihtiri deco ijigū mūsare tiqiro уаһdūorire masigū yerota tiqiro. Marine tiqiro sa paja

ihñagū ihñana, tiqirore Cohācĵūre mari pūhtoro Jesucristo pacūrore ño peouhna.

⁶ Sa tiqiro уаһdūoana ijina, mehenogā ahri yehparū mūsā ijiro puno peye tahari mūsā ñano уаһdūepenata bucuere mūsā. ⁷ Sa ñano уаһdūepenata Cohācĵūre cohādana mūsā tiqirore wacū tutuaye potota ti ijigū tire masigū yena niaga mūsā. Uru ahri yehpa cĵē pūrita pihtia waharota. Uru уаһdūoro mūsā wacū tutuaye pehe ihyo waro ijierare. Sa ye masa uru ti ijiyere masi duaye doha tuhu ihñare. Urure tiqina doha tuhu ihñano saha mūsā wacū tutuayere Cohācĵū ihña duaro “Ñano уаһdūahro”, niboaga mūsare. Mūsā sa ñano уаһdūari bato potota tiqirore mūsā quehnoano wacū tutuaducugū ihñano, Cristo ño peoye mehna mūsare “Quehnoano yeri mūsā”, ninota. Ahri yehparū tojoa taro sa ninota.

⁸ Tiqirore Jesucristore mūsā ihñedapenata cahñe mūsā. Sa yena yojobūre tiqirore ihñedapenata tiqirore wacū tutuare. Sa wacū tutuana, tutuaro bucuere mūsā. Cohācĵū tiqiro sa mūsare bucuēgū yegū tutuaro bucuere mūsā. Ti bucuēye quehnoa уаһdūare. ⁹ Sa yero Cohācĵū mūsare pecapū wahaborinare уаһdūgū yerota, mūsā tiqirore quehnoano wacū tutuagū.

¹⁰ Cohācĵū mūsare tiqiro sa уаһdūoatire panopū cĵēna Cohācĵū yere yahu māhtariquina tire masi duaye, sinitue tiahye. ¹¹ Cristo tiqiro ñano уаһdūatire, tiqiro masa mājatire, ijipihtieyehna pūhtoro tiqiro ijiatire tiqiro masa bajuato panopūta tire yahuyu tuhasae tiahye tiqina. Jesucristo yaqiro Espiritu Santo tiqiro yedohoye mehna sa yahuyuahye tiqina. Sa ye tiqina Cohācĵū yere yahu māhtariquina tiqina yahurire quehnoano

masi duaye sinitue tiahye tiquina Cohãcjüre. “Cristo wihirota”, Espíritu Santo tiquiro nidire “¿Noa boro pehe ijiorotari?” ni sinitue tiahye tiquina. Tiquiro wihiati pje gãhure sinitue tiahye. ¹² Tiquina yahuyuri tiquinare masi pehogũ yeati ijierahye. Maripure masi pehogũ yeatire sa ni yahue tiahye. Tire tiquinare masigũ yeahye Cohãcjũ. Æhmusepũ ahtariquiro Espíritu Santo yedohoye mehna yojopure quehnoañe buheyere musare usã yahuaja. Panopũ musa masiatire tiquina yahuyuri tita ijire yojopure musare usã yahuye. Ti buheyere angele gãhũ tutuaro masi duae tiahye.

Cohãcjũ marine ñañe mariena iji dutire

¹³ Sa yena quehnoano wacũ masitjiãna ijiyuya musa. Sa yena tũho masina ijia. Cristo tiquiro tojoa tagũ Cohãcjũ musare quehnoano tiquiro yeatire wacũña. Sa yena tire quehnoano cohteya. ¹⁴ Panopũ Cohãcjüre masiedarĩna ñañene tutuaro cahmena ijimedi musa. Yojopure tire yeracãhña. Sa yena tiquina pohne tiquina pacusumũare quehnoano tiquina yũhtiro saha yeya musa. ¹⁵ Sa yena tiquiro yequina ijiatire musare beseriquiro ñañe marieniquiro tiquiro ijiro sahata musa gãhũ ñañe mariedacãhña. Sa yena quehnoañe dihitare yeya. ¹⁶ Sata ni ojoahye Cohãcjũ yere tiquina ojoari pũpũ: “Ñañe mariegũ ijiaja yũhũ. Yũhũ sa ijigũ musa gãhũ ñañe mariena ijia”, ni, ojoahye.

¹⁷ Tiquiro Cohãcjũ ijipihtiyequinare tiquina yerire ihñano ihcãno saha besere tiquinare. Ñañequinare, quehnoañequinare besere. Tiquiro sa yeriquiro ijigũ tiquirore “Yũhũ Pacũ” ni duana quehnoano yeya. Ahri yehpapũ musa ijiro puno cua pesaro mehna quehnoano ijiducuya musa.

¹⁸ Musa ñecusumua muna panopũ cjẽna tiquina yeri ne dũhseati ijierahye. Musa gãhũ tiquina yeriro saha yena musa ijiepegũta Cristo musare tiquiro yequina ijigũ yeri. Wapamoñequinare tiquina wapamorire tiquina boriro sahata tiquiro pehe musa ñañe yerire potota bo cãhri. Tire quehnoano masine musa. Musare sa yero plata mehna, uru mehna wapa ye wioerare tiquiro musare sa yero. Plata, uru butia waharota. ¹⁹ Tiquiro pehe oveja quehnoariquiro, wete marieniquiro yero sahata ijiriquiro Cristo tiquiro dii mehna tiquiro yariari mehna musa ñañe yerire cohã, musare yũhdũorota. Tiquiro dii mehna marine sa yero quehnoano waro yero nidi.

²⁰ Panopure ahri yehpare tiquiro bajumehneato pano Cristo tiquiro sa wahatire masi tuhasahye mari Pacũ. Yojopũ pehere pihtiatu deco panogã ijigũ, Cristore quehnoano masigũ yeri mari Pacũ musare. ²¹ Cristo yedohoro mehna mari Pacure wacũ tutuare musa. Mari Pacũ pehe Cristore yariariquirore masori jiri. Sa yero tiquirore Æhmusepũ cũno ijipihtiyequinare tiquirore ño peogũ yeahye mari Pacũ. Tiquiro sa yegũ mari Pacure wacũ tutuare musa. Sa yena musare tiquiro yũhdũoatire quehnoano masine musa.

²² Quehnoañe buheyere tiquiro nidiro sahata yena ijina, musa ñañe yerire cohãnohrina ijire musa. Sa yena potota mari acayere Jesu yequinare cahĩ masine musa. Sa yena musa mehna cjẽnare musa jeripohnari mehna tutuaro cahĩña.

²³ Sa yena coã bajuayequina yero saha ijina Cohãcjũ pohna wahari musa. Mari pacusumua mehna masa bajarina ijina came yari-anata. Ti yero saha ijierare Cohãcjũ pohna musa wahagũ. Cohãcjũ buheye mehna tiquiro catigũ yeye buheye mehna tiquiro pohna

wahari m̄sa. Ti buheye mehna Cohācjū mehna sa ijuducunata mari. ²⁴ Ohō saha nine Cohācjū yere tiquina ojoari p̄p̄:

Ijipihtiyequina masa taa yero saha ijire. Sa ye quehnoañe tiquina c̄oye, taa cohorī yero saha ijire. Taa ñaia wahare. Cohorī ḡāh̄ buru dijia, ahbaa wahare. Ti yero saha yariare masa ḡāh̄. ²⁵ Mari p̄h̄toro ye buheye pehe ne p̄htisi. Tiquiro nidiro sahata sa waharota, ni ojoahye.

Ti buheye m̄sare tiquina yahuri quehnoañe buheyeta ijire.

2

¹ Sa yena ijipihtiye ñañe yeyere, ni mehoñene, masa ihñono dihita quehnoano iji mehoñene, apee borore tiquina c̄oḡū cooyere, apeqinare ñano q̄uiti yeyere tire duhuya m̄sa. ² Sa yena coã masa bajuayequina ep̄core tiquina cahmeno saha m̄sa ḡāh̄ quehnoañe buheyere Cohācjū yere tutuaro cahme nemoña. Sa cahme nemoña m̄sa tiquirore m̄sa wacū tutua nemoatire, tiquiro ȳhd̄onohatina m̄sa ijiatire. ³ Sata ijinata m̄sa. Mari p̄h̄toro m̄sare tiquiro quehnoano yeyere mehenogã masi tuhasare m̄sa.

Cristo catigū yeriquiro utā yero saha ijire

⁴ Cristo catigū yeriquiro utā yero saha ijire. W̄h̄ dahreyequina ihcāria utāre tiquina cahmedaro saha masa tiquirore cahmedare. Cohācjū pehe tiquirore ihñagū tiquiro beseriquiro quehnoa ȳhd̄ariquiro ijire. Tiquiro sa ijiriquiro ijigā tiquirore wacū tutuaya. ⁵ Sa yena m̄sa ḡāh̄ w̄h̄ cjē utā paca yero saha ijire. M̄sa sa ijina Cohācjū ya w̄h̄ cjē utāre ihcāno saha tiquina cūriro saha m̄sa tiquiro yequina ḡāh̄ ihcāno saha quehnoano ijinata.

Sa yena Cohācjū ya w̄h̄ cjāna quehnoana pahia ijinata m̄sa. Sa yena Jesucristo yedohoye mehna Cohācjū yere quehnoano yenata m̄sa. M̄sa sa yegū ihñā bucuerota Cohācjū. ⁶ Ohō saha nine Cohācjū yere tiquina ojoari p̄p̄:

Utā w̄h̄p̄ tiquina cū m̄htaria mariedagū w̄h̄re ye d̄uca masiedare. Sata Cristo marieno yeequina waha masiedare masa. Sa yero tiquiro ihyo ijiriquiro ijierare. Sa yegū tiquirore Jerusalēp̄ yo-jop̄re cūḡ niaja. Tiquiro ȳh̄ beseriquiro quehnoa ȳhd̄ariquiro ijire. Sa ye tiquirore wacū tutuayequina bucueeta, ni ojoahye.

⁷ Tiquirore wacū tutuayequina pehe quehnoa ȳhd̄aro wahaeta. Sa yero ihyo ijiriquiro ijierare tiquiro. Tiquirore wacū tutuayequina pehe sijoro saha wahaeta. Tiquinare ohō saha nine Cohācjū yere tiquina ojoari p̄p̄.

Ahriquiro Cristo utā yero saha ijire. Utāre w̄h̄ dahreyequina tiquina bese cohāno saha masa tiquirore cohāeta. Tiquina sa yepegāta yo-jop̄re w̄h̄ dahreyequina w̄h̄re yeye, tiquina cū m̄htaria utāre tiquina cūno saha Cohācjū tiquirore p̄h̄toro cūri, ni, ojoahye.

⁸ Ahri ḡāh̄re nine Cohācjū yere tiquina ojoari p̄p̄:

Omariquiro utāre doque wāhā saro tiquiro esaborirone ne eserare. Sata utā yero saha ijiriquirore Cristore cahmedana, tiquirore ȳhd̄d̄cana, Cohācjū cahap̄ esasi mari, ni ojoahye panop̄.

Tiquina Cohācjū ye buheyere ȳhtierare. Sa yeye panop̄ tiquiro ni ojariro sahata Cristore

cahmedare. Cohācjū panopu “Sa waharota”, tiqiro nidiro sahata Cristore cahmedare tiquina. Sa yeatiquinare cūahye Cohācjū tiquinare.

Ohō saha ijire Cohācjū yequina

⁹ Mūsa pehe Cohācjū beserina ijire. Tiqiro mari pūhtoro tiqiro yequina pahia, tiqiro yere ye basana ijire mūsa. Sa yena tiqiro ya curua cjāna ñaṇe mariedana, Cohācjū yequinata ijire mūsa. Sata ijire mūsa. Cohācjū tiqiro quehnoa yūhdūayere tiqiro yerire apequinare yahuatina ijire mūsa. Mūsare beseahye tiqiro mūsare ñaṇene ye dutieraro. Sa besero quehnoaṇe pehere yeana-jare cūri mūsare. ¹⁰ Panopure dūhseatina ijierari jiri mūsa. Yojoṛu pūritare Cohācjū yequina ijire mūsa. Panopure mūsare paja ihñariqiro mūsare mariedahye. Yojoṛu pūritare mūsare Cohācjū paja ihñari.

Cohācjū yere yena ijiya mūsa

¹¹ Yūhū cahīna, ahri yehpau iji dojatina ijierare mūsa. Cohācjū yequina ijire mūsa. Mūsa sa ijina ijigū ahrire tutuaro yahuaja mūsare: Mūsa ñaṇe tutuaro cahmeṇene yeracāhña. Ti ñaṇene tutuaro cahmena, ñana wahana niaga mūsa. ¹² Cohācjūre cahmeēṇequina watoa ijina quehnoano yena ijiya mūsa, mūsare “Yahūsāri”, nina. Mūsa sa yegū tiquina yojoṛure mūsare ñano yahūsā duepeta, mūsa quehnoano yeyere masieta tiquina. Sa masiṇe, tiquina Cohācjūre “Quehnoagu, tutuagu ijire”, nieta. Sata nieta Cristo ahri yehpau tiqiro tojoa tagū.

¹³ Mari pūhtoro yūhti duana ahri yehpa cjēna pūhto gūhure yūhtiya mūsa. Roma cjānore mūsa ijipihina pūhtoro tiqiro gūhure yūhtiya. ¹⁴ Pūhtoare yūhdūdūcayequinare buhiri dahre dutiro, ohori pūhtoro

tiqirore yedohoyequinare. Sa yero quehnoano yeyequinare “Quehnoano yeri mūsa”, ni dutiro ohori tiqiro tiquinare. Tiqiro sa ohogū, tiquinare yūhtiya mūsa. ¹⁵ Mūsa quehnoano yegū ihñañe tūho masieṇequina tiquina esa tuharo mūsare quti dahre duepeta quti dahre masiedare. Mūsa sa yegū cahmene Cohācjū. Sa yena mūsa pūhtoare yūhtiya.

¹⁶ Cohācjū mūsa pūhtoro ijire. Apequina cahacjāna ijierare mūsa. Sa ijiepenata “Ūsāre dutiriqiro mariedare. Sa yena ñaṇene yematja”, ni tūhotueracāhña, “Ñañene yeari”, nina. Cohācjū cahacjāna ijire mūsa. Sa yena tiqirore quehnoano yūhtina ijiya mūsa. ¹⁷ Ijipihtiyequina masare ño peoya. Mari acaye Jesu yequinare cahñña. Cohācjūre ño peoye mehna ihñañña. Ahri yehpa cjēna pūhtoro gūhure ño peoya.

Cristo ñano yūhdūro tiqiro ihcāno saharo sahata ihcāno sahaya mūsa gūhū

¹⁸ Cahacjāna, mūsa cua pe-saro mehna mūsa pūhtoare yūhtiya. Quehnoaṇequina, mūsare quehnoano yeyequina dihitare yūhtina ijieracāhña. Mūsa mehna usuayequina gūhure yūhtiya mūsa. ¹⁹ Mūsa ñano yerapegūta mūsare tiquina buhiri dahregū “Cohācjū cahmeno sahata ye duaja”, mūsa ni tūhotugū tire mūsa ihcāno sahaḡū “Quehnoano yeri mūsa”, ninota Cohācjū mūsare. ²⁰ Mūsa ñano yeri buhiri tiquina mūsare buhiri dahregū tire mūsa ihcāno sahaḡū ti dūhseati ijierare. Sa yena mūsa quehnoano mūsa yeri buhirire tiquina buhiri dahregū tire mūsa quehnoano mehna ihcāno sahaḡū Cohācjū “Quehnoano yeri mūsa”, ninota mūsare.

²¹ Sa ñano yūhdūanajare mūsare tiqiro yequina iji dutiri jiri

Cohãcjũ. Cristo m̄sa ye iji-
 atire ñano yãhd̄ari tiquireore
 m̄sa ihña cūatire. ²² Tiquireo
 ne ñano yerari. Sa yero ne ni
 mehoedari. ²³ Tiquireore tiquina
 tuhtigũ, tiquireo pehe tiquinare
 tuhti cahmedari. Tiquireore tiquina
 ñano yepegũta “Quẽitja m̄sare”,
 ne niedari. Tiquina sa yepegũta
 tiquinare Cohãcjũ tiquireo buhiri
 dahreatire potota tiquireo yeatire
 masino, “Yũhũ Pacapũ tiquinare
 buhiri dahrerota”, ni tãhoturi.
²⁴ Tiquireo basi curusapũ mari ñañe
 buhirire yariari. Sa waha yariari
 pari turi mari ñañene yeratire,
 Cohãcjũ cahmeñe pehere mari
 yeatire. Tiquireo ñano cami tire,
 marine pecapũ wahaborinare
 yãhd̄oro taro. ²⁵ Oveja wisiaye
 tiquina butiriro sahata mari gũhũ
 pecapũ butiatina ijimi. Yojoꝛũ
 pehere Cristore, ovejare ihña
 ihboriquiro yero saha ijiriquirore,
 marine ihña ihboriquirore wacũ
 tutuaja mari. Sa wacũ tutuana,
 tiquireo yequina wahaũ mari.

3

*Omoca dũhteriquinare ohõ saha
 yero cahmene tiquinare*

¹ Sa yegũ cahacjẽnare yũhũ du-
 tiriro sahata m̄sa namosãnumiare
 dutiitja. M̄sa manũsum̄are
 yãhd̄ũcaeracãhña tiquina
 Cohãcjũ buheyere tiquina cah-
 meaire. Ihqẽquina tiquina
 Cohãcjũ buheyere cahmeẽquina
 ijiye, tiquinare m̄sa yãhd̄ũcaeragũ
 ihñañe Cohãcjũ ye buheyere cah-
 meboaga tiquina. Ti buheyere
 m̄sa yahuerapẽgũta tiquireo yere
 cahmeboaga tiquina. ² Sata
 cahmeboaga tiquinare m̄sa
 quehnoano yeyere, m̄sa ño peoye
 gũhare ihñañe. ³ M̄sa numia,
 cariboyequina numia yero saha
 yeracãhña. Sa yena m̄sa poarire
 wãhãpo sepahtana numia, uru
 darire bũsana numia, wapa bũjũye

suhtire sañana numia ijieracãhña,
 m̄ma m̄sare “E pejẽ yeri”,
 nina. M̄sa pagũre masa tiquina
 ñe pejẽ yeracãhña. ⁴ Sa yena m̄sa
 cua pesaro mehna apequinare
 tutuaro cahñe mehna yena, cua
 pesaro mehna yahuna, ti pehere
 ihña bucuegũ yeya. Ti pehere m̄sa
 yegũ ihyo waro ijierare, Cohãcjũ
 ihñagũ. ⁵ Sata yee tiahye panopũ
 cjẽna numia Cohãcjũ yequina
 numia. Tiquina numia Cohãcjũre
 wacũ tutuaye numia ijiye, tiquina
 manũsum̄are yãhd̄ũcaera
 tiahye. ⁶ Sata Sara ticoro manũno
 Abrahãre quehnoano mehna
 yũhtie tiahye. Sa yero tiquireo
 “Pũhto”, ni pisuahye. Sa yena m̄sa
 quehnoano yena numia ijina,
 cuero marieno ijina numia ijina,
 Sara yero saha ijire m̄sa gũhũ.

⁷ Sata m̄sa m̄ma gũhũ m̄sa
 namosãnumiare quehnoano yeya.
 Tiquina numia mari m̄ma yero
 saha tutuayequina numia ijier-
 are. Sa yena ño peoye mehna
 quehnoano yeya tiquina numi-
 are. Cohãcjũ ijipihtiyẽ decori
 tiquireo mehna mari ijiatire tiquireo
 ohoriro sahata tiquina numia
 gũhare ohorota tiquireo. Tiquina
 sa ijiyequina ijigũ tiquina numiare
 quehnoano yeya. Cohãcjũre m̄sa
 siniñene m̄sa dojomehnedatire
 tiquina numiare quehnoano yeya.

*Quehnoano tiquina yepegũta
 apequina tiquinare ñano yeyere
 yahuahye Pedro*

⁸ Ahri mehna m̄sare yahu bato
 tiitja: M̄sa ijipihtina ihcãno saha
 quehnoano mehna ijiya. Sa yena
 m̄sa mehna cjẽnare quehnoano
 paja ihñaña. M̄sa acaye Jesu
 yequinare pũa peheri cahme
 cahña. Sa yena quehnoano yeya
 tiquinare. Sa ye “Ihyo ijina ijiaja”,
 ni tãhotuya. ⁹ Apequina m̄sare
 tiquina ñano yegũ tiquinare
 ñano ye cahmedacãhña. M̄sare
 tiquina tuhtigũ tiquinare tuhti

cahmedacãhña. Músare tiquina sa yepegãta quehnoano yeya tiquinare. Sa yena “Quehnoano ijiya”, niña tiquinare. Tire yeatinare tiquiro yequinare cãri músare Cohãcjũ pehe músare quehnoano yero taro.

¹⁰ Sata nine Cohãcjũ yere tiquina ojoari pũpũ:

Musa quehnoano bucueye mehna iji duana ne ñano ni yahuducueracãhña. ¹¹ Ñaãe yeyere duhu cãhña. Quehnoaãe pehere yeya. Cahme musa basĩ ihña tuhtiro marieno ijiya. Tire tutuaro yeya. ¹² Quehnoaãequinare mari puhtoro sa ihña ihboducuro nine. Sa yero tiquirore tiquina siniñene sa tuhoducuro nine. Ñano yeyequina pehere tiquiro ihña tuhtire, ni ojoahye.

¹³ Quehnoaãene musa tutuaro ye duagũ apequina pehe músare ñano yuhdugũ ye duaye, ye masisi tiquina. ¹⁴ Quehnoano musa yepegãta músare tiquina ñano yuhdugũ yegũ ihñano Cohãcjũ músare quehnoano yerota. Tiquiro sa yegũ músare ñano ye duayequinare cueracãhña. Sa yena bujua witiyacãhña. ¹⁵ Musa Cristore “Usã puhtoro ijire”, ni tuhotuna, ño peoya tiquirore. Sa yena Cristore musa wacũ tutuayere, Cohãcjũ mehna musa ijiatire apequina sinituboaga. Tiquina sa sinituato pano tiquinare musa yuhtiatire quehnoano masiyuya. Sa yuhtina cahño mehna, quehnoano ño peoye mehna yahuya tiquinare. ¹⁶ Quehnoana ijiya. Sa yena

“Ñañene yeaja”, ni tuhotusi musa. Sa ye Cristo yere quehnoano yena musa ijiã apequina músare ñano quitĩ yeye, buoro wa-haeta tiquina. ¹⁷ Ñañene musa yeri buhiri musa ñano yuhdugũ

quehnoaedare. Sa yero Cohãcjũ cahmegũ quehnoaãene musa yeri buhiri musa ñano yuhdugũ quehnoarĩne ti pũrita.

¹⁸ Sata ñano yuhdũri Cristo. Ihcã tahata ijiptiyequina tiquina ñaãe buhirire yariari tiquiro. Quehnoariquiro ijiri. Sa yero mari ñaãe buhiri ñano yuhdũri tiquiro. Ñano yuhdũri tiquiro marine Cohãcjũ yequina wahagũ yero taro. Tiquiro pagũ yariaa wahari. Yariari bato tiquiro masari jiri. ¹⁹ Sa masariquiro ijiro tiquina buhiri dahreatire cohteyequina muna yariariquina muna jeripohnarine buheahye tiquiro. ²⁰ Sa cohteyequina panopũ Cohãcjũre yuhtierariquina muna ijiyahye. Ti pjepũre Noé tiquiro ijiri pjepũre, pajiria yucusare dohoro niahye. Tiare tiquiro dohori watoa Cohãcjũre yuhtierariquina munare tiquina yuhtigã cahmeno, tiquina yuhtiatire yoari pje cohtemahye Cohãcjũ. Sa ye meheñequinagã ocho masa dia minidi pjere yuhduahye. ²¹ Minigã tiquina yuhdũriro saha wame yeye mehna yuhdũre masa. Mari pagũre mari wete tu cosero saha ijierare wame yeye. Sijoro saha ijire wame yeye. Ñaãe mariena mari ijiatire Cohãcjũre mari siniñe ijire ahri wame yeye. Sa yena Jesucristo tiquiro masa mujari mehna yuhduaja mari. ²² Tiquiro Jesucristo ahmũsepu wahahye potõ pehepũ dujiro taro, Cohãcjũ mehna dutiro taro. Sa yero tiquiro angele bui, ahmũse cjẽna puhtoã bui, dutiyequina bui tiquina puhtoro ijire.

4

Cristo yequina ijina quehnoaãe pehere comesarina ijinata

¹ Mari ñano yuhdũna ñaãe yeyere duhu cjã mari. Sa yena Cristo ñano yuhdũro tiquiro cuerariro sahata tiquiro usuerariro sahata musa

gũhũ tiquiro yero sahata yeya. ² Sa yeya m̄sa ñañene m̄sa ƚe pjerire m̄sa duhuro quehnoano, Cohãcjũ cahmeñe pehere m̄sa yero quehnoano.

³ Panopũ Cohãcjũre cahmeeñequina ñañene tiquina ƚe pjerire tiquina yeriro sahata yeducumahye m̄sa gũhũ. Bũe tiro marieno ñano yena, ñañene tutuaro m̄sa ƚe pjerire yena, quehena, queheye bose decorire yena, “Cohãcjũ ijire”, m̄sa niñe queoyere ño peona ti pehere yee timahye m̄sa. Ti queoyere ihña yabire Cohãcjũ. Sa yena to punota ye bato tiya. ⁴ Sa ye ti ña yũhdũyere yeyequina mehna m̄sa ijigũ yojopũre m̄sa tire yeragũ ihñañe tiquina pehe ihña maria wahari. Sa ye tiquina m̄sare quitu dojomehnedi. ⁵ Tiquina sa yegũ ihñano tiquina ñañe yerire Cohãcjũ pehe sinituro, yahu yũhdũ dutirota tiquinare. Tiquiro catiyequinare, yariariquina gũhũre beseatiquiro buhiri dahreatiquiro ijire. ⁶ Tiquiro sa beseatiquiro ijigũ Jesu yequina pehe yojopũre yariariquina m̄nare quehnoañe buheyere yahuri tiquina yariato pano. Sa ni yahuri tiquina pagũre Cohãcjũ tiquiro yaria dutiepegũta. Sa yahuri tiquinare Cohãcjũ ijipihtiyere decori tiquiro ijero saha tiquiro mehna tiquina ijiducuatire.

⁷ Pihtiyati deco mehenogũ dũhsare. Sa yena quehnoano wacũ masina ijiya, yojopũre Cohãcjũ mehna m̄sa quehnoano yahuducuatire. ⁸ Apequinare cahña, peye tahari tiquina ñañene tiquina yepegũta sa ihña cjã mari. Sa yena m̄sa mehna cjẽnare sa cahĩducuya. Apeye dutiye yũhdũoro ahrireta yeya. ⁹ M̄sa mehna cjẽnare unureno marieno m̄sa ye wũhũsepm̄ sajã ta dutiya. ¹⁰ Cohãcjũ

m̄sare ijipihtinare m̄sa yeatire cũri. Tiquiro sa cũgũ, m̄sa ye masino sahata m̄sa mehna cjẽnare tire quehnoano yeya. Cohãcjũ m̄sape cũri m̄sa yeatire. Tiquiro cũriro sahata apequinare quehnoano yedohona, Cohãcjũ cũriro saha quehnoano yena niaga m̄sa. ¹¹ M̄sa quehnoano yahuna, Cohãcjũ tiquiro yahuboriro saha quehnoano yahuya m̄sa gũhũ. Masare yedohona Cohãcjũ tiquiro cũri tutuaye mehna apequinare yedohoya. Ti ijipihtiyere yena Cohãcjũre masa tiquina ño peoatire sa yeducuya. Jesucristo pehe tire m̄sa yegũ yedohorota. Tiquirore ijipihtiyere decori ño peo, “Tutuagũ ijire”, nino cahmene ijipihtiyequinare. Sata niahdo.

Jesu yequina tiquina ijiri buhiri tiquina ñano yũhdũyere yahuahye Pedro

¹² Yũhũ cahña, yojopũre ña yũhdũaro yũhdũna, “Yohou, sijoro saha ijero wahaga yahũre”, ni, wacũedacãhña. ¹³ Cristo tiquiro ñano yũhdũriro saha m̄sa gũhũ tiquiro yero saha sa wahana, bucueya m̄sa. Sa bucuenta Cristo asi siteye mehna tiquiro tojoa tagũ m̄sa quehnoano bucuenata. ¹⁴ Cristo yequina m̄sa ijiri buhiri apequina m̄sare tiquina tuhtigũ Cohãcjũ yaquiro Espĩritu Santo asi siteriquiro m̄sa mehna ijero nine. Sa yena bucueya m̄sa. ¹⁵ Sa yena masare wejẽdacãhña m̄sa. Apee borore yaqueracãhña. Ñano yeracãhña. Sa yena apequina tiquina yerire ihñana tiquinare sijoro saha ni dojomehnedacãhña. Ti buhiri m̄sa ñano yũhdũgũ ñarĩne. ¹⁶ Sa yena Cristo yequina m̄sa ijiri buhiri ñano yũhdũna, bũe tieracãhña. Ñano yũhdũepenata Cristo yequina m̄sa ijiye mehna bucuenta, Cohãcjũre “Quehnoare”, ni, ño peoya m̄sa.

¹⁷ Cohăcjă tiquiro yequina yerire ihñano tiquiro beseati pje ijiro nine yojopăre. Ijipihtina mari tiquiro yequina mari yerire ihñano bese mahtanota, “Ahri ñaŋe ijire. Ahri quehnoaŋe ijire”, nino. ¿Sa bese mahtano dahse yerotari tiquiro yequina ijieyequina pehere? Tiquirore yahtieyequina pehere tutuaro buhiri dahrerota. ¹⁸ Sa ye quehnoaŋequina yuhdueta. Tiquina sa yuhduati mijo cjüre. Ti sa mijo cjügă Cohăcjüre cahmeeŋequina, ñaŋequina pehe ne yuhduasi. Basioerare tiquinare. ¹⁹ Sa yena Cohăcjă cahmegă mûsa ñano yuhduana, quehnoaŋene mûsa yerire duhueracăhña. Sa yena mûsare bajumehnediquirore, mûsare ne duhueriquirore tiquirore wacŭ tutuaya mûsa.

5

Jesu yequina tiquina yeatire yahuahye Pedro

¹ Yojopăre Jesu yequina pũtoare yahutja. Yuhŭ Jesu yequina pũto ijiaya. Mûsa gũhŭ tiquina pũtoata ijire. Mûsare yuhŭ yero saha pũtoa ijinare ahrire yahugŭ tagŭ niaya yuhŭ. Cristo tiquiro ñano yuhduarire ihñarigŭ ijigŭ, uhmûsepŭ Cristo mehna yuhduacŭ ijigŭ ahrire mûsare yahutja: ² Cohăcjă yequina oveja yero saha ijire. Mûsa pehe ovejare ihña ihboyequina yero saha ijire. Tiquinare Cohăcjă mûsare tiquiro cûriquinare tiquiro yequinare quehnoano ihña ihboya. Sa yena Cohăcjă tiquiro cahmediro sahata quehnoano jeripohna tiye mehna tiquinare ihña ihboya. Sa yena tiquinare ihña ihbona, “Ŭsă ihña ihbori wapa niŋerure wapatanata”, niedacăhña mûsa. Cohăcjă cahmeno sahata yeducuna ijiya. ³ Sa ihña ihbona tiquinare ñano dutiperacăhña. Sa yena quehnoano yeya mûsa

Jesu yequina mûsare tiquina ihña cûatore. ⁴ Mûsa sa yena Cristo ijipihtinare marine ihña ihboriquiro tojoa tagŭ tiquiro mûsare quehnoaŋene ohoatire mûsa yuhduatire cûonata. Ti mûsa cûoati ne pihtisi.

⁵ Tiquinare yuhŭ dutiriro sahata mûsa wahma pjia gũhŭ mûsa pũtoare yahtiya. Sa yena mûsa mehna cjĕnare ijipihtieyquinare ño peoya.

“Masi yuhduacŭcaja”, niŋequina pehere Cohăcjă ihña tuhtire. Apequinare ño peoyequina pehere “Ihyo ijiya ijiaya”, ni tuhotuyequina pehere quehnoano yere tiquiro.

⁶ Sa yena Cohăcjă tutuariquiro mûsare tiquiro dutigŭ tiquirore ño peoya. Mûsa sa yegŭ tiquiro queori pje ijigŭ mûsare apequina ño peota tiquiro dutiro mehna. ⁷ Tiquiro mûsare pajiro tuhotu ihña ihbore. Sa yena tiquirore wacŭ tutuana, ne pajiro tuhotueracăhña mûsa pehe.

⁸ Sa yena wacŭ masi ijiya. Mûsare ihña tuhtiriquiro watĭno yairo usuariquiro tiquiro maca ihya duaro saha mûsare ñano yuhduagŭ ye duare. Sa yero mûsare ñano ye dutire. ⁹ Ijipihtiropŭ ahri yehpapăre apequina Jesu yequinare ñano yuhduagŭ yere watĭno. Tire masina, tiquirore yahtieracăhña. Sa yena Cristore tutuaro wacŭ tutuaya mûsa. ¹⁰ Sa yena mehenogă mûsa ñano yuhdari bato Cohăcjă mûsare yedohorota. Mûsare quehnoana ijigŭ yerota. Sa yero tiquirore mûsa wacŭ tutua nemogŭ, tiquirore mûsa ne duhueragŭ yerota mûsare. Tiquiro ijipihtieye decori uhmûsepŭ Cristo mehna mûsa ijiatire mûsare cûriquiro ijire. Tiquiro Cohăcjă ijire ijipihtieyquinare paja ihñariquiro. ¹¹ “Ijipihtieye decori tiquiro tutuariquiro ijire”, ni ño peouhna

tiquiore. Sata yeihna.

Quehnoa duti bato tiahye Pedro

¹² Ahri pũ meheni pũgãre m̄sare yũhũ oho duagũ Silvano pehe yũhare ojoa basari. Tiquiro Jesu yaquiro yũhũ acayũro Jesure duhueriquiro ijire, yũhũ tũhotugũ. M̄sare quehnoano yahu duaja. Sa yegũ “Ahri buheye potota Cohãcjũ marine tiquiro cahĩñene yahuri buheye ijire”, ni yahugũ m̄sare ahri pũre ojoaja. Sa yena ahri buheyere ne duhueracãhña m̄sa.

¹³ M̄sare tiquiro yequina iji-atinare tiquiro beseriro sahata Jesu yequina Babilonia cjẽna gũhare beseahye Cohãcjũ. Tiquina pehe m̄sare quehnoa dutire. Marco gũhũ yũhũ macũ yero saha ijiriquiro m̄sare quehnoa dutire.

¹⁴ M̄sa mehna cjẽnare quehnoano mehna piti caya.

Ijipihina Jesucristo yequinare quehnoa dutiaja m̄sare.

2 San Pedro

Jesu yequinare ojoa ohoahye Pedro

¹ Y^hu Simo Pedro, Jesucristo buhe duti tiquiro cūrigu ijiaja. Sa yegu tiquiro cahacjāta ijiaja. Sa yegu māsare ojoa ohoaja y^hu. Cohācjū marine y^hdh^oriquiro Jesucristo pehe ñañe marieniquiro ijire. Sa yero tiquirore m^usa wacū tutuagū, tiquiro yequina wahagū yeri jiri māsare. Sa wahana m^usa gū^hu usā yero saha tiquiro yequina ijire. Mari ihcāno saha tiquiro yequina ijiaja. Sa yegu māsare ojoa ohoaja. ² Sa yena Cohācjū gū^hure, mari p^htoro Jesu gū^hure masi nemona tiquina cahñe mehna quehnoano ijiducunata m^usa. Sa quehnoano m^usa ijiatire māsare sini basaja. Sa yegu māsare quehnoa dutiaja.

Ohō saha ijire Cristo yequina

³⁻⁴ Tiquiro yequina ijiatinare Cristo marine pijiri. Tiquiro sa pijigū tuhona, tiquirore y^htii mari. Sa y^htina Cohācjūre masi nemona, tiquiro tutuaye mehna tiquiro cahmeno sahata quehnoana ijinata mari. Tiquiro ijire tiquiro yequina ijiatinare marine pijiriquiro. Quehnoariquiro, masi pehoriquiro tiquiro ijiro sahata ijiatinare marine pijiriquiro ijire. Sata tiquiro tutuaye mehna marine quehnoa y^hdh^oaro yeri. “Ohō sahata māsare quehnoano yeitja”, tiquiro nidiro sahata marine quehnoa y^hdh^oaro yeri. Marine tiquiro sa yegū ahri yehpa cjē ñañene, ñañene mari űe pjeje pehere mari duhu cjā. Ti ñañe pehe marine ñano wahagū yemedi. Sa yena tiquirore y^htina, Cohācjū ijiro saha ijinata mari. ⁵ Sa yena Cristore wacū tutuana iji tuhasare m^usa. Sa yena ohō saha ye nemoña

tja: Quehnoana ijiya m^usa. Quehnoano wacū masina ijiya m^usa. ⁶ Ñano ye duepenata Cohācjū cahmeñe pehere yeducuya m^usa. Sa yena Cristo yequina m^usa ijiri buhiri ñano y^hdh^oepenata sa ihcāno sahaducuya m^usa. Sa yena Cohācjūre ño peona, tiquiro cahmeñene yeya m^usa. ⁷ Sa yena m^usa mehna cjēnare cahme cahña, tiquinare quehnoano yedohoya m^usa. Sa yena ijiptiyequina apequina gū^hure cahña m^usa.

⁸ M^usa sa ye nemogūta quehnoa y^hdh^oare. M^usa sa ye nemona, quehnoañene yena ijiducunata. Sa yena Cristo tiquiro cahmeñene quehnoano yeducuna ijinata m^usa. Ihyo ijina ijisi m^usa. Sa ye Cristore m^usa wacū tutuari ihyo warota ijisi. Y^hu nidiro sahata m^usa ye nemogū quehnoa y^hdh^oare. ⁹ M^usa sa ye nemoedana Cohācjū yere ne masiedabutiare m^usa. Sa ye nemoedana Cristo m^usa ñano yerire tiquiro cohārire ne wacūedare m^usa. Sata bo cā duare m^usa. ¹⁰ Sa yena, y^hu acaye, Cohācjū yequina ijiatinare māsare tiquiro iji dutigū y^htiri m^usa. Sa y^htirina ijina, tiquiro yere wacūduca duana, tiquiro cahmeñene tutuaro sa yeducuya. M^usa sa yena potota Cohācjū mehna ijinata m^usa. Sa yena potota tiquiro beserina ijinata m^usa. Sa yena ñañene yeducusi m^usa. ¹¹ M^usa sa tiquiro cahmeno saha yerina ijina mari p^htoro marine y^hdh^oriquiro Jesucristo tiquiro ijirop^u quehnoano wahanata m^usa. Potota tiquiro yequina waro m^usa ijigū ihñano “Quehnoano mehna y^hu mehna ijiya m^usa”, ninota Jesu māsare.

¹² Sa yegu ahrire māsare sa wacūgū yeducuutja. Ahri māsare y^hu yahurire masi tuhasari m^usa. Sa masina Cohācjū yere m^usa t^horiro sahata quehnoano

yena nine m̄sa. Sa yerina m̄sa ijiepeḡuta ahri m̄sare ȳhu yahurire sa wac̄uḡu yeducuutja m̄sare. ¹³⁻¹⁴ Mehenoḡa d̄hsare ȳhu yariato. Tire quehnoano yahuri mari p̄horo Jesucristo ȳhare. Sa yeḡu catiniḡu waro ahri ȳhu yahurire m̄sare sa wac̄uḡu yeducuutja. Ȳhu sa yeḡu quehnoar̄ne. ¹⁵ Sa yeḡu ahri ȳhu yahu ojoarire m̄sare ojoa c̄u pehoḡutja, ȳhu yariari bato m̄sa quehnoano masiatire. Sa yena ahri ȳhu yahurire sa wac̄uducunata m̄sa.

Cristo tutuariquiro tiquiro ijiye tiyere ih̄n̄ahye Pedro ḡuh̄u

¹⁶ Sa yena Cristo tiquiro tutuaye ḡuh̄are tiquiro ahtati ḡuh̄are m̄sare yahuna, us̄a esa tuharo yahuna niedaja. Tutuariquiro tiquiro ijiyere us̄a basita ih̄n̄a. ¹⁷ Cristo tutua ȳhd̄uariquiro tiquiro ijiyere us̄are ih̄n̄ori Coh̄ac̄j̄u mari Pac̄u. Tiquiro sa ih̄n̄oḡu tiquiro pehe quehnoano asi siteriquiro ijiri. Tiquiro sa asi siteḡu oh̄o saha nino ca tari ti asi siterop̄u: “Ahriquiro ȳhu mac̄u, ȳhu cah̄n̄iquiro ijire. Tiquiro mehna quehnoano bucueaja”, nino ca tari us̄a tuhoḡu. ¹⁸ Uhm̄usep̄u tiquiro sa niḡu tuh̄ou us̄a. Can̄u buip̄u Coh̄ac̄j̄u tiquiro ijiri can̄up̄u Cristo mehna ijii us̄a.

¹⁹ Tire ih̄narina ijina, Coh̄ac̄j̄u yere yahu m̄htariquina panop̄u c̄j̄ena tiquina ojoari potota ijiḡu quehnoano masiaja us̄a. Tiquina ojoarire quehnoano buheducuna quehnoano yena nine m̄sa. Ti tiquina ojoari Coh̄ac̄j̄u yere marine quehnoano masiḡu yere. Ahri yehpap̄u ñano tiquina yeri yehpap̄u mari ijiḡu quehnoano masiḡu yere marine. Sa yena Coh̄ac̄j̄u yere tiquina ojoarire sa buheducuya. Sa buheducuna Cristo tiquiro tojoa taḡap̄u buhe duhnata. Sa tojoa taro tiquiro yere mari masiedarire

marine quehnoano masi pehoḡu yerota. ²⁰ Ijipihtiyē ti ȳhu yahuri ȳhd̄uro ahri pehere quehnoano masiña m̄sa: Coh̄ac̄j̄u yere panop̄u tiquina ojoarire buhena mari esa tuharo tire buhena, “Oh̄o saha nino niaga”, ni masiedaja mari. Esp̄ritu Santo yedohoro mehna masiaja mari. ²¹ Ne masa tiquina esa tuharo Coh̄ac̄j̄u yere ojoaerahye. Panop̄u c̄j̄ena Coh̄ac̄j̄u yere tiquina ojoaḡu Esp̄ritu Santo pehe tiquina ojoatire tiquinare masiḡu yeahye.

2

“Coh̄ac̄j̄u ye buheye ijire”, ni meho buheyequinare yahuahye Pedro
(Jud 1.4-12)

¹ Panop̄u mari acaye judio masa mehna c̄j̄ena “Coh̄ac̄j̄u yere yahu m̄htarina ijiaja”, ni mehoñequina ijie tiahye. Tiquina yero sahata yojop̄u ḡuh̄are m̄sa mehna c̄j̄ena sa ni mehoñequina ijieta. Potota tiquina buheboro sahata ni mehoñe pehere buheeta. Sa buheye Cristo ye buheye pehere dojomehneeta. Sa ye “Cristo ȳhd̄onohrina ijiaja”, niepeta Cristo dutiyere ne ȳhtierare tiquina. Sa ye tiquirore “Us̄a p̄horo ijire”, ni tuh̄otuerare. Ti ijipihtiyere tiquina sa yeri buhiri duita tiquinare Coh̄ac̄j̄u pecap̄u waha dutirota. ² Sa ni meho tiquina buheḡu tuh̄oye tiquina ñañene tutuaro cahmediro sahata peyequina masa tiquinare ih̄n̄a c̄u ñano yeeta. Tiquina sa ñano yeḡu ih̄n̄añe apequina masa ḡuh̄u quehnoañe buheyere ñano quit̄i dahreeta. ³ Sa ye tiquina ni mehoñequina niñerure wapa cahmeñe, ni mehoñe buheyere buheeta m̄sare. Tiquina sa buheri buhiri Coh̄ac̄j̄u tiquinare pecap̄u waha dutirota. Panop̄u

sa yeyequinare buhiri dahre duti tuhasahye tiquiro.

⁴ Sata panopu buhiri dahre dutiahye ñañequina angele gūhare. Tiquinare pecapu peresu yeahye. Sa yero pihtiri deco bato tiquinare buhiri dahrerota. ⁵ Sata panopu cjēnare Cohācjūre cahmeeñequinare buhiri dahreahye. Sa yero ijipihitiro ahri yehpare miono, ijipihitiyequina ñañequina masare mio wejēahye. Sa yero Noéne tiquiro mehna cjēna gūhare yūhdūoahye. Tiquina ijipihitiyequina tiquiro yūhdūoriquina ocho masa ijiahye. Noé pehe quehnoañene ye dutiro ti pje cjēnare buhee timahye. ⁶ Sata Sodoma wame tiri maca cjēnare, Gomorra wame tiri maca cjēna gūhare Cohācjū buhiri dahreahye. Ti macarine peca mehna quehnoano ujāa peho cāhye. Sa yero cameru ijiatiquinare tiquirore cahmedatiquinare ihñono niahye. Ñañequinare tiquiro buhiri dahreatire ihñono niahye tiquinare. ⁷ Sa yero Lote wame tiri quirore yūhdūoahye. Lote pehe quehnoariquiro ijiahye. Sa quehnoariquiro ijiro Sodoma cjēna Cohācjū dutiyere yūhdūdūcayequina ña yūhdūaro tiquina yegū ihñano caributia wahahye tiquiro Lote. Sa yero amua tiquina basi tiquina paguri mehna tiquina ñano yegū ihñano caributia wahahye tiquiro. ⁸ Tiquiro quehnoariquiro ñañequina watoa ijiahye. Sa yero decoripe ña yūhdūaro tiquina yegū ihñano, ñano tiquina yahuducugū tūhoro ñano jeripohna tiahye. ⁹ Tiquirore Cohācjū yūhdūogū ihñana ahri yūhū yahuatire masiaja mari. Cohācjū mari pūhtoro tiquirore cahmeeñequinare tiquina ñano yūhdūgū ihñano tiquinare yūhdūorota. Sa yero ñañequina pehere peresu yero, tiquinare cūore pihtiri deco ijigū tiquiro buhiri dahreatiquinare.

¹⁰ Ñañene tutuaro űe pjeyequina Cohācjūre yūhdūdūcayequina tiquina pūritare ñano buhiri dahrerota tiquiro. Tiquina mūsa mehna cjēna ni meho buheyequina ñañene yeye, ne cuerare. Sa ye bue tierare tiquina. “Apequinare masi yūhdūdūcaja”, ni tūhotuyequina ijire tiquina. Sa ijieyequina ijieye űhmūse cjēna tutuayequinare ne ño peoera, ñano ni bujūpere tiquinare. ¹¹ Angele pehe ne tiquina yero saha yerare. Tiquina pehe ni meho buheyequina yūhdūoro tutuayequina ijire. Sa ijiepetā tiquina ne bujūpeye mehna ni meho buheyequinare ñano yahusāedare Cohācjūre, yūhdūdūcayequina ijieye.

¹² Sa ye ahriquina ni meho buheyequina pehe nūcu cjēna wahiquina yero saha tūho masieñequina ijire. Nūcupu boca sa tiquina wejēatiquina yero saha ijire tiquina. Tiquina basi cahmeno saha yere tiquina. Sa ye tiquina masieñequinare bujūpe, ñano ni yahuducu cohtere. Sa yeyequina ijigū wahiquinare mari wejēdiro saha Cohācjū tiquinare pecapu cohānota. ¹³ Sa yero tiquina ñano yeri buhiri buhiri dahrerota Cohācjū. Tiquina ñañene tutuaro cahmene. Sa ye ñano yeducure. Mūsa mehna bose deco yeye, ti bose deco ijigū tiquina ñañene ye yūhdūare. Sa yeye mūsa bose decore tiquina wete ohōno saha tiquina ñañene pihore mū sare.

¹⁴ Sa ye numiare ihñañe, ñehe duare tiquina. Sa ye ñañene sa yeducu duare. Cohācjūre wacū tutuera cjūñequinare ñañene ye dutiye, sa ijieyequinare tiquinare ihñā cūgū yere. Sa ijieye tiquina sehsaro apee borore, niñeru gūhare ni meho ehma mihniñequina ijire. Tiquina Cohācjū tiquiro buhiri dahreatiquina ijire. ¹⁵ Tiquina Cohācjū yere buheraye,

sijoro saha ijiye buheye pehere buhere. Sa ye Balāa yero saha yeye nine. Balāa, Beor macano ijiyahye. Tiquiro pehe panopu tiquiro ñañe yeri mehna niñerure wapata duamahye. ¹⁶ Tiquiro sa yegū ihñano tiquiro yacoro burro tuhtiahye ticoro uparore. Tiquiro yacoro burro yahuducuericoro ijiepegūta Cohācjū ticoro uparore tuhti dutiahye ticorore. Ticoro sa tuhtigū tūhoro Balāa tutuaro tiquiro ñañene ye duamedire duhu cāhye.

¹⁷ Ahriquina ni mehoñequina mări pohteripu aco marieno yero saha ijire. Aco marieñe pohteri ti dūhseati ijieraro saha tiquina ni mehoñequina ne dūhseati ijierare. Sa ye ehmeo cururi wihnono ti wēdoqueoye cururi ti sa comesaducuro sahata, tiquina ni mehoñequina gūhu ihcāno saha yahuducuera, sa comesaducure. Sa yero nahitiano warore quehno tuhasahye Cohācjū topu tiquinare buhiri dahrero taro. ¹⁸ Tiquina ni mehoñequina tiquina yahuducuye dūhseati ijierare. Masiñequina yero saha masare sa buhe maca cāhre. Ohō saha ni buhere tiquina: “Mari cahmeno sahata mari yegū quehnoarīne”, ni buhemene tiquina. Tiquina sa ni buhegū masa tūhoye ñañene űe pjeje, tiquina ye buheyere cahmene. Apequina masa Cohācjūre potota coā cahme dūcayequina mehenogāta wahare tiquina ñañene tiquina duhuri bato. Tiquinare ni mehoñequina buhegū tūhoye ñañene cahmene tja Cohācjū yequina ijiboriquina ijiepetā. ¹⁹ Tiquinare ohō saha ni buhere ni mehoñequina: “Mari cahmeno sahata mari yegū quehnoarīne”, ni buhemene tiquina. Tiquina sa ni buhepegūta tiquina ni-di-ro saha wahaerare tiquinare. Ñañene duhu dueraye, tire duhu

masiedabutiare. Tiquina sa ñano yeye, “Queoro ijire űsā yeri”, ni tūhotumene tiquina. Sa ye tiquina ti ñañene ne duhu masiedare. Ti ñañe tiquina pūhtoro yero saha ijire.

²⁰ Mari pūhtoro Jesucristore marine yūhdūoriquirore coā cahme dūcayequina pehe ahri yehpa cjē ñañene duhu cāmedi. Tiquina sa duhuri bato pari turi ñañene yeye, ña yūhdūaro tojoare tiquina. Cristore tiquina masiato pano tiquina iji mūhtariro yūhdūoro ña yūhdūaro tojoare, pari turi ñañene yeye. ²¹ Sa ña yūhdūaro tojoaye quehnoañe buheye pehere tiquina ne masi mūhtaedagū quehnoa yūhdūboya tiquinare. ²² Sa ye pari turi ñañene yeye, masape tiquina ni yahuducue tiriro saha yee nine tiquina. Ohō saha ni yahuducure masa: “Diero etoa tuhasa pari turi tiquiro etoa cūrire ihyare. Sa yero yesere tiquina coseri bato pari turi tiquiro ñari sahbaru cuhsare tja. Sata yere quehnoañene cahmemediquina gūhu pari turi ñañene cahmeñe tja”, ni yahuducue tire masa.

3

Cristo ahri yehpapu tiquiro tojoa tatire yahuahye Pedro

¹ Yūhu cahīna, mū sare ihcā pū ojoa oho tuhasan. Sa yegū ahri pūre tja yojopure mū sare ojoa ohogu niaja. Sa yegū pua taha ojoagu ahri ijipihtiyere mū sare wacūgū ye duagu niaja quehnoañe dihitare mū sare tūhotu dutigu. ² Ahri yūhu yahuatire wacūña mūsa: Panopu cjēna quehnoañequina Cohācjū yere yahu mūhtariquina mūna tiquina yahu ojoarire wacūña. Sa yena mari pūhtoro marine yūhdūoriquiro Cristo tiquiro dutiye gūhure wacūña. Ti dutiyere űsā tiquiro cūrina mū sare buhei.

3 Sa yena ahrire wacū m̄htaña: Pihtiati deco panogā Cohācjū yere b̄j̄m̄peyequina ijietā. Tiquina ñañene tutuaro cahmeducuyequina ijiye, ti ñañene yeducueta. Ohō saha ni b̄j̄m̄peeta: 4 “Cristo ‘Tojoa tautja’, nieperota ne tojoa tasi. ¿Tojoa ta dueperota duhsero ne bajuerajari tiquiro? Ahri yehpa iji d̄cari bato mari ñec̄sum̄na m̄na iji turiayequina tiquina yariari bato ijipihtiuro sijoro saha waharo marieno sa ijiducure. M̄nanota sa ijiducu cāre. Sa yero ahri yehpare ahtatiquiro uhm̄separe mariedare”, ni b̄j̄m̄peyequina ijietā. 5 Sa ni b̄j̄m̄peye ahri pehere ne wacū d̄erare tiquina: Panop̄re Cohācjū tiquiro dutiro mehna ahri yehpare, uhm̄se ḡh̄are bajumehneahye. Sa yero ahri yehpar̄m̄ aco dihita ijirirore dihta ijigū yeahye tiquiro. Sa yero aco mehna ahri yehpa yojop̄re ti ijiro sahata ahri yehpare yeahye tiquiro. 6 Sa yero camer̄m̄ ahri yehpare miono, cohā pehoahye ahri yehpa cjēne. Sa yero ahri yehpare ihcā tahata sijoro saha wahagū ye tuhasahye Cohācjū. 7 Sa sijoro saha wahagū yeperota yojop̄re uhm̄sere, ahri yehpa ḡh̄are pari turi comesagū yerari tiquiro. Tiquiro dutiro mehna ahri yehpare, uhm̄se ḡh̄are yojop̄re ti ijiro sahata ijiducu nemogū yero nine. Sa yero cohtero nine came ijipihtirop̄re ujm̄ano taro. Sa cohtero nine Cohācjū tiquirore cahmeñequinare buhiri dahrero taro. Sa buhiri dahrero tiquinare pecar̄m̄ cohānota.

8 Ȳh̄u cahīna, ahrire wacūña m̄sa: Mil cahmarine “Yoa yuh̄uari pje ijire”, mari ni tuh̄otuepegūta ihcā decota ijire, Cohācjū ihñagū. 9 “Cohācjū tiquiro nidiro saha um̄ñano yerabutiare”, nine masa. Sa ijierare. Masare quehnoano ye duaro

cohtenino nine. Ne ihcāquiro masunore pecar̄m̄ cohā d̄erare tiquiro. Sa yero ijipihtiyequina tiquina ñañene b̄j̄m̄a witiḡū, ñañene duhugū cahmeno nine tiquiro.

10 Ñamip̄re yaque buc̄ro tiquiro wacūeno mehna yaquero saḡ̄riro saha Cristo ahri yehpar̄m̄re wacūeno mehna ahtarota. Tiquiro ahtagūta to tutuaro bisigūta uhm̄se cjē pihtia waharota. Ujū pihtia waharota. Sa yero ahri yehpa ḡh̄u, ahri yehpa cjē ḡh̄u ujm̄ pihtia waharota.

11 “Ahri ijipihtiye pihtia waharota”, Cohācjū nigū tuhona ñañene duhuna, Cohācjū cahmeñene yero cahmene marine. 12 Mari p̄htoro ahri yehpar̄m̄ tiquiro ahtatire cohtena, sojaro mehna tiquiro ahtagū yeya m̄sa. Ti deco uhm̄se cjē ujm̄ pihtia waharota. 13 Ti sa cuaro wahati ijiepegūta mari pehe Cohācjū ni cūriro sahata ijipihtiye tiquiro comesagū yeatire cohteaja mari. Ijipihtiye ti ujm̄ pihtiari bato ohō saha ijirota. Uhm̄separ̄m̄ ḡh̄u ahri yehpar̄m̄ ḡh̄u wahma ijirota. Sa ye ti p̄ep̄re quehnoañe dihitare yeeta ijipihtiyequina. Tireta cohteaja mari.

14 Sa yena yuh̄u cahīna, mari p̄htoro tiquiro ahtatire cohtena, Cohācjū ihñonop̄m̄ quehnoano yena ijiya m̄sa. Sa quehnoano yena ijiya m̄sa Cohācjū m̄sa mehna tiquiro bucueatire. 15 Sa yena yoa cjūri pje tiquiro bajueragū ihñana ahrire masiña m̄sa. Masa tiquirore cahmeñequina tiquiro yuh̄duatiquina d̄hsar̄ne yojop̄m̄. Sa yero tiquinare cohtenino nine Cohācjū. Sata ni m̄sare oja ohori jiri mari acayuro mari cahñiquiro Pablo. Cohācjū masiñe mehna tire ojoari jiri tiquiro. 16 Sa dihita ni ojoari jiri Pablo tiquiro ojoaripe. Cristo tiquiro ahtatire, ñañene yeeyequina mari ijiati ḡh̄are yahuro ohō saha dihita ni ojoari

jiri tiquiro. Ihquẽ tahari mijo
 cjuñene tiquiro yahu ojoari jiri.
 Apequina ne masieñequina, taho
 masieñequina ni mehoñe mehna
 tiquiro sa nidire camesa mujare.
 Sa ye tiquiro sa nidi ijiepegũta
 sijoro saha ni camesa yahure
 tiquina. Apeye Cohãcjũ yere
 tiquina ojoari pũri gãhare sata yeri
 tiquina. Tiquina sa yegũ ihñano
 Cohãcjũ tiquinare buhiri dahrero,
 pecapũ cohãnota.

¹⁷ Yũhũ acaye, yũhũ cahĩna ahri
 ijipihtiyere ti sa wahato pano
 yahuu mũsare. Sa yena ahrire
 masina, quehnoano yeya mũsa.
 Ñañequina mũsare sijoro saha
 ni tiquina buhegũ tãhoeracãhña
 tiquinare, “Cristo yere duhuari”,
 nina. ¹⁸ Sa yena mari pũhtorore
 marine yãhdũoriquirore Cristore
 quehnoano wacũ tutua nemoña
 mũsa. Tiquirore quehnoano masi
 nemoña mũsa. Yojoũre, ijipihtye
 decori tiquirore quehnoano ño
 peouhna mari. “Quehnoariquiro,
 tutuariquiro ijire”, niuhna mari
 tiquirore. Sata niuhna.

1 San Juan

Jesucristo catiyere ohoriquire ijire

¹ Jesu Cohãcjũ mari Pacũ ye yahuducuyere yahuriquire ijire. Duita coã waropũta ijiriquiro tiquireo mari Pacũ mehna masare sa ijiducugũ yeriquiro ijiahye. Yojoþure usã tiquireo yere, tiquireo ijiye tiyere yahu ojoana niaja. Tiquireore tũhona, tiquireo waroreta ihñau usã. Sata ijire. Tiquireore ihñana, usã omocari mehna tiquireore dahra tuhuu. ² Ahriquireo mari Pacũ mehna sa ijiducugũ yeriquiro ahri yehpapũ tiquireo masa bajuari bato tiquireo usã ihñau. Sa yena tiquireore yahuaja usã musare. Ijipihtiye decori mari Pacũ mehna tiquireo ijiducuriquireo ijigũ, yojoþure mari Pacũ tiquireore ihñori usãre. Tire yahuaja usã musare. ³ Mari Pacũ mehna cjãna ijiaja usã. Tiquireo macũno mehna cjãna gũhu ijiaja usã. Sa yena musa gũhu usã mehna cjãna, mari Pacũ mehna cjãna, tiquireo macũno mehna cjãna musa ijiatire usã ihñarire, usã tũhorire musa gũhure usã yahuaja. ⁴ Ahrirete usã ojoaja quehnoano mari bucueatire.

Buhrioro to wete marieno saha Cohãcjũre ñahe ne mariedare

⁵ Ahri buheye Cohãcjũ macũno usãre tiquireo yahuri ijiye nine. Yojoþuta ahrire yahunatja usã musare: Cohãcjũ buhrioro yero saha ijire. Buhrioro to wete marieno saha tiquireore ne ñahe mariedare. Ñahe nahitiano yero saha ijire. Cohãcjũre ne ñahe mariedare. Tiquireo sa ijiye tiyere yahuaja musare. ⁶ Sa yena nahitianopũ ijina yero saha mari ñahe yena ijiepenata “Cohãcjũ mehna cjãna ijiaja”, nina, mari ni mehona niaja. Sa yena

Cohãcjũ yere queoro yeraja. ⁷ Sa yena buhrioropũ ijina yero saha Cohãcjũ tiquireo yeriro sahata mari quehnoañe pehere yena, apequina Jesu yequina mehna quehnoano ijina niaja. Mari sa yegũ Cohãcjũ macũno Jesu tiquireo dii cohãno mehna, curusapũ tiquireo yariari mehna ijipihtiye mari ñahe yerire bore.

⁸ “Yũhu pũrita ne ñahe yeraja”, ni wacũna, mari ni mehoñene tũhotuna niaja. Mari sa ni tũhotuna Cristo yere ne masiedaja. ⁹ Sa yena Cohãcjũre mari ñahe mari yahu yũhdugũ tiquireo pota yeriquiro mari ñahe borota. Sa yero ijipihtiye mari ñahe yeri gũhure, mari ñano tũhotuye gũhure cose werota tiquireo. Tiquireo nihiro sahata yeriquiro ijire. ¹⁰ “Ñahe yeraja”, nina, “Cohãcjũ ni mehoriquireo ijire”, nina niaja mari. Sa nihequina tiquireo buheye cahmedare.

2

Cristo marine yedohore

¹ Yũhu pohna, musare “Ñahe yeri”, nigũ ahrire ojoagu niaja. Yũhu sa ni ojoapegũta ñahe yeboaga musa. Musa sa yegũ ihñano Jesucristo quehnoariquireo musa ye ijiatire tiquireo Pacũrore ohõ saha ni sini basarota: “Ahriquina tiquina ñahe yeri buhirire buhiri dahreracãhña”, ni sini basarota tiquireo Pacũrore. ² Cristo mari ñahe cohãriquireo ijire. Mari ñahe mari dihitare cohãedare. Ijipihtiro cjẽna gũhure tiquina ñahe cohã masine tiquireo.

³ Cohãcjũ dutiyere yena, tiquireore potota quehnoano masiaja mari. ⁴ Ihcãquireo Cohãcjũ dutiyere yeraperota “Yũhu Cohãcjũre masiaja”, nino, tiquireo ni mehoriquireo ijire. Sa yero Cristo yere ne masiedare. ⁵ Apequireo

pehe Cohãcǵũ dutiyere yeriquiro Cohãcǵũre tutuaro cahĩniquiro ijire. “¿Cohãcǵũ mehna cǵãna ijiajari mari?” ni masi duana, ohõ saha mari masinata: ⁶ Cohãcǵũ mehna cǵãno Jesucristo quehnoañene tiquiro yeriro sahata yeriquiro ijire. Sata yeducuuhna mari.

Wahma dutirore yahuahye

⁷ Yũhũ cahĩna, ahri dutiro yojopũre musare yũhũ yahuati wahma dutiro ijierare. Ahri dutiro musa coã waropũre cuoriro muna dutirota ijire. Ti dutirore musa tũho tuhasari. ⁸ Yojopũ pehere musare yũhũ yahuati muna dutiro ijieperota wahma dutiro gũhũ ijire. Cristo gũhũ, musa gũhũ ti dutirore yere. Yojopũ nahitiano pihti cã mari ihña masino saha mari masiedarire masi dũca cãna niaja mari. Sa yero buhrioro mehna mari ihña masino saha Cristo musare poto ijiyere masigũ yero ahta tuhasari.

⁹ “Yũhũ buhrioropũ ijiriquiro yero saha Cohãcǵũ dutiyere yegũ ijiaja”, ihcãquiro nieperota, apequinare ihña tuhtiro, tiquiro Cohãcǵũ dutiyere yerare. ¹⁰ Sa yero apequirore cahĩniquiro pũrita buhrioropũ ijiriquiro yero saha Cohãcǵũ dutiyere yeriquiro ijire tiquiro. Sa yero ñañene pari turi ye duerare. ¹¹ Masare ihña tuhtiriquiro pehe nahitianopũ ijiriquiro yero saha ijiro nine. Tiquiro caperi bajueriquiro yero saha ijire. Tiquiro wahatore ihña masiedare tiquiro.

¹² Yũhũ pohna, Cristo tiquiro yariari mehna musa ñañe yerire cohãri jiri. Sa yegũ musare yahu ojoagũ niaja. ¹³ Musa pacusumua gũhũ, musa Cristore coã waropũ ijiriquirore masine musa. Musa sa masigũ ihñagũ musa gũhũre yahu ojoagũ niaja. Musa wahma pjia ñariquiro watĩnore yũhdũdũcari

musã. Musã sa yũhdũdũcãna ijigũ musã gũhũre yahu ojoagũ niaja.

Yũhũ pohna, mari Pacũre musa masine. Musã sa masigũ ihñagũ musare yojopũre yahu ojoagũ niaja. ¹⁴ Musã pacusumua, musã Cristore coã waropũ ijiriquirore masine musã. Musã sa masigũ ihñagũ musare yahu ojoagũ niaja. Musã wahma pjia potota musã Cohãcǵũre wacũ tutuana ijire. Sa yena musã Cohãcǵũ yere yena niaga. Sa yena, musã ñariquiro watĩnore yũhdũdũcari. Sa yegũ musare yahu ojoagũ niaja. ¹⁵ Ahri yehpa cǵẽ ñañene cahmedacãhña. Ahri yehpa cǵẽ ñañene cahmena mari Pacũ pehere cahmedare musã. ¹⁶ Ñañequina tiquina basi ñañene tiquina tutuaro cahmedi, ñañene tiquina ihña duari mari Pacũ Cohãcǵũ ye ijierare. “Ijip-ihtiye cuo pehogũ, masi pehogũ ijiaja yũhũ. Ne ihcãquiro masino yũhũre yũhdũdũcaerare”, masa tiquina ni tũhotuye mari Pacũ ye ijierare. Ti ijipihtiye ahri yehpa cǵẽ ijire. ¹⁷ Ahri yehpa, ahri yehpa cǵẽ gũhũ masa tiquina cahmeñe pihtia waharota. Sa yero Cohãcǵũ cahmeñene yeriquiro ijipihtiye decori Cohãcǵũ mehna ijirota.

Cristore ihña tuhtiriquiro pehere yahuahye Ñũ

¹⁸ Yũhũ pohna, ahri yehpa pihtiatĩ deco mehenogã dũhsare. “Cristore ihña tuhtiriquiro ahtarota”, ni, Jesu yequina musare yahu tuhasari. Yojopũre Cristore ihña tuhtiequina peyequina iji tuhasare. Tiquina sa ijigũ ihñana yojopũre pihtiatĩ deco mehenogã dũhsagũ masiaja mari. ¹⁹ Ahriquina Cristore ihña tuhtiequina pehe mari caha ijiepetã potota mari mehna cǵẽna ijierare. Sa ye tiquina marine cohã cãri. Tiquina mari mehna cǵẽna ijiye, mari mehna ijiboaga. Marine cohã cãri. Tiquina sa cohãgũ

mari mehna cjēna tiquina ijieragū masiaja mari.

²⁰ Cristo Espíritu Santore mūsa pehere oho. Sa yero Espíritu Santo mūsa mehna ijire. Sa yena mūsa ijipihtina Cristo yere masi tuhasare. ²¹ Mū sare yahugū “Cristo yere masiedare mūsa”, ni tuhotueraja yūhu. Mūsa Cristo yere masigū ihñagu mū sare yahuaja. Cristo ye ne ni mehoñe mariedare. Ti gūhare masina mūsa ijigū masiaja yūhu. ²² Ahriquiuro ijire ni mehoiquiro: “Jesu Cohācjū macūno ijierare”, nidiquiro pehe ni mehoiquiro ijire. Potota Cristore ihña tuhtiriquiro ijire tiquiuro. Mari Pacūre, tiquiuro macūno gūhare cahmedariquiro ijire Cristore ihña tuhtiriquiro. ²³ Ohō saha ijire: Jesure cahmeediquiro pehe mari Pacū gūhare cahmeediquirota ijire. Jesure cahmediquiro pehe mari Pacū gūhare cahmediquiro ijire.

²⁴ Coā waropū Cohācjū yere mūsa tuhorire quehnoano wacūña. Tire mūsa wacūna, Jesu mehna cjāna ijinata. Sa yena mari Pacū mehna cjāna ijinata. ²⁵ Tireta Jesu marine yahuri. Ohō saha ijire tiquiuro yahuri: “Mūsa ijipihtiyē decori Cohācjū mehna ijiducunata”, ni cūri Jesu marine.

²⁶ Apequina mū sare ni mehoñe nine. Tiquina sa ni mehogū masigū mū sare yahu ojoagu niaja. ²⁷ Tiquina sa ni mehonohrina mūsa ijiepegūta mūsa pehere Cristo tiquiuro yaquiuro Espíritu Santore oho tuhasari. Espíritu Santo mūsa mehna ijire. Mūsa mehna ijiro mū sare buheriquiro ijire. Tiquiuro ijipihtiyere mū sare yahure. Tiquiuro yahuye ijirota ijire. Ni mehoñene yahuerare tiquiuro. Espíritu Santo nidiro sahata yeya mūsa yojoḡre. Sa yena mūsa Cristo yere tuhona, tiquiuro mehna quehnoano ijiya.

²⁸ Sata ijire. Yūhu pohna, mūsa Cristo mehna cjāna ijiya. Sa yena Cristo ahtati decore cuesi mūsa. Sa yena tiquiuro ahtati decore bue tiye mehna duhtisi mūsa. ²⁹ Cristo quehnoañene yeriquiro tiquiuro ijigū mūsa masine. Tire masina ahri gūhare masiña mūsa. Ijipihtiyequina quehnoañene yeyequina Cohācjū pohmeta ijire. Ti gūhare masiña mūsa.

3

Mūsa Cohācjū pohna ijire

¹ “Mūsa yūhu pohna ijire”, nino, tutuaro cahī yūhdudūcaro nine marine mari Pacū. Tiquiuro sa cahñona ijina tiquiuro pohna ijiya mari. Ahri yehpa cjēna ñañequina Cohācjūre masiedare. Sa yeye Cohācjū pohna mari ijigū ihñañe tiquina mari gūhare masiedare. ² Yūhu cahīna, yojoḡre Cohācjū pohna ijiya mari. Sa ijiepenata came mari ijiatire mari quehnoano masiedaja. Sa masiedapenata ahri pehere masiaja. Cristo tojoa tagū mari ihñana, tiquiuro ijiriro sahata tiquiore mari ihñanata. Sa yena Cristo marine bajuagū ihñana tiquiuro yero saha mari came-sanata. ³ Ijipihtiyequina ahrire masiñequina Cristore ihña cūñe, ñañene ye duerare.

⁴ Ñañene yena dutiyere yūhdudūcana niaja. Sa ye ijipihtiyequina ñañene yeyequina Cohācjū dutiyere yūhdudūcayequina ijire. ⁵ Cristo masare tiquina ñañene cohātiquiro bajuahye. Tiquiuro ne ñañene yerare. Tire masine mūsa. ⁶ Sa ye ijipihtiyequina Cristo yequina ñañene yeducuerare. Apequiuro pehe ñañene sa yeducuriquiro Cristore ne masiedare. Sa yero Cristo yaquiuro ijierare. ⁷ Yūhu pohna, mū sare ni mehoñequinare tuhoeracāhña. Ijipihtiyequina quehnoañene

yeyequina Cristo yero saha quehnoañequina ijire. ⁸ Apequiro pehe ñañene sa yeducuriquiro watño yaquiro ijire. Watño pūrta duita ñañene yeriquiro ijiahye. Sa yero watño tiquiro ñañene ye dutiyere cohātiquiro Cohācjū macuno masa bajuahye.

⁹ Cohācjū pohna ijina Cohācjū yero saha ijina ijiaja. Sa yena ñañene yeducueraja. Cohācjū mari Pacu tiquiro ijigū mari pehe ñañene yeducu masiedaja. ¹⁰ Ohō saha ijieyequina Cohācjū pohne tiquina ijigū masinata: Cohācjū pohne watño pohne yero saha ijierare. Ñañene yeducuyequina, apequinare cahñequina Cohācjū pohne ijierare.

Musa mehna cjēnare cahñña

¹¹ “Mari mehna cjēnare cahñña”, ni buheyere coā waropure tuho tuhasari musa. ¹² Mari Caī tiquiro ñano yeriro sahata yeracāhna. Tiquiro watño yaquiro ijiro, tiquiro bahurore wejēahye. ¿Duhse yero tiquirore wejēyari, musa tuhotugū? Tire yahutja musare: Caī tiquiro yeri ñañe ijiahye. Tiquiro bahuro pehe quehnoañene yeriquiro ijigū ihñano tiquiro wahmino pehe tiquirore wejēahye.

¹³ Sa yena yuhū acaye, ahri yehpa cjēna musare tiquina ihña tuhtigū “¿Duhse ijiro boro yuhare ihña tuhtiajari tiquina?” ni, tuhotueracāhña.

¹⁴ Mari pecaru wahaborina ijimi. Yojopure ahmusepu sa ijiducuatina comesarina ijiaja mari. Jesu yequinare cahña, Cohācjū marine tiquiro comesagū yerire masiaja mari. Masare cahñeniquiro pecaru wahatiquiro ijire. ¹⁵ Tiquiro acayurore ihña tuhtiriquiro masare wejēdiquiro ijire, Cohācjū ihñagū. Masare wejēñequina ahmusepu ijiducusi. Tire quehnoano masine musa. ¹⁶ Masare cahñene ohō

saha masinata. Ijipihtiyere decori Cohācjū mehna mari ijiatire Cristo yariaro marine tutuaro cahidi. Sa yariaro marine tiquiro sa cahiducurire masigū yero nidi. Sa yena mari gūhure Jesu yequina ye ijiatire yariaro cahmeboaga. ¹⁷ Peye cuoriquiro Jesu yaquirore pejecuoriquirore ihñaeperota tiquirore paja ihñedaro, Cohācjūre cahñedare tiquiro. ¹⁸ Yuhū pohna, masare mari cahñe pehe mari dusero dihita wijiaeracāhdo. Masare mari cahña, tiquinare yedohoro cahmene marine.

Cuero marieno Cohācjū caharu iji masiaja mari

¹⁹⁻²⁰ Sa cahña mari potota Cohācjū yequina mari ijieyere gūhure masinata. Sa yena Cohācjū caharu cuero marieno mari iji masiaja. Sa yena “Ñañe buhiri ijiaga yuhare”, mari ni tuhotuepegāta, Cohācjū caharu cuero marieno iji masiaja. Tiquiro pehe mari yuhduoro tutu-ariquiro ijiro ijipihtiyere masine.

²¹ Yuhū cahña, quehnoañene yena, “Quehnoañe pehere yena niaja”, ni tuhotuna, Cohācjū caharu mari cuero marieno iji masiaja. ²² Cohācjū dutiyere, tiquiro cahmeñe gūhure mari yegū, tiquirore mari sinino punota tiquiro ohorota. ²³ Ohō saha dutire tiquiro marine: “Cohācjū macunore Jesucristore wacū tu- tuaya. Sa yena Cristo marine tiquiro dutiriro sahata musa mehna cjēnare cahñña musa”, nino, ye dutire marine. ²⁴ Cohācjū dutiyere yeriquiro Cohācjū mehna cjēno ijiro nine. Sa yero Cohācjū tiquiro mehna cjēno ijire. Cohācjū mari mehna cjēno tiquiro ijieyere mari masi duagū marine tiquiro ohoriquiro Espiritu marine masigū yerota.

4

Ni mehoñe buheye gūhure,

Cohācjū ye buheye gūhare quehnoano ihña masi dutiahye

¹ Yūhū cahīna, apequina “Cohācjū yaquiro Espiriture cūoaja”, niñequina tiquina ijiepegāta tiquina ye buheye ni mehoñe ijire. Sa ye apequina pehe Espiritu Santo warore cūoyequina ni mehono marieno buhere tiquina. Peyequina “Cohācjū yere yahu mahtarina ijiaja”, niepeta ni mehoñequina ijire yojopure. Ijipihtiropure ijire tiquina. Sa yena apequina masare tiquina buheye ni mehoñe buheye ijigū ihña masiña mūsa. Cohācjū ye ti ijigū gūhare ihña masiña mūsa. ² Cohācjū yaquiro Espiriture cūoyequinare mūsa ihña masi duana, ohō saha masinata: “Jesucristo ahri yehparū masuno pagū waro cūoriquiro ahtari jiri”, ni, buheyequina Cohācjū yaquiro Espiriture cūoyequina ijire tiquina. Sa yena sa ni buheyequinare ihña masinata mūsa. ³ Apequina pehe “Jesu ahri yehparū masuno pagū waro cūoriquiro ahtaerari jiri”, ni, buheyequina Cohācjū yaquiro Espiriture cūoyequina ijire. Tiquina ye tuhotuye Cristore ihña tuhtiriquiro tiquiro tuhoturo saha ijire. “Cristore ihña tuhtiriquiro ahtarota”, tiquina nidire tuho tuhasari mūsa. Sa ye tiquiro ye buheye ahri yehpapure wihi tuhasari.

⁴ Mūsa pehe yūhū pohna, Cohācjū yequina ijire mūsa. Sa yena “Cohācjū yere yahu mahtarina ijiaja usā”, ni, mehoñequinare yūhdūca tuhasari mūsa. Mūsa mehna ijiriquiro Espiritu Santo pehe tutua yūhdūcare. Sa yero ahri yehpa cjēna yaquiro watīno yūhdūoro tutuare. Sa yena ni mehoñequinare yūhdūcari mūsa. Sa yena ti buheyere cahmedari mūsa. ⁵ Ni mehoñequina pehe ahri yehpa cjēna ijire. Sa ye tiquina ahri yehpa cjē ñañene tiquina

buhegū ahri yehpa cjēna ñañequina pehe tiquinare quehnoano tuhore. ⁶ Mari pehe Cohācjū yequina ijiaja. Sa ye Cohācjūre masiñequina marine quehnoano tuhore. Apequina pehe Cohācjū yequina ijieraye, marine ne tuho duerare. Tiquina sa tuho dueragū ihñana tiquina ye buheye Cohācjū ye buheye ti ijieragū masinata mari. Sa yena apequina pehe marine tiquina tuhogū tiquina ye buheye quehnoañe buheye ti ijigū gūhare masiaja mari.

Cohācjū masare tutuaro cahīducuriquiro ijire

⁷ Yūhū cahīna, Cohācjū marine apequinare cahīgū yeriquiro ijire. Tiquiro sa yeriquiro ijigū ihñana mari mehna cjēnare cahīhna mari. Masare quehnoano cahīñequina pehe Cohācjū pohne ijire. Sa ye tiquina Cohācjūre quehnoano masine. ⁸ Cohācjū masa ijipihtiyequinare tutuaro cahīducuriquiro ijire. Tiquiro sa cahīducuriquiro ijigū masare cahīñequina pehe Cohācjūre masiedare. ⁹ Cohācjū marine tiquiro cahīñene mari masi duana, ohō saha masinata: Cohācjū pehe tiquiro macūnore ihcāquirote ijiriquirore marine yūhdūoatiquirore ahri yehpapure ohoahye. Sa ohoro marine tiquiro cahīñene marine masigū yero niahye. ¹⁰ Apequinare cahīñe waro ohō saha ijire: Cohācjūre mari cahīñe pehe poto cahīñe waro ijierare. Marine Cohācjū tiquiro cahīñe pūrita potota cahīñe waro ijire. Sa yero tiquiro macūnore mari ñañene cohātiquirore ohoro marine tutuaro cahīne tiquiro.

¹¹ Yūhū acaye, Cohācjū marine tiquiro sa tutuaro cahīgū ihñana mari gūhū mari mehna cjēnare cahīhna. ¹² Masa pehe ne Cohācjūre ihñedari. Tiquirore mari ihñedapegāta mari mehna cjēnare mari cahīgū, Cohācjū pehe mari

mehna sa ijiducuro nine. Sa yero potota marine cahĩ nmoducugũ yere tiquiuro. ¹³ Cohãcjũ pehe marine tiquiuro yaquiuro Espiriture ohori. Sa yena Espiriture cõona, Cohãcjũ mehna mari quehnoano ijiyere masiaja mari. ¹⁴ Sa yena mari Pacu tiquiuro macunore ahri yehpa cjẽnare yãhdũoatiquiore tiquiuro ohorire usã ihña. Tire ihñana apequinapure tire yahuaja usã. ¹⁵ Cohãcjũ mehna cjũno ohõ saha nidiquiro ijire: “Jesu Cohãcjũ macuno ijire”, nidiquiro tiquiuro pũrita Cohãcjũ mehna cjũno ijiro nine. Sa yero Cohãcjũ gãhu tiquiuro mehna cjũno ijiro nine.

¹⁶ Sa yena marine Cohãcjũ tiquiuro cahñene mari masiaja. Sa yena marine potota cahñiquiro tiquiuro ijigũ masiaja mari. Cohãcjũ masa ijipihtiyequinare tutuaro cahĩducuriquiuro ijire. Sa yero apequiuro masare cahĩducuriquiuro Cohãcjũ mehna cjũno ijire. Sa yero Cohãcjũ gãhu tiquiuro mehna cjũno ijire. ¹⁷ Sa yena mari quehnoano cahĩ nmoducuaaja Cohãcjũre, apequina gãhure, buhiri dahreri deco ijigũ mari cuero marieno mari ijiatire. Sa yena cuesi mari ahri yehpapu Cristo yero saha ijina. ¹⁸ Apequinare mari cahĩgũ cuero mariedare. Cohãcjũ marine tiquiuro cahñene masina mari ne cueraja. Masa cueye tiquinare buhiri dahreatire cue nine. Sa cueye ñano yãhdare. Sa yero cueriquiro pehe Cohãcjũ cahñene masieniquiro ijire. ¹⁹ Marine Cohãcjũ cahĩ mahtahye. Sa yena mari gãhu tiquiore cahñaja. ²⁰ Ihcãquiuro “Cohãcjũre cahñaja”, nidiquiro ijieperota apequiore ihña tuhtiro, ni mehoriquiro ijire tiquiuro. Tiquiro ihñariquiore cahñedarõ, Cohãcjũre tiquiuro ihñeniquiro gãhure cahĩ masiedare tiquiuro. ²¹ Sa yero ahri ijire marine Cristo tiquiuro dutiriro: Cohãcjũre cahñana,

masa cahapu ijiequina gãhure cahñana.

5

Cohãcjũ pohne ahri yehpa cjẽ ñañene ye duerare

¹ Ijipihtiyequina Jesure “Cristo ijire. Cohãcjũ ohoriquiro ijire”, niñequina, Cohãcjũ pohne ijire. Apequina pacũre cahñana, tiquiuro pohne gãhure cahñaja mari. Sata Cohãcjũre cahñana, tiquiuro pohne gãhure cahñaja mari. ² Cohãcjũre cahñana, tiquiuro dutiyere quehnoano yena, tiquiuro pohne gãhure mari cahñana niaja. ³⁻⁴ Tiquiro dutiyere yena Cohãcjũre cahñana niaja. Marine Cohãcjũ dutiyere yegũ mijoedare. Mari ijipihitina Cohãcjũ pohna ijina, ñañene cahmedaja mari. Sa ye marine tiquiuro dutiyere yegũ mijoedare. Cohãcjũre wacũ tutuana ñañene cahmedaja. Sa yena tiquiore mari wacũ tutuari bato ñano ye dueraja. ⁵ Ñañene cahmedana ohõ saha nina ijiaja mari: “Jesu Cohãcjũ macuno ijire”, nina ñañene cahmedaja mari.

Cohãcjũ macunore yahuahye Ñu

⁶ Jesucristo ahri yehpapu tiquiuro ahtagũ tiquiore Ñu aco mehna wame yerire masina, curusapu tiquiuro dii cohãri gãhure masina, Cohãcjũ macuno tiquiuro ijiyere masiaja mari. Tiquiro wame yeri dihita Cohãcjũ macuno tiquiuro ijiyere marine masigũ yerare. Tiquiro dii cohãri gãhu marine tire masigũ yere. Espiritu Santo “Ahri ijirota ijire”, ni yahure marine. Tiquiro poto ni yahuriquiuro ijire. [⁷ Sa ye Jesu Cohãcjũ macuno tiquiuro ijiyere ahmuse cjẽna yahuyequina ihtiaro ijire: Mari Pacu, tiquiuro macuno Jesu, Espiritu Santo mehna “Jesu potota Cohãcjũ macuno ijire”, niñequina ijire tiquina. Tiquina ihtiaro ijiepetã ihcãno mehna yahure tiquina Jesure.]

8 Jesu Cohãcjũ macũno tiquiro ijyere ahri yehpapure ihtiaro yahure: Cohãcjũ macũno tiquiro ijyere Espiritu Santo pehe marine yahure. Sa yena Jesure aco mehna tiquiro wame yeri gãhure masina, Cohãcjũ macũno tiquiro ijyere masiaja mari. Sa yena mari ye ijiatire tiquiro yariarire tiquiro dii cohãrire masina, Cohãcjũ macũno tiquiro ijyere masiaja mari. Sa ye ti ihtiaro ihcãno mehna marine masigũ yere Cohãcjũ macũno Jesu ijyere.

9 Masa tiquina yahuyere tuhona “Ijirota ijire”, niaja mari. Sa niepenata mari Pacũ tiquiro macũnore yahugũ masa tiquina yahuye yahũoro tiquiro pehere tuhoro cahmene marine. Cohãcjũ waro tiquiro ijigũ tiquiro yahuyere tuhoro cahmene marine. 10 Sa ye ijipihtiyequina Cohãcjũ macũnore wacũ tutuayequina Jesure yahuri buheyere quehnoano tuhore. “Queorota ijire”, ni tuhature tiquina Jesure yahuri buheyere. Cohãcjũ macũnore tiquiro yahurire tuhoriqiro “Cohãcjũ ni mehoriquiro ijire”, nidiquiro ijire tiquiro. 11 Cohãcjũ marine ijipihtiyẽ decori tiquiro mehna sa ijiducugũ yerota. Cohãcjũ macũno yequina mari ijigũ tiquiro mehna sa ijiducugũ yerota marine. Ahri ijire Cohãcjũ marine tiquiro yahuye. 12 Cohãcjũ macũno yequina ijiye tiquiro mehna sa ijiducuetã. Sa ye apequina pehe tiquirore cahmeeñequina tiquiro mehna sa ijiducusi.

Ñu yahu ojoa bato tiahye

13 Mũsa Cohãcjũ macũnore wacũ tutuana Cohãcjũ mehna sa ijiducunata. Tire mũsa masiatire mũsare yahu ojoagũ niaja.

14 Cohãcjũ tiquiro cahmediro sahata mari tiquirore dahse ijyere mari sinigũ tiquiro marine quehnoano tuhoro. Sa

mari sinina “Potota quehnoano tuhore tiquiro”, ni masiaja mari. 15 Tiquirore mari sinigũ, marine tuhore. Tiquiro sa tuhore masina, tiquirore mari sinino punota tiquiro ohoati gãhure masiaja mari.

16 Mũsa acayuro tiquiro ñañene yegũ ihñana, ti ñañe Cohãcjũ pecapũ tiquiro waha dutiye ñañe ijieragũ, tiquirore sini basaya Cohãcjũre. Sa yero Cohãcjũ tiquirore yedohoro tiquiro mehna sa ijiducugũ yerota tiquirore. Cohãcjũ pecapũ tiquiro waha dutiyequina dihãtare sini basaya mũsa. Apeye ñañe pehe Cohãcjũ pecapũ tiquiro waha dutiye ñañe waro ijire. Ihcãquiro ti ñañe warore tiquiro yegũ “Tiquirore sini basaya mũsa”, niedaja yahũ. 17 Ijipihtiyẽ ñañe yeye ñañe warota ijire, Cohãcjũ ihñagũ. Ti sa ijiepegũta apeye ñañe Cohãcjũ pecapũ tiquiro waha dutiye ñañe ijierare.

18 Cohãcjũ macũno Jesu pehe Cohãcjũ pohne quehnoano ihña ihbore. Tiquiro sa ihña ihbogũ watĩno pehe Cohãcjũ pohne ñano ye masiedare. Sa ye Cohãcjũ pohne pehe ne ñañene sa yeducerare. Ahrire mari masiaja.

19 Mari pehe Cohãcjũ yequina ijiaja. Watĩno pehe ahri yehpa cjẽna puhtoro ijire. Ahri gãhure mari masiaja.

20 Cohãcjũ macũno ahri yehpapure ahtaro marine quehnoano masigũ yeri tiquiro. Tiquiro sa yegũ potota Cohãcjũ waroreta mari quehnoano masiaja. Ahri gãhure mari masiaja. Cohãcjũ macũno Jesucristo yequina ijiaja mari. Sa yena potota Cohãcjũ waro mehna cjãna ijina niaja mari. Ahriqiro yahũ nidiquiro potota Cohãcjũ waro ijire. Sa yero tiquiro ahmũsepũ sa ijiducugũ yeriquiro ijire.

21 Yáhu pohna, “Cohãcjã ijire”,
tiquina niñe queoyere ño peoer-
acãhña.

2 San Juan

*Jesucristo yere, potota ape-
quinare cahñe gāhare yahuahye Ñu*

¹⁻² Yuhū b̄s̄c̄u m̄s̄are Cohācjū beserinare ahri pūre ojoa ohoaja. Jesucristo yere yuhtina ijiaja mari. Sa ye tiqiro buheye gāhū mari mehna ijipihtiye decori sa ijiducurota. Sa yegū potota m̄s̄are cahñaja yuhū. Yuhū dihita cahīgū niedaja m̄s̄are. Apequina Jesu yere masiñequina tiquina gāhū potota cahñe m̄s̄are. ³ Cohācjū mari Pacū, Jesucristo tiqiro mac̄no gāhū poto tiquina cahñe mehna marine quehnoano yeeta. Sa ye marine paja ihñæta. Sa yeye marine quehnoano ijigū yeeta tiquina. Sata yeahro marine. Sa nigū m̄s̄are quehnoa dutiaja.

⁴ Mari Pacū marine tiqiro dutiriro sahata ihquēquina m̄s̄a mehna cjēna tiqiro yere yuhtiyequina tiquina ijigū masigū bucueaja yuhū. ⁵ Yojop̄re m̄s̄are yuhū dutiati wahma dutiro ijierare. Coā warop̄re ahri dutiro marine duita ijiahye. Ohō saha dutire marine. Mari mehna cjēnare cahñihna. ⁶ Tiqiro ye dutiyere ye pehona mari tiqirore cahñaja. Sa yero coā warop̄re m̄s̄a tuhōriro sahata yojop̄re gāhare ohō saha dutire m̄s̄are. Apequinare sa cahīducuya.

Peyequina ni mehoñequina ijire

⁷ Peyequina ni mehoñequina “Potota Jesucristo ahri yehpapū mas̄no pagūta c̄oriquiro ah-taerari jiri”, niñequina gāhū ahri yehpa cjēnare buheye wahari. Cristore ihñā tuhtiriquiro ni mehōriquiro tiquina yero sahata ijire. ⁸ Quehnoano yeya m̄s̄a. Cohācjū ye wapare m̄s̄a

quehnoano yeri wapare boer-acāhñā. M̄s̄a sa boeragū Cohācjū quehnoa yuhūaro yerota m̄s̄are.

⁹ Ijipihtiyequina Cristo yere yuhūd̄m̄c̄ayequina, Cristo yere cohñequina mari Pacū yequina ijierare. Sa ye Cristo yere ne duhueyequina Cohācjū mari Pacūre, tiqiro mac̄no gāhare masine tiquina. ¹⁰ Cristo ye buheyere cahmedariquiro, ap-eye buheyere buheriquiro m̄s̄a cahapū ahtagū, tiqirore m̄s̄a ya wuhupū sajā ta dutieracāhñā. Tiqirore piti caeracāhñā. ¹¹ Apeye buheyere buheriquiro Cristo yere cahmedariquiro ñano yere. Sa yero tiqirore piti cariquiro pehe ñano yeriquirore yedohoro nine. Sa yena tiqirore piti caeracāhñā.

Ñu yahu ojoa bato tiahye

¹² Peye m̄s̄are yahu duepegūta tire ojoa dueraja. M̄s̄are ihñagū waha duaja. M̄s̄are ihñagū m̄s̄a mehna yahuducutja, mari quehnoano bucueatire.

¹³ Cohācjū beseriquina ohōpū cahmecoañequina, m̄s̄a mehna cjēna m̄s̄are quehnoa dutire.

3 San Juan

*Ñu Gayo wame tiriquireore
“Quehnoariquireo ijire”, niahye*

¹ Yuhu bucu mahure Gayore potota yuhu cahigure ahri püre ojoa ohoaja.

² Yuhu cahigu, Cohâcjü mehna cjü mahu ijigü masiaja yuhu. Tiquiro mehna mahu quehnoano ijiriro sahata mahu quehnoano yuhduatire, mahu pagu dohatiro marieno mahu ijiatire Cohâcjüre sini basaja mahure. ³ Ihquëquina Jesu yequina yahu cahapu wihiye mahu ijiye tiyere yahuri yuhure. “Cristo cahmeno sahata potota yere Gayo”, ni yahuri tiquina yuhure. Tiquina sa ni yahugü tuhogu tutuaro bucuei yuhu. ⁴ Mûsa Jesu yere yuhu buherina tiquiro cahmeno sahata mûsa yegü tuhogu tutuaro bucueaja.

⁵ Yuhu cahigu, Jesu yequinare yedohogu quehnoano yeri mahu. Sa yegu Jesu yequinare mahu ihña masieñequina pehere yedohogu quehnoa yuhduaro yeri mahu. ⁶ Tiquina panopu mahu ihña masieñequina pehe Jesu yequina ohõpu cahmecoañequinare usâre ohõ saha ni yahuri: “Gayo usâre quehnoano cahine”, ni yahuri panopu mahu ihña masieñequina pehe. Came mahu ya macare tiquina yuhdu cãgü ihñagu tiquinare quehnoano yedohoya Cohâcjü tiquiro bucueatire. ⁷ Tiquina Jesu yere buhe tiniñe wahaye, Cohâcjüre cahmeeñequinare yedohogü cahmedari. ⁸ Sa yena tiquinare Jesu yere buhe tiniñequinare yedohouhna mari. Tiquinare sa yedohona, tiquina yero saha mari gûhu Cohâcjüre yedohona niaja.

*Diotrefe tiquiro ñaÑe yerire
yahuahye Ñu*

⁹ To cjênare Jesu yequinare ojoami. Yuhu sa ojoaepëgata Diotrefe tiquiro basi tiquina puhtoro yero saha iji duaro, yuhure tûho duerari. ¹⁰ Mûsa cahapu yuhu esari bato tiquiro yerire mûsare yahu pehoutja. Usâre ñano yahuducure tiquiro. Sa yero ni mehoÑe peyariquireo ijire tiquiro. Sa yero apeye ñaÑe gûhure yere tiquiro. Jesu yequinare tiquiro yere buhe tiniñequinare tiquiro ya wuhure sajã dutierare. Sa yero apequina to cjëna Jesu yequina pehe buhe tiniñequinare tiquina sajã dutigü ihñano tiquiro pehe “Buhe tiniñequinare sajã dutieracãhña mûsa ye wuhusepüre”, ni yahusâre tiquinare. “Mûsa ye wuhusepü buhe tiniñequinare mûsa sajã dutiri buhiri mari Jesu yequina mari ya wuhupüre mari cahmecoari wuhupüre sajãedacãhña mûsa pehe”, nine Diotrefe to cjênare Jesu yequinare.

¹¹ Yuhu cahigu, ñaÑequinare ihña cüedacãhña. Quehnoano yeyequina pehere ihña cûña. Quehnoañene yeyequina Cohâcjü yequina ijire. Ñañene yeyequina Cohâcjüre masiedare.

*Demetrio quehnoañene tiquiro
yerire yahuahye Ñu*

¹² Ijipihtiyequina quehnoano yahuducuri Demetriore. Sa ye tiquiro yerire ihñaÑe quehnoano tiquiro yeriquiro ijigü masine masa. Usã gûhu tiquirore sata ni yahuaja. Sa yena usã yahuye pehere potota ijigü masine mûsa.

Yahu bato tiahye Ñu

¹³ Mûhure peye yahu duami. Sa yahu duepegata tire ojoeraja. ¹⁴ Mehenogã batota mûhure ihña duaja. Sa yena mari basi cahme yahuducunata.

15 Quehnoa dutiaja mähure.
Mari mehna cjěna ohõ cjěna
Jesu yequina mähure quehnoa
dutare. To cjěna mari mehna cjěna
ijipihtiyequina quehnoahdo.

San Judas

Juda Jesu yequinare ojoa ohoahye

¹ Yuhh Juda Santiago bahh, Jesucristo cahacjũ musare Jesu yequinare ahri pũre ojoa ohoaja. Musare mari Pacu Cohãcjũ be-seahye. Sa yena tiqũiro cahĩne mehna quehnoano ijire musa. Sa yero Jesucristo yedohore musare “Ñañene yeari”, nino. ² Quehnoa dutiaja musare. Cohãcjũ yedohoro mehna quehnoano ijiya musa. Sa yegu Cohãcjũre paja ihña dutigu, musare cahĩ dutigu sini basaja Cohãcjũre yuhh.

Ni mehoñequina tiquina ye buheyere yahu dũcahye Juda

³ Cohãcjũ marine pecapũ waha-borinare tiqũiro yũhdũoye pehere tutuaro ojoa duami musare, yuhh cahĩnare. Sa ojoa duepegata musare yojopũre ni mehoñe buheyere cahme dutieragu musare ojoaja. Sa yena Jesucristo ye buheye pehere tutuaro buheya musa. Ahri buheye pehe Jesu yequinare Cohãcjũ cũri buheye sa ijiducurota comesaro marieno.

⁴ Ihquẽquina masa ñañequina wacũeno mehna musa cahapũ esari. Musa mehna ijiye tiquina ohõ saha ni buhemene musare: “Cohãcjũ yequina musa ijigũ, tiqũiro cahĩne musare. Sa yero numia mehna musa ñano yegũ tiqũiro musare ne buhiri dahresi”, ni buhemene tiquina. Sa ye mari pũhtoro ihcãquiota ijiriquirore Jesucristore “Cohãcjũ macano ijierare”, ni buhemene tiquina. Ohõ saha ni buheyequinare Cohãcjũ tiqũiro buhiri dahreatire yahuahye panopũre. Tiqũiro yere tiquina ojoari pũpũ sata ni yahuahye.

⁵ Yojopũre musare apeyere wacũgũ ye duaja. Ahrire musa masiepegata pari turi ahrire musare wacũgũ ye duaja. Cohãcjũ judio masare Egiptopũ ijiye-quinare tiqũiro wiori bato tiquina mehna cjẽnare tiqũirore wacũ tutueyequinare tiqũiro wejẽahye.

⁶ Sa yena musa apequina gãhũre wacũña. Apequina angele pehe Cohãcjũ dutiyere ye duerahye. Sa ye tiquinare tiqũiro iji duti cũrirore tiquina iji duerahye. Sa ye tiquina ijimedirore duhu cãhye tiquina. Tiquina sa duhugũ ihñano Cohãcjũ nahitianopũ tiquinare peresu yeahye. Sa ye tiquina pihtiatĩ deco pano come dari mehna dũhteriquina yero saha ijiducuetã. Sa yero pihtiatĩ deco ijigũ tiquinare buhiri dahrerota Cohãcjũ.

⁷ Sata yeahye apequina gãhũ. Tiquina gãhũre wacũña musa. Tiquina Sodoma wame tiri maca cjẽna, Gomorra wame tiri maca cjẽna ti macari cahapũ ijiye macari cjẽna gãhũ numia mehna ñano yeahye. Sa ye sijoro saha yeye gãhũre ye, amũa pehe tiquina basita tiquina pagari mehna ñano yeahye. Numia gãhũ sata yeahye. Tiquina sa yeri buhiri Cohãcjũ tiquinare mũã peho cãhye. Tiquinare mũãano Cohãcjũ ijipihtiyequina tiqũirore yũhdũdũcariquinare tiqũiro buhiri dahreatire masare ihñono niahye. Tiquinare tiqũiro buhiri dahreri peca ne yatisi.

⁸ Tiquina Cohãcjũ buhiri dahrenohriquina mũana yero saha yojopũ gãhũre sata yeducure ni mehoñene buheyequina. Tiquina quehñequina yero saha ijiye, tiquina pagari mehna ñano yere. Sa yeye Cohãcjũ dutiyere cahmedare tiquina. Sa ye tiquina yũhdũoro tutuayequinare tiquina pehe ñano yahuducu

cohtere. ⁹ Quehnoañequina angele pehe tutuayequina ijiepetata sa ni yahuducuerare. Miguel wame tiriquire angele pãhtoro pehe Moise pagare cahmeno, watño mehna cahme sehña soahye. Tutua yahdãariquire ijieperota tiquiro “Watño yahdãoro yahã pãrita tutuaja”, ni tahotuerahye. Sa yero tiquiro esa tuharo watñore ñano yahuducuera, tiquirore tuhtierahye. Sa yero ohõ saha niahye watñore. “Cohãcjãpã mahãre tuhtiahro”, niahye Miguel watñore. ¹⁰ Sa ye ahriquina ni mehoñequina pehe tiquina masieñequinare ñano yahuducu cohtere. Sa ye wahiquina tãho masieñequina tiquina esa tuharo tiquina yero saha ni mehoñequina pehe yere. Sa yeyequina ijiye, pecapã wahaeta.

¹¹ Tiquinata ñano yahdãeta. Caĩ yeriro saha ñano yeri tiquina. Sa ye Balãa tiquiro yeriro saha tiquina niñerure cahĩ wapata duaye, ni mehoñene buhere. Sa ye niñeru neati dihitare tahotu, ti dihitare yere. Sa ye Coré tiquiro pãhtoro cohã duariro saha tiquina gãhã tiquiro yero saha yere. Sa ye tiquiro yero saha tiquina gãhã pecapã wahaeta. ¹² Tiquina ni mehoñequina pehe masa cahme cahĩati bõse decorire ihyaye, ño peoro marieno tiquina cahmeno saha apere. Sa ye tiquina sehsarota ihyayere bore apequinare ohoro marieno. Wete yero saha tiquina masa bõse decorire quehnoañe decori ijiborirore dojomehne cohtere.

Ehmeo cururi acoro marieñe cururi ti dahseati ijieraro saha tiquina ni mehoñequina ne dahseatiquina ijierare. Sa ye ehmeo cururi wihnono wẽdoqueoye cururi ti sa comesaducuro saha tiquina ni mehoñequina gãhã ihcãno saha yahuducueraye, sa comesaducure.

Sa ye, dãca tiri pje ijigã dãca marieñe cjũ yero saha ijire tiquina. Ti cjũ pãa tahapã yariaa wahare. Ihcã taha dãca tieye cjũ, yariaye cjũ yero saha waha tuhasare. Ti cjũre tiquina duhari bato pari turi yariaa wahare tja. Ti cjũ yero saha ijiye dahseatiquina ijierare tiquina ni mehoñequina.

¹³ Sa ye pajiri ma cjẽ pahcõri bũjãye pahcõri yero saha ijire tiquina. Ti pahcõri quẽ ohõgã, wete bũjãye sahpori wahare. Dãhse ijiyere tiquina ni mehoñequina tiquina yegã pahcõri cjẽ sahpori wete bũjãye sahpori ti waharo saha ni mehoñequina tiquina ñano yeye ijire.

Sa ye asi maa cãe paca ñahpicoha paca yero saha ijire tiquina. Sa yeye ñahpicoha paca nahitianopã ti waharo saha tiquina gãhã ñanopã wahaeta. Sa ye topãre sa ijiducuetata tiquina ni mehoñequina.

¹⁴⁻¹⁵ Enoco panopã cjũno Adãn panamino iji turiariquiro seis cururi bato masa bajuariquire ohõ saha niahye. Tiquinare ni mehoñequinare ohõ saha niahye: “Tãhoya yahãre. Cohãcjã peyequina tiquiro yequina angele quehnoañequina mehna ijipihtiyequina ñañequinare tiquina ñañe buhiri buhiri dahrero ahtarota. Sa yero ijipihtiyequina Cohãcjãre ihña tuhtiyequinare tiquina ñañe yeri buhiri tiquinare buhiri dahre dutiro ahtarota Cohãcjã. Sa yero Cohãcjãre ñano tiquina yahuducuri buhiri gãhãre tiquinare buhiri dahre dutiro ahtarota”, niahye Enoco. ¹⁶ Tiquina ni mehoñequina unureducuyequina, apequinare yahu wajayequina tiquina ñano wacũñe dihitare yere tiquina. Sa ye “Apequinare masi yahdãdãcaja usã”, niducure tiquina. Sa ye tiquina cahmeno saha ye duaye, apee borore ehma duaye, tãhoro quehnoanopãta yahuducure masare.

*Jesu yequinare yahu nemoahye
Juda*

¹⁷ Mari pahtoro Jesucristo buhe duti tiqiro cūriquina tiquina buherire wacūña m̄sa, yuh̄u cah̄ina. ¹⁸ Ohō saha nidi tiquina m̄sare. “Ahri yehpa pihtiatō panogā Cohācjūre ñano yahuducu bujūpeyequina ijieta. Sa ye tiquina Cohācjūre cahmedaye, ñañene tiquina tutuaro cahmeñene yeeta tiquina”, ni yahuri Jesu cūriquina m̄sare. ¹⁹ Jesu yequinare tiquina basi tiquina cahme ihña tuhtigū yere tiquina ni mehoñequina pehe. Sa ye tiquina ñañequina ahri yehpa cjēna ijiye, Espiritu Santore ne c̄oerare tiquina. Sa ye tiquina ñañene tutuaro cahmeñe dihtare yere tiquina.

²⁰ M̄sa pehe yuh̄u cah̄ina, Jesucristo ye buheyere quehnoano t̄ho nemoña, quehnoano wacū tutuana m̄sa ijiro quehnoano. Ti buheye pehe quehnoa yuh̄uare. Espiritu Santo yedohoye mehna Cohācjū mehna yahuducuya m̄sa. ²¹ Quehnoañene yeya m̄sa Cohācjū m̄sare tiqiro cahñene m̄sa masino quehnoano. Sa yena Jesucristo mehna m̄sa sa ijiducuatire cohteya. Tiqiro marine paja ihñano uhm̄sep̄u sa ijiducugū yerota.

²² Cristo yere t̄ho duera cjūñequinare paja ihñaña. Sa yena tiquinare buhe, masigū yeya. ²³ Tiquinare pecap̄u waha-boriquinare Cohācjūre yuh̄uogū yeya m̄sa. Sa yena apequinare paja ihñaña m̄sa. Tiquinare yedohona m̄sa ḡhu tiquina ñañe yeyere ihña cūedac̄hña. Wete tiri suhtirore m̄sa yabiro saha, apequina tiquina ñañe yeyere yabiya, “Tiquina ñañe yeyere pihari”, nina.

²⁴⁻²⁵ Cohācjū mari pahtoro marine ihña ihbo masine “Ñañene yeari”, nino. Sa yero tiqiro marine ñañe buhiri marienare uhm̄sep̄u tiqiro cahap̄u cū masine. Sa marine top̄u tiqiro cūgū mari bucuenata. Tiqiro Cohācjū ihcāqirota ijire. Apeqiro mariedare. Sa yero marine pecap̄u wahaborinare yuh̄uoriqiro ijire tiqiro. Tiqiro pehe panop̄u, yojoḡp̄u, ijipihtiyē decori ḡhure quehnoa yuh̄uariqiro, mari pahtoro, tutua yuh̄uariqiro, ijipihtiyequinare dutiriquiro ijire. Tiqiro sa ijigū mari pahtoro Jesucristo yedohoro mehna tiqirore ño peouhna. Sata yeihna.

*Juda Cohācjūre tiqiro ño peoye
ijire*

Apocalipsis

Camepare ahri deco dahse wahatire marine masigū yeahye Jesucristo

¹ Ahri pūpū Jesucristo marine tiquiore masigū yerire yahu ojoagū niaja. Mari Pacū pehe tire yahu dutiro cūahye tiquiore, tiquiore yequinare tiquiore cahacjēnare masigū ye dutiro. Sa yero mianota dahse wahatire masigū yeri tiquiore. Mehenogā dahsatjiāno nine sa wahato. Jesucristore tiquiore sa cūgū tiquiore pehe angelre tire yūhūre Ńure yahu dutiro ohori. ² Sa yegū yūhū Ńū ijipihtiyere yūhū ihñarire yahu ojoagū niaja. Cohācjū ye yahuducuyere Jesucristo ye buheyere yahu ojoagū niaja.

³ Ahri pūpū camepare dahse wahatire yahu ojoagū niaja. Mehenogā dahsatjiāno nine ahri ijipihtiyere sa wahato. Sa ye ijipihtiyequina ahri pūre buheyequina, yūhū yahurire quehnoano tuhoyequina ahri pū nidiro saha yeyequina bucuyequina ijeta.

Siete cururi cjēnare Jesu yequina cahmecoañequinare ojoa ohoahye Ńū

⁴ Yūhū, Ńū māsare siete cururi cjānare Jesu yequinare Asia yehpa cjānare ojoa ohoaja: Cohācjū tiquiore cahñe mehna māsare quehnoa dutiaja. Sa yena tiquiore yedohoye mehna quehnoano ijiya māsā. Tiquiore panopūta sa ijiducuriquiore ijie tiahye. Yojoꝛpū gūhūre sa ijiducure. Camerū ahtarota. Tiquiore pūhtoro dujiro poto ijiyequina siete pagū bajueyequina ijire. Tiquina cahñe mehna māsare quehnoa dutiaja tja. ⁵ Cristo tiquiore cahñe mehna māsare quehnoa dutiaja tja. Cohācjū yere ni mehono marieno yahuriquiore ijire tiquiore. Sa yero

tiquiore yariari bato tiquiore masa mājari bato ne pari turi yariasi tiquiore. Sa yero ijipihtiyequina ahri yehpa cjēna pūhtoa tiquina bui pūhtoro ijire tiquiore. Marine cahñe tiquiore dii cohāri mehna mari ñañene coseri tiquiore. ⁶ Sa cosero marine pūhtoa sōri tiquiore. Marine pahia wahagū yeri tja. Cohācjū mari Pacū tiquiore yere yeatiquinare marine sa sōri tiquiore. Ijipihtiyere decori “Tutuagū ijire mūhū”, ni ño peoducueta ijipihtiyequina tiquiore. Ijipihtiyequina pūhtoro sa ijiducure tiquiore. Sata ijiahro.

⁷ Quehnoano wacū masi cohteya māsā. Ehmeo cururi watoa dijia tarota Cristo. Tiquiore sa ahtagū ihñæta ijipihtiyequina. Tiquiore quē biha wejēdiquina gūhū tiquiore ihñæta. Sa ye tiquiore ahtagū ihñæne ahri yehpa cjēna ijipihtiyere cururi cjēna tutuaro utieta. Sata utiahro.

⁸ Ohō saha nine mari pūhtoro Cohācjū: “Yūhū ijipihtiyere bajumehnedigu ijiaja. Sa yegū ijipihtiyere pihtigū yeacjū ijiaja. Tutua yūhduducagū ijiaja yūhū. Panopū gūhūre sa ijiducue ti. Yojoꝛpū gūhūre sa ijiducujaja. Came ahtaajta”, nine Cohācjū.

Cristore asi siteriquiore tiquiore ihñarire yahuahye Ńū

⁹ Yūhū Ńū māsā acayū Jesu yaquiore ijiaja. Sa yegū māsā yero saha yūhū gūhū Jesu yere yūhū yeri buhiri ñano yūhdū. Sa yegū māsā yero saha yūhūre tiquina sa ñano yepegūta Jesu yedohoye mehna Jesure cohædū. Mari ihcāno saha tiquiore pūhtoro ijire cjāna ijiana ijiaja mari. Ya dihta cjēna tiquina cohārigū ijigū Patmo wame tiri nūcūopū ijiaja. Cohācjū yere, Jesucristo tiquiore buheri gūhūre apequinare yūhū buheri buhiri ohōꝛpū tiquina cohārigū ijiaja. ¹⁰ Ohōꝛpū yūhū ijigū ihcā

deco domingo ijigū Espiritu Santo yuhare quehēnopu ihñono nidi. Tiquiro sa ihñogū yuhu behero peheru tutuaro yahuducuro ca tari. Corneta tutuaro bisiro saha tutuaro bisiro ca tari tiquiro yahuducuye. ¹¹ Ohō saha nino ca tari yuhu tuhogū:

—Yuhu ijipihtiyere bajumehnedigu ijiaja. Sa yegu ijipihtiyere pihtigū yeacju ijiaja. Yojoꝑu mahu ihñatire ojoati pūꝑu ojoa ohōña. Mahu sa ojoa ohōri bato siete cururi cjēnare Cohācjū yequinare ohoya ti pūre. Tiquina siete cururi Asia dihtarpu ijiye macari cjēna ijire. Efeso cjēnare, Esmirna cjēnare, Pérgamo cjēnare, Tiatira cjēnare, Sardis cjēnare, Filadelfia cjēnare, Laodicea cjēnare mahu ihñatire ojoa ohoya, nino ca tari yuhare.

¹² Tiquiro sa nigū tuhogu majareducau yuhare yahuducuriquire ihñagu tahu. Sa majareducagu siete sihāñe pacare tiquina duhu peoye cjure uru mehna tiquina yeri cjure ihñau. ¹³ Ti cju watoa ducuriquire masuno yero saha bajuriquire ihñau. Tiquiro yoari suhtiro dahpocāripu esari suhtirore sañariquire ijiri. Sa yero uru mehna tiquina yeri cahsero mehna tiquiro cutiro bui tuā dihoriquire ijiri. ¹⁴ Sa ye tiquiro poari buhsa cohoꝑi caperi peca pohna yero saha asiri. ¹⁵ Sa ye tiquiro dahpocāri bronce wame tiye come asiye come yero saha asi siteri. Broncere peca mehna tiquina quehnoano ujuā weri bato tire wahtere quehnoano asi paha dutiye. Ti quehnoano wahtenohriro yero saha tiquiro dahpocāri quehnoano asi siteri. Sa yero tiquiro yahuducuye peo tutuaro cuari peo yero saha tutuaro bisiro ca tari. ¹⁶ Tiquiro omoca poto pehe siete ñahpicoha pacare cuori. Sa yero tiquiro

daseropu ñoseni pjiꝑu peheri siori pñine cuhñuri. Sa yero asū deco cjūno tiquiro tutuaro asi sitero saha tiquiro wuhdoa tutuaro asi siteri.

¹⁷ Sa yegu tiquirore ihñagu tiquiro dahpocāri cahapu doque quehe sau yariariquire yero saha. Yuhu sa doque quehe sagū ihñano tiquiro poto pehe cjā omoca mehna yuhare duhu peo ohō saha nidi:

—Cueracāhña. Yuhu ijipihtiyere bajumehnedigu ijiaja. Sa yegu ijipihtiyere pihtigū yeacju ijiaja. ¹⁸ Catigu ijiaja yuhu. Yariarigu ijimi. Yojoꝑu ihñaña. Ijipihtiyere decori sa catiducugu ijiaja yuhu. Pari turi masagu masare pari turi yarieragū ye masiaja yuhu. Sa yegu masare yariariquina tiquina ijiroꝑu wahaeragū ye masiaja yuhu. ¹⁹ Sa yegu yojoꝑu wahatire ihñagu, ojoa ohōña. Cameru dūhse wahati gūhare ihñagu ojoa ohōña mahu. ²⁰ Ahri siete ñahpicoha pacare yuhu poto pehe yuhu cuoye pacare yahutja mūhare. Sa yegu siete sihāñe pacare tiquina duhu peoye cju uru cju gūhare yahutja. Ohō saha ijiye yahuyere panopu cjēna masare ne yahuera tii. Ohō saha ijire ti: Siete ñahpicoha paca siete cururi cjēna yeequina pūhtoa ijiye nine, mari queoye mehna buhegū. Sa ye siete sihāñe pacare tiquina duhu peoye cju siete cururi cjēna yeequina ijiye nine, mari queoye mehna buhegū, nidi yuhare.

2

Efeso cjēnare Jesu yequinare ojoa oho basa dūca dutiahye Ñure

¹ Sa ni tuhasa ohō saha ni nemori yuhare ojoa dutiriquire:

—Efeso cjēna yeequina, tiquina pūhoro gūhare ohō saha ni ojoa oho basaya mahu: “Yuhu omoca poto pehe siete ñahpicoha pacare cuogu ijiaja. Sa yegu siete sihā

docoye cju watoa tinigu ijiaja. Sa tinigu ijigu musare ohō saha ni yahuaja: ² Ijipihtiyē mūsa yerire masi pehoaja. Yee ijiatire mūsa tutuaro dahrarire, yuhure mūsa wacū tutua duhuerari gūhure quehnoano masiaja. Nañene yeriquinare mūsa ihña yabigū gūhure masiaja. Sa yena 'Jesu buhe dutiro tiquiro cūrīna ijiaja', nimediquinare queoro tiquina buheragū ihñana, ni mehoñequina tiquina ijigū masidi mūsa. ³ Yeere mūsa yeri buhiri mūsa ñano yuhdūepenata ihcāno sahari mūsa Efeso cjāna. Sa yena yuhure ne duhuerari mūsa. ⁴ Sa quehnoano yena ijiepenata ihcānore queoro yerari mūsa. Ahri ijire ti: Yuhure mūsa quehnoano cahī mahtariro saha yojopure yerare mūsa. ⁵ Yuhure mūsa cahī mahtarire wacūña mūsa tja. Yojopure yuhure mūsa cahīeda cjūrire wacūña. Sa yena mūsa ñañe yerire buja witiya. Tire duhuya. Sa duhuna, yeere mūsa ye mahtariro sahata yeya tja. Mūsa ñañe yerire mūsa duhueragū sojaro mehna sihāriare yuhū duhu peodu mūsa ya dare yuhū dapodure ne cohātja. (Sa nigu ohō saha ni yahugu niaja musare. Mūsa to cjāna yuhure cohāboaga. Sa cohāna to punota pihtinata mūsa ñañe yeyere duhuerana.) ⁶ Yuhure cahīeda cjūna ijiepenata ahrire quehnoano yeri mūsa: Nicolaita wame tiyequinare ñañequinare ihña yabire mūsa. Yuhū gūhū tiquinare ihña yabiaja. ⁷ Cahmo tina ijire mūsa. Sa yena mūsa ye cururi cjēnare yeequinare Espiritu Santo tiquiro yahurire tuhoya mūsa. Ohō saha nine tiquiro: 'Ijipihtiyequinare Jesure wacū tutua duhueyequinare Cohācjū ya wese paraíso wame tiro cjādu dūcare ihya dutiitja. Tu dūca catigū yeye ijire', nine Espiritu Santo",

ni yahu ojoa oho basaya Efeso cjēna yeequinare, tiquina puhtoro gūhure.

Esmirna cjēnare Jesu yequinare ojoa oho basa dutiahye Ñure

⁸ 'Esmirna cjēna yeequinare, tiquina puhtoro gūhure ohō saha ni ojoa oho basaya mūhū: "Yuhū ijipihtiyere bajumehnedigū ijiaja. Sa yegu ijipihtiyere pihtigū yeacju ijiaja. Yariaa waha. Pari turi cati-aja tja. Sa yegu ohō saha ni yahuaja musare: ⁹ Mūsa ñano yuhdūire masiaja. Pejecuona mūsa ijigū gūhure masiaja. Sa ijiepenata Cohācjū yere quehnoañene pajiro core mūsa. Apequina pehe 'Judio masa ijiaja', nimediquina ni mehonēquina ijire. Tiquina musare ñano quitī yerire masiaja. Tiquina Satana yequina ijire. ¹⁰ Yojopure mūsa ñano yuhduatire cueracāhña. Tuhoya mūsa. Watīno musare Cohācjūre duhu dutiro ihquēquina mūsa mehna cjēnare peresu ye dutirota. Pua omope decori waro ñano yuhdūnata mūsa. Tiquina sa ñano yegū musare tiquina sa wejē duepegāta yuhure, yee gūhure cohāedacāhña. Mūsa sa yuhure cohāedagū ihñagu ijipihtiyē decori Cohācjū cahapu musare sa ijiducugū yeitja. ¹¹ Cahmo tina ijire mūsa. Sa yena mūsa ye cururi cjēnare yeequinare Espiritu Santo yahurire tuhoya mūsa. Ohō saha nine tiquiro: 'Ijipihtiyequina Jesure wacū tutua duhueyequinare pecapu wahasi. Tiquina yariari bato pecapu wahasi', nine Espiritu Santo", ni ojoa oho basaya Esmirna cjēna yeequinare, tiquina puhtoro gūhure.

Pérgamo cjēnare Jesu yequinare ojoa oho basa dutiahye Ñure

¹² 'Pérgamo cjēna yeequinare, tiquina puhtoro gūhure ohō saha ni ojoa oho basaya mūhū: "Yuhū ñoseni pjī pua peheri siori pjīne

cuogũ ijiaja. Mũsare ohõ saha ni yahutja: ¹³ Mũsa yerire, mũsa ya maca cjẽna tiquina yeri gãhũre masiaja. To cjẽna pũtoro Satana ijire. To cjẽna Satanare ño peoyequina Antipare yeere quehnoano yahuriquire wejedi. Tiquiquire tiquina sa wejẽgũ ihñaepenata yũhũre ne wacũ tutua duhuerari mũsa. ¹⁴ Mũsa sa wacũ tutua duhuerapenata mehenogã yũhũre yũhdũdũcari mũsa. Ihquẽquina mũsa mehna cjẽna Balãa ye buheyere cahmene. Panopũ Balac wame tiriquire pũtorore ohõ saha ni buhee tiri Balãa pehe: 'Israe masare yũhdũdũca duana "Cohãcjũ ijire", mũsa niñe queoyere ño peo mũsa duhu peo ihyayere ihya dutiya tiquinare. Sa yena numia mehna ñano yegũ yeya tiquinare', ni buhee tiri Balãa mũnana. Panopũ tiquiro yeriro saha yojopũ gãhũre ñano yegũ yere ihquẽquina mũsa mehna cjẽna apequinare. ¹⁵ Sa ye tiquina yero saha apequina mũsa mehna cjẽna Nicolaita wame tiyequina ye buheye pehere cahmene. ¹⁶ Sa yena mũsa ñañe yerire duhuya mũsa. Mũsa sa duhueragũ ihñaagũ sojaro mehna mũsa cahapũ wahagũ, sa ñano yeyequina mehna cahmequitja yũhũ dũseropũ ijiri pjĩ ñoseni pjĩ mehna. ¹⁷ Cahmo tina ijire mũsa. Sa yena mũsa ye cururi cjẽnare yeequinare Espiritu Santo tiquiro yahurire tũhoya mũsa. Ohõ saha nine tiquiro: 'Ijipihtiyequinare Jesure wacũ tutua duhueyequinare maná wame tiye ihyayere mũmũse cjẽ ihyayere ohoutja. Yehseye utã paca gãhũre ohoutja tiquinare. Ti utã pacapũre wahma wamene yũhũ ojoa ohõati utã paca ijirora. Apequina ti wamene ne masisi. Ti utã pacare neñequina dihita ti wamene masieta', nine Espiritu Santo", ni ojoa oho basaya Pérgamo cjẽna yeequinare, tiquina pũtoro

gãhũre.

Tiatira cjẽnare Jesu yequinare ojoa oho basa dutiahye Ñure

¹⁸ Tiatira cjẽna yeequinare, tiquina pũtoro gãhũre ohõ saha ni ojoa oho basaya mũhũ: "Yũhũ Cohãcjũ macũ yũhũ caperi peca pohna yero saha asire. Sa ye yũhũ dahpocãri bronce wame tiye come tiquina wahteri come yero saha asi sitere. Mũsare ohõ saha ni yahuaja.

¹⁹ Mũsa yerire masiaja yũhũ. Cohãcjũre, apequina gãhũre mũsa cahĩdire, yũhũre mũsa cohãedarire, apequinare mũsa yedohorire, ñano yũhdũepenata yũhũre mũsa duhuerarire masiaja. Coã waropũ mũsa yeriro yũhdũoro yojopũ pehere quehnoano ye nemona nine mũsa. Ti gãhũre masiaja yũhũ.

²⁰ Mũsa sa quehnoano yena ijiepenata ohõ saha yũhũre yũhdũdũcari mũsa: Jezabe wame tiororo 'Cohãcjũ yere yahugo ijiaja', ni mehoricoro mũsare ticoro ñano buhegũ tũhona ticorore tuhtierari mũsa. Ni meho buhero yeequinare yũhũ cahacjẽnare numia mehna ñano yegũ yere. Sa yero 'Cohãcjũ ijire', tiquina niñe queoyere apequina ño peo, tiquina duhu peoe tiri ihyayere. Ti ihyayere yeequinare ihya dutire ticoro. ²¹ Ticoro ñañene bujũa witiatire cohtenimi. Yũhũ sa cohtepegãta mũhũ mehna ticoro ñano yeyere duhu duerari. ²² Yũhũre tũhoya mũsa. Ticorore dohatigũ yeitja. Ticoro mehna ñano yeriquina gãhũre dohatigũ yeitja. Sa ye tiquina tutuaro ñano yũhdũeta. Sata yeitja tiquinare ticoro mehna tiquina ñano yerire tiquina bujũa witiagũ, tire tiquina duhueragũ. ²³ Sa yegũ ticoro pohnene wejẽitja. Yũhũ sa yegũ ihñañe ijipihtiyequina yeequina yũhũ quehnoano masigũ ijigũ masieta. Masa tũhotuyere

tiquina tutuaro cahmeñe gũhare masiaja. Yũhũ sa masiñene masieta tiquina ticorore yũhũ buhiri dahregũ ihñañe. Ijipihtina mũa ñañene yeri buhirire buhiri dahreitja mũsare. Sa yegũ mũa quehnoañene yeri wapa pehere quehnoano yeitja mũsare. ²⁴ Apequina mũa mehna cjẽna Tiatira cjẽna ticoro ye buheyere cahmedari. Mũa pehe Satana ye buheyere ‘Panopũ tiquiro yahuerari jiri’, tiquina niñe buheyere cahmedari mũa. Sa yegũ mũa pehere duti nemosi yũhũ. ²⁵ Ahri dihitarẽ ye duti nemoutja mũsare: Mũa cahapũ yũhũ tojoa tato pano yũhũ buheyere mũa masidire ne mehenogã duhueraacãhña. ²⁶⁻²⁷ Ijipihtiyequina ñañene duhuyequinare, yeere sa yeducuyequinare pũtoa sũutja. Yũhũ Pacũ yahũre tiquiro pũtoro sũriro sahata mũa gũhare pũtoa sũutja. Ijipihtiyẽ yehpari cjẽna bui pũtoa sũutja mũsare. Sa pũtoa sajãna, mũa docapũ ijiyequinare ijipihtiyẽ yehpari cjẽnare tutuaro dutinata mũa. Dihi suturire mari yucũgũ mehna pohagũ duita wahtiro saha tiquina duita pihtia wahaeta. ²⁸ Sa yegũ mũsare yeere ne duhuyequinare ñahpicoha bohrea mũa tariare ohoutja mũsare. Sa yegũ mũa mehna ijiitja yũhũ.

²⁹ Cahmo tina ijire mũa. Sa yena mũa ye cururi cjẽnare yeequinare Espĩritu Santo tiquiro yahurire tũhoya mũa”, ni ojoa oho basaya Tiatira cjẽna yeequinare, tiquina pũtoro gũhare.

3

Sardis cjẽnare Jesu yequinare ojoa oho basa dutiahye Ñure

¹ ‘Sardis cjẽna yeequinare, tiquina pũtoro gũhare ohõ saha ni ojoa oho basaya mũhũ: “Yũhũ siete pagũ bajueyequinare Cohãcjũ

yequinare cũogũ ijiaja. Sa yegũ siete ñahpicoha pacare cũogũ ijiaja. Mũsare ohõ saha ni yahuaja:

Mũa yerire masiaja. Ohõ saha ni tũhotumene apequina mũsare: ‘Tiquina Cohãcjũ yere quehnoano ye pehoyequina ijire’, ni tũhotumene mũsare apequina. Tiquina sa ni tũhotuepegãta Cohãcjũ yere quehnoano yerare mũa. ² Sa yena quehnoano yeya mũa ‘Ñañene yeari’, nina. Cohãcjũ yere mũa masidire quehnoano wacũña, ‘Tiquiro yere duhuari’, nina. Cohãcjũ ihñagũ quehnoano ye pehoerare mũa. ³ Sa yena yeere mũa tũho mũhtarire quehnoano wacũña mũa. Sa wacũna yeere yeya. Mũa ñañe yerire duhuya. Yũhũ nino saha mũa yeragũ wacũeno mehna mũsare buhiri dahreitja. Yaqueriquiro wacũeno mehna tiquiro yaquero sajãriro saha mũsare wacũeno mehna buhiri dahreitja. ⁴ Ihquẽquina mũa mehna cjẽna Sardis cjẽna ñañene yeducuere. Wete marieni suhtirore mũa sañaboriro saha ti ñañe yeyere piha duerare mũa. Sa quehnoana ijina, yehseri suhtiro sañana yũhũ mehna ijinata mũa pehe. ⁵ Ijipihtiyequina yeere duhuyequina sata yehseye suhti sañaducuyequina ijieta. Sa yeye yũhũ mehna sa ijiducuatiquina wamene tiquiro ojoa ohõri tjuũ tiquina gũhũ tiquina wamene ojoa ohõnohriquina ijieta. Tiquina wamene tiquiro ojoa ohõrire cosesi yũhũ. Yũhũ Pacũ ihñonopũ, angele gũhũ tiquina ihñonopũ yeequina mũa ijirire yahutja tiquinare.

⁶ Cahmo tina ijire mũa. Sa yena mũa ye cururi cjẽnare yeequinare Espĩritu Santo tiquiro yahurire tũhoya mũa”, ni ojoa oho basaya Sardis cjẽna yeequinare, tiquina pũtoro gũhare.

Filadelfia cjẽnare Jesu yequinare ojoa oho basa dutiahye Ñure

7 'Filadelfia cjēna yeequinare, tiquina puhtoro gūhure ohō saha ni ojoa oho basaya mūhū: "Yūhū űāñe mariegū ijiaja. Poto yegū ijiaja. Davi mūnāno panopū cjēno sawire tiquiro cūboriro saha, masare tiquiro puhtoro ijiropū tiquiro pūboriro saha yeitja yūhū. Sa yegū Cohācjū tiquiro puhtoro ijiropū sajātore yūhū pūogū ne apequina tire biha masiedare. Yūhū bihagū ne apequina pūo masiedare.

8 Ijipihtiyē mūsa yeyere masiaja yūhū. Wacū tutuera cjūna ijiepenata yūhū buheyere quehnoano tūhori mūsa. Sa yena yūhūre, yee gūhūre duhuerari mūsa. Sa yegū yeere cūu mū sare. Sa ye apequina 'Tire yeracāhñā', ni cahmota masiedare mū sare. 9 Sa yegū ohō saha yeitja: Apequina mūsa caha ijieyēquina Satana yequina ijire. 'Judio masa ijiaja', niepeta judio masa waro ijierare. Tiquinare mūsa caha dūsepe curi mehna quehe sa, mū sare űo peogū yeitja tiquinare. Yūhū sa yegū ihñāñe mū sare yūhū cahñēne masieta tiquina. 10 Mū sare yeere yūhū duhu dutieragū tūhona quehnoano yūhtiri mūsa. Mūsa sa yegū ihñāgu ahri yehpa cjēna ijipihtiyequina tiquina űāno yūhdūati pje ijigū mū sare cahmotaűtja. Ti pje ijipihtiyequina tiquina űāno yūhdūati pje ijirota. 11 Mehenogā dūhsare ahri yehpapū yūhū tojoa tato. Yeere mūsa masidire boeracāhñā. Sa yena yūhūre sa yūhtiducuya, mūsa quehnoano yeri wapare 'Boari', nina. 12 Sa yegū yeere sa yeducuyequinare yūhū Pacū ya wūhū cjēna ijiatiquinare cūtja tiquinare. Tiquiro ya wūhū cjē botari ti yoari pje ijiducuro saha Cohācjū mehna ijiducugū yeitja tiquinare. Sa ye tiquina mehna cjēna sa ijiducuetā. Sa yegū Cohācjū wūhū cjē botaripū yūhū ojoa ohōno saha tiquinare tiquina pagūripū ohō saha ni ojoa ohōtja: Cohācjū

yūhū Pacū wamene, tiquiro ya maca wame gūhūre ojoa ohōtja. Tiquiro ya maca wahma maca Jerusalē ijirota. Ti maca hūmūsepe Cohācjū cahapū ahtari maca ijirota. Yūhū wahma wame cūoutja. Ti wame gūhūre ojoa ohōtja tiquina pagūripū.

13 Cahmo tina ijire mūsa. Sa yena mūsa ye cururi cjēnare yeequinare Espiritu Santo yahurire tūhoya mūsa", ni ojoa oho basaya Filadelfia cjēna yeequinare, tiquina puhtoro gūhūre.

Laodicea cjēnare Jesu yequinare ojoa oho basa dutiahye űure

14 'Laodicea cjēna yeequinare, tiquina puhtoro gūhūre ohō saha ni ojoa oho basaya mūhū: "Yūhū poto yegū ijiaja. Sa yegū ni mehono marieno yūhū ihñārire, yūhū tūhorire sa yahuducugū ijiaja. Ijipihtiyere mari Pacū tiquiro yerire ye basagū ijiaja yūhū.

15 Ijipihtiyē mūsa yerire masiaja yūhū. Yūhūre wacū tutuana ijiepenata mehenogā wacū tutuana ijire mūsa. Ohō saha ijire ti: Aco yūseye aco asū mehna asi busuye aco yero saha ijire mūsa. Sata ijiye acore mari coaero saha yūhūre wacū tutuera cjūna mūsa ijigū yūhū gūhū mū sare coeraja. Yūhūre mūsa quehnoano wacū tutuagū quehnoaboaga yūhūre. Yūhūre mūsa wacū tutueragū űārīboaga yūhūre. Ti yūhdūoro mehenogā wacū tuana mūsa ijigū űā yūhdūare. 16 Mūsa sa ijigū ihñāgu yabi yūhdūaja yūhū. űāñe acore yūhū sihco puti cohāno saha yūhūre mehenogā wacū tutuayequinare yabi yūhdūaja yūhū. 17 Sa yena ohō saha ni tūhotumene mūsa: 'Ijipihtiyere cūoaja. Ne yabe dūhsaerare marine', ni tūhotumene mūsa. Sa niepenata pejecūoyequina yero saha ijire mūsa. Sa yena suhti marieñequina bue tiro saha Cohācjū ihñonopū

musa ñañe yerire bue tiana ijire musa. Sa yena caperi bajueyequina tiquina ihña duayeretiquina masieno saha Cohãcjũ yere ne masiedare musa. ¹⁸ Musa sa yena ijigũ ihñagu ohõ saha ni yahutja musare: Uru warore musa dúro saha quehnoañene yuhũ cuoyere neña musa. Musare yuhũre wacũ tutuagũ yeitja. Sa yena potota Cohãcjũ ye mehna pajiro cõonata. Sa yena yehseri suhtirore musa dú musa sañano saha yuhũ dii cohãri mehna yuhũ yariari mehna musa ñañe yerire cosenohrina ijia. Sa yena quehnoañe suhti sañañequina tiquina bue tiero saha musa ñañene cosenohrina ijina ne bue tisi musa gũhũ. Sa yena musa caperire musa aco tiri bato quehnoano musare caperi bajuro saha Cohãcjũ yere quehnoano tuhoya, musa masino quehnoano.

¹⁹ Ijipihtiequina yuhũ cahĩñequinare yahuaja. Sa yegu yuhũ cahĩñequina tiquina ijigũ ihñagu, tiquina yuhũtieragũ tiquinare buhiri dahreja, tiquinare yedohogũ tuhũ. Sa yena yee pehere tutuaro cahmeña. Sa yena ñañene duhuya. ²⁰ Tuhoya yuhũre. Musa wuhũre bihari wuhũre yuhũ esaduca yuhũ sajã duaboriro saha musa mehna cjã iji duagu niaja. Yuhũ sa ye duagũ tuhona yuhũre musa mehna iji dutiya. Yeequina ijia. Musa sa ye dutigũ musa mehna ijiitja. Sa yegu mari siho ihyaro saha musa mehna quehnoano ijiitja. Sa yena yuhũ mehna cjãna ijinata musa. ²¹ Ñañene yuhũ cohãri bato yuhũ Pacũ pũhtoro tiquiro dujiro cahapũ dujiaja yuhũ gũhũ dutigũ tuhũ. Sata musa gũhũ ñañene musa duhuri bato yuhũ pũhtoro dujiro cahapũ dujinata musa dutina tana. Musare yuhũ cahapũ dujigũ yeitja.

²² Cahmo tina ijire musa. Sa yena musa ye cururi cjẽnare yeequinare Espĩritu Santo tiquiro yahurire

tuhoya musa”, ni oja oho basaya Laodicea cjẽna yeequinare, tiquina pũhtoro gũhũre, nidi yuhũre oja dutiriquiro.

4

*Uhmũsepũ Cohãcjũ cahapũ
dũsepe curi mehna quehe sa tiquina
ñõ peoyere ihñahye Ñũ*

¹ Yuhũre tiquiro sa ni yahuri bato uhmũsepũ põori sopechare ihñau. Pari turi corneta tutuaro bisiro saha tutuaro yahuducuye bisiro ca tari, yuhũ tuhogũ. Ohõ saha nidi yuhũ tuhogũ.

—Ohõpũ mija taya. Ahri yuhũ yahuati camepũre sijoro saha waharota. Sa wahatire mũhũre ihñoutja. Yuhũ nidiro sahata waharota, nino ca tari uhmũsepũ.

² Tiquiro sa ni yahugũta topũ mija esagu Espĩritu Santo tutuaye mehna ihñagu nii. Sa yegu pũhtoro dujirore uhmũsepũ ihñau. Topũ ihcãquiro dujiri. ³ Sa yero quehnoano asi siteriquiro dujiri. Jaspe wame tiri utã yero saha, cornalina wame tiri utã yero saha quehnoano asi siteriquiro dujiri tiquiro. Sa yero buheni da esmeralda yero saha asi siteri da docapũ dujiri tiquiro. ⁴ Sa yero tiquiro dujiro cahapũ veinticuatro dujiyere ihñau. Ti dujiye pũhtoa ye dujiye yuhũ ihña mũhtariquirore duji behtoori. Ti dujiyepũ veinticuatro Jesu yequina pũhtoa dujiri. Yehseye suhti sañañequina ijiri. Sa ye pũhtoa pesaye behtori uru behtorire pesariquina ijiri tiquina. ⁵ Yuhũ ihña mũhtariquiro dujiropũ miadoqueori. Sa yero sijoro saha ijiro bisiro ca tari. Uro gũhũ bisiro ca tari. Ti dujiro poto siete sihãñe paca ijiri. Siete sihãñe paca mehna tiquiro queoye mehna buhegũ Cohãcjũ yequina siete pagũ bajueyequina ijiri. ⁶ Sa yero tiquiro dujiro poto pajiri ma yero

saha vidrio yero saha, quehnoano
aco sitiri ma yero saha ijiri.

Ti dujiro cahapũ pitiario sijoro
saha bajuyequina ijiri. Tiquina
pagari paa pehe gũhare tiquina
behero pehe pehe gũhare peye
caperi tiyequina ijiri tiquina.
7 Yũhũ ihña mahtariquiro sijoro
saha bajuriquiro yairo sohãriquiro
yero saha bajuri. Tiquiro bato
ijiriquiro wecũ yero saha bajuri.
Tiquina bato ijiriquiro masũno
wũhdoa saha wũhdoa tiriquiro
ijiri. Tiquina ihtiaro bato ijiriquiro
cacũ wũye dũpũrire seõ dujiriquiro
yero saha bajuri. 8 Tiquiro seis
dũpũri wũye dũpũri tiriquiro ijiri.
Tiquiro mehna cẽna gũhũ sa dihita
wũye dũpũri tiri. Sa ye tiquina
wũye dũpũri pũa peheripũta peye
caperi tiye dũpũri ijiri. Sa ye
decoripe, ñaminipe sa basaducuye
nidi. Ne basa duhuerari. Ohõ saha
ni basari:

Quehnoariquiro, quehnoariquiro,
quehnoariquiro, Cohãcũ
mari pũtoro tutua
yãhdũriquiro ijire. Tiquiro
panopũta sa ijiducuahye.
Yojopũ gũhare sa ijiducure.
Camepũ ahtarota, ni basa-
ducuye nidi.

9 Sa basaye tiquina piti-
tario sijoro saha bajuyequina
tiquiro tutuayere basa peoye
nidi. Sa ye tiquirore ijipihtiyẽ
decori ijiducuriquirore ño peoye
“Quehnoare”, niñe nidi. 10 Tiquina
sa ye peogũ ihñañe veinticuatro
Jesu yequina pũtoa pehe pũtoro
dujiropũ dujiriquiro poto dũsepe
curi mehna quehe sa, tiquirore
ño peori. Tiquiro ijipihtiyẽ decori
ijiducuriquiro ijire. Sa ño peoye
tiquina pũtoa pesaye behtorire
tiquiro dujiro caha doque peori. Sa
doque peoye ohõ saha nidi tiquina:

11 Mũhũ Cohãcũ usã pũto waro
ijire. Tutuagũ, quehnoagũ
ijire mũhũ. Mũhũ usã
ño peogũta ijigũ nine.

Mũhare sa ño peoducuro
cahmene usãre. Ijipi-
htiyere bajumehnedigũ ijire
mũhũ. Mũhũ cahmediro
sahata ti ijipihtiyere ba-
jumehneahye mũhũ, nidi
tiquina Cohãcũre, topũ
dujiriquirore.

5

*Ojoari pũre torẽdi tunure cordero
gũhare yahuahye Ñũ*

1 Came topũ dujiriquiro tiquiro
omoca poto pehe tiquiro caõri pũre
ojoari pũre ihñaũ. Ti pũ pũa pe-
heri ojoari pũ tiquiro torẽdi tunu
ijiri. Sa yero siete piha ñeheñe
mehna tiquiro piha ñehedi tunu
ijiri. 2 Sa yegũ tutuariquiro angelre
ihñaũ. Tiquiro tutuaro yahudu-
cuye mehna ohõ saha ni yahuri:

—Ahri tunure piha ñeheñene
quehnoariquiro dihita tũhrẽ
masine. ¿Diquiro pehe ijiajari
tũhrẽatiquiro? nidi tiquiro angel.

3 Sa nieperota tiquina ti
tunure tũhrẽatiquirore bocaer-
ari. Ti tunure tũhrẽatiquirore,
quehnoariquirore bocaer-
ari. Æhmusepũ, ahri yehpapũ,
catiyequina watoapũ, yaria
tuhasariquina watoapũ ne ti
tunure ñeheñene tũhrẽatiquiro
mariedari. Sa yero ti tunure
buheatiquiro mariedari. 4 Sa
yegũ tũhrẽatiquirore, ti pũre buhea-
tiquirore tiquina bocaeragũ ihñaagũ
tutuaro utii yũhũ. 5 Yũhũ sa utigũ
ihñaño ihcãquiro Jesu yequina
pũtoa mehna cãno ohõ saha nidi
yũhare:

—Utieracãhña. Ti tunure
ñeheñene ihcãquiro tũhrẽ masine.
Tiquiro Judá ya curua cãno
tutuariquiro ijire. Tutuariquiro
ijiro “Yairo sohãriquiro”, tiquina ni
pisuriquiro ijire. Tiquiro pũtoro
Davi panamino iji turiariquiro
ijire. Watĩnore yãhdũdcariquiro
ijire tiquiro. Sa yero tiquiro

ti tunure siete ñeheñene tãhrẽ masidiquiro ijire, nidi tiquiro yãhãre.

⁶ Tiquiro sa nigũ tãhogũ pãhtoro dujiro poto cordero ducugũ ihñau. Pititiaro sijoro saha bajueyquina, Jesu yequina pãhtoa gãhũ tiquina watoa ducurĩ cordero. Tiquiro tiquina wejẽdiquiro mãnano saha bajuri. Siete sahari tiriquiro, siete caperi tiriquiro ijiri. Ti siete caperi mehna tiquiro queoye mehna buhegũ Cohãcjũ yequina pagũ bajueyquina siete bajueyquina yero saha ijire. Tiquina tiquiro yequina pagũ bajueyquina ijipihitiro ahri yehparũ Cohãcjũ ohoriquina ijiri. ⁷ Sa yero cordero pehe pãhtoro dujiro cahapũ esaro, tiquiro poto pehe caori tunure tãã we nedi tiquirore. ⁸ Tiquiro sa tãã we negũ ihñãñe cuatro sijoro bajueyquina, veinticuatro pãhtoa gãhũ cordero poto dusepe curi mehna quehe sa, tiquirore ño peori. Tiquina pãhtoa ijipihitiquina arpa wame tiye bũã pãtẽñene, uru pari gãhãre caori. Ti pari bueye ehme sitiye quehnoano wahpaye pose tiye pari ijiri. Ti ehme sitiye mehna tiquiro queoye mehna buhegũ Cohãcjũ yequina tiquirore tiquina sini basari yero saha ijiri. ⁹⁻¹⁰ Sa tiquirore ño peoye ohõ saha ni wahma basayere tiquina basa peori tiquirore:

Mãhũ tiquina wejẽdigũ ijire. Sa yegũ mãhũ dii cohãri mehna usã ñãñe yerire coseri mãhũ Cohãcjũ yequina usãre iji dutigũ. Sa yegũ usãre ijipihitiye cururi cjãnare, ijipihitiye yahuducuyere yahuducunare, ijipihitiye yehpari cjãnare usãpe usãre ijipihitinare mãhãre cahmena dihitare usã ñãñe yerire mãhũ dii cohãri mehna cosere mãhũ Cohãcjũ yequina usãre iji dutigũ. Usãre ijipihitinare Cohãcjũ

yequina ijiatinare cãri mãhũ. Sa yegũ pahia cãri mãhũ usãre Cohãcjũ cahacjãna usãre iji dutigũ. Sa yegũ peye yehpari cjẽna bui pãhtoa sõri mãhũ usãre. Sa yerigũ ijigũ mãhũ ti tunure piha ñeheñene tãhrẽacjũ ijire mãhũ, ni basa peori tiquina corderore.

¹¹ Pari turi ihñagũ millones angele parire ihñau. Pãhtoro dujirore pititiaro sijoro saha bajueyquinare, veinticuatro pãhtoare angele pehe tiquinare wahme dũca sari. Tiquina angele pari tutuaro tiquina sañuducu peogũ ihñau. ¹² Ohõ saha ni tutuaro yahuducu peori tiquina:

Cordero tiquina wejẽdigũ mãhũ ijipihitiquinare dutigũ, ijipihitiyere caogũ, masi pehogũ, tutua yãhdũgũ ijire mãhũ. Masa tiquina ñãñe buhiri tiquina wejẽdigũ mãhũ ijigũ ihñana sa ni ño peoaja mãhãre. “Quehnoa yãhdũgũ ijire”, ninatja mãhãre. Mãhãre quehnoano yahuducunatja, ni yahuducu peori angele pari.

¹³ Sa yegũ apequina gãhãre tiquina yahuducu peoye ca tagũ tãhou. Ijipihitiquina ahmãse cjẽna, ahri yehpa cjẽna, catiyequina, yariariquina gãhũ, pajiri ma cjẽna, ijipihitiorũ ijiyequina ohõ saha ni yahuducu peoye ca tari:

Cohãcjũre mãhũ dujiropũ dujigũre, Cordero gãhãre mãsare pãanare quehnoano yahuducunatja. Mãsare ño peonatja. “Quehnoa yãhdũna ijire. Tutua yãhdũna ijire”, nina, ijipihitiye decori sa niducunatja mãsare, ni yahuducu peoye ca tari.

14 Sa ye tiquina pititiaro sijoro saha bajuyequina tiquina sa yahuducu peogã tuhoye “Sata ni yahuducu peoahro”, nidi. Sa ye Jesu yequina puhtoa pehe dusepe curi mehna quehe sa Cohãcjãre, Cordero gãhãre ño peori.

6

Papera tunure tiquiro nedi tunure piha ñeheñene tãhrẽne Cordero

1 Came papera tunure tiquiro nedi tunure Cordero piha ñehe mahtaritore tãhrẽdi. Tiquiro sa tãhrẽgũ ihñau. Tiquiro sa tãhrẽdi bato ihcãquiro sijoro saha bajuyequina mehna cjãno, “Ihñana ahtaya”, nidi. Sa nino upo yero saha bisiri tiquiro.

2 Tiquiro sa nidi bato ihñau yahũ. Yehseriquiro caballore ihñau. Tiquiro bui pesariquiro bæedure cãori. Tiquirore puhtoro pesari behtore ohori apequiro pehe. Tiquiro sa ohori bato tiquiro pehe tiquirore ihña tuhtiyequinare yãhdũdũcaro wahari.

3 Came ihcãno ñehenore tãhrẽ tuhasa Cordero apero ñehenore tãhrẽdi tja. Tiquiro sa tãhrẽdi bato apequiro sijoro saha bajuyequina mehna cjãno “Ihñana ahtaya”, tiquiro nigũ tãhou tja.

4 Sa yegũ apequiro caballore sohãriquirore ihñau tja. Tiquiro bui pesariquirore tutuayere ohori apequiro pehe. Ahri yehpa cjẽnare cahme wejẽ dutiatiquirore cãri tiquirore. Sa ye ijipihitiro cjẽna cahme wejẽeta ahri yehpapũ. Sa yero pajiri pjĩ ñoseni pjĩne ohori tiquirore.

5 Came puarore tãhrẽ tuhasa Cordero apero ñehenore tãhrẽdi tja. Tiquiro sa yegũ puaro tiquina yahuducuri bato apequiro sijoro saha bajuyequina mehna cjãno “Ihñana ahtaya”, tiquiro nigũ tãhou.

Tiquiro sa nidi bato ñiniquiro caballore ihñau. Tiquiro bui pesariquiro balanza nũcũñe quorore cãori. 6 Tiquirore yahũ ihñari bato sijoro saha bajuyequina watoapũ ohõ saha bisiro ca tari:

—Ihcã deco dahrari wapa mehna trigore ihcã kilota dúeta masa. Ihcã deco dahrari wapa mehna cebada wame tiye pjerire ihtia kilota dúeta masa. Trigo, cebada gãhũ pihtia waharota. Sa ye ti wapa bujaninota. Sa ijiepegũta ihyaye dahreye ahse, vino gãhũ peye ijininota, nino ca tari.

7 Came ihtiarore tãhrẽ tuhasa Cordero apero ñehenore tãhrẽdi tja. Tiquiro sa tãhrẽdi bato apequiro sijoro saha bajuyequina mehna cjãno iji bato tiriquiro “Ihñana ahtaya”, nidi tja.

8 Tiquiro sa nigũ tuhogu opoariquiro caballore ihñau. Tiquiro bui pesariquiro “Yariagũ yeriquiro”, wame tiri. Sa yero tiquiro bato ahtariquiro “Peca”, wame tiri. Sa yero tiquinare tutuayere ohori apequiro pehe. Ahri yehpapũre deco mehna ijieyequina docapũ peyequina masare wejẽ dutiri. Cahme wejẽne mehna, wãña ahbaye mehna, dohatiye mehna, wahiquina nũcãri cjẽna usuayequina mehna peyequina masare tiquina wejẽatire cãri tiquinare.

9 Came pititiaro ñehedire tãhrẽ tuhasa Cordero apero ñehenore tãhrẽdi tja. Tiquiro sa tãhrẽgũ altar docapũ Jesu yequinare tiquina wejẽdiquina jeripohnarine ihñau. Cohãcjã yere tiquina yahuri buhiri, “Jesu yequina ijiaja”, tiquina ni yahuri buhiri tiquinare wejẽdi jiri. 10 Tiquina sañuducuye ohõ saha nidi Cohãcjãre:

—Mũhũ usã puhto, ñañe mariegũ, ni mehoñe mariegũ, mũhũ nidiro sahata yegũ ijire mũhũ. ¿Ahri yehpa cjẽnare, usãre wejẽdiquinare dũhse

ijigū buhiri dahreitjari m̄h̄u? ni sañuducuri tiquina.

¹¹ Sa yero tiquinare yehseye suhti yoaye suhtire ohori. Tiquinare sa ohoro ohō saha nidi tiquinare:

—Sorīña. Apequina m̄sa acaye Jesu yequina m̄sa yeriro sahata yojop̄ gūh̄are quehnoañe buheyere buheniñe nine. M̄sare tiquina wejēdiro sahata tiquina gūh̄are tiquina wejē pehoato d̄hsarīne. Sa yena tiquinare ijiphiyeyequinare tiquina wejēato pano mehenogā sorīña m̄sa, nidi tiquinare.

¹² Came ihcā omope ñehedire t̄hrē tuhasa Cordero apero ñehenore t̄hrēdi tja. Tore tiquiro sa t̄hrēgūta tutuaro yehpa ñuhm̄idi. Sa yero asū deco cjāno ñiniquiro wahari. Ñini suhtiro yero saha ñiniquiro wahari. Sa yero asū ñami cjāno dii yero saha sohāriquirō wahari. ¹³ Sa ye ñahpicoha paca yehpap̄ bora dijiaa wahari. Yucu d̄uca yahsayere wiñnono wē bure dijioro saha ñahpicoha paca bora dijiaa wahari. ¹⁴ Sa yero uhm̄use butia wahari. Patera tunure mari torēgū bajuero saha bajuerari uhm̄use. Sa ye ijiphiyiye c̄nu c̄j̄ gūh̄u, n̄c̄p̄o gūh̄u ape sier̄p̄ esad̄cari. ¹⁵ Sa wahagū ihñañe, ahri yehpa cjēna p̄h̄toa c̄nu c̄j̄ cjē utā w̄h̄usep̄ duhtiri. Apequina p̄h̄toa, surara p̄h̄toa, doeri cjē opana, tutuayequina, ijiphiyeyequina tiquina cahacjēna, cahacjēna ijieyeyequina gūh̄u top̄ta duhtimedi. ¹⁶ Sa duhtiyē, c̄nu cj̄are, utā w̄h̄use gūh̄are ohō saha nidi:

—Ūsā bui bora p̄jeya. Ūsāre n̄oña. Siquiro p̄h̄torore, dujirop̄ dujiriquirore cue ȳh̄d̄aja. Cordero ūsāre ñano buhiri dahrerota. Sa yena n̄oña ūsāre. ¹⁷ Ijiphiyeyequinare tutuaro buhiri dahreati deco iji tuhasare. Sa ye ti buhiri dahreatire ne ihcāquiro

duhtiriquiro ihcāno sahasi, nidi tiquina ijiphiyeyequina.

7

Israe masa paḡure Cohācjū tiquiro wame ña ohōatire yahuahye Ñū

¹ Came pititiaro angelere ihñau. Tiquina ijiphirop̄ wahari. Ihcāquiro nortep̄ waharo top̄ ahtari wiñnonore ahtaeragū yeri. Apequiro surp̄, apequiro asū m̄ja tarop̄, apequiro asū sajānop̄ wahaye, nortep̄ wahariquiro yero saha yeri tiquina gūh̄u. Sa yero ahri yehpap̄, pajiri map̄ gūh̄are ne wiñnono ahtaerari. Ne ihcādu yuc̄gare wiñnono ñuhmigū yerari. ² Sa yeḡu apequiro angelre ihñau tja. Asū m̄ja tarop̄ ahtaro nidi tiquiro. Cohācjū catiriquiro tiquiro wame ña ohōnore ne cāhtaro nidi tiquiro. Sa ne cāhtaro apequina pititiaro angelere tiquiro sañuducuri. Tiquina angele pehe ahri yehpare, pajiri ma gūh̄are Cohācjū tiquiro ñano wahagū ye dutinohriquinap̄ ijiri. ³ Tiquinare sañuducuro ohō saha nidi angel:

—Cohteniña. Cohācjū cahacjēna tiquina w̄h̄doa pacare tiquiro wamene ohōna tana niaja. Ūsā sa ohōato pano ahri yehpare, pajiri mare, yuc̄ri gūh̄are ñano wahagū yeracāhña m̄sa, nidi tiquiro apequina pititiaro angelere.

⁴ Sa yero Cohācjū tiquiro wame mehna tiquina w̄h̄doa pacare tiquina ohōatiquinare “Ohōpequina ijire”, ni yahuri ȳh̄are ihcāquiro. Israe masa doce cururi cjēna ciento cuarenta y cuatro mil masa tiquina ohōatiquina ijīñohti. ⁵ Ahriquina ijīñohti tiquina ohōatiquina: Doce mil masa Judá panamena iji turiayequina tiquina ohōatiquina ijiri. Apequina doce mil masa Rubē panamena iji turiayequina tiquina ohōatiquina ijiri. Apequina doce mil masa Gad panamena iji

turiayequina tiquina ohōatiquina ijiri. ⁶ Apequina doce mil masa Aser panamena iji turiayequina, apequina doce mil masa Neftalí panamena iji turiayequina, apequina doce mil masa Manase panamena iji turiayequina tiquina ohōatiquina ijiri. ⁷ Apequina doce mil masa Simeo panamena iji turiayequina, apequina doce mil masa Leví panamena iji turiayequina, apequina doce mil masa Isacár panamena iji turiayequina tiquina ohōatiquina ijiri. ⁸ Apequina doce mil masa Zabulón panamena iji turiayequina, apequina doce mil masa José panamena iji turiayequina, apequina doce mil masa Benjami panamena iji turiayequina tiquina ohōatiquina ijiri. Topequinata ijipihtiyequina masa ciento cuarenta y cuatro mil tiquiro wame mehna tiquiro ohōatiquina ijiri.

Peyequina yehseye suhti sañañequinare yahuahye Ñu marine

⁹ Came peyequina masare ihñau. Ijipihtiye yehpari cjēnare, ijipihtiye cururi cjēnare, ijipihtiye yahuducuyere yahuducuyequinare, ijipihtiye macari cjēnare peyequinare Cristore cahmeñequina dihitare topu ducuyequinare ihñau. Pūhtoro dujiro poto, Cordero caha ducuri tiquina masa. Peyequina masa ijiri. Sa ye queo pehoyequina ijierari. Yehseye suhti sañañequina ijiri tiquina. Sa ye iqui pohnarine cūori. ¹⁰ Sa ye tiquina ijipihtiyequina ohō saha ni tutuaro sañuducuri:

Cohācjū ijire usāre yūhdūoriquiro. Tiquiro dujiropu dujiriquiro ijire. Cordero gūhu usāre yūhdūoriquiro ijire, ni sañuducuri tiquina.

¹¹ Sa ye ijipihtiyequina angele, Jesu yequina pūhtoa gūhu, sijoro saha bajuyequina mehna pūhtoro dujiro cahapu ducuri. Sa ducuye

tiquiro dujiro poto dūsepe curi mehna quehe sa, Cohācjūre ño peori. ¹² Ohō saha ni ño peori tiquina: Sa tjire. Cohācjū usā pūhto, mūhure quehnoano yahuducujaja. Quehnoa yūhdūagu ijire mūhu. Masi pehogu ijire mūhu. Mūhure “Quehnoare”, niaja. Mūhure ño peoaja. Tutua yūhdūagu ijire mūhu. Mūhu tutuaye mehna yerigu ijire mūhu. Sa ijiducugu ijire mūhu ijipihtiye decori. Sa tjire, ni ño peori tiquina.

¹³ Sa yero ihcāquiro Jesu yequina pūhtoa mehna cjāno yūhure sinituri:

—¿Ahriquina yehseye suhti sañañequinare masiajari mūhu? ¿Tiquina ahtaritore masiajari mūhu? ni sinituri yūhure.

¹⁴ Tiquiro sa nigū tūhogu,

—Masiedaja, ni yūhtii.

—¿Noa ijiajari tiquina? ni sinituu tiquirore.

Yūhu sa nigū tūhoro ohō saha nidi yūhure:

—Ahriquina ña yūhdūaro yūhdūari deco ijigū ihcāno sahayequina ijire. Tiquina suhti cosenohriquina tiquina ijiro saha Cordero tiquiro dii cohāno mehna tiquina ñañene cosenohriquina ijire. Sa ye quehnoano yehseye suhti sañañequina ijire.

¹⁵ Sa tiquiro cosenohriquina ijije Cohācjū dujiro poto tiquirore sa ño peoducure. Decoripe, ñaminipe tiquirore sa ño peoducure, pahia Cohācjū wūhupu tiquina yeriro saha. Sa yero tiquina mehna sa ijiducuro, tiquinare yedohorota Cohācjū “Sijoro saha wahari”, nino. ¹⁶ Ne pari turi wūha ahbasi tiquina. Sa ye ne aco wūosi tiquina. Ne asū deco cjāno asiye tiquina asiye posi. Tutuaro asiye

tiquinare ñano yuhdugū yesi. ¹⁷ Puhoro dujiro potu ducuriquiuro Cordero tiquinare ihña ihborota. Ovejare ihña ihboriquiro yero saha tiquinare ihña ihborota. Sa yero mári pohteripū catigū yeye mári pohteripū tiquinare uhmū tā cānota, ovejare ihña ihboriquiro tiquiuro uhmū tā cāno saha. Sa yero sa bucueducugū yerota tiquinare. Sa ye ne pari turi utisi tiquina, nidi Jesu yequina puhota mehna cǵano yuhare.

8

Seis papera tunurine tiquina piha ñehedire tuhre tuhasaro aperore tuhreahye tja Cordero

¹ Seis papera tunurine tiquina piha ñehedire tuhre tuhasaro aperore tuhredi tja Cordero. Tiquiuro sa tuhre tuhasagū hora deco topū uhmūsepū quehnoano dihta mariaa wahari. ² Sa yegu siete angelere Cohācjū potu ducuyequinare ihñau. Sa yero tiquinare siete cornetarire ohori apequiuro. ³ Apequiuro angel uru pare bueye ehme sitiyaere pose yeati pare cuoriquiro altar cahapū esa, ducuri. Topū tiquiuro ducugū peye ehme sitiyaere tiquiore ohori ijiphiyequina Cohācjū yequina tiquiore tiquina sinidi mehna moreatire. Sa yero uru altarpū Cohācjū dujiro caha ijiri altarpū ti ehme sitiyaere bueri Cohācjūre. ⁴ Sa ye angel tiquiuro cuori pa cǵe ehme sitiyaere altarpū tiquiuro poho siteri bato ti ehme sitiyaere cǵe ohmeo Cohācjū yequina tiquiore tiquina sinidi mehna mujaa wahari. ⁵ Sa wahari bato altar cǵe nitine ti papū wehe sāa tuhasa, yehpapū doque cūri. Tiquiuro sa doque cūgūta mia sitedoqueo, tutuaro upo pari. Sa

yero sijoro saha ijiro bisi maa, yehpa ñuhmi maari.

Cornetarire yahuahye Ñu

⁶ Came siete angele tiquinape tiquina cornetarire putie tee nidi.

⁷ Ihcāquiuro angel tiquiuro yariare puti mūhtari. Tiquiuro sa putigū aco paca yusūaye paca, peca mehna, dii mehna moreñe paca yehpapū doque dijiori. Sa doque dijigūta yehpa ujūa wahari. Ohō puno ujāri: Ahri yehpa deco esaro taro yemehno ujūa wahari. Sa yero to puno poseta yucūri gūhū, taa gūhū ujūa wahari.

⁸ Angel ihcāquiuro tiquiuro sa puti mūhtari bato apequiuro angel tiquiuro yaria cornetare putiri tja. Tiquiuro sa putigū pajidū cūnū yero saha bajudū quehnoano ujūducudū pajiri mapūre waha maa ñojoaa wahari. Sa yero yehpa ujūriro puno to punota pajiri ma dii ma dojoa wahari. ⁹ Sa ye pajiri ma cǵēna wahi deco mehna mehenno esaboro yariaa wahari. Sa ye tope yucasari gūhū minia wahari pajiri mapūre.

¹⁰ Puhoro angele tiquina putiri bato apequiuro angel gūhū tiquiuro yaria cornetare putiri tja. Tiquiuro sa putigū pajiria ñahpicoha, sihāria yero saha asiria yehpapū bora sa quehea wahari. Ahri yehpa cǵe mári deco mehna mehenno esaboro tope mári bui bora sa quehea wahari ñahpicoha. Tope mári pohteri bui bora sa quehea wahari. ¹¹ Tope márita suēñe mári wahari. Sa wahagū peyequina masa ti mári cǵe acore sihnime, yariaa wahari. Tia ñahpicoha “Suēnia”, wame tiri.

¹² Ihtiaro angele tiquina putiri bato apequiuro angel gūhū tiquiuro yaria cornetare putiri tja. Tiquiuro sa putigū asū deco cǵāno, ñami cǵāno gūhū deco mehna mehenno esaboro dojoa wahari. Ñahpicoha pari gūhū deco mehna mehenno

esaboro tope pacata dojoa wahari. Tope paca ahmuse cjē paca quehnoano buhrioerari. Decopu pititia hora waro asū deco cjāno ne buhrioerari. Ñamine pititia hora waro asū ñami cjāno, ñahpicoha pari gāhu ne buhrioerari.

¹³ Came ihñadoque m̄ou tja. H̄m̄usep̄u w̄ariquirore cac̄ure ihñau. Sa yegu tiquiro sañuducugū t̄ahou. Ohō saha nidi tiquiro:

—Ña yuhduare. Ña yuhduare. Ihtiaro angele d̄hsari yojop̄u putiatiquina. Tiquina putiri bato ña yuhduaro waharota. Sa wahagū ahri yehpap̄u ijiyequina ña yuhduaro yuhdueta, nidi tiquiro.

9

¹ Came pititiaro angele tiquina putiri bato apequiro angel tiquiro yaria cornetare putiri tja. Tiquiro sa putigū ñahpicoha yero saha ijiriquiro angel ahm̄usep̄u bora dijia tariquirore ihñau. Sa yero tiquirore ahc̄uāri cope cjā sawire ohori. ² Sa yero tiquiro ti copere tiquiro p̄ogū peca ohmeo wijiari. Pajiri peca cjē ohmeo yero saha pajiro ohmeo wijiari ti copere. Sa wijiario ti ohmeo duita asū deco cjānore, ahm̄use gāhare butia wahagū yeri. ³ Sa ye ti ohmeo puhiap̄u ijiyequina poreroa yehpap̄u ahtari. Sa ye cutipa tiquina tutuaro pur̄no saha tiquina gāhu tutuaro pur̄idi. ⁴ Sa yero taare, yucarire, apeye oteyere ñano ye dutierari tiquinare. Masa dihitare ñano ye dutiri tiquinare. Coh̄c̄jū wamene tiquina wuhdoa pacare oh̄mehneñequina dihitare ñano ye dutiri tiquinare poreroare. ⁵ Sa ñano ye dutieperota tiquinare wejē dutierari. Tiquinare wejē dutieraperota ihcā omope asūri waro tiquinare ñano pur̄igū ye dutiri. Cutipa toaye tiquina pur̄no saha pur̄igū yeyequina ijiri poreroa gāhu. ⁶ Tiquinare tiquina sa pur̄igū

yegū masa yariaa duaeta. Tiquina sa yaria duepegūta tiquinare yaria dutisi.

⁷ Poreroa pehe caballoa yero saha bajuri. Tiquina cahme wejēato pano caballoare tiquina suhti s̄ariro saha sa bajuyequina ijiri tiquina poreroa gāhu. Tiquina dapu paca bui puhtoa pesaye behtori uru behtori yero saha bajuri. Tiquina wuhdoa paca masa yero saha bajuri. ⁸ Tiquina poari numia poari yero saha ijiri. Sa ye tiquina upiri yayia upiri yero saha ijiri. ⁹ Jeripohna cahmotari cahsero come cahsero yero saha bajuri tiquina cutiro. Sa ye tiquina wugū peyequina caballoa omañequina tiquina omano saha tiquina wugū bisiri. Caballoa tunuñe paca wejeyequina tiquina cahme wejēnopu wahaye, tiquina bisiro saha bisiri poreroa wugū. ¹⁰ Sa ye cutipa picōno tiro saha, toaria tiquiro c̄uro saha ijiri tiquina poreroa. Sa ye tiquina toaye paca mehna toaye, ihcā omope asūri waro masare pur̄igū yeri. ¹¹ Sa ye tiquina puhtoro tiyequina ijiri. H̄c̄uāri cope up̄ro ijiri tiquina puhtoro. Tiquiro angel ijiri. Hebreo ye mehna Abadón wame tiri tiquiro. Griego ye mehna Apolión wame tiri. (Apolión “Dojomehneniquiro” nino nine.)

¹² Poreroa masare ñano tiquina pur̄igū yeri bato ahri tiquina ñano yuhdu m̄htariro pihtia wahari. To bato p̄a taha pari turi ñano yuhdueta masa.

¹³ Came ihcā omopequina angele tiquina putiri bato apequiro angel tiquiro yaria cornetare putiri tja. Tiquiro sa putigū Coh̄c̄jū caha ducuri altarp̄u uru altarp̄u yahuducuye bisi wijiario ca tari. Ti altar cjē sahari pititia saharop̄u yahuducuye bisi wijiario ca tari. ¹⁴ Sa yahuducuro cornetare putiriquiro angelre yahuri:

—Eufrates wame tiri ma pajiri mapu peresupu ijiyequinare angelere wioya. Tiquina pititiaro angele ijire, nino ca tari.

¹⁵ Sa nigū tūhoro angel pehe tiquinare pititiaro wiori, peyequina masare wejēatiquinare. Ahri cūhmare, ahri asūre, ahri decore, ahri horare queoro cohteye nidi tiquina pititiaro angele. Tiquina cohteriro esa tuhasare. Sa ye wejēne tee nine. Ijipihtiyequina deco esaboro caha masare wejēatiquina ijire. ¹⁶ Sa yegu tiquina yequina surarare “Ohōpequina ijire”, tiquina nigū tūhou. Tiquina caballoa bui pesayequina ijiri. Doscientos millones surara ijiri.

¹⁷ Sa yegu caballoare tiquina bui pesayequina gūhare ihñau. Sa ye caballoa bui pesayequina tiquina jeripohnarine cahmotaye suhti come suhti sohāne suhti, yahsaye suhti, bojoyaye suhti ijiri. Sa ye caballoa tiquina dapu paca yayia sohānequina yero saha bajuri. Tiquina dūseripu peca, ohmeo, azufre wame tiye ohmeo gūhu wijiari. ¹⁸ Sa ye caballoa dūseripu wijiaye masare wejēdi. Ijipihtiyequina deco mehna meheno esaboro waro topequina masare wejēdi. Sa ye peca mehna, ohmeo mehna, azufre mehna peyequina masare wejēdi. ¹⁹ Tiquinare caballoa dūseri mehna wejēdi. Sa ye caballoa picōri mehna wejēdi tja. Tiquina picōri sohtoapu añaa dapu paca yero saha bajuri. Sa ye tiquina picōri mehna ñano yeri tiquina masare.

²⁰ Peyequina masa yarieyequina tiquina wejē dahariquina pehe tiquina ñahe yerire ne duhuerari. Watfare ño peo duhuerari. “Cohācjū ijire”, tiquina niñe queoye gūhare ño peo duhuerari. Ti queoye uru mehna, plata mehna, bronce wame tiye come mehna, utā mehna, yucari mehna

tiquina yeri queoye ijiri. Sa ye ti queoye pehe ihñedari. Tūhoerari. Tiniedari. ²¹ Peye ñahe gūhare tiquina ne bujua witierari. Masare tiquina wejēdire, tiquina numia mehna tiquina ñano yerire, tiquina yaqueri gūhare ne bujua witierari tiquina. Sa ye masare ujuayequina yayia tiquina yero saha yeye, ti gūhare ne bujua witierari tiquina.

10

Meheni tunugāre papera tunugāre ne cāhtahye angel

¹ Came apequiro tutuariquiro angel ahmūsepu tiquiro dijia tagū ihñau. Ehmeo curua watoapu ahtari. Sa yero buheni da tiquiro dapu bui pesari. Tiquiro wāhdoā asū deco cjanō yero saha asi siteri. Tiquiro ñecari wjāri peca yero saha bajuri. ² Sa yero meheni tunugā papera tunugāre tiquiro pāri tunugāre cūori tiquiro. Tiquiro dahpocā poto pehe cja dahpocā mehna pajiri mapu cūhta cūri. Tiquiro dahpocā cū pehe pehe mehna dihtapu cūhta cūri. ³ Sa ducuro yayia tiquina sañuducuro saha tiquiro tutuaro sañuducuri. Tiquiro sa sañuducuri bato siete upoa yahuye ca tamedī. ⁴ Tiquina sa yahugū tūhogu ojoa dūcamī. Yūhu sa ojoa dūcagūta ahmūsepu yūhare yahuducuro ca tari.

—Siete upoa tiquina nidire apequinare yahueracāhña. Sa yegu tire ojoa nedacāhña, nino ca tari yūhare.

⁵ Tiquiro sa nidi bato pajiri mapare cūhta cū, dihtapare cūhta cūriquiro angel tiquiro omoca poto pehe siōdoque mūori ahmūsepu. ⁶ Sa siōdoque mūono Cohācjū sa catiducuriquiro wame mehna wame peori. Tiquiro Cohācjū pehe ijipihtiyere ahmūsepe, ahmūsepe cjehe, ahri yehpare, ahri yehpa cjehe, pajiri mare, pajiri ma cjehe

yeriquiro ijire. Sa yero ohō saha nidi angel:

—Cohācjū mehna poto nii niaja. To punota cohtenatja. ⁷Seis angele cornetarire tiquina putiri bato apequiro angel putigū Cohācjū panopu tiquiro “Ohō saha yeitja” nidiro sahata yerota. Panopu masare tire quehnoano yahuerahye. Came tiquiro cahacjēnare, tiquiro yere yahu māhtariquina pehere quehnoano yahu pehoahye tiquiro. Ti tiquiro yahu cūrire yojopure yerota tiquiro, nidi angel.

⁸Tiquiro sa nidi bato ūhmasepu yahure yahuducuriquiro pari turi yahuducuro ca tari tja. Ohō saha nino ca tari yahure:

—Pajiri mapu cūhta cūriquiro dihtapu cūhta cūriquiro siquiro angel cahapu wahaya. Sa wahagu papera tunugāre tiquiro cūori tunugāre neña, nino ca tari yahure.

⁹Tiquiro sa nigū tūhogu angel cahapu wahau. Tiquirore papera tunugāre yahu sinigū tūhoro ohō saha ni yūhtiri yahure:

—Neña. Sa yegu ahri tunu papera tunugāre ihyaya. Mūhu coā ihyagū umi yero saha quehnoano bisirota. Mūhu paapu māhu ihya sōri bato sūēñe waharota, nidi yahure.

¹⁰Tiquiro sa nigū tūhogu ti tunugāre angelre yahu nedi bato ihyau. Yūhu coā ihyagū umi yero saha bisiri. Yūhu ihya sōri bato yūhu paapu sūēno wahadu. ¹¹Yūhu sa ihyari bato ohō saha nidi yahure:

—Pari turi ijipihtiyē macari cjēna, ijipihtiyē yehpari cjēna, peye yahuducuyere yahuducuyequina, tiquina pūhota gūhu came tiquina dūhse wahatire yahuyuya māhu, nidi yahure.

11

Puaro Cohācjū yere yahua-tiquinare yahu ojoahye Ñu marine

¹Came yahure queodure ohori Cohācjū. Tuadu puno yoadu ijiri tū. Tūre ohoro ohō saha nidi yahure:

—Ya wūhure queogu wahaya. Ti wūhu cjā altar gūhure queoya. Sa yegu ti wūhuru yahure ño peoyequinare queoya. ²Sopecaha wijia saducari paare quehnoari paare queoeracāhña. Ti paa yahure cahmeeñequinare tiquina cūri paa ijire. Tiquina cuarenta y dos asūri waro Cohācjū ya macare, ti maca cjēna gūhure ñano yeeta. Sa yegu queoeracāhña tiquina ya paare quehnoari paare. ³Sa yegu yeere yahuatiquinare puarore ohoutja. Mil doscientos sesenta decori waro yeere yahueta. Masa dija suhtire sañañequina ijieta tiquina yūhu yahu dutiyequina, ni yahuri yahure.

⁴Ahri yehpa cjēna pūhtoro poto puadu Olivo wame tiye cju ducure. Puadu sihā peoye cju gūhu ti cju cahapu ducure. Ti cju mehna queoye mehna yūhu buhegū ahriquina puaro mari pūhtoro yere yahuyequina ti cju yero saha ijire. ⁵Sa ye tiquinare ihña tuhtiyequina tiquinare ñano ye duagū tiquina pehe dūseri cjē peca mehna ūjūa pehoeta tiquinare ihña tuhtiyequinare. Sata tiquinare ñano yeyequinare wejēeta tiquina puaro mari pūhtoro yere yahuyequina pehe. ⁶Sa ye tiquina puaro acoro ahta dutieragū acoro ahtasi. Sa yero mari pūhtoro yere tiquina yahuro puno acoro ahtasi. Sa ye mārīne dii mārī wahagū yeeta tiquina. Sa ye ahri yehpare ñano wahagū yeeta. Ijipihtiyē dūhse ijiyere, ijipihtiyequina dūhse ijiyequinare masare ñano wahagū yeeta. Tiquina cahmeno sahata sa ñano wahagū yeeta ahri yehpare.

⁷Tiquina sa ye pehogū ūhcuāri coperu ijiriquiro ñariquiro nūcu cjēno wijiarota. Sa wijiaro Cohācjū yere yahuyequina mehna cahme-

quenota. Sa cahmequeno tutua yuhducaro tiquinare wejēnota. ⁸ Tiquiro sa wejēdi bato tiquina pagari pajiri maca cjā mahapū cuñaeta. Yahuyequina pūhtorore tiquina quē biha wejēdi maca ijire ti maca. Ti maca cjēna ñañequina ijiye Sodoma cjēna, Egipto cjēna yero saha ijire. ⁹ Sa cuñañe ihtia deco quehnoano cuña, ape deco deco mehna tiquina pagari mahapū cuñaeta. Sa ye ijipihtiye yehpari cjēna, ijipihtiye cururi cjēna, ijipihtiye yahuducuyere yahuducuyequina tope decori waro tiquina pagarire ihñaducuetā. Sa ye tope decori waro tiquina pagarire ya dutisi. ¹⁰ Tiquina sa yariariquina ijigū ihñañe ahri yehpa cjēna bucueeta. Sa bucueye bose decore yeye, tiquina basi apee borore sa oho quēeta. Tiquina pūaro Cohācjū yere yahuyequina masare ñano yuhdugū yeriquina ijiahye. Sa ye tiquina sa yariagū ihñañe bucue yuhdueta ahri yehpa cjēna.

¹¹ Sa yero ihtia deco ape deco deco mehna bato Cohācjū tiquina pagarire masonota. Tiquiro sa masogū tiquina pari turi wahcāducaeta. Tiquina sa wahcāducagū ihñañe ijipihtiyequina cue yuhdueta tiquinare. ¹² Came tiquina pūaro uhmūsepū tutuaro yahuducugū tūhoeta. Ohō saha ninota tiquinare.

—Ohōpū mūja taya mūsa, ninota.

Tiquiro sa nigū tūhoye ehmeo curua watoa mūjaa wahaeta. Tiquina yabiriquinare mūjagū ihñāeta masa. ¹³ Tiquina sa mūjagūta yehpa tutuaro ñuhminota. Sa ñuhmigū ti maca cjē wūhūse peye bora dijiaa wahaeta. Sa ye yehpa ñuhmino mehna siete mil masa yariaa wahaeta. Apequina dūhsariquina pehe acūaa wahaeta. Sa ye Cohācjūre uhmūse cjānore “Tutuagu ijire” ni ño peoeta

tiquiore.

¹⁴ Ahri ijipihtiye tiquina sa wahari bato pūa taha masa ñano yuhdu tuhsariquina ijeta. Tiquina sa yuhdūri batogāta pari turi duita masa ñano yuhdueta tja.

Seis cornetarire tiquina putiri bato apequiro putiahye

¹⁵ Came seis cornetarire tiquina putiri bato apequiro angel tiquiro yariare putiri. Tiquiro sa putigū uhmūsepū tutuaro yahuducuye ca tari. Ohō saha nino ca tari:

Yojoḡpū mari Pacū, Cristo mehna ahri yehpa cjēna pūhtoa ijieta. Sa yero pūhtoro sa ijiducurota Cohācjū, nino ca tari.

¹⁶ Sa ye Cohācjū poto pūhtoa dujiyepū dujiyequina veinticuatro Jesu yequina pūhtoa Cohācjū poto quehe sa, tiquiore ño peori. ¹⁷ Sa ño peoye ohō saha nidi:

Ūsā pūhto Cohācjū, tutua yuhduagu ijire mūhū. Mūhū panopū sa ijiducuahye. Sa yegū yojoḡpū gūhūre sa ijiducurota. Camepū ahtaeta mūhū. Mūhū tutuaye mehna masa tiquina pūhto mūhū ijiducagū “Quehnoare” niaja mūhūre. ¹⁸ Ijipihtiyequina ahri yehpa cjēna mūhūre cahmedariquina mūhū mehna usuamedī. Yojoḡpūre tiquinare mūhū buhiri dahreati pje ijire. Yariariquina gūhūre mūhū buhiri dahreati pje ijire. Sa yero mūhū yequina pehere quehnoañene tiquina yeri wapare mūhū ohoati pje ijire. Ihquēquina tiquina mūhū cahacjēna mūhū yere yahu mūhtariquina ijire. Sa ye tiquina, apequina mūhū yequina mehna ijipihtiyequina mūhūre ño peoyequina ijire. Sa yegū pūhtoare, ihyo ijiyequina gūhūre mūhū

yequina tiquina ijiri wapa quehnoano yeita m̄h̄h̄. Sa yero ahri yehpa cjēnare dojomehne cohteriquinare m̄h̄h̄ cohāti pje ijire yojop̄re, ni ño peori p̄h̄toa Cohācj̄ure.

¹⁹ Tiquina sa yeri bato um̄use cjā w̄h̄h̄ Cohācj̄ū ya w̄h̄h̄ tiquiro p̄ōri w̄h̄h̄ ijiri. Sa yena ti w̄h̄h̄p̄h̄ ijiri acarore ih̄ñ̄ā. Ti acaro puhiap̄ Cohācj̄ū masare tiquiro yedohoatire yahuri p̄ū sañari. Ȳh̄h̄ sa ih̄ñ̄aḡūta mia sitedoqueo, upo pa maari. Sa yero sijoro saha ijiro bisi maa, yehpa ñuhmi maa, aco paca ȳh̄h̄aȳe paca um̄usep̄ peye bora dijia tari.

12

Numino ḡuh̄ure pinono ḡuh̄ure yahuahye Ñu

¹ Came ahri yehpa d̄h̄se w̄hatire um̄usep̄ ih̄ñ̄ori. Tiquiro sa ih̄ñ̄ori ihyo waro ijierari. Ohō saha ih̄ñ̄a m̄htā: Um̄usep̄ numinore ih̄ñ̄ā. Ticoro suhtiro as̄ū deco cj̄āno yero saha asi siteri. Sa yero as̄ū ñami cj̄āno bui ducuri. P̄h̄toro pesari behto borore doce ñahpicoha paca c̄ōri behtore pesaricoro ducuri. ² Sa yero mehenoḡā d̄h̄sari ticoro pohna tiato. Sa yero ticoro sañuducuri. ³ Came pari turi ih̄ñ̄ā um̄usep̄ tja: Pajiriquiro pinonore sohāriquirore ih̄ñ̄ā. Siete dapu paca tiriq̄ūro ijiri. Ijipihtiye tiquiro dapu paca p̄h̄toa pesaye behtori borore pesaye dapu paca ijiri. Sa yero diez waro sahari tiriq̄ūro ijiri tiquiro. ⁴ Tiquiro picōno mehna ñahpicoha pacare wahba sitedoque dijiori yehpap̄. Ijipihtiye ñahpicohare deco esaboro caha wahba sitedoque dijiori. Sa yero numino pohna tiaticoro potoducuri pinono. Ticoro mac̄noḡā bajuaḡū tiquiroḡāre ihyaro taro nimesi. ⁵ Cameḡāta c̄ōo tuhasari nijinoḡāre. Ijipihtiye yehpari cjēna

p̄h̄toro ijiatiquiro ijiri tiquiroḡā. Tiquiro sa p̄h̄toro tutuariquiro ijiḡū, masa tiquirore ȳhd̄d̄ucaȳe ih̄c̄āno sahasi. Tiquiro sa masa bajuaḡūta Cohācj̄ū tiquiro dujiro cahap̄ tiquiroḡāre ne c̄āa wahari. ⁶ Tiquiro sa yeḡū numino pehe masa marienop̄ duhti c̄āa wahari. Cohācj̄ū tiquiro quehnoyurirop̄ duhti c̄āa wahari ticoro. Top̄re mil doscientos sesenta decori waro Cohācj̄ū ticorore ih̄ñ̄a ih̄bori.

⁷ Coā warop̄re um̄usep̄ cahme wej̄ē d̄ucaȳe. Miguel wame tiriq̄ūro angel tiquiro yequina angele ḡuh̄h̄ pinono mehna cahmequeahye. Tiquina sa cahmequeḡū pinono tiquiro yequina angele mehna Miguel ḡuh̄h̄ mehna cahmequeahye.

⁸ Sa ye Miguel ḡuh̄h̄ pinonore ȳhd̄d̄ucaȳe. Sa yero pinono yequina angele ḡuh̄ure um̄usep̄ iji nemo dutierahye. ⁹ Sa yero pajiriquiro pinonore cohā c̄āh̄e Cohācj̄ū. Tiquiro pinono wat̄nota ijiro nidi. Satana wame tiriq̄ūro ijiri. Panop̄ tiquiro pinono paḡū saha bajuriquiro ijiahye. Sa yero ijipihtiri yehpa cjēnare ni mehoriq̄ūro ijire. Tiquirore tiquiro yequina angele mehna yehpap̄ cohā dijioahye.

¹⁰ Came um̄usep̄ sañuducuro ca taḡū tahou:

Yojop̄re mari Pac̄ masare ȳhd̄h̄ōri. Yojop̄ p̄ūritare mari Pac̄ mari p̄h̄toro ijiro ahtari tiquiro tutuayere ih̄ñ̄ono taro. Sa yero tiquiro ohoriquiro Cristo ḡuh̄h̄ tiquiro p̄h̄toro ijiyere tiquiro tutuayere ih̄ñ̄ori ijipihtiyequinare. Wat̄nore um̄usep̄ ijiriquirore yehpap̄ cohā dijiori. Sa yero tiquiro tutuayere ih̄ñ̄ori mari Pac̄. Tiquiro wat̄no pehe decoripe, ñaminipe Jesu yequinare “Ahriquina ñañequina ijire”, ni yahusāno

niahye mari Pacare. Sa yero mari acayere Jesu yequinare yahusâriquiroy ijahye. ¹¹ Cristo Cordero wame tiriquiroy tiquiroy dii cohâri mehna mari acaye Jesu yequina tiquiroyre wacũ tutuayequina tiquina ñano yerire tiquiroy cohânohriquina ijire. Sa wacũ tutuayequina ijiye, watĩnoye yuhduɗucari. Sa ye quehnoañe buheyere buh-eye, watĩnoye yuhduɗucari. Tiquiroy yere buheye apequina tiquinare wejê duepegãta, Cristo yere duhuerari. ¹² Sa yena masa umuse cãna bucueya. Watĩnoye yehpapu tiquiroy cohã dijiogũ ihñana bucueya. Sa yepegãta ahri yehpa cãna, pajiri ma cãna gãhu pejecuona wahanata masa pehe. Masa cahapu dijiari watĩno. Tiquiroyre buhiri dahreato mehenogã duhsare. Sa yero usua yuhduare tiquiroy. Masa cahapu tiquiroy esagũ pejecuona musare tojoagũ yerota tiquiroy, ni sañuducugũ tuhoy.

¹³ Sa yero pinono tiquiroy cohã dijioriquiroy numinore, nijinogã pacorore nanu tã cãri. ¹⁴ Sa yero ticorore pajiriquiroy cacu tiquiroy wãye duparire ohori Cohãcã, masa marienopu ticoroy wã duhti cãtoye. Topu ticoroy esari bato ihtia cahma quehnoano ape cahma deco waro ticorore ihña ihbori Cohãcã. Tiquiroy sa ihña ihbogũ pinono ticorore ñano ye masiedari. ¹⁵ Topu ticoroy ijigũ ihñano pinono acore pajiro puti sitedoqueori ticorore mionoy taro. ¹⁶ Tiquiroy sa yegũ yehpa pehe ticorore yedohori. Pinono duseropu wijiaye acore yehpa pehe aco ihmi peho cãri. ¹⁷ Sa wahagũ ihñano pinono

numino mehna usua yuhduari. Sa usuaro ihquẽquina ticoroy panamena iji turiayequina mehna cahmequeno wahari. Tiquina pehe Cohãcã dutiyere yeyequina ijiye, Jesu ye buheyere quehnoañe buheyere ne duhueyequina ijiri. ¹⁸ Sa yero pinono pajiri ma duhtu cahapu ducuri.

13

Pãaro nucu cjenare yahuahye Ñu

¹ Pajiri ma duhtu cahapu ducugu, nucu cãnoye ti mapu ijiriquiroyre wahcã pahagũ ihñau. Tiquiroy pehe siete dapu paca, diez sahari waro curiquiroy ijiri. Tiquiroy sahari puhto pesaye behtori borore pesari. Sa yero tiquiroy dapu pacare tiquiroy wamene ojoa ohõri dapu paca ijiri. Ti wame tiquiroy ñano wame tigũ ihña yabiri Cohãcã. ² Sa yero tiquiroy nucu cãno yairo dohroriquiroy yero saha bajuri. Sa yero mie yero saha dahpocãri tiriquiroy ijiri. Sa yero yairo sohãriquiroy pajiriquirodu yero saha dusero tiriquiroy ijiri. Sa yero pinono pehe tiquiroy tutuayere ohori nucu cãnoye. Sa ohoro tiquiroyre puhtoro dujiropu cãno tiquiroy yero saha peyequina masare dutigũ yeri pinono nucu cãnoye. ³ Ihcã dapu nucu cãno dapu tiquina wejẽbo cureriquiroy dapu yero saha bajuri. Sa bajuepegãta tiquiroy camino pehe yatia wahari. Ti dapu catigũ ihñañe, ihña maria wahari ijipihtiyequina ahri yehpa cãna. Sa ihña maria wahaye, nucu cãnoye ño peori. Sa ye tiquiroy yequina wahari masa. ⁴ Sa ye nucu cãnoye pinono tiquiroy tutuayere tiquiroy ohogũ ihñañe masa pehe tiquiroyre pinonore dusepe curi mehna quehe sa, ño peori. Sa ye nucu cãno gãhãre dusepe curi mehna quehe sa, tiquiroyre ño peori. Sa ño peoye ohõ saha nidi:

—Ne apequiro m̄h̄na yero saha tutuariquiro mariedare. Apequiro m̄h̄re ne ȳhd̄d̄ca masiedare, ni ño peori masa n̄c̄u cj̄n̄ore.

⁵ Sa yero tiquiro n̄c̄u cj̄no “Tutua ȳhd̄d̄caḡu ijiaja”, tiquiro niepeḡata Coh̄c̄j̄re tiquiro ñano yahuducuepeḡata sa t̄hotu c̄r̄di Coh̄c̄j̄ pehe. Sa yero cuarenta y dos as̄ri waro tiquiro n̄c̄u cj̄no masare dutinimedi. To punota tiquiro p̄htoro ijiḡu cahmedi Coh̄c̄j̄. ⁶ Sa yero tiquiro Coh̄c̄j̄re ñano yahuducuri. Tiquiro wamene, tiquiro ya w̄h̄re, āhm̄sepu tiquiro ijiro cj̄na ḡh̄re ñano yahuducuri n̄c̄u cj̄no. ⁷ Sa yero Coh̄c̄j̄ yequinare cahme wej̄no tiquinare ȳhd̄d̄cari. Tiquiro sa yepeḡata sa ih̄na c̄r̄di Coh̄c̄j̄. Coh̄c̄j̄ tiquiro sa ye dutieraḡu yeraboya. Sa yero ijipihtiyequina ahri yehpa cj̄na bui p̄htoro ijinimedi n̄c̄u cj̄no. Ijipihtiye cururi cj̄na bui, ijipihtiyequina macari cj̄na bui, yehpari cj̄na bui, ijipihtiye yahuducuyere yahuducuyequina bui p̄htoro ijinimedi tiquiro. ⁸ Sa ye ijipihtiyequina ahri yehpa cj̄na tiquiro n̄c̄u cj̄no poto d̄sepe curi mehna quehe sa tiquiro ño peori. Ahri yehpare Coh̄c̄j̄ tiquiro bajumehneato pano tiquiro yequina ijiatiquinare, sa ijiducuatiquinare tiquina wamene oja oh̄ tuhasahye. Ti tju tiquiro sa oja oh̄ri tju Cordero tiquina wej̄d̄iquiro ya tju ijire. Ti t̄pu tiquina wamene oja oh̄nohedariquina dihita n̄c̄u cj̄n̄ore ño peori.

⁹ Cahmo tina ijire m̄sa. Sa yena t̄hoya. ¹⁰ Ijipihtiyequina masare peresu yenohatiquinare came tiquinare peresu yeeta. Ijipihtiyequina masa ñose wej̄nohatiquinare tiquinare ñose wej̄eta. Tire masina mari Coh̄c̄j̄ yequina ñano ȳhd̄æpenata tiquirore

coh̄ædac̄hna. Sa yena tiquirore wac̄u tutūhna.

¹¹ Came apequiro n̄c̄u cj̄n̄ore ih̄na tja. Yehpa puhiapu ijiriquiro wijiaḡu ih̄na. P̄a saharo oveja sahari yero saha bajuye sahari sahari tiquiro ijiri. Sa yero pinono yero saha yahuducuri. ¹² Sa yero n̄c̄u cj̄no iji m̄htariquiro pehe came ijiriquiro pehere p̄htoro s̄ori. Tiquiro sa p̄htoro s̄onohriquiro pehe ijipihtiye yehpari cj̄n̄are iji m̄htariquirore ño peoḡu yeri. Iji m̄htariquiro n̄c̄u cj̄no tiquina wej̄bo cureriquiro camino yatiriquiro ijiri. ¹³ Sa yero came ijiriquiro n̄c̄u cj̄no tutuaye mehna ye ih̄ori masa tiquina ih̄na mariatore. Sa yero masa tiquina ih̄onop̄u peca pajiri peca āhm̄sepu bora dijia taḡu yeri. ¹⁴ Sa yero iji m̄htariquiro ih̄onop̄u apequiro n̄c̄u cj̄no pehe tutuaye mehna masare mehori “Ahriquiro m̄sa ño peoatiquiro ijire”, nino. Sa yero tiquiro masare mehono, iji m̄htariquiro queoyere masare ye dutiri. Tiquiro iji m̄htariquiro ñoseni p̄i mehna tiquina ñosediquiro ijieperota catiriquiro ijiri. Tiquiro yero saha bajuye queoye ye dutiri apequiro n̄c̄u cj̄no masare. Tiquina sa yeḡu Coh̄c̄j̄ yabieperota sa ih̄na c̄r̄ahye. ¹⁵ Sa yero came ijiriquiro n̄c̄u cj̄no pehe iji m̄htariquiro queoyere catiḡu yeri masare ti queoye dutiatio saha. Sa yero ti queoyere ño peoyequinare wej̄ dutiri masare queoye pehe. ¹⁶ Sa yero ijipihtiyequinare tiquina omocari poto pehe, tiquina w̄h̄do paca ḡh̄re oja oh̄ dutiri n̄c̄u cj̄no came ijiriquiro. Ihyo ijieyequinare, p̄htoare, doeri cj̄ opanare, pejec̄oyequinare, tiquina cahac̄j̄n̄are, cahac̄j̄na ijieyequinare, ijipihtiyequinare tiquina omocarine tiquina w̄h̄do paca ḡh̄re oja oh̄ dutiri. ¹⁷ Tiquiro iji m̄htariquiro n̄c̄u

cjāno tiquiro wamene, tiquiro ya numerore ojoa ohōñequinare ne dú dutierari. Sa yero tiquinare dua dutierari.

¹⁸ Tire quehnoano wacū masiña m̄sa. Tūho masina ijina n̄c̄n̄ cjāno tiquiro ya numerore quehnoano ihña masiña. Ti numero m̄m̄no wame yero saha ijire. Ti numero seis cientos sesenta y seis ijire.

14

Cohācjū tiquiro yūhd̄uoriquina wahma basayere basahye

¹ Came Siō wame tid̄m̄ c̄n̄n̄ bui ducuriquirore Corderore ihñaa. Tiquiro mehna ciento cuarenta y cuatro mil masa ijiri. Tiquina tiquiro ye wamene, tiquiro Pac̄ro ye wame ḡh̄ure tiquina w̄h̄doa pacare tiquina ojoa ohōnohriquina ijiri. ² Tiquinare yāh̄ ihñaḡta ūhm̄sep̄m̄ yahuducuro ca tari. Pajiri peo bisiro saha ap̄o tutuaro bisiro saha bisiro ca tari tiquiro yahuducuye. Sa yero arpa wame tiyere tiquina b̄ua p̄t̄ēno saha bisiro ca tari tiquiro yahuducuye. ³ Top̄m̄ p̄h̄toro dujiro cahap̄m̄ piti-tiario sijoro saha bajuyequina, Jesu yequina p̄h̄toa ḡh̄m̄ ijiri. Sa ye tiquina poto ciento cuarenta y cuatro mil masa ducuri. Top̄m̄ ducuye, wahma basayere basaye nidi. Ti basayere tiquina dihita masidi. Cristo yūhd̄uoriquina dihita ti basayere masidi. Tiquina ahri yehpap̄m̄ ijimediquina tiquiro ne m̄uoriquina ijiri. ⁴ Ne tiquina ihcā tahagā numino mehna ñano yerari. Sa ye Corderore ihña cūñequina ijiye, tiquiro yere sa yeducuyequina ijiri. Sa yero ñañequina mehna ijiyeyequinare tiquiro yūhd̄uotiquinare nedi Cohācjū pehe. Sa tiquiro yūhd̄uoriquina ijiye, Cohācjū yequina ijiatiquina, Cordero yequina ijiatiquina ḡh̄m̄ iji m̄h̄tariquina ijiri. ⁵ Sa ye tiquina mehna cjēna ne ihcāquiro

ni mehoriquiro mariedare. Sa ye Cohācjū tiquiro tūhotugū ñañe marieñequina ijiri tiquina.

Ihtiaro angele yahuducu dijioahye

⁶ Came ūhm̄sep̄m̄ w̄riquirore angelre ihñaa. Tiquiro ahri yehpa cjēnare, ijipihtiyē cururi cjēnare, ijipihtiyē yahuducuyere yahuducuyequinare, ijipihtiyē yehpari cjēnare, quehnoañe buheyere yahuatiquiro ijiri. Ti buhēye ne comesaeraye, sa ijiducure. ⁷ Sa yero angel sañuducuro ohō saha ni yahuducu dijiori:

—Cohācjūre cueya. “Tutua yūhd̄uaḡm̄, quehnoa yūhd̄uaḡm̄ ijire”, ñña tiquirore. Yojo p̄re masare tiquiro buhiri dahreati pje ijiro nine. Tiquiro ūhm̄sere, ahri yehpare, pajiri mare, m̄ari pohteri ḡh̄ure yeriquiro ijire. Sa yena tiquirore d̄asepe curi mehna quehe sa, ño peoya, ni sañuducuri angel.

⁸ Tiquiro sa nidi bato apequiro angel ūhm̄sep̄m̄ w̄riquiro ohō saha ni yahuducu dijiori:

—Tiquinare cohā c̄h̄ri. Pajiri maca Babilonia wame tiri maca cjēnare cohā c̄h̄ri Cohācjū. Tiquina tiquiro cohāriquina pehe ijipihtiyequina apequinare ñano yegū yeri. Queheyequina vinore tiquina tutuaro cahmeno saha tiquina ñañene tutuaro cahmeñe, Babilonia cjēnare ihña cūri. Sa yero Cohācjū tiquinare tutuaro buhiri dahreri, ni yahuducu dijiori apequiro angel.

⁹⁻¹⁰ Tiquina p̄aro angele tiquina sa nidi bato apequiro angel tiquina bato w̄riquiro ohō saha ni yahuducu dijiori:

—Ijipihtiyequina n̄c̄n̄ cjānore ño peoyequinare, tiquiro queoyere ño peoyequinare, tiquina w̄h̄doa pacare, tiquina omocarine tiquiro wamene ojoa ohōnohriquina ḡh̄ure buhiri dahrerota Cohācjū. Tiquina

mehna usuaro, tiquina pūritare tutuaro waro buhiri dahreducurota Cohācjū. Nūca cjūnore ño peoyequina ijipihtiyequina pecapū wahaeta. Topū tutuaro purīnota tiquinare peca mehna, azufre wame tiye mehna tiquina wijiāri peca mehna. Quehnoañequina angele, Cordero gāhū tiquina ihñonopū ñano yūhdūeta tiquina. ¹¹ Ti peca sa ohmeo tiducurota. Ne yatisi. Tiquinare sa purīducugū yere. Ijipihtiyequina nūca cjūno poto dūsepe curi mehna quehe sa, ño peoyequinare sa purīducurota. Decoripe, ñaminipe sa purīducucāhnota. Tiquiro queoyere ño peoyequina, tiquiro wamene ojoa ohñohriquina gāhū sata ñano yūhdūeta, ni yahuducu dijiori angel.

¹² Sa tiquina ñano yūhdūgū ihñana Cohācjū yequina tiquiro dutiyere yena, Jesure cohāedarina ijina, tiquiro yere duhueracāhña. Ñano yūhdūepenata Cohācjū yere cohāedacāhña.

¹³ Came ūhmūsepū yūhūre yahuducuro ca tagū tūhou. Ohō saha nidi yūhūre:

—Ahrīre ojoaya mūhū. Cohācjū yequina tiquirore cohāedarina ijina yojopūre mūsa yariari bato gāhūre bucuena ijire mūsa, ni yahuducu dijiori yūhūre.

Tiquiro sa nidi bato Espīritu Santo pehe ohō saha ni nemori tja:

—Sa tjire. Poto tjire. Tiquina tutuaro tiquina dahrayere duhu, soeta. Ūhmūsepū tiquina wahagū quehnoano tiquina yerire wacūnota Cohācjū. Sa yero tiquina sa yeri wapa tiquinare quehnoano yerota. Sa ye tiquina bucueyequina ijire, ni nemori Espīritu Santo.

Wese cjē oteye dūcare mari bese neno saha Cohācjū tiquiro yequinare bese nenota. Ñañequina pehere sijoro bese docorota

¹⁴ Came ehmeo curua yehseri curuare ihñā. Ti curua bui masano yero saha bajuriquiro dujiri. Tiquiro uru behto pūhtoro pesari behto borore pesari. Sa yero dihi pjī siori pjīne cūori tiquiro. ¹⁵ Came apequiro angel Cohācjū wūhūpū ijiriquiro wijia tari. Sa wijia taro tutuaro sañuducuri ehmeo curua bui dujiriquirore:

—Mūhū dihi pjī mehna wese cjē dūcare ahri yehpa cjē dūcare dūte ne pehoya. Yojopūre tiquiro queori pje esare. Yojopūre dūca neni pje esare, nidi angel.

¹⁶ Tiquiro sa nigū tūhoro tiquiro dihi pjī mehna ahri yehpa cjē dūcare ne dūcari ehmeo curua bui dujiriquiro.

¹⁷ Came apequiro angel gāhū Cohācjū wūhūpū ijiriquiro wijia tari. Tiquiro gāhū dihi pjī siori pjīne cūori. ¹⁸ Sa yero apequiro angel altar cahapū ijiriquiro wijia tari. Tiquiro pehe altar cjā pecare ihñā ihboriquiro ijiri. Sa wijia taro dihi pjī siori pjīne cūoriquirore sañuducuri:

—Mūhū dihi pjī mehna ahri yehpapū ijiri wese, ūhse wese cjē dūcare neña. Ūhse pehe ñi tuhasari, ni sañuducuri.

¹⁹ Tiquiro sa nigū tūhoro angel tiquiro ya pjī dihi pjī mehna ahri yehpa cjē ūhse tōhorine yūhūre nedi. Tiquiro sa yeri bato ti tōhorine ūhse tōhorine tiquiro ñatihātopū cohāri. Tiquiro sa cohāriro saha Cohācjū tiquirore cahmeeñequinare tutuaro usuaro, cohānota. ²⁰ Ti maca dūhtū cahapū tiquina ñatihātopū ti ūhse tōhorine ñatihāri. Topū tiquina ñatihāgū dii wijiari. Dii ma yero saha ijiri. Tres cientos kilómetro yoari ma, ihcā metro quehnoano ape metro deco ūhcūari ma ijiri.

15

Masa tiquina ñano yūhdūatire angele cū bato tiahye masare

¹ Came aħmusepũ sijoro saha ijirore ihñau. Tire ihñañe masa ihña maria wahaga. Ahri yehpapure dũhse wahatore marine ihñori. Sa yero ti ihyo waro ijierare. Ohõ saha ihñau: Siete angele ijiri. Cohãcjũ usuaro, siete tahari maşare buhiri dahre bato tiro taro nidi. Sa ye tiquina siete angele pehe buhiri dahre dutiro tiquiro cũatiquina ijiri.

² Angelere yũhũ ihñari bato pajiri mare quehnoano aco sitiri ma yero saha ijiri mare ihñau. Ti ma peca mehna ijiri ma ijiri. Sa yegũ nũcu cjanore tiquiro queoye gũhũre yũhdũdcayequinare ihñau. Tiquina tiquiro wamene tiquiro ya numerore cũoyequina ijiri. Tiquina yũhũ ihñagũ pajiri ma aco sitiri ma dũhtũ cahapũ ducuri. Topũ ducuyequina arpa wame tiyere bũa pũtẽñene cãori. Ti bũa pũtẽñe Cohãcjũ tiquiro ohori ijiri. ³ Sa ye Cohãcjũ cahacjãno, Moise ye basayere basaye nidi. Cordero ye basaye gũhũre basaye nidi. Ohõ saha ni basari:

Usã pũhto mũhũ Cohãcjũ tutua yũhdũagũ ijire. Mũhũ yerire ihñana ihña maria wahaja usã. Mũhũ yeri quehnoa yũhdũare. Mũhũ ijipihtiye yehpari cjenã pũhto ijire. Quehnoano ni mehono marieno yeducure mũhũ. Ijipihtiyequina mũhũre cueta. ⁴ Ijipihtiyequina mũhũre “Tutuagũ ijire”, nieta. Mũhũ dihita ñañe mariegũ ijire. Ijipihtiye yehpari cjenã mũhũ cahapũ esaye, dũsepe curi mehna quehe sa, mũhũre ño peoeta. Sata yeeta tiquina ijipihtiyequina queoro mũhũ yerire ihñañe, ni basaye nidi tiquina.

⁵ Came aħmusepũ ihña mũnogũ, Cohãcjũ wũhũ pãori wũhũre ihñau. Topũ Cohãcjũ ijiri tucũ waropũ

Cohãcjũ dutiye tiquiro ojoari pñini utã pñini tiquina ihbori pñini ijiri. ⁶ Ti wũhũre yũhũ ihñagũta siete angele ti wũhũ puhapũ ijiriquina wijia tari. Tiquina Cohãcjũ buhiri dahre dutiro tiquiro cũatiquina ijiri. Tiquinape tiquina buhiri dahreatire cãori tiquina angele. Quehnoañe suhti, yehseye suhti sañañequina ijiri. Sa ye tiquina cutiro bui uru cahsero mehna tũã dihoriquina ijiri. ⁷ Ti wũhũpũ ijiriquina tiquina wijia tagũ pĩti-tiaro sijoro saha bajuyequina mehna cjanõ tiquinare siete angelere siete uru parire ohori. Ti pari Cohãcjũ usua tiquiro buhiri dahreati mehna quehnoano wahpari ti pari. Tiquiro Cohãcjũ sa ijiducuriquiro ijire. ⁸ Tiquiro sa ohogũ Cohãcjũ wũhũ puhapũ tiquiro asi siteye mehna tiquiro tutuaye mehna ohmeo ti sehşaa wahari. Sata ohmeo wũhũ wahagũ ne masa ti wũhũre saşã masiedari. Siete angelere Cohãcjũ buhiri dahre dutiro tiquiro cũiro saha masare tiquina buhiri dahre tuhasari bato pari turi ti wũhũpũ saşã masine tja. Tiquiro buhiri dahreato pano saşã masiedari.

Cohãcjũ masare tiquiro buhiri dahreatore yahuahye

16

¹ Came Cohãcjũ wũhũpũ tutuaro yahuducuro ca tari. Siete angelere yahuro nidi:

—Siete paripũ pose tiyere yehpapũ pio sitedoque dijiona wahaya. Yehpa cjenãre Cohãcjũ tiquiro nidiro sahata buhiri dahreya yojopũre, ni yahuducuro ca tari.

² Tiquiro sa nigũ tũhoro iji mũhtariquiro angel tiquiro cãori papũ pose tiyere yehpapũ pio sitedoque dijiori. Tiquiro sa pio sitedoque dijigũ nũcu cjanõ wamene ojoa ohõnohriquina, tiquiro queoyere ño peoriquina

ñano camí tiri. Ti camí tutuaro purídi tiquinare.

³ Tiquiro sa pio siteri bato apequiro angel tja tiquiro c̄ori pap̄u pose tiyere pio sitedoque dijiori tja pajiri map̄u. Tiquiro sa pio sitedoque dijioḡata ti ma dii ma wahari. Yariariquiro dii yero saha ijiri ti dii. Sa wahaḡu ti ma puhiap̄u ijiyequina yaria pihtia wahari.

⁴ P̄uaro tiquina sa pio siteri bato apequiro angel tja tiquiro c̄ori pap̄u pose tiyere pio sitedoque dijiori tja márip̄u, ti mári pohterip̄u ḡah̄are. Tiquiro sa pio sitedoque dijioḡu mári dii mári dihita wahari.

⁵ Sa wahaḡu ihñano apequiro angel márine cohteriquiro oh̄o saha nidi: Cohācj̄u m̄uh̄u ñañe marieḡu ijire.

Yojop̄u ḡah̄are sa ijiducuḡu ijire m̄uh̄u. Panop̄u ḡah̄are sa ijiducue tiri m̄uh̄u. Sa yeḡu masa tiquina ñano yeḡu ihñaḡu queoro buhiri dahreri m̄uh̄u tiquinare. Dii márine yeḡu quehnoano yeri m̄uh̄u. ⁶ Nuc̄u cj̄ano yequina pehe m̄uh̄u yequinare wejēñe, dii cohāḡ̄u yeri. M̄uh̄u yere yahuyequina ḡah̄are wejēñe, dii cohāḡ̄u yeri. Tiquina sa wejēdi buhiri mári dii mári wahari. Sa ye tiquinare diire m̄uh̄u sa sihniḡu yeḡu quehnoar̄ine. Sata m̄uh̄u buhiri dahreḡu tiquina ye buhiri ijire, nidi márine cohteriquiro angel.

⁷ Tiquiro sa nidi bato altarp̄u yahuducuro ca tari:

—Sa tjire. Cohācj̄u us̄a puhto tutua ȳhd̄uaḡu ijire m̄uh̄u. Ni mehono marieno, queoro masare bese, buhiri dahrere m̄uh̄u, ni yahuducuro ca tari.

⁸ Ihtiaro angele tiquina pio siteri bato apequiro angel tiquiro c̄ori pap̄u pose tiyere pio sitedoque dijiori tja as̄u deco cj̄ano bui. Tiquiro sa pio sitedoque dijioḡata as̄are masare tutuaro asiḡu yeri

Cohācj̄u. ⁹ Sa yero as̄u deco cj̄ano masare tutuaro asiri. Sa ye Cohācj̄u tiquinare tiquiro buhiri dahre dutiḡu masiñe, tiquirore ñano yahuducuri masa. Sa ñano ȳhd̄uapeta tiquina ñañe yerire ne buj̄ua witierari. Sa ye duhuerari. Cohācj̄ure “Tutuaḡu ijire”, ni ño peo duerari.

¹⁰ Pititiaro angele tiquina pio siteri bato apequiro angel tja tiquiro c̄ori pap̄u pose tiyere pio sitedoque dijiori tja nuc̄u cj̄ano tiquiro dujiro bui. Puhtoro dujiro ijiri tiquiro dujiro. Tiquiro sa pio siteri bato tiquiro yequina tiquina ijiri yehpap̄u nahitiaa wahari. Sa ye tiquiro yequina masa ñano puriḡu bahque dihori. ¹¹ Tiquinare ñano pur̄tepeḡata ñano camí tiepeta, ne tiquina ñañe yerire buj̄ua witierari. Sa ye tire duhuerari. Sa ye Cohācj̄u tiquinare tiquiro camí dahreḡu masiñe tiquirore ah̄m̄use cj̄anore ñano yahuducuri.

¹² Ihc̄a omopequina angele tiquina pio siteri bato apequiro angel tja tiquiro c̄ori pap̄u pose tiyere pio sitedoque dijiori tja Eufrates wame tiri ma pajiri map̄u. Tiquiro sa pio sitedoque dijioḡata ti ma sihbi quehea wahari. As̄u m̄uja taro cj̄ena puhtoa yequina masa mehna ti mare tiquina peh̄a tatore sa yeri.

¹³ Came ihtiaro wat̄iare taharoc̄ua yero saha bajuyequinare ihñau. Ihc̄aquirop̄u pinono puhiap̄u ijiri quiro tiquiro d̄userop̄u wijia tari. Apequiro wat̄ino nuc̄u cj̄ano d̄userop̄u wijia tari. Apequiro wat̄ino “Cohācj̄u yere yahu m̄uh̄taḡu ijiaja”, ni mehori quiro d̄userop̄u wijia tari.

¹⁴ Sa ye tiquina ihtiaro wat̄ia tutuaye mehna yeyequina ijiri. Ijipih̄tiro cj̄ena puhtoare cahmecoaḡu yeri tiquina cahme wejē dutiye tehe. Tiquina sa cahme wejēati deco Cohācj̄u tutua ȳhd̄uari quiro

ijipihtiequinare tiquiro dutiati deco, pihtiati deco ijire.

¹⁵ Ohō saha nidi Jesu: “Ihñaña masa. Yaqueriquiro wacūeno mehna tiquiro yaquero ahtaro saha yuhū gūhū wacūeno mehna ahtaŋtja. Yuhū ahtatore quehnoano cohteriquiro bucueriquiro ijirota. Tiquiro ye suhtire quehnoano quehnoyuriquiro yero saha yeere quehnoano yeriquiro ijire bucueriquiro. Sa yeriquiro ijiro yuhū ahtaḡ suhti marieniquiro tiquiro bue tiberiro saha bue tisi tiquiro”, nidi Jesu.

¹⁶ Came ihtiaro watia yehpari cĵena pūhtoare cahmecoagū yeri tiquinare. Tiquina cahmecoano Hebreo ye mehna “Armagedon”, wame tiri.

¹⁷ Seis angele tiquina pio siteri bato apequiro angel tja tiquiro cūori papū pose tiyere ehmeo cururi cahapū pio sitedoque dijiori tja. Tiquiro sa pio sitedoque dijiori bato pūhtoro dujiropū Cohācĵū wūhūpū tiquiro dujiropū tutuaro yahuducuro ca tari:

—To punota ijiaga, nino ca tari.

¹⁸ Tiquiro sa nigūta mia sitedoqueo, upo pa maa, sijoro saha ijiro bisi maa, cuaro yehpa űuhmidi. Ahri yehpapū masa tiquina iji dūcari bato ne sa űano yehpa űuhmieda tiri. Apeye űuhmiñe yūhdūoro cuaro yehpa űuhmidi.

¹⁹ Sa űuhmigū pajiri macare ihtia maha yihti maa wahari. Sa ye buĵūye macari ahri yehpapū ijiye macari sehte dijiaa wahari. Sa yero Babilonia wame tiri maca pajiri maca cĵenare wacūri Cohācĵū tiquinare buhiri dahrero taro. Tiquina űañene yeri buhiri tiquina mehna tutuaro usuari. Sa usuaro tiquinare tutuaro buhiri dahreri.

²⁰ Tiquiro sa yegū ijipihtieye nūcūpo, cūnū cĵū gūhū cohō pihtia wahari. Sa ye ne mariedare. ²¹ Sa ye buĵūye paca aco paca yūűūaye paca

yehpapū masa bui bora dijia tari. Ijipihtieye paca aco paca cuarenta kilo nūcūñe paca ijiri. Tiquina bui ti paca sa bora dijia tagū Cohācĵū masare tiquiro tutuaro buhiri dahregū masiñe űano yahuducuri masa Cohācĵüre.

17

Ūmūa mehna űano yeducuricorore űa yūhdūaro yericorore buhiri dahre dutirota

¹ Came siete pari cūoyequina angele mehna cĵāno yuhū cahapū wihiro ohō saha nidi yūhūre:

—Ihñagū ahtaya. Peye mārī bui dujiricorore ūmūa mehna űano yeducuricorore űa yūhdūaro yericorore Cohācĵū tiquiro buhiri dahreatire ihñagū ahtaya mūhū.

² Ahri yehpa cĵēna pūhtoa ticoro mehna tiquina űano yeboro saha ticoro yero saha yeri. Cohācĵū ye pehere cahmedari. Ahri yehpa cĵēnare ticoro quehegū yeboro saha tiquina mehna ticoro űano yeboro saha ticoro masare űañene tutuaro cahmegū yeri. Sa yero űañene yegū yeri masare, ni yahuri angel yūhūre.

³ Tiquiro sa nidi bato Espiritu Santo pehe yūhūre ihñori: Angel pehe masa marienopū neari yūhūre. Topū numinore ihñau. Ticoro nūcū cĵāno sohāriquiro bui pesaricoro ijiri. Nūcū cĵāno pehe tiquiro pagūpū peye wame tiquina ojoa ohōnohriquiro ijiri. Ti wame űañe wame Cohācĵū tiquiro ihña yabiye wame ijiri. Sa yero siete dapu paca tiriquiro, diez sahari tiriquiro ijiri nūcū cĵāno. ⁴ Sa yero numino pehe quehnoano yahsaye suhti pūhtoa tiquina sañañe suhti saha ijiyere sañaricoro ijiri. Sohāñe suhti gūhūre sañaricoro ijiri. Peye urure, wapa tiye ūtāre, perla pjeri gūhūre ohōri suhtire sañaricoro ijiri ticoro. Sa yero uru pare cūori ticoro. Ti papū pose tiye űañe ticoro yeri jiri. Ūmūa mehna űano yero,

pajiro ñano yeri ticoro. Ti ñañene ihña yabire Cohãcjũ. ⁵ Ticoro wãhdoapũ ticoro wame tiquina ojoa ohõnohricoro ijiri. Ti wamene quehnoano masiedaja mari. Ti wame queoye mehna buheri wame ijire. Ahri ijire ti wame: “Pajiri maca Babilonia wame tiri maca ijire. Ijipihtiye wãana tiye dahpoto cjõno, ña yãhdũayere yericoro ijire”, ni, ticoro wãhdoapũ tiquina ojoa ohõnohricoro ijiri. ⁶ Sa yero ticoro peyequina Cohãcjũ yequinare wejẽdicoro ticoro ijigũ masii. Queheyere ticoro bucuero saha tiquinare wejẽno, tiquina dii cohãgũ bucueri ticoro. Jesure tiquina cohãedari buhiri ticoro wejẽdi tiquinare. Ticorore ihñagũ, ihña maria wahaũ.

⁷ —¿Dũhsegũ mũhũ ihña maria wahajari? nidi angel yũhũre.

Sa nino yũhũre ohõ saha ni nemori:

—Mũhũ masiedarire mũhũre yahutja. Numinore mũhũre yahutja. Ticoro pesariquiro gũhũre yahutja. Tiquiro nũcũ cjũno ijiri. Sa yero siete dapu paca tiriquiro, diez sahari tiriquiro ijiri. ⁸ Tiquiro panopũ ijiriquiro ijiri. Yojoþũre mariedare tiquiro. Came tiquiro hũcũãri copeþũ ijiriquiro wijia tarota. Tiquiro sa wijia tari bato pecapũ waharota. Ahri yehpa cjẽna tiquirore ihña maria, ño peori tiquirore. Ahri yehpa ijiato pano Cohãcjũ tiquiro yequina ijiatiquinare sa ijiducuatiquinare tiquina wamene ojoa ohõahye. Tiquiro ojoa ohõnohedariquina ijiri nũcũ cjũnore ño peoyequina. Tiquiro pehe panopũ ijiri. Yojoþũ pehere mariedare. Camerũ pari turi bajarota. Sa ye tiquiro bajuagũ ihñañe masa tiquirore ihña maria wahaeta.

⁹ Yojoþũre yũhũ yahuatire masi duana, quehnoano tãhonata mũsa. Sa yena tũho masina ijiya. Nũcũ cjũno dapu paca

siete dapu paca siete cũnũ cju ijire, mari queoye mehna buhegũ. Ti cũnũ cju buipũ pesare ticoro mũmũ mehna ñano yeducuricoro. ¹⁰ Ti dapu paca siete pũthoa yero saha ijire, mari queoye mehna buhegũ. Peyequina masa pũthoa ijire. Ihcã omopequina pũthoare cohã tuhasari. Apequiro tiquina bato ijiriquiro pũthoro ijire yojoþũre. Apequiro pehe came pũthoro sajãnota. Sa sajãno mehenogã pũthoro ijirota tiquiro. ¹¹ Sa yero nũcũ cjũno sohãriquiro panopũ iji mũhtariquiro, yojoþũre marieniquiro tiquina siete pũthoa bato pũthoro ijirota. Siete pũthoa mehna cjũno ijire. Came pecapũ waharota.

¹² Nũcũ cjũno sahari diez sahari diez pũthoa yero saha ijire, mari queoye mehna buhegũ. Peyequina masa pũthoa ijire. Tiquina pũthoa sajãedare yojoþũ. Camerũ pũthoa sajãñe mehenogã pũthoa ijieta. Yoari pje iji dutisi tiquinare. Sa pũthoa ijiye nũcũ cjũno mehna pũthoa ijieta. ¹³ Tiquina diez pũthoa ihcãno saha tãhotuyequina ijire. Sa ijiye tiquina nũcũ cjũnore tiquina ye yehpari cjẽna pũthoro sõeta. ¹⁴ Sa ye Cordero mehna cahme wejẽeta. Tiquina sa cahme wejẽpegũta Cordero tiquiro beseriquina mehna tiquirore ne cohãẽñequina mehna tiquinare yãhdũdũcaeta. Tiquiro ijipihtiyequina apequina pũthoa bui pũthoro ijire. Sa yero tiquinare yãhdũdũcarota, nidi angel yũhũre.

¹⁵ Ahrire yũhũre yahu nemori angel:

—Ūmũa mehna ñano yeducuricoro mări bui dujiri. Ti mări ahri yero saha ijire mari queoye mehna buhegũ: Ijipihtiye yehpari cjẽna, peye cururi cjẽna, peye yahuducuyere yahuducuyequina yero saha ijire ti mări. ¹⁶ Nũcũ cjũno, diez pũthoa gũhũ mũmũa mehna ñano yeducuricorore ihña

yabieta. Tiquina diez pũtoa nũcu cjãno mehna ticoro yere ehma peho, suhti mariedicoro cohãeta ticorore. Sa ye ticoro pagũre ihyæta. Tiquina sa yeri bato ticorore ʋjũa pehoeta. ¹⁷ Tiquina diez pũtoa ihcãno saha tũhotuye, nũcu cjãnore tiquina ye yehpari cjẽna pũtoro sũeta. Tiquinare sa yegũ yeri Cohãcjũ, tiquiro cahmeno saha yero taro. Sa yero nũcu cjũno pehe pũtoro ijirota. Ijipihtiye Cohãcjũ panopũ tiquiro yahuriro sahata tiquiro yeri bato nũcu cjãnore cohãnota. ¹⁸ Ticoro mũhu ihũaricoro mehna ohõ saha ni queoye mehna buhere: Ticoro pajiri maca Babilonia wame tiri maca yero saha ijire. Ijipihtiyequina apequina pũtoa bui ijire ti maca cjẽna, nidi angel yahũre.

18

Babilonia wame tiri maca tiquiro cohãri maca ijire

¹ Came apequiro angel ʋhmũsepũ dijia tariquirore ihũau. Tiquiro pũtoro waro ijiri. Sa yero tiquiro asi siteye ijipihtiropũ quehnoano buhrio sehãa wahari. ² Tiquiro sa dijiri bato tutuaro saũducu yahuri:

—Cohãri jiri. Babilonia wame tiri maca pajiri maca cjẽnare cohãri jiri. Yojoꝑũre watĩa, peyequina ñaũequina pagũ bajueyequina gũhu ti macapũ ijiiye nine. Ñaũequina boro minicjũa pari gũhu ti macapũ ijiiye nine. Tiquina minicjũa masa tiquina ihũa yabiyequina ijiri. ³ Ijipihtiye yehpari cjẽna ti maca cjẽnare ñaũequinare ihũa cũũe, tiquina gũhu ñano yeri. Sa ye ahri yehpari cjẽna pũtoa ti maca cjẽna numia mehna ñano yeri. Ticoro sa ʋmũa mehna ñano yeducuricoro ijiro wapa tiyere dũe tiri. Pajiro ticoro sa dũgũ ahri yehpa cjẽna doeri cjẽ duayequina pajiro wapatari, ni yahuri angel.

⁴ Came pari turi ʋhmũsepũ yahuducuro ca tari. Ohõ saha nidi:

—Yeequina, ahricoro ʋmũa mehna ñano yeducuricoro mehna ijieracãhũa mũsa. Ticoro mehna mũsa ijigũ mũsa gũhũre buhiri dahrerota. Sa yena ticoro ñano yeyere ihũa cũedacãhũa. ⁵ Ticoro ñano yeri peye ijire. Ticoro ñano yerire pari tju mari duhu peo mũogũ ti tju pehe ʋhmũsepũ wahã sa cãboaga. Sa ye ticoro ñano yeri peye ijire. Sa yero ticoro ñano yerire wacũre Cohãcjũ. Sa wacũno ticorore buhiri dahre dutirota. ⁶ Ticoro tutuaro tiquiro buhiri dahrenohaticoro ijiaho. Masare ticoro ñano yegũ yeriro saha ticoro gũhũre ñano yahdũgũ yeahro. Masare ticoro sa ñano wahagũ yeriro saha ti yahduoro ticorore ñano buhiri dahreahro. ⁷ Ticoro “Quehnoago ijiaja”, ni tũhotumedi. Sa ni tũhoturo, wapa bujũyere pajiro cũori ticoro. Ti wapa bujũyere pajiro ticoro cũoro punota ticorore pajiro ñano yahdũgũ yeahro. To punota ticorore bujũa witi gũ yeahro. Ticoro basi ohõ saha ni tũhotumene. “Ohõpũ dutigo dujiaja. Wape wiho ijieraja. Sa yego ne ñano yahdũsi yũhu”, ni tũhotumene ticoro. ⁸ Sa ni tũhoturicoro ijigũ wacũeno mehna ticorore buhiri dahrerota. Ticoro dohati, yariariquinare yahco uti, ʋjũa ahbarota. Sa yero ticorore ʋjũa borota. Mũsa pũtoro Cohãcjũ ticorore buhiri dahre dutiriquiro tutua yahdũariquiro ijire. Sa yero sa yũhu nidiro saha ticorore buhiri dahre dutirota, nino ca tari ʋhmũsepũ.

⁹ Sa ye ticoro yero saha ijiri macare Cohãcjũ tiquiro buhiri dahrerri bato ahri yehpa cjẽna pũtoa tutuaro bujũa witi, utieta. Ti maca cjẽna mehna ñano yeyequina ijiri. Ti maca ʋjũgũ ihũaũe utieta tiquina. ¹⁰ Sa ʋjũgũ ihũaũe tiquina pũtoa yoaropũ

ihñadoqueoducueta, “Ŭsã gãhure buhiri dahreari”, niñe. Topu ihñadoqueoducuye ohõ saha nieta:

—Yohou, pejecuori maca ijire, Babilonia. Si maca pajiri maca tutuari maca ijimedi. Wacũeno mehna si macare buhiri dahreari, nieta tiquina.

¹¹ Ijipihtiro cjẽna doeri cjẽ duayequina ti macare ihñañe tutuaro bujua witi utieta. Ti maca pihtigã ihñañe, tiquina ye doeri cjẽne dúyequina mariedagũ ihñañe bujua witieta tiquina. Sa ye utieta. ¹² Tiquina ne cãhtarire urure, platare, wapa bujuye utãre, perla wame tiye paca gãhure dúyequina marisi. Sa ye apeye tiquina ne cãhtarire suhti quehnoañe suhtire, yahsaye suhti puhtoã tiquina sañañe suhti saha ijiye suhtire, seda wame tiye suhtire, sohãñe suhtire dúyequina marisi. Sa ye apeye tiquina ne cãhtarire yucari ehme sitiye yucari dúyequina marisi. Sa ye apeye tiquina ne cãhtarire marfil wame tiye mehna tiquina yerire, wapa bujuye cju mehna tiquina yerire, bronze wame tiye come mehna tiquina yerire, come butiye mehna tiquina yerire, marmol wame tiye mehna tiquina yerire dúyequina ne marisi. ¹³ Sa ye apeye tiquina ne cãhtarire canela wame tiyere tiquina ihyayere ocagũ yeyere, apeye tiquina ihyayere ocagũ yeyere, bueyere, mirra wame tiye ehme sitiye, apeye ehme sitiye dúyequina marisi. Sa ye apeye tiquina ne cãhtarire vinore, uhse ihyaye moreñene, trigore, trigo pjerire, wecuare, corderoare, caballoare, tunuñe cohrore caballoare tiquina wejeye cohrore dúyequina marisi. Cahacjẽnare dú tiquinare cuoyequina gũhu marisi. Masa tiquina ijepegãta tiquinare dúyequina ijimedi. Yojoꝑure marisi. Sa ye bujua witieta doeri cjẽne du-

ayequina. ¹⁴ Sa ye ohõ saha nieta tiquina ti maca cjẽna ijiriquinare:

—Adei, ñabutiario wahayari. Ijipihitiye m̃sa cahĩmedi pihtia wahari. Sa ye ijipihitiye quehnoañe m̃sa cuomedi pihtia wahari. Sa yena tire pari turi bocasi m̃sa, nieta doeri cjẽne duayequina.

¹⁵ Tiquina ti macare doeri cjẽne duaye, pajiro wapatamedi. Sa ye tiquina ti macare yoaropu ihñadoqueoducueta, “Ŭsã gãhure buhiri dahreari”, niñe. Sa ihñadoqueoducuye ti macare tutuaro bujua witi utieta. ¹⁶ Ohõ saha nieta ti macare:

—Adei, pejecuoyequina ijire si maca pajiri maca quehnoari maca cjẽna m̃na. Si maca numino yero saha quehnoañene cuori. Numino pehe quehnoañe suhtire, yahsaye suhti puhtoã tiquina sañañe saha ijiye suhtire, sohãñe suhti gãhure sañari. Sa yero uru, wapa bujuye utã, perla wame tiye paca ohõri suhtire sañari. Sa yeri si maca cjẽna. ¹⁷ Sa ye wacũeno mehna si maca buti pihtia wahari, nieta ti macare.

Sa ye ijipihitiyequina yucasari mehna tiniñequina, ti yucasari opana, tiquina am̃a, apequina pajiri mapu dahra wapatayequina gãhu ti macare yoaropu ihñadoqueoducueta. ¹⁸ Topu ihñadoqueoducuye ti macare to ujugũ ihñañe ohõ saha ni sañuducueta:

—Quehnoañe macari si maca yero saha ijiye macari ne apeye macari mariedare, ni sañuducueta tiquina.

¹⁹ Sa bujua witiyequina ijiye tiquina dapu paca bui dihtare orẽ peoeta. Sa ye tutuaro yahco utiye ohõ saha nieta:

—Adei, pejecuoyequina ijire si maca cjẽna m̃na. Quehnoari maca ijimedi. Ijipihitiye yucasari cuona pajiri mapu tinina ijina si maca cjẽ doeri cjẽ mehna quehnoano wapatami mari. Sa

ye duita si maca cjē buti pihtia wahari, nieta yuc̄sari cjēna.

²⁰ Ti macare tiq̄iuro cohāgū ihñana bucueya m̄sa ʔhm̄se cjāna. Cohācjū yequina, Jesu tiq̄iuro cūrina, tiq̄iuro yere yahu m̄htarina ijipihtina m̄sa bucueya. Ti maca cjēna m̄sare ñano ȳhd̄gū yeri. Tiquina sa yeri buhiri buhiri dahreri Cohācjū. Sa yena bucueya m̄sa.

²¹ Sa yero tutuariquiro angel pajiria ʔtāre ne wahcō, pajiri map̄ doque ñori. Sa doque ñono ohō saha nidi:

—Ahria ʔtā bora ñojoariro saha pajiri maca Babilonia wame tiri maca boraro tutuaro bisirota. Sa borari bato ti macare pari turi ihñasi masa. ²² Ti macare butia wahagū yerota. Sa ye ti macap̄ basayere m̄sa basaducuriro saha ne acaro tisi. Arpa wame tiyere m̄sa b̄a p̄t̄educuriro saha, flauta wame tiye pacare, corneta ḡh̄re m̄sa putiducuriro saha pari turi ti macap̄ acaro tisi. Sa ye ti maca mariedagū pari turi ti macap̄ dahrayequina dahراسi. Sa ye ʔtā mehna trigore m̄sa ña m̄toñe ḡh̄re t̄honohsi. ²³ Ne ti maca buhrio cuñariro saha ne ijisi. Sa ye omoca d̄htena m̄sa bucue yahuducuriro saha pari turi ne acaro tisi. Ti maca cjāna m̄sa doeri cjēne duana, dúna ḡh̄ ʔpequina ȳhd̄oro c̄omedi m̄sa. Sa yena yayia masare ujuayequina yero saha yena ijipihtiro cjēnare mehori m̄sa. M̄sa sa yerire ihñana mariañe, Cohācjū pehere cahmedari masa, nidi tutuariquiro angel.

²⁴ Ti maca cjēna Cohācjū yere yahu m̄htariquinare ʔpequina tiq̄iuro yequina ḡh̄re ijipihtiro cjēnare wejēdi jiri. Tiquina sa wejēdi buhiri buhiri dahreri Cohācjū Babilonia cjēnare.

ihñari bato ʔhm̄sep̄a peyequina masa sañuducue ca tari ȳh̄ t̄hogū. Ohō saha ni sañuducuri:

Aleluya. Cohācjüre quehnoano yahuducuuhna. Cohācjū marine ȳhd̄oriq̄iuro ijire. Tiquirore quehnoano ño peouhna. Tutua ȳhd̄ariq̄iuro ijire tiq̄iuro. ² Mehono marieno queoro masare buhiri dahrere tiq̄iuro. Ñañe buhiri marieñequinare tiquinare buhiri dahrerare. Ñaricorore ʔm̄na mehna ñano yeducuricorore ihña cūñe ijipihtiro cjēna, ahri yehpa cjēna ñano yeri. Ticoro pehere buhiri dahreri Cohācjū. Sa yero tiq̄iuro cahacjēnare ticoro wejēdi buhirire buhiri dahreri tiq̄iuro, ni sañuducue ca tari.

³ Pari turi sañuducue ca tari tja: Aleluya. Cohācjüre quehnoano yahuducuuhna. Ti maca ñari maca tiq̄iuro ʔjūari maca sa ohmeo tiducurota, ni sañuducue ca tari.

⁴ Sa yeye veinticuatro Jesu yequina p̄htoa, pititiaro sijoro saha bajuyequina mehna d̄sepe curi mehna quehe sa, mari Pac̄re tiq̄iuro dujirop̄a dujiriq̄iurore ño peori. Ohō saha ni ño peori tiquina: “Aleluya. Sata yeihna. Mari Pac̄re quehnoano yahuducuuhna,” nidi tiquina. ⁵ Came p̄htoro dujirop̄a ohō saha nino ca tari:

Mari p̄htoro Cohācjüre ño peoya. Tiquiro cahacjāna, tiq̄iurore ño peona, ihyo ijina, p̄htoa ḡh̄ ʔjipihtina m̄sa tiq̄iurore quehnoano yahuducuya, nino ca tari.

Cordero tiq̄iuro omoca d̄hteat̄i deco bose decore yahuahye Ñu

⁶ Came peyequina masa tiquina yahuducugū t̄hou. Sa ye pajiri peo, ʔpo mehna tutuaro bisiro

19

¹ Babilonia d̄hse wahatire ȳh̄

saha yahuducue ca tari yuhũ tãhogũ:

Aleluya. Cohãcjũre quehnoano yahuducuuhna. Tiquiro mari puhtoro pehe puhtoro sajã tuhasari. Tutua yahdũariquiro ijire tiquiro. ⁷⁻⁸ Cordero tiquiro omoca dũhteati pje ijire yojopũre. Tiquiro omoca dũhteaticoro quehnoano tiquina quehno tuhasari-coropũ ijire. Ticorore quehnoari suhtiro wete marieni suhtirore ohori. Ti suhtiro Cohãcjũ yequina quehnoañene tiquina yeri yero saha ijire, mari queoye mehna buhegã. Sa yena ti omoca dũhteati pje ijigũ bucueihna mari. Cohãcjũre “Tutua yahdũariquiro ijire”, niuhna, ni yahuducue ca tari.

⁹ Tiquina sa nidi bato angel ohõ saha nidi yũhare:

—Ahrire ojoa neña: “Cordero tiquiro omoca dũhteri deco bose decore tiquiro pijioriquina bucueyequina ijire”, ni ojoa neña, nidi angel yũhare.

Sa ninota ohõ saha ni nemori:

—Ijirota ijire ahri yuhũ yahuri. Cohãcjũ ye yahuducuye ijire, ni nemori yũhare.

¹⁰ Tiquiro sa nigũ tãhoguta tiquiro caha dũsepe curi mehna quehe sa, tiquirore ño peou tũu nimi. Yuhũ sa yegũ waro ohõ saha nidi tiquiro yũhare:

—Tire yeracãhña. Mũhũ yero saha yuhũ gũhũ Cohãcjũ cahacjãta ijiaja. Mũhũ acaye Jesu yequina ijipihtiyequina tiquiro ye buheyere duhueyequina yero saha yuhũ gũhũ Cohãcjũ cahacjãta ijiaja. Sa yegũ Cohãcjũ pehere dũsepe curi mehna quehe sa, tiquirore ño peoya, nidi angel yũhare.

Cohãcjũ yere yahu mũhtariquina mũna panopũ cjẽna Espĩritu Santo yedohoro mehna ti buheyere Jesu ye buheyere yahuyuahye.

Caballo yehseriquiro bui pesariquirore yahuahye Ñu

¹¹ Came uhmũse parĩ maa wahagũ ihñau. Topũ caballo yehseriquiro ijiri. Tiquiro bui pesariquiro ohõ saha wame tiri: Tiquiro nidiro sahata yeriquiro poto yeriquiro wame tiri tiquiro. Queoro masare dutiriquiro ijiro, tiquirore ihña tuhtiyequina mehna cahme wejẽne. ¹² Tiquiro caperi peca pohna yero saha ijiri. Sa yero tiquiro dapupũ peye puhtoa pesaye behtori ijiri. Sa yero tiquiro pagapũ wame ojoa ohõnohriquiro ijiri. Ti wamene tiquiro dihita masidi. Apequina masiedari. ¹³ Tiquiro sañari suhtiro yoari suhtiro dii wahñari suhtiro ijiri. Tiquiro ohõ saha wame tiri: Cohãcjũ ye yahuducuyere yahuriquiro wame tiri tiquiro. ¹⁴ Sa ye tiquiro yequina surara uhmũse cjẽna tiquirore nũnũ tãri. Yehseyequina caballo bui pesayequina quehnoañe yehseye suhtire, wete marieñe suhtire sañariquina ijiri. ¹⁵ Tiquiro dũseropũ ñoseni pjĩne siori pjĩne cuhñuri. Ti pjĩ ijipihtiye yehpari cjẽnare tiquiro yahdũdũcati pjĩ ijiri. Sa yero tiquiro tutuaye mehna tiquiro dutigũ ne ihcãquiro tiquirore yahdũdũcaro cũsi. Cohãcjũ ijipihtiye yehpari cjẽna mehna usuare. Tiquiro sa usuagũ caballo bui pesariquiro tiquinare tutuaro buhiri dahrerota. ¹⁶ Tiquiro suhtiropũ, tiquiro ñecu gũhare ahri wamene ojoa ohõri jiri: “Ijipihtiyequina apequina puhtoa bui puhtoro”, ni ojoa ohõri jiri.

¹⁷ Came asũ asiropũ ducuriquirore angelre ihñau. Ijipihtiyequina uhmũsepu wũyequina yuca

parire sañuducu m̄ori tiquiro. Ohõ saha ni tutuaro sañuducu m̄ori;

—Cahmecoana ahtaya. Cohãcjũ tiquiro bose decop̄u ihyana ahtaya. ¹⁸ Peye yehpari cjẽna p̄htoare, surara p̄htoare, surara parire, caballoare, tiquina bui pesayequinare, ijipihitiyequina apequina masare, cahacjẽnare, cahacjẽna ijieyequinare, apequina p̄htoare, ihyo ijieyequinare tiquina ijipihitiyequina tiquina paḡari ijjirire ihyana ahtaya, nidi angel yucaare.

¹⁹ Came n̄cu cjãnore, ahri yehpa cjẽna p̄htoa tiquina yequina surara pari ḡh̄are ihñau. Caballo bui pesariquiro mehna tiquiro yequina surara pari mehna cahme wejẽne tehe cahmecoari tiquina. ²⁰ Tiquina sa cahme wejẽgũ caballo bui pesariquiro n̄cu cjãnore peresu yeri. Apequiro “Cohãcjũ yere yahu m̄htaḡu ijiaja”, ni mehoriquiro ḡh̄are peresu yeri. Tiquiro ni mehoriquiro pehe n̄cu cjãno tiquiro ihñonop̄u tutuaye mehna ye ihñoriquiro ijiri. Tiquiro sa ye ihñori mehna n̄cu cjãno wamene wahñañequinare tiquiro queoyere ño peoyequinare ni mehori “Ahri Cohãcjũ ye ijire”, nino. Tiquina p̄arore tiquiro peresu yeri bato tiquinare catiyequinareta pecap̄u cohãri. Ti peca pajiri ma yero saha pajiri peca azufre mehna ñjãri peca ijiri. ²¹ Sa yero d̄hsariquinare tiquina yequina surara parire ñoseni pjĩ mehna tiquiro d̄aserop̄u ijiri pjĩ mehna wejẽdi caballo bui pesariquiro pehe. Sa tiquiro wejẽdi bato yuca pari tiquina paḡari ijjirire ihyaye, yapi ȳhd̄aa wahari.

20

Mil c̄hmari waro Cristo tiquiro yequina mehna masare dutirota

¹ Came apequiro angel ãhm̄sep̄u tiquiro dijia tagũ ihñau.

Ëhcãri cope cjã sawire, pajiri da, come da ḡh̄are c̄ori tiquiro.

² Sa dijia wihiro pinonore ñehedi tiquiro. Tiquiro pinono panop̄u pinono saha paḡu tiriquire ijiro, watĩno Satana wame tiriquire ijiri. Tiquirore ñeheno tiquirore d̄h̄teri mil c̄hmari waro peresu yero taro. ³ Sa d̄hte tuhasa, ãhcãri copep̄u cohãri tiquirore ahri yehpari cjẽnare mil c̄hmari waro tiquiro “Mehoari”, nino. Sa cohã tuhasaro ti copere biha, piha ñehe cãri. Sa yero mil c̄hmari bato pari turi meheñe decorigã tiquirore wiorĩnota.

⁴ Came p̄htoa dujiyere ihñau. Ti dujiyep̄u dujiyequina ḡh̄are ihñau. Tiquinare masare tiquina beseatore ñañene yeyequinare tiquina buhiri dahreatore c̄uri Cristo. Apequina ḡh̄are ihñau. Tiquina pehe Jesu yere Cohãcjũ yere tiquina yahuri buhiri tiquina dapu pacare d̄te cohãnohriquina ijiri. N̄cu cjãnore tiquiro queoye ḡh̄are d̄asepe curi mehna quehe sa ño peerari. Sa ye tiquina w̄h̄doa pacare tiquina omocari ḡh̄are tiquiro wamene oja ohõ dutierari tiquina. Sa ye apequina tiquinare wejẽdi bato masaa wahari tja. Masari tiquina mil c̄hmari waro Cristo mehna p̄htoa ijieye tehe. ⁵ Apequina Cristo yequina yariariquina m̄na masaedarĩdi. Tiquina wejẽdiquina tiquina masari bato mil c̄hmari p̄htoa tiquina ijiri bato apequina ḡh̄u masaa wahaeta. Sa ye tiquina wejẽdiquina m̄na Cristo yequina tiquiro bato masa m̄htañequina ijiri. ⁶ Tiquiro maso m̄htariquina pehe tutuaro bucueyequina ijietã. Ñañe marieñequina ijietã tiquina. Sa ye pecap̄u wahasi tiquina. Masa pecap̄u wahaye, pari turi tiquina yariaro saha wahare. Sa ye tiquina pecap̄u wahaerare. Masa m̄htariquina Cohãcjũ, Cristo

yequina pahia ijjeta tiquina. Sa ye mil cūhmari waro Cristo mehna masa pūhtoa ijjeta.

⁷ Mil cūhmari bato Satanare peresupū ijiriquirore wiorota. ⁸ Tiquirore sa wiori bato ahri yehpa cjenare mehono waharota tiquiro. Gog wame tiyequinare, Magog wame tiyequina gūhure mehono waharota. Sa ye tiquina tiquiro mehoñene tūhoye, tiquina yequina surara parire cahme-coaeta cahme wejēne tehe. Surara pari peyequina ijjeta. Pajiri ma cje padū pjeri peye ti ijiro saha peyequina surara ijjeta.

⁹ Sa ye ahri yehpapūre waha siteye, Cohācjū yequina tiquina ijiri macare Cohācjū tiquiro cahīdi macare majare behtoa cahmotāeta. Tiquina sa cahmotari bato Cohācjū tiquinare ūhmūse cja peca mehna ūjūadoque dijiorota. ¹⁰ Sa wahari bato watīnore tiquinare mehoriurore pecapū cohānota. Ti peca pajiri ma yero saha ijiri peca azufre mehna ūjūri peca ijiri. Topū nūcū cjunore, “Cohācjū yere yahu māhtagū ijiaja”, ni mehoriurore gūhure cohā tuhasari. Topū tiquina ijigū deco, ūamipū gūhure sa ūano purīducurota tiquinare.

Cohācjū masare buhiri dahre bato tire

¹¹ Came pajiro dujiore quehnoano yehserore pūhthora dujiore ihñau. Ti dujiro bui dujiriquiro gūhure ihñau. Ahri yehpa cjenā gūhū ūhmūse cjenā gūhū tiquirore cueye, duhti oma cāa wahari. Sa duhtiepetā tiquirore duhtie cūedari. ¹² Sa yegū pūhthora poto yariariquina mūna tiquina ducugū ihñau. Tiquina ihyo ijieyequina, pūhthoa ijiriquina gūhū ijiri. Topū tiquina ducugū oja ohōñe tjurire pōori. Ti tjuri masa tiquina yerire tiquina oja ohōñe tjuri ijiri. Sa yero beseriquiro ti tjurire

ihñā tuhasa tiquina yerire masidi. Tire masino yariariquinare beseri ūñequina, quehnoañequina gūhure. Came ape tju gūhure pōori. Ti tju Cohācjū mehna sa ijiducuatiquinare tiquina wamene oja ohōri tju ijiri. ¹³ Came pajiri mapū, diapū gūhure yaria dijariquina wahcā mūjaa wahari. Sa ye yehpa puhapū ijieyequina, yariariquina tiquina ijirōpū ijieyequina gūhū mūjaa wahari. Tiquina sa mūja sagū topū dujiriquiro tiquina yerire masi pehoro, tiquinare beseri ūñequina, quehnoañequina gūhure. ¹⁴ Came yariarore, yariariquina tiquina ijiro gūhure cohā cāhri Cohācjū pari turi mari yariarore. Pecapū cohā cāhri. Ti peca pajiri ma yero saha ijiri peca pajiri peca ijiri. Pecapū wahayequina pehe pari turi yariaro saha wahare. ¹⁵ Sa yero sa ijiducuatiquina tiquina wamene Cohācjū tiquiro oja ohōri tjupū ijipihtieyequina tiquina wamene oja ohōmehneñequina pehere pecapū cohāri tiquiro.

21

Ūhmūsepū, ahri yehpa gūhure wahmare comesarota Cohācjū

¹ Came ūhmūsepū, ahri yehpa gūhure wahmare tiquiro comesarire ihñau. Ūhmūsepū iji māhtari, yehpapū iji māhtari, pajiri mapū iji māhtari gūhū pihtia wahari. Mariedari. ² Sa yegū yūhū ūñu quehnoari macare, wahma macare Jerusalēne ihñau. Ti maca ūhmūsepū Cohācjū cahapū dijia tagū ihñau. Omoca dūhteaticorore quehnoañe suhti mehna wahma sūore omoca dūhteatiquirore bucuegū yero taro. Sata ti macare quehnoyuri jiri Cohācjū, tiquiro yequinare bucuegū yero taro. ³ Tire yūhū ihñari bato pūhthora dujiropū tiquiro sañuducugū tūhou:

—Ihñaña. Yojoꝑure masa wa-toaꝑu ijiro nine Cohãcjã. Tiquina mehna ijirota tiquiro. Sa ye tiquiro yequina ijietia tiquina. Sa yero Cohãcjã tiquiro basi tiquina mehna cjãno ijiro, tiquina yaquiro Cohãcjã ijirota. ⁴ Sa yero sa bucueducugã yerota tiquiro tiquinare. Sa ye pari turi bujua witisu tiquina. Sa ye ne pari turi yariasi tiquina. Ne ñano jeripohna tiye, utiye, puriñe gãhu marisi tiquinare. Ahri ijipihtiye panopu cjẽ ijiri pihtia waharota, ni sañuducuro ca tari.

⁵ Came puhtoro dujiropu dujiriquiro ohõ saha nidi:

—Ihñaña. Ijipihtiyere wahma comesagã yeitja, nidi.

Tiquiro sa nidi bato yuhure ohõ saha nidi tja:

—Ahri yuhu niñene ojoa neña. Yuhu niñe ijirota ijire. Sa yero yuhu nidiro sahata sa waharota. Sa yegu yuhu niñene ojoa neña, nidi yuhure.

⁶ Came ohõ saha nidi tja yuhure:

—To punota ijiaga. Yuhu ijipihtiyere bajumehnedigu ijiaja. Sa yegu ijipihtiyere pihtigã yeacju ijiaja. Aco woyequina tutuaro tiquina acore cahmeno saha yuhu cahapu ahta duayequina yuhure cahmeeta. Sa ye yuhure yuhtieta. Yuhu catigã yeye aco yero saha ijigu ijiaja. Yuhure cahmeñequinare yuhu mehna sa ijiducugã yeitja tiquinare. Tiquina esa tuharo ye dutiro marieno, yuhu tutuaye mehna yuhu mehna sa ijiducugã yeitja.

⁷ Ijipihtiyequina yuhure wacũ tutua duhueyequinare ohõ saha yeitja: Tiquina yaquiro Cohãcjã ijietja. Sa ye tiquina pehe yuhu pohna ijietia. ⁸ Sa ijiepetã cueye, yeere duhueyequina, yuhure cahmeñequina, ña yuhduyere yeyequina, masare wejẽñequina, wana tiyequina, masare ujuayequina yero saha yeyequina yayia, “Cohãcjã ijire”, tiquina niñe

queoyere ño peoyequina, ijipihtiyequina ni mehoñequina pecapu wahaeta. Topu pajiri ma yero saha ijiri peca pajiri peca azufre mehna ujãno nine. Topu wahayequina pari turi tiquina yariaro saha wahaye nine, nidi yuhure.

Wahma maca Jerusalẽne yahuahye

⁹ Came ihcãquiro angel yuhu cahapu wihiri. Tiquiro siete pari cwoyequina, tiquiro buhiri dahre duti cõriquina angele mehna cjãno ijiri. Sa wihiro, ohõ saha nidi yuhure:

—Ihñagu ahtaya. Cordero tiquiro omoca duhtericorore ihñoutja muhure, nidi angel yuhure.

¹⁰ Sa yero Espõritu Santo yuhure Cohãcjã ya macare ihñori. Ohõ saha bajuro ihñori yuhure: Uhmuanu canu buiru yuhure ne mujari. Turu usã ijigã Jerusalẽne Cohãcjã ya macare quehnoari macare ihñori yuhure. Cohãcjã cahapu uhmuseꝑu ijiri maca dijia taro nidi ahri yehapu. ¹¹ Cohãcjã tiquiro asi siteye mehna asi siteri maca ijiri ti maca. Wapa tiye utã yero saha asi siteri. Jaspe wame tiye utã yero saha asi siteri. Sa yero vidrio yero saha quehnoano aco sitiri maca ijiri ti maca. ¹² Sa yero pajiri sahrõno uhmuari sahrõno tiquina sahrõ sãri maca ijiri ti maca. Doce sopecahari tiri ti sahrõno. Ti sopecaharipe cohteri angele. Ti maca cjẽ sope pahmaripu Israe masa cururi doce cururipe tiquina wame wahñari. ¹³ Asũ mija taro pehe ti sahrõno cuori ihtia sopecaha. Sur cũ pehe pehe ihtia sopecaha ijiri. Norte poto pehe ihtia sopecaha ijiri. Asũ sajãno pehe gãhure ihtia sopecaha ijiri. Ijipihtiro doce sopecahari waro cuori ti sahrõno. ¹⁴ Ti sahrõno doce utã paca bui pesari. Ti utã pacape Cordero cõrina doce tiquiro cõrina usãpe wame wahñari.

15 Sa yero angel yuhare yahuriquero queodũ uru mehna tiquina yedure cœori. Ti macare, ti maca cjê sopecaharire, sahrĩno gũhare queoro taro nidi. 16 Ti maca yoaro punota ehsaro gũhu to punota ehsari. Uhmũano gũhu to punota uhmũari. Sa yero angel queodũ mehna ti macare queori. Ti maca dos mil doscientos kilómetro yoari maca ijiri. To punota ehsari maca ijiri. To punota uhmũari maca ijiri. 17 Sa yero ti maca cjã sahrĩnore queori angel. Sesenta y cinco metro uhmũari sahrĩno ijiri. Masa mari queoro sahata queoro nidi tiquiro angel.

18 Ti sahrĩno jaspe wame tiye utã paca mehna tiquiro yeri sahrĩno ijiri. Sa yero ti maca pehe uru mehna tiquiro yeri maca ijiri. Ti uru wete marieñe ijero quehnoano asi siteri. 19 Ti sahrĩno docapũ ijiye utã pacapũre peye sijoro saha ijiye wapa tiye paca wahñari. Ti utã paca sahrĩnopũ pesaye paca doce paca ijiri. Iji muhtarĩa utãre jaspe wame tiye utã wahñari. Ti paca bato ijiria utãre zafiro wame tiye utã wahñari. Pũaria bato ijiria utãre ágata wame tiye utã wahñari. Ihtiarĩa bato ijiria utãre esmeralda wame tiye utã wahñari. 20 Pititiarĩa bato ijiria utãre ónice wame tiye utã wahñari. Ihcã omope paca bato ijiria utãre cornalina wame tiye utã wahñari. Seis paca bato ijiria utãre crisólito wame tiye utã wahñari. Siete paca bato ijiria utãre berilo wame tiye utã wahñari. Ocho paca bato ijiria utãre topacio wame tiye utã wahñari. Nueve paca bato ijiria utãre crisoprasa wame tiye utã wahñari. Diez paca bato ijiria utãre jacinto wame tiye utã wahñari. Once paca bato ijiria utãre amatista wame tiye utã wahña bato tiri.

21 Sa ye doce sope pahmari doce perla mehna tiquiro yeri pahmari

ijiri. Ti pahmaripe ihcã pje perla pje mehna tiquiro yeri pahmari ijiri. Sa yero ti maca cjã maha uru mehna tiquiro yeri maha ijiri. Ti uru wete marieñe uru ijiri. Sa yero quehnoano aco sitiri maha ijiri ti maha.

22 Ti macapũ Cohãcjũ wuhare ihñedũ. Mariedari. Ti macapũ ijip- ihtiropũ mari puhtorore Cohãcjũ tutua yuhduariquiore, Cordero gũhare ño peore masa. Sa yero ti maca ijipihtiro Cohãcjũ wuhũ yero saha ijiri. 23 Sa yero ti macapũ Cohãcjũ tiquiro asi siteye quehnoano buhriori. Cordero gũhu sihãria yero saha buhriori. Sa ye asũ deco cjũno gũhare ñami cjũno gũhare topũ tiquina buhriogũ cahmedari. 24 Sa ye ahri yehpapũ ti buhrioye mehna ijietã ijipihtiro cjẽna. Sa ye ijipihtiyeyehpari cjẽna puhtoã ti macapũ quehnoã yuhduayere tiquina cœoyere ne wihietã. 25 Sa ye decore ti maca cjẽ sopecahari pœori sopecahari ijietã. Topũre ne ñami marisi. Sa ye ti sopecaharire ne bihasi. Sa susuducurota. 26 Sa ye ahri yehpari cjẽna quehnoañene tiquina cœoyere ti macapũ ne wihietã. 27 Ñañe pehere ti macapũ ne ne wihisi. Bue tigũ yeyequina, ñañene yeyequina gũhu ti macapũ ne wahasi. Mehoñequina gũhu ne wahasi. Cordero tiquiro ojoari tjupũ tiquina wame wahñañequina dihita ti macapũ wahaeta. Ti tju tiquiro yuhduariquina tiquina wamene tiquiro ojoã ohõri tju ijire. Ti tjupũ tiquina wame wahñañequina sa ijiducueta.

22

1 Came quehnoari mare catigũ yeri mare ihñori yuhare angel. Ti ma quehnoano aco sitiri ma Cohãcjũ, Cordero gũhu tiquina dujiropũ ahtari ma ijiri. 2 Sa yero ti maca cjã maha deco buhñari ti ma. Ti ma pũã peheri duhtũ

cahapu catigū yeye cju ducuri. Ti cju asūripe dūca tiri. Ihcā cūhmare doce tahari dūca tiri. Sa ye ti cju cjē pūri mehna quehnoano aco tieta ahri yehpa cjēna. ³ Ti macare ne ñaṇe buhiri dahreati marisi. Ti macapu Cohācjū dujiro ijirota. Cordero dujiro gūhu ijirota topu. Sa ye ijipihtiyequina masa topu ijiyequina tiquina cahacjēna tiquina poto dusepe curi mehna quehe sa, tiquinare ño peoeta. Sa yero topu ñaṇe ne marisi. ⁴ Tiquina Cohācjūre ihña piti ca dujieta. Sa ye tiquina wūhdo pacapu tiquiuro wame wahñaṇequina ijieta. ⁵ Topure ñami ne marisi. Sa ye sihāṇe paca gūhure cahmesi topu ijiyequina. Asū buhriogū gūhure cahmesi. Mari puhtoro Cohācjū buhriorota. Sa ye ti macapu ijiyequina ape sie cjēna puhtoia ijiducueta.

Jesucristo ahri yehpapu tiquiuro tojoa tato mehenogā dūhsare

⁶ Came angel yūhure ohō saha nidi:

—Ijipihtiyeh ahri tiquina yahuri ijirota ijire. Sa ye tiquina ni-diro sahata wahaota. Mari puhtoro Cohācjū tiquiuro yere yahu mūhtariquinare masigū yeriquiro ijire. Tiquiro pehe yojopure tiquiuro yaquiuro angelre ohori tiquiuro cahacjēnare masigū yero taro. Came cjūnogā dūhse wahatire masigū yero taro tiquiuro yaquiuro angelre ohori, nidi angel yūhure.

⁷ Jesu pehe ohō saha nidi:

—Tūhoya mūsa. Mehenogā dūhsare yūhu tojoa tato. Ahri pū cjē yahuyere yūhdūcaeyequina bucueyequina ijieta, nidi Jesu.

⁸ Yūhu Ñu ahri ijipihtiyere yūhu ojoa nedire tūhou. Sa yegu tire ihñan. Sa yegu yūhu tūhori bato, yūhu ihñari bato yūhure ihñoriquiro angel poto dusepe curi mehna quehe sami. Tiquirore ño peogu

tūu nimi. ⁹ Yūhu sa yegū ihñano ohō saha nidi yūhure:

—Sa yeracāhña. Mūhu yero saha yūhu gūhu Cohācjū cahacjūta ijiaja. Mūhu acaye Cohācjū yere yahu mūhtariquina, ijipihtiyequina ahri pū cjē dutiyere yeyequina gūhu tiquina ijiro saha yūhu gūhu Cohācjū cahacjūta ijiaja. Sa yegu Cohācjū poto dusepe curi mehna quehe sa, tiquiuro pehere ño peoya, nidi angel yūhure.

¹⁰ Sa yero ohō saha ni yahu nemori yūhure:

—Ahri pūpu came dūhse wahatire yahure. Sa wahato mehenogā dūhsare. Sa mehenogā dūhsagū ahri pūpu yahurire nuodacāhña mūhu. ¹¹ Ti pje yūhu yahuri pjere ñaṇequina pehe sa yeducucūnahdo ñaṇene. Ŋabutiyequina gūhu ña yūhdūaro yeducucūnahdo. Quehnoañequina pehe quehnoano yeducuahro. Sa ye ñaṇe marieñequina gūhu ñaṇe marieñequina sa ijiducuahro ti pjere, nidi angel yūhure.

¹² Ohō saha nidi Jesu:

—Tūhoya mūsa. Mehenogā dūhsare yūhu tojoa tato. Mūsaare yeequinare yūhu ohoatire ne cāhtagu tūu niaja. Sa yegu quehnoañene mūsa yeri wapa mūsaare quehnoano yeitja. ¹³ Yūhu ijipihtiyere bajumehnedigū ijiaja. Sa yegu ijipihtiyere pihdigū yeacju ijiaja.

¹⁴ Ijipihtiyequina wete marieñe suhtire sañañequina tiquina ijiro saha tiquina ñaṇe yerire cosenohriquina ti macapu esaeta. Sa ye ti maca cjē cju catiyere ohoye cju dūcare ihyaeta. Sa ye bucueyequina ijieta tiquina, nidi Jesu. ¹⁵ Ti macapu eseyequina pehe ahriquina ijire: Ŋa yūhdūayequina, masare ujuayequina yero saha yeyequina yayia, wūana tiyequina, masare wejēñequina, “Cohācjū

ijire”, tiquina niñe queoyere ño peoyequina, ni meho peyayequina gāhñ ijire ti macapñ eseyequina.

¹⁶ Sa yero ohō saha ni yahu nemori Jesu:

—Yññ, Jesu, yaquiro angelre ohou mūsare yeequinare ahri pñ cñe yahugñ tññ. Pñhtoro Davi panami iji turiagñ ijaia yññ. Yññ bohrearia yero saha ijigñ ijaia, ni yahu nemori Jesu.

¹⁷ Espiritu Santo Jesure “Tojoa taya”, nine. Jesu yequina tiquiro omoca dñteaticoro yero saha ijieyequina gāhñ “Tojoa taya”, nine. Ijipihtieyequina tiquina “Tojoa taya”, nidire tñhoyequina gāhñ “Tojoa taya”, niahdo Jesure.

Aco wñoyequina acore tutuaro tiquina cahmeno saha Cohācjñ cahapñ waha duana Jesure tutuaro cahmeña. Tiquiro catigñ yeye aco yero saha ijire. Tiquirore cahmeñequinare ãhmūsepñ sa ijiducugñ yerota Cohācjñ. Tiquina esa tuharo ye dutiro marieno Jesu yedohoro mehna sa ijiducugñ yerota.

¹⁸ Yññ Ññ, ijipihtina ahri pñ cñe Cohācjñ yere tñhorinare

mūsare ohō saha ni cua pesaro mehna yahutja. Ahri buheye mehna apeye buheye mehna more yahu nemoñequina Cohācjñre yñhdñdcayē nine. Tiquina sa yñhdñdcagñ ihñano ijipihtieyē ahri pññ tiquiro buhiri dahreatire tiquiro yahuriro sahata cñnota tiquina gāhñre. Sa yero sata tiquina gāhñre buhiri dahrerota.

¹⁹ Sa ye ahri pñ cñe yahuyere yahu dñhayequina Cohācjñre yñhdñdcayequina ijire. Tiquina sa yñhdñdcagñ ihñano catigñ yeye cññ dñcare tiquinare ihya dutisi. Sa ye sa ijiducusi tiquina. Sa yero tiquiro ya macapñ quehnoari macapñ waha dutisi. Ti cññ, ti maca gāhñ ahri pññ tiquina yahuripñ ijire.

²⁰ Ijipihtieyē ahri pñ cñe yahuriquiro ohō saha nine:

—Sa tjire. Mehenogā dñhsare ahri yehpapñ yññ tojoa tato, nine tiquiro.

Sa tjiya. Ësā pñhto Jesu, tojoa taya.

²¹ Mari pñhtoro Jesu tiquiro yedohoro mehna ijipihtina mūsā quehnoano ijiya.